

श्रीस्वयम्भू महाचैत्य

SHREE SWAYAMBHU MAHA CHAITYA



श्रीस्वयम्भू महावैद्य

श्रीस्वयम्भू महाचैत्य

चवमि

हेमराज शाक्य

पिकाक

स्वयम्भू विकास मण्डल
स्वयम्भू, येँ ।

सफूया ब्याक्क अधिकार च्वमियाके

ने. सं. १०६८

स्वांयापुन्ही

न्हापां द्वःछिगू

छगूया मू २००१- निसः

देवःकिपा- श्रोचिनिकाजो ताम्रकार

थाकू:-

नेपाल प्रेस,

शुक्रपथ, येँ ।

Shree Swayambhu Maha Chaitya

Hem Raj Sakya

Swayambhu Vikas Mandal

Published by :-

The Swayambhu Vikas Mandal

Swayambhu, Kathmandu,
NEPAL.

लेखक, तथा प्रकाशकया अनुमति विना श्व ग्रन्थया छुं परिच्छेद
वा अंश गुगु भाषाय् अनुवाद याये दैमखु ।

All rights have been reserved by the author.
Any Chapter or any extract from this book
cannot reproduced and be translated into
any language without the written permission
from both the writer and the publisher.

Baisakh Full Moon Day

22nd May, 1978

First Edition 1000

Price: Rs. 200.00 N.C.

Printed at ;

The Nepal Press, Kathmandu

Phone : 11032

नेपाल भाषा

श्रस्विद्यम्भू महाचैत्य

1777

पुस्तकालय

प्रातस्मरणीय दिवंगत अबु श्री पुण्यराज व मां अष्टमायाया

पुण्यस्मृतिस

समर्पण



हेमराज शाक्य

22P

~~11/11/11~~

ਸਤਿਨਾਮੁ ਕਰਤਾ ਹਰਿ ਨਾਨਕੁ ਜੀਉ ਭਾਖੈ ॥ ਸਾਧਿਕਾਨਾ ਸਾਧਨਾ ॥

ਸਤਿਨਾਮੁ

ਨਾਮੁ

ਪ੍ਰਸਾਦਿ ਹਰਿਗੋਬਿੰਦੁ

१६२
नेपाळी

जिमिगु धापू

स्वयम्भू विकास मण्डलया नीन्यादँ बुन्हि (रजत जयन्ती) या लसताय् प्रसिद्ध लिपि विशेषज्ञ तथा अन्वेषक श्री हेमराज शाक्यया 'श्रीस्वयम्भू महाचैत्य' सफू थासाआखलं पितकाय् दयाः जिमित लय्ताः वइगु ला जु हे जुल, समस्त नेपाल भाषा भाषीपिनिगु निंति हे नं थ्व तःधंगु लय्ताःया खँ जुइ धइगु जिमित विश्वास दु ।

चमिया २२ नीनिदँ कुतः, लगन, अध्ययन व अन्वेषणं पिहांवःगु थुगु दुर्लभ विवरणं जाःगु 'श्रीस्वयम्भू महाचैत्य' बौद्धधर्म व बौद्धसंस्कृतिया लिस्सें स्वयम्भू महिमाया वृहत् अन्वेषणात्मक व ऐतिहासिक सफू नं खः । थौंया थुगु वैज्ञानिक युग्य् अति प्राचीनतां छायाप्युगु स्वयम्भू महाचैत्यया विस्तृत अध्ययन याइपिनिगु लागी थ्व अमूल्य सफुलि तःधंगु तुतांया लिधंसा बिइ धइगु भाःपिया ।

छेँ छखा दनेत गाक्क दां तूगु थ्व सफू नेपाल भाषाय् आःतक पिदंगु सफूत मध्यय् दकलय् तःधंगु व तपँगु सफू जक मजुसे बौद्धवाङ्मय, पुरातात्विक व अन्वेषणात्मक जगतय् तकं थ्व दकलय् महत्वपूर्णगु जुइ धइगु जिमित पुरा आशा व विश्वास दु । न्हापां नेपाल भाषां पिदंगु थ्व सफू भविष्यय् विदेशी भाषां नं अनुवाद यानाः पितकाय् फत धाःसा अन्तरराष्ट्रिय जगतय् स्वयम्भूया विशाल महत्व नगु थे' सदां थिका तय् फइ धइगु आशा काय्गु अप्पो जुइ थे' मताया । वरु थुकिइ सकसिगुं ग्वहाःलिया अपेक्षा याना ।

थ्व सफू पितकाय्त् निर्व्याजी रूपं माक्व दां त्याय् बिया. ग्वहाःलि यानादिइपि सर्वश्री साहु मणिहर्षज्योति कंसकार, श्री साहु सानुरत्न स्थापित, श्री साहु कुलवीरसिंह तुलाधर (दबल साहु), श्री साहु जगतधर तुलाधर, श्री साहु दीर्घमान (हिसिग्येंजे), श्री साहु भाइराजा तुलाधर व श्री साहु दिव्यरत्न तुलाधरपित जिमिगु यक्व यक्वं सुभाय् दु ।

ने. सं. १०६८, स्वांयापुन्हो

स्वयम्भू, येँ

स्वयम्भू विकास मण्डल

त्वमिया थःगु बिचाः

पौराणिक व अनुश्रुतिकथं

नेपाःया हृदयङ्गम स्थल काठमाण्डू उपत्यकायागु आदिकारण थ्व हे श्रीस्वयम्भू महाचैत्ययागु आत्मकथानिसें आरम्भ जूगु धाःसां अप्पो जुइमखु । समस्त एशिया महाद्वीपय् प्रस्थापित चैत्य व स्तूपत मध्यय् थःगु हे किसिमया विशेषता व महत्व दइच्चंगु सर्वप्राचीन श्रीस्वयम्भू महाचैत्य खः । थुकियात हे जीवित बौद्धसंस्कृतिया केन्द्र रूप्य मानय् यानावइच्चंगु खनेदु ।

धाय् कि- सत्ययुगय् नेपाल नागदहः जुयाच्चंगु इलय् वासुकी, कर्कोटक तक्षक एवं कुलीक आदि नभराजपिसं बास यानाच्चंगु स्थान जुल । थुकियात कालीहृद धकाः नं धाइ । थ्व विशालगु सुन्दर शान्तगु असंख्य पवित्र व रमणीय जूगुलि इलय्-व्यलय् थन अनेक बुद्ध, बोधिसत्व, ऋषिमुनि एवं देव, अप्सरा, गन्धर्व किन्नर आदि वयाः स्नान याय्त वइगु अगाद हृद जुयाच्वन ।

थुगु थासय् छन्हु बन्धुमति नगरं श्रीविपश्ची तथागत विज्यानाः जामाःचो पर्वतय् च्वनाः थुगु नागहृदया दृश्य अवलोकन यानाः अलौकिक पलेसकिपु बीजारोपन यानाथकल । उकि द्वःछिहः दइच्चंगु दिव्यकमलपुष्प उदय जुल । थ्व हे कमलपुष्पपाखे वसपोल श्रीस्वयम्भू ज्योतिरूप प्रकाश जूगु जुल । हानं थ्व हे ज्योतिरूपपाखे खनेदइच्चंगु पञ्चरश्मिपाखे क्रमशः वैरोचन, अक्षोभ्य, रत्नसम्भव, अमिताभ व अमोघसिद्धि तथागतपि खनेदइवल ।

थुगु किसिमं श्रीस्वयम्भू ज्योतिरूप प्रकट जूगु खँ सियाःलि अरुण नगरं श्रीशिखी तथागत विज्यानाः घेनाचो पर्वतय् च्वनाः श्रीस्वयम्भू ज्योतिरूप दर्शन यात । थ्वयां लिपा गुलिखय् समय वने धुंकाः अनुपम नगरं श्रीविश्वभू तथागत फूलचो पर्वतय् थ्यंकःविज्यात । थन हे च्वनाः श्रीस्वयम्भू ज्योतिरूप दर्शन यात । थ्वयां लिपा महाचीनं बोधिसत्व मञ्जुश्री विज्यानाः महामण्डप गिरि (नगरकोट)स थ्यंकःविज्यात । थन हे च्वनाः बोधिसत्व मञ्जुश्रीनं थ्व बिचाः यात कि श्रीस्वयम्भू ज्योतिरूप दर्शन पूजन याःवने ज्याछिकेत देवमनुष्यपिनिगु हितसुख निम्ति थ्व अथाह नागहृदया लः छ्वनेगु दृढ संकल्प यासे गोकर्ण, आर्यघाट, चोभाः व क्वदुवाःया पहाड तच्छ्यानाः लः छ्वनाःलि लः सुकय् यानाः देस निर्माण याय् धइगु । वास्तवय् थःह्यं गथे मतिइ तल अथे हे यानाविज्यात ।

अनंलि नागदहनय् वास यानाच्चर्वि वाकि दनिपि नागराजपित ल्वःगु किसिमं थाय् दय्काबिल । उगु थाय्थात तौदहः, धनादहः व द्वादशतीर्थ धइगु नामं प्रसिद्ध यानाबिल । थथे हे श्रीस्वयम्भू ज्योतिरूप उत्पन्न जूगु पलेसकिपु सिद्धवंगु थासय् जक धर्मोदया श्रीगुह्येश्वरी धइगु नां प्रसिद्ध जुल । थ्व हे श्रीस्वयम्भू ज्योतिरूपया प्रभावं बोधिसत्व मञ्जुश्रीनं उपयुक्त स्थान दय्काः मञ्जुपत्तन धइगु सहर वसाले यात । राजा विना देस व प्रजायःगु समुचित व्यवस्था जुइमखु धइगु महसूस यासे थः शिष्य धर्माकर धइहासित नेपाःया सर्वप्रथम राजा स्थापना यात । लिसेलिसें गुरु मञ्जुश्रीनं स्थानीय जनतातय्त ज्ञान-विज्ञान शिल्पकला आदि शिक्षा-दीक्षा विद्याः थुगु देसयात सम्भ्य एवं सुसंस्कृत यानाथकल । थ्व हे कारणं वसपोलयात स्थानीय जनतां थौतकं वागीश्वर विद्यापति धइगु नामं सम्बोधन यानावइच्वन । थ्वसपोलयागु गुणानुस्मरणय् भिक्षु गुणाकर, आचार्य शान्तिकरजुं स्वयम्भू डाँडाया लिउनेपाखे च्वंगु मञ्जुश्रीपर्वस्थानय् 'मञ्जुश्री स्मृति चैत्य' स्थापना यानाथकूपु थौतकं विद्यमान तिनि ।

बोधिसत्व मञ्जुश्रीयां लिपा श्रीस्वयम्भू ज्योतिरूप दर्शनया लागी क्षेमावती नगरं श्रीक्रकुच्छन्द तथागत विज्यानाः श्रीस्वयम्भू दर्शन यानाःलि वाक्द्वार सिफुचोय् विज्यानाः थः शिष्य गुणध्वज ब्राह्मण, अभयन्दद क्षेत्री प्रमुखं मेमेपित नं चूडाकर्म याय्त लः मदयाःलि वसपोलं थःगु मति चिन्तना यानाः वाक्द्वारा अधिष्ठान यानाः लः उत्पत्ति यानाबिल । थ्व हे कारणं थुगु थाय्थात वाक्द्वारं उत्पन्न जूगु वाग्मती धइगु तीर्थ संज्ञा जूगु जुल ।

क्रकुच्छन्द तथागतं लिपा शोभावती नगरं श्रीस्वयम्भू दर्शन निम्ति कनकमुनि तथागत विज्यात । अनंलि गुलिखय् समय लिपा वाराणसी सहरं काश्यप तथागत विज्यानाः श्रीस्वयम्भू दर्शन यानाः लिहांविज्यानाः श्रीस्वयम्भू ज्योतिरूपयागु विषय कयाः काशी सहरय् च्वनाः धर्म व्याख्यान यानाविज्यानाच्वन । उगु धर्मसभाय् गौड देसया जुजु प्रचण्डदेव नं दइच्वंगु जुयाच्वन । तर प्रचण्डदेव राजायात काश्यप तथागतयागु उपदेश न्यनाःलि वसपोल श्रीस्वयम्भू ज्योतिरूप दर्शन याय्गु अत्यन्त उत्सुक जुयाःलि स्वयम्भू क्षेत्रय् थ्यंकःवल ।

श्रीस्वयम्भू ज्योतिरूप दर्शन यानाः अत्यन्त प्रभावित जुल । अले व दूरदर्शी प्रचण्डदेव राजां थ्व मतिइ चिन्तना यात— कलिकालय् मनूतय्के लोभ पाप बढय् जुइ उबलय् थुगु ज्योतिरूप स्वयम्भूयात लापर्वाही याइ, अनास्था याइ धइगु मति अथे मजुइमा धइगु विवेकपूर्ण दृष्टि खंकाःलि श्रीस्वयम्भू ज्योतिरूपयात महान् चैत्याकार रूपय् परिणत याय्गु शुभसङ्कल्प यासे तत्समयय् श्रीस्वयम्भू मञ्जुश्रीया सेवाभक्ति यानाच्वंहा महाभिज्ञ गुणाकर भिक्षुया शिष्यत्व ग्रहण यानाः प्रचण्डदेव राजा शान्तश्री भिक्षु जूगु जुल । अनंलि श्रीस्वयम्भू महाचैत्य प्रतिष्ठाया लागी हानं आचार्याभिषेक कयाः भिक्षुपद त्वःताः शान्तिकराचार्य धाय्कल ।

शान्तश्री भिक्षुं लिपा शान्तिकराचार्य जुयाः श्रीस्वयम्भू महाचैत्ययात विधिवत् प्रतिष्ठा याय् धुँसें लि थ्वया ल्यूल्यू पञ्चतत्त्व पञ्चमहाभूतयागु प्रतिनिधित्व याइगु शान्तिपुर, वसुपुर, नागपुर, वायुपुर तथा अग्निपुर नं स्थापना यात । थुलि जक मखु षट्गति विशुद्धिता लागी षट् भैरव नं

अधिष्ठान यानाथकूंगु दु । थःगु सद्विच्छानुसार सम्पूर्ण ज्या सिधसेलि शान्तिकाचार्य शान्तिपुर गुफाय् दुने बिज्यानाः सदांया लागी चिन्तामणि मत च्याकाः आष्फानिक योग्य च्वनाः तपस्या याना- बिज्यानाच्वन ।

उबलसंनिसें श्रीस्वयम्भू ज्योतिरूप वास्तविक रूप दर्शन दुर्लभ जुयाः द्योने त्वपुयातःगु श्रीस्वयम्भू महाचैत्य जक दर्शन व पूजन याय्गु यानावइच्चंगु जुल ।

थुगु किसिमं सप्तबुद्धपिनिगु अनुक्रमकथं शाक्यमुनि बुद्ध बिज्यानाः श्रीस्वयम्भू महाचैत्य दर्शन यानाःलि पुलांस्यंगु गोपुच्छाग्र चैत्यया थासय् च्वनाः अनागत बुद्ध आर्यमैत्रेय बोधिसत्वयात श्रीस्वयम्भू ज्योतिरूपयागु महात्म्य धर्म व्याख्यान यानाबिज्याःगु खः । उकिं थुगु पर्वस्थानयात 'धर्मचक्र महाविहार' पुराणस्यंगु नामं सम्बोधन यानावइच्चन । शाक्यमुनि बुद्ध थनं लिहांबिज्यानाः नमुधा (नमःबुद्ध) दर्शन याःबिज्यात । थन हे च्वनाः थःगु पूर्वजन्म महासत्वयागु जातककथायात सत्य सावित यानाक्यंगु थाय् जुल ।

गोपुच्छाग्र पर्वतय् च्वनाः शाक्यमुनि बुद्ध स्वयम्भू विषयय् धर्म व्याख्यान यानाच्वंबलय् नं हारितीमहायक्षिणी उपस्थित जूगु खँ न्ह्यथनातःगु दु । थ्वय्कः हारितीं बुद्ध शाक्यमुनिया अग्रय् च्वनाः प्रार्थना याःगु दु- 'भो शास्ता ! जि थुगु स्वयम्भू क्षेत्रय् च्वनाः बुद्धशासन बुद्धविहार एवं श्रीस्वयम्भू महाचैत्ययागु नं सेवा चाकरी यानाच्वने, लिस्सें फिनिदँमदुनिपिं मस्तय्गु नं रक्षा यानाच्वने । हानं गन गन' बुद्धउत्सव जुइ अन अन जि बिचाःसंचाः यानाच्वने ।' थ्व हे कारणं श्रीस्वयम्भू महाचैत्यया धर्मपालिका स्वरूपं हारितीवज्रयक्षिणी बिज्याकातःगु खनेदु ।

स्वयम्भू ज्योतिरूपयां लिपा नेपाःया देवस्थल तीर्थोपतीर्थ उदय

आदिबुद्ध वसपोल श्रीस्वयम्भू ज्योतिरूप प्रादुर्भाव जुसेलि मां प्रज्ञापारमिता धर्मोदया गुह्येश्वरी उत्पन्न जुल । अले उगु श्रीस्वयम्भू ज्योतिरूपया पञ्चरश्मिपाखे वैरोचन, अक्षोभ्य, रत्नसम्भव, अमिताभ, अमोघसिद्धि पञ्चबुद्ध प्रकाश जूगु खनेदत । थ्व हे पञ्चबुद्धया शक्ति स्वरूप वज्रधात्वेश्वरी, लोचनी, मामकी, पाण्डूरा, तारा पञ्चतारा दइवल । अनंलि उपाय स्वरूप पञ्चबुद्ध व प्रज्ञास्वरूपी पञ्चतारापाखे पञ्चबोधिसत्व उत्पन्न जुल- समन्तभद्र, वज्रपाणि, रत्नपाणि, पद्मपाणि, खड्गपाणि । थुपि जिनपुत्रपि मध्यय् प्रधान बोधिसत्व पद्मपाणि आर्यावलोकितेश्वर जुल । पद्मपाणि- लोकेश्वरं लोकरक्षा निम्ति लोकसंसर्जन नाम समाधिइ च्वनाः थःगु शरीरं निम्नप्रकारं देवतापिं सृष्टि यानाबिज्यात । अले वसपोलया नां सृष्टिकर्तालोकेश्वर नाम विख्यात जूगु जुल-

१. कपालं- महादेव

२. मिखां- चन्द्रसूर्य

३. ब्वहलं- ब्रह्मा

४. नुगलं- नारायण

५. वाऊवलं- सरस्वती

६. ह्युतुं- वायुदेवता

७. त्यफुं- अग्निदेवता

८. प्वाथं- वरुणदेवता

९. पुलिं- लक्ष्मी

१०. पालिं- पृथ्वीदेवी

थ्व हे आदर्श अपनय यानाः येँय् आदिबुद्ध स्वयम्भूयात प्रधानता बियातः थेँ पशुपति क्षेत्र देवपत्तनय धर्मश्री प्रज्ञापारमिता गुह्येश्वरी अथे हे यल्य् अमिताभ पुत्र संघनायक श्रीकरुणामय आर्यावलोकितेश्वर प्रसिद्ध जुयाच्वन । उकिं हे ललितपुर महानगरया सर्वगुण सम्पन्न केन्द्रवर्ती यल लाय्कूया लुँक्यालय् वसपोल सृष्टिकर्ता लोकेश्वर तथाः सकसितं दर्शन बियातल । थ्व हे कारणं यलया मल्ल जुजुपिनिगु राष्ट्रिय मुद्राय् श्रीकरुणामय, श्रीलोकनाथ, श्रीलोकनाथ सहाय धकाः नाम अंकित जुयावइच्वंगु खनेदु । लोकनाथ करुणामययात सृष्टिकर्ता लोकेश्वर रूपय् मानय् यानावइच्वंगु प्रमाण १७ शदीया बुंगद्यःया विराट् रूप सृष्टिकर्ता लोकेश्वरयागु पौभाः छाउनीया राष्ट्रिय संग्रहालयय् प्रदर्शित यानातइतःगु दु । एवं येँ जनबहालय् छगू ल्वहंथामय् नेपाल भाषां पद्य रचना यानातःगु सृष्टिकर्ता लोकेश्वर स्तुति अंकित यानातइतल ।

स्वायम्भू पुराणया अनुक्रमकथं विचाः याय्वलय् थ्व खँ स्पष्ट सिइदु कि श्रीस्वयम्भू दर्शनार्थ बिज्याःपिं शिखी, विश्वभू, मञ्जुश्रीयां लिपा ऋकुच्छन्द तथागत बिज्यात । वसपोल ऋकुच्छन्द तथागतं थःलिसे ब्वनाहःपिं गुणध्वज ब्राह्मण, अभयन्दद क्षेत्री प्रमुखं न्ह्यसः शिष्यपित वाक्द्वार सिफुचो यंकाः चूडाकर्म यानाः प्रवर्जित याय् धुँसेलि मञ्जुश्रीकीर्ति मञ्जुपत्तन निरीक्षण याय्त बिज्याःबलय् श्लेष्मान्तक वन गुह्येश्वरी जंगलय् थ्यंवल्य् अन ब्रह्मा विष्णु महेश्वर मृग रूप जुयाः वनविहार यानाच्वंगु खन । थुपिं स्वह्म मृग रूपयात स्वयाः थःशिष्यपित परिचय ब्यूगु दु— कालान्तरय् थ्व मृग रूप महेश्वर पशुपति महादेवयागु विषयय् कयाः भविष्यवाणी यानाः महत्व प्रकाश यानाविल ।

थ्व हे श्रीस्वयम्भूया कारणं जामाःचो, घेनाचो, फूचो, सिफुचो अति पवित्र जुल । ऋकुच्छन्द तथागत बिज्यासेलिं तिनि वाग्मती, केशावती, प्रभावती, विष्णुमती उत्पन्न जुल । क्रमशः अष्टबोधि-सत्त्वया अंश मणिलिङ्गेश्वर मणिचूदहः, गोकर्णेश्वर गोकर्ण, कीलेश्वर सक्वचंगु, कुम्भेश्वर ववन्ति, गर्तेश्वर फणिकेश्वर फंफि, गन्धेश्वर चोभाः, विक्रमेश्वर होलचो इचंगु आदियागु प्रसिद्धि खनेदत । थ्वयां लिपा विस्तार विस्तारं पुण्यतीर्थ गोकर्ण, शान्ततीर्थ गुह्येश्वरी, शंकरतीर्थ शंखमूल, राजतीर्थ धंतिल, मनोरथतीर्थ खुसिख्यः, निर्मलतीर्थ भचाखुसि, निधानतीर्थ लखतीर्थ, ज्ञानतीर्थ करखुसि, चिन्तामणितीर्थ तेखुदोभान, प्रमोदतीर्थ दानिगाः, सुलक्षणतीर्थ भाजंगाः, जयतीर्थ न्येखुहोया महत्व खनेदइवल । थ्वया ल्यू ल्यू तारादहः, अगस्त्यदहः, तौदहः, मणिचूदहः, ववदुवाः आदि उपतीर्थत खनेदत । अथे हे द्वादशतीर्थया नापनार्प अष्टपोठस बास यानाच्वंपिं अष्टमातृका— ब्रह्मायणी, माहेश्वरी, कौमारी, वैष्णवी, वाराही, इन्द्रायणी, चामुण्डा, महालक्ष्मी जुल । थुपिं अष्टमातृकाया लिसेलिसे अष्टभैरव— असितांग, चण्ड, क्रोध, उन्मत्त, कपाल, रुरु, संहार, भीषण । थुपिं अष्टमातृका अष्टभैरव बास यानाच्वंगु अष्टश्मशान— चण्डोग्र, गह्वर, ज्वालाकुल, कलंक, अट्टहास, लक्ष्मीवन्त, घोराब्ध, कृकलास जुल । थ्व हे श्मशानस च्वंगु अष्टचैत्ययागु नां थथे बियातःगु दु— कायवज्र, वाकवज्र, चिन्तवज्र, रत्नवज्र, शान्तवज्र, संस्कारवज्र, विश्ववज्र, रागवज्र । थ्व हे श्मशानय् च्वनाः योगसाधन यानाच्वंपिं अष्टसिद्धपिं— कच्छपाद, शबरदाद, विरूपाक्षपाद, नागरिपाद, कृक्कूरिपाद, जालन्धरपाद, चर्पटिपाद, गोरक्षपाद ।

थुलि स्वयम्भू ज्योतिरूपां लिपा उदय जूगु देवदेवता, वीतराग, तीर्थोपतीर्थ श्मशान
पीठाधीश मातृकादि गण दइवःगु खँ जुल ।

स्वयम्भूयागु महत्व व भक्ति परम्परा

विशाल भारत व महान् देस चीनया दत्थुइ च्वंगु अत्युच्चगु च्वापुगुँया ववस्सं बास याना-
च्वंगु जम्बुद्वीपया मूलगु पुण्यभूमि सुन्दर शान्त विशालगु नेपाःदे खः । थ्व हे नेपाःदेया केन्द्रवर्ती
हृदयङ्गम स्थल प्यख्यरसं ततःजाःगु ऐतिहासिक वन जंगल पहाडं चाःहुलाच्वंगु काठमाण्डू
उपत्यकाया श्रीशोभा जुयाच्वंगु ज्योतिरूप श्रीस्वयम्भू महाचैत्य जुल । थुकियागु महिमा अपार व
अद्वितीय खः । स्वयम्भू महाचैत्ययागु दर्शन अनमोल व दुर्लभ खः । उकिं शिखी, विश्वभू, ऋकुच्छन्द,
कनकमुनि, काश्यप एवं शाक्यमुनि मौतम थे जाःहा मानव बुद्धपिसं थःथःगु पर्यायस सुन्दर
उपत्यकायागु सद्धर्मयात्राया सन्दर्भय् वसपोल श्रीस्वयम्भू महाचैत्य दर्शन व पूजन यानाः अनंलि
निर्वाण जुयावन । थ्व हे कारणं थौतकं थ्व श्रीस्वयम्भू महाचैत्य मानव सभ्यता व संस्कृतिया स्रोत
जुयाः नं अतिरिक्त जीवित बुद्ध धर्म संघया छगू ज्वलन्त उदाहरण व महान् दिव्य प्रतीक रूपय्
कीगु न्होने युगयुगनिसें साक्षि रूपय् सुप्रतिष्ठित जुयाच्वंगु जुल ।

फलस्वरूप 'स्वयम्भू' छगू विश्वय् नांदंगु तोर्थस्थल जुल । चीबाहाः, देगः व विहार, गुम्बा-
तय्गु उद्गम स्थल बने जुल । श्रावक, महायान, वज्रयानया छगू त्रिवेणी जुल । बौद्ध व हिन्दू
धर्मविलम्बोतय्गु निम्ति धार्मिक सहिष्णुताया छगू महान् पवित्रस्थान बने जुल । एवं सकसिगुं लागी
धार्मिक सामञ्जस्य निम्ति छगू ज्वलन्त उदाहरणया लागी छगू साक्षागु धर्मभूमि बने जुल । स्वयम्भू
थःगु पहःयागु विशुद्ध नेपाली शैलीयुक्त छगू प्रसिद्ध ऐतिहासिक स्मारक बने जुल । सृष्टिकालयागु
गर्भ दइच्वंगु अर्द्धगोलवृत्त छगू अनुपम चैत्य सिद्ध जुल, गुकिं यानाः मानव सभ्यता व संस्कृतिया
प्राचीनता अध्ययन व अनुसन्धान याइपि पुरातत्त्वान्वेषकतय्गु निम्ति आशाकेन्द्र बने जुल । गन
कि अनेक धार्मिक उत्सव रितिथिति गुठी न्यायकः वइगु छगू उत्सव केन्द्र जुल । एवं प्रकारं विभिन्न
इलय्-ब्यलय् प्राचीनकालनिसें विद्वान् आचार्य भिक्षुपिसं प्रशंसा यानावइच्वंगु धर्ममूलक भूमि बने
जुल । थुलि जक मखु स्वयम्भू शान्तिपुरी महाविहारय् नेपाःया बुद्धधर्म अध्ययनया लागी केन्द्रीय
स्थल जुयावने धुकूगुलि शिक्षामूलक भूमि नं जुल । विभिन्न देवदेवीपिनिगु अनगिन्ती मूर्तित जमघट
जुयाच्वंगु कलाकेन्द्र स्थान बने जुल । थन हे अनेक पुण्यकर्म व साधनादि योग भावनाय् च्वनेगु
तपोभूमि बने जुल । शान्ति व सुरक्षाया छगू आश्रमस्थान जुयाः नं दर्शन व चिन्तनया छगू मुहान
बने जुल ।

छगु शब्दं धाय्गु खः धइगु जूसा पूर्वीजगतया छगू खुला संग्रहालय बने जुल । सदा दर्शनीय
अखण्डज्योतिया छगू आलोक भूमि हे बने जुल ।

तर इतिहास साक्षि दु, स्वयम्भूया अस्तित्वय् सुनानं गनं आरोप पुरय् याय् फइमखु ।
वसपोलया दिव्यानुभावं थन बुद्ध धर्म संघया ज्योति च्याना हे च्वनी । थन हे महायान बुद्धधर्म

सदासर्वकालया लागी थिना हे चवनी ।

थुजाःगु गौरवमय अत्यन्त महत्वपूर्ण प्रसिद्धि प्राप्त अनुपम श्रीस्वयम्भू महाचैत्ययागु दर्शन स्पर्शन एवं चिन्तन तथा अध्ययनया लागी युगयुगानिसे देसदेसान्तरं विविध विद्वान्, आचार्य, भिक्षु एवं श्रद्धालु भक्तजनपि अतिथिगणपि वयावन । उपि मध्यय् गुलिसिनं थन हे अनेक धर्मकीर्ति तयाथकल, गुलिसिनं आजीवन थन हे वितय् यात । थ्व हे ऊवलय् वर्तमान मित्रराष्ट्रया शाही अतिथि महानुभाव राष्ट्रपति, उपराष्ट्रपति एवं मंत्रीगण, कूटनैतिक तथा विद्वान् पर्यटक आदिपिसं नं इलय्-ब्यलय् स्वयम्भू दर्शन व पूजन तथा निरीक्षण यासे उचित सन्मान यानावइच्चंगु सकसिनं सियाच्चंगु हे दु, खनाच्चंगु हे दु । थुगु थासं थुगु किसिमं परम्परागत विश्ववन्धुत्व स्थापना जुजुं वयाचवन । अज्ज थ्व थासं पुरातत्त्व इतिहास, धर्म, संस्कृति, कला विषयक अभिरुचि दुपि विद्वान्-पिनिगु लागी अध्ययन अनुसन्धानार्थं छगू सजीव संग्रहालय तुल्य जुयाच्चंगु दु ।

प्रसङ्गवस थन श्रीस्वयम्भू धर्मधातुयात स्तुति प्रशंसा यासे भक्ति यानावंपिनिगु नां निगू प्यंगू उदाहरणया लागी प्रस्तुत यानाचवना-

शिखी तथागतं

‘श्री धर्मधातु’ धइगु तुतः फूचो पर्वतय् चवनाः रचना यानाथकल-

ज्योतिरूप श्रीस्वयम्भू धर्मधातु करुणावतार छलपोल नागवासदहनय् पलेस्वान्तय् बिज्याःह्य क्लेश मदुह्य उपमा मदुह्य, आकाश समानह्य, अचिन्त्य गम्भीर जुयाबिज्याःह्य परमेश्वर छलपोलयागु महिमा अपार जि वर्णन याय्मफु, इ० ।

विश्वभू तथागतं

‘प्रणमामि स्वयम्भूवं’ धइगु स्तोत्र यासे थथे वर्णन याःगु दु-

आदिगुरु श्रीस्वयम्भू सम्पूर्ण पाप शान्त यानाबिज्याःह्य सृष्टिया आदिकारण गुणया उज्ज्वल तेज जुयाः पञ्चतत्त्वात्मक छलपोल जगत्उद्धार याय् कारणय् पलेस्वान् उत्पत्ति जुयाबिज्याःह्य, इ० ।

बोधिसत्व मञ्जुश्रीनं

‘त्रिजगति कतरद्वै’ नामक स्तुति यानाः थथे वर्णन याःगु दु-

थ्व स्वंगू भुवनय् गुजाःगु वस्तु अथवा तत्त्वमहत् थुगु थुगु धकाः जिमिसं निर्णय याय्मसः गुगु इच्छा याना उगु सम्पूर्ण थुकिइ दुने खनेदइचवनिइगु विश्व रूप धइगु, इ० ।

थुगु रूप ‘आदि द्वादशक’ धइगु स्तुति यानाः नं हानं थथे प्रशंसा याःगु खनेदु-

छलपोल स्वयम्भू धर्मधातु त्रिरत्न रूप पञ्चबुद्ध एवं प्रज्ञोपाय, उत्पत्ति स्थिति लय आदि

सचराचर सम्बृति परमार्थ सम्पूर्णयां स्वभाव जुयाः क्यनाबिज्यात अर्थात् गुह्येसित गुगु माल उगु
रूपं जुयाबिज्याःह्य विश्व रूपयात नमस्कार, इ० ।

क्रकुच्छन्द तथागतं

‘हिमालयाख्य पीठके’ धइगु स्तुति यानाः थथे धाःगु दु-

हिमालय धइगु पीठय् श्रीशोभावृद्धि निर्मित अनेक लोक बास यानाच्चंगु थासय् बिज्यानाः
श्रीस्वयम्भू धर्मधातु चिन्तामणि महारत्न समानं सत्त्वहित सुखया कारणय् अनेक वरदान बियाबिज्याःह्य
विश्वधर जगद्गुरु छलपोल, इ० ।

आचार्य शान्तिकरजु

‘स्वयम्भूदर्शन’ धइगु स्तुति यानाः थथे प्रशंसा याःगु दु-

चतुर्दिशा व दत्थुइ बिज्यानाच्चंह्य पञ्चज्ञानात्मक श्रीस्वयम्भू पञ्चबुद्धया ध्यान रूप वर्णन याना-
तइतःगु, इ० ।

शाक्यमुनि बुद्ध

‘वन्देहं तत्त्वरूपं’ धइगु स्तोत्र यानाः थथे वर्णन यानातःगु दु-

सर्वव्यापक तत्त्व रूप बुद्धपिनि नं आदिबुद्ध सम्यक्संबोधिया मूर्ति, त्रिगुण पञ्चज्ञानया कारण
स्फटिक मणि थे विविध रूप धारण यानाः विश्व रूप जुयाबिज्याःह्य छलपोलयागु ज्योतिरूपय्
तल्लीन जुइगु मतिइ तयाः मणिचूडया जन्मय् पारमिता समुद्र तरय् यानावया । छलपोलयात सकल
देव मनुष्यं अनेक विधि पूजा यात । तर, जि छलपोलयाके लीन जुइगु मतिइ तयाः सम्पूर्ण राज्यैश्वर्य
परित्याग यानावयाह्यस्यां छु चह्य याय् ? जि जन्मजन्मपति गुलि नं पुण्य सञ्चित यानागु दु,
थ्व सम्पूर्ण जिगु शरीर समेतं द्रव्यलपा जुल, इ० ।

विधिहरिहरशक्रपिसं

‘वन्देऽकनिष्ठा’ धइगु स्तोत्र ब्वनाः थथे धाःगु दु-

अकनिष्ठ भुवनया मालिक धर्मधातु महाज्योति रश्मिपाखे लोकधातु प्रकाश यानाबिज्याःह्य
श्रीस्वयम्भूयात जन्ममरण दुःखं छुटय् जुइमा धइगु कामना यासे पञ्चेन्द्रिय आदि त्हाः तुति सेवा
यानाः छःपिनिगु वस्तुलि छःपितसंतु पूजा याय्, परन्तु छःपि दर्शन प्राप्त जूगुलि जिमिगु जीवन
सफल जुल, इ० ।

चतुर्भङ्गराजपिसं

‘नमस्ते विश्वरूपं’ धइगु तुतः ब्वनाः थथे वर्णन याःगु दु-

जगत् उद्धार याय्गु कारण स्वरूप जुयाच्चंहा ज्योतिरूप श्रीस्वयम्भू विश्व रूप छःपि जिमिगु विवेकं खनाच्चनाकि बुद्ध बोधिसत्त्व व देव मनुष्य पङ्गति प्राणि एवं पञ्चभूत, त्रिगुण आदि समस्त विषय्य सृष्टि याय्गुलिइ सलर्थवान् जुयाः अचिन्त्य लोकधातुस सकल तेज खय्काः मूलबीज स्वरूप विश्वया तस्सकं थिइगु छप्वाः मत जुयाच्चंहा, इ० ।

क्षेमराज बोधिसत्त्व

‘जगत्कृते’ धइगु स्तुति यानाः थथे वर्णन याःगु दु-

आदि अन्त मदुहा छलपोलं जन्म जरा मृत्यु नाश यानाः द्वःछिहः दइच्चंगु दिव्यकमल पुष्प उत्पत्ति जूहा सकतां इच्छा जूगु बिइहा सहस्रसूर्य फिलाख चन्द्रमा समानं तेजरश्मि प्रकाश याना- बिज्याःहा सकल देवतापिसं वन्दना याकाच्चंहा अचिन्त्यगुणया तेज प्रकाश यानाबिज्याःहा सम्यक्संबोधि ज्ञानया मूर्ति छलपोल, इ० ।

सिद्धकणपाजु

‘पञ्चतथागत’ धइगु चचा हालाः गुणगान याःगु दु-

पञ्चबुद्धया दत्थुइ बिज्यानाच्चंहा श्रीसम्बर कालचक्र हेवज्र (अभ्यन्तरपाखे आदिबुद्ध) थवया छचालं बोधिसत्त्व एवं अष्टयोगिनी सहित जुयाः श्रीशोभा दइच्चंगु धइगु, इ० ।

आचार्य परमाद्यवज्र

‘विश्वसरोरुह’ नामक चचागीत हालाः थथे प्रशंसा याःगु दु-

विश्वसरोरुह नामक श्रीशोभा युक्तगु पलेस्वांया द्योनेच्चंगु चन्द्रमण्डल स्थित ॐकार बीजाक्षर- पाखे उत्पन्न जूहा सकल तथागतया नं प्राण स्वरूप छलपोल वागीश्वर श्रीधर्मधातुयात नमस्कार यानाःलि उकिइसंतु लीन जुइगु आसं चचा हालाच्चंगु, इ० ।

आचार्य सिद्धिवज्रजु

‘सहस्रदल’ नां जुयाच्चंगु चचागीत हालाः थथे वर्णन याःगु जुल-

आश्चर्यमय नानाकुसुम संयुक्तगु तःधंगु पुखुलिइ द्वःछिहः दइच्चंगु पलेस्वांया द्योने ज्योतिरूप पञ्चबुद्ध त्रिभुवनया धर्मस्वामि पुण्यक्षेत्र गोपुच्छगिरि स्वयम्भू पर्वतय् बिज्यानाच्चन । गुहासिनं समय,

द्विग, रूप, प्रसाद सिद्धि ज्ञान सृष्टि यांना: देवमनुष्यपिसं स्तुति याका: भक्तजन उद्धार यांना-
चवंह, इ० ।

आचार्य वाकवज्रजुं

‘नमामि २ जिनपञ्च’ धइगु चचा हाला: थथे वर्णन या:गु दु-

त्रिभुवनय् अनुत्तर धर्मस्वामि श्रीधर्मधातु वागीश्वरयात नमस्कार यायां धर्मश्री मित्र ज्ञानश्री
मित्र स्मरणया लिस्सें आचार्य बन्धुदत्त, जुजु नरेन्द्र मिलय् जुया: श्रीकापोतल (कामरू) पाखे
श्रीआर्यावलोकितेश्वर नेपालमण्डलय् हल धइगु संस्मरण नं उल्लेख यासे मे हालात:गु, इ० ।

कवीन्द्र प्रताप मल्लजुं

‘मञ्जुश्रीकृतरम्य भूमि’ नामक स्तोत्र यांना: थथे प्रशंसा या:गु दु-

युगभेदं पद्मगिरि, वज्रकूट, गोशृङ्ग, गोपुच्छगिरि नां जुयाचवंगु गुगु स्वयम्भू जंगलया सिद्धिया
खानि जुयाचवंगु न्हाइपुसे चवंगु सुन्दर स्वर हा:स: दइचवंगु थासय् विराजमान जुयाबिज्या:ह्य
छलपोल श्रीस्वयम्भू धर्मधातु-

‘बौद्ध, शैव, शाक्त, वैष्णव एवं सौर सम्प्रदायपिनि नं ‘दर्शन’ या कारण जुयाचवंह । हानं
व्याक्क कारणया नं कारण जुया: कारण मदय् धुंकूह्य जूसां कारणया रूप जुयाचवंह, इ० ।

शैव सौगत शाक्त वैष्णव सौर दर्शनकारणं ।

सर्वकारण कारणात्तक कारणात्मक रूपिणं ॥

स्वयम्भूप्रति विभिन्न विद्वान आचार्यपिनिगु आस्था

श्रीस्वयम्भू धर्मधातु वागीश्वरप्रति श्रद्धाभक्ति तथा: विभिन्न समयय् विभिन्न थासं विभिन्न
विद्वानपि वयावंगु इतिहासं कनाचवंगु दु-

वाराणसी सहरं व:ह्य महापण्डित भिक्षु धर्मश्री मित्रयात थन हे चवना: वागीश्वरमण्डलयागु
नामसंगीतियागु दीक्षा प्राप्त जुल । कपिलवस्तु ओडियानाचार्य विज्याना: स्वयम्भू दर्शन यांना:
फनकेश्वरी, गन्धेश्वरी, विक्रमेश्वरी चवना: योगसाधन यांना: अष्टसिद्धि प्राप्त यात । श्रीपर्वत
वज्रपर्वत आन्ध्र प्रदेशपाखे आचार्य नागार्जुन विज्याना: किनिदँतक स्वयम्भूया द्य:पा:ला: जुया:
नागार्जुन पर्वतय् चवना: महायान बुद्धधर्म प्रचार यांनावन । अथे हे गान्धार देसपाखे आचार्य
वसुबन्धु विज्याना: श्रीस्वयम्भू महाचैत्य दर्शन यात । अन्तय् थ्वसपोलया देहावसान नं थन हे जुल,
गुह्यसिगु स्मृतिचैत्य थन हे जंगलय् दु । अथे हे कनकावती नगरं रतिशर्मा ब्राह्मण वया: श्रीस्वयम्भू
दर्शन यांना:लि किमाण्डोल विहार दय्काथकल । वाराणसी सहरया सुनयश्री मित्र ब्राम्हण नं स्वयम्भू
दर्शन याय्त कपिलवस्तुया लं जुना: स्वयम्भू चैत्य दर्शन या:विज्यात । लिपा ल्हासा वना: अनं

लिहांवया यम्पि महाविहार दय्काः आजीवन थन हे वितय् यात । अथे हे शान्तरक्षित् स्वयम्भू दर्शन यांनाः थन हे शान्तिपुरी विहारय् च्वंपि विद्वान् आचार्यपिनाप सत्संगत यांनाः विद्याध्ययन यात । थ्वसपोल आचार्य शान्तरक्षित् सँदेस वन, हानं अनं लिहांवयाः स्वयम्भू दर्शन निम्ति विज्यानाच्चवंम्ह काश्मिरयाम्ह मन्त्रधर गुरु पद्मसम्भव व्वनाः शान्तरक्षित् हानं सँदेसय् थहांवन । थुगु हे प्रकारं विक्रमशील विद्यापीठया महापण्डित अतिशादीपङ्कर नं स्वयम्भूस थ्यंक विज्यात । अनं लिपा तिब्बतया धर्मस्वामि चाग्लोत्सवा, ह्लाङलोचवापि वयाः स्वयम्भूया शान्तिपुरी विहारय् गुरु रत्नरक्षित्याके विद्याध्ययन यात । सँदेसया नांदंम्ह श्यामारपा लामाजु वयाः स्वयम्भूयात सुवर्णतोरण द्वहलपा थकल । एवरीतं विद्वान् आचार्य दोर्जेछेवाङनोर्बु, ऋग्पा थाम्चे ख्येन्पा मेघसर्वज्ञ लामाजु, वीररत्न लामाजु, पाल्देन् येशेताशि लामा, भुटानया देवाधर्मा लामा, छिखाछेया महापण्डित शाक्यभद्र, सिक्किमया ताशिनामग्याल, दुक्पाया शेरावदोर्जे लामाजु, काथोरिम्पोछे लामाजु एवं खाम देसया शाक्यश्री लामाया सुपुत्र सिदा लामा, ल्हादेन् लामा तथा ल्हासाया धर्मस्वामि ळ्वाङ्चे छ्वेजे रिम्पोछे, थिरमुचि थिन्छेन्-डावानोर्बु लामाजु, छिरिङनोर्बु लामाजु आदि श्रीस्वयम्भू महाचैत्य जीर्णोद्धार सम्बन्धी ज्याखँय् नियुक्ति जुयावपि जुल । हानं ग्याञ्ची धइगु थासं क्यान्छ्या लामाजु नं खाम देसया गोङ्गु धइगु थासंनिसें दण्डवत् यायां श्रीस्वयम्भू दर्शन याःविज्याःगु जुल ।

थुगु किसिमं विभिन्न थासं विभिन्न विद्वान् सिद्ध योगि, आचार्यपिसं श्रीस्वयम्भूयागु गुणगौरव म्हसिङ्काः अनेक स्वागतस्त्कार यांनाः सेवाभक्ति यानावन धाःसा स्वयम्भू क्षेत्र नेपाःयापि स्थानीय विद्वान्, आचार्य भिक्षुपिसं सेवा भावभक्ति यानावंगु इतिहासं कनामच्चंगु मखु ।

स्वयम्भूप्रति राजकीय आस्था

भारताधिपति सम्राट् अशोकया सम्बोधि यात्राया ऊबल्य बुद्धजन्मस्थल लुम्बिनी, कनकमुनि बुद्ध स्तूप निग्लीहवा दर्शन व पूजन याय् धुंकाःलि हानं श्रीस्वयम्भू महाचैत्य दर्शनार्थ थःगुरु उपगुप्त भिक्षुलिसें थःकलाः तिष्यरक्षिता, म्हचाय् चारुमती सहित जुसे थन विज्यानाः पञ्चबुद्धात्मक श्रीस्वयम्भू महाचैत्य दर्शन व पूजन याःगु जुल । गुकिया ज्वलन्त प्रमाण यल सहर दय्काः अशोकपत्तन नां तयाः थन हे पञ्चस्तूप न्यागः थूर दय्काथकूगु थौतकं कीगु न्ह्योने दनि । थ्व पञ्चबुद्धया प्रतिनिधिकथं दय्कूगु धाइ । थ्वसपोल अशोकं मेमेगु चिचीगःगु चैत्यत नं स्थापना यानाथकल, गुकियात कीसं थौतकं अशोकचैत्य नामं सम्बोधन यानावयाच्वना । थ्व हे अशोकचैत्ययागु आदर्श अपनय् यांनाः लिच्छवी कालय् नं आपालं चैत्यत पुनर्माण यानाथकूगु दु ।

लिच्छवी जुजु वृषदेवं शान्तशील भिक्षुयागु उपदेश व शिक्षा-दीक्षा कयाःलि थः नं बौद्ध जुयाः श्रीस्वयम्भू महाचैत्य अति जीर्ण जुयाच्वंगु दुरावस्था खनाः पुनर्निर्माण यानाविल । थ्व हे जुजु वृषदेवया काय् शङ्करदेवं थन हे च्वंगु विहार निम्ति अक्षयदान-स्वरूप जग्गा प्रदान यानावन । हानं

शङ्करदेवया काय् धर्मदेवं नं थ्व हे स्वयम्भूइ धर्मशाला दय्काथकल । अथे हे धर्मदेवया काय् ऐतिहासिक प्रथम मानदेव राजा श्रीस्वयम्भू महाचैत्ययात छत्र इलां समर्पण यानाथकल । महासामन्त थकुरी जुजु अंशुवर्मा स्वयम्भू स्थित श्रीसेगु विहारया लागी खर्च नियत यानाः गुठी तयावंगु जुल । थवयां लिपा बुद्ध अंकित कमरपेटि चिनातइहा लिच्छवी जुजु नरेन्द्रदेवं स्वयम्भूप्रति उत्तिकं श्रद्धा तयाः बुंगद्यःयागु रथया दकल्य-सकल्य चव्य धकिवाय्मोल्य स्वयम्भू भगवान् बिज्याकाः न्हू स्थिति वन्देज यानाथकल । उगु थितिरिति आःतकं चल्य जूनि । चीनया बादशाह हेन धइहास्यां राजदूत वाङ्महोएनचेयात स्वयम्भूयात काषायवस्त्र उपहार चह्ल्य याके छव्याहःगु इतिहासं कया-वइचवन । इमि थ गु ताङ्गवंशया इतिहास्य नं स्वयम्भूया चर्चा अंकित याके ब्यूगु खँ नं न्ह्यथनातल । एवंक्रमं सुदूर पश्चिम नेपाःया शासक जुजु जितारि मल्ल, रिपु मल्लपिसं नं श्रीस्वयम्भूयागु उत्तिकं सम्मान यानावन । हानं काठमाण्डू उपत्यकाय् दुनेचवंपि मल्ल जुजु जयस्थिति मल्लं थःगु प्रशस्तिइ स्वयम्भू वरलब्ध प्रसाद विजयी जूहा धकाः चव्यावन । थ्वय्कःया महामन्त्री मदनरामसिंह बर्द्धनं नं स्वयम्भूयागु जीर्णोद्धार यानाथकल । अथे हे राजा ज्योतिर्मल्ल, लक्ष्मीनरसिंह मल्ल, पार्थिवेन्द्र मल्ल, भाष्कर मल्ल, जयप्रकाश मल्लं नं जीर्णोद्धार कार्यय् भाग काःगु दु । लिसेलिसें राजा शिवसिंह मल्लं श्रीस्वयम्भूयात सुवर्णछत्र चह्ल्य यात, एवं राजा लक्ष्मीनरसिंहं सुवर्णविमान, कवीन्द्र जयप्रताप मल्लं विशाल सुवर्णमय वज्र, धर्मधातु मण्डल तथा लुंगज् द्वहलपावन । एवंक्रमं जय नृपेन्द्र मल्लं लँ दय्के निम्ति सहयोग प्रदान यात । थ्व हे ऊवल्य योगनरेन्द्र मल्लं दिव्यघण्ट तयाथकल । जयप्रकाश व जयरणजित् मल्लपिसं पद्य रचना यानाः स्वयम्भूया सेवा यानावन । थुगु हे किसिमं स्वयम्भूया सेवाया लागी राजा महाराजापिसं जक मखु रानी महारानीपिसं नं सेवा यानाथकूगु उल्लेख खनेदु- लालमती-देवी, अनन्तप्रियादेवी, भुवनलक्ष्मी एवं लक्ष्मीदिव्येश्वरी । लिसेलिसें शाहकाल्य नं श्री ५ पृथ्वी-नारायण शाहदेव, गीर्वाणयुद्धविक्रम व सुरेन्द्रविक्रमपिसं नं स्वयम्भू जीर्णोद्धार कार्यय् भाग काःगु दु । वर्तमान सरकार विकासप्रेमी श्री ५ महाराजाधिराज वीरेन्द्रवीरविक्रम शाहदेवजुं नं स्वयम्भू शान्तिपुरी भित्तीचित्र निरीक्षण यानाः समुचित कदर यासे जीर्णोद्धार याके ब्यूगु नं सर्वविदित जू ।

स्थानीय बौद्धसंस्कृतिइ स्वयम्भूया देन

नेपाःया सम्पूर्ण बौद्धविहार तीर्थ, गुम्बा एवं लाछि, ननि, चुक, गल्लि व पर्वत पर्वतय् प्रस्थापित चैत्यया विकासक्रम हे वसपोल श्रीस्वयम्भू महाचैत्ययागु अनुरूप खः । हानं बौद्धसंस्कार जन्मनिसें चूडाकर्म, विवाह, दीक्षा तथा मृत्युसंस्कार व श्राद्धकर्म आदि विधिविधानय् तक नं पञ्चज्ञान पञ्चबुद्धात्मक श्रीस्वयम्भूयात परिलक्षित यासे विशेष स्थान प्रदान यानावइचवंगु खनेदु । थुलि जक मखु अज्ज नेपाःमि बौद्धतय्गु रितिथिति कुत्तुकुलाः दुहांवनाः स्वत धाःसा चिभिभि काय्योसा दुहांदुहां वा धयातःगु थे श्रीस्वयम्भू ज्योतिरूप प्रभाश्वर धर्मकाययागु ज्ञान, ध्यान सुलाचवंगु खनेदइ । उदाहरणया लागी प्रसङ्गवस निगू प्यंगू खँ पाठकपिनिगु न्होने प्रस्तुत यानाचवना-

की नेपाःमि बौद्धतय्सं छुं ततःधंगु धर्मकर्म याइबल्य थःथःपिनिगु छेँया मूलुखाफुसय्
 पञ्चबुद्ध अंकित यानाः चाचि च्वकेगु चलन दु । थ्व खः उच्चकोटि दर्शनया प्रतिनिधित्व यानाच्चपि
 पञ्चकुलया अधिष्ठातृ देवता श्रीस्वयम्भू पञ्चबुद्धयात दुहांवक्वपति पिहांवक्वपति धया थे' छ्यं
 व्वच्छुनाः वन्दना यानाः स्वागत्सत्कार यानावइच्चंगु, लिस्से' नेपाःमि बौद्धतय्गु निम्ति आश्रयस्थान
 शरणस्थान धकाः भावना याकावइच्चंगु जुल । थुकिं स्पष्ट जू नेपाःमि बौद्धत पञ्चबुद्धया उपासकत
 खः धइगु । अज्ज वास्तु निर्माण विधिअनुसार छेँ दनिइबल्य छेँ प्रतिष्ठा याइबल्य छेँयात
 स्थिरोभव वाक्य ब्वनाः न्यंकेमाः, गुगु स्थिरोभव वाक्यय् छेँया दकलय्-सकलय् च्वय्च्चंगु थैमायात
 वैरोचन तथागतयागु संज्ञा बियातल । व थे' पञ्चऊयाःयात पञ्चबुद्ध । कीसं मचावल्य सर्वप्रथम
 विद्यारम्भ याय्त न्हापालाक हे ग्वहल्य वसपोल श्रीस्वयम्भू धर्मधातु वागीश्वरयात लुमंकाः
 'ॐ नमोवागीश्वराय' धकाः ब्वनावयाच्चना, सय्कावयाच्चना । थ्व परम्परागत न्हापांनिसे' छ्यला-
 वयाच्चना । नेपाःमि बौद्धतय्सं वसपोल श्रीस्वयम्भू धर्मधातु वागीश्वरयात गुबले' लोमंके फइमखु ।
 अज्ज कीसं थ्व नं धयावयाच्चना- चिकुलां निभाल्य च्वनेवल्य छुं जुयाः निभाः मत्वल्कि स्यंगुद्यः
 श्रीस्वयम्भूयागु नामोच्चारण यानाः प्रकृतियात धम्कि बियाच्चना- 'हुं कन धाःसा तो तो थन धाःसा
 मतो मतो, त्वय् ला मत्वय् ला स्यंगुद्यःया पालि निपा भाःगि ।' थुकिं सिइदु, ज्ञानविज्ञान छुं मस्युनिपि
 मस्तय्सं हे स्यंगुद्यःयागु नां काय्वं श्रीसूर्य प्रकाश जुइ, निभाः त्वइ, सुपांय् चिलावनी धइगु आत्म-
 विश्वास यानावइच्चन तिनि । नेपाःया बौद्ध परम्परानुसार वदे छुइगु, पय्थः लुइगु, नायो लुइगु,
 थपा त्वय्गु व सम्यक्, नरां, पञ्जरां आदि जुइगु लस्ताय् भव्य न्याय्किइबल्य नं थासंछः धकाः
 चीबाहाःद्यः न्ह्योने तयाः भव्य नय्गु यानावइच्चंगु नं खनेमदुगु मखु । हानं दीक्षा थे' जाःगु रहस्य
 क्रिया जुइबल्य नं सप्ताभिषेक, दशाभिषेक व चतुर्दशाभिषेक थे' जाःगु अनुत्तरयोगतन्त्र अनुसार
 विधि जुइबल्य पञ्चबुद्ध चिन्होंकित मुकूटाभिषेक विइगु यानावइच्चंगु खनेदु । थुलि जक मखु
 गुरु वज्राचार्यपिसं षोदशलास्या कयाः पूजा याइबल्य यज्ञ होमया पूर्णाहूति आदि जुइबल्य
 पञ्चबुद्ध मुकूटं पुयाः पञ्चबुद्धयात इलय्-व्यलय् थासंथासय् उच्चकोटि स्थान बियाः
 सन्मान यानावइच्चंगु खनेदु । सूत्रतन्त्रपाखे नं असंख्य तःधनाच्चंगु त्रिकालबुद्धपिसं प्रशंसा
 यानातःगु कोगु विहारविहारय् ब्वनावइच्चंगु नामसंगीति नं आखिरय् थ्व हे पञ्चबुद्धया
 ज्ञान पञ्चज्ञान संग्रहया रूप्य मान्य यानावइच्चंगु धाय्फु । थ्व हे कारणं जुइफु स्वयम्भू धर्मधातु
 वागीश्वर व आर्यनामसंगीति निह्यं छह्य खः धइगु चीबाहाः चीबाहालय् धर्मधातु वागीश्वरया
 मूर्ति तयाः क्यनातःगुलि स्पष्ट जू । अज्ज धात्थे' धाय् धाःसा क्रियातन्त्र, चर्यातन्त्र योगतन्त्र व
 अनुत्तरतन्त्रपाखे' पिज्वःपि वाह्य गुह्य अभ्यन्तरया देवदेवतापिसं नं धारण यानाच्चंगु पञ्चभूषण
 चन्दी, कुण्डल, कण्ठी, रोचक, मेखलाया अर्थ विशुद्धि विचाः यानास्वत धाःसा नं थ्व हे पञ्चबुद्धया
 पञ्चज्ञानया प्रतीकात्मक रूप खः धकाः तन्त्रय् उल्लेख यानातःगु खनेदु । हानं कीसं भावना यानाः
 पूजा यानावयाच्चनापि विभिन्न देवदेवतापि नं थ्व हे पञ्चबुद्धया कुलपाखे' पिहांवयाच्चपि खः धकाः
 वर्णन यानातल । उदाहरणया लागी-

वैरोचनया कुलं उत्पन्न जूषि-

उष्णीषविजय, नामसंगीति, मारिची, सितातपत्रा, महासाहस्र प्रमर्दनी, वज्रवाराही, ग्रहमातृका परमाश्ववज्र, योगाम्बर, कालचक्र, प्रज्ञापारमिता, महाप्रत्यंगिरा, नैरात्मा, वज्रयोगिनी, इ० ।

अक्षोभ्यया कुलं उत्पन्न जूषि-

चण्डमहारोषण, हेरुक, बुद्धकपाल, सम्बर, महामाया, हयग्रीव, यमारि, अचल, विघ्नान्तक, वज्रहूँकार, भूतडामर, वज्रज्वालानलार्क, त्रैलोक्यविजय, वज्रधर, वज्रसत्त्व, इ० ।

रत्नसम्भवया कुलं उत्पन्न जूषि-

वसुन्धरा, जम्बल, महाप्रतिसरा, रत्नडाकिनो रत्नवीरमहाकाल, प्रसन्नतारा, इ० ।

अमिताभया कुलं उत्पन्न जूषि-

अवलोकितेश्वर (पद्मपाणि), महाबल, पद्मिनीतारा, सप्तशक्तिक, हयग्रीव, कुरूकुल्ला, भृकुटी, महाशीतवती, इ० ।

अमोघसिद्धिया कुलं उत्पन्न जूषि-

वज्रामृत, खडिरवतीतारा, महाश्रीतारा, वश्यतारा, सिततारा, आर्यतारा, पर्णशवरी, महामायूरी, इ० ।

थुलि जक मखु फीसं गुलि नं अनेक देवदेवताया नामं जात्रा उत्सव नखःचखः न्याय्कावइच्चना उकिइ मध्यय्सं तःधनाच्चंगु अति भव्यगु महत्वपूर्णगु लस्करं ह्वाःगु अमिताभपुत्र श्रीआर्यावलोकितेश्वर करुणामय बुंगद्यःयागु रथजात्रा मानय् यानावइच्चना । थुगु रथया नं दकलय्-सकलय् चवय् वसपोल स्यंगुद्यः स्वयम्भू विज्याकातल । थुकि प्रमाणित याःगु दु- श्रीस्वयम्भू आदिवुद्ध गुलितक तःधं धइगु । लिसेलिसे नेपाःयागु बुद्धधर्मय् असंख्य महत्वपूर्णगु बौद्धजगतय् दुर्लभगु द्वादशवर्षीय महादान गुठी सम्यक् न्याय्किइबलय् तक नं उगु समारोहय् सुइस्वकोटि देवतापिनि चवय् श्रीस्वयम्भू स्यंगु भगवान् विज्याकाः सर्वोपरी स्थान प्रदान यानावइच्चन । थ्व थिति नं थ्व हे श्रीस्वयम्भू महाचैत्यया छत्रच्छायाय् चवनाः हे न्याय्कावइच्चंगु खनेदु । थुगु किसिमं स्वयम्भू चैत्ययागु महत्वप्रति ध्यान आकषित यासे श्रद्धापूर्वक सुवर्णचैत्यया प्रमाणं लखलख त्याख धकाः लुचिद्यः (चैत्य) थाकेगु यानावइच्चन । हानं बाहाःपूजा वनिइबलय् नं सर्वप्रथम श्रीस्वयम्भू महाचैत्यनिसे आरम्भ याय्गु यानावइच्चंगु जुल ।

वसपोल श्रीस्वयम्भू भगवान् बौद्धतय्गु निमित्त जक महत्वपूर्ण मजुसे नेपाःमि शैवमार्गीपिसं न उत्तिकं सन्मान यानावइच्चंगु खनेदु— देवदेवमहादेव श्रीपशुपतिनाथं विरूपाक्षयागु क्रूरतां वचय् जुइत मुखोष्टमि खुनुया दिनय् पञ्चबुद्धात्मक स्वयम्भू अंकित मुखलं पुयाः स्वयम्भूया सन्मान यानावइच्चंगु खँ इतिहासं कनावइच्चंगु दु । थुलि जक मखु भुइजःसि नारायणद्यःया मुकूटय् नं अक्षोभ्य बुद्ध अंकित यानातःगु दु धयातल । उकिं बुद्धनीलकण्ठनारायणया अपभ्रंस बुद्धनीलकण्ठ जूवंगु धकाः धाइ । खनं खः थ्व सुन्दर शान्त भव्य मूर्ति बौद्ध, शैव, वैष्णव स्वंगू सम्प्रदाय एकीकरण यानातइतःगु थ्व नेपाली संस्कृतिया थःगु हे विशेषता खः । थ्व हे आदर्श अपनय् यानाः सिद्धिनरसिंह मल्ल जुजुं थःगु लाय्कूया न्ह्योने दय्केव्यूगु कृष्णमन्दिरय् नं उजाःगु हे किसिमं जुयाच्चंगु दु । कृष्ण मूर्तिया च्वस्सं शिवलिङ्ग स्थापना यानातल । थ्वया नं च्वस्सं अवलोकितेश्वर अंकित चैत्य तयातल । वर्तमान थुगु मूर्ति अपहरण जुइ धुकल । थुलि जक मखु यलया लाय्कुलिइ च्वगु लुँछयालय् नं अमिताभ बुद्धपुत्र पद्मपाणि सृष्टिकर्तालोकेश्वर अंकित यानाः उचित सन्मान यानावइच्चन । गुलि नं बाहाः वहो कचावाहाः दय्कातल, उगु विहारया क्वाःपा.द्यः गन्धुरी देवताया न्ह्योने पञ्चबुद्धात्मक स्वयम्भू चैत्यया विकासक्रमया रूप्य निर्माण जूगु छगू नं छगू किसिमया चैत्य बाहाःबहीया केन्द्रवर्तीस्थानय् प्रतिष्ठा यासे परम्परागत भावभक्ति यानावइच्चन थ्व स्वयम्भूयागु प्रभाव धाःसां अत्युक्ति जुइमखु । हानं थ्व हे विहार विहारया छत्रंकूजु आजु आजुपिसं नं व हे पञ्चबुद्धांकित आजुतपुलि पुयाः नेपाःया प्राचीन बौद्धसंघया इज्जत तयावइच्चंगु जुल ।

उपर्युक्त विविध रितिथिति चालचालन अध्ययन यानास्वयंबल्य् नेपाःमितय्सं स्वयम्भूयात सर्वश्रेष्ठ स्थान बियाः उचित सन्मान यानावइच्चंगु खनेदु ।

स्वयम्भू धर्मधातु ज्ञान—उच्चकोटि बौद्धदर्शन

प्रागैतिहासिक इलंनिसें नेपाःया बुद्धधर्मय् दकल्य्-सकल्य् न्हापां आदिबुद्ध श्रीस्वयम्भू धर्मधातु वागीश्वर पञ्चबुद्धयागु परस्परा न्ह्योने च्वंवइ । गुलि नं नेपाःमि बौद्धतय्गु जनजीवन, कला धर्म, दर्शन, रितिथितिइ दुहांवनाः स्वयंबल्य् पञ्चबुद्धात्मक स्वयम्भूयागु ज्ञान तत्त्व दर्शन सुलाच्चंगु खनेदइ । खनं खः नेपाःया श्रद्धेय पूर्वाचार्यपिसं छयलाथकूगु क्यनाथकूगु श्रावकचर्या, महायानचर्या व वज्रयानचर्या आदिसं कुत्तुकुलाः वात्तुवालाः स्वयंबल्य् वसपोल श्रीस्वयम्भू धर्मधातुया त्रिगुण पञ्चज्ञान निरञ्जन निराकार चित्त चैतन्यया स्वभाव जुयाच्चंगु प्रभाश्वर धर्मकाय न्ह्योने तय्ज याःवइ, साक्षात्कार जूवइ । थ्व हे खँयात ध्यान आकर्षित यानाः श्रद्धेय की पूर्वाचार्यपिसं स्वायम्भू पुराणय् आदिबुद्धयागु परिकल्पना थथे उल्लेख यानातःगु खनेदु—

प्रभाश्वरात्महाशून्यं तस्माच्चोपाय सम्भवः ।

तस्मादुत्पादिता प्रज्ञा प्रज्ञया त्रिगुणास्तथा ॥

बुद्धधर्मया उच्चकोटि दर्शन 'प्रभाश्वर धर्मकाय' पाखे अचिन्त्य प्राणिपिनिगु हितसुख शान्ति

निर्मित उपाय स्वरूप बोधिचित्त महाकरुणापाखे वसपोल आदिबुद्ध उत्पन्न जुल । व हे आदिबुद्धपाखे प्रज्ञारूपी धर्म खनेदत, हानं व हे प्रज्ञापाखे त्रिगुणात्मक तत्त्व त्रिरत्नालोक पुण्यकीर्ति उदय जूगु जुल ।

थ्व हे विषय कयाः स्वायम्भू पुराणादि ग्रन्थय् स्वयम्भूया ज्ञानयात थथे वर्णन यानातल-

रत्नत्रयालयं नैर्वाणिकं सकलसर्वज्ञ लीनं
प्रज्ञोपायात्मकं पञ्चज्ञानाकृति धर्मधातुं ।
पञ्चबुद्धाधिष्ठानं मध्यपङ्कज कर्णिकायां
वैरोचनाधिष्ठित

त्रिरत्न बुद्ध धर्म संघया छे जुयाच्वंगु निर्वाण वनिइपि सकल सर्वज्ञ तथागतपि लीन जुइगु स्थान जुयाच्वंगु प्रज्ञोपायया आत्मा पञ्चज्ञान स्वरूपगु धर्मधातुस पञ्चबुद्ध अधिष्ठान यानातइतःगु अलौकिक दिव्यकमल पुष्पपाखे उत्पन्न जुयाविज्याःपि वैरोचनादि अक्षोभ्य, रत्नसम्भव, अमिताभ, अमोघसिद्धि ।

थ्व हे विषय कयाः थथे नं धयातःगु दु-

वन्देहं तत्त्वरूपं ततविततभवं भव्यहव्य स्वभावं
बुद्धानामादिबुद्धं कृतविविधहितं तेजसांसंनिधानं ।
सम्यक्संबोधिमूर्ति त्रिगुणविलसितं ज्ञामपंचैक हेतुं
नैराकारं निरञ्जं गगनवदनिशं चित्तचैतन्य चैत्यम् ।

सकंभनं व्याप्त जुयाच्वंगु कल्याण रूपगु भव्यहव्य स्वभावगु तत्त्व रूप बुद्धपिनि नं आदिबुद्ध छलपोल अनेक प्रकारं हितसुख शान्ति निर्मित तेजया खानि जुयाच्वंह्य सम्यक्संबोधिज्ञानया मूर्ति छलपोल त्रिगुणय् विलास यानाच्वंह्य पञ्चज्ञानया कारण स्वरूप जुयाच्वंह्य छलपोल छुं विकार मदुगु परिशुद्धगु आकाश थे सर्वत्र व्याप्त एवं शान्त गम्भीर स्वरूप जुयाच्वंह्य चित्तचैतन्य स्वरूप छलपोल श्रीस्वयम्भू महाचैत्ययात वन्दना धकाः बुद्धं नमस्कार यानावन ।

थुगु स्वयम्भूयागु स्तुति वन्दनापाखे स्पष्ट सिइदु कि वसपोलयागु गरिमा महिमा अपार अनन्त सर्वत्र व्याप्त । उकि हे थुगु प्रभाश्वर शून्यतामहाज्ञानयात कयाः तन्त्रवज्रयानया आचार्यपिसं उत्पत्तिक्रम व निष्पत्तिक्रमया भावानाय् च्वनाः देवदेवतापि आराधना याइवल्य् सर्वप्रथम ध्यान याय् न्ह्यो निम्नलिखित स्वभाव शुद्धगाथा व्वनाः जक अनेक प्रकारया साधनादि पूजाया विधिविधान शुरु याइ-

स्वभावशुद्धः सर्वक्षमाणां स्वभावशुद्धोहं ।

शून्यताज्ञान वज्र स्वभावात्मकोहं ॥

थुकि प्रमाणित याःगु दु- नेपाःया बुद्धधर्मय् वसपोल श्रीस्वयम्भू धर्मधातु वागीश्वरयागु आदर्श गुण ज्ञानप्रति पौराणिक अनुश्रुति एवं ऐतिहासिक वर्णनानुक्रमं जक महत्वपूर्ण मजुसे परन्तु सैद्धान्तिक दार्शनिक दृष्टिकथं नं उतिकं हे महत्वपूर्ण जूगुलि यानाः अद्यापि नेपाःया बुद्धधर्मय् परम्परानिसे

अद्वितीय स्थान प्रदान यानावइच्चंगु खनेदु । थ्व नेपाःया बुद्धधर्मं थःगु हे विशेषता खः, गौरव खः ।

थ्व हे आदिबुद्धयागु विषय सूत्र तन्त्र अध्ययन व अनुसन्धान यानास्वयंबल्य वाह्य गुह्य अभ्यन्तरया दृष्टिकथं आदिबुद्धयागु स्वरूप नं न्यागु हे किसिमं परिकल्पना यानातःगु खनेदु-

- १) प्रथम आदिबुद्ध स्वयम्भू ज्योतिरूप
- २) द्वितीय आदिबुद्ध समन्तभद्र तथागत
- ३) तृतीय आदिबुद्ध वज्रधर तथागत
- ४) चतुर्थ आदिबुद्ध वज्रसत्त्व तथागत
- ५) पञ्चम आदिबुद्ध धर्मधातु वागीश्वर

कीगु धर्म, संस्कृति व इतिहास्य वसपोल स्वयम्भूयात 'आदिबुद्ध ज्योतिरूप स्वयम्भू धर्मधातु वागीश्वर' धकाः नाम प्रसिद्ध यानातःगु दु । तर थुगु नां ऊवात्त स्वयंबल्य छगु थे च्वंसां थुकिइ वांलाक बिचाः याय्वन्य कार्यकारणवस न्यागु हे किसिमं नां फरक जुयाच्चंगु खनेदु-

१) आदिबुद्ध	आदिबुद्ध	शून्यनिरञ्जन शुद्ध शान्त
२) स्वयम्भू	समन्तभद्र	बोधिचित्त महाकरुणा
३) ज्योतिरूप	वज्रधर	प्रभाश्वर धर्मकाय
४) धर्मधातु	वज्रसत्त्व	विशुद्धता परिपूर्णता
५) वागीश्वर	महामञ्जुश्री	अनुत्तरबोधि सर्वज्ञज्ञान

(नामसंगीति)

वसपोल स्वयम्भू अनादिकालनिसें शून्यनिरञ्जन स्वभावतः शुद्ध शान्त जुयाच्चंगु दकल्य-सकल्य न्हापालाक दुहा जूया निम्ति 'आदिबुद्ध' धाल ।

थ्वसपोल आदिबुद्ध प्रभाश्वर धर्मकायपाखे ज्योतिस्वरूप जुयाः दर्शन व्यूहा जूया निम्ति 'ज्योतिरूप' स्वयम्भू धाय्गु चलन जुल ।

थुगु ज्योतिरूप स्वयम्भू सुनानं दय्काः दुहा मखु, थःतिथःह्य स्वयं प्रकाश जूहा जुया कारण्य 'स्वयम्भू' धकाः धयावयाच्चंगु खः ।

थ्व हे स्वयम्भू ज्योतिर्मय तत्त्व प्रभाश्वरपाखे धर्मधातु महामण्डल स्वरूप दर्शन व्यूगु जुया स्वयम्भूयात 'धर्मधातु' धकाः नं धाल । थ्व हे कारणं स्वयम्भूया अग्र्य धर्मधातुमण्डल तयातःगु धाइ ।

थ्व हे धर्मधातुमण्डलय पञ्चबुद्ध न्याहा छहा जुयाः ज्ञानकाय वागीश्वर महामञ्जुश्रीया रूप दर्शन बिल । थ्वसपोलयात मेगु अर्थ्य 'आर्य नामसंगीति' धकाः नं धाइ । व हे नामसंगीतिइ 'पञ्चतथागत स्तुति ज्ञानगाथा पञ्च' धयातःगुलि थ्व खँयात प्रमाणित यानाव्यूगु दु ।

युगु प्रकारं अचित्त्य प्राणिपिनिगु हितसुख शान्ति निम्ति कार्यकारण भेदं आदिबुद्ध स्वयम्भू न्यागु किसिमं थःगु स्वरूप धारण यानाक्यंगु धाय्माल । थ्व हे पञ्चज्ञान स्वरूप वसपोलयात 'आदिबुद्ध ज्योतिरूप स्वयम्भू धर्मधातु वागीश्वर' धकाः धाय्गु यानावइच्चंगु खनेदु ।

उपर्युक्त नामानुसार कार्यकारण सिद्ध जुयाच्चंगु गुगु स्थान खः उगु थासय् साक्षात् गुरु वज्रधरया अंश जुयाच्चंगु शान्तिकराचार्यजुं श्रीस्वयम्भू महाचैत्याकार रूपय् परिणत यानाः सदाया लागि सुरक्षित यानाव्यूगु जुल ।

प्रथम आदिबुद्धयागु संज्ञा स्वायम्भू पुराणय् उल्लेख यानातल । द्वितीय चतुर्थ आदिबुद्धया नां गुणकारण्डव्यूहय् च्वयातल । अथे हे तृतीय आदिबुद्धया नां आदिबुद्धमहायोग तन्त्रय् उल्लेख जुयाच्चन । एवंप्रकारं पञ्चम आदिबुद्धया नां मायाजालतन्त्र नामसंगीतिया टीकाय् वर्णन यानातःगु दु ।

उकि थ्व हे कारणय् स्वयम्भू पर्वस्थानय् च्वंगु अभिलेखय् थासंथासय् वसपोल आदिबुद्ध स्वयम्भूयात 'श्रीस्वयम्भू धर्मधातु वागीश्वर' धकाः नाम अंकित यानावइच्चंगु जुल ।

अज्ज थ्व हे प्रभाश्वर विषय कयाः आचार्य प्रज्ञाकरमतिजुं बोधिचर्यावितारया टीकाय् बांलाक स्पष्ट रूपं च्वयाथकूगु दु-

आदिशुद्ध ह्यनुत्पन्ना प्रकृत्यैव सुनिर्वृता ।

यथाबोधिस्तथा ह्येषा शान्ता शुद्धाः प्रभाश्वराः ॥

आदिनिसें शुद्ध जुयाच्चंगु उत्पत्ति मदुगु स्वभावतः बांलाक भिन्नकं छुं विकार मदयाच्चंगु छुं याय्मवाःलाच्चंगु व हे वास्तविक बोधि खः, शान्त खः, शुद्ध खः, गुगु अवस्था ख. उकियात हे प्रभाश्वर धर्मकाय धाइ । थुकियात हे की श्रद्धेय पूर्वाचार्यपिसं 'ज्योतिरूप स्वयम्भू' धकाः वर्णन यानावइच्चंगु खनेदु ।

अज्ज थ्वसपोल स्वयम्भू धर्मधातुया ज्ञान अनागत बुद्ध मैत्रेय बोधिसत्त्वं प्रकाश याइतिनि धइगु विषय नेपाःमि बौद्धतय्गु थुजाःगु धारणा दु-

शाक्यमुनि बुद्ध मैत्रि बोधिसत्त्वयागु अनुरोधकथं गोपुच्छपर्वस्थानय् च्वनाः स्वयम्भू धर्मधातुयागु ज्ञान प्रकाश यानाबिज्यात । उकियागु संस्मरणकथं सद्धर्ममूलक परमतत्त्व ज्ञानमूलक सम्यक्संबोधि मूर्ति अतुलनीय महान् दिव्यप्रतीक श्रीस्वयम्भू चैत्ययात थःगु शिरय् धारण यानाः सन्मान यानावइच्चंगु खः । धयागुया मतलब थ्व खः कि हानं वसपोल मैत्रेय बोधिसत्त्व नेपाः विज्यानाःलि श्रीस्वयम्भू महाचैत्ययागु गुणधर्म निश्चय नं प्रकाश याय्त विज्याइ । थ्व हे कारणं मैत्रेय बोधिसत्त्वया शिरय् चैत्य अंकित यानावयाच्चंगु खनेदु ।

स्वयम्भू महाचैत्यया सांकेतिक अर्थ विशुद्धी

श्रीस्वयम्भू महाचैत्यया नां काय्वं, लुमनेवं अथवा खनेवं गिरिवर साह्येगु शिखर

गोपुच्छपर्वतयु विराजमान जुयाच्वंगु शान्त गम्भीरगु भयगु थःगु हे किसिमगु स्तुपाकृति महाचैत्य फोगु न्ह्योने ऊवाताहां दनाच्वंगु खनेदइ ।

स्वयम्भू महाचैत्ययागु तालमान लक्षण बनौत छनौत थःगु हे किसिमं थःगु हे स्वरूपं थद्वाभक्ति कल्कय् जुइगु किसिमं अति भव्य रूपं दय्कातइतःगु खनेदु ।

थुकिइ ऊवात्त स्वयंबल्य वृत्ताकार वेदिका चाकलाःगु गोलूगु फः तयाः उकिइ छचालं गणावर्तमण्डल स्वरूपं स्वयम्भू सम्बन्धी कथा नाप ज्वरय् जूगु विभिन्न मूर्ति व चैत्य अंकित यानाः शोभावृद्धि यानातःगु दु । थ्वया द्योने धान्यराश्याकृति पात्राकृति लसि वय्क आकाश थें गुमोज लुइक गर्भगृह चीबाहाःगो दय्कातल । थ्व हे चीबाहाः गोलय् प्यंगु दिशा व प्यकुनय् पञ्चबुद्ध व चतुर्ताराया लुंसिया धातुया मूर्तित शान्तदान्तपूर्वक च्वनाच्वंगु दु । थ्व हे गर्भगृहया च्वस्सं चौकुलांया प्यख्यरसं विशाल नेत्र अंकित यासे न्हातिकाय् रश्मि प्रस्फुरण चिन्ह गभष्टिमाला तयाः शोभायमान यानातल । थ्व हे चौकुलांया फुसय्लाक प्यख्यरसं पञ्चकुलया चिन्ह व मूर्तित सहित यानाः तोरणाकृति रूपय् हलपौ तयातल । थ्वया च्वस्सं छत्रयुक्त गजू व प्यकुनय् प्यंगः ग्वलध्वज आकाशध्वज वय्कातल । हानं चौकुलांया कानेस लिसेलिसे रञ्जना लिपि सर्वसुगत हृदय धारणी छत्राःख्यरं अंकित यानाः नं किङ्किजालया लिपि घानाः बांलाका तल । थुगु चौकुलांया दत्थुइ मूढन्य भागय् फिस्वतं तगिं तगिं लूगु त्रयोदश चक्रावली तयातःगु दु । थ्व हे चक्रावली फोचाय्वं अम्बलाकृति पद्म तयाः उकिइसं द्योने उष्णीषचूडामणि च्वलामू तइतल । अले थ्व हे त्रयोदश चक्रावलीयात ल्वःगु किसिमं बांलाक छांत वंक कल्डरयुक्त तप्पाःगु सुवर्णमय छत्रं कुइकाः अतीव श्रीशोभावृद्धि यानातःगु जुल ।

ऊवात्त स्वयंबल्य फोसं खनाच्वनागु श्रीस्वयम्भू महाचैत्यया वर्तमान स्वरूप साधारणतया वर्णन थथे जूसां थुकिइ प्रातःस्मरणीय आचार्यपिसं उपरोक्त सांकेतिक चिन्हया छगू छगूया अर्थ विशुद्धी महत्व दर्शय् यानाः क्यनातइतःगु खनेदु-

श्रीस्वयम्भू महाचैत्ययागु त्रिवेदिका हे त्रिधातु कामधातु, रूपधातु, आरूप्यधातुया प्रतीक । उकिइ द्योने च्वंगु पद्माकृति हे विषयजञ्जाल क्लेश पापं अलिप्तगु अर्थ । स्वयम्भूया दोम हे त्रिकालया सकल बुद्धपिनिगु ज्ञानराशि ज्ञानभण्डार स्वरूप । उकिइ छचालं च्वंपि पञ्चबुद्ध हे पञ्चमहाभूतमय भौतिक संसारय् बास यानाच्वंपि पञ्चस्कन्धया आत्मा जुयाच्वंपि प्राणिपिनिगु चित्तवृत्ति पञ्चविष परिशुद्ध यानाः पञ्चज्ञानया शिक्षा-दीक्षा बियाः पञ्चबुद्धात्मक स्वयम्भू धर्मधातु ज्ञानया माध्यमद्वारा महामोक्ष प्राप्त याकेत तत्पर जुयाच्वंपि । व हे पञ्चबुद्धपिनि शक्ति स्वरूप च्वना-च्वंपि लोचनी, मामकी, पाण्डूरा एवं आर्यतारा तर वज्रधात्वेश्वरीया मूर्ति जक थन क्यनातःगु मदु । अले थ्व हे चीबाहाःगोया च्वस्सं प्यख्यरसं मिखा कंकातःगु दु- थ्व खः भवसंसारय् च्वनाच्वंपि प्राणिपिनिगु हितसुख शान्ति निम्ति शून्यतामहाकरुणा प्रज्ञोपायया दृष्टि अवलोकन यानाः सतर्क व जागृत जुयाः स्वयाच्वंगु । मेगु अर्थय् पञ्चज्ञानवक्षुं स्वयाच्वंगु । थुगु मिखाया दत्थुइ च्वंगु प्रश्नचिन्ह थें जाःगु गुगु चिन्ह अंकित यानातःगु खः उकियात तथागतपि समाधिइ च्वनिइबल्य जक

प्रकाश जुडगु खनेदइगु छगु किसिमया दिव्यरश्मि धाइ । थुगु चिन्हयात गभण्टि मालारश्मि धकाः नं धयातल । थ्वया च्वस्सं च्वंगु तोरणाकृति रूप्य तइतःगु हलिपौया प्रतीक पञ्चबुद्धया पञ्चकुलया चिन्ह- चक्र, वज्र, रत्न, पद्म व विश्ववज्र तयातःगु जुल ।

- १) वैरोचनया चक्रकुलया चिन्ह दत्थुइ चक्रावली तयातल ।
- २) अक्षोभ्यया वज्रकुलया चिन्ह पूर्वय् वज्र अंकित यानातल ।
- ३) रत्नसम्भवया रत्नकुलया चिन्ह दक्षिणय् रत्न तयातल ।
- ४) अमिताभया पद्मकुलया चिन्ह पश्चिमय् पद्म चिन्ह तयातल ।
- ५) अमोघसिद्धिया कर्मकुलया चिन्ह उत्तरय् विश्ववज्र अंकित यानातल ।

थ्वया च्वस्सं च्वंगु त्रयोदशचक्रावली त्रयोदश भूमिइच्चंपित धर्मचक्र प्रवर्तन यानाच्चंगु धइगु अर्थ व खास यानाः अनुत्तरसम्यक्संवोधिज्ञान प्राप्ति निम्ति क्रमशः शिक्षा-दीक्षा लाभ यानावनेगु योग भूमि समाधि भूमि रूप्य मानय् यानावइच्चंगु जुल ।

त्रयोदश भूमिनां थथे खः-

- १) प्रमुदिता २) विमला ३) प्रभाकरी ४) अर्च्चिष्मती ५) सुदूर्जया ६) अभिमुखी ७) दुरङ्गमा ८) अचला ९) साधुमती १०) धर्ममेघा ११) समन्तप्रभा १२) निरूपमा १३) ज्ञानवती वज्रभूमि ।

आचार्यक्रियासंग्रहालयय् नं चैत्यया अर्थ विशुद्धी विषय कयाः छगु छगुया अंगप्रत्यंग एवं नाप साइज परिमाणया नं दिव्यभावना अंकित यानाः थथे वर्णन यानातइतःगु खनेदु-

सुइनिगु तालमानया प्रमाणं मिलय् यानाः वेदिका (फ) तयागुलिइ सुइनिता लक्षणं पुरय् जूगु महापुरुष लक्षण विशुद्धी धयातल । अथे हे थ्व हे फःया जाः किनिगु तालमानया प्रमाणं मिलय् यानागुलि द्वादशाङ्क प्रतीत्यसमुत्पाद ज्ञान विशुद्धी मानय् यानातल । पात्राकृति अथवा धान्यराश्याकृति रूप्य चीबाहाःया गो दय्कागुलि दशवल व अष्टादशावेणिका बुद्धधर्म संयुक्तगु धइगु अर्थ । अथे हे पिखाद्वार खुलय् यानागुया मतलब चतुरार्यसत्यज्ञान देशना यानाच्चंगु धइगु भावना । द्वारया च्वस्सं तोरण तयागुया अर्थ खः चतुर्ध्यान संयुक्तगु चतुष्कोण युक्त यानागुया चतुर्वैशारद्य पुरय् जूगु विशुद्धी धयातल । फःया निम्नभाग चतुर्द्विपाद जुल । निगूगु तहःया फः जक चतुस्सम्यक्प्रहाण धयातल । थुगु रूपं छत्र तःगुया अर्थ विशुद्धी जक सर्वाकारजता ज्ञान परिपूर्णगु संकेत यानातल । एवंप्रकारं ध्वजया अर्थय् अलोभात्मिक चित्तविमुक्ति ज्ञान दर्शन धइगु संज्ञा बियातल । पताकाया मतलब विशुद्ध निर्मल यशकीर्ति फिजय् जुयाच्चंगु धयाच्वन । थुगु प्रकारं चैत्यया दकलय्-सकलय् च्वय्च्चंगु सर्वबुद्धमहामुकूट उष्णीष चूडामणिना अर्थय् अनुत्तरमहाकरुणा विशुद्धी धकाः प्रशंसा यानावइच्चंगु जुल ।

स्वयम्भू पुराण व प्रस्तुत ग्रन्थ संबन्धी

श्रीस्वयम्भू धर्मधातु वागीश्वर प्रादुर्भाव जुसेलि गन गुवलय् छु जुल, सुनां छु छु सेवाभाव

भक्ति यात धइगु विषय कयाः माःथाय् माःगुकथं स्वयम्भू पुराणय् विस्तारं उल्लेख जुयाचवंगु दु ।
अथे दय्क दय्क नं थुगु ग्रन्थ छाय् चवल धकाः धाय्फु । तर स्वयम्भू पुराण पौराणिक धंगं थःगु हे
तालं न्हापा न्हापायागु ईव्यःयात ल्वःगु किसिमं श्रद्धा भक्ति प्वकेगुकथं चवयावंगु जुल ।

स्वयम्भू पुराणय् खास यानाः नेपालमण्डलय् कालीहृद जुयाचवंगु विपश्ची तथागत
बिज्यानाः पलेसकिपु पिनाथकुगुलिइ अकस्मात् द्वःछिहः दइचवंगु दिव्यकमलपुष्पं श्रीस्वयम्भू ज्योति
प्रकाश जुल । व हे ज्योतिरूप स्वयम्भूपाखें पञ्चबुद्ध दर्शन बिल धइगु निसें शुरु यानाः क्रमशः
शिखी, विश्वभू, ऋकुच्छन्द, कनकमुनि, काश्यप बुद्धपि बिज्यानाः स्वयम्भू दर्शन यानावन । उकिइ
बिचय् बिचय् मञ्जुश्री, गगनगञ्ज, समन्तभद्र, क्षितिगर्भ, पद्मपाणि आर्यावलोकितेश्वर आदि मैत्रेय
बोधिसत्व व वज्रपादपण्डित, ओदियानाचार्य, धर्मश्री मित्र बिज्यानावंगु खँ चवयाःलि अन्तय् शाक्यमुनि
बुद्ध बिज्याय् धुंकाः निसःदँ लिपा भिक्षु उपगुप्तलिसे अशोक महाराज बिज्यानावंगु घटनाक्रम
तक स्वयम्भू पुराणय् चर्चा यानातल । लिसेलिसें अष्टवीतराग, तीर्थोपतीर्थ, मातृकादि पीठ, ग्राम
आदि दयावंगु कारण नं निर्देशन यानाः क्यनातःगु दु । अज्ज शान्तिकराचार्य वयाःलि स्वयम्भू
ज्योतिरूपयात चैत्याकार रूपय् परिणत यानाव्युगु खँ उल्लेख याय् धुंकाः हानं थुगु स्वयम्भू
महाचैत्य सेवा भावभक्ति यानागुया पुण्यानुशंसा एवं भविष्यत्कालय् जुइगु खँत समेत चवयाबिल ।
लिस्सें स्वयम्भू पुराण सद्धर्मग्रन्थयात आदर सत्कार यानागुया प्रशंसा तक नं चवयाः ग्रन्थ समाप्ति
यानातःगु खनेदु ।

आःतकयागु अनुसन्धानकथं स्वयम्भू पुराण प्यंगु किसिमया उपलब्ध जूगु खनेदु-

- | | |
|--------------------|-------------------------|
| १) स्वयम्भू पुराण | २) बृहत्स्वयम्भू पुराण |
| ३) स्वायम्भू पुराण | ४) बृहत्स्वायम्भू पुराण |

बृहत्स्वयम्भू पुराणय् निम्नप्रकारं अध्याय चवयातःगु दु-

- १) श्रीधर्मधातु कालीहृद समुत्पन्न कथा
- २) स्वयम्भूचैत्य भट्टारकोद्देश पूजाफल वर्णन
- ३) स्वयम्भूचैत्य भट्टारकोद्देश छन्दोत्पाद
- ४) स्वयम्भूचैत्य भट्टारकोद्देश ग्रामादि समुद्भूत
- ५) स्वयम्भूचैत्य भट्टारकोद्देश तीर्थोपतीर्थ पीठञ्च निरूपण गुणवर्णन
- ६) स्वयम्भूचैत्य भट्टारकोद्देश धर्मधातुवागीश्वर प्रवर्तन
- ७) स्वयम्भूचैत्य भट्टारकोद्देश धर्मधातुवागीश्वर गुप्तीकरण
- ८) स्वयम्भूचैत्य भट्टारकोद्देश महाप्रभाव वर्णन

स्वायम्भू पुराणय् निम्नप्रकारं अध्याय चवयातःगु जुल-

- १) ज्योतिरूपस्वयम्भू समुत्पन्न स्वयम्भूमहात्म्यवर्णन
- २) धनादहह गोपुच्छ गुह्यदेवी प्रकाश मञ्जुचैत्य निर्णित
- ३) ऋकुत्सदाभिगमन भिक्षुचर्याचरण वाग्मती केशावती प्रभव

- ४) मणिचूड तडागादि मकारदशसंभव
- ५) वीतराग समुत्पत्तिकथन
- ६) पुण्यतीर्थादि द्वादशतीर्थ वर्णन
- ७) उपतीर्थ मातृकापीठ श्मशान वर्णन
- ८) श्रीधर्मधातु वागीश्वर मण्डलाभिधान प्रवर्तन
- ९) प्रचण्डदेव भिक्षुचर्या ज्योतिरूप गुप्तीकरण
- १०) नागसाधन दुर्भिक्षादि शान्तिकर वर्णन
- ११) पूजाफल वर्णन

स्वयम्भू पुराण, बृहत्स्वयम्भू पुराण एवं स्वायम्भू पुराण थुगु स्वंगू ग्रन्थयस् श्रीज्योतिरूप स्वयम्भू धर्मधातुयागु प्रभावं विस्तारं नेपाल विकास जुयावःगु खँ वर्णन यानातइतःगु जुल । तर बृहत्स्वायम्भू पुराण स्वयम्बल्य आदिबुद्ध ज्योतिरूप श्रीस्वयम्भूपाखे संसार हे उत्पत्ति जूगु खँ वर्णन यानातःगु खनेदु-

- | | |
|------------------------------|---------------------|
| १) मेरुसृष्टी | २) सर्वाचलोत्पन्न |
| ३) सप्तपातालोद्भव | ४) मेरुहिमालय वर्णन |
| ५) हिमालयवरप्रद | ६) शक्राभिषेक |
| ७) अग्निदिक्पालसिद्धि | ८) यमतपसिद्धि |
| ९) नैऋत्यतपसिद्धि | १०) वरुणतपसिद्धि |
| ११) वायुउत्पत्ति | १२) कुबेरतपसिद्धि |
| १३) रुद्रतपउत्थाने देवमंत्रण | १४) वायुतपसिद्धि |
| १५) ईशानतपसिद्धि | |

श्व प्यंगू किसिमया स्वयम्भू पुराण अध्ययन यानाः स्वयम्बल्य श्रीस्वयम्भू धर्मधातुया कारण अथवा प्रभावं विपश्ची बुद्धनिसें कयाः सम्राट् अशोक आगमन जूगु तक उल्लेख जूगु खनेदइ । तर अशोक महाराजयां लिपा अर्थात् निइस्वसःदे थुखे वसपोल स्वयम्भूया कारण जुयावंगु विविध घटनात विषय कयाः च्वयामतःगु खनेदु । अशोकयां लिपायागु खँ कयाः स्वयम्भू चैत्य जीर्णोद्धार, सुधारकार्य तथा स्वयम्भू दर्शनार्थ वःपि विभिन्न विद्वान आचार्य भिक्षु तथा पर्यटक, अतिथिपि वयाःलि गुबल्य सुनां छु यात छु जुयावन उकिया बिच्य बिच्य स्थानीय श्रद्धालु भक्तजनपिसं छु छु धर्मकर्म यानाः थितिरिति गुठी तथाथकल धइगु विषय वयाः प्रस्तुत ग्रन्थय च्वयागु खः । खतु अशोकयां न्ह्यो जुयावंगु खँ न थुकिइ संक्षिप्तं घटनाक्रम मिल्य यानाः च्वयावियागु दु । श्व ग्रन्थ छगू किसिमं अशोकयां लिपा जूगु वर्तमान समयतकयागु स्वायम्भू पुराणया स्वापू धाःसां अत्युक्ति जुइमखु ।

स्वयम्भूया ऐतिहासिक परम्परा व पुरातात्विक पृष्ठभूमि

नेपाःया बुद्धधर्म व संस्कृतिया परम्परागत विश्वास व भावनाकथं बिचाः याय्वल्य

श्रीस्वयम्भू महाचैत्ययागु प्राचीनता द्वलंढः दं पुलांगु खः धइगु स्वयम्भू पुराण कनावइच्चंगु खनेदु ।

थवया सन्दर्भय गुलिसिनं थथे धाय्फु- श्रीस्वयम्भू महाचैत्ययागु आत्मकथा स्वयम्भू पुराण मुनां स्वइत गन च्वनाः कंगु अले गुवलय् च्वयातःगु ?-

थव खः श्रीशाक्यमुनि बुद्ध थःगु जन्मभूमि लुम्बिनी वनय् विज्याय् धुंकाः अनं सरासर श्रीस्वयम्भू महाचैत्य दर्शन निम्ति सप्तबुद्धपनिगु अनुक्रमकथं नेपाः थ्यंकःविज्यात । उवलय् स्वयम्भू गोपुच्छगिरि पर्वत वर्तमान पुलांस्यंगुस च्वनाः मैत्रेय बोधिसत्वयागु अनुरोधकथं श्रीस्वयम्भू महाचैत्ययागु उत्पत्तिक्रम व गुण वर्णन आज्ञा जुयाविज्याःगु जुल ।

थव हे खँ शाक्यमुनि बुद्ध महापरिनिर्वाण जुइ धुंकाः निसःदं लिपा कुक्कूटाराम महा-विहारय् च्वनाः उपगुप्त भिक्षुं अशोक महाराजयात कनाथकल । उगु व्याख्यानय् उपगुप्त भिक्षुं थथे धयाविज्याःगु दु-

थुगु श्रीस्वयम्भू महाचैत्ययागु महात्म्य गुण वर्णन गोपुच्छगिरि पर्वत स्वयम्भूस च्वनाः आर्यमैत्रेय बोधिसत्वयात खँ कन धकाः आनन्द भिक्षुं जयश्री भिक्षुयात कन । जयश्री भिक्षुं जिनश्री राज बोधिसत्वयात कन, थव हे खँ जिनश्री राज बोधिसत्वं शाणवासी भिक्षुयात कन । अनं लिपा व हे शाणवासी भिक्षुं उपगुप्त भिक्षुयात कन । उपगुप्त भिक्षुं महाराज अशोकयात कंगु जुल । थुकियागु गुरुकुल ऐतिहासिक परम्परा थथे जुल ।

थव हे समयय् बुद्धधर्मप्रति अगाढ श्रद्धाभक्ति दुहा महान् प्रतापी अशोकं समस्त एशिया महाद्वीपय् बुद्धधर्म प्रचार प्रसारया लागी अनेक विद्वान् आचार्य भिक्षुपि सम्मिलित यानाः प्रथम बौद्ध संगायन न्यायकल । शायद् उवलय् अवश्य लिपिबद्ध रूपय् पञ्चबुद्धात्मक श्रीस्वयम्भू धर्मधातु वागीश्वरयागु महात्म्य च्वकल जुइ । अनंलि थुगु श्रीस्वयम्भूयागु महात्म्य विस्तार विस्तार प्रचार प्रसार जूगु खनेदत ।

फलस्वरूप सम्राट् अशोकया आगमनं लिपा श्रीस्वयम्भू महाचैत्य दर्शन, पूजन एवं सेवाभाव प्रस्तुतया लागी थःथःगु इलय् देसदेसान्तरया विभिन्न सिद्ध, योगि, आचार्य, भिक्षु तथा राजा-महाराजपि वल । अले वसपोलपिसं छु छु यानावन धइगु विषय कयाः प्रस्तुत ग्रन्थया २६ परिच्छेदनिसें कयाः १६७ परिच्छेदतक थःगु अल्पबुद्धि चाछि अध्ययन व अनुसन्धान यानाः लुइकागु भाषावंशावली, इतिहास व अभिलेखया आधारकथं शताब्दि अनुक्रमानुसार मिलय् यानाः च्वयावियागु जुल ।

श्रीस्वयम्भू महाचैत्ययागु गुण वर्णन कथा पुराण व परम्परागत जनविश्वासकथं स्वयंवल्य युगयुगनिसें आस्था प्रतिष्ठा तयावइच्चंगु खनेदु । तर प्राचीन लिपिवद्ध प्रमाण धाःसा दुर्लभ थें जुयाच्वन । थौंयागु वैज्ञानिक युगय् पुराणकथा व परम्परागत जनविश्वास जकयागु आधारयात कयाः जक नं गौरव व सन्तोष यानाच्वनेगु थव थौंयागु ईयात मत्वःगु थें जुइ धुंकल । उकि पुरातत्त्वान्वेषकतय्गु धारणा थव दु कि कोसं थःगु अतीतकालयागु केवल गौरव व प्रशंसा न्यनेगु

स्वयाः नं थःगु हे मिखां अवशेषयागु रूप्य जक जूसा स्वय्दइगु सार्थक खः, महत्वपूर्ण विषय खः
धकाः प्रमाणित यानावइच्चंगु खनेदु ।

थ्व हे विषयय् ध्यान आकर्षित यासे श्रीस्वयम्भू महाचैत्य विषयय् पुरातात्विक आधार
पृष्ठभूमि जनसमक्षय् प्रस्तुत याय्गु विचारकथं उपलब्धि प्रमाण न्ह्यव्वय्गु कुतः याय्-

खतु स्वयम्भूइ लुयावःगु पूर्वलिच्छवीकालयागु सर्वप्राचीन शिलाभिलेख शङ्करदेवोनरेन्द्रः
धकाः धयातःगु प्रमाण अनुसार प्रथम ऐतिहासिक मानदेवराजाया बाज्या शङ्करदेव जुजुं स्वयम्भूया
विहार निर्मित अक्षयदान स्वरूप जग्गा प्रदान यानावंगु खँ न्ह्यथनातल । तर अपशोच थ्व शिलालेख
प्रायः अस्पष्टगुलि विवादास्पदया विषय थे जुयाच्चंगु दु । छगू पक्षं थ्व बिचाः याःगु दु- शङ्करदेव
जुजुया छय् प्रथम मानदेव जुजुं तयाथकूगु मानय् यानाच्वन । न्ह्यागु थजु, मानदेवया पालय् थन
विहार दय् धुकूगु अवश्यं खः । उगु अभिलेखय् गुगु विहारयागु चर्चा जुल थ्व प्रथम मानदेव
स्वयाः निगू प्यंगू शताब्दि न्ह्योयागु जुइफु, कारण थन शान्तिशील भिक्षुयागु नेतृत्वय् थ्व हे
मानदेवया तापाःबाज्या वृषदेव जुजुं स्वयम्भूयागु पूर्णरूपेण जीर्णोद्धार यानाथकूगु आशयं थ्व
स्पष्ट जू कि थन आर्यजिन संघ भिक्षुसंघपि च्वनिइगु विहार दय् धुकल । स्वयम्भू चैत्य, सेगुं
आदिया चर्चा जुयाच्चंगु इतिहासप्राण शिलाभिलेख केवल स्वयम्भूइ जक सीमित मजुसे परन्तु
गोकर्ण, हाडिगां आदि थासय् च्वंगु पूर्वलिच्छवीकालया शिलापत्रय् नं स्वयम्भू चैत्य भट्टारक,
श्रीसेगुं विहार निर्मित अंशुवर्मा जुजुं गुठीखर्च नियत यानाथकूगु उल्लेख अंकित यानाथकल ।
करीब ३०।४० दँ न्ह्यो राजकीय पुस्तकालय वीर लाइब्रेरीपाखे थाय्थासस् च्वंगु शिलाभिलेखतय्गु
प्रतिलिपि उतार याकूवलय् कयातःगु स्वयम्भूयागु दकलय्-सकलय् पुजांगु शिलापत्र हे नं
थौं कीगु न्ह्योने खनेमदय् धुकल, थ्व आश्चर्यया विषय खः । थुजाःगु हे प्रकारं थ्व ३०।४० दँया
दुने उगु शिलालेख अलपत्र जुल धाःसा मेमेगु प्राचीन अभिलेखत नं गुलि नष्ट भ्रष्ट खण्डित जुयाः
चाय्कं वा मचाय्कं तनावने धुकल जुइ थ्व धाय् फुगु मखु । जि थःह्यं अनुभव यानागु स्वयम्भू
सम्बन्धी उल्लेख जुयाच्चंगु शिलापत्र स्वयम्भूइ जक मखु इतुं बाहाः, पशुपति, वँतु तःधंवाहाः,
विष्णुमती ताफू, ह्यूमत बुद्धवारी, ह्यय्पि व पुरातत्त्ववगैँचा आदि थासय् तक नं खनागु दु ।
हानं स्वयम्भूइ हे नं गुगु शिलालेख मि नयाः पौसा तयातःगु नं मदुगु मखु एवँक्रमं शमस्सुद्दीनया
आक्रमणया हूलमूलय् लानाः स्यनाच्चंगु नं । १५।१६ दँ न्ह्यो नं श्री ५ या सरकार पुरातत्त्व विभागं
ऐतिहासिक मन्दिरतय्गु विवरण कयातःगु तथ्याङ्कय् नं चीनया यात्रीत वयाः स्वयम्भूयात सुवर्णछत्र
चह्य् यानावंगु १७ शताब्दि या शिलापत्र दु धकाः च्वयातल । अपशोच, उगु शिलापत्र नं थौं
खनेमदय् धुकल । विजयकामदेव जुजुया पालय् मैत्रिचन्द्र शाक्यभिक्षुं स्वयम्भू जीर्णोद्धार याःगु
स्वयाः नं ७०।८० दँ न्ह्यो ने. सं. २४६ सालं स्वयम्भू जीर्णोद्धार जूगु शिलापत्र नं कीगु न्ह्योने
खनेमदय् धुकूगु खनेदु ।

थुगु प्रकारं स्वयम्भू सम्बन्धी आधारभूत प्रमाण न्ह्योने न्ह्यथं ह्यास जुजुं परिलोप जुजुं
वनाच्वन, उकिइसं प्राचीन लिपि अनभिज्ञया कारणं अथवा धनद्रव्यया लोभं अज्ञान व दरिद्रया

वशं धाय् ला कीगु प्राचीन सद्धर्मग्रन्थत नं सुचुयावन, खनेमदयावन । थुजाःगु अवस्थां यानाः दुर्भाग्यवश थौं स्वयम्भूयागु प्राचीनताप्रति विचिकित्सा यानाः कुदृष्टि तयाः न्हूगु सावित याय्गु प्रयास यानाच्चवंपि नं मदुगु मखु । थुजाःपिसं धयाच्चवंगु दु- स्वयम्भू सम्बन्धी उल्लेख जुयाच्चवंगु मूलग्रन्थ 'स्वयम्भू पुराण' धइगु ग्रन्थ हे १६।१७ शताब्दिइ रचना जूगु जक खः । वय्कःपिनिगु निम्ति जि थथे लिसः बिइमास्ति वः-

थुगु स्वयम्भू पुराणय् च्वयातःगु मुख्य मुख्यगु मूलमूलगु शब्द स्वयम्भूया १२, १३, १४, १५ शताब्दिया इतिहासप्राण शिलाभिलेख्य निम्नलिखित आधारभूत शब्दत व प्रशस्ति प्रयोग यानावइच्चवंगु खनेदु-

१) किनिगु शदीया मैत्रिचन्द्रजुं जीर्णोद्धार याःगु शिलापत्रय्-

धर्मधातु, सद्धर्मचैत्य, धर्मध्वजचैत्यज्येष्ठ,
शून्यताज्ञान धामपुर, रत्नसरोज,
बोधपति प्रज्ञोपाया [त्तरूपः]

२) किस्वंगुगु शदीया जयार्जुनदेव समयय् राजहर्ष भल्लोकजुं जीर्णोद्धार याःगु शिलापत्रय्-

श्री साह्ये शिखर प्रसिद्ध भुवन,
धर्मधातु, विमलस्तूप मुनेकेतन.....

३) किप्यंगु शदीया इतुं बाहाःया शिलापत्रय्-

गिरिवरमहाविहार,
श्रीस्वयम्भूचैत्य

४) किन्यागु शदीया पशुपतिया शिलापत्रय्-

श्रीपद्माचलशिखर
श्रीधर्मधातु वागीश्वर स्वयम्भू चैत्य

वृहत्स्वयम्भूया पुराणया प्रारम्भ वाक्यय् गुगु च्वयातःगु खः उगु श्लोकया आशयकथं पाय्छि जुइक चीनया ताङ्गवंशया इतिहासय् थ्व हे स्वयम्भू महाचैत्यागु विषय कयाः उल्लेख यानातइतःगु दु धइगु खँ प्रस्तुत ग्रन्थया ३४ परिच्छेदस च्वयागु दु । ताङ्गवंशया इतिहास काठमाण्डू उपत्यकाय् उपलब्ध जूगु १६।१७ शदीया स्वयम्भू पुराण स्वयाः नं प्यसः खुसः दँ न्ह्योयागु खः । थुकि थनयागु स्वयम्भू पुराण स्वयाः नं चीनय् च्वयातःगु यक्वं प्राचीनता जू धइगु सिद्ध जू । तर अनयागु स्वयाः थनयागु सफुलिइ लिपाया आचार्यपिसं भति भति बढीचढी यानाः च्वय्फु व मेगु हे खँ ।

कीथाय् थन नेपाःमितय्के उजाःगु पुरातात्त्विक सम्पत्ति प्राचीन वस्तु सांस्कृतिक निधी थःगु देसया अस्तित्व एवं गौरव अध्ययन व अनुसन्धान यानाः सुरक्षित् याय्गु चलन तनावंगुलि खास यानाः कीगु देसयागु गौरवगाथा इतिहासत आपालं विलुप्त जुयाः भूगर्भय् दुने विलीन जुयावनाच्चवंगु दु । उदाहरणया लागी-

प्रसिद्ध चिनीयात्री हुएनसाङ्गजुं थःगु यात्रा वृत्तान्तय् कैलासकूट भवनयात कयाः गुलि प्रशंसा यानावन, थौंतकं उगु भवनयागु अवशेष तकं लुइके मफुनि, अथे हे मानगृह व भद्राधिवास

भवन्त्यागु नं । एवंप्रकारं तिब्बतीयागु इतिहास्य नेपाःया म्हाय्मचा भृकुटीयागु गुलि चर्चा यानातल व थे तुं शीलमञ्जु बौद्धभिक्षु, प्रसिद्ध कलाकार अरणिकोजुयागु नं । हानं प्रसिद्ध यात्री फाहियान लिसे चीनय् वनाः बुद्धधर्म प्रचार याःवंह नेपाःली बौद्धभिक्षु बुद्धभद्र आदि थुजाः थुजाःगु महत्वपूर्ण प्रमाण लिपिवद्ध रूप्य आःतकयागु कीगु इतिहास्य लुयामवःनिसां उगु खंयात कीसं आत्मसात् सहर्ष गौरवान्वित यानावयाच्चवना ।

४१ अतएव कीसं थःगु प्राचीनता व गौरव अनुसन्धानया लागी थःगु देस धकाः जक हालाच्चवनां मज्जिल- तिब्बत, चीन व भारत एवं बिलायत, जर्मन, अमेरिका,^१ फ्रान्स, इटाली आदि थासय् च्वंगु पुस्तकालयय्, संग्रहालयय् वनाः नं अध्ययन व अनुसन्धान याय्मालाच्चंगु दु ।

स्वयम्भू क्षेत्रय् पञ्चबुद्ध- वैरोचन, अक्षोभ्य, रत्नसम्भव, अमिताभ एवं अमोघसिद्धियागु नां अंकित जुयाच्चंगु शिलालेख अथवा मूर्ति सरसरि अध्ययन याय्वलय् १२।१३ शदीयागु जक खनाच्चवना । तर, श्रीस्वयम्भू ज्योतिरूपयात महाचैत्याकार रूप्य परिणत याय् धुंकाः स्थापना जूगु वैरोचनादि अक्षोभ्य, रत्नसम्भव, अमिताभ एवं अमोघसिद्धियागु पूर्वरूप प्राचीन रूप व हे स्वयम्भू चैत्ययागु गर्भगृहय् दुने हे सुरक्षित जुयाच्चंगु अवश्यं दय्माः धइगु खँ इलय्-व्यलय् जीर्णोद्धार जुयावंगु मूर्तित तत्तत्स्थानय्संतुं तयावइच्चंगु खँ इतिहास साक्षि दु ।

पञ्चबुद्धया नां कीगु बौद्धसाहित्यय् गन गुथाय् उल्लेख जुयाच्चंगु दु धइगु विषयय् नं छकः बिचाः याय्-

श्रीस्वयम्भू महाचैत्यस प्रमुख स्थान विद्यावयाच्चंगु आदिबुद्ध अमिताभ तथागतयागु महत्त्व वारय् 'सुखावतीव्यूह' नामक महायानसूत्रय् थथे उल्लेख जुयाच्चंगु दु-

भगवान् शाक्यमुनि बुद्धं श्रावस्ति जेतवन अनाथपिण्डिकयागु वगैचाय् च्वनाः महास्थवीर शालिपुत्रयात सःताः सुखावतीलोकधातुस बिज्यानाच्चंह्य अमिताभ तथागतयागु विषय कयाः धर्मव्याख्यान यानाबिज्याःगु दु । अथे हे थुगु महायानसूत्र सुखावतीव्यूहय् अक्षोभ्य तथागतयागु विषयय् नं छत्वाःचा खँ न्ह्यथनातःगु खनेदु । थुगु ग्रन्थ निगूगु शदीइ चिनीया भासं अनुवाद

१- विद्वान् श्रीप्रतापादित्यपालजुं सम्पादन यानादिइगु एशिया हाउस ग्यालरी न्यूयोर्क सहरपाखे हालसालय् प्रकाश जूगु 'नेपाल द्वेरे दि गडस् एर योङ्ग' नामक क्याटलागया ६९ पृष्ठस अंकित 'स्वयम्भू जीर्णोद्धार' नामक पौभाःया अभिलेखय् थथे च्वयातःगु खनेदु-

यलया शक्तिशाली शासक जुयाच्चर्चि श्रीजयपुरन्दर सिंहदेवजुया दाजु किजा स्वह्म थाकुरपिनिगु पर्याय ने. सं. ६८५ आषाढशुक्ल दिशि आदित्यवारखुनु श्रीस्वयम्भू महाचैत्य जीर्णोद्धार यानाथकूगु जुल ।

थुगु पौभालय् स्वयम्भू जीर्णोद्धार सम्बन्धी चित्र छलंङ्ग यानाः क्यनातःगु दु । लिस्सें तत्कालीन समययागु जनजीवन व भौगोलिक मानचित्र नं छुं दर्शय् यानाः थाय्थाय्थागु निम्नप्रकारया नां अंकित यानातल-

श्री माणिगल यंलदेस, श्री यंगलदेस, श्री गोल्बदेस, श्री ववादेस, श्री वदेदेस, श्री थसिदेस, श्री कित्तिदेस श्री जलदेस, श्री खासदेस, श्री यंबुदेस, श्री खपोदेस, श्री थेमिदेस, श्री श्वदेस, इ० ।

जुयाच्चंगु दु धकाः 'भारतीय कलाको विहारकी देन' पृ. १५६ स उल्लेख जूगु दु । अथे हे प्यंगुगु शदीया अन्तपाखे चिनीया भासं अनुवाद जूगुलिइ अक्षोभ्य बुद्ध बोधिसत्व मञ्जुश्रीया नां न्ह्यथनातल । थुगु हे प्रकारं इस्वी २८६ स चिनीया भासं अनुवाद जूगु सद्धर्मपुण्डरीक ग्रन्थय् नं अमिताभपुत्र आर्यावलोकितेश्वरयागु नां उल्लेख यानातल लिम्सें रत्नसम्भव तथागत, धर्मकाय, धर्मधातुयागु नां समेत अंकित जूगु खनेदु । थ्व हे सद्धर्मपुण्डरीकया समसामयिक इलय् रचना जुगु गण्डव्यूहसूत्र व गुणकारण्डव्यूहय् वैरोचन तथागतयागु प्रशंसा यानातइतःगु दु ।

थथे प्रथम, द्वितीय, तृतीय एवं चतुर्थ शदीइ वैरोचन, अक्षोभ्य, रत्नसम्भव, एवं अमिताभ बुद्धयागु नां ग्रन्थग्रन्थान्तरय् उल्लेख जूगु दुसां काठमाण्डू उपत्यकाय् पञ्चबुद्ध अंकित यानातइतःगु चैत्य अनुमानित खुगु शदीपाखे जक खनेदय्कःवल । थ्व चैत्य यल वज्रकीर्ति महाविहारस सुप्रतिष्ठित यानातइतःगु जुल । थुगु रूपं यल त्यागःया उत्तमबाहालय् दुनेच्चंगु लिच्छवी चैत्यय् कियातइतःगु पूर्वलिच्छवी लिपि अक्षोभ्य तथागत व अमिताभ बुद्धयागु नां न्ह्यथनातइतःगु खनेदु । खतु सँदेसया जुजु श्रद्धाचेतन्याल्पो नाप भृकुटीया विवाह जूवल्य नं वसःया रूपय् वियाह्वःगु विभिन्न मूर्तित मध्यय् छगु अक्षोभ्य बुद्धयागु नां न्ह्यथनातल । सिद्धकण्हा (कर्णपा) जुं च्यागु शदीइ 'पञ्चतथागत' धइगु चर्यागीत (चचा) रचना यानाथकल । अथे हे आचार्य अनङ्गवज्रपादजुं नं थःगु कृति 'प्रज्ञोपाय विनिश्चय सिद्धि' नामक तन्त्रय् वैरोचन, अक्षोभ्य, रत्नसम्भव, अमिताभ व अमोघसिद्धि तथा लोचनी, मामकी, पाण्डूरा एवं ताराया शब्दार्थ बांलाक खुलस्त जुइक वनातःगु तय् धुंकूगु खनेदु, इत्यादि ।

चवमिया थःगु खँ

आदिबुद्ध श्रीस्वयम्भू धर्मधातु वागीश्वरयागु महान् गौरव, विशुद्धकीर्ति, अचिन्त्यगुण, अपारमहिमा, प्रज्ञोपात्मकतत्त्व, अनुत्तर सम्यक्संबोधि मूर्ति अपरिमित पुण्य साधनया कारण स्वरूप जुयाः कोगु न्ह्याने युगयुगनिसें सुप्रतिष्ठित जुयाच्चंगु वसपोलयागु गुण वर्णन प्रशंसा न्ह्याव्व याःसा नं सिद्धइगु मखु । तर थन वसपोलयागु गुण वर्णन याय् धकाः साहस यानागु नं मखु ।

अथे नं छह्य बौद्धया नातां वसपोलप्रति श्रद्धाभक्ति प्रेरित जुयाः कल्याणमित्रपिनिगु सौजन्य प्राप्त जूगु व थःगु अल्पबुद्धि चाछि अध्ययन व अनुसन्धान यानागु द्वारा उपलब्ध जूगु सामग्रीया आधारय् वसपोलप्रति श्रद्धाभक्ति दुपिनिगु लागी छुं उपयोगी जुइ धइगु हेतु प्रस्तुत ग्रन्थ न्ह्यव्वयागु जुल ।

तर, थौंयागु युगय् सद्धर्मचेतना कम जुजुं वन । लिसेलिसें थःगु देसया अस्तित्व गौरवमय कीर्ति, कलात्मक वस्तु एवं पुरातात्त्विक सम्पत्ति, ऐतिहासिक सामग्री अभिलेखत चाय्कं वा मचाय्कं तनावनाचवन । उकिइसं थुगु विषयय् सःस्यूपि विद्वान आचार्य एवं बुरापाकात नं दुर्लभ थें जुयावनाचवन ।

थुजाःगु इलय् श्रीस्वयम्भू महाचैत्य सम्बन्धी घटनाक्रम व स्थान परिचय, मूर्ति, चित्र, अभिलेख, चैत्य व धितिरिति गुठी विषयय् लुमंके बहःगु उल्लेखनीय खँत छथासं मुनाः जनसमक्षय् प्रस्तुत यानाबियागु जुल ।

प्रस्तुत ग्रन्थ चवय्या लागी सौजन्यतापूर्वक आवश्यक सहयोग प्रदान यानाः हारगुहार याना-बिज्याःपि दिइपि महानुभावपिनिगु प्रसङ्गवस थन न्ह्यथँसे वय्कःपित सहस्र धन्यवाद नं देछाय्—

१) स्वयम्भूया महत्त्व क्यनाः उत्साहवर्धक प्रेरणा बियाबिज्याःपि पूज्यवर गुरुपि—

सर्वश्री गुरु श्री धर्मादित्य धर्माचार्य

पण्डितगुरु श्री रत्नबहादुर वज्राचार्य

२) ऐतिहासिक सामग्री बियाः ग्वहाःलि यानाबिज्याःपि—

श्री जीवगुरुजु

स्वयम्भू

श्री सानुकाजि गुरुजु

”

श्री गौतमवज्र वज्राचार्य

मासंगल्लि

श्री परमानन्द वज्राचार्य

नःबही

श्री कमलानन्द वज्राचार्य

”

श्री सप्तमुनि वज्राचार्य

लगं

श्री अमोघवज्र वज्राचार्य

छेत्रपाति

श्री भोजमानपति वज्राचार्य

लाय्कूबही

श्री आनन्दमुनि वज्राचार्य

इकुवाहाः

श्री कुस्योछेचुलामा

महाराजगञ्ज

श्री भिक्षु सुमतिशोल

मैत्रिगुम्बा

श्री कान्छाभिक्षु

स्वयम्भू

श्री देवरत्न वज्राचार्य

ह्यय्पि

श्री देवहर्ष वज्राचार्य

तःछेँवाहाः

श्री पूर्णरत्न वज्राचार्य

तेवाहाः

श्री मोतिरत्न वज्राचार्य

चिकंमू

श्री साहु त्रिरत्नमान तुलाधर

तंलाछि

३) तिब्बत भाषा अनुवाद कार्यय् ग्वहाःलि यानाबिज्याःपि—

श्री भिक्षु सुमतिसंघ, मैत्रिगुम्बा

श्री भिक्षु ग्याल्छेन्, नाघिगुम्बा

श्री साहु कुलरत्न धारुवाः, किण्डोल (भू. पू. अ., स्व. वि. मण्डल)

४) आवश्यक सुकाव बियाः ग्वहाःलि यानादिइपि—

श्री साहु दयावीरसिंह कंसकार, केल

श्री साहु भक्तिदास श्रेष्ठ,	लाजिम्पात
श्री साहु भीमराज श्रेष्ठ	कटापोल
श्री चिनीकाजी ताम्रकार,	मरु पीगंननि

श्री दयावीरसिंह कंसकारजुं आवश्यक सुकाव जक बियादिइगु मखु प्रस्तुत ग्रन्थ पिदंकेगुलिइ हःपाः बियाः नं अप्पो कुतः यानाः बरावर च्वय्काः न्ह्यज्याकूगुलि वय्कःप्रति दुनुगलंनिसे आभार प्रकट यानागु जुल ।

५) थःगु अनुभवया खँ कनाः ग्वहाःलि यानाविज्याःपि-

श्री पं बुद्धिराज शाक्य,	उकुवाहाः
श्री भिक्षु धर्मगुरुजु,	"
श्री हर्षवीर शाक्य,	कुतिवाहाः
श्री भीमराज ब्रह्मचर्यभिक्षु	ईवाहाःवही
श्री आनन्दमुनि वज्राचार्य	इकुवाहाः
श्री लोकरत्न तुलाधर	मासंगल्लि
श्री जगत्त्रत्न तुलाधर	तंलाछि
श्री धर्मानन्द वज्राचार्य	क्वहिति
श्री दानजीव ताम्रकार	यतखावाहाः

प्रस्तुत ग्रन्थया गेट-अप व भाषा शुद्धिकरणया लागी अलसि व दिक्कयात तोताः थःगु अमूल्य समय बियाः स्वयम्भूप्रति श्रद्धा तयाः प्रेस सम्बन्धी ज्याखँय् रेखदेख यानाः नं सम्पूर्ण प्रूफ स्वय्गु ज्या अभिभार कुबियादिइह्य मित्रवर भांजु श्री हितकरवीरसिंह कंसकारयात नं दुनुगलंनिसे धन्यवाद मबिसे च्वनेमफु । लिस्से हितचिन्तक पासा प्रो. श्री आशाराम शाक्यजुं थुगु ग्रन्थया निम्ति आद्योपान्त अध्ययन यानाः भूमिका च्वयाबिल, थुकिया लागी नं आभारी जुयागु दु । अथे हे प्रस्तुत ग्रन्थ आकर्षक व शोभावृद्धि निम्ति ब्लक दय्केत माक्व फोटोया लागी श्री ५ या सरकार पुरातत्त्वया निर्देशक श्री रमेशजङ्ग थापाजुं अनुमति बियाः सहयोग प्रदान यानादिल, थुकिया लागी आपालं कृतज्ञ जुयागु जुल ।

अन्तय् जितः थ्व हे धाय्मास्ति वः- स्वयम्भू विकास मण्डलया २५ दँ बुन्हि (रजतजयन्ती) या लसताय् नेपाल गौरव राष्ट्रज्योति श्रीस्वयम्भूयागु महत्व प्रकाशय् ह्यत् जि थःगु २२ दँ तकयागु कुतलं तयार यानातयागु अनुसन्धान कार्य 'श्रीस्वयम्भू महाचैत्य' नामक ग्रन्थ इलय् हे स्वयम्भू विकास मण्डलं आपालं धनखर्च यानाः जनसमक्षय् प्रकाशय् हयाबिल । थ्व जिगु लागी जक मखु परन्तु समस्त नेपाःमि बौद्धतय्गु निम्ति नं तःधंगु सन्तोष व गौरवया विषय खः । तसर्थ स्वयम्भू विकास मण्डलयात सदा सर्वकालं हार्दिक कृतज्ञता ज्ञापन यासे वसपोल स्वयम्भूयाके थ्व प्रार्थना यानाच्चवना- स्वयम्भू विकास मण्डलयागु पवित्र उद्देश्य निर्विघ्नपूर्वक सफल जुगु स्वय्दय्मा ।

श्रीस्वयम्भू धर्मधातु वागीश्वरयागु संक्षिप्त परिचय च्वयागु कुशलमूलद्वारा प्राप्त जूगु
पुण्यानुभावं दिशा किगु वखत स्वंगु मङ्गलसुख प्राप्त जुइमा ।

थुगु ग्रन्थय् च्वयातयागु जिगु भाषा शैली खनाः विद्वान साहित्यकारपिनिगु निम्ति सन्तोष
मजुइफु, गुलिसिनं ह्यस्याय्फु, अथे नं अनुसन्धान थे जाःगु थाकूगु विषय जूया निम्ति थुकिइ
गनं द्वंगु दत धाःसा विज्ञपाठकवर्गपिनिगु आलोचना व सुक्राव सहर्ष स्वागत यानाच्चना, अस्तु ।

हेमराज शाक्य

यल महाबुद्ध, थैना
जयश्रीविहार

ने. सं. १०६८ श्रीपञ्चमी

भूमिका

स्वयम्भू ज्योतिरूपयात थःगु प्वाथे तया समस्त विश्वयात निर्वाणया लँ क्यनाच्चंहा स्वयम्भू चैत्य नेपाल अधिराज्यया निम्ति जक मखु संसारया बौद्धजनपिनिगु निम्ति अति पवित्र बौद्ध तीर्थस्थल खः । आधुनिक इतिहासया जन्म ज्वी द्वलंद्वःदँ न्ह्यो अर्थात् सत्य युगनिसें नेपाले थिनाच्चंगु बौद्ध ज्योति संसारे अनेक प्रकारया पापया फलस्वरूप दुःखे लानाच्चंपि प्राणी मात्रया निम्ति निर्वाणया द्वार जुयाच्चंगु स्वयम्भू निश्चय नं अति हे पवित्रगु तीर्थस्थल खः । धात्थे हे लगनशील व प्रयत्नशीलहा अन्वेषक श्री हेमराज शाक्यजुं स्वयम्भू चैत्यया इतिहास व स्वयम्भू चैत्यनाप सम्बन्धित सप्त तथागतपि, बोधिसत्वपि, जुजुपि, दातापि, भक्तजनपि व स्वयम्भू स्यंकेत कुतःयापि विदेशी आक्रमणकारीपिनिगु नं गुगु तरिकां विषद वर्णन यानाबिज्यागु खः थ्व नं लिपायापि अन्वेषकपिनिगु निम्ति छगू तःधंगु गुहालि जूवःगु दु, अस्तु ।

इतिहासया अध्ययन बहः कया धायेबले नेपाले बौद्धधर्मया प्रवेश मगधाधिपति सम्राट् अशोकया पाले वसपोलं वसपोलया गुरु उपगुप्त भिक्षुया आशाकथं भगवान् बुद्धं कनाबिज्यागु धर्म अर्थात् चतुरार्य सत्य, आर्याष्टांग मार्ग व प्रतीत्यसमुत्पादयात विश्वे न्यंकभनं प्रचार याना प्राणीमात्रयात दुःखं मुक्त यायेत श्रीलंकाय् थःहे काय् महेन्द्र महास्थविर व म्हाय् संघमित्रा व मेमेथाय् बुद्धधर्म व दर्शने अति पारंगत जुयाबिज्यापि स्थविरपि छ्वयाबिज्या थें थन नेपाले नं थः म्हाय् चारुमति व बौद्ध विद्वान जुयाबिज्यापि स्थावरगणपि छ्वयाबिज्यासेंलि जूवःगु खः । सम्राट् अशोकं इ. सा. या सिकं ४२३ दँ न्ह्यो लुम्बिनी थःहे बिज्याना सिद्धार्थ कुमार जन्म जुयाबिज्यागु थासे स्तम्भ थना 'हिंद बुधे जाते सव्यमुनीति' धका भगवान् बुद्ध थन हे जन्म जुयाबिज्यागु खः धका घोषणा यानाबिज्यात । नेपालया इतिहासे सम्राट् अशोक काठमाण्डू उपत्यका दुहांबिज्यागु प्रमाण मदुसां थनया जनतापिनि वसपोल सम्राट् अशोक स्वयं स्वयम्भू दर्शन याये धुंका मञ्जुपत्तन महानगरे (यले) बिज्याना नगरया प्यखे प्यकुने प्यंगः स्तूप स्थापना याना नगरया दत्थवी छगो विशालगु चैत्य स्थापना याना थुगु नगरयात अशोकपत्तन धका नामकरण यानाबिज्यात धयागु विश्वास दु । थुगुकथं थन ऐतिहासिक रूपं बुद्धधर्मया प्रवेश जुल ।

तर आर्यावर्तया अति प्राचीन सभ्यता व संस्कृति स्यूगु हे खँ खः, चीन विज्याहा बोधिसत्व मञ्जुश्रीनं आयागु काठमाण्डू उपत्यका, उबलेयागु नागदहःस च्वंगु लः पितछ्वया उपत्यकाय् न्हूगु सभ्यता प्रादुर्भाव यांनाविज्यागु भौगोलिक प्रमाणकथं सत्यगु खँ हे खः तर 'मञ्जुश्री' जक गुलि ऐतिहासिक व्यक्ति खः अज्ज नं अनुसन्धानया विषय तिनि । थथे हे अन्वेषणया क्रमे पं. हेमराज शाक्यजुं २२ दँ मयाक अन्वेषण यांना थ्व ग्रन्थ रचना यांनाविज्यागु समस्त अन्वेषणकारीपित छगू तःधंगु उत्साहया प्रतीक खः ।

स्वयम्भू ज्योतिरूपयात गौड देसं विज्याहा जुजु प्रचण्डदेवं चैत्य दयेका त्वपुया कलि-काले धर्मे श्रद्धा मदुपि मनुतसें थ्वयात स्यंके मफयेकेमा धका गुगु कुतः यांनाविज्यागु खः, अले थःत महायान बुद्धधर्मया आचार्य पदं अभिषिक्त यांना शान्तिकर आचार्यया नामं शान्तिपुर ध्यानागार दयेका अन हे समाधिष्ठ जुयाविज्यागु इतिहासयात थ्व हे शान्तिपुरे दुने सुलाच्वंगु २७ गू ध्यानागार व मेमेगु रहस्यमय बाख ३५० दँ न्ह्यो कवीन्द्र जयप्रताप मल्ल शान्तिपुरे दुहांविज्याना कर्कोटक नागराजयागु हि च्वयातःगु सफू पितहया निभाले वयना विधिवत् पूजा यांना फिनिदँ तक्क वा मवया दुर्भिक्ष जुया दुःखसियाच्वंपि नेपाली जनतापित उद्धार यांनाविज्यागु नं ऐतिहासिक अन्वेषणया विषय जुयाच्वंगु दु ।

पं हेमराज शाक्यजुं थ्व हे अन्वेषणया क्रमे स्वयम्भू चैत्यस्थानया विभिन्न स्थाने स्थापना जुयाच्वंपि देवदेवतापिनिगु मन्दिर, विहार, चैत्यया नापनापं शिलालेख, शिलापत्र, ताम्रपत्र, इष्टिकापत्र इत्यादियागु नं बांलाक अध्ययन यांना क्रमबद्ध रूपं धलः दयेका थ्व ग्रन्थे दुथ्याकाविज्यागु अति प्रशंसनीय जू ।

महायान बुद्धधर्मया विकास नापनापं मूर्तिकला, चित्रकला व संगीतकलाया नं गुगु विकास जुया वल उकियागु नं स्वयम्भू चैत्यस्थानं गाक्क प्रतिनिधित्व यांनाच्वंगु खँ थ्व ग्रन्थे बांलाक उल्लेख जुयाच्वंगु दु । थ्व स्वयम्भू चैत्यया कलात्मक निर्माण थ्व चैत्ये विराजमान जुयाविज्यापि पञ्चबुद्धपि, वसपोलपिनिगु ध्यान मुद्रा व विशुद्धि थ्व ग्रन्थे अति हे सरल ज्वीक लेखकं कनाविज्यागु दु । चैत्यया प्यखे प्यकुने उज्ज्वल ज्वीक खनेदयाच्वंगु दिव्य चक्षु व बुद्धरश्मि अले वया च्वे च्वंगु गजूया नं बांलाक व्याख्या जुयाच्वंगुलि थ्व ग्रन्थया महत्व अति हे थिनाच्वंगु दु ।

सम्राट् अशोकया पाले प्रवेश जूगु बुद्धधर्म थेरवादी खःसां नेपाले स्वयम्भूइ प्रादुर्भाव जुयाच्वंगु बुद्धधर्म महायान खः धयागु सकसिनं स्यूगु खँ खः । अशोकया सिकं न्हापा थन उपत्यकाय् बुद्धधर्मया छुं चि दुसा स्वयम्भू हे खः उकिं 'स्वयम्भू पुराण' या कथं सम्राट् अशोक हे नं स्वयम्भू दर्शन यायेत थन विज्यात धका धयागु खँय् छक्कलं अविश्वास याये मज्यू । कीगु इतिहासं नं गुलिखे खँ मस्यूगु दै वा सियेक-सियेकं तथ्ययात थःत योकथं इतिहासकारतसें प्रस्तुत मयात ज्वी धका कीसं धाये थाकु ।

स्वयम्भू पुराणया धापूकथं प्रत्येक न्याद्वःदं पत्तिकं छद्म छद्म 'बुद्ध' पृथ्वी मण्डले अवतरण जुयाविज्याइ धयागु धापूकथं बिचा याना स्वयेबले काठमाण्डू उपत्यकाय् दुगु जलासय नागदहःस विपश्ची तथागत थ्व पवित्र पुखुली मोल्हुयेत विज्याये न्ह्यो दुगु खः अले चैत्यपुन्हीखुनु वसपोलं छगो सकिया पू पिनाविज्यासेलि थ्व नागदहःस द्व छि हः दुगु पलेस्वां उत्पत्ति जुल । अले थ्व हे पलेस्वांया द्योने स्वयम्भू ज्योतिरूप प्रकट जुल । विपश्चीं लिपा शिखी, विश्वभ, क्रकुच्छन्द, कनकमुनि, काश्यप व शाक्यमुनि तथागत नापं न्ह्ये जूगुलि स्वयम्भू ज्योतिरूप प्रादुर्भावि जूगु ३५००० दँ दत धका अनुमान यायेफु । विश्वया अनन्त समययात बिचार याना स्वयेबले ३५००० दँ धयागु छुं नं मखु । हानं फिखूगु शताब्दी च्वयातःगु स्वयम्भू पुराण खःसां तबि न्हापा लिपिवद्ध याना इतिहास च्वयेगु प्रथा मदु धयागु सकसिनं म्युगु हे खँ खः । गुरुं शिष्ययात न्हाय्पने स्वांपुया दीक्षा वियेगु प्रथा व छद्मसिनं मेद्मसित कना युग युगया इतिहास न्ह्यज्याका यंकातयेगु त्रमे ५०० दँ न्ह्यो थथे हे क्रमवद्ध तरिकां वयाच्वंगु खँयात लिपिवद्ध यानाः स्वयम्भूया बाखं स्वयम्भू पुराण रचना जूवःगु खः धयागु खँ नं छुं आश्चर्य मखु । यगु थजुयेव्यु, स्वयम्भू चैत्य प्रागैतिहासिक व ऐतिहासिक कालया छगू स्वापू खः, गुगुयात विस्तृत अन्वेषणया आधार मकासे अथे हे कल्पना धका धयाछ्वयेगु अन्वेषकपित गवले त्वःगु ज्या जुइ मखु ।

स्वयम्भू चैत्य महायान बुद्धधर्मया प्रतीक खः । ऐतिहासिक विवेचनाकथं महायान बुद्धधर्म भगवान् बुद्धया महापरिनिर्वाणं न्यासःदँ लिपा पण्डित नागार्जुनं स्थापना यागु धर्म खः धका विद्वान्तयगु धापू दुसां महायान, वज्रयान व न्ह्याग्गु याने नं भगवान् बुद्धपिसं प्रतिपादन याना- बिज्यागु चतुरार्य सत्य, आर्याष्टांग मार्ग व प्रतीत्यसमुत्पाद व हे खः । इले-विले वसपोलपिसं प्रतिपादन यानाबिज्यागु थ्व निर्वाणया लँ मनुखं त्वमंका छ्वैगुलि वसपोलपिसं समय समये व्याख्या यानाबिज्याइगु खँ खः । मुक्क ऐतिहासिकतायात जक कया खँल्हाय् धासा थेरवादं नं नीच्याह्य बुद्धपित स्वीकार यानाच्वंगु दु । थेरवादया गुगुं ग्रन्थे नं व नीच्याह्य बुद्धपिनिगु समय व कालया उल्लेख यानातःगु खनेमदु । अथे हे महायाने नं विशेष याना अष्टसहस्रिका प्रज्ञापारमिताय् गंगाया फिगोल प्रमाणं बुद्धपि जुयाबिज्यात धका उल्लेख जुयाच्वंगु दु । थेरवादं नं प्रत्येक व्यक्तिपि बुद्ध जुयेफु धका उल्लेख यानातःगु दु थें महायाने नं बोधिसत्व चर्याय् च्वना कुतः यासा प्रत्येक व्यक्तिपिसं बुद्धत्व प्राप्त याना क्लेशं मुक्त जुया निर्वाण प्राप्त यायेफु । उकिं शाक्यमुनि बुद्धया न्ह्यो मेपि सुं बुद्धपि मदु धका कीसं धायेमफु । हाकनं भगवान् बुद्ध शाक्यमुनि तथागतं उपदेश वियाबिज्यागु सूत्रत फुक्क थेरवादी त्रिपिटके हे जक दु धका धायेत नं मछि ।

भगवान् बुद्धं ४१ दँगु बैसे गृद्धकूट पर्वते निकोगु धर्मचक्र प्रवर्तन याना महायानया व्याख्या यानाबिज्यात धयागु खँ थेरवादं नं ख हे मखु धका धाये थाकु । उकिं बुद्धपिनिगु क्रमकथं थन नेपाले नं शाक्यमुनि तथागत बिज्याये न्ह्यो हे महायान बुद्धधर्मया प्रादुर्भावि ज्वी धुंकल ज्वी धका

अनुमान यायेकु । अले थ्व महायान बुद्धधर्मया प्रतीक स्वयम्भू चैत्य हे खः धका कीसं धायेकु । थथे खै हे मखु धकाः छक्कलं धायेत कीसं हाकनं अनुसन्धान व अन्वेषण याये मानि ।

मेगु खँ, स्वयम्भू चैत्ये विराजमान जुयाविज्यापि न्याहा ध्यानी बुद्धपि वैरोचन, अक्षोभ्य रत्नसम्भव, अमिताभ तथा अमोघसिद्धिपि थेरवादी बुद्धधर्मो मद्दु, उकि थ्व लिपाया कल्पना ज्वी धका धायेत महायान बुद्धधर्मया विशेषता व विशुद्धि श्वीकेगु आवश्यक जूवै, नापं विभिन्न समाधि व योगया अध्ययनं क्लेश क्षय यायेगु सिद्ध पुरुषपिनिगु कुतःयात थु हे मथ्वीकुसे महायान बुद्धधर्मयागु आन्तरिक योग साधनाद्वारा क्लेश क्षय यायेगु कुतःयात अबौद्ध व अवैज्ञानिक धका कीसं छक्कलं धाये थाकु । उकि स्वयम्भू चैत्य गुगु महायान बुद्धधर्मया जीवित प्रतीक खः कीगु न्होने छगू अध्ययन, अन्वेषण व अनुसन्धानया चुनौति जुया दंवयाच्चन, अले नेपाल प्राचीन समयनिसे बौद्ध देस खः धका प्रमाणित नं यानाच्चन ।

पं हेसराज शाक्यजुं गुलि मेहनत, परिश्रम याना थ्व ग्रन्थ रचना यानाविज्यात व कीसं तस्सकं हे प्रशंसा याये बहः जूगु कुतः खः । न्हियान्हित्थं स्यनावनाच्चंगु कीगु प्रवृत्ति, धार्मिक प्रवृत्तियात स्वयम्भू चैत्यया प्रभावं हाकनं छको शुद्धिकरण यायेत व विश्वया कुंकुलामं नेपाया बौद्ध संस्कृति, बौद्ध सभ्यता व बौद्ध धर्म दर्शन व कला अध्ययन यायेत वैपि देशी तथा विदेशी विद्वानपिनिगु निम्ति थ्व ग्रन्थ तःधंगु गुहालि जूवै, छायाधासा थुकी दुथ्यागु स्वयम्भू चैत्य सम्बन्धी तिथिमिति, नखःचखः, देवदेवीपिनिगु देगः, अभिलेख, जीर्णोद्धारकपि व इले-बिले स्वयम्भूइ पूजा यानाविज्यापि जुजुपि फुक्क फुक्क ऐतिहासिक तथ्य खः ।

बुद्धधर्मया मूल उद्देश्य दुःखीपि प्राणीपित दुःखं मुक्त याना निर्वाणपाखे छवयेगु खः । उकी मध्ये मनू दक्कसिवे चिन्तनशील, व चेतनशील जूगुलि मनुष्य जन्मे हे निर्वाण प्राप्त यायेगु यक्को साधन दुगुलि अनेक बुद्ध बोधिसत्वगणपिसं सकलसित करुणा तथा वसपोल सम्यक् सम्बुद्ध तथागतं कनाविज्यागु धर्म व धर्मधातु मण्डलया प्रतीकया रूपं स्वयम्भू ज्योतिरूप प्रादुर्भावि जूगुलि स्वयम्भूया महत्त्व श्वीका सकलसितं निर्वाण कामना याये फत धासा ग्रन्थकारया व प्रकाशकपिनि प्रयत्न सफल ज्वी, अस्तु ।

आशाराम शाक्य

PREFACE

THE SWAYAMBHU CHAITYA, enshrining within it the Great Eternal Beacon, has been the source of inspiration to all the aspirants for Nirvana, the state of perfect bliss and as such it has the most sacred place of pilgrimage not only for the Nepalese Buddhists but also for all the Buddhist of the world. Thousands of years before the beginning of the modern history i.e. from the hoary past of the Golden Age 'Satya Yuga' Swayambhu, the light of Buddhism shining brightly in Nepal, has been the golden gate through which can enter all the sentient beings suffering much for all sins they have committed to absolve themselves of their impurities. Mr. Hem Raj Sakya, an earnest research scholar has, in this work, been able to present the comprehensive study of Swayambhu Chaitya and the development of its historical perspective along with the chronological list of the seven Buddhas who visited this light of Dhamma and also the Bodhisattvas, kings, donors, the devotees and also those who attempted to destroy this Chaitya. This volume will be of immense help to all those who will undertake research on this Swayambhu Chaitya.

History tells us that Buddhism was introduced to Nepal by the members of the Ashokan Dhammaduta Mission which Emperor Ashoka sent to Nepal under the leadership of Princess Charumati as he had sent Rev. Mahendra Mahasthabir and Sangha Mitra his own son and daughter respectively to Ceylon for the propagation of the Four Noble Truths, the Noble Eightfold Paths and also the theory of dependent origination discovered by the Buddha with the sacred aim of absolving all the sentient beings of their sins and of ensuring them the path of peace and Nirvana. Emperor Ashoka had personally visited Lumbini, the birth place of Prince

Siddhartha, in 423. B.C. and after paying due homage to the sacred place had established a stone-pillar with an inscription 'Here verily was the Buddha born'. Though history does not support Emperor Ashoka's visit to the Kathmandu Valley, people still believe that he had come to this valley and after paying homage to the Swayambhu Chaitya had visited the City of Manjupattan and had built four earthen stupas in the four directions and one Chaitya in the centre of the city. To mark the occasion, the city was called Ashoka Pattan after Emperor Ashoka's name. This is the historical account of how Buddhism came to Nepal. But the most ancient civilization and culture of the Aryavarta i.e. the Himalayan region knows, as to how Manjusri had visited the Great Celestial lake (now Kathmandu Valley) to pay homage to the self-originated eternal beacon of the primordial Buddha blazing over a thousand-petalled lotus blooming brightly over this celestial lake called Naga-rhada, the abode of the serpents and how after draining the water off by cutting the southern low hills established human habitation but we have still to find out how much a historical figure Manjusri is. It is still the subject of research. This present work also the result of 22 years of unceasing research of Mr. Hem Raj Sakya will, we hope, be a great help to research scholars.

The Great Eternal Beacon self-originated as it was, was enshrined into this Chaitya by Prachand Deva, the king of Gauda in India with a sacred aim to preserve its religious sanctity against the possible destruction of it by the non-believers in the Iron Age (the Kali Yug). The king, after having ordained himself as the Shanti Kara Acharya of Mahayana Buddhism, had established 'Shantipura' the meditation cave and it was inside this cave that the Acharya finally passed into the state of Samadhi. The twenty seven meditation rooms of this cave and king Pratap Malla's entry into it to take the sacred book written with the blood of the serpent-king Karkotaka out for proper worship to have rains and save people from impending famine bear eloquent testimony to the historicity and authenticity of this cave. This event is also a fascinating subject for those interested in research on the origin of the Kathmandu Valley and the advent of Buddhism here.

Mr. Hem Raj Sakya, the author of this work has undertaken the intensive study of all the temples of gods and goddesses, monasteries,

Chaityas, inscriptions on stone, copper plates, bricks etc. found in and around the vicinity of the Swayambhu Chaitya. He has prepared the exhaustive list of all these antiquities.

The Swayambhu Chaitya has been the symbol of the development of arts along with the development of Mahayana Buddhism in this part of the world. The author has very aptly described the artistic structure of the Swayambhu Chaitya and of the five Meditating Buddhas. The importance of this work has been very much enhanced because of the author's attempt to explain the esoteric meaning of the four pairs of penetrating eyes found in the four direction of the central column of the Chaitya.

It is a matter of common knowledge that the Buddhism introduced here by the Ashokan Dhammaduta Mission was Theravadin in character but the Buddhism which was here before the mission came was Mahayanic. If there were any Buddhist temple here in those days it is the Swayambhu Chaitya. Swayambhu Purana makes a reference to Emperor Ashoka's visit to Swayambhu Chaitya to pay homage to the sacred chaitya and it can not be easily dismissed as not based on history. It is difficult to say that history has been able to record all the facts and historians also, quite possibly, might have overlooked many important events or presented facts in their own ways.

Swayambhu Purana, it is generally believed, is attributed to the fact that every five thousand years a Buddha appears in this world. An analysis of the geographical location and structure of the Kathmandu Valley makes our belief quite feasible to think that the Kathmandu Valley was possibly a big lake known as the Naga-rhada, the abode of serpents in the most ancient times. The existence of this lake is proved by geographical evidence even before Bipaswi Buddha came here to have the holy dip into this lake. Bipaswi Buddha is said to have thrown a lotus seed into the lake and it eventually led to the blooming of a thousand-petalled lotus over which appeared the self-originated Beacon which is the Swayambhu Jyoti-Rupa (the Beacon). Then came the Buddhas like Sikhi, Biswabhu, Krakuchhanda, Kanakmuni, Kasyapa and Sakyamuni to pay homage to the Jyoti-Rupa. It is thus calculated that the visits of these seven Buddhas cover a period of 35000 years which is not a big time-period when compared

with the infinity of time. Though the Swayambhu Purana is said to have been compiled and written only in the sixteenth century, it is the common knowledge that in those ancient days there was no system of recording the events in black and white and the system of whispering the teachings to the student's ear by the teacher was in vogue. No wonder it was only in sixteenth century that the legend of the Swayambhu Maha Chaitya might have been compiled and written. Whatever may be the fact, the Swayambhu Chaitya has been a link between the pre-historic and historic times and as such it would not be fair for the research scholars to dismiss the legend of the Swayambhu Chaitya as mere imagination without undertaking through research.

The Swayambhu Chaitya is the symbol of Mahayana Buddhism. History tells us that the Mahayana Buddhism appeared five hundred years after the passing away of the Sakyamuni Buddha as a result of Pt. Nagurjuna's philosophy on the theory of voidness (Sunyata) but the doctrine of the Four Noble Truths, the Noble Eightfold Paths and the theory of dependent origination remain the same in Theravada, Mahayana, Bajrayana etc. Buddhas appear time and again only to refresh the universal doctrine they have been preaching among the people for their salvation as they are apt to forget them. If we are to note only in terms of history we find that Theravada has also recorded the appearance of twenty eight Buddhas but no detailed references about them have been found in any historical works of Pali canon. In Mahayana too specially in Asta Sahasrika Pragyaparamita references have been made to indicate that there had been as many Buddhas as there are sand grains in the sea. Theravada believes that everybody is a potential Buddha and Mahayanists also are of confidence that through the practice of a Bodhisattva's life one can achieve Nirvana. It would, therefore, be improper to think that there were no Buddhas before the Sakyamuni Buddha. It would also not be proper to conclude that the Pali Tripitakas have been able to record all the discourses the Lord Sakyamuni had delivered in different times and places.

It is an indisputable fact that the Sakyamuni had delivered the second discourse on the wheel of Law, this time on Mahayana in the Gridhakuta Mount at the age of forty one. As such when we study the chronology of the Buddhas we can easily guess as to how Buddhism had already appeared

here even before the advent of Sakyamuni Buddha. Swayambhu Chaitya has thus come to establish itself as the symbol of Buddhism. To dismiss it as pleasant phantasy we shall have to take recourse to the intensive research.

The conception of the five Dhyani Buddhas viz. Bairochana, Akshyovya, Ratna Sambhava, Amitabha and Amoghsiddhi enshrined in Swayambhu Chaitya are the Mahayanic conceptions. As such to think they are the later imaginations we have got to have the comprehensive understanding of the special feature of Mahayana Buddhism and the scientific characteristics of Yoga and Samadhi and their use in eliminating all the cravings which are the hindrances in the path of Nirvana. They, therefore, can not be rejected as non-Buddhistic and un-scientific. The Swayambhu Chaitya the living symbol of Mahayana Buddhism is standing before us as a challenge to the spirit of research and investigation. It has also been testifying that Nepal had gone Buddhist even in the hoary past.

Mr. Hem Raj Sakya deserves our appreciation for this work which is the result of his 22 year's research. It can be easily hoped that this pious work will enable us to keep the light of the Dhamma ever blazing and help people maintain the Mahayani tradition of philosophy, art and culture in Nepal besides being a great help even to the foreign scholars who come to Kathmandu to have comprehensive study of Buddhist art and culture. All the references to the dates of different religious and cultural functions are factual.

The sacred aim of Buddhism is to free the sentient beings from the bondage of suffering and to clear their ways to Nirvana. Human beings are the most conscious and intelligent creatures. They can achieve Nirvana in their own life if they work hard. Buddhism provides them opportunities to attain Nirvana. Buddhas and Bodhisattvas with their kindness and compassion to the suffering beings have always come forward to guide the suffering people. The Swayambhu Chaitya is the symbol of what Buddhism stands and as such if the readers will be able to move

any concrete step in this direction, the author and the publisher of this momentous work will feel themselves lucky and successful in their efforts.

May all living beings be happy.

Patan Multiple Campus
Department of English
Tribhuban University
Kathmandu, Nepal.
28th March, 1978.

Asha Ram Sakya

१. कालीहृदया दृश्य	१
२. विपश्ची बुद्ध आगमन	३
३. शिखी तथागत आगमन	५
४. विश्वभू तथागत आगमन	८
५. मञ्जुश्री बोधिसत्व आगमन	९
६. मञ्जुश्रीयात गुह्येश्वरीं दर्शन व्यूगु	१३
७. गगनगञ्ज बोधिसत्व आगमन	१५
८. मञ्जुश्रीया नेतृत्व्य मञ्जुपट्टन निर्माण एवं धर्माकरया शुभराज्याभिषेक	१६
९. ऋकुच्छन्द तथागत आगमन	२०
१०. रतिशर्मा ब्राह्मण्या स्वयम्भू दर्शन	२३
११. गोकर्ण राजकुमारया स्वयम्भू दर्शन व पुण्यतीर्थस तपस्या	२५
१२. वज्रपाद पण्डितया स्वयम्भू दर्शन एवं निर्मलतीर्थस तपस्या	२६
१३. दीनचूड राजकुमारया स्वयम्भू दर्शन व निधानतीर्थस तपस्या	३२
१४. अज्ञानसिन्धु राजाया स्वयम्भू दर्शन एवं ज्ञानतीर्थस तपस्या	३५
१५. स्वह्म अलक्षिणिपिनि स्वयम्भू दर्शन तथा सुलक्षणतीर्थस तपस्या	३७
१६. दानासुर पत्नीया स्वयम्भू दर्शन व जयतीर्थस तपस्या	३९
१७. श्रीस्वयम्भू ज्योतिरूपया सेवा निमित्त समन्तभद्र बोधिसत्वपाखे कुलिकया दमन	४१
१८. ओदियानाचार्यया स्वयम्भू दर्शन व अष्टसिद्धि साधन	४४
१९. स्वयम्भूया विषय कयाः खगर्भ बोधिसत्वया व्याकरण	४७
२०. धर्माकर राजाया उत्तराधिकारी राजा धर्मपाल नेपालया शासक	४९
२१. कनकमुनि तथागत आगमन	५०
२२. महापण्डित भिक्षु धर्मश्रीमित्र आगमन	५१
२३. काश्यप तथागत आगमन	५६

२४. शान्तिकराचार्यया स्वयम्भू प्रतिष्ठा कर्म	५८
२५. शान्तश्री आचार्यजुया सम्बिधानत्वय् गुणकामदेव राजाद्वारा नागसाधन	६१
२६. शाक्यमुनि तथागत आगमन	६७
२७. स्वयम्भू गोपुच्छाग्र पर्वतस मैत्रेय बोधिसत्वया उपस्थिति	७२
२८. आरण्यवासी चूडा भिक्षुणीया स्वयम्भू महाचैत्य-सेवा भक्ति	७४
२९. हारिती महायक्षणीया स्वयम्भू महाचैत्य सेवा	७६
३०. स्वयम्भू महाचैत्य दर्शनार्थ सम्राट् अशोक आगमन	७८
३१. पशुपति महादेवं पञ्चबुद्धात्मक स्वयम्भूया मुखलं पुङ्गु परम्परा	८२
३२. स्वयम्भू महाचैत्य दर्शनार्थ सिद्ध नागार्जुन आगमन	८७
३३. स्वयम्भू महाचैत्य दर्शनार्थ आचार्य वसुबन्धु आगमन	८९
३४. स्वयम्भू महाचैत्यया राजा वृषदेवद्वारा पुनर्निर्माण	९१
३५. स्वयम्भू स्थित बौद्ध विहार निति राजा शंकरदेवद्वारा जग्गा प्रदान	९३
३६. काठमाण्डू उपत्यकाय् दुनेच्वंगु सर्वप्राचीन स्वयम्भू स्थित शिलापत्र	९४
३७. स्वयम्भू महाचैत्य स्थानय् राजा धर्मदेवया धर्मशाला निर्माण	९६
३८. स्वयम्भू महाचैत्ययात राजा मानदेवद्वारा छत्र समर्पण	९८
३९. स्वयम्भू महाचैत्य दर्शनार्थ गुणादय ब्राह्मण आगमन	१००
४०. स्वयम्भू महाचैत्य (साहो गुं विहार) प्रति राजा अंशुवर्माया आस्था	१०२
४१. राजा नरेन्द्रदेवया स्वयम्भू पूजा व गुरु शान्तिकर दर्शन	१०७
४२. स्वयम्भू महाचैत्यप्रति आचार्य वन्धुदत्त व राजा नरेन्द्रदेवया आस्था	११०
४३. ताङ्गवंशया इतिहासय् स्वयम्भूया चर्चा	११२
४४. चीनया वादशाहयागु उपहार ज्वनाः स्वयम्भूया दर्शन याःवःहा वाङ्महानचे	११४
४५. सुनयश्रीमित्रया स्वयम्भू महाचैत्य दर्शन	११७
४६. स्वयम्भू चैत्य दर्शनार्थ शान्तरक्षित् नेपाल आगमन	११९
४७. गुरु पद्मसम्भवया स्वयम्भू दर्शन व श्मशान योगचर्या	१२१
४८. अतिशा दीपङ्करया स्वयम्भू महाचैत्य दर्शन	१२२
४९. अन्तिम भारतीय बौद्ध भिक्षु पण्डित वनरत्न शान्तिपुरो विहारस	१२३
५०. स्वयम्भू वैरोचनयाथाय् ख्यचाय्के गुठी तयाब्युगु	१२४
५१. तिब्बती भिन्नु धर्मस्वामिजुया स्वयम्भू दर्शन एवं विद्याध्ययन	१२५
५२. केशचन्द्रजुयात स्यंगु वन प्रवेशया वरदान	१२७
५३. शाक्यभिक्षु मैत्रिचन्द्रद्वारा स्वयम्भू चैत्य जीर्णोद्धार	१३०
५४. जितारि मल्ल राजाया स्वयम्भू महाचैत्य दर्शन	१३२
५५. रिपु मल्ल जुजुया स्वयम्भू महाचैत्य दर्शन	१३३

५६. स्वयम्भू महाचैत्यप्रति शमस्सुहीनया आक्रमन	१३४
५७. महापात्र राजहर्ष भल्लोकद्वारा स्वयम्भू महाचैत्य जीर्णोद्धार	१३७
५८. महामन्त्री मदनराम वद्धनपाखे स्वयम्भू महाचैत्य एवं एकजटी जीर्णोद्धार	१४०
५९. स्वयम्भूस जोतिराजं बही दयकूगु	१४२
६०. जुजु जयस्थिति मल्लया स्वयम्भूप्रति आस्था	१४४
६१. राजा ज्योतिर्मल्लद्वारा स्वयम्भू महाचैत्य जीर्णोद्धार	१५०
६२. स्वयम्भू महाचैत्यस अनन्तजीव भारीया मयन छत्रारोहन	१५२
६३. स्वयम्भूया हलपति प्यख्यरसं सुवर्ण छत्र समर्पण	१५३
६४. राजा शिवसिंह मल्लद्वारा स्वयम्भू महाचैत्यप्रति सुवर्ण छत्र समर्पण	१५४
६५. स्वयम्भू महाचैत्यस वज्रमलः जूवयाः शाक्यभिक्षु जयलक्षजुद्वारा जीर्णोद्धार	१६०
६६. स्वयम्भू जीर्णोद्धार निम्ति महारानी गङ्गादेवीया पूर्ण सहयोग	१६२
६७. स्यंगुस प्वं गात, शान्तिपुरीस खुं वल	१६३
६८. स्वयम्भू महाचैत्य जीर्णोद्धार निम्ति जुजु लक्ष्मीनरसिंहया पूर्ण सहयोग	१६४
६९. स्यंगुदेवया निम्ति जुजु लक्ष्मीनरसिंहजुया पाखे विसः नियुक्त यानाव्यूगु	१६६
७०. स्वयम्भू महाचैत्यय् रूपराज दंगूरीया सख्याःपा	१६७
७१. स्यंगुया कतिनियातयाखुनु तच्चोगु वेगं प्वं गात	१६८
७२. स्यंगुया वनस मगरं सिमा ध्यंवलय् हि म्हुयावःगु	१६९
७३. स्वयम्भू शान्तिपुरीस जुजु लक्ष्मीनरसिंहया आज्ञानुसार महामेघ साधन	१७०
७४. स्वयम्भू महाचैत्यया पिखाद्वारस सुवर्ण तोरण लामा श्यामारजुं दोहलपिल	१७२
७५. स्वयम्भू महाचैत्यप्रति सुवर्ण बिमान राजा लक्ष्मीनरसिंहद्वारा समर्पित	१७३
७६. स्वयम्भू महाचैत्यस शाक्यभिक्षु हाकुजुद्वारा मयन छत्रारोहण समर्पित	१७४
७७. स्वयम्भूप्रति जुजु लक्ष्मीनरसिंहया लस्ताः पूजा	१७७
७८. स्वयम्भू महाचैत्यस गोमिराज भारीया सख्याःपा	१७८
७९. जुजु लक्ष्मीनरसिंहजुं स्वयम्भूस नित्यपूजा दयकूगु	१७९
८०. स्वयम्भू महाचैत्य जीर्णोद्धार-शाक्यभिक्षु मञ्जुदेव व जुजु लक्ष्मीनरसिंहया संयुक्त प्रयासद्वारा	१८०
८१. स्वयम्भू तैनय् विशाल अक्षोभ्य बुद्ध स्थापना- संस्थापक रथन भारी	१८१
८२. हाकुजुया स्वयम्भू निमन्त्रणा	१८३
८३. स्वयम्भूया पञ्चबुद्धयाके तिसां तिइकेगु व्यवस्था	१८४
८४. शाक्यभिक्षु सिद्धिमुनि देवजु शान्तिपुरीस प्रवेश	१८५
८५. स्वयम्भू महाचैत्य दर्शनार्थ चीनया स्तूनीनजु आगमन	१८६
८६. स्वयम्भू स्थल बुद्धधर्म अध्ययन निम्ति १७ शदी तकं विद्याध्ययन केन्द्र	१८७

८७. स्वयम्भू महाचैत्यस गजू द्वहलप्युगु- जुजु प्रताप मल्लजुया	१६७
८८. स्वयम्भूस कवीन्द्र मल्ली तकाया आयस्तां महादी च्याकेगु गुठी तःगु	१६८
८९. साह्येगु क्वस्सं गौचरण निम्ति जग्गा प्रदान याःगु	१६९
९०. राजा प्रताप मल्लया शान्तिपुर प्रवेश	२००
९१. जुजु कवीन्द्र प्रताप मल्लया स्वयम्भू महाचैत्यया सेवा	२०५
९२. स्वयम्भूस वाद्य सहित तुतः ब्वनेगु गुठी	२०६
९३. जुजु कवीन्द्र प्रताप मल्लया निकोगु शान्तिपुरी प्रवेश	२१०
९४. महापण्डित जयमुनिजुया स्वयम्भूस स्वयम्भू पुराण व्याख्या	२११
९५. जल वृष्टि निम्ति स्वयम्भूस प्रार्थना गुठी	२१४
९६. स्वयम्भू महाचैत्यया लँ ल्ह्वनेगु निम्ति जुजु मृपेन्द्र मल्लया सहायता	२१५
९७. स्वयम्भू गजुलिइ वेँ थहांवन	२१६
९८. राजा पार्थिवेन्द्र मल्लद्वारा स्वयम्भू महाचैत्यया जीर्णोद्धार	२१७
९९. स्वयम्भू महाचैत्यया अग्र्य राजा भूपालेन्द्र व मांहा ऋद्धिलक्ष्मी कौट्याहूति महायज्ञ याकूगु	२१८
१००. स्वयम्भू महाचैत्यया अग्रस जुजु योगनरेन्द्र मल्लद्वारा घण्ट समर्पण	२१९
१०१. स्वयम्भू महाचैत्य स्थानय् राजा भाष्कर मल्ल नागसाधन याकूगु	२२०
१०२. स्वयम्भू महाचैत्य जीर्णोद्धार कार्यय् जुजु भाष्कर मल्लया पूर्ण सहायता	२२१
१०३. स्वयम्भूया पञ्चबुद्ध निमन्त्रणा-प्रार्थी जुजु भाष्कर मल्ल	२३१
१०४. स्वयम्भू महाचैत्य जीर्णोद्धार कार्यस महादेव, गणपति, कुमार एवं विष्णुया उपस्थिति	२३२
१०५. स्वयम्भू जंगल आरक्षा निम्ति जुजु जयप्रकाश मल्लया सन्देश	२३३
१०६. स्वयम्भू महाचैत्यप्रति जुजु जयप्रकाश मल्लया कविता पाठ	२३५
१०७. स्वयम्भू महाचैत्यया गुणानुस्मरणय् जुजु रणजीत मल्लया पद्य रचना	२३७
१०८. स्वयम्भूप्रति जुजु पृथ्वीनारायण शाहया आस्था	२४०
१०९. स्वयम्भू महाचैत्य जीर्णोद्धार कार्यस जुजु जयप्रकाश मल्ल एवं पृथ्वीनारायण शाहया सहयोगया निम्ति पूर्ण आश्वासन	२४२
११०. स्वयम्भू महाचैत्य जीर्णोद्धार निम्ति वज्र आयुरीशमणि लामाजुया महान् संकल्प	२४४
१११. स्वयम्भू व शान्तिपुर विषय कयाः लामा पाल्देन् येशेताशिजुं श्री ५ वडामहाराजयात चेतावनी	२५८
११२. श्री ५ रणवहादुर शाहया शान्तिपुर प्रवेश परिणाम	२६०
११३. श्री ५ गीर्वाणयुद्ध विक्रमया शान्तिपुरस महापूजा गुठी	२६३
११४. स्वयम्भू महाचैत्यप्रति लामा देवाधर्माजुया जग्गा व ग्राम प्रदान	२६७
११५. महापण्डित शाक्यभद्रया स्वयम्भूप्रति श्रद्धा चन्दा	२६९

११६. स्वयम्भू महाचैत्यस लामा श्यामार्पाजुया दिव्य घण्ट समर्पण व शिलापत्र जीर्णोद्धार	२७०
११७. स्वयम्भू महाचैत्यया प्राचीन घण्ट लामा थिलेन्द्रजद्वारा पुनर्निर्माण	२७१
११८. लामा धर्मसिद्धिसागरजुया स्वयम्भूस दिव्य घण्ट समर्पण	२७२
११९. स्वयम्भू महाचैत्यनिसे तीर्थ सेवा	२७३
१२०. स्वयम्भू महाचैत्यया पूजा निमित्त वार्षिक खर्च नियत- भीमसेन थापापाखे	२७४
१२१. जुजु गीर्वाणयुद्ध व राजेन्द्र विक्रमया सदिच्छानुसार स्वयम्भू महाचैत्यया पुनर्जीर्णोद्धार	२७५
१२२. जीर्णोद्धार कार्य सिद्ध जूगु विषयय् सँदेयात सन्देश छ्वःगु	२८६
१२३. स्वयम्भू महाचैत्य गुला व नीच्यान्हु लिपा पुनर्जीर्णोद्धार	२९०
१२४. स्वयम्भू चैत्यया वैरोचन तथागतयात लुँपलि चिन	२९१
१२५. पण्डित अमृतानन्दलिसे हजसनजुया स्वयम्भूया मूर्ति व चैत्य अध्ययन	२९२
१२६. स्वयम्भूया चाकलय् तेजनारां तुलाधरं त्वहंतं सियाव्यूगु	२९८
१२७. स्वयम्भू महाचैत्यया च्वलामू व लुँस्वांमाः तस्सकं वाफ्य वयाः तोधुल	२९९
१२८. स्वयम्भू महाचैत्यस न्याद्वः व सच्छिवः पञ्चोपचार पूजा याकूगु	३००
१२९. स्वयम्भूप्रति विहार स्वरूप छेँ शुभ संकल्प	३०१
१३०. धनसिंह साहुया स्वयम्भू जीर्णोद्धार	३०२
१३१. स्वयम्भूस लक्षावती पाठ याय्गु गुठी तःगु	३०४
१३२. स्वयम्भूस प्रज्ञापारमिता युक्त त्वहंथां स्वाःगु	३०५
१३३. स्वयम्भू अमिताभया न्ह्योने निह्य भव्य रूप आर्यतारा मूर्ति प्रतिष्ठा	३०६
१३४. स्वयम्भू महाचैत्यया पूर्वपाखेच्वंगु कचादेगःया जीर्णोद्धार	३०८
१३५. स्वयम्भू अमिताभ बुद्धया क्वस्सं ह्याय्खा द्वहलप्यूगु	३०९
१३६. स्वयम्भूस वज्रसत्त्व युक्त स्तम्भ स्वाःगु	३१०
१३७. स्वयम्भू महाचैत्यय् वहःपातां भुनेगु देवशम्शेरया महान् संकल्प	३११
१३८. स्वयम्भू तैनय् त्वहंत्वाथःया व्यवस्था	३१३
१३९. सिक्किमया जुजु गुम्बा पुनर्निर्माण यानाव्यूगु	३१५
१४०. स्वयम्भू जीर्णोद्धारार्थ लामा देवाधर्मायात भोतु पांडेजुया पौ	३१७
१४१. शाक्यश्री लामाजुयागु महान् शुभ संकल्पकथं दुक्पा लामाजुयागु निर्देशनय् धमां साहुया पाखे स्वयम्भूया जीर्णोद्धार	३१९
१४२. स्वयम्भूया गुंगः कचादेगः साहु हर्षसुन्दर रामसुन्दरद्वारा निर्मित	३२७
१४३. स्वयम्भू स्थानय् स्वर्देयकं पण्डित बुद्धिराज शाक्यद्वारा धर्म व्याख्यान	३३०
१४४. गुरु धर्मादित्यजुया स्वयम्भू दर्शन व किनूवाहाः जीर्णोद्धारया प्रथम आयोजक	३३२
१४५. स्वयम्भू जीर्णोद्धार याय्त ज्यामि जुयावःहा छिरिङनोर्बु लामाजुया देन	३३५
१४६. स्वयम्भू महाचैत्य दर्शनार्थ क्यान्छ्या लामाजु आगमन	३३७

१४७. स्वयम्भूस लाठसाहेब जुद्धशम्शेरद्वारा सवालाख छोपूजा	३४१
१४८. स्वयम्भू दर्शनार्थ चु'गुम्बानिसे' दण्डवत यानाः वःहा भिक्षु धर्मगुरुजु	३४४
१४९. स्वयम्भू महाचैत्यपाखे' ज्योतिरश्मि दर्शन व्यूगु	३४६
१५०. महापण्डित राहुलजुया स्वयम्भू दर्शन व शिलालेख अध्ययन	३४८
१५१. डा. विनयतोष भट्टाचार्यजुया स्वयम्भू दर्शन व मूर्तिकला अध्ययन	३५०
१५२. स्वयम्भूया जंगलय् खानी विभागपाखे' लु'खानी लुइकूगु	३५३
१५३. स्वयम्भूस ज्ञानमाला भजन खलःया सेवा भक्ति	३५५
१५४. विविध चैत्य व मूर्तितय्गु जीर्णोद्धार अभियान	३६१
१५५. स्वेनामृतिजिन् लामाजुया स्वयम्भूस काङ्ग्युर पाठ व प्रदक्षिणा	३६३
१५६. स्वयम्भूस नित्यपूजा पर्वपूजा निमित्त बसाः ज्वलं द्रहलप्युगु	३७०
१५७. हुलाक सेवा विभागया स्वयम्भूप्रति आस्था	३७१
१५८. स्वयम्भू विकास मण्डल स्थापना	३७४
१५९. पण्डितगुरु रत्नबहादुरजु' स्वयम्भूयात स्वायम्भू पुराण द्रहलप्युगु	३८०
१६०. कलाविद् जोगमान शाक्यजुया धातुमय स्वयम्भू महाचैत्य दय्केगु शुभसंकल्प	३८४
१६१. स्वयम्भूप्रति गोरखापत्र संस्थानया आस्था	३८७
१६२. अन्तरराष्ट्रिय बौद्ध प्रतिनिधि मण्डलपिनि स्वयम्भू महाचैत्य दर्शन व पूजन	३८८
१६३. प्रधानमन्त्री चाउएनलाईया स्वयम्भू दर्शन व निरीक्षण	३९३
१६४. चीन सांस्कृतिक प्रतिनिधि मण्डलया स्वयम्भू तथा मञ्जुश्री दर्शन	३९५
१६५. उपत्यकाञ्चल तात्कालीन सुधार समितिद्वारा स्वयम्भूप्रति छु' सेवा	३९७
१६६. पण्डित जवाहरलाल नेहरुजुया स्वयम्भू दर्शन तथा आनन्दकुटीस भाषण	३९८
१६७. नेपाल राष्ट्र बैंकया स्वयम्भूप्रति आस्था प्रतिष्ठा	३९९
१६८. स्वयम्भूस भव्य रूपं बुद्धजयन्ती जूगु	४०३
१६९. प्रधानमन्त्री उनूया स्वयम्भू महाचैत्य दर्शन व पूजन	४१७
१७०. डेपुटी डाइरेक्टर कृष्णदेवद्वारा स्वयम्भू स्थित मूर्तिकला सर्वेक्षण	४१८
१७१. स्वयम्भू महाचैत्यप्रति पुरातत्त्व विभागया सहयोग	४२०
१७२. राष्ट्रपति मार्शल अयूबखाँया स्वयम्भू दर्शन	४२२
१७३. जर्मनीया राष्ट्रपति हेनरो लुक्केद्वारा स्वयम्भू पूजा	४२३
१७४. महासचिव उथान्तजुया स्वयम्भू दर्शन व पूजन	४२४
१७५. स्वयम्भू क्षेत्रय् अन्तरराष्ट्रिय सफाई आन्दोलन सेवा	४२६
१७६. डेनमार्कया युवराज्ञीद्वारा स्वयम्भू पूजा	४२८
१७७. स्वयम्भूया अग्रय् छद्म मिसाया आभरण अनशन	४२९
१७८. ग्वाल्वा कर्मापा लामाया स्वयम्भू दर्शन व अभिषेक प्रदान	४३१

१७६. स्वयम्भू वन संरक्षण व आस्था निम्ति श्री ५ सरकारया हजुरीस बित्तिपत्र	४३३
१८०. स्वयम्भूप्रति महाकवि चित्तधरजुया कलात्मक वस्तु उपहार प्रदान	४३७
१८१. स्वयम्भू महाचैत्य निम्ति उपत्यका मर्मती डिभिजनया सहयोग	४४१
१८२. स्वयम्भू महाचैत्यप्रति छद्म चित्रकारया शान्तिपुरीस चित्रपूजा	४४२
१८३. स्वयम्भूनिसे चन्दा संकलन शुभारम्भ लुम्बिनी विकास निम्ति	४४६
१८४. लुम्बिनी विकास योजना चन्दा संकलन समितिया आह्वान	४४८
१८५. भिक्षु प्रियदर्शी महास्थवीरद्वारा स्वयम्भू दर्शन व प्रवचन	४४९
१८६. फुजिई गुरुजुया स्वयम्भू दर्शन	४५२
१८७. स्वयम्भूस युवा कलाकारपिनिगुपाखे बुद्धजीवनी प्रदर्शनी	४५५
१८८. इरानी शाहज्यादीद्वारा स्वयम्भू दर्शन	४६१
१८९. स्वयम्भूस ज्ञानमाला भजन सम्मेलन विशेष कार्यक्रमकथं	४६२
१९०. स्वयम्भू जंगलया शोभा वृद्धि निम्ति स्वद्वःति सिमा पिङ्कूगु	४६७
१९१. स्वयम्भूस श्री ५ अधिराजकुमारीपिनिगुपाखे वृक्षरोपन जूगु	४६९
१९२. महर्षी महेशयोगीया स्वयम्भू दर्शन	४७०
१९३. स्वयम्भूप्रति महाकवि चित्तधरजुया निक्कःगु सांस्कृतिक वस्तु उपहार प्रदान	४७१
१९४. स्वयम्भू महाचैत्यया हलपौया छत्र, गजू क्लडल आदि मर्मत	४७३
१९५. स्वयम्भूया न्होने छन्हुसंतुं लक्षावती प्रज्ञापारमिता पाठ याकूगु	४७५
१९६. स्वयम्भू डांडा सुरक्षित निम्ति आवास तथा भौतिक परियोजनाया सेवा	४७८
१९७. आयुष्मान् ति. योशिओकाजुया स्वयम्भू दर्शन	४७९
१९८. भूमिखेल (भुइख्यः)	४८३
१९९. सिखःत्वहं	४८६
२००. पलेस्वांपुखू (भुइख्यःपुखू)	४८७
२०१. ल्वहंहिति	४८८
२०२. बुद्धपादुका मण्डल	४८८
२०३. स्वयम्भू प्रवेश द्वार	४९०
२०४. माणधुङ्गयुर	४९४
२०५. विशाल अक्षोभ्य बुद्धमूर्ति	४९८
२०६. प्यकुंलाःगु गालय् मण्डल	४९९
२०७. गणेश व कुमार	५००
२०८. आजु अजि (भैरव भैरवी)	५००
२०९. चतुर्महाराज	५०१
२१०. सूर्यमुख गणेश, दक्षिणमुख गणेश	५०२

२११. काली महानाग (वासुकी नागराज)	५०३
२१२. पञ्चबुद्धया बाहन (सिंह, गज, अश्व, मयूर, गरुड)	५०४
२१३. योगाम्बर, गुह्येश्वरी	५०५
२१४. धर्मपाल (सुशक्ति भैरव)	५०५
२१५. धर्मधातु वागीश्वर मण्डल	५०५
२१६. विशाल रूप सुवर्ण वज्र	५०७
२१७. अनन्तपुर, प्रतापपुर	५१०
२१८. विहङ्गम दृश्य स्थान	५११
२१९. वसुपुर	५११
२२०. ग्वहः (पञ्चाङ्ग निर्देशिकापत्र)	५१३
२२१. वायुपुर (फसखाद्यो)	५१४
२२२. मङ्गल बहुद्वार चैत्य (ताशिगोर्मी छोर्तेन्)	५१५
२२३. स्वयम्भू मूर्ति संग्रहालय	५१८
२२४. चिन्तामणि लोकेश्वर	५२१
२२५. देवाधर्मा गुम्बा (मार्मैल्हाखाङ)	५२२
२२६. हारती मन्दिर (रत्नपीठ)	५२४
२२७. स्वयम्भू बही	५२८
२२८. अन्तरराष्ट्रिय बौद्ध ग्रन्थालय	५२९
२२९. देवावतार बोधिसत्व (भविष्यव्याकरण मुद्रा बुद्ध)	५३०
२३०. स्वयम्भू क्वाःपाःछे	५३१
२३१. स्वयम्भू चैत्य पार्क	५३१
२३२. सखाः दय्केगु थाय्	५३२
२३३. गुप्तगत सर्वप्राचीन अभिलेख	५३३
२३४. नागपुर (बशिगाः)	५३३
२३५. कर्मराज गुम्बा	५३४
२३६. पवन भैरव	५३७
२३७. स्वयम्भू भजन सतः	५३७
२३८. बुद्धप्रति मार आक्रमण	५३८
२३९. वैरोचन तथागत	५४१
२४०. वज्रधात्वेश्वरी (प्रज्ञापारमिता)	५४२
२४१. अक्षोभ्य तथागत	५४३
२४२. सप्तलोचनी तारा	५४४

२४३. रत्नसम्भव तथागत	५४५
२४४. मामकीतारा	५४६
२४५. अमिताभ तथागत	५४६
२४६. पाण्डुरातारा	५४८
२४७. अमोघसिद्धि तथागत	५४८
२४८. आर्यतारा	५४९
२४९. स्वयम्भू महाचैत्यया माणे चक्का	५५०
२५०. दीपावली चाकःमत (चाकःदलू)	५५०
२५१. गणावर्त्त मण्डल	५५३
२५२. वज्रसाधु महाकाल	५५७
२५३. विरूपाक्ष मूर्ति	५५९
२५४. हरिहरिहरिवाहन लोकेश्वर	५५९
२५५. यज्ञशाला (यज्ञमण्डप)	५६१
२५६. अग्निपुर	५६४
२५७. गुरु मञ्जुश्री पादुका	५६५
२५८. विशाल बुद्ध मूर्ति	५६६
२५९. अरपचन वागीश्वर महामञ्जुश्री (नामसंगीति)	५६६
२६०. योगाम्बर स्थान (नमसि कौशि)	५७१
२६१. शान्तिपुर	५७२
२६२. वसुवन्धु स्मृति चैत्य	५८३
२६३. मञ्जुश्री पर्वस्थान	५८४
२६४. गोपुच्छाग्र चैत्य (पुलां स्यंगु)	५८९
२६५. पर्वस्थान (धर्मचक्र विहार)	५९१
२६६. छ्वेकीखोर्लो गुम्बा (धर्मचक्र विहार)	५९३
२६७. पर्वस्थानया नवचैत्य	५९४
२६८. धार्मिक अवशेषतय्गु संग्रह क्वथा	५९५
२६९. मैत्रि गुम्बा (सुमति मैत्रिशासन विहार)	५९६
२७०. आनन्द कुटी (श्रीलङ्काचैत्य विहार)	५९८
२७१. बोधिवृक्ष सिमा	५९९
२७२. श्रीलङ्काचैत्य	६०१
२७३. आनन्द कुटी विद्यापीठ	६०१
२७४. ध्यानकुटी (योगाश्रम)	६०२

२७५. किण्डोल विहार	६०३
२७६. चीधंगु कितूबाहा: (तेजकीर्ति विहार)	६०७
२७७. महापरिनिर्वाण मूर्ति	६०८
२७८. बुद्धजननी मायादेवी	६०९
२७९. धर्मचक्र शाक्यमुनि बुद्ध	६०९
२८०. शूक्ष्म बुद्धगया मन्दिर	६०९
२८१. जगतोद्धार महाविहार (बौद्ध छात्रावास)	६१०
२८२. फेल्गेलिङ्ग गुम्बा	६१२
२८३. सिद्धि विहार	६१६
२८४. स्वयम्भू स्थित लिच्छवीकालीन अभिलेख	६१९
२८५. स्वयम्भू स्थित मल्लकालीन अभिलेख	६२०
२८६. स्वयम्भू स्थित शाहकालीन अभिलेख	६३०
२८७. मञ्जुश्री पर्वस्थानया संक्षिप्त मूर्ति विवरण	६६०
२८८. गोपुच्छाग्र चैत्यस्थानया	"
२८९. शान्तिपुर स्थानया	"
२९०. शान्तिपुरया धर्मशालास च्वंगु	"
२९१. शान्तिपुरया न्ह्योनेपाखे च्वंगु	"
२९२. अग्निपुरया लिकच्वंगु	"
२९३. चःस्वां सिमाया चाकलय् च्वंगु	"
२९४. नागपुरया जःखः च्वंगु	"
२९५. प्रतापपुर अनन्तपुर लिकसं च्वंगु	"
२९६. वसुपुरया दुनेच्वंगु	"
२९७. वापुपुर पाखे च्वंगु	"
२९८. ताशिगोर्मे चैत्यया लिकच्वंगु	"
२९९. अमिताभ बुद्धया न्ह्योनेपाखे च्वंगु	"
३००. पुलांगु गुम्बाया छ्यलिङ्ग च्वंगु	"
३०१. हारितीया भण्डार क्वथाय् च्वंगु	"
३०२. स्वयम्भू बहीया दुने चाकलय् च्वंगु	"
३०३. " दुने भगवान्द्योथाय् च्वंगु	"
३०४. " महाकाः छ्यलिङ्ग च्वंगु	"
३०५. " बहीफःलिसे च्वंगु	"
३०६. चैत्यपार्कय् च्वंगु	"

३०७. कर्मराज गुम्बाय् चवंगु	६८२
३०८. पिखाद्वारया कवस्सं चवंगु मूर्तिया विवरण	६८४
३०९. स्वयम्भूया न्ह्योनेचवंगु तँया जःखः चवंगु मूर्तिया विवरण	६८५
३१०. स्वयम्भूया उख्ये थुख्ये चवंगु विविध चैत्य विवरण	६८८
३११. स्वयम्भू जंगलया उख्ये थुख्ये चवंगु मन्त्र अंकित अभिलेख	७२८
३१२. स्वयम्भू वीजारोपण चैत्र पूर्णिमा	७३९
३१३. स्वयम्भू उत्पत्ति- आश्विन पूर्णिमा	७४०
३१४. स्वयम्भू प्रतिष्ठा कर्म- कार्तिक पूर्णिमा	७४०
३१५. गुह्येश्वरी विश्वरूप दर्शन ब्यूगु- मार्गकृष्ण नवमी	७४१
३१६. सम्बरोदय दिशी- मार्गकृष्ण दशमी	७४१
३१७. मञ्जुश्री आगमन- मञ्जुपञ्चमी	७४२
३१८. शान्तिपुरीइ लुँमोहः छाया गुठी	७४२
३१९. शान्तिपुरीइ दुहांवनेगु गुठी	७४२
३२०. मञ्जुश्रीतँनय् पाल्चामत च्याके गुठी	७४३
३२१. नासपूजा गुठी	७४३
३२२. घाँय् पुइ गुठी	७४३
३२३. पिक्खा द्वार तोरण सिले ज्या	७४४
३२४. पुलुं भुनेगु गुठी	७४४
३२५. माकःयात कःनि ह्वले गुठी	७४४
३२६. स्वयम्भू व हारतीयात भुजा छाया गुठी	७४४
३२७. ताडन आसँकि काय्गु थिति	७४५
३२८. फय्प्वाः तिइगु विधि	७४५
३२९. दे आचार्य गुठी	७४५
३३०. अनन्तपुर प्रतापपुर प्रवेश	७४५
३३१. स्वयम्भू भगवान् भुइख्यलय् विज्याकेगु	७४५
३३२. नरांखुनु स्वयम्भू भगवान् दानशालाय् विज्याकी	७४६
३३३. न्हाय्कं-क्वाति त्वंकेगु गुठी	७४६
३३४. सायात छ्व नकेगु गुठी	७४६
३३५. न्हय्सः साय्मितय्गु गुठी	७४६
३३६. ओँला चवंवइगु थिति	७४७
३३७. महादी च्याकेगु गुठी	७४७
३३८. सखाःपा याय्गु चलन	७४७

३३६. पता: छाया गुठी	७४७
३४०. पञ्चबुद्धया भुतिमालि ह्वयकेगु गुठी	७४८
३४१. गुंला धर्म सेवा	७४८
३४२. गुंला धर्म प्रारम्भ	७४८
३४३. गुंलाया नुप्यने चलन	७४९
३४४. निसला: छायागु	७४९
३४५. मत्या:या द्ये के वइगु	७५०
३४६. दमखि था:वइगु थिति	७५०
३४७. येँया पञ्जरां जूगो	७५०
३४८. गुंला धर्म समाप्ति	७५०
३४९. यंला सेवा	७५१
३५०. काति सेवा	७५१
३५१. वसन्त सेवा	७५१
३५२. पिन्पां द्रहलपेगु	७५२
३५३. छाहायकेगु चलन	७५२
३५४. तीङ्छापूजा	७५२
३५५. चतुर्युगोदयया सेवा	७५३
३५६. बुसाधं गुठी	७५३
३५७. वह: पलेस्वां छायागु गुठी	७५३
३५८. पञ्चबुद्धयात तिसां तिङ्के गुठी	७५४
३५९. ह्यचायके गुठी	७५४
३६०. बाहा:पूजाय् न्हापालाक शुरु	७५४
३६१. ज्ञानमाला भजन	७५४
३६२. ओंलाया द्ये के वइगु चलन	७५५
३६३. स्वांयापुन्ही	७५५
३६४. ज्या:पुन्ही	७५५
३६५. न्हिसिवा कल:पूजा- मञ्जुश्रीस	७५५
३६६. धकि प्यने गुठी	७५६
३६७. घण्टा घोषण याय्गु थिति	७५६
३६८. पुन्ही सेवा	७५६
३६९. आरती गुठी	७५७
३७०. न्हिसिवा कल: गुठी	७५७

३७१. महास्नाम गुठी	७५७
३७२. योसिं बुसाधं गुठी	७५७
३७३. फकिबाता बुसाधं गुठी	७५७
३७४. पञ्चायन पूजा	७५८
३७५. सिईछा. पूजा विधि	७५८
३७६. प्यहा भगवान् बुद्ध सिइकःवइगु चलन	७५८
३७७. विभिन्न समयय् जुइगु लस्ताः पूजा	७५९
३७८. युगभेदं स्वयम्भू पर्वतया नां	७६३
३७९. कार्यकारणं स्वयम्भूया नाम संज्ञा हिलावंगु	७६३
३८०. स्वयम्भू स्थित विविध पुरया नां	७६३
३८१. स्वयम्भू स्थित षट् भैरव	७६३
३८२. स्वयम्भू अन्तर्गत विहार	७६४
३८३. स्वयम्भू दर्शन गमनपथ	७६४
३८४. स्वयम्भूस्थानया आश्रम भेद	७६४
३८५. स्वयम्भूया फले व सतः	७६४
३८६. स्वयम्भू गःचाःहुलेबलय् खनिइगु जलाश्रय	७६५
३८७. स्वयम्भू डाँडाया छ्वाःख्यरं च्वंगु मुख्यमुख्यगु ऐतिहासिक स्थानत	७६६
३८८. स्वयम्भूस्थानयात रक्षक स्वरूपं प्रतिष्ठा यानातःपि रक्षक देवता	७६६
३८९. स्वयम्भू स्थित अभिलेख भेद	७६७
३९०. शिलाभिलेख भेद	७६७
३९१. थन हे दइच्वंगु लिपि भेद	७६७
३९२. स्वयम्भूइ दइच्वंगु कलात्मक भेद	७६७
३९३. स्वयम्भूइ च्वंगु स्थापत्यकला शैली	७६७
३९४. स्वयम्भू स्थित समूह मूर्ति विभिन्न पक्षः—	
त्रिरत्नमूर्ति	७६८
३९५. त्रिकुलनाथ	७६८
३९६. त्रिआयुदेव	७६८
३९७. त्रिविद्यादेव	७६८
३९८. पञ्चबुद्ध	७६८
३९९. सप्तबुद्ध प्रतिनिधि स्वरूप सप्त विशाल बुद्धमूर्ति	६६८
४००. प्यहा प्रसिद्ध नाथ	७६८
४०१. प्यहा प्रसिद्ध बुद्ध भगवान्	७६८

४०२. प्यह्य प्रसिद्ध जोगिनीया प्रधान उपासक	७६८
४०३. स्वयम्भू स्थित विविध शैली चैत्यया प्रकारान्तर	७६८
४०४. स्वयम्भू नाप सम्बन्धित ऐतिहासिक पवित्र स्थल :- चतुर्महाप्राकार भूत पर्वत	७६९
४०५. प्यंगू न्हुछेकाप	७६९
४०६. अष्ट वैतराग	७६९
४०७. स्वयम्भू बातनय् च्वंप्ति चतुर्महाराज	६६९
४०८. स्वयम्भूया पिखाद्वारय् च्वंप्ति च्याह्य प्रसिद्ध भिक्षुप्ति	७६९
४०९. पिखाद्वारय् अंकित अष्ट बोधिसत्त्वप्ति	७७०
४१०. स्वयम्भूस्थानया मूर्तितय्गु भेद	७७०
४११. स्वयम्भू स्थित त्रि-महाचैत्य	७७०
४१२. स्वयम्भूया न्ह्योनेसं च्वंगु धर्मधातु मण्डलया जन्तु	७७०
४१३. हारती देगलय् च्वंप्ति तुनाःसिया मूर्तितय्गु नां	७७०
४१४. हारतीया लुखाफुसय् च्वंगु तोरणय् अंकित पञ्चरक्षादेवी	७७१
४१५. स्वयम्भू महाचैत्यय् प्रस्थापित पञ्चबुद्ध	७७१
४१६. स्वयम्भू महाचैत्यया प्यकुनय् च्वंप्ति तारादेवीप्ति	७७१
४१७. स्वयम्भू महाचैत्यया प्यख्यरसं च्वंगु हलपतिइ अंकित मूर्तितय्गु नां	७७१
४१८. सप्तबुद्धपिनिगु संक्षिप्त विवरण तालिका	७७२
४१९. स्वयम्भू जंगलया छ्वाःख्यरं च्वंगु तीर्थ सारिणी	७७३
४२०. काठमाण्डू उपत्यकाया द्वादश तीर्थ संक्षिप्त विवरण तालिका	७७४
४२१. शब्दानुक्रमणिका-सूची	७७६
४२२. सहायक ग्रन्थ व पत्र-पत्रिका सूची	८०४
४२३. शुद्धाशुद्धि पत्र	८१०

श्रीस्वयम्भू महाचैत्य



स्वयम्भू महाचैत्य व हारती देगः

श्रीस्वयम्भू ज्योतिरूप उत्पत्ति

१

★

कालीहृदया दृश्य

श्रीधर्मधातु मनिशंकरणावतारं नागादिवासहृद पंकज कर्णिकस्थं ।

नैरञ्जनं निरुपमं खसमं महेशं ज्योतिस्वरूपम समं प्रणतोऽस्मनित्यम् ॥

श्रीधर्मधातु वागीश्वर स्वयम्भू महाचैत्य उत्पत्ति जुइ न्ह्यो काठमाण्डू उपत्यकाया प्रसिद्ध ऐतिहासिक चतुर्महाप्राकार—जातमात्रोच्च, ध्यानोच्च फुलोच्च एवं सिद्धिफलोच्च—थुगु प्यंगू विशाल पर्वतया दुने सत्ययुगय् धुनं व्यानं न्ह्यक्वय्या प्रमाणं विस्तार जुयाच्चंगु कालोहृद नामक विशाल पुष्करिणी छगू दइच्चन^१ ।

थुगु सुन्दर ऐतिहासिक नागवास दहं अष्टांग गुण सम्पन्न जलं भरिपूर्णगु, अनेक गुखिँ लहरां चाःहुलाच्चंगु, विचित्र सुन्दर जलपुष्पं सहित जुयाः शोभावृद्धि जुयाच्चंगु, गनं गनं राजहँस, हँय् बडेहँय्, चक्वाःकंगः, बोह, क्वलःखा आदि कंगः पंक्षित जुनाच्चंगु, उकीसनं उगु अथाह भयंकर कालीञ्जल पुखुलिइ पाथिन्या, भूया, सरिन्या, न्या, तिमिगिलिन्या त्वाकज्यानाच्चन; एवं शंख, शंखुचा, बोहन्या, सिंगिन्या सोँजु, गोँजु, मलुप्या, ब्यां हितिमंगः भयानकपि जलजन्तु क्षपः कापत्य, ग्रह चुल्याकारपि जलजन्तु विशेषे उख्ये थुख्ये फुत्त फुत्त तिन्हुयाः जलक्रिडा याना जूगुलि लखय् पियाकनाः क्षीर समुद्र थें अद्भुत तमासा दइच्चंगु । हानं गनं गनं कर्कोटक, वरुण, वासुकी, तक्षक, कुलिक आदि नागराजपि ह्मिता रसरंगं वं वइत वं वइत हितुहिना जूगुलि नागपाश थें चमत्कार खने दइच्चंगु, उकीसनं तज्जाःगु चिकिजाःगु फणाया समूह दुंगा थें जुयाः सार्थवाहुपि च्वनाच्चंगु रत्नाकर समुद्र थें उख्ये थुख्ये चलय् जूगु बेक्वय्क वंगु लिहां वःगु बेगं तिन्हुयाजूगु, लः जलामय जुयाच्चंगु कर्कोटक नागया छेँ जूया निम्ति नागवास धइतःगु, वया स्त्री नागिनी काली च्वनाच्चंगुलि कालीदहं नां जुयाच्चंगु, गनं गनं आकाश थें निर्मल वँचुसे च्वंगु लः जूया निम्ति 'कालीञ्जल' धकाः प्रख्यात जुयाच्चंगु थुगु कालीहृदया छचाःखयरं

पःखाः थे पर्वतमालां चाःहुलाच्वंगु, थन हे निधिदर्शन धइह्य नागराजपिसं प्रकाश यानातःगु हेरा,
 बिदोल, शंख, सखाः, भिपू, माणिक, कर्कटन, नील, सूर्यकान्ति, लुँ, वहः सिजः आदि धातुया खानि
 दयाच्वंगु नापनापं ग्यलुसलां, मनशिला, हरिताल, वसि आदि खनेदयाः विचित्र चहकमहक दयाः गनं
 गनं रंगीचंगीया शिलाखण्ड जजमान जुइक थिनाच्वंगु थुगु प्रकारं अनेक सुगन्ध सुपुष्प तृणगुल्म लता
 वनस्पति वृक्ष आदि स्वांमा सिमां व्याप्त जुयाः मनोहर जुयाच्वंगु; उकीसनं उज्ज्वलगु पंचरश्मि लःया
 धारा पताः बव्यकातःगु थे श्रीशोभा वृद्धि जुयाच्वंगु जुल । थन हे थासय् सिंह शार्दूल ऐरावत गेँडा
 चला खनेदयाच्वंगु गनं गनं ह्याखा वखुं, दुयकंगः, कोकिल, जीवंज्यूकंगः, सलांकंगः चौक्वाकंगः, गुँखा,
 माकः, भुतिमाकः, कर्किकंगः आदि रमिता यानाच्वंगु उख्ये थुख्ये कस्तिहा भ्रमरगण हालाच्वंगु बनया
 मत थे पुईपुईकेराया रश्मि खनेदयाच्वंगु सर्वगुण सम्पन्नगु थुगु नागवासहृदया प्रशंसा न्ह्याक्व याःसां
 कम हे जक जुइ । कारण, गथे आकाशमण्डलय् चन्द्र सूर्य प्रकाश जू थे थुगु अनन्त पवित्र कालीहृदया
 आत्मा स्वरूप ता विस्तार मजुइक थन हे बुद्ध व बोधिसत्व, सिद्ध आचार्य आदि महापुरुषपि वयाः
 अधिष्ठान यानाः व्याकरण यानाः बिज्याइ तिनि, श्रद्धा निश्चय दुपि भाग्यमानीपिसं थुगु लःया अभिषेक
 कयाः थुकि उत्पत्ति जुइगु ज्योतिरूप श्रीस्वयम्भू धर्मधातु करुणावतार दर्शन व स्पर्शन स्मरण याना
 मात्रं अनन्तकाल तक नं सत्सुख प्राप्त जुइगु अक्षय सुखया भण्डार सुखावती भुवनस वास याइपि जुइ ।

विपश्ची बुद्ध आगमन

बौद्ध इतिहास [स्वयम्भू पुराण] अनुसार मानव बुद्धपि मध्यय् सर्वश्री नेपाल शुभागमन जूहा महात्मा बुद्ध विपश्ची तथागत खः । थ्वसपोल विपश्ची तथागत सत्ययुग ८०००० चय्दोदँ आयु दइच्चंबल्य् बन्धुमति नगर्य् बन्धुमान राजाया स्त्री बन्धुमतिदेवीया पाखे जगत् हितया कारण्य् जन्म जुल । क्रमशः तःधिकः जुसेलि बुद्धचर्यानुसार क्वफोसिमाया क्वस्सं च्वनाः सम्यकसम्बोधिज्ञान प्राप्त यानाः बुद्ध जुल । थुगु समय्य् शाक्यसिंह बुद्ध जुइहा सत्यधर्म नाम बोधिसत्व जुयाः विपश्ची तथागतया सेवा यानाच्वन । विपश्ची बुद्धं खण्ड व तिष्य नामक अग्रश्रावक शिष्य सहित यानाः ३२ कोटि शिष्यपि मुंकाः थःगु विहार्य् च्वनाः बुद्धचर्या यानाच्वन ।

थुगु समय्य् सत्ययुग्य् नेपाल मण्डलय् नागवास धइगु तःधंगु दहः जुयाच्वन । छगू समय्य् विपश्ची तथागत जगत् हितार्थ निम्ति शिष्यगण मुंकाः देशान्तर गमन याना वँवं थुगु महान् सुन्दरगु कालीहृदया तीर्य् थ्यंकाः थ्व विशाल कालीहृदया पुखू स्वचाःहुलाः पश्चिम व उत्तरया दत्थुइ च्वंगु तज्जाःगु पर्वतया च्वय् विज्यात । थुगु विशालमय अद्भुतगु सुन्दर पवित्रगु नागहृदया दृश्ययात खनाः मतिइ चिन्तना यात कि थ्व सर्वगुण सम्पन्न सौभाग्यवान् वृहद् आकार पुष्करिणिस स्वयम्भू उत्पत्ति जुइगु विशुद्धगु स्थान खः धकाः भाःपाः पलेस्वां-सकि छगः दुसा ज्यू धकाः आशिका याय्साथ तत्क्षण्य् सर्वश्रेष्ठ अकनिष्ठ भुवनया अधिपतियागु प्रभावं पलेस्वां-सकि छगः अकस्मातं न्ह्योने खनेदत । थ्व स्कन्दपद्म उगु समय्य् अन च्वनाच्वंपि भिक्षुपिसं सुनानं मखं, कारण इपि सकले अकनिष्ठयागु अभिषेक प्राप्त मज्जुनिपि जूया निम्ति । अथे नं शिष्यवर्गपित आज्ञा जुल, थ्व मानसरोवर थे जाःगु नागहृद कर्कोटक नागराजाया वासस्थान जुयाच्वंगु थन स्नान या धकाः थुलि आज्ञा जुयाः 'नमोस्तत्रयाय' थुगु सप्ताक्षर मंत्र स्वकः उच्चारण यानाः अलौकिक प्रेरणावश थ्व हे महान् सरोवर्य् चैत्रपूर्णिमा [ल्हुतिपुन्हि] या दिनस पलेस्वांपु-सकि बीजारोपन याना विज्यात ।

थुगु पलेस्वांपु-सकि वीजारोयन याःगु भिक्षुपिसं खनाः विपश्ची तथागतयाके प्रश्न यात । थुकिया लिसः थथे आज्ञा प्रशन्न जुल--भो भिक्षुपि ! थुगु पलेस्वानं कालान्तरय् अकनिष्ठ भुवनया अधिपति जगदीश्वर ज्योतिरूप श्रीस्वयम्भू उत्पत्ति जुइ । थुकियात हे भविष्यत्कालय् “धर्मधातु वागीश्वर श्रीस्वयम्भू महाचैत्य” नामं प्रसिद्ध जुइ । कालान्तरय् आपालं समय लिपा उत्तरापन्थ [महाचीन पञ्चशीर्षवर्तत्] पाखे तःधंहा बोधिसत्व मञ्जुश्रो विज्याइ तिनि । अले वसपोलं थुगु नागवासदहःया लः छ्वनाः सुयोग्य स्थान दय्का बिइ । थन हे असंख्य तीर्थ व देवदेवता विराजमान जुइ, नापं ग्राम, नगर, निगम, राष्ट्र देश निर्माण जुजुं वनी । थन सत्य शील नियम धर्म पालन जुइ, उकि नियमपाल धइगु थुगु क्षेत्रया नाम जुइ । एवं रूपं नेनाम शून्य निरञ्जन स्वयम्भूयाके सदां प्रतिपाल रक्षा याइगु जूया निम्ति थुगु पवित्रभूमियात नेपाल धइगु नामं प्रसिद्ध जुजुं वनी ।

थुगु प्रकारं भविष्य व्याकरण यानाः धर्मासनं दनाः सकलसितं अभिषेक विद्याः पर्वतयात नं शुभ आशीर्वाद बिल--भो पर्वतराज ! छंगु शरीरया अवयवय् च्वनाः थुलिमछि शिष्यपि मुंकाः धर्मचक्र यानागु पुण्यानुभावं छंत लीपा थुगु स्थान नेपाल मण्डलय् जात जुया च्वक्व मध्यय् उच्चा जुयाच्चंगु जातमात्रोच्च [जामाःचो] पर्वत धइगु नां जुइ । थुगु हे पर्वत स्थानय् सिद्धयोगी विदयाधर-पिनिगु आश्रम जुइ, गुगुयात नागार्जुन धकाः नं धाइ । सुनां गुह्यसिनं श्रद्धा निश्चयपूर्वक थुगु पर्वत अभियान यात धाःसा नीचहा जूसां नं उच्च जुइ, नेपाल प्रदक्षिण यानागु अनुभव प्राप्त जुइ । गन च्वनाः पितृ तर्पण बिइ, इपि सन्तोष जुयाः मुक्त जुइ ।

थुलि धयाः विपश्ची तथागत थःगु थासय्तुं आनन्दं लिहां विज्यात । थुगु अलौकिक कमलपुष्प प्यूगु दिनया लुमन्तिकथं थौया अदचापि चैत्रपूर्णिमा [ह्रवंपुल्लि-लुहतिपुल्लि] या दिनस थुगु जामाःचो पर्वतया मेला उत्सव मानय् याना वयाच्चन तिनि ।

शिखी तथागत आगमन

अतीतकालय् अरुण धइगु नगरय् अरुणराजाया धर्मपत्नी प्रभावतीया पवित्र गर्भं शिखी नाम पुत्ररत्न जन्म जुल । जन्म जुइसाथ थ्वया आँगसँ थःथह्यं तुं मुण्डन यानाः चसुप्वाःया तेजं समन्त अन्तपुर जाज्वल्यमान जुल । बुद्धचर्यानुसारं क्रमशः महाभिनिष्क्रमण जुयाः विशाल सुन्दर रूखकमल सिमाया मुलय् च्वनाः संबोधिज्ञान लाभ यानाः मुनीन्द्र धाय्बल । उबल्य् शाक्यमुनि बुद्ध जुइह्य क्षेमराज गृहस्पति जुयाः वसपोलया अनुचर जुयाच्वन । शिखी तथागत रत्नपाणि अभिसंभव, क्षेमंकर आदि १६ कोटि शिष्यपि सहितयासे धर्म व्याख्यान यानाच्वन^१ ।

विपश्ची तथागतं पिना थकूगु पलेस्वां-सकि चुलिह्वयाः चक्कं स्वां ह्वसैलि थुगु अलौकिक सुन्दर पलेस्वानय् आश्विन पूर्णि रेवती नक्षत्र शुक्रवार ध्रुवयोग खुनु ब्रह्ममुहूर्तय् ज्योतिरूप श्रीस्वयम्भू उत्पत्ति जुल । थुगु महान् शुभ निमित्त खुता प्रकारं भूकम्प जुल, सकभनं तेज प्रकाश जुल, देवदुन्दुभि बाजा थानाहल, दिशा चक्कना वन, अनेक शुभ निमित्त खने दयावल । थथे आश्चर्य जूगु खनाः रत्नपाणि बोधिसत्व शिखी तथागतयाके अभिवादनपूर्वक प्रश्न यात । उगु प्रश्न समाधान निमित्त शिखी तथागतं यथार्थ खँ निर्देशन यानाः धाल--थन उत्तर दिशापाखे हिमालयया समीपय् छगू तःधंगु नागहृद धइगु दहः दु । उगु दहल्य् विपश्ची तथागतं वीजारोपण याना थकूगु पलेस्वां उत्पत्ति जुल, व हे सहस्रदल युक्तगु असंख्य रश्मि प्रकाश जुयाच्वंगु रत्नसरोज पलेस्वानय् निरञ्जन ज्योतिरूप स्वयं प्रकाश जुल । थथे धाःगु शुभसन्देश न्यनाः धर्मसभा मण्डपय् च्वंपि सकलसियां दर्शन याय्गु अत्यन्त उत्साह जुयाः व अरुण नगरं शिष्यगण सहित शिखी तथागत थन प्रस्थान याना विज्यात ।

थन थ्यंकाः नागहृदया नैऋत्य कुलांया पर्वतय् वनाः स्वयम्भू ज्योतिरूप दर्शन यानाः अभिषेक काय् धुसैलि थुगु अलौकिक सुन्दर पलेस्वांया विशेष महिमा गुण वर्णन यासे शिष्यवर्गपित थथे आज्ञा जुल--

प्रिय शिष्यवर्गपि ! जगद्गुरु स्वयम्भूया दर्शन या, मर्त्य मण्डलया लोकपि उद्धार याय् निर्मित
 स्वयं प्रकाश जूहा, विपश्ची तथागतं वोजारोपन याना थकूगु सकि उत्पत्ति जूगु मणिजडाउ जुयाच्चंगु
 सुवर्णया दँ दोछि हः दुगु पञ्चरत्नया लता स्व, च्वयक्वय् हेरा-मोतियागु श्रीशोभा दइच्चंगु गाडाया
 घःचाः पाय्फोगु थुगु पलेस्वानय् विराजमान जुयाच्चंगु ज्योतिरूप श्रीस्वयम्भूयात स्वागत सत्कार या ।
 ब्रह्मा, विष्णु, महेश्वर आदि देवतापि वयाः पूजा सत्कार यानाच्चंगु स्व । आकाशय् च्वनाः बाद्यवादन
 थानाः नृत्य गीत यानाच्चंगु गन्धर्व किलरत स्व । विविध पूजोपकरण दोहलपाच्चंगु सिद्ध विदयाधर
 योगिगण स्व । यामा, तुषिता, परनिर्मित वशवर्ति आदि स्वर्ग भुवनय् च्वंगु देवतापिसं अर्पण यानाहःगु
 पुष्पमाला लखय् लानाः इन्द्रधनु थे' शोभा दइच्चंगु थ्व हे पत्र-पुष्प-फल कुतुवःगु तरंग आकाशवर्णगु
 लखय् विभिन्न किसिमया वर्ण खने दइच्चन । देवतापिसं मणि मोति कुतुकाहःगु आकाशय् तारा थे'
 पूर्णचन्द्र थे' शान्त वातावरण क्लकय् जुयाच्चन । जगतं वन्दन याय् योग्यह्य श्रीस्वयम्भूयात पूजा
 याय्गु तत्पर जुयाच्चंगु जलक्रिडा यानाच्चंगु नागराजापि चाःहुलाच्चंगु स्व । गुह्यसिया तेजं जगतय्
 व्यापक जुयाच्चंगु रत्नसरोजया तक्करय् च्वनाच्चंगु श्रीस्वयम्भूया दर्शन या । गुह्य स्वयम्भू उत्पत्ति
 जुइ मात्रं सागर पर्वत पृथ्वी कम्प जुल, आकाशं पुष्प वृष्टि जुल, थुह्य श्रीस्वयम्भू ज्योतिरूप धर्मधातु-
 यात भक्तिपूर्वक सकलसिनं श्रद्धाञ्जलि दोहलपि ।

थुलि शिष्यवर्गपित सम्बोधन यानाः आज्ञा जुइ धुंकाः थःह्यं नं श्रद्धाभक्ति तसे थुगु पर्वतय्
 च्वनाः एकचित्तं श्रीस्वयम्भू धर्मधातु स्मरण यानाः ध्यान यानाः वसन्ततिलक छन्दं स्तोत्र याना
 विज्यात--

श्रीधर्मधातुमनिशं करुणावतारं नागाधिवासहृदपंकजकणिकास्थं ।
 नैरञ्जनं निरूपमं खसमं महेशं ज्योतिः स्वरूपमसमं प्रणतोऽस्मिनित्यम् ।
 श्रुत्वासमं महिम ते श्रवणेन दृष्ट्वा नेत्रेण रूपमनिशं चरणेन गत्वा ।
 हस्तेन पूज्य चरणं मनसानुचिन्त्य ज्योतिः स्वरूपमसमं प्रणतोऽस्मिनित्यम् ।

किवर्णयामि तव रूपमचिन्त्यमेत जिह्वेन्द्रियेण भवदीय नुति करोमि ।
 दोषोह्यदोष इति वा भवदीय एव ज्योतिः स्वरूपमसमं प्रणतोऽस्मि नित्यम् ।
 ज्योतिः स्वरूपनुतिमीदृक्कृति पठन्ति निष्कलेश शुद्ध विलसहृदय स्वभावाः ।
 पाथोजकर्णिक कणामृतमाप्नुवन्तः स्वायंभुवेऽति रुचिरेऽर्चिषिते लयन्ते ॥

। इति श्री शिखी तथागत कृत स्वयम्भू स्तोत्रं समाप्तम् ।

थुलि स्तोत्र यानाः रत्नपाणि आदि शिष्यपित बोध यानाः धया विज्यात--कालान्तरय् थ्व
 पलेस्वांया हां श्रीनैरात्मादेवी गुह्येश्वरी प्रादुर्भाव जुइ । छिपि सकलं थनं लिहांवनाः विहारय् च्वनाः

स्वयम्भूया नामं चैत्य दय्काः सेवा याना च्वँ । थुगु प्रभावं त्रिवोधिज्ञान ह्यसोकाः षट्पारमिता पुरय्
यानाः षडभिज्ञपद लानाः थुकिइ लीन जुइपि जुइमा धकाः थुलि आशीर्वाद वियाः शिखी तथागत स्वयं
जगदीश्वर श्रीस्वयम्भू ज्योतिरूप धर्मधातुस अन्तर्हित जुयावन ।

गुगु थासय् च्वनाः शिखी तथागतं ध्यान यानाः 'श्रीधर्मधातुमनिशं'— धइगु तुतः ब्वनावन, उगु
पर्वत थौतक नं ध्यानोच्च धइगु नां जुयाः अत्युच्च जुयाच्वन । अतःएव थुगु पर्वतयागु ऐतिहासिक
घटनायात लुमंका मेघसंक्रान्ति [खाइसंल्ह] या दिनस अदद्यापि मेला मानय् याना वइच्वन । सुनां
गुह्यसिनं थुगु खँयात ध्यान तथाः थुगु पुण्यभूमि ऐतिहासिक पर्वतस थहांवन धाःसा उह्य स्मृति सम्पन्न
जुइ । ध्यानी योगो तपश्चोपनि निर्विघ्नपूर्वक योग समाधि सिद्ध जुइ धकाः वर्णन यानातल ।

विश्वभू तथागत आगमन

अतीत समयय् मनुष्यया ६० खवीदोल आयु जुयाच्चंवले अनुपरम नगरय् सुजितराजाया धर्मपत्नी यशोवती देवीया गर्भं विश्वभू नामक सुपुत्र जन्म जुल । श्वय्कः क्रमशः बैस जायावसेलि शालवृक्षया मुल्य् च्वनाः बोधिज्ञान प्राप्त यानाः बुद्ध जुयाः सोण्ड, उत्तरा, तुपसन्तरा आदि १० कोटि शिष्यगणपित धर्मोपदेश यानाच्चन । उगु समयय् सर्वार्थसिद्ध पर्वताक्ष नामक दानपति जुयाः जन्म कयाच्चन । बुद्धचरित्रानुसारं विश्वभू तथागतं देशदेशान्तर चाःहिलाः स्वयम्भू दर्शनया निम्ति भिक्षुपि सहित यानाः अनुपम विहारं प्रस्थान यानावल । नागहृदयात चाःहुलाच्चंगु चतुर्महाप्राकार मध्यय् आग्नेय कोणपाखे च्वंगु फुलोच्च धइगु पर्वतस थहां वनाः श्रीस्वयम्भू ज्योतिरूप दर्शन याःगु जुल । थन अनेक प्रकारया स्वांमा-सिमा संयुक्त जुयाच्चंगु आपालं पत्र-पुष्प-फल सयाच्चंगु उपवन खनाः भिक्षुपित सःताः धाल कि--हल ज्वतय् याय् स्वाय्क सुनानं परिश्रम याय् स्वाय्क अथे उत्पत्ति जुयाच्चंगु वन जंगलया स्वां स्कन्दमूल सुनानं थःथःगु धकाः नालामतःनिगु वस्तु निश्चय नं दोहलपे ज्यु धकाः उजं दय्काः थःह्यां नं सवालाख १२५००० दाफस्वां श्वयाः श्रद्धापूर्वक स्वयम्भूपाखे स्वयाः पुष्पपूजामेघ चह्लय् यात । उकिं थुगु पर्वतया नाम फुलोच्च धइगु प्रसिद्ध जुल^१ ।

विश्वभू तथागतं श्व नं आज्ञा जूगु दु--ता विस्तार मजुइक थुगु दहःया लः सुकय् जुइ । आपालं तीर्थ व वीतराग उत्पन्न जुइ । श्व हे फुलोच्च पर्वतया चरणाबिन्दय् वसुन्धरादेवी उत्पत्ति जुयाः थुहा वसुन्धराया नं पादमूलं पवित्रगु सुन्दरजल भरिपूर्णगु गुणागुली सृष्टि जुइ । सुनां गुह्यसिनं जल इच्छा याइपि जल प्रार्थिजनपिसं थुगु थासय् सेवा यात धाःसा अवश्य निराश जुइ माली मखु । थुलि धयाः नागहृदया लः पिहां वनीगु निष्कासन द्वार थः शिष्यपित कयनाः विश्वभू तथागत थःगु थासय्तुं लिहांवन ।

१- स्वायम्भू पुराण पृ. ८९

मञ्जुश्री बोधिसत्व आगमन

फुक्क शास्त्रं पारंगत महापराक्रमी बोधिसत्व मञ्जुश्री अति सुदूर महाचीन देशया प्रसिद्ध असंख्य शोभालंकार सहितगु पञ्चशीर्ष पर्वतनिसें केशिनी, उपकेशिनी [वरदा व मोक्षदा] देवीपि निह्यं जःखः तयाः सिंह गयाः हर्षपूर्वक श्रीस्वयम्भू ज्योतिरूप धर्मधातु दर्शन याय् धकाः नागहृदया समीपय् थ्यंकः वल । स्वचातक महामण्डप [नगरकोट] स वासं च्वनाः पंचबुद्धात्मक श्रीस्वयम्भू ज्योतिरूप दर्शन याय् दयाः तस्सकं लय्तायाच्वन^१ ।

थुगु ज्योतिरश्मि स्वयम्भूयात खनाः तस्सकं आश्रयं चायाच्वन । थ्व छु गुगु खः धकाः निश्चय यानाः सुनानं थ्व हे खः धकाः निर्णय याय् फुगु मखु । 'लखय् दुने जकं मत च्याना च्वंगु ला ? आकाशं पल्पसा-विजुली जकं कुतुवयाच्वंगु ला ? अथवा लखय् श्रीसूर्य उदय जुया च्वंगु ला ? अर्थात् पूर्णचन्द्र जकं खनेदयाच्वंगु ला ? अथे हे अकालय् वादवाग्नि जकं उत्पत्ति जूगु ला ? लखय् दुने च्वंगु नागभवनयागु रत्नया खानीया तेजया समूह ला ?' धकाः अनेक तर्क वितर्क शंका उपशंका यानाच्वपि लोकजनपिनिगु सन्मुखय् मञ्जुश्री बोधिसत्वं अनन्त श्रद्धाभक्ति तयाः अष्टाङ्ग प्रणाम यासे चतुषष्ठी उपचारं स्वागत सत्कार यानाः स्तोत्र यात--

त्रिजगति कतरद्वै वस्तुतत्त्वं महद्वा अयमयमिति ।

सोऽयं निर्णयेऽज्ञा वयं च । यदभिलषित सर्वं

दर्शयत्येवमेतदिति परिगणितोऽहं त्वां नमे विश्वरूपम् ।

थ्व त्रिभुवनय् गुजाःगु वस्तु अथवा तत्त्व महत् थुगु थुगु धकाः जिमिसं निर्णय याय् मसः, गुगु अभिलाषा याना उगु उगु सम्पूर्ण थुकिइ ह्नाय्कनय् दुने स्वय् थे छर्लंग खने दु धइगु जिमिसं मतिइ चिन्तना यानाः छलपोल विश्वरूपयात जिगु नमस्कार धकाः प्रार्थना यानाः स्वयम्भूया अभिमुखय् च्वनाः महान् प्रतिज्ञा यात--

देव मनुष्यपिनिगु हितसुखया कारणय् श्रीस्वयम्भू ज्योतिरूप दर्शन व प्रदक्षिणा याय् ज्याच्छिक बसोवास यायत् लायक जुइक सुन्दर नगर [मञ्जु पट्टन] सहर निर्माण याना बीगु लागी बोधिसत्वयागु दिव्य प्रातिहार्यद्वारा थःगु चन्द्रहास खङ्गं महान् भीषण दुर्लब्ध पहाड विष्फोट यानाः कालीहृदया लः पित छ्वय्गुलिइ तत्पर जुल । थः ल्यूल् यू नापं ब्वनाहःपि वरदादेवी [लक्ष्मी] यात फुलोच्च पर्वतय् तथाः मोक्षदादेवी [सरस्वती] यात ध्यानोच्च पर्वतय् बासं बियाः थुपिनापं थः अनुचर शिष्यपित नं अन हे सं तुं तथाः मञ्जुश्रीनं थथे चिन्तना यात । अथाह कालीहृदया लः छ्वनेया लागी पर्वत शृङ्खलाया लागी च्वं च्वं चाःहुलाः निरीक्षण याना स्वःगु इलय् दक्षिणपाखे च्वंगु नाकं तज्जाः मज्जुगु पःखाः थें जुयाः जवर जुयाच्चंगु व्याक्क लःया निष्कासन द्वार मूल बन्द यानातःगु थें जुयाच्चंगु कापोतल पर्वत [क्वदुवालया न्हुछेकाप]स थ्यंकाः दूरदर्शी महाज्ञानी मञ्जुश्रीनं थुगु पर्वतयात शान्तवना बियाः चन्द्रहास खङ्गं बेग प्रहार यानाः पर्वत त्वाःल्लानाबिल । थुगु पर्वत छेदन याना निष्कासन द्वार चालावसेलि थुगु अनन्तकालनिसें लिकुनाच्चंगु जलब्यूह समुद्रप्रवाह जूगु थें तस्सकं चञ्चलतापूर्वक बन्धनागारय् कुनातःपि पिहांवंगु थें तःधंगु कोलाहल शब्द पिकयाः ध्वातुमनुध्वाध्वां जलतरंग पिकयाः पिहांवन ।

पर्वत जसां नं पोडा धइगु सहयात् थाकुगुलि मञ्जुश्रीयात ब्रह्मबियाः धाल- 'जितः जक अकस्मात् वज्रपात जूगु थें सास्ति यात । विपश्ची आदि बुद्धपिसं मेमेगु पर्वतयात अधिष्ठान याना-वन । छ वयाः जिमित थुजाःगु दुःख बिल । न्हापा इन्द्रं वृत्तासुर दैत्य स्याःबलय् जिमिगु पपू त्वाःल्लानाबिल । उबलय् बरु थुलि कष्ट मजू ।' थुलि पर्वतयागु कठोर शब्द न्यनाः आपालं उपाय कुशल ज्ञान सियाच्चंह्य मञ्जुश्रीनं धैर्य बियाः शान्तवना बिल- 'भो नात्युच्चागिरि ! जि खङ्ग धारना यानाच्चवनाह्य जूसा नं जन्म जुसांनिसें सुं प्राणिया घाटक यानागु मदु । थः पर समान भाःपाः च्वनाह्य ख । तर खँ छु धाःसां 'विनासत्वहितार्थेन कि शुभेन प्रयोजनम् ?' ध्यातः थें जगत् उद्धारया लागी श्रीस्वयम्भू धर्मधातु पुजाया निमित्त मेमेपि देवदेवता तीर्थोपतीर्थ प्रादुर्भाव याय्त् जि छंत प्रहार यानागु खः । हे साधु ! श्रीस्वयम्भू धर्मधातुया स्वागत सत्कारया लागी व्यथा जूगु सह या । सहयाय्गु समान तपस्या मेगु छुं मदु, द्वेषसमान पाप मेगु छुं मदु, भो क्षमाधारी शिखर ! छंत नं जि अधिष्ठान यानागु दु । भविष्यत्-कालय् नेपालय् अनावृष्टि दुर्भिक्ष शान्त यानाः सुवृष्टि याय्या निमित्त वृष्टिदेव श्रीआर्यावलोकितेश्वर वइतिनि । श्व नेपाल मण्डलया द्वारय् च्वंह्य जूया निमित्त कूटपाल धइगु नां जुइ । थन हे सम्पूर्ण तीर्थया जल संग्रह जुइगुलि तीर्थ धइगु संज्ञा जुइ ।' थुलि धयाः आश्वासन सहित आशीर्वाद प्रदान यात ।

थुगु थासं लःया समूह वेगं न्ह्याःवन । मेघ गर्जय् जूगु थें शब्द पिकयाः सिमा कोथलाः आपालं जग्गा जमीन स्यंकाः मत्सरी चित्त जुयाच्चपि जंतुत लखं चुइके यंकूगुलि स्वर्ग छ्वयाः पर्वतया तीर भासय् यानाः स्वच्छन्द गति बेक्वय्क तरंग थें मण्डलया आकारं भ्रमरी दय्काः चाःचाःहुलाः हानं हानं लिहांवयाः पियाकंगुलि हिले थें तरंगं ल्लाः संकाः प्याखं हुले थें पोपोचा खाःगु नक्षत्रमाला थें विचित्र रूपं अभिनय कयनाः वन ।

थुजाःगु अभूतपूर्व घटना जूगु खनाः कर्कोटक नागराजा थहावयाः आश्रय चायाः छचाःख्यरं

स्वयाः 'थ्व छु धइगु हेतु जुल !' धकाः महाधन्दा कयाः भय त्राश जुइकाच्वन । जिगु आशा भरोशाय् च्वनाच्वं पि आपालं पासापि थुगु अथाह हृदया लः सुनावंगु खनाः जितः तोताः विस्मयुं वन । आः जिनं थुगु थःगु वासस्थान धकाः पियाच्वनं छुयाय् ? बुद्धपिनिगु वचन कदापि कूठ जुइमखु, ता विस्तार मजुइक महापराक्रमी फुक्क शास्त्रया ज्ञानी मञ्जुश्री विज्याइ तिनि धाःगु निश्चय नं खः, उकि जि वसपोलनाप जोरी मखु, थःगु ह्मापांनिसेंयागु वासस्थान निर्माण याय् थाकुसां थः परिवारपि व्वनाः मन विखूस यानाः भचा भचा वाकि दुगु लःया समूहलिसे बुलुहुं बुलुहुं धुसुहुं न्हयानावन ।

समन्तदर्शी मञ्जुश्री बोधिसत्त्वं भविष्ययागु लक्षण विचाः याना स्वत कि थुगु नागवासहृदया अधिपति जुयाच्वं ह्मा कर्कोटक नागराजा पिहांवन धाःसा अनर्थ जुइगु संभावना खनाः शान्तवना बियाः लिगनाः धाल- 'श्रीस्वयम्भू धर्मधातु दर्शन याकेछिक देवमनुष्यपित हितसुखया लागी गुगु महान् शुभकार्य जुइत्यन व जि धाय्माःगु मखु । भगवान्पिसं याःगु थें परिवर्तनशील संसारय् संयोगवश कालवखत त्यइवल्य जुयावइगु उगु सुख दुःख न्हयाह्मसिनं सहर्ष स्वीकार याय् हे माली । काल धइगु निश्चय नं लंघना याय् फइमखु । तर थन गुगु जुइत्यंगु क्रिया खः व जगतोद्धारया निम्ति जुइ । थन कालान्तरय् लिपा आपालं लोकपिनिगु वस्ति दइ, तीर्थ दइ । छंगु जनपरिवार नं लिहांवइ तिनि । थुगु नागहृदया सम्पूर्ण वैभवया स्वामि थुगु मण्डलया अधिकारी छ जुल ।' थुलि धयाः धनाःदहः दय्काः आनन्दं वासं तःगु जुल । गुरु मञ्जुश्रीनं कर्कोटकयागु ख्वाः स्वयाः थथे नं धाःगु दु- 'छंगु लागी आधार धइगु दहः धनाःदहल्य[तःदहः-टौदहः] गुह्यसिनं श्रद्धा तयाः स्नान याइ, नागवास दहल्य स्नान यानागु तुल्य पुण्य प्राप्त जुइ । गुगु वखतय् जल वृष्टि मजुइ उगु वखतय् थुगु धनादहःया किनाराय् विधिपूर्वक पुजा यात धाःसा सुवृष्टि जुइ । कालान्तरय् उत्तमक्षेत्र स्वयम्भू पर्वतस्थानय् छंगु उपस्थिति जरूरी जुइ तिनि ।' थुलि त्रिकालदर्शी मञ्जुश्रीयागु दिव्योपदेश न्यनाः तथास्तु धयाः सन्तोष जुयाच्वन ।

थुलि कर्कोटक नागराजायात यथायोग्य वासस्थान बियाः बोध याय् धुसेलि गन गन लः लिकुनाच्वंगु खः अन अन न्हुछेकाप, कैलाश, गोकर्ण आदि व्याक्कभनं पर्वत त्वाःह्लानाः तुरन्त लः सुकय् यानाबिल । थुलि यानाः भूमि सतह खने दसेलि श्रीस्वयम्भू ज्योतिरूप प्रकाश जुयाच्वंगु अलौकिक सुन्दर पुष्प पलेस्वां जक खने दय्क सम्पूर्ण नाल त्वपुयाः यथायोग्य प्रमाणं सुरक्षित यासे श्रीस्वयम्भू ज्योतिरूप प्रदक्षिणा याय् छिक विश्वकर्मावतार मञ्जुश्रीनं भव्य रूप सुन्दर आसन दय्का व्यूगु जुल ।

फलस्वरूप थुगु महान् शुभकार्ययागु प्रसादं कार्तिकशुक्ल पूर्णिमाया दिनस मञ्जुश्री बोधि-सत्त्वयात आदिबुद्ध पंचबुद्धात्मक श्रीस्वयम्भू ज्योतिरूप धर्मधातु विश्वरूपया रूपय् दर्शन प्राप्त जुल । थुगु विश्वरूप चिन्तामणि अहो विस्मयरूप विश्वरूप श्री स्वयम्भूयात दर्शन प्राप्त जूगुलि महानन्दं उद्गार स्तुति व्यक्त यात :-

नमस्ते बुद्धरूपाय धर्मरूपायते नमः । नमस्ते संघरूपाय पंचबुद्धात्मने नमः । १

पृथ्वीरूपाम्बुरूपाय तेजोरूपायते नमः । नमस्ते वायुरूपायकाश रूपायते नमः । २

ब्रह्मणे सत्त्वरूपाय रजोरूपाय वैष्णवे । तमोरूपमहेशाय ज्ञानरूपाय ते नमः । १३
 प्रज्ञोपायात्मरूपाय गुह्यरूपाय ते नमः । दिग्गुणलोकपालाय विश्वरूपाय ते नमः । १४
 चक्षुरूपाय कर्णाय घ्राणरूपाय जैह्विकः । कायरूपाय श्रीधर्मरूपाय मनसे नमः । १५
 नमस्ते रूपरूपाय षडिन्द्रियात्मने नमः । मांसास्थिमेदमज्जात्र संघातरूपिणे नमः । १६
 रूपाय जंगमांतां ते स्थावराणां चमूर्तये । तिरश्चां मोहरूपाय रूपायाश्चर्यमूर्तये । १७
 सृष्टिकर्ते जन्मरूप कालरूपाय मृत्यवे । भव्याय वृद्धरूपाय बालाय ते नमोनमः । १८
 प्राणापानसमानोदानव्यानमूर्तये नमः । वर्णाय वर्णरूपाय भोक्ते नमूर्तये नमः । १९
 दिनरूपाय सूर्याय चन्द्राय रात्रिमूर्तये । तिथिरूपाय नक्षत्रयोगवारादिमूर्तये । १०
 बाह्याभ्यन्तररूपाय लौकिकाय नमोनमः । नैर्वाणाय नमस्तुभ्यं वदुरूपाय ते नमः । ११
 आदिबुद्धादशकं पुण्यं प्राप्तः पठिष्यति । यदिच्छन्ति लभेन्नूनमन्नो नित्य निश्चयः । १२

थुगु श्लोकया संक्षिप्त अर्थ :-

आदिबुद्ध स्वयम्भू धर्मधातु, छलपोल त्रिरत्न [बुद्ध, धर्म, संघ] रूप जुयाच्चव्हायात नमस्कार ।
 एवं जल तेज पृथ्वी वायु आकाश रूप छःपि सत्त्वरूप ब्रह्मा, रजोरूप विष्णु, तमोरूप महेश्वर जुया-
 च्चव्हा ज्ञानरूप छःपित प्रणाम । प्रज्ञोपायया आत्मारूप, गुह्यरूप, दिशारूप, लोकपाल, विश्वरूप
 छःपित नमस्कार । चक्षु, श्रोत, घ्राण, जिह्वा, काय एवं धर्म मनरूप छःपि रूपया नं
 रूप, शब्दरूप, गन्धरूप, रसरूप, स्पर्शरूप धर्मरूप धारण यानाः षडिन्द्रियया आत्मा जुयाच्चव्हा छपित
 वन्दना । जंगमरूप, स्थावररूप, तिर्यकरूप, मोहरूप जुयाः आश्चर्य मूर्ति जुयाच्चव्हा छःपित प्रणाम ।
 सृष्टि यानाच्चव्हा जन्मरूप, कालरूप, मृत्युरूप, कल्याणरूप, बृहरूप, बलरूप तथा प्राण, अपान, समान,
 उदान, व्यान वायुया मूर्ति जुयाच्चव्हा छःपित प्रार्थना । चतुर्वर्णपित चतुर्वर्णया रूप, भोजनरूप
 अन्नमूर्ति तथा दिनरूप श्रीसूर्य रात्रिरूप चन्द्रमा तिथि नक्षत्र योग वार आदिया मूर्ति छःपित
 नमस्कार । बाह्याभ्यन्तररूप, लौकिकरूप, निर्वाणरूप अथे हे वदुरूप, अचिन्त्यरूप विश्वरूप छलपोल
 धर्मधातु वागीश्वर स्वयम्भूयात सर्वदाकालं सभक्तिपूर्वक नमस्कार । थुगु स्तोत्र श्रद्धा तयाः गुह्ये सिनं
 व्वनो उह्य भक्तया इच्छानुसार निश्चय नं प्राप्त जुइ ।

मञ्जुश्रीयात गुह्येश्वरीं दर्शन ब्यूगु

कालीहृदया लः छ्वनाः लः सुकय् जुसेलि श्रीस्वयम्भू ज्योतिरूप उत्पन्न जुयाच्वंगु पलेस्वांयात
वांलाक बल्लाक आसन दय्काः सुरक्षित याय् धुंकाः थन हानं पले-सकि कुतुवनाच्वंगु थासं
[गुह्येश्वरी कुण्डलं] तस्सकं जलतरंग वधय् जुयाः लः थहांवयाच्वन । थुगु समयय् सर्वज्ञानी विचक्षण
जुयाच्वंह्य मञ्जुवज्र ह्लापा थें लखं पुरय् जुयाः नागहृद जुइ ला धकाः शंका कयाः तुरन्त वज्र धरय्
यानाच्वंह्य मञ्जुवज्रं हेवज्रसमाधिइ च्वनाः जलस्तम्भन क्रिया यानाविल ।

विपश्ची तथागतं पिनाथकूगु पल-सकि कुतुवनाः सिद्ध जुयाच्वंगु थुगु भूमिकुण्ड विषयय् थथे
वर्णन यानातल- थय्क्क स्वयंवलय् कुछिमात्र भूगर्भय् दुने लानाच्वंगु स्वहः दुगु पलेस्वां गुगु पलेपु
कुण्ड वनय् जुयाः त्रिकोणाकार जुयाः सुन्दर जुयाच्वंगु 'धर्मोदयरूप' थुगु थासय् पुष्प धूप आदिया
वर्णगन्धं सहितगु बुलुबुलु लः पोपोचा खानाच्वंगु थें सुरापानया वास वइच्वंगु थुकिइ आकार प्रकार
छुं सीमदु । निरञ्जन निराकार सकभनं खाः खने दुगु ज्योतिरूप भगवान् जलरूप ज्याच्वंगु दर्शन
लात, उवलय् मञ्जुश्रीनं तस्सकं हर्ष जुयाः भक्तिपूर्वक पुजादि सत्कार यात । तत्क्षणय् उगु कुण्डलं
नैरात्मा गुह्येश्वरी विश्वरूप जुयाः दर्शन बिल । थुजाःगु प्रकारं अति विस्मयरूप खंगुलि मञ्जुश्री
महान् आश्चर्य जुयाच्वन । मञ्जुश्रीयात शान्त व क्रोध निगू प्रकारया नं रूप दर्शन बिल ।

शान्तरूप गुह्येश्वरी :-

प्रेतासन यानाः स्वंगः मिखा कनाः कर्तिपात्र ज्वनाः प्रज्ञोपाय स्वरूपं खिखुदँया बैस जुयाः
पंचमुद्रां [चक्री, कुण्डल, कण्ठी, रोचक, मेखलां] तियाः, पंचबुद्धया मुकुटं पुयाः नवनाटयरूपं संयुक्त
जुयाः वीरेश्वरपिसं चाःहुइकाः नग्नरूप, सियूगु तित्तिस्वाःगु सँ जुयाः चन्द्र-सूर्यया कुण्डलं सुयाः नरशिर-
मालां क्वक्खायाः उत्तरपाखे स्वयाच्वंह्य थुगु साधारण मूर्ति बिइ धुंकाः हानं भयंकर क्रोधमूर्ति
धारण यानाक्यन । थुगु शुभमुहूर्तय् आकाशं पुष्प वृष्टि यानाहल । भूमि कम्प जुल । देवहुन्दुभि

बादय थानाहःगु तायदत ।

भयंकररूप क्रोधमूर्ति गुह्येश्वरी :-

चन्द्र-सूर्य-अग्नि स्वंगः मिखा कनाः, उज्ज्वलगु दोछिपाः ख्वाः धारण यानाः, महान् अलंकारं तियाः, निदोपा ह्लातं विचित्र शस्त्र अस्त्र ज्वनाः, सच्छि व च्यागः ब्रह्ममुण्ड कवक्खाया उज्ज्वलगु नुगःपा जुयाः, छपु छपु चिमिसँवाःया रश्मिं ब्रह्माण्डया विभिन्न भेद क्यनाः, ब्रह्मा विष्णु महेश्वर प्रेतरूपि तुति न्ह्याः, चन्द्र-सूर्य निपा ह्लातं आकर्षण यानाः, छयंयागु सँ नक्षत्रया समूह भेद यानाः, कंगःपक्षि व जन्तुया आकार विकारगु ख्वाः जुयाः भयानक मूर्ति धारण यानाः, पंचामृतपान यानाः, मत्ता जुयाः, महानन्दं नृत्य यानाः, प्रेत माःहनातःगु कुण्डलं सुयाः, सच्छिह्वा ध्वं हाःगु थें अद्भुत स्वर पिकयाः, विविध रूप न्यागः गणया तिसां तियाः, अतिघोररूप धारण यानाः, कङ्कालीत प्याखं हुलाच्चं पि भक्तपिसं प्रदक्षिणा याकाः, अतिशीतोष्णया तेजं दिशा प्रकाश यानाः, मिखाफुसि फस्वकाः, मे पिकयाः, मेघ गर्जय् जूगु थें महानाद पिकयाः, वाक्कुछिनाः, पल्पसा त्वःगु थें जाःगु हाराद्ध मालां कवक्खायाः महोज्ज्वल जुयाः, जभीया घंग्ला शब्द वय्काः, व्याघ्रचर्म न्ययाः, थुजाःगु प्रकारया महान् भीषणरूप धारण यानाः विश्वरूप मूर्ति दर्शन व्यूगु जुल । एवं रूपं छपाः ख्वाःनिसें दोछिपाः ख्वाः तकं जुयाः दर्शन विइ धुसें लि जल रूप्य तुं अन्तर्द्धानि जुयाक्यन ।

थजाःह्वा आदिबुद्धया शक्ति स्वरूप नैरात्मा प्रज्ञापारमिता [गुह्येश्वरी]या शान्त क्रोध विश्वरूप दर्शन मार्गकृष्ण नवमीया दिनस प्राप्त जुल । वयां सतिखुनु दशमीखुनु विधिपूर्वक स्वागत सत्कार यानाः गुह्येश्वरीकुण्डया वज्रोदक अभिषेक काय् धुंकाः थनं स्वकुंलाःगु त्वहंत चौकुलां दय्काः त्वपुयाः लः थहांव इगु द्वार चाय्काः यथायोग्य प्रमाणं कुण्डल दय्काबिल ।

थ्व हे महान् ऐतिहासिक घटनायात लुमंकाः श्रद्धा भक्ति तयाः काठमाण्डू उपत्यकावासी बौद्धजनपिसं सम्बरोदय दिशि [मार्गकृष्ण दशमी] या दिनस परम्परागत विश्वास यानाः दिशि पुजा मानय् याना वइच्चंगु धाय्माल ।

गगनगंज बोधिसत्व आगमन

कालीहृदया दथुस उत्पन्न जूगु सहस्रदल पलेस्वांया द्योने अकस्मात् अकनिष्ठ भुवनं अवतरित ज्योतिरश्मि स्वयम्भू भगवान् प्रकाश जुल । थुगु शुभ समाचार शिखी तथागतया धर्मसमास थ्यंक प्रचार जूगुलि शिखी तथागत थः शिष्यपि समेत ब्वनाः श्रीस्वयम्भू ज्योतिरूप धर्मधातु दर्शन याःबल । अथे हे विपश्ची तथागतं अधिष्ठान याःगु पलेसकिपु कुतुवंगु स्थान गुह्येश्वरी कुण्डं अकस्मात् भगवती श्रीप्रज्ञापारमिता उत्पन्न जूगु संकेत गन विश्वभू तथागतं अनुपम विहारय् च्वनाः धर्मोपदेश यानाच्वन उगु परिषद् मण्डपस थ्यंक प्रचार जूवन ।^१

उगु समयय् गगनगञ्ज बोधिसत्व थःगु आसनं दनावनाः विश्वभू तथागतया सन्मुखय् च्वनाः सुविनीतपूर्वक प्रार्थना यात- 'भो सर्वज्ञ तथागत ! थौं आकाळाकां भूमि कम्प जुल । थुगु भूमि कम्प जूगुया हेतु छु ? थथे न्ह्यसः न्यँसेलि विश्वभू तथागतं आज्ञा जुल कि नेपाल मण्डलय् श्रीगुह्येश्वरी प्रादुर्भाव जूगु कारण विशुद्धि सम्पूर्ण प्रसन्न जुल । थुगु अद्भुत आश्चर्य घटना जूगु स्थान दर्शन याय्गु तःधंगु अभिलाषा जुयाः गगनगञ्ज बोधिसत्व प्रभृति थः पासापि मुनाः स्वयम्भू व गुह्येश्वरी दर्शनार्थ अनुपम विहारं प्रस्थान यानाबल । थ्वया नापं कालान्तरय् शाक्यमुनि बुद्ध जुइहा पर्वताख्य बोधिसत्व सहित वःगु जुयाच्वन ।

गगनगञ्ज, पर्वताख्य आदि नेपाल मण्डलय् थ्यंकाः धनादहः [तःदहलय्] स्नान यानाः आदिबुद्ध स्वयम्भू व गुह्येश्वरीयात नं स्नान याकाः पूजादि सत्कार याःगु जुल ।

थुगु समयय् विश्वभू तथागतं मञ्जुश्री बोधिसत्वयात उपहार स्वरूप बिया ब्यु धकाः सुवर्णया पलेस्वां गगनगञ्ज बोधिसत्वयात बियाहःगु जुयाच्वन । थ्व सुवर्णया पलेस्वां दोहलप्युगु अवसरय् थथे धाःगु दु- बुद्धपिसं मयाःनिगु प्रशंसनीय कार्य विश्वकर्मावतार छलपोल मञ्जुश्रीनं यानाबिल, थुगु विषय आपालं साधुकार व धन्यवाद बियाहःगु न्यंकाः थःपिसं नं मञ्जुश्रीयात आपालं प्रशंसा यानाः स्वागत सत्कार यानाः आनन्दं लिहावन ।

मंजुश्रीया नेतृत्वय् मंजुपट्टन निर्माण एवं धर्मकरया शुभराज्याभिषेक

पञ्चशीर्ष पर्वतं विज्यानाच्चंहा महागुरु मञ्जुश्री विज्यानाः गुगु प्रकारं नागहृदया लः पित-
छ्वयाः श्रीस्वयम्भू ज्योति प्रकाश जुयाच्चंगु पलेस्वांयात यथायोग्य प्रमाणं सम्मानपूर्वक सुरक्षित यासे
शोभायमान यानाबिल, अथे हे गुह्येश्वरी कुण्डलयात नं उलि हे आदर तसे शोभावृद्धि यानाः कुण्डल
दय्का व्युगु जुल । उवलसंनिसें थुगु भूमियात सुदूर्जया धइगु संज्ञा जुल, नापं चतुर्विंशति पीठ मध्यय्
छगू उपछन्दोह धइगु नां प्रसिद्ध जुल । थन हे मञ्जुश्री बोधिसत्वयागु विचार अनुसार हिमालयया
चरणकमलस वासं च्वनाच्चंगु नेपाल उपत्यकाया सर्वप्रथम नगर निर्माण याय्गु पाखे ध्यान आकर्षित
यासे मञ्जुपट्टन धइगु सुन्दर सहर निर्माण यानाबिल । थुगु मञ्जुपट्टनया विषयय् स्वायम्भू पुराणय्
थथे वर्णन यानातःगु खनेदु? —

मञ्जुपट्टन महानगरया छ्चाःख्यरं गंपःखालं चाःहुइकातःगु, सिमा छ्चाःख्यरं दइच्चंगु च्यागू
दिशाय्सं च्यागू सुन्दरगु ध्वाका दइच्चंगु चतुष्कोणाकारगु समस्थल जुयाः समान उच्चा जुयाच्चंगु
न्हाइपुसेच्चंगु नगर बसय् यात । थुगु देशया केन्द्रीय स्थान मानय् यानातःगु अति भव्यगु सर्वगुण
सम्पन्नगु राजप्रासाद दय्कल— थुगु राजप्रासाद गथे च्वंगु धाःसा— कलापूर्णगु सुवर्णया द्वार तोरण
दइच्चंगु स्थानस्थानान्तरय् अष्टमंगल दयाः शोभायमान जुयाच्चंगु, थाय्थासय् अमूल्य ज्वाहारात
जडय् यानातःगु द्वारया जःखः द्वारपाल स्वरूप महावीरया मूर्ति तयाः सजय् यानातःगु, थ्वया सन्मुखय्
ताःहाकःगु फर्कियागु थां स्वानाः सिंहया मूर्ति तयाः निर्माण यानातःगु दु । अष्टमंगलया आकारं
चाःहुइकातःगु कूटागार महाउज्ज्वलगु सुवर्णमय रूप्यमय ऊचाः दइच्चंगु माणिकया तोरणं सुशोभित
यानातःगु । स्वयम्भू गुह्येश्वरी यागु आकार तयाः छायापातःगु, नक्षत्रया आकारगु मुसि तइतःगु,

हयूखा जुकातःगु लुँपोल तथाः छत्रध्वजपताः व्यक्तातःगु उकिइसं सुवर्णचैत्यया आकार चूडामणि दइच्चंगु मूर्ति माणिकया किङ्किणीजाल प्यनाः श्रीशोभावृद्धि जुयाच्चंगु स्थान जुयाचवन । उकिइसं थाय्थासय् मनोहरगु पलेस्वापुखू, बुँगाः हिति, मण्डप व सकल ऋतुया पत्रपुष्प फल आदिया तृण गुल्म लता गुँखि सिमा दइच्चंगु उद्यान वन दइच्चंगुलि नगरया आवश्यक व्यवस्था सुसम्पन्न जूगुलि थुगु मञ्जुपट्टन अतिकं प्रशंसनीय जू ।

गुरु मञ्जुश्रीनं पद्मगिरि [स्वयम्भू पर्वस्थान] निसें गुह्येश्वरी थ्यंक विस्तृत नगर वसय् याःगु खँ वंशावलिइ नं उल्लेख यानातःगु दु । थुगु सत्यं शिवं सुन्दरंगु नगर व्यवस्थाया लागी शासकया रूपय् छह्म योग्यह्म क्षत्रीय धर्माकरयात हयाः विधिपूर्वक शुभराज्याभिषेक बियाः राजा स्थापना यानाबिल । बोधिसत्त्व मञ्जुश्रीनं धर्माकरयात राजा स्थापना याय् धुँसेलि आवश्यक उपदेश, भविष्यवाणी एवं आशीर्वाद बियाः थःगु थासय् तुं लिहांवन । वसपोलया अनुययी शिष्यदर्गपिसं थुगु शहरयात उचित प्रमाण मिलय् यानाः नगर निर्माता थःगुरु मञ्जुश्रीया नामं 'मञ्जुपट्टन' धइगु नामं प्रख्यात यानाबिल । अले वसपोल अनन्तोपकारी जगद्गुर्यागु गुणानुस्मरणया लागी भक्तिभाव याय्त 'मञ्जुश्री स्मृति चैत्य' नामं छगः चीबाहाः नं प्रातःठा याःगु जुल, गन कि वसपोल महागुरु मञ्जुश्री नेपाल शुभागमन जूगु पवित्र पुण्य तिथि माघशुक्ल पञ्चमी [वसन्तपञ्चमी-मञ्जुपञ्चमी] या दिनस मञ्जुश्री पर्वस्थानय् थौंतक नं श्रीपञ्चमीया महोत्सव मानय् याना वइचवन ।

श्रीपञ्चमाखुनु उत्तर भद्र नक्षत्र बृहस्पतिवार संयोग जुल धाःसा थुगु दिनयात 'मञ्जुपञ्चमी' धकाः धाइ । थुगु दिनय् तदहलय् स्नान यानाः मञ्जुश्रीयात पूजा सत्कार यात धाःसा निश्चय नं विद्वान जुइ धकाः कनातःगु दु ।

प्रसङ्गवस थन गुरु मञ्जुश्रीनाप सम्बन्ध दइच्चंगु ऐतिहासिक स्थानया संक्षिप्त परिचय प्रस्तुत यानाचवना --

१) मञ्जुपञ्चमी

मञ्जुश्री नेपाल शुभागमन जूगु अथवा मञ्जुश्री दर्शन याय्गु विशेष पर्वकाल माघशुक्ल पञ्चमी उत्तरभद्र नक्षत्र बृहस्पतिवार संयोग जूगु दिनयात श्रीपञ्चमी- मञ्जुपञ्चमी धाइ ।

२) मञ्जुश्री पर्वस्थान

स्वयम्भू पर्वस्थानया लिउनेसं बासं चवनाच्चंगु 'मञ्जुश्री स्मृति चैत्य' प्रतिष्ठा यानातःगु दु । गुलिसिनं सरस्वती स्थान धका नं धाः । थन हे श्रीपञ्चमीखुनु लखौं भक्तजन एवं विद्यार्थीपि वयाः दर्शन व पूजन यानावनी, थुगु दिनस गुगु पर्वस्थानय् महत्वपूर्ण मेला मानय् याना वइचवन ।

३) नगरकोट मण्डप (महामण्डप गिरि)

मञ्जुश्री महाचीनं नेपाः बिज्याःबलय् केशिनी उप-केशिनी सहित विश्राम यानाः नागहृद दृश्याबलोकन याना बिज्याःगु थुगु स्थान खः ।

४) सावाभूमि

गन च्वनाः कि वारणसी सहरया महापण्डित धर्मश्री मिश्रं माया जाल तन्त्रान्तर्गतस च्वंगु आर्यनामसङ्गीति सूत्रया द्वादशाक्षद्रया अर्थ विशुद्धि शिक्षा काय्त मञ्जुश्री नापलाय्त वःगु समयय् करुणावान् बोधिसत्त्वं भक्त धर्मश्रीमित्रया उपरय् अनुकम्पा तसे छली रूपय् साधारण कृषक जुयाः सिंहशार्दूलपित गोस्या रूपय् हल जोतय् यानाः बुँ पाय्काच्चंगु, गुगु अद्भूतमय दृश्य प्रदर्शन व्युगु ऐतिहासिक स्थान खः ।

५) ध्यनाच्चो, फुलोच्च

मञ्जुश्री, स्वयम्भू दर्शनार्थ नेपाल वःगु समयय् कालीहृदया लः छ्वनेत थःनाप ब्वनाहःपि केशिनी उपकेशिनी [वरदा, मोक्षदादेवी] शक्तिपित बासं व्युगु स्थान खः । ध्यनाच्चो माजु विदद्यादेवी [सरस्वती], फूचमाजु श्रीदेवी [लक्ष्मी वसुन्धरा] धकाः मानय् याना वइच्चन । थुगु ऐतिहासिक घटनाया सारांश रूपय् “शुभलाभ” जक च्वयाः नं उगु घटनायात स्मरण याना वइच्चंगु धाय्माल ।

६) ल्हासापाकु

थुगु ल्हासापाकु गुफा नेपाः व ल्हासा उत्तरीय प्रदेश चीन थ्यंक छस्वा जुयाच्चंगु फय्प्वाः वइच्चंगु मञ्जुश्री प्रवेश जूगु प्रसिद्ध गुफा धाइ । थौंया अद्यापि स्थानीय जनतां धयाच्चंगु दु- थन दुने गुफाय् सिरिरिरि सिचुसेच्चंक फय् वयाच्चनी, गुगु फय्पात ल्हासांनिसे वयाच्चंगु धइगु जन-विश्वास दु ।

७) मञ्जुपट्टन

मञ्जुश्री वयाः कालीहृदया लः पितछ्वयाः स्वयम्भू व गुह्येश्वरी दर्शन याय् धुंकाः देव-मनुष्यपित च्वने छिक अर्थात् उत्तर व भारत वइच्चनीपि लोकपि बासं तय्त दय्कूगु सुन्दर शोभायुक्त सहर खः । थुगु स्थान मञ्जुश्रीयागु प्रेरणां निर्माण जूगु जूया निम्ति मञ्जुपट्टन धइगु नामकरण जुल । थुगु स्थान वर्तमान इतिहासकारतय्सं थथे अनुमान याःगु दु- मञ्जुपट्टनया अपभ्रंश रूप ‘मजिम्पाट’ मानय् याना वइच्चन, गुलिसिनं राजधानीपट्टनया अपभ्रंश रूप ‘लाजिम्पाट’ जुल जुइ धइगु शंका यानाच्चन । थन हे धर्माकर राजाया राजधानी धकाः संकय् याना वइच्चन* ।

८) शरप्रवेश-त्रिस्थान

मञ्जुश्रीनं गुगु अथाह कालीहृद नागवासदहःया लः छ्वनेत प्रयास यात उबलय् थ्व विशाल जलसमूहया लः गुलि गथे दु अर्थात् गपाय्जाः धइगु अनुमान याय्त वसपोलं सर्वप्रथम थ्व क्रिया

* मञ्जुश्रीयात नेपालया बुखं, चित्तधर हृदयजु ।

याना बिज्यात धइगु अनुश्रुति दु- थःह्म ज्वनाच्वंगु धनुष वाणं स्वकः तक उगु लखय् प्रहार यात ।
उगु शरप्रवेश जूगु स्थान अशनि वज्रपात जूगु धकाः स्मरण याना वइच्वंगु गुगु खः स्थान
वर्तमान काठमाण्डू असन टोलया अशनिप्रवेश न्याचा दुगु थाय् व थे देवपट्टनया त्वहंशूल गणेशया
थाय् अथे हे मेगु ललितपट्टनया जगति द्वहं समेत थुगु स्वंगू थाय्यात मञ्जुश्रीया शरप्रवेश सिद्ध जूगु
थाय् धकाः परम्परागत अनुश्रुतिकथं मानय् याना वइच्वंगु जुल ।

ऋकुच्छन्द तथागत आगमन

अतीतकाल्यु क्षेमावती नगर्यु अग्निदत्त ब्राह्मणया स्त्री विश्वचिनीदेवीया विशुद्ध गर्भं ऋकुच्छन्द जन्म जुल । श्वसपोल सम्बुद्ध जुइगु पूर्वसंस्कार दुह्य जूया निम्ति शिरीषवृक्षया मूल्य च्वनाः सम्बोधिज्ञान प्राप्त याना विज्यात । क्रमशः बुद्धचर्या याय माःगु ज्या यानाः विधुर, संजीव तथा बुद्धिज्ञ आदि प्रमुख भिक्षुवर्गपि मुंकाः क्षेमाकर महाविहार्य च्वनाः धर्मोपदेश यानाच्वन । लोक-हितार्थं निम्ति देशाटन याना विज्याःबलय स्वयम्भू धर्मधातु दर्शन याय्त कथंथे नेपाः थ्यंकः वल^१ । भ्रमणया कार्यक्रमकथं ऋकुच्छन्द तथागतया नापं तीर्थ सेवा याय्गु उत्साह याना साकेतनगराधिपति महाराज धर्मपाल एवं गुणध्वज ब्राह्मण, अभयन्दद क्षेत्री प्रभृति आपालं शिष्यपि सहित यानावल । उगु समय्यु शाक्यमुनि बुद्ध जुइह्य ज्योतिपाल बोधिसत्व जुयाः तथागतया सेवा यानाच्वन ।

ऋकुच्छन्द तथागत नेपाः थ्यँसेलि श्रीस्वयम्भू धर्मधातु दर्शन व पूजन याय धुंकाः थनंलि श्रीनैरात्मादेवी गुह्येश्वरीया नं दर्शन यानाः मञ्जुपट्टन सहर्यु दुहांवनाः मञ्जुश्रीया कीर्ति खनाः अतिकं प्रशंसा यानाः उत्तरपाखे स्वयाः प्रस्थान यानाः सिद्धिफुलोच्च पर्वतस थहांवन । थन हे च्वनाः ऋकुच्छन्द तथागतं भिक्षुपित श्रावकचर्या, बोधिसत्वपित महायानचर्या, योगिपित योगचर्या तथा गृहस्थपित गृहस्थचर्या समेत उपदेश विया विज्यात । श्व हे बुद्धोपदेश न्यनाः प्रभावित जूपि गुणध्वज ब्राह्मण व अभयन्दद क्षेत्री प्रभृति शिष्यपित थन हे पर्वस्थान्य च्वनाः चूडाकर्म यानाः विनयानुसारं भिक्षुवर्यास तयाः बोधिमार्गं सप्त त्रिश बोधिपाक्षिकायागु सविस्तार वर्णन याना विज्यातः--

सर्वज्ञैरपि बौद्धैश्च बोधिसत्व गणैरपि ।

इत्यादि भिर्गुणैर्युक्तं धर्मं संबोधिपाक्षिका ॥

सप्तत्रिंशभिर्युक्ता स्तथागतैः प्रचारिताः ।

अतीतानागतैर्बुद्धैः प्रत्युत्पन्नैः स्तथागतैः ॥

अर्हद्भिर्वोधिसत्त्वैश्च महासत्त्वैस्तथा अपि ।
 दशादिक्षु स्थितैश्चापि सर्वैस्तथागतैरपि ॥
 प्रतिदिने प्रतिमासे प्रतिक्षणे च वर्णितम् ।
 इत्यादि भिर्गुणैर्युक्तं तथागतैः प्रशंसितम् ॥

सर्वगुण सम्पन्न सप्तत्रिंश बोधिपाक्षिका धर्म [३७ स्वीन्हयगू बोधिपाक्षिका × धर्म] न्हात्थाय
 न्हावलं सर्वज्ञ बोधिसत्त्व एवं अर्हत्पिसं नं अति श्रद्धा तथाः प्रशंसा यानाः कनावइच्चंगु, आचरण
 याना वइच्चंगु व हे सद्धर्ममूलक थौ थुगु सिद्धिफुलोच्च पर्वस्थानय च्वनाः धर्म व्याख्यान जुल । थ्व हे
 खँ न्यनाः बोध जूपि ७०० शिष्यपित श्रावकचर्यास तथाः थुमित अभिषेक विइगु इच्छा प्रकट याना
 विज्यात । तर उगु अवस्थाय अभिषेक वीत लः मदयाच्चंगु सोकाः महाकरुणावान् तथागतं थुक्रियागु आशय
 थुइकाः जल उत्पन्नया लागी थुगु पर्वतय जलाधिष्ठान यायगु मतिइ तथाः शुभसंकल्प याना विज्यात कि-

ज्योतिरूप श्रीस्वयम्भू धर्मधातु स्मरण यानाः भविष्य कालय आपालं तीर्थ उत्पन्न जुइगु
 शुभलक्षणयात आशय यानाः जल बिना प्राणी म्वाना च्वने फइमखुगुलि जल आराधना तथा
 भिक्षुचर्यास च्वंपिनि प्रवज्याव्रत साङ्गि यायत्, अभिषेक विना विधिविधान पूर्ण जुइ मखुगुलि
 अभिषेकया लागी आवश्यक जूगुलि बुद्धानुभावं ऋद्धिया प्रभावं थुगु थासं सदांया लागी जल प्रवाह
 जुयाच्च्वनेमा धकाः क्रकुच्छन्द तथागतं जवगु ल्लाःया दथुपचिनं थुगु पर्वतस स्पर्श यानाः अधिष्ठान
 याय मात्रं तत्क्षणय उगु थासं निर्मल अष्टांग गुण सम्पन्न जल प्रवाह जुयाः न्हावल । थुगु निर्मल
 यच्चुगु जलधारा प्रवाह जूगु स्वयाच्च्वंपि दर्शकगणपिसं क्रकुच्छन्द तथागतप्रति न्हापा स्वयाः नं अप्पो
 श्रद्धा निश्चय जाया वयाः आपालं भिक्षु जूवन । वसपोलयागु उपदेश न्यनाः गुलिसिनं योग यात,
 अपि योगी जुल । प्रत्येक ज्ञान लानाः प्रत्येक बुद्ध जुल । गुलि पारमिताचर्या चलय यानाः बोधिसत्त्व
 जुल, एवं क्रमं सकल शिष्यवर्गपित थुगु पवित्रगु निर्मल जलं धमाधम अभिषेक प्रदान यानाः थःगु
 शासन दीक्षित याना विल ।

विपश्ची, शिखी, विश्वभू तथागतपिसं जामाचो, ध्यनाचो, फूचो पर्वतयात अधिष्ठान यानावन;
 व हे खँयात लुमंकाः क्रकुच्छन्द तथागतं थुगु पर्वतयात नं अधिष्ठान यानावन । उवलसंनिसं क्रकुच्छन्द
 तथागतया मतिइ चिन्तना यानाः वाक्यद्वारा अधिष्ठान याःगु जूया निम्ति थुगु तीर्थयात वाग्मती =
 वाक्यमति = वाक्द्वार धयागु नां प्रख्यान्त जुल । थुगु वाक्द्वारं निष्कासन जुयाः पिहांवःगु वाग्मतीया
 लः गन गन मेमेगु धः खुसि नदीनाप संगम जूवन, अन अन तीर्थ धइगु संज्ञा जुयावन । आदिगु
 वाक्द्वार, अन्तिमगु कोदुवाः, मध्यमगु मनोहरा-- थुपि स्वंगू विशेष उत्तम तीर्थ जुइ । एवं रूपं
 क्रकुच्छन्द तथागतं शिष्यपित चूडाकर्म यानाः बडे छूगु समयय केशपतन जूगु गुगु थाय खः उगु थाय
 विभिन्न केशाकृतिया रूपय सिद्ध जुयाच्च्वन । थ्व हे केशप्रवाहयागु नदीया नाम केशावती धइगु संज्ञा

× प्यंगू स्मृत्युपस्थान, प्यंगू सम्यकप्रदान, प्यंगू ऋद्धिपाद, न्यागू इन्द्रिय, न्यागू वल, न्हयगू बोध्यंग व
 च्यागू आर्याष्टाङ्ग मार्ग ।

जुल । थुगु पर्वत शंखया आकारगुलि शंखोच्च पर्वत जुल । थुगु स्थानय् यानागु कर्म सिद्ध जुइगु
जूया निम्ति सिद्धिफुलोच्च धइगु नं नां जूगु जुल । सुनां थुगु खँयात ध्यान तथाः श्रद्धापूर्व सिद्धिफुलोच्च
[सिफूच]स थहांवनी उह्य भक्तया पाप नं नाश जुइ, थन हे भविष्य कालय् सिद्धगणपिसं आश्रम
याइ तिनि धकाः प्रशंसा यानावन ।

उकिं इतिहासपाखे ध्यान आकर्षित यासे थुगु पर्वत स्थानय् थौतक नं मेषसंक्रान्तिया दिनय्
मेला मानय् याना वयाचवन तिनि ।

ऋकुच्छन्द तथागतं सिफूच पर्वतयात अधिष्ठान याय् धुंकाः थन मञ्जुश्रीनं दय्कावंगु
गुह्येश्वरी जंगलय् बासं चवनाः शिष्यपित खँ थवकाः आज्ञा जुल— 'कालान्तरय् थुगु सुन्दरवनय् देवता,
योग सिद्धगणपिसं नं बास याइ । थन स्वयम्भू व गुह्येश्वरी दर्शन याय् धकाः वयाचवंपि ब्रह्मा, विष्णु,
महेश्वर— थुपि सुन्दरपि स्वह्य मृग रूप जुयाः वन विहार यानाचवंगु स्व, लीपा थुमिगु नामं थुगु
श्लेष्मान्तक वन अतिकं उत्तम जुइ, थन थुमिगु नामं ज्योतिर्लिङ्ग उत्पत्ति जुइ, थुमिगु हे नामं थुगु वन
जंगलया मृगस्थली धइगु नां जुइ ।' थुलि धयाः श्रीनैरात्मादेवी गुह्येश्वरी दर्शन यानाः थःगु थासय्तुं
लिहांवन ।

रतिशर्मा ब्राह्मण्या स्वयम्भू दर्शन

हिमालयपाखे कनकावती धइगु छगू देस दु, गन शास्त्रया ज्ञानी जुयाः आपालं धनरत्न श्री-सम्पत्ति दइच्चंहा तर निःसन्तान जुयाः दुःख सियाच्चंहा रतिशर्मा धइहा ब्राह्मण छहा दइच्चन ।

थुमिसं सन्तान प्राप्तिया कारण् व हे कनकावती सहरया सिथय् च्वंगु शान्त वातावरणगु रमणीयस्थलस न्ह्यानाच्चंगु कनकावती महातीर्थय् न्हित्थं स्नान कर्म यानाः शुचिर्नियमय् च्वनाः थः कलाः रत्नावती सहित यानाः अमूल्य रत्नया किङ्किनी जाल प्यना तइतःगु सुवर्णमय उष्णीषच्छत्र अंकित यानातःगु असंख्य शोभायमानगु अति उच्च जुयाच्चंगु महान् विपुलगु धर्मधातु स्वयम्भू चैत्ययागु पूजा भावभक्ति यानाः सेवा यानाच्चन^१ ।

थुगु चैत्ययागु सेवा याना च्वच्चं छन्हु थ्व हे कनकावती महातीर्थस निह्मतिपूया मोल्हुया-च्चंगु बेलय् पद्मपुर महानगरया दक्कसिबय्सं धनाढ्यह्य गुणशील महाजनया कलाः गुणवतीया पाखें जन्म जूहा गुहा खः सर्वज्ञमित्र नांया मचा विविध घटनाया कारणं जंगलय् वाछ्वयाथकूहा ह्याउँमचायात गिद्ध छहा वयाः इमां खाचा दायायंकू थें दाया यंकल । उवलय् व गिद्धं सुनानं मखंक नय् धकाः आकाशमार्गं ब्वय्का यंकुयंकुं थ्व हे कनकावती देसया पिने च्वंगु धर्मधातु स्वयम्भू महाचैत्यया सुवर्णमय उष्णीष छत्रमण्डलया द्योने तीजक दिके हःगु जुयाच्चन^२ । थ्व मचायात नय् धकाः तस्सकं लय्तायाः थःगु त्वाः च्वतुमतुच्चलाः पपू भाराभारा संकाः नय्त तयार जुयाच्चन । उगु अवस्थाय् थ्व मचा सर्वज्ञमित्रया पूर्वजन्मया पुण्यया फलं स्मृतिसंप्रजन्य बांलाक चालावसेलि ह्लाः-दुति संकाः ख्वयाहल । थ्व मचा संगु ख्वःगु खनाः म्वाःह्यसिगु ला जि मनया, स्यानाः गथे नय् धकाः मतिइ तयाः व मचा अनसं तोताः सरासर ब्वयाः मेथाय् वन ।

थथे अचानक उहा सर्वज्ञमित्र मचा ख्वयाहःगु सः ताय्दय्वं रतिशर्मा ब्राह्मणं थः कलाःयात 'भो पत्नी ! थन सुं मदुगु थासय् गन गुगु थासं मचा ख्वःगु सः ताय्दत !' धाधां उख्यें थुख्यें

१, २- थुकिया विस्तार खँ सर्वज्ञमित्रावदानय् उल्लेख जुयाच्चंगु दु ।

मालास्वत नं लुयामवसेलि आकाशय् थस्वःगु बेलय् उगु महाचैत्यया च्वय्च्वंगु उष्णीष छत्रस च्वनाः कुतुवइथे वइथे च्वंक ख्वयाः हालाः सनाच्वंगु खनाः निहासियां हथाय्पथाय् चायाः कय्कय्च्याना-च्वन । 'अहो छेगु भाग्य, थुगु धर्मराजिक महाचैत्ययागु सेवा यानाच्वनागु फलं दुःख कष्ट सिइ-म्वाय्क परमेश्वरं वरदान बिल । जि वनाः कयाह्य ।' धकाः क्षमा पवनाः, चीबाहाः अनि यानाःलि उगु महाचैत्ययागु त्रयोदश चक्रावलीस गयाः च्वय् थ्यंक थहांवनाः छत्रय् च्वंहा सर्वज्ञमित्र मचा कयाहयाः थः कलाःयात लय्लय्तातां लःल्हाना विइत सनाच्वंबलय् कलाःहासिनं 'भो प्रभु स्वामि ! आम मचा सुयाहा खः, गुगु जातयाहा खः, भि ला मभि ला ?' धकाः न्यैसेलि रतिशर्मा ब्राह्मणं लिसः बिल- 'मखु मखु थर्थेज्याःहा सुन्दर सुलक्षणहा मचा अवश्य नं अलक्षणहा जुइमखु । उकिइसं थुगु धर्मधातु स्वयम्भू महाचैत्यं वरदान स्वरूप व्यूहा थुहा मचा गथे मभिहा जुइ फइ ! निःसन्देह भिहा सपूतहा खइ । मन अन्दोल यानाच्वने मते ।' थुलि धयाःलि मचा लःल्हानाबिल । मचा लःल्हाना काय् धुँसेलि थःगु जात कर्म अनुसारं संस्कार कर्म खंकाः धर्म यानाः दुहा मचा जुयाः धर्मदत्त धइगु नामकरण यानाबिल । निहातिपूयां अत्यन्त हर्ष जुयाः वांलाक बिचाःसंचाः यानाः पालन पोषण यानातल ।

थुहा मचा सर्वज्ञमित्र (धर्मदत्त) शुक्लपक्षया चन्द्रमा समानं न्हित्थं तःधी जुजुवल । प्यदं न्यादं दसेलि शास्त्र विद्या नं ब्वंकातल । प्यदं फुनाः न्यादं दसेलि रतिशर्मा ब्राह्मणया तीर्थाटन याय्गु मनसुवा जुयाः थःगु छेँ तोताः अनेक देसान्तर भ्रमण यानावन ।

देश देशान्तर भ्रमण याना वँव कथथे नेपाल मण्डलय् थ्यंकाः अनेक तीर्थय् स्नान यानाः ज्योतिरूप श्रीस्वयम्भू दर्शन यानाः पूजा भावभक्ति यानाः स्वयम्भू पर्वतया जःपाखे च्वंगु वर्तमान किण्डोल धइगु स्थानय् थ्यंकाः अन विश्राम यानाच्वन । थुहा साधु तपस्वी भेष रतिशर्मा ब्राह्मण अनेक ज्ञान गुण धर्मशास्त्र उपदेश बियाः छुं कालान्तर थन हे बासं च्वंच्वन । गुलिछि समय बितय् जुसेलि थुहा साधु तपस्वीया आपालं शिष्यपि दइवल । उकिइसं श्रद्धालु दातापि नं यक्व दत्त । न्हित्थं थुमिसं दान प्रदान याय्हःगु उलिथुलि मदय्क धन श्रीसम्पत्ति दसेलि श्रीस्वयम्भू ज्योतिरूप दर्शन व पूजन याय्त वइच्वनीपि अतिथि अभ्यागत एवं तीर्थयात्रीगणपि च्वनेत धर्मशाला दय्के धकाः शोभायमान जुइक ज्याछिक तःधंक छगू विहार नं दय्काबिल । थुगु विहारया निर्माण कार्य सुसम्पन्न जुसेलि विहारया नां छु तय् माली गुगु तय् माली धकाः गुलिखे समय तक मतिइ आकुल व्याकुल जुयाः अन्दोल जुयाच्वंगुलि "किम् इति आन्दोलम् = किमान्दोल" धकाः किण्डोल महाविहार धइगु नामं प्रसिद्ध याना व्यूगु जुल । ख्व हे कारणं थौतकं थुगु स्थान किण्डोल नामं प्रख्यात जुयाच्वन । थुगु विहारया निम्ति विनयानुसार आवश्यक व्यवस्था मिलय् यानाः थःगु देस कनकावती महानगरसंतुं लिहांवनाः थःगु छेँय् आनन्दं थ्यंकः वंगु जुल ।

गोकर्ण राजकुमारया स्वयम्भू दर्शनि व पुण्यतीर्थस तपस्या

अतिकं विद्वान् व नीतिशास्त्रय् निपुणह्य राजा वृषकर्ण पाञ्चाल देसस राज्य यानाच्वन ।
छन्हु राजकुमार गोकर्ण थः अबु वृषकर्णया न्ह्योने वनाः थथे इनाप यात--

‘भो अबुजु ! छलपोल वृद्धावस्था जुइ धुंकल । थःगु शरीरयात अप्पो छाया दुःख बिया
च्वनेगु ! छलपोल जितः राज्याभिषेक बियाः तपोवनय् प्रवेश जुयाः शान्तं जीवन हना बिज्याहुँ ।
गथे बुबां थ्व देसयात राज्य यानाच्वन अथे हे जिं नं आनन्दपूर्वक राज्यशासन यानाच्वने^१ ।

थुकथं एक्कासि कायनं वयाः प्रार्थना याःवःगु खँ न्यनाः अबुहोसिनं लिसः बिल- ‘अरे !
चण्डाल गोकर्ण, खास जि दयकदयकं थुजाःगु खँ ल्हाःवय् ज्यू ला ? जि खनाः छाया दोष चर्कय् जूगु !
जिगु राज्य जि यत्थे याय्, छंत छाया च्यूता ! जि म्वाना च्वेतले थ्व राज्य छंत दइमखु । यदि छंत
जि मयो धइगु जूमा थ्व देस तोताः याकनं हे थनं पिहां हुँ ।’

अबुयागु खँ न्यनाः तँम्वयाः राजकुमार गोकर्ण धाल- ‘छ दुष्टम्ह अबुं आवंलि आपाः राज्य
याय् दइमखुत । मृत्युकाल सतिना वइच्वन । जि याकनं हे राजसिंहासनय् च्वने दइ, अले छ नरक
पतन जुइ ।’

थः कायनं धाःगु अपमान शब्द न्यनाः राजा वृषकर्ण धाल- ‘अरे चण्डाल कुपुत्र, छं जिगु
अपमान यात, छ जिम्ह काय् हे मखु । थनिनिसें छंत देसं पितनेगु जुल ।’ थ्व खँ न्यनाः गोकर्ण
तस्सकं तँम्वयाः अबुम्हेसित लिसः बिल- ‘छ थें जाःम्ह शत्रुम्ह अबुयागु बीजं जन्म जूगु हे जिगु
जन्म धिक्कार, लिस्सैं थुगु देसय् च्वनाः म्वानाच्वनागु नं ।’ अबु-काय्या विचय् अथे परस्परय् त्वापु
जुसैंलि राजां हुकुम जुल- ‘थ्व पापीयात जिगु देसं पिछ्व । थ्व जिम्ह शत्रु खः । थ्वं अवश्य नं

भिज्या याइमखु ।' काय्हासिनं हानं लिसः बिल- 'अरे शत्रुह्म अबु ! छ याकनं यमलोक वनेमा । छंगु मृत्यु संस्कार व जलदान, पिण्डदान नं याय् मखु, गुकि याना छ नरकवास लाय्मा ।' थथे काय्यागु अवाच्य शब्द न्यनाः वृषकर्ण गोकर्णयात श्राप बिल- न्ह्यात्थाय् वंसां च्वंसां पितृदोहयागु पापं छ हे नरकय् लानाच्चनेमा ।'

थथे अबुयागु श्राप न्यनाः थःगु देस तोताः सुंसां मदुगु वनान्तरय् वनाः च्वंच्वन । अन हे वनान्तरय् अबुयागु श्रापया फलं मिखां मखंहा थें जुइकाः गन वने गन च्वने धया थें जुयाः लं मसियाः छथाय् विचय् लानाच्चन । छुं दिन लिपा पितृदोहया पापं यानाः अन हे नरकभूमि खने दइवल । लिस्सें अन हे नरकय् च्वंहा छहा पापीं खनाः 'अहो ! मानव, गथे याना थ्व तःमागु सिमाय् नया सिखलं चिकाः महादुःख, महाकष्ट भोगय् यानाच्चना ?' धकाः धयाहःगु आवाज न्यनाः पापात्मां लिसः वियाहल- 'भो पितृद्रोही, पापात्मा महाभाग गोकर्ण ! गनं गथे जुया थन लाःवल ? थन हे खः कर्मभूमि, नरकभूमि । थुजाःगु दुःखै दुःख भोग सकसितं लाःवइ तिनि ।' थुजाःगु हे प्रकारं हानं मेहा पापीष्टयात गोकर्ण खन । छहा मनूया छचनय् चक्रवेग हिलाच्चंगुलि हि, दाः स्यः नायाः सोसो पिने पिहांवयाच्चंगु व मे फेत्तुफेयाः सवाः कयाच्चंगु खनाः गोकर्ण वयाके न्यन- 'थुजाःगु सास्ति छाय् छंत याकातःगु ?'

गोकर्णयागु न्ह्यसः न्यनाः पापात्मां लिसः बिल- 'मखु, थ्व दुःख सुनानं ब्यूगु मखु । केवल थमं पूर्वजन्मय् यानावयागु पितृद्रोहयागु पापया फलं यमद्वारय् यंकाः थन थथे तयातःगु खः । जितः जक मखु थथे हे पितृद्रोह याःपि गुलि नं पापीष्टत दइ इपि सकसितं थन हे हइ तिनि । उकिइ मध्यय् छ नं थन लाःवल खनी, छ नं पितृद्रोह यानावःहा जुल । उकि छुं क्षण लिपा छंगु छचनय् नं थथे हे चक्रं प्रहार याइ तिनि, अने छ नं जि थें हे जुइ तिनि । न्ह्यात्थेसां छ जिहा दुःखया पासा जुइहा जुल ।' थुलि न्यनाः गोकर्ण रुसंक वन- 'अहो ! जि नं पितृद्रोह यानावइहा पापी जुयाच्चन खनी, उकि थुगु थासय् लाःवल । आवंलाछि लाःनि, यमदूततसें मखंनिबलय् याकनं बिस्युं वनेमाल । थ्व थासय् च्वनां भिनी मखु ।' पापात्मां थ्व खं न्यनाः न्हिलाः धाल- 'हे मानव ! छ न्ह्यात्थाय् छलय् जुयाः मखंक बिस्युं वने धाःसा नं यमदूतं छंत पाशं कयंकाः साला हइवलय् छ गनं नं बिस्युं वने फइमखु ।'

गोकर्णकुमार हत्तर पत्तरं अनं बिस्युं वन । वं वं छथाय् विचय् लय् शान्तदान्तहा भिक्षुयात खनाः आदरपूर्वक नमस्कार यानाः थःगु दुःखया वृत्तान्त खं कनाः बचय् जुइगु उपाय जत्तन छु दु धकाः न्यन । वयागु अत्यन्त दुःखित सः न्यनाः धैर्य शान्तवना वियाः पाप फुकेगु उपायकुशल ज्ञान स्यूहा भिक्षुं वइगु हित सुख कल्याणया निम्ति थथे आज्ञा जुल- 'हे महाभाग गोकर्णकुमार ! थनं सुदूर उत्तरापन्थपाखे हिमालय पर्वतया क्वस्सं अत्यन्त पवित्रगु नेपाल धइगु भूमण्डल छगू दु, गन कि ततःधंगु उत्तम पवित्रगु नदी तीर्थत न्ह्यानाच्चंगु दु । उकिइ मध्यय् अतिकं प्रसिद्ध जुयाच्चंगु महातीर्थ वाग्मती संगम जुयाच्चंगु आमोघफल विइगु पुण्यतीर्थ दइच्चन । अन श्रीआर्यावलोकितेश्वर करुणामय प्रशन्न जुसे आपालं लोकउद्धार जुयाच्चन । उकि छ नं अन हे तीर्थय् वनाः स्नान दान व्रतोपासनादि

यानाः श्रीस्वयम्भू ज्योतिरूप भगवान् दर्शनं व पूजनं यायुः स्व । उगु पुण्यया प्रभावं दशाकुशल पाप मुक्त जुयाः मातृ-पितृद्रोह यानागु पञ्चमहापाप आदि शान्त जुयावनी । लिस्सें श्रीआर्यावलोकितेश्वर-यागु दर्शनं प्राप्त जुयाः अन्तर् जीवन मुक्त प्राप्त जुइ ।'

थुकथं भिक्षुयागु सदुपदेश न्यनाः नेपाल मण्डल्य थ्यंकाः श्रीस्वयम्भू ज्योतिरूप भगवान् दर्शनं व पूजनं यानाः पुण्यतीर्थपाखे स्वयाः गोकर्णकुमार सरासर वन । पुण्यतीर्थ्य थ्यंसेलि भक्तिपूर्वक स्नानकर्म यानाः त्रिरत्नया शरण्य वनाः पलेस्वां द्वहलपा व षडक्षरी मन्त्र जप यानाः उपोषधव्रत यानाः १२ दै दसेलि थःगु पितृद्रोह पाप परिशुद्ध जुयावंगु जुल ।

थुलिया दुने उखे पाञ्चाल देसया जुजु वृषकर्णया देहान्त जुइ धुंकूगु जुयाचवन । राजकुमार गोकर्ण देस तोताः पिहांवंगुलि वृषकर्णयागु अग्निसंस्कार आदि क्रिया ब्राह्मणपि पाखे सम्पन्न याकल । थःह्य काय्यागु ह्लातं जलदान पिण्डदान काय् मखंगुलि राजा वृषकर्ण अगतिइ लाःवन । अगतिइ लाःवंगुलि यानाः राजगृह्य वनाः पिण्ड पवनाः दुःखसिया नयाचवन । 'हे पुता ! हे गोकर्ण ! छ गन वनाचवना ? छंगु ह्लातं पिण्डदान जलदान काय् मखंगुलि थौं जि दुर्गति - अगतिस लानाचवन । याकनं जितः उद्धार याना ब्यु ।' धकाः हाहां राजा वृषकर्ण न्हित्थं राजगृह्य चवनाः अगति रूप्य दुःख सियाचवन ।

थुखे पुण्यतीर्थ्य चवनाः उपोषधव्रत यानाच्चंहा गोकर्णकुमारयात सुखावतिस विज्यानाच्चंहा श्रीआर्यावलोकितेश्वरं ध्यानदृष्टिं खंकाः गगनगञ्ज बोधिसत्वयात सःताः आज्ञा जुल- 'हे गगनगञ्ज ! नेपाल मण्डल्य पुण्य तीर्थ धइगु स्थान्य चवनाः गोकर्ण राजकुमारं दुष्कर तपस्या यानाः उपोषधव्रत यानाच्चंगु दु । वइगु उद्धारया निम्ति याकनं हुँ ।' थुलि वचन न्यनाः थःगु दिव्यरूप प्रकाश यानाः गोकर्ण राजकुमारयात दर्शन बिल । आश्चर्यपूर्वक ज्योतिरश्मि प्रकाश यानाच्चंहा गगनगञ्ज बोधिसत्वयात खनाः हथासं दनाः प्रदक्षिणा यानाः प्रार्थना यात- 'हे नाथ ! हे भगवन् !! छःपित जिगु सहस्त्रकोटि बारंवार नमस्कार । दुःखी, मूर्ख, अभागी जि सिइकं मसिइकं पितृद्रोह यानाः अपराध यानावयागुलि जि दुःखसागर्य लानाचवन । उगु सम्पूर्ण अपराध क्षमा यासे पितृद्रोह पापं मुक्त यानाः जितः उद्धार याना विज्याहुँ ।'

गोकर्णकुमारयागु प्रार्थना न्यनाः महाकारुणिक गगनगञ्ज बोधिसत्वं आज्ञा जुल- 'भो गोकर्ण-कुमार ! पाञ्चालाधिपति महाराज छं अबु वृषकर्णया देहान्त जुइ धुंकल । आः थुगु अवस्थाय् प्रेत जन्म कयाः अगति जुयाः दुःख भोग यानाचवन । छंगु ह्लातं जलदान पिण्डदान मकासें छं अबुयात सद्गति प्राप्त जुइमखु । उकिं अबुया नाम्य याकनं पिण्डदान याना ब्यु, उकिं यानाः छंत लानाच्चंगु पितृद्रोह पाप याकनं फुनावनी ।'

बोधिसत्वयागु दिव्य उपदेश न्यनाः गोकर्णकुमारं उगु पुण्यतीर्थस श्राद्धकर्म पिण्डदानया सर-सामग्री ज्वर्य याना हयाचवन । उबलय् अन प्रेतात्मा वृषकर्ण पुण्य तीर्थ्य थ्यंकाःलि न्ववाना हल- 'हे प्रिय पुत्र गोकर्ण ! छंगु ह्लातं याकनं श्रद्धापूर्वक पिण्डदान ब्यु, गुगु पिण्डदान यानागु पुण्यानुभावं थनिनिसे प्रेतयोनि मुक्त जुइगु जुल ।' थुलि धयाः वृषकर्ण अनसंतु लुप्त जुल ।

थः अबुयागु आत्मीय सन्देश न्यनाः श्रद्धापूर्वक अन्तस्करणंनिसैं प्रणिधान यानाः 'थ्व जिगु ह्लातं जिम्ह अबुयागु प्रेत जन्म भोग शान्त जुयाः सुखावति भुवनस जन्म कयाः अमिताभ तथागतयागु व्याकरण अभिषेक लाय्मा ।' धकाः शुद्ध संकल्प यानाः पिण्डद्वारा चैत्य [बुद्ध] दय्कल, नैवद्यद्वारा गोमाता [धर्म] दय्कल, पाल्चामतद्वारा [संघ] यात लुमंकाः दय्कल । अथे हे कूशद्वारा प्रेतात्माया प्रतिमा दय्काःलि विधिपूर्वक थः काय्यागु ह्लातं पिण्डदान याःगु पुण्यया प्रभावं राजा वृषकर्ण प्रेतात्मां तरय् जुयाः आकाश मार्ग वनाः आकाशवाणी जुल- 'हे पुत्र गोकर्ण ! आवंलि छंगु मनोरथ याकनं पूर्ण जुइमा ।' थुलि आशीर्वाद बियाःलि सुखावतिस जन्म काःवन ।

पिण्डदान क्रिया सिधय्काः गोकर्णकुमार एकचित्त यानाः भक्तिपूर्वक बोधिसत्वयात पूजा याय् धुंकाः प्रार्थना यात- 'हे नाथ ! हे भगवन् !! छलपोलयागु अनुग्रहं जिमि अबु पितृलोकं उद्धार जुयाः सुखावतिस वन । छलपोल थुगु हे थासय् स्थिरं विज्याहुँ । जि नं सदां थ्व हे थासय् च्वनाः छलपोलया सेवा भक्ति यानाच्वने ।' गोकर्णकुमारयागु विन्ति न्यनाः बोधिसत्वं 'भो वत्स ! बोधिसत्व धर्इपि स्वइगुं स्वागत सत्कार ग्रहणया निम्ति छगू थासय् थातं च्वने मज्यू । प्राणिपिनिगु हित सुख शान्तिया लागी थासं थासय् चाहुलाः उद्धार कार्य याःवनेमाः । यदि जिगु प्रति श्रद्धा भक्ति जूसा थ्व पाषाणखण्डय् जिगु ज्योतिर्चिह्न पलेस्वां अङ्कित याना थके । सदां थुकिइ जितः लुमंकाः भावभक्ति यानाः च्वन धाःसा कालान्तरय् दिव्यलोकय् जन्म काःवने दइ' धकाः थयाः थःगु ज्योतिर्चिह्न पलेस्वानय् अधिष्ठान यानाः थुकिइ समावेश यानाः आकाश मार्ग लिहां विज्यात ।

वज्रपाद पण्डितया स्वयम्भू दर्शन एवं निर्मलतीर्थस तपस्या

पाञ्चाल देसस अतिकं सःस्यूह्य वज्रपाद धइह्य पण्डित छह्य दइचवन । थुह्य पण्डित महा-
विचक्षण चतुषष्ठि विद्या सःह्य समस्त गुणज्ञानया निधि जुयाः महाविज्ञ जुयाच्वंह्य । तर थ्वं न्ह्यागु
याःसाः नं यानायानागु ज्याय् गुवलें छुं जश कीर्ति काय् फुगु मखु । थुह्य पण्डितं स्यना व कनातःपि
अनेक शिष्यपिसं वनावना चवनाचवना थास जश कीर्ति कयाः लोकजनपिनिगु स्वागत सत्कार कयाचवन ।
थुह्य पण्डितं स्यनाकनाथाय् पूर्ण जुइथे चवनेव अनेक बिघ्नमार वयाः शिष्यपि परस्परय् त्वापु जुयाः
अपजश जक जुइकाः सिरपाः काय् मफयाः न्हित्थं मनय् चिन्ता जुइकाचवन । 'हा ! हे भगवन् !
जिगु जन्म धिक्कार । थुलिमल्लि शास्त्र विदद्या तन्त्र मन्त्र आदि चतुषष्ठि विदद्या सय्काः पण्डित
धाय्काः चवना । उकिइसं कर्पितं नं उत्तिकं स्यने कने यानाः मेपिसं याय् मफुगु अनेक चमत्कार क्यना
चवना । गुलिखय् अज्ञानी लोकजनपित नं ज्ञानदान विइ धुन तथापि जिगु गुण ह्यसिइकाः जश व्यूगु
मखु, अःखः अपजशह्य पण्डित धाय्का चवनेमाल । जि शिष्यपिसं आपालं जश लानाः व पण्डित
धाय्काः प्रसाद कयाः मान सत्कार याकाचवन । जिगु धाःसा सुनानं नां सुधा काःगु मखु । जि गनं
हे ल्याखय् मवन, अपमान यात । थुजाःपि अविवेकी लोकजनपि च्वंगु देसय् चवनाया छु प्रयोजन ?'
धकाः मतिइ चिन्तना यानाः दिक्दार जुयाः थःगु देस तोताः वन । भिक्षाटन यायां देसान्तर गमन
जुजुं नेपाल क्षेत्रय् थ्यंकःवल ।

नेपाः थ्यँसेलि अति शोभायमान जुयाच्वंगु ज्योतिरूप श्रीस्वयम्भू भगवान्यात यानंनिसें खनाः
नमस्कार यानाः कथहनं स्वयम्भू भगवान्या अग्रस थ्यंकाः त्रिपदक्षिणा यानाः पंचोपचार पूजा यानाः

व थनं नं क्वहांवयाः निर्मलतीर्थ्य थ्यंकवल । थुगु तीर्थस्थानया शान्तवातावरण खनाः पण्डित जुलसां विचार यात- 'अहो ! पवित्रगु स्थान श्रीस्वयम्भू ज्योतिरूपया न्होने थुजाःगु आनन्ददायकगु तीर्थ केसावती व कुसुमावती संगम जुयाच्वंगु पुण्य क्षेत्र जुल । थुजाःगु उत्तमगु तीर्थस्थलयात तोताः गन वने, आवंलि जि नं थुगु तीर्थ्य च्वनाः तपस्या यानाः पाप शुद्ध यानाःलि अष्टसिद्धि लाय् ।' थुलि मनं भाःपाः न्हि न्हि स्नान यानाः वालुकाया चैत्य दय्केगु लिस्सें उपलालनागया मूर्ति दय्काः पूजा यानाः जप तप ध्यान यानाः श्रीत्रिरत्नया सेवा भावभक्ति यासे प्रदक्षिणा यानाच्वन । हानं थनंलि कर्णदीप श्मशानय् च्वनाः न्हियान्हिथं ओगलसिंहलस श्रीप्रज्ञापारमितायागु मन्त्र च्वयाः तीर्थ्य चुइकाः श्रीविदद्याधरीया मन्त्र जप यानाः एकचित्तं थुगु श्मशानय् पुरश्चरण च्वनाच्वन ।

थुगु प्रकारं पण्डित वज्रपादं ६ दँ तक तपस्या याय् धुँसेंलि थ्वइगु निश्चय भावभक्ति खनाः श्रीविदद्याधरीदेवी दर्शन वियाः आकाशवाणी जुल- 'भो वज्रपाद ! छंगु श्रद्धा भक्ति खनाः जि अत्यन्त प्रशन्न जुइ धुन ।' थुलि धयाः थःगु रूपया दर्शन बिल- अत्यन्त जाज्वल्यमानं तेज प्रकाश यानाः धालेस्वयं थें निर्मल रक्तवर्ण जुयाः स्वंगः मिखा कनाः, जवगु ह्लातं वज्र ज्वनाः खवगु ह्लातं कपालपात्र ज्वनाः, जवगु तुति यलखुसे ह्यालापचिया च्वकं सहस्रदल पलेस्वांया मूलस चुयाः व खवगु तुतिया पालि आकाशय् थछ्वयाः, खवगु ह्लातं खवगु तुति घय्पुनाः, स्वंगः मिखां आकाशय् थस्वयाः मुमुहुं न्हिलाः व धालेगुलि थें जाःगु दन्तपंक्ति प्रदर्शित यानाः जगत्संसारयाके करुणा तसे सम्यक्संबोधिज्ञान रूपी विशाल नेत्र प्रकाश यानाः व नरमुण्डमाला रत्नमणि माणिक्य मालां क्वक्खायाः सुवर्णया तिलहिलं तसे अनेक रत्नं जडय् यानातःगु पंचबुद्ध मूर्ति अङ्कितगु सुवर्णया जटा मुकुटं पुयाः विविध रत्नया हार तसे कोटिसूर्यया रश्मि प्रकाश यानाः, सिद्धिनी व्याधिनी जःखः तयाः जटा फिजय् यानाः दर्शन बिल । अकस्मातं थुजाःगु दिव्य सुन्दरी श्रीपरमेश्वरी विद्याधरीया स्वरूप दर्शन प्राप्त जूगुलि हथानं दनाः अनेक प्रकारं जप पाठ पूजा एवं प्रदक्षणादि भावभक्ति यानाः ह्लाः बिलि यानाः आकाशय् थस्वयाः स्तोत्र यात-

'हे परमेश्वरी, हे माता, हे विदद्याधरी, हे जोगिनी, हे बुद्ध जननो, हे प्रज्ञापारमिता, हे गुह्य-माता, हे जगन्माता ! छलपोलया चरणस कोटि कोटि जिगु नमस्कार । हे जगत्व्यापिनी ! जि थजाःह्य पापीष्टया उपरय् करुणा तयाः जितः दर्शन विया बिज्यात । हे माता ! छलपोलया चरणस शत सहस्र वारंवार कोटि कोटि वन्दना । हे महालक्ष्मी ! धन्य धन्य जिगु भाग्य ! थौं छलपोल थें जाःम्ह जोगिनीया दर्शन याय् खन, जि अत्यन्त कृतार्थ जुया । हे उग्रतारा ! आः जितः वरदान भेगु मखु कि हे जगन्माता ! जितः अपजश नाश यानाः सुयश कीर्ति प्राप्त यानाःलि अष्टसिद्धि वर प्रसाद सुप्रशन्न जुसे बिज्याहुँ ।'

थुलि प्रार्थना न्यनाः श्रीविदद्याधरीदेवीं आज्ञा दय्कल- 'भो वत्स वज्रपाद ! छं याःगु तपस्या खनाः जि सन्तुष्ट जुइ धुन । छंत अष्टसिद्धि वरदान बिइ धुंगु जुल । थुगु थासय् भक्तजनपिनिगु निमित्तय् सद् या लागी जिगु अंश स्थापना यानागु दु । भो वज्रपाद ! थुगु जिगु प्रतिमायात गुम्ह श्रद्धालु भक्तजनं छं याःगु थें तुं थ्व तीर्थय् स्नानदान यानाः श्रीत्रिरत्नया सेवा भक्ति यानाःलि जिगु

प्रतिमायात पूजा भाव याइ उम्हसित निश्चय नं अष्टसिद्धि फल लाभ जुइगु जुल । आः छ थ गु देसय् लिहांवनाः शास्त्र गुण ज्ञान प्रकाश यानाः लोकपित बोध यानाः त्रिरत्नया भक्तिस जोजलपा बोधि-चर्याव्रत धारण यानाच्चवनेगु स्व ।' थुलि धयाःलि वसपोल श्रीविदचाधरी अन्तर्ध्यान जुयाः सिद्ध जुया बिज्यात ।

थुगु थाय् थौंया अदचापि श्रीविदचाधरीदेवी नामं प्रसिद्ध जुयाच्चन । थनंलि वज्रपाद पण्डितं श्रीविदचाधरीदेवीया प्रसाद जशपद अष्टसिद्धि लानाः आज्ञा जू थें गोपुच्छ पर्वतय् थहांवनाः श्रीस्वयम्भू ज्योतिरूप भगवान्यात दर्शन, पूजन व प्रदक्षिणा यानाःलि हर्षपूर्वक थनं थःगु देसय् तुं लिहांवन ।

कुशलपूर्वक थःगु देसय् लिथ्यँसेंलि समस्त थःथिति इष्टमित्र एवं शिष्यपि सकले वयाः कुशल वार्ता याःवयाच्चन । श्रीविदचाधरीदेवीया प्रसादं अष्टसिद्धि जशपद लाःगुलि न्हापा स्वयाः वीर्य उत्साह जूगुलि हानं सकल थः शिष्यपि मुंकाः अनेक पुराण स्मृति आदि शास्त्र शास्त्रात गंत धर्मकथा कनाः सकल लोकजनं 'धन्य धन्य, साधु साधु' धाय्काः स्वागत सत्कार याकाः अनेक प्रकारया प्रसाद उपहार सिरपाः कयाः सकसिनं प्रशंसा स्तुति याकाः परम आनन्द व सद्धर्म दिन हनाच्चन ।

दीनचूड राजकुमारया स्वयम्भू दर्शन व निधान तीर्थस तपस्या

पाञ्चाल देसया जुजु रत्नचूडया स्वह्म कार्पि दु । इपि स्वह्म कार्पि मध्यय् तःधीह्म दीनचूड राजकुमार तस्सकं गुन्दा जुयाः फर्मास यानाः उख्ये थुख्ये जुयाः राज्यय् छुं छुं बिचाः मयासे थःयत्थे सना जुइह्म जुयाच्वन । थथे जुजुं आपालं समय बितय् जुसेलि कथहनं थन राज्यया आपाः आपालं धनद्रव्य आदि विनाश याःगुलि थाय् थासय् राज्यत विनष्ट जुयावन । थथे जुसेलि रत्नचूड महाराजं थः कार्पि स्वम्हेसितं व्यागलं तयाबिल ।

अथे नं दीनचूड राजकुमार यत्थे सनाः हालाः मखुमखुगु लय् जुयाच्वँच्वं फिनिदँ दसेलि सारै दीनहीन जुयाः नय्गु हे चूमलानाः थः कलाःया क्वसः समेतं मियाः नय्माल । वया कलाःह्मसिनं गुलिखय् न्वात, ह्येकल, घुकि नकल, बोबिल नं स्वभावय् भतोचा हे सुधार जूगु मखु । अथे जुसेलि कलाःह्मसिनं तोताः थःछेय् वनाः मांवाया सेवा याना च्वंवन । थथे जुल नं वयात भ्याःभचा हे च्यूताः दुगु मखु, थःगु हे तालय् सनाजुल । लिपा जूलिसे नय्त तक नं मुश्किल जुसेलि थःगु लाय्क् समेत तोताः उख्ये थुख्ये साहुमहाजनपिके त्याना नयाः हाराहरु यानाजुल । काक्वकाक्व लिल्लहाय् मफुत । सुनानं पत्यार मयात । होमोचायाः वेंचाःखिचा थें जुल । न्हापाया कर्मया फलं आहार चूमलानाः दचांतक नं लात । थुजाःगु प्रकारं दुःख भुक्तमान यानाच्वँच्वं ताकालं समय बितय् जुल । राजकुमारं शोक सुर्ता कयाः क्कुकाः तयाः तस्सकं पस्ताय् चायाः थः कलाःयात लुमंकाः बिरह यानाच्वन । थःगु कर्मभोग धाय् ला अथवा आचार विचार खराब जुयाः धाय् थौंया दिनय् ज्ञातिवर्ग वन्धुवर्ग एवं अबुं तक नं थितिमाया तोतका च्वनेमाल । 'हा हा जिगु कर्म धिक्कार । आः गथे याय् छुयाय् ! जितः सुनां रक्षा याइ ? छु धर्म याःसा जय जुइ ? हा हा थजाःगु दुःख जुइकाः थःगु

जन्मभूमि धकाः माया कया च्वना नं छुयाय् !' धकाः थःगु देस तोता पिहांवन ।

थःगु देस तोताः पिहांवँव दुर्गावनय् लानाः तस्सकं दुःख सियाः देस देसान्तर चाहुलाः उख्ये थुख्ये पवनाः पवनाः नयाजुल । थथे जुजुं गुलिखय् लिपा देसान्तर गमन यायां नेपाल मण्डलय् थ्यंकाः वल । नेपाल मण्डलय् थ्यंकाः श्रीस्वयम्भू ज्योतिरूप विराजमान जुयाच्चंगु साम्हेगु पर्वतय् थ्यंकाः दीनचूड राजकुमारं थःगु श्रद्धाभक्ति अनुसारं पूजादि सत्कार यानाः अष्टांग प्रणाम यात । 'भो परमेश्वर ! हे भगवन् !! जि थें जाःम्ह दुःखी दरिद्रहम्ह पृथ्वी मण्डलस दुर्लभ । थजाःम्ह पापी भक्तजनया उपरय् प्रशन्न जुसे दुःख शान्त यानाः रक्षा याना बिज्याहुँ ।' धकाः प्रार्थना यात ।

स्वयम्भू दर्शन व पूजन सिधय्काः उगु थासं सरासर क्वहांवयाः नय्पित्यानाः उख्ये थुख्ये स्वयाः नय्गु छुं प्राप्त मजुसेलि लः वयाच्चंगु धःचा छगू खनाः राजकुमारं धःचालिसे वनाः लः पनाःपनाः न्याः लानाच्चन । थथे लानावँव उगु धःचा फोचायाः निगू खुसि-होय् लानाः न्या लाय्-मफयाः तस्सकं नय्पित्याःगु तोरं न्या अथे कचिकं नल । थुगु वेलय् हे निधानतीर्थय् स्नान याःवया-च्चंपिसं खनाः न्यन- 'हे भद्रपुरुष ! आम न्या छाय् कचिकं नया ? बुके म्वाः ला ?' अले राजकुमारं थःगु सम्पूर्ण वृत्तान्त खँ कन । खँ न्यनाः दर्शकगणपिनि उम्ह राजकुमार खनाः सारै करुणा वनाः वइत उपकार जुइगु खँ कन- 'छं आम न्या लानागु धःचा ला थें जाःगु मखु, सुवर्णवती व केसावती निगू मिलय् जुयाच्चंगु हों निधानतीर्थ खः । थुगु तीर्थय् जिमिसं नं सेवा यानाच्चन । आवंलि छं नं थुगु तीर्थय् सेवा या । थुगु पुण्यं छंत दुःख नाश जुयाः धनद्रव्यया निधी वरदान बिइ, निश्चय नं छंगु रक्षा जुइ । थव तीर्थ धनरत्न श्रीसम्पत्तिया वरदान बिइगु निधान धइगु नां जुयाच्चंगु अतिकं प्रसिद्धगु उत्तमगु तीर्थ खः ।' थुलि न्यनाःलि थुम्ह राजकुमार दीनचूड जूसां केसावती, सुवर्णवती समागम जुयाच्चंगु निधानतीर्थय् स्नान यानाः मन, वचन, शरीर शुद्ध यानाः एकचित्तं श्रीत्रिरत्नया भक्ति यानाः 'भो परमेश्वर तीर्थराज ! जिगु दरिद्र, दुःख शान्त यानाः श्रीसमृद्धिवन्त याना ब्यु' धकाः प्रशन्न चित्तं दृढ संकल्प यानाः तपस्या यानाच्चन ।

थथे तपस्या यानाच्चवँचवं गुलिछि समय वितय् जुसेलि तीर्थराज प्रशन्न जुयाः नन्दउपनन्द धइपि निम्ह नागराज तीर्थ थहांवयाः सुवर्णघट व रत्नघट निगः वरदान बियाः नागराजपिसं आशीर्वाद बियाः पिहांवन । थथे वरदान प्राप्त जूगुलि अत्यन्त हर्ष जुयाः तीर्थराजयात स्तोत्र यात ।

थःगु मनोवाञ्छा पूर्ण जुसेलि गन वने गन च्वने धकाः विचाः यानाः थःगु देसय् लिहां मवंसे थन हे निधानतीर्थया नापसं वास दय्काः त्रिरत्नया भावभक्ति यानाः दुःखी दरिद्रपित करुणा तयाः दान प्रदान यानाः सुखं जीवन हँहं लिपा वया मृत्यु जुयावन ।

थुगु पुण्यं थुम्ह दीनचूड असंख्य श्री सम्पत्ति धनरत्न आदि विपुल ऐश्वर्य सम्पन्नगु नन्दउपनन्द नागराजया वंशय् जन्म काःवन । छन्हुया दिनय् दीनचूड राजकुमारं निधानतीर्थया सेवा यानातःगु पुण्य फलं पूर्वजन्मया खँ लुमनावल- 'अहो, आश्चर्य ! जि जुलसां न्हापाया जन्मयां न्हापाया जन्मय् महादुःखी दरिद्र जुयाच्चन । थव हे कारणं थुगु निधानतीर्थय् तपस्या यानागु पुण्यया प्रभावं जिगु उद्धार जुयाः श्रीसमृद्धि सम्पन्नगु असंख्य शोभायमानगु स्थान प्राप्त जुल ।' थुकथं महान् पवित्रगु तीर्थ धकाः मनं

भाःपाः गुणानुस्मरण यानाः थुहा दीनचूड राजकुमारं (नागपुत्रं) छन्हुया दिनय् असंख्य लोकपि मुंकाः
अनेक सुवर्ण हेरा माणिक मोति सहितगु सामग्री ज्वरय् यानाः दिव्य छत्र, ध्वाँय् पताः ब्वय्काः
अनेक वादचवादन सहित यासे महामंगल पूर्वक उत्सव यासे थ्व हे तीर्थय् सेवा यानाच्चन । थुगु
पुण्यानुभावं थ्व दीनचूड राजकुमार नागपुत्र दिव्य लोक प्राप्त जुयाः परम आनन्दं च्वंच्वन ।

अज्ञानसिन्धु राजाया स्वयम्भू दर्शन एवं ज्ञानतीर्थस तपस्या

गुगुं समयय् कर्णाटक देसय् छह थुजाःह्य जुजु जन्म जूगु जुयाच्वन- त्याकं मस्यू बुकं मस्यू, छुं वास्ताकिस्ता मदुह्य, कर्पिसं धाःधाःगु खँय् ब्वाँय् जुइह्य, एकोरिह्य अज्ञानसिन्धु । थथे जुयाच्वंगुलि यांनाः कर्णाटक देसया राजकाज हर्ताकर्ता फुक धया थें मन्त्रीगणपिसं चलय् यांना-च्वन^१ ।

थुगु प्रकारं गुलिखय् समय वितय् जुसेलि अज्ञानसिन्धुया कलातं महारानी जूसां थः स्वामि महाराजयात तं पिकयाः निन्दा यांनाः थथे धाल--

‘भो मूर्ख राजा ! छंगु जन्म धिक्कार ! थःगु देसया प्रजागणपिनि राजा जुयाच्वनाः नं छुं ज्ञान बुद्धि विवेक धयागु छुं मदु । उकिं थःगु समस्त राज्य थः चाकर मन्त्रीगणपिसं चलय् याका च्वनेमाल । छ थें जाःह्य निबुद्धि विवेकहीनह्य स्वामियाथाय् च्वनाः छुं प्रयोजन मंत । छं जिके माया कयाः नं छुं कथंहनी मखुत । थ्व राजदरवारय् च्वनाः जितः आः छुं जश गुण लाभ दइमखुत ।’ थुलि धयाःलि सरासर थःछेय् वनाः मांभौया सेवा चाकरी यांनाच्वन ।

थथे थः अति प्रेमीह्य कलातं तोता वंगुलि मनय् प्रसंताप चायाः दिक्दार जुयाः चित्त भ्रान्ति जुइकाः धिर्ज याय् मफयाः अति विरहं थःगु देस त्याग यांना पिहांवन ।

थःगु मनय् वैरागी भावना उत्पन्न जुयाः गन वने गन च्वने जुयाः उख्यें थुख्यें चाःहुलाः भिक्षावृत्ति यांनाः देसान्तर भ्रमण यांनाः जुजुं छन्हु नेपाल मण्डलय् थ्यंकाःलि श्रीज्योतिरूप स्वयम्भू दर्शन यांनाः व थः शक्तप्रमाणं पूजा भावभक्ति यांनाः जप ध्यान स्तोत्र यात- ‘हे परमेश्वर ! जिगु पूजा भाव खनाः छलपोल प्रशन्न जुसे जिगु अज्ञान फुकाः दिव्य ज्ञान प्रकाश यांनाः बिज्याय्माल ।’

अनंलि स्वयम्भू प्रदक्षिणा याय् धुंकाः थुगु स्वयम्भू पर्वतं ववहांवयाः केसावती व पापनाशिनी निगू तीर्थ संगम जुयाच्वंगु ज्ञानतीर्थया समीपय् थ्यंकःवल ।

थुगु ज्ञानतीर्थय् थ्यंकाः न्हियान्हित्थं स्नानकर्म यांनाः बालुका चैत्य दय्काः पूजाभाव भक्ति यांनाः सक्क फक्क जप तप ध्यान यांनाः एकचित्तं तपस्या यांनाच्वन । थुगु प्रकारं तपस्या यांनाच्वच्चं दच्छि दसेलि छन्हुया दिनय् अकस्मातं तीर्थराजं आकाशवाणी जुल--

‘भो अज्ञानसिन्धु राजा ! छं पूर्वजन्मय् छुं दान पुण्य यांनातःगु मदु, उकिइसं असंख्य शास्त्र विद्यायात निन्दा यांनाः ध्वंश यांनावल । थुगु पापभोगं यांनाः मूर्ख धाय्काः सकल प्रजागणं अपमान याकाच्वनेमाल । थ्व हे कारणं छं अज्ञानं त्वपूगुलि दुःखकष्ट सियाच्वन । आः छ हतोत्साह मजुसे एकचित्तं थुगु तीर्थराजस तपस्या यांनाः त्रिरत्नया शरणय् वनाः बोधिज्ञान शिक्षा चलय् यांना च्वं । थुगु पुण्यया प्रभावं निश्चय नं छंत दशाकुशलपाप नाश जुयाः सम्बोधिज्ञान प्राप्त जुयाः लिपतय् छंगु मनोरथ पूर्ण जुयाः जातिस्मरण लुमंहा राजा जुयाः उद्धार जुयावनी ।’ थुलि धयाः तीर्थराज अन्तर्ध्यान जुयावन ।

तीर्थराजयागु आकाशवाणीकथं तच्चोगु हर्षचित्तं ‘तथास्तु’ धकाः मनं भाःपाः एकचित्तं न्हित्थं स्नान यांनाः बालुका चैत्य दय्काः भावभक्ति यांनाः तपस्या यांनाच्वन । गुलिछि समय वितय् जुसेलि थुगु पुण्यं अज्ञानसिन्धुया पाप मोचन जुयाः दिव्यदेह जुयाः महाविचक्षण ज्ञानी धाय्काः शुद्धात्मा जुल ।

लिपा गुलिछि काल हनाः सिनावन । थुगु पुण्यं थ्व हे देसय् मन्त्रीपुत्र जुयाः जन्म काःवल । अज्ञानशोधन धकाः नामकरण यात । थुहा मचायागु स्वरूप लक्षण तेज खनाः थ्व हे देसय् शुभ राज्याभिषेक यांनाः राजा स्थापना यात । थुहा राजां थःगु न्हापायागु पूर्वजन्मयागु खं लुमंकाः सकलयात खं कनाः ज्ञानतीर्थ सेवा याकाः आपःलं प्रजापित सद्धर्ममार्गय् तयाः उद्धार यांनावल ।

स्वह्य अलक्षणिपिनि स्वयम्भू दर्शनि तथा सुलक्षणतीर्थस तपस्या

कोशिरु धयागु नदीया तोरय्, कुशीनगरय् सुरक्षिगो जसमतो महारानी सहित यासे महा-
प्रतापी सुरक्षण राजा राज्य याताचवन । थुगु देसय् गुलिछि समयतक नं बांजाक व्यवस्था मिलय्
याताः आनन्दं राज्य भोग याताः प्रजाप्रतिपाल याताचवन ।

आपालं समय लिपा पञ्चमहापापया फलं उगु कुशीनगरय् छन्हया दिनय् छगू हे लगनबेलाय्
साक्षात् ३२ ता अलक्षणपि स्वह्य कुपुत्र जन्म जूगु जुल । थुपि स्वह्य अलक्षणपि व हे कुशीनगरया
राजा, मन्त्री व महाजनया पुत्र जुयाः जन्म जूवल खनी । थुमिगु ३२ ता कुलक्षण छु छु धाःसा
(१) खबुजा थें छयं तग्गवः (२) कपाः अंगुछि प्रमाण (३) मिखाफुसि स्वाकः (४) चिमिसँ
तिति स्वाः (५) छुँया न्हिप्यं थें चीहाकः (६) मिखा ह्याउँ (७) न्हाय्पवाः थस्वः (८) ह्यतुसि
खातु) ९) मे हाकु (१०) वा तपुसे आपाः मदु (११) न्यताः पा न्ह्यां वः (१२) सँ सियू (१३)
चिमिसँ अःखतं चाः ह्यू (१४) न्हासिकुति (१५) मिखागुलिच्चाः दुहांवं (१६) म्हुतुसि गं (१७)
ह्येगवाः थें हाकुखाः (१८) ग.पः ताहाः (१९) नुगःपा छत्ती (२०) वा ताहाकः (२१) ह्याः
पतिहाकः (२२) त्येफु ताहाः (२३) प्वाः तग्गवः (२४) लिग कुछिहा (२५) ह्य बागःचा (२६)
पुलि धुँया थें (२७) पालि ऊँथया थें (२८) आहार फछि (२९) आतापति तःपु (३०) लुसि
क्वन्हालू (३१) पालि दथुथ्याः (३२) शब्द धाःसा न्यने ह्याइपु, गखेंसे च्वं । थुलि अलक्षणं पूर्णपि
तच्चोगु कुलक्षणपि उपि स्वह्य हे छगू हे इलय् जन्म जूगुलि याताः उगु देसय् अनेक प्रकारं उपद्रव
जुल । अशान्ति जुल । क्षतिग्रष्ट जुल । किर्जांमिजां दन । ततःधंगु रोग फैलय् जुल । हाहाकार जुल ।
नय्त्वनेगु समेत मदयाः देसय् दुर्भिक्ष जुल । लज्या, शर्म, धर्म, दया, माया मदयावन । सुयाके

ईश्वरप्रति भावभक्ति मंत । थथे जूगुलि राजां ज्ञानीगुणी पण्डित ज्योतिषीपि सःताः प्रश्न न्यन ।

उगु विद्वत्मण्डलं अनेक शास्त्र विचाः यानाः थथे लिसः बिल— ‘थ्व हे महाकुलक्षणपि छगु हे इलय् जन्म जूगुलि यानाः कीगु देसय् तच्चोगु हाहाकार जूगु खः ।’

थ्व खँ न्यनाः जुजुया मनय् तच्चोगु महाधन्दा पीर जुयाः थुगु अशान्ति उपद्रव शान्ति स्वस्ति याय्त शास्त्रया विधिकथं अनेक वही विहार देवदेवालय आदि थासय् पठनपाठ जप तप ध्यान आदि यज्ञयागादि क्रिया याकातल । अथे नं थुपि महाअलक्षणपि जन्म जूवःगु कुलक्षणया प्रभावं धर्महीन जुयाः पाप वृद्धि जुयाच्चन । थुगु अवसरय् सुरक्षण राजां थः प्रजागणपिनिगु उपरय् तच्चोगु करुणा तयाः सकलया दुःख शान्त जुइमा धकाः आशिका यानाः थाय्थासय् शान्ति स्वस्ति याकातल । अथे नं थ्व कुलक्षणपिनिगु पाखें जयकल्याण मजुयाच्चन ।

महाजनया छेँ कुपुत्र महाअलक्षण जन्म जुगुलि नं हासनास जुल । थथे जुपेलि थःगु बोजं जन्म जूह्य काय्मचा जूसां नं माया कयां मजिल धकाः निह्य प्यह्य पासापि बियाः व्यापार याकेगु त्वहतयाः दुर्गावनय् वाके छ्वत । थुह्य कुलक्षणह्य मचा घोर दुर्गावनय् लानाः उख्ये थुख्ये स्वयाः अनेक प्रकारं बिलाप यानाः चाःहुला जुजुं कथं थें दैवसंयोगं नेपालय् थ्यंकःवल ।

पुण्यभूमि नेपालय् थ्यंकाः श्रीस्वयम्भू दर्शन यानाः थः गच्छे अनुसारं पूजा भावभक्ति सहित प्रदक्षिणा यानाः स्तोत्र यात— ‘हे परमेश्वर ! जिगु पाप भोग महाकुलक्षण जूगु मदय्का दिव्यदेह याना ब्यु ।’ थुलि प्रार्थना यानाःलि वाग्मती व चारूमती संगम जुयाच्चंगु सुलक्षण धयागु तीर्थय् थ्यंकः वल । थ्व हे तीर्थय् न्हि न्हि स्नान यानाः बालुकामय चैत्य दय्काः एकचित्तां पूजा भावभक्ति यानाः सेवा यानाच्चन । गुलिछि समय वितय् जुसेलि छन्हु सुलक्षण तोर्थ प्रशन्न जुयाः सुलक्षणयुक्तगु दिव्य-शरीर प्राप्त जुल ।

थथे थःत आश्चर्यमय दिव्यदेह सुलक्षण प्राप्त जुगु खनाः अत्यन्त हर्ष यासे थः पासापिनिगु अलक्षण शरीर लुमनाः इमित नं शुभसमाचार न्यंके धकाः तःधंगु उत्साह यानाः कुशीनगरय् थ्यंकःवल ।

वयागु दिव्यदेह शरीर खनाः राजा प्रजा सकल परिवार सुप्रशन्न जुयाः कुशल वार्ता याःवया-च्चन । थुगु हे रूपं राजपुत्र मन्त्रीपुत्र निह्य नेपाल मण्डलय् छ्वयाहयाः स्वयम्भू दर्शन याकाः सुलक्षण तीर्थय् सेवा याके बिल । कालान्तरय् इपि निह्य महाजनपुत्र थें समान रूपं सुलक्षण शरीर जुयावल । थुपि नं हर्षपूर्वक कुशीनगरय् लिथ्यन । थ्व हे सुलक्षणपि स्वह्यसिगु पुण्यया फलं कुशीनगरय् जुया-च्चंगु अशान्ति वातावरण शान्ति जुयाः जयकल्याण जुल । सकलसिके सद्धर्मचित्त उत्पत्ति जुयावल ।

दानासुर पत्नीया स्वयम्भू दर्शन व जयतीर्थस तपस्या

दानासुर दैत्यया थः कलाःया पाखें सन्तान मदु धकाः न्हित्थं भाःतह्यसिनं त्वह मदु त्वह मालाः घुर्कि नकाः चान्हं न्हिनं ल्वापु थयाच्वन । थथे न्हित्थं ल्वापुख्यापु जुयाः थः भाःतयागु अहंकार क्रोध खनाः ग्यानाः मनय् तस्सकं धन्दा पीर कयाः शोक यानाच्वन । 'छु पापं थुजाःगु प्रकारं निःसन्तान धाय्काः भोग यानाच्वनेमाल ? गुगु धर्म जि सन्तान जन्म जुइ ? छु धर्म याय् गुगु धर्म याय्, गन वने, गन च्वने ?' धकाः सारै दिक्दारं तस्सकं विरह जूगुलि दैत्यनी धैर्य याय् मफयाः धःगु छेँ तोताः पिहांवन । अनेक देस देसान्तर भ्रमण यानाजुल । दैवसंयोगं कथहनं नेपालय् थ्यंकाः श्रीस्वयम्भू भगवान्यात दर्शन व पूजन यानाः अग्निकुलांसच्वंगु अति उच्चगु महापवित्र जुयाच्वंगु फुलोच्च पर्वतय् थ्यंकाः श्रीमहालक्ष्मीदेवीयात नमस्कार यानाः पुत्र पुत्री प्राप्त जुइमा धइगु दृढ प्रतिज्ञा यानाः वाग्मतीया तीरय् स्नान यानाः थुम्ह महालक्ष्मीदेवीयागु पूजा भावभक्ति यानाः एकचित्तं तपस्या यानाच्वन^१ ।

थनंलि तपस्या यानाः च्वँच्वं १२ दँ बितय् जुसेलि थुम्ह दैत्यनीयागु श्रद्धाभक्ति खनाः श्रीवसुन्धरादेवी अतिकं प्रशन्न जुयाः दर्शन बियाबिज्यात— सुवर्णया थें जाःगु ऊन जुयाः, ललितासन यानाः, खुपा ह्लाः धारण यानाः, शिरस पञ्चबुद्ध अंकितगु सुवर्ण मुकुटं पुयाः, दिव्य वस्त्रं तियाः, रत्नया मालां क्वक्खायाः, मूलगु ह्लातं तथागत वन्दना यानाः, निपागु ह्लातं संसारय् दरिद्र दुःख नाश याय् धकाः रत्न ज्वनाः, स्वपागु ह्लातं अभयवरदान बियाः, प्यपागु ह्लातं सद्धर्म उपदेश बिइत प्रज्ञापारमिता पुस्तक ज्वनाः, न्यापागु ह्लातं संसार प्रतिपाल याय्त् काःगु ई ज्वनाः, अले खुपागु ह्लातं सुगति अभिषेक बियाः पाप क्लेश सिलाछ्वय्गु अमृतकलश ज्वनाः अतिकं शोभायमान जुइक दिव्य

रूप दर्शन बियाविज्यात । थजाःगु दिव्य रूप परमेश्वरी विज्याःगु खनाःलि हथासं दनाः ह्लाः जोजोलपा चरणकमलस भवपुयाः अष्टांग प्रणाम यानाः प्रार्थना यात--

‘भो परमेश्वरी ! छलपोलया चरणारविन्दुस कोटि कोटि नमस्कार । छलपोलं संसारया श्रीलक्ष्मी जुयाः समस्त लोकयात प्रतिपाल यात । वसुन्धरादेवी धइह्य छलपोल, सिद्धिलक्ष्मी धइह्य नं छलपोल, अथे हे तुं बुद्धजननी धइह्य नं छलपोल, प्रज्ञापारमिता धइह्य नं छलपोल, हानं उग्रतारा, जोगिनी एवं आर्यतारा धइह्य नं छलपोल-थजाःह्य संसारया मां जुयाविज्याःह्य सर्वव्यापिनी छलपोलं जिगु दुःख शान्त यानाः जितः रक्षा याना विज्याय्माल ।’ थुलि धाधां चरणपादुकास भवसुनाच्चन । थ्व बेलय् श्रीमहालक्ष्मी वसुन्धरादेवी थुह्य दैत्यनीया कपाः फयाः आज्ञा दय्कल ।

अन उगु शुभमुहूर्तय् श्रीवसुन्धरादेवी थगु जःगु तुतिया पालि तत्काल नदी उत्पन्न यानाबिल, गुकिया प्रभावती धइगु नां जुल । थुगु नदी हथासं महावेगं न्ह्यानाः वाग्मती तोर्थय् संगम जूवन । ‘आर्वलि छं थुगु प्रभावती वाग्मती स्वानाच्चंगु महातीर्थ जयतीर्थय् वनाः एकचित्तं श्रीत्रिरत्नया शरण वनाः तपोव्रत या । थुगु पुण्यया अनुभावं छंत निश्चय नं पुत्री प्राप्त जुयाः छंगु मनोकामना पूर्ण जुइ ।’ थुलि जक छु आज्ञा जुल वसुन्धरादेवी अनसंतुं अन्तर्ध्यान जुल ।

थुलि देवीयागु वचन न्यनाः अनं प्रस्थान जुयाःलि प्रभावती व वाग्मती संगम जुयाच्चंगु थासय् वनाः देवीया आज्ञा थें न्हि न्हि स्नान यानाः त्रिरत्नया भजन यानाः एकचित्तं उगु तोर्थय् सेवा यानाच्चन ।

थुगु प्रकारं तीर्थ सेवा याना च्वँच्वं गुलिछि काल बितय् जुया वसेलि थुगु पुण्यानुभावं थुह्य दैत्यनीयात अति सुन्दरी सुलक्षणीह्य पुत्री छह्य जन्म जुल । दैत्यनीया अति हर्ष जुयाः थुह्य पुत्रीयात प्रभावतीदेवी धकाः नां छुनाः बांलाक प्रतिपाल यानातल । थजाःह्य प्रभावतीदेवी पुत्री प्राप्त जुयाः दैत्यनीया जय जूगुलि थुगु तीर्थया नां जयतीर्थ धइगु नामं प्रसिद्ध जूगु जुल ।

श्रीस्वयम्भू ज्योतिरूपया सेवा नितिं समन्तभद्र बोधिसत्व पारवे कुलिकया दमन

गुरु वागीश्वर मञ्जुश्रीनं थुगु श्रीस्वयम्भू ज्योतिरूप दर्शन याय् छिकेत, देव मनुष्यपि वास याय् ज्याछिकेत गुगु कालीहृद जुयाच्चंगु अथाह जलसागर सुकय् यांना: नेपाल मण्डल दय्केया निम्ति उवलय् अन दहलय् च्वंगु ल: छ्वना: छ्वत । थुगु कालीहृदय् वास यांनाच्चंगुपि नागराजपि थुगु दह:या ल: पिहांव:गु स्वया: सकल नागराजपि नं ल: स्वस्वं हूलय्सं च्वना: पिहांवन । थुगु बेलय् मञ्जुश्रीनं पिहांवंपि नागराजपि स्वया: आज्ञा दय्कल--

‘हे नागराजपि ! छिपि निराश जुया: पिहां वने मते । छिमिगु वसोवासया निम्ति आवश्यक व्यवस्था यांना बिइ ।’ नागराजपिसं लिस: बिल- ‘भो मञ्जुश्री ! जिपि गुलिगुलिछि काल बितय् जुइ धुं कल, थुगु थासय् जिपि सुखपूर्वक रसरंग यांना: च्वनागु अत्यन्त मनोहरगु वासस्थान मदुसैलि जिपि थन च्वनाया छु प्रयोजन ?’ थथे धाधां पिहांवन ? ।

थुगु हे इलय् अतिकं बुद्धि व उत्साह दुहा वलवान्हा कुलिक नागराजं मेमेपि थ: पासापि नागराजपित स:ता: आशा भरोशा बिया: धाल-- ‘भो पासापि ! कीजि थन स्ववास छेँ मदुसां धन्दा काय् मते, जिगु ल्यू ल्यू वा । जि नं हाकनं छुं कालान्तर लिपा थुगु नेपाल मण्डलय् वया:लि न्हापा थेँ तुं नागवास दह: दय्का: थव हे थासय् कीजि वास या:वय् मानि । मञ्जुश्रीनं कीगु वास स्यंके धुं का:लि थ:गु देस महाचीन सं तुं लिहांवनी, उवलय् कीपि थन हे सं तुं वय् ।’ थथे परस्परय् सरसल्हा यांना: आपालं नागराजपि थ:लिसे व्वनायन ।

श्रीस्वयम्भू ज्योतिरूप दर्शन याय् छिकेत देव मनुष्यपिनिगु हितया निम्ति नेपाल मण्डल मञ्जुपट्टन सहर दय्के धुँसैलि गुरु मञ्जुश्री महाचीन सं तुं लिहांवने धुं कल धइगु समाचार सिया:

अवसर बिचार यानाच्वंहा चलाखहा कुलिक नागराजं सकल पासापि लिब्वनाह्याः चारुगिरि पर्वत दय्काः न्हापा थें नागदहः दय्के धकाः हूल मुनावल । थुमिसं नेपाल मण्डल जल थल याय् कारणस चान्हं न्हिनं जलवृष्टि यानाच्वन । थथे चच्छि न्हिच्छि मदिकक जल वृष्टि जक जुयाच्वंगु खनाः सकल मनुष्यपि भय त्राश चायाः छु बिघ्न उपद्रव जुइन जुइ धकाः ज्योतिषी पण्डित क्यनाः प्रश्न बिचाः यानास्वत । थुगु बेलय् ज्योतिषं परीक्षा याना स्वसेलि 'हा हा । कीजि नेपाल देस फुत । थन न्हापा थें नागह्द याय् धकाः मतिइ तयाः आपालं नागराजपि नेपालय् वास याय्त वल ।' ज्योतिषया खँ न्यनाः सकल लोक त्राहित्राहि जुइकाच्वन । उकिइसं नय् त्वने समेतं दुर्लभ जुयाः गन वने गन च्वने धकाः महाधन्दा कयाः शोक यानाः हालाः ख्वयाच्वन ।

थुगु हे इलय् बिघ्न शान्ति याय्या निर्मिती धर्मशास्त्रया वचन थें फक्क चाक्क सिक्क शान्ति स्वस्ति यानाः अनेक पाठ पूजा यानाः श्रीकरुणामयया नां अनुस्मरण यानाः ख्वयाः हालाजुल-- 'छलपोलं जिमित उद्धार याय्गु बखत जुल । आः धाःसा जिपि फुत ।' थथे बारंबार श्रीत्रिरत्नया सेवा भावभक्ति यानाः फुकुथें धर्मकर्म यानाच्वन । थथे ख्वयाः हाला जुसेलि छन्ह्या दिनय् सुखावती भुवनय् बिज्यानाच्वंहा श्रीकरुणामयं सियाः अति करुणा चायाः थः अंश जुयाच्वंहा श्रीसमन्तभद्र बोधिसत्वयात साताः आज्ञा दय्कल--

'हे समन्तभद्र बोधिसत्व ! समस्त लोक लोकान्तरय् कल्याण यानाबिज्याःहा छलपोलं नेपाल मण्डलय् मञ्जुश्रीनं लः छ्वनाः सकल देव मनुष्ययात बास दय्कातःगु मञ्जुश्रीया कीर्ति थौंया दिनय् विनाश कारणय् फुइन, ध्वंश याय्त कुलिक नागराजं महान् उपद्रव याय् धकाः मतिइ तयाः नाग दक्क मुंकाः लः पनाः जल थल यानाः नागवास दय्के धकाः वयाच्वन । उकि थुगु अवसरय् छःपि अन बिज्यानाः थुपि नागराजपित शान्त यानाः अन च्वंपि लोकजनपित उद्धार याना वय्माल ।'

थुगु बेलय् समन्तभद्र बोधिसत्वं श्रीकरुणामययागु वचन न्यनाः 'तथास्तु !' धकाः ध्वज छपु ज्वनाः थःगु शरीरं तेजरश्मि पिकयाः सुखावती भुवनं प्रस्थान यानाः नेपालय् थ्यंकः बिज्यात । नेपालय् थ्यंसेलि समन्तभद्र बोधिसत्वं तंम्बयाः अहंकार यानाच्वंहा उपद्रवकारक कुलिक नागराजया ह्मलिसे बिज्यानाः कुलिक नागराजया न्ह्योने थःम्हं ज्वनावयागु ध्वजा की ताय् थें इकिधिकि संके मजिइक स्वानाः नागराजया गःपतय् जुत । थुगु इलय् नागराजं लिफः स्वयाः थुहा बोधिसत्व समन्तभद्रयात खनाःलि ल्हाः विन्ति यानाः स्तोत्र यात--

'हे नाथ ! जिगु अपराध क्षमा यानाबिज्याहुँ ! जि मेगु कारणय् थन वयागु मखु, जिमित स्ववास मदुया कारणय् स्ववास दय्के धयागु मतिइ तयाः जक जिपि थन वयागु, हे प्रभु ! छलपोलं जि व जिमि पासापित उद्धार याय्या लागी थन जिगु ह्मय् जुनाः जिगु शरीर पवित्र यानाबिल, हे प्रभु ! वैरोचन तथागतया सुपुत्र जुयाः बिज्याःहा सकल गुण ज्ञानं परिपूर्णहा छलपोल थजाःगु चारुगिरि पर्वतय् बिज्यात । छलपोल हानं थ्व संसारय् गुहा गुहा दुष्ट जुल वइत वइत चित्त शान्त यानाः सूर्यरश्मि थें सकलयात उति खनाः समन्तभद्र धाय्काः लोक रक्षा यानाबिज्याःहा छलपोलयात कोटि कोटि बारंबार नमस्कार ।'

थुलि कुलिक नागराजयागु स्तोत्र न्यनाः समन्तभद्रं आज्ञा जुल— 'हे कुलिक नागराज ! गुरु वागीश्वर मञ्जुश्रीनं दयकातःगु थुगु कीर्ति ध्वंश याय् अयोग्य; कारण, थुगु थाय् सम्पूर्ण देवलोकया बासस्थान जुयाच्चंगु उकिइसनं श्रीस्वयम्भू ज्योति प्रकाश जुयाच्चंगु, अत्यन्त उत्तम जुयाच्चंगु स्थान गथे स्यंके त्यना ? हे कुलिक नागराज ! थुगु विशुद्ध कीर्ति विनाश यात धाःसा छंगु छु गति जुइ, उकि यानाः छ कल्पकल्पान्त तकं दुर्गतिइ वनेमाली ।' थुकथं अनेक प्रकारं संबोधिज्ञानया उपदेश बियाः बोध यानाः हानं धाल— 'हे कुलिक ! छंत बास मदुसा जि बास विइ, गन कि केसावती व विमलावती संगम जुयाच्चंगु अत्यन्त पवित्रगु रमणीय स्थान मनोरथ तीर्थय् वनाः आनन्दं बास याना च्वँ ।'

थुलि जुसेलि कुलिक नागराजं श्रीसमन्तभद्र बोधिसत्वया आज्ञा न्यनाः 'तथास्तु ।' धकाः अत्यन्त प्रशन्न जुसे वसपोलया चरणस भवपुयाः प्रदक्षिणा यानाः मनोरथ तीर्थय् च्वंवन । उवलेंनिसे लोकपिनिगु मनोरथ पूर्ण जुसेलि थुगु तीर्थ मनोरथ तीर्थ धइगु नामं प्रसिद्ध जुल । गुह्यसिनं श्रद्धाभक्ति तयाः सेवा याइ उह्यासिया याकनं मनोरथ पूर्ण जुइ धकाः समन्तभद्र बोधिसत्वं व्याकरण यानाःलि लिस्से थःगु रश्मि लीन जुइकातःगु कीलेश्वर वैतराग नं सिद्ध यानाः थःम्हं ज्वनावयागु चिन्ह ध्वज स्वानाः अन्तर्ध्यान जुयाविज्यात ।

ओदियानाचार्यया स्वयम्भू दर्शन व अष्टसिद्धि साधन

कपिलवस्तु नगरया अतिकं प्रसिद्ध जुयाच्वंहा आचार्य श्रीओदियान अत्यन्त पवित्र जुयाच्वंगु पुण्यभूमि नेपाल मण्डल दर्शन याय्गु मनसुवा यानाः नेपालय् थ्यंकाः श्रीस्वयम्भू भगवान्या दर्शन व पूजन यानाः नेपाल मण्डलया दक्षिण पाखे च्वंगु आनन्दगु छगू वनखण्डय् च्वना अष्टसिद्धि लाय्गु मतिइ तथाः तपस्या यानाच्वन^१ ।

थुहा आचार्यजुं अष्टसिद्धि लाय्गु हेतुं म्वाःपि न्यात सुलापातय् तथाः आहूति वियाः होम यानाच्वन । थुपि न्यात जज्ञशालाय् दुयालिसे तोर्थ उत्पत्ति जुयाः थ्व समस्त न्याया कपालय् लुचिनं सहितपि जुयाः आनन्दं थुगु तीर्थय् वसलपाच्वन । थुगु मत्स्याहूति जज्ञ यानाच्वंगु शुभअवसरय् अकस्मातं कामनापूर्ण फल बिइहा कामधेनु सा छहा वयाःलि थुगु जज्ञ-कुण्डलय् दुरु हाय्काविल । थुवलय् हे कामधेनु सां धाल--

‘हे वीर अचार्य ओदियानजु ! छंगु तपस्या खनाः जि प्रशन्न जुया, निश्चय नं छंगु मनोवाञ्छा पूर्ण जुइ, भो आचार्य ! छं थुगु उत्तम स्थान तोते मते, थन हे मेमेपि देवदेवतापि नं विज्याइ तिनि ।’ थुलि धयाःलि उहा कामधेनु सा अन्तर्धान जुयावन ।

थुहा कामधेनु सायानु वचन थें श्रद्धाभक्ति तथाः थुगु थासय् तपस्या याना च्वँच्वं छुं कालान्तर लिपा थःगु तपस्यायागु प्रभावं सुखावती भुवनय् विज्यानाच्वंहा श्रीआर्यावलोकितेश्वरं थुगु समाचार सियाः व सर्वनिवरण विष्कंभि बोधिसत्वयात सःताः ओदियानाचार्ययाथाय् छ्वयाहल । वसपोल करुणामययागु आज्ञानुसारं सर्व निवरण विष्कंभि बोधिसत्वं थःगु तेज प्रकाश यानाः ओदियानाचार्यजुया-थाय् थ्यंकाविज्यात । वसपोल विज्या गु खनाः अतिकं हर्ष जुयाः स्वागत यानाः व स्तोत्र यात ।

१- रा. अ. वि. नं २३२, स्वायम्भू पुराण

थुगु बेलय् ओदियानयागु श्रद्धाभक्ति खनाः आज्ञा जुल ।

‘भो आचार्य ! छं थ्व हे सिद्धभूमिइ च्वनाः हानं मांसाहूति बियाः योगिनीगणपि आराधना याना च्वं । थुगु पुण्यया प्रभावं अनुत्तर सहज अष्टसिद्धि प्राप्त जुइ ।’ थथे उपदेश बियाः थःगु अंश तोताः फणिकेश्वर वीतराग धकाः नां प्रख्यान्त यानाः लिहांविज्यात ।

सर्वनिवरण विष्कंभि बोधिसत्वयागु आज्ञा थें ओदियान आचार्यजुं थःगु शरीरया ला थःम्हं ध्यनाः मांसाहूति यज्ञ यानाः जोगिनीगणपित आराधना यानाः एकचित्तं जप यानाच्वन । थुगु तपस्या-यागु फलं आकाशमार्गं जोगिनीगणपि विज्यानाः थुह्य आचार्ययात दर्शन बियाविज्यात । थथे जोगिनीगणपिसं दर्शन व्यूगु खनाः तच्चोगु श्रद्धाभक्ति निश्चय तयाः आकाशमार्गय् थस्वयाः अनेक प्रकारं पूजा भाव यानाः प्रार्थना यात— ‘भो परमेश्वरी, जि भक्तजनपिनिगु उद्धारया निम्ति थुगु थासय् छलपोलयागु प्रतिमा दय्का विइ, उकिइ अधिष्ठान यासे थन विज्याय्माल ।’ आचार्य ओदियानयागु प्रार्थनायात सहर्ष स्वीकार यासे उगु प्रतिमास लोन जुयाः अष्टसिद्धि वरदान बियाविज्यात ।

फणिकेश्वर वीतराग सिद्ध यानाः श्रीवज्रयोगिनीदेवी साधन याग् धुसैंलि महापराक्रमी ओदिनाचार्यजु उत्तरपाखे स्वयाः थनं कापलेया आकार थें जाःगु कच्छपालगिरि पर्वतय् थ्यंकाः किसिया छ्यंगू लायाः थ्वया कूशासन यानाः आश्रम दय्काच्वन । थः न्ह्योने विधिपूर्वक अति लक्षणं संयुक्त यानाः शोभायमान जुइक मण्डल छगू दय्काः उकिइ श्रीस्वयम्भू धर्मधातु मण्डल श्रीत्रिरत्न खगानना गुह्येश्वरी आदि समस्त बाह्य गुह्य अभ्यन्तरया देवतापि आराधना यानाः मण्डल दय्काः विधिपूर्वक पूजा यानाः पुरश्चरण च्वनाः एकचित्तं साधन यानाच्वन । थुगु मण्डलय् सकल देवता प्रवेश जुया-विज्यात । थुगु बेलय् श्रीगणेश नं थः सपरिवार मुनाः हथासं वयाः स्वःवःगु बेलय् आदियानाचार्य गजचर्म आसन यानाः समस्त देवताया आराधना यानाः जोग यानाच्वंगु खन । तर, उगु थासय् श्रीगणेश छह्य बाहेक मेमेपि देवतापि सकल दुध्याकातल, थः छह्य जक अलग यानातःगु खनाः श्रीगणेशं अति क्रोध यानाः थः परिवारया न्ह्योने धाल— ‘भो परिजनपि ! स्व स्व !! जि स्वर्ग मर्त्य पातालया गणनायक जुयाच्वनाह्य जूसं थ्व अविवेकी ओदियानाचार्य जितः वास्ता मतल, सकल देवलोकपि आराधना यानाः जितः आसन यानाच्वन । थुलि तक जितः ह्यपय् यासैंलि, जि गथे सहयाना च्वने फइ ? भो परिवारपि, पराक्रमं थ्वइगु सम्पूर्ण साधन कर्म विघ्न यानाः भंग याय् नु । थ्वइत थुगु पर्वतं चिया छ्व । अथे नं दना मवन धाःसा वाग्मतीया लः थपनाः लः कुनाः थ्व पर्वतं ववपवाना लखय् कुतुका छ्व । छिमिगु थःगु शस्त्र अस्त्रं प्रहार यानाः पितिना छ्व ।’ श्रीगणेशयागु आज्ञा न्यनाःलि सकलया सल्हासाहूति यानाः गुलि कापले जुयाः, थुह्य साधकच्वंगु पर्वतय् खाल थयाः कुतुका छ्वय् धकाः म्हुयाः दुहांवन । गुलि नागरूप जुयाः बसिकया भेष जुयाः वाग्मती थपनातल । गुलिसिनं ल्हाः बुबूस्यानाः वा कुरुकुरु न्ह्ययाच्वन । गुलिसिनं ‘का का ज्वं ज्वं, दा दा, पा पा, स्या स्या’ धकाः हाला हूँकारं हुनर यानाः अनेक भय त्रास बियाः विघ्न याय् तत्पर जुयाच्वन ।

थथे अनेक भय त्रास बियाच्वंसां ओदियानाचार्य निर्भीक जुयाः एकाग्रचित्तं समाधान याना-च्वन । थुजाःगु प्रकारं अनेक किसिमं भय त्रास बियाः नं चित्त विचलित मजूह्य आचार्य थःत

बाहेक यांना: थःत आसन यांनाचवंगु स्वया: फुवक देवतापित पूजा सत्कार या:गु स्वया: श्रीगणेश जूसां अति लज्या अपमान चाया: सुं देवतापितिगु ख्वा: तक नं स्वय्मछाला: मिखा तक नं कने मछाला: मिखां क्वजक स्वया: स्यालिमिखा यांनाचवन । मनं मनं तंपिकया: लज्यां क्वच्छुना चवंगुलि थौतकं मिखा चकंक कनेमछा:गुलि स्यालिमिखा जुयाचवन धाइ । परिवारपिसं धा:सा साधकीयात अनेक ख्याचो वियाचवन, अथे नं निर्भोक्पूर्वक एकाश्रम यांना: स्थिरं चवना: जोग ध्यान यांनाचवन ।

छन्हु सुखावती भुवनय् विज्या:ह्य श्रीआर्यावलोकितेश्वरं ध्यानदृष्टिं स्वयाविज्या:बलय् ओदि-
यांनाचार्ययात त्राश बियाचवंगु सिया:लि हथासं क्षितिगर्भ बोधिसत्वयात स:ता: आज्ञा जुल- 'भो
परिवृत्त ! नेपाल मण्डलया कच्छपालगिरि पर्वतय् ओदियांनाचार्य अष्टसिद्धि लाय्गु कामना
यांना: जोगध्यान यांनाचवंगुहेसित गणेशमार वया:लि त्राश वियाचवन । थुह्य साधकीयात रक्षा याय्त
याकनं नेपाल मण्डलय् हुं ।' आर्यावलोकितेश्वरयागु आज्ञा शिरोपर यासे क्षितिगर्भ बोधिसत्व तुरन्त
नेपाल मण्डलय् थ्यंका: कच्छपालगिरि पर्वतय् विज्यांना: ओदियांनाचार्ययात दु:ख त्राश वियाचवंगु स्वया:-
लि हथासं क्षितिगर्भं दशक्रोध भैरव आराधना यांना: आज्ञा जुल- 'भो दशक्रोध भैरव ! गुम्हेसिनं ओदि-
यांनाचार्ययात विनाकारणय् मारबिघ्न वया: दु:खकष्ट वियाचवन उम्हय्सित दमन यांना छ्व ।' थुलि
न्यनेवं दशक्रोध भैरवपि जाना: थुह्य बिघ्नकारक गणेशया परिवारपित अनेक प्रकारं बोबिया: लिना-
यन । ओदियांनाचार्ययात क्वपवाय् धका: पर्वत म्हुयाचवंपि गुलिसितं लिनायन । गुलिसिनं खड्गं सुया-
छ्वत । गुलि चखुं चा रूप जुया: ब्वया: प्वालय् विस्युंवन । थ्व चखुं चा जुया: विस्युं वंगु प्वा: अदचापि
चखुती धका: प्रसिद्ध जुयाचवन । गणेशया परिवार सैन्यगण सकल चिच्चा: दना: वसेलि बिघ्नान्तक
भैरवं गणेशयात लिना: ज्वनाहया: अति क्रोधं गणेशया छपु दन्त स्वहाय्का: वइत क्रोधं हक्का: धाल-

'हे गणेश ! छंगु व ओदिनाचार्यया पराक्रम उस्ति मजू । छं संग्राम याय्गु मतिइ तयागु लाकि
छु ? यदि जुद्ध याय्गु जूसा छंगु दन्तं छंत तुं दाया: चूर्ण यांना बिइ ।'

गणेशं ग्यांना: विन्ति यात-- 'भो श्रीबिघ्नान्तक ! जि छःपिनि सेवक । छलपोललिसे ज्वरि
मखु । जिगु अपराध क्षमा यांनाबिज्याहुं । भो बिघ्नान्तक ! जि ओदियांनाचार्य खना: तंम्बयागु
मेता कारणं मखु । जिगु थासय् चवना: जित: तुं आसन यांना: जि छह्य बाहेक सकल देवता मानय्
यांनाचवन । थ्व हे कारणं जक जि मारसैन्य छ्वयाहयागु ख: । जित: नं उगु सभामण्डपय् थ्याकूगु
जूसा थथे विनाश व उपद्रव याय्मागु छुं कारण हे मदु ।' गणेशयागु विनम्रभाव खँ न्यना: गणेश व
ओदियान निम्हं नापं तया: आज्ञा दय्कल--

'भो ओदियांनाचार्य ! बिघ्नया राजा गणेश छह्य मथ्याकूगुलि यांना छंत बिघ्नमार उत्पन्न
जुल, आवंलि छं सीकि- न्ह्यागु साधन कर्म या:सां न्हापं श्रीगणेश मानय् याय्माल ।' थथे निह्यसिगु
दत्थुइ परस्परय् मैत्रीभाव तय्का: अन्तर्धान जुयाबिज्यात ।

थुलि जुसेलि क्षितिगर्भ बोधिसत्वयागु प्रभाव खना: ओदियान आचार्यं पूजा भावभक्ति यांना:
प्रार्थना या:गु अनुसारं थुगु थासय् गन्धेश्वर वीतराग सिद्ध जूगु जुल । गुह्यसिनं थुगु सिद्धभूमिइ भाव
भक्ति याइ वइत कुष्ठरोग आदि शान्त जुया: दिव्यदेह प्राप्त जुइ धका: धयातल ।

स्वयम्भूया विषय कथा: खगर्भ बोधिसत्वया

व्याकरण

ओदियानाचार्य फणिकेश्वर, गन्धेश्वर वीतराग उत्पत्ति याय् धुंकाः थनं गोपुच्छ पर्वतया समीपय् च्वंगु छगू अति उत्तमगु वन जंगलय् वनाः थथे मनं भाकल यात कि जि नं फणिकेश्वर, गन्धेश्वर वैतरागयागु दर्शन याय् धुन । आः हाकनं स्वम्हम्ह खगर्भ बोधिसत्व दर्शन याय्गु मतिइ तयाः थुगु वनस कुशासन यानाः एकाग्रचित्तं खगर्भ बोधिसत्वयात आराधना यानाःलि दहिनावर्त्ता शंखं मन्त्र ब्वनाः सुमधूर घोषं शंख पुयाच्चन । थथे शंख पुइगु धर्म याना च्वच्चं ताकाल बितय् जुसेलि अष्टसिद्धि लाय् धुंकूहा ओदियानाचार्यया म्हुतुं पूगु शंखया शब्दया प्रभावं सुखावती भुवनय् विज्याःम्ह श्रीकरुणामय आर्यावलोकितेश्वर संतुष्ट जुयाः व खगर्भ बोधिसत्वयात सःताः आज्ञा जुल^१ ।

‘हे खगर्भ बोधिसत्व ! छलपोल नेपालय् विज्यानाः गोपुच्छ पर्वतया लिउनेसं च्वंगु पर्वतय् च्वनाच्च्वम्ह अति गुणवन्तम्ह ओदियानाचार्ययात उद्धार याय्त हूँ ।’ थुलि वचन न्यनाः ‘तथास्तु’ धकाः सुखावती भुवनं क्वहांविज्यानाः ओदियानाचार्य पुयाच्च्वंगु शंखय् लीन जुयाः दुहांविज्यात । थुगु बेलय् थ्व हे शंखं बोधिसत्व पिहांविज्याय्वं थुगु वनय् महाउत्सव जुल कि—

न्हाया न्हापा सिनाच्च्वंगु सिमा, स्वां, सिसाफुसा, गुँखि पर्यंत पल्लवित पुष्पित एवं विकसित जुल । जातंजातया स्वां फलमूल स्कन्द उत्पन्न जुयाः असंख्य शोभायमान जुयाः मनोहर जुल । अन च्वंपि वनजन्तुपिके नं परस्परय् स्नेह प्रीति भाव दइवल । अनेक कुंगःपक्षिपि नं थःथःगु सुमधूर सलं हालाहयाच्चन । थुगु प्रकारं वनय् मनोहर एवं उत्साह जुयाच्च्वंगु स्वयाः उकिइसं थःगु न्ह्योने बोधिसत्व विज्याःगु खनाः ओदियानाचार्यया मनय् हर्षमान जुयाः तःधंगु प्रीति सुख लाभ जुल । ‘धन्य जिगु भाग्य’ धकाः बोधिसत्वयात पूजा भाव यानाः स्तोत्र यात । थ्वइगु श्रद्धाभक्ति खनाः

क्षितिगर्भं बोधिसत्त्वं आज्ञा जुल ।

‘भो ओदियानाचार्य ! छंगु तपस्यायागु पुण्यया प्रभावं सिंहनाद थें जाःगु दिव्यज्ञान लात, अष्टसिद्धि लाभ जूम्ह छ जुल, चतुर्वर्गफल नं प्राप्त जूम्ह जुल, योग याय् फुम्ह योगेश्वर नं छ जुल ।’ थथे आज्ञा जुयाःलि थःगु शरीरं तेज प्रकाश यानाः शुद्धगु शिलाखण्डय् लीन यानाबिल । थथे थःगु तेजरश्मि लीन याय् धुँसेलि आचार्यया न्ह्योने लिपा जुइगु भविष्य व्याकरण नं उपदेश जुल--

‘कालान्तरय् थुगु गोपुच्छ पर्वतय् विज्याःम्ह श्रीज्योतिरूप स्वयम्भू भगवान् रत्नया पलेस्वां आदि त्वपुयाः व आपालं चैत्य दय्काः प्राणप्रतिष्ठा आदि नं याइ । थुगु बेलय् कलियुग आरम्भ जुइ । उगु बेलय् जिपि च्याम्ह बोधिसत्त्व अष्ट वैतराग (अष्ट महादेव) नामं प्रसिद्ध जुइ । थुगु बेलय् छ जूसां दक्क शास्त्र मन्त्र तन्त्र आदिया गुरु आचार्य नामं लोकय् विख्यात जुइ । भो वत्स ! छं एकचित्त यानाः न्यँ, कालान्तरय् थ्व हे थासय् नेपाल मण्डलय् जिमि गुरु गुम्ह खः श्री आर्यावलोकितेश्वर करुणामय देवातिदेवया नाथ जुयाविज्याःम्ह थजाःम्ह परमेश्वर जुलसां कामुनि धयागु पर्वतय् थःति-थःम्हं प्रत्यक्ष जुया विज्याइ तिनि । उवलय् छंगु शास्त्र तन्त्र विद्या नं थुम्ह परमेश्वर श्रीकरुणामय नेपाल मण्डलय् विज्यानाः असंख्य प्राणि उद्धारया निम्ति विज्याइगु जुल । थुम्ह परमेश्वर श्रीकरुणामय नेपालय् मविज्याःतलय् छ निर्वाण मजुसे नेपालय् सं तुं जन्म कयाः लोकाहितार्थ याना च्वँ । गुम्ह खः वसपोल करुणामय नेपाल मण्डलय् विज्याके धुँसेलि वसपोलया मूर्ति निर्माण यानाः प्राणप्रतिष्ठा आदि दशकर्मक्रिया सिद्ध यानाः यथास्थानय् दिव्य आसनय् विज्याके धुँसेलि तिनि छ वसपोलया जवगु श्रीचरणकमल पादुकास लीन जुइव अले तिनि छंगु सम्पूर्ण जीवनक्रिया समाप्त जुयाः मोक्षसिद्धि प्राप्त जुइगु जुल ।’

धर्माकर राजाया उत्तराधिकारी राजा धर्मपाल नेपालया शासक

नेपाल मण्डलयागु प्राकृतिक सौन्दर्य एवं मञ्जुश्री निर्मित अति भव्य लक्षण सम्पन्नगु मञ्जु-पट्टन सहर बासं चवने योग्यगु स्थान भाःपियाः अतिकं न्ह्याइपुसे च्वंगुलि नापं क्रकुच्छन्द तथागतयागु आज्ञानुसार श्रीस्वयम्भू धर्मधातुयागु आजीवन सेवाभक्ति यानाच्चवनेगु अत्यन्त उत्सुक जुयाः व साकेतनगराधिपति राजा धर्मपाल थनसंतुं बासं च्वंगु जुल ।

मञ्जुश्रीनं दय्काच्चंगु मञ्जुपट्टनया निर्मित दकल्य् न्हापां राजा स्थापना याना थकूह्य गुह्य खः राजा धर्माकरया निःसन्तान जूगुलि सौभाग्यवश धर्मपाल राजायात सम्पूर्ण शासनाधिकार लःह्लानाः धर्माकर राजा वानप्रस्थ जुयाः श्रीस्वयम्भूया सेवाभक्ति यानाच्चवने^१ ।

धर्माकर राजां गथे प्रजागणपित सुख शान्ति वियाः देसोन्नति यानाः श्रीस्वयम्भू धर्मधातुया भावभक्ति यानाच्चवने अथे हे धर्मपाल जुजुं नं उतिकं हे समस्त प्रजा प्रशन्न यानाः श्रीस्वयम्भू धर्म-धातुया ग्वानत सत्कार यानाः आनन्दं सुव्यवस्थित रूपं राज्य चल्य् यानाच्चंगु जुल ।

थुगु अवस्थायात ज्योतिपाल बोधिसत्त्वं स्वयाः श्रीस्वयम्भूया स्थानय् वनाः भक्तिपूर्वक शुभ प्रणिधान दृढ संकल्प यात- 'छलपोल स्वयम्भूया क्षेत्रय् विशुद्ध कीर्ति स्थापना याय्गु महोत्साह जुल, छलपोलया सुदृष्टिं वरदानं जि लिपायागु जन्मय् थन हे वय् तिनि ।' थुलि धयाः स्वयम्भू प्रदक्षिणा यानाः लिहांवन । थ्व हे ज्योतिपाल जन्मान्तरय् साकेत नगरय् मणिचूड धाय्काः जन्म जूवल । गुम्हेसिनं मणिरंग मणिचूदहल्य् चवनाः त्रिभुवनय् सुनानं मयाःनिगु सत्वहितार्थ निर्मित थःगु शिरय् च्वंगु मणि फाय्केविल । थ्व इतिहास बौद्ध जगतं मस्यूगु मखु । थुगु घटनास्थल सांखु खड्गजोनिया लिउनेसं च्वंगु जङ्गल्य् दु ।

कनकमुनि तथागत आगमन

परापूर्वकाल्य शोभावती नगर्य यक्षदत्त ब्राह्मण्या धर्मपत्नी उत्तराण्या उत्तमगर्भं कनकमुनि जन्म जुल । कनकमुनि क्रमशः बुद्धचर्याया याय्माः गु ज्या याणाः उदुम्बर वृक्षमूल्य च्वनाः संबुद्ध धाय्कल । थ्वसपोलं शोभिताराम महाविहार्य च्वनाः धर्मोपदेश याणाः भायाश्च, भारद्वाज आदि आपालं शिष्यगणपित बोध याणाः बुद्धशासन्य दीक्षित यात । थुगु समय्य शाक्यमुनि बुद्ध जुइह्य सुधर्मराज महाजन धाय्काः संघ सेवा याणाच्चन ।

थ्वसपोल कनकमुनि बुद्ध^१ लोकहितार्थं निम्ति देसान्तर भ्रमण याणाः छन्हु नेपाल थ्यंकाः स्वयम्भू धर्मधातु दर्शन व पूजन याणाः आपालं लोकजनपित बोध याणाः थनं स्वर्गलोक वनाः देवराज इन्द्रयात सद्धर्म बोधिज्ञान्य तयाबिज्यात^२ ।

१- कनकमुनि [कोनाकमुनि] बुद्ध महापरिनिर्वाण जुइ धुंकाः मर्यादानुसार आदहनोत्सवं लिपायागु अस्थिधातु तथाः द्यकातः गु स्तूप गुगु खः उगु थूदो वर्तमान नेपालया पश्चिम तराई खण्डया पालिमाण् खण्ड अन्तर्गत कपिलवस्तु नापं निग्लीहवा धइगु थासय् जुयाच्चन । थौतकं थुकियागु साक्षि स्वरूप सम्राट् अशोकया राज्याभिषेकं क्पिण्दं लिपा स्थापना याः गु शिलास्तम्भं निम्न गाथा वंवानाच्चंगु दुः—

- १) देवानं पियेन पियदसिन लाजिन चोदसवसा [भिसि] तेन
- २) बुद्धस कोनाकमनस थुवे दुतियं वढिते [१]
- ३) [वीसतिव] साभिसितेन अतन आगाच महीयिते
- ४) पापिते [१]

देवतापिनि योह्य प्रियदर्शी राजा अशोकं राज्याभिषेकं क्पिण्दं लिपा कनकमुनि बुद्धया स्तूप निकोगु जिर्णोद्धार याणाः राज्याभिषेक नीदं लिपा थः हे वयाः थुगु स्तूपयात पूजा सत्कार याणाः छगु शिलास्तम्भ स्वनाथकल ।

© अशोकके धर्मलेख- पृष्ठ ३८७, प्रकाशक- ज्ञानमण्डल कार्यालय, काशी । वि. सं. १९८०

२- स्वायम्भू पुराण, पृ. २६१

महापण्डित भिक्षु धर्मश्रीमित्र

आगमन

अतीतकालय्, वाराणसी सहरय् च्वंगु विक्रमशील महाविहारय् च्वनाः आपालं श्रमण भिक्षु श्रामणेर ब्रह्मचर्य एवं उपासक आदि श्रोतागणपि मुंकाः महापण्डित भिक्षु धर्मश्रीमित्रं सद्धर्म व्याख्यान यानाच्चन । थुगु समयय् शिष्यगणपिसं अध्येषण यात— ‘भो गुरु धर्मश्रीमित्र ! छःपिनिगु श्रीमुखद्वारा अनेक प्रकारया सूत्र, तन्त्र विषय व्याख्यानयागु खँ न्यने धुन । आः जिमि सकलसिया आर्यनामसंगीति गाथायागु महिमा न्यनेगु तच्चोगु उत्साह जुल । उकिं जिमित अनुकम्पा तसे आर्यनामसंगीति व्याख्यान यानाबिज्याहुँ^१ ।

थुगु प्रार्थनायात सहर्ष स्वीकार यासे धर्मश्रीमित्र भिक्षु नामसंगीति विषय कयाः उपदेश कनाबिल । थ्वसपोलं द्वादशाक्षर [अआ ईई उऊ एऐ ओऔ अंअः] या अर्थ विशुद्धि वाहेक मेगु सम्पूर्ण वाह्य गुह्य अभ्यन्तरया अर्थ सकतां स्यू । थःह्यं सःस्यूथे व्याक्क अर्थ विशुद्धि कनाबिल, परन्तु द्वादशाक्षरया अर्थ जक कने मफयाच्चन । उकिं ध्यानागारय् च्वनाः तस्सकं धन्दा पीर कयाच्चन— गुबलय् जि थुगु द्वादशाक्षरया रहस्य तत्त्व थुइकाः व्याख्यान याय् फइगु ? तर, द्वादशाक्षरया अर्थ यथार्थ रूपं कने फुह्य थुगु लोकय् केवल सकल शास्त्र विद्यां पारंगतह्य महागुरु मञ्जुश्री छह्य हे जक खनाच्चना, वसपोल धाःसा महाचीन थ्यंक बिज्यानाच्चन ।

थुलि मतिइ चिन्तना यानाः धर्मश्रीमित्रं शिष्यपिके बिदा कयाः वसपोल सद्गुरु दर्शन लाय्गु हे थःगु जीवनया परम लक्ष्य भाःपाः आपालं विस्तार जुयाच्चंगु दुर्गम मार्गयात न्ह्योने साधन यानाः आलस्य व भीरुतायात त्याग यानाः महाचीन वने धकाः प्रस्थान यानावन ।

थुगु समयय् कथहनं धर्मश्रीमित्र नेपालय् थ्यंकाः श्रीस्वयम्भू धर्मधातुयात दर्शन व पूजन

यांना: प्रदक्षिणा यांना: थनं भक्ता उज्या मञ्जुश्री स्मृति चैत्ययात नं पूजादि सत्कार यांना: आशिका यात- गुबलय् जि जगद्गुरु मञ्जुश्री दर्शन लांना: द्वादशाक्षरया शिक्षा-दीक्षा प्राप्त यांना काय फड ।' थुलि दृढ प्रतिज्ञा यांना: उत्तरपाखे स्वया:वन ।

उगु शुभअवसरय् समन्तदर्शी सर्वज्ञानी महागुरु मञ्जुश्रीनं भक्तया उपरय् महाकरुणा तया: सिंहशार्दूल ऐरावत निम्हेसित फकिया हल सुवर्णया दण्ड ब्वहलय् दिका: रत्नजडित सुवर्णया कथि ज्वना: साधारण कृषक रूप धारण यांना: समस्थल भूमिस सा वाय्काच्वंगु अद्भुत दृश्य दर्शन बिल । थुजा:गु आश्चर्ययुक्त घटना जूगु खना: धर्मश्रीमित्रजुया मतिइ च्वन कि- जिगु प्रतिज्ञा एवं महान् अभिलाषा सिद्ध याय्गुलिइ परम सहयोगी कल्याणमित्र थ्व हे जुइ धइगु भा:पा: उह्य भेषधारी कृषकया सन्मुखय् थ्यंक वना: खाखातूगु सलं प्रश्न यात-- 'भो महापुरुष ! जि महाचीनय् वना: महागुरु मञ्जुश्री दर्शन याय्त वयाह्य ख; तर थुथाय् जिगु चित्त भ्रान्ति जुल । लँ उगु थुगु निश्चय याय् मफुत । छलपोल सर्वज्ञानीं निर्दिष्ट थासय् थ्यंक:वनेगु प्रयुक्ति उपदेश जुया विज्याहुँ ।' थुकथं सुविनीतपूर्वक प्रार्थना यात । थथे प्रार्थना या:गु न्यना: भेषधारी कृषक साक्षात् मञ्जुश्रीनं भक्तया उपरय् करुणा तया: लिस: बिल--

'भो धर्मश्रीमित्र कविवर ! "सिंहशार्दूल ऐरावत सा वाय्काच्वंगु खना: छ विस्मय चायाच्वन, सतिकच्वंगु तोता: तापाक थ्यंक च्वंगु इच्छा यांनाच्वंह्य छ खना: जि नं आश्चर्य चायाच्वना ।" महा- चीन धइगु अति दूर जुयाच्वंगु मनुष्यपिनि आवागमन मदइच्वंगु थासय् थ्यंक: वनेत अत्यन्त कष्ट जुइ । थौं लिवात, सन्ध्या ई जुल । थौं चच्छि जिगु छेय् सं तुं वासं च्वँ ।' थुकथं सा वाय्केगु ज्या तोता: सिंहशार्दूल निह्यं अन्तर्द्वानि यांना: हलसिं त्या: भूमिइ गाह्य यांना: सरासर थ:गु थासय् ब्वनायन । गुगु थासय् हलसिं गाह्य या:गु ख: अन मञ्जुश्रीभूमि सिद्ध जुल । उबलसंनिसें उगु थाय् 'सावाभूमि' धइगु नामं प्रसिद्ध जुल । थौंतक नं थुगु थासय् न्हापालाक वा पिइगु ज्या याय्मा: धइगु जनश्रुति परम्परानिसें प्रचलन जुयाच्वन ।

उगु छेय् थ्यँसेलि अतिथि सत्कारया रूपय् केशिनीदेवीं फलफुल आदि रात्री-भोजन याकल । नापं उह्य भक्तयागु खा: स्वया: करुणा तसे विश्वासपूर्वक थथे धा:गु दु-- 'कृषक बुगप्रति निश्चय नं काय वाक् चित्तं श्रद्धा ति, गुम्हेसिगु प्रेरणां कालीहृद नं स्थल जुल; उकिं वइगु प्रभावं कन्हय् सुथय् ब्रह्ममुहूर्तय् छंगु मनोकामना अवश्य पूर्ण जुइ । आ: छ तापाकनिसें व:ह्य त्यानु चाय् धुकल, आनन्दं छँ ।' थुलि धया: गुरुमां थ:गु अन्त पुरय् दुहांवन । थुलि शुभसन्देश प्राप्त जुसेलि धर्मश्री- मित्रया गन न्ह्यो वय्के फड ? गुरु मञ्जुश्री विज्यानाच्वंगु लुखाखलुस भ्वस्सुना: इमि निह्यतिपूया खँल्हानाच्वंगु शब्द न्यना: गुरु स्मरण यांना: एकाग्रचित्तं ध्यान यांनाच्वन ।

अन्त पुरय् दुने क्वथाय् च्वना: केशिनीदेवीं थ: धर्मस्वामि गुरु मञ्जुश्रीयाके पिने वयाच्वंह्य आगन्तुक सु ख: गुह्य ख: धका: न्यँसेलि मञ्जुश्रीनं लिस: विया: धाल-- 'हे देवी ! व काशी सहरयाह्य धर्मश्रीमित्र धइह्य पण्डित ख: । वया नामसंगीतिया द्वादशाक्षर अर्थ विशुद्धि न्यने धका: महाचीनय् वना: जित: नापलाय् धका: वयाच्वंह्य ख: ।' थुलि शुभ-सूचक प्राप्त जुसेलि छं हे

निश्चय वधय् जुयाः 'धन्य ! धन्य !! महागुरु मञ्जुश्री निश्चय नं छलपोल हे खः; थुकिइ छुं हे शंका मंत ।' धकाः भक्तिभावं कविवर भिक्षुजु उगु द्वारमूल लुखाखलुस भवस्सुनाः थथे स्तोत्र यानाचवन--

'जगद्गुरु छलपोल जुयाः नं बुज्या यानाचवंहा कृषक भाःपाः चवनाहा जि, सिंहशार्दूल खनाः नं निर्णय याय् मफयाचवनाहा जि, अमूल्यरत्न जडय् यानातःगु हल सुगन्धयुक्तगु सुवर्णया दण्ड खनाः नं मूर्ख जुयाचवनाहा जि अज्ञानी भक्तयात छलपोलं क्षमा याना व्यु । जगत रचना याय्गु समर्थ दुहा वहरूप छःपित जि छु सिइकेफइ ? थुजाःहा मन्द बुद्धि जुयाचवंहा भक्तया उपरय् अनुकम्पा तसे थ्व द्वारमूल याकनं उदघाटन यानाः जिगु जीवनया परम लक्ष्य छलपोलं दर्शन वियाविज्याहुं ।' थुगु लुखाखलुस अनेक पूजा भावभक्ति यानाचवन । थुहा भक्तया उपरय् करुणा तसे गुरु मञ्जुश्रीनं थःगु यथार्थ रूप साक्षात् दर्शन विल । थुगु सुन्दर रूप मञ्जुश्रीकुमार दर्शन प्राप्त जूगुलिं महार्हर्ष स्तोत्र यानाः प्रदक्षिण यात । तत्क्षणय् वइगु सदृच्छा पूर्ति याय् कारणय् गुरु मञ्जुश्रीनं विधिपूर्वक मण्डल दय्काः व अभिषेक कर्म खंकाः नामसंगीतिया दीक्षा वियाविज्यात--

'गुगु जा नामसंगीति धयागु विद्या त्रिकालया बुद्धपिसं आज्ञा दय्कातःगु, आदि मध्यय् अन्त्येसं कल्याणदायक जुयाचवंगु, सम्पूर्ण पाप क्लेश फुकाविइगु, सकल लोकपाल धर्मपालपिसं स्वागत यानातःगु थ्व हे नामसंगीतिया प्रभावं मुनीश्वरपिसं पारमिता पुरय् यानावन एवं १०८ धर्माधिकमुख पुरय् यानाः संबोधिज्ञान लानाः तथागत जुयाः लोकपित उद्धार यानाः बोधिमार्गय् तयाः निर्वाण पदवि लानावन । थुकि यानाः लौकिक लोकोत्तर ज्ञान नं लानावन । सांसारिक जनपित स्वर्ग विइगु ग्रहगति पीडा शान्त जुयाः सप्तवृद्धि लाभ जुइगु । लोकोत्तर पारमार्थिकजनपित संबोधि-निर्वाण विइगु, सम्पूर्ण शास्त्र विद्या धारिणीया नं उत्तम जुयाचवंगु ध्यान ज्ञान समाधि सूत्र तन्त्र मन्त्रया नं सारया नं सार जुयाचवंगु श्रावक प्रत्येक महायानीपित सिद्धि विइगु । स्मरण याना मात्र नं सकल भय शान्त जुइगु । थुकिइ वैरोचन आदि पञ्चबुद्धपिनिगु वर्णन दु, हेवज्र आदि सम्बरपिनिगु व्याख्या दु, अनंलि यमान्तक आदि वीरगणपिनिगु महिमा दु एवं त्रैलोक्यविजय आदि योगाम्बरपिनिगु प्रशंसा दु । थुकिइ हे दुने पञ्चबुद्धात्मक स्वयम्भू धर्मधातु न्याहा नं छहा जुयाचवंगु रहस्य परमार्थतत्त्व सुलाचवंगु दु । समस्त तन्त्र शास्त्र मध्यय् मायाजालतन्त्र उत्तक, थुकिया नं सार आर्यनामसंगीति जुयाचवन, थ्वया नं सार द्वादशाक्षर जुयाचवन । दृष्टान्त गथे धाःसा साया सार दुरु, दुरुया नं सार धौ, वया नं सार घ्यः थें जुयाचवन ।' थुकथं धर्मश्रीमित्रयात बोध यानाः द्वादशाक्षर अर्थ विशुद्धि तत्त्व नं बांलाक प्रकाश यानाः कयनाबिल ।

थःगु महान् अभिलाषाकथं द्वादशाक्षर अर्थ विशुद्धि ज्ञान प्राप्त जूगुलिं धर्मश्रीमित्रजु अपार हर्ष जुल । थुगु उपलक्षय् गुरुयात यथायोग्य प्रमाणं दक्षिणा चढय् याय्गु छुं मदयाः पण्डितजुं धाल-- 'भो सद्गुरु ! जि छहा परदेशी दरिद्रहा मनू जूया निम्ति छलपोलयात जि छु दोहलपे ? केवल जिगु थ्व काय वाक् चित्त चढय् याना, छःपिनिगु धर्मकाय रूपकाय मिखां दर्शन याना, न्हाय्पनं सद्धर्मामृत कथा श्रवण याना, वचनं स्तोत्र याना, शिरं नमस्कार याना, मनं स्मरण याना, ध्यान याना,

जप याना, ह्लातं पूजा अर्पण याना, तुति प्रदक्षिणा याना-- थ्व हे जिगु दक्षिणा अनुकम्पा तयाः ग्रहण याना कया विज्याहूँ । थुगु महान् दुर्लभ शुभसंयोगद्वारा थौं छलपोल दर्शन प्राप्त जूगुलि जि जन्म जुयागु सफल जुल, पण्डित जुयागु नं सार जुल, भवसागरं पार जूम्ह नं जि जुल, अनन्त दुर्लभ जुयाच्चंगु अनुत्तर तत्त्व प्राप्त जुल । अज्ञानं अन्धकार जुयाच्चंपित पञ्चज्ञानचक्षु प्रदान याना- विज्यात ।' धर्मश्रीमित्रं थथे आपालं प्रशंसा यानाः स्तोत्र यात ।

अभिषेक प्राप्त जूम्ह धर्मश्रीमित्रयात गुरु मञ्जुश्रीनं आज्ञा जुल-- 'भो वत्स ! आः छंगु मनोरथ पूर्ण जुल, आनन्दं थःगु विहारय् लिहां हूँ । न्हापाथें नामसंगीति व्याख्यान याय्त याकन हूँ । छं उपदेश ब्यूगु परीक्षा याय् निम्ति जि नं नामसंगीति व्याख्या श्रवण याय्त वय् ।' थुलि गुर्यागु वचन न्यनाः धर्मश्रीमित्रं शंका यानाः न्यन-- 'छलपोल बहुरूप, जिगु कारणय् सिंहशार्दूल सा वाय्काः साधारण कृषक रूप जुयाविज्याःम्ह, उकिं आः हानं छःपित छुकिं जि म्हसिइके ?' प्रार्थनाया लिसलय् धाःगु दु-- 'वँचुगु उफोस्वां ज्वनाच्चंम्ह स्वयाः छं उगु परिषद् मण्डपय् जि धकाः म्हसिइका का, तर अपमान छता याय् मते ।' थुलि धयाः वइत शुभआशीर्वाद सहित विदा बियाः अन्तर्द्वानि जुयावन ।

थनंलि पण्डित धर्मश्रीमित्र भिक्षु गुर्यात स्मरण यानाः लुखाखलुस साष्टांग प्रणाम यानाः अनुमोदनपूर्वक चक्कंगु खाः यानाः पासापि नाप व्वनाः थःगु स्थानय् लिहांवन । थः गुरु लिहांवल धइगु समाचार सियाः शिष्यपिसं स्वागत सत्कार यानाः विक्रमशोल विहारय् पूर्ववत् धर्मासनय् विज्याकल । सकल शिष्यपि गुरु दर्शन याय्त वयाचवन, गुरु नं थःत अनुभव जूगु सारा वृत्तान्त खँ कनाः स्वयम्भू धर्मधातुयागु प्रशंसा यानाः न्यंकल ।

छुं दिन लिपा हानं न्हापाथें तुं व हे आर्यनामसंगीतिया व्याख्यान प्रारम्भ यात । थुगु व्याख्यान-समयय् न्हापाथें बाह्यार्थ जक मखु परन्तु विधिपूर्वक मण्डल दय्काः अभिषेक बियाः द्वादशाक्षरया अर्थ विशुद्धि समेत प्रकाश यानाविल । थुगु प्रक्रियानुसार शिष्यवर्गपि क्रमशः द्वादश ज्ञान, द्वादश वशिता एवं द्वादश भूमि यथा द्वादश धर्मचक्र नं बांलाक अवबोध जूपि जुल ।

थुगु हे इलय् थः गुरु मञ्जुश्री वँचुगु उफोस्वां छफो ज्वनाः उगु धर्मसभाय् तुप्लुक्क थयंकवल-- म्हुतुं लाः मुलुहं वय्काः, न्हासय् न्हि स्वालाहां वय्काः, खै व ई म्हुतुइ प्याचयन्-प्याच्या पुंकाः, भुजिनं भुंकाः, ग्वाय् हाह्लि ताःहाकः जुइकाः स्वय् हे गर्खेसेच्वंगु नवःगु वसतं पुनाः, थःगु ह्लातं ज्वनाच्चंगु उफोस्वानं वरोवर भुजि ख्यानाच्चंम्ह, ध्वग्गी नवःगुलि दर्शक व श्रोतागणपिसं निन्दा याकाच्चंम्ह थुजाःम्ह अघोरी रूप जूसां केवल उफोस्वांया चिन्हं जक गुरु धकाः म्हसिइकाः धर्मश्रीमित्रया मनय् सारै आकुल व्याकुल जुइकाचवन ।

'अहो ! महापुरुषपिनिगु चरित्र वडो विचित्र अपरम्पार खनी, जिगु चित्त परीक्षा याय् निम्ति अभागी दुःखी गृहस्थिया रूप धारण यानाः दिव्य सुन्दर रूप तोताः जिगु लज्याया खानी थें न्ह्योने ऊवाताहां दनाच्चंवल । धर्मश्रीमित्रया मनय् द्वन्द्वया संघर्ष चलय् जुल कि जि दनावनाः अभिवादन याय् धाःसा थ्व अज्ञानीजन राजा आदि श्रोतागणपिसं धिक्कार धकाः जितः निन्दा याइगु

जुल, यदि दनावनाः स्वागत सत्कार याःमवन धाःसा गुरुया मनय् विस्मात् जुइ धकाः स्युसा नं क्षमावान् करुणावन्त सर्वज्ञ गुरुं जितः अवश्य क्षमा याना विज्याइ, थ्व मस्युपि सभाषदपिसं धिक्कार याइगु ज्ञब्द सहयाय् थाकु ।' थुलि मतिइ चिन्तना यानाः मनं मनं नमस्कार यानाः क्वच्छुनाः हथासं व्याख्यान समाप्त यानाः श्रोतागणपि सकलें लिछ्वयाः विहारं पिहांवने धुँसेलि गुरु नं सरासर पिहांविज्यासेलि थः नं हतपतं काचाकाचां गुरुयात वन्दना याय् धकाः वन । उवल्य् गुरुं लोकजनपि थें तंचायाः विमुख जुयावंगु खनाः पण्डितयात पश्चाताप रूपी अग्निं दाह जुल । अले भिक्षु पण्डित बेगं ब्वांब्वां वनाः 'भो गुरु ! दयासागर जिगु अपराध क्षमा यानाः जितः दर्शन वियाविज्याहुँ' धकाः तस्सकं प्रार्थना याःसा नं लिफः जक हे मस्वसे विज्याःगु खनाः किकर्त्तव्य विमूढ जुयाः भूमिस भ्वस्सूवन, गथे फय् वयाः हा ल्यहेदंगु सिमा थें भूमिस गोतूगु खनाः अनुग्रह तयाः लिहांविज्यानाः वइत थनाविल । उगु समयय् गथे दुरुइ अजः छफुति लाःगु थें व भिक्षुया निर्मल चित्तय् मृषावादया दोष छफुति लात ।

'भो गुरु मञ्जुश्री, छःपि विज्याःगु जि मखना, तर उफोस्वांया चिन्हं जि सिल' धकाः थुलि धयाः सुविनीतपूर्वक ल्हाः जोजोलपा गुरु मञ्जुश्रीया चरणकमलस थःगु शिरं भ्वस्सुनाः साष्टांग प्रणाम यात । खंसा नं मखं धकाः मृषावाद खँल्हानागु थःगु हे कर्म यानाः वइगु सुन्दरगु मिखा निगलं गुरु मञ्जुश्रीया चरणकमल-पादुकास कुतुवन ।

थथे कर्मकर्मया फल अवश्यम्भावी जुइ धइगु पूरा अनुभव जुसेलि थःगु भूल थःह्मं सहर्ष स्वीकार यासे धर्मश्रीमित्रं गुरुयाके प्रार्थना यात- 'गुगु थ्व अनित्यगु चक्षु नाश जुल जिगु मनय् छुं विस्मात् मदु, अनित्य-चक्षु अर्पण यानागुलि जितः अज्ञान-चक्षु फुनाः नित्यगु ज्ञान-चक्षु अवश्यमेव लाभ जुइ ।' थथे विश्वास यानाः मतिइ चिन्तना यात-- 'गुगु जा थ्व मिखां खनाः नं विशुद्ध आत्मा छलपोलयात मखंपहः यानाः घृणाया दृष्टिं स्वया, थ्व हे मिखा अनित्यविषयनाप भुल्य् जूगुलि चित्त चञ्चल जूगु खः, आः थ्व हे मिखा मंत धकाः जि अपशोच मताया, परन्तु जिगु भक्तिया प्रभावं देवदैत्य मनुष्यं पूजा याकागु छलपोलयागु उत्तम चरणकमल दर्शन दुर्लभगु पादुकास सौभाग्यवश जिगु मिखा निगलं लीन जुइदत । उकिइसं भोग याय्माःगु कर्मफल नं थन प्रत्यक्ष रूपं भोग याय् धुन । थ्व जिगु कर्मभोग खंपि न्यंपि सक्य् याःपिसं पाप कर्मयाके विरक्त जुयाकाय्गु छगू प्रकारया सदांया लागी प्रेरणा स्वरूप जुयाच्चनी ।'

थुलि जुइ धुँसेलि धर्मश्रीमित्रयात शान्तवना बिइया लागी मञ्जुश्री गुरुं थनिनिसे छंगु नां ज्ञानश्रीमित्र जुल धकाः प्रख्यात यानाविल । उवलसंनिसे व ज्ञानश्रीमित्रं ज्ञानदृष्टिं स्वयाः वागीश्वर मञ्जुश्रीयागु नित्य भजन यानाः बोधिज्ञान लाय्गु आज्ञा यानाः शिष्यपित बोध यानाच्चन ।

थुगु इतिहास घटनाया साकार रूप थौंया अद्यापि मञ्जुश्रीया पादुकास पलेस्वानय् केशर थें सुशोभितपूर्वक महापण्डित धर्मश्रीमित्रजुया मिखा अङ्कित याना वइच्चंगु जुल ।

काश्यप तथागत आगमन

अतीतकाल्य् वाराणसी सहर्य् वन्धुदत्त नाम ब्राह्मण्या पत्नी धनवतीदेवीया उत्तमगर्भं काश्यप नाम सुपुत्र जन्म जुल । थुह्य वालक बुद्ध जुइगु पूर्वसंस्कार दुह्य जूया निम्ति क्रमशः तःधी जुयावसेलि न्यग्रोधवृक्षमूल्य् च्वनाः मार जित्य् यानाः सम्यक संबुद्ध धाय्कल । बुद्धचर्यानुसार जगतहितार्थ निम्ति अनेक स्थान स्थानान्तरय् भ्रमण यायां नेपाल्य् थ्यंकःवल । थुगु बखतय् शाक्यमुनि बुद्ध जुइह्य ज्योतिराज बोधिसत्व धाय्काः जन्म जुयाः काश्यप तथागतयागु सेवा याना-च्वन । थ्वसपोल काश्यप तथागतया नापं तिष्य, उत्तम, सोत्थित एवं ज्योतिराज प्रमुखं आपालं शिष्यवर्ग सहित यासे श्रीस्वयम्भू धर्मधातुप्रति श्रद्धा भक्ति तसे पूजादि सत्कार यात^१ ।

स्थानीय जनपित धर्मोपदेश यानाः आशीर्वाद बिसे थनं गौडदेसपाखे स्वयाः प्रस्थान यानावन ।

थुगु गौडदेसया अधिपति महाराज प्रचण्डदेव जुयाच्वन । थुह्य राजां दुष्टगणपित यमराज थें त्राश बियाः साधुसन्तपित स्वागत सम्मान यानाः प्रजापित आनन्दं प्रतिपाल यानाच्वंह्य विवेकवन्त राजां थःगु देस्य् काश्यप तथागत दुर्हाविज्यात धइगु शुभसमाचार सियाः व बडो हर्षपूर्वक स्वागत सत्कार यानाः लिख्यचाय्काः असंख्य शोभायमानगु धर्मासनय् विज्याकल ।

काश्यप तथागतप्रति राजा प्रचण्डदेवया अपार श्रद्धा उत्पन्न जुयाः अक्षयतृतीया दिनय् थःगु सम्पूर्ण राज्य समेत दोहलपाः सुवर्णपिण्डपात्र प्रदान यात, नापं क्षीर भोजन याकल । थुगु दान यानागुया विशेष पुण्यफल उपदेश जुया विज्यात । 'बुद्ध' जुइत सत्त्वार्थया लागी सर्वस्व थःगु काय वाक् चित्त समेत त्याग याय्माः धासेलि थ्व राज्य जिमिगु लागो कलंक जक खः उकिं थ्व राज्य महाराजया सुपुत्र शक्तिदेव राजकुमारयात जकं योग्य जू । उकिं याकनं शक्तिदेवयात शुभ-राज्याभिषेक बियाः नेपाल्य् श्रीस्वयम्भूया दर्शन निम्ति गमन जु । चतुर्द्वीप मध्यय् जम्बुद्वीप श्रेष्ठ

१- स्वायम्भू पुराण, पृ. २७६

जुयाचवन । उकिइसं काशि क्षेत्र, कुरु क्षेत्र, हिमालय क्षेत्र विशेष उत्तम जुयाचवन । थ्वयासिनं नेपाल क्षेत्रया श्रीस्वयम्भू क्षेत्र अत्युत्तम जुयाचवन, गनकि श्रीस्वयम्भू ज्योतिरूप पलेस्वांया द्योने विराजमान जुयाचवन, अन हे सम्पूर्ण पीठयासिकं प्रसिद्धगु गुह्येश्वरी पीठ दयाचवन । थुगु प्रकारं अष्टवैतराग, द्वादशतीर्थ, उपतीर्थ दयाः पवित्र जुयाचवंगु थन हे जंगद्गुरु मञ्जुश्री स्मृति चैत्य दइचवन । थ्व हे चैत्यया समीपय् मञ्जुश्रीया शिष्य गुणज्ञानं परिपूर्णह्य गुणाकर नाम भिक्षु उपस्थित जुयाचवन । व हे गुणाकरया शिष्य जुयाः स्वयम्भू चैत्य सुनिर्माण यानाः वसपोलयात भजन यानाः वज्राचार्य पद प्राप्त यानाः लोक उद्धार याना च्वं ।' धकाः धाःगु काश्यप तथागतयागु उपदेशयात सहर्ष स्वीकार यासे प्रार्थना यात-- 'भो तथागत ! छलपोलयागु उपदेश जि निश्चय नं पालन याय्गु जुल, तर जि छलपोलयात दोहलपे धुंगु राज्य छता लितकाय्गु इच्छा मदु, क्षमा यानाविज्यहुँ ।' अनंलि तथागतया चरणस प्रणाम यानाः सरासर नेपालपाखे स्वयाः स्वयम्भू क्षेत्रय् प्रस्थान जुल ।

थनंलि प्रचण्डदेव राजायागु अनुरोधयात स्वीकार यासे काश्यप तथागतं राजकुमार शक्तिदेव-यात सःताः शुभराज्याभिषेक वियाः राज्य लःल्हानाः आवश्यक राजधर्म उपदेश वियाः थनं लोक-हितार्थ निम्ति मेगु थासय् प्रस्थान जुयावन ।

शान्तिकराचार्यया स्वयम्भू प्रतिष्ठा कर्म

काश्यप तथागतयागु वचनामृत प्रेरणाद्वारा सद्धर्मचित्त उत्पत्ति जुयाः श्रीस्वयम्भू दर्शनार्थ थःगु सम्पूर्ण राज्य ऐश्वर्य त्याग यानाः नेपाल वय् धकाः वःह्य प्रचण्डदेव राजा नेपालय् थयंकाः अष्ट-वैतराग, द्वादशतीर्थ एवं चतुर्महाप्राकार पर्वत आदि धनादहः व गुह्येश्वरो पोठ समेत दर्शन यायां गिरिवर साम्हेगु पर्वतय् थहांवनाः ज्योतिरूप श्रीस्वयम्भू सरोजपद्मय् उज्ज्वल जुयाच्चंगु दर्शन यानाः अपार हर्ष उत्पन्न जुयाः रत्नमाला दोहलपाः श्रद्धा भक्तिपूर्वक पूजा यात^१ ।

श्रीस्वयम्भू ज्योतिरूप दर्शन पूजन याय् धुँसेलि मञ्जुश्रीया शिष्य पञ्चाभिज्ञ लाभ जुयाच्चंह्य सकल गुणज्ञानं युक्तह्य गुणाकर भिक्षुया आश्रमय् वनाः शिष्यत्व ग्रहण यात । थ्वय्कःयात चूडाकर्म यानाः अभिषेक बियाः धारिणी विद्या स्यनाः कनाः मण्डल दर्शन बियाः आर्यनामसंगीति पाठ याकाः भिक्षुचर्याव्रत बियाः आवश्यक शिक्षा-दीक्षा बियाः शान्तश्री धइगु नामकरण यानाबिल ।

अनुपम सुन्दर ज्योतिरूप स्वयम्भू सहस्रदल पलेस्वाया द्योने प्रकाश जुयाच्चंगु स्वयाः शान्तश्री भिक्षु थथे मतिइ चिन्तना यात— 'गुवलय् तक थ्व मनुष्यपिनिगु चित्तय् सद्धर्मप्रति भावभक्ति श्रद्धा आदर निश्चय दयाच्चैतले थुगु अद्वितीय महान् सुन्दर ज्योतिरूप सुपुष्प अद्भुत आश्चर्यपूर्वक सकलया न्ह्योने सदाकालं सुरक्षित जुयाच्चनी, गुवलय् थ्व मनुष्यपिनिगु चित्तय् कलियुग जुयावइवलय् पञ्चकषायं संयुक्त जुयाः महादुष्ट जुयाः घोर अत्याचार कर्म यानाः कर्मकर्मफलय् अन्धविश्वास जुयाः दशाकुशल पापकर्मय् अनुरत जुयाः धर्माधर्म विवेक छु मयाइपि जुइ, त्रिरत्नया शासनिक कीर्ति वस्तु [द्यो, सफू, पौवाहाः] आदि सद्धर्म सामग्री अपहरण यानाः सनी, शुद्धगु वचनय् सकलसिनं दोष खनी, सद्धर्मचर्यानाप मिलय् मज्जुगु विपरीत चलन कं कं वधय् जुजुं वइ, उजाःगु समयय् थुकियात सुना नं रक्षा यानां रक्षा याय् फइमखु अतएव थुकियात इलय् हे त्वपुयाः रक्षा याय्या निम्ति थुकिइ द्योने श्रीस्वयम्भू महाचैत्य निर्माण याय्माल धइगु दृढ संकल्प यानाः मतिइ तयाविज्यात ।

१- स्वायम्भू पुराण, पृ. २८५

थःगु शुभप्रतिज्ञा दृढसंकल्पयागु विचार ज्वनाः थः गुरु भिक्षु श्रीगुणाकरयाथाय् वनाः प्रार्थना यात- 'थथे श्रीस्वयम्भू ज्योतिरूपयात प्रकाशन यानातय्गु स्वयाः नं अप्पो गोप्य यानाः चैत्याकार रूपय् परिणत याना वियागुलि अनन्तकाल तक नं भाग्यवान्पिनिगु लागी आयु पुष्प ज्ञान सिद्धिया अक्षय भण्डार स्वरूप सदाया लागी स्थिर जुयाच्चनी ।'

थुलि थः शिष्य शान्तश्री भिक्षुयागु उपयुक्त वचन न्यनाः भिक्षु गुणाकरजुं नं अनुमति सहित पूर्ण आश्वासन वियाः विधिवत् शान्तश्री भिक्षुयात सुप्रशन्नपूर्वक वज्राभिषेक वियाः स्वयम्भू महाचैत्य निर्माण याय्गु सर्वाधिकार प्रदान याःगु जुल ।

आचार्य शान्तिकरजु थः गुरुयागु आज्ञा शिरोपर यासे वसपोलयात वन्दना सत्कार यानाः पुरश्चरण च्वनाः सर्वसुगत हृदय-निरञ्जन आदिबुद्धयात क्षमापन यानाः स्वयम्भू महाचैत्य निर्माण याय्गु कार्य शुभारम्भ याःगु जुल । त्रिलोक्य सुदुर्लभगु ज्योतिरश्मि केशरी दइच्चंगु अनुपम सुन्दर पद्मयात दत्थुइ ह्वः दुगु रत्नया ल्वहँतं त्वपुल, वया द्योने नवकोष्ठयुक्तगु रत्नसमानगु ल्वहँफा तयाः बुद्ध तारा स्वरूपं दत्थुइ ह्वः तल । थुकिइ द्योने उच्चा जुइक च्वय् त्रयोदशकोष्ठ दय्काः ईशान-कोणय् ह्वः तल, वया छ्वाःख्यरं पद्मावली, वज्रावली, ज्वालावली तयाः मण्डलाकारगु ल्वहँ तल । थुगु अपरिमित पुण्यकार्य जुयाच्चुवं शुभसन्देश त्रिभुवनय् प्रचार प्रसार जूगुलि अनेक देवलोकगणपिसं रत्नवृष्टि, पुष्पवृष्टि यानाहल; नापं थःथःपिनिगु अधिकार अनुसारं फुम्हं फूगुचाःगु हारगुहार यानाः स्वयम्भू भक्ति याय्गुलिइ तत्पर जुयाच्चन । शुभ मुहूर्तस सुमेरूया प्रमाणं यष्टिदारु [गलसिं] स्वात, शास्त्रीय प्रमाण अनुसारं थुकिइ दुने वहुमूल्य वस्तुत गर्भय् स्वथनाः पात्राकारया रूपय् छ्वाःख्यरं अपां दनाः उच्च ध्वज थें शोभायमान जुइक महाचैत्य दय्केगु ज्या जुल । थुकियात ल्वय्क धर्मधातु मण्डलया प्रमाणं लक्षण संयुक्तपि देवतापि तयाबिल । पूर्वदिशापाखे किसिवाहन यानाः भूमिस्पर्श मुद्रा यानाच्चंह्य आकाशवर्णह्य अक्षोभ्य तथागतया मूर्ति, दक्षिण दिशापाखे सलवाहन गयाः सुवर्णवर्णह्य वरदमुद्रा यानाच्चंह्य रत्नसंभव तथागत एवं पश्चिम दिशापाखे ह्यय्खा गयाः ध्यानमुद्रा यानाच्चंह्य माणिकवर्णह्य अमिताभ तथागत, उत्तर दिशापाखे गरूडवाहन यानाः अभयमुद्रा यानाच्चंह्य हरितवर्णह्य अमोघसिद्धि तथागत, मध्यस बोध्यंगमुद्रा यानाः सिंहासनय् विज्यानाच्चंह्य श्वेतवर्णह्य वैरोचन तथागत मूर्ति प्रतिष्ठा याःगु जुल; अथे हे चतुष्कोणय् क्रमशः लोचनी, मामकी, पाण्डूला एवं तारादेवी । गलतुकि प्यखे सुन्दर शान्तगु ध्यान सुदृष्टि मिखा कंकल; थ्वया च्वस्सं हलपति प्यख्यरसं वज्र, रत्न, पद्म व विश्ववज्रया प्रतीक अङ्कित यात । थ्वयां दथुस त्रयोदश^१ चक्रावली तयाः सुशोभित यानातल । ईशानकोणय् छगू ह्वः तल । थ्वयां नं च्वय् उष्णीष चूडामणि तयाःलि थुकिइ द्योने हानं आकाश मण्डलया श्रीशोभा थें मणिरत्न सहितगु सुवर्णछत्र स्थापना यात । धारिणी मंत्र च्वयातःगु प्यखे प्यपु ध्वज स्वात एवं प्यकुनय् प्यदिगय् उपद्रव शान्त याइगु मन्त्रवास गथिचिनातःगु दिग्माना दिक्पताः व्वय्कल । थुगु रूप यथायोग्य प्रमाणं स्वयम्भू महाचैत्य निर्माण कार्य समाप्त जुसेलि महोत्सवपूर्वक कार्तिक पूर्णिमाया महान् शुभदिनस यथाविधि थें प्रतिष्ठा

कार्यं सुसम्पन्न याःगु जुल ।

श्व हे स्वयम्भू महाचैत्य निर्माण कार्ययागु ऊवल्य महोत्साही विचक्षण जुयाच्चंहा शान्तिकर आचार्य श्रीधर्मधातु वागीश्वर महामण्डल दयकल । थनलि पुच्छाग्रपर्वतय गोपुच्छाग्रचैत्य थन हे हेवज्र भैरव नागराज एवं मञ्जुश्री गुरुया चरणकमल दयकल । नापं वरदा मोक्षदादेवी सहित स्थापना यानाबिल । एवं प्रकारं पञ्चमहाभूत [जल, तेज, पृथ्वी, वायु, आकाश] या पाखें जुइगु अनेक विघ्नोपद्रव शान्ति कामना यासे पञ्चसाधन कर्म सिद्ध जुइगु अनेक लक्षण संयुक्तगु सुन्दरगु पञ्चपुर [शान्तिपुर, वसुपुर, नागपुर, वायुपुर एवं अग्निपुर] नं स्थापना यात । थुगु शान्तिपुरयात प्यंगू प्रकारं नामकरण याःगु जुल-- (१) शान्तिपुर (२) सम्बरपुर (३) गुह्यपुर (४) आकाशपुर । दूरदर्शी बुद्धिमान जुयाच्चंहा शान्तिकरजुं दिगवन्धन स्वरूपं खुहा भैरवया मूर्ति नं अधिष्ठान याःगु जुल :--

- (१) शान्तिपुरया दक्षिणय् भयानकहा आलिस्वरूप पृथ्वी भैरव
- (२) स्वयम्भूया पूर्वपाखे लैय् उच्छिष्टवली वाइगु थासय् असितांग भैरव
- (३) पर्वतया पाक्वय् पूर्व दिशाय् तेजसा भैरवो [पाताल]
- (४) पर्वतया नैऋत्यपाखे वायु भैरव
- (५) पश्चिम दिशाय् आकाश भैरव
- (६) पूर्वपाखे लैया क्वय् शक्ति सहित शून्य भैरव

थुगु प्रकारं अन्य उपयुक्त थासय् निम्न प्रकारया मूर्तित स्थापना याःगु जुल-- पर्वतया पूर्व-पाखे च्वंगु लैया विचय् काली धयाहा महानाग, विघ्न निवारणया लागी गणेश मूर्ति, शासन रक्षकया रूपय् चतुर्महाराज, प्यंगू भुवनया प्रमाणं प्यखें प्यंगू मण्डल तयाः आवश्यक व्यवस्था याय् धुंकाःलि शान्तिकर आचार्य नेपाःया लागी भविष्यवाणी यानाः सदांया लागी साक्षि स्वरूपं शान्तिपुर गुफाय् दुने प्रवेश जुयाः सिद्ध जुयावन ।

शान्तश्री आचार्यजुया सम्बिधानत्वय् गुणकामदेव राजाद्वारा नागसाधन

राजा गुणकामदेव तस्सकं मिसाह्यो जुयाः कामराग्य् लुब्ध जुयाः आपालं पौरकन्या सुन्दरी स्त्रीपिनाप जक भुल्य जुयाः राजनीति धर्म्य् छुं वास्ता मतल । केवल उख्ये थुख्ये रतिक्रिडाय् अति व्यस्तगुलि यानाः यथाराजा तथाप्रजा धया थें जुयाः देस्य् अनेक प्रकारया अशान्ति उपद्रव जुजु वनाचवन^१ । गुगु पाप कर्म यानाः इन्द्रादि लोकपालपि समेत कोप जुल :--

- (१) देवराज इन्द्र कोप जूगुलि जलवृष्टि मजुल ।
- (२) यमराज तंचाःगुलि अनेक रोग उत्पन्न जुयावल ।
- (३) वरुणादि नागराज तंचाःगुलि लया भय वधय् जुल ।
- (४) जम्बलादि कुबेर विमुख जूगुलि दरिद्र जुयावल ।
- (५) अग्नि रिसाहा जूगुलि थाय्थासय् मिनल ।
- (६) नैऋत्यगण विमुख जुयाः थाय्थासय् भूतप्रेतं दुःख वियाहल ।
- (७) वायु ईर्ष्या याःगुलि फसं दुःख बिल ।
- (८) ईशान प्रशन्न मजूगुलि यानाः अनेक बिघ्न उत्पात जुल ।

थुगु प्रकारं न्ह्यदंतक देस्य् अशान्ति उपद्रव मचय् जूगुलि तस्सकं हाहाकार जुल । थुजाःगु आपद्कालय् तस्सकं विवेकवती सुविनिता रतिरूप स्त्रीनं कामराग्य् दुवय् जुयाच्वंहा गुणकामदेव राजायात अनुरोध यात-- 'न्हापायागु पुण्य संस्कारद्वारा थों छःपि राजा धाय्काचवन, आः हानं कामचर्या तोताः धर्मचयास कुतः यानाविज्याहुं । थुगु पुण्यया फलं स्वर्ग्य् देवराज इन्द्रया रतिसमानपि कामकला निपुणपि अप्सरापिनापं च्वनाः सुख बिलास याय् दइ । लिस्सें पुण्यया प्रभावं

थःगु देसय् नं शान्ति सुख उदय जुया वइ । उकिं कीसं न्ह्यागु यानाः नं सद्धर्मचर्या उन्नति याय्माल । थथे विवेकहीन जुयाः कामं अन्ध जुयाच्चव्हं राजा जुल धाःसा अत्याचार सिवाय् सद्धर्म गनं उन्नति जुइ ? सद्धर्म बिना संसारय् सुख शान्ति जुइगु कारण हे मद्दु, अतःएव भो राष्ट्रपाल, महाराज ! कल्पवृक्ष समानह्य धर्मधातु श्रीस्वयम्भू महाचैत्य नित्य भजनया महायोगी गुरु शान्तश्री आचार्यजुया शरणय् हुँ, गुह्यसिगु उपदेशं कीगु देस हानं महामंगल जुइ ।' थथे धाःगु वचन न्यनाः अन्तस्करणंनिसें विश्वास जुयाः सद्धर्म चेतना दइवल ।

थुलि सुन्दरी मिसायागु हितवचन न्यनाः बडो हर्षमान यानाः अनेक पूजोपकारण सहित यानाः वाद्यवादन थाकाः व मन्त्री भारदार एवं अधिकारीवर्ग आदि प्रजागणपि ल्यू ल्यू तयाः गुणकामदेव राजा साम्हेगु पर्वतय् थहांवनाःलि श्रीस्वयम्भू महाचैत्य प्रदक्षिणा यानाः शान्तिपुरय् शान्तश्री आचार्यया आश्रमय् थ्यंकः वन । अन दुने अभ्यन्तर कोथाय् च्वनाः नेपाल सदां शान्ति सुख जुयाच्चवनेमा धकाः श्रीआदिबुद्ध ज्योतिरूप स्वयम्भू नित्य स्मरण यानाः जुगं जुग तक नं सजीव तुल्य जुयाच्चवने फइगु आष्फानिक समाधिइ च्वनाच्चव्हं सद्गुरु श्रीशान्तिकराचार्यया दर्शन प्राप्त जुल ।

गुणकामदेव राजा गुगु महान् इच्छा यानावःगु ज्या खः व सफल याय्गुलिइ शान्तिकर आचार्यजुं नं अतिकं प्रशन्न जुसे पूर्ण सहयोग प्रदान याय् धइगु वचन बिल । थुगु सत्प्रेरणा प्राप्त जुसेलि राजां थःहानं यानागु सम्पूर्ण पाप कर्म देशना यासे क्षमा पवन । पुनः प्रार्थना यात-- 'कीगु नेपाल देस सकभनं सुख सुभिक्ष महामंगल जुइगु उपाय कुशल आज्ञा जुया विज्याहुँ ।' अले समन्तदर्शी गुरु शान्तिकरं नं आज्ञा प्रशन्न जुल-- 'भो नरेन्द्र गुणकामदेव ! संसारय् सुख दुःखया कारण कुशलाकुशल [धर्म व पाप] निगू जक जुयाच्चवन । गुम्हेसिनं कुशलाकुशलया विवेक याइमखु, उम्हेसिनं सुख शान्ति स्थापना याय् फइमखु । उकिं छंके दुगु अविवेकया कारणं सकल प्रजापिसं दुःख भोग याय् मालाच्चन । मनुष्यपिसं पुण्यफल धाःसा इच्छा यानाच्चन, परन्तु पुण्य कर्म साधन याय्गु ज्या याय् मंमद्दु, अथे हे मनुष्यपिसं पाप कर्मयागु फल इच्छा मयाः, तर पाप कर्म धाःसा मचाय्क जत्न युक्ति यानाः सना जुइ । अथे जूगुलि राजापिसं विवेकं राज्य प्रतिपाल याय् सय्केमाः । जगत् उद्धार याय् उत्पत्ति जूह्य स्वयम्भू भक्ति इच्छा याइ, गथे स्पर्शमणि नं धातु स्पर्श याय्गु अभिलाषा याइ । अतःएव श्रीधर्मधातु स्वयम्भू महाचैत्य नित्य स्मरण यानाः भजन या, निश्चय नं कल्याण जुइ ।'

गुरुयागु हितोपदेश न्यनाः 'तथास्तु' धयाः अनं पिहांवयाः आवश्यक सरसामग्री ज्वरय् यानाः अष्टवैतराग, द्वादशतीर्थ आदि योगी मातृकागण चाःहुलाः गुह्येश्वरी, मञ्जुश्री तथा धर्मधातु चैत्ययात विधिपूर्वक पूजा सत्कार यात । अनंलि शान्तिपुरय् दुने ध्यानागारय् विज्यानाच्चव्हं गुरुयात नं नमस्कार यानाः अनं लिहांवयाः नीति धर्मानुसार थःगु राजदरवारय् च्वनाः प्रजागणपित प्रतिपाल यानाच्चन । थुगु पुण्यकार्ययागु प्रभावं अन देसय् जुयाच्चवंगु गुगु खः विघ्न उत्पात परिशान्त जुजुवन । तथापि गुलिखय् समयतक नं जलवृष्टि मज्जुगुलि महा आतुर जुयाः राजा हानं तत्कालं शान्तश्री गुरुयाथाय् वनाः विन्ति यात-- 'भो गुरु ! छलपोल सर्वदर्शी, कीगु देसय् फुक्क उत्पात शान्त जुल, तर जलवृष्टि छता मज्जुयाः प्रजापित तस्सकं आपत जुल, जलवृष्टि बिना सयसाह्या उब्जनी

जुइमखु, अन्न बिना प्राणिपिनगु प्राण रक्षा जुइमखु, अन्न वस्तु हे सम्पूर्ण सम्पत्तया मूल कारण जुयाच्चन, उकि छलपोल शान्तश्रीया नामयात त्वय्क थुगु अनावृष्टि दोष शान्त जुइगु उपाय यानाविज्याहुँ ।

राजायागु प्रार्थना न्यनाः शान्तश्री आचार्य थुकियागु हेतु छु खः धकाः ध्यानद्वारा चिन्तना यानाः स्वतः, उगु समयय् गुरुं सिइकाः 'हे राजन् ! छं सकभनं तीर्थ स्नान यात, परन्तु नागवास तःदहलय् स्नान मयाः, उकि कर्कोटक नागराज तंचायाः जलवृष्टि रोकय् यानातल । अथे जूसां धन्दा काय्मते ।' धयाःलि पूरा भरोशा बियाः, गुरुया आज्ञानुसार, नागसाधनया पूजा सामग्री दक्क ज्वनाः शुचिनीचि यानाः गुरुया आश्रमय् थ्यंकाः 'सत्त्वार्थ निम्ति जुइगु शुभकार्यय् विलम्ब यानाः विज्याय् मते, याकनं यानाविज्याहुँ' धकाः चव्यकाच्चन ।

राजायागु प्रार्थनायात स्वीकार यासे अनावृष्टि शान्त याय् कारणय्, राजायात उत्तरसाधक यानाः शान्तिपुरय् दुने नवनागराजपिनगु महामेघमण्डल विधिवत् दय्काः नागराजापि आराधना यात । सकल नागराजापि मेघमण्डलय् दुने च्वनाः जलधारा हाय्काः आकाशमार्गं गमन जुयाः लोकपित हर्ष याकाः श्रीस्वयम्भू धर्मधातुयात प्रदक्षिणा यानाः गुह्यपुर नामक शान्तिपुरय् प्रवेश जुयाः थःथःगु आश्रम ग्रहण यात । कर्कोटक नागराजा छह्य जक न्ह्यात्थे याःसा नं सामेल मजू । वरुण आदि अष्टनागराजापि जलधारा वृष्टि यानाः थःगु आश्रमय् च्वनाच्चन । 'तःदहःया स्वामि कर्कोटक छह्य मन्त्रपाशं आकर्षण याःसा नं गलःदया विरूप जूगुलि मछालाः थन मवल धइगु सिइकाः, हानं मन्त्रद्वारा आकर्षण यात धाय् वया शिर न्हय्कू टुका दलावनी, पाप नं लाइ, कीगु शुभकार्य नं विध्वंस जुइ, उकि गुरु आचार्य याय् मज्युगु प्रकृया उत्तरसाधक जूह्य छं याय्माः, अन थाःगाः मदुगु लखय् वने थाकुगु दुर्गमगु भयंकरगु थासय् जूसां छ निर्भय जुयाः हुँ ।' धकाः धाःगु गुरुयागु वज्रवाचायात शिरोपर यासे अन वनेगु तत्पर जुल । अले राजायात मन्त्राधिष्ठान यानातःगु दाफस्वां व श्यामकर्ण सल बियाः उजं दय्कल-- 'थ्व श्यामकर्ण सल गयावनाः नागवास दहलय् थ्व दाफस्वां कुतकेछ्व । थ्व स्वां चाःचाःहुलाः गनं वनीगु खः उगु लँ लिसे लिसे छ निर्भय जुयाः हुँ ।' आज्ञा जू थें सरासर व दहलय् थ्यंकाःवन । दहलय् थ्यंकाः गुरुया वचनानुसार दाफस्वां दहलय् कुतका बिइवं जवं चाःहुलाः क्वय् क्वहांवलिसे मन्त्ररूपी पपू दुह्य उत्तरसाधक राजा तत्कालं नागराजाया छेय् थ्यंकाःवन । सुवर्णयागु मणिरत्नं उज्ज्वल जुयाच्चंगु विजुलीया खिपः समानगु पाश रत्नया तोरणं अन्धकार नाश जुयाच्चंगु चन्द्रसूर्य थें मणियागु तेजं प्रकाश दइच्चंगु थुजाःगु नागभुवन स्वयाः आश्रय जुयाच्चन, 'धन्य ! धन्य !! वसपोल सिद्धवान आचार्य सद्गुरुया चमत्कार स्वय् धुन ।' निःशंकापूर्वक निर्दिष्ट स्थानय् थ्यन । 'अहो मन्त्रया प्रभाव !' धकाः गुरु स्मरण यानाच्चन । थुह्य उत्तरसाधक खनाः थन च्वं पि नागत गुलि क्रोध पिकयाच्चं पि, गुलि आश्रय चायाच्चं पि, गुलि सन्तोष जुयाच्चं पि, गुलि युद्ध याय् तत्पर जुयाच्चं पि, गुलि विषस्वास ल्हानाः बिस्युं वं पि, गुलि न्ह्योने वयाः स्वागत सत्कार याः वयाच्चं पि, गुलि अपरिचित जुयाः थीथी हालाच्चं पि-- थुजाःगु थासय् नागराजपित थःथह्य थःगु परिचय बियाच्चन--

‘भो नागगणपि ! जि श्रीस्वयम्भू महाचैत्यया भक्त जुयाचवनाम्ह शान्तश्री गुरुया आज्ञां
 अनावृष्टि शान्त याय्या लागी कर्कोटक नागराजा ववना यनेत थन वयाम्ह खः ।’ थुलि धयाः
 शान्तिकरया शिष्य गुणकामदेव राजा अन्तःपुरय् दुहांवनाः स्वःगु बेलय् सुवर्ण रत्नयागु आसनय् चवना
 नागिनीपिसं चाःहुइकाचव्ह कर्कोटक नागराजायात खनाः ह्यसिइका सम्बोधन यानाः धाल— ‘भो
 नागेन्द्र कर्कोटक ! जि गुरुया आज्ञां वयाह्यप्रति प्रशन्न जुइमाल । थुगु जनअगोचरगु महादुर्गमगु थ्व
 अन्तःपुरय् वयाह्य जिगु अपराध दुसा क्षमा यानाविज्याहुँ । मन्त्रदूतं सःताहःगुलि च्याह्य नागराजापि
 उपस्थित जुयाचवने धुंकल, छःपि छहा जक विस्तार याना चवंगुलि गुरुं जितः नाप ववनाहति धकाः
 छवयाहःगु खः । तदर्थ अविलम्बपूर्वक लोकोपकारया लागी याकनं विज्याहुँ, लोक उद्धार याय्
 कारणय् मञ्जुश्री गुरुं छःपित थन वासं वियाथकल, आः थुगु महामेघसाधन जुयाचवंगु शुभकार्यस
 छाया विमुख जुया विज्याय्गु ? शान्तश्री गुरुं छःपित पूजा याय्त सुभिक्ष याय्त निमन्त्रणा छवयाहःगु
 थ्व छःपिसं स्यूगु हे खँ खः । उकि अविलम्ब स्वयम्भू क्षेत्रय् विज्याय्माल ।’ थथे जिद्दी यानाः
 हालाचवंगु न्यनाः कर्कोटक ऊं हे मछालाः ववच्छुनाः ‘धक्कार धक्कार जि विरूपम्ह !’ धकाः मतिइ
 तयाः न्वँमवासे सुम्क चवंचवन । सुम्क चवंचवंगु खनाः राजां पुनः प्रार्थना यात— ‘हे महाभाग्यमानि !
 प्रशन्न जुयाः दना विज्याहुँ, जवरजस्ति याय् माय्के मते ।’ थथे धाल नं मौन धारण यानाचवंगुलि
 नागिनीनं प्रार्थना यात— ‘भो उत्तरसाधक नरेन्द्र ! थ्व जिम्ह स्वामि न्वँमवासे चवनेगु वया
 स्वभाव हे । स्वभाव धइगु लंघना याय् थाकु । न्हापा नं जगद्गुरु मञ्जुश्रीनं आपालं ह्येकल, बोध
 यात, अथे नं थवं न्वँमवासेचवंगु स्वयाः थः नं न्वँमवासे विज्यात । छःपिनिगु आराधना स्वीकार
 मयाःगु कारण छु धाःसा विरूप जूगुलि लज्याचायाः जक मवःगु खः, परन्तु धन दुगुलि, अवसर
 वःगुलि, बल दुगुलि अभिमान व क्रोधं मवःगु मखु । उकि छःपिसं ह्येकाः आदरपूर्वक ववना यंकि ।’
 थुखे थः स्वामिजुयात नं विनम्र भावं धाल— ‘भो प्रिय स्वामि ! आदर तयाः सःतःवसेलि निश्चय नं
 विज्याय्माः । दैवया अधीन जुयाचवंगु लोकय् विरूप जुल धकाः छुया मछालेगु ? शान्तश्री गुरु कोप
 जूगुलि छःपिनि छयं स्याःगु ल्वय् दत । हानं मिचाहाः जुयाः विस्तार यानाचवन धाःसा अवश्यं
 कल्याण जुइमखु, ऊं तच्चोगु संकष्ट जुइका चवनेमाली । उकिइसं जगतहित जुइगु महान् शुभकार्यय्
 बिघ्नकारक कोपि थहरय् जुइ । लोकय् नं उपहास जुइ । महापुरुषपि तंचाय्कागुलि थःगु जीवन नं
 अवश्यं विनाश जुइ, अतःएव आदर सत्कार तयाः सःतःवःम्ह शान्तश्रीया अग्रदूतनापं विज्याहुँ । थ्व
 संसारय् ज्ञानगुण जक हे ज्येष्ठ जुइ सिवाय् रूप ज्येष्ठ जुइमखु । तुयूगु सुपांय् स्वयाः नं हाकूगु वर्णगु
 सुपांय्यात लोकं पत्यार याइ । अथे हे उगू नागपरिषद् मण्डपय् छःपित हे अधिक पूजा सत्कार याइ,
 थुकिइ शंका मकासे सहर्षपूर्वक विज्याहुँ ।’ थःम्ह स्त्रीनं यथार्थ विन्तिभाव यात नं थःगु हे तालं
 न्वँमवासे चवनाः सुन्दर रूप धारण यानाचवंगु पासापि जक लुमंकाः थःगु रूपयात थःथम्हंतुं निन्दा
 यानाचवन । थथे न्वँमवासे मूर्ख जुयाः ववच्छुनाचव्हसित उत्तरसाधकं ‘अरे मूर्ख ? मूर्ख धइम्हसिया
 न्वँमवासे चवनेगु हे तःधंगु बल जुयाचवन खनी, आः जि छंत नागराज धकाः श्रद्धा तयाचवने
 फइमखु ।’ धयाकथं काचाक्क कर्कोटकयागु चसु ज्वनाः सिंहासनं ववफात । उगु अन्तिम समयय्

नागराजं धाल-- 'हे वीर नरेन्द्र ! जिमिगु परिषद्मण्डप मध्यंतरे जितः गलः त्वपुयाः क्वच्छुकाः
 ब्वना यँकि, सम्पूर्ण दुःख खुनु याउँसे च्वनी; तर लज्या शर्म दुःख धइगु सिनातुल्य, तस्सकं सहयाय्
 थाकु ।' थुलि नागराजयागु खँ न्यनाः राजां हतपतं उगु दहलं थतह्याः भूमियागु मार्गं ब्वनाहल,
 थुगु लँपुयात वशिकाचल [ताहाचल] धकाः धयातल । राजां कर्कोटकयात नापं ब्वनाः शान्तिपुरय्
 दुने गुरु शान्तश्री आचार्यया आश्रम क्वस्सं कर्कोटकयात पयतुकल ।

उगु शुभमुहूर्तय् नवनागराजापि सकलें उपस्थित जुसँलि महामेघसाधन प्रक्रियाय् छु तक
 जुइमाःगु खः उगु तक सम्पूर्ण विधि सुसम्पन्न जुल । थुगु महामेघमण्डल साधन क्रिया सिद्ध जुसँलि
 सकभनं सुवृष्टि जुयाः देसय् सुभिक्ष जुल । सेसाह्या वधय् जुयाः समस्त प्रजागणपित उलि थुलि
 मदय्क हर्ष आनन्द अनुभव जुल । तत्क्षणय् विचक्षण जुयाच्चंहा दूरदर्शी आचार्य शान्तश्री गुरुं पुनः
 भविष्यत् कालय् जुइगु अनावृष्टि दोष निवारणया लागी छु उपाय या सा जल वृष्टि जुइ धकाः कर्कोटक
 नागराजायाके प्रश्न यात-- 'थन जगद्गुरु मञ्जुश्रीनं छःपित जलाधिकार प्रदान यानावन । लः
 धइगु सेसाह्याया वास जुयाच्चन । सेसाह्यां यानाः शस्यसम्पत्ति [अन्नवस्तु] दइ, गुकि यानाः प्राणि-
 पिनिगु प्राण रक्षा जुयाः सुखं जीविका जूगुलि भक्तिनिश्चय उत्पन्न जुयाः सद्धर्म वृद्धि जुइ, सद्धर्म
 वृद्धि जूगुलि भुक्ति मुक्ति प्राप्त जुइ-- थुलिया कारणं मञ्जुश्री गुरुं छःपित थन वासं तयाथकल ।
 जल वृष्टि कारणय् विशेष वरदान स्वरूप जुयाच्चं पि छःपिसं लोक उपकारया लागी न्हूगु उपाय बिया
 थकि ।' धाःगु शान्तश्री गुरुयागु वचन न्यनाः नागराजपिनि सरसल्हा जुल । उगु सल्हानुसार अनावृष्टि
 दोष हरण जुयाः सुवृष्टि जुइगु उपाय कुशल ज्ञान विधान विश्वासपूर्वक कनावसँलि शान्तश्री आचार्य
 नागराजापिनिगु मूर्ति विधिपूर्वक च्वयाः पुरश्चरण सहित दशकर्म खंकाः जीवन्त्यास तयाः पूजा यात ।
 नापं निमन्त्रित नागराजपित नं सन्तोषजनक रूपं स्वागत यानाः क्षमा पवनाः सभा विसर्जन याःगु
 जुल ।

उगु महान् उपलक्षय् जूगु सम्पूर्ण विधानय् नागराजापिसं धाःगु दु- थुजाःगु प्रकारया हानं
 हानं महामेघमण्डल पूजोत्सव जुइवलय् जिपि उपस्थित जूवय् धकाः आत्मसात् शपथग्रहण यानाः
 उत्साहपूर्वक विचित्र सुन्दर मेघमाला उत्पत्ति यानाः उच्चघोष पिकयाः आनन्दं थःथःपिनिगु नाग
 भवनय् लिहांवन ।

जलाधिपति नागराजापि लिहांवने धुंकाः गुणकामदेव राजां थःगुरु शान्तश्रीयात स्तोत्र
 यानाः थथे धाःगु दु-- 'छःपि सिद्धमन्त्र मूर्ति जुयाच्चंहा देवनागयक्ष वशय् तय्फुहा चिन्तामणि थःगु
 अधिकारय् दुहासित जि छु दक्षिणा चह्यय् याय् ? छलपोलयात जिगु राज्य हे दोहलपा बिल धाःसां
 लायक जुइमखु । त्रिभुवन हे छःपिनिगु मन्त्रया अधिनय् लानाच्चन धासँलि हानं जि छःपिनि दास हे
 जुइ धाःसां उचित मजू, गुहासिया जा सिद्धगणपि हे अनुचर जुयाच्चन धाःसा केवल छःपिनिगु न्होने
 अन्तस्करणनिसें चित्त-स्वां ह्यकाः श्रद्धाभक्ति तयाः क्पिति ज्वरय् यानाः, सुविनीतपूर्वक शिर
 क्वच्छुइगु थुलि जक जि खना ।' थुलि धयाः साष्टांग प्रणाम यात । शान्तसुचरित्रं विनम्र जूहा
 शिष्ययात गुरु शान्तश्री आचार्य शुभआशीर्वाद बियाः धाल-- 'आः छंगु मनसुवा पूर्ण जुल शुद्धचित्त

जुयाः श्रीस्वयम्भू धर्मधातु महाचैत्ययागु भक्ति यानाः धर्म राज्य चल्य यानाः प्रजागणपित, प्रतिपाल याना च्वँ, श्व हे जितः दक्षिणा संक्य जुयाच्चने ।'

भक्तिपूर्वक अभिवादन यानाः 'धन्य धन्य वसपोल सद्गुरुयागु अपार महिमा !' धकाः गुणानु- स्मरण यानाः हार्दिक अनुमोदन यासे विदा कयाः निरुपद्रवगु शान्तगु थःगु देसय उत्साहपूर्वक लिहांवयाः गुरुयागु आज्ञानुसार प्रशासन चल्य यानाच्चन । थःगु शरीर ज्याथः जुसेलि राजकुमार नरेन्द्रदेवयात शुभराज्याभिषेक वियाः श्रीस्वयम्भू धर्मधातु महाचैत्ययाथाय वनाः चित्त समाधान यानाः राजर्षि- जीवन वित्य यानाः अन्तय जीवन-मुक्त जुयावन ।

थथे सकल उपद्रव शान्त यानाः व्यूगु जूया निर्मित शान्तश्री गुरु शान्तिकराचार्य धइगु नामं लोकय प्रसिद्ध जुल । श्व हे शान्तिकराचार्य सिद्ध जूगु स्थान जूया निर्मित उबलय निसे थौतक नं शान्तिपुर धइगु नां प्रसिद्ध जुयाच्चन ।

शाक्यमुनि तथागत आगमन

शाक्यमुनि बुद्ध जुइ न्ह्यो प्राणिपिनिगु हितसुख शान्तिया लागी वसपोलं असंख्य स्वंगू कल्पवर्ष पर्यन्त अनेक बोधिसत्व जीवनय् अनेक पारमिताचर्या चल्य यांनाः अचिन्त्य बोधिसम्भार पुरय् यांनाबिज्याःगु अपरिमित पुण्यया प्रभावं अन्तय् तुषिता भुवनय् श्वेतुकेतु बोधिसत्व धाय्काः जन्म जुल । थन हे च्वनाः वसपोलं पञ्चमहाविलोकन [देस, काल, परिस्थिति] बिचाः यांनाः मर्त्यमण्डलय् जम्बुद्वीपय् सद्धर्म शासन लोप जुल, इमित हितसुख निम्ति सुधार व उद्धार याय्गु समय जुल धकाः महशूस यांनाः अनागत बुद्ध आर्य मैत्रेय बोधिसत्वयात थःगु सिंहासन लःल्हानाः कपिलवस्तु महानगरय् शाक्यकुलय् शुद्धोदन महाराजया धर्मपत्नी महामायादेवीया पवित्र गर्भ लुम्बिनी बनय् स्वांयापुन्ही-खुनु जन्म जूवल । क्रमशः बयस जायावसेलि लिपिशालाय् वनाः चतुषष्ठी प्रकारया लिपि सय्काः दर्शनशालाय् च्वनाः चतुषष्ठी कला चमत्कार क्यनाः जशोधरा कन्या विवाह यात । छन्हू अनित्य संसार खनाः बैराग उत्पन्न जुया चाःह्यवंबले चतुर्महानिमित्त खनाः दुःख रहितगु शान्त निर्वाण अनुत्तर बोधि अनुसन्धान निम्ति छन्हू चाया रात्रीस सम्पूर्ण राज्य वैभव परित्याग यांनाः महाभि-निष्क्रमण जुयाः तपोवन बिज्यात । गुबलय् वसपोलं आनोमा नदी पार तरय् यांनाः स्वयं चूडाकर्म यांनाः नैरञ्जना नदीया किनारय् च्वनाः ६ दँ तक घोर दुष्कर चर्या यांनाः तपस्या यात । लिपतय् अश्वत्थ वृक्षमूलय् च्वनाः अनुत्तर सम्यक संबोधिज्ञान प्राप्त यांनाः सम्पूर्ण कृष्णवन्धुया अनन्तकोटि मारसैन्ययात दमन यांनाः मारजित् लोकजित् धाय्काः सम्यक्सम्बुद्ध जुल । प्राप्त जूगु सम्यक संबोधिज्ञान प्रचारया निम्ति महाकारुणिक वसपोल बुद्ध बोधिवृक्षमूलय् दनाः ऋषिपत्तन मृगदावनय् सर्वप्रथम धर्मचक्र प्रवर्त्तन यांना बिज्याय् धुंकाः पुनः बहुजन हितसुखया लागी देसदेसान्तर भ्रमण यांनाः धर्मोपदेश यांनाबिज्यात । गुगु समयय् दिवङ्गत स्वर्गीय थः जन्मदातृ मां महामायादेवीयागु अनन्तोपकार गुणानुस्मरण यांनाः तुषिता भुवनय् बिज्यानाः धर्मोपदेश यांनाः ६८ ख्वीच्यागूलाख योजन प्रमाणं विस्तार जुयाच्चंगु दिव्य सोपानं क्वहांबिज्यानाः असंख्य देवपुत्रगणपिसं लँ स्वय्काः इन्द्र छत्रं कुइकाः संकाश्यनगरय् अवतरित जुयाबिज्यात । थुगु प्रकारं धर्मोपदेश यांनाजूगु स्वय्

मफयाच्चंपि आपालं तीर्थिकवादीजननाप शास्त्रार्थ यानाः दिव्य प्रातिहार्यं क्यनाः आपालं लोकपित
बोध यानाः विज्यानाः लि थः पिता महाराज शुद्धोदन नापलायत कपिलवस्तु महानगर्य् थ्यंकः-
विज्यात- गुगु वखतय् वसपोल वादीसिंह शाक्यमुनि बुद्धयागु सम्मानया लागी सहापति महाब्रह्मा,
त्रिष्णु, महेश्वरादि, इन्द्र, यम, वरुण, कुबेर, लक्ष्मी, सरस्वती आदि असंख्य लावालस्कर वयाः
अभूतपूर्व नक्सां लुम्बिनी वनय् थ्यंकाः धुमधामं स्वागत समारोह जुल^१ । थुगु सिलसिलाय् विपश्ची
आदि अतीत बुद्धपि विज्याः गु पूर्व घटना लुमंकाः थः शिष्य शालिपुत्र मौद्गल्यायन एवं आनन्द भिक्षु
प्रभृति नापं व्वनाः श्रीस्वयम्भू धर्मधातु महाचैत्य दर्शनार्थ काठमाण्डू उपत्यकाय् शुभागमन जुल^२ ।

थुगु समयय् काठमाण्डू उपत्यकाय् दुने किराती राजा हुमति [जितेदस्ति] राज्य चल्य
यानाच्चन । शाक्यमुनि बुद्ध उपत्यकाय् दुने विज्यानाः किण्डोलय् छुं समय विश्राम यानाः थनं सरासर
गिरिवर साम्हेगु पर्वत थहांवनाः स्वयम्भूयागु अतीत गौरव स्मरण यानाः श्रीस्वयम्भू महाचैत्ययात
श्रद्धापूर्वक त्रिप्रदक्षिणा यानाः स्तोत्र यात :-

वन्देऽहं तत्त्वरूपं ततविततभवं भव्यहव्य स्वभावं
बुद्धानामादिबुद्धं कृतविविधहितं तेजसां सन्निधानम् । १।
सम्यक्संबोधिमूर्ति त्रिगुणविलसितं ज्ञानपंचैकहेतुं
नेराकारं निरञ्जं गगनवदनिशं चित्तचैतन्यचैत्यम् । २।
ज्योतिरूपे त्वदीये विनिलयमना दानशीलक्षमासु
वोर्यध्यानाख्यप्रज्ञोऽधिकृततरणो मणिचूडेसुजातौ । ३।
बोधिप्राप्तोऽस्मि चास्मिन्सकलपुरवरे चाकनिष्ठे
महिम्नि वन्दे त्वां विश्वरूपं स्फटिकमणिरिवोपात्तनानाप्रभेदम् । ४।
नानावेध्य सुपूज्योपकरण मनिशं ढौकितं सर्वलोकैः
किंवाह ढौकियिष्ये त्वदनुलयमना स्त्यक्तराज्यादिद्रव्यम् । ५।
जातौ जातौ चजातौ कृतमुक्ततचयं कायवाङ्मानस्वैस्तैः
तत्सर्वं ढौकियिष्ये निजतनुसहितं संगृहाणाशु बुद्ध । ६।
एकं युगं तृतीयं युगलयुगलयो पंचमं षष्ठसंज्ञं सप्ताष्टौ
वै नवाख्यं दशममथ तथैकादशं द्वादशाख्यम् । ७।
त्रयोदश्यं चतुर्दश्यं तथ शरकुश्चैकत
सप्रसूत आनन्त्यं त्वत्तएवं जगदखिलमभूत्वां नमे चैकरूपम् । ८।
एकं वैरोचनाख्यं द्वितयमपि जिनं बुद्धमक्षोभ्य संज्ञं
रत्नादयं सनवन्तं त्रितयममितरुक्संज्ञं तूर्यसंस्थम् । ९।

१- पं. निष्ठानन्दद्वारा अनुदित ललितविस्तर

२- स्वायम्भू पुराण, पृ. ७४

पंचारव्यामोघसिद्धि तदनु च जगति ख्यातसंख्यादयसंख्यं
देवा दैत्याश्च मर्त्या भवदवयजाः सर्वदाहं नतीऽस्मि । १० ।

स्वयम्भू धर्मधातु छलपोल तत्त्वरूप जुयाः व्याप्तरूपं उत्पत्ति जूहा कल्याण हव्यस्वरूपहा
बुद्धपिनि आदिबुद्ध नामाप्रकारं हितयाःहा तेजया खानी सम्यक संबोधिया मूर्ति स्वंगु गुणय् विलास
जूहा, पञ्चज्ञानया कारणहा निरंजन निराकार आकाश सरिकाहा सदां चित्त चैतन्य चैत्य स्वरूपहा-
यात नमस्कार । छःपि ज्योतिरूपयाके लोन जुइगु मतिइ तयाः मणिचूडया जन्मय् षट्पारमितादिया
समुद्र तरय् यानाः आः थ्व सकलपुर मध्यय् उत्तमगु अकनिष्ठ भुवन थें जाःगुलिइ जि बोधि प्राप्त
यानाः छलपोल तकरया भेदं अनेक किसिम जूगु फटिकमणि थें विश्वरूप जुयाविज्याःहायात
नमस्कार । छलपोलयात सकल लोकं अनेक विधि उत्तम उपचार सदां पूजा यात, जि छलपोलयाके
लीन जुइगु मतिइ तयाः सम्पूर्ण राज्य आदि द्रव्य तोताः वयाहासिनं छु दोहलपे ? जि जन्म जन्म
पतिकं काय वाक् चित्तं पुण्य संहह यानागु गुलि दु थ्व सकतां जिगु शरीर समेत दोहलपा, छःपिसं
याकनं ग्रहण यानाकया विज्याहुं । छगू निगू स्वंगू आदि किन्यागू रूप छःपि छहासिके उत्पत्ति जुल,
छःपिके अन्त मदय्क थ्व जगत दत्त । थजाःम्ह एकरूपयात जिगु नमस्कार । छम्हम्ह वैरोचन, निम्हम्ह
अक्षोभ्य, स्वम्हम्ह रत्नसंभव, प्यम्हम्ह अमिताभ एवं न्याम्हम्ह अमोघसिद्धि; थनंलि जगत असंख्य
देव दैत्य मनुष्य आदि छःपिनिगु शरीरं दइवल, थजाःम्ह छलपोलयात सदाकालं जिगु नमस्कार ।

थुगु पवित्र पुण्यभूमि सुन्दरगु जंगलयागु दृश्य खनाः अतीतयागु गौरव स्मरण यानास्वयाः
भिक्षुगणपित सम्बोधन यानाः धाल- 'थुगु स्थानय् स्वयम्भू दर्शनार्थ जि' न्हय्गु जन्मय् न्हय्कः तक
वय् धुन, थ्व वनयागु प्रतिभा नं न्हय्गु हे किसिमं जि खनागु जुल ।' थनंलि स्वयम्भूया पश्चिम
मञ्जुश्री स्मृति चैत्यया नं पूर्वपाखे च्वंगु पुच्छाग्र पर्वस्थानय् च्वनाः वादोसिंह तथागत शाक्यमुनि
स्वयम्भू महाचैत्य उत्पन्न जुयावंगु विशेष व्याख्यान नेपाल महात्म्य [स्वायम्भू पुराण] प्रकाश
यानाविज्यात । शाक्यमुनि बुद्धं नेपालय् विज्यानाः १३५० क्रिस्वसःत्या शिष्यपि दय्काः मञ्जुश्री
स्मृति चैत्य व नैरात्मा गुह्येश्वरी दर्शन यानाः लिहांविज्यात ।

इतिहासकारतय्गु धापू अनुसारं— शाक्यमुनि बुद्ध थनं सरासर नालापाखेयागु लंपु जुयाः
सुवर्णभूमि पर्वत नमुराय् [नमोबुद्ध] प्रस्थान जुल । थुगु पवित्र पुण्यभूमिस थ्यंकाः पूर्वानुस्मरण ज्ञान
लुमंका स्वयाः गुगु थासय् अतीत कालय् थःम्हं महासत्त्वयागु जीवनकालय् धुंयात ला घ्यनाः नकूगु
खंयात ध्यानय् तयाः थुगु तपोभूमि वनखण्डया छगू दोमारयात खनाः बुद्धं स्वयं त्रि-प्रदक्षिणां
यानाविज्यात ।

थथे बुद्धं प्रदक्षिणा यासे वन्दना याःगु खनाः शालिपुत्र भिक्षुं अभिवादनपूर्वक 'भो शास्ता
मुनोन्द्र ! थुगु छगू साधारण किंचित् दोमारयात छाया छलपोलं नमस्कार यानागु ?' धकाः न्यंगुया

१- स्वायम्भू पुराण

२- ललितविस्तर, निष्ठानन्द वज्राचार्य ।

लिसलय् आज्ञा जुल- 'खः थुगु थासय् च्वनाः न्हापा जि महासत्व धाय्काः जन्म जुयावलय् तस्सकं करुणा चाइपुसे च्वंम्ह धुंयात थःगु ला थःम्हं ध्यनाः नकागु, इमिगु आत्मसन्तोष यानाः बोधिचर्याव्रत चलय् यानागु सिद्धभूमि खः ।' नापं शिष्यपित प्रतीत याके कारणय् पूर्णतया श्रद्धा निश्चय उत्पन्न याकेया निम्ति अनुकम्पा तसे शाक्यमुनि बुद्धं मुसुहुं न्हिलाः उगु सिद्धभूमिस थःगु पाल्हातं दायाः क्यन, तत्क्षणय् उगु भूमि बुद्धानुभावं बै चर्कय् जुयावनाः अन दुने साक्षात् महासत्वयागु शरीरया कंलाय् न्हाय्कनय् दुने स्वय् थें छर्लंग खनेदत, गुगु कि सुवर्ण वर्णगु अवशेष जुगांजुग तक सुरक्षित जुयाच्वंगु खनाः सकल दर्शक एवं शिष्यवर्गपिसं बांलाक श्रद्धाभक्ति तयाः दर्शन व पूजन यात ।

थुगु पवित्रगु महासत्वयागु अस्थिधातु स्वागत सत्कार निम्ति आयुष्मान शालिपुत्रया अबुजुं थुगु स्थानय् यथोचित प्रमाणं सुन्दर चैत्य निर्माण यानाविल । थुगु पुण्यभूमियात शाक्यमुनि बुद्धं हे वन्दना याःगु स्थान जूया निम्ति 'नमोबुद्ध' धइगु नामं प्रसिद्ध जुल, गुकिया अपभ्रंश रूपय् थौकन्हय् फ़ीसं 'नमुधा' धयावयाच्वनागु धाय्माल ।

शाक्यमुनि बुद्ध थुगु थामं लिहाविज्यानाः अथवा थन विज्याय् न्ह्यो सुन्दर उावन नालादेसय् छगू वर्षावास नं यानाविज्यात । मूल सर्वास्तिवाद विनयय् प्रमाणित यानातःगु दु कि गौतम बुद्धया दाजुकिजापिसं थव उपत्यकाय् आश्रय काःगु दु । हानं शिष्य आनन्द नं इमित नापलाय्त् उपत्यकात् वःगु दु । नाला व उकिया नापनापंच्वंगु पुखू व थाय् गौतम बुद्धया जीवन चरित्रनाप सम्बन्धित जुयाच्वंगु खनेदु । स्थानीय नां व बाखंत शिलालेख थें नेपालया इतिहास थुइकेत सहायक जूसा नालादेसनाप सम्बन्धित थाय्या नां बुद्धया जीवननाप सम्बन्धित जूगुलि सिइदत कि भगवान् बुद्धं नेपाल उपत्यकाय् छगू वर्षावास याःगु दु । थव नं बिल्कुल संभव जुइफु बुद्धत्व प्राप्ति न्ह्यो काठमाण्डू उपत्यकाय् छुं समय वितय् याःगु दु ? ।

मूल सर्वास्तिवाद विनयग्रन्थ थें जाःगु प्राचीन बौद्ध बाइमयस धयातःगु दु-- शाक्यमुनि बुद्धया जीवमानकालय् नेपालय् बांलाक उन्नति जुयाच्वंगु व थन प्रसिद्ध बौद्धभिक्षुपि आवागमन जुयाच्वंगु खँ महत्वसाथ वर्णन यानातःगु दु । शाक्यमुनि बुद्धया उपस्थापक भिक्षु आनन्द थःथिति नापलाय्त् नेपालय् वंगु खँ खनेदुगुलि बुद्धया प्रमुख शिष्यपि बरावर नेपाल वन जुइ । स्वयं शाक्यमुनि बुद्धया नापं आपालं वया सहचारीपि नं बल जुइ ।

'शाक्यमुनि बुद्ध नेपाल आगमन' वसपोलया जीवनया अन्तिमपाखे जूगु अनुमान खनेदु । कारण, बुद्धत्व-प्राप्ति जुइ धुंकाः लिपा मगध व गंगा-यमुनाया कछारपाखे थवसपोलयागु आपालं प्रसिद्ध जुइ धुंकाः जक हिमालय सन्निवर्ति थुगु थासय् विज्याःगु जुल । संभवतः बुद्धया थुगु आगमन इस्वी स्वयाः नं ५२० दँ न्हापा हे जुइफु ।

आनन्द भिक्षु नेपाल वःगु वारय् थथे उल्लेख यानातःगु खनेदु -- आनन्द भिक्षु थः कुटुम्बज

१- नेपाल ऋतुषी, दँ २, ल्याः ४, पृ. ८

प्राचीन नेपाल- केशरबहादुर के. सी. एम. ए.

२- नेपालकी सांस्कृतिक कहानी, पृ. ३६, ले० पशुपतिनाथ घोष

नापलाय्त् नेपालय् वल । लिहांवंवलय् आनन्द भ्रावस्ति थ्यंकःवन । अन च्वंपि भिक्षुसंघपिसं स्वागत यात । इमित आनन्दयागु अवस्था खनाः तस्सकं अपमान जुल । वइगु पालि चिकुं पुनाः तज्ज्यानाः चर्कय् जुयाच्चन । न्यासि वनेत तक नं थाकुचाःगु थें जुल ।

थुगु अवस्था खनाः पासापिसं प्रश्न यात । आनन्दं लिसः विल-- 'थःगु धर्म रक्षाया निम्ति यदि थःगु शरीर नष्ट जूसां जितः वास्ता मदु ।' छह्य वया शिष्यं पालि भभज्याःगु कारण न्यन, लिसलय् धाःगु दु-- 'नेपालय् छचाःखयरं पहाड पर्वतं चाःहूगु च्वापुया थाय्, उकिइसं खाउँगु फय् वयाच्चनीगु, खाउँगु हे लःया करना हायाच्चनीगु, ल्वहंया लँपुइ नांगागु तुति न्यासि वनेमाः; उकिं जिगु पालि भभज्याःगु खः ।' 'अन च्वंपि मनूतसें थःगु पालि रक्षाया निम्ति लाकां न्ह्याना जू । अथे जूसां छःपिसं जक छाय् मन्ह्यानागुलय् ?' धकाः न्ह्यसः न्ह्योने तल । आनन्दं न्हिनाः धाल-- 'जि गौतम बुद्धया अनुयायी खः, धर्मया रक्षाया लागी जि थःगु पालियात पर्वाह मतया ।' सकल भिक्षुपि आनन्दया जिद्दी खनाः छक्क परय् जुल । इमि थःथःपिनि लाकां न्ह्याय्गु विषयय् मतभेद जुल । थुगु विषयय् शंका समाधानया कारणय् सकले भगवान् बुद्धया आश्रमय् वनाः प्रार्थना यात ।

वसपोलं आज्ञा जुल-- 'शरीर हे धर्म याय्गु साधन खः, धर्म रक्षाया लागी शरीरया रक्षा नं अनिवार्य जुइ; अतः च्वापु व खाउँगु पाखे वचय् जुइत भिक्षु जूसा नं लाकां न्ह्याय् ज्यू ।' थ्व खँ न्यनाः भिक्षुसंघपि प्रशन्न जुल ।

स्वयम्भू गोपुच्छाग्र पर्वतस मैत्रेय बोधिसत्त्वया उपस्थिति

स्वयम्भू महाचैत्य दर्शन याया निमित्त शाक्यमुनि बुद्ध नेपालय् विज्यानाः स्वयम्भू पर्व-
स्थानय् लिउनेसंच्वंगु गोपुच्छाग्र पर्वतय् च्वनाः स्वयम्भू उत्पत्ति जूगु विषयय् सद्धर्म कथा व्याख्यान
यानाविज्यात । थुगु व्याख्यान याय् न्ह्यो बुद्धिमान जुयाच्चंहा अनागत बुद्ध आर्य मैत्रेय बोधिसत्त्वं
उपस्थित सभापदपिनिगु अभिलाषा थुइकाः शाक्यमुनि बुद्धया अभिमुखय् च्वनाः सुविनीतपूर्वक प्रार्थना
याःगु अनुसारं स्वयम्भू महाचैत्ययागु विशेष महात्म्य कनाविज्यात ।

अथ धीमान्महासत्त्वो मैत्रेयःस जिनात्मजः ।

भगवन्तं पुनर्नत्वा साञ्जलिखे मब्रवीत् ॥

भगवच्छ्रोतुमिच्छामि स्वयम्भूत्पत्ति सत्कथाम् ।

तद्भवान्समुपाख्यातु लोकानां संप्रबोधने ॥

थुगु सभामण्डपय् भिक्षु, श्रामणेर, ब्रह्मचारी, ब्रतीजन, उपासकोपासिका एवं सिद्ध विद्याधर,
यक्ष, गन्धर्व, किन्नर, ऋषि, ब्राह्मण, अतिथि तपस्वी, तीर्थिक, दिगम्बर तथा राजा, क्षेत्रो, अमात्य
मन्त्री, शिल्पी, वणिक् सार्थवाहु एवं ग्रामीण देसवासी आदि श्रोतागणपि उपस्थित जुयाच्चन ।

थुजाःगु सभामण्डलय् मैत्रेय बोधिसत्त्वं पुनः श्रोतागणपिनिगु आश्रय थुइकाः 'स्वयम्भू
महाचैत्ययात सेवाभक्ति यानागुया पुण्य प्रशंसा कनाविज्याहुँ ।' धकाः अध्येषण यात । थुगु प्रार्थना-
यात सहर्ष स्वीकार यासे विविध पूजोपकरण चह्य् यानागुया पुण्यफल कनाविल ।

स्वयम्भू महाचैत्यप्रति गुह्यसिनं श्रद्धा भक्ति निश्चय तथाः वन्दना, पूजन, देशन, अनुमोदन एवं
अध्येषण, याचना व बोधिपरीपना नापं अर्घ, पाद्य, पुष्प, धूप, दीप, गन्ध, रस, नैवेद्य, फलमूल,

तथा छत्र, ध्वज, पताः, चामर, उखेर, चीवरवस्त्र दोहलपाः प्रदक्षिणा, दण्डवत् यानाः स्तोत्र, पाठ, धारिणी, गाथा, सूत्र, मन्त्र च्वनाः योग, ध्यान, समाधिश्च च्वनाः पुरश्चरण आदि साधना याइ अथवा वाद्य, गीत, नृत्यद्वारा स्वागत यासे विधि पूजोपहार पाखे स्वयम्भूया सेवा भक्ति प्रस्तुत याइ इमित निश्चय नं उगु पुण्यया प्रभावं यथायोग्य प्रमाणं पुण्यफल प्राप्त जुइ धइगु वर्णन यानातःगु दु^१ ।

थुगु गोपुच्छाग्र पर्वतय् च्वनाः शाक्यमुनि बुद्धं स्वयम्भू महाचैत्ययागु विषयय् धर्म व्याख्यान यानाविज्याःगु पवित्रस्थान जुया निमित्त थुगु स्थान धर्मचक्र महाविहार धइगु नामं प्रसिद्ध जुल ।

धयातःगु दु^२— श्वसपोल मैत्रेय बोधिसत्व शाक्यमुनि बुद्धयागु शासन अन्त जुइ धुंकाः प्राणिपिसं नमोबुद्धाय तक नं धाय् मफयाः धर्मान्ध जुयाः अश्वकल्प जुइगु समयय् कलीया अन्त्यय् घोर अत्याचार जुइबल्य् मनुष्यपिनि परमायु च्यादं तक जुइगु अवस्थाय् आर्य मैत्रेय बोधिसत्व जगतोद्धारया लागी जम्बुद्वीपय् अवतार काः विज्याइ । बौद्धजनपिनि परम्परा विश्वासकथं श्वसपोल मैत्रेय बोधिसत्व वर्तमान तुषिता भुवनय् विज्यानाच्वन । आपालं गुणया खानो जुयाः केतुमती सहरय् विप्रवंशय् जन्म जुयाः नागवृक्षमूलय् च्वनाः अनुत्तर सम्यक संबोधिज्ञान प्राप्त यानाः सम्यक संबुद्ध धाय्काः मार जितय् यानाः जगतोद्धार यानाविज्याइ । शाक्यमुनि बुद्ध श्वेतुकेतु बोधिसत्व जुयाच्वंबल्य् मर्त्यमण्डलय् अवतार काः विज्याय् न्ह्यो श्वसपोलयात तुषिता भुवनय् १०८ सच्छि व च्यागु धर्मांलोक मुख परिवर्त्त नामक धर्मचक्र प्रवर्तन यानाविज्याःगु दु^३ ।

१— स्वायम्भू पुराणया द्वितीय अध्यायय् थुकिया विषयय् बांलाक वर्णन यानातःगु दु ।

२— सुगतावदानया प्रमाणानुसार

३— ललितविस्तर

आरण्यवासी चूडा भिक्षुणीया स्वयम्भू महाचैत्य-सेवा भक्ति

स्वयम्भू पर्वस्थानया लिउनेसंच्वंगु मञ्जुश्री पर्वस्थानय् आरण्यवासी जुयाः प्रवज्या लाभ यानाः शुद्धशीला जुयाच्चंहा चूडा नाम भिक्षुणीनं नित्य अखण्ड श्रीस्वयम्भू धर्मधातु वागीश्वर महाचैत्ययाथाय् सुगघर सफा यानाः बँपुनाः क्वय् दहलय् च्वंगु निर्मल जल ह्याः यच्चुसे च्वंक सिलाः व हे दहलय् ह्याच्चंगु पलेस्वां चढय् यानाः सेवा भक्ति यानाच्चन । थुगु हे प्रकारं मञ्जुश्री स्मृति चैत्यया नं सेवा भक्ति यानाच्चन^१ ।

शाक्यमुनि बुद्ध स्वयम्भू गोपुच्छगिरि पर्वतय् विज्याःगु समयय् ब्रह्मचारिणी चूडा भिक्षुणीनं आदरपूर्वक लिख्यचाय्काः स्तोत्र यात । उगु समयय् मैत्रेय बोधिसत्व आदि उपस्थित शिष्यवर्गपिनिगु सन्मुखय् चूडा भिक्षुणीयागु ख्वाः स्वयाः भगवानं आज्ञा जुल—

हे चूडे ! छं स्वयम्भू महाचैत्य, मञ्जुश्री स्मृति चैत्ययात आरण्यवासी जुयाः भक्तिभाव याना च्वं । थुगु पुण्यं छंत भिक्षुणी जुयाः मार्गफल्य सुप्रतिष्ठित जुयाः अन्तय् सम्पूर्ण बन्धनं मुक्त जूहा जुइ । गुलि नं स्वयम्भूया भक्ति याःवइपि श्रद्धालु भक्तजनपि दइ इपि मध्यय् नं न्हापालाक स्वयम्भू मञ्जुश्री दर्शन यानाः पूजा सत्कार याय्गु सौभाग्य छंत लाभ जुइ । थुगु आरण्यया क्वस्संच्वंगु निर्मलगु भूमि दहलय् स्नान यानाः विहारय् याय्मागु परिचर्या यानाः शुद्धगु उफोस्वां चह्लय् यानाः थःगु जीवन दत्तले आदिबुद्ध स्वयम्भूयागु सेवा याना च्वं । नवाक्षर सम्पन्न चूडा नाम धारिणी मन्त्र व्वनाः स्वयम्भू मञ्जुश्री प्रदक्षिणा याना च्वं ।^१ थुकथं शाक्यमुनि बुद्ध थःह्यं हे व्वनाः न्यंकाः आवश्यक शिक्षा वियाः चूडा भिक्षुणी^२ यात धया विज्याःगु दु— ‘थुगु स्वयम्भू महाचैत्य सेवा भक्ति यानागु पुण्यानुभावं निश्चय नं किनिदं लिपा छंत पञ्चाभिज्ञ ज्ञान लाभ जुइ ।’

१— स्वयम्भू पुराण, पृ. ७९

२— नेपाःया बुद्धधर्मया इतिहासय् सर्वप्रथम चूडाकर्म जूगु स्थान वाक्यद्वार तीर्थ प्रसिद्ध जुयाच्चन, गन च्वनाः कि

ऋकुच्छन्द तथागतं गुण ध्वज ब्राह्मण व अभयन्दद क्षेत्रीपित चूडाकर्म याताः बुद्धशासनय् दीक्षित यात । अथे हे नेपालय् गुलि नं स्त्री जातिपिं ब्रह्मचारिणी, अनागारिका तथा भिक्षुणी जूपि मध्यय् दववसिबय् न्हापां भिक्षुणी जूह्य थ्व हे चूडा भिक्षुणी धाइ । अतः नेपाःया बुद्धधर्मया इतिहासय् थ्वय्कःयागु छगू विशेषता दुगुलि याताः लिपायापि कुशल कलाकारपिसं चूडा भिक्षुणीयागु छगू प्रस्तर मूर्ति दय्काः स्वयम्भू क्षेत्रय् स्थापना यानाव्यूगु खनेदु । [थ्व खँ राष्ट्रिय अभिलेखालय, तृ ६४१ नं, धारणी संग्रह, पृ. २०२ उल्लेख जूगु दु ।]

थौं उगु सुन्दर कलापूर्ण चूडा भिक्षुणीयागु प्रस्तर मूर्ति स्वयम्भू क्षेत्रय् गनं खने मदय् धुंकल । सत्यादं न्ह्यो ललितपुर महाबुद्धया पण्डित अमृतानन्द शाक्यजुं चव्यावंगु राष्ट्रिय अभिलेखालय स्थित तृ ६६२ नं. धर्मकोश नामक पुस्तकय् स्वयम्भू क्षेत्रया मूर्ति तय्गु वर्णन यानातःगु ऊवलय् प्रसंगवश चूडा भिक्षुणीयागु मूर्तियागु विवरण बियातःगु जुयाच्वन :—

एकाश्या द्विभुजा मुण्डिता कुञ्चितकेशा काषायनिवसना दक्षेवरदमुद्रा वामे चीवरकर्णिका इत्यादि ।

हारिती महायक्षणीया स्वयम्भू महाचैत्य सेवा

शाक्यमुनि बुद्धं गोपुच्छ पर्वतय् च्वनाः श्रीस्वयम्भू महाचैत्य महात्म्य विषय्य व्याख्यान याना विज्यानाच्चन । उगु समय्य पाञ्चिक महायक्षया कलाः हारिती महायक्षणी तुप्लुक्क न्होने थ्यंकःवल । अन स्वयम्भू महात्म्य व्याख्यान सिधय्काः हारिती महायक्षणीनं सर्वज्ञ शाक्यमुनिया चरण कमल्य भवपुयाः प्रार्थना यात--

‘भो शास्ता मुनीन्द्र ! जि नं छःपिनाप स्वयम्भू महाचैत्य दर्शन व सेवाया निम्ति वयाच्चनाह्य, आः जि थुगु सुन्दर उपवन्य च्वनाः स्वयम्भू महाचैत्य, सद्गुरु मञ्जुश्री एवं शान्तिकर आचार्यया सेवा याय्या निम्ति व बुद्धशासन रक्षा याय्या कारण्य जि सदां थन च्वनेगु महान् अभिलाषा जुल । अतःएव, छलपोलं जितः वचन वियाविज्याहुँ ।’ थुलि हारिती महायक्षणीयागु प्रार्थना न्यनाः भगवान् बुद्धं आज्ञा प्रशन्न जुल-- ‘हे वत्से ! छं थुगु महान् उत्तमगु पुण्य क्षेत्र्य साह्यगुं विहार्य च्वनाः बुद्धशासनया संरक्षिका जुयाः वालवालिकापित दया माया तथाः रक्षा याना च्वं, तर छं न्हापा थें मत्सरी जुयाः उईं स्वभाव पिकयाः उख्यें थुख्यें व्वांव्वां जुयाः विना कारण्य भय त्राश वियाः कर्किगु जिव्य तातुनाः सनाः हालाः जूह्यायात जि दमन यानाविया । छं थःपुतायाके गुलि माया प्रीति दु उलि हे कर्पिनि मस्तय्त नं दया मायां लालन पोषण याना तथातइ । आवलि छं न्हापा थें जिगु शासन्य द्वेष तथाः कलङ्क याय् मते । स्वयम्भूयात चह्ल्य याःगु भाग पिण्डपात्र भोजन यानाः पञ्चदशशत^१ परिवारपिनि दत्थुइ महोत्सव यानाः सन्तोषं स्वयम्भू महाचैत्य भजन याना च्वं । छगु पञ्चदशशत परिवारपिनिगु लागी आहार चूलाकेया निम्ति जिगु शासन्य च्वनीपि भिक्षुसंघपिसं

१- हारिती महायक्षणीया १५०० किन्त्यासः परिवार दु धकाः पञ्चरक्षा महामायूरी अध्याय्य च्वयातःगु दुः—

पञ्चरक्षा महामायूरी परिच्छेदः —

पांचिकस्य च या भार्या श्रीहारिती नाम विश्रुता
पंचभिर्दुहिता शतैर्तिष्ठते परिवारिता ।

हारिती महायक्षणीयात भोजन प्रदान याय्गु छगू विनय प्रस्तुत याना बियागुदु । गुगु वाक्य ब्वनाः भोजन चह्ल्य् याःगुलि छंत उलि थुलि मदय्क सन्तोष जुइक भोजन प्राप्त जुइ ।' थथे धयाः आश्वासन बियाबिज्यात ।

'खतु छंगु स्वभाव न्हापा न्हि न्हि थें ५००।५०० न्यासः न्यासः मस्तय्गु प्राण हरण यानाः आपालं दुःख बियाः हाहाकार मचय् यानाः मस्तय् मांबौपित आपालं ख्वय्काः हाय्काः सनाजुल, गुलिसिनं छंत दमन याय् धकाः सन, अथे नं छुं हे वास्ता मतःगुलि लोकय् महान् उपद्रव अशान्ति मचय् जुयाच्वन । थुजाःगु प्रकारं घोर अत्याचार जुयाच्वंगु स्वय्मफयाः ब्रह्मा आदि देवतापिसं प्रार्थना याःगुलि छंत जि साह्ल्य् यानाबिया । छं तस्सकं प्राण समानं योह्य आनन्दा धइह्य म्हाय्यात पिण्डपात्रं त्वपुया तयावल्य् व मचायात लुइकेया लागी अन मथ्यं थन मथ्यं धइगु मदय्क तस्सकं विरह यानाः माःमाः जुल । समुद्र हे बुलुकाः त्रिभुवनय् चाःहुलाः सो जुल । आखरिय् जिगु न्ह्योनेसंच्वंगु सुमेरु पर्वतयासिकं ऊयातुगु पिण्डपात्र छं उलास्वय्गु समर्थ मदयाच्वंह्यायात छंत हिंसा तोतकेगु करान याकाः उगु पिण्डपात्र उलाः छं आनन्दा धइह्य म्हाय् न्ह्योने तयाबियागु जेतवन बिहारय् जूगु घटना छं लुमंनि ला ? उवलसंनिसें छं मांसभक्षण मयासे पिण्डपात्र क्षीर भोजन यानाः मचा-तय्त रक्षा याइह्य जुयाच्वन । आः थुगु थासय् च्वनाः उगु हे प्रकारं मन समाधान याना च्वं ।' थुलि स्यने कने यानाः भगवान् बुद्ध उगु थामं प्रस्थान यानावन ।

हारिती महायक्षणीनं अवलय्निसें पिण्डपात्रं संतुष्टगु चित्त जुयाः बुद्धशासन रक्षा याय्गु कारणय् स्वयम्भू स्थानया वायव्यकोण पाखे च्वनाच्वन^२ ।

पंचजामातृशतैः पंचपुत्र शतैर्वृता
पुरस्कृतस्य सानित्यं पंचभिस्तुषिका शतैः ।
विमानसर्वतोभद्रे शुचिगन्धे नगरे
पाटलिपुत्रे च वरदेशोनिवासिनी ।
एताः सर्वाश्च राक्षस्यो महर्द्धिको महाबलाः
वसन्ति देशदेशेषु पृथक्कृत्वा लयेषु च ।

२- महायानी भिक्षुपिसं थौंतक भोजन याइवल्य् हारितीयात निम्नलिखित वाक्य ब्वनाः भोजन चह्ल्य् याना वयाच्वन—

श्रावकदिनचर्या संग्रह घापा पृ. २

तिब्बती बौद्धग्रन्थय् उल्लेख जुयाच्वंगु वाक्य :—

ॐ हारिती महावज्रयक्षणी हर हर सर्वपापं भक्षी स्वाहा ।

३- हारिती स्वयम्भू महाचैत्यया लिक्क च्वनाच्वंगुया विषयय् कयाः तिब्बती बौद्ध इतिहासय् थथे धइतःगु खनेदु -

हारिती महायक्षणी स्वयम्भू महाचैत्य रक्षिका स्वरूपं धर्मपालिका जुयाच्वंह्य, स्वयम्भूप्रति गुह्येसिनं दोष व अपराध कर्म याइ उह्योसित दमन याइह्य जुयाः भक्तजनपित शान्ति पुष्टी वशी सिद्धि बियाबिज्याइह्य महा वज्रयक्षणी जुयाच्वंह्य धकाः प्रशंसा यानातल ।

स्वयम्भू महाचैत्य दर्शनार्थ सम्राट् अशोक आगमन

शान्तिनायक भगवान् बुद्ध महापरिनिर्वाण जुइ धुंकाः निसःदँ लिपा कुक्कुटाराम महाविहार्य आयुष्मान् भिक्षु उपगुत्तं धर्मासनय् विज्यानाः भारताधिपति सम्राट् अशोक महाराजयात बुद्धधर्म सम्बन्धी अनेक महत्वपूर्ण धर्म व्याख्यान यानाविज्यात । गुगु महत्वपूर्ण धर्मोपदेश श्रवणद्वारा महाराज अशोक अत्यन्त प्रभावित जुल । फलस्वरूप सम्राट् प्रियजीव अशोकं आजीवन पर्यन्त बुद्धधर्मय् दीक्षित जुल । नापनापं बौद्ध संगायन न्यायकल, भारतं पिने अन्तराष्ट्रय् नं आपालं बुद्धधर्म प्रचार यात, सम्बोधि प्राप्ति निमित्त बौद्धतीर्थ स्थान अनुत्तर पुण्यक्षेत्र दर्शन याय्गु नं अत्यन्त उत्सुक जुल ।

छन्हु उपगुप्त भिक्षु अशोक महाराजयात बौद्धतीर्थ पुण्य क्षेत्र चर्चा यायां प्रसंगवश चैत्य-कुचनायक श्रीस्वयम्भू महाचैत्य उत्पत्ति, स्थिति व आदर्शयागु विषय कयाः उपदेश न्यंका विज्यात'—

‘सत्ययुगय् वन्धुमती नगरं विपश्ची तथागत विज्यानाः गुगु थासय् कालीहृद जुयाच्चंगु सुन्दर दृश्य खनाः थःह्यं नं स्नान यानाः पलेसकिपु वीजारोपन यानाः जातमात्रोच्च पर्वतय् च्वनाः धर्म व्याख्यान यानाः लिहांविज्यात । गुलिछि समय लिपा उगु कालीहृदय् पलेस्वां ह्वयाः उकिइ ज्योतिरूप स्वयम्भू उत्पत्ति जुल । गुगु ज्योतिरूप प्रकाश जूगु दर्शनार्थ अरुण नगरं शिखी तथागत विज्यानाः ध्यानोच्च पर्वतय् च्वनाः ध्यान यानाविज्यात । एवं प्रकारं अनुपम नगरं विश्वभू तथागत विज्यानाः फुलोच्च पर्वतय् थ्यंकाः श्रीस्वयम्भू ज्योतिरूपयात पुष्प पूजामेघ चह्लय् यानाविज्यात । उगु नागहृद जुयाच्चंगु जलस्थलयात भविष्य कालय् आपालं देव मनुष्यपिनिगु हितसुखया लागी बुद्धशासन अभिवृद्धि याय्त् महाचीनं मञ्जुश्री बोधिसत्व विज्यानाः थ गु दिव्य प्रतिहार्यद्वारा लः पितछ्वयाः यथायोग्य प्रमाणं नेपाल देस मुनिर्माण यानाविज्यात । थनंलि क्षेमावती नगरं ऋकुच्छन्द तथागत

विज्यानाः स्वयम्भू धर्मधातु दर्शन यानाः थःनाप व्वनाहयापि गुणध्वज ब्राह्मण एवं अभयन्दद क्षेत्री प्रमुखं आपालं शिष्यवर्गपित वाक्द्वारस लः उत्पत्ति यानाः चूडाकर्म यानाविज्यात । थुगु वाक्द्वारयात नेपालया तीर्थोपतीर्थया अभ्युदयस्थान मानय् याना वइच्चन । थनं लिपा शोभावती नगरं कनकमुनि तथागत विज्यानाः श्रीस्वयम्भू ज्योतिरूप दर्शन व पूजन यानाविज्यात । एवं प्रकारं वाराणसी सहरं काश्यप तथागत नं विज्यात । श्रीस्वयम्भू ज्योतिरूप दर्शन यानाः थनं लिहांवनाः गौडदेस विज्यानाः अनया जुजु प्रचण्डदेवयात स्वयम्भू धर्मधातु विषयय् प्रशंसापूर्वक कनाविल । गुगु प्रशंसा न्यने मात्रं प्रचण्डदेव राजाया स्वयम्भू दर्शन यायगु तच्चोगु अभिलाषा जुयाः नेपालय् थ्यंकःवल । भिक्षु गुणाकरद्वारा प्रचण्डदेव स्वयम्भू धर्मधातुया अग्रय् तयाः चूडाकर्म यानाः शान्तश्री भिक्षु यानाविल । छुं सम्य लिपा थ्वय्कः शान्तश्री भिक्षुं वज्राभिषेक प्राप्त यानाः विधिपूर्वक श्रीस्वयम्भू ज्योतिरूप संरक्षणया लागी महान् चैत्याकारया रूपय् परिणत यानाः त्वपुयाः स्वयम्भू महाचैत्य नामं प्रतिष्ठा यानाविज्यात । थुलि क्रिया सिध्यकाः शान्तिकराचार्यजुं नेपाःया निमित्तय् आपालं भविष्य व्याकरण यानाः शान्तिपुर गुफाय् दुने आजीवन पर्यन्त प्रवेश जुल, गुगु सिद्धभूमि अद्यापि विद्यमान हे तिनि ।

थथे हे आपालं समय लिपा विश्वशान्तिया संस्थापक शास्ता शाक्यसिंह तथागत लुम्बिनी वनय् जन्म जुल । वसपोलं अनुत्तर सम्यक संबोधिज्ञान प्राप्त याय् धुँसेलि मृगदावनय् धर्मचक्र प्रवर्त्तन यानाः लोकहितार्थं निम्ति देसाटन यायां थःगु जन्मभूमि कपिलवस्तु महानगरय् लिहांविज्यासे पिता पुत्र समागम यानाः, अतीत तथागतपिनिगु अनुगमनकथं स्वयम्भू धर्मधातु दर्शनार्थं नेपाल मण्डलया किमदोल (धान्यकूट पर्वत) स थ्यंकाः विश्राम यानाः स्वयम्भूयात चिन्तना यानाः ध्यान यानाविज्यात । थनंलि गोपुच्छगिरि [साह्येगुँ] पर्वतय् थहांविज्यानाः श्रीस्वयम्भू महाचैत्ययात सप्तविधानुत्तर पूजा स्तोत्र यानाः मञ्जुश्री पर्वस्थानय् विज्यात । थ्वसपोल शाक्यमुनि तथागत विज्याकेत अत्यन्त शोभायमान जुइक विश्वकर्मा धर्मचक्र महाविहार सुनिर्माण यानाविल । गन च्वनाः वसपोल शाक्यमुनि तथागतं अनागत बुद्ध आर्य मैत्रेय बोधिसत्व प्रमुखं सकल सभाषद् मुंकाः स्वयम्भू महाचैत्ययागु विशेष महात्म्य धर्मकथा सुभाषित यानाविज्यात ।

थुगु स्वयम्भू उत्पत्ति सत्कथा^१ शाक्यमुनि बुद्धं आनन्द भिक्षुयात कनाविज्यात । आनन्द भिक्षुं जयश्री भिक्षुयात कनाविज्यात । जयश्रीभिक्षुं जिनश्रीराज बोधिसत्वयात कनाविज्यात । जिनश्रीराज बोधिसत्वं गुरु सानुवासि भिक्षुयात कनाविज्यात । उगु हे प्रकारं जिनं थौं थुगु कुक्कुटा-राम महाविहारय् च्वनाः स्वयम्भू महाचैत्ययागु वर्णन न्यंकाच्चवनागु जुल^२ ।

थुलि थःगुरु उपगुप्त भिक्षुयागु सद्धममृत वचन न्यनाः स्वयम्भू महाचैत्य दर्शन याःवनेगु महान् अभिलाषा जुयाः नेपाल मण्डल वनेगुलिइ तत्पर जुयाः सम्राट् अशोक थःगुरु उपगुप्त, धर्मपत्नी तिष्परक्षिता [असन्धिमित्रा], म्हाय् चारुमती व अन्य परिचारक प्रभृति सहर्षपूर्वक

१- स्वायम्भू पुराण [बौद्ध इतिहास]

२- अशोकावदान प्रथम अध्याय ।

सम्बोधिप्राप्ति^३ कामना यासे प्रसिद्ध बौद्धतीर्थ यात्रा^४ थःगु राज्याभिषेकं नोदँ लिपा शुभारम्भ याःगु जुल ।

२५० ईसा पूर्व, महाराज अशोक किराती राजा थुङ्कोया शासन कालय् नेपालय् थ्यंकःवःगु जुल । गिरिवर साह्ये^५ गुं पर्वतय् सुप्रतिष्ठित चैत्य कुलनायक श्रीस्वयम्भू महाचैत्ययात यानंनिसं खना मात्रं अतिकं सुप्रशन्न जुयाः स्वयम्भू पर्वस्थानय् थ्यंकाः श्रद्धापूर्वक स्वागत सत्कार यानाः प्रदक्षिणा यात । थःगुरुं आज्ञा जुयाबिज्याःगु स्वयम्भू महाचैत्ययागु गुणानुस्मरण यासे 'धन्य ! धन्य !! नेपाल मण्डलया प्रतिष्ठाता स्वयम्भू महाचैत्य' धकाः प्रशंसा यायां नेपाःया प्रसिद्ध तीर्थस्थलत चाःहुलाजुल ।

थुगु हे शुभावसरय् सम्राट् अशोकं यल सहर पवित्र व सुन्दर स्थान भाःपाः छुं समय बितय् याःगु खनेदु । थन हे ललितपुरया प्यंगू दिशाय् प्यंगः थूदो चतुर्युगया प्रमाणं स्थापना यानाथकूगु साक्षि स्वरूप थौतक विद्यमान तिनि :-

- (१) ललितपुरया पश्चिम दिशाय् पूचथूदो-- सत्ययुगोदयया प्रमाणं श्रावणकृष्ण त्रयोदशीया दिनय् शिलापुर दानागिरि [पुलचोक] या क्वस्सं प्रतिष्ठा याःगु जुल ।
- (२) ललितपुरया पूर्व दिशाय् तेताथूर-- त्रेतायुगोदयया प्रमाणं माघशुक्ल पूर्णिमाया दिनय् तेताय् प्रतिष्ठा यात ।
- (३) ललितपुरया उत्तर दिशापाखे ईबहीथूर-- द्वापरयुगोदयया प्रमाणं वैशाखशुक्ल तृतीयाया दिनय् वाग्मतीया किनारय् स्थापया याःगु जुल ।
- (४) ललितपुरया दक्षिण दिशापाखे लगंथूर-- कलियुगोदयया प्रमाणं कार्तिकशुक्ल नवमीया दिनय् यलया तिनिख्यलय् थापना याःगु जुल ।

गुलि इतिहासकारतय्गु धापू दु- उपर्युक्त चतुः स्तूप पाखे अलग्ग मेगु यलदेसया दत्थुइ केन्द्रीय स्तूपया प्रमाणं छाय्वाहाः पुखूया न्ह्योनेसं च्वंगु पिवाहाःया विशाल रूप चैत्ययात मानय् याना वइच्चन । गुलि इतिहासकारतय्गु तर्क श्व नं दु--- पटुकोदों हे मूलस्तूपया भग्नावशेष खः । थथे न्यागः स्तूप दय्के सिधय्काः अशोकया सुपुत्री चारूमतीं सुन्दर शान्तगु थुगु स्थानय् हे बासं च्वनेगु इच्छा यात, नापं अशोक महाराजं थः म्हाय् चारूमती स्थानीय क्षेत्रीकुमार देवपालयात कन्यादान बिल, नापं क्वसःया रूपय् ३३०० स्वदो व स्वसः लाय जग्गा प्रदान याय् धुँसेलि अशोक राजा स्वदेश गमन जुल ।

अशोक महाराज लिहांवने धुंकाः देवपाल क्षेत्रीं छगू योग्यगु स्थान ल्ययाः सहर निर्माण यात, गुगु सहर देवपट्टन [ग्वल] नामं प्रसिद्ध जुल । चारूमतीया विवाह याय् धुँसेलि देवपाल क्षेत्री बुद्धोपासक जुल । चारूमतीं चाय्बही दय्के धुँसेलि भिक्षुणी जुयाः अन हे थःगु जीवन व्यतीत यात ।

३- अशोकके धर्मलेख, अष्टम शिलालेख ।

४- अशोकया १४ गूगु शिलालेख अनुसार- सर्वश्री बुद्ध जन्मभूमि लुम्बिनीनिसं शुरू याःगु खः ।

बौद्ध इतिहासं कनाच्वंगु दु- अशोक महाराजं थःगु जीवनकालय् बुद्धधर्मं प्रचारया निर्मित्ति निम्न महत्वपूर्ण अविस्मरणीय महान् कार्यं यानाथकल :-

- [१] चय्प्यदो ८४००० चैत्य निर्माण
- [२] बुद्धधर्म प्रचार प्रसार
- [३] शान्तिद्वारा युद्ध विजय
- [४] प्राणिपिनिगु प्रति करुणा तय्गु
- [५] साधु सन्त भिक्षु श्रमणपित स्वागत याय्गु
- [६] सत्य शान्ति प्रिय भाषण याय्गु

अशोक महाराजं बौद्धस्तूप व चैत्य जक निर्माण यानाथकूगु मखु, जीर्णोद्धार नं यानाच्वंगु खँ लुम्बिनी अञ्चल स्थित निग्लीहवा धइगु थासय् शिलास्तम्भ^१ स्वानाथकूगु दु । चैत्यकुलनायक धर्मराजिक स्वयम्भू महाचैत्य दर्शन निर्मित नेपाल आगमन जुल । थौंतक नं अशोक काठमाण्डू उपत्यकाय् वःगुया प्रमाण स्वरूप थःगु हे विशेषतां पूर्णगु अशोकस्तम्भ थें त्वहं पालिस दइच्वंगु अशोक चैत्यत खने मदुगु मखु । अशोक पुत्री चारूमती देवपत्तनय् च्वंगु जूया निर्मित चाय्बही धनदोचीवाहाः (आदर्श भगवान् गाउँ पञ्चायत) या नापनापं मेमेगु थासय् स्वयाः अधिकांश अशोक चैत्य नां जुयाच्वंगु चीवाहाःत उपलब्ध जुयाच्वंगु दनि । गुकिइ मध्यय् अनित्यया चलनं अथवा वास्ता मदुगुलि अनास्थाया कारणं धया थें उगु स्थानया चीवाहाःत आपालं नष्ट भ्रष्ट जुजु वनाच्वंगु खनेदु । वर्तमान फीसं स्तूपयात थूर धयावयाच्वना, थ्व थूर शब्द हे अशोककालीन खः । थूर शब्दया पूर्वरूप निग्लीहवाय् च्वंगु अशोकस्तम्भय् थुरयात 'थुवे'^२ धकाः च्वयातःगु प्राकृत शब्दया हे विकृत रूप खः ।

उपर्युक्त आशयद्वारा सिद्धत-- अशोक महाराज चैत्यवाद निकायया प्रधान उपासक नं खः । थौंतकयागु बौद्ध इतिहासय् थ्वय्कः समान चैत्यभक्त सुं दइमखुला धइ थें च्वं । कारण गुह्येसिगु निर्देशनय् चय्प्यदो धर्म स्कन्धया प्रतिनिधिकथं चय्प्यदो क्लेशोपक्लेश परिशान्त जुइमा धइगु हेतुं चय्प्यदो कुशलमूल लाभ निर्मित चय्प्यदो हे चैत्यत स्थापना यानाथकल । थुगु प्रकारं चैत्य प्रतिष्ठा कार्यं जूगु महान् उपलक्षय् चैत्यकुलनायक श्रीस्वयम्भू महाचैत्य दर्शन याःवःगु जुल ।

१- अशोकके धर्मलेख, पृ. ३८५

थुगु शिलालेखया धापूकथं अशोकया राज्याभिषेकं क्रिप्यदं लिपा बुद्ध कनकमुनियागु स्पूप निकोगु पत्तिइ जीर्णोद्धार यानाबिल । खुदं लिपा थःगु यात्राक्रमय् थः नं थन वःगु दु ।

२- बुधस कोनागमन थूवे द्वितीयं वढीते— 'निग्लीहवा शिलास्तम्भ' ।

पशुपति महादेवं पञ्चबुद्धात्मक स्वयम्भूया मुखलं पुङ्गु परम्परा

अतीतकाल्य नेपाल्य धर्मदत्त जुजुं राज्य याना च्वंवल्य विरूपाक्ष नां जुयाच्वंहा छहा
किराती दइच्वन ।


थुहा विरूपाक्ष फिनिदँया उमेर्य थःमांलिसे छेँ-खँ मिल्य मजुयाः मांनाप त्वानाः दिक्दार
जुयाः फिरन्त जुयाः थःगु छेँ तोताः पिहांवन । दँवदँ लिपातक नं थः याकः काय् थःगु छेँ लुमंकाः
दुहांमवसेलि थ्व हे धन्दा पीरं मांहा नं विरक्त जुयाः पिहांवन । इपि मां व काय् निहां थःथःगु
कर्मभोग अनुसारं अनेक देसदेसान्तर चाःहुला जुजुं कालान्तर्य छन्हु छगू जंगलय् निहां छथासंतुं
वासं लाःगु जुल । तर काय् व मां निहां छथासंतुं वासं लाःसां काय् नं मां धकाः ह्यमसिल, मामं
काय् धकाः ह्यमसिइ धुंकल । अथे नं मिसा मिजं छथासं वासं च्वंगु जुयाः एकान्त्य लाःवल्य
मांहासिगु सुन्दरता खनाः काय्हासिया मन्य कामतृष्णा उत्पन्न जुल । आखिर निहासिया बिच्य
संभोगतक नं जुल । थुलि जुसेलि बिच्य वास्तविक परिचय न्यंकूवल्य साक्षात् थः मां व काय्
जुयाच्वन खनी । अहो आश्चर्य ! “कामतृष्णाया वश्य लानाः मां व काय् संभोग जुल, थ्व तःधंगु
भूल जुल, महान् अपराधकर्म यानागु जुल !” धकाः तच्चोगु पश्चाताप जुयाः उगु पापकर्म शान्तया
लागी पशुपति महादेवया थास्य शरण वन^१ ।

कर्मतो मातृसंभोगो भविष्यतीति
द्वादशवयस्को वैराग्यमापन्न
कियत् वर्षान्तरे तयोः संयोगः प्राप्तः

श्रीस्वयम्भू महाचैत्य



विरुपाक्षया तपस्या



RECEIVED

NOV 10 1910

U.S. DEPT. OF AGRICULTURE

WASHINGTON, D.C.

10-10

संभोगश्चपश्चात् विचारे संजाते
 मातापुत्र ततो विरूपाक्षः
 प्रायश्चित्तार्थं महादेवमापन्नः
 स च द्वादशनारिकंपकृ
 ताम्ररसं पिवेति कथित्वान्
 सचाप्रतीतो जीवितासया
 बुद्ध भगवन्तमुपागच्छन्
 भगवति स्फटिक मालां दत्त्वा
 सूत्रशेषं जपंकुर्वित्युक्ते
 विरूपाक्षोज जापः कियंतिवर्षाणि

'थ्व जि गुगु जान अजानं घोर पापकर्म यानागु जुल, भो परमेश्वर पशुपतिनाथ ! छलपोलं
 जिगु उपरय् अनुकम्पा तयाविज्याहूँ । थुगु पापकर्म भोग याय्म्वाःलिइगु पाप नाश जुइगु उपाय
 आज्ञा जुया विज्याहूँ' । धाःगु प्रार्थना न्यनाः उबलय् विरूपाक्षया लागी पापमोचन जुइगु
 थ्व उपदेश ब्यूगु दु कि- सिजः किनिधानि दाय्काः सिजःति त्वनाविल धाःसा छंगु पाप
 तत्कालं नाश जुयाः उद्धार जुइ । पशुपति महादेवं आज्ञा जूगुलिइ तस्सकं विश्वास जुयाः छगु जंगलय्
 वनाः सिजः नाय्क ग्वाराग्वारा दाय्काच्वन ।

उबलय् अन सिजः दाय्का च्वँच्वं विरूपाक्षया मनय् थथे अन्दोल जुयाच्वन कि आः जा
 ब्याक्क सिजः नाल जुइ, लः थें छ्वालुल जुइ अथवा त्वनेत पाय्छि जुल ला मज्जुनि धकाः सिजः
 दाय्कातःगु खासिइ छकः अय्क क्वस्वयाः स्वःबलय् थःगु ग्वाय् सँसँ फुक्क च्यालललं मिनल ।
 काचाकाचा थःगु ख्वाः गथे च्वन थें धकाः न्हाय्कं स्वःबलय् थःगु रूप व ख्वाः थ्व ख्वाः मदयाः विरूप
 जुल । थथे ख्वाः विरूप जूगु खनाः विरूपाक्षया मनय् थथे मतिइ लुल -- 'थ्व सिजःति दाय्का-
 तयागु खासिइ छकः जक क्वस्वयाबलय् ग्वाय् दाह्लि मिखाफुसि सँ फुक्क मिनल धाःसा थ्व तस्सकं
 छ्वयाच्वंगु ह्याउँसे च्वंगु सिजःति जि त्वने लाःगु जूसा जिगु शरीर भष्म जुयावनी । थथे जिगु
 शरीर भष्म जुसँलि जि पापकर्म फुकाः धर्मकर्म यानाः हानं थ्व लोकय् अष्टैश्वर्य साधन यानाः
 सुख चैन गुबलय् याय् दइ ? थुजाःगु नं उपदेश जुइ ला ?' थुक्थं अनपत्यार जुयाः उगु जंगल
 तोताः बुद्धयाके शरण वन ।

बुद्धं व विरूपाक्षयागु पाप फुके निम्ति निर्मल फट्कियागु जापमाला छमाः बियाः 'षडक्षरी'
 मन्त्र जाप या धकाः उपदेश बिल, 'तर थ्व जापमाला ज्यलामवंतले छंगु पाप मफूनि धकाः सिइकि ।
 गुबलय् थ्व जापमाला ज्यलावनी उबलय् तिनि छंगु पाप नाश जुयाःलि सद्धर्म चित्त उत्पत्ति जुइ,
 लिस्सें आत्मा परिशुद्ध जुयाः उद्धार जुयावनी ।' बुद्धवचन न्यना वडो हर्षपूर्वक वाग्मतीया किनारय्
 च्वनाः एकाग्र चित्तं बुद्धं ब्यूगु मन्त्र निश्चय यानाः जाप यानाच्वन ।

उगु जापमाला गुलिखय् समयतकं जाप यानाः नं जापमाला ज्यलामवँसेलि निराश थें जुयाः

पिहांवन । छथाय् छहा पवगिमचां खुसि-सिथय् च्वनाः नँपाता छपाता फि तयाः त्वहँतय् च्वलाच्चंगु खन । थुगु चरित्र खनाः व पवगि मचायाके विरूपाक्षं न्यन, 'आम नँपाता छु याय् च्वलागु ?' थ्व खँ न्यनाः व मचां लिसः बिल-- 'खः थ्व जिगु लं सारै भ्वाथः जुल, उकिं थ्व नँपाता च्वलाः ज्यय्काःलि मुलु दय्काः लं सुयाः भ्वाथः पकँत थथे सनाच्चवनागु खः ।' थ्व खँ न्यनाः विरूपाक्ष दंग जुल । उजाःह्य निर्धनीह्य पवगि मचायाके जा उजाःगु उद्योग दु धासँलि जि जक व मचा स्वयाः छु कम जुइ धयाः थःगु आश्रमय् वनाः न्हापा थें तुं एकचित्त यानाः जाप यानाच्चन ।

गुलिंछि समय लिपा हानं जापमाः ज्यलामवंगु खनाः दिक्क जुयाः पिहांवन । छथाय् हानं निह्य मनुखं माय्कां फट्कि-थां फायाच्चंगु खन । अन नं थ्व घटना खनाः इमिके न्यन-- 'आम छु यानागु ?' विरूपाक्षया खँ न्यनाः इमिसं लिसः बिल-- 'थ्व फट्कि-थां फायाः कुचा कुचा यानाः जापमाला दय्काः जाप यानाः अष्टसिद्धि साधना याय्गु ।' थ्व खँ न्यनाः विरूपाक्ष कं हे अद्भूत जुल कि जि गुरुं जा उलि दुष्करगु ज्या अह्य याःगु मखु खनी का । हानं थःगु आश्रमय् तुं लिहां-वनाः जाप याःवन । थुगु हे रूपं छथाय् छहा मनुखं मुलुं जक प्वाःखनाः सिमा कोथलेत सनाच्चंगु खन । थ्व खनाः व मनूयाके नं कारण न्यन । व मनुखं धाल-- 'सिमायात छत्थुं पां पालेबलय् तच्चोगु वेदना जुइ, मुलुं प्वाःखनाः कोथलेबलय् उलि कष्ट जुइ मखु, अःपुक हे कोदलो ।' थुजाःगु कठोर परिश्रम व धैर्य खनाः विरूपाक्ष हानं लिहांवनाः गुर्यागु आज्ञा शिरोपर यानाः जाप यानाच्चन । अथे नं जापमाला न्हापा गथे खः अथेसंतुं भचा हे ज्यलामवं, अथे जुसँलि हानं दिक्क व निराश थें जुयाः उगु आश्रमं दनावन । छन्हु फिरन्त जुयाः पिहांवँ छथाय् छहा कंगलं छगू पुखूया लः त्वाथं तुत्तुतुयाः मेगु लः मदुगु पुखुलिइ लः जाय्केगु कोशिश यानाच्चंगु खन । छहा कंगःयाके जा थुजाःगु साहस व धैर्य दु धाःसा जि विरूपाक्ष धाय्का च्वनाह्यसिनं गुर्यागु वचन पालन याय् मफुगु थ्व जिगु नामर्दया लक्षण खः धकाः मतिइ तयाः कं हे उत्साह व वीर्य पिकयाः थ्व ज्या सिद्ध मयासँ तोते हे मखु धकाः धयाः स्थिर आसन यानाः जाप यात । जाप यायां जापमाला ज्यलावन, अले वइगु दुष्करतुत पाप नं नाश जुल । धैर्य व उत्साह एवं निश्चयया फलं सद्गुर्या आज्ञा पालन यायां थगु पाप फुनावन धकाः वडो खुशि जुयाच्चन ।

विरूपाक्षया मनय् अथे नं चित्त शान्त मज्जनि कि 'थःगु शरीर भष्म जुइगु सिजःति दाय्काः त्वँ धकाः धाइहा थुजाःह्य नं द्यो जुइला ?' धकाः पशुपति महादेवया उपरय् कोंक पिकयाः गन गन शिर्वालिग स्थापना याना तइतःगु दु अन अन शिर्वालिगयात प्रहार याःवन, लाकामं च्वाःवन । थुगु कथं चाहुलाच्चँच्चं पशुपति महादेव चलाखी जुयाः थःत नं प्रहार याःवइन लाकामं च्वाःवइन धइगु सिद्धिः हतरपतरं व्वाँय्वनाः बुद्धभगवान्या थासय् शरण वनाः गुहाःलि काःवन । पशुपति महादेवयागु आपद् खनाः वइगु रक्षायां लागो भगवान् बुद्ध 'स्वयम्भू पञ्चबुद्ध अङ्कित मुखलं पुयातल धाःसा अले छंत सुनानं छुं याय् फइमखु' धकाः उपदेश बिल । तदनुसार कवयलाथ्वः अष्टीखुनु स्वयम्भू पञ्चबुद्ध अङ्कित मुकुटं पुयाः थःगु थासय् थपक्क च्वनाच्चन । अन हे विरूपाक्ष नं तुप्लुक्क थ्यंकःवल । विरूपाक्षं पशुपति महादेवयात प्रहार याय् धकाः स्वःगुबेलय् थःगुरु बुद्ध बुद्ध

महाबुद्ध पञ्चबुद्धयुक्तं मुखलं पुयाच्चंगु खन । अले विरूपाक्ष नं कसंक वन, थ्व नं निश्चय नं बुद्ध हे खइ धइगु मनं भाःपियाःलि थुगु पशुपति महादेवयात प्रहार मयासे वन्दनादि सत्कार यानावन^१ ।

ततो महादेवस्य विद्देपिणो लिगानि पादप्रहारतां
भग्नानि कृतानि । अथ च यदा पशुपतिक्षेत्रं प्राप्तं
तदा महादेव विज्ञापनात् भगवानबुद्ध स्तल्लिङ्ग
पञ्चबुद्धात्मकं चैत्याकारमकरोत् तदनुप्रहर्षितेन
तेन महती पूजाकृताः स्वयमपि पानभोजादिकृतम् ।

थ्व हे कारणं पशुपति महादेवयागु शिवलिङ्ग छगु जक तप्यनाच्चंगु दु, अन्यत्र स्थानयागु शिवलिङ्ग धेचुलाः बेक्वयाच्चंगु दु धइगु परम्परागत जन-विश्वास चल्य जुयाच्चन । थौतकं थ्व हे घटनायागु संस्मरणकथं क्वय्लाथ्वः अष्टीखुनु पशुपति महादेवं स्वयम्भू पञ्चबुद्ध मुखलं पुयाः दर्शन विइगु दिन जूया निम्ति मुखःअष्टमीया अपभ्रंश 'मुखोऽष्टि' धयाच्चन । थौतकं थ्व परम्परा चल्य याय्गु थितिरिति विद्यमान तिनि^२ ।

गुगु बखतय् विरूपाक्षं वाग्मती किनारय् च्वनाः तपस्या यात धकाः धाल उकिया अनुस्मरणकथं अद्यापि पशुपति आर्यघातया सिथय् विरूपाक्षयागु प्राचीन मूर्ति स्थापना याना तइतःगु दु । व विरूपाक्षयागु प्रस्तर मूर्ति गुलि गुलि थहांवइ उलि उलि कलि वधय् जुयावइ धइगु लोकोक्ति चल्य जुयाच्चन । गुलि गुलि बुरातसें धाःगु दु कि छयं छगः जक खनेदुगु आः थौकन्ह्य् ऊन्दै पुलि खने दइन । थ्व हे थासय् विरूपाक्षया मांयागु शालिक धकाः तइतःगु नं दु, गुकियात मूर्तिकला सम्बन्धी ग्रन्थ च्वइपि विद्वानतसें 'किराती राजमाता' धकाः धयाच्चन । गुलिसिनं यक्षिणी मूर्ति धकाः नं धाः । न्ह्यागु थजु, लोकजनपिनिगु थ्व धारणा दु कि विरूपाक्ष व विरूपाक्षया मां निह्यं थःथःगु पापकर्म शान्त याय्त शान्ततीर्थया सन्निवर्तो आर्यघातया सिथय् च्वनाः तपस्या यानाच्चन तिनि धइगु भाव कयंगु दु । थनं वनाः थ्व विरूपाक्षया निगूगु मूर्ति स्वयम्भू महाचैत्यया चाकलय् खने दु । विरूपाक्षयागु स्वंगूगु मूर्ति आःतकयागु अनुसन्धानय् लुयावःगु खने मदुनि धाःसां अप्पो जुइमखु । थ्व विरूपाक्षयागु मूर्ति पशुपति व स्वयम्भूइ जक खनेदइच्चंगुलि थ्व धाय्फु कि च्वय् च्वयागु घटनानाप यक्व यक्व मिलय् जू वः । तर फरक थुलि हे जुल-- पशुपति आर्यघातय् च्वंगु मूर्ति आः छु जुइन धया थें मिखा गुलिगुलिच्याक कनाः ज्यामछि पहलं ल्हाः निपां तप्यंक तयाः वैराग्य रूप धारण यानाः खङ्गासनय् च्वनाच्चंगु दु । परन्तु स्वयम्भूइ च्वंगु विरूपाक्षया मूर्ति बन्धनं छुटय् जुया पर्वतारूढया आसनय् च्वनाः पापकर्मपाखे सतर्क जुयाः पाप देशनाया रूपय् श्रीस्वयम्भू महाचैत्ययात भक्तिपूर्वक स्थिर दृष्टि यानाः स्वयाच्चंगु दु । आर्यघातय् च्वंगु मूर्तिइ निवस्त्र थें यानाः सँ ब्वहलय् तक क्वकयातल, स्वयम्भूया मूर्तिइ रक्षाजन्त्र कण्ठी व कर्णपुष्प सहित यासे सँ जक उर्द्धकेसया रूपय् कुमारीया सपः हिने थें यानाः क्यनातःगुदु । थुगु मूर्तिया अभिनयं थ्व भाव स्पष्ट जू कि आवंलि

१- धर्मकोष संग्रह, पण्डित अमृतानन्द शाक्य, पृ. २८

२- श्री ५ या सरकार, शि. वि. स्वीकृत- 'इतिहास' पृ. १२, दशौं संस्करण, २०२०

थुजाःगु क्लेश चित्त पाप कर्म गुबलें हे याय् मखुत धकाः श्रीस्वयम्भू महाचैत्यया अग्र्य च्वनाः सदाया निर्मित पाप देशना यानाच्चंगु जुल । हानं थुगु विस्मय मुद्रां थ्व नं भाव निर्देशन यानाच्चंगु दु-अहो ! थ्व संसारय् अज्ञानवश कर्म क्लेशया कारणं छु जुइफु छु जुइमफु, संसारया चलन बडो आश्चर्य विचित्र खनो धइगु थःगु दुनुगलंनिसें चाय्काः स्मृति संप्रजन्य सहित जुयाः ज्योतिरूप श्रीस्वयम्भू धर्मधातुया चिन्तनाय् स्थिर जुयाः च्वनाच्चंगु दु ।

विरूपाक्षयागु प्रहार पाखें बचय् जुइत बुद्धया उपदेश अनुसारं स्वयम्भू पञ्चबुद्ध मुकुट काय्त पशुपति महादेव गोपुच्छ पर्वत स्वयम्भूइ थ्यंकःवन । उगु घटनायात नं लुमंकाः इतिहासप्रति अनुराग दुपि भक्तजनपिसं शिव-पार्वतीया मूर्ति तथाः थ्वया च्वस्सं स्वयम्भू चैत्य अङ्कित यानातःगु थुगु मूर्ति नं थौतकं विद्यमान तिनि^१ । हानं थ्व हे सन्दर्भय् पशुपति महादेव स्वयम्भू दर्शनार्थ बिज्याःबलय् थःगुरु^२ आर्यावलोकितेश्वरयात नं स्वयम्भू नापलाःगु दु धइगु भाव निर्देशन यानाः तइतःगु मूर्ति नं थ्व हे स्वयम्भू जंगलय् दनि । थ्व हे विषय कयाः पशुपति महादेवं स्वयम्भू अमिताभ बुद्ध शिरय् धारणा यानाच्चंगु काष्ठमूर्ति बिलंपौ यलय् हिरण्यवर्ण महाविहारय् प्रदर्शित रूपय् क्यनातःगु दनि ।

१- बुद्धधर्म वणिपालभाषा, दँ ३ अंक ३-४, प्रकाशन दँ ने. सं. १०४७

२- अमिताभ बुद्धपुत्र पद्मपाणि श्रीआर्यावलोकितेश्वरं थ्व जगतयात सुख शान्ति विद्या निर्मित सृष्टिकर्ता लोकेश्वरया रूप धारण यानाः ब्रह्मा, विष्णु, महेश्वर, चन्द्र, सूर्य आदि देवतापित व्याकरण याना बिज्याःबलय् उबलय् महादेवयात धाःगु दु- 'भविष्यत् छ भण्मेश्वर नाम तथागत जुइतिनि ।' — गुणकारण्डव्यूह ।

स्वयम्भू महाचैत्य दर्शनार्थ सिद्ध नागार्जुन आगमन

महाशून्यतावाद माध्यमिक दर्शनया प्रधानाचार्य सिद्ध नागार्जुन विदर्भ धइगु थासय् ब्राह्मणया कुलय् जन्म जुल । थ्वय्कलं चतुर्वेद किंच्यागू पुराण अध्ययन यानाः संस्कृत शास्त्रय् धुरन्धर विद्वान् जुयाच्चंहा खः । लिपा अश्वघोष थें जाःपिं प्रकाण्ड बौद्धविद्वानपिनिगु सत्संगतं यानाः शैवधर्म तोताः बौद्ध धर्मय् दीक्षित जुल । थ्वय्कः दक्षिण भारत मद्रास गुंटूर जिज्जलापाखे च्वंगु आन्ध्र देसया धान्यकटक चैत्य श्रीपर्वतय् आपालं समय वितय् यात, गन कि सिद्ध नागार्जुनया नेतृत्वय् वज्रयान विषयय् आपालं चर्चा जुल । उकिं थुगु श्रीपर्वत वज्रयान केन्द्र^१ जूया निम्ति थुगु थाय् वज्र पर्वत धइगु नामं प्रसिद्ध जुयावन । धयातःगु दु— आचार्य नागार्जुन वज्रयानया महान् प्रवर्तक जूया निम्ति महासिद्ध रूपय् मानय् याना वइच्वन । खतु थ्वसपोलयात बोधिसत्व धकाः नं धाः ।

थुजाःह्य महान् दार्शनिक सिद्ध नागार्जुनपाद इस्वो २०० शदी पाखे प्रागैतिहासिक कालनिसं प्रसिद्ध जुयाच्चंगु स्वयम्भू महाचैत्य^२ दर्शन याय्या निम्ति नेपाल^३ थ्यंक्रःविज्यात । प्राकृतिक सुन्दर विशाल ऐतिहासिक वज्रकूट पर्वत [साम्हेंगुं] स सुशोभित जुयाच्चंगु भक्तिया चुडामणि श्रीस्वयम्भू

१— मञ्जुश्री मूलकल्प अनुसार— शाक्यमुनि बुद्धं सम्यक संबोधि प्राप्त जूगु प्रथम वर्षय् ऋषिपत्तन मृगदावनय् श्रावकबोधि धर्मचक्र प्रवर्तन यात । श्रावकबोधियां किस्वदँ लिपा राजगृह गृद्धकूट पर्वतय् च्वनाः बुद्धबोधि [महायान] धर्मचक्र प्रवर्तन जुल । अथे हे महायान [पारमिता शास्त्र] धर्मचक्र यानाः स्वदँ लिपा वज्रयान [मन्त्रयान] धर्मचक्र प्रवर्तन श्रीधान्यकटक श्रीपर्वतय् च्वनाः यानाविज्यात ।

पुरातत्त्व निबन्धावली,— राहुलसांकृत्यायन ।

२— नेपाल बौद्ध तीर्थावली— तिब्बती इतिहास [संक्षिप्त स्वयम्भू विवरण]

३— नेपाल देश और निवासी, पृ. १०१

धर्मधातु महाचैत्ययात खनाः अतिकं प्रशन्न जुसे पूजादि सत्कार यात । श्व हे स्वयम्भू महाचैत्य सेवा याय्या निम्ति गुलिखय् समयतक थः हे नं द्योपाःलाःया रूप्य च्वनाच्चन । श्वसपोलया लागी आवश्यक व्यवस्थाया दानपति 'रश्मिकवच' (ह्वेसर् घोछे) जुयाच्चन । थन हे च्वनाः गुगुं समयय् नागार्जुनपाद शान्तिपुरय् दुने प्रवेश जुयाः वर्षापनविधि [नागसाधन] नं यानाविज्यात । श्वसपोलया धापूकथं— शान्तियुरय् दुने स्वयम्भूया ज्योतिरश्मि दर्शन याःवनेगु छपु लँपु, नागभुवनय् वनेगु छपु लँपु, एवं असंख्य भयंकरपि स्वयाच्चने हे ग्यानापुसे गख्येसेच्चंपि भूत प्रेत यक्षगणपि बासं च्वनाच्चंगु थासय् वनेगु समेतं स्वपु लँपु दु । थन हे दुने दर्शन याना मात्रं अहोभाग्य प्राप्त जुइगु असंख्य तःधनाच्चंगु फ़िखुगु पुषि महान् दार्शनिक अमूल्य सुदूर्लभ ग्रन्थ नागभवनय् सुरक्षित जुयाच्चंगु दु । श्व हे स्वयम्भू महाचैत्यया प्यख्यरसं प्यंगू खानी त्वपुयाः गोप्य याय् थें यानाः थुकिइ द्योने चैत्य स्थापना यानाथकल । थन हे जङ्गलय् थःगु दिव्यानुभावं अनेक मन्त्र तन्त्र अमृत सञ्जीवनी थें जाःगु वनस्पति अधिष्ठान यानाथकल । थुगु जम्बुद्वीपया मूलगु पुण्यभूमि सर्व बुद्धाधिष्ठित महान् चैत्य स्वयम्भूया अग्रय् च्वनाः आपाः आपालं शुभप्रणिधान यानावन ।

थःगु इच्छानुसार स्वयम्भूया सेवाभक्ति याय् धुँसेलि थनं नं पश्चिमोत्तर दिशापाखेच्चंगु जामाच्चो पर्वतया ववस्सं च्वंगु त्वहंया पाकुस विज्यानाः आपालं योगसमाधिइ च्वनाः विमुक्ति ज्ञान दर्शन प्राप्त यात । थुगु थासय् नागार्जुनपाद बोधिसत्व विज्याइ तिनि धइगु शुभसन्देश न्हापा हे न्यंकावंगु दु, गन च्वनाः आचार्य नागार्जुनपादया नायकत्वय् आपालं योगी सिद्ध विद्याधर आचार्यपि च्वनाः वज्रयान सम्बन्धी चर्चा जुयाच्चन । उदाहरणया लागी थौतक नं थुगु पर्वत स्थानय् थाय्थासय् ज्ञात अज्ञात गुफा पाकुत यक्वं स्वयंगु दनि । धयातःगु दु— थुगु स्थानय् १०८ गू गुफा दु धाइ । उकिं थुगु वन जङ्गल थौतक नं नागार्जुन जङ्गल धइगु नामं प्रसिद्ध जुयाच्चन ।

स्वयम्भू महाचैत्य दर्शनार्थ आचार्य वसुवन्धु आगमन

आचार्य वसुवन्धु^१ प्रसिद्ध बौद्ध नैयायिक महापण्डित खः । श्वय्कः गन्धारदेस पुरुषपुर [पेशावर] नगर्य कौशान्वय ब्राह्मण वंश्य जन्म जुल । थुमि स्वहा दाजुकिजापि दु-- असंगवसुवन्धु, वसुवन्धु, विरंचिवसुवन्धु । असंग प्रवजित जुयाः प्रसिद्ध योगाचार महायानी दार्शनिक जुल । वसुवन्धु जक सर्वास्तिवादय् प्रवजित जुल । कालान्तर्य गान्धारदेस तोताः अयोध्याय् थ्यंकःवल, थन हे स्थवीर बुद्धमित्रयाथाय् वनाः शिष्यत्व ग्रहण यात । छन्हु वसुवन्धुया अनुपस्थिति समयय् वसपोलया गुरु बुद्धमित्र संख्याचार्य विन्ध्यवासिनाप शास्त्रार्थ यात, बुद्धमित्र पराजित जुल । छुं दि लिपा वसुवन्धुं थुगु समाचारया व्याक खँ न्यनाः उगु शास्त्रार्थया प्रत्युत्तरया लागी गुगु ईश्वर कृष्ण विचरित - सांख्यकारिक शास्त्रया विपक्ष जुयाः वसपोलं परमार्थ सप्तति नामक ग्रन्थ चवयाबिल । थुगु समयय् गुप्त सम्राट् अयोध्याधीश्वर चन्द्रगुप्त आचार्य वसुवन्धुयागु प्रभावं सांख्यमतपात रित्याग यानाः बौद्ध धर्मय् अनुसरण जुल, नापं चन्द्रगुप्तया काय्, कलाः व शिष्यपि नं । थुगु समयय् बौद्धदर्शन अध्ययन याइपि विद्यार्थीपिनिगु लागी अत्युपयोगी सिद्ध जुयाच्चंगु अभिधर्मकोश नामक ग्रन्थ चवल । श्वया नापं वसुवन्धु समयकालीन आचार्य संघभद्रं चवइगु अभिधर्म कोश भाष्यय् अनेक त्रुटि खंकाः उगु दोष निराकरणया लागी 'अभिधर्म-न्यायानुसार शास्त्र' चवयाबिल । आचार्य संघभद्रयात शास्त्रार्थ निमित्त निमन्त्रणा यात, तर वसुवन्धुनाप विजय प्रात जुइगु लक्षण मखनाः वसुवन्धुया अग्र्य थःगु भूल स्वीकार प्रस्तुत यात उकियात सौजन्यतापूर्वक क्षमा प्रदान यात । अन्तय् आचार्य वसुवन्धु सर्वास्तिवादयात तोताः महायान धर्मय् प्रवेश जुल । महायानय् दीक्षित जुइ धुँसेलि, बुद्धवर-विपश्चो तथागत, विद्वतवर-मञ्जुश्रो, नृपवर-अशोक एवं सिद्धवर-नागार्जुनपाद

थे जाःपि विज्यानाः दर्शन पूजन यानाविज्याःगु जम्बुद्वीपया मूलगु प्रागैतिहासिक कालंनिसे सुप्रसिद्ध जुयाच्चंगु चैत्यकुलनायक स्वयम्भू महाचैत्य दर्शनार्थ नेपाल मण्डल थ्यंकःविज्यात^१ । गिरिवर महा-विहार साम्हेगु पर्वतय सुशोभित जुयाच्चंगु परम धर्मधातु श्रीस्वयम्भू महाचैत्ययात श्रद्धापूर्वक प्रदक्षिणा यात ।

थुगु जम्बुद्वीपया मूलगु पुण्यभूमि— स्वयम्भू महाचैत्यया समीपय त्रिरत्नालोक पुण्य कीर्ति सदाया लागी स्मरण स्वरूप— उष्णीष विजय धर्मपारंगत चैत्य छगः नं स्थापना यानाथकल । थुगु आचार्य वसुवन्धु दय्काविज्याःगु चैत्य स्वयम्भू पर्वस्थानया पश्चिमपाखे काश्यप तथागतयागु चैत्य नापं दय्कावन धकाः वर्णन यानातल । आचार्य वसुवन्धु वृद्धावस्था जुइकाः नेपाः विज्याःगु जुयाः वसपोलयागु असामयिक देहावसान नं थन हे जुल धकाः धयातल । उक्त चैत्य नं वसपोलयागु हे अस्थिधातु सहित यानाः शान्ति कामना यानाः दय्कावंगु धाइ^२ । थ्व घटना ईस्वी प्यंगूगु शताब्दी-यागु खः ।

१— थ्व खँ स्वयम्भू वर्णन— तिब्बती इतिहासय च्वयातःगु दु ।

२— काठमाण्डू उपत्यकाको मध्यकालीन इतिहास, पृ. २४६, ले० सूर्यविक्रम ज्ञवाली ।

स्वयम्भू महाचैत्यया राजा वृषदेवद्वारा पुनर्निर्माण

अनुमानित प्यंगुगु शताब्दीपाखे सूर्यवंशी राजा वृषदेवं थःगु कुल्य् चल्य् जुयावइच्चंगु शैवधर्म तोताः बुद्धधर्म ग्रहण याःगुलि अतिकं प्रसिद्ध जुयाच्चंगु स्वयम्भू पर्वस्थान्य् वयाः च्वंवल । उगु समय्य् अन साम्हेंगु विहार्य् प्रसिद्ध बौद्धविद्वान् शान्तिशील भिक्षुया शिष्यत्व ग्रहण यात । थःगुरु शान्तिशील भिक्षुयागु उपदेशयात शिरोपर यासे राजा वृषदेवं प्रागैतिहासिक कालंनिसें प्रसिद्ध जुयावइच्चंगु श्रीस्वयम्भू ज्योतिरूपयात चैत्याकार रूप्य् परिणत याय्माल धयाः अत्यन्त हर्षोत्साह जुयाः हादिक स्वीकार यात ।

तदनुसार आचार्य शान्तिशीलया कुशल नेतृत्व्य् शास्त्रोक्त विधिपूर्वक चैत्यनिर्माण कार्य सुसम्पन्न जुल । नापनापं पञ्चमहाभूतयागु प्रतिनिधित्व यानातःगु पञ्चपुर्य् नं देवदेवता स्थापना यानाबिल । थ्व हे स्वयम्भू महाचैत्ययागु विशेष महात्म्य न्यनाः भक्तिवश छुं समयतक स्वयं राजा हे पूजारी [द्योपाःलाः] जुयाबिज्यात । सदांया लागी थथे थः हे स्वयम्भूया द्योपाःला जुयाच्चने मफइगुलि स्वयम्भू महाचैत्यया नित्य पूजाया लागी आवश्यक बन्दोबस्त मिल्य् यानाः शाक्यभिक्षु वन्देजुपित अधिकार प्रदान यानाबिज्यात^१ ।

आचार्य शान्तिशील भिक्षुयागु प्रेरणाद्वारा बुद्धधर्मप्रति अनन्य श्रद्धाभक्ति उत्पन्न जुल । उकिं थ्वय्कः वृषदेवं बुद्धधर्म सम्बन्धी अनेक उन्नति यानाथकूगु खनेदु । वृषदेव राजायागु विषय्य् थूगु किसिमं वंशावली व जयश्रुतिया आधार्य् जक बुद्धधर्मया परम भक्त धयातःगु मखु कि इतिहासप्राण शिलालेखं नं न्वँवानाच्चंगु दु— देवपट्टन स्थित पशुपतिनाथया न्ह्योने च्वंगु दबुलिइ तयातःगु

१— देवमाला नामक पुस्तक, पृ. २५,

संग्रहकर्ता— योगी नरहरिनाथ ।

लिच्छवी जयदेव (द्वितीय) यागु शिलापत्रम् राजा वृषदेवया विषयम् थथे प्रशस्ति उल्लेख^१
जुयाच्वंगु दुः-

श्रीमान् बभूव वृषदेव इति प्रतीतो
राजोत्तमः सुगतशासन पक्षपाती ।
भभूततः शंकरदेव नामा श्रीधर्मदेवोऽप्युदपादि तस्मात्
श्रीमानदेवो नृपतिस्ततोऽभूततो महीदेव इति प्रसिद्धः ।

राजापि मध्यम् उत्तम जुयाः सुगत^२ (बुद्ध) शासनयागु धर्म जक मानम् याइह्य गुह्य खः
वृषदेवयागु अंशं शंकरदेव जन्म जुल, शंकरदेवयागु पाखे धर्मदेव उत्पन्न जुल, धर्मदेवयागु अंशं
ऐतिहासिक प्रथम मानदेव जुजु उदय जुल, थ्व हे मानदेवयागु अंशं महीदेव धयाह्य प्रसिद्ध राजा
जन्म जुल धकाः च्वइतल ।

धर्मदत्त राजां गुलिख्य थःगु श्रोसम्पत्ति धनराशि गर्भम् दुने तयाः गणावर्त्त सहित यानाः
दय्कावंगु महान् त्यागया स्मारक स्वरूप देवपट्टनम् च्वंगु धनदो महाचैत्य, गुगु प्राकृतप्रकोपं विनष्ट
जुयावंगु पवित्र ऐतिहासिक चैत्य पुनर्निर्माण याय्गु सौभाग्य राजा वृषदेवयात प्राप्त जुल^३ । छन्हु
वृषदेव राजायात अकस्मात् यमराजयागु भय त्राश उत्पन्न जुल । उगु भय त्राशं अवलोकितेश्वरया
अनुस्मरणं तुरन्त मुक्त नं जुल । थुकिया उपलक्ष्य दय्का ब्यूगु षडक्षरी लोकेश्वरस्थित बडेगांयागु
सुविमुक्त चैत्य^४ खः । युजाःगु प्रकारं थाय्थास्य सद्धर्मकीर्ति स्थापना यानाथकूगु दु । थुगु हे प्रकारं
वृषदेव राजां सौहावचैत्य दय्काः प्रतिष्ठा यानावन धकाः नं च्वयातल^५ ।

१- संस्कृत सन्देश, वर्ष १ अंक १

२- सर्वज्ञ-सुगतो बुद्धो धर्मराजस्तथागतः— इत्यमरकोशः ।

३- पुरातत्त्व प्रकाशनमाला- २१ भाषा वंशावली ।

४- भाषा वंशावली - यल महाबुद्ध

५- गोपाल वंशावली

स्वयम्भू स्थित बौद्ध विहार निंति राजा शंकरदेवद्वारा जग्गा प्रदान

अनुमानित प्यंगुगु शताब्दीया उत्तरार्द्ध समयय् राजा शंकरदेवं बौद्धविहार निंति अक्षयदान स्वरूप जग्गा प्रदान यात धकाः स्वयम्भू महाचैत्यया वायव्यकोणपाखे सख्याः दय्किइगु गालय् च्वंगु शिलापत्रं धयाच्चंगु दु^१* ।

परन्तु थुगु शिलापत्रया च्वय् क्वय् खण्डित जुयाच्चने धुंकल, उकिइसं बाकि ल्यनाच्चंगु आखलय् नं जःखः अप्पो स्यनाच्चने धुंकल । उकिं थुगु शिलालेखं गुलि खँ व्यक्त यानाच्चंगु खः उलि थन स्पष्ट रूपं सिइके मफुत । तथापि थुगु शिलापत्रय् उल्लेख याना तइतःगु विभिन्न वाक्यया आशय व विचारं एवं तत्सम्बन्धी वंशावलीया अनुश्रुति नाप तुलनात्मक अध्ययन याना स्वतः धाःसा थ्व भाव कल्कय् जूवइ—

आचार्य शान्तिशील भिक्षुयागु उपदेशद्वारा प्रभावित जुयाः बुद्धधर्मय् दीक्षित जूह्य गुह्य खः अनन्य बुद्धभक्त राजा वृषदेवं स्वयम्भू महाचैत्य पुनर्निर्माण यानाथकल । थुगु स्वयम्भू महाचैत्य विराजित विहारया निंति राजा वृषदेवया सुपुत्र शंकरदेवं थःअबुजुयागु विशुद्ध कीर्ति परन्तु चिरस्थायी जुइमा धइगु शुभप्रतिज्ञा यासे अक्षयदान स्वरूप जग्गा प्रदान यात । थुकिया उपलक्ष्य महान् यज्ञयादि नं जुल ।

१— पूर्णिमावर्ष २, पूर्णाङ्क ९


* अमृत पत्रिका— श्री ५ महेन्द्र जन्मोत्सवाङ्क, पृ. ४३

थौतकया काठमाण्डू उपत्यकाय् लुयावःगु अभिलेखत मध्यय् चांगु स्थित संबत् ३८६ यागु प्रथम ऐतिहासिक मानदेव राजायागु विजयस्तम्भ लेख सर्वप्राचीन मानय् याना वइच्चंगु खः । तर यथार्थ रूपं विचार याय्गु खः धइगु जूसा सर्वप्राचीन अभिलेख उक्त चांगुयागु स्तम्भ लेख मजुसे स्वयम्भू स्थित मानदेवया बाज्या शङ्करदेवया अभिलेख जूवइ । —ले. हरिराम जोशी

* नेपालको प्राचीन अभिलेख, पृ. १

काठमाण्डू उपत्यकाय् दुनेच्वंगु सर्वप्राचीन स्वयम्भू स्थित - शिलापत्र

- (१)
- (२) ... [शङ्क] रदेवो नरेन्द्र ..
- (३) शत लक्ष्मि ...
- (४) प्रसाद ...
- (५) राजेन्द्र ..
- (६) विधिज्ञ ..
- (७) विनीतभृत्य ...
- (८) पविमान ...
- (९)
- (१०) ... क्षेत्रञ्चाक्षयं दत्तं ... विहारे ...
- (११) ... मेत्य तनय ..
- (१२) ... महिम्ना
- (१३) ... क्षयी राजा सर्व ...
- (१४) ... सन्धर्मा द्युतिमा (न्) ईजे...
- (१५) ... (म) खैरुदारै ड्काय ...
- (१६) ... श्रेयः निरुपसत्त्वो दान्त ...
- (१७) ... ख्यातयशा ... स्वधर्मयर्मसुनय...
- (१८) तनयोभिजात ... सर्वानतिवर्तते ...



स्वयम्भूत चवंगु
लिच्छवीकालया शिलापत्र

- (१६) ... णैर्नृपतीन्यः अनुपरत धर्म ...
(२०) ... करुणैक-प्रियः सदा रणम् ...
(२१) ... तकठिन बाहुः केसरिमत्तेभ विक्रमः ...
(२२) ... स्थिरधीः यम्विभ्यति वीक्ष्य नृपाः ...
(२३) ... मृगाः केसरिणमिव रणेष्वभयः ...
(२४) ... निमित्तपाती शिक्षासौष्ठव विधान ...
(२५) ... मतिमान् रूपबलसत्त्वतेजः श्रुत ...
(२६) ... लनिधिः कलासु निपुणः प्रियवत् ...
(२७) ... साग्रं शतं वर्षाणां याज्ञापयता विचिन्त्य ...
(२८) ... निपुणम् श्रेमोर्त्थिना धृतिमता ...
(२९) ... वरुणमहेन्द्रवपुषा महता

स्वयम्भू महाचैत्य स्थानय राजा धर्मदेवया धर्मशाला निर्माण

नेपाल देसया सर्वप्राचीन उत्तम तीर्थस्थान श्रीस्वयम्भू महाचैत्य विराजमान जुयाच्वंगु थुगु साह्येगु पर्वतय् धर्मशालायागु अभाव महशूस यासे श्रीस्वयम्भू दर्शनार्थ चतुर्दिशां वइपि अतिथि महोदयपिनिगु लागी सुख सुविस्ता जुइमा धइगु हेतुं श्रीस्वयम्भू महाचैत्यप्रति श्रद्धाभक्ति तसे स्थान स्थानान्तरय् यथायोग्य प्रमाणं सुन्दर कलापूर्ण धर्मशाला सतः फलेचा आदि दय्कल, लिस्से जुइ च्वने छिक् लैयागु नं व्यवस्था यानाबिल^१ ।

गुह्य धर्मदेव^२ जुजु वृषदेव राजाया छय् शंकरदेवया काय् मानदेव राजाया अबु थ्वय्कःया जीवनय् छगू अद्भूत घटना जुयावंगु दु, प्रसङ्गवश थन छत्वाःचा खं न्ह्यथने—

वर्तमान राष्ट्रनायक श्री ५ पिनिगु राजद्वारं दक्षिणपाखे च्वंगु नारायण हितिया पूर्वकथा थ्व खः कि— परापूर्वकालय् धर्मगतदेवया नामं दय्कातःगु नारायण हिति बन्द जुयावन । थथे हितिया जलप्रवाह रोकय् जुसेलि जुजुं बिचार याना स्वत— ‘जिमि पुर्खापिसं थुगु हितिया लः जलशयन नारायणया वचन कयाः हाय्कातःगु हिति खः । आः जि नं जलशयन नारायण [भुभुक्ति जलशयन— भुईजःसि] नारायणयाथाय् वने ।’ थुकथं बिचाः यानाःलि अन थ्यंक वनाः पूजा भावभक्ति यानाः निश्चय-पूर्वक स्तुति यात । थुगु दिनया रात्रिस स्वप्नय् आज्ञा प्रशन्न जुल— ‘ज्योतिषीपिके वयनाः ज्या या ।’ व हे आज्ञानुसार ज्योतिषी ब्राह्मणपि सःताः प्रश्न मुताविक लग्न ज्यानास्वःगु बेलय् तःधंगु कष्टं जक ज्या सिद्ध जुइ धकाः लिसः बिल । व लिसलय् थथे धाःगु दु— ‘स्तीनिता लक्षणं संयुक्तह्य नरबलि बिइफुसा जक निसन्देह जल प्रवाह जुइ, अन्यथा मेगु जत्न युक्ति मदु ।’ थुलि ज्योतिषीपिनिगु वचन

१— पुरातत्त्व प्रकाशन माला २१, भाषा वंशावली, पृ. ७४

२— गोपाल वंशावली अनुसार— ४१ दैतक राज्य याना च्वंबलय् राजबिहार नं दय्कुगु दु ।

न्यनाः क्रिया कर्म याय्गुलिइ तत्पर जुयाः धर्मदेव जुजुं मतिइ विचार याना स्वत-- 'थःगु देसया प्रजागणपिनिगु विचय् यदि ३२ लक्षणं संयुक्त जूह्य मनुष्य प्राप्त जुल धाःसां बिना अपराधं प्राण हत्या याय्गु थ्व जिमिगु राजधर्म मखु । आः थुगु अवस्थाय् ३२ लक्षण सम्पन्नह्य जि व जिह्य काय् निह्येसिके जक दु ।' तसर्थ श्रद्धेय पूर्वजपिनिगु धर्मकीर्ति स्थिर याय् निम्ति प्रजागणपिनिगु हितसुखया लागी थःगु हे प्राणबलि बीगु कर्तव्य व धर्म भाःपाः सुशीलवती नवसागर महारानीयात नं छुं मधासे थःगु सम्पूर्ण विशाल वैभव सुखैश्वर्ययात तिरस्कार यानाः थःगु मुख्य उद्देश्ययात गुप्तरूपं तयाः दृढसंकल्प यानाः एकान्तय् राजकुमार मानदेवयात सःताः आज्ञा जुल--

'कीगु हितिइ लः महागु कारण पत्तालगय् जुल । उगु बिघ्न शान्तिया लागी थ्व उपाय कनाच्चना । छं एकचित्त यानाः न्यना च्वं, तर जिगु वचन कदापि लंघना याय् मते- थन्हिइ प्यन्ह्या चान्ह्य कीगु हितिया च्वय् ह्य छह्यं तुय्गु कापतं प्वपुयाः चत्तावानाः यनाच्चनीह्य छह्य दइ, वइत सरासर वनाः कापः उला मस्वसे अन थ्यनेसाथ खज्जं चनंक प्रहार याना व्यु । थुलि याय् धुनकि अले तिनि बिघ्न शान्ति जुयाः हितिइ निर्मल जलधारा प्रवाह जुइ ।' थुकथं काय्यात अह्य यात । थुलि थः अबुयागु आत्मीय सन्देशयात 'तथास्तु' धकाः स्वीकार यासे विचार संचार छुं मयासे धाःगु दिनय् वनाखत नं थस्सःपायाः यनाच्चंहासित चनंक खज्जं प्रहार यानाबिल । थुलि जुसेलि छयं व ह्य छिन्न भिन्न जुल-- उघरिमय् तच्चोगु शब्दं हिति हाल । राजकुमार अति हर्षमान जुयाः अबुयागु आज्ञानुसार कार्यसिद्ध जुल धकाः चुपि सिले धकाः वंगु बेलय् हितिइ हिया धाः न्ह्यानाच्चंगु खन ।

थथे जुसेलि पितृहत्या याःह्य चण्डाल महापापीयागु खाः स्वय् मत्यः धकाः हितिमंगः लिफः स्वयावन । राजकुमार उगु थासं तोता वसेलि हानं सदांया लागी निर्मल जल प्रवाह जुयाच्वन ।

थुगु प्रायश्चित्तं हानं देसय् अनावृष्टि जुयाः हाहाकार जुल । थुगु अनावृष्टि दोष निवारणया लागी खसु तिलःमुनाः खास्तिइ चीवाहाः दय्केगु ज्या शुरु जुल ।

स्वयम्भू महाचैत्ययात राजा मानदेवद्वारा छत्र समर्पण

ऐतिहासिक प्रथम मानदेव राजा तत्सकं प्रतापी व धर्मात्मा जू । श्वयंकः छत्र शूर वीर एवं मातृभक्त नं खः । थःगु राज्यय् चलय् जुयाच्चंगु बौद्धधर्म एवं हिन्दूधर्म निगूयात नं उत्तिकं आदर सत्कार तथा वयाच्चंगु खनेदु ।

मल्लपुरी विजय जूगु उपलक्षय् दोलागिरि पर्वतस्थित चांगु नारायण^१यात श्रद्धाभक्ति तथाः पूर्वलिच्छवी लिपि अंकित विजयस्तम्भ संवत् ३८६^२ [तदनुसार वि.सं. ४६६]*स स्थापना याना-थकल^३ । दिवङ्गत आत्मा थःमांया शान्ति कामनाया लागी संवत् ३८६ सालं त्रिविक्रम विष्णुं विक्रान्त मूर्ति स्थापना यानावन । अथे हे आर्यसंघ बौद्धभिक्षुपिनिगु लागी थःगु नामं मानविहार दय्का थकल^४, गुकियात मानदेव संस्कारित मानविहार धकाः धयावयाच्चन^५ ।

नेपाःयागु प्राचीन इतिहास स्वयम्भू पुराण एवं हिमवत्खण्ड कथनानुसार बौद्ध तथा हिन्दूधर्म निखलःसिनं थःथःगु दृष्टिकोणं स्वागत सत्कारपूर्वक मानय् याना वइच्चंगु गुगु खः स्वयम्भू महाचैत्ययात थःतापाःआजु वृषदेव राजां पुनर्निर्माण यानाथकल, आजु शंकरदेव राजां बुद्धविहार निम्ति अक्षयदान स्वरूप जग्गा प्रदान यात । अबु धर्मदेव राजां आवश्यक धर्मशाला व लँयागु व्यवस्था मिलय् याना थकूगु गुगु परम्परानिसें श्रद्धा प्वंका वइच्चंगु इतिहासयात लुमंकाः थःह्यं नं उत्तिकं श्रद्धाभक्ति तथाः स्वयम्भू महाचैत्यया सर्वोपरी स्थानय् अत्यन्त शोभायमान जुइक छत्र दोहनपा बिल^६ । नापं पशुपतिनाथयात नं छत्र समर्पण याःगु जुल । थुगु महान् शुभउपलक्षय् कल्पवृक्ष

१- चांगुनारायण, स्वयम्भू पुराणया प्रमाणानुसार- हरिहरिहरिवाहन लोकेश्वर धाइ ।

२*- लिच्छवी संवत्को निष्कर्ष, पृ. २७

३- संस्कृत सन्देश, वर्ष १ अंक १

४- गोपाल वंशावली

५- नेपाल बौद्धविहार सूची - हेमराज शाक्य ।

६- भाषा वंशावली, पृ. ७८

सिमा दय्काः उकिइ अनेक रत्न सुवर्ण आदि बहुमूल्य वस्तुतः सय्काः श्रमण भिक्षु ब्राह्मण याचक आदिपित प्रदान यात । विशालनगरया प्रजापित भोजन नं याकल । नापं थुकियागु उत्सवय् भूमिनाप याय्गु मापडण्डस अंकित अंक्ष निर्धारित यानाः सर्वत्र थासय् प्रचार यानाबिल । पुनः राजसम्मानय लागी धातुयागु यन्त्र निर्माण यानाः रथयान आविष्कार याःगु जुल ।

थुगु प्रकारं नेपालय् आः जक मखु न्हापांनिसें बुद्धधर्म व हिन्दूधर्म गाडिया घःचाः थें नापनापं न्ह्यानाच्चंगु खनेदु । थनया जुजुपिसं धर्मया नामय् ल्वापु ख्यापु विद्रोह कलंक गुबलसं मयाः । परन्तु बौद्धधर्म अन्तर्गत श्रावक, प्रत्येक महायान तन्त्रवज्रयान एवं सहजयान कालचक्रयान तथा हिन्दूधर्म अन्तर्गत बैदिक, शैव, वैष्णव, शाक्त व पाशुपत्, कापालिक धर्म समुन्नतिया लागी सहयोग प्रदान याना वइच्चन । थुकिया ज्वलन्त उदाहरण स्वरूप थौतक नं बौद्ध व शैवया धार्मिक कीर्ति वही विहार बुद्ध बोधिसत्व आर्यतारा चैत्य व कैलाश परिवार, शिवलिङ्ग, हरिहर, हरगौरी लक्ष्मीनारायण विष्णु, मथ मन्दिरत नापनापं प्रस्तुत यानातःगु खनेदु । थ्व खः नेपाली संस्कृतिया उदार भावना अभिव्यक्तया रूपय् प्रदर्शित जुयाच्चंगु । नेपाल संस्कृत छगू पक्षीय अथवा साम्प्रदायिक दृष्टिकोणं सर्वथा मुक्त जू । थ्व हे नेपाःदेया छगू तःधंगु विशेषता खः ।

स्वयम्भू महाचैत्य दर्शनार्थ गुणाढ्य ब्राह्मण आगमन

मथुरा सहरया विष्णुदत्त ब्राह्मणया सुपुत्र धाय्काः जन्म जुल । थुह्य गुणाढ्य ब्राह्मण अनेक शास्त्र विद्यां निपुण जुयाः सर्वगुण सम्पन्न जुल । थ्वय्कःयात उज्जयिनीया राजा मदनया द्वारपण्डित यानातल । उगु समयय् थ्वय्कलं पिशाच भाषां नवलक्षगाथा रचय् यानाविल ।

छन्हु थ्वय्कः द्विजवर गुणाढ्य ब्राह्मणया जम्बुद्वीपया मूलगु पुण्यभूमि नेपाल मण्डल परम पोठ दर्शन याय्गु अभिलाषा जुयाः तीर्थ भ्रमण यायां नेपालय् थ्यंकःवल । थुगु शुभअवसरय् न्हापां वाग्मती तीर्थय् स्नान यानाः श्रीपशुपतिनाथ दर्शन यानाःलि दक्षिण द्वारं पिहांवनाः क्रमशः निम्न-प्रकारं तीर्थस्थल व देवस्थल प्रदक्षिणा यायां स्वयम्भू क्षेत्रय्^१ थ्यंकःवन :—

(१) राजराजेश्वरी (२) कीर्तिमुख भैरव (३) वत्सलादेवी (४) गुह्येश्वरी (५) चैलगंगा स्नान (६) गोकर्णेश्वर (७) कारणिकेश्वर (८) सुन्दरीजल सुन्दरीदेवी (९) वज्रयोगिनी (१०) दोलागिरि स्थित गरुडनारायण (११) वागीश्वर (१२) वाग्मती मुक्ति कुण्ड स्नान (१३) वाल्मी-केश्वर (१४) त्रिपंचकपुस्करिणी स्नान (१५) माधव (१६) चण्डेश्वरी (१७) धनेश्वर (१८) गोखुरेश्वर (१९) इन्द्रेश्वर (२०) लीलावती रोषमती संगम स्थान (२१) ईश्वरलिङ्ग (२२) आपुरेश्वर (२३) डोलेश्वर (२४) सूर्यविनायक (२५) अनन्त लिङ्गेश्वर (२६) वज्रवाराही (२७) भार भूतेश्वर (२८) मनशीलातीर्थ स्नान (२९) हरिहर (३०) भैरव (३१) मातातीर्थ स्नान (३२) हरसिद्धि देवी (३३) गोपालेश्वर (३४) शिखर नारायण (३५) पण्डूकेश्वर (३६) पाण्डू-नदी स्नान (३७) चतुर्वक्त्रेश्वर (३८) इन्द्रेश्वर (३९) इचांगुनारायण आदि दर्शन व पूजन यायां गन परमानन्द स्कन्द पत्यस्वानं प्रकट जूह्य स्वयम्भू धर्मधातु महाचैत्य विराजमान जुयाच्चंगु थुगु

१- पुरातत्त्व प्रकाशन माला २१, पृष्ठ २७

पवित्र वनविहार्य जितेन्द्रो प्राप्त वैरागी भिक्षुपि च्वनाः अनेक धर्माध्ययन यानाः पूजा भावभक्ति
यानाच्चंगु साह्ये गुं पर्वतय् थ्यंकाः (४०) वसपोल आदिबुद्ध स्वयम्भू भगवान्यात दर्शन व पूजन
यासे थुगु थासं सरासर लिहांवयाःलि (४१) विष्णुमती स्नान (४२) बुढानीलकण्ठ (४३) विसंखु
नारायण (४४) जयवागीश्वर इत्यादि पुण्य भूमि परिक्रमा याःगु जुल ।

थुगु पुण्यानुभावं अन्तय् मुनि श्रेष्ठ हरितऋषियागु आशीर्वादद्वारा भृङ्गीश्वर सुवर्णेश्वरया
रूप जुयाः गुणाढ्य ब्राह्मण जीवन मुक्त जुल, कैलाश भुवनय् वास प्राप्त जुल ।

स्वयम्भू महाचैत्य (साह्येगुँ विहार) प्रति राजा अंशुवर्मिया आस्था

विद्यानुरागी धर्मप्रिय स्वनामधन्य महाराज अंशुवर्मा^१ नेपालया निर्मित समाज सुधार यानाः स्वर्णयुग स्थापना यानाविल । थ्वय्कःयागु शासनकालय् आपालं देसोन्नति जुल । स्वयं विद्वान व लेखक जूगुलि मेपि विद्वान व लेखकपित कदर यानाच्चनी । अज्ज कला मर्मज्ञया नातां भव्य रूप कलापूर्ण प्रसिद्ध कैलाशकूट भवन निर्माण यानावन । गुगु विशाल रूप सुन्दर राजप्रासादयात खनाः प्रसिद्ध चीनिया यात्री तस्सकं प्रशंसा याःगु दु— थ्व लायकू ४६० फुटया हाकः—ब्याय् फिजय् जुयाच्चंगु, न्हय्गू तला दइच्चंगु, सिजःपाताया पोल, बुर्जाया कुनय् कुनय् सुवर्णया जलप दइच्चंगि शानदार हितिमंगः तयाः शोभावृद्धि यानातःगु दु । थुकिइ अटालि, थां, धलिखाः, फल्लर आदि उपयुक्त थासय् ज्वाहारात जडय् यानातःगु दु । एवरूपं स्फुर्तिदार क्षपु, हितिमंगः, मलः सिंहशार्दूल किसि आदिपाखें छायापाः अतिकं सुशोभित यानातःगु जुयाच्चन । वर्णन यानातःगु^२ दु— न्हय्गु तलाय् फिदो मनूत सुविस्तासाथ च्वनेछिक दय्कातःगु थुजाःगु सर्वगुण सम्पन्न लायकू संसारय् गनं हे मदु । थुगु वास्तु निर्माण कलाय् फुक्क देस स्वयाः नं नेपाल अग्रगण्य जू ।

परन्तु थुगु दर्शनीय ऐतिहासिक राजप्रासाद कैलाशकूट भवन फिस्वसःदं लिपा जूवल्य् थौं उकियागु अवशेष तक नं लुइके मफुनि, आशा दु— इतिहासकारतय्गु अनुमानकथं हाडिगां अथवा देवपट्टन (ग्वल) पाखे जुइ, गुलिसिनं धयाच्चन^२— यलया गुईट द्वयात संकेत यानाच्चन ।

थ्वय्कःयागु कुलधर्म शैवी जूसां वय्कलं बुद्धधर्मय् नं उत्तिकं हे मान मर्यादा तयावंगु प्रमाण खनेदु,— देवदेवतापिनिगु पूजा आज्ञा परिलोप मजुइमा धइगु हेतु आयस्ता तयाः वन्दोवस्त मिलय्

१— हुयेनसाङ्ग भारत यात्रा वृत्तान्त

२— प्राचीन नेपाल— पृ. ४६

यानाथकूगु थौया अद्यापि साक्षी स्वरूप हाडिगांया शिलालेखं न्वँवानाच्वंगु दु —

संवत् ल २ [३२] तदनुसार^१ वि. सं. ६४२ आषाढ शुक्ल त्रयोदशीया शुभदिनय् महासामन्त अंशुवर्मा निम्नलिखित बौद्धविहार व प्रसिद्ध देवदेवतापित श्रद्धानुसार पूजाभाग समर्पित^२ यानाथकल —

(१) श्रीपशुपति	पुटाप २	पशुपतिनाथ
(२) दोलशिखरस्वामि	" २	चांगुनारायण
(३) श्री [साह्ये] गुँ विहार	" २	स्वयम्भू महाचैत्य
(४) श्रीमानविहार	" २	मानविहार [चूकवाहा:]
(५) श्री [राज ?] विहार	" २	तेवाहाल ?
(६) श्रीखजूँरिका विहार	" २ ?
(७) श्रीम ... म विहार	" २ ?
(८) सामान्यविहार	पु ३ प १	कच्चावाहा:
(९) श्रीरामेश्वर	" ?
(१०) श्रीहंसगृह	" ?
(११) श्रीमानेश्वर	"	हाडिगांया मानेश्वर
(१२) श्रीसाम्बपुर	"	शान्तिपुर
(१३) श्रीवाग्वतीपारदेव	"	कोटेश्वर ?
(१४) श्रीधारामानेश्वर	" ?
(१५) श्रीपर्वतेश्वर	"	जामाच्चो ?
(१६) श्रीनरसिंहदेव	" ?
(१७) श्रीकैलाशेश्वर	"	कैलाश
(१८) श्रीभुम्भुक्तिजलशयन	"	भुईज:सिनारायण

थुगु प्रकारं [साह्ये] गुँ विहार स्वयम्भू महाचैत्य एवं साम्बपुर [सम्बरपुर — शान्तिपुर] गन कि दुने सम्बरदेवता मुख्य देवता जूगुलि शान्तिपुरया नां सम्बरपुर धका: नं गनं गनं वंशावलीस उल्लेख यानातइत:गुलि शान्तिपुरयात साम्बपुर धा:गु नं जुइफु ।

अंशुवर्मा थथे देवभक्त जक मखु, परन्तु सामाजिक क्रान्ति परिवर्तन ह्यत् शान्तिनायक भगवान् बुद्धयागु सुधार नीति अनुसार जातिपातियागु भेदभाव मतसे थ्वय्क: कुशल नीतिज्ञ दूरदर्शी महाराज अंशुवर्मा तिब्बतया प्रतापी राजा स्रचंगम्पोयात थ:सुपुत्री राजकन्या भृकुटी विवाह याना-बिल । थ्वय्क: भृकुटी [हरिततारा] या नापं बुद्ध, अक्षोभ्य, मैत्रेय, भैषज्य गुरु व आर्यतारा

१- लिच्छवी संवत्को निष्कर्ष अनुसार

२- सिल्भान लेवी नं १४

भिक्षापात्र* आदि त्रिरत्नया शासनीक कीर्तिवस्तुतः क्वसःया रूप्य बियाछ्वतः^१ । थ्व घटना ईस्वी ६४० स जूगु खः ।

फलस्वरूप थ्व हे क्वसःया अनुरूप थौं तिब्बत देसय् बुद्धधर्म प्रचार जुयाः उगु देसया कला व संस्कृतिया जग बल्लाकेत गुलि गथे योगदान विल धइगु तिब्बतीया इतिहासं कनी । थुगु विवाहया घनिष्ठ सम्बन्धं नेपाल-तिब्बत नाप राजनैतिक, कूटनैतिक व पारिवारिक सम्बन्ध जक तयाव्यूगु मखु अपितु नेपाली कला, संस्कृति व धर्मयागु नं गुबलसं लोममनीगु किसिमं अनयागु जनजीवनय् छाप अङ्कित यानाबिल । उगु बेलाय् भृकुटीं तिब्बतय् बुद्धधर्म प्रचार यात । गुकि याना थौंयागु विश्वं तिब्बतयात अज्ज बुद्धधर्मया छगू प्रमुख स्थान मानय् याःगु दु । थुगु रूपं छगू देसया धर्म, कला व संस्कृतियात मेगु देसय् यंकाः मैत्रोपूर्ण भावनाय् प्रचार यानाः उगु देसया वासिन्दातय्त सम्भ्य व सुसंस्कृत जुइकेगु गुगु देन विल व इतिहासं लोमंके फइमखु ।

राजा अंशुवर्मा हाडिगांया शिलालेखय्^२ थथे धइतःगु दु—

प्रजाहितार्थोदयत शुद्धचेतसांशुवर्मणा श्रीकलहाभिमानिना

कथंम्पुजा मे सुखिता भवेदिति प्रियाव्यवस्थेयमकारि धीमता ।

श्रीकलहाभिमानो राजा अंशुवर्मा समस्त प्रजापिनिगु सुख समृद्धिया लागी न्ह्याबलें उद्योग यानाचवनीह्म बुद्धिमान पूर्वक गथे यानाः थःप्रजापिनिगु सुख शान्ति जुइ धइगु शुद्ध चित्त तयाः प्रियकर स्थिति बन्देस दय्काबिल ।

अंशुवर्मा बुद्धधर्मप्रति श्रद्धा अभिव्यक्त यासे थःगु बुद्धमती^३यागु शिलापत्रया शिरोभागय् बुद्धधर्मया प्रसिद्ध धार्मिक चिन्ह धर्मचक्र अङ्कित यानाः थ्वया जःखः चला अङ्कित यानाव्यूगु दु । थुकि स्पष्ट भाव फल्कय् जू— वाराणसी सहर मृगदावनय् शाक्यमुनि बुद्धं सर्वप्रथम पञ्च भद्रवर्गीपित धर्मचक्र प्रवर्तन यानाबिज्याःगुया स्मारक । थुगु प्रकारं बुद्धपिसं न्ह्यात्थाय् न्ह्याबलें धर्मोपदेश बिइत तयार जुल कि अथे हे धर्मचक्र मुद्रा यानाः धर्म व्याख्यान याय्गु ज्या शुरु जुइ । गुगु धर्मचक्र मुद्रा प्रदर्शित बुद्धया प्रतिमा सारा बौद्ध जगतय् प्रचार जुयाच्वंगु दु ।

पुनः थुगु धर्मचक्र चिन्हया रहस्य थुलि जक मखु, नेपाःया छगू थःगु हे विशेषता दु कि— पञ्चबुद्धात्मक स्वयम्भू महाचैत्यया पञ्चचिन्ह (चक्र, वज्र, रत्न, पद्म व विश्ववज्र) यात उच्चकोटि दार्शनिक प्रतीकात्मक रूप्य स्वयम्भू चैत्यया गर्भगृहया फुसय् च्वनाः चतुर्दिगय् महाकारुणिक दृष्टि अवलोकन यानाच्वन । थुगु विशुद्धि दृष्टि स्वयाः न छगू तहः च्वय् सम्मानपूर्वक तयातःगु पञ्चचिन्ह जुल, गुकियात पञ्चबुद्धया थःथःगु कूलया चिन्ह धकाः धाइ । थुगु पञ्चकुलया चिन्ह नेपाली शैली चैत्यस सर्वत्र थासय् प्रयोग याना वइच्वंगु खनेदु । गुगु पञ्चकुल चिन्ह मध्यय् च्वय् च्वनीगु आदिबुद्ध

* नेपाल देश और निवासी पृ. १०२ — धयातःगु दु— राजकुमारी भृकुटीं थःनापं भगवान् बुद्धया भिक्षापात्र संदेसय् ज्वनावन ।

१— पुरातत्त्व निबन्धावली— पृ. २३२

२— इण्डियन एन्टीक्यूरी, पृ. १६९, भगवानलाल इन्द्रजी, ई. सं. १८८०

वैरोचन तथागतयागु नामं प्रसिद्ध जुयाच्वंगु चक्रचिन्ह खः । थ्व हे चक्र स्वयम्भू महाचैत्यया प्रतिनिधि स्वरूप जुयाच्वंगुलि थुगु चक्रचिन्हयात उचित सम्मानार्थ स्वयम्भू वन जंगलस विहार यानाच्वंगुपि शान्तिया प्रतीक जःखः चला निह्य तयाः दथुइ शोभायमान जुइक चक्र अङ्कित याना वइच्वन । चैत्यया प्यख्यरसं हलपतिस क्रमशः वज्र, रत्न, पद्म एवं विश्ववज्र तयातःसा दथुइ चक्रचिन्ह दु । थुगु चक्रचिन्ह ऊवात्त स्वयंबल्य होस मदय्फु, तर चक्राकार रूप्य त्रयोदश चक्रावली प्रस्तुत यानातःगु दु । थुगु त्रयोदश चक्रावली त्रयोदशभुवनय स्वयं धर्मचक्र प्रवर्तन जुयाच्वंगु दु धइगु अर्थ सिद्ध जू ।

थुगु पवित्रगु हरिश्चक्र चिन्हाङ्कित शिलाभिलेखयात ल्वय्क, गथे भारताधिपति सम्राट् अशोक-यागु थःगु पञ्चमस्तम्भ लेखय् निर्देशन यानाः क्यनातल कि- पशुपंक्षीपिनिगु प्रति करुणां प्रेरित जुयाः अहिंसायागु विषयय् वर्णन यानातल । अथे हे दयावान् राजा अंशुवर्मा बुँगय् च्वंगु थःगु शिलापत्रय् थथे उल्लेख याना तइतल :-

बुगायूमीगा [म] निवासोपगता [न्] कुटुम्बिनो
यथा प्रधानङ्कुशलमाभाष्य [समा] ज्ञापयति
विदितम्भवतु भवतोङ्कुक्कूट सुकराणा
... नां मत्स्याराञ्चावाधनेन परितुष्टैरस्माभिः

अंशुवर्मा थथे धाःगु दु- 'बुगायूमी ग्रामस्थित मुखिया लगायत रैती दुनियातय्के कुशलक्षेम न्यनाः आज्ञा जूगु दु कि थ्व खँ छिमिसं सोकि- खा, फा व न्यातय्त दुःख कष्ट मव्यूगुलि छिपि खनाः खुशि जुयाः आंकन गामय् अधिकरण [कर] त प्रवेश जुइगु रोका यानाः छिमित अनुग्रह तयागु दु ।'

प्रस्तुत शिलालेखं थ्व खँ स्पष्ट जू- अंशुवर्मा छह्य तःघंहा अहिंसावादी शासक खः धइगु । सम्राट् अशोकं थें थ्वया दया प्रेमयागु सीमा खालि मनुष्यमात्रयाके जक मखु परन्तु प्राणिमात्रयाके तक नं व्याप्त जू धइगु अर्थ स्पष्ट जू ।

थुगु शिलालेखय् खा, फा व न्याया नां अङ्कित यानातःगुलि थ्व नं अनुमान याय्फु- नेपाःया थःगु परम्परा धार्मिक विश्वास अनुसारं बाहन स्वरूपं द्योयात ह्यसिइकेगु चलन दु । तदनुरूप बुँगायूमी (बुँग) ग्रामया मुख्य देवता ललितपुरया अधिष्ठाता नेपाः सहकालया निर्मित बिज्यानाच्वंहा श्रीबुँगमलोकेश्वर मत्स्येन्द्रनाथया बाहन न्या खः^१ । थन हे बुँगायूमी ग्रामया सतिक्च्वंगु वादेसया प्रमुख देवता वज्रबाराही, थ्व हे देवोया मूल बाहन फा^२ जुयाच्वन । अथे हे मेह्य सुं गुह्य देवताया बाहन स्वरूप खा जुइफु । थुगु प्रमाणानुसारं उपरोक्त देवदेवीपिनिगु प्रति श्रद्धा अभिव्यक्त यानातःगु आभास खनेदु ।

लिच्छवी जुजु राजा वृषदेव, मानदेव एवं शिवदेवपिसं गथे बौद्धविहार दय्काः बुद्धधर्मया

१- अशोकके धर्मलेख, पृ. ३४१

२- इण्डियन एन्टीक्यूरी. पृ. १६९, भगवानलाल इन्द्रजी, १८८० इ. सं. ।

३- मत्स्येन्द्रनाथ स्वयाः न्हापा अंशुवर्माया पालय् मीननाथ स्थापना जुइ धुँकूगु दु ।

४- वज्रबाराहीया लिच्छवनय् कोलमुखी फायागु शिर धारण यानाच्वंगु खनेदु ।

सेवा यानावन, अथे हे राजा अंशुवर्मा नं राजविहार दय्कावन^१ । नापनापं धर्मराज स्वरूपं जटाधारी लोकेश्वर (मीननाथ) चांदुगलोकेश्वर [चाकबाहाःद्यः] या मूर्ति दय्काः विधिवत् बौद्धाचार्यद्वारा प्रतिष्ठा याकेविल^२ ।

थुलि जक मखु बडो चतुरोह्य बुद्धिमानी जुयाच्चंहा जुजु अंशुवर्मा वज्रयानयात लक्ष्य यानाः स्वयम्भू चैत्य अट्टारकयात शुक्ल पंचमीखुनु दय्दसं पर्व चलय् याय्गु गुठी तयाथकूगु दु^३ ।

थ्व खँ उल्लेख यानातःगु अभिलेख स्वयम्भू चाकलय् मलासे गोकर्णेश्वर महादेवया चाकलय् लानाच्चन । आशा दु, गन कि मदनरामवर्द्धनं स्वयम्भूयागु खँ न्ह्यथनाः इतुं बाहाःयागु ने. सं. ५०२ यागु शिलालेख च्वयाथकल, अथे हे जयज्योति मल्लयागु पशुपतिइ च्वंगु शिलापत्रय् श्रीस्वयम्भू धर्मधातु वागीश्वर महाचैत्ययागु जीर्णोद्धार चर्चा यानातःगु थें निःसन्देह थुगु वज्रयानयात लक्ष्य यानाः स्वयम्भू चैत्य भट्टारकयात पर्व चलय् याय्गु गुठो तःगु अंशुवर्मायागु शिलाभिलेख गोकर्णय् लानाच्चंगु जुइफु ।

थ्व अभिलेख अप्पो थासय् स्यनाः खण्डित जुयाच्चने धुंकल । गुलिखय् समयतकं थ्व अभिलेखयागु महत्व मथूगुलि अनया पूजारीतय्सं चन्दन घोटय् याय्गु याना वइच्चंगु खः ।

१- हिमवत्संस्कृति, पृ. ११

२- देवमाला वंशावली, पृ. ४५

३- लिच्छवीकालका अभिलेख, सं. ८९, धन वज्र वज्राचार्य ।

राजा नरेन्द्रदेवया स्वयम्भू पूजा व गुरु शान्तिकर दर्शन

जुजु नरेन्द्रदेवया पर्यायस कानफताजोगी गोरखनाथं थःगुरु श्रीमत्स्येन्द्रनाथ करुणामय नेपाल बिमज्याय्कं थुगु आश्रमं दनेमखु धकाः धयाः नवनागराजपि आसन याताः व मृगस्थली वनय् तपस्या याताबिज्यात । उबलसंनिसें नेपाल मण्डलय् मेघ शून्य जुयाः जलवृष्टि मजुल । जल वृष्टि मजुगुलि याताः नेपालय् तच्चोगु हाहाकार जुल । उबलय् अन च्वंपि प्रतिष्ठित ज्ञानी गुणी पण्डित जोतिषी मुंकाः सल्हासाहुति याताः बिचाः यात— चिन्तामणि-मत च्याकाः आष्फानिक योगय् बिज्याःह्य अनेक उपाय कुशल ज्ञान सियाच्चंह्य महागुरु श्रीशान्तिकरयाथाय् वनाः उपदेश न्यनेगु खँ कोजित ।

थुगु निर्णयकथं भावभक्ति सन्तोष जुइह्य दुर्भिक्ष शान्त याताः सुवृष्टि जुइगु उपाय याइह्य नेपाल सहकाल याय्त जोगेश्वर जुयाः तपस्या याताच्चंह्य थजाःह्य महागुरु श्रीशान्तिकराचार्यया शरण वनेमाल धयाः आवश्यकीय सरसामग्री ज्वलंकुलं दय्काः पूजाकु दक्व न्ह्यो न्ह्यो तयाः पुरोहित, मन्त्री भारदार, प्रजा सकलें ल्यू ल्यू तयाः राजा नरेन्द्रदेव साह्येगुँ गिरि गोपुच्छ गिरि पर्वतय् थ्यंकःबिज्यात ।

गोपुच्छ गिरि स्वयम्भू पर्वस्थानय् थ्यंकाः श्रीस्वयम्भू महाचैत्य धर्मगातु वागेश्वरयात विधिकथं दर्शन व पूजा याताःलि अनंलि शान्तिपुरय् वनाः गुरु शान्तिकर वज्राचार्ययात नमस्कार याताः पूजा याताः छचाःलं च्वनाः थःगु देसय् जुयाच्चंगु आपद् विपद् विषय कयाः भक्तिपूर्वक प्रार्थना यात ।

थुगु प्रार्थना न्यनाः कय्कय्च्याःह्य प्रजापिनिगु उपरय् तःधंगु दया करुणावानह्य उत्साही राजा नरेन्द्रदेवयात गुरु शान्तिकराचार्यजुं आज्ञा प्रशन्न जुल— 'भो महाराज ! कीजिसया देस नेपालय् जलवृष्टि जुइमखु, छायाःसा गोरखनाथ धइह्य छह्य योगेश्वर वयाः मृगस्थली वनय् च्वनाः

नवनागराज आसन यांना: तपस्या यांनाचवन । थुह्मा योगेश्वर दनावन धा:सा तिनि जलाधिपति नवनागराजापित स्वतन्त्र जुया: जलवृष्टि जुइ, नत्रसा जलवृष्टि जुइमखु ।'

थ्व खँ न्यना: नरेन्द्रदेव राजां हानं विन्ति यात- 'भो गुरु ! थुह्मा गोरखनाथ जोगीयात उगु आसनं थनाछ्वय्त छु जत्तन उपाय याय्माली ?' राजाया खँ न्यना: गुरुजुं आज्ञा जुल- 'थुह्मा जोगेश्वर महापुरुष नारायणया अंश जुयाचवंह, थ्वइत बल जबरजस्ति थने फइमखु । विन्तिभाव यांना: नं जिइमखु, छायाधा:सा थ्वया गुरु लोकनाथ मत्स्येन्द्र दर्शन याय्था कारण्य् एकचित्त यांना: तपस्या यांनाचवंगु दु । बिना श्रीलोकनाथ नेपाल्य् मविज्याय्कं दनीमखु । उकिं थुह्मा जोगीयात याकनं थनेत श्रीआर्यावलोकितेश्वर करुणामय लोकया कारण्य् कामुनि धइगु धासय् शशि नाम यक्ष राजाया द्व:छिह्मा मचाखाचा मध्यय् दक्खिसिवय् चीधिक:ह्य लोकनाथ मत्स्येन्द्र धाय्का जन्म कयाचवन ।

'थुगु कामुनि धइगु देसय् श्रीलोकनाथ जन्म जुसें निसें सुथय् पिना: न्हिनय् पाकय् यांना: नका: प्रजालोक प्रतिनाल यांना: लहिना विज्यानाचवन । थुह्मा श्रीलोकनाथ विज्याके फुसा जक गोरखनाथ थ:गुरु दर्शन याय्त दनावनी । अथेया निम्ति लोकनाथ विज्याकेत जत्तन जुक्ति यांना: थन ह्य्माल । लोकनाथ ह्य्फुसा जक थुह्मा गोरखनाथ तपस्यां दनावनी, बिना श्रीकरुणामय दर्शन मयासें दनावनी मखु ।'

थुलि गुरुयागु जुक्ति उपदेश न्यना: थ:गु शंका समाधानया लागी जुजुं हानं विन्ति यात- 'भो दयाधारी गुरु ? थ्व कामुनि धइगु देस गन गुखे सुनां स्यू, अले अन वनेत गथे यांना: वनेमा: ? न्ह्यागु जत्तन उपाय यांना: जूसां वसपोल श्रीकरुणामय लोकनाथ मत्स्येन्द्र नेपाल्य् निमन्त्रणा यांना: विज्याकेमाल । गुलि जक थथे मेघ शून्य जुइका: जलवृष्टि मजुइका: दुर्भिक्ष जुइकाचवने ? थुगु अवस्थाय् छलपोल सुम्क चवनेगु वखत मखुत । तुरन्त थुकिया जत्तन जुक्ति उपदेश बियाविज्याहुँ । यदि छलपोलं करुणा मतलसा देस नरेश जनता त:धंगु दु:खसागरय् लाइगु जुल । थुगु भय त्राशं याकनं याकनं रक्षा यांनाविज्याहुँ, उद्धार यांनाविज्याहुँ ।'

थुलि राजायागु इनाप न्यना: गुरु शान्तिकरं शान्तिपुरया दुने दुहांविज्याना: जातिस्मरण धइगु समाधिइ चवना: न्हापा न्हापा जुयावंगु खँ लुमंका: विचार यांनाविज्यात- ह्यसपीठद्वं धयागु थासय् चवना: श्रीयोगाम्बरयाके सेवा भक्ति यांना: पूजा यांनाचवनावलय् उवलय् अन जित: नापलाय् धका: जिह्मा याक: काय् शक्तिदेव धयाह्य तुप्लुकक थ्यंक:वल । तर, थ:काय् ल्यू ल्यू वयाचवंगु धा:सा मखना । उगु पूजा यांना: श्रीपरमेश्वर योगाम्बर सुप्रशन्न जुया: आज्ञा जुल, 'भो शान्तिकर ! छंगु महार्थक्रिया भक्तिभाव खना: जि अत्यन्त सुप्रशन्न जुया, आ: थुगु बेलय् छंगु तपस्या पूर्ण जुया: छंत वरदान विइगु शुभमुहूर्त जुल, तर थुगु बेलाय् जिमित हिंसा भोग व्यु ।'

थुगु दिव्यवाणी न्यना: शान्तिकर वज्राचार्यजुं विन्ति यात- 'हे परमेश्वर ! योगाम्बर !! क्षमा यासे विज्याहुँ, जि जूसां गुबलें गनं स्वइतं प्राणिघाटक मयांना, उकिं जि गथे हिंसाकर्म यांना: भोग विइ ? सु गुह्य पशुयात भोग विइ ?' थ्व बेलय् हानं श्रीयोगाम्बरं दिव्यवाणी जुल- 'भो शान्तिकर ? छंगु ल्यू ल्यू व:ह्य व्यु ।' थुलि खँ न्यना: लिफ: स्व:गु बेलय् थ: हे काय् जुयाचवन खनी ।

थः काय्यागु रूप खनेवं व धाय् थ्व धाय् छुं मफयाः खालि मुम्क च्वनाः महाधन्दा पीर कयाः अपशोच यानाच्चन । 'अहो आश्चर्य ! जि नं थ्व काय् वःगु गथे मखन, आः गथे याय् !' धकाः शान्तिकरं हानं बिनति यात— 'भो परमेश्वर ! क्षमा यानाविज्याहुँ, जि थ्व हे काय् छ्हा सिबय् मेपि सुं मचाखाचा मदु ।' उबलय् हानं परमेश्वरं आज्ञा जुल— 'थुहा मचा छंगु पाखे' जन्म जुइमाःगु योगुत्योगु संयोग जक खः । थ्व जा धात्थे छ्हा काय् मखु । थ्व मचा भविष्यत्कालय् नेपाल उद्धार याय्त विज्याइहा श्रीआर्यावलोकितेश्वर जक खः, कालान्तरय् नेपालय् विज्याके कारणस पुसा जक जूवःहा जुल । थ्वया मांस जक जिमिसं भक्षण याय्, हार जक थ्व पीठसं थुनाः ति । थ्वइगु जीवात्मा परमात्मा श्रीलोकनाथ आर्यावलोकितेश्वर करुणामय जुयाः जगत उद्धार याइहा जुइ, उकि थुगु हारया पुसा कयाः लिपा कालान्तरय् वसपोल करुणामय पद्मपाणि बोधिसत्वयागु मूर्ति दय्काः रथ जात्रा जुयाः लोक उद्धार याइहा जुइ ।'

थुगु महार्थसिद्ध जुइगु आत्मीय स-देश न्यनाः शान्तिकरं निःशंक जुयाः दृढ विश्वास यानाः श्रद्धाभक्तिपूर्वक थुहा मचा भोग चह्लय् यानाविल । थुहासिगु ला हि जक भोजन यानाः हार जुक्व अधिष्ठान यानाः अन हे भूमिसं थुनाः गुप्त यानातल । उबलसंनिसं थुगु स्थान ह्मसपीठ धइगु नामं प्रसिद्ध जूगु जुल । थुजाःगु महार्थसिद्ध जुइगु ज्या सिद्ध जुसेलि हानं शान्तिकरं थुहा परमेश्वरयाके बिनति यात— 'भो परमेश्वर ! आः थुहा जि पुत्र शक्तिदेवया गुवलय् दर्शन दइ ?' श्रीयोगाम्बरं लिसः बिल— 'हे प्रियवत्स ! कालान्तरय् छं नं दर्शन याय्त छ्हा शिष्य नं थ्व परमेश्वर श्रीलोकनाथ नेपालय् विज्याके माली तिनि, उबलय् निःसन्देह दर्शन याय् दइ ।' थुकथं आज्ञा दय्काः श्रीयोगाम्बरं वरप्रसाद बियाथकूगु खँ जातिस्मरणज्ञान लुमंकाःलि थुगु कार्यय् 'जि धन्दा काय्माल, जोजलपे माल' धकाः मनय् भाःपाः समाधिजोगं दनालि थुगु खँ विस्तारं नरेन्द्रदेव राजायात न्यंकल— 'भो महाराज नरेन्द्रदेव । न्हापा पूर्वजन्मय् गुगु प्रकारं जितः श्रीयोगाम्बरं आज्ञा जूगु खः, उगु प्रकारं छंत कने धुन ।' थ्व खँ न्यनाः राजाया मनय् अतिकं हर्ष जुयाः माःथाय् माःगुतक व्यवस्था याय्गु तत्पर जुल । 'भो गुरु ! गुपि कामुनिया यक्षगणपित शान्त यानाः व श्रीलोकनाथ कथाय् व्वनाह्य माल ।'— राजायागु बिनतिभाव न्यनाः गुरु शान्तिकरं थःशिष्य बन्धुदत्त आचार्ययात सःतके छ्वत । गुरुया आज्ञा थें उपस्थित जुयाः प्रदक्षिणा यानाःलि 'आज्ञा प्रशन्न जुया विज्याहुँ' धकाः बिनति यात । थःशिष्य बन्धुदत्तयागु उत्साहयुक्त वचन न्यनाः गुरु शान्तिकरं आज्ञा जुल— 'भो प्रियशिष्य बन्धुदत्त ! छ व राजा नरेन्द्र छिपि निहा हित्तचित्त मिलय् जुयाः कामुनि क्षेत्रय् शशि धयाहा यक्षराजाया १००० ह्य मचाखाचा मध्यय् कनिष्ठह्य सुपुत्र ३२ ता लक्षणं संयुक्त जुयाच्चंहा बोधिसत्व श्रीकरुणामय थुहा परमेश्वरयाथाय् वनाःलि नाना प्रकारं शान्ति स्वस्ति यानाः यक्षगणपित बोध यानाः थुहा लोकेश्वर जक्ष पुत्र करुणामय नेपाल मण्डलय् विज्याकेमाल ।' गुरु शान्तिकरं शुभ आशीर्वाद सहित मज्जल यानाः बिदा बियाहःगु जुल ।

स्वयम्भू महाचैत्यप्रति आचार्य वन्धुदत्त व राजा नरेन्द्रदेवया आस्था

नेपालय् गुलिनं जात्रा महोत्सव दइच्चन, उकिइ मध्यय् लोक प्रसिद्ध जुयाच्चंगु सर्वश्रेष्ठगु आर्यावलोकितेश्वर करुणामय (मत्स्येन्द्र नाथ) यागु रथजात्रा जुयाच्चन ।

थुगु जात्रोत्सव विविध क्रियां संयुक्तगु, अद्भूत इतिहास साक्षि दइच्चंगु, देस नरेश प्रजा सकलयातं हितकरगु, सर्वधर्म समन्वय (साम्प्रदायिक) भावं रहितगु, भक्तजनपिनिगु श्रद्धाभक्ति पूजां आकर्षितगु, विविध स्तोत्र पाठ संगीत नृत्यद्वारा स्वागत सम्पन्नगु, नाना प्रकारया उत्सव समारोह पाखे मनोरञ्जनगु, लोकिकलोकोत्तर गुणालंकारपाखे शोभा वृद्धि जुयाच्चंगु, कल्पान्कल्प पर्यन्त क्षमता प्राप्त पृथ्वीयात सौभाग्य लाभ जुइगु रथ प्रस्थान, संसार निर्वाण एकत्व रूप एवं अपार करुणा, अथाहज्ञान, अचिन्त्य उपायकुशल चर्याया साकार रूप सुन्दर मूर्ति महाकारुणिक, विश्वनाट्य सूत्रधार, योगीन्द्र वन्द्य, सिद्धनाथ, मत्स्येन्द्रनाथ भक्त चिन्ताणणि, बुद्धमौले, त्रैलोक्यनाथ, सुभिक्षदेव गोरक्ष गुरु, नेपालपाल, सर्वलोक वन्द्य, मणिपद्मधर, महायान प्रवर्त्तक— श्रीमत् आर्यावलोकितेश्वर सर्वगुण सम्पन्न बोधिसत्वयागु गुगु जात्रा ७गु शताब्दी न्ह्यो आचार्य गुरु वन्धुदत्त व राजा नरेन्द्रदेवयागु अथक परिश्रमद्वारा थुगु अद्वितीय महान् जात्रा सुसम्पन्न जुल^१ ।

थुगु जात्राया विषय कयाः वंशावलीइ मुक्तकंथं प्रशंसा यानातःगु दु^२ । ‘मत्स्येन्द्रस्य समायात्रा नास्ति ब्रह्माण्ड मण्डल’य् थुजाःगु सर्वगुण सम्पन्नगु बोधिसत्वयागु जात्रा सारा पृथ्वो मण्डलय् दर्शन दुर्लभ जुइ । थुहा अवलोकितेश्वर — ललितपुरया श्रीशोभा जुयाः नेपाःमितय् सदां सहकालया

१- गोपाल वंशावली— राजा नरेन्द्रदेव वर्ष ३५ तस्य आचार्य वन्धुदत्त द्वयेन श्रीबुंगमलोकेश्वर भट्टाकस्य जात्रा कृता भवति ।

२- मत्स्येन्द्रपद्य शतक, पृ [ख]

प्रतीक जुयाः च्वनाविज्याःगु दु । वसपोल करुणामययागु अपार महिमां जायाच्वंगु गुगु रथजात्राया निर्मित सुमेरु मण्डलया प्रतीकात्मक भावनाय् मिलय् यानाः रथ प्रस्तुत यात १। गुगु रथया सर्वोपरी स्थान धकिवाय्मोया फुसय् नेपाल प्रतिष्ठाता स्वयम्भू महाचैत्यया प्रतीक परमेश्वर आदिबुद्ध श्रीस्वयम्भू जगद्गुरु वज्रसत्वया मूर्ति स्थापना यानाबिल । थ्व खः बन्धुदत्तयागु आज्ञानुसार राजा नरेन्द्रदेवजुया स्वयम्भू महाचैत्यप्रति अपार श्रद्धा निश्चय उत्तम जूगुलि स्वयम्भू मूर्ति श्रीवज्रसत्व स्थापना याःगु जुल ।

थुकिया मतलब थ्व खः कि नेपाःया सर्वप्राचीन इतिहासयात लुमंकेया निर्मित स्वयम्भू हे नेपाःया सम्पूर्ण देवदेवताया चूडामणि खः धइगु प्रमाणित याकेया लागी, नेपाःया सम्पूर्ण सृष्टि हेतु व हे स्वयम्भू ज्योतिरूप संस्मरण याकेत अर्थात् बौद्ध इतिहास स्वयम्भू पुराणया महात्म्ययात सदैव शिरोपर याकेया निर्मित साक्षि स्वरूप नेपाःया सर्वश्रेष्ठ जात्रा श्रीकरुणामययागु रथया च्वग् तइतःगु जुल । थौतक नं थ्व परम्परा विद्यमान हे तिनि । गुह्य खः वज्रसत्वयात लोकजनं सिगुद्यः (स्वयम्भू) धकाः मानय् याना वइच्वन । गुलिसिनं धाय्फु, वज्रसत्व धइहा स्वयम्भू आदिबुद्ध खः ला ? थुकिइ निःसन्देह वज्रसत्व आदि बुद्ध खः धइगु बौद्धशास्त्रय् थासंथासय् उल्लेख जुयाच्वंगु दु^२ ।

नरेन्द्रदेव राजा बुद्धप्रति तस्सकं श्रद्धा निश्चय दुहा बुद्धभक्त खः धइगु प्रमाण चीनिया राजदूत वाङ्गुएनचेयागु यात्रा वृत्तान्त अनुसार थथे वर्णन यानातःगु दु । ताङ्गवंशी सम्राट्पिनिगु इतिहासय् नेपाःया जुजु नरेन्द्रदेवयागु विषय कयाः थथे धयातःगु दु^३— नरेन्द्रदेव सकली मोती स्फटिक, मोती—सीपि, भिपू व अम्बरं सुसज्जित जुयाच्वनी । थ्वइगु न्हाय्पनय् मणि जडय् यानातःगु कुण्डलपाखे शोभायमान जुयाच्वनी । थ्वय्कःयागु जँय् बुद्ध-मूर्ति अङ्कितगु सुशोभितगु पेटी धारण यानाच्वनी । थ्वइगु राज्यासनय् सिंहया आकृति सहित जुयाच्वंगु दु । लायकुलिइ स्वां व अत्तर ह्वला तइ । राज्यया उच्चाधिकारीत सिंहासनया जःखः च्वनाच्वनी एवं सलंसः सशस्त्र सिपाहिंत जुजुया अङ्ग रक्षा याय्त च्वनाच्वनी ।

पशुपति स्थित जयदेवयागु शिलालेखय् जुजु वृषदेवयात सुगतशासन अति प्रेमी धकाः प्रशंसा यानातल, थुखे ताङ्गवंशी सम्राट्पिनिगु इतिहासं नरेन्द्रदेव राजायात बुद्ध-भक्त खः धइगु प्रमाणित याय्हुःगु दु । थौतकयागु नेपाःया जुजुपिनिगु इतिहासय् पशुपति, तलेमाजु, कुमारीमाजु, गोरखनाथ एवं गुह्येश्वरी लोकनाथ—करुणामय, हरिसिद्धि आदिपिनिगु राष्ट्रिय मुद्राय् (धेवाय्) नाम अङ्कित यानातःगु दुसां नरेन्द्रदेव जुजु थें थःगु हे शरीरय् धारण यानातल धकाः गनं थौतकं उल्लेख प्राप्त जूगु मदुनि । थ्व छगू राजा नरेन्द्रदेवया बुद्ध-भक्तिया विशेषता खः । जुजुपिनिगु परम्पराय् थ्व छगू विलक्षण खः ।

१— आर्यावलोकितेश्वर परिचय, पृ. ३८

२— गुणकारण्डव्यूह प्रथम परिच्छेद—

तद्यथादि समुद्भूतो धर्मधातु स्वरूपकः । पञ्चबुद्धांश संजातो जगदीश स्तथागतः ।

महाबुद्धोजगन्नाथोच्छास्तामहेश्वरः । षड्भिज्ञो महावीरो वज्रसत्वोविनायकः ।

३— नेपालको ऐतिहासिक रूपरेखा, पृ. १०३

ताङ्गवंशया इतिहासय् स्वयम्भूया चर्चा

ताङ्गवंश चीन देसया इतिहासकथं विचाः याना स्वयम्बल्य् स्वयम्भू महाचैत्य दर्शन निम्ति निश्चय नं अज्ञात् यात्रित नेपाः थ्यंकःवल जुइ । तर कीसं अःपुक अनुमान याय्फु-थुपि चीनिया शिष्टमण्डल गन गुथाय् चाःहुल ? सु सु वल ? गन वासं चवन ? अले छु यात ? थ्व अनुसन्धानया विषय तिनि ।

न्यागु थजु, इमिगु ताङ्गवंशया इतिहासक्रमय् नेपाःया धर्म विषय चर्चा यायां स्वयम्भू महाचैत्यया खँ उल्लेख याना तइतल । थ्व नेपाःमि बौद्धजनतय्गु लागी हर्षया विषय खः । थ्व स्वयम्भू महाचैत्ययात धार्मिक, सांस्कृतिक, ऐतिहासिक एवं पुरातात्त्विक सम्बन्धी गुलि गथे खँ दु उगु विषय बांलाक सिइकेत उगु मूलग्रन्थ ताङ्गवंशया इतिहास हे अध्ययन याना मस्वसे कीसं सिइके फइमखु । अथे नं इ-पा मिनाएमजुयागु नेपाल धइगु अनुदित लेखकथं^१ विचाः याना स्वयम्बल्य् उगु ग्रन्थय् स्वयम्भू महाचैत्ययात आध्यात्मिक दृष्टिकोणं प्रशंसा याना वइच्चंगु खनेदु । छायाःसा उगु लेखय् थथे च्वइतःगु दु—

“आकाशयागु आत्मा निःसन्देह
ज्योतिर्मय स्वयम्भू आदिवुद्ध ।”

थ्व उद्गार व्यक्त याना तइतःगु श्लोकया आशयकथं विचार याना स्वतः धाःसा की नेपाःमि बौद्ध धर्मावलम्बीपिसं स्तोत्र याना वइच्चंगु वृहद् स्वयम्भू पुराणया प्रारम्भिक सूत्रया प्रथम चरणनाप पाय्छि जूवः—

स्वयम्भुवे विपच्छान्तं भानवे धर्मधातवे
जगदाल्हाद रूपाय श्रीस्वयम्भुवे सदानमः ।

उकिं थुपि चीनिया शिष्टमण्डल नेपाः वःवल्य् श्रीस्वयम्भू दर्शन याय् धुँसेलि उगु

१- इ. पा मिनाएमजुयागु ‘नेपाल’ लेख “नेपाली” पत्रिका पूर्णाङ्क ४८ स प्रकाशित ।

शिष्टमण्डलया विद्वानपिसं स्वयम्भूया आत्मकथा विषय सविस्तार वर्णन याना तइतःगु संस्कृत भाषां चइतःगु वृहत् स्वयम्भू पुराण इमि थःगु भाषाय् निःसन्देह अनुदित यात जुइ धइगु उक्त श्लोकया आशयकथं प्रतीत जू ।

थुगु रूपं चीन देसय् कीगु नेपाःया महत्वपूर्ण इतिहासत यक्व यक्व सुलाच्चंगु दु । छायाःसा कोसं स्यू—जगत् विख्यात कलाविद् कलाकार अरणिको (वलबाहु) १३ ख्रिस्वंगुगु शदीपाखे याहा ल्हासा व चीन देसय् वनाः गुजाःगु अद्भूत चमत्कार क्यन उगु उल्लेख प्रमाण थौतकं गनं नेपाःयागु इतिहासय् न्ह्यथनातःगु लुयामवःनि । अथे हे भारत व नेपाःया बौद्ध विद्वानत संदेसय् वनाः गुलि नं महत्वपूर्ण बौद्धग्रन्थतय्गु भाषान्तर जुल एवं लिच्छवी जुजु नरेन्द्रदेव राजायागु जय् चिनातःगु पेटीस बुद्धया मूर्ति अङ्कित जूगु खना धकाः गुगु चीनियातय्सं च्यावंगु खः, उगु विषय नं कीगु नेपाःया बौद्ध इतिहासय् खने महुनि; गुलि दु चीन व तिब्बती इतिहासय् जक । अज्ज, श्रीलङ्कायागु धर्मवंश महावंश इतिहासय् सम्राट् प्रियजीव अशोक महाराज थः कलाः तिष्परक्षिता, म्हाय् चारुमती, गुरु उपगुप्त भिक्षु सहित नेपालय् विज्यानाः यलदेसय् स्थूदो दय्कल धइगु तक नं । उकिं महापण्डित राहुल सांकृत्यायनजुं धयाबिज्याःगु दु—भारत व नेपाःदेया पुलांगु इतिहास धर्म, संस्कृति, साहित्य बांलाक ह्यसिइकेत अभाव पूर्ति याय्त निश्चय नं चीन व तिब्बती इतिहास अध्ययन व अनुसन्धान याय्माः । महापण्डितजुं थःह्यं धयाथे ज्या नं यानाथकल । तिब्बतय् वनाः गुलिखय् शास्त्र अध्ययन व अनुसन्धान यानाः प्रसिद्ध अवतारी लामाजुपिनिगु सत्संगत यानाः थःगु हिन्दी भाषा साहित्य सुसमृद्ध यानाथकल । थौं नेपाःयापि बौद्धाचार्यपिसं उखेपाखेयागु धर्मग्रन्थ इतिहासय् ध्यान तःपि महुनि धाःसां अत्युक्ति जुइमखु ।

जितः विश्वास दु, कीथाय् काठमाण्डू उपत्यकाय् दुने च्वंपि बुरापाकातय्गु धापूकथं विचार याय्बलय् चीनियातय्गु कीर्तित नं थन महुगु मखु । चीनिया बादशाहयात उपहार दोहलपिइगु, मल्ला पिइगु जग्गा किण्डोल विहारया छगू क्यव बारिइ दु, चिनियातय्सं स्थापना यानाथकूगु धर्मथलो न्यागःमणि चैत्यया भग्नावशेष दनि, अथे हे देवघाटय् च्वंगु चीन मन्दिर नामं प्रसिद्ध भग्नावशेष स्तूप थौं सामान्य जंगलयागु रूप धारण यानाच्चंगु दु । थन उगु स्तूपया पिखाद्योपि कारपातय् दुने सुलाच्चंगु दनि । शायद् थुगु कीर्तित अज्ञात चीनिया शिष्टमण्डलतय्गु संस्मरण खः धइगु परम्परागत चलय् जुयाच्चंगु खनेदु ।

चीनया बादशाहयागु उपहार ज्वनाः स्वयम्भू दर्शन याःवःह्य वाङ्हुएनचे

स्वयम्भू महाचैत्ययागु गुण गौरवप्रति श्रद्धा अभिव्यक्त यासे इलय्-व्यलय् अनेक देसदेसान्तरं विभिन्न श्रद्धालु महोदयपिसं थःथःगु सदिच्छानुसार सौहार्दपूर्ण उपहार चढ्य याना वयाच्चंगु खँ कथा, पुराण व इतिहासं कना वइच्चंगु हे दु । थ्व हे सन्दर्भय् इस्वी संवत् ६५७ पाखे चीनया बादशाह हेन धइह्यस्यां एशिया महादेसया अतिकं प्रसिद्धगु चैत्यकुलनायक नेपाल प्रतिष्ठाता धर्मराजिक चैत्यस सुप्रतिष्ठित बुद्ध बुद्ध महाबुद्ध आदिबुद्ध ज्योतिरूप श्रीस्वयम्भू निम्ति दुनुगलंनिसें श्रद्धा भक्तिपूर्वक अतिकं भिगु बांलाःगु बहुमूल्यगु दर्शनीय काषाय वस्त्र (चीवर वस्त्र) चीनया राजदूत वाङ्हुएनचेया ल्हातय् चह्य याना व्यु धकाः वियाहःगु जुल । चीन बादशाहयागु कुसिल ज्वनाः वाङ्हुएनचे काठमाण्डूस थ्यँसॅलि श्रीस्वयम्भू महाचैत्ययात आदरपूर्वक द्वहलपा विल ।

प्रसङ्गवश काषाय वस्त्र (चीवर वस्त्र) या विषय कयाः छत्वाःचा खँ न्ह्यथने- गुलिसिनं थ्व नं धाय्फु चीनया बादशाह थें जाःह्यसिनं आदिबुद्ध स्वयम्भूयात ज्वाहारात सुवर्ण दान दक्षिणा एवं बहुमूल्य कलात्मक वस्तु उपहार द्वहलपा मव्युसे खालि काषाय वस्त्र जक छाय् द्वहलपिल ? अले थ्व काषाय वस्त्रया छु महत्व दु धकाः नं शंका याय्फु ।

बुद्धधर्मय् अनेक कल्पित वस्तु विविध सांस्कृतिक एवं कलात्मक वस्तु उपहार द्वहलपिङ्गु स्वयाः नं त्रिकायदिव्य प्रतीक (कुसुङ्थु) चह्य यानागुया पुण्य असंख्य तःधं धकाः कनातल । थ्व त्रिकायदिव्य प्रतीकया रूपय् बुद्धया कायिक शासन कीर्ति-बुद्धमूर्ति, बुद्धया वाचिक शासन कीर्ति-सद्धर्मग्रन्थ, बुद्धया चैतसिक शासन कीर्ति-चैत्ययात मानय् याना वइच्चन । थ्व हे स्वतां छथाय् तयाः चह्य याय्गु यात हे 'त्रिकायदिव्य प्रतीक' धकाः धाइ । त्रिकायदिव्य प्रतीकया सारांश रूप 'काषाय वस्त्र' द्वहलपेगु बौद्धदृष्टि थुनिया महत्व व गौरव यक्व दु । उकिं थ्व हे खँयात ध्यान आकर्षित यासे श्रद्धापूर्वक काषाय वस्त्र द्वहलपाहःगु जुल ।

थुगु काषाय वस्त्र अर्थात् चीवर वस्त्रया विषय सूत्र विनयय् थथे वर्णन यानातःगु खनेदु—

खतु वस्त्र धाय्वलय् शारीरिक स्वास्थ्य रक्षा व लाज शर्म वचय् याय् निमित्त जक थें च्वं, तर थुकिइ दुने दुहांवनाः स्वतः धाःसा बुद्धोपदेशित गुण व अलङ्कार युक्तगु इहत्र परत्र निगू लोकयात नं ल्वःगु भिगु बांलाःगु हलुकागु उत्तम वस्त्रया रूपय् मानय् यानातःगु खनेदु । थुगु काषाय वस्त्रया ऊन बालसूर्यया वर्ण थें ह्यासुगु ह्याउँगु ल्वाकज्याःगु आशा राग तृष्णा रहितगु वैराग्यभाव वयनातःगु शान्तिया विजय कण्डा भाःपाः तइतःगु काषाय वस्त्रयात ज्ञान परिपक्व जूगु संक्रान्त्यर्थं वर्णन यानातल । गनं गनं दुःखित प्राणिपिनिगु लागी विशेषं करुणा युक्तगु वर्ण धकाः नं धयातल । अथे हे पापकर्म व विषयप्रपञ्चय् भुलय् जुइगु अवस्थाय् स्मृति विइगु परिशुद्ध शीलया आदर्श रूपा धकाः नं मानय् याःगु खनेदु । सारांश रूपय् धाल धाःसा विनय व अनुशासन पालन जूगुया चिं खः । हानं मेगु अर्थय् महाक्षान्ति निर्भयया शुभ प्रतीक तथागतया वस्त्र चीवर धकाः उल्लेख यानातःगु जुल^१ ।

थुजाःगु महत्वपूर्णगु काषाय वस्त्र श्रीस्वयम्भूयात द्वहलपे धुंकाःलि उगु वखतया लिच्छवी जुजु नरेन्द्रदेवनाप सौहार्दपूर्ण शिष्टाचार भेटघाट जुसैंलि चीन देसया अतिथि वाङ्महानचेयात काठमाण्डू उपत्यकाया दक्षिण पश्चिमया विचय् च्वंगु अद्भूत कौतुकमय जुयाच्वंगु छगू नागपुखूया विषय कयाः वर्णन न्यंकूगु दु । उगु पुखू दर्शन निमित्त राजदूत वाङ्महानचे लिसे काःपिं सकलें पुटुनाउ धइगु थासय् थ्यंसैंलि अन नं पूर्वपाखे स्वयावन, गन कि उपेक्षित् किसिमगु ऐतिहासिक पुखूया किनारय् थ्यन । थ्व पुखूया संरक्षण रूपय् पञ्चनागराजपिं बासं च्वनाच्वंगु दु । थुपिं अग्नि स्वरूपपिं नागराज धाइ । थुपिं चीनियातय्सं थ्व च्यानाच्वंगु मियागु सहायता कयाः नय्गु नं ज्वरय् यानाः नल । थ्व च्यानाच्वंगु मियात धुलं छ्वाकेवलय् मि प्वाक्क सिनावनी, पलख लनाः अले हानं न्हापा गथे खः अथे हे मि दन्कय् जुयाः च्यानासंतुं च्वनी धयातल । अमिसं थ्व नं धयातःगु दु—थ्व लखय् दुने छगू दिव्य मञ्जुषा उज्ज्वलगु थल छगः नं खनाच्वन । तर उगु थल सालाकाय् अनेक कोशिश यात, गुलि-गुलि थःथाय्पाखे सालेत स्वइ, उलिउलि छं हे तापाक तापाक लानावनी । थ्व घटना खनाः इपिं सकलें आश्चर्य चाः । धयातःगु, दु थ्व दिव्य मञ्जुषाय् दुने मिलेपोसा (अनागत बुद्ध आर्य मैत्रेय बोधिसत्व) यागु दिव्यरत्नं सुसज्जितगु मुकुट दुने स्वथनातःगु धाइ । थुकियागु हे सुरक्षा व स्वागत निमित्त इपिं पञ्चअग्नि स्वरूपपिं नागराजपिसं गुबले मतोतू, न्हावले इपिं अन दया हे च्वनी^२ ।

थ्व थाय्थागु विषय कयाः प्रसिद्ध इतिहासकार सिल्भान् लेभीजुं नं थःगु 'ली नेपाल' धइगु किताबय् उल्लेख याय् धुंकूगु दु—वर्तमान थुगु थाय् कच्छपाल गिरि चोबाहाःया क्वस्सं च्वंगु धनाःदहः (तौदहः) यात मानय् यानातल । थौतक थ्व थाय् गुबलय् नेपालय् अनावृष्टि जुइ उबलय् नागसाधन निमित्त प्रसिद्ध जुयाच्वन । थ्व हे थाय् मञ्जुश्री गुरु कर्कोटक आदि नागराजपित बासं ब्यूगु पवित्र तीर्थस्थान धकाः नं मानय् याना तइतःगु दु ।

१- सद्धर्म पुण्डरीक, धर्मभाणक परिवर्त श्लोक २४

२- प्राचीन नेपाल, डी. आर. रेग्मी, पृ. १७५

गुखुनु माघशुक्ल पञ्चमी उत्तरभद्र नक्षत्र वृहस्पतिवार चूलाइ, उगु पर्वयात 'मञ्जुपञ्चमी'
धाइ । थ्व हे मञ्जुपञ्चमीखुनु अतीतकालय् धर्माकर जुजुपिसं थ्व हे तःदहः (धनाःदहः) स सूर्योदय
जुइवं स्नान यानाः कर्कोटक नागराजयात अर्घ वियाः थनयागु जल यंकाः स्वयम्भू मञ्जुश्रीयात स्नान
याकाः पूजादि सत्कार यानाःलि थःगु छेय् लिहांवयाः पालं यानावन धइगु खँ उल्लेख यानातल ।

थथे मञ्जुपञ्चमीखुनु तःदहलय् मोल्हुयाः कर्कोटक नागराजयात अर्घ वियाः थनयागु जल
ज्वनाः श्रीस्वयम्भू धर्मधातु वागीश्वर गुरु मञ्जुश्रीयात स्नान याकाः विधि थें पूजा यात धाःसा उहा
भक्त दरिद्रहा जूसां कुबेर समानं धनाढ्य जुइ, लाता पाकः ग्वाज्यो जूसां नं पण्डित जुइ धकाः
धयातःगु दु^१—

माघशुक्ल पञ्चम्यामुत्तरा भाद्र भान्वितः ।
गुरुवारो यदि भवेत् ख्यातासा मञ्जुपञ्चमी ॥
तस्मिन्योगे मञ्जुघोषं सदारं पूजयेन्नर ।
दीनः श्रीदाधिकं द्रव्यं मूकः पाण्डित्यमाप्नुयात् ॥

१- स्वायम्भू पुराणपाखें उद्धृत

पुण्याग्रदूत नामक पत्रय् प्रकाशित, पृ. १

सुनयश्रीमित्रया स्वयम्भू महाचैत्य दर्शन

पण्डित सुनयश्रीमित्र माध्यमिक बौद्ध शास्त्र तथा न्याय शास्त्रया नं महान् विद्वान् जुयाच्वन । कीगु वंशावली अनुसार थ्वय्कःयागु थःगु जन्मभूमि कपिलवस्तु नगर उल्लेख यानातल^१ । थ्वय्कलं नेपाःया विशेष महात्म्य न्यनाः श्रीस्वयम्भू महाचैत्य व नैरात्मादेवी गुह्येश्वरी दर्शनार्थ नेपाल थ्यंकःवल । स्वयम्भू महाचैत्य दर्शन याय् धुँसेलि ललिताख्य जङ्गलनाप अशोकस्तूपया लिक शंकरतीर्थ (वाग्मती) या किनारापाखे उच्चगु स्थानय् बासं च्वन ।

शिक्षा-दीक्षा लाभ निम्ति ज्ञान अनुसन्धानया लागी ल्हासाया छ्हा नांदंछ लामाजुया शिष्यत्व ग्रहण याय् ल्हासा वन धकाः नेपाःया वंशावलीइ च्वयातल । तर तिब्बती वंशावलीइ धाःसा—मिनाग लोचव नामक पण्डितं निमन्त्रणा यानाः ल्हासाय् सःताः थ्वय्कःयाके वज्रावली मण्डल साधन शिक्षा ग्रहण याःगु खँ दु । ल्हासाय् छुं समय विस्तार यासे लिपा नेपालय् लिहांवल । थः न्हापा गन बासं च्वनागु खः अन हे स्थान सुनयश्रीमित्रजुया निम्ति उपयुक्त भाःपिल । थन हे थःह्यं ज्वनावःगु असंख्य ज्वाहारात मध्यय् छगू वैदूर्यमणि रुद्रदत्त राजायात मियाः दीपङ्कर तथागत प्रतिमा स्थापना यानाः यम्पि महाविहार दय्काः आजीवन अन हे बासं च्वंगु जुल ।

छुं समय लिपा गोवर्द्धनमित्र व कपिलमित्र निह्य वया शिष्यपिसं थःगुरु सुनयश्रीमित्रयात मामां ललितपुर सहरय् थ्यंकःवल । इपिं नं थःगुरुया आश्रमनाप सतिक ईखाछेँ बहो व क्वन्तिबही दय्काः थन हे थातं च्वन । सुनयश्रीयात माले धकाः वयाच्वंपि शिष्यत लिहां मवसेलि हानं सुनयश्रीया मां व काय्पि इमित नापलाय्गु इच्छां नेपाः थ्यंकःवल । अले व हे थःमां व काय्पिनिगु लागी थः च्वंच्वनागु विहारया नापं प्यपुंक चोक धइगु छगू थाय् दय्काविल । छय्चा जन्म जुसेलि वय्कलं थःकाय्पात भिक्षुव्रत काय्केबिल तथा थःगु वंशय् सन्तान जुन्म जुइ धुंकाः अबुह्यसिनं भिक्षुव्रत धारण

१- महाबुद्ध सिद्धिनरसिंह आजुयाके च्वंगु भाषा वंशावली ।

याय्गु नियम चल्य् यात । थ्व हे नियमानुसारं थन च्वंपित ब्रह्मचर्यं भिक्षु (विक्खुवरे) धाय्गु चलन जुल ।

थुगु यम्पि महाविहार निर्माता सुनयश्रीमित्रयात स्थानीय भाषां 'षटांजु' धकाः धयाच्वन । मतलब, बौद्धतीर्थ यात्रा यानाः बौद्धविहार दय्केत थःगु साथ्य् प्रशस्त मात्रां ज्वाहारात ज्वनावःगु जुयाच्वन । धयातःगु दु—थ्वय्कः श्रीसमृद्धिशालीह्य जूया निम्ति खुगू कोटि ६०,०००,००० धन सम्पत्तिया प्रमाणं विल्वरमणि ज्वनाः नेपाः वःह्य जूया निम्ति थ्वय्कःयात नेपाल भाषां षटांजु (षट्कोटि धनं गृहीत्वा आगत आजु षटांजु) धयाच्वन ।

यम्पि विहारया नापं च्वंगु चुक्य् च्वनाः श्रीबुंगमलोकेश्वरया अष्टधातु मूर्ति दय्कल । उकिं थुगु चुक करुणाचुक धइगु नामं सिद्ध जुयाच्वन । थुगु अवलोकितेश्वर (मत्स्येन्द्रनाथ) या मूर्ति दय्कूह्य कलाकार शुभश्रीमित्र शाक्यवंश खः^१ । उकिं थौतक नं बुंगद्यःयागु रथ निर्माण कार्यय् शान्ति स्वस्ति याय्त सुनयश्रीमित्रजु^२या वंशतय्त करुणामयया पुरोहित भाःपाः दान प्रदान याय्माःगु परम्परा थिति वन्देश कायम जुयाच्वंगु दु ।

१- बुंगद्यः नेपालय् हःगु वंशावली, पृ. ८४

२- सुनयश्रीमित्रयात 'सून्यश्रीमित्र' धकाः ईवही महाकाः छचलिइच्वंगु शिलापत्रय् थथे च्वइतःगु दु—“सून्यश्रीमित्र नामोऽयं दाक्षिण्योभू द्विजोत्तमः ।”

स्वयम्भू चैत्य दर्शनार्थ शान्तरक्षित् नेपाल आगमन

भारतीय बौद्ध विद्वान् शान्तरक्षित् च्यागु शताब्दीया थःगु समयय् आपालं ख्याति प्राप्त जुह्म खः । स्वयम्भू महाचैत्ययागु विशेष ऐतिहासिक महत्व एवं सर्वगुण सम्पन्न पवित्र पुण्यभूमि भाःपाः थ्वय्कः नेपालय् वयाः स्वयम्भू पर्वस्थानस च्वंवल । थन हे च्वनाः आदिबुद्ध स्वयम्भूया प्रभावं शून्यतावाद महायान धर्मय् नवजागृति प्रदान याय्गु चेष्टा यानाच्चन । शान्तरक्षित् बौद्ध शास्त्रया प्रसिद्ध विद्वान् जक मखु परन्तु शुद्ध रूपं चर्याचारी जुयाच्चंहा नं खः । थुगु हे ताकय् ल्हासाय् बौद्धधर्मया विरोधी भावना प्रबल जुयाच्चन । थ्व हे कारणं बुद्धधर्म पक्षया दलतय्सं छ्हा बौद्धविद्वानयात ल्हासा ब्वनाय्केगु प्रयत्न यानाच्चंगु जुयाच्चन । थुजाःह्य विद्वानया आवश्यकताया निम्ति माले धकाः नेपालय् वःपिं तिब्बती बौद्धतय्सं शान्तरक्षित्यात नापलानाः तिब्बत ब्वनाय्केगु सविनयपूर्वक आग्रह यात । उगु आग्रहपूर्ण प्रार्थनायात सहर्ष स्वीकार यासे ल्हासा प्रस्थान जुल ।

अन च्वंपि गुलिसिनं प्रश्न याइवलय् शान्तरक्षित्जुं थथे लिसः ब्यूगु दु—“तर्कद्वारा सिद्ध जुइगु खँयात अनुशरण याय्गु तथा तर्कद्वारा सिद्ध मजुइगु खँयात मानय् मयाय्गु हे जिगु सिद्धान्त ।” थुजाःह्य विशुद्ध तार्किक सुयोग्य विद्वानयात खनाः तिब्बतया बोन धर्मावलम्बी मनूत छाय् प्रश्न जुइ ? इमिसं थ्वसपोलया विरोध याना जुल । संयोगवश वय्कः ल्हासाय् बिज्यानाच्चंवलय् भूकम्प, दुर्भिक्ष आदि अनेक दुर्घटना नं जुल । शान्तरक्षितं प्रचार याःगु न्हूगु धर्म यानाः कीगु ल्हासा देसय् अशान्ति जुल धकाः तक नं बोन धर्मानुयायीतय्सं मखुगु खँया प्रचार याना जूगुलि आन्दोलन मचय् जुल । फलस्वरूप ल्हासा देसया जुजुं थ्वय्कःयात ल्हासा देस तोता वनेगु वचन ब्यूगु जुल । थुकिं यानाः शान्तरक्षित् थःगु मन शान्ति याय्त हानं नेपालय् लिहां वय्माल । थन वज्रयानया महान् आचार्य मन्त्रधर गुरु पद्मसंभवयात नापलात, नापं थःत जूगु सारा अनुभव व्यक्त यानाः न्यंकल । शान्तरक्षितं दृढ विश्वास याःगु दु—गुगु ल्हासा देसय् फैलय् जुयाच्चंगु बोन धर्मावलम्बीतय्त परास्त यानाः वशय्

तय्गु पद्मसंभव थे जाःहा घोर तान्त्रिक सुयोग्य सम्कृय् जुयाः वय्कलं पद्मसंभवनाप निको खुसिइ ल्हासा वनेशु अनुरोध यात ।

मन्त्रधर पद्मसंभवं अनयागु परिस्थिति विषय सुधार हय्त बोनतय्त परास्त यानाः थःगु अलौकिक प्रातिहार्य प्रदर्शन क्यनाः ल्हासाय् विशुद्ध रूपगु वज्रयान धर्म स्थापना यानाबिज्यात । थुलि जुसेलि स्वस्थ मनं वृद्ध शान्तरक्षित् नेपाल तोताः हानं ल्हासा देस प्रस्थान जुल^१ । थ्वय्कलं थन आपाः आपालं बुद्धधर्म प्रचार व प्रसार यानाबिल । गुलिछि समय लिपा ई० सं० ८४० स सलयापाखें चोट परय् जुयाः असामयिकवश थ्वय्कःया ल्हासा देसय् हे देहावसान नं जुल ।

१- नेपाल उपत्यका मध्यकालीन, पृ. २४९

गुरु पद्मसंभवया स्वयम्भू दर्शन व श्मशान योगचर्या^१

शान्तरक्षित्या निवेदन अनुसार तिब्बत वने स्वयाः नं न्यादँ न्ह्यवःनिसें पद्मसंभव नेपालय् बिज्यानाच्चन । थ्वय्कः काश्मिर देसया वर्तमान गजनी अन्तर्गत उद्यानया राजकुमार खः । नेपालय् नं वज्रयान प्रवेश याःह्य सम्भवतः पद्मसंभव हे जुइमाः । थौंतक नं नेपालया वज्राचार्यपिसं पुइगु तपुलि गुगु खः उगु पद्मसंभवं पुयाबिज्याःगु उग्येन् [उद्यां] तपुलिया अनुकरण धाःसां छुं पाइमखु । उकिं पद्मसंभवयात गुरु उग्येन् रिम्पोछे धकाः नं धयातल । थ्वय्कः स्वयम्भू महाचैत्य दर्शन याय् धुंकाः थन हे लिकच्वंगु श्मशानस च्वनाः श्मशान योगचर्याय् व्यतीत यानाबिज्यात । स्वयम्भू चैत्यया श्मशान धइगु वर्तमान बौद्ध शैव निखलःसियां तान्त्रिकपिसं मानय् याना वइच्वंगु विष्णुमती किनाराय् च्वंगु करवीर श्मशान खः । थुगु श्मशानयात तिब्बती इतिहासय् 'रामडोले' धकाः धयातःगु दु । थ्वय्कः पद्मसंभव श्मशान योगचर्याय् पारङ्गत जूगुया चिन्ह स्वरूप गुरु पद्मसंभवया तपुलिइ गृद्धया पा छपा तियातःगु दु ।

गुरु पद्मसंभव नेपालय् बिज्यानाच्चंगु इलय् आपालं सिद्धभूमि—तीर्थ, श्मशान, गुफा, पहाड पर्वत आदि थासय् च्वनाः छगू छगू योगचर्या यानाबिज्यात धकाः तिब्बती इतिहासं कनामच्वंगु मखु ।

- (१) स्वयम्भू महाचैत्य प्रदक्षिण
- (२) करवीर श्मशानस श्मशान योग
- (३) काष्ठमण्डपया सिंहासनय् च्वनाः वादीजननाप शास्त्रार्थ
- (४) फर्पिङ गोरखनाथ गुफाय् योगचर्या
- (५) फर्पिङ शिखरनारायण (याङलेस्वेमा) विघ्न शान्तिया लागी मण्डल साधन तथा सिद्धि लाभ ।
- (६) साङ्खु खड्गयोगिनी दर्शनयागु खँ नं च्वइतःगु दु ।
- (७) तिष्ठुङ तमनाऋषीश्वरे (ऊचामिदुचि) योगयागु ई० ।

अतिशा दीपंकरया स्वयम्भू महाचैत्य दर्शन

फिछगुगु शताब्दीया पूर्वाद्धिपाखे अतिशा दीपंकरयागु विद्वता तिब्बत थ्यंक प्रचार जुयावसैलि थ्वय्कःयात ल्हासा देसया विद्वत् परिषद्या पाखे निमन्त्रणा छ्वयाहल । थ्वय्कः विक्रमशील विद्यापीठया थःगु समय प्रकाण्ड विद्वान जुयाच्चंहा जुयाच्वन । थ्वय्कलं तिब्बतया निमन्त्रणा स्वीकार यासे थथे मतिइ चिन्तन! यात—नेपालया धर्मराजिक श्रीस्वयम्भू महाचैत्य दर्शन याय् धुंकाः जक तिब्बत वनेगु निश्चय यात । उगु निश्चित विचार अनुसार १०४१ ई. सं. नेपालय् थ्यंकाः स्वयम्भू महाचैत्य दर्शन एवं पूजन याताः दच्छितक थन हे स्वयम्भू पर्वस्थानय् वासं च्वन ।

थ्वय्कलं नेपाःया विक्रमशील महाविहार (थँवही) स छगू मन्दिर दय्काथकूगु दु । अतिशा दीपंकरयात भारतय् वनाः काःवंपि अर्थात् लँस्वःवंपि तिब्बतो नाग्सो लोचवं नेपाःया स्थम्बिहारय् च्वंपि भिक्षुपिनिगु आचरण विषयय् थःत लगय् जूगु महत्वपूर्ण खँत न्ह्यथनातःगु दु । वय्कःपिनिगु धापूकथं थँवहीया भिक्षुपिनि बौद्ध शास्त्र अध्ययन परिपाटि व भोजन विधि तस्सकं प्रशंसनीय जू । थ्वय्कः नागसो लोचवं आपालं बौद्धग्रन्थ अनुवाद यानाविल । वय्कःयात ग्रन्थ अनुवाद कार्यय् ग्वहाःलि व्युपि पण्डितपि मध्यय् शान्तिभद्र नामक नेपाली पण्डितयागु नां नं उल्लेख यानातःगु जुयाच्वन^१ ।

नेपालं अतिशा दीपंकर नरी प्रदेशय् वन, तर अन छुं वर्षतक च्वनाः वय्कः किरोंग वल । वय्कःयागु इच्छा धाःसा पाल्पा वने धइगु; तर स्थानीय मनुतय्गु आन्तरिक कलहं यानाः लँ मचाः, अले पाल्पायागु यात्रा स्थगित यात । किरोंगपाखे वय्कः तिब्बतया यू प्रदेशय् वन ।

अतिशा दीपंकरं तिब्बतय् गुलि प्रभाव परय् यात अथे नं नेपालय् वयाः उलि प्रभाव परय् याय् मफुगु खनेदु । धयात गु दु—नेपाःया छहा राजकुमारं वय्कःयागु शिष्यत्व ग्रहण याःगु जूसा नं नेपालया निर्मित विशेष प्रभावित याय् मफुत ।

अतिशा दीपंकर तिब्बत वने धुँसैलि वय्कःया समसामयिक सिद्ध नारोपा (हास्यवज्र) तथा वय्कःया शिष्यपिसं अत्यन्त कर्तव्यपरायण जुयाः नेपालय् तान्त्रिक धर्म प्रचार यात ।

१- नेपाल उपत्यकाको मध्यकालीन इतिहास, पृ. २६८

अन्तिम भारतीय बौद्ध भिक्षु पण्डित वनरत्न शान्तिपुरी विहारस

भारतीय अन्तिम बौद्ध भिक्षु पण्डित वनरत्न सँदेस्य वनाः अनुवाद व धर्म प्रचार यात^१ । श्वय्कः या जन्म पूर्वदेस (बंगाल?) या छगू राजवंशय् जूगु खः । श्वय्कः बुद्धघोषया शिष्य । २० दँया उमेरय् सिंहलय् वनाः अन च्वंहा आचार्य धर्मकीर्तियाके शिष्यत्व ग्रहण यानाः भिक्षु जुल । ६ दँ तक अन हे च्वनाः अध्ययन यात । हानं श्रीधान्यकटक लँपु जुनाः मगध देसय् थ्यंकःवल । अन हरिहर पण्डितयाके कलाप व्याकरण व्वन । हानं गुलिखय् थासंथासय् चाःहुं नेपाल थ्यंकःवल । अन नं पण्डित शीलसागरयाके छुं भचा अध्ययन यानाः ई. सं. १४५३ स भोट देसय् वन । व यर्-लुङ्स धइगु थासय् गुलिखय् समय वितय् यानाः भतीचा तान्त्रिक ग्रन्थ अनुवाद कार्यय् ग्वहाःलि यानाविल । हानं नेपालय् लिहांवयाः शान्तिपुरी विहार (स्वयम्भू पर्वस्थान) स च्वन^२ । भोटराज वारराजा (सि-तु) राव्-तेनया निमन्त्रणाय् हानं भोट देसय् वंगु जुल । भोट राजा ग्रग्स-प-डव्यूङ-ग्नस् या पर्यायस राजधानी चेर्स-थङ्ग थ्यंकःवन । गुलिछि समयतक च्वनाः स्वको खुसिइ हानं नेपाः लिहांवल । अले अन हे १४४६ ई. सं. स श्वय्कःयागु देहान्त जुल ।

श्वय्कः पण्डित वनरत्नया विषयय् थथे नं धयातःगु^३ दु—शान्तिपुरी विहारय् च्वने धुंकाः गोविन्द्रचन्द्र विहारय् च्वन । श्वय्कलं याचकवृन्दपित विशेष प्रकारं नय्गु त्वनेगु व मेमेगु आवश्यक सामग्री नं इना बियाच्वनी । श्वय्कयाःगु मृतशरीर अग्नि संस्कार स्वयम्भूपाखेच्वंगु श्मशानय् जुल । अग्नि संस्कार समयय् चमत्कार खने दुगुलि दर्शकगण विस्मित जुल धकाः नं धयातःगु दु ।

१- तिब्बतमे बौद्ध धर्म, पृ. ५४

२- ब्लु एनल्स भाग २, पृ. ८०४

३- ब्लु एनल्स भाग २, पृ. ८०४

स्वयम्भू वैरोचनयाथाय् रत्यचाय्के गुठी तयाब्युगु

स्वयम्भू महाचैत्यप्रति श्रद्धाभक्ति तयाः श्रीस्वयम्भू धर्मधातुया दथुस विज्यानाः सिंहवाहन यानाः बोध्यंग मुद्रा यानाच्चंहा श्रीस्वयम्भू वैरोचन तथागतयात नित्य स्नान पूजा निमित्त देव रत्यचाय्के गुठी तयाविल । लिस्से, न्हियान्हिथं संध्याइलय् संध्या याय्गु दीपदान विइगु समेतं न्ह्यथनातल ।

थुगु स्थितिइ गुठी सदां स्थिर जुइमा धइगु हेतुं थः दिवंगत मां-अबुयागु नामं सुख शान्ति कामना यासे आयस्ता स्वरूप जग्गा तयाः गुठी तयाथकल । थुगु गुठीया बुसादँखुनु स्वयम्भू व शालिक, पौवाहाः एवं कुलदेवता पूजा यानाः व दानपतिया सपरिवार म्हाय्मचा भिनामचा समेतं भव्य नकेमाःगु खँ उल्लेख यानातल ।

सुनां गुह्यसितं थुगु गुठीइ लोभानि पापानि याइ वयात पञ्चमहापाप लाइ; संरक्षण यात धाःसा स्वस्ति कल्याण जुयाः अन्तय् बोधिज्ञान लाय्मा धकाः आशिका यानातःगु दु । थुगु शुभकार्यया साक्षि जूहा वज्रसिंह अले धर्मचित्त उत्पत्ति याःहा दायक जुल वज्रशील महाविहार इकुवाहाया वज्राचार्य धर्मसिंह ।

स्वयम्भू वैरोचनस देव रत्यचाय्के गुठी ने. सं. २१३ श्रावणशुक्ल त्रयोदशोखुनु समर्पण याःगु जुल^१ ।

१- न्हापाया सिजपौया प्रतिलिपि मःभवँतय् चवइतःगु थुगु अभिलेख इकुवाहाया श्रीआनन्दमुनि वज्राचार्यया सौजन्यं प्राप्त ।

तिब्बती भिक्षु धर्मस्वामिजुया स्वयम्भू दर्शन एवं विद्याध्ययन

धर्मस्वामि (चाग्लो-त्सवा) तिब्बतया छह्य विद्वान् बौद्ध भिक्षु खः । थ्वय्कः विद्या अध्ययनया लागी ई. सं. १२२८ स उत्साहपूर्वक नेपाः थ्यंकःवल । नेपाल उपत्यका काठमाण्डूस थ्यंकाः छह्य सतःया संरक्षकं वय्कःयागु वसोबासया लागी माःगु व्यवस्था मिलय् यानाविल । छुं दिन लिपा नेपालया सुप्रसिद्ध पुण्यभूमि स्वयम्भू महाचैत्य विराजमान जुयाच्वंगु साह्रेंगु पर्वतय् सुयोग्यह्य गुरु रत्नरक्षित् बिज्यानाच्वंगु शुभसमाचार प्राप्त जुसेलि प्रशन्न चित्तं अन थ्यंकःवन । उगु थासय् थ्यंकाः श्रीस्वयम्भू महाचैत्य प्रदक्षिणा यानाः अनलि गुरु रत्नरक्षित्या आश्रमय् वनाः वन्दनादि स्वागत सत्कार यानाः बांलाक परिचित जुसेलि वसपोलयाके वज्रयान सम्बन्धी आवश्यक शिक्षा-दीक्षा प्राप्त यानाकाःगु जुल ।

थुगु समयय् गुरु रत्नरक्षित्याके विद्याध्ययन याइपि कल्याणमित्र आदि छह्य तिब्बतो विद्यार्थीपि दइच्वंगु जुयाच्वन । अध्यापन निम्ति गुरु-दक्षिणा स्वरूप प्रत्येक विद्यार्थीपिके छगः छगः घण्ट काइगु चलन जुयाच्वन । थ्वय्कः भिक्षु धर्मस्वामिजुं महापण्डित रवीन्द्रदेवयाके नं मंगलसाधन, गुह्यसमाज, वज्रावली व इन्द्रजाल विद्या आदि विषय अध्ययन याःगु दु । थुपि निह्य गुरुपि मध्यय् रत्नरक्षित् हे तस्सकं ख्याति प्राप्त जूह्य खः । थ्वय्कःयात शिष्यपिनिगुपाखे दक्षिणा स्वरूप ३०० स्वसःगः घण्ट प्राप्त जूगु दु । थ्वय्कलं थुगु अवसरय् स्वयम्भू चैत्य पाखेयागु विहारय् अनेकौं मूर्तित तयार यानाः प्रतिष्ठापन समारोहया निम्ति थाय्वाय् दय्काच्वन ।

नेपाःया धर्मधातु विहार, बुखम विहारयागु विषय नं धर्मस्वामिजुं चर्चा यानावंगु दु । थ्वय्कःयागु विवरण अनुसार धर्मधातु विहार भारतय् तस्सकं प्रख्यात जू, तर तिब्बतय् धाःसा स्वयम्भू महाचैत्ययागु विषय आपालं प्रशंसा याना वइच्वंगु जुल ।

धर्मधातु विहारयात तिब्बती भासं 'थाम्' धाइगु जुयाच्वन । थाम्या अर्थ 'ज्येष्ठ' अथवा 'उच्च' नं धाइगु चलन जू । शायद् थुगु (थाम्विहार) धइगु खास यानाः थम्बही जुइफु । थन छगः चैत्य स्तूप दु । थुगु चैत्यया सन्मुख्य अभय व वरद मुद्रा यानाच्वंहा सुवर्णया बुद्धमूर्ति दु । थुगु विहारय प्रमुख स्थवीर च्वने छिगु मिश्रित धातुयागु छगू अलंकारपूर्ण आसन दु, थुकिइ सुवर्ण, मोती मेगु प्यंगू किसिमया धातुद्वारा सुशोभित यानातःगु खनेदु । थुगु विहारया दानपति महापण्डित गुरु रवीन्द्रदेवजु-यात उगु भव्यगु आसनया द्योने बिज्याकाः वसपोलयात स्वागत सम्मान यात । थनंलि रवीन्द्रदेवजु थन हे च्वनेगु कोजित । मेगु बुखम् विहारय श्रीखण्डया न्यादँ दुहा बालक रूपया छगू बांलागु मूर्ति दु । थ्व हे मूर्तियात पंचामृतद्वारा महास्नान न्हवं याकिइगु थुगु रूपं छगू पक्ष तक पूजा जुया हे च्वनो, मेगु महिनाया छगू सप्ताह लिपा महान् उत्सवया बिचय् हाँदु नां जुयाच्वंपि युवक तान्त्रिकपिसं थःथःगु ल्हातय् छत्र, ध्वज, पताकादि पाखे शोभायमान यानाः नाःनाः प्रकारया वाद्यवादन थानाः उगु सुन्दर मूर्ति देवतायात मन्दिरय् दुने दुहांबिज्याकेगु आह्वान याइ । च्यान्हु दय्काः मूर्तियात ह्याउँक रंगं च्वंकेगु ज्या जुइ ।

थुगु प्रकारं बौद्ध विहार व अनेक लोक संस्कृति पर्व मेला जात्रा अनुभव यायां भिक्षु धर्मस्वामिजु नेपाल देसय् जम्मा ८ दँ तक च्वनाः सिमरौनगढ, मिथिला आदि दक्षिण प्रदेसपाखे चाःहूचवन । लिहांवंचलय् नं काठमाण्डू उपत्यकाया लँ जुनाः स्वदेस गमन जुल ।

धयातःगु दु—धर्मस्वामियागु नेपाल यात्रा विवरणद्वारा फिस्वंगूगु शताब्दीपाखेयागु नेपालयागु सुन्दर इतिहास प्रस्तुत जुइ । वय्कःयागु प्रतिवेदन अनुसार नेपालयागु भौगोलिक ज्ञान, उन्नत आर्थिक अवस्था, समाज सुधार एवं धार्मिक व कल्याणकारी भावना दु धइगु विदित जू । अतिथि व विद्वानपिनिगु बांलाक स्वागत सत्कार जू । धर्मशाला सतःयागु व्यवस्था तस्सकं बांलाः जू । व्यापारीवर्ग खूब धनी धाय्माः । तूर्क व मुगलपिनिगु आक्रमण तथा भयानक उत्पातयागु कारणं भारतीय विद्यालयत पतन व लोप जुजु वनाच्वन । थुकियागु सत्ता काठमाण्डू उपत्यकाय् विद्याध्ययनया लागी सुव्यवस्थित केन्द्रया रूपय् प्रख्यात जुइ धुंकूगु खः । थनयागु हे धर्मग्रन्थ एवं सुन्दर मूर्तित तिब्बत यंकी । तिब्बत लिहांवनेत्यय्काः काठमाण्डूया व्यापारीतय्सं धर्मस्वामिजुयात हादिक उपहार स्वरूप आपालं कलात्मक सुवर्ण रूप्य ज्वाहारात आदिया वस्तुत लःल्हाना विल धइगु समेत उल्लेख यानातःगु जुल ।

केशचन्द्रजुयात स्यंगु वन प्रवेशया वरदान

स्वयम्भू जंगलयागु इतिहासं थ्व कनाच्चंगु दु कि विभिन्न ऐतिहासिक पुरुषपि वयाः अनेक अद्भुत घटना जुयावंगु खँ क्यनावइचवन । गुकिइ मध्यय् छगू अपूर्व घटना थ्व नं खः—किनिगू शदी न्ह्यो थकू जुजु भास्कर वर्माया शासनकालय् जुयावंगु^१—

येँ देया छह्सा साहुमहाजनया केशचन्द्र धइह्सा काय् छह्सा दु । थ्व केशचन्द्रजु धा.सा अतिकं जू ह्यितेमाःह्सा जुयाच्चन । आखिर जू ह्यितुह्यितुं जुलं बुनाः तस्सकं कङ्गाल जुयावन । थ्वइत सुथय् बहनो छछाः तिप्यंक नय्त तक नं मुश्किल जुयावंगुलि यानाः सुवर्ण प्रणाली नगर थहितिइ च्वंहा थःह्सा ततायाथाय् वनाः सुथय् बहनोसिगु छाक तरय् याःवनाच्चनी । थःह्सा किजा केशचन्द्रं तस्सकं दुःख सियाच्चंसां थःथाय् वइचनीबलय् देमाय् जा, कयलय् केँ तरकारि तयावियाच्चनी । छन्हु जा किजाह्से सिनं थःत नकेत तयाव्यूगु देमा, कयः व लःथल समेतं यंकाः जुलय् पानाः बुकाबिल । अथे जुसेलि किजाप्रति दया माया वंसां वइगु आचारप्रति अविश्वास यानाःलि जुलं बुकाबिइगुलि यानाः छन्हु तताह्से सिनं देमाय् मतसे बँय् जा ताना ब्यूगु जुयाच्चन । थथे बँय् जा ताना ब्यूगुलि यानाः तस्सकं लज्याचायाः बँय् च्वंगु जा वँयाः रुमालय् पोचिनाः केशचन्द्र अनं जुरूक दनाः सरासर पिहांवल । पिहांववं स्यंगुया घोर जंगलय् थ्यँसेलि नय् पित्यानाः आकुल व्याकुल जुयाः रुमालय् पोचिनाहःगु जा नय् धकाः स्वबलय् जा तस्सकं नायाच्चंगु खनाः छुं भचा जा गंका नय् धकाः मतिइ तयाः तफाःगु त्वहँतय् जा हिलाः थः त्वहँतय् ग्वतुलाः आराम कयाच्चंबलय् साराक न्ह्यो वल । थुगु हे इलय् लाक बखुंत छबथां वयाः व त्वहँफातय् हिलातइतःगु जा फुक्क नयाः सिमाय् जुनाः बखुंत सकलें प्रफुल्लित जुयाच्चन । उबलय् भुसुकक न्ह्यो वयाच्चंहा केशचन्द्रया कसंक न्ह्यलं चाल, अले थःह्सा त्वहँतय् हिलातइतयागु जा नय् धकाः स्वःबलय् जा छगः हे मखनाः तस्सकं नय् पित्याःगुलि साह्रै अन्दोल जुयाः छुयाय् छुयाय् जुयाः खाः गख्येसे तयाः 'अहो ! जि थेँ जाःह्सा अभागी सुं हे

दइमखु, जि छु नया: जीविका याय् ?' धका: आर्तनाद स्वरं खखं हानं अथे न्ह्यो वय्कल ।

केशचन्द्र विरह याना: खःगु व वइगु साह्ले दीन हीन अवस्था खना: सिमाय् जुनाच्चं पि वखुंतय्सं थथे मतिइ तया: दुःख प्वंकल—'हरे ! गजा:गु दुःखीह्मे सिगु नय्त तयात:गु जा नयागु जुल, जिपि वखुंत नं धिक्कार हे का ! आ: न्ह्यागु जूसां नय्गु नय् धुन, जुइगु जुइ धुं कल, आवंलि थुह्म दुःखी असहाययात जिपि सकले मिलय् जुया: वइगु दारिद्र दुःख शान्त याना: समृद्धिवन्त याना: बिइ ।' वइगु उपरय् तच्चोगु करुणा चित्त तया: विवेकं खंका: व हे जा हिला: गंका: तइत:गु तफा:गु त्वहंतय् वखुंत वया: प्रत्युपकार निम्ति लुंखि फानाथकल । केशचन्द्र न्ह्यलं चाय्का: स्व:बलय् वखुंतय्सं लुंखि फाना तइत:गु खना: आश्चर्य चाल—'अहो ! थुगु स्वयम्भू महाचैत्य विराजमान जुयाच्चंगु अति पवित्रगु भयंगुया वन जंगलय् च्वं पि वखुंतय्गु पाखे लुंखि प्राप्त जूगुलि जिगु थौं दारिद्र दुःख नाश जुया: जित: श्रोसमृद्धि सुख दइगु जुल ।' थुकथं लय्लय्तातां व लुंखि मुंकाकया: छथाय् द्वच्यंगुबलय् निह्य प्यह्य भरियातय्सं कुबिइ फइ थे मच्चन । आ: थ्व स्वयम्भू भगवान् वसलपाच्चंगु स्यंगु वन प्रवेश जुया: उपलब्ध जूगु थुगु सुवर्ण राशि सुनां कुबिइकेगु, थ:ह्म जक ज्वनां नं साध्य मजू धका: महाधन्दा कया: मतिइ चिन्तना यानाच्चंबलय् अकस्मातं अनं व: थनं व: मदय्क गुरुमापा धइह्य राक्षस छह्य तुप्लुक्क थ्यंक:वल । गुरुमापां थुह्य सुन्दर कुमार केशचन्द्रजुयात खनेवं वडो खुशि जुया: 'आ: धा:सा जिगु नय्पित्या:गु तरङ्ग लनिगु जुल, जित: दैवं आहार चूलाके हल ।' धका: धाधां केशचन्द्रजुयात रुम्हय् याय्त सन ।

उगु अवसरय् विचारवान् केशचन्द्रजुं विनम्र अनुरोध यात—'भो राक्षस राज ! छंगु नय्पित्या:गु हीमोचा:गु वारय् छुं धन्दा काय्म्वा:, छंगु इच्छा सन्तुष्ट याना: परिपूर्ण यानाबिइ; तर हथाय्पथाय् चाय्मते— थ्व जिगु शरीर छंत छछा:यात हे आहार गाइकि मगाइ, परन्तु बुद्धिमानी-पिसं थौं निन्हु प्यन्ह्यागु जक लागी स्वइ मखु लिपातकं आहार चूलाइगु थ:गु बन्दोवस्त जुइगु स्वय्मा: । स्व थुगु श्रीस्वयम्भू महाचैत्य निवासस्थान स्वामिगुंया प्रभावं वखुं चातय्गु करुणां प्रेरित जुया: जिगु भाग्यं लाभ जूगु थुलिमछि सुवर्ण राशि दु । थ्व हे सुवर्णया प्रभावं छंत निह् छह्य छह्य मे व छमुरी जाकिया जा नका तय् । तर थ्व जिगु धन राशि सुवर्ण जिगु छेँय् तक थ्यंका विउ ।' केशचन्द्रया वचनयात गुरुमापां सहर्ष मञ्जुर यात । अले व 'सुवर्ण राशि' केशचन्द्रजुयागु छेँ तक आनन्दपूर्वक थ्यंकाबिल ।

केशचन्द्रजुं नं गुरुमापायात थ:ह्मं धया थे नका: त्वंका: थ:गु छेँय् छगू गोप्यगु थासय् सुनानं मखंक तयातल । अथे जूसां गुरुमापा राक्षस मौका मौकाय् ज:ला:खला:तय् मस्त खुया: खुया: नइगु जुयाच्चन । थ्व खँ फैलय् जुजुं येँदेसय् सकभनं प्रवार जुयावन । थौंतक मस्त खल कि 'गुरुमापा वल' धका: मस्तय्त ख्याइगु चलन थे जुयाच्चन । छन्हु त्वा:वा:यापि सकले मिलय्चलय् जुया: गुरुमापा राक्षसयात स्याय्त्वंबलय् थ:गु ज्यूज्यान रक्षाया निम्ति वं कराल त्हात— 'जित: स्याय् छता धाय्मते, थन्हिइनिसें गुवले स्वइह्य मस्त स्याना: नय्मखु, जित: केशचन्द्रजुं गुगु धयाह:गु ख: उगु वचन पुरय् याना:लि छगू अलग च्वनेगु थाय् मिलय् यानाबिल धा:सा थ्व येँदेसय् सुं लाखय् लसितय्गु भय त्राश

वय्के बिइमखु ।' लिस्सें देसवासीतय्सं दैय् छकः होलिपुन्हिया दिनय् छहा मे व छमुरी जाकिया जा नकेगु व लुमधि जंगलया लिकसं च्वंगु तिनिरुयलय् च्वनेगु थाय्या वन्दोवस्त मिलय् यानाः गुरुमापायात सहरय् दुने दुहांवय् मखु धइगु वाचा बन्धन याकल । उगु बखतय् गुरुमापां 'तिनिरुयलय् च्वनाः छु ज्या यानाच्वने ?' धकाः न्यन । थ्व खँ न्यनाः सकसिगुं सल्हानुसार थ्व धाःगु दु कि गुवलें थ्व तिनिरुयलय् त्वहंचात स्वंगः छथासं च्वनाच्वंगु खन धाःसा अलग अलग यानाः फायाबिइगु धकाः ज्या अह्य यानाथकल । उवलसंतिसें थुगु तिनिरुयलय् स्वंगः त्वहंचात छथासं तयाविल धाःसा कन्हय्खुनु वनाः स्वःवनेबलय् अलग अलग जुया च्वनी धइगु अद्यापि लोक कथन दिन ।

जू ह्मिताः सर्वनाश जुयाः आकुल व्याकुल जुयाच्वंहा केशचन्द्रयात स्वयम्भू जंगलया वखुंतय्पाखें प्राप्त जूगु सुवर्ण राशि गुरुमापायागु सहयोगं थःगु छेय् थय्केहल । थ्व हे सुवर्ण राशि धनदौलतपाखें न्हापायागु दीन हीन भाव तनाः एवं दुश्चरित्र वानी मदयाः सद्धर्म चेतना दयावसेलि बुद्धधर्म सेवार्थ सदाया लागि अमर कीर्ति स्वरूप इतुं बाहाः दय्काथकल । थुगु विहार थौंतकं विद्यमान तिनि, धाय् कि येँया प्रसिद्ध विहारत मध्यय् छगू खः । जेतऋषिया नामं जेतवनमहार अनाथपिण्डिक महाजनं दय्काविल धयाथे वखुंतय्गु नामं केशचन्द्रं दय्का ब्यूगु विहार जुयाः खास थुगु विहारया नां केशचन्द्रकृत श्रीपारावत महाविहार धइगु नामं प्रसिद्ध जूगु जुल ।

शाक्यभिक्षु मैत्रीचन्द्रद्वारा स्वयम्भू चैत्य जीर्णोद्धार


साह्येगुँ पर्वत स्थित श्रीस्वयम्भू धर्मधातु वागीश्वरया न्ह्योने पश्चिमपाखे च्वंगु रञ्जना लिपि च्वइतःगु शिलापत्रया प्रमाणानुसारं थ्व खँ न्ह्यथनाच्वना^१ ।

अनुमानित १२ किनिगूगु शताब्दीपाखे अङ्कित यानातःगु शिलाभिलेख जूसां प्राकृतिक तथा मानवीय प्रकोपद्वारा थाय्थासय् प्रायः नष्ट रूप जुयाच्च्वंगु खनेदु । तथापि टुट्फुट् जुयाः अतःवितः वनाच्च्वंगु आखः शब्द व वाक्यया आशयं प्रतीत जूगु जक सज्जन पाठकपिनिगु समक्षय् प्रस्तुत यानागु जुल ।

थुकिइ दक्कसिवय् च्वय् धर्मधातु स्वयम्भू चैत्ययात नमस्कार यासे रत्नसरोजय् उत्पन्न जुयाच्च्वंगु स्वयम्भू ज्योतिरूप धइगु विषय चर्चा यायां मञ्जुघोषया कीर्ति जुयाच्च्वंगु—(शान्तिकर-महाविहार ?) विहारय् विराजमान जुयाच्च्वंगु—धर्मध्वज समान सम्पूर्ण चैत्य स्तूप मध्यय् ज्येष्ठ जुयाच्च्वंगु—गुगु धर्मधातु वागीश्वर शून्यता ज्ञानया धामपुर जुयाच्च्वंगु—स्वभावतः समसुखवशवर्ती जुयाच्च्वंगु—लोकय् सद्धर्म अभिवृद्धि याय्या लागी प्रकाशमान जुयाच्च्वंगु—ब्रह्मनिर्वाणया ज्ञानय् च्वनोपिनिगु निम्ति आनन्ददायकगु—थुगु प्रज्ञोपायात्मक स्वरूप बोधिज्ञानया अधिपति जुयाच्च्वंगु थुगु सद्धर्म चैत्य प्राकृतिक प्रकोपपाखे जीर्ण जुयाच्च्वंगु खनाः शाक्यभिक्षु मैत्रीचन्द्रया श्रद्धा चित्त उत्पन्न जुयाः वज्रानुक्रम विधिद्वारा यष्टिदारु यलसि स्थापना यानाः स्वयम्भू महाचैत्य जीर्णोद्धार कार्य सुसम्पन्न याःगु जुल ।


थुगु शिलालेख ने. सं. ४७० सालय् शमस्सुदीन आक्रमण याय् न्ह्यो हे स्थापित जुइ धुंकूगु खनेदु—कारण थुगु अभिलेखय् अङ्कित रञ्जना लिपि व इचांगु स्थित राजा विजयकामदेव ने. सं. ३२०

१— मेडिभल नेपाल, कोलोफोन्स एण्ड इन्स्क्रिप्शन, पृ. ५६— हेमराज शाक्य ।



स्वयम्भू मूर्तिसंग्रहालयस च्वंगु
मैत्रिचन्द्रया स्वयम्भू जीर्णोद्धार शिलापत्र

1871



THE UNIVERSITY OF CHICAGO
LIBRARY

यागु रञ्जना लिपियागु शैलीइ समानता खनेदु । थुगु निगु शिलालेखया रञ्जना लिपि नाप तुलनात्मक अध्ययन याना स्वतः धाःसा शायद उगु निगु शिलालेखया नं आखः क्यूहा कलाकार व हे छहा जुइगु यक्वं संभव दु । उकिं जितः विश्वास दु, थुगु निगु शिलालेख विजयकामदेवयागु समसामयिक खः ।

थुगु शिलालेखया विषय छगू विशेषता थ्व दु— शिलापत्रया शिर्षचिन्ह श्रावकयानय् च्वंपि भिक्षुपिसं धारणा याना जुइगु शिलाङ्कुश व लः चालय् याय्गु चालनी कियातःगु दु । थुजाःगु प्रकारं श्रावकयानया चिन्ह अङ्कित याना तइत गु थौतक प्राप्त जूगु सम्पूर्ण नेपालया बौद्धशिलालेख्य गनं खने मदुनि । गुलिनं बौद्धशिलालेख्य प्राप्त जूगु शिर्षचिन्ह प्रायः— चैत्य, वज्र, धर्मचक्र, हरिश्चक्र, गजचक्र, अशोकचक्र एवं खड्ग पुस्तक, कर्तिपात्र, खट्वांग, हस्तिवज्र, पूर्णकलश, सप्ताक्षरी कूटाक्षर आदि आदि खने दइच्चनी । परन्तु महायान, तन्त्रवज्रयानी सिद्ध, आचार्य, योगी, विद्याधरपिसं धारण याइगु चिन्ह मजुसे खास यानाः विशुद्ध श्रावकयानिक आर्यसंघ भिक्षुपिसं जक धारण याना जुइगु बुद्धशासनया छगू प्रसिद्ध चिन्ह खः ।

शाक्यभिक्षु मैत्रीचन्द्रजुं थःगु शिलालेख्य विशुद्ध श्रावकयानया मूल चिन्ह शिलाङ्कुश तथाव्यूगुलिं थ्व आशय वुछ्य जू कि मैत्रीचन्द्रजु वर्तमान नेपाःया शाक्यभिक्षु थे केवल गृहस्थी नाम मात्रया शाक्यभिक्षु अवश्य खइमखु । निःसन्देह शुद्ध वानप्रस्थ भिक्षु जुइ । थ्व शिलाङ्कुशया नापं मेमेगु चिन्हत नं अङ्कित यानातःगु दु, थ्व विचारनीय विषय खः । थथे बुद्धशासनया प्रसिद्ध चिन्ह अङ्कितगु शिलालेख खनाः आर्यधर्म विरोधी शमस्सुदीन यवनतय्सं प्रहार याना वन जुइ, उकिं थुगु शिलालेखया प्रायः नष्ट रूप जुल ।

थुगु शिलाङ्कुशया नापं लः चालय् याय्गु चालनी छगू नं तथातःगु खनेदु । थुगु चालनीया साधारण प्रयोग थ्व खः कि बुद्धधर्मय् च्वंपि भिक्षुपि सर्वप्रकारणं हिंसापाखें वच्य जुइगु निःतान्त आवश्यक जूया निर्मित लः त्वनेवल्य लख्य च्वंपि कीचात सीगु भयं अमिगु उपर्य करुणा तय्या लागी वियातःगु छगू प्रकारया ज्याभः खः । मेगु अर्थय् थथे नं जुइफु— कीगु नेपालया अगाढ जलामय कालीहृदया लख्य च्वंपि नवनागादि जलजन्तु एवं थुगु लः छ्वना छ्वय् धुंकाः मञ्जुश्रीया कृपां वनय् जूगु नेपाल देसय् वास याना च्वंपि त्रिकालया प्राणिपि वसपोल धर्मधातु श्रीस्वयम्भू महाचैत्यया प्रभावं सदा सर्वदा सुधार व उद्धार याय्मा धइगु शुभप्रणिधान यासे आशिका यानातःगु जुइमाः धइगु भावनाया संकेत जुइफु ।

जितारि मल्ल राजाया स्वयम्भू महाचैत्य दर्शनि^१

सुदूर पश्चिम कर्णाली प्रदेशया खस राजा जितारि मल्लं नेपाल उपत्यकाय् ने. सं. ४०८ पौष महिनाय् आक्रमण यात । थुगु समय नेपाल उपत्यकाय् राजा अनन्त मल्लं शासन चलय् यानाच्चन । गुगुं राजनैतिक असमानताया कारणं स्वयम्भू डाँडाय् जितारि मल्लया खस सैन्य व नेपाल उपत्यकाया वासिन्दात नाप लडाइँ जुल । थुगु लडाइँलय् ८०० च्यासःति जितारि मल्लया खस सिपाहिँत लाःगु दु । अथे नं जितारि मल्ल हट्य् मजू । थनं लिपा थन च्वंप्पि समस्त वासिन्दात रसदपानी (नय्गु त्वनेगु) वस्तु ज्वनाः वनान्तरय् दुने सुलाच्चन । थुलि जुसेलि सुं महु धकाः जितारि मल्ल स्वदेस लिहांवन । खस राजा (खँय् जुजु) या सिपाहिँत व्याक्क लिहांवसेलि थन च्वंप्पि वासिन्दात स्वयम्भू प्रदक्षिणा यानाः स्वस्थ चित्तं न्हापा थें थःथःपिनिगु थासय् वयाः च्वंवन ।

थुगु घटना जुइ धुंकाः फिप्यला लिपा ने. सं. ४०९ फागुनपाखे हानं निको खुसिइ पूर्व लिहांवयाः अपाद राजा जितारि मल्लं नेपाल उपत्यकाय् आक्रमण यात । थुगु पटकयागु जितारि मल्लया आक्रमण न्हापायागु आक्रमण स्वयाः नं तस्सकं भयङ्कर जू । थुगु पटकय् जितारि मल्लं नं गांगामय् मि तयाबिल^२ ।

थुलिंयाय् धुंसेलि नेपाःया प्रसिद्ध देवता स्वयम्भू महाचैत्य दर्शन व पूजन याय् सिधय्काः, बुंगमलोकेश्वर एवं पशुपतिनाथयात नं दर्शन व पूजन यानाः आनन्द चित्तं सरासर थःगु देसपाखे स्वयाः ने. सं. ४१० फागुनकृष्ण प्रतिपदाया दिनय् लिहांवन ।

१- प्रमाणप्रमेय, पृ. ७०

२- हिमवत्संस्कृति, पृ. २९

रिपु मल्ल जुजुया स्वयम्भू महाचैत्य दर्शन

कर्णाली प्रदेशया खस राजा रिपु मल्लं पश्चिम तराइपाखे च्वंगु कनकमुनि बुद्धया जन्मस्थल निग्लीहवा तथा शाक्यमुनि बुद्धया जन्मभूमि लुम्बिनी आदि पवित्र तीर्थ दर्शन यायां राजनैतिक चालबाजीया कारणं नेपाल उपत्यकाय् नं प्रवेश जूगु जुल । थ्वय्कलं लुम्बिनी स्थित अशोक शिलास्तम्भया च्वय् च्वंगु भागय् छगू वाक्य अङ्कित यानातःगु दु— ‘श्रीरिपुमल्ल श्रिरञ्जयतुः संग्राममल्ल महाराज जयः ।’ थुगु हे प्रकारं निग्लीहवायागु शिलास्तम्भय् नं छगू वाक्य उत्कीर्ण याना तइतल— ‘श्री र पुमल्ल जयस्तु संबत् १२३४’ । थुगु प्रकारं तीर्थस्थानत भ्रमण यायां नेपाल उपत्यकाय् दुने प्रवेश जुयाः इमि परम्परानिसें बुद्धधर्मप्रति श्रद्धा तथावयाच्चंगुलि थःह्यं नं उत्तिकं शुद्ध मनं नेपाल प्रतिष्ठाता भक्तिया चूडामणि श्रीस्वयम्भू महाचैत्ययात यथा श्रद्धानुसार वन्दन पूजन यानावन । नापं अन च्वंपित भ्वय् नकावन ।

शाक्यमुनि बुद्धं गन च्वना अनुत्तर सम्यक् संबोधिज्ञान प्राप्त यानाकाल, उगु पवित्र भूमि बुद्धगयास थुमि तापाःवाज्या महाराज काचल्लया काय् अशोक चल्लं नं दर्शन व पूजा यानाः छगू अभिलेख नं समर्पित यानाथकगु जुयाच्वन । अशोक चल्लं थुकिइ थःत हेवज्रोपासक धकाः गौरव यानातःगु दु । रिपु मल्लयां छ्वीचा पृथ्वी मल्लया दुल्लुया शिलालेखया शिर्षचिन्ह बौद्धतय्गु प्रसिद्ध मन्त्र ‘ॐ मणिपद्मे हूँ’ अङ्कित यानातल । अथे हे जुम्लाया सं. १२७८ यागु सुवर्णपत्रय् साक्षि तय्गु नाम उल्लेख याःबलय् त्रिरत्न (बुद्ध, धर्म, संघ) या नाम अङ्कित यानाव्यूगु दु । काचल्ल जुजुं थःगु बालेश्वर कुमाउँया अभिलेखय् थःत ‘परमसौगतोपासक’ धयातःगु दु ।

सुदूर पश्चिम नेपालपाखे उपर्युक्त कारणं यानाः अन बांलाक हे बुद्ध धर्म प्रचार व प्रसार जूगु खनेदु । उकि अतिशा दीपङ्कर नेपालं पाल्पायागु लैपु जुनाः ल्हासा वनेगु इच्छा जूगु कारण पश्चिम नेपालया बौद्धत नापलानाः मान सरोवरयागु दर्शन याःवनेगु जुइ धइगु अनुमान खः । नापं अन च्वंपिके बौद्धधर्मप्रति दइच्चंगु विश्वास व बौद्ध संस्कृति, बौद्ध कला, प्रदर्शन याय्गु विचार नं जुइमाः धइगु विद्वान्तय्गु धापू खः ।

स्वयम्भू महाचैत्यप्रति शमस्सुद्दीनया आक्रमण

प्रागैतिहासिक कालान्तिसें प्रसिद्ध जुयाच्चंगु नेपालया श्रीस्वयम्भू महाचैत्य अतिकं शोभायमान जुयाच्चन । थुजाःगु प्रसिद्धगु पुण्यभूमि पशुपतिनाथ आदि समृद्धगु देवदेवालययागु असंख्य धन द्रव्यया लोभ लालसां याताः ने. सं. ४७० मार्ग महिनाय् बंगालया सुल्तान शमस्सुद्दीन आपालं लस्कर सहित पूर्वपाखे नेपाल उपत्यकाय् दुहांवल । थुगु समय राजधानी भक्तपुर जुयाच्चंगु व पूर्वपाखे काठमाण्डू उपत्यकाय् दुहां वय्वलय् लैय्संतु लानाच्चंगु जूया निम्ति शमस्सुद्दीनया आक्रमण सर्वप्रथम खपदेसय् हे लाःगु जुल । मार्गशुक्ल नवमीया दिनय् मुसलमान सैन्यया फौजं खपदेसय् हमला यात । परन्तु थुपि मुसलमानो सैन्ययात रोकय् याय्गु शक्ति थन च्वंपिके मदयाः शमस्सुद्दीनया फौजं खपदेसय् मार हानय् याताः धन सम्पत्ति लुटय् याताः कलात्मक प्रसिद्ध देवमन्दिर थुनाः मि तयाः भक्तपुर शहरयात ध्वस्त यानाविल^१ । थुजाःगु प्रकारं आक्रमण यायां फौज न्ह्योनेपाखे बढय् जुयावन ।


न्हापांनिसें नांदनाच्चंगु यक्व धन दौलत दइच्चंगु पशुपतिनाथया मन्दिरय् शमस्सुद्दीनया फौजतय्गु मिखा वनीगु जा स्वाभाविक हे जुल । थन च्वंगु धन सम्पत्ति लुटय् याताः नं अमिसं हे थुगु पशुपतिनाथया शिवलिङ्ग समेत स्वक् टुक्रा थलाविल^२ ।

पूर्व सुरतान समसदिनं नेना मागत्य
नेपालं श्रीपशुपति त्रिखण्डीकृता नेपाल
समस्त भस्मी भवान् । हाहा भवति लौकश्च ।

पशुपति ध्वस्त गाय् धुँसेलि अले कान्तिपुरय् लुटपीट मचय् याताः शमस्सुद्दीनया लस्कर स्वयम्भू पर्वस्थानय् थहांवन । स्वयम्भू महाचैत्यया गर्भय् नवरत्न, लुं, वहः आदि बहुमूल्य वस्तुत

१- गोपाल राज वंशावली, पृ. २८

२- गोपाल राज वंशावली, पृ. २८



स्वयम्भू चःस्वांमा क्वस्सं च्वंगु
शमस्सुद्दीनया आक्रमण शिलापत्र

तयातःगु सिइकाः शमस्सुदीनया सिपाहिंतयसं स्वयम्भू चैत्य थुनाः स्यंकाः गाः म्हुयाः इयाकाल ।
थथे यानाः काय् धुंकाः हानं मि नका थकल । थ्व हे विषय कयाः शिलापत्र स्थापना यानावंगु थौतक
स्वयम्भूइ इचांगु कुलांया चःस्वां सिमाया क्वस्सं तयातःगु दु । उगु शिलाभिलेख्य थथे उल्लेख
यानातल^१—

आसीद्धर्मनिधिद्वयैक जलधिर्नेपाल भूमण्डले,
ख्यातः श्रीजयराज देवनृपतिः तेनैव राजीकृते ॥
तस्मिन्नेव विराजति स्म विमलः स्तूपो मुनेः केतनः,
श्रीसाहो शिखरि प्रसिद्ध भुवने प्रस्थापितः पूर्वकैः ॥
सप्तत्याभ्यधिके श्रीमन्नेपालाब्द चतुःशते ।
मार्गशोर्षे सिते पक्षे दशम्यां गुरुवासरे ॥
सुरत्राणसमस्दीनो बंगालबहुलैर्बलैः ।
सहागत्य च नेपालो भग्नो दग्धश्च सर्वशः ॥

निगू धर्म (बौद्ध, शैव) मानय् याइहा नेपालया प्रख्यात जुजु श्रीजयराजदेव जुयाच्चन ।
थ्वय्कः जुजुं राज्य याना च्वंबलय् संसारय् प्रसिद्ध जुयाच्चंह्य श्रीस्वयम्भूया पर्वतय् न्हापान्हापायापिसं
स्थापना याना तइतःगु भगवान् बुद्धपिनिगु (शाक्यमुनि बुद्धया) बासस्थान जुयाच्चंगु स्तूप शोभायमान
जुयाच्चन । ने. सं. ४७० मार्गशुक्ल दशमी वृहस्पतिवारखुनु आपालं फौज नाप व्वनाहयाः सुल्तान
शमस्सुदीनं नेपालय् सकभनं थुन, मि नकल । छुं समय लिपा बुद्धिमान राजदेव स्वर्गी जुल । थुजाःगु
अवस्था जूगुलि मुसलमानतय्सं छ्वय्कूगु उगु स्वयम्भू स्तूप अथे जुल ।

स्वयम्भू चैत्य ध्वस्त याय् धुंसैलि छुं दिन लिपा यलय् नं प्रवेश जुयाः शमस्सुदीनया
लस्करतसें यलय् प्रसिद्ध विहार मन्दिर चैत्यत ध्वस्त यानाः उत्पात मचय् याःगु खनेदु । थ्व खँ यल
पिम्बाहाःया विशाल सुन्दर चैत्यया क्वस्सं च्वंगु शिलापत्रय् उल्लेख यानाःतगु दु ।

श्रुतानसामसदिनो यवनाधिराजः
नेपाल सर्व्वनगरं भस्मी करोति ।
तस्मिन्क्षणे पतितमिदं च दृष्ट्वा
जीर्णकरोति नवकं वरपा [लसि] हः ।

मुसलमान राजा सुल्तान शमस्सुदीनं सारा नेपाल सहर ध्वस्त यात । उगु हे समयय् थुगु
चैत्य नं ध्वस्त जूगु खनाः पालतय् भिह्य श्रेष्ठ मेघपाल वर्मा जीर्णोद्धार याःगु जुल ।

थथे नेपाल उपत्यकाया शासक एवं प्रजागणपिसं शमस्सुदीनया लस्करयात तप्यंक मुकाविला
याय् मफयावन, दुर्गया दुने मुलाः केवल थःथःपिं जक सुरक्षित याय्गु पाखे लगय् जूगुलिं मुसलमानी
सैन्यतय्सं निर्धत्कसाथ उपत्यकाया स्वंगू सहर किर्कामिकां दंकेगु अवसर प्राप्त यात ।

की आजुपिसं आपालं समय, बुद्धि व परिश्रम एवं धन खर्च यानाः दय्कावंगु गुलिखय् कीर्तित
नष्ट भ्रष्ट यानाः घोर अत्याचार यानाः हाहाकार मचय् यानाः शमस्सुदीन लिहांवन ।

महापात्र राजहर्ष भल्लोकद्वारा स्वयम्भू महाचैत्य जीर्णोद्धार

जयराजदेव जुजुया पर्यायस ने. सं. ४७० मार्गशुक्ल दशमी वृहस्पतिवारया दिनय् बंगालया सुल्तान यवनाधिराज शमस्सुद्दीन सहित सैन्यगणं स्वयम्भू पर्वस्थानय् वयाः स्वयम्भू महाचैत्यया सारा श्रीशोभा विनष्ट यानाः गर्भय् दुने च्वंगु धन रत्न आदि लुटय् याना मि तयाः घोर अत्याचार यानावन ।

थुजाःगु प्रकारं अनेक उपद्रव विघ्न अशान्ति जूगु खनाः राजा प्रजा सकलयां महाधन्दा कयाच्वन । महान् पापी दुष्ट चण्डाल शमस्सुद्दीन शायद् नेपालय् हानं प्रवेश जुइ ला धइगु शंकां यानाः आपालं समयतक नं थुगु स्वयम्भू चैत्यया पुनर्निर्माण याय्गु ज्या अथे लिक्नुनाच्वन ।

शमस्सुद्दीन नेपाल तोता वसेलि विस्तार विस्तारं नष्ट भ्रष्ट जुयाच्वंगु कुनःगु मिनःगु देवमन्दिर आदियागु जीर्णोद्धार जुजुं वयाच्वन । थुगु आक्रमणया ७ दँ लिपा यल पिम्बाहाःया विशाल चैत्ययागु जीर्णोद्धार महापात्र मेघपाल वर्मा याःगु जुल । थ्वयां ४ दँ लिपा ने. सं. ४८० स महामन्त्री जयसिंह रामं पशुपतियागु मेगु नवनिर्मित शिवलिङ्ग स्थापना यानाविल । अथे हे थ्व स्वयाः नं १२ दँ लिपा जक ने. सं. ४९२ स कान्तिपुरया समृद्ध महापात्र राजहर्ष भल्लोकद्वारा राजा जय अर्जुनदेव व उपराज जयस्थिति मल्लयागु आज्ञा कयाः स्वयम्भू महाचैत्य पुनर्निर्माण जुल ।

स्वयम्भू महाचैत्य पुनर्निर्माण जूगु विषय कयाः स्वयम्भू स्थित शिलापत्रय् थथे उल्लेख याना तइतःगु दु :—

‘श्रीधर्मधातु [स्वयम्भू महाचैत्य] यात नमस्कार । संसारयात आनन्द विइहा सत्शास्त्र विद्याया हेतु जुयाच्वंगु सम्पूर्ण लोकयागु अन्धकार फुकिइगु कारण स्वरूप छलपोलयात नमस्कार ।

गुह्यसिगु नाम स्मरण याता मात्रं सम्पूर्ण क्लेश फुकिइह्य बोधि प्राप्त याइपिसं छलपोलयात लुमंकाचवन । अनुपम गुण वीर्य दुह्य संसारयागु माया मोह बन्धनं छुतय् जुयाचवंह्य । त्रिजगत् (कामधातु, रूपधातु, आरूप्यधातु) या समान बीज स्वरूप जुयाचवंह्य छलपोल धर्मधातु रक्षा याय्मा ।

निगू धर्म (बौद्ध, शैव) मानय् याइह्य नेपालया प्रख्यात राजा श्रीजयराजदेव जुयाचवन । अन व जुजुं राज्य याता चवंबलय् संसारय् प्रसिद्धगु श्रीसाह्योगुं शिखरय् स्वयम्भू न्हापान्हापायापिसं स्थापना यातावंगु सुगत गर्भ स्तूप शोभायमान जुयाचवन ।

श्रीमत् नेपाल सम्बत् ४७० मार्गशुक्ल दशमी वृहस्पतिवारखुनु आकाकां आपालं बंगाली फौज बवनाः सुल्तान शमस्सुद्दीन वयाः नेपालय् सकभनं स्यंकाः मिनकल । छुं समय लिपा बुद्धिमान राजा जयराजदेव स्वर्गी जुल । थुजाःगु अवस्था जुयाचवंगुलि मुसलमानतय्सं छ्वयकूगु उगु स्तूप नं अथेसंतुं जुल ।

जुजु जयराजदेवया काय् वीरपिनिगु दत्थुइ श्रेष्ठह्य श्रीजयार्जुनदेवं नेपालय् राज्य चलय् याताचवंबलय् क्षेत्रीय कुलय् जन्म जूह्य श्रीजयस्थिति मल्लं बुद्धया पुण्यानुभावं उगु हे समयय् शासन चलय् याताचवंबलय् बांलाःगु न्ह्याइपुसेचवंगु श्रीकाष्ठमण्डपस पराक्रम व गुणवन्त जुयाः विजयी जूह्य, उदार स्वभावह्य, सकसिनं हनातःह्य, पात्रवंशय् जन्म जूह्य, तःधंगु यश कीर्ति दुह्य, श्रीराजहर्ष दइचवन । थ्वया समस्त चरित्र शुद्ध जूह्य वीर पराक्रमं उज्ज्वल जुयाचवंपि रणदेव, रुद्रदेव किजापि निह्यसिगुं सहयोग कयाः शत्रुतय् तयाकाः सत्कीर्तिपाखे शोभायमान जुयाचवंह्य श्रीराजहर्ष सुयोग्यगु रमणीय कान्तिपुरीस चवनाचवन । इन्द्र व उपेन्द्र थे जाःपि राजा जयार्जुनदेव व उपराज जयस्थिति मल्लयागु वचन कयाः बुद्धिमानी राजहर्ष शुभ दिनय् हानं श्रीधर्मधातु स्वयम्भू स्तूपयात शोभायमान जुइक अनेकानेक रत्न ज्वाहारातं सहित याताः उष्णीष चूडामणि बांलाक दय्काः जीर्णोद्धार याताबिल । नेपाल संवत् ४६२ आश्विनशुक्ल पूर्णिमा अश्विनीनक्षत्र सुकर्मयोग बुधवारया दिनय् सकभनं भिकाः अनेक उत्सव मङ्गलपूर्वक लक्षाहूति होम यासे सुवर्ण छत्रारोहण विधि कर्म खनाः बांलाक भिक थुगु स्वयम्भू स्तूप महाचैत्य जीर्णोद्धार कार्य सुसम्पन्न याःगु जुल ।

गुह्यसिगु धर्म उत्तमगु महायानय् लगय् जूह्य परमोपासक परम धार्मिक सकल प्राणिया उपरय् अनुकम्पा तयाचवंह्य काष्ठमण्डप महानगरया केलाछे ध्वाखाय् चवंह्य कुटुवज्ज अमात्य मूर्त्यगरण शक्तिमल्लवर्म भल्लोकया सुपुत्र श्रीराजहर्ष भल्लोकं थः सहधर्मचारिणी पत्नी श्रीजोतिलक्ष्मी सहित किजा श्रीरणदेववर्म भल्लोक व भिका श्रीशिखरापुरय् चवंह्य त्रिशक्ति गुणवान् महारावुत्त श्रीजूटसिंह समेतया नं सहानुमति जुयाः श्रद्धा चित्तं तस्सकं परिश्रमपूर्वक यलसिं [यष्टिदारू] थनेगु ज्याया विषय आवश्यक सरसल्लाह व माःगु गुहाःलि ब्यूगु दु ।

थ्व हे महान् शुभकार्ययागु विषय कयाः काष्ठमण्डप स्थानय् रत्नदण्ड छत्र कलश ध्वज तयाः प्यन्हु प्यचातक दीपावली उत्सव याताः स्वर्गसरी अनेक विचित्र ध्वज पटाकादि सुशोभित याताः अभूतपूर्व रूपं महायात्रा परिक्रमा जुल ।

श्रीसाह्योगुं धर्मधातु वागीश्वर भट्टारकयात सुवर्ण चक्रावली, सुवर्ण प्रकाशित विश्वमणिपाखे

सुशोभित जुयाच्वंगु रत्नोष्णीष दण्ड, सुवर्ण गर्भ, सुवर्ण कलश ध्वज, सुवर्ण दण्ड सहित व मेगु अभिनव निर्मित देवदेवताया अङ्ग व छत्र छत्रारोहण याःगु शुभ उपलक्ष्य प्यन्हुतक अहोरात्र यज्ञ यासे सभक्तिपूर्वक स्वयम्भू चैत्ययात दोहलपा विल ।

काष्ठमण्डपया मुख्यह्वा श्रीजयानन्द वज्राचार्य, सिकोम गुह्यविहार (सिखोमू बाहाः) स च्वंहा पण्डित श्रीज्ञानकीर्तिसेन पाद वज्राचार्ययात कर्माचार्य यानाः वज्रधातु देगुरिक्रम विधिद्वारा जोर्णोद्वारा यानाः प्रतिष्ठा यात । थुगु शुभकार्य निम्ति साइत व्यूहा वानिहास च्वंहा दैवज्ञ रत्नपति जुल । थ्व हे थासय् च्वंहा श्रीमानचन्द्रजुं विश्वमणि दय्काविल । सिँज्या जुक्व स्थपति भारो वया हे काय्चा जयराम भारो समेत सम्मिलित जूगु दु ।

‘थुगु महान् अपरिमित पुण्यकार्ययागु प्रभावद्वारा भव सङ्कटयागु दुर्गतिइ लानाच्वं पि सम्पूर्ण प्राणिपि छुटकारा प्राप्त जुयाः हर्ष जुया च्वनेमा । शेष हे मदय्क सम्पूर्ण शत्रुतय्क त्याकाः भूमीश्वर (जुजु) पिसं समस्त पृथ्वीयात पालन याय् फय्मा । लखं भरय् जूगु सुपाँचं समय समय जलवृष्टि जुया च्वनेमा । कुशल मूल सञ्चयद्वारा सम्बोधिलक्ष्मो पद प्राप्त जुइमा ।’

थुगु प्रशस्ति शिलालेख जि मन्दबुद्धि च्वयागु, द्वंगु थाय् विज्ञवर्गपिसं क्षमा याइ धइगु आशा दु ।

‘श्रयोऽस्तु नेपाल संवत् ४६२ आश्विनशुक्ल पूर्णि अश्विनीनक्षत्र सुकर्मयोग बुद्धवारखुनु ध्वजावरोहण सम्पूर्ण कार्य सिधय्काः प्रतिष्ठा यानागु जुल ।

थुगु शिलापत्रया आखः क्यूहा ल्वहं कर्म श्रीमानीगल त्रमुलमीस व हे स्थानया मुलमीस । सकभनं स्वस्ति कल्याण जुइमा । ।’

महामन्त्री मदनराम वर्द्धनपार्वे स्वयम्भू महाचैत्य एवं एकजटी जीर्णोद्धार

महामन्त्री जयसिहराम वर्द्धनया विजयराज्यस थ्वय्कःया हे सहोदर भ्रातृ तस्सकं धर्मात्मा, गुणी, क्षिप्यंगु विद्याय् अभिरुचि दुह्म षडाम्नाय आगम शास्त्रया ज्ञान स्यूह्म, नृत्यकलाय् निपुणह्म, त्रिपुरा सुन्दरीया वरप्रसाद प्राप्त जूह्म, तःधंगु ऐश्वर्य दुह्म, महायोगी सहजनारायण धइगु उपाधि दुह्म गुह्म खः महामन्त्री श्रीमदनराम वर्द्धनजु थ्वय्कलं स्वयम्भू पर्वतय् प्रतिस्थित गिरिवर महाविहारया श्रीस्वयम्भू महाचैत्य तथा एकजटीयात अतिकं श्रद्धा तयाः भिन्नकं विधिवत् जीर्णोद्धार यानाबिल ।

थ्व खँ कान्तिपुर पारावर्त महाविहारया शिलालेखं न्वँवानाच्चंगु दुः—

श्रीगिरिवरमहाविहारे— श्रीश्रीस्वयम्भूचैत्य

श्रीश्रीएकजटी संस्कारितः परमयोगीन्द्र

सहजनारायण महामन्त्री श्रीमदनरामवर्द्धनः

थ्वय्कः महामन्त्री मदनराम वर्द्धनजु नेपाःया धर्म व संस्कृति, कलाया केन्द्रीय स्थान गिरिवर महाविहारय् विराजित श्रीस्वयम्भू महाचैत्य एवं एकजटी (बौद्धदेवी) विधिवत् जीर्णोद्धार यानाः वांलाक सुरक्षित यानाबिल । थ्व हे स्वयम्भू जीर्णोद्धारया नापनापं मेमेगु नं धर्मकीर्ति स्थापना यानावंगु खँ उक्त शिलापत्रय् चर्चा यानातःगु दुः—

(१) श्रीयलखचोगिरि शिखरराज [पलाञ्चोक डाँडा ?] पर्वतस श्रीत्रिपुरेश्वरी सिद्धपीठ

(२) श्रीमदनेश्वर [शिवलिङ्ग]

(३) महात्रिपुस्करणी नां जुयाच्चंगु पुखूया मण्डपस जलशयन नारायण

(४) पारावर्त महाविहार [इतुंवाहाल] स श्रीदीपङ्कर तथागत

स्थापना यानावन । नापं थ्वय्कःया धर्मपत्नी सुख सुविधा विइह्य बुद्धया परमभक्त धर्मात्मा जैत्रलक्ष्मीदेवी नं उत्तिकं हे श्रद्धावती व धर्मबुद्धि दुह्य जुयाच्वन । थ्वय्कलं नेपाःया अति प्रसिद्धगु महान् जात्रा याइह्य बुद्धमलोकेश्वर श्रीआर्यावलोकितेश्वर (मत्स्येन्द्रनाथ) यात कलापूर्ण सुवर्ण तोरण समर्पण यानाथकल । एवंप्रकारं बुद्धशासन धर्म प्रचार व सदा जयकल्याणया लागी देस सकभनं सम्पूर्ण दुःख त्रास भय शान्त जुयाः लोकहित निम्ति सुख समृद्धि चिरकालतकं स्थिर जुया च्वनेमा धइगु महान् प्रतिज्ञा यासे पारावर्त महाविहारय् भगवती श्रीआर्यतारादेवीया सुवर्ण मूर्ति दय्काः व ने. सं. ५०२ आषाढशुक्ल दशमी शनिश्चरवार स्वास्तिनक्षत्र सांध्ययोगया दिनय् श्रद्धावती दाता जैत्रलक्ष्मीं सहर्षपूर्वक विधिवत् प्रतिष्ठा याःगु जुल । थ्वय्कः जैत्रलक्ष्मी मय्जुयात थुलि प्रशंसा यानातःगु दु—‘परमानन्दकारिणी सुगतावंशावतारिणी धर्मपुत्री’ नामं विभूषित याना तइतल ।

थुगु प्रतिष्ठा कार्यय् आचार्य जूह्य राजपण्डित श्रीमहाबोधिदेवद्वारा प्रति संस्कार यानातःगु काष्ठमण्डपया भिक्षु श्रीआरजयजु जुल ।

स्वयम्भूष जोतिराजं बही दयकूगु

प्रागैतिहासिक इलंनिसें श्रीस्वयम्भू व गुरु मञ्जुश्रीया प्रभावं थुगु स्वयम्भू पर्वस्थानय् नेपाःया बुद्धधर्म अध्ययन व अध्यापन याय्गु परम्परा फिन्ह्यग्गु शदीतकं विद्यमान जुयाच्चन । थ्व हे स्वयम्भू शान्तिकर महाविद्यालयय् चतुर्दिशां वइच्चनिइपिं अनेक श्रमण भिक्षु बौद्ध विद्यार्थी तथा विशिष्ट अतिथि महोदयपिं वल धाःसा च्वनेत अनुकूल मिलय् जूगु किसिमं नेपाःया थःगु परम्पराकथं श्रीस्वयम्भू महाचैत्यया न्होनेसं शोभायमान जुइक भव्य रूपं छगू बही निर्माण यानाबिल । लिस्सें शास्त्रानुसार विधिपूर्वक प्रतिष्ठा नं जुल ।

थुगु स्वयम्भू बही जुजु जयस्थिति मल्लया मुशासनकालय् ने. सं. ५१३ आश्विनशुक्ल चतुर्दशी-खुनु स्वयम्भू शान्तिकर महाविहारया कुशल आचार्यपिनिगु निर्देशन अनुसार मंगलोत्सव पूर्वक प्रतिष्ठा कार्य सम्पन्न यात । थुगु बहिलिइ मूलदेवता त्रिरत्न मूर्ति वज्रासन अक्षोभ्य तथागत स्थापना याःगु जुल । थुकिया श्रद्धालु दानपति खः काष्ठमण्डप मदुटोलया ऊवारहार कुटुम्बकार जोतिराज (हाकु) भाः जुल ।

थुगु स्वयम्भू बहिलिइ पारावर्त महाविहार (इतुंबाहाः) या शाक्यभिक्षु श्रीमधंजुं नं नित्य पूजा याकाः थुकिया संरक्षण कार्ययागु अभिभार नं वय्कःयात हे लःल्हानातःगु खँ उल्लेख यानातल ।

थुगु बही दय्काः प्यसः दैतकं धया थें थःगु स्वरूपं स्थिरं च्वंच्वन । तर अनित्ययागु चलन प्राकृतिक तथा मानवीय प्रकोपया कारणं जीर्ण शीर्ण जुयाः क्षतिग्रष्ट जुयावन । थथे स्वयम्भू महाचैत्य विराजमान जुयाच्चंगु थासय् थुजाःगु विहार क्षतिग्रष्ट जुयाच्चंगु दुरावस्था खनाःलि श्री ५ रणबहादुर शाहजुया पर्यायस ने. सं. ११५ मार्गकृष्ण प्रतिपदाखुनु येँया मन्दु गारछेँया धर्मात्मा नापिनी पुण्यलक्ष्मीया काय् तमकार तद्धि थ्वया किजा भाजु, पतासि आदि सकलं जहान परिवार समुच्चय जुयाः विधिवत् श्रीवज्रासन अक्षोभ्य तथागत दय्काः थुगु विहारया पूर्ण रूपेण जीर्णोद्धार कार्य सम्पन्न याःगु जुल । थुगु पुण्यं आयु आरोग्य सप्तवृद्धि परिपूर्ण जुयाः दानपति जजमानपिनि मनोरथ कार्य

सिद्ध जुइमा धकाः नं आशिका यानातःगुडु^१ ।

विगत १९६० सालया महाभूकम्पं हानं थुगु विहार थाय्थासय् स्यन, दुन, शोभाहीन जुल ; अले थ्व हे विहारय् च्वंच्वंपिसं थःथःगु गच्छे अनुसार ज्यूज्यूथे यानाः जीर्णोद्धार यानाच्वन । छुं समय लिपा स्वयम्भू विकास मण्डल स्थापना जुसेलि थुगु बहीया पूर्व मोहरा छद्या स्वयम्भू विकास मण्डलयात चन्दा स्वरूप दान प्राप्त जुल । अले स्वयम्भू विकास मण्डलं थुगु थाय्थात उचित सम्मान यासे पूर्ण रूपेण हानं न्हूगुकथं कलात्मक पञ्चऊयाः तयाः शोभायमान जुइक दय्काबिल । थ्व हे थासय् मण्डलं स्वयम्भू महाचैत्य दर्शनार्थ वइच्चनिर्इपि स्वदेशी तथा विदेशी पर्यटक एवं विद्वानपिनिगु निर्मित बुद्ध जन्मभूमि नेपाःयागु छगू समस्या पूर्ति धया थे 'अन्तरराष्ट्रिय बौद्ध पुस्तकालय' स्थापना यानाः श्रीशोभा वृद्धि याना ब्यूगु जुल ।

१- स्वयम्भू बहीया मूलदेवताया पादपीठ लेख अनुसार ।

जुजु जयस्थिति मल्लया स्वयम्भूप्रति आस्था

काठमाण्डू उपत्यकाय् प्रसिद्ध जुयाच्वंहा स्वनाम धन्य महाराज जयस्थिति मल्लं उगु समाजयात ल्वय्क तत्कालीन राजनीतियागु चातुर्यता क्यनाः अनेक विद्वान्पि मुंकाः धर्मशास्त्रयात विचाः यानाः न्हूगु स्थिति बन्देज यानाः समाजयागु आपालं सुधार यानाथकल । उकिं वसपोलं गथे नां खः अथे ज्या यानाथकल धकाः इतिहासकारतसें जयस्थिति मल्लयात थासंथासय् प्रशंसा याना वइच्वन । थौतकं जयस्थिति मल्लं दय्का थकूगु गुलिखय् थितिरिति नेवाःसमाजय् दुने दुने चलय् जुयाच्वंगु दनि ।

उकिं काठमाण्डू उपत्यकाय् लुयावःगु वंशावली मध्यय् दकलय्-सकलय् प्रमाणितगु भुजिमो आखलं संस्कृत व नेपाल भासं च्वइतःगु तालपत्रयागु गोपाल वंशावली धइगुलिइ जयस्थिति मल्लयागु विषय कयाः थथे प्रशस्ति च्वइतःगु दु—

बुधे [द्धे] व्वंसा [शा] वतारे कलियुगे

स्वयम्भूकृता वरप्रसादितः अष्टलोक—

पालावतार श्रीजयस्थितिराजमल्ल देव विजयी...

थथे धइतःगुलिं थ्व स्पष्ट अर्थ बुक्य् जू— शाक्यमुनि बुद्धयागु शासनकालय् कलियुगय् वसपोल स्वयम्भू महाचैत्ययागु जीर्णोद्धार कार्य जूगु अपरिमित पुण्ययागु वर प्रसाद प्राप्त जुयाच्वंहा अष्टदिग लोकपाल [इन्द्र, यम, वरुण, कुबेर एवं आग्नेय, नैऋत्य, वायु, ईशान] पिनिगु अवतार स्वरूप जुयाः लोकजनपिनिगु हितसुखया लागी विज्यानाच्वंहा श्रीजयस्थिति राज मल्ल देव जुजु विजयराज्य याना-च्वंगु इलय्^१ ।

थौतकयागु नेपाःया इतिहासयागु परम्पराय् गुलिनं लिच्छवी, मल्ल एवं शाह जुजुपिसं राज्य यानावन इमिसं नेपाःया प्रतिष्ठाता श्रीस्वयम्भू महाचैत्ययागु वरप्रसादं विजयी जूहा धकाः गनं उल्लेख

१- गोपाल वंशावली [हिमवत्संस्कृति], पृ. १३

यानातःगु खनेमदु । प्रसंगवश उदाहरणया लागी मेमेपि राजा महाराजापिसं थःगु प्रशस्तिइ अथवा मुद्राय् अंकित यानाथकूपि द्योपि व जुजुपिनिगु नां प्रस्तुत यानाचवना—

- (१) लिच्छवी जुजु वृषदेव — सुगतशासन सेवक
- (२) " " मानदेव — विष्णुचरण "
- (३) " " शिवदेव — वप्पपादालुध्यातः सेवक
- (४) थकूरी " अंशुवर्मा — पशुपति चरण सेवक
- (५) दुल्लुराजा *अशोकचल्ल — हेवज्ज सेवक
- (६) " पुण्य मल्ल — ॐ मणिपद्मे हूं सेवक
- (७) " पृथ्वी मल्ल — त्रिरत्न चरण सेवक
- (८) मल्ल जुजु जयस्थिति — स्वयम्भूवर प्रसादिक सेवक
- (९) महामन्त्री मदनराम वर्द्धन — एकजटा चरण सेवक
- (१०) मल्ल जुजु जयप्रताप मल्ल — स्वेष्ट देवता चरण सेवक
- (११) " " श्रीनिवास — करुणामय चरण सेवक
- (१२) " " योगनरेन्द्र — लोकनाथ चरण सेवक
- (१३) " " जयप्रकाश — तलेजुमाजु
कुमारीमाजु
गुह्येश्वरी } चरण सेवक
- (१४) " " विश्वजित् — हरिसिद्धि चरण सेवक
- (१५) शाह " पृथ्वीनारायण — गोरखनाथ चरण सेवक
- (१६) " " गीर्वाणयुद्ध — बद्रीकेदार चरण सेवक
- (१७) " " सुरेन्द्रविक्रम — पशुपति चरण सेवक

थुगु किसिमं नेपालय् विभिन्न समयय् विभिन्न राजा महाराजापिसं विभिन्न देवतापिनिगु सेवक उपासक अनन्य भक्त जुयाः वसपोलपिनिगु वरप्रसादं विजय राज्य यानाचवनाह्य धकाः धयावंगु खँ इतिहासं न्वँवानाचवन । तर उपि मध्यय् 'श्रोस्वयम्भू महाचैत्ययागु वरप्रसादं विजयी जूहा' धकाः धाय्गुलिइ जुजु जयस्थिति मल्लं थःत अत्यन्त महत्त्व व गौरवान्वित सम्क्रय् जूगु खनेदु । कारण छायाःसा दूरदर्शी महाराज जयस्थिति मल्लं थव नं विचाः याःगु दु—वसपोल आदिबुद्ध ज्योतिरूप श्रोस्वयम्भू भगवान् प्रकाश जुसेलि तिनि लिपा क्रमशः गुह्येश्वरी, पशुपति, द्वादश तीर्थ, अष्टवीतराग, चतुस्महाप्राकार आदि अनेकानेक देवस्थल तीर्थस्थल प्रादुर्भाव जुसेलि अनेक बुद्ध, बोधिसत्व अर्हत् सिद्ध आचार्य व विद्वान् राज महाराजपि विशाल भारत व महान् देस चीनपाखे आगमन जूगु जुल ।

*— इपिग्राफिका इण्डिया भाग १२, पृ. २९

ध्व हे खँयात ध्यान आकर्षित यासे जुजु जयस्थिति मल्लं “स्वयम्भूकृता वरप्रसादितः” धइगु उपाधि विभूषित जुइ दुगुलि गौरवान्वित सम्कय् जूगु धाय्फु !

थुलि जक मखु जुजु जयस्थिति मल्लं तत्कालीन समाजय् जुयाच्चंगु अनेक संकीर्णता एवं अव्यवस्थित ढंगयात बांलाक सुधार यानाः थितिरिति नियम दय्काः जाति विभाजनया परिपाटी सुदृढीकरण याय् धुँसेलि उगु बखतया विद्वत् परिषदं “अष्टलोक पालावतारः श्रीजयस्थितिराज मल्लदेवः” धकाः प्रशस्ति अङ्कित याःगु जुल ।

अष्टदिगलोकपालपि विमुख जुल धाःसा प्रशन्न मजुल धाःसा लोकय् छु जुइयो धइगु खँ अतीतकालया गुणकामदेव जुजुया पालाय् जुयावंगु घटनां स्पष्ट कयं—

- (१) देवराज इन्द्र कोप जूगुलि जलवृष्टि मजुल ।
- (२) यमराज तंचाःगुलि अनेक रोग उत्पन्न जुल ।
- (३) वरुणादि नागराज कोकय् जूगुलि लःया भय बढ्य जुल ।
- (४) जम्बलादि कुबेर विमुख जूगुलि दरिद्र जुल ।
- (५) अग्नि रिसाहा जूगुलि थाय्थासय् मिनल ।
- (६) नैऋत्य राक्षस विमुख जुयाः थाय्थासय् भूतप्रेतं पुनाहल ।
- (७) वायुं ईर्ष्या याःगुलि फसं दुःख बिल ।
- (८) ईशान प्रशन्न मजुगुलि यानाः अनेक विघ्न उत्पात जुल ।

थुजाःगु प्रकारया अशान्ति उपद्रव विघ्न बाधा मजुइमा धइगु हेतुं देसय् सुख सुविस्ता देस, नरेश व जनताया बिचय् जुइमाःगु पारस्परिक अनुशासन चिरस्थायी निम्ति तत्कालीन समाजयात ल्वःगु किसिमं व्यवस्था कायम यानाथकल ।

उगु व्यवस्था प्रसंगवश थन संक्षिप्त रूपं उद्धृत यानाच्चवना^१—जुजु जयस्थिति मल्लं थः परलोक जुइ न्ह्यो भारत व नेपाःया विद्वानपि सःताः ६४ खुइप्यंगु प्रकारया ज्या याइपि गृहस्थीत छखे तथाः शाक्यभिक्षु, श्रामणेर, चैलक ब्रह्मचर्य भिक्षु एवं वज्राचार्यपित सन्यासित जातयागु थितिरितिइ चवनेम्वाःपि जातं चवय्यापि धकाः अलग तथाः मान्यता बियातल । थुमिगु आचार विचार नं शुद्ध आर्यपिनिगु थे धकाः थुमित सकल लोक आदर सत्कार यानातःगु जूया निम्ति थुमित वन्द्यजुपि धाल । वन्द्यया अर्थ खः वन्दना याय् योग्यह्य, गथे सिंहल द्रोप लङ्काय् हन्दुरु, वर्माय् पुङ्गि व लहासा देसय् लामा; अथे हे नेपालय् ‘वन्द्यजु’ धकाः आदर सत्कार यानावयाच्चंगु खः । वन्द्यजु शब्दया अपभ्रंश जुया ‘वदे’ ‘वरे’ खँय्भासं ‘बांडा’ धाःवंगु जक खः, गथे पञ्चसूत्रकाया पसूका धाः थे जूवंगु धाय्माल । थुगुकथं वन्द्यजु शाक्यभिक्षुपित आदर सत्कार तथावयाच्चंगुया ज्वलन्त प्रमाण व छु धाःसांनि—नेपाःया सर्वश्रेष्ठगु विश्व प्रसिद्धगु श्रीकरुणामय बुंगद्योयागु जात्राय् शाक्यभिक्षु बुंगया पाञ्जुत बुंगद्योया खजलाय् चवनाः द्योपाःलाः जुयाच्चन, थुमि क्वस्सं हःपाः बिइपि सेसेवाज्या

१- बुद्ध धर्म व नेपाल भाषा पत्रिका, दँ ३ अंक १, २ पृ. १४

द्योत्रम्हूत चवनावड । अथे हे येँया इन्द्रजात्राया सन्दर्भय् जुयाच्चवंगु कुमारी जात्रा नं वन्द्यजुया म्हाय्मस्तय् सद्यकौमारी रूपय् मानय् यानावड्चवंगु दनि । थ्व हे कुमारीयात श्री ५ महाराजाधिराज सरकारपिसं परम्परागत उत्तिकं स्वागत सत्कार तथाः प्रसाद ग्रहण यानाः टीका फया वड्चवन, थ्व परम्परा अद्यापि विद्यमान तिनि ।

थन ६४ गू जाति विभाजनया नां व वया ज्याया अर्थ चवयाचवना—

- (१) पञ्चगौड - पञ्चदाविड, देवब्राम्हू धयापि द्विज, विप्र, ब्राह्मण ।
 - (२) भूप - राजा क्षेत्रीत थें गथे थकू अर्थात् थकू जुजुपि, मल्लपि मेमेपि सूर्यवंशी व नेपालया क्षेत्रीय राजवंशीत ।
 - (३) अमात्य - मन्त्री धाःसां सचिव - थुपि न्हापा न्हापाया मन्त्री राज्याधिकारी, मन्त्रीसभाया सदस्यपि ।
 - (४) लेखक - राजलेखक (राज्यन्यायया खँ च्वइपि)
 - (५) कायष्ठ, कैत (च्वइपि, सफू च्वइपि, राज्यया ज्याखँ च्वइपि)
 - (६) पूजित - शिव व शक्ति दइच्चवंगु देगल्य् पूजारी जुइपि ।
 - (७) देवचिन्त - शिवमार्गी पूजारी ।
 - (८) आचार्य - आचाजु, छुं पूजा क्रियाया शिवमार्गीपिनि पूजारी ।
 - (९) देवाचाजु - देवाचार्य, देगल्य् पूजा याइपि पूजारीत ।
 - (१०) गुर्वाचार्य - शिवमार्गीपिनि दीक्षा विइपि, छुं क्रियाय् पूजारीत ।
 - (११) कर्माचाजु - कर्माचार्य, तलेजु भवानीया देगल्य् चिकिधंगु कर्म याइपि ।
 - (१२) शिवाचार्य - शिवलिङ्ग पूजा व मेमेगु छुं पूजाया पूजारीत ।
 - (१३) पीठाचाजु - पीठाचार्य, पीठपीठ्य् व प्रायश्चित यज्ञ बलिकर्मय् पूजारीत ।
 - (१४) जोशी जैशी
 - (१५) दैवज्ञ
 - (१६) ज्योतिष्क
 - (१७) गणिक
- } थुपि प्यंगुलिं भिन्न भिन्नगु ज्योतिष शास्त्रया ज्या याइपि ।
- (१८) श्रेष्ठ - भारोस, थुपि न्हापा न्हापा क्षेत्रीत जुयाः लिपा व्यापारीत जूसां लेखकपि जुल ।
 - (१९) निकूजु - न्यकू, बुंगमलोकेश्वरया प्रतिमाय् च्वइपि व्यपारीत, बुँ ज्या याइपि ।
 - (२०) भनो - तलेजु भवानीया सेवक जुयाच्चवंपि ।
 - (२१) बागःश्रेष्ठ - बागः स्यस्यः
 - (२२) लवजु
 - (२३) भजु - उसांय्मदुगु व्यलाय् धर्मया पुरोहितपि ।
 - (२४) गवकु - चिकिधंगु देगल्य् पूजा याइपि वैश्यत ।
 - (२५) वैद्य - धन्वन्तरि, त्वय् लाय्केगु ज्याय् वासः याइपि वैश्यत ।

- (२६) राजलवत
 (२७) थकूलव - अर्थात् पात्रवंश शास्त्रास्त्र धारण याइपि ।
 (२८) आलमु - आचालमु (आचालव ?)
 (२९) श्रीचन्त
 (३०) सुजिकार
 (३१) सुपिक धा:सां सुर्पाकार ।
 (३२) चिच्छक
 (३३) शिल्पकार
 (३४) दारुकार - सिँक:मि
 (३५) तक्षक - सिँ फाइहा बोस्य
 (३६) तुलाधर - उदास स्थापित
 (३७) सुवर्णकार - लुँक:मि
 (३८) कंसकार - कसा:
 (३९) ताम्रकार - तमो
 (४०) कुण्डकार-इस्थिहारया ज्या याइपि ।
 (४१) लोहाकार - नँक:मि, कौ
 (४२) शिलाकार - ल्वहं:मि
 (४३) धूस:
 (४४) मधिक:मि
 (४५) चित्रकार - चित्रकारी, पुं
 (४६) रजक - रञ्जक, छिपा
 (४७) धूव्या
 (४८) कर्णकार - न्हाय्पं प्वा: खनिइपि
 (४९) नाडिच्छेदी - भम:, पि ध्यनिइपि
 (५०) बहि - अँक:मि, अँ दय्किइपि
 (५१) भा:
 (५२) तत्ति - सिइवले भुनेगु काप: थाइपि
 (५३) मालि - मालाकार, गथु
 (५४) ग्वा: - गवकु, हेँपू, मेपू, सापू, सा मे ऊइपि व दुरुवञ्जा:
 (५५) क्षेत्रकार - दङ्गू, वुँ दाइपि
 (५६) कुम्भकार - कुह्या:, चाभाला दय्किइपि
 (५७) नापित - नौ
 (५८) भारिक - भरिया, कु क्वविइपि
 (५९) लेपिक - वज्जक:मि, पाइपि ।
 (६०) चर्मकार - मातङ्गि, कुलु, छयंगूया ज्या याइपि ।
 (६१) तैलकार - साय्मि, मानन्धर
 (६२) टङ्काधारी - दां त्याय्विइपि
 (६३) नटीजीव - प्याखं हुइपि
 (६४) ज्यापु - भावो

थुगु रूपं देस व समाजयात ल्व:गु किसिमं वन्दोवस्त याना विइ धुँसेलि मन्त्री, भारदार, प्रजागण सकलया अत्यन्त हर्ष व सन्तोष जूगु खना: विद्वानवर्ग नं उगु व्यवस्थाप्रति अनुमोदन यासे निम्न गाथां उद्गार व्यक्त या:गु खनेदु:—

श्री जयस्थितिमल्लेन क्षत्रिरत्नाकरेन्दुना ।

पालिते तत्र कालेन बुद्धपुण्योदयेन च ॥

क्षेत्री रूपी रत्नाकर सागरया द्योने चन्द्रमा समानं उदय जूह्य जयस्थिति मल्ल जुजु बुद्ध पुण्यया

प्रभावं उगु बखतया प्रजापित आनन्दपूर्वक पालन यानाचन धकाः धयातल । अज्ज, जयस्थिति मल्लयागु व्यवस्थाप्रति अत्यन्त प्रभावित जुयाः मल्ल शासन अन्त यावत्त गुह्य खः नेपाल निर्माता श्री ५ बडामहाराजाधिराज पृथ्वीनारायण शाहजुं तक नं उगु व्यवस्थायागु आदर्श गुण लुमंकाः थःगु दिव्योपदेश्य थथे धाःगु दु^१—यदि ईश्वरं विल धाःसा जि नं व हे स्थिति वन्देज कायम यानावने फय्मा धकाः आशा अभिव्यक्त यानातःगु खनेदु—

राजा जयस्थितिमल्ल र महेन्द्रमल्लले
वाध्याको थितिपनि हेरी सकें
ईश्वरले दियो भन्या म पनि
यस्ता वन्देजको बाह्र हजारको
थीतो बांधि जाला भन्या अवीथाषा थीयो...

राजा ज्योतिर्मल्लद्वारा स्वयम्भू महाचैत्य जीर्णोद्धार

स्वनाम धन्य जुजु जयस्थिति मल्लया दातिह्य काय् खः ज्योतिर्मल्ल । ध्वय्कलं भक्तपुरया शासन चल्य् यानाच्चन । थः स्वयं विद्वान जुयाः नं नापं विद्वानपित नं उत्तिकं सन्मान याइह्य खः । ध्वय्कः ज्योतिष शास्त्रय् नं अतिकं निपुणह्य खः धइगु प्रतीत जू, कारण ने. सं. ५३२ स सिद्धिसार नामक ज्योतिष शास्त्र च्वयावन । अज्ज ध्वय्कः विद्वान जक मखु नेपाःया प्रमुख धर्म बौद्ध व शैव निगू पक्षयात नं ध्वय्कलं समान आस्था तयावइच्चंगु खनेदु । थुकिया ज्वलन्त उदाहरण स्वरूप प्रमाण थ्व खः—गुह्यसिनं स्वयम्भू महाचैत्य जीर्णोद्धारया नापं पशुपतिनाथया मन्दिरया श्रीशोभा वृद्धिया लागी सुवर्ण कलश ध्वजारोहण कार्यं सुसम्पन्न यानाबिल ।

थुगु शुभकार्यं सम्पन्न जूगु विषय कयाः पशुपतिइ शिलापत्र स्थापना यानाथकूगु दु, गुकिइ निम्नलिखित प्रमाण अङ्कित यानाथकलः—

श्रीपद्माचलशिखरोपरि धर्मालयस्थानाश्रित
श्रीधर्मंघातु वागीश्वरमूर्ति स्वयम्भूचैत्य भग्नस्थापन ।
महाकीर्तिभाजन विविधविरूदावली समलंकृत
श्रीश्रीरघुवंशावतंस महाराजाधिराज परमेश्वर
परसभट्टारक श्रीमत् श्रीश्रीजयज्योतिर्मल्लदेवेन
लक्षाहूति महायज्ञ पूजाभिर्गणगुरुमातृगण देवताः
समाराधयित्वा । श्रीदेवपट्टनमहास्थाने श्रीपशुपतिभट्टारकस्य
महाप्रासादोपरि - सुवर्णकलशावरोहण प्रतिष्ठाकृता ।

प्यंगू युगया भेदं प्यंगू नां दइच्चंगुः अति प्रसिद्धगु साह्ये गुं गिरिवर पद्माचल शिखर गिरि (स्वयम्भू पर्वस्थान) स विराजित श्रीधर्मधातु वागीश्वर स्वयम्भू महाचैत्य विधिवत् जीर्णोद्धार यानाः बांलाका बिल । नापं देवपट्टन स्थित श्रोपशुपतिनाथया मन्दिरय सुवर्ण कलश (लुंगजू) तसे प्रतिष्ठा कार्य सम्पूर्ण जूगु उपलक्षय् ने. सं. ५३३ माघशुक्ल त्रयोदशी पुनर्वसुनक्षत्र प्रीतियोग मिथुनचन्द्र आदित्यवारया दिनस महाराज जयज्योतिर्मल्ल, महारानी संसारदेवी व राजकुमार यक्ष मल्ल सकल राजपरिवार सहित जुसे लक्षाहूति महायज्ञ यासे गुरुगण एवं मातृगण देवता समेत निमन्त्रणा यानाः अनेक उत्सव मंगलपूर्वक प्रतिष्ठा याः गु जुल ।

१- सत्ये-पद्माचल, त्रेता-रत्नगिरि + वज्रकूट, द्वापर-गोशृङ्ग, कली-गोपुच्छ । स्वायम्भू पुराण, परिच्छेद प्रथम ।

स्वयम्भू महाचैत्यस अनन्तजीव भारोया मयन छत्रारोहण

वर्तमान स्वयम्भू महाचैत्यस गथे त्रयोदश चक्रावलीया फुसय् सुवर्णया छत्र समर्पण याताः श्रीशोभावृद्धि यानातल, अथे हे परन्तुया लागी मखु छुं दिनया लागी जक धया थें सी (मयन) यागु सुन्दर जुइक छत्र दय्काः स्वयम्भू चैत्ययात द्वहलपिइगु गुगु क्रिया खः उकियात 'मयन छत्रारोहण' धाई^१ । थुगु मयन छत्र धइगु परन्तुतक चिरस्थायी जुइ फइमखु, कारण स्वभावतः तस्सकं नायूगु श्रीसूर्ययागु तापाग्नि कलकि हे सरसर नायावइच्चनिइगु, उकिइसं अप्पो फसं कलकि नं उगु नायूगु सी ताराक च्वनाः छत्थुं चाराक तज्याय् योगु वस्तु जुया निम्ति थुगु सीयागु छत्र दय्काः समर्पण याःसां छुं दिनया लागी जक च्वनाच्वनी । अथे जूसा नं विविध धातु व उत्तम वस्त्र (तास, तिनिखा, क्वेँचि) आदियागु छत्र दय्काः चढय् याय्गु स्वयाः नं छगू थुकिइ थःगु हे विशेषता अवश्य दु जुइमा । तर सीयागु स्वयाः नं कापःयागु जक छत्र दय्कूसां अप्पो ता तुइफु । न्ह्यागु थजु, अप्पो तातुइगु व मतुइगुया खँ मखु, सीयागु छत्र चढय् याय्गु विषयय् निश्चय नं विशेष महत्व दइ, थ्व अनुसन्धानया विषय तिनि । थुजाःगु हे पहःयागु छगू थिति थ्व नं खः कि यलय् मत्याः ओला बाहा.पूजा वइवलय् सीस्वां दय्काः छाया वइच्चन, थ्व नं व हे मयन छत्रारोहणया आदर्श अनुशरण यानातःगु जुयाच्वन ।

थुजाःगु थिति थौंयागु बौद्ध समाजय् प्रायः लोप जुइ धुकूगु थें जूसां जुजु यक्ष मल्लया पर्यायस ने. सं. ५५१ आश्विनशुक्ल पूर्णमासि रोहिणीनक्षत्र सौभाग्य योग बृहस्पतिवारया दिनस येँ देसया थँथु ब्राह्मणया छेँया दानपति अनन्तजीव भारोया धर्म चित्त उत्पत्ति जुयाः वसपोल आदिबुद्ध स्वयम्भू महाचैत्यप्रति विधिवत् 'मयन छत्रारोहण कार्य याःगु जुल ।'

थुगु कार्यय् मूलाचार्य जूहा सिख्वंमवाहाःया राजगुरु तोयूजु वज्राचार्यया नां उल्लेख यानातल^२ ।

१- थ्व मयन छत्रारोहण विधि सफू हेमराज शाक्यया संग्रहय् सुरक्षित जुयाच्वंगु दु ।

२- थ्यासफू, कमलानन्द वज्राचार्य, येँ, नकवही ।

स्वयम्भूया हलपति प्यरत्यरसं सुवर्ण छत्र समर्पण

नेपाःया उच्च ध्वज विमान थें शोभायमान जुयाच्वंगु प्यरत्यरसं खनेदइच्वंगु ३३ कोटि देवताया प्रासाद स्वरूप जुयाच्वंगु युगयुगंतिसें नेपाःया चूडामणि सर्वबुद्ध महामुकुट श्रीस्वयम्भू महाचैत्य नामं अतिकं प्रसिद्ध जुयाच्वंगु जुल ।

थुगु महाचैत्ययागु आदर्श व गुण गौरवप्रति श्रद्धां प्रेरित जुयाः चैत्य गर्भया च्वय्च्वंगु भागय् प्यंगू दिशाय्सं महाकरुणाया दृष्टि अवलोकन यानाच्वंगु पञ्चचक्षु [धर्मचक्षु, समन्तचक्षु, दिव्यचक्षु, ज्ञानचक्षु तथा बुद्धचक्षु] स्वरूप जुयाच्वंगु दृष्टिया च्वस्सं तइतःगु भर्गिया च्वस्सं च्वंगु तोरणाकृति हलपतिया फुसय् कुसां कुइके थें लक्षण प्रमाण मिलय् यानाः अति शोभायमान जुइक भव्य रूपं सुवर्ण छत्र आकाश छत्र तयाबिल ।

थुगु पुण्यकार्यया श्रद्धालु दानपतिपि खः येँया गावच्छेँया ताम्रकार अभयसिंह भारो, ओमबाहाःया शाक्यभिक्षु श्रीअभयजु, चीवाहाः लाछिया ताम्रकार जयकीत व रोखाच्छेँया शाक्यभिक्षु श्रीशंखजु थुपि प्यहासिनं सम्यक संबोधि प्राप्ति कामना यासे विधिवत् उत्सव यासे ने. सं. ७११ आश्विनशुक्ल त्रयोदशीखुनु द्वहलप्यगु जुल । थुगु पुण्यं शास्त्रस ल्हासय् तक्व फल लाय्माल धकाः आशीका यानातल^१ ।

१- स्वयम्भू महाचैत्यया पूर्वपाखे च्वंगु हलपतिमा सुवर्ण छत्राभिलेख ।

राजा शिवसिंह मल्लद्वारा स्वयम्भू महाचैत्यप्रति सुवर्ण छत्र समर्पण

नेपाली मुद्रा इतिहासय् सर्वप्रथम रूप्यमुद्रा प्रचलनय् हःहा काष्ठमण्डपया अधिपति महाराज महेन्द्र मल्लया सुपुत्र बडो शूर वीरह्य महत्वाकांक्षी जुजु शिवसिंह मल्लं साह्येगु पर्वतस्थित स्वयम्भू धर्मधातु वागीश्वर महाचैत्यप्रति श्रद्धाभक्ति तसे ने. सं. ७१५ बैशाखकृष्ण पञ्चमी शुक्रबार मूलनक्षत्र सिद्धियोगया दिनय् सुवर्ण छत्र दोहलपाः बौद्धाचार्यपि तयाः लक्षहोम विधि खंकाः स्वयम्भू स्तूप प्रतिष्ठा कार्य सुसम्पन्न याःगु जुल ।

थुगु महान् शुभकार्य बौद्धस्तूप जीर्णोद्धारया प्रसादं यानाः ललितपुरया राज्य विजय प्राप्त यानाः राजा शिवसिंह आपालं शास्त्र विद्या ध्वनातःपि वेदविज्ञ ब्राह्मणद्वारा प्रशन्नपूर्वक होम याकेबिल धकाः स्वयम्भू स्थित शिलापत्र अङ्कित यानातःगु दुः—

नेपालाङ्के तिथिमुनियुते माघवे कृष्णपक्षे
पञ्चम्यां भार्गवसुदिवसे मूल भे सिद्धियोगे ।
लक्षाहृत्या बहुमुनिगणै छत्रसमारोह पूर्व
स्तूपे पूर्णामकृतं नृपतिः श्रीशिवः सर्वशक्त्या ॥
तस्य प्रसादबलितः शिवसिंह राजा
राज्ये जयी ललितपत्तन नाम धेये ।
विप्राय वेदविदुषे बहु विदयकाय
होमं व्यधत्त बहुलं मनसोत्सुकेन ॥

शिवसिंह महत्वाकांक्षी राजा खः । वय्कःयात कान्तिपुर राज्यं जक नं सन्तोष मजुयाः थःगु राज्य विस्तार याय्गु उद्योग यात^१ । ललितपुरय् धाःसा महापात्र विष्णुसिंहया सन्तानतय्सं स्वतन्त्र जुयाः राज्य चलय् यानाच्चन । थुगु स्थिति मल्ल जुजुपित मन परय् मजू । शिवसिंहं ललितपुरय् आक्रमण यानाः वि. सं. १६६१ स्वयाः नं छुं भचा न्हापा ललितपुरय् दखल यात । थथे जुयाः ललितपुर कान्तिपुर नाप मिलय् जुल । ललितपुरया शासन चलय् याय्त शिवसिंहं थःह्य काय् हरिहरसिंहयात नियुक्त यात । हरिहरसिंहं अबुयागु प्रतिनिधि जुयाः ललितपुरय् शासन चलय् यात । थुगु प्रकारं शिवसिंहं थःगु शक्ति बढय् यानाः यंकाच्चन । पूर्वपाखे मोरङ्ग थ्यंक नं शिवसिंहयागु प्रभाव लात ।

शिवसिंहयागु शासनकालय् वि. सं. १६५२ स वय्कःयागु आज्ञा कयाः स्वयम्भू चैत्य जीर्णोद्धार जुयावन । लिपा नं वज्रमलः जुनाः उगु स्तूप हानं स्यन । अले हानं शिवसिंहया आज्ञा कयाः जयलक्ष नामक शाक्यभिक्षुजुं ने. सं. ७२४ माघशुक्ल पञ्चमीस यलसिं थनाः थिक दछि लिपा ने. सं. ७२५ माघ श्रोपञ्चमी वृहस्पतिवारखुनु थुगु महान् चैत्ययागु प्रतिष्ठा कार्य सम्पन्न याःगु जुल ।

थुगु स्वयम्भू महाचैत्य जीर्णोद्धार जूगु विषय शिलालेख^२ व थ्यासफूया^३ आधार कयाः थन प्रस्तुत यानाच्चना—

श्रीधर्मधातुयात नमस्कार । स्वस्ति श्रयोऽस्तु नेपाल संबत् ७११ चैत्रशुक्ल पूर्णिमा हस्तानक्षत्र वरियानयोग शुक्रवारखुनु यष्टिदारु (यलसिं) ध्यना । थुगु यलसिं ख्वपया बोस्यतसें लुइकूगु जुल । थुगु यलसिं प्राप्त जूगु स्थान खः ज्ञारापाकु धुनिचीभाः मथ्येवं जुल । थुगु सालं जेरावासया धुनि धइगु थासय् तक थ्यंकल । थुगु थासय् सर्प छह्य वयाः पियाच्चन, मगःत निह्यसिया मृत्यु जुल ।

ने. सं. ७१२ ज्येष्ठशुक्ल द्वादशी सोमवारस आरम्भ यासे चतुर्दशीनिसें यलसिं सालाहःगु जुल । अनालाया सुदी तृतीया शुक्रवारखुनु अनेक लस्कर मुनाः पञ्चताल आदि विविध वाद्यवादन थाकाः राधा प्याखं हुइकाः रात्रिस यंपिख्यलय् मतयात, हाथ्व पर्यन्त गुणाधीमतपाखें सुशोभित यासे मंगलोत्सवपूर्वक लैय् सिन्दुर जात्रा यानाहःगु जुल । थुगु शुभकार्ययागु समयय् तस्सकं जलवृष्टि जुल, थ्वयां सतिखुनु मुरुज वाद्य थासय् पूजा यानाः स्वयम्भू पर्वतय् थ्यंका बलि बिसे च्वय् थ्यंकेहःगु जुल । थुगु उपलक्ष्य दीपावली उत्सव नं यात । थ्वयां सतिखुनु कार्यक्रम अनुसार मदुत्वाःया पाखें देवता पूजा याःगु जुल । एवंकमं डारोहन थन न्याचाखुनु । असंत्वाःयापि न्याचाखुनु तक नियमपूर्वक पुच्वन, अथे हे वँतुत्वाःया, मखंत्वाःया, मदुत्वाःयापि समेत । थुपि सकले स्यंगुस थ्यंकाः जुल । जाकि फँ ५० करथ्व ग्वः २ मेस ह्य १ सिनके, चोकि माय् म्वाय् चि-चिकं न्यापुचःयातं थुलि प्रमाणं बिसे

१- प्रमाण प्रमेय, पृ. ७९

२- संस्कृत सन्देश, वर्ष २, अंक ६

३- कमलानन्दजुया थ्यासफू

सालागु जुल । मेगु बाकि थःथःपिसं ब्यूगु नयां नय् मफु । सालाहयाया न्हिनिस्ते भेगपा २ ह्यति बलि वियाः सालाहल, सालागु दितकि यिनकोयात मत ब्यूगु जुल । थुलि कर्म यलसिं सालाया विधि जुल ।

ने. सं. ७१४ मार्गशुक्ल दशमी आदित्यवारखुनु श्रीस्वयम्भू चैत्यस पूजा याताः पूर्व सेवा ग्वयागु जुल । थनंलि येँ देसया साहु महाजन व्यापारीत मुनाः सकलयागु सहयोग द्वारा पौष महिनां सारसिं ग्वः ३२ सालाहःगु जुल । चक्रावली निम्ति यंबु नं बछि, मदुयापिसं प्यब्वय् छब्व ओमवाहाः सकसिनं ज्याया अभिभार काःगु जुल ।

माघशुक्ल एकादशी रोहिणीनक्षत्र अति गन्धयोग वृहस्पतिवारखुनु स्वयम्भू चैत्यया न्यास पिकयागु दिन । माघपुन्हीखुनु सिंज्याया निम्ति सिं घाकागु जुल । जीर्ण चैत्य पुनरुद्धारया निम्ति बाःछि विक पियाहःगु जुल, थुकिया क्षमापन क्रिया कलशाच्चन पूजा यात । थुगु स्वयम्भू स्तूप पुनरुद्धारया लागी छसीकथं दनाहय्त सर्वप्रथम विशाल रूप काष्ठ जाल मुगल खः चिइत खः ग्वयगु ज्या लछि दय्काः तिनि सिधय्कल ।

चैत्रशुक्ल एकादशी पुष्यनक्षत्र बलियान योग वृहस्पतिवारखुनु चैत्यया गर्भगृह दँज्या शुरु याय्त सुदीर्घ रूप यलसिं थनेगु ज्या जुल । यलसिं थनेत स्वन्हुतक दनायनाःलि यलसिं तप्यंके धुँसेलि प्रतिष्ठा याताः छत्र ध्वज पताकादि छासे पञ्चताल तूर्यताडावचर वाद्य सहित उत्सव समारोह जुल । नृत्य उत्सव जक भूमिख्यलय जुल । थुगु उत्सव कार्यय् दर्शकगण स्यंगुइ मन्ह्यन, लस्कर आपालं हुनर जुल । गर्भगृह प्यूखुनु छह्य व खः च्यूगुलिइ छह्य सर्प खनेदत । कार्यकारिणी सकसिनं स्वयाच्चन, छुं नं मयाः, गुरुजुं लहातं कयास्वत, अथेनं छुं नं मयाः । शान्तपूर्वक च्वनाच्चन, पंचामृत भोजन तयाविल । योसि थने धुंकाः निन्हु लिपा तस्सकं वाफय् वल । गर्भगृह दनेगु ज्याय् सहयोग व श्रमदान ब्यूपिं वँतुवाहाः, मदुत्वाः, ओमवाहाः, लगं तथा भोतेवाहाःयापि जुल । थनंलि गर्भस्तम्भ, लुखा, गलतुखेला न्हापायागु अति जीर्ण जुयाः न्हूगु दय्काः तयाविल । गल दनेगु कार्यभार जुक्व वँतुवाहाः, इतुंवाहाः, मदुत्वाः, लगं व ओमवाहाःयापिसं भाग काःगु जुल ।

बैशाखशुक्ल त्रयोदशी रोहिणी नक्षत्र शोभनयोग शनिश्चरवारखुनु चक्रावलीया थां स्वानाः त्रयोदश चक्रावली श्रेणी विभाजन याःगु जुल । थुकिया क्रिया यज्ञकर्म जुल ।

बैशाखकृष्ण त्रयोदशी आदित्यवारखुनु चैत्यया शिर्षभाग उष्णीष चूडामणि यज्ञकर्म सहित यासे सुशोभितपूर्वक स्थापना यात ।

ज्येष्ठकृष्ण अष्टमी रेवतीनक्षत्र बलियान योग वृहस्पतिवारखुनु सर्वोपरी चैत्यया श्रीशोभा सुवर्ण छत्र यज्ञ कर्म खंकाः समर्पण याःगु जुल ।

थुलि स्वयम्भू चैत्य निर्माण कार्य सम्पूर्ण जुसेलि न्हापायागु न्यास लिक्कया तयागु पूर्ववत् प्राण प्रतिष्ठाया लागी आश्विनशुक्ल प्रतिपदा पुष्यनक्षत्र धृतियोग वृहस्पतिवारखुनु न्यास स्वथनेगु ज्या जुल । न्यान्हु न्ह्यवः पुलुं भुनातल । गर्भय् दुने तयागु रूप्यमयी घट १ सुवर्णया दुगुरि १ विविध अलंकार निम्ति लुं जुक्व श्रद्धालु जनतापिनिगु । यलसिंस भुनागु सिजः जुक्व नं समस्त जनतायागु जुल । एवँरीत सम्पूर्ण प्रतिष्ठा कर्म विधिस कना तक्व सरसामग्री ताःलाकाबिल ।

ने. सं. ७१५ चैत्रशुक्ल त्रयोदशी बृहस्पतिवारखुनु अग्नि कुण्डपाद स्थापना याःगु दिन जुल ।
चैत्रकृष्ण प्रतिपदा आदित्यवारखुनु पृथ्वी पूजा । वैशाखशुक्ल तृतीयास दिगवन्धनार्थ कीलं स्वाःगु,
श्वया नापं धर्मधातु वागीश्वर मण्डलस पदसाधन कर्म याःगु जुल ।

थुगु महान् पुण्य कार्यय् सफल याय्या निम्ति निम्नलिखित स्थानया सहयोगी श्रद्धावानपिसं
सहर्ष ध्यान तसे छगू छगू ज्याया भार कूब्यूगु जुल—

(१) ने. सं. ७१५ वैशाख शुक्लाष्टमी पुष्पनक्षत्र ध्रुवयोग सोमवारखुनु अग्निस्थापन क्रिया,
जातकर्मया विधि अनुसार जुजु शिवसिंह मल्ल व वंतुबाहाया चित्ताकारकयागु निर्देशनय् अहोरात्रसं
क्रिया जुल ।

(२) श्वया सतिखुनु लगत्वाःयापिं श्रद्धालु भक्तजनपिनिगु सहयोगद्वारा दृष्टिदानया मर्यादानु-
सार क्रिया सम्पन्न यात ।

(३) दृष्टिदानयां सतिखुनु ओमवाहाःयापिनिगु श्रद्धा चित्तया पाखे श्रमदान प्राप्त जुयाः मि
छुइया नियमानुसार कार्य जुल ।

(४) मि छुइयां सतिखुनु धर्म चित्त उत्पत्ति जुयाः भोतेबाहाःयापिसं नामाक्षरया विधि
अनुसार क्रिया जुल । थुखुनुया रात्रिस सालछेयापिनिगु पाखे आवश्यक सहयोग प्राप्त जूगु दु ।

(५) नामाक्षरयां सतिखुनु सिख्वंमूबाहाःयापिनिगु मन स्वां ह्वयाः व अहोरात्रसं फल प्राप्त
विधि जुल ।

(६) श्वयां सतिखुनु ग्वाःपसःया लस्ताः वयाः अन्न प्राप्तया विधि थे जया जुल । रात्रिस
गण्ठछेया जिडभारोया पाखे तपं वल ।

(७) अन्नप्राप्तयां सतिखुनु मखंबाहाः दण्डछेया पाखे पुण्य चित्त उत्पत्ति जुयाः न्हिच्छि
चच्छि कण्ठखुया विधि जुल ।

(८) श्वयां सतिखुनु इतुंबाहाः व न्यतया संयुक्त प्रयासद्वारा सहर्ष चित्तं चच्छि न्हिच्छि
चूडाकर्मया विधिकथं आवश्यक क्रिया सम्पन्न जुल ।

(९) श्वयां सतिखुनु वंतुबाहाःयापिनिगु लस्ताः वयाः व्रतादेशया क्रिया यात ।

(१०) श्वयानं सतिखुनु प्राणिग्रहणया विधि अनुसार केलत्वाःया पाखे चित्त प्रशन्नपूर्वक
जया जुल ।

(११) प्राणिग्रहणयां सतिखुनु असं व नःघःया पाखे प्रशन्नपूर्वक अहोरात्रि प्रतिष्ठाकर्मया
विधि अनुसार कार्यसिद्ध याःगु जुल ।

(१२) उपर्युक्त शास्त्रानुसार पदसाधन, वज्रधातु देगुरिक्रमेन प्रतिष्ठा कार्य महाराज
शिवसिंहया नेतृत्वय् बडो प्रशन्नपूर्वक साङ्गी जुल । थुगु प्रतिष्ठा कार्य निम्ति श्रद्धालु दायकपिनिगु
पाखे प्राप्त जूगु अनेक सरसामग्री कयाः समारोहपूर्वक नगर परिक्रमा यासे स्वयम्भू पर्वस्थान थत यन ।

ने. सं. ७१५ वैशाखकृष्ण पञ्चमी शुक्रवार मूल नक्षत्र थुखुनु द्वादशदिन पर्यन्त लक्षाहूति
यज्ञद्वारा महोत्सव पूर्वक प्रतिष्ठा कार्य सुसम्पन्न याःगु जुल ।

थुगु महान् कार्यय् मूलाचार्य जूहा गुरु वज्राचार्य काष्ठमण्डपया श्रीतरुमूल महाविहार खण्डचोक लिफु उक्कानछेँस च्वंहा श्रीसंजजु । सएव स्थानया कर्माचार्य श्रीरविजु । अनसंतुं च्वंहा उपाध्या श्रीशिरोमुनि वज्राचार्यजु । गीताचार्यजूपि—इतुं बाहाःया वज्राचार्य श्रीरुंगुरुजु पूर्वस । सिख्वंमूया वज्राचार्य श्रीवितुजु दक्षिणस । अनसं च्वंहा वज्राचार्य श्रीज्ञानदेवजु पश्चिमस । यम्बुया वज्राचार्य श्रीअमृतपालजु उत्तरस । एवंप्रकारं लगंवाहाःया श्रीउदयचन्द्रजु, मखंवाहाःया श्रीलुंगुसिंहजु, जमलगण्ठिया श्रीजयसिंहजु, तःछेँ बाहाःया श्रीमुनिजु । श्वते क्रियाया कर्ता भिक्षु श्रीज्ञानचन्द्रजु । व्यश्यत यम्बु ब्राह्मणछेँया विजसिंह भारो । सुवार यम्बु किसिराग्रया महर्जन जयराम । वेताजु वज्राचार्य श्रीगुणजु श्वय्कःया किजा श्रीपण्डुजु । न्यासबलि वालेगु ज्याय् च्वंहा स्यंगुमि हृदयजु । श्वते क्रियाकर्मस चिन्ताकारक जूहा महान नाथू भारो व जखाम । देसस चिन्ताकारक सिख्वंमुगुया भिक्षु श्रीमृजु जुल ।

श्वते स्वयम्भू जीर्णोद्धार कार्यया प्रमुख दानपति काष्ठमण्डप वंतुटोल जाम्बुनन्द वन्महाविहारस च्वंहा राज्ञोमित्र शाक्यभिक्षु श्रीजयलक्षजु जुल । श्वय्कः जयलक्षजु ऐश्वर्य सम्पन्न प्रतिष्ठित व्यक्ति जुयाः नं राजकार्यय् नं दुथ्याःह्य जुयाच्वन । धयातःगु दु—जुजु शिवसिंहसिंहया विश्वासपात्र जुयाच्वंहा जूया निर्मित जुजुया त्वाय्जु तक नं जुयावंगु दु । जाम्बुनन्द विहारया छगू शिलालेखय् जयलक्षजुया वारय् थथे वर्णन यानातःगु दु^१—

भुवनाधिप भूपेन्द्र ध्यान ध्वंसन भास्करः
शिवसिंह नृपः श्रीमान् भाति नेपाल मण्डले ।
शशीन्दुमुनि वर्षेषु राधकृष्णे धनञ्जये
आरम्भ दिवसे तस्य विहारस्य शुभान्विते ।
अनेक गुणसम्पन्नो भूमीन्द्र हितकारकः
भिक्षुः श्रीजयलक्षोऽयं कीर्त्यान्य कृत भूमिपः ।
जातः परम धर्मात्मा कुवेर इवचापरः
अनेन भिक्षु संकीर्ण दानेनैव वशोक्तः ।
श्रावकादि महायाने धर्मेषु सततं रतः
तत्पुण्य परिपाकेन विख्यातस्त्रि भुवनेष्वपि । ...

श्वय्कः जयलक्ष शाक्यभिक्षु व राजा श्रीशिवसिंह मल्लया विचय् गुलि सम्बन्ध दु धइगु विषयय् स्वयम्भू स्थित शिलापत्रय् छथाय् थथे अङ्कित यानातल—

धर्मस्य संस्थापनयैव नूनं
पूर्वैस्त्वदीयैः पुरुषैः कृतोयं
स्तूपः सुजीर्णं प्रबभूव देव ॥

१— संस्कृत सन्देश, वर्ष २, अंक ६, परमानन्द वज्राचार्यजुया थ्यासफू पाखे ।

श्रुत्वा वचस्तच्छिवसिंहदेव
आज्ञापयामास निजं स मित्रं
तथैव चक्रे विधिना सुमित्रं
यज्ञादि पूर्व्वम्मुनि पुङ्गवेन ॥
तत्रैवकाले विधिना धनेन
वज्राभिधेयो मुनिपुङ्गवोऽसौ
समारोपितवान् सुधीरो
मङ्गल्यकर्म्मकर चित्तशुद्धः ॥
चित्रैर्विचित्रैरपि हेमवृन्दै
विनिर्मितैः शिल्पविशेषकारैः
यज्ञेन दानेन जनैस्तदीयैः
स्तूपं वितेन शिवसिंहदेवः ॥

स्वयम्भू महाचैत्यस वज्रमलः जूवयाः शाक्यभिक्षु जयलक्षजुद्वारा जीर्णोद्धार

स्वयम्भू महाचैत्यय् अकस्मात्तं दैवीप्रकोप जुयाः व आकाशमार्गं वज्रमलः जुनाःलि स्वयम्भूया श्रीशोभा विनष्ट जूगु खनाः शाक्यभिक्षु जयलक्षजुं पुनर्जीर्णोद्धार याना व्यूगु जुल^१ ।

राजा शिवसिंह मल्लजुया हजुरीस जाहेर यानाः व पुनः राजापाखे आज्ञा कयाः स्वयम्भू जीर्णोद्धार याय्त सारसिं सालेत ने. सं. ७२१ चैत्रशुक्ल दशमी वृहस्पतिवारखुनु यथा विधि थे पूजा यानाः चैत्रकृष्ण प्रतिपदाया दिनय् सारसिं सालाः निर्दिष्ट स्थानय् थ्यंकेहल । ने. सं. ७२२ आषाढशुक्ल दशमी स्वातिनक्षत्र शुभयोग शुक्रवारखुनु न्यास पिकयाः कलशाच्चर्चन पूजा यानाःलि सद्धर्म पुथि पाठ याकाः न्यासघल काचपाल छेलिइ विश्राम याकातल । थनंलि छत्र चक्रावली गर्भगृह पियाः फिच्यान्हुतक खःग्वय्गु ज्या जुल । ने. सं. ७२४ माघशुक्ल पञ्चमीखुनु श्रीधर्मधातु वागीश्वर स्वयम्भू चैत्य जीर्णोद्धार निर्मित यलसिं थनागु जुल । माक्व विधिविधान थे जीर्णोद्धार कार्य सिधसेलि ने. सं. ७२५ माघशुक्ल श्रीपञ्चमी वृहस्पतिवारया दिनय् प्यचा प्यन्हुतक यज्ञोत्सव यानाः प्रतिष्ठा कार्य सम्पूर्ण याःगु जुल ।

थुगु जीर्णोद्धार कार्यय् मूलाचार्य सिख्वंमूया पण्डुजु वज्राचार्य, कर्माचार्य रविजु एवं पुखूद्यांया मणिजु उपाध्या । दिगयितु विहारया नुगुजु, सिख्वंमूया वित्तजु, ज्ञानदेवजु, क्वाःबाहाःया अमृतपालजु, चर्यापालङ्क रथजु, ओमबाहाःया रत्नसिंहजु, तःछेया मुनिजु— थुपि आचार्य समुच्चय जुयाः वज्रधातु देगुरि क्रमेण प्रतिष्ठा कर्म यानाया स्यंगुया कर्ता मञ्जुदेवजु जुल । एवंकर्म थुगु पटकय् जीर्णोद्धार कार्यया अनुक्रमय् सहयोग बियाः भागकयाच्चर्चि निम्नप्रकार श्रद्धालु भक्तपिनिगु नां न्ह्यथना- तःगु खनेदु—

वैतुविहारया स्थवीर बान्धवकीर्ति, केलया कंसाकार गुणसिंह, इतुं बाहाःया हाकु, मुखंया वैश्य

देवसिंह, वंगःया ताम्रकार समर, असंया तुलाधर ज्ञान व जीवनसिंह, नःघःया जयकीर्त, सिक्कमगुडिया भासिंह एवं कनकराज, तोछेया ताम्रकार मेल भारो, सालछेया ताम्रकार जके भारो, ओमवाहाःया रूपसिंहदेव व भय, लगःया मयसिंह, ज्ञानकीर्त आदि धर्मात्मापिसं श्रमदान ब्यूवःगु दु । थुगु कार्यय् निरीक्षक हाकु व ज्ञानकीर्त जुल । थपति मखंया जशीराम, वितुर, यगलया जशीरामराज, सुराज, ल्वहंकीर्मी सुमति, जोशी मन्दुरामजु ।

स्वयम्भूस वज्रपात जुयाः गुगु प्रकारं विनष्ट जुल उगु क्षतिग्रष्ट सुधार निमित्त जीर्णोद्धार कार्य जुयाच्चंगु अपरिमित पुण्य कार्यय् परम सहयोगी दानपति वंतु जाम्बुनन्द विहारया शाक्यभिक्षु श्रीजयलक्षजु, तस्य भार्या हेला, ज्येष्ठपुत्र जयतसिंह, भलि माणिक, द्वितीयपुत्र पूर्णसिंह थ्वया कलाः प्रभाती, छय्चापि जके, यक्षजयन सकल परिवारयां शुद्ध चित्त जुयाः थुगु निकोगु पतिइ स्वयम्भू ल्ह्वंगुया दानपति जुल ।

स्वयम्भू जीर्णोद्धार जूगुया वर्षवन्धन (बुसाधन) या निमित्तय् आयस्ता स्वरूप साखुराय बुँ प्यपी शुभ संकल्प जुल । थुगु आयस्तां दैय्दैसं महादीप छ्वय्केमाल, श्रीपञ्चमीखुनु दिनयज्ञ यासे आर्यनामसंगीति सूत्रपाठ याके । शान्तिपुरीस खापा चाय्काः पूजा विधि दुतविइ माल जुल ।

थुगु पुण्यानुभावं निम्नलिखित गाथा अनुसार फल प्राप्त जुइमा धकाः आशीका यानातःगु दु-

एतत्पुण्य प्रभावाद भिमतफलदां
मेदिनी पान्तु भूपा मेघा वर्षन्तु काले
त्रिदशपुरगताः सन्तु लोकास्त्वशोकाः
यावन्तिष्ठति वायुक्षितिजलरविखा
ये ख भूम्यो हितावल्लोका यान्तु प्रमोदाः
परमगतितामां निर्वृता मोक्षमार्गे ।

स्वयम्भू जीर्णोद्धार निमित्त महारानी गङ्गादेवीया पूर्ण सहयोग

महारानी गङ्गादेवी राजा शिवसिंह मल्ल जुजुया धर्मपत्नी खः । श्वय्कः राजा बडो बुद्धिमानो व प्रजापालक नापं उत्तिकं धर्मात्मा नं जू । श्वय्कलं आपालं देवदेवालय नं दय्कावन । श्वय्कःया निरन्तर श्व चिन्ता जुयाचवनी—थ.गु देसया प्रजापि छछाः हे छांलाना चवने म्वाःलेमा । श्व हे खँया विषय कयाः वंशावलीकारतय्सं थथे वर्णन यानातःगु दु^१— वय्कःयागु लायकुलिइ कौशीया बुर्जाय थहांवनाः थथे विचार याना स्वयाचवनी— गुगुं त्वाःवाहालय छेँखाय भुतुलिइ मि मच्यात उगु छेँय हेरविचारया लागी तुरन्त थः सिपाहिंत छवयाः जांच बुळ याकाः इमिगु दुःख शान्त याना बिइ ।

थुजाःह्य विवेकवन्त जुजुया कलाः जूया निमित्त गङ्गादेवी रानी नं उत्तिकं हे प्रभावशाली व शूर वीर जू, थःभाःतयात जूसां धर्मकार्यय् बारंवार टेवा बियाः प्रेरणा बियाचवनी । प्रायः राज्ययागु धार्मिक पक्षयागु सम्पूर्ण अधिकार रानीपाखे हे रेखदेख याकूगु खनेदु^२— स्वयम्भूयागु गलसिँ यलसिँ हिलाः बांलाक जीर्णोद्धार याकेबिल, अथे हे पशुपति व चांगुनारायण आदि मेमेगु मन्दिरय् नं जीर्णोद्धार याकाः बांलाका बिल । थुलि जक मखु पशुपंक्षि मृगतय्गु लागी बिचाः संचाः याय्त नापं प्रजापित प्राकृतिक सुन्दरतायागु आमोद प्रमोद बिइकेत, देसया शोभावृद्धि निमित्त स्वयम्भू चैत्यया सतिकसंतुं च्वंगु नागार्जुन जङ्गलयात सुरक्षित यानाः अनेक स्वां सिमा फलफुलमा पिनाः न्ह्याइपुसेच्वंक सुन्दर विशाल बगैचा दय्के बिल । उकिं थुगु उपवन थौतकं गङ्गादेवीया नामं 'रानीवन' धइगु नामं प्रसिद्ध जुयाचवन ।

सौभाग्यवश गङ्गादेवीयागु सदिच्छानुसार यक्व समय लिपा थुगु रानीवनया छगू अग्रभाग ल्हुति वालाजु उद्यान प्राकृतिक सुन्दर हिमाच्छादित नेपाल देसया मुख्यगु रमणीय 'महेन्द्रोद्यान' नामं प्रख्यात जुयाचवन । अतः वर्तमान थुगु बगैचायागु रेखदेखयागु व्यवस्था व वैज्ञानिक तरिकायागु सजावत जुजुं वयाचवंगुलि यानाः लोकप्रियता वृद्धि जुजुं वयाचवन ।

१- काठमाण्डू उपत्यकाको मध्यकालीन इतिहास, पृ. १०९

२- नेपालको ऐतिहासिकको रूपरेखा, पृ. १६६

स्यंगुस प्वं गात, शान्तिपुरीस खुँ वल

संसारय् प्रकृतिया नियम नं बडो विचित्र खनी, मेमेथाय् प्वं मगासे स्यंगुया वन जंगलय् जक प्वं गाःगुया छु रहस्य खः थ्व आश्चर्यजनक धाय्माः । हानं शान्तिपुर थे जाःगु अगम्यगु भयंकरगु थासय् नं लोभराग अथवा अनुसन्धानया दृष्टि खुँतय्सं नं व मयाः थ्व मयाः अन वने थन वने मज्यू धइगु छुं नियम मदु धइगु थ्व घटनां प्रमाणित जू ।

थुजाःगु अशुभ अशकुन अमंगल जुइबलय् बिघ्नोपद्रव शान्तिया निम्ति शास्त्रोक्त विधिकथं राजा लक्ष्मीनरसिंहजुया पर्यायस ने. सं. ७४० चैत्रकृष्ण त्रयोदशीया दिनय् स्यंगुया वन जंगलय् जक प्वं गाःगु व अन हे च्वंगु प्रसिद्ध गुफा शान्तिपुरीइ खुँ वःगुया नं विषय कयाः जुजु लक्ष्मीनरसिंहं गुरुजुपि मुंकाः सरसल्हा जूगु निर्णय कथं जुजुं आवश्यक पूजा सामग्री बियाः शान्ति स्वस्ति कृया याकूगु जुल । श्रीस्वयम्भू महाचैत्यया न्ह्योने यज्ञ, पञ्चरक्षा पाठ आत्मविम्बदान व खासिवली याकल । शान्तिपुरीस जक मांसाहृतियज्ञ एवं पञ्चधारा हाय्काः सुवर्ण दक्षिणा बियाः सद्यकौमारी भोजन याकूगु जुल ।

थुगु कार्यय् कृपा याःह्य सिख्वंमू वज्राचार्य मणिरत्नजु, ज्ञानदेवजु, मणिजु, जिओनसिजु, विभुजु, रथनजु, मित्ररत्नत्रयजु, मुनिजु, नुगुदेओजु, मणिराजजु, विभूजु व परमपारजु समेत सम्मिलित जुसे कार्य सुसम्पन्न याःगु जुल । भण्डारी गुणसेनजु ।

स्वयम्भू महाचैत्य जीर्णोद्धार निमित्त जुजु लक्ष्मीनरसिंहया पूर्ण सहयोग

धर्मधातु वागीश्वर श्रीस्वयम्भू महाचैत्यप्रति अतीतकालया राजा राजापिसं गुगु प्रकारं श्रद्धा भक्ति तयाः स्वयम्भू चैत्ययागु जीर्णोद्धार यानावन, उगु हे प्रकारं जीर्णोद्धार याकेगु विषय निर्णय जुल^१ ।

थुगु महान् पुण्य कीर्ति स्वयम्भू महाचैत्य जीर्णोद्धार कार्यक्रम अनुसार ज्या प्रारम्भ जुल । सर्वप्रथम ने. सं. ७४१ पौषकृष्ण षष्ठीखुनु जीवन्त्यास पिकाल, थ्वयां सतिखुनु विधिवत् वनजात्रा जुल, नापं यौताज्वलस पुरश्चरण च्वन । थनंलि पौषकृष्ण नवमोखुनु पृथ्वीपूजा यात । पौषकृष्ण एकादशीया दिनय् पाद स्थापना जुल । माघशुक्ल द्वितीयास कीलं ताय्गु यात । थ्वयां सतिखुनु दुसरा क्रिया, थ्वयां सतिखुनु अग्नि स्थापना याःगु जुल । ने. सं. ७४१ श्रीपञ्चमीखुनु सम्पूर्ण कार्य सिधय्काः व धर्मधातु वागीश्वर स्वयम्भू चैत्यय् मंगलोत्सव पूर्वक अहोरात्र यज्ञ यासे छत्रारोहण सहित प्रतिष्ठा कार्य सम्पूर्ण याःगु जुल ।

थुगु जीर्णोद्धार कार्य विषय निम्नलिखित कार्यकर्तातय्गु नां न्ह्यथनातःगु दु—

स्यंगुया मञ्जुदेव शाक्यभिक्षु राजाया हजुरीस वनाः राजायाके पूर्ण सहयोग माग याना हयाविल । जीर्णोद्धार याय्माःगु कारण विषयय् थथे धइतःगु दु—स्वयम्भूया चकुलि छत्रावली चूडामणि पर्यन्त आपालं ध्यचुला च्वंगुलि तत्कालं हे उगु त्रयोदश चक्रावली भग्न जुइत तैयार जुयाच्चंगु दु । उगु क्षतिग्रस्त महान् ऐतिहासिक चैत्य भिके निर्मित राजां पूर्ण सुदृष्टि तय्माः धकाः इनाप यात । थुगु प्रार्थनानुसार राजां स्वयम्भूप्रति श्रद्धा भक्ति तयाः जीर्णोद्धारया लागी आवश्यक

१- कमलानन्दजुया थ्यासकृति ।

सरसामग्री एवं आर्थिक सहयोग मोहः ४८ पोच्यामोहः प्रशन्न जुयाः व नापं उगु कार्यय् ज्यामि स्वरूप माहांत (सरकारी सिपाहिं) समेत कार्यार्थं नियुक्त यानाव्यूगु जुयाच्वन ।

मञ्जुदेवजुया इनापकथं जुजुं पूर्ण सुदृष्टि तयाः थथे नं आज्ञा जूगु दु—थुगु महान् कार्यय् सकलसिगुं श्रमदान सहयोग सहानुभूति आवश्यक जू धइगु विषय कयाः देसया प्रतिष्ठित व्यक्ति गुरु भराड, कार्यकारिणी, साहु महाजन मुंकाः सभाषद च्वनाः अनेक सःस्यूपि सम्बन्धित कलाकारपि समेत सामेल याकाः प्रतिष्ठा याय्गु शुभ घडी सहित निर्णय यानाविल ।

थुगु कार्यय् याय् माक्व विधिविधान पूजा गुरुजुं स्थान स्थानान्तरयात विभाजन यानाविल— वादेसन थ स्वव्व, बादेसन क्व निव्व याय्माल धकाः गुरुजुं आज्ञा जुल । तदनुसार कार्यभार लःल्हाना काय्गु सकलसियां सहर्ष स्वीकार याना काःगु जुल ।

श्रीस्वयम्भू जीर्णोद्धार कार्य सम्पन्न जूगु दिनय् अहोरात्र यज्ञ यानाच्वंगु बेलाय् राजारानी बिज्यानाः गुरुजुपित दक्षिणा दां तका ३ महारानीं दां तका २ प्रशन्न जुल ।

थुगु प्रतिष्ठा कार्यय् मूलाचार्य सिख्वंमूवाहाःया वज्राचार्य मणिरत्नजु, कर्माचार्य ज्ञानदेवजु, पुखूद्यांया उपाध्या मणिजु । एवंप्रकारं इतुंवाहाःया जीवनरसिंहजु पूर्वय्, सिख्वंमूवाहाःया बितुजु दक्षिणय्, लगंया रथनजु पश्चिमय्, क्वाथवाहाःया जित्पालजु उत्तरय् । अन्य बाबुदेवजु, मणिजु चचपा जुल । थुगु कार्यय् चिन्ताकारकपि इतुंवाहाःया पुरन्दरजु व जमलगणिया नुगुरुजु, मरुया धर्मजु सहित आचार्यपि च्वनाः थुगु जीर्णोद्धार निर्विघ्नं सिध्यक्कूगु जुल ।

स्यंगुदेवया निमित्तं जुजु लक्ष्मीनरसिंहजुया पारखें बिसः नियुक्त यानाब्यूगु

जामाःचो, फूच, सिफुच व धेलाचो थें जाःगु प्रसिद्ध पर्वतं चाहुइकाः सुरक्षित यानातःगु द्वादशतीर्थया जलं निरन्तर पवित्र जुयाच्चंगु श्रीसम्बर मण्डलाकार स्वरूपी नेपाल मण्डलया श्रीशोभा जुयाच्चंगु स्वयम्भू महाचैत्य जुयाच्चन । थुगु स्वयम्भू महाचैत्ययागु गुलिनं थितिरिति गुठी व्यवस्था दइच्चन, अले उगु भण्डार्य गुलिनं तिलहिल व पूजा सामग्री अन्य वसु जात दइच्चनी, इमिगु भिन्नकं हेरविचारया लागी संरक्षणया निमित्त लाय्कूपाखें विचाः संचाः याइह्य गुह्य खः विसः (विशिष्ट व्यक्ति) नियुक्त यानाब्यूगु जुल ।

श्वय्कः विसःजु नियुक्त यानाब्यूगु दिन खः ने. सं. ७४४ सालया चौछाय्पुन्हीखुनु^१ ।

१- श्रीगौतमवज्र वज्राचार्यजुया थ्यासफुति ।

स्वयम्भू महाचैत्यय् रूपराज दंगूरीया सरत्वाःपा

स्वयम्भू महाचैत्ययागु गुण गौरवप्रति ध्यान आर्कषित जुयाः विभिन्न श्रद्धालु महानुभावपिसं इलय्-व्यलय् अनेक प्रकारं स्वागत सत्कारपूर्वक यथा शास्त्रानुसार धर्म कीर्ति तयाः मनमाथं पूजाभाव यानाः अनेक प्रकारं पुण्य साधन यानावंगु वंशावलो, इतिहास, कथा, पुराण आदिस उल्लेख याना तइतल ।

थव हे ऊवलय् जुजु लक्ष्मीनरसिंहया पर्यायस ने. सं. ७४७ बैशाखशुक्ल पूर्णिमाखुनु श्रीस्वयम्भू महाचैत्यप्रति श्रद्धाभक्ति तयाः तरुमूल श्रीमहाविहारया गुरु वज्राचार्य मणिरत्नजुया संविधानत्वय् यथा शास्त्रोक्त विधिपूर्वक सुधालेपन सरत्वाःपा याःगु जुल । थुगु शुभकार्यया दानपति महर्जन रूपराज दंगूरी^१ ।

स्यंगुया कतिनियातयाखुनु तच्चोगु बेगं प्वं गात

स्वयम्भू महाचैत्य विराजमान जुयाच्वंगु काठमाण्डू उपत्यकाय् विभिन्न समयय् प्राकृतिक प्रकोप जूगु विभिन्न घटनात मध्यय् छगू उल्लेखनीय घटना थ्व नं खः ।

स्वयम्भू महाचैत्य स्थानय् परम्परागत रूपं न्याय्का वयाच्वंगु ने. सं. २४८ आश्विनकृष्ण चतुर्थीया दिनस उत्सव जुयाच्वंगु इलय् अकस्मातं तच्चोगु बेगं प्वं गात ।

थुगु दँ आपालं वन जंगलया सिमात क्षति ग्रष्ट जुल । सिमाय् वासं च्वनेमाःपिं कंगः पंक्षितय् नं तच्चोगु दुःख कष्ट जुल, हाहाकार जुल । थुलि जक मखु जग्गा जमीनय् सयाच्वंगु, ह्वयाच्वंगु, पाकय् जुयाच्वंगु आपालं सिसाफुसा, जातं जातया स्वां व सेसामा अन्न वस्तुत अकथनीय रूपं क्षति ग्रष्ट जुल; गुकिया कारणं वजारया भाः यक्व यक्वं थिकय् जुयावन, अन्नवस्तु दुर्लभ जुल । छमोहःया जाकि छमना तकं जुयावन^१ ।

१- श्रीपरमानन्द वज्राचार्यजुया थ्यासफुति ।

स्यंगुया वनस मगरं सिमा धयंबलय् हि म्हुयावःगु

संसारय् दैवया लीला विचित्र, व जुइ मखु थ्व जुइ मखु धइगु संसारया विधाताया छुं निश्चित नियम मदु धइगु खँ विभिन्न समयय् जुयावंगु अनेक आश्चर्यजनक घटना इतिहासय् उल्लेख जुया वइच्चंगु मध्यय् थ्व नं छगू थःगु हे तालगु घटना खः ।

छह्ना खँय् मगरं थ्व स्वयम्भू जंगलय् च्वंगु सिमा ध्यने धकाः ने. सं. ७४६ ज्येष्ठकृष्ण अष्टमीस सिमाय् पां घाःकःगु (पाःगु) व्यलय् अद्भूत नक्सां हि म्हुयावल खनी । थथे सिमा ध्यनाः हि म्हुयावल धइगु स्वय् नंपि न्यने नंपि मदु धकाः स्वक्व न्यक्व ताक्व सकसियां विश्मय चायाच्चन । उकिइसं थथे तःधंछोयाथाय् थुजागु प्रकारं उत्पात जूगुलि अवश्य देसय् अशान्ति विघ्न उपद्रव जुइफु धकाः धर्मभीरु जनतापिनि सकसियां खँल्हावल्हा जुल । थ्व अद्भूत घटना जूगु समाचार महाराज लक्ष्मीनरसिंहया हजूरौ तक नं थ्यन । जुजुं आज्ञा जुल—‘थुक्रिया अवश्य नं शान्ति स्वस्ति याय्माः ।’ थुलि धयाः गुरु भराड र ब्राह्मण, दैवज्ञ आदिपि मुंकाः सरसल्हा जुल । थुगु सरसल्हानुसारं आषाढ-शुक्ल अष्टमोखुनु स्यंगुइ शान्ति बलि विधिपूर्वक जूगु जुल । थुगु शान्ति बलिस माक्व सरसामग्री प्रशन्न जुयाःलि जुजु थः हे विज्यानाः शान्ति बलि बिइकूगु खः ।

थुगु शान्ति बलिया कृयाकर्ता सिख्मूबाहाःया वज्राचार्य श्रीमणिरत्नजु प्रमुखं स्यंगुया प्रतिष्ठा कार्यय् ग्यलको जुल । चिन्तायाक वँतुवाहाःया पुनजु, जिवराज, हाकुजु एवं ज्ञानकीर्तिपि^१ ।

स्वयम्भू शान्तिपुरीस जुजु लक्ष्मीनरसिंहया आज्ञानुसार महामेघ साधन

हिमालयया मुकुटं पुयाच्चंगु गिरिराज पर्वतं चाःहुलाच्चंगु प्राकृतिक प्रधान नेपालस समय—समयय् मेघ शून्य जुयाः देसय् अनिकाल दुर्भिक्ष जुयावंगु विविध घटनात कीगु न्ह्योने इतिहासं न्यंका वइच्चंगु दु । तदनुसार कवीन्द्र प्रताप मल्लया अबु राजा लक्ष्मीनरसिंहया पर्यायस अकस्मातं आकाश मण्डलस धारा प्रपात मेघ शून्य जुयाच्चंगुलि देसय् जल वृष्टि मजुयाः प्रजागणपित आपालं दुःख कष्टः जुयाः हाहाकार जुल ।

थुजाःगु अनावृष्टि समयय् राजा लक्ष्मीनरसिंहं करुणां प्रेरित जुयाः जल वृष्टि निम्ति नागसाधन महामेघ आराधना याकेगु निर्णय जूगुलि बौद्धाचार्यगणपि निमन्त्रणा याकाः विधिवत् साह्येगु पर्वतय् विराजित नेपाल अधिष्ठाता श्रीस्वयम्भू महाचैत्यया स्थानस 'महामेघ साधन' याकेविल ।

ने. सं. ७४६ आषाढकृष्ण तृतीया धनेष्टानक्षत्र आदित्यवारनिसें न्हय्चा च्यान्हुतक महामेघ साधन याःगु जुल । थुगु साधनकर्मय् मूलाचार्य जूह्य तरुमूल श्रीविहारया मणिरत्न वज्राचार्य, नागपुर वशिकस च्वंपि बाबुदेव वज्राचार्य । पदुमय्जु याक व मूलविहारया नाथजु शान्तिपुरीस च्वन । एवंक्रमं आवश्यक ज्याखँय् कार्यकर्ता जूपि मुसूबाहाःया मणिराज, लगंया गुणदेव लकोसोर स्थानय् नियुक्त जुल । इतुं बाहाःया धर्मदेवजु इतास च्वन । जमलगण्ठिया वित्तुजु, क्वाथवाहाःया जितरपार, तःछेया शिरोमुनि थुपि फसखास नियुक्त जुल । अले पुखूद्यांया मणिजु, मखंबाहाःया अमितचन्द्रजु थुपि थातं च्वंपि जुल । एवंक्रमं धर्म, रत्नत्रय, जिनदेव, गुणसेन आदि माःगु ज्याखँय् हारगुहाःलि याःपि जुल । गुलिसिनं महामेघ सूत्र पाठ यात ।

थुगु महामेघ साधन क्रिया विसर्जन जुइ छन्हु न्ह्यो महाराज लक्ष्मीनरसिंहया सदिच्छानुसार तस्सकं जल वृष्टि जुल । देसय् महामंगल जुल, प्रजागण सकले अत्यन्त हर्ष जुल ।

थुगु साधनकर्म सफल जूगु उपलक्षय् आचार्य मणिरत्न व बाबुदेव निहासित हार्दिक कृतज्ञता ज्ञापन यासे साधुकार व धन्यवाद प्रदान यानाः पारितोषिक स्वरूप सिरपाः— लुँचुल्या छपु, पलिगा (दोसालगा) छपु राजां प्रशन्न जुल । मेपि प्रमुख कार्यकर्ता च्याह्येसित जक पलिगा छपु छपु इनाबिल । तोपु व भदिलीयात दां सुका निसुका बिल । पाठ याःपित दां सुका छसुका दरं बिल ।

पूजा विषयय् थथे चर्चा यानातःगु दु— स्वयम्भू महाचैत्य पूजा, कलश पूजा, नाग पूजा, न्हिनय् बलि छपाः व खालस १०० पाः बलि । रात्रिस भेगपात ३२ व खालस १०८ बलि तर्पण । कार्य शुभारम्भखुनु पञ्चभूतस पूजा, विसर्जनखुनु बाग्वरदार भेगपात ५० खालस १०८ पञ्चभूत पूजा, फसखास बलि कर्म खंकल । शान्तिपुरीस प्रारम्भ छन्हु न्ह्यो पूजा द्रुत व्यूगु जुल । सतिखुनु पञ्चसालि नामक रहस्य पूजा जुल ।

थुगु कार्यय् आवश्यक ज्याखँय् धन्दा कुबियाजूपि पजामोर उदास, वँतुया पुनजु, जिवराजजु, हाकुजु । लगंया ज्ञानकितजु, न्यतया कुतु, असंया जयतसिंहजु, केलया मणिराज प्रभृति सकल महानु-भावपिनिगु सहयोगद्वारा थुगु 'महामेघ साधनकर्म' निर्विघ्नपूर्वक सिद्ध जुल ।

स्वयम्भू महाचैत्यया पिखाद्वारस सुवर्ण तोरण लामा श्यामारजुं दोहलपिल

स्वयम्भू महाचैत्यया गुणानुस्मरण यासे चतुर्दिगया अनेक महापुरुषपि व भक्तजन वयाः दर्शन व पूजन यासे विविध धर्मकीर्ति दोहलपा वयाच्वंगु परम्पराकथं छन्हु उत्तरापन्थ ल्हासाया प्रसिद्ध धर्मावतार श्रीश्यामार लामाजुया सद्धर्म चित्त उत्पत्ति जुयाः स्वयम्भू दर्शनार्थ नेपाः थ्यंकःवल ।

स्वयम्भू धर्मधातु वागीश्वर प्रदक्षिणा यासे थुगु स्थानयात त्वय्क शोभावृद्धि याय्या निम्ति पूर्वय् अक्षोभ्य, दक्षिणय् रत्नसंभव, पश्चिमय् अमिताभ एवं उत्तरय् अमोघसिद्धि विज्यानाच्वंगु चतुर्दिगया पिखाद्वारया श्रीशोभा अभिवृद्धिया लागी सुवर्ण तोरण दोहलपेगु महान् अभिलाषा प्रकट जुल । देसया तत्कालीन नरेश श्रीलक्ष्मीनरसिंह मल्लजुया हजुरीइ वनाः थःगु मनोभाव व्यक्त यासे प्रार्थना यात ।

थुगु प्रार्थनायागु शुद्ध हृदययागु आशय थुइकाः व लामाजुं याय्त्यंगु प्रशंसनीय उत्तम कार्य जूया निम्ति राजां वडो प्रशन्नपूर्वक तोरण निर्माणया लागी सिजः जुक्व राजां प्रशन्न जुल । थुगु कलापूर्ण सुवर्ण तोरण दय्के सिधय्काः ने. सं. ७५० फागुनशुक्ल अष्टमीया दिनय् स्वयम्भू महाचैत्यस सभक्तिपूर्वक प्रतिष्ठा यानाः तयाबिल^१ ।

थुगु तोरण प्रतिष्ठा जूगु शुभउपलक्षय् सिख्वंमुगुया मणिरत्न वज्राचार्य क्रियाकर्ता जुयाः कलशाच्चर्चन एवं दिनयज्ञ या गु जुल । थुगु कार्यस चिन्ताकारक असं छेँया पुलानमिखा जुल ।

१- कमलानन्दजुया थ्यासफू ।

स्वयम्भू महाचैत्यप्रति सुवर्ण बिमान राजा लक्ष्मीनरसिंहद्वारा समर्पित

राजा लक्ष्मीनरसिंहं स्वयम्भू महाचैत्यप्रति श्रद्धाभक्ति तथाः थुजाःगु प्रकारं मतिइ चिन्तना यात—नेपाल इतिहासय् सर्वप्रथम उत्पन्न जुयाविज्या ह्य स्वयम्भू महाचैत्य जात्राया लागी साधारण काष्ठमय खः जक जुयाच्चंगु खनाः बुद्धिमानी जुजुया धर्मचित्त जुयाः यथायोग्य प्रमाणं बांलाक सुवर्ण रचित बिमान चढ्य् याय्गु शुभसंकल्प याःगु जुल ।

थुगु शुभसंकल्प भाकल अनुसारं अति हर्षमान याताः कुशल कलाकारया ल्हातं लुंया बिमानखः दय्के बियाः ने. सं. ७५० आषाढकृष्ण द्वितीयाखुनु गिरिवर साह्येगुँ विहारस सुप्रतिष्ठित ज्योतिरूप श्रोस्वयम्भू महाचैत्यप्रति कलश पूजा याताः सभक्तिपूर्वक समर्पित याःगु जुल । थुगु सुवर्ण बिमान चढ्य् यातागु विषय कयाः छुं दिन लिपा आषाढकृष्ण चतुर्दशीखुनु स्यंगुस पुनः कलश पूजा याकाः फसखास बलिकर्म खंकाः शान्तिपुरीस पञ्चसारी पूजा समेत याकाः उगु लुं बिमानखः दोहलप्युगुया कार्यक्रम सिधय्कूगु जुल^१ ।

थुगु कार्यस पूजा याःह्य सिख्वंभूवाहाःया वज्राचार्य मणिरत्न धकाः उल्लेख यातातल ।

स्वयम्भू महाचैत्यस शाक्यभिक्षु हाकुजुद्वारा मयन छत्रारोहण समर्पित

तरुमूल श्रीमहाविहारया शाक्यभिक्षु हाकुजुया धर्मचित्त उत्पत्ति जुयाः श्रीधर्मधातु स्वयम्भू महाचैत्यप्रति श्रद्धाभक्ति तयाः मयन छत्र (सीस्वां दय्के थें उगु स्वयम्भू चैत्ययात लव्यक त्रयोदश चक्रावली व्याप्त जुइक भुनेगु प्रमाणं आपालं सी खर्च यानाः व महान परिश्रम यासे दय्कातःगु) सीया छत्र गजू मण्डल (इला ?) आदि छत्र ध्वज पताकादि पाखे सुशोभित जुइक दय्काः व लक्ष्मीनरसिंहया शासनकाल ने. सं. ७५० आश्विनशुक्ल पूर्णिमाखुनु विधिपूर्वक अनेक मंगलोत्सव यासे मयन छत्रारोहण सुसम्पन्न याःगु जुल^१ ।

मयन छत्र समर्पण याय् बाःछि न्ह्यो कलश पूजा यानाः स्वयम्भूइ भुनातःगु पुलु उलाबिल । अले च्यान्हु न्ह्यो कलश पूजा, खःपूजा, विश्वकर्मा पूजा यानाःलि फसखास बलि विइगु ज्या जुल । एवंरीतं प्यन्हु न्ह्यो सखाःपाया विधि अनुसार पूजा, फसखास खासबलि बिल । निन्हु न्ह्यो मयन छत्र दय्केया लागी संकल्प यानातःगु ब्याक्क सिथ खतय् तयाः उत्सवपूर्वक नगर परिक्रमा याकाः जात्रा यानायंकाः पुन्ही न्ह्यथुखुनु सेथगजु इलां स्वयम्भू पर्वस्थानय् थ्यंकाः लसकुस यासे स्वागत यानाः दुकाःगु जुल ।

पुन्हीखुनु मयन छत्र दोहलप्युगु विषय थथे विधि कर्म याःगु दु धकाः वर्णन यानातल—

च्यागः कलश पूजा यानाः देवताहूति यज्ञ याय् धुंकाः सिथयात थथे भावना व्यक्त यानातःगु खनेदु— थनंलि सिथ मण्डल भावना—

ऊटीति शून्यतानन्तरं वैरोचन अक्षोभ्य
रत्नसंभव अमिताभ अमोघसिद्धि

१- थ्यासफू- हेमराज शाक्यया थःगु संग्रह ।

लोचना मामकी पाण्डूरा तारादि
चतुर्देव्या स्वभावं कटीति शून्यताधिमोक्षेण
पंचतथागत हृद्बीज स्वरूपेण निष्पन्न करिमान
वैरोचनादि स्वभावेन— मयन पुष्पं छत्र ध्वज
वितान गण्डादि पंचवर्ण देवतारूपं विचिन्तयेत् ।

थुलि गाथा व्वनाः व उगु मयन पदार्थ परिशुद्ध याय् धुंकाः थुजाःगु सद्भावना व्यक्त याइ—
अचिन्त्य लोकधातुय! प्राणिपिनि छगू मात्र आधार स्वरूप जुयाच्चंगु सुख शान्तिया लँपु विशुद्धगु मैत्री
करुणा रूपी विपुलगु जगच्छत्र भावना याइ, त्रयोदश भुवन नाथ स्वरूप पुण्यमेक जगत्राण धर्ममेघा
भूमिश्चर लाभ जुइमा धइगु शुभप्रतिज्ञा याइ । गथे कुसां कुइवल्य तांन्वइगु वा वइगु पाखे वच्य
यानाः शान्त याना विइ अथे हे थुगु बुद्धशासनया विशुद्ध छत्रच्छायाया दुने लानाच्चंवि प्राणिपि निश्चय
नं सम्पूर्ण दुःखपाखे पार जुयाः सत्सुख प्राप्त जुइ । थुगु छत्र स्वयम्भूयात चढ्य यानागु पुण्यया
प्रभावं— सकल सत्व प्राणिपिसं अनुत्तर बोधि प्राप्त जुइमा धइगु कामना यासे हानं आचार्य निम्न-
लिखित वाक्य व्वनाः अधिष्ठान याइ—

ॐ नमः समन्तबुद्धानां ॐ महाप्रत्यंगिरोष्णीष
चक्रवर्ति— सर्वयन्त्र बन्ध, इन्द्रभुवनं वश्र,
महावृष्टि बन्ध, वृषदेवबन्ध धारय
इहवस्तुनां येन केनचित् भयादिकं
छिन्द २ भिन्द २ चिरि २ गिरि २
हूँ २ फट् २ स्वाहा ।

इत्यादि सद्भावनां प्रेरित यानाः विशुद्धगु छत्र तुल्य भावना याय् धुँसेलि विधिवत् कर्म खंकाः स्वयम्भू
चैत्यय् मयन छत्र दोहलपा ब्यूगु जुल ।

थुगु कार्यय् मूलाचार्य सिख्वंमुगुया मणिरत्नजु थ्वया खवय् बाबुदेव, जवय् पुख्खाया मणिजु ।
मयन छत्रारोहण कार्य सम्पन्न जूगु उपलक्ष्य जजमानं गुरुजुयात मुखः वज्रघण्ट, श्रुवापा एवं बेताचि,
गोकुल, चुल्या, अंगू व वस्त्र सहित सिरपाः बिल । जुजु लक्ष्मीनरसिंहं थुगु कार्यय् सहमति जुयाः
अनुमोदन यासे दक्षिणा दां तका ६०, सुवर्ण दक्षिणा तका २ चढ्य यात । नापं मयन छत्रारोहण
सम्पन्न याःह्य दानपति हाकुजुयात नं पीतवस्त्र छजु १, लुँ चुल्या निपु २, पलिगा छपु १ तथा
राजगुरुजुयात जक लुँ चुल्या छपु १ तथाः राजां प्रशन्न जुल ।

छत्रारोहणया सतिखुनु बिचाः पूजा, लय्सेवा व शान्तिपुरीस रहस्य पूजा यानाः प्यन्हु दुखुनु
चतुर्थी पूजा समेत जुल । मयन छत्र छायाः च्यान्हु लिपा स्वयम्भू चैत्य पूजा यानाः मयन छत्र
क्वकाय्गु ज्या जुल । थुगु मयन छत्रया जम्मा सी स्वभाग थल— छभाग गुरुजुयात, छभाग स्यंगु
बन्देजुयात, मेगु छभाग मयन छत्र दय्कूह्य कलाकार व अन्य आवश्यकजनपित प्रसाद स्वरूप वितरण
जुल । गण्डल इलायागु सी जक निभाग राजायात, छभाग कक्षीयात, मेगु स्वभाग मध्यय् निभाग

मूलाचार्ययात, छभागत्या खव्य च्वंहा आचार्ययात मेगु ल्यंगु जव्य च्वंगु आचार्यया भाग ।
जुजुयात व्युगु सेथगण्डल सँऊयाःया जःखः तयाः खादलू खाय् थें यानाः उचित सन्मान यानाबिल,
मतलव दानपतियागु शुद्ध हृदयया स्मरण स्वरूप लँय् जूवःपित क्यनेया लागी प्रदर्शनी रूप्य् क्यनातल ।
थुगु कार्यय् जुजुं चाकःमत छत तोप वःगु जुल ।

शुद्धात्मा महापुरुषपतिगु हृदयय् भय्भय्बिया वयाच्वंगु विविध सद्भावनाया प्रतीक साकार
रूप बिइ निर्मित- “सर्वभावेन बोधौचित्तं अनुत्तरमार्गं तथा सेव्य” धया तः थें धर्मया नामय् अनेक
विधि विधान सृजना जुयाच्वंगु खनेदु । धाय् कि कीगु बौद्ध समाजय् चैत्य, धर्मधातु, विहार व मन्दिरय्
छत्र ध्वज पताः तान वितान इलां दय्केत तास तिनिखा क्वेँचि लुँ वहः सिजः आदि पदार्थ पाखे
दय्का वइच्वंगु खनेदु । अज्ज, भोस्वांयागु तक नं । थथे सीयागु दय्काः चढय् याय्गु थ्व परम्परा
तस्सकं दुर्लभ थें जुयाच्वंगु खनेदु । थुकिया संक्षिप्तिकरण उदाहरण मतया वंला बाहाःपूजा वनिइवल्य-
सम्म सीस्वां दय्काः छाया वनिइगु चलन गुबलें गुबलें जक खनाच्वनी ।

संसारया सृष्टि पदार्थ न्ह्याग्गुलिइसं छगू छगू ज्याया छगू छगू वस्तुया महत्व अवश्यं दयाच्वनी,
धाय् कि व्रतोत्सवादि यज्ञयागादि दीक्षाकर्मय् पञ्चामृतया नामं ध्यः कस्ति साखः, पञ्चगव्यया रूप्य्
सादुरु साध्यः आच्छुरिया निमित्तय् चि चिकं धौ, सहाय्या कारणय् मुस्या पालु ओ एवं प्रकारं
पञ्चपल्लव निर्मित वरहः वंगलसिहः पौहः पंहः तथा श्राद्धकर्मय् गेंडाया खल विशेष महत्व सम्भूय् जुयाः
नं अनिवार्य जुयाच्वन । तर उकिया छु रहस्य ? थ्व अनुसन्धानया विषय तिति ।

स्वयम्भूति जुजु लक्ष्मीनरसिंहया लस्ताःपूजा

स्वयम्भू महाचैत्यप्रति आपालं श्रद्धाभक्तिं दुह्य महाराज श्रीलक्ष्मीनरसिंहजुं थुगु मनोरथ सिद्धि कामना यासे विशेष लस्ताःया उपलक्ष्य ने. सं. ७५० आषाढकृष्ण चतुर्दशीया दिनय् श्रीस्वयम्भू महाचैत्यया अग्रस कलशाच्चर्चन पूजा व वलि एवं प्रसिद्ध गुहा शान्तिपुरीस पञ्चसाली सहित यासे रहस्याच्चर्चन पूजा याकूगु जुल । थुगु रूपं फसखास च्वलय् ह्य १ तयाः पूजा विल' ।

थुगु शुभकार्यय् क्रियाकर्ता जूह्य सिख्वंमूवाहाःया वज्राचार्य श्रीमणिरत्नजु जुल ।

स्वयम्भू महाचैत्यस गोमिराज भारोया सरत्वाःपा

इहत्र सुख सम्पत्ति परत्र मोत्र गति प्राप्ति कामना यासे श्रीस्वयम्भू महाचैत्यय् विभिन्न श्रद्धालु भक्तजनपिसं थःथःगु सदिच्छानुशारं विविध प्रकारं सेवा भाव भक्ति प्रस्तुत यानावन । तदनुसार- यथाशास्त्रोक्त विधि अनुसार मङ्गल उत्सवपूर्वक राजा श्रीलक्ष्मीनरसिंहया पर्यायस ने. सं. ७५१ चन्द्रग्रासयुक्त कार्तिक पूर्णिमाया दिनय् दानपति असंया गोमिराज भारोजुं श्रीस्वयम्भू महाचैत्यस सरत्वाःपा याःगु जुल ।

थुगु विधि विधानय् मूलाचार्य जूहा सिख्वंमुगुदि विहारया श्रीमणिरत्न वज्राचार्यजुं^१ ।

१- श्रीपरमानन्द वज्राचार्यजुया सौजन्यं प्राप्त ।

जुजु लक्ष्मीनरसिंहजुं स्वयम्भूस नित्यपूजा दय्कूगु

गिरिवर साह्येगुं पर्वतया च्वकास सुप्रतिष्ठित प्रागैतिहासिक कालंनिसें प्रसिद्ध जुयाच्वंगु रत्न सरोजय् उत्पन्न जुयाविज्याःह्य ज्योतिरूप श्रीस्वयम्भू धर्मधातु वागीश्वर महाचैत्ययागु अपार महिमाप्रति श्रद्धां प्रेरित जुयाः विशेष श्रद्धाचित्त उत्पन्न जुयाः राजा लक्ष्मीनरसिंहजुं ने. सं. ७५४ जुगोदयदिन श्रावणशुक्ल अष्टमी आदित्यवारनिसें आवश्यक व्यवस्था मिलय् यानाः नित्यपूजा याय्गु बन्देज यानाबिल^१ ।

स्वयम्भू महाचैत्य जीर्णोद्धार- शाक्यभिक्षु मञ्जुदेव व जुजु लक्ष्मीनरसिंहया संयुक्त प्रयासद्वारा

गिरिवर साह्येगुं पर्वतया च्वकाय् सुप्रतिष्ठित जुयाच्चंगु प्रागैतिहासिक कालनिसें प्रसिद्ध जुयाच्चंगु श्रीस्वयम्भू महाचैत्य जूया निम्ति समय समयय् जुयाच्चंगु प्राकृतिक प्रकोपयागु आक्रमण नाप सामना यानाच्चन । थुजाःगु कारणं यानाः बारंबार थुगु स्वयम्भू चैत्य जीर्णोद्धार जुया वयाच्चंगु खनेदु । थुगु सालं तं स्वयम्भू चैत्ययागु आधार सिं यलसिं धेचुला स्यनाच्चंगु खनाः पुनर्जीर्णोद्धार याय्गु निर्णय जुल^१ ।

जीर्णोद्धारयागु कार्यक्रम अनुसार आवश्यक कार्यकर्तापि च्वनाः कार्य आरम्भ जुल । विधिकथं न्यास पिकाल, वन जात्रा जुल, यलसिं काःवन, पाद स्थापना जुल । क्रमशः विधिपूर्वक माःगु तक ज्या यानाः लक्षाहूति विधिकर्म खंकाः ने. सं. ७५७ बैशाखशुक्ल तृतीया रोहीणीनक्षत्र शोभनयोग सोमवार-खुनु प्रतिष्ठा याःगु जुल ।

थुगु कार्यय् राजा लक्ष्मीनरसिंहयागु निर्देशनकथं आवश्यक सहयोग कयाः दानपति स्यंगु साह्येगुं महाविहारय् च्वंहा धर्मात्मा शाक्यभिक्षु मञ्जुदेवजु तस्य भार्या जवनालक्ष्मी, प्रथम पुत्र सिद्धिमुनिदेव सकलयां धर्मचित्त उत्पत्ति जुयाः थुगु यलसिं थनेगु ज्या सुसम्पन्न याःगु जुल ।

१- वँतु जाम्बुनन्द विहारया शिलापत्र व संस्कृत सन्देश पाखे ।

स्वयम्भू तैन्नय विशाल अक्षोभ्य बुद्ध स्थापना —संस्थापक रथन भारो

नेपालया गौरव श्रीस्वयम्भू महाचैत्य विराजमान जुयाच्चंगु स्वयम्भू जंगलयात ल्वय्क छिक् वांलाक इलय्-व्यलय् विभिन्न श्रद्धालु दातापिसं अनेक कीर्ति तयाः श्रीस्वयम्भू महाचैत्ययागु सेवा यानाः परलोकयात सामो दय्कावन । उकिइ मध्यय् स्वयम्भू जंगलया अग्रय् यथायोग्य प्रमाणं थुगु विशाल रूप ल्वहंयागु अक्षोभ्य तथागत स्थापना याना व्यूगुलिं छं हे शोभावृद्धि जूगु जुल ।

खतु थुगु अक्षोभ्य बुद्धमूर्ति जुजु लक्ष्मीनरसिंह व प्रताप मल्लया पर्यायस दानपति कान्तिपुर जमलेश्वर स्थान केलटोलया न्हूछेँस च्वंहा थकालि कंसकार जितर भारो, जजमान रथन भारो, कलाःह्य मंगललक्ष्मी, म्हाय् पुण्डरीक, छय्चा हेरमनि प्रभूति सकलया धर्मचित्त उत्पत्ति जुयाः ने. सं. ७५७ माघमासे शुक्लपक्ष श्रीपञ्चमी उत्रभद्र नक्षत्र सिद्धियोग वृहस्पतिवार दिन खुनु वज्रधातु देगुरी क्रमानुसार सहस्राहूति अहोरात्र यज्ञ यासे विधिपूर्वक प्रतिष्ठा कार्य सम्पन्न याःगु जुल^१ ।

धयातःगु दु- थुगु शुभकार्यय् क्रियाकर्ता याःह्य मूलवाहाःया वज्राचार्य नाथुजु, मूलाचार्य जूहा मञ्जु वज्राचार्य आदि दिगाचार्य गीताचार्यपि समेन च्वनाः ज्या जुयावन । हानं थुगु बुद्धमूर्ति दय्कूपि कुशल कलाकारपि खः सर्वश्री मखनटोलया जित्सि भारो, बुध भारो, रयराज, चन्द्रभारो, धर्मराज प्रभूति जुल । थुगु धर्मकीर्ति यावच्चन्द्रसूर्य दत्तले स्थिर जुइमा धइगु कारणय् ने. सं. ७५६ ज्यापुन्हीखुनु जजमान रथन भारों अति श्रद्धायुक्त जुयाः श्री ३ वज्रासन अक्षोभ्य तथागतयात श्रद्धा तसे वपघकोबुँ निपीत्या, खुसि बहिरिकोबुँ निपी जम्मा प्यपीत्या बुँया आयस्तां दुथे दय्दसं कतिपुन्हीखुनु ५२ प्वाः मत छ्वय्के, श्रीपञ्चमीखुनु बुसाधन याय्या निर्मित गुठीं तयाव्यूगु जुल । थुगु कार्यया गुठिहार— कंसकार जितर भारो, जजमान रथन भारो, नागाध्वज, अमिसि, शंखर थुलिसिनं दानपत्रय् च्वसे

१- उक्त विशाल बुद्धमूर्तिया क्वस्सं च्वंगु शिलापत्र ।

तक्व थितिरिति विचार याय्माःगु विषय नं न्ह्यथनातःगु जुल । अन्तय् थुगु पुण्य कार्य सान्नि जूगु
उपलक्ष विषय कयाः बोधि परीणामना गाथा व्वनाः संसह ल्वहूतय् थथे उत्कीर्ण यानाथकल :-

लक्ष्मीजाज्वल्यमानो वसतुइह सदाकीर्तिमाना ।
स्फुरंतु निःशेषारिक्षितीशः । क्षितिमेवतुल
व्याधिदुर्भिक्षमुक्तां शीलादद्या दक्षिणीया
प्रवचन निचया शासनरत्नत्रयेवृद्धिमायान्तु नित्यं ।
आचन्द्रावर्कं प्रकाशयतु भगवतः शासन निप्रकम्प ।
प्रशान्तु धर्मेण महीमहीपतिः भवन्तु रत्नत्रये
पूजनाजनाः प्रशान्तपापा पृथुगोकुलाकुला ।
सदैव नन्दन्तु सुप्रजा प्रजा विभातिकर भाश्वरा
नभसियावदुष्णप्रभ प्रभाजटिलमण्डले
हरिशलाच्छच्छोदित हरतुमकरालया ।
नमस्तुतं सुगतशासन तिष्ठतु । ।

हाकुजुया स्वयम्भू निमन्त्रणा

श्रीतरुमूल महाविहारया हाकुजुया सद्धर्म चित्त उत्पत्ति जुयाः सर्वसंघ पिण्ड पात्रदान तथा सम्यक भोजन जुइगु उपलक्ष्य शोभावृद्धि निम्ति विधिपूर्वक साह्येगुं गिरिवर पर्वतय् विराजमान जुयाविज्याःह्य श्रीस्वयम्भू महाचैत्यया पञ्चबुद्ध (वैरोचन, अक्षोभ्य, रत्नसंभव, अमिताभ, अमोघसिद्धि) न्याह्यं ने. सं. ७६१ सालया जुगोदय महापुण्य तिथि श्रावणकृष्ण त्रयोदशीखुनु वाद्यवादन सहित उत्सवपूर्वक दानपतिया दानशालाय् विज्याकूगु जुल^१ ।

स्वयम्भूया पञ्चबुद्धयाके तिसां तिइकेगु व्यवस्था

पञ्च तत्त्वात्मक पञ्चज्ञान, पञ्चकुल एवं पञ्चपुरया अधिष्ठातृ पञ्चबुद्धात्मक श्रीस्वयम्भू महाचैत्यया प्यख्यरसं विज्यानाच्चं पि अक्षोभ्य, रत्नसंभव, अमिताभ व अमोघसिद्धि दथुस वैरोचन तथागतया समूह जुयाच्चंगु पञ्चरश्मिया छगू ज्योति स्वरूप जुयाः प्रकाशमान जुयाविज्याः ह्य श्रीस्वयम्भू धर्मधातु वागीश्वर युगयुगनिसें भक्तजनपिनिगु सन्मुख्य सुप्रणित जुयाच्चंगु दु ।

थ्व हे स्वयम्भू महाचैत्यया हामूदेव व प्यख्यरसं विज्याः पि पिखादेवयात तिइकागु तिसाया भाला कुब्यू पि स्यंगुदेवया पानिजु पि थथे जुल :-

मूल- अमिताभया तिसा- सिद्धिमुनि देवयाके

वसिक- अमोघसिद्धिया तिसा- शाक्यमुनियाके

लँस्वः ह्य- अक्षोभ्यया तिसा- चिन्तामुनियाके

छेँ स्वः ह्य- रत्नसंभवया तिसा- रत्नमुनियाके

हामूदेव- वैरोचनयाके तिसां तिइकेगु दय्काः लय् लय् पतिकं ।

ने. सं. ७६१ आषाढ पूर्णिमाया दिनसंनिसें थ्व वन्देज दय्कूगु जुल ।

शाक्यभिक्षु सिद्धिमुनि देवजु शान्तिपुरीस प्रवेश

प्रसिद्ध गुफा शान्तिपुरीइ दुहांवनेगु धइगु परम्परागत, कुलगत, जातिगत अधिकारीवर्गपि जक दुहांवने फइ धइगु खँ मखु; गुह्यसिके योगसिद्धि मन्त्रसिद्धि एवं आचरण शुद्धि तथा भावना शुद्धि जुइ उह्य व्यक्ति जक योग्य व्यक्ति सिद्ध जुइ, व हे जक शान्तिपुरीइ दुहांवनेगु समर्थ दुह्य जुइ । उकि स्वयम्भू चाकलय् च्वंपि गुपि बौद्धाचार्य शाक्यभिक्षु सिद्धिमुनि देवजु ने. सं. ७६५ श्रावणकृष्ण दशमी बुधबारखुनु निविघ्नपूर्वक शान्तिपुरीइ प्रवेश जूगु जुल^१ ।

१- श्रीगौतमवज्र वज्राचार्यजुया सौजन्यं प्राप्त ।

स्वयम्भू महाचैत्य दर्शनार्थ चीनया स्त्वीनजु आगमन

महान् देस चीनया शिष्टमण्डल नेपाल आगमन दलया प्रमुख नेता स्त्वीनजु खः । थ्वय्कः स्त्वीनजुं जुजु प्रताप मल्लया शासनकालय् नेपालयागु यात्रा याःगु जुयाच्वन । थ्वय्कः स्त्वीनजुं श्रीस्वयम्भू महाचैत्य दर्शनार्थ साह्येगु पर्वतस थ्यंकाः दर्शन व पूजन यानाः प्रदक्षिणा यानादिल । थुगु स्वयम्भू दर्शनया नापनापं थ्व खँ न्ह्यथनातःगु दु^१—स्वयम्भू महाचैत्यस लुँपौ चह्य यात ।

स्वयम्भू महाचैत्यया च्वय् लुँपौ तल धइगु आश्चर्यया खँ खः । तर स्वयम्भूया पिखादेगः अर्थात् कचादेगलय् लुँपौ तःगु जुइफु धइगु अनुमान खः । अथवा लुँपौया पलेसा सुवर्ण छत्र चह्य याःगु नं जुइफु । न्ह्यागु थजु, स्त्वीनजुं स्वयम्भू महाचैत्यप्रति श्रद्धाभक्ति तयाः सुवर्ण छत्र, सुवर्णया इलां अथवा लुँपौ थुपि स्वताय् छता द्रहलप्युगु निश्चय नं खः ।

१- श्री ५ या सरकार, पुरातत्त्व विभागया अप्रकाशित शिलालेख विवरण सूची पाखें, प्रस्तुत कर्ता-
हेमवज्र बज्राचार्य ।

स्वयम्भू स्थल बुद्धधर्म अध्ययन निम्ति १७ शदी तकं विद्याध्ययन केन्द्र

जीवनया मुख्य लक्ष्य उच्च कोटि दर्शन परमार्थ योग तत्त्वया विशुद्ध स्वभाव जुयाच्वंगु प्रभाश्वर धर्मकाय आदिबुद्ध श्रीस्वयम्भू ज्योतिरूप दर्शन प्राप्ति निम्ति सकल शास्त्रं पारंगत जुया-विज्याःह्य महापराक्रमी बोधिसत्व मञ्जुश्री विज्यानाः कालीहृद जुयाच्वंगु उपत्यकायात देवमनुष्यपिनिगु हितमुख निम्ति यथायोग्य प्रमाणं वासस्थान दय्काः मञ्जुपट्टन सहर निर्माण यानाविज्यात । लिस्सें थ्व हे स्वयम्भू क्षेत्रय् वास याना च्वनिइपिं व अन्तर्देसं आवागमन जुइपिं अतिथि महोदय ज्ञानी गुणी महात्मापिनिगु लागी शास्त्र विद्या अध्ययन अध्यापन निम्ति नं सदांया लागी उपयुक्त विद्याध्ययन केन्द्र नं प्रस्थापन यानाः थःशिष्य भिक्षु गुणाकर आदि अनेक विद्वान आचार्यपिं तोताथकल ।

उकिं थुगु पवित्र स्थलयात मञ्जुपट्टन सहर निवासी जनतां थौंया अद्यापि मञ्जुपञ्चमी (श्रीपञ्चमी) खुनु प्राथमिक पाठशाला, माध्यमिक स्कल, उच्च शिक्षालय एवं विश्वविद्यालयया छात्र छात्रा विद्यार्थी, शिक्षक, प्राध्यापक, प्राचार्य आदिपिसं नेपाःया विद्याया मूल केन्द्रीय स्थल रूपय् महागुरु मञ्जुश्री दर्शन व पूजन एवं विद्यासिद्धि लाभ हेतुं स्वागत सत्कार यानावयाच्वंगु खनेदु । उकिं थुगु स्थानयात थनया विभिन्न अभिलेखय् 'श्रीस्वयम्भू धर्मधातु वागीश्वर' स्थान धकाः मानय् याना वइच्वंगु जुल । अज्ज थ्व हे विशुद्ध ऐतिहासिक स्थानयात लक्ष्य यानाः श्रीस्वयम्भू धर्मधातु वागीश्वर गुरु मञ्जुश्रीयात अनुस्मरण यानाः स्थानीय जनतां विद्याध्ययन शुभारम्भ याय्त थौतकं सर्वश्री 'ॐ नमोवागीश्वराय' धकाः नामोच्चरण याय्गु चलन याना वइच्वन ।

थुगु मञ्जुश्री पर्वस्थान अर्थात् स्वयम्भू स्थल नेपाःया बुद्धधर्म अध्ययन व अध्यापनया केन्द्रीय स्थल जुयाच्वंगु साक्षि स्वरूप प्रमाण विभिन्न पुराण इतिहास व पत्र पत्रिकाय् उल्लेख जुयावयाच्वंगु खँ छुं उदाहरण स्वरूप थन प्रस्तुत यानाच्वना —

वाराणसी सहरय् विक्रमशील महाविहारय् च्वनाः महापण्डित धर्मश्रीमित्रजुं आर्यनामसंगीति

व्याख्या याः गु समय्य द्वादशाक्षर महामन्त्रया अर्थ कने मफयाः महागुरु मञ्जुश्री नापलानाः शंका समाधान यायत् महाचोन वने धकाः वः वलय महाकारुणिक मञ्जुश्रीनं उह्य भक्त धर्मश्रीमित्रयागु उपरय् अनुकम्पा तयाः नामसंगीतियागु मण्डल दयकाः अभिषेक प्रदान यानाः द्वादशाक्षर महामन्त्रयागु गूढ रहस्य अर्थ विशुद्धिया शिक्षा-दीक्षा थ्व हे थासय् च्वनाः बियाविज्यात । अनंलि वसपोल महामण्डितयागु जीवन सफल जुल ।

अनंलि काश्यप बुद्धया पर्याय्य गौड देसया जुजु प्रचण्डदेवं मञ्जुश्री गुरुया शिष्य जुयाच्चंहा थ्व हे स्वयम्भू विद्यालय्य च्वंच्चंहा गुणाकर भिक्षुया शिष्यत्व ग्रहण यानाः शान्तिकर भिक्षु जुल । छुं समय लिपा स्वयम्भू ज्योतिरूपयात चैत्याकार रूप्य परिणत यायत् हानं वसपोलयाके महामण्डलयागु दीक्षा कयाः शान्तिकर आचार्य नं जूगु जुल ।

थ्वयां लिपा शाक्यसिंह तथागत विज्यानाः श्रीस्वयम्भू महाचैत्य दर्शन याय् धुंकाः गोपुच्छाग्र पर्वतय् विज्यानाः मैत्रेय बोधिसत्व आदि १३५० शिष्यगणपि सहित यानाः स्वयम्भू उत्पत्ति विषय कयाः धर्मचक्र प्रवर्तन यानाविज्यात । लिस्सें थ्व हे स्वयम्भू महाचैत्ययागु सम्बन्धी अनेक शिक्षा-दीक्षा व पुराण इतिहास स्यने कने यानाविज्याः गु स्थान जूया निम्ति थुगु थाय्यात थौतक नं 'पुराणस्यंगु' धया वइच्चंगु खः । थुकिया अर्थ मथुयाः गुलिसिनं पुलांगु स्यंगु नं धाल, थ्व धारणा बिलकुल मिलय् मजू । थ्व हे थासय् चूडाभिक्षुणी व हारिती महारक्षिणीपित शाक्यमुनि बुद्धं बुद्धशासनय् च्वनाः पालन याय्माः गु शिक्षा-दीक्षा प्रदान याः गु थाय् नं खः ।

हानं थुगु थासय् हे महायानी बुद्धधर्मय् अत्यन्त सुप्रसिद्धपि स्वयम्भू दर्शनार्थ बिज्याःपि मञ्जुश्री समन्तभद्र, खगर्भ एवं आर्यमैत्रेय बोधिसत्वपि उपस्थित जुयाः थःगु इलय् माःह्येसित माःगुकथं व्याकरण अभिषेक प्रदान यासे अद्भूत ऋद्धि प्रातिहार्य क्यनाविज्याः गु खँ प्रस्तुत पुस्तकय् थाय् थासय् उल्लेख जुइ धुंकागु दु । थुपि बोधिसत्वपि छह्ति छह्ति थःगु विषयय् उत्तिकं प्रवीण व निपूणपि खः । थ्वसपोलपि थन उपस्थित जूगुलि थुगु स्वयम्भू विद्याध्ययन केन्द्रया गौरव व महिमा यक्वं दु । थुमिगु आचार विचारयात कयाः महायान आर्य गण्डव्यूह सूत्रय् आपालं प्रशंसा याना तइतल—

मञ्जुश्रीयथा जानति शूरः सोच समन्ततभद्रः ।

तेषु अहं अनुशिक्षयमानो नामयमि कुशलं इमु सर्वम् ॥

थनंलि आचार्य नागार्जुन बोधिसत्व विज्याना; नेपालय् नं महाशून्यतावाद माध्यमिक योग दर्शन विषय शिक्षा-दीक्षा विइया लागी स्वयम्भूया फिनिदँतक द्योपाःलाः जुयाः च्वनाविज्यात । लिस्सें नागार्जुन जंगलया विभिन्न गुफाय् आचार्य योगी सिद्ध एवं साधकपित योग समाधि पुरश्चरण नं तय्सल, फलस्वरूप उगु गुफा थौतकं विद्यमान तिनि । थुलि तक प्रसिद्ध जुइ धुंकागु गुफा जूया निम्ति ने. सं. ६०७ तकं तःमूवाहाः लगंवाहाःया शाक्यभिक्षुपिसं ल्हुति महासिद्धगुहा सेवा यासे आदिबुद्ध प्रीति नं सुवर्णया अलंकार द्रहलप्युगु खँ अङ्कित यानातल^१ । अथे हे प्रताप मल्लया समयय्

१- मेडिमल नेपाल कोलोफोण्ड एण्ड इन्स्क्रिप्शन, पृ. ८२

महासिन्दूराचर्चन पूजा ३६ सम्बरया प्याखं नं हुइका वन ।

थुगु स्वयम्भू क्षेत्रया विद्याध्ययन केन्द्रया प्रसिद्धि न्यनाः बुद्धवर विपश्ची शिखी, विद्वत्वर मञ्जुश्री, नृपवर अशोक तथा सिद्धवर नागार्जुन थे जाःपिसं दर्शन व पूजन यानाः विद्या प्रचार यानावंगु चैत्य कुलनायक स्वयम्भू दर्शनार्थ आचार्य वसुवन्धु नं थ्यंकःवल । उवल्य वसपोलं थःके दइच्चंगु शिक्षा-दीक्षा प्रचार यानाः स्यने कने यानाःलि थःगु नामं उष्णीष विजय धर्मपारंगत चैत्य स्थापना यानाविज्यात, लिस्सें थः वृद्धावस्था जूया निम्ति वसपोलया निर्वाण नं थन हे जुल ।

थ्वसपोलपिनिगुपाखे स्वयम्भू महाचैत्ययागु महत्व व बुद्धधर्मया गुण गौरव आपाः आपालं प्रचार जूगुलि यानाः तत्कालीन नेपाःया शासक लिच्छवी जुजु वृषदेवजुं थःगु शैवधर्म तोताः बुद्धधर्म ग्रहण याय्या निम्ति अतिकं प्रसिद्ध जुयाच्चंगु स्वयम्भू पर्वस्थानय् वयाः च्वंवल । उगु समयय् अन साह्रेंगु महाविहार (शान्तिकर महाविद्यालय) या प्राचार्य भिक्षु शान्तिशीलजुया शिष्यत्व ग्रहण याःवंगु जुल । वसपोल भदन्त आयुष्मान् शान्तिशीलजुया उपदेशं प्रभावित जुयाः जीर्ण जुयाच्चंगु स्वयम्भू महाचैत्यया पुनर्निर्माण यानाविल । लिस्सें ग्वल्य च्वंगु धनद्व महाचैत्ययागु नं पुनर्निर्माण यात, थुलिजक मखु सौहावचैत्य अले वदेगांया षडक्षरीयुक्त चैत्य नं प्रस्थापन यानाथकल ।

थुगु स्वयम्भू महाचैत्ययागु गुण गौरव प्रचार प्रसार याय्गु व नेपाःया थःगु हे परम्परागत बुद्धधर्म सम्बन्धी विद्याध्ययन केन्द्रया संरक्षक रूपय् सदांया निम्ति प्रतिनिधि स्वरूप जुयाः अनन्तकालया लागी चिन्तामणि मत च्याकाः आष्फानिक योग्य च्वनाविज्याःह्य गुरु शान्तिकराचार्ययाके लिच्छवी जुजु नरेन्द्रदेवया पालाय् देसय् अनावृष्टि जुसेलि थुगु शान्तिकर महाविद्यालयया प्रधानाचार्य श्रीशान्तिकर गुरुया आश्रमय् वयाः जुजु नरेन्द्रदेव व आचार्य वन्धुदत्त वसपोलयागु सन्देश कयाः श्रीकरुणामय बुंगमलोकेश्वर नेपालय् विज्याकाः सहकाल यानाविल । थुहा वन्धुदत्त गुरुं थ्व हे थासय् च्वनाः शिक्षा-दीक्षा प्राप्त याःगु जुल ।

जुजु अंशुवर्माया म्हाय् भृकुटी (खिचुन्) लहासाया जुजु श्र्यङ्चेन्ग्याल्पो नाप विवाह जूबलय् उवल्य राजकुमारी भृकुटीलिसे वंह्य आचार्य शीलमञ्जुयागु सतत् प्रयत्नं यानाः बुद्धधर्म सँदेसय् राज्याश्रय प्राप्त जुल^१ । श्र्यङ्चेन्ग्याल्पो नाप विवाह जुइ न्ह्यो राजकुमारी भृकुटी वसपोल आचार्य शीलमञ्जुयाके निश्चय नं शिक्षा-दीक्षा ग्रहण यात जुइ, उकिं हे बुद्धधर्मया प्रकाण्ड विद्वान् शीलमञ्जु-यागु आत्मीय सन्देशं प्रभावित जुयाः थःगु वसः अक्षोभ्य, भैषज्य, आर्यतारा व मैत्रेय एवं पिण्डपात्र यंकूगु खइ । थ्वसपोल आचार्यजु नं थ्व हे शान्तिकर महाविद्यालयया प्राचार्य जुयाच्चंगु जुइ ।

जुजु नरेन्द्रदेवं थःगु मरणान्त शय्याय् च्वनाः थः म्हाय्यात बौद्धदर्शनया मूल ग्रन्थ प्रज्ञापारमिता लःल्हाना बियाथकल धयातःगु आशय अनुसार जुजु नरेन्द्रदेवयात थ्व हे विद्यालयया आचार्यपिनिगु उपदेशं गावकं प्रभाव लाःगु जुइफु^२ ।

१- पुरातत्त्व एक रोचक कथा, पृ. ७६

२- मयूरवर्ण महाविहार इतिहास, पृ. ३८

लिच्छवी जुजु नरेन्द्रदेवया पर्यायस नेपाः काःपि वाङ्महानचे आदि चीनिया शिष्टमण्डलतयस् स्वयम्भू व थनया विद्यालययागु वारय् इमिगु थाङ्गवंशया इतिहासय् यक्वं प्रशंसा यानाथकूगु दु । उकिं हे थनया प्रसिद्ध आचार्य वन्धुदत्त थे जाःपिनिगु हितोपदेशं प्रेरित जुयाः हे नरेन्द्रदेव जुजु बुद्धया चित्र अंकितगु पेटीं चिनातःह्य धकाः धयावन ।

थ्व स्वयम्भू क्षेत्रयागु शिक्षा-दीक्षायागु प्रचारं यानाः माध्यमिक व न्याय शास्त्रया नं महान् विद्वान्हा सुनयश्रीमित्रजु नं थ्व हे स्वयम्भू विद्याध्ययन केन्द्रया आचार्यजुपि नाप सत्संगत व स्वयम्भू महाचैत्य दर्शन यानाः यल शंखमूल तीर्थया किनारय् ईवहीथूद्ध न्ह्योनेसं ईवही दय्काः अन हे बासं च्वन । थ्वसपोल तिब्बतया मिनाग लोचावयागु निमन्त्रणाकथं ल्हासाय् वनाःलि अन च्वंपित 'वज्रावलीमण्डल साधन' शिक्षा व्यूगु खँ न्ह्यथनातल ।

आचार्य शान्तरक्षितं स्वयम्भूया प्रभावं शून्यतावाद महायान धर्मय् नवजागृत प्रदान याय्गु मतिइ तयाच्वन । थूगु इलय् स्वयम्भूया विद्यालयय् सुयोग्य विद्वान्हा आचार्य शान्तरक्षित् विज्यानाच्वंगु दु धइगु खबर सिइकाः ल्हासाय् बुद्धधर्मया विरोधी भावना प्रवल जुयाच्वंगु इलय् अनयापि प्रतिष्ठित व्यक्तिपि वयाः थ्वसपोलयात सःताः व्वनायन । तर दुर्भाग्यवश उगु इलय् तिब्बतय् अनेक प्रकारया प्राकृतिक प्रकोप जुयाच्वन । शान्तरक्षितं प्रचार याःगु न्हूगु धर्म याना ल्हासा देसय् अशान्ति जुल धकाः वोन धर्मावलम्बीपिसं मखुगु प्रचार यानाः आन्दोलन मचय् यानाच्वन, गुकि यानाः थःगु मन शान्ति याय् निम्ति हानं शान्तिकर महाविहार स्वयम्भूस लिहांवल । अले वसपोलं वज्रयानया महान् आचार्य मन्त्रधर गुरु पद्मसंभवयात नापलानाः थःत जूगु अनुभवया खँ कन । शान्तरक्षितं दृढ विश्वास याःगु दु - ल्हासा देसय् फैलय् जुयाच्वंगु वोन धर्मावलम्बीतय्त पराष्ट यानाः नियन्त्रण याय्गु पद्मसंभव थे जाःह्य घोर तान्त्रिक सुयोग्य सम्फुय् जुयाः वसपोलं पद्मसंभवनाप निको खुसिइ ल्हासा वनेगु अनुरोध यात । गुरु पद्मसंभवं शान्तरक्षितयागु अनुरोधयात स्वीकार यासे ल्हासाय् जुयाच्वंगु विरोधीतय्गु दुष्परतूत दमन याय्त थःगु दिव्य प्रातिहार्य प्रदर्शन क्यनाः ल्हासाय् विशुद्धगु वज्रयान धर्म स्थापना यानाविल । थुलि जुसैलि स्वस्थ मनं वृद्ध शान्तरक्षित् नेपाः तोताः हानं ल्हासा देस प्रस्थान जुल ।

मन्त्रधर गुरु पद्मसंभव आचार्यजु थन स्वयम्भू विद्यालयय् जक छथासं थातं च्वनाविज्याःगु मखु कि अनेक तीर्थ, पहाड, गुफा व श्मशान आदि थासय् गवेषण व प्रवेशन जुयाः चाःचाःहिलाः विज्यानाच्वन । खास यानाः थ्वसपोलं आपा यानाः हिमाली प्रदेश पाखेया प्राणिपिनिगु निम्ति विशेष अनुकम्पा तयाः वज्रयान प्रचार याना जूगु खनेदु । गुरु पद्मसंभवया मेगु नां खः उर्ग्येन् आचार्य उर्ग्येन्हुचल धइगु देसया आचार्य धइगु खः । थ्वसपोलं पुइगु तपुलियात उर्ग्येन् तपुलि धाइ । थुकिया अपभ्रंश उद्यांतपुलि जूवन । थ्व तपुलि नेपाःया गुरुजुपिनि पुइगु चलन दनि ।

विक्रमशील विद्यापीठया प्रकाण्ड विद्वान् जुयाच्वंहा अतिशा दीपङ्करजु तिब्बतयागु निमन्त्रणाय् वने न्ह्यो स्वयम्भू महाचैत्य दर्शन यानाःलि दच्छितक स्वयम्भूइ हे बासं च्वन । थ्वसपोलयागु इच्छा खः थनया विद्यालययागु स्थिति अध्ययन व थनया गुरु आचार्यपिनाप च्वनाः सत्संगत याय्गु । वसपोलयात लँस्वःवःपि तिब्बती विद्वान्तय्सं थ्व नं धाःगु दु—थनयापि भिक्षुपिनिगु बौद्ध शास्त्र

अध्ययन चलन व भोजन विधि तस्सकं प्रशंसनीय जू । वसपोलपित अनुवाद कार्यय् सहयोग प्रदान याःपि पण्डितपि मध्यय् शान्तिभद्र नामक नेपाली पण्डितयागु नां नं उल्लेख यानाथकूगु दु । नेपाःया छह्ना राजकुमारं अतिशा दीपङ्करजुया शिष्यत्व ग्रहण याःगु दु । अतिशा दीपङ्कर तिब्बत वने धुँसेलि वसपोलया समसामयिक सिद्ध नारोपा तथा वसपोलया शिष्यपिसं अत्यन्त कर्त्तव्य परायण जुयाः तन्त्रयान धर्म प्रचार यात ।

भारतीय पण्डित वनरत्न सँदेसय् वनाः अनुवाद व धर्म प्रचार यात, अनंलि सिंहलय् वनाः आचार्य धर्मकीर्तिया शिष्यत्व ग्रहण यानाः भिक्षु जुल । अन नं धान्यकटक लँपु जुनाः मगध देसय् थ्यंकःवल । थनं नं अनेक थासय् चाःहुहुं नेपाःया पण्डित शीलसागरजुयाके छुं भचा विद्याध्ययन यात । थनं नं यरलुङ्गस् धइगु थासय् वन, अनं नं हानं लिहांवया शान्तिपुरी विहार स्वयम्भू पर्वस्थानय् च्वन । थन नं छुं समयतक च्वनाः भोट राजाया निमन्त्रणाय् वनाःलि पुनः नेपाः लिहांवल । अन्तय् थ्वय्कःया देहावसान नं थन हे जुल ।

तिब्बती धर्मस्वामी चाग्लोत्सवा विद्याध्ययनया निम्ति स्वयम्भू शान्तिपुरी विहारय् च्वंन्ना सुयोग्य विद्वान् गुरु रत्नरक्षित्जुयाके वज्रयान सम्बन्धी शिक्षा-दीक्षा ग्रहण याःगु जुल । लिस्से थ्वय्कलं खुद्दा विद्यार्थी पासापि व्वनाहःगु दु । भिक्षु धर्मस्वामीजुं थनया महापण्डित रवीन्द्रदेवजुयाके नं मंगल साधन, गुह्यसमाज, वज्रावली व इन्द्रजाल विद्या आदि विषय नं अध्ययन याःगु दु । थुपि गुरुपि मध्यय् रत्नरक्षित् हे तस्सकं ख्याति प्राप्त जूह्ना खः । थ्वसपोलपित शिष्यपिनिगुपाखे गुरुदक्षिणा स्वरूप ३०० स्वसःगः वज्रघण्टो चह्लय् याःगु खँ न्ह्यतनातल ।

तिब्बतया प्रसिद्ध पण्डित ह्याङलोचाव नेपाः वयाःलि स्वयम्भू दर्शन यानाः थन नं किसिकपाः छाँतगु पर्वतय् सुप्रतिष्ठित जुयाच्चंगु श्रीसूर्यासन विहारया गुरु वज्र भैरु आचार्ययाके हेवज्र मण्डलयागु शिक्षा-दीक्षा ग्रहण यात । अथे हे कापलि छाँतगु पर्वतय् विराजमान जुयाच्चंगु श्रीआदिनाथ लोकेश्वरया अनन्य भक्ति जुयाच्चंगु श्रीचन्द्रकान्ता भिक्षुणीयाके नं सहस्र भुजलोकेश्वरयागु शिक्षा-दीक्षा ग्रहण यात । थ्व हे सहस्र भुजलोकेश्वरयागु न्यूनव्रत नामं तिब्बतय् अतिकं प्रसिद्ध जुयाच्चंगु दु । इमिसं न्यूनव्रतमागु गुरुकुल परम्परायागु स्तोत्र याइवलय् थ्व हे चन्द्रकान्ता भिक्षुणीयात 'भाल्वो पालमो गेलोङमा' धकाः अत्यन्त आदर तयाः सर्वोपरी स्थान बियावयाच्वन ।

अनुमानित १७ फिन्ह्यगू शदीया दुक्पा सम्प्रदायया गुरु फाजीङ्कगमलिम्पो व भोटाङ्गया नवनिर्माता सावङ्गङ्ग डवाङ्ग नाम्गेल (दुक्पा रिम्पोछे) समेत नं थ्व हे स्वयम्भूया शान्तिकर महाविद्यालयपाखे हे बुद्धधर्मया शिक्षा-दीक्षा प्राप्त जूगु धकाः च्वइतल ।

थुगु किसिमं स्वयम्भू पर्वस्थानय् १७ गूगु शदीतकं परम्परागत विद्याध्ययन याय्गु थाय् दु धइगु जनविश्वास नेपालय् जक मखु एसिया महाद्वीपय् तक नं थाय्थासय् प्रचार जुयाच्चंगु खनेदु । उदाहरण स्वरूप थ्व धाय्फु कि वर्तमान सारनाथया वयोवृद्धि भिक्षु तक नं थथे धाःगु दु धकाः

पत्र पत्रिकाय् तक नं उल्लेख याःगु खनेदु*—नेपाःया स्वयम्भू पर्वस्थानय् बुद्धधर्मया शास्त्रत ब्वनेगु महाविद्यालय स्तरयागु छगू विद्यालय दु । उगु स्वयम्भू शान्तिकर महाविद्यालयय् अध्ययन याय्त् एसिया महादेसया बौद्धभिक्षुत वयाच्चवनी । व हे परम्पराकथं थौतकं नं संसारया बौद्धभिक्षुत छकः जक जूसां स्वयम्भू महाचैत्ययागु दर्शन याय् धुनकि थःत भिक्षु जुयागु थे गौरव ताइगु जुयाच्चन ।

स्वयम्भू महाचैत्य व गुरु मञ्जुश्री एवं गुणाकर, शान्तिकरया प्रभावं दइच्चंगु थुगु स्वयम्भू स्थलया विद्यालययागु आदर सत्कार यासे अनेक देस विदेस—भारत, चीन, तिब्बत, भुटान आदि थासं विभिन्न लब्ध प्रतिष्ठ श्रमण, भिक्षु, आचार्य, सिद्ध एवं बोधिसत्वपि वयाः थन स्वयम्भू महाचैत्ययागु दर्शन पूजन याताः विद्याध्ययन यानावंगु खँ संक्षिप्त रूपं प्रस्तुत यानागु जुल ।

परन्तु नेपाःदेया नागरिक जुयाच्चपि अनेक विद्वान्पि दयाः नं वसपोलपिसं थुगु थासय् विद्याध्ययन यात धकाः गनं अङ्कित यानातःगु खनेमदुलि आश्चर्य जुइगु छगू स्वाभाविक खः । तर नेपाःया छगू परम्परा थ्व दु कि सुं श्रद्धालु धर्मात्मापिसं बाहाः बही व मन्दिर दय्काः बाहाःपूजा मत्याः, ओला वनी अथवा सम्यक नरां, पञ्जरां न्याय्की उबलय् स्वयम्भू महाचैत्ययागु नं प्रदक्षिणा व पूजा यावःनेगु चलन दु । परन्तु थुबलय् थुहोसिनं यानावन धकाः इतिहास वंशावलीइ चव्यगु चलन तस्सकं दुर्लभ, अथे धकाः याना हे मवं धइगु अर्थ मखु । थ्व आत्माभिमान मदुगु सुविनीत भावया चलन क्यनावइच्चंगु धाय्फु । अथे हे स्थानीय ज्ञानी गुणी पण्डित आचार्यपिसं निःसन्देह थुगु विद्यालयय् विद्याध्ययन यात जुइ । थौतक नं काठमाण्डूया वज्राचार्यपिसं गुरु शान्तिकरार्य बिज्याना-च्चंगु शान्तिपुरय् प्रत्येक वर्ष फाल्गुणकृष्ण अष्टमीखुनु देआचाः गुठी न्याय्काः उचित सन्मान याना वइच्चंगु ज्वलन्त उदाहरण दिन । अथे जुयाः नं उगु देआचाः गुठी गुबलय् न्याय्कल छुया निम्ति न्याय्कल धइगु सन्तोषजनक इतिहास चवयातःगु प्रमाण लुया मवःनि । अथे धकाः व स्थिति बन्देज लोप जुल धकाः धाय् फइमखु । अथे हे नेपाःया प्रसिद्ध गण्य मान्य प्रतिष्ठित बौद्ध विद्वान्पिसं अवश्यमेव थुगु स्वयम्भू पर्वस्थानयागु विद्यालयपाखे आपाः आपालं शिक्षा-दीक्षा प्राप्त यानाः जीवन सार्थक यानावन जुइ धइगु जितः पूर्ण विश्वास दु ।

आः थन प्रसंगवश उदाहरणया लागी नेपाःया लब्ध प्रतिष्ठ बौद्धविद्वान्पिनिगु नां व वसपोलपिनिगु छुं छत्वाःचा परिचय प्रस्तुत याय्—

चीनय् बिज्याःह्य प्रथम नेपाली बौद्धभिक्षु बुद्धभद्र खः । थ्वसपोलयात चीनिया प्रथम यात्री फास्यान् (फाहियान्) जुं सहायता ब्यूगु खँ न्ह्यथनातल । चीनय् वनाः चीनिया जनताया सेवार्थ थःगु सम्पूर्ण जीवन अर्पण याःह्य न्हापांयाह्य नेपाली बुद्धभद्रजु खः^१ । थ्वसपोलयात चीनिया भासं च्वेस्यान् धाइगु जुयाच्चन । इस्वी ३५८ स जन्म जुयाः बुद्धधर्म अध्ययन व चिन्तन यानाः प्रतिष्ठित बौद्ध विद्वान्या रूपय् कपिलवस्तु व काश्मिरय् समेतं ख्याति प्राप्त जूह्य बुद्धभद्र चीनिया यात्री फास्यान्

*— हिमालचुली वर्ष १०, अंक ९, पृ. ५

१— गोरखापत्र, ०३३ ज्येष्ठ १७— 'मञ्जुश्री देखि अरनिको सम्म' लेखपाखे ।

व पाओयुन्या दलय् सम्मिलित जुयाः चीनय् वनाः बुद्धधर्म अध्यापन व प्रचार प्रसार याय्गु ज्याय् आजीवन वितय् यात । बुद्धभद्र आपाः आपालं चिनीयातय् शिष्य दय्काः सफल जुल । फास्यान् नाप मिलय् जुयाः बुद्धभद्र लिपा नान्चिङ्ग धङ्गु थासय् च्वनाः आपालं बौद्धग्रन्थतय्गु सम्पादन व चीनिया भासं अनुवाद याय्गु नं ज्या यात, गुगु ज्या मध्यय् १०७ भागया १५ ठेलि सफूया उल्लेख उख्य थुख्य खनेदु । इस्वी ४२६ स ७१ दँया उमेरय् वसपोलं अन हे निर्वाण प्राप्त यात । चीनय् बुद्धयागु शान्ति सन्देश व्यापक प्रचार यानावन, उकिं बुद्धभद्र नेपाः व चीनिया अविच्छिन्न मैत्रीया स्वापू तयाः जग स्वनावंहा धकाः धयाच्वन ।

ल्हासा देसय् चलय् जुयाच्वंगु बोन धर्मावलम्बीतय् आचार्य शान्तिरक्षित् व गुरु पद्मसंभव-पिनिगु अकथनीय परिश्रम व दिव्य पुरुषार्थ वयनाः गुगु बुद्धधर्मया जग स्वनाविल थ्व हे सन्दर्भय् अनया प्रसिद्ध विद्वान् लामाजुपिनिगु अनुरोधकथं काङ्ग्युर तङ्ग्युर अनुवाद याय्गु महान् कार्य अपरिमित पुण्य सम्भार मुनेगु ज्याय् सहयोगया निम्ति १०८ सुयोग्य विद्वान्पि भारतं तिब्बतय् वन । उपि १०८ विद्वान्पि मध्यय् नेपाली विद्वान्पिनिगु नां नं न्ह्यथनातःगु दु—सर्वश्री शीलमञ्जु, लक्ष्मीश्री, शान्तिभद्र, अनन्तश्री एवं संघश्री^१ अथे हे पुण्यमती, भारो महापण्डित, श्रीकीर्ति^२ जुल ।

थुलि जक मखु संसारय् अतिकं नांदनाच्वंगु नालन्दा विश्वविद्यालयया मूलद्वारय् च्वनिइहा नेपाली पण्डित रत्नाकर^३ अथे हे अनया अध्यापक जुयाच्वंहा फपिया वागीश्वरकीर्ति नं अथे हे दइच्वंगु जुल, व थे^४ विक्रमशील विद्यापीठया द्वारपण्डित कनकश्री नं ।

नेपालय् फिनिदँतक अनावृष्टि जुयाच्वंगु इलय् लाखय् लसितय्गु देसय् वयाः बुंगद्यो क्याह्याः जलवृष्टि यानाः सहकाल यानाव्यूहा तेवाहाःया बन्धुदत्त आचार्य । पशुपतिइ च्वंगु लिच्छवी कालया दकलय् सकलय् तःग्वःगु जयदेव जुजुया शिलापत्र निम्ति श्लोकबद्ध यानाः संस्कृतं च्वयाथकूहा पण्डित बुद्धकीर्ति ।

उगु इलय् यल देसय् नं अतिकं प्रसिद्ध जुयाच्वंहा पण्डित महाकरुणा*, सप्तपुर महाविहार दय्काविज्याःहा महापण्डित शाक्यभिक्षु गौतमश्री थ्व हे गौतमश्रीया मूल शिष्य पद्मोच्च श्रीमहाविहारया दीपङ्कर तथागत स्थापना यानाथकूहा क्षान्तिश्री^५ थ्व हे विहारया उत्तरपाखे च्वंगु तःग्वःगु चीवाहाःया अक्षोभ्य तथागत स्थापना याःहा महापण्डित विभूत चन्द्रपाल । एवंक्रमं ये^६ थंवहिलिइ च्वंगु बौद्धजगतय् प्रसिद्धगु नीलपत्रय् लुँया मसि रञ्जना आखलं च्वइतःगु लक्षावती प्रजापारमिता सफू च्वयाथकूहा पण्डित जिनश्रीज्ञानं तच्चोगु मेहनत यानाः च्वयातःगु थ्व सफू धर्मधातु महाविहारया अतिकं समृद्धगु 'परमगुणालंकृत ज्ञानसंघ' या निमित्तय् समर्पण यानातःगु जुयाच्वन^७ । अथे हे यलदेया समृद्धगु

१*— तिब्बतमे^१ बौद्धधर्म— राहुल सांकृत्यायन ।

२— धर्मोदय पत्रिका भाग ९, अंक १०८

३ — त्रिभुवन विश्वविद्यालय संस्कृत परिषद्द्वारा प्रकाशित 'नेपाल', पृ. ३४

४ — मेडिभल नेपाल, भाग ३

५ — संस्कृत सन्देश, वर्ष १, अंक ५

हिरण्यवर्णं महाविहारय् च्वंगु लुं च्वयातःगु अष्टसाहसिका प्रज्ञापारमिता सफू नं कापितनगरया आनन्दभिक्षुं च्वयातःगु जुल । यल ईवहीया संस्थापक सुनयश्रीमित्रया सन्तान नेपाःदेया प्रसिद्ध श्रीबुंगमलोकेश्वर करुणामयया अष्टधातुया मूर्ति दय्काबिज्याःह्य कलाकार शुभश्रीमित्र ब्रह्मचर्यं भिक्षु खः^१ । थुगु रूपं अति प्रसिद्धगु यल महाबुद्ध मन्दिरया संस्थापक बौद्धाचार्य अभयराज शाक्यजुया छय् महापण्डित जयमुनिजुं स्वयम्भू च्वनाः स्वयम्भू पुराण नं व्याख्यान् यानाबिज्यात^२ । ल्हासांनिसें नेपालय् जात्रा स्वय् धकाः आकाशं व्वयाबिज्याःह्य वज्रवीर महाकालयात आकाशं व्वकयाः तिनिख्यःया सिथय् स्थापना यानाथकूह्य सवलवाहाःया शाश्वतवज्र आचार्य । अथे हे सक्वदेया खड्गजोगिनी स्थापना यानावंह्य अग्निवज्र आचार्य । ब्रह्मटोलया जापतुं सिद्ध यानाः द्वकय् लः फय्काः लः मज्वय्काक्यंह्य मञ्जुवज्र (जामुनाचार्य) । शंकराचार्यनाप शास्त्रार्थ यानाः त्याकूह्य नंसावाहाःया अमरसिहाचार्य, वया किजा ऋद्धिवलं त्याकूह्य द्रुमसिहाचार्य । यल क्वाःवाहाः दय्कूवल्य् गुरु जूह्य कुलपादाचार्य । नेपाःया थःगु परम्पराकथं चल्य् जूगु संस्कार पद्धति निम्ति उपयुक्त ग्रन्थ आचार्य क्रिया संग्रह नामक सफू दय्कावंह्य कुलदत्ताचार्य । थाय्थासय् हिति तुं पुखलिइ नागसाधन यानावंह्य सुधाकरवज्र आचार्य । क्वाःवाहालय् योगाम्बर गुफास पुरश्चरण च्वनाः नीलथुसा साधन यानाः क्वालखु गालं क्वचहा पिकयाः किरातोतय्गु उपद्रव शान्ति यानाथकूह्य तथागत वज्र । ल्हासाया लामागुरुपिनाप संवादं त्याकाः जयवाच्छली चचा हालाः कसागायात दुंगा यानाः खुसि पार यानाः वज्रयोगिनी दर्शन लानाः सिद्धि कयाः छेय् लिहांवःह्य तःछेवाहाःया सुरतवज्र । यलय् छेखापति धया थे भवत्वचं कयाः उपद्रव जूगु इलय् च्वय् पुचःवहीया न्ह्योनेच्वंगु गुफाय् पुरश्चरण च्वनाः विघ्नोपद्रव शान्त यानावंपि सहजानन्दाचार्य, समन्तभद्राचार्य^३ । जुजु जयस्थिति मल्लया महामन्त्रीया कलाः जेत्रलक्ष्मीं दय्कूगु जेत्रवर महाविहार प्रतिष्ठा याःह्य राजगुरु पण्डित महाबोधिभद्र ।

उपर्युक्त नेपाःया विद्वान् आचार्य गुरुजु शाक्यभिक्षु आदिपिसं नेपाःया प्रतिष्ठाता श्रीस्वयम्भू महाचैत्यस थःथःपिनिगु श्रद्धा निश्चय अनुसारं फुह्यं फुथे अनेक प्रकारं भावभक्ति यानाः दर्शन व पूजन यानावन जुइ । लिसेलिसें थुगु स्वयम्भू स्थानया नेपाःया बुद्धधर्मया केन्द्रीय स्थल अन्तर राष्ट्रया बौद्धदेसय् अतिकं प्रसिद्ध जुयाच्वंगु साह्येगु गिरि पर्वतस सुप्रतिष्ठित परम्परागत विद्याध्ययन व अध्यापन निम्ति नांदनाच्वंगु आदिबुद्ध स्वयम्भू व गुरु मञ्जुश्रीया प्रभावं संस्थापन जुयाच्वंगु शान्तिकर महाविद्यालयय् निःसन्देह सम्पर्क तयाः थःथःगु योग्यतानुसार परीक्षास उत्तीर्ण जुइ धुंकूपि जुइ धइगु क्रीसं तप्यंक अनुमान याय्फु ।

तर, जितः विश्वास दु—ने. सं. ४७० सालं बंगालया शमस्सुदीनया दलत वयाः थुगु स्वयम्भूइ आक्रमण जूवल्य् थनच्वंपि विद्वान् आचार्यपि छितरवितर जुल जुइ, लिसें ने. सं. ४६२ सालंनिसें

१- बुंगद्यो हःगु वंशावली ।

२- राष्ट्रिय संग्रहालयया पुस्तकालयय् च्वंगु स्वायम्भू पुराण ।

३- सुरदत्त कथा (संल्हू गुठीया महिमा) या भूमिकापाखे उद्धृत ।

हानं थुगु विद्यालय विस्तारं चालु जुल तथापि न्हापा थे' सुचारु रूपं उन्नति व विकास जुइ मफुत, यक्वं शिथिलता वल । उकिइसं जुजु यक्ष मल्लया शासनकालं लिपा थ्व काठमाण्डू उपत्यकाय् येँ, यल व ख्वप आदि थाय्थासय् राजनैतिक अस्थिरताया कारणं परस्परय् ईर्ष्या व वैमनस्यं यानाः अलग अलग जुल । उवलसंनिसें थ्व शान्तिकर महाविद्यालययागु उन्नति व प्रगतिपाखे अनेक विघ्न बाधा उत्पन्न जूवन जुइ, थुकिया ज्वलन्त प्रमाण थन व्वय् न्ह्यथनाच्चना । कवीन्द्र प्रताप मल्लं थ्व स्वयम्भू महाचैत्यया थुलि मुक्तकण्ठं प्रशंसा याना शिलालेख तथा थकूगु दु कि—

शैव सौगत शाक्त वैष्णव सौर दर्शन कारणं
सर्वकारण कारणान्तक कारणात्मक रूपिणम् ॥

धकाः धयातःसां थ्व थासय् येँया जुजुपिसं बाहेक यल व ख्वपया जुजुपिसं अपो सेवा भावभक्ति यानाः छुं कीर्ति स्थिति तथाः सेवा प्रस्तुत याय् मफुगु खनेदु । थुकिया छगू स्पष्टिकरण थ्व दु—योगनरेन्द्र मल्ल जुजुं स्वयम्भूइ च्वंगु दिव्यघण्ट जीर्णोद्धार याःवल्यत्क नं जुजु भूपालेन्द्र मल्लयागु विशेष अनुमति कयाः जक जीर्णोद्धार यानावंगु खनेदु । हानं थुलि जक मखु नेपाःया बुद्ध शासनय् च्वंच्वंपि ब्रह्मचर्य भिक्षु, शाक्यभिक्षु, श्रामणेरे व वज्राचार्यपि ग्रन्थधूर विपश्यनाधूर अर्थात् अध्ययन अध्यापन व साधन चर्यापाखे ह्य जुजुं वनाःलि आपाः यानाः थितिरिति परम्परा चलय् यानाः गुठी न्याय्काः भवय् नय् दतकि गाःगु थे' जुल । केवल उकिइ हे जक गौरवान्वित थे' तायाच्वन ।

परन्तु थुगु थासय् १७ गू शताब्दी लिपा वर्तमान २० शताब्दीपाखे वयाः बुद्धधर्म सम्बन्धी अध्ययन व अध्यापनया गतिविधि रोकका जूसा नं अज्ज नं पुरातत्त्व, इतिहास, संस्कृति व कला विषय अभिरुचि दुपि विद्वान्पिनिगु लागी अन्वेषण व गवेषण निम्ति सजीव संग्रहालय तुल्य जुयाः नेपाःयागु गौरव कायम याना वइच्वंगु दनि । लिसेलिसें मित्र राष्ट्रया विद्वान् एवं पर्यटकपिसं उपत्यकाया उच्च ध्वज विमान थे' न्ह्याथासं स्वःसां तारिफ जुयाच्वंगु ३३ कोटि देवतापिनि चूडामणि समान जुयाः श्रीशोभा वृद्धि जुयाच्वंगु थुगु अति पवित्र व रमणीय सांस्कृतिक निधि स्वयम्भू महाचैत्य स्थान खनाः अतिकं प्रशंसा याना वइच्वंगु जुल ।

सच्चि व सुइदं पिइदं न्ह्यो नेपाः काःपि विदेशी विद्वान् कर्कपेटिक, डेनिल राईट, माय्क्समुलर व अले हजसन् आदिपिसं स्वयम्भू विषय कयाः माःथाय् माःगु किसिमं प्रशंसा यानाथकल । अज्ज हजसन्जुं ला यल महाबुद्धया पण्डित अमृतानन्द शाक्यजुयाके स्वयम्भू पर्वस्थान व चाय्वही धनद्वचीवाहाःयागु मूर्तिकला सम्बन्धी बांलाक अध्ययन यानावंगु खनेदु^१ । वयां लिपा पिइदं न्येदं न्ह्यो काःपि भारतया प्रसिद्ध विद्वान् महापण्डित राहुल सांकृत्यायन, भगवानलाल इन्द्रजीपिसं थ्व थाय्थागु शिलालेख विषय अध्ययन यानावन, अथे हे डाक्टर विनयतोष भट्टाचार्य एवं श्री ५ या सरकार पुरातत्त्व विभागया तलहाकार जुयाः काःह्य डा. कृष्णदेवपिसं मूर्तिकलायागु सर्वेक्षण यानाः रिपोर्ट पेश

याना थकल । थ्व हे सन्दर्भय् भट्टाचार्यजुं धाःगु दु^१—‘बौद्धदेव तथा देवदेवीपिनिगु अविश्वस्य प्रतिमा निधि थुपि हे खः ।’ लिस्सें च्वापुंगुं चाहुइकातःगु थुजाःगु रहस्यमय देसय् इलं संस्कृतियागु गुगु देन वियाथकल उकियात संरक्षण मयात धाःसा बौद्धधर्म गुगु बखतय् न्ह्यात्थे जाःगु अध्ययन नं असम्पूर्ण जुइ । संक्षिप्तं धाल धाःसा बुद्धधर्म अध्ययनया निम्ति नेपाल स्वर्ग खः । थुगु हे रूपं महापण्डित राहुलजुं धयाथकूगु दु^२—प्रारम्भिककालनिसें नेपालं बुद्धधर्म व बुद्धधर्मया ग्रन्थयात सुरक्षित याना तइतःगु दु । नेपाःया बुद्धधर्मप्रति थ्व तःधंगु देन खः । लिस्सें थ्व नं व्यक्त प्राःगु दु—थौतकं विश्वय् खनेदइच्चंगु दर्शनत मध्यय् बौद्ध दर्शन तस्सकं वैज्ञानिक जू ।

थुगु कथं स्वयम्भू पर्वस्थानय् प्रारम्भिक इलंनिसें फिन्हय्गु शदी तकं अटूट नक्सां बुद्धधर्म अध्ययन अध्यापन निम्ति महाविद्यालय स्तरगु शिक्षण संस्था दइच्चंगुलि यानाः स्वयम्भू पर्वस्थानया प्यख्यरसं श्रावक, प्रत्येक महायान वज्रयानया विषय सम्पर्क तय्गु स्थान विद्यमान तिनि धाःसां अत्युक्ति जुइ मखु । धाय् कि स्वयम्भूया पूर्वपाखे च्वंगु जगतोद्धार महाविहारय् वज्रयान सम्बन्धी चर्चा जुया-च्चनी । निगू दशक न्ह्यो नेपाःया बुद्धधर्म पुनर्जागृतिया लागो ब्वनिइपिं बौद्ध छात्रावास निम्ति छ्छाःचा बोर्डिङ्ग स्कूल नं जुयावन । अथे नं थ्व बोर्डिङ्ग स्कूलया संस्थापक पण्डित जोगमुनि वज्राचार्यजुं थःह्यं फुथे महायान वज्रयानया वारय् वारंवार प्रचार एवं प्रकाशन यानाः शिक्षा-दीक्षा प्रदान याना वइच्चंगु खनेदु । स्वयम्भूया दक्षिण भागय् च्वंगु किण्डोलविहारय् बराबर लामागुरुजुं वयाः अनेक लुङ वाङ्ग (व्याकरण अभिषेक) वियाः महायानिक बुद्धधर्म प्रचार याना वइच्चन । थुगु हे रूपं स्वयम्भूया पश्चिम दिशापाखे आनन्दकुटीस लंका वर्माया तालगु श्रावकयान अन्तर्गत थेरवादी शासन (हीनयान) या भन्तेपि च्वनाः इलय्-ब्यलय् बुद्धधर्म प्रचार याना वइच्चंगु खनेदु । अथे हे स्वयम्भूया उत्तरपाखे नागार्जुन जंगलय् सिद्धयोगी विद्याधरपिसं चलय् यानावंगु योग साधन चर्यास च्वनाः संसार निर्वाण अथवा ‘थः धइगु छु खः’ धइगु विवाद निर्णय याय्त चिन्तना यानाः एकान्तय् ध्यानय् च्वनिइपिनिगु लागी उपर्युक्त जुयाच्चंगु जामाःचोया क्वस्सं नागार्जुन जंगलय् अनेक किसिमया गुफा पाकुत सुरक्षित् जुयाच्चंगु दनि । थुगु थासं स्वयम्भू पर्वस्थानयात प्रभा मण्डल थे च्वनाः मण्डलाकार रूपं शोभावृद्धि जुयाच्चंगु जुल । स्वयम्भू विद्याध्ययन केन्द्र शान्तिकर महाविद्यालययागु परम्परायागु इतिहासयात साक्षि स्वरूपं च्वनाच्चंगु जुल ।

१- नेपाल सांस्कृतिक परिषद पत्रिका, वर्ष २, अंक २

२- गोरखापत्र वर्ष ५७, सं. १३८, मिति ०९/०१/१९९१

स्वयम्भू महाचैत्यस गजू द्वहलप्युगु- जुजु प्रताप मल्लजुया

नेपाल मण्डल्य विराजमान जुयाच्चर्वि गुलि नं वाह्य गुह्य अभ्यन्तर आदि शान्त क्रोधया सम्पूर्ण देवदेवतापिनि नं मूल केन्द्रीय स्थान जुयाच्चंगु पञ्चकुलया अधिष्ठातृ श्रीस्वयम्भू महाचैत्यस शोभा वृद्धि निम्ति अखण्ड विजय राज्य अटल जुया चवनेमा धइगु महान् शुभ संकल्प यासे यथायोग्य प्रमाणं महोत्सव याताः विधिपूर्वक त्रयोदश भुवनया च्वला मूलिइ द्योने अतिकं शोभायमान जुइक राजा राजेन्द्र कवीन्द्र जयप्रताप मल्लजुं सुवर्णं गजू चढ्य याता ब्यूगु जुल ।

थ्व गजू चढ्य याःगु पुण्य तिथि खः ने. सं. ७७६ ज्येष्ठशुक्ल पूर्णिमाया दिनस' ।

स्वयम्भूस कवीन्द्र मल्ली तकाया आयस्तां महादी च्याकेगु गुठी तःगु

नेपाल मण्डल कालीहृद जुयाच्चंगु इलय् वसपोल स्वयम्भू आदि बुद्धं संसारया सम्पूर्ण अज्ञान वलेश रूपी अन्धकार फुकेगु प्रवल इच्छा यानाः छन्हु महान् शुभ मुहूर्त्तय् अकस्मात् अद्भूतमय महान् ज्योति प्रकाश जुल । नेपाःया सौभाग्य उदय जुल । त्रिकालया सम्पूर्ण गुरु बुद्ध बोधिसत्व एवं बाह्य गुह्य अभ्यन्तरया देवदेवतापिनि आत्म स्वरूप ज्योतिरूप स्वयम्भू धर्मधातु वागीश्वर उत्पन्न जुल ।

थ्व हे अद्भूतमय ज्योतिरूप महादीप विश्व प्रदीपं धर्मधातु वज्रधातु महामोक्ष निर्वाणया अखण्ड प्रकाश जुयाच्चंगु सम्बोधिज्ञान भास्कर रूपी रश्मिया पञ्चदान पाखें पञ्चबुद्ध न्याह्यं छह्य जुयाः सदांया निम्ति स्वयम्भू ज्योतिरूप महाचैत्य कीगु न्ह्योने सुप्रतिष्ठित जुयाच्चंगु जुल । फलस्वरूप थौतक नं काठमाण्डू उपत्यकाय् न्ह्याथासं स्वःसां ज्योतिरूप श्रीस्वयम्भू महाचैत्य अतिकं शोभायमान जुइक प्रकाश जुयाच्चंगु जुल ।

वसपोल ज्योतिरूप श्रीस्वयम्भू महाचैत्ययागु आत्मा स्वरूप प्रभाश्वर धर्मकाय ज्ञानकाय सर्वसुगत हृदय प्रतिबिम्ब उकिइसं लीन जुइगु सदिच्छा यानाःलि केलत्वाःया शिवभारो सत्यहरि भारो-सेनं थःअबुजु श्रीविष्णुरामया नामं श्रीस्वयम्भू महाचैत्यया पूजा सत्कार जुया चवनेमा धकाः दैय्दसं बैशाखशुक्ल पूर्णिमा स्वांयापुन्हीखुनु स्वयम्भू महाचैत्यया अग्रस महादीप छजो, त्वाःदेवा, चाकःदलू आदि विभिन्न प्रकारया मत च्याकाः दीपदान पूजा याय्गु गुठी तयाव्यूगु जुल । लिस्सें स्वयम्भूया देवदेवतायाथाय् सद्धर्म ग्रन्थ पाठ याकेगु खँ नं न्ह्यथनातःगु दु^१ ।

थुगु महादी च्याकेगु व पाठ याकेगु गुठी सदांया लागी चिरस्थायी जुइमा धइगु हेतुं श्रद्धालु दानपतिजुं कवीन्द्र मल्ली तका १५०१- जगीरा स्वरूप आयस्ता तया व्यूगु जुल । राजा कवीन्द्र प्रताप मल्लया पर्याय ने. सं. ७८३ सालं स्वांयापुन्हीखुनु थुगु गुठी संकल्प यासे विधि थें पूजा-आजा यानाः सिधय्कूगु जुल ।

१- मूर्ति संग्रहालयया क्वस्सं च्वंगु रेष्टुरांया न्ह्योने फःक्वस्सं च्वंगु शिलापत्र ।

साह्येगुं कवरसं गौचरण निम्ति

जग्गा प्रदान याःगु

साह्येगुं गिरि पर्वतय् विराजमान जुयाच्चंहा श्रीस्वयम्भू महाचैत्य निम्ति आस्था तसे श्रीगोमाता प्रीतिन गोपुच्छ गिरि गोशृङ्ग पर्वतया नामं विख्यातगु साह्येगुं (स्वयम्भू) पर्वतया पूर्वोत्तर कुने छुल बुँ स्वपीत्या सदाया लागी वाँजु यानाः तोता व्युगु जुल ।

जुजु प्रताप मल्लया पर्यायस ने. सं. ७८६ सालया श्रीसूर्यग्रास जूगु दिनय् विधिवत् संकल्प यासे गौचरणया रूपय् तोता व्युगु जुल^१ । थुकिया दानपति खः कान्तिपुरया इताखाटोल निवासी विष्णुसिंह, मुकुन्दसिंह भारो । थुगु शिलापत्रया शिरोभागय् जःखः सा द्वहं तयाः श्वया दथुस स्वयम्भू चैत्ययागु शुभ प्रतीक अंकित याना शोभावृद्धि यानातःगु दु ।

१- स्यंगु गः चाःहुलेबलय् मुसलमानतय्गु तकिया लिकच्चंगु पःखाःया शिलापत्र ।

राजा प्रताप मल्लया शान्तिपुर प्रवेश

थुगु प्रसिद्धगु शान्तिपुर गुफाय् गुणकामदेव राजा दुहांवनाः देसय् सुभिक्ष यानाबिल धइगु खँ थनं च्वय् वर्णन जुइ धुं'कूगु दु । तदनुसार अनं लिपा कवीन्द्र जयप्रताप मल्ल राजां शान्तिपुरय् दुने थ्यंक दुहांवंगु ऐतिहासिक वर्णन प्राप्त जुयाच्चंगु दु । थुगु विषय शान्तिपुरय् दुने तइतःगु शिलापत्र^१ व प्रताप मल्लया शान्तिपुर प्रवेश धइगु लेखय्^२ थथे उल्लेख यानातःगु दु, व खँ गथे धाःसा—

वर्षादि वितय् जुयावनाः नं जल वर्षा मजुल । थथे जुयाः वा पिइज्या याय् मफुत । प्रजागणपिनि बिचय् तस्सकं हाहाकार मचय् जुल । दुर्भिक्षया आशंका जुयाः जुजु प्रताप मल्लयात नं छुयाय् छुयाय् जुल ! अले राजा प्रताप मल्लं वज्राचार्य व ब्राह्मणपिके सल्हा यानाः पशुपति, गुह्येश्वरी, स्वयम्भू, वज्रयोगिनी, चांगु, गोकर्णेश्वर आदि प्रसिद्ध देवस्थलय् पाठ पूजा याकेबिल । अथे नं जल वृष्टि मजुल ।

थुजाःगु समयय् छगू थुजाःगु खँ चर्चा जुल कि शान्तिपुरय् दुने नागराजपिनिगु हिं च्वयातःगु पौवाहाः व सफू दु, उगु पौवाहाः व सफू पिनेहयाः निभालय् क्यने फत धाःसा जल वृष्टि जुइ धइगु खँ न्ह्यथन । अथे जूसा उगु पौवाहाः व सफू पिने ह्यमाल धयाः प्रताप मल्लं वज्राचार्यपित अह्लय यात । तर वज्राचार्यपिसं ह्य मफुत । थथे जुसेलि लिपा स्वयं प्रताप मल्ल हे शान्तिपुरय् प्रवेश जुल । थुगु विषययात कयाः प्रताप मल्लं शान्तिपुरया शिलालेखय् तथा अलग थुगु विषयय् चित्र व सफू च्वकाः प्रचार यानावन । शान्तिपुरया शिलापत्रय् थुगु यात्रा सम्बन्धी वर्णन थथे यानातःगु दु—

जल वर्षा मजूगु खनाः प्रताप मल्लं तान्त्रिक आचार्यपित सःताः धाःगु दु— शान्तिपुरय् च्वंगु पुस्तक रत्न पितह्यगु याकनं हे कोशिश या । इमिसं राजां धाःथे यात । तर कलियुगया दोषं यानाः पुस्तक मेगु हे लात । अथे जूगु खनाः शान्तिपुरय् दुने थः हे दुहांवनाः व पुस्तक ह्यगु विचार यात ।

१- संस्कृत सन्देश, वर्ष १, अंक १२

२- पूर्णिमा वर्ष १, अंक ४

अन वनेवल्य् सर्पतय्के न्ह्याः वनेमाःगु जुयाचवन, ग्यानापुसेच्वं पि पिशाचतय्सं चाःहिलाचवन, मन मनं थ्व स्तुतिपाठ यानाः शान्ति स्वस्ति यानाः सम्पूर्ण शान्त जुयावन । भयंकरगु शान्तिपुरया दुने जम्मा २७ कोथा दुगु जुयाचवन । गनं सिद्धिपि च्वनाः सभा यानाचवन । मणिरत्नपाखे सजय् यानातःगु सुन्दर इलांत तयातःगु दु । च्यागुगु कोथा स्वयाः गुंगुगु कोथाय् थ्यंवल्य् वासकापः दुगु पौ पौ छुतय् जूगु सुन्दर पुस्तकयात खनाः दंग जुल । अल्य् राजाया मन चञ्चल जुयाचवन । अन दुने हानं उज्ज्वल ज्वाला खने दत, उकियात नं अथे हे यानाः शान्त यात । सकल प्रजापिनिगु उपर्य् दया दुगुलि सौभाग्यवश थःह्यं मनं तातुना थें मुख्यगु नागया हि च्वयातःगु अद्भूतमय सफू व पौवाहाः ज्वनाः छक्क पर्य् जुयाः पिने हयाः श्रीसूर्य रश्मि खय्कल; तुरन्त हे मेघ शून्य आकाशय् हुसुमुं सुपाय् व्वाय्वल । तत्क्षण्य् जल वृष्टि नं जुल । पृथ्वी लखं भरिपूर्ण जुल । थुजाःगु अद्भूत खं दइच्वंगु सफू सुनां शान्तिपुरय् दुहांवनाः कयाहल धइगु प्रमाणितया लागी लोकजनपित क्यनेत तुरन्त हे अन जुयाच्वंगु अद्भूत घटनायात हर्षपूर्वक चित्राङ्कन यानातल । अनेक जन्मय् मुंकातयागु पाप नाश याइगु दुःखमय संसारपाखे पार यानाविइपि ग्यानापुसेच्वं पि देवदेवतापित प्रणाम यासे राजा प्रताप मल्लं अनुमोदन यासे वृष्टि चिन्तामणि स्तोत्र दय्काः भक्तिपूर्वक स्तोत्र यात । अन दुने च्वंगु साक्षात्कारगु अति प्रसिद्धगु नागराजपिनिगु शर्तनामा सहितगु आचार्य शान्तिकरजुं अधिष्ठान यानातयातःगु महामेघ सूत्र कवोन्द्र प्रताप मल्ल राजां ने. सं. ७७८ आषाढकृष्ण चतुर्थी शतभिषा नक्षत्र शोभनयोग बृहस्पति-वारया दिनय् शान्तिपुरय् च्वंगु सफू व पौवाहाः पितहःगु जुल । उगु शुभावसरय् प्यख्यरसं सारा मनुष्यतय्त प्रशन्न याइगुकथं तस्सकं वांलाक जल वृष्टि जुल । थुकि देसय् सहकाल जुल^१, पृथ्वीमण्डल सुगहर सफा जुल । थथे दुष्करगु महान् कार्यं निर्विघ्नपूर्वक सफल जूगुलि थः प्रजागणपि तस्सकं प्रशन्न जूगु स्वयाः राजा प्रताप मल्ल बडो हर्षपूर्वक स्वयम्भू महाचैत्य प्रदक्षिणा यानाः लिहांविज्यात ।

थुगु रूपं प्रताप मल्ल शान्तिपुरय् दुने दुहांवंबल्यसिगु विभिन्न दृश्यत दइच्वंगु हरिताल भवैतय् च्वयातःगु आकर्षक चित्रपट्ट छगू दु^२ । थुकिइ शान्तिपुरया शिलालेख स्वयाः नं अप्पो विस्तारपूर्वक वर्णन यानातःगु दु । प्रताप मल्लया विभिन्न मुद्राया रंगीन चित्र दइच्वंगुलि उकि दर्शकपित कं अप्पो ध्यान आर्कषित जूवनेफु ।

थुगु चित्रय् थथे निर्देशन यानाः क्यनातःगु दु— शान्तिपुरया दुने जमीनय् जम्मा स्वंगू तल्ला दु धकाः क्यनातल । उगु स्वंगू तल्लाय्सं गुंगू गुंगू कोथा अलग अलग यानातल । उगु स्वंगू तल्लाय्सं विशेष खैत दइच्वंगु कोथायागु जक उकिइ चित्रण यानातःगु जुल । देवता मदुगु शून्यगु कोथाय् जक 'देव मदु कोथा' धकाः च्वयातःगु दु । थुकिइ न्हापां शान्तिपुरया पिनेयागु लुखाया दृश्य अंकित यानातल । व हे लुखाया नापं लुखां दुहांवनेवं च्वंच्वंहा प्रताप मल्लयात खने दइ । वइगु जवगु ल्हातय्

१- थुगु दैय् जाकिया भाः २२ फा, वा जक ५० फा जुल, व हे चित्रपट्टय् अंकित ।

२- वर्तमान थुगु चित्रपट्ट कान्तिपुर सुस्तश्रीमहाविहारया देवहर्ष वज्राचार्यजुया गृह्य सुरक्षित यानातःगु दु ।

सुकुन्दा मत छप्पाः व खवगु ल्हातय् पूजाभः ज्वनाच्चंगु दु । उगु दृश्यया छचाःखयरं हाकुमसि नेवाःभासं
परिचय बियातःगु दु, व थुकथं दु—

‘श्रीश्री राजराजेन्द्र कवीन्द्र जयप्रताप मल्लदेव पूजा सामग्री दचाम्वा सादुर ज्वना व दुहां
विज्यात ।’

छगू तल्लां मेगु तल्लाय् वनेगु स्वहांने नं चित्रय् क्यनातःगु दु । ल्वहंया स्वहांने धकाः अन
चव्यातल ।

निगूगु तल्लाया विचय् च्वंगु कोथाय् छगू चाकलाःगु जन्त्र दु, उकिइ जःखः खङ्ग पौवाहाः
स्वथनेगु दुंगुर व कलश थें जाःगु वस्तु नं दु । कोथाया अंगलय् छगू ग्वाखंचा थें जाःगु नं क्यनाब्युगु
दु । थुकिया दथुस शून्याकारया जन्त्र जक, विचय्यागु कोथाय् श्रीमहासम्बर नापलात । श्रीराजराजेन्द्र
कवीन्द्र जयप्रताप मल्लदेवं थःह्यं उगु दर्शन प्राप्त यात । सिजःया दुंगुरस महासम्बर तन्त्र छगू सफू व
थ्वया पौवाहाः समेत तयातःगु खनेदत ।

निगूगु तल्ला तोताः स्वंगूगु तल्लाय् क्वहांवनेगु स्वहांनेया पूर्वपतियागु कोथानापं क्यनातःगु दु ।
उगु कोथाय् थथे परिचय च्वयातल—

‘न्हापांगु लुखां दुहांवनाः स्वत च्वय् वने ज्यू, स्वयास्वयाथासय् द्यो मदु, थनतक जा गुभाःजुपि
नं वनेफु, लै मखंगुलि वने मफुत, ल्वहंयागु तःखाखापा खनाः स्वहांने क्वहांवनाः स्वय्गु लै जुयाच्वन ।’

स्वतंगु तल्लाय् फुकभनं कोथाय् विशेष आकर्षक दृश्यत दइच्वन । नितंगु तल्लां क्वहांवने
वित्तिकं स्वंगू तल्लायागु पूर्वपाखेया कोथा खने दइ । थुगु कोथाय् स्वह्य लापाचात ब्वयाच्चंगु खनेदु ।
थनं क्वहांवने मात्रं चिकंलापातय्सं मत स्याःवल, थुगु कोथां मेगु निगू कोथाय् वने ज्यू ।

चिकंलापा ब्वयाच्चंगु दृश्य दइच्चंगु थुगु कोथानापं स्वय्बल्य् ग्यानापुसेच्चंवि राक्षसत प्याखं
हुलाच्चंगु दृश्य खनेदु । थुगु दृश्यया परिचय अन थथे च्वइतल—‘थुगु कोथाय् भूतप्रेत पिशाचत दु,
थुमिसं पवं वइ, थुमित चित्त बुरुय् यानाः शान्त याय् मफुत धाःसा दुःख ब्यू वइ, लिहांवने मजिइक
ज्वना तयातइ ।’

स्वंगू तल्लायागु दक्षिणपाखेयागु कोथाय् ब्याक्कभनं पुखुलिइ लःगुजि उठय् जुयाच्चंगु दृश्य दु ।
थुकियागु विषयय् नं थथे धइतःगु दु—‘थन लै मदु थन प्वाः जक दु, थ्व प्वालं स्वय्बल्य् लः खनेदु
नापं लःया न्हव वास वःगु फय् वयाच्वनी ।’

पश्चिमपाखेयागु छगू कोथाय् सिमा छमा दु, थुगु कोथाय् दुहांवनेथाय् तःतःग्वःगु ल्वहंत दु ।
धयातःगु दु, लुखा ल्वहंतं त्वपुयातःगु ।

थ्वयां लिपा पश्चिमोत्तरया कुनाया कोथा वइ, थन भयङ्करपि सर्पतय्गु दृश्य क्यनातःगु दु ।
थुकियागु विषयय् नं थथे उल्लेख यानातल—‘थुगु कोथाय् सर्पत ल्यू ल्यू वइ, शान्ति स्वस्ति याय्
मफुत धाःसा लिहांवने मजिइक हिना तय्यो । शान्ति स्वस्ति याना वने फत धाःसा सर्पतय्गु ह्यय्
न्हुयाः वने दइ, वहे सर्पत सहयोगया रूप्य् स्वहांनेया स्वरूप जुयाः ज्या विइ ।’

थनं नं हानं उत्तरपाखेयागु कोथा वड, गुगु इच्छाया लागी प्रताप मल्ल वंगु खः उगु विषय खास यानाः थ्व हे कोथाय् प्रस्तुत यानाः क्यनातःगु दु । थन च्वयातःगु थथे खः—‘जल वर्षा मजुयाः पिने ह्यागु गुपाः नागराजपिनिगु हि च्वयातःगु पौवाहाः सिजःया दुंगुर्य् तथाः तालं ग्वयातःगु ।’ थ्व हे कोथाया मध्यभाग्य् छंचगू व क्वय् जक वाकि दयाच्वंह्य ध्यानमग्न तपस्वीया दृश्य दु, थुनिया परिचय थन वियातःगु दु— ‘शान्तिकर आचार्य समाधियोग्य च्वनाः सिद्ध जुयाच्वन, शरीर्य् ला छति हे मदु, क्वय् जक छ्वां छ्वां वयाच्वन, प्राणहंस जक ल्यनाच्वन, श्रीश्रीराजराजेन्द्र कवीन्द्र जयप्रताप मल्ल देवं वसपोलयात नापलात, अनयाके न्यनाः जक दुने दुहांवन ।’

स्वंगूगु तल्लायागु दथुयागु कोथाय् रत्न जड्य् यानातःगु श्रीपेच पुयाच्वंह्य दारि ग्वाय् लहिनातःह्य न्हाय्पनय् चाःचाः गःपतय् मोतिमाला व लुँसिखः क्वकखायातःह्य ह्याउंगु कल्लरी गुजिले फिनाः वेंचुवेंचुनःगु बुट्टा दुगु जनिखं चिनातःह्य प्रताप मल्लयागु चित्र अंकित यानातःगु दु । उगु चित्रय् प्रताप मल्ल मत न्होने तथाः मुलपति थ्यानाः समाधिइ च्वनाच्वंगु खनेदु । थन नं थथे च्वइतःगु दु— ‘श्रीश्रीराजराजेन्द्र कवीन्द्र जयप्रताप मल्ल देवं व्याकभनं कोथा स्वयाः प्रजा रक्षा याय्त् वा मवःगुलि थनसं ध्यान यानाविज्यात, अले सकभनं कोथाय् दुहांवनाः अनेक विषय स्वयाविज्यात । थुलि माक्व विधि विधान सिध्याकाः लिहांविज्यात ।’

थुगु शान्तिपुर्य् दुने प्रताप मल्ल राजां विभिन्न प्रकारया भयङ्करपि नागराजपि खना धकाः उक्त चित्रपट्ट पौवाहालय् वर्णन यानातल । तदनुसार अन शान्तिपुर्य् दुने स्थानस्थानान्तरया नागराजपि आवाहन याःगु खनेदु । छगू वर्षापिण विधि नामक सफुतिइ निम्नलिखित नागराजपिनिगु नां उल्लेख यानातःगु खनेदु^१—

प्रारम्भ वाक्य—

नमः श्रीवज्रसत्वाय ॥ श्रीसाह्येगु महाविहाराम्नाय वर्षापिणमुच्यते ।

- | | |
|---|-----------------------------------|
| (१) सागरक्वमरूक्व नागराज | (१०) तिमोदंचग्राम नागराज |
| (२) अनन्त परिकर सागर तेजोमण्डल छत्राकार | (११) फन्हूगु नागराज |
| महानागाधिपति | (१२) गोकर्ण नागराज |
| (३) वरुण नागराज | (१३) कौशिकी नागराज |
| (४) लूँ चूरुक नागराज | (१४) स्वयम्भू चैत्य वासुकी नागराज |
| (५) त्रिशिर्षनागराज | (१५) फलेविति नागराज |
| (६) प्रस्फोटक नागराज | (१६) तेचम्प नागराज |
| (७) अवभासन शिखीन नागराज | (१७) वैवाटिका नागराज |
| (८) मेघसंचोदन नागराज | (१८) अनन्तेश्वर नागराज |
| (९) पशुपति भट्टरकस्य वासुकी नागराज | (१९) बुंगम नन्दोपनन्दौ नागराज |

- (२०) गण्डकी नागराज
 (२१) मुखलिन् नागराज
 (२२) पूर्वहृद नागराज
 (२३) थूलवीहृदयौण्ड नागराज
 (२४) भृङ्गारेश्वर हृद नागराज
 (२५) किन्नरो पर्वत नागराज
 (२६) कच्छनदी नागराज
 (२७) लहूती नागराज
 (२८) सुवर्णवती नागराज
 (२९) सिद्धशुभमती नागराज
 (३०) लुंविन नागराज
 (३१) स्वामिगुं वासुकी नागराज
 (३२) मणि प्रक्षारण पुष्करणी नागराज
 (३३) सपथ पुष्करणी नागराज
 (३४) मूचिलिन्द नागराज
 (३५) नन्दोपनन्दौ नागराज
 (३६) अनवतप्त नागराज

- (३७) कृष्ण नागराज
 (३८) अनन्त नागराज
 (३९) चक्रवाडा नागराज
 (४०) वासुकीन् नागराज
 (४१) तक्षक नागराज
 (४२) कर्कोटक नागराज
 (४३) शंखपाल नागराज
 (४४) पद्म नागराज
 (४५) महापद्म नागराज
 (४६) कुलीक नागराज
 (४७) धृताष्ट्र नागराज
 (४८) ऐरावत् नागराज
 (४९) श्रीतेजन् नागराज
 (५०) भद्र नागराज
 (५१) महामणिचूड नागराज
 (५२) विद्युन्मालिन् नागराज
 (५३) चूडामणिधर नागराज

जुजु कवीन्द्र प्रताप मल्लया स्वयम्भू महाचैत्यया सेवा

प्रताप मल्ल कान्तिपुर सहरया मल्ल जुजुपि मध्यय् दक्कसिवय् नांदह्य जुजु धकाः धा.सा नं ज्यु । राजा प्रताप मल्ल बडो धर्मात्मा व प्रतापी नं खः । प्रताप मल्ल स्वयं विद्वान् जुयाः नं नापं थःगु राजद्वारिय् पण्डित लम्भकर्ण भट्ट, नरसिंह थाकुर, जामनः गुभाःजु आदि विद्वान्तय्गु सभा मुंकाच्चनी । जुजु थः स्वयं कवि नं खः, उकि वय्कलं थःगु नांया न्ह्योने 'कवीन्द्र' धइगु उपाधि नं अङ्कित यात । उकिइसं थःगु कवीन्द्रपुर लाय्कूया पिने अंगल्य् १५ किसिमया लिपि अंकितगु शिलालेख तयाः थःगु विद्वत्ताया परिचय जनतापिनिगु न्ह्योने तयाथकल । उगु शिलालेख थौतकं विद्यमान तिनि । प्रताप मल्लं धार्मिक पक्षपात रहित बौद्ध देवतायात नं उत्तिकं सम्मान याः । उदाहरणया लागी थथे धाय्फु- प्रागैतिहासिक कालनिसें बौद्धधर्मया परम्परा स्वाकातइत.गु नेपाःया सर्वप्रसिद्ध देवस्थल स्वयम्भू चाकल्य् जक छकः अय्क ध्यान तयाः स्वत धाःसा नं कवीन्द्र प्रताप मल्लजुं विविध समयय् विभिन्न धार्मिक कीर्तित स्वनावंगु खनेदु—

(१) स्वयम्भू महाचैत्यया अमिताभ बुद्धया जःपाखे च्वंगु वज्र अंकित शिलापत्रस प्रताप मल्ल जुजुं स्वयम्भू धर्मधातु वागीश्वरप्रति श्रद्धाभक्ति तयाः स्वयम्भू भट्टारक स्तोत्र १७ पु श्लोक रचना यानावन । थ्व स्वयम्भू भट्टारक स्तुति नेवाः आखः संस्कृत भाषां च्वयाथकल । थुकिइ “मञ्जुश्री कृतरम्यपर्वत” निसें प्रारम्भ यानाः स्वयम्भू पर्वतयात प्रशंसा यायां थ्व हे पर्वतय् रत्न सरोज्य् विराजमान जुयाः सुप्रतिष्ठित जुयाच्चंगु धर्मराजिक श्रीस्वयम्भू महाचैत्ययागु गुण वर्णन यानाः अन्तय् थथे धइतःगु दु- छलपोल धर्मभास्कर ज्योतिरूप स्वयम्भू धर्मधातु- शैव, बौद्ध, शाक्त, वैष्णव एवं सौर सम्प्रदायया नं दर्शनया नं कारण जुयाच्चंह्य सम्पूर्ण सचराचर जगतया नं कारण स्वरूप जुयाः नं कारण शान्त जुइ धुंकूह्य कारणात्मक रूप जुयाच्चंह्य छलपोलयात नमस्कार धकाः स्तोत्र याना तइतल--

शैव सौगत शाक्त वैष्णव सौर दर्शन कारणं

सर्वकारण कारणान्तक कारणात्मक रूपिणम् ॥१६॥

थुजाःगु प्रकारया सारगर्भितगु दर्शन सम्बन्धी चर्चा यानाः ने. सं. ७७० श्रावणशुक्ल प्रतिपदा व्यतिपात योग अश्लेषानक्षत्र शुक्रवारया दिनस थुगु शिलापत्र प्रतिष्ठा यानातल^१ ।

(२) स्वयम्भू महाचैत्यया अग्निकोणपाखे च्वंगु अनन्तपुर मन्दिरया न्ह्योनेसं स्वाना तइतःगु शिलापत्रय् नं वज्रयोगिनीयागु जाद्यमुद्गरस्तोत्र यानाथकल । थुगु स्तोत्रया ववस्सं जुजु कवीन्द्र प्रताप मल्ल व महारानी अनन्त प्रियादेवी सहित जुयाः गोपुच्छ पर्वत स्यंगुस गंथकूट शैली देगः दनाः सरस्वती उग्रतारा एकजटी परमेश्वरीया मूर्ति स्थापना यानाः गजुरी छायाः प्रतिष्ठा यानातःगु खँ न्ह्यथनातल । ने. सं. ७७५ आषाढशुक्ल नवमी शिवयोग चित्रानक्षत्र शुक्रवारया दिनस ।

(३) नेपाल देसय् अनावृष्टि जुयाः तस्सकं हाहाकार जुसेलि उगु अनावृष्टि दोष निवारण याय् कारणय् सुं नं दुहांवने मछ्याःगु स्वयम्भू शान्तिपुरी गुफास प्रताप मल्ल थः हे दुहांवनाः वृष्टि चिन्तामणि नामक स्तोत्र रचना यानाः अन दुने च्वंगु चमत्कार दुगु सफू व पौवाहाः पितहयाः सुवृष्टि यानाः सहकाल यानाविल । थ्व खँ शान्तिपुरी दुने च्वंगु ने सं. ७७८ आषाढकृष्ण चतुर्थी शतभिषा नक्षत्र शोभनयोग वृहस्पतिवार अंकितगु शिलालेखय् वर्णन यानातःगु दु ।

(४) स्वयम्भू महाचैत्यस सुप्रतिष्ठित वैरोचन, अक्षोभ्य, रत्नसंभव, अमिताभ, अमोघसिद्धि थुपि पञ्च तथागतपिनिगु व विद्याधरीदेवी (विजयेश्वरी) प्रति श्रद्धाभक्ति तयाः विष्णुमतीस ताफू दय्काव्यूगु खँ व हे ताफू लिक्कसंतुं च्वंगु शिलापत्रय् उल्लेख यानातःगु दु । थ्व ताफू प्रतिष्ठा जूगु दिन खः ने. सं. ७८३ ज्येष्ठशुक्ल द्वितीया आद्रानक्षत्र गंधयोग वृहस्पतिवार ।

(५) स्वयम्भू महाचैत्य न्ह्योनेसं च्वंगु धर्मधातु मण्डलया द्योनेसं सुवर्ण रचित धर्मधातु मण्डल व उकिइ द्योनेसं धातुयागु कलात्मक वज्र लुं सियाः तस्सकं बांलाक ने. सं. ७८८ आषाढशुक्ल षष्ठी हस्तानक्षत्र शिवयोग आदित्यवारखुनु प्रतिष्ठा याःगु जुल । थ्व हे वज्रया नाप नापं घण्ट नं समर्पण याःगु दु । जुजु प्रताप मल्लं अनेक शास्त्र स्वयाः थुगु धर्मधातु मण्डलय् उपस्थित जुइपि गुलि नं देवदेवतापि दु उपि व्याक्क थुकिइ अंकित यानाव्यूगु खनेदु । थुगु धर्मधातु मण्डलया द्योनेसं 'सत्यं शिवं सुन्दरं' धयातः थें अत्यन्त शोभायमान जुइक सुवर्णमय विशाल वज्र अंकित यानाव्यूगु दु । शायद् थुलि तःग्व गु वज्र नेपाल अधिराज्यय् गनं दइमखु ।

थुगु धर्मधातु मण्डलय् अङ्कित यानातःपि विभिन्न देवदेवतापिनि नां थथे खनेदु—

१) महावैरोचनात्मा मञ्जुघोष (धर्मधातु वागीश्वर)

२) पञ्चतथागत :- वैरोचन, अक्षोभ्य, रत्नसंभव, अमिताभ, अमोघसिद्धि ।

३) पञ्चबोधिसत्व :- समन्तभद्र, वज्रपाणि, रत्नपाणि, पद्मपाणि, विश्वपाणि ।

४) पञ्चतारा :- सीततारा, उग्रतारा, रत्नतारा, भृकुटीतारा, आर्यतारा ।

१- स्वयम्भू महाचैत्यया अमिताभ बुद्धया जःपाखे च्वंगु शिलापत्र ।

- ५) अष्टोष्णीष :- महोष्णीष, सितातपत्र, तेजोष्णीष, जयोष्णीष, विजयोष्णीष, विकिर-
णीङ्गत, महोङ्गत, तेजोङ्गत ।
- ६) षोडशबुद्ध :- वज्रसत्त्व, वज्रराज, वज्रराग, वज्रसाधु, वज्ररत्न, वज्रतेज, वज्रकेतु,
वज्रहास, वज्रधर्म, वज्रतीक्ष्ण, वज्रहेतु, वज्रभास, वज्रकर्म, वज्ररत्न,
वज्रयक्ष, वज्रसन्धि ।
- ७) चतुर्पूजादेवी :- वज्रगन्धा, वज्रधूपा, वज्रपुष्पा, वज्रदीपा ।
- ८) चतुर्द्वारपाल :- वज्रांकूश, वज्रपाश, वज्रस्फोट, वज्रावेश ।
- ९) द्वादशभूमेश्वरी :- अधिमुक्ति, प्रमुदिता, विमला, प्रभाकरी, अर्चिष्मती, सुदुर्जया,
अभिमुखी, दुरङ्गमा, अचला, साधुमती, धर्ममेधा, समन्तप्रभा ।
- १०) द्वादशपारमितादेवी :- रत्नपारमिता, दानपारमिता, शीलपारमिता, क्षान्तिपारमिता, वीर्य-
पारमिता, ध्यानपारमिता, प्रज्ञापारमिता, प्रणिधिपारमिता, उपायपार-
मिता, बलपारमिता, ज्ञानपारमिता, वज्रकर्मपारमिता ।
- ११) द्वादशवशितादेवी :- आयुवशिता, चित्तवशिता, परिष्कारवशिता, कर्मवशिता, उपवृत्तिव-
शिता, ऋद्धिवशिन्ना, अधिमुक्तिवशिता, प्रणिधानवशिता, ज्ञानवशिता,
धर्मवशिता, तथतावशिता, बुद्धबोधिप्रभावशिता ।
- १२) द्वादशधारणी :- वसुमती, रत्नोल्का, उष्णीष, विजया, मारीचि, पर्णशवरी, जाङ्गुली,
अनन्तमुखी, चून्दा, प्रज्ञावर्द्धनी, सर्वकर्मावरणविशोधनी, अक्षयज्ञान-
करण्डा सर्वबुद्धधर्मकोशवती ।
- १३) चतुर्प्रतिसम्बिददेव :- धर्मप्रतिसम्बिद्, अर्थप्रतिसम्बिद्, निरुक्तिप्रतिसम्बिद्, प्रतिभानप्रतिसम्बिद् ।
- १४) चतुर्लास्यादेवी :- वज्रलास्या, वज्रमाल्या, वज्रगीता, वज्रनृत्या ।
- १५) षोडशबोधिसत्त्व :- समन्तभद्र, अक्षयमति, क्षितिगर्भ, गगनगञ्ज, रत्नपाणि, सागरमति,
वज्रगर्भ, अवलोकितेश्वर, महास्थानप्राप्त, चन्द्रप्रभ, जालिनीप्रभ,
अमितप्रभ, प्रतिभानकूट, सर्वशोकतमोनिर्घाटनमति, सर्वनिवरणविष्कम्भि,
यमान्तक, प्रज्ञान्तक, पद्मान्तक, विघ्नान्तक, त्रैलोक्यविजय, वज्र-
ज्वालार्क, हेरूकवज्र, परमाश्रवज्र, उष्णीषचक्रवर्ति, सुम्भराज ।
- १६) दशक्रोधभैरव :- वज्रपुष्पा, वज्रधूपा, वज्रदीपा, वज्रगन्धा, वज्ररूपा, वज्रशब्दा,
वज्ररसा, वज्रस्पर्शा ।
- १७) अष्टपूजादेवी :-
- १८) द्वाविंशतिदेवयोनिगण :- आदित्येय, विश्व, वसव, तुषित, आभाश्वर, असुर, अनिल, महाराजिक,
साध्य, रुद्र, विद्याधर, अप्सरा, यक्ष, राक्षस, गरुड, महोरग, गन्धर्व,
किन्नर, पिशाच, गुह्यक, सिद्ध, भूत ।
- १९) अष्टदिग्पाल :- इन्द्र, यम, वरुण, कुबेर, अग्नि, नैऋत्य, वायु, ईश ।
- २०) ब्रह्मादिदेवता :- ब्रह्मा, विष्णु, महेश्वर, कार्तिकेय, ब्रह्मायणी, रुद्रायणी, वैष्णवी,

कौमारी, इन्द्रायणी, वाराही, चामुण्डा, भृङ्गी, गणपति, महाकाल, नन्दिकेश्वर ।

- २१) नवग्रहदेवता :- सूर्य, चन्द्र, मंगल, बुध, वृहस्पति, शुक्र, शनि, राहु, केतु ।
२२) बलभद्रादि चतुर्देवता :- बलभद्र, जयकर, मधुकर, वसन्त ।
२३) अष्टनागराज :- अनन्त, वासुकि, तक्षक, पद्म, महापद्म, शंखपाल, कुलिक, कर्कोटक ।
२४) अष्टपर्वतदेवता :- वेमचित्र, बलि, प्रल्हाद, वैरोचन, गरुड, द्रुमकिन्नर, पञ्चशिख, सर्वार्थसिद्धिकर ।
२५) अष्टयक्षराज :- पूर्णभद्र, माणिभद्र, धनद, वैश्रवण, चिविकुण्डली, केलिमाली, सुखेन्द्र, चलेन्द्र (हारती) ।
२६) अष्टाविंशति नक्षत्र देवता :- अश्विनी, भरणी, कृत्तिका, रोहिणी, मृगशिरा, आर्द्रा, पुनर्वसु, पुष्या, अश्लेषा, मघा, पूर्वफाल्गुणी, उत्तरफाल्गुणी, हस्ता, चित्रा, स्वाती, विशाखा, अनुराधा, ज्येष्ठा, मूला, पूर्वाषाढा, उत्तराषाढा, श्रवणा, धनिष्ठा, शतभिषा, पूर्वभाद्रपदा, उत्तरभाद्रपदा, रेवती, अभिजित् ।
२७) चतुराकर्षण देवता :- वज्राकुश, वज्रपाश, वज्रस्फोट, वज्रावेश ।

धर्मधातुमण्डल स्तुति —

मञ्जुघोषं महावीरं सर्वमार विनाशकम् ।
सर्वाकार प्रदातारं धर्मधातुं नमाम्यहम् ॥
वागीश्वरं महाबोधि सर्वविघ्न विनाशकम् ।
सर्वज्ञज्ञान दातारं धर्मधातुं नमाम्यहम् ॥
मञ्जुश्रियं महाज्ञानं सर्वविद्याप्रभेश्वरम् ।
सर्वाकार स्वरूपं च वादिराजं नमाम्यहम् ॥

स्वयम्भूस वाद्य सहित तुतः ब्वनेगु गुठी

धर्मराजिक स्वयम्भू महाचैत्य नेपाःमि बौद्धजनपिनि निर्मित श्रद्धाभक्तिया केन्द्र जुयाच्चंगु महान् पुण्यभूमि विशुद्ध तीर्थस्थल खः । थन हे विभिन्न इलय् विभिन्न श्रद्धालु भक्तजनपिसं अनेक पुण्यकीर्ति तयाः जीर्णोद्धार यानाः व पठन पाठन पूजा स्तोत्र व भजन आदि विषय कयाः गुठी चरलप्येगु लागी आयस्ता तयावन । थ्व इतिहासं कनाच्चंगु दु ।

थ्व हे ऊवल्य ने. सं. ७६० सालं कान्तिपुर वँतुटोल स्थित श्रीधर्मचक्र महाविहार (वँतु तःधंवाहाः) या गुणचन्द्र शाक्यजुया अतिकं श्रद्धाचित्त उत्पत्ति जुयाः श्रीस्वयम्भू महाचैत्यप्रति प्रसिद्ध धर्मावतार महिना गुंला जोछि नसंचा इलय् मङ्गल वाद्यया ध्वनिद्वारा स्वयम्भू जंगल कःकः धाय्के निर्मित वाद्यवादन सहित तुतः ब्वनेगु गुठी दोहलप्युगु जुल ।

थ्व वाद्यवादन सहित स्वयम्भूस तुतः ब्वनेनेत पूजा सामग्री व वाद्यवादन निर्मित वाद्य सामग्री थथे उल्लेख याना तइतःगु दु^१—

पूजा सामग्री—चितमिन्द्र (सिन्हः), के (जाकि), स्वान (स्वां), धुन (धुं), जजम (जजंका) पञ्चगन्ध, पञ्चामृत, धूप दीप, धर्मनिश्राव जुछि (निसलाः ब्व छभू) ।

वाद्य सामग्री—धाक ग्वऽ २ (धाः निगः), तवर ग्वछि (तवर छगः), भूकस्यार जुनछि (भुस्याः निजु), बभूरिजुनसि (बभूचा निजु), तारजुछि (ताः छजु), करपिरि (केंपा १) । थुलि वाद्यवादन सहित यासे सुप्रभात इलय् प्रस्थान जुइ माल ।

स्वयम्भूस थ्यंकाः च्वय् च्वयागु पूजा ज्वलं तयाः पूजा यानाःलि तुतः खलकं तुतः ब्वने जुल । गुंला लछियागु कार्यक्रम सिध्यंकाः आमाईखुनु महादीप छ्वय्के । गुंलाधर्म समाप्तिखुनु स्वयम्भूया अग्रस जज्ञ यानाः शान्तिपुरिस वनाः यथा विधि थें पूजा यानाः गुठीहारछिसियां भोजन याय्माल ।

थुगु गुठी चल्य् याय्या निर्मित खुपी बुँ दोहजपा तःगु दु—तोडरयोखा बुँ रोपनी ३, सरयता सिम्रसिबुँ रोपनी ३ समेत ।

जुजु कवीन्द्र प्रताप मल्लया निकोगु शान्तिपुरी प्रवेश

पुण्यभूमि देवभूमि नेपालय् अनेक वही, विहार, मथ, मन्दिर तथा सिद्ध गुहा पाकु यववं दु । थुगु देवदेवालय व गुफा पाकुत मध्यय् थ्व स्यंगुया शान्तिपुर गुहाया थःगु हे विशेषता दु, महत्व दु; गन कि दुने अनेक प्रकारया अलौकिक महिमां जायाच्चंगु विचित्र वर्णन व घटनापाखे सम्पन्न जुयाच्चंगु जुल । थन हे दुने महार्थसिद्ध जुइगु अनेक साधन वस्तुत असंख्य दुर्लभ अप्राप्य पुरातात्विक बहुमूल्य सिद्ध विद्या व तन्त्र वज्रयानया अभ्यन्तरया क्रोध मूर्ति वीर सम्बर डाकडाकिनी एवं देव, यक्ष नाग भुवन आदियागु अक्षरशः सत्यसिद्धि प्रभाव दइच्चंगु थुगु लोकय् दर्शन दुर्लभगु महामेघ सूत्र थे जाःगु सूर्यताम्र कयने मात्रं अनावृष्टि दोष निवारण जुयाः सुवृष्टि जुइगु तन्त्र-मन्त्र धारिणी विद्या दइच्चंगु स्थान । अनेक छया अपस्मारकपिनिगु किचलं दाय् मात्रं भय त्रासं विह्वल याइगु अनेक मार बिघ्नत नं दइच्चंगु थुगु सिद्ध शान्तिपुर गुहायागु थःगु हे इतिहास दु । थुकियागु साधारणतया परिचय 'प्रताप मल्ल शान्तिपुर प्रवेश' नामक परिच्छेदस वर्णन जुइ धुकूगु दु ।

न्हापायागु पटकय् ने. सं. ७८७ सालं जुजु कवीन्द्र प्रताप मल्ल अनावृष्टि दोष निवारणया लागि जल वृष्टि याय्गु महान् सदिच्छा ज्वनाः देस व जनताया लागि तच्चोगु करुणा तयाः शान्तिपुरय् दुहांवनाः निर्विघ्नपूर्वकं कार्यं सफलता प्राप्त यानाः पिहांवःगु जुल । तर थ्व निकोगु शान्तिपुर प्रवेश जूगुया विशेष लोकोपकारया कारण खने मदु, केवल राजाभिमानया मनोवाञ्छानुसारं जक प्रवेश जूगु खनेदु । तःधंगु थासय् दुहांवनेत 'विशेष जनहित सुख जुइगु मखय्कं साधन सम्पन्न मजुइकं वन धाःसा उगु थासं उपकार जुइगुया पलेसा विघ्न जक जुइ यो' धयातः थे जुजु प्रताप मल्ल शान्तिपुरी दुहांवसांनिसे थरथर खासे चिकुल्वचं कयाः मलमूत्र न्हि खैचय् हि जक जुयाः तःधंगुया दोष थे जुयाः ने. सं. ७९४ चैत्रशुदि एकादशीस खुला व न्यान्ह मम्वासे थुगु लोक तोताः परलोक जुयावन^१ ।

१- श्रीगौतमवज्र वज्राचार्यजुया सौजन्यद्वारा प्राप्त ।

महापण्डित जयमुनिजुया स्वयम्भूस स्वयम्भू पुराण व्याख्या

यलदेया अतिकं प्रसिद्धगु महाबुद्ध मन्दिर संस्थापक बौद्धाचार्य अभयराज शाक्यजुया चीधीहा काय् बुद्धजु थ्वया काय्या नं काय् श्रामणेर जयमुनि शाक्यजु खः । थ्वसपोलया पुर्खां दय्कूगु नेपाःदेया अद्वितीय महाबुद्ध मन्दिर विधिवत् प्रतिष्ठा कार्य सम्पन्न जुसेलि थःअबुजु जीवराजयागु आज्ञानुसार महाबुद्ध देगःयागु प्रसाद ज्वनाः सिक्किमया जुजुयाथाय् वन । सिक्किमया जुजुयाथाय् थ्येसैलि वसपोललिसे आवश्यक कुशल वार्ता जुसेलि थःह्यं ज्वनावनागु प्रसाद स्वां-सिन्हः वभुस तयाः चह्लय् याःगु जुल । लिसेलिसें उगु महाबुद्ध देगःयागु सम्पूर्ण इतिहास व उकियागु महत्व एवं अर्थ विशुद्धि खँ वनाबिल । थ्व खँ न्यनाः जुजु अतिकं प्रभावित जुसे 'धन्य धन्य महाबुद्धयागु प्रसाद' धकाः प्रशन्नपूर्वक श्रद्धा निश्चय तयाः ग्रहण यात । अले व गुगु प्रसाद तयाहःगु वभुं छथलसतुं सिक्किमया जुजुं दक्षिणा स्वरूप लुँचुं तयाः भेटी चह्लय् यात । उवलसांनिसें थुगु महाबुद्ध देगःयात साङ्ख्येतोङ्गु (नवसहस्र-बुद्धकाय) धइगु नामं तिब्बत जगतय् प्रचार यानाव्यूगु जुल ।

थ्व सिक्किम जुजु नाप शिष्टाचार भेट सिधसैलि अन नं पटना सहर गयाया महाबोधि मन्दिर दर्शन याःवन । थन नं वाराणसी काशी सहरय् वनाः अन च्वनाः महत्वपूर्ण अनेक बौद्धशास्त्र संग्रह यात, लिसें अनयापि विद्वानतनाप नं आपालं शास्त्रार्थ यानाः विजय प्राप्त यानाः थःगु देसय् लिहावल । उवलसांनिसें वसपोल 'महापण्डित' धइगु नामं प्रसिद्ध जूगु जुल ।

थःगु देसय् आनन्दं लिथ्येसैलि महाबुद्ध देगःया दानपति प्रसिद्ध कलाकार जीवराज महापण्डित जयमुनिपिसं सिक्किमया जुजुं बियाहःगु सुवर्ण दान दक्षिणा थःगु निम्ति उपभोग मयासे महान् निःस्वार्थ

त्याग भाव क्यनाः दूरदर्शी वसपोलपिसं नेपाःया अतिकं प्रसिद्धगु श्रीकरुणामय बुंगद्योयागु रथय् सुवर्णमय तोरण, लुखा, थां व भगि दय्काः ने. सं. ७६४ सालं श्रीशोभावृद्धि यानाः अतिकं कःकः धाय्क द्वहलपाः ६० पी जग्गा समेत तथाः लुसाहा गुठी तयाब्यूगु जुल ।

थुकि यानाः वसपोल महापण्डित जयमुनिजुयागु यशकीर्ति अटल जुजुं वन । थ्व हे लसताय् कवीन्द्र जयप्रताप मल्ल जुजुयागु विजयराज्यस श्रीस्वयम्भू महाचैत्य धर्मधातु वागीश्वर सुप्रतिष्ठित जुयाच्चंगु साह्येगु गिरि पर्वतय् श्रीस्वयम्भू ज्योतिरूप प्रादुर्भाव नेपाल उत्पत्ति जूगु सत्कथा स्वयम्भू पुराण बौद्धइतिहास विषय कयाः सकल सभाषदपिनिगु न्ह्योने व्याख्यान यानाबिज्यात^१ ।

थुगु व्याख्यान परिसमाप्ति यानाबिज्याःगु दिन खः ने. सं. ७६५ चैत्रशुक्ल चतुर्थी हस्तानक्षत्र ध्रुवयोग मंगलवार ।

थ्वसपोल जयमुनिजु महापण्डित जक मखु कलाकार नं खः धइगु प्रमाण यल योतालिबिस च्वंगु भव्य सुन्दर चैत्य दय्केत निर्देशन व लक्षण व्यूहा धकाः नं उल्लेख यानातल^२ ।

यः श्रीजयमुनिर्नाम्ना श्रामण्यः सर्ववित्सुधीः ।
तस्याज्ञयानुभावेन धर्मराजेन सद्विया ।
प्रदत्तं लक्षणं तेन चैत्यस्यास्य समग्रताम् ।

थुजाःगु प्रकारया चैत्यत यल, येँ, खपय् गुलि नं थासय् दय्का तइतःगु दु, उकिइ मध्यय् थःगु हे प्रकारया विशेष लक्षणकथं तस्सकं बांलाक धु व व्या त्वय्क दय्कातःगु मेथाय् मदु धाःसां छुं अप्पो जुइ मखु । दानपति रुद्रवर्णमहाविहारया रत्नसिंह शाक्यजुं आवश्यक खर्च हनाः बांलाक उत्सव यानाः जुजु योगनरेन्द्र विज्याकाः ने. सं. ८०५ अक्षय तृतीयाखनु प्रतिष्ठा यानातःगु जुल । न्हापायागु धर्मधातु चैत्ययात त्वपुयाः महापण्डित जयमुनिजुयागु निर्देशनकथं दुर्गतिपरिशोधन मण्डलाकृति रूपय् लिपा भव्य रूप प्रदान यानातःगु नं धयातल । उकिइसं थुगु चैत्यय् अंकित षोडश बोधिसत्व षोडश पूजा देवीपिनिगु मूर्तिया क्वस्सं क्वस्सं नां नं कियातःगु दु । थुगु चैत्य प्रतिष्ठा यानाः फिनिदै लिपा ने. सं. ८१७ पञ्चाष्टमीया दिनस थ्व हे थासय् दानपति रत्नमुनि शाक्यजुं सम्यक न्याय्कूबलय् यलया जुजु योगनरेन्द्र, येँया जुजु भूपालेन्द्र निहां बिज्याकूगु खँ च्वइतःगु दु । थुगु किसिमं सम्यक न्याय्कूबलय् निहा जुजुपि उत्पत्ति जुल धइगु खँ थौतकयागु सम्यकया इतिहासय् खनेमदुनि ।

खतु थ्व यतालिबि चैत्यया आत्मकथाया दुने नं स्वयम्भू महाचैत्ययागु सम्बन्ध स्वानाच्चंगु दु धकाः स्थानीय बुरापाकातय्सं धयाच्चंगु दु—अनुमानित १२।१३ शदीपाखे थ्व हे रुद्रवर्ण

१- नेपाल राष्ट्रिय संग्रहालयया संग्रहलय् च्वंगु हरिताल भवतय् तामिल लिपि च्वइतःगु स्वयम्भू पुराण ।

२- मेडिभल नेपाल कोलोफोण्ड एण्ड इन्स्क्रिप्शन ।

महाविहारया छह्ण शाक्यजु न्हि न्हि स्वयम्भू महाचैत्य दर्शन यांनाः जक नइह्ण जुयाचवन । थ्वय्कः
शाक्यजुया वृद्धावस्था जुसेलि छन्हु स्वयम्भू महाचैत्यं स्वप्नान्तरय् दर्शन बियाः न्वैवाना विज्यात कि
आवेलि छं थःगु आश्रमय्संतुं जि हे भाःपाः स्वयम्भू धर्मधातु चैत्य दय्काः भक्तिभाव यांनाः च्वै,
तर थनथ्यंक वयाः दुःख सिइ म्वाल धकाः धाःगु स्वप्नदर्शन अनुसारं थुगु स्वयम्भू धर्मधातु चैत्यया
प्रतिनिधिकथं दय्काथकूगु धाइ । लिपा महापण्डित जयमुनिजुयागु निर्देशनकथं दुर्गति परिशोधन
मण्डलाकार रूपय् परिणत जूगु जुल ।

जल वृष्टि निम्ति स्वयम्भूस प्रार्थना गुठी

त्रिकाल बुद्ध्या प्रतिनिधित्व जुयाविज्याःह्य श्रीस्वयम्भू महाचैत्यप्रति गुह्यसिनं श्रद्धाभक्ति तयाः गुंला लच्छियां बाजं वनाः तुतः व्वनेगु गुठी दोहलपा विल उह्य गुणचन्द्र शाक्यजुं अतिकं विचारं खंकाः समस्त नेपाःमितय्गु हितसुख निम्ति सहकाल निम्ति शस्य सम्पत्ति वृद्धि निम्ति कृषि प्रधान नेपाल देस समृद्धि याय्या लागी विशेष करुणा चित्त उत्पत्ति यासे थः जन्मभूमि नेपालय् सदां इलय्-व्यलय् जल वृष्टि जुयाचवनेमा धइगु हेतुं गथे न्हापान्हापा नं अनावृष्टि जूगु समयय् थन हे स्वयम्भू क्षेत्रय् हे चवनाः राजा महाराज नरेन्द्रदेव, गुणकामदेव, लक्ष्मीनरसि, प्रताप मल्ल आदिपिसं जल वृष्टि निम्ति ततःधंगु विधि विधान यानावन उगु हे आदर्शयात लुमंकाः श्रीसाह्येगुं धर्मधातु वागीश्वरयाके लः पवनेगु गुठी वन्देज यानाथकल^१ ।

थ्व गुठी दैय्दसं आषाढशुक्ल द्वितीयाखुनु श्रीस्वयम्भू महाचैत्यया न्ह्योने जलयज्ञ व बलिविधि सम्पन्न यानाः अनावृष्टि, खण्ड वृष्टि, उत्पात वृष्टि, अति वृष्टि मजुसे केवल सदां सुवृष्टि जुयाचवनेमा धइगु श्रद्धा निश्चय व विश्वास तयाः ने. सं. ७६६ स जल वृष्टि प्रार्थना गुठी वन्देज यानाथकल । थुकिया लागी कुनबुँ रोपनी २, भरबु रोपनी १ आयस्ता तयाव्यूगु दु । थ्व हे इलय् गुणचन्द्रजुं स्वयम्भूस वासं चवनाः वसपोल स्वयम्भूयागु हे व्याक्क ११००००० जाप नं यानावंगु खँ न्ह्यथनाथकूगु जुल ।

१- काडमाण्डू वंतु तःधंवाहाःया शिलापत्र ।

स्वयम्भू महाचैत्यया लं ल्हनेगु निम्ति जुजु नृपेन्द्र मल्लया सहायता

कान्तिपुरी महानगरया श्रीयग्लभूमि माछेपात वताछेस च्वंहा चित्रकारी कमलामयी प्रमुखयां धर्म चित्त उत्पत्ति जुयाः श्रीस्वयम्भू महाचैत्ययागु गुण गौरवप्रति श्रद्धाभक्ति तथाः स्यंगुया लं ल्हनेगु ज्या संकल्प जुल । थुगु संकल्प अनुसार स्यंगुया लं दय्केगु थासय् राजभूमि नं लानाच्वंगु जुयाच्वन । थुगु राजभूमि प्राप्ति निम्ति महाराज जयनृपेन्द्र मल्लया हजुरीस बिन्ति यात । थुगु शुभकार्ययागु आशय थुइकाः कमलामयी मैजुयागु प्रार्थनायात राजां उगु जग्गा वीगु प्रशन्न जूगु जुल^१ ।

थुगु जग्गाया चारकिला विषय थथे उल्लेख याना तइतःगु दु—राजकुलया क्षेत्रेन पश्चिम, चन्द्र आचारया क्षेत्रेन उत्तर, कुश्रवंदेया क्षेत्रेन पूर्व, कनूसि किसानिया क्षेत्रेन दक्षिण थुलि जग्गाया दुने लानाच्वंगु ईशानकोण पाखेच्वंगु खसिबाहाबुं छपीजछिया कवीन्द्र मल्ली तका ७५।— कयाः थःगु मनोमान खुशि राजी जुयाः व्यूगु जुल । थुकिया साक्षि पार्थिवेन्द्र मल्ल व महिपतेन्द्र मल्ल जुल । ने. सं. ७६६ आषाढकृष्ण पञ्चमी शुभम्^३ ।

१— हेमराज शाक्ययागु निजी संग्रह तालपत्र तमसूकपाखे ।

स्वयम्भू गजुलिइ वेँ थहांवन

संसारय् मद भ्रष्ट स्मृति भ्रष्ट जूपि व अज्ञानी मुखजनपिसं व याइ मखु थ्व याइ मखु धइगु दइमखु, उकिइसं कर्त्तव्य व अकर्त्तव्य तक नं हसिइ मखु धयातः थेँ स्वयम्भूयागु इतिहासय् थ्व छगू अद्भूतगु घटना खः । स्वयम्भू महाचैत्यया गर्भगृहं च्वय् हर्मिका गयाः हलपति ज्वनाः थहांवनाः त्रयोदश चक्रावली स्वहांने त्वाथः थेँ यानाः चाया रात्रिइ सुनानं मखंक सकलेँ आश्चर्य जुइक छत्रावलीया नं च्वय् थहांवन । अले उष्णीष चूडामणि गजू सुधा कवय्थ्यंक कुतुकेहल । लिस्सें व हे वेँ च्वनिसें कुतुं वयाः थःगु शरीर नं चूर्ण जुयाः सित ।

थ्व घटना ने. सं. ८०० फाल्गुणकृष्णया पञ्चमीखुनु जूगु घटना खः । गुगु उत्पात बिघ्न शान्ति निम्ति गुन्हु लिपा फाल्गुणकृष्ण त्रयोदशीखुनु रात्रिस विधि थेँ शान्ति स्वस्ति याःगु जुल^१ ।

१- मेडिभल नेपाल भाग ३, पृ. ९

राजा पार्थिवेन्द्र मल्लद्वारा स्वयम्भू महाचैत्यया जीर्णोद्धार

कवीन्द्र जयप्रताप मल्लया सुपुत्र राजा पार्थिवेन्द्र मल्लं थःअबुं स्वयम्भू धर्मधातुप्रति गुलि गथे श्रद्धा व्यक्त यानावन, तदनुसार थःह्यं नं उगु पुण्यकार्य विषय ध्यान आकर्षित यानाः अतीत राजापिसं स्वयम्भू सेवा यानावंगु इतिहासयात लुमंकाः स्वयम्भू महाचैत्य जीर्णोद्धार याय्गु विषय आपालं कार्यकारिणी सदस्यत मुंकाः विचार विमर्ष यासे शास्त्रोक्त विधि अनुसार जीर्णोद्धार याय्गु निर्णय जुल^१ ।

तदनुसार क्षमा पूजा, वन जात्रा, सारसिं सालेगु, नगर परिक्रमा याय्गु, यष्टिदारु (यलसिं) दय्केगु ज्या, पाद स्थापना, यष्टिदारु स्थापना, पद संचारण, खः चिइगु, गर्भगृह दनेगु ज्या व फिस्वंगू चक्रावलीया १३ तल्लाया छगू छगू तँ जाय्केया निम्ति विविध स्थानया भक्तजनत वयाः ज्या याना ब्यूवल । नापं रत्नन्यास, जीवन्त्यास, दशकर्म, खंकाः प्रतिष्ठा याःगु बेलाय् लक्षाहूति होम यासे सम्पूर्ण जीर्णोद्धार कार्य ने. सं. ८०२ मार्गकृष्ण प्रतिपदाखुनु निर्विघ्नपूर्वक समारोह सम्पन्न याःगु जुल ।

छगू हर्षया विषय थ्व खः—थुगु स्वयम्भू जीर्णोद्धार निम्ति चा काय्त कुंदलचोया भूमिस कुह्याःतय्सं गाः म्हुयाः चा काःगु गालय् अकस्मात् सुवर्ण घट निगः भाग्यवश लुयावल । थुगु उपलब्ध सुवर्ण घटयात सिन्दुरजात्रा यानाः जुजु पार्थिवेन्द्र व महीपतेन्द्र निह्य फुकिजन हर्षचित्तं लँ स्वसे स्वागत यानाः राजकुलय् दुत यन ।

स्वयम्भू महाचैत्यया अग्र्य राजा भूपालेन्द्र व मांहा ऋद्धिलक्ष्मीं कोट्याहूति महायज्ञ याकूगु

भूपालेन्द्र मल्लयात थःहा अबु सिइ धुंकाः फिप्यन्हु दुखुनु भक्तपुरया राजा सुमति जयजितामित्र वयाः कान्तिपुरया राजसिंहासनय् फेतुइके विल । भूपालेन्द्र मल्ल राजसिंहासनय् च्वंगु व्यलय् वय्कःया उमेर च्यादँ जक वयंगु जुयाच्वन । राजा भूपालेन्द्रया वालक अवस्था जूसा नं बडो उत्साही बुद्धिमानी जुयाच्वंहा राजमाता ऋद्धिलक्ष्मीं राजकाज चल्य् यानाः प्रजा पालन यानाच्वन । बौद्ध, शैव निगू पक्षयात नं उत्तिकं आदर सत्कार यानाच्वंगु खनेदु ।

थ्वय्कः राजमाता ऋद्धिलक्ष्मीं स्वयम्भू महाचैत्यप्रति श्रद्धा भक्ति तयाः स्वयम्भूया अग्रस शास्त्रोक्त विधिपूर्वक बौद्धाचार्यपिनिगु संविधानत्वय् आपालं धन खर्च यानाः विशाल रूप यज्ञ मण्डप दय्काः व देस नरेशप्रति स्वस्ति कल्याण कामना यासे कोट्याहूति महायज्ञ मङ्गलोत्सवपूर्वक ने. सं. ८१७ ज्येष्ठशुक्ल नवमीया दिनस सुसम्पन्न याःगु जुल ।

धयातःगु दु- थुगु कोट्याहूति याय्गु विषयय् आचार्यपिनि विचय् छुं खँय् सन्तोष मजुयाः कचिगल जुइ थें च्वनाः कोट्याहूतिया संचालकपि च्वनाः उगु ल्वापु समाधान याय्या निमित्त स्यंगुया शाक्यभिक्षु शाक्यसिंहजु व सिखंमूवाहाःया राजगुरु वज्राचार्य जयरत्नदेव थुपि निहा निमन्त्रणा यासे अग्निशालास तसे पाठ याकेत जप याकेत तयाविसेलि कोट्याहूति निर्विघ्न साथ सम्पूर्ण कार्य सिद्ध जुल ।

थुगु हे व्यनाय् दानपति महाराज भूपालेन्द्र मल्ल व राजमाता ऋद्धिलक्ष्मीदेवी सहित जुयाः पशुपतिनाथया देगःया निन्हातक नखतं पियाः पुलांगु गजू हिलाः न्हूगु दय्काः देगः जोर्णोद्वार जूगु उपलक्ष्य थन नं कोट्याहूति यज्ञ यानाःलि प्रतिष्ठा यानाव्यूगु जुल ।

१- श्रीजीवगुरुजुया थ्यासफूपाखें ।

स्वयम्भू महाचैत्यया अग्रस जुजु योगनरेन्द्र मल्लद्वारा घण्ट समर्पण

राजर्षि महाराज सिद्धिनरसिंहया छय् श्रीनिवास मल्लया सुपुत्र योगनरेन्द्र मल्लजु खः ।
थ्वय्कः धर्मात्मा व संगीशास्त्रय् निपुण जुयाः नं रति विलास चर्याय् उत्तिकं न्ह्याःह्य नं धाइ । नेपाःया
थःगु मुद्रा इतिहासय् रानीपिनिगु नामं अप्पो मुद्रा छापय् या ह्य नं थ्वय्कः हे खः । थ्वय्कःयागु
निधनय् सुइछ्छह्य मिसात सती वन धकाः उल्लेख यानातल । देस व प्रजा रक्षाया लागी राजायात
सदां आस्था तय्केत वय्कलं यलदेया निम्ति च्यागु मणि व च्यागु आश्चर्य कल्पना यानाथकूगु दु ।
उकिं थ्वय्कःयात कुशल राजनीतिज्ञ धकाः नं धाः ।

गुगु समय येँ, यल व ख्वप देसया जुजुपिनि थःथः परस्परय् विरुद्ध जुयाः अनेक राजनैतिक
चालवाजी जुयाच्चन, गुकि यानाः जुजु जुयाः नं योगनरेन्द्र मल्लं स्वयम्भूप्रति घण्ट चह्लय् याय्गु धर्म
चित्त उत्पत्ति जुयाच्चंसा नं एक्कासि स्वयम्भूइ घण्ट दोहलप्ये मछिगु खनेदु- कारण स्वयम्भू
महाचैत्यया स्थानय् घण्ट तय् न्ह्यो येँया जुजु भूपालेन्द्र मल्लजुयाके सहमति कयाः जक घण्ट दोहलप्युगु
स्पष्ट खँ उल्लेख यानातःगु दु ।

थ्व घण्ट न्हापा कवीन्द्र जयप्रताप मल्ल जुजु दोहलपावंगु स्यनावनाः हानं जुजु योगनरेन्द्र
मल्लं ने. सं. ८२० सालं प्रतिष्ठा यानाथकूगु जुल^१ ।

स्वयम्भू महाचैत्य स्थानय् राजा भाष्कर मल्लं नागसाधन याकूगु

जुजु भाष्कर मल्लया शासनकालय् अचानक जल वृष्टि मजुयाः प्रजागण समस्तया वा पिइमंत धकाः राजाया हजुरीस इनाप याःवन । उगु अनावृष्टि पीडित प्रजागणपिनिगु अनुरोधयात सहर्ष स्वीकार यासे अनावृष्टि दोष निवारण निम्ति उपाय बौद्धाचार्यपिनिगुपाखे नेपाःया प्रसिद्ध धर्मपीठ श्रीस्वयम्भू पर्वस्थानय् परम्परागत जुजुपिसं यानावंगु थे राजा भाष्कर मल्लं थःप्रजापिनिगु उपरय् करुणा तयाः शान्तिपुर, नागपुर आदि स्थानय् साधक तयाः महामेघमण्डल पूजा याका नागसाधन याकल । थुगु साधन कर्मद्वारा देसय् जल वृष्टि जुल । थुगु साधन कर्म ने. सं. ८२३ आषाढ पूर्णिमाखुनु सुसम्पन्न जुल ।

स्वयम्भू महाचैत्य जीर्णोद्धार कार्यय् जुजु भाष्कर मल्लया पूर्ण सहायता

धर्मधातु वागीश्वर श्रीस्वयम्भू महाचैत्य वन जंगलया दत्थुइ लानाच्वंगु जूया निम्ति बारंवार वा वयाः फय् वयाः आपाः थासय् स्यनाः जीर्ण-शीर्ण जुयाच्वंगु अवस्था खनाः राजा भूपालेन्द्र मल्लया सुपुत्र भाष्कर मल्लं गथे न्हापायापि जुजुपिसं श्रद्धापूर्वक स्वयम्भूयागु जीर्णोद्धार यानावन, अथे हे थःह्यं नं भिन्नकथं जीर्णोद्धार याय्गु मतिइ चिन्तना यात ।

शास्त्रानुसार विधिपूर्वक छगू छगू ज्याया कारण विशेषं उत्तिकं श्रद्धा तसे ने. सं. ८३४ ज्येष्ठ-शुक्ल त्रयोदशीया दिनय् राजमाता भुवनलक्ष्मी सहित जुसे बौद्ध आचार्यपिनिगु संविधानत्वय् यलासं थनाः लक्षाहूति यज्ञ यासे प्रतिष्ठा कार्य मङ्गलोत्सव सहित पूर्ण याःगु जुल^१ ।

जुजु भाष्कर मल्लं थुगु स्वयम्भू महाचैत्य जीर्णोद्धार याय्त गुलि गथे विधि विधान यानावन उक्विया विषयय् सविस्तार वर्णन वंशावलीइ च्वइतःगु दु^२ । तर थन ग्रन्थ विस्तार जुइगु भयं संक्षिप्तं जक च्वयागु जुल—

स्वयम्भू चैत्य जीर्णोद्धार निम्ति सर्वप्रथम ने सं. ८३० ज्येष्ठकृष्ण सप्तमीया दिनय् श्रीस्वयम्भू भगवानयाके क्षमा पूजा याःगु जुल । थुगु पूजाया लागी पञ्चोपचार, पञ्चगन्ध, पञ्चामृत, कोखागा, निसलाः आदि सामग्री तसे पूजा याकल । थनंलि शान्तिपुरीइ पञ्चसाली दय्काः मर्यादानुसार समयचक्र, गणचक्र पूजा जुल ।

थ्वयां स्वन्हुखुनु स्वयम्भू चैत्यया जीवन्यास लिक्कायाया यथा विधि थें होम यात । थुगु क्रियाय् मूलाचार्य, उपाध्या व कर्माचार्य स्वह्यं च्वसे ज्या जुल । पाठ जुक्व कर्माचार्यजुं याय् । खासिस

१- श्रीजीवगुरुजुया थ्यासफू ।

२- स्वयम्भू चैत्य प्रस्थापन वर्णन, वीर पुस्तकालय, नं. तृ. २७०

महाबलि तसे बलि विइ । न्याहोसिनं अंपचां पञ्चधारा हाय्के । पूजा छव्य बुयिनाय १ सुयिनाय २ फोसिदो ३ दुवाखा ४ परमभैरव ५ फसखास बलि विइ । परमभैरव थास कर्माचार्य, फसखास मूलाचार्य पूजा याय् । मय्जुदेवयात नं पूजा याय् । सा ह्य २ नं पूजा विइ, निहासित नं लुंया न्यकू वहःया खो सहित यासे सिजःया साहरि २ तुयूगु कापः कु ८, पञ्चवृहि सायात नके । हाथ पूजा याय्, थुलि क्रिया जुसेलि सां देव साय्के जुल । देवपूजायात पुलुपात ५ तुयूकापः थान ५—थुलि सहित यासे यथा विधि थें पूजा याय् धुंकाः व न्यास घः लःल्हानाः लसकुस यासे छेय् दुत यने ।

न्यास पिकाय् बलय् पञ्चविंशति सूत्र कां पिखाद्यो, ताराद्यो, गलतुकि, चकू, योसिँ, फटकिवाता एवं छत्र थ्यंक नं हिनेमाल । थुलि याय् धुंकाः न्यास घः स्थापना याय् । न्यासबलि विइ धुंकाः शान्तिपुरीस पञ्चसाली दय्काः विधि थें पूजा याय् । समयाचक्र, गणचक्र सहित यासे ।

ने. सं. ८३० आषाढशुक्ल तृतीयाखुनु फटकिवाता क्वकाय्गुया स्वहोसिनं विधि थें कलश पूजा याय् । शान्तिपुरीस लयसेवा ज्वलं पूजा समयचक्र, गणचक्र सहित याय् ।

ने. सं. ८३० श्रावणकृष्ण द्वितीयाखुनु रक्तवृष्टि उत्पात जूगुया शान्ति विधि जज्ञ यानाः खासिस पञ्चधारा हाय्काः बलि विइ । सुवर्ण, आत्मबिम्ब, भूमि, गृह— थुलि प्यता दान वियाः शान्तिपुरीस विधि थें पूजा यानाः नं शान्ति जुइ ।

ने सं. ८३१ पौषशुक्ल अष्टमीया दिनय् स्यंगु देवताया यलसिँ वाद्यवादन सहित यासे सालाः ह्य । सासितल नं क्वफाय्पात चा पूजा याय् । मूलाचार्य कलश पूजा, उपाध्यायं बलि विइके, कर्माचार्य पाठ याय् । थुगु क्रियाया निम्ति समस्त सामग्री राजायाके काय् जुल । थुखुनु दिन मदयाः प्यन्हुखुनु सालाहसे त्रयोदशीखुनु यलसिँ स्यंगुस थ्यंकूगु जुल । किल्ला स्वानाया बुधोपदुवथाय् बलि विइ, स्यंगुवदेयाके कयाः स्यंगुवदेन भोजन याके । योसिँ स्यंगु चव्य शान्तिपुरीया थासय् थ्यनेवतुं लसकुस यानाः दुकाय्, आसन तय्, पुरुपात १ द्वाल्याख निपु २ वागेश्वर त.हांफ निगः तसे लँस्वय् परिमान थें । थुगु कार्यय् स्यंगुया वदे व नकिजु प्यह्य च्वनेमाल । गणचक्र पूजा जक स्यंगुया थकालिया छेसं याय् ।

ने. सं. ८३२ कार्तिककृष्ण अमावासीखुनु स्वयम्भूया 'चउकाखत ज्वाला कोकायाया' पूजा सगं धौपा निपा शान्तिपुरीस निपा तयाः कर्मिया हस्त पूजा याय् ।

ने. सं. ८३२ पौषशुक्ल चतुर्थीखुनु 'गरतुकि पियाया' पूजा सगं धौपा निपा बलि भेगपा स्वपा सहित यासे मूलाचार्य उपाध्याय कर्माचार्य व स्यंगुया थकालि च्वनाः ज्या याय्माल ।

'योसिँ स्वाय्थास' गाःम्हुइत कोकिचा निपु लुं नं भुनेमाल । थुगु पूजा निम्ति भेगपा स्वपा खःग्वय्गु योसिँ ग्वलय् पूजा यानाः स्वाय् । पूजास स्यंगुमि ह्य २ हाथ पूजा याय् । शुभसाइत ब्यलाय् गर्भगृह प्वाथ पिइ । सालमि नायक प्रमुख दक्क सालमिया हाथ पूजा याय् । योसिँ लःल्हाना विइ योसिँ थःथःथाय् स्वाचके जुल । थुलि याय् धुंसेलि सगं धौपा २ थापिजु १ तयाः विधि थें शान्तिपुरीस गणचक्र पूजा याय् ।

ने. सं. ८३२ पौषकृष्ण पञ्चमीखुनु 'योसिँ अग्निपुरया थासं सालाहयाः स्यंगुया गर्भस तय्' । थुक्किया लागी पूजा सगं धौपा २ थापिजु १ बलिपात ३ तसे मूलाचार्य उपाध्या कर्माचार्य सहित जुयाः पूजा याय्माल । शान्तिपुरीस सगं धौपा २ थापिजु तसे गणचक्र याय् । थ्वयांलि स्वन्हु दय्काः शान्तिपुरीस 'शान्तिपूजा' यानाः फसखास सगं धौपा २ बलिपा ३ थापि १ तसे पूजा याय् । मुख्य देवताया न्होने कर्माचार्यजु 'पञ्चरक्षापाठ स्वय्' जुल । थ्वयां लिपा स्वन्हु दय्काः योसिँदेवया प्वाथय् ध्वदुइकाया यथा विधि थे कलश पूजा याय् । सालमिया हाथ पूजा यानाः योसिँ ल्हने । गुरुजु ह्य ३ तयाः योसिया 'फोना ध्यने' जुल । थुखुनुया लागी कलश पूजा बलिपात १ ख्ये छगः १ गुरुजु ह्य ३ लायकुलिइ वनाः पूजाभः कयाः ह्य । गुरुजु ह्य २ कर्माचार्य १ ह्यसिनं मूल देवताया सन्मुख्य पञ्चरक्षा पाठ याय् । फोना ध्यनाथाय् बलिपात १ विइमाल । सिंस पञ्चोपचार पूजा याय् । पञ्चगव्य पञ्च मृत तयाः सिमागुखि यने । सिमा दुकाय्, कूशहस्तकं ४७१ अंगुरि ४ थुलि प्रमाणं तय्माल । पुरुषा १ कापः कु १० च्चकासं पुइ । वोस्य व कर्मिया हाथ पूजा याय् । पा हं हर्खिसं लुं भुनाः पूजा याय् । थुगु उपलक्ष्य कुह्यप्याखं, दैत्यप्याखं आदि दक्क प्याखं सहित यासे अनेक वाद्यवादन थाकाः ह्यसिक्वनिसे स्यंगु मथ्यंतले लावालस्कर सहित यासे राजा भाण्कर मल्ल विज्यानाः लँ स्वयाह गु जुल ।

ने. सं. ८३१ आषाढकृष्ण अष्टमीखुनु जुजुयागु चकुरि ज्या आरम्भ यानाया कलश पूजा बलिपात ७ स्यंगुस, फसखा, दुवाखा, सुयिनाय, बुयिनाय, फोसिदो थ्वते थास बलिपात ५ विइ । थुगु व्यल्य् खेज ५ सहाय् धाला तयाः पञ्चोपचार पूजा छ्वय् । स्यंगुइ पञ्चगन्ध, पञ्चामृत दय्काः पूजा याय् । थनंलि कर्मिया हाथ पूजा याय् । शुभमुहूर्तय् सिँधाकय् चकुरि ज्याचके गणचक्र सहितं कर्मियात विश्वकर्मा स्वरूपं पूजा याय् । थनंलि चकुलि ज्या याय्त सगं धौपति २ बलिपात १ खेज १ सहित यासे मूलाचार्य पूजा याकाः उपाध्या उष्णीष विजय पाठ याय् । कर्मिया ज्याभः व हस्तं पूजा याय् । सिँधाकय् व्यल्य् सिँज्या याका तय्, लखुस बलि वाके छ्वय्माल । स्यंगुदेवय त पञ्चामृत सहित पूजा यानाः कलश पूजा याय् ।

ने. सं. ८३१ आश्विनकृष्ण सप्तमीखुनु दक्षिण दिशापाखें वःबुइँचा अधिक दाःवःगुलि थुगु दैय् छति वा मगाक जुल । थुगु उपद्रव शान्तिया लागी राजा भाण्कर मल्लं स्यंगुइ शान्तिबलि विइकल, मूलस यज्ञकर्म यानाः ब्राह्मणयात सा दान, मूलाचार्ययात चन्द्रबिम्ब, सूर्यबिम्ब, आत्मबिम्ब दान बिल । पञ्चरक्षा २१ धाः पाठ याकल । खासिस बलि व मय्जुदेव (हारिती) स छाहाय्काः पूजा जुल । फसखा, सुयिनाय, बुयिनाय, दुवाखा, फोसिदो, परमभैरव थुलि स्थानय् पूजा छ्वय् । बलिगालं वरुणकोर आदि नवनाग ताडन तसे परिकर्म पूजा याय् । नागसमाधिस च्वने । कर्माचार्यद्वारा महामेघ बलि स्थापन याके । थुगु रूपं बुँगस, वज्रयोगिनीस पूजा याःवने । शान्तिपुरीस पञ्चसाली दय्कं पूजा याय्, समयचक्र, गणचक्र सहित याय् । लायकुलिइ कलश लल्ल्हाके छ्वय् जुल । थुगु दिननिसे देसय् सकभनं जल वृष्टि जुयाः आनन्द वा पिइदत । तर लिपा पिनागु जुयाः थुगु दैय् वा स्याचु मजू ।

ने. सं. ८३२ पौषकृष्ण चतुर्दशीखुनु न्हापाया जीर्णगु पुलांगु योसिँ लिक्काः अग्नि संस्कार यासे

पूजा यज्ञ याय् । कलश ग्वः १ सगं धौपा २ तथाः दुर्गति परिशोधन समाधि दनाः विधि थे पूजा याय्
 धुंकाः पुलांगु योसिँस स्वां छपवः तसे भावना याय्; धूप, निराञ्जन, वञ्चताःचा व मत फँनं त्वय् ।
 स्नान पञ्चसालीयागु न्यातां तय्, अभिषेक बिइ, नियमानुसार पूजा दृष्टि स्वां लुँपले वहःपले दुकि
 सकतां तय् । पञ्चग्रास व १ व निसरा तय्, सौबँस तय् । कापः थान १ दुखापिखां तिइ, पुरुपा १
 कोचिकं बुइके, पञ्चरत्न तय्, कँय्ख्वला १ तय् । म्हुतु पुयाः भावना याय् । होतारनु १ राजनु १
 खातानु १ पतिगापु १ देवं छपुं फाय्के । च्याहःपले व पञ्चवर्ण छत्र ५ तय् । बेला जुइवंतुं सिँताप्वाः
 च्याकाः यज्ञस च्याकातय्, सिँ मफूतले संस्कार याय् मज्यू । थुगु कार्यय् स्यंगुमि गुरुजु ३ कर्माचार्य
 च्वनाः दुर्गति परिशोधन पाठ याय् । नापं स्यंगुमि निह्वा उपासं तय् । थापि २ पञ्चसाली जु १ अंपचा
 समेत ऊवःलाक व्वय् । श्रीखण्ड, रक्तचन्दन, नँस्वाक चिकं सिँ उनासाथ तय् । मण्डल थिले । पूर्ण
 दक्षिणा आच्छुस पञ्चसाली काय् । पञ्चसिर मम्वाल अंपचां तय्, बलि भेगपा १ शेषाहूति गणचक्रस
 सहाय् यक्व दु थय् मज्यू । अन यक्व नय्गु वस्तु लितहय् मदु । थुलि यानाःलि प्यन्हुखुनु भस्म
 नदीप्रवाह याय् । पञ्चगव्य पञ्चामृत तसे नौ फुक्क मुंकाः चैत्य दय्के, पञ्चोपचार पूजा याय्, धौ-व्व
 छाया, बलिपा १ बिइ । ॐ आकाशगर्भे हूँ धकाः धयाःलि किगः तने जुल । थुलि प्रक्रिया धुंकाः चैत्य
 दय्काःलि कोपोचाग्वः ५ थुकिइ पञ्चरत्न लुँपले वहःपले तसे पूजा याय् । किसली ग्वः ५ दक्षिणा
 दँ १० तथाः पूजा याय् धुंकाः पञ्चतीर्थ— १. गोकर्ण, २. शंखमूल, ३. विजयेश्वरी, ४. लखुतीर्थ,
 ५. नेखुहो । नौ व्याक्क मुंकाः विजयेश्वरी व्वस्सं चुइकाछ्वय्माल ।

थनंलि योसिँ थनेयात गुरुजु ह्य ३ स्यंगुबदेजु ह्य १ थुलिसिनं फक्व जप यानाः शान्तिपुरीस
 लयसिवा ज्वलं तथाः समयाचक्र सहित पूजा यानाः परमेश्वरयाके वर पवने जुल ।

ने. सं. ८३२ माघशुक्ल पञ्चमीखुनु योसिँ थनेयात विधि थे समस्त क्रिया याय् धुंकाः
 सुयिनाय, बुयिनाय, फोसिदो, दुवाखा पूजा छ्वय्, अथे हे पवनभैरव व फसखास समेत । स्वयम्भू
 चैत्यया गर्भय् शुभसाइतय् लाकाः रत्नन्यास प्रमाण थे पूजा याय् । दुने रत्न, लुँपले, वहःपले, लुँ
 याकावलय् पञ्चबुद्धया वाहन स्वरूपं सिंह, किसि, सल, ह्यय्खा, गरुड व्वय्, बृहि व धातु समस्त योसिँ
 दिकेगु ब्रह्मशिरस त्वहं तथाः आचार्य कलश पूजादि क्रिया धुनेवंतुं रत्नन्यास याय् । थुलि सिधसेलि
 योसिँ थनेयात जज्ञ यानाःलि योसिँ सालाकाय् जुल । थुगु दिनय् योसिँ मदंगुलि थने मफयाच्चन ।
 थुगु आश्रय घटना जूगु खँ राजायाके न्यन, राजां आज्ञा जुल—योसिँ मदंगुया छु उपाय याय् ?
 छिमिसं याय्माक्व कर्म क्रिया याय् सिधय्के धुंकल । अथे नं राजाया आज्ञा थे क्रिया माक्व यानाः
 बुयिनाय अय्कृ चाकलय् कलश ताहांफ नागपो श्रीलक्ष्मी, जक्षजक्षणी थ्वते सकतां न्यासघलया थासय्
 तथाः शान्तिपुरीस लयसेवा ज्वलं सहित यासे पूजा यानाःलि सहाय् व भोजन समेत जुल । थुखुनुया
 रात्रिस पञ्चधारा हाय्काः महाबलि बिल । गुरुजु व न्हिसिवा खलः दक्कसिनं सद्धर्म पुण्डरीक नाम
 ग्रन्थ पाठ याःगु जुल । थुखुनु पञ्चताल वाद्य सहित कुहार प्याखं, दैत्य प्याखं, राजा प्याखं आदि
 लोक नृत्य उपस्थित याकाः राजमाता भुवनलक्ष्मी, राजा भाण्कर मल्ल प्रमुखं समस्त दर्शकपि
 स्वयाच्वंगु व्यलय् उगु योसिँ प्यकः तक साल नं मदनाः सकल लोकजन हथाय् चायाः गुरुजुपिके इनाप

यात- थुगु व्यल्य गुरुजु स्वह्मसिनं फसखा, शान्तिपुरीस विधिपूर्वक पूजा याताः गुरुजुपिसं हानं बांलाक ववात्तुक श्रद्धाभक्ति तयाः एकचित्तं जप ध्यान याताः जगदीश्वर श्रीस्वयम्भूयाके वर पवन, थुखुनु छुं हे म्वाकं आनन्दपूर्वक योसिं तःस्वाके फत । थ्वयां सतिखुनु द्वादशी शुक्रवारया दिनय् योसिं तःस्वाकूगुया उपलक्षय् क्रियाकर्म जज्ञ प्रतिष्ठा दशकर्म आहूति एवं त्रिमण्डल परिक्रमा याताः चरुजा थुयाः सहस्त्राहूति व्यूगु जुल । बुयिनाय, सुयिनाय, फोसिदो, दुवाखा, परमभैरव थुलि स्थानय् यथा विधि थे पूजा छवल । फसखास जक जुजु विज्यानाः थिहाय्का (संकल्प) याताः पञ्चधारा हाय्काः व महाबलि व्यूगु जुल । योसिं थनाथाय् ध्वज पताः छायाः न्हापां हःपाः व्यूहसिगु अनंलि सालमियागु अले जुजुयागु ३२ कु दइच्चंगु पताः छायाः योमधि, ग्वःमधि, चाकुमधि लुइगु ज्या जुल । थुगु कार्य पूर्ण जूगुया उपलक्षय् जुजुयात पूर्ण कलश व राजमातायात श्रोलक्ष्मी यक्षयक्षणी लःल्हाना विल । इनाप अयकृ लिता शान्तिपुरीस कुमारी पूजा यात । थुगु योसिं थनेगु ज्याय् जुजु व गुरुजुपि ३ कर्म व्यापारी स्यंगुबदे व सालमि थुलि मिलय् जुयाः स्वयम्भू महाचैत्यप्रति श्रद्धाभक्ति तयाः स्थिर वाक्य व्वनाः शुभसंकल्प याःगु जुल । थुगु उपलक्षय् समयचक्र, गणचक्र सहित सम्पन्न जुल ।

थनंलि प्यन्हु लिपा गलसिं स्वानाया कलश पूजा सगं धौपा २ बलिपा ३ पाठ पञ्चरक्षा पुस्तक; मूलाचार्य, उपाध्या, कर्माचार्य, स्वह्मसिनं अप्पा न्यापा लायाः चा भ्वारा न्याग्वारा तयाः, लुँपले, वहःपले, पञ्चरत्नपो न्यापो, पालाहा, कुसूम, स्वतंतिर, प्रियंगु, केसरी थुलि घलचाय् तय्— शुभघडोस लाकाः पूजा याय्, निगः स्वने । गलस दथुस प्यकुनस स्वने, कर्मियात हाथ पूजा यासे जुजु अतःपा लःल्हाय् । कर्मियात वस्त्र बेतालि बिइ । थनं दुनेयागु क्रिया सकतां जुजुं याके बिइमाल जुल । थुलि निगः स्वनाया विधिपूर्वक याय् धुंकाः शान्तिपुरीस सगं धौपा २ थार्पि १ तयाः मर्यादानुसार समय व गणचक्र सहित पूजा याय्माल ।

थनंलि न्यान्हु लिपा स्वयम्भू चैत्यया गर्भ (प्वाथ) स निगः स्वनेया विधि— कलश पूजा, बलिपात ३ स्यंगुदेवया प्वाथ पियाथाय् दथुनिसें प्यकुनेसं निगः स्वने जुल । सिजःघःचा न्यागः लुँपले वहःपले पञ्चरत्न पालाहा आदि फुक्क तयाः निगः स्वनाया विधिकथं पूजा याताः स्थिर वाक्य राजां याकाः गर्भगृह दय्केगु ज्या जुल । शान्तिपुरीस लयसिवा ज्वलं दय्काः पूजा याय् समयचक्र, गणचक्र सहित यासे ।

योसिं तःस्वाकूखुनु न्यासघल तयातइगु थाय् होसपास मदय्क सँय्त दुहांवन, थुक्किया दण्ड स्वरूप खुमोह दां कयाः शान्ति यानाविल ।

लक्ष चैत्यव्रत दंके निम्ति स्यंगु वन्देजु ७ हा अहोरात्रि उपासन तयाः लुचिद्यः थाकाः धर्म दंका निराहार नं तयाः सतिखुनु न्हापां जज्ञ कर्म याताः विधि थे लुचिद्यः पूजा याताः अर्घ वियाः धोव्व छायाः पञ्चगव्य वितरण जुल ।

थनंलि शिष्याधिरासन लोहाग्नि रक्षा धुंकाः न्यासघलस प्रमाण थे पूजा याताः देवताहूति वियाः बलि वियाः चाकः पूजा, पूर्णाहूति, शेषाहूति यासे विसर्जन जुल । थुलि धुंकाः न्यासघलस गुरुजु

ह्य ३ दुहांवनाः व न्यासबलि विइ । थुलि धुंकाः हानं कलश, सगं, मत तथाः आत्मबिम्ब, सूर्यबिम्ब दान याय्, बलिपात ६ थापना यानाः हानं पूजा यानाःलि दान विइ । बलि बियाः बलिस पञ्चधारा हाय्के । विसर्जन यानाः बलि छ्वय्, थुलि कर्म धुंकाः, पञ्चसाली दय्काः शान्तिपुरी पूजा, कुमारी पूजा याय् धुंकाः समयचक्र, गणचक्र याय् जुल ।

ने. सं. ८३२ माघकृष्ण दशमीया दिनय् स्वयम्भू चैत्यया गलतुकियात निगः स्वनाः कलश, सगं, मत, पञ्चगव्य, पात्र, सिजःघःचाः नोस्वनाया प्रमाण थे अतःपा ५ न्याको, चा ग्वारा ५ विधि थे पूजा यानाः कर्मिया हाथ पूजा यासे शुभबेलासं गलतुकिया निगः स्वना दथुस प्यकुनसं नोस्वनाया पूजा याय् । न्हापा थे पूजा विधि उत्थे जुल । थुलि याय् सिधय्काः बलिपाः ३ बियाः पूजा यानाः विसर्जन यानाः बलि छ्वय् । अनंलि शान्तिपुरस विधि थे पूजा याय् ।

थनंलि दनाह्यगु प्रमाण- योसिं दिके थासंनिसें च्वय् बुइगलतक एवरीतं योसिंनिसें वशिदेवया पाचि गःपतय् प्वाः तय्माल, क्वपुइ मज्यू जुल ।

ने. सं. ८३२ फाल्गुणकृष्ण द्वादशीखुनु न्हापां कोथुचकुरि तथाः वँतुबाहाःयापिनिगु नापं किला जज्ञ यानाः मूलाचार्य उपाध्या कर्माचार्य विधि थे वलश पूजा अग्नि आहूति देवपूजा याय् धुंकाःलि चकुलि लँस्वसे हयाः प्रमाण थे पूजा लोहाग्नि रक्षा यासे पूजा याय् धुंकाः कर्मिया हाथ पूजा यासे भिगु बेलाय् थां दिके प्वालय् पूजा याय् लुँपले वहःपले पञ्चरत्नजु २४ थां २४ ग्वः पूजा यानाःलि शुभमुहूर्तय् थां स्वाय् । चकुरिसिं क्वथुगुलि तय् थामय् विधि थे पूजा याय् । दृष्टि चिलाहात निरांजन लोहाग्नि रक्षा प्रत्येक स्तम्भ पतिकं माल, जज्ञ देवताहूति विइ थां ग्वः पतिकं फुककय्सं पूजा भाव याय् जुल । स्तम्भ थापन स्वयाः याय्माल । थन दुकि छाय् । स्थिर वाक्य परलपे । निनाः, चुकुसिंइ पूजा याय् थ्वते धुंकाः बलिपात १ विइ चाकःपूजा वने, मण्डल थिले, किगः तने, आशीर्वाद विइ, सगुन तने, चित्त पूजा, दक्षिणा विइ, सिन्हलं तिके, विसर्जन याय् । न्हापां बुयिनाय, सुयिनाय, फोसिदो, दुवाखा, परमभैरव फसखा थुलिथासय् पूजा छ्वय्माल । थनंलि शान्तिपुरीस लयसिवा ज्वलं पूजा विधि थे याय् धुंकाः समयचक्र नं याय् । थुलि परिकर्म नं चकुलि देछाक्क पतिकं उपरोक्त विधि थे कर्म खंकेमाल ।

(१) थनंलि बैशाखकृष्ण तृतीयाखुनु मदुछेया ताम्रकारपिनिगु सहयोगद्वारा चकुलि तथाया पूजा कलश, मत, पञ्चगव्य, पात्र, बलिपात १ तसे क्रिया जुल । चकुलि दिकागु प्वालय् पूजा याय् सकतां क्रिया पूर्ववत् जुल । शुभयोगय् लाकाः थां स्वाय् । थां निनाः, चकुलिसिंइ पूजा याय् । विधि व्याक्क उत्थे लोहाग्नि रक्षा पञ्चामृत, पञ्चगव्य, पञ्चगन्ध, दुदुकि छाय्, वलंगसिमा स्वांमाः दृष्टि चिलाहातसे थिहाले बलि विइ स्वांन तने परिचर्या सकतां न्हापा थे तुं याय्माल । थ्वते समस्त क्रिया धुंकाः पीठादि पूजा याय्, मण्डल थिले, किगः तने, शताक्षर परलपे, आशीर्वाद, सगुन तने, चित्त पूजा विसर्जन यासे बलि छ्वय् । थनंलि शान्तिपुरीस लयसिवा ज्वलनं पूजा यानाः चक्र भोजन याय् जुल ।

(२) बैशाखकृष्ण प्रतिपदाखुनु भेलाछेया मोस्वकपिनिगुपाखे राहुचकुलि तथाया कलश पूजा

ज्वलं बलिपा १ न्हापायाः थें लुपले, वहःपले, पञ्चरत्न, दृष्टि तयाः विधि कर्म उत्थे जुल । नापं शान्तिपुरीसं विधि खंके माल ।

(३) बैशाखशुक्ल चतुर्दशीखुनु नःघःयापिनिगुद्वारा चकुलि तया जुल, विधि विधान न्हापा थें तुं याय् ।

(४) बैशाख पूर्णिमाया दिनय् सिख्वंमुगुयापिनिगुपाखें चकुलि त.गु जुल, पूजा विधि साविक संतुं जुल ।

(५) चैत्रकृष्ण सप्तमीखुनु स्वयम्भूया चौकासिं थल वनाया कार्यक्रम—गुरुजु ह्य ३ मूलाचार्य, उपाध्या, कर्माचार्य व स्थवीर, स्यंगुवदे, बोस्य, कर्म थुलि उपासं चवनाः चौकासिं काय्त मञ्जुश्री पर्वस्थानया लिउनेच्वंगु काय्माल । मञ्जुश्री पर्वस्थान गमन यांना वनेत आचार्य स्वांजपाव सकल बोस्यतय्त शिरस छुनाः रक्षा याय्, थुपि बोस्यजननाप वन प्रस्थान जूपि सकसिनं मंगलाष्टक गाथा परलपा वने, उगु वृक्षमूलय् थ्यनेवंतुं पूजा कलश, सगुन, मत, पात्र, बलिपात ५ तय् । पञ्चरक्षा अन्तर्गत महामायूरी अध्याय छगू पटल पाठ याय् । विश्वकर्मा देवता आराधना यांनाः पूजा याय् नापं क्वथय्गु सिमायात नं । दश दिगया क्रिमा सिमा क्रमशः पूजा याय् नापं बलि नं विइ । पीठादि पूजा मण्डल थिले, किगः तने, विसर्जन सगुन तने, चित्त पूजा—थुलि क्रिया जुइ धुंकाः लिपा उगु मूलगु सिमाया क्वस्सं छचाःख्यरं चाकःमत छ्वय्कां तय् । भोजन याय् । थ्वयां सतिखुनु कलश, सगुन, मत, विश्वकर्मा, सिमा क्रिदिगसं च्वंगु पूजा याय् । बोस्ययात व विश्वकर्मा पूजा निमित्त विधि थें पूजा धुनेवं बेलाबखत जुइवं लुं भुनातःगु पा पूजा यांनाःलि बोस्यजनयात हाथ पूजा यासे लःल्हाना बिइ, ठीक साहने लाकाः चौकासिमा क्वथय्के जुल । सिमा क्वथय्थाय् पुरुपात १ लाय्, पलिगा पु १ देवन १ तय् सिमा ध्यने धुनेवं ध्यनागु खोंतस पञ्चगन्ध पञ्चामृतं इले, हागुलि खोंतस कापतं भुने । थुलि क्रिया सिधय्काः चौकासिं छिइ, हानं विधि थें पूजा याय्, बलिपा ५ तयाः विधि थें याय् । पीठादि पूजा याय्, मण्डल थिले, स्वान तने, किगः तने, विसर्जन, चित्त पूजा, दक्षिणा विइ आछुस छाया, विसर्जन चौकासिं कापतं भुने, पुलुं भुना तय् नापं गणचक्र कर्म खंकेमाल । थ्वयां सतिखुनु चौकासिं क्वबुयाः हयाः स्यंगुइ थतयनाः लँ स्वसे दुकाय्—लँस्वय् ज्वलं द्वाल्याख तिप्वाः च्याकाः स्यंगुया नकितय्सं लसकुस यासे दुकाय्, चौकासिं दिक्थाय् पुलुपात १ लायाः बिइ, सकसिनं नमस्कार याय्माल ।

(६) बैशाखकृष्ण द्वितीयाखुनु ओंवाहाःयापिनिगु श्रद्धाद्वारा चकुलि तयाया पूजा विधि सकतां न्हापा थें तुं याय्माल ।

(७) बैशाखकृष्ण तृतीयाखुनु इतुंवाहाःयापिनिगु मनोवाच्छान चकुलि छायाया पूजाकर्म साविक बमोजिम याय् ।

(८) बैशाखकृष्ण पञ्चमीखुनु लगंयापिनिगु सदिच्छानुसार चकुलि छायाया पूजा विधि उथे तुं याय् ।

(६) वैशाखकृष्ण षष्ठीया दिनय् असंया दातापिनिगुपाखे चकुलि चह्य यांनाया पूजाकर्म न्हापा थे तुं जुल ।

(१०) वैशाखकृष्ण सप्तमीया दिनय् वंगःयापिनिगु सहयोगद्वारा प्राप्त चकुलि तयाया पूजा विधि साबिक थे तुं ।

(११) वैशाखकृष्ण अष्टमीखुनु वँतुवाहाःपिनिगुपाखे दोहलप्युगु चकुलि तयाया पूजा कर्म न्हापा थे तुं याय् ।

(१२) फिछ्तँगु चकुलि तया दिनसं तुं स्यंगुयापिनिगुपाखे फिनिँगु चकुलि तयाया पूजा विधि पूर्ववत् जुल ।

(१३) वैशाखकृष्ण नवमी प्रदशमीया दिनय् राजा भाष्कर मल्लयागु पाखे दय्केव्यूगु चकुलि प्रीति यांनाया पूजा विधि जज्ञ कर्म माक्व यांनाः जुजु बिज्याकाः चकुलि शुभ संकल्प याकाः स्थिर वाक्य परलपा पूजा कर्म सकतां याय् धुंकाःलि शान्तिपुरीस विधि थे पूजा याय् जुल ।

वैशाखकृष्ण त्रयोदशी प्रचतुर्दशीखुनु अम्बसाहा तयाया जमलगन्थोपिनिगुपाखे पूजा कलश, सगुन, मत, पञ्चगव्य, पात्र तसे विधि याय् धुंकाः च्वकाय् पलेग्वः दिगपति पूजा याय् लुपले वहःपले पञ्चरत्न आदि सामग्री सहित याय् । थुगु अम्बसाहाल षोदश शून्यताया प्रमाणं फिखुगः तयागु जुल ।

ज्येष्ठकृष्ण नवमीखुनु चतुष्कोणया स्तम्भ ग्वः ४ कु ७ तमागु थां ग्वः ४ दुने बखुं थां ग्वः ४ खः जालत ३ थुलि तयाया कलश पूजा याय् पूर्वत् विधि अनुसारं च्वय् पूजा याय्, लुपले वहःपले पञ्चरत्न आदि सामग्री सहित यांनाः पूजा याय्माल ।

श्वते चुकासिं तय्, न्यान्हु न्ह्यवः फकिवाता क्वत यनेयात फकिवातास मूलय् पञ्चपचार पूजा पञ्चामृत, पञ्चगन्ध सहित यासे पूजा याय् । शान्तिपुरीस पूर्व विधि अनुसार जुल । श्व फकिवाता क्वकाय्गु ज्याय् माक्व विधियात खर्च लगंयापिनिगुपाखे हनाव्यूगु जुल ।

ज्येष्ठशुक्ल द्वादशीखुनु चुकासिं ज्यांनाया पूजा बलिपात १ विइ ।

ज्येष्ठकृष्ण पञ्चमीखुनु स्वयम्भू चैत्यया च्वका छायाः फकिवाता स्थापना यांनाया विधि कर्म जज्ञ यासे दिगपूजा छ्वय्, फसखा, परमभैरवयाथाय् विधि थे पूजा याय्माल । थुगु क्रियाय् योसिस रत्नन्यास याय्गु विधि अनुसार लुपले, वहःपले, पञ्चरत्न, अष्टधातु, सप्तवृहि श्वते तयाः पूजा याय् । लुपले, वहःपले, भुजापत्रसं बीजाक्षर च्वयाः पोचिना तय् । न्ह्यथुखुनु व सतिखुनु शुभमुहूर्तय् लाक फकिवाता जुजुं व्यापारियात लःल्हाय् ठीक साइतय् लाकाः स्थापना याय् । थनंलि चुकासिं दिकागु वसुसिस रत्नन्यास याय् अले चुकासिं व फकिवातासं विधिपूर्वक पूजा याय् ।

एवंकर्म स्वयम्भू महाचैत्यया भूगर्भनिसें गर्भगृह, गलतुकि, हलपति, विलंपति, त्रयोदश चक्रावली तथा अम्बसा, चुकासिं, फकिवाता आदि क्रमशः विधिवत् क्रिया सम्पूर्ण जूगु शुभउपलक्षय् पुनः जात कर्मनिसें प्रतिष्ठाया विधि अनुसार दशकर्म सकतां यांनालि चरुजा थुयाः अनंलि

चुकासिंनिते पञ्चसूत्रकां कयंकाः जाप यासे राजा रानीं स्थिर वाक्यद्वारा अधिष्ठान यानाःलि अंपचां पञ्चधारा हायकाः महाबलि वियाः यथा विधि थे पूजा याय् । थ्वते सम्पूर्ण क्रिया पूर्ण याय् धुँसेलि स्वयम्भू महाचैत्यस सगं तयाः जुजुयात कलश सगुन थ्वया द्योने नैक्याः खः १ तसे लःल्हाय्, माजु (राजमाता) यात श्रीलक्ष्मी लःल्हाय् । इनाप, अयक्तृ नितान् शान्तिपुरीसं लयसिवा ज्वलनं पूजा याय्, समयाचक्र, गणचक्र सहित याय् जुल ।

ज्येष्ठकृष्ण चतुर्दशीखुनु वँतुवाहाःयापिनिगु सहयोगद्वारा स्वयम्भू चैत्यया पूर्वपाखेच्वंगु हलंपौ तयाया विधि कलश, सगुन, मत, पञ्चगव्य, पात्र, बलिपा १ तसे पूजा याःगु जुल । पूजा याय् सिधसेलि हलंपौ दिकागु सिंस लुँपले, वहःपले, पञ्चरत्न तसे पूजा याय् नापं चाकःपूजा, मण्डल थिले, किगः तने, शताक्षर, आशीर्वाद, सगुन तने, चित्त (चैत्य) पूजा, दक्षिणा विइ, बलि छ्वय् । शान्तिपुर यथा विधि थे पूजा याय् ।

ज्येष्ठकृष्ण द्वादशीखुनु लगं व ओंवाहाःया निखलःसिनं मिलय् जुयाः पश्चिमपाखेच्वंगु हलंपौ तःगु जुल, थुकिया क्रिया कर्म पूर्ववत् जुल ।

थुखुनु हे केल व अरखुवहीया किसानी निखलःसिनं सहमति जुयाः दक्षिणपाखेच्वंगु हलंपौ तयाः विधि थे पूजा याःगु जुल ।

ज्येष्ठकृष्ण अमावासीखुनु सिख्वंमुगु व मदु एवं रूपछेँयापि समेतं मिलय् जुयाः उत्तरपाखेच्वंगु हलंपौ तःगु जुल, विधि उत्थे ।

श्रीस्वयम्भू महाचैत्यया चक्रावलीया च्वय्च्वंगु फकिवाता स्थापना याय् निर्मित उच्च ध्वज विमान (सुशोभितखः) स तयाः शोभायमान जुइक नाना गीत वाद्य नृत्य सहित यासे महोत्सव मंगल यानाः राजप्रासादय् द्रुतयनाः राजां स्वागत सत्कार पूजा भाव याय् धुँसेलि नगर परिक्रमा याकाः असंख्य लावालस्करं लिचक्राः गिरिवर स्वयम्भू पर्वस्थानय् थतयनाः लसकुस यासे स्वयम्भू महाचैत्य त्रिप्रदक्षिण याकाः त्रयोदश चक्रावलीया द्योने यथायोग्य प्रमाणं सुरक्षित् यानातःगु जुल ।

थुलि क्रिया कर्म विधि विधान सम्पन्न जुसेलि क्रमशः बलिखा थात, लिंवि फुल्डर, नैमाचाकः नैमागजू तयाः चूडामणि जक मतसे ज्या बाकि याना तया ।

ने. सं. ८३२ ज्येष्ठकृष्ण त्रयोदशीखुनु राजा व राजमातां स्वयम्भू चैत्यया चतुर्दिगय् तइपि पिखाद्यः दय्के बिइया लागी कलश पूजा यासे सिथ शोधन पूजा यानाः मूर्तिकारयात लःल्हाना ब्यूगु जुल । ने. सं. ८३३ बैशाखशुक्ल दशमीखुनु धातुया पञ्चबुद्ध मूर्ति निर्माण याय् सिथं दय्कातःगु साय पूजा निर्मित कलश पूजा, साय पूजा व भूमि शोधन पूजा समेत याःगु जुल । मूर्तिकारया हस्त पूजा यानाः शुभवेलाय् साय लःल्हानाबिसे शुभमुहूर्तसंतुं अग्निपाक यात । भेग्वः बलिपात ५ तयाः विधिवत् बलि पूजा, चाकः पूजा, मण्डल थिले, किगः तने, आशीर्वाद, सगुन, चैत्य पूजा, दक्षिणा थ्वते सम्पूर्ण क्रिया कर्मया कर्ता महाराजं याःगु जुल ।

ने. सं. ८३३ आषाढशुक्ल प्रतिपदाखुनु^१ श्रीस्यंगुदेव (अक्षोभ्य, रत्नसंभव, अमिताभ, अमोघसिद्धि) प्यह्यं थनाः दय्काः देवलोक सकले^१ बिज्याकाः देस चाहुइकाः जात्रा यानाः स्वकंबुस चर्छि विश्राम याकाः सतिखुनु स्यंगुद्यः स्यंगु बिज्याकाः जात्रा यानाः देवलोक सकले^१ ल्यूल् यू तय्काः थ्वया नं सतिखुनु स्वयम्भू महाचैत्यस थःथः थासय् बिज्याकल । जुजु व जुजुया मांहा निह्यसिनं थुगु मूर्ति दय्के बियाः हिलाव्यूगु जुल ।

१- मेडिभल नेपाल भाग ४, पृ. ३५०

स्वयम्भूया पञ्चबुद्ध निमन्त्रणा - प्रार्थी जुजु भाष्कर मल्ल

महाराज भाष्कर मल्लं थुख्य पाखे बौद्धधर्मया जगदीश्वर श्रीस्वयम्भू महाचैत्य जीर्णोद्धार याय्गु विषय तत्पर जुयाच्चन, उख्य पाखे नं शैवधर्मया जगदीश्वर महादेवप्रति श्रद्धाभक्ति तसे थःगु लाय्कूया लिक छगः देगः दय्के ब्यूगु जुयाच्चन ।

थुगु महादेवया मन्दिर प्रतिष्ठा कार्य सुवर्ण कलश ध्वजावरोहण जुइगु उपलक्ष विषय कयाः महाराज भाष्कर मल्लं थथे आज्ञा जूगु दु—थुगु मन्दिर प्रतिष्ठा याइखुनु स्वयम्भू महाचैत्यया पञ्चबुद्ध (वैरोचन, अक्षोभ्य, रत्नसंभव, अमिताभ, अमोघसिद्धि) न्याह्यं क्वहांविज्याकेमाल । तदनुसार राजाज्ञा शिरोपर यासे देवल प्रतिष्ठा जुइगु प्यन्हु न्ह्यवः विधिपूर्वक नीतंपूजा (निमन्त्रणा) छ्वयाहल । उगु निमन्त्रणा सहर्ष स्वीकार यासे नियमानुसार स्वयम्भू पञ्चबुद्ध लाय्कुलिइ विज्याकल । पूजादि सत्कार जुल ।

नीतंपूजाया सामग्री थथे उल्लेख यानातःगु दु—

(१)	पूजानिम्ति ग्वःगु ग्वय्	१०
(२)	दक्षिणा भाष्कर मल्ली तका	१
(३)	ध्यवा	४
(४)	निसलाः ब्व	१
(५)	किसली	१
(६)	पञ्चामृत ज्वलं	१

स्वयम्भू महाचैत्य जीर्णोद्धार कार्यस महादेव, गणपति, कुमार एवं विष्णुया उपस्थिति

धर्मधातु वागीश्वर स्वयम्भू महाचैत्य प्राकृतिक तथा मानवीय प्रकोपद्वारा आपालं थायथास्य जीर्ण-शीर्ण जुयाच्चंगु सिङ्काः सँदेया पण्डित साधक गुणीजनया चूडामणि निर्मलकीर्ति युक्त धर्मावितार वज्रआयुरीशमणि (दोर्जेछेवाङ्ग नोबु) लामाजु विज्यानाः पूर्णतयाः जीर्णोद्धार याय्गु महान् शुभसंकल्प याःगु जुल ।

गुगु निर्माणया महायोगियागु चलन अनुसारं जुजु जयप्रकाश मल्लया पर्याय ने. सं. ८७१ सालया शुभमुहूर्तय् स्वयम्भू महाचैत्य जीर्णोद्धार कार्य शुभारम्भ यानाच्चंगु बेलाय् अकस्मात् महादेव, गणपति, कुमार भेषधारी जुयाः सद्दे थःगु रूप क्यनाः स्वयम्भू महाचैत्ययात अति श्रद्धाभक्ति तयावन, थ्वया लिस्सें विष्णु ब्राह्मणया रूप कयाः स्वयम्भू जीर्णोद्धार निर्मित यलसिं थुजाःगु लक्षण प्रमाणं संयुक्तगु काय्माल धकाः वचन वियावन ।

थथे धकाः सप्ताक्षरी कूटाक्षर शिर्षचिन्ह अंकितगु स्वयम्भूया दक्कसिबय् तःग्वःगु शिलापत्रय् निम्नलिखित वाक्य अंकित याना तइतःगु दु^१—

(१३) सुदिनकुन्हू धर्मयाज्या आरम्भयाडा बेरस
महादेव, गणपति, कुमार थ्वपनि णिह्मसेन
थवरूप शदच केडाओ श्रीतथागतया स्थानरत्न
यात अति भक्ति सर्धा... ..

(१५) वृष्णु ब्राह्मणया रूपकायाओ महाचैत्यया माफिक
यओसि थथे चोङ्गुलि काओधक वचन विर,
तओधङ्ग देवतापनिसेन भाला काओया निर्मितिनं
सिद्धयिओगु रक्षन खडाओ... ..

१- स्वयम्भूया बहिफलय् च्वंगु तःग्वःगु शिलापत्र, ऊवः ल्याः १३, १५

स्वयम्भू जंगल आरक्षा निम्ति जुजु जयप्रकाश मल्लया सन्देश

रत्न सरोजय् उत्पन्न जुयाच्चंगु ज्योतिरूप श्रीस्वयम्भू महाचैत्य विराजमान जुयाच्चंगुलि गिरिवर साह्येगु^१ पर्वस्थानया श्रीशोभावृद्धि जुयाच्चन । थुगु वन जंगलया महिमा अपार जुयाच्चन । सत्ययुगंनिसे^२ स्वनामधन्य जुयाच्चंगु प्यंगू युगय् प्यंगू हे नामं सिद्ध जुयाच्चंगु, प्रागैतिहासिक कालंनिसे^३ प्रशंसा यानावइच्चंगु, सम्पूर्ण वन जंगलया स्वयाः नं महत्वपूर्ण जुयाच्चंगु स्वामिगु^४ नामं प्रसिद्ध जुयाच्चंगु थुगु स्वयम्भू पर्वस्थानया विषय कयाः थथे प्रशंसा यानातःगु दु^५ —

युगे सत्ये पद्मगिरिः त्रेतायां वज्रकूटकः
गोशृङ्ग द्वापरेख्यातः कलौ गोपुच्छपर्वतः ॥
नानारत्नमयैः स्वस्ति नानाधातुभिः संयुतः
नाना गुणैः समायुक्तः त्रैलोकेऽपि सुदुर्लभः ॥
वैजयन्त सहशी स्यात्, सोऽयं गोपुच्छपर्वतः
मञ्जुश्रीय प्रभावाच्च मेरोरधिक गौरवः ॥
त्रिसाहस्रेमहालोके नेपाल साहसं नहि
श्रीस्वयम्भूरुपन्नाच्च सर्वत्र गौरवं महत् ॥

थुजाःगु महत्वपूर्णगु अति प्रसिद्धगु स्वयम्भू वन जंगल आरक्षा निम्ति बांलाक विवेक दृष्टि खंकाः राजा जयप्रकाश मल्लं उचित सन्मान व कदर यानाः ताम्रपत्रय् थथे उल्लेख याना तइतःगु दु^६ —

१- बृहत्स्वयम्भू पुराण, पृ. ८ व ४०३

२- मेडिभल नेपाल, भाग ४, पृ. ३०४

राजोपाध्याय, परमान (भारदार) उमराओ, भोटयोगी, देशान्तरी, महाविद्याधर पञ्च सकले मुंकाः थथे निर्णय यातातःगु दु—‘आवंनलि सुनानं अन्याय अकृति यायेमदु, थुगु स्वयम्भू चैत्यया गलस सिद्धकानं छ्यानाकाये कचाथला काये मदु थुगु सिमागरस वईच्चनीपि साधुसन्त श्रमण ब्राह्मण अतिथियात दुःख विये मदु नापं वनचर— सा, ध्वं, माक, सर्प आदियात प्राणहरण याये मदु, खेल वनखण्डस गनँ मिँ तये मदु । यदि सुनां गुह्यसें थ्व खँयात अनास्थायात उल्लंघना यात धासा उह्ये सित पंचमहापातक लाई नापं मोह ३२ राजदण्ड भागी जुयू ।’ थुगु स्वयम्भूया सिमागः नापं बारांबुगः, गोकर्णगः चंगुगः, वज्रयोगिनीगःयागु समेत नां न्ह्यथनातःगु दु ।

थुगु न्यागू वन जंगल आरक्षाया विषय कयाः ने. सं. ८७२ आषाढशुक्ल प्रतिपदा संक्रान्ति बुधवारया दिनय् ताम्रपत्र तानाब्यूगु जुल ।

स्वयम्भू महाचैत्यप्रति जुजु जयप्रकाश मल्लया कविता पाठ

जयप्रकाश मल्ल काठमाण्डूया अन्तिम मल्ल राजा खः । थ्वय्कः छ्हा भयानक परिस्थितिइ काठमाण्डूया राजगद्दीइ च्वनेमाल । स्वंगु सहरया जुजुपि थःथः कलहपूर्ण उत्कर्ष अवस्थाय् थ्यनाच्वंगु ई । उख्य पश्चिमपाखे गोरखाया जुजु पृथ्वीनारायण शाहया दलत उपत्यका विजय याय्गु लक्ष्य दय्काः नुवाकोटपाखे वढय् जुयावयाच्वन । उकिइसं घर मामिला व कर्मचारीपिनिगु जाल्केलं यानाः जीवनभरी उख्ये थुख्ये युद्ध यायां वितय् याय् माल । परन्तु थुलि जुयाः नं दृढ प्रतिज्ञा एवं पराक्रमी जुयाच्वंहा जयप्रकाश मल्लं २५ दै तक विरोधीतय्गु विचय् शासन चलय् याय्गु अनौठो खः । ध्रुवतारा सरह अटल जुयाः थःगु लक्ष्यपाखे विचलित जुयाः च्वनेफुगु वीरयागु हे लक्षण खः । थ्वय्कलं आखिर गोलि नयाः नं गौरवयात मतोतुसे आपतकालय् हरवरय् मजुसे वीरगति प्राप्त यानावन ।

थुजाःगु राजनैतिक चालवाजिया कारणं जयप्रकाश मल्ल जुजुं धार्मिक, सांस्कृतिक, कलाया उत्थानय् उस्त सेवा याय्गु पूर्ण अवकाश प्राप्त याय् मफुत, अथे नं आपतकालय् सुधीर धयातः थेः आपत-विपतकालय् जगत सहाय परमेश्वरपिके श्रद्धा निश्चय वढय् जुइगु थ्व स्वाभाविक विषय खः ।

उकि जुजु जयप्रकाश मल्ल छ्हा आपालं देवभक्त खः धइगु थ्वय्कःयागु मुद्रा इतिहासं प्रमाणित याःगु खनेदु । धाय् कि गथे—लिच्छवी वृषदेव राजां बुद्धभक्ति याःसा मानदेव राजां विष्णुया सेवा यात, अथे हे शिवदेव, अंशुवर्मा जयदेवपिसं पशुपति अनुस्मरण यानाच्वंसा थुख्ये महेन्द्र मल्लं वज्र अकित यानाः इन्द्र वज्रधर आदियात लुमंकाच्वनी; एवरूपं श्रीनिवास, योगनरेन्द्रपिसं लोकनाथ करुणामय भजय् या ना, राज्यप्रकाशं हरसिद्धि आराधना यानाच्वनी । थथे हे शाह जुजुपिसं गोरखनाथ पशुपतिनाथयात स्मरण यानाच्वंगु खनेदयाच्वनी, परन्तु जयप्रकाश मल्लं तलेजुमाजु, कुमारीमाजु, गुह्येश्वरी, करुणामययात भजन यानाच्वंगु खनेदु ।

नेपाःया बौद्ध दृष्टिकोणं त्रिरत्न (बुद्ध, धर्म, संघ) या रूपय् सानय् याना वइच्चंगु मुख्य स्यान्
 खः—बुद्ध—आदिबुद्ध स्वयम्भू महाचैत्य, धर्म—नैरात्मा गुह्येश्वरीदेवी, संघ—आर्यावनोक्तेश्वर करुणामय
 (मत्स्येन्द्रनाथ) थुपि स्वह्य ईश्वरपि मध्यय् बुद्ध छह्य वाहेक धर्म व संघयात श्रद्धा भक्ति तथाः थःगु
 धेवाय् गुह्येश्वरी व करुणामययागु नां अङ्कित यानाविल । उकिं त्रिशरण शिक्षाकथं विचार याय्वलय्
 बुद्ध बिना धर्म व संघया जक नामोच्चारण यानां मगाःगु जूया निम्ति दूरदर्शी राजा जयप्रकाश मल्लं
 त्रिशरण शिक्षापदय् मिलय् याय्गु कथं आदिबुद्ध स्वयम्भूया नामं 'लंखन समुदर पेरलानं जलथल' धइगु
 नेपाल भाषां छगू पद्य रचना यानाः स्वयम्भू चैत्यया सेवा याःगु जुयाच्चन । उगु पद्य रचना थथे^१—

राग जयश्रो । प्रता ।

लंखन समुदर परेलानं जलथल रत्नया पत्य २ जाफल
 मणिमूत अयधार भगवान याहुने उद्धार । १ ।
 हेलजुक्वया हल परह्यनागया केसर मुन विदोलया
 मारचोत थन इश्वर । २ । मंजुश्रीरि बिज्याक जलछोन
 ओतुजुल भूमिजुल नेपार विदिगन लोक ओल । ३ ।
 गौरदेशन ओर धाल प्रचण्डदेव राजा जुल श्रीगुरु नाल
 शान्तकर नामजुल । ४ । भगवान तोकपुल पंचपुली
 दयकल । धाल चैत्यविहार स्वकह्यया पापमोचन । ५ ।
 भगवान नमस्कार ल्हाकह्य जयप्रकाश नेपाल मण्डल
 स्वयानं अती सुन्दर । ६ ।

१— थुगु रचना इकुवाहाःया दाफामफुतिइ दु ।

स्वयम्भू महाचैत्यया गुणानुस्मरण्य जुजु रणजीत मल्लया पद्य रचना

स्वपया कलापूर्ण न्येन्यापाः ऊयाः दइच्वंगु भव्य रूप लायकू व प्रसिद्ध न्यातपौ देगःया संस्थापक कलाप्रेमी राजा भूपतीन्द्र मल्लया सुपुत्र भक्तपुरया अन्तिम मल्ल राजा रणजीत मल्ल खः । श्वय्कः वडो उदार, स्वाभिमानो एवं चलाखी नं जू, गुह्यसिनं आर्थिक स्तर अभिवृद्धिया कारणं लहासा देसय् तक नं वर्षौनि लखौं दां चलय् यानाविल, थुकिया पलेसा संयत्सें वहः वियाहयाचवनी । रणजीत मल्लयागु दां सँदेसय् 'नागताङ्ग' या नामं प्रसिद्ध जू ।

धयातःगु दु—पृथ्वीनारायण शाहं येँ व यल थःगु अधीनय् तय् धुंकाः येँया जुजु जयप्रकाश व यलया जुजु तेजनरसिंह पृथ्वीनारायण शाहद्वारा पराजित जुइ धुँसेलि रणजीत मल्लया शरणय् वय्माल । आखिर पृथ्वीनारायण शाहया अधीनय् चवनेगु अतिच्छा जुयाः स्वाभिमानो रणजीत मल्ल आजीवनया लागी काशी प्रस्थान जुल ।

श्वय्कः रणजीत मल्ल थःगु राज्यकाल ने. सं. ८४२-८२ तक राज्य चलय् यानाच्चवलय् छन्हु पञ्चबुद्धात्मक स्वयम्भू भगवानयाप्रति श्रद्धा भक्ति उत्पन्न जुयाः 'श्रीस्वयम्भूया नामकास्य कामना याओ न्हों' धइगु नेपाल भाषां मे चिनावन' । थुगु स्वयम्भूया नामकास्य धइगु सिन्हाज्याया लचय् हालेगु मे चिनाः थः प्रजागणपित थथे सम्बोधन यानाः आज्ञा प्रशन्न जूगु दु—'श्रीस्वयम्भू नामकास्य कामना याओ न्हों' नेपाल प्रतिष्ठाता स्वयम्भू भगवान अनुस्मरण यासे सकलयात भितुनेगु शुभ संकल्प याय् सय्कि । मनुष्य जीवनय् सर्वप्रथम थथे शुभ प्रतिज्ञा स्वस्ति कल्याण जुइगु मतिइ चिन्तना याय्, अले आलस्य व भीरुतायात तोताः देशोन्नतिया निम्ति कर्तव्यशील जुइमाल धइगु विषय कयाः थथे धाःगु दु—'सालविस्य कुलज्यास भिनक ज्या सओ न्हों' प्राणिपिनिगु जीवनय् अन्न वइ प्राणिणा प्राणः धयातः थे' अन्न विना प्राणिपिनिगु प्राण रहे जुइ मखुगुलि अन्न पिइगु थाय् गुगु जग्गा खः उगु बुज्या

यायत् न्हापां निता वस्तु आवश्यक जू वइ, व खः लः व साः; अले व हे लः व साः या लागी भिन्नकथं
व्यवस्था याय् सय्केमाः, गथे कीगु जीवनय् अन्न व वासः परमावश्यक जू । 'न्हियान्हिथं लुमनाकाओ
वापिज्या याहुने' सदा सर्वदा वसपोल आदिबुद्ध स्वयम्भू धर्मधातु चैत्ययात स्मरण यानाः अन्न बीजारोपन
कार्य वा पिइज्या (सिन्हाज्या) याय् माल धइगु सन्देश खः । वा पिइज्या यायत् स्वयम्भू महाचैत्य छाया
लुमंकेगु धइगु विषय प्रश्न जुइकु । धयातःगु दुः—गुवल्य् तक गोशृङ्ग पर्वतय् बिज्याःह्य श्रीस्वयम्भू
महाचैत्ययात यथा आदर सम्पन्नपूर्वक पठन पाठ पूजा भक्तिभाव जुयाच्चैतल्य् थुगु नेपाल देसय् सदां
सुभिक्ष जुयाच्चनी, देस नरेश सकलया स्वस्ति कल्याण जुयाच्चनी, यदि विपरीत स्वयम्भूप्रति अनादर
जुल धाःसा देसय् नं विपरीत परिस्थिति जुयावइ । थुजाःगु धर्मशास्त्रया वचनयात सावधान तयाः
दूरदर्शी रणजीत मल्लं धयातःगु जुइ । उकि हे नेपालय् अनावृष्टि शान्त याय् धकाः बिज्यानाच्चैह्य
वृष्टिदेव श्रीकरुणामययागु रथया चव्य् स्वयम्भू बिज्याकातःगु जुइमाः । आकाश, जल, तेज, पृथ्वी,
वायुया अधिष्ठातृ देव पञ्चबुद्ध न्याहां छह्य जुयाच्चैह्य स्वयम्भू महाचैत्ययात लुमंकाः चिकुलां चिकुया
निभाल्य् च्वनाः निभाः पानाच्चनिइपि मस्तय्सं छुं जुयाः निभाः मत्वलकि स्वयम्भूप्रति श्रद्धा तयाः
थथे छगू उद्गार व्यक्त याय् धुंकिइ—

थन धासा मतो २ हुँकन धासा तोतो

त्वेला मत्वेला स्यंगुद्योया पालि निपा भागि ।

थुगु लोकगीत सूद्यो सःतेगु आह्वान मन्त्रं स्वयम्भूयागु प्रभावप्रति गुलि तक सत्य व प्रत्यक्ष दु
धइगु भाःपाः विश्वासपूर्वक मस्तय्सं छगू पाःखं पाःलाक हाले धुंकी । थुगु मे निभाः त्वय्केगु मन्त्र थे
प्राकृतिक वश्य तय्गु शस्त्र थे सम्फ्य यानाच्चनी । यदि थुगु किसिमं नारा लगय् यानाः नं निभाः
त्वया मबिल धाःसा श्रीस्वयम्भू भगवानया चरणकमल भागि याय् धकाः प्रकृतियात धम्कि बिइ धुंकी ।
थुगु प्रार्थना यांनागु पुण्यं जमित याकनं शीत दुःख शान्त यानाः सुखी जीवन याना व्युधइगु अभिलाषा
अभिव्यक्त यानाच्चनी । तदनुसार, जुजु रणजीत मल्लं स्वयम्भू अनुस्मरण यांनागु प्रभावं वा पिइज्या
सफल जुइमा धइगु शुभेच्छा प्रकट याःगु खनेदु । 'ख्यालमते लोकपनि वापिज्या याओ न्हां' असार
महिनाया वखत सिन्हाज्या वा पिइज्या याइवल्य् अप्पो मनूत ख्याः यानाच्चनिइगु जुयाच्चन । थथे ज्या
स्वयाः नं अप्पो ख्याः जुइवल्य् ज्या यक्वं लिकुनाच्चनिइगुलि अधिक हास्य विलास्य धइगु कार्योन्नतिया
लागी वाधा जूया निमित्त लोकजनपिसं ख्याः त्वःताः लच्छिया ज्यां दच्छिया नय्गु सामो भरय् याय्माःगु
जूया निमित्त वा पिइज्या कोशिश या धयातःगु खः । 'सतिक वापियेमते तापाके मते न्हां'—वा
पिइज्याय् अप्पो कोशिश जा याइ, तर ज्या यांनागु चोपो मंत धाय् व याक्वं व्यर्थ जुइ योगुलि पुनः
सावधान वियाच्चंगु जुन । सतिक नं पिइमते, तापाक नं पिइमते, थिक्क रूपं तापाः सती मिलय्
यानाः मध्यमं पिइसय्कि, नापं वा पिइमाः धकाः वातुवा नं पिइमते, वाताहां ऊवाताहां दनाः बिलम्ब
आपाः यानाः नं पिइमते । मतलव थ्व खः कि बीणायागु तार छ्वासु क्वातु बराबर मिलय् यानाः

थाय्सय्केमाः धयातः थे' मध्यम मार्ग अनुशरण याय्माः धाःगु खः । 'पिनाव वा बुयके नयानं जन्महने धरम थथ्य पिय स्ववन्हां'—अन्तय् रणजीत मल्लं धयादिल, थःह्यं च्वयागु मेया सारांश रूप कयाः वा पिनाः वा सय्काः गुगु सःगु वा लयाः थपिसं नयाः आनन्द जीवन हने । तर मनुष्यपित नयगु त्वनेगु व पुनेगु ऐश आराम जक दय्वं मनुष्य जीवन सफल जुल धाय् फइमखु, परन्तु असार संसारय् सारगु वा पिना थे' धर्म नं पिइ सय्केगु मानवमात्रया परम कर्तव्य जू वइ ।

थुजाःगु प्रकारं भावपूर्णगु सारगु मे स्वयम्भू चैत्यया नामं च्यात्वाः श्लोक नेपाल भाषां सिन्हाज्याया लचय् रचना प्रस्तुत यानादिल । गुगु रचना कव्य न्ह्यथनाकथं—

श्रीस्वयम्भू नामकास्य कामुना याओन्हां ।ध्रु।
 उनकपुरीया उननाम श्रीवैलोचन आदिबुद्ध धका सिया न्हं ।
 सिंहया ह्यसदिस्य चित्तलपा मन दयकु थ्व संसार साल न्हं ।
 सालबिस्य कुलज्यास भिन्नकज्या सओन्हां ।१।
 गगनवरन अक्षोभ्यमुरुति निर्मल शरीर भूनृपति ।
 अतिनबल थुओ तिगुलिदन्त दुह्य कुबुस्यतल थ्व संसार न्हं ।
 न्हियान्हिथं लुमनकाओ वापिज्या याहुने ।२।
 सुवर्णसमतुल्य रत्नसंभवमुनि भुमिस भलसा दयकु न्हं ।
 अतिनह्मिने सओ तुरगया ह्ययाचोस लोकया चारिद्रनि स्वयन्हं ।
 ख्यालमते लोकपनि वापिज्या याओन्हां ।३।
 अरुणवरन अमिताभ मुरुति जोगस जुगांजुग वनन्हं ।
 ताहाकबलकास्य वापिकपनि स्वस्य मयुरयाह्ययाचोस विज्याकन्हं ।
 सतिक वापियमते तापाके मते न्हं ।४।
 कोमलनयन अमोघसिद्धिमुनि लोकस अभयमुरुति न्हं ।
 बलिखा समयस वसयावाहन नागलंसिस्य वातुंगाक न्हं ।
 बिलंभमते लोकपनि एकचित्त याओन्हां ।५।
 लसिकल भउपनि स्ववस्वव मनबोल पुवाम्हुति जोने मनमदु न्हं ।
 धरमतोलताओ भालतछे छेसे मिखानं जितुं जितुं स्वक न्हं ।
 सरममदु मईपनि खनाओ ग्याना न्हं ।६।
 थ्व जुगस अजुगति स्वओस्वव मईपनि सपलस कापत दुथना न्हं ।
 छित्तबिया लनमुल तुकमुल स्वसुकि सिधलस तुक मुल डामुकी ।
 अथ्यमते मईपनि मन लिकाओ न्हं ।७।
 ल्हाकह्य श्रीरणजितमल्ल खओमखु स्ववजन निदान धरमन सालन्हं ।
 पिनाव वा बुयके जरम हन्य धरम थथ्य पिय स्वव न्हं ।
 श्रीस्वयम्भूनाम कास्य कामना याओन्हां ।८।

स्वयम्भूप्रति जुजु पृथ्वीनारायण शाहया आस्था

एकता प्रेमी दूरदर्शी जुजु श्री ५ पृथ्वीनारायण शाहजुं थःगु अर्थस्थिति मजबूत याय्गु विषय कयाः सँदेस कुतिया सम्पन्नपि लामात ल्हातय् कयाः न्हापालाक लुँया दरभाउ निश्चित यात ! छुं समय लिपा कुतिया आधिकारिक लामातय् धर्मवाचा याकेबिल । पृथ्वीनारायण शाहजुं दां छ्वय् धुंकाः पूर्वं शर्त अनुसार लामाजुपिसं लुँ छ्वयाह्यगु यानाः निखलःसिनं परस्परय् मिलय् चलय् जुयाः खुशिराजि जुयाः सन्धिपत्र धर्मपत्र च्वःगु जुल ।

थुगु धर्मपत्रय् 'लुँया दरभाउलय् घटि बढी जुल अथवा लुँया दां इलय्-ब्यलय् मथ्यन अनियमित जुल परस्परय् कर्तव्य पालन मजुल धाःसा श्रीबौद्ध श्रीस्वयम्भू महाचैत्य स्यंकागु पाप लाय्मा । यदि थुगु धर्मपत्र अनुसार निखलःसियां नियम पालन जुयाच्वन धाःसा श्रीकामिनी (छास्कामिनी अजिमा ?), श्रीभैरबी, श्रीलामाजु (गुरुरिम्पोछे), श्रीसिम्बुछेव (स्वयम्भू महाचैत्य) श्रीबौध (बौद्धनाथ खास्ति चीवाहाः) यागु सुदृष्टि लाय्माल' धयातःगु दु ।

थुगु शर्त पालन याय्गुलिइ सहि याःपि आधिकारिक लामाजुपिनिगु नां थथे खः-

- (१) श्रीरिङजिछिबो लामा
- (२) श्रीछो आंपोजोर घेवा
- (३) श्रीनुबु घेवा
- (४) श्रीफुन्जो राय्तेन्
- (५) सीछिटुंडो
- (६) सीवाङ्ज्यू

वि. सं. १८१२ पौष १४ रोज ६ स थुगु धर्मपत्र च्वःगु दिन जुल^३ ।

थुगु धर्मपत्रं थ्व हे आशयं क्यंगु दु- स्वयम्भूप्रति श्रद्धाभक्ति आस्था प्रतिष्ठा काठमाण्डू

१- श्री ५ पृथ्वीनारायण शाहको उपदेश व्याख्या, पृ. ९५६

उपत्यकाया दुने जक मखु परन्तु गोरखाया जुजु श्रीपृथ्वीनारायण शाहयात नं उत्तिकं श्रद्धां प्रेरित जुयाच्चंगु दु धइगु स्पष्ट यानाब्यूगु दु, लिस्से सँदेस कुतिया लब्ध प्रतिष्ठ विद्वान् लामाजुपित नं ।

बौद्ध इतिहास स्वयम्भू पुराणकथं बिचाः यायबल्य नेपाःयागु इतिहास, धर्म, संस्कृति ब कला आदिया प्रमुख स्थल सिद्ध जूवः । थुलि जक मखु ३३ कोटि देवदेवताया प्रादुर्भाव नं ज्योतिरूप आदिबुद्ध श्रीस्वयम्भू महाचैत्यपाखे जूगु धइगु स्पष्ट रूपं आशय वयना तइतःगु खनेदु । उकिं थुगु थासय् श्रीस्वयम्भू ज्योतिरूप उत्पन्न जूगुलि नेपाःदेयागु गौरव महत्व सकभनं प्रसिद्ध जुयाच्चन धकाः उल्लेख यानातल^१—

त्रिसाहस्रे महालोके नेपाल साहसं न हि ।

श्रीस्वयम्भूरूपन्नाच्च सर्वत्र गौरवं महत् ॥

थ्व हे महत्व व आदर्शप्रति ध्यान तयाः जुजु श्री ५ पृथ्वीनारायण शाह व कुतिया लामाजुपिनि बिचय् जूगु सन्धिपत्र धर्मपत्र श्रीस्वयम्भू महाचैत्यप्रति आस्था प्रतिष्ठा तयाः प्यख्यरसं सुदृष्टि स्वयाः अवलोकन यानाच्चंहा जगच्चक्षु श्रीस्वयम्भूनाथयात साक्षि तइतःगु जुल । थुलि जक मखु उगु सन्धिपत्रय् उल्लेख जूगु धर्मवाचायात अनास्था यात धाःसा पञ्चहथ्या-पञ्चमहापाप-पञ्चानन्तर्य पापया सिकं तःधंगु घोर पाप स्वयम्भू महाचैत्य स्यंकागु पाप लाय्मा तकं धयातल । थुगु पत्रय् श्रीमत्स्येन्द्रनाथ, श्रीपशुपतिनाथ, श्रीगोरखनाथपिनिगु नां उल्लेख मयासे केवल नेपाःया सर्वप्राचीन महान् सुप्रसिद्ध देवता श्रीस्वयम्भूनाथयागु नां मात्र अंकित यानाः मान्यता बियावइच्चंगु जुल ।

स्वयम्भू महाचैत्य जीर्णोद्धार कार्यस जुजु जयप्रकाश मल्ल एवं पृथ्वीनारायण शाहया सहयोगया निमित्त पूर्ण आश्वासन

श्रद्धेय पूज्य प्रसिद्ध धर्मावतार वज्र आयुरीशमणि लामाजुयागु महान् शुभ सङ्कल्प अनुसार थ्वय्कःया मूल शिष्य प्रसिद्ध अवतारी ऋग्पाथाम्च्येख्येन्पा मेघसर्वज्ञ लामाजुं थःगुर्यागु उपदेशयात शिरोपर यासे महान् उदार चित्त उत्पत्ति यानाः ने. सं. ८७८ पौषपूर्णिमाया दिनय् श्रीस्वयम्भू महाचैत्य-यागु जीर्णोद्धार कार्य सुसम्पन्न यानाबिल ।

थुगु महान् पवित्र कार्यय् काष्ठमण्डपया तत्कालीन राजा जयप्रकाश मल्ल व गोरखाया राजा पृथ्वीनारायण शाहं उगु कार्यय् सहायता स्वरूप निम्नलिखित सत्य वाचा ल्हानाः पूर्ण भरोशां आश्वासन वियादीगु दु । थ्व खँ नेपाल भाषा व संदेया भाषा निगुलि सहित जुयाच्चंगु रञ्जना लिपिया सप्ताक्षरी कूटाक्षर शिर्षचिन्ह युक्तगु नेवाः आखः व सँय्या उछेन आखः अङ्कित याना तइतःगु पिचुगु हाकुगु संसहत्वहँतय् क्रियातःगु दु । वर्तमान थुगु शिलालेख हारिती अजिमाया नापं तयातःगु दु^१ ।

आर्य श्री ३ महाचैत्यरत्नया जीर्णोद्धार यायेयात
रू इत्यादि मारमारगुरि वस्तुक मालेमुमारकं
संयुक्तयाडाओ वियेगुलि भारा कायाओ
वचन बिल,—तओधङ देवतापनिसेन भाला
कायाओया निर्मितिनि सिद्धयिओगु रक्षन
खडाओ महाराजा श्रीश्री जयप्रकाशमल्ल देवन
निश्चयनं सत्य आज्ञा प्रशन्न जु

ग्वरषाया राजा श्रीश्रीश्री पृथ्विनारायणनं
एओसिं ननानं सालाओ वियधक सत्यधर्म विल ।

आर्य स्वयम्भू श्री ३ महारत्न चैत्य जीर्णोद्धार याय्या लागी लुँ आदि आवश्यक सरसामग्री
उख्येथुख्ये मालेगु क्कट तन्ता अलमल याय्म्वाय्क ज्वरदाम यानाविइगु अभिभार कयाः वचन विल ।
नापं थुगु महान् कार्यय् विष्णु ब्राह्मणया रूप धारण यानाः थुगु महाचैत्यया नाप साइज अनुसार लक्षण
प्रमाण मिलय् जूगु वल्लाःगु स्यल्लाःगु दुग्यंगु किलं मनःगु ताकाल तक तुइगु भिगु उत्तमगु सिँया जात
त्ययाः थुजाःगु प्रकारया योसिँ काय्माः धका सन्देश ब्यूवल । थथे देवतापिसं सहायता ब्यूवःगुया निम्ति
कार्य सिद्ध जुइगु शुभ लक्षण खनाःलि महाराज जयप्रकाश मल्ल पुनः निश्चयपूर्वक सत्य आज्ञा प्रशन्न
जुयाः दानपति लामाजुयात पूर्ण विश्वासं भरोशा ब्यूगु जुल ।

एवं प्रकारं गोरखाया प्रतापी जुजु पृथ्वीनारायण शाहं नं थुगु महान् शुभ कार्यया निम्ति
सुदीर्घाकृति यूप (योसिँ) याकनं साय्का विइगु जुल धकाः पूर्ण भरोशा आश्वासन बियादिल ।

स्वयम्भू महाचैत्य जीर्णोद्धार निमित्तं वज्र आयुरीशमणि लामाजुया महान् संकल्प^१

यावत् लोकधातुस वास यानाच्चर्वि अनन्त प्राणिपित हितसुख यायया निमित्तं प्रसिद्ध जुयाच्वंगु नेपाल मण्डल्य विराजमान जुया विज्याःह्य धर्मधातु वागीश्वर श्रीस्वयम्भू महाचैत्य ३३ कोटि देवतापिनि नं चौडामणि समानं उच्च जुयाच्वंगु; ब्रह्मा, विष्णु, महेश्वरादि सकल देवता लोकपालपिसं नं स्वागत सत्कार याका विज्याःह्य; असंख्य ज्योतिरश्मि प्रकाश जुयाः जाज्वल्यमान जुयाः समस्त उत्तम महापुरुषपिनि चित्त स्वरूप जुयाच्वंगु; सकल पुण्याश्रय भक्तजन श्रद्धालुपिनिगु सदिच्छा परिपूर्ण यायगुलिइ अक्षय रत्न उदय जुयाच्वंगु; गुलि प्राणिपिसं श्रद्धाभक्ति तयाः स्पर्श याना मात्र नं वसपोलयाके कयाः ह्याःगु फसं थिजक थिलसां उह्य उह्य प्राणिजन भवचक्र संसार-सागरं पारङ्गत जुयाः अनुत्तरबोधिपाखे तक्कंका यंकिइगु अमोघपाश जुयाच्वंगु; अनागति संसार-चक्र्य चाःहुलाच्चर्वि प्राणिपि गुलिसिनं वसपोलयागु रूपकाय दर्शन, स्पर्श, स्मरण, श्रवण याना मात्रं उह्य प्राणियागु अशुद्धगु देह विशुद्ध गति प्राप्त जुयाः मोक्षमार्गया द्वार चाय्का बिइगु; त्रिकालया गुरु बुद्ध बोधिसत्वपिनिगु अनुत्तर सम्पत्ति जुयाच्वंगु थुगुलिइ गुह्यासिनं छु छु आशा इच्छा व्यक्त याइ उह्यसित उगु उगु मनोरथ परिपूर्ण याना बिइगुलिइ भद्रघट, सिद्धौषधी, एवं चिन्तामणि जुयाच्वंगु; त्रिभुवनया भक्तजनपित अचिन्त्यगुण सागर समानं न्ह्योने सुप्रतिष्ठित जुयाच्वंगु, जम्बुद्वीपया मूलगु पुण्यभूमि महापीठ नेपालया धर्मराज गिरिवर साह्येगु पर्वतय् अति शोभायमान अलंकारं संयुक्त जुयाच्वंगु थुजाःगु स्वयम्भू महाचैत्यरत्न यात--

कलियुगया पञ्चकषाय दोषं थियाः जीर्ण जुयाच्वंगु व्यलाय् उत्तरापन्थ सँदेया पण्डित साधक गुणोजनया चूडामणि विद्याधरगणया चक्रवर्तेश्वर निर्मल कीर्ति प्राप्त प्रसिद्ध धर्मावतार दोर्जेछेवाङनोर्बु

१- स्वयम्भूया वहिफल्य च्वंगु शिलापत्रया आधारकथं ।

(वज्र आयुरीशमणि) लामाजु शरदकालया चन्द्रमा समानं परिशुद्धगु चित्त जुयाच्चंहा शुभ संकल्प याना--

गनतक आकाश धातु व्याप्त जुयाच्चन अनतक च्वंप्पि अचिन्त्य प्राणिपिनिगु कारणय् हितसुख शान्तिया निम्ति सँदे, महाचीन व नेपालया ज्योतिष शास्त्र अनुसारं अत्युत्तम शुभदिनय् लाकाः श्रयोऽस्तु नेपाल सम्बत् ८७१ सालं थुगु अपरिमित पुण्यकार्यं स्वयम्भू महाचैत्य जीर्णोद्धार शुभारम्भ यानाच्चनागु अवस्थाय्--

अकस्मात् महादेव गणपति कुमारपि सद्दे थ गु रूप कयनाः स्वयम्भू चैत्यरत्नयात अति श्रद्धा भक्ति तःगु जुल । थुकथं विष्णु-ब्राह्मण रूप कयाः योसिं काय्गु लक्षण प्रमाण कनाविल । थुगु महान् कार्य निश्चय नं सिद्ध जुइगु शुभलक्षण खनाः महाराज जयप्रकाश मल्लं सत्य आज्ञा प्रशन्न जुल- थुगु कार्य निम्ति लुं इत्यादि आवश्यक सामग्री माले म्वाय्क ताःलाकाविइगु अभिभार कयादिल ; अथे हे पृथ्वीनारायण शाहं थुगु ज्याया निम्ति योसिं याकनं साय्का विइ धकाः सत्य कराल ल्हाःगु जुल ।

थुगु रूपं जीर्णोद्धार कार्यं न्हियान्हिथं न्ह्यानाच्चंगु ब्यलाय् मयुरतौदेसय् लाहोरया आक्रमण जुइगु भय हतय् याय्त लामाजु हथासं वनेमाःगु जुयाः, सँदे, काठमाण्डू उपत्यका व गोरखाया राजापिसं उगु कार्यं छुं समयतक स्थगित याय्माःगु आवश्यक जूगुलि यानाः उगु जीर्णोद्धार कार्यं विस्तार जूवन ।

लामाजु थनं बिज्यानाः किलदेस थ्यँसेलि समाचार अनुसार थ्व खँ सिल- छुं समय लिपा जक लामाजु नेपाः बिज्याइगु भविष्य लक्षण खन । थनं लामाजु अज्ज ल्हासा थहांवनेमाःगु विशेष कारण परय् जूगुलि थथे धयाबिज्याःगु दु कि जि छुं जुयाः नेपाः वय् फुसां अथवा मफुसां जिगु चित्त समानहा सुहृद्मित्र कर्मपाया न्याहाय् छहा वयाः ज्या सिधय्के फुसां छुं सन्देह मदु, तथापि कर्मपाया अंशधारी लामाजु वय्मफुसां जि शिष्ययात जि समान भाःपाः मानय् यानाः थुगु स्वयम्भू चैत्य जीर्णोद्धार कार्यं सिद्ध याय्माल धकाः विश्वाससाथ वचन बियाः थःगु थासय्तुं लिहांबिज्याते । छुं दिन लिपा अनित्य शरीर नश्वर आत्मा धर्मधातुस लीन जुयावन ।

थुजाःगु अवस्थाय् थुगु महान् पुण्यकार्यं स्वयम्भू जीर्णोद्धार छु गथे यानाः याय् धकाः महाधन्दा कयाच्चंगु समयय् धर्मस्वामि श्रीक्रग्पा थाम्च्येख्येन्पा मेघसर्वज्ञ लामाजुं थःगुर्यागु शुभप्रणिधान पूर्ण याय्या निम्ति गुर्यागु वज्रवाचा उद्देशयात शिरोपर यासे उत्साहपूर्वक उगु जीर्णोद्धारया ज्याखँ ज्वनाः नेपाः थ्यंकःवल ।

नेपाः थ्यँसेलि मेघसर्वज्ञ लामा व वसपोल गुर्या शिष्यनायक शाक्यभिक्षु श्रीशासनधर प्रभृति सकल शिष्यपि मुनाः एकता सहयोग एवं सहानुभूतिद्वारा तन मन धन बियाः अति परिश्रमपूर्वक थःगुरुं दय्का थकूगु ज्याया ग्वसाःकथं पूर्ववत् ज्या चालु जुल । थुगु जीर्णोद्धार कार्यं न्हय्दँ बित । ने. सं. ८७८ पौषशुक्ल पूर्णिमाया शुभदिनय् श्रीक्रग्पा थाम्च्येख्येन्पा लामाजु तथा श्रीवीररत्न लामाजु निहासितं तिब्बतया बौद्धशास्त्रया विधिकथं सम्पूर्ण प्रतिष्ठा कार्यं सुसम्पन्न याःगु जुल ।

थुगु जीर्णोद्धार निमित्त गुलि गथे धन रत्न खर्च जुल उगु विषय थन प्रसङ्गवश संक्षिप्त विवरण स्वयम्भूना —

स्वयम्भू महाचैत्यय् ख्यलातः गु गुलि नं न्हापायागु जीर्ण-शीर्ण जुयाच्वंगु पुलांगु लुं, वहः, सिजः दक्क छे अलग छवयाः आः पुनर्निर्माण जुइत्यंगु थुगु महान् विशुद्ध कौर्ति निमित्त खर्च व्यहोरय् यानागु- न्हूगु व पुलांगु समेत सिजः १३८२ किस्वसः व चय्निधानि जुल । मेगु स्वयम्भू चैत्यया गलतुकि प्यख्ये, हलपति प्यख्ये, चकुरि किस्वतें एवं छत्र पर्यन्त लुं सिइत लुं २०४५ नीदो व पीन्यातोला व चानचुन खुमे थ्वते सुवर्णयात पूट वियाः पा काय् धुसैलि सुवर्ण १६३१ किगुसः व स्वीछतोला व चानचुन खुमे जुल, मेगु पुलांगु पा कयातयागु लुं ८६ चय्गुतोला व किमे दु, थुगु लुं समेत सायाः लि ब्याक्क २०२१ निदो व नीछतोला व प्यमे दु । एवं रूपं थुगु कार्य प्रारम्भनिसें समाप्त मज्जतले उक्थियात माः माःगु आवश्यक ज्याखं थः थःगु शक्ति व अधिकार विशेष फुह्यं फुथे देस नरेश, काजी, नायक प्रजापिसं प्रशन्नपूर्वक सहयोग प्रदान यागु जुल । महाचैत्य व चैत्यस सुप्रतिस्थित देवतापित सुवर्ण लेपनं यानागु समेत लुं जक जम्मा ३३४४ स्वदो व स्वसः व पीप्यतोला व चानचुन किमे सुवर्ण राशि खर्च जुयावन । एवं प्रकारं सुवर्ण खर्चपाखें अलग मेगु शाही तका ४७७५ पीन्ह्यसः व न्ह्यन्यातका व वहः धानि ११ तौल, म्वाः सिजः धानि २, चलन चल्ति जुयाच्वंगु दां १४१०६ किप्यदो व सच्छि व खुमोहः तथा थुगु ज्याय् ख्यलागु विविध वस्तु खाता, क्वय्चि, कूतचा, सपा, च्या, घ्यः, चि, चिकं खाद्य पदार्थ थुगु देसया बजार भाउ अनुपातं हिसाव यानाः खर्च जूगु ४ः६३६ पीस्वदो व खुस व स्वीगुतका जुल । थुगु खर्चपाखें अलग अभरख सहित सल ह्य ६७ क्वय्चि आदि देओ- उत्तम वस्त्र थान् २१ केशरी स्वयम्भू चैत्यय् लेपन यागु जुल । मूल शाही तका १००० दोछि थ्वते सम्पूर्ण वस्तु खर्च हनागु जुल ।

वसपोल विद्याधर वज्र आयुरीशमणि लामाजु वैराग्य ज्ञानया भण्डार लानाः निर्माया योगियागु चलन कयनाविज्याः ह्य जूया निमित्त श्रीसमृद्धिवान् जुयाः नं प्राणया आधार माफिक मात्रं जीवन हनाः छुं वस्तुया नं रेणु मात्र हे राग कल्पना छुं मयासे दानपारमितायागु महत्व कयनाः शुद्धं जीवन हनाच्वंह्य खः धइगु महिमा लोकप्रसिद्ध जू । उकि थ्वय्कः लामाजुयागु शुद्ध हृदयपाखें प्रवाह जुयाच्वंगु महान् उदारताया साकार रूप खः थुगु भव्य रूप श्रीस्वयम्भू महाचैत्यया निर्माण कार्य ।

तथापि स्वयम्भू चैत्ययागु ज्या आरम्भ यासांनिसें सिद्ध मज्जतले दशदिग्या श्रद्धालु भक्तजनपिसं थुगु अपरिमित पुण्य कार्यय् अर्पण यागु विविध परिष्कार किञ्चित् सुधां मभ्युसे सदुपयोगय् परिणत यानाविल । गथे महासागरय् लः छफुति कुतुकागु व लः छफुतिया आयुर्दा यावत् महासागरया लः फुनामवंतले अनन्तकालतक नं चिरस्थिति प्राप्त जुइगु खः, अथे हे अनुत्तरबोधि प्राप्तया निमित्त शुभ संकल्प यानागु श्रद्धापाखें पिज्वःगु थुगु विशुद्ध चर्यास दोहलप्युगु कारणपाखें यानाः यत्किञ्चित् छुं पदार्थ जूसां निश्चय नं बोधि प्राप्तिया हेतु जूवनी धइगु विशुद्धगु न्यायं ज्या जूगु जुल ।

स्वयम्भू महाचैत्यया आदर्श विषय थथे चर्चा यानातःगु दु- त्रिकालया सकल तथागतया धर्मकाय सुनानं दय्के म्वाय्क थथेऽहं अनादिकालनिसें सिद्ध स्वभाव जुयाच्वंगु स्वयम्भू अरूप जुयाः

नं सम्पूर्ण रूपया आत्मा जुयाच्चह्य, अवस्तु जुयाः नं सम्पूर्ण वस्तुक्य व्याप्त जुयाः समन्तभद्र सकभनं कल्याण यानाः परमाणु रज समानं पारङ्गत जुयाच्चह्य सर्वथा सर्वकालं स्थिर सतात्मा शुद्ध सुख नित्य पारमिता प्राप्त जुयाच्चह्य स्वयं धर्मधातुपाखे सर्वसत्त्व प्राणिपिनिगु स्वभाव धातुस अत्यन्त व्याप्त जुसे अभिन्न अंग जुयाः असार संसार्य सत्सारगु सर्व धर्मया नं नाथ जुयाच्चह्य नैराकार निरञ्जन गगनवत् स्वभाव चित्त चैतन्य थुगु महान् चैत्यरत्न अति गम्भीर अभ्यन्तर तत्त्व जुयाच्चगुलि पुण्य परिपाक मज्जुनिपि शुभसंयोग लाभ याय्गु असंख्य दुर्लभ जुयाच्चपि सर्वसाधारण प्राणिपिनिगु मन्दबुद्धि खंकांखंके मफुगुलि नं थ्व अचिन्त्य लोकधातु विश्वया न्ह्योने असंख्य प्राणिपित सुधार व उद्धार याय् निमित्त करुणावतार स्वरूप रूपकाय श्रीधर्मधातु वागीश्वर स्वयम्भू महाचैत्याकार रूप्य कीगु न्ह्योने सुप्रतिष्ठित जुयाच्चन ।

थजाःह्य धर्मधातु परमेश्वर करुणावतार— नागहृदया द्योने पलेस्वानं उत्पन्न जूह्य ज्योतिरूप श्रीस्वयम्भू महाचैत्य जीर्णोद्धार यानागुया वर्णन संक्षिप्त मात्रं थन उल्लेख यानागु जुल । मेगु विस्तार खँ थ्यासफुतिइ च्वयागु स्वयाः सिइकेमाल ।

थुगु स्वयम्भू महाचैत्य जीर्णोद्धार यानागुया कामना केवल लोकजनपिनिगु न्ह्योने जशकोर्ति लाय् धकाः नं मखु, कपिनि न्ह्योने जोरि खोज्य यानाः थःगु गौरव सम्प्ल्य जुइके निमित्त नं मखु, लौकिक च्याता धर्म्य दुखिनाः नं मखु, चक्रवर्ती आदि ब्रह्मादि महेश्वरपिनिगु अत्युच्च पदवी लाय्गु इच्छा नं मखु; केवल थुगु शुभकार्य्य लग्य जुयाच्चक्व तथा आकाशं खयाच्चक्वया दुने वास यानाच्चक्व सर्वसत्त्व प्राणि धर्मकाय वज्रधरपद प्राप्त याके कारणपाखे जक वसपोलया असभिन्न चित्त चैतन्य चैत्यज्ञानया आशय धर्मधातुस विलीन जुइके निमित्त आज्ञा जू थे थुगु अप्रमेय पुण्यया फलं उगु फल प्राप्त जुइमाल धकाः —

थुगु कार्यया व्यवस्थापक एवं दानपति वज्र आयुरीशमणि लामाजुया सम्पूर्ण दोषपाखे रहितगु विशुद्धगु हृदय बोधिचित्तपाखे प्रार्थनायागु थुगु महायान प्रणिधान— निबिघ्नपूर्वक सिद्ध जुइमाल धकाः सत्यया शरणनाथ श्रीत्रिरत्न गुरुदेव डाकिनो धर्मपालगणपिके सुदृढपूर्वक प्रतिज्ञा याःगु दु— जगत संसार थुगु जन्म हे चतुष्कायपद वज्रधरपद प्राप्त जुइगु महान् शुभअवसर सौभाग्य यथाशीघ्र फल प्राप्त जुइमाल ।

वज्र आयुरीशमणि लामाजुयागु महान् शुभ संकल्प अनुसार स्वयम्भू जीर्णोद्धार सम्बन्धी गुलि गथे ज्याखँ जुल, उगु विषय कयाः संक्षिप्त रूपं थन च्वय् वर्णन जुल । आः हानं थ्व हे स्वयम्भू महाचैत्य जीर्णोद्धार जूगु समय्य नेपाःया थःगु परम्पराकथं वज्राचार्य, शाक्यभिक्षु एवं अन्य उपासक उपासिकापिनिगुपाखे गुलि गथे ज्या जुल धइगु विषय कयाः छत्वाःचा खँ थन प्रस्तुत यानागु जुल'—

१— स्वयम्भू प्रस्थापन वर्णन कचिभोया सफू

— सप्तमुनि वज्राचार्यया पाखे प्राप्त ।

यलसिँ काय्गु विधि

शुभसाइत स्वयाः सिमा लुइकातय्, स्वयम्भू चैत्यय् सिथल वने, प्यन्हु न्ह्यवः देवसके कलश पूजा याय्, शान्तिपुरीस लय्पूजा ज्वलं सहित यानाः विधि थे पूजा याय् ।

यलसिँ काःवने

ने. सं. ८७० फाल्गुणकृष्ण नवमीया दिनय् खेहोजराज गुरुजु ज्ञानभद्रजुया शुभ व्यलाय् महान् माहिकपि च्वनाः सगुन कयाः सुचि-नीचि यासे राजकुलय् पूजाभः कयाः बाजं थाकाः शुभमुहूर्त दिशा स्वसे प्रस्थान जुइ । निर्दिष्ट स्थानय् थ्यंकाः विश्वकर्मा व वनदेवी एवं सिमा समेत पूजा याय् । सिमा ध्यनेत बोस्यजया हाथ पूजा यानाः न्हूगु पास लु भुनाः कस्ति इलाः पा पूजा याय्, सिमा ध्यनागु पुलु परिगास जुतके विधि थे पूजा याय् जुल ।

यलसिँ साय्के

ने. सं. ८७७ फाल्गुणशुक्ल चतुर्थीखुनु राजगुरुजु मखंवाहाःया रत्नपतिदेवजु उपाध्या सिख्वंमूया ज्ञानभद्रजु, कर्माचार्य गुणपतिजु, महान् बेस्यत कुलधरसिजु, मनमोहनजु थुपि वनाः थ्वयां सतिखुनु विधिवत् पूजा यासे यलसिँ सालाहल । लँया बिचय् बिचय् इनायको, सरयापीठ, मनोमयजु, ह्यसपीकोस थ्यंकाः थासय् थासय् विधि थे पूजा यानाः सालाहल । फाल्गुणशुक्ल अष्टमीखुनु जयप्रकाश मल्ल जुजु व येँ, यल, ख्वप ग्राम आदिया प्रजागण वयाः भचाखुसि छिनाः पाखय् थ्यंबलय् ध्वंपय् दुना थसाले मफु । थ्वयां सतिखुनु विधिवत् पूजा यानाः कपातगि थसाय्काः जलय् दुसालेत नं पूजा याकाः जुजु यलसिँस छपासः मोहः दक्षिणा छाल । एवंकमं थासय् थ्यंकेहल ।

न्यास निमन्त्रणा विधि

ने. सं. ८७७ फाल्गुणकृष्ण प्रतिपदा आदित्यवार उत्तरफाल्गुणि नक्षत्रखुनु सिख्वंमूया विमलप्रभा राजगुरुजु प्रमुख न्याह्यसिनं जुजुयात दँ ४ दक्षिणा तल । तःछेँया देवपतिजु, उपाध्या भारवीर, कर्माचार्य शुन्यन्दजु जुल ।

न्यास पिकाय्त् निमित्त पूजा विधि जुइ, शान्तिपुरीस प्यन्हुयंकं पूजा याय् ।

तीर्थ लः काःवने

माक्व सामग्री दय्काः राजगुरुजु, उपाध्या, कर्माचार्य, स्यंगुवदे थकालि व बेस्यतया विजयेश्वरी क्वय् स्नान यानाः, गुरु मण्डल पूजा, नाग भावना धूप पूजा यानाःलि तीर्थ लः काय् ।

न्यास पिकाय्

फाल्गुणकृष्ण द्वितीयाखुनु मर्यादानुसार माक्व सामग्री दय्काः विधि थे वज्रधातु देगुरि

क्रमानुसार पूजा जुइ । थुगु पूजाया अन्तर्य सुयिनाय, बुयिनाय, हारिती, पवनभैरव, फसखा, एवं शान्तिपुरीस विधि थे पूजा याय् ।

फर्किवाता गजुलिइ क्वकाय्

चैत्रशुक्ल चतुर्थीखुनु लायकुलिइ पूजा कयाः विधि थे वज्रधातु देगुरि पूजा यासे फर्किवाता चौडामणि पूजा याय् धुंकाः नैकर्मि, सिकर्मि, तमो व निवाया ज्याभः व हाथ पूजा याय्, फर्कि क्वकाय् जुल ।

अम्बसा क्वकाय्

चैत्रशुक्ल पञ्चमोखुनु विधि थे पूजा यानाःलि सतिखुनु लाय्कूया पूजाभः कयाः पूर्वत् वज्रधातु समाधि यासे च्वचक्र क्वकाय् ।

गलतुकि पिङ्गु

चैत्रशुक्ल सप्तमीया दिनय् विधिवत् पूजा यासे थःथः चकरि क्वथ्यंक पिङ्के, सतिखुनु स्यंगुवदेतय्सं गलतुकि क्वचाय्क पिङ्के ।

यवसिँ ध्यनेगु

चैत्रशुक्ल दशमी प्रएकादशीया रात्रिस विधि थे पूजा यासे वोस्यत न ध्यंके छ्वयाः सम्बन्धित व्यक्ति बाहेक सुना नं स्वय् मदु । रात्रि घटि ११ स यहसिँ क्वःदल । थ्व यवसिँ क्वःदयाः खिपः नित्याः दल, वशिदेवया पोल स्यन । यवसिँ क्वःदयाः बाघौति लिपा स्यंगुवदेया मूलदेवया मृत्यु जुल ।

प्वाथ पिङ्गु

चैत्रशुक्ल एकादशीखुनु मूलाचार्य विमलप्रभं विधि थे वज्रधातु देगुरि पूजा यासे प्वाथ पिङ्गु ज्या जुल ।

मुगः खः ग्वय्

चैत्रशुक्ल द्वादशीखुनु विधि थे पूजा धुंकाः सालमि ८ ह्याया हाथ पूजा व खः ग्वय्त् माक्व सिँ चाय्के, सिँइ पूजा याय्, सिँ स्वाय् । थुगु कार्यय् राजां मे ह्य १ मूल मोहः ४० बिल ।

यवसिँ स्वाय्

चैत्रशुक्ल चतुर्दशी उत्तरफाल्गुण नक्षत्र ध्रुवयोग आदित्यवारखुनुनिसें बाह्यातसे प्वाथ पिङ्कल, आ. सो. मं. बु. बृहस्पतिवारखुनु क्वचाल । गर्भगृहय् स्वथनातःगु अनेक वहःघः, सिजःघः, अनेक

देवता, बहुमूल्य रत्न लुँ वहः तिसा आदि वस्तुया चित्त विचार संचार याःह्य इतुंवाहाःया भिक्षु श्रीमान्यकरजुं कोथा छगुलिइ तयाः तालं ग्वयातल । थनंलि न्हित्थं सालमितय्सं मुगः खः ग्वय्काः योसिँ ४४ गः स्वाकाः खः ग्वय्त १२ । चैत्रकृष्ण सप्तमीखुनु जुजु जयप्रकाश मल्ल व उपाध्या चिक्रिति भाजु स्यंगु थहांबिज्यानाः जुजु न्यासघः, फकिवाता थियाः देव अनियात, मोह १ दक्षिणा छाल । अथे हे हारिती, शान्तिपुरीस मोह दक्षिणा तसे अनंलि प्वाथस च्वंगु वहःया चैत्य भराड स्वयाः माक्व खँ साहुति यासे लिहांबिज्यात । धमाधम खः ग्वय्गु ज्या जुयाच्वन ।

फोना ध्यने

चैत्रकृष्ण अमावासिखुनु विधि थे पूजा यासे यवसिँ ज्यातके जुल ।

यवसिँ दुसाय्के

बैशाखशुक्ल तृतीया रोहिणी नक्षत्र शोभन घटि ७ प्र सौभाग्ययोग वृहस्पतिबारखुनु विधि थे पूजा यानाः दुतयने ।

रत्नन्यास

विधिवत् आवश्यकीय सामग्री दय्काः पूजा याय् ।

यवसिँ संस्कार याय्

बैशाखशुक्ल चतुर्थी रोहिणी घटि १ प्र मृगशिरा नक्षत्र सौभाग्य घटि प्र अतिगन्धयोग शुक्रवारया रात्रिस घटि ८ वितय् यानाः घटि १५ न्ह्यो यवसिँ संस्कार याय्त अन्त्यक्रिया विधि अनुसार दुर्गति परिशोधन समाधि यासे अग्न्याहुति कर्म खंकाः स्वस्ति वाक्य परलपा विधि थे अग्नि संस्कार सिधय्के ।

यवसिँ भष्म प्रवाह

बैशाखशुक्ल सप्तमीया दिन नसनेवंतुं पुलांगु यवसिँया भष्म नदी प्रवाह याय् विधिपूर्वक । थुखुनुसंतुं लामाजुया भ्वँतय् च्वयाः पिण्डकर्म मण्डल जुल ।

यवसिँ थने

ज्येष्ठशुक्ल नवमी घटि ३८ पूर्वफाल्गुण घटि २ प्र उत्तरफाल्गुण नक्षत्र वज्रयोग घटि ३५ शुक्रवार थ्वखुनुया दिन घटि २७ स यवसिँ थनाः शुभव्यला जुल । थुगु कार्यय् राजायाके पूजाभः कासे विधिवत् पूजारम्भ याय् । थुगु कार्यय् मूलाचार्य विमलप्रभानन्द, उपाध्या जयपतिदेव, कर्माचार्य गुणेन्द्रजु । पूर्वाचार्य- वेंतुवाहाःया रत्नपतिदेवजु, दक्षिणाचार्य शबलवाहाःया महामुनिजु, पश्चिमाचार्य

उत्तराचार्य क्वाःवाहाःया शाक्यमुनि द्यो जु सकसितं वज्रधातु देगुरि विधि थे पूजा याःगु जुल । पाठ—
सद्धर्म पुण्डरीक व पञ्चरक्षा महायान सूत्र । जु जु विज्यायवं यवसिं साय्कल । थुलि क्रिया सिधय्व
सालमि पताः छाय्कल, योसिं पालाव्यूह व योसिंस च्वैक्व खतय च्वैक्व व्वनाः मूलाचार्य मुकूटं पुयाः
वज्रघण्ट थानाः वज्रसूचि कयाः कसागां न्ययाः उपाध्या, कर्माचार्य, दिगाचार्यपि च्वय् प्वाथस
थहांवनाः विधिवत् पूजा जुल । थुगु महान् शुभकार्य समारोह जूगु उपलक्षय् देसछिसियां वडो हर्षमान
जुयाः अनेक नृत्य गीत वाद्यवादन (पञ्चताल, जोगीवाजं, नाय्वाजं, दाफावाजं, गुंलावाजं, धाः, खि,
धिमे, काहा क्वंचाखि) आदि सहित यानाः मंगलोत्सवपूर्वक पूजा जुल । राजायात इन्द्रकलश लःल्हात ।
सकसितं प्रसाद वितरण नं जुल ।

पाद स्थापना याय्

ज्येष्ठशुक्ल द्वादशी घटि २७ चित्रानक्षत्र घटि ७ प्र स्वाति नक्षत्र वलियानयोग सोमवारखुनु
यवसिया दिगविदिगसं पाद स्थापना जुल । थुगु कार्यय् स्वयम्भू पुराण, सद्धर्म पुण्डरीक प्रज्ञापारमिता
पाठ याय् । गरप दनेयात पाद स्थापना विधिवत् जुल । पात्राकृति लक्षण स्वयम्भू चैत्य प्वाथ छखेया
कु ४४ दु, अक्षोभ्यं निसें अमिताभतक । रत्नसंभवं निसें अमोघसिद्धि तक कु ४४ थुलि प्रमाणं
दइच्वंगु । यवसिं कु ४८ अंगुलि ६ तछो ४ या प्रमाणं गलतुकिया भागं दाना तयागु । यवसिं छखें जक
कु २३ प्यख्यरसं यानाः कु १० दु^१ * ।

प्वाथ दने

प्वाथगो दनेत राजा व बेस्यतया पूजाभः थ्यंकाः व आचार्य विधि थे पूजा याके ।

गलतुकि दनेत

ज्येष्ठकृष्ण एकादशीखुनु थुगु कार्य निमित्त राजा व बेस्यतयाके पूजाभः कयाः विधि थे पूजा
यानाः गलतुकि दनेत पाद स्थापना जूगु जुल ।

१- अनुमानित १३ गूगु शताब्दीपाखे च्वइतःगु वीर पुस्तकालयय् च्वंगु 'स्तूपलक्षण कारिका विवेचन' नामक
पुस्तकया अन्तिम पृष्ठय् स्वयम्भूया योसिया नाप साइजया विषयय् थथे च्वइतःगु दु—

जेटनकु ३५ अंगुलि ५ यव ७ स अंकन घाव ।

प्वातस कु ९ कु ५ गलस कु ३

डमड्थं धुड चकु १८ अं ५ यव ७ प्रमाणेति मध्यमादि क्रमेण ।

*- लामाजुयागु प्रस्ताव अनुसार—गलतुकि २३ जाः ताछाय्गु विषय सरसल्हा जुल, सुनानं वचन मब्बू, राजां आज्ञा
जुल—अथे जूसा गुरूका काय्काः स्वय् (द्योयाके यो मयो काय्गु) । अन्तय् लामाजुयागु सदिच्छानुसार ताछाय्गु
ज्या जुल ।

— भोजमानपति पुस्तक, पृ. ६

लामाजुया पिण्डकर्म

आषाढशुक्ल प्रतिपदा आद्रानक्षत्र धृतियोग शुक्रवारखुनु न्हापायागु मण्डल तयत् लामाजु दोर्जेछेवाङनोर्बुया शिष्यपि व राजा जयप्रकाश मल्ल, उपाध्या भाजुराज, तःछेया जयपतिदेवजु, गुणेन्द्रजु सहित जुसे सल्हा यानाःलि वहःया पाताय् लु सियाः श्वया द्योने पिण्डकर्म मण्डलया विधिवत् पुष्पन्यास जुल ।

थुकिइ धर्मधातु, कुरुकुला, जाङ्गुली, प्रत्यङ्गिरा आदि व धारणी संग्रहया मन्त्र अङ्कित याःगु दु । श्व मण्डल गलतुकिया पूर्वदिग्य न्याकु जागुलिइ तल । श्व पिण्डकर्म मण्डलया दत्थुइ वागीश्वर, वज्रधात्वेश्वरी मन्त्र तयाविल, अनलि चतुर्दलसा पूर्व्य जिनजिक रागरति, दक्षिण्य रत्नधृक द्वेषरति, पश्चिम्य आलोकिक मोहरति थुगु रूपं मन्त्र विन्यास तःगु जुल । अथे हे गर्भ्य न्हापां पाधार, श्वया द्योने राजरंपुर, श्वया नं द्योने मलचमिपि, श्वया नं द्योने राजरंपुर, श्वयां द्योने लवं जीफो अले हानं राजरंपुर, श्वयां द्योने मण्डल थिल—वैदूर्य, इन्द्रनील, पुष्पराग, पद्मराज, मरकट नाना रत्न सुवर्ण रूप्य आदि तःगु जुल । अलंकार जन्त्र, शिखर, तायर समस्तं तयाः क्वय्चि भुनाः सिजः—पुसां त्वपुयाः की कयाः तसेलि जयप्रकाश मल्ल राजाया कोथामचा (प्राईभेट सेक्रेटरी—हजुरी) छ्वयाहयाः किल कयागुलिइ लिक्काः समस्त तँ पतिकं बांलाक स्वयाः गोरखाया जुजु पृथ्वीनारायण ग्राहया मोहः ३२ तय्मदु धकाः लिक्काः जयप्रकाश मल्ली मोहः यल ख्वपया मोहः पलेसा तयाः सिज या पुसां पुयाः की तानाः बांलाक सुरक्षित यानाः तयाव्यूगु जुल ।

यवसिया पूर्वभाग्य ल्वहँतं दनाः द्योने थापना यात । श्वयां द्योने ल्वहँतं क्वपुल, श्व हे ल्वहँया द्योने लामाजुया नां व सम्बर तल, श्वयां द्योने जयप्रकाश मल्ल राजाया अतँ गलतुकि च्याकु जाय्कल । आषाढ पूर्णिमाखुनु दम्बसक्व थूचकरि तया जुल । जजमान वँतुवाहाःया ज्येष्ठ महामुनिजु प्रभृति गोष्ठिछियां पूजाविधि माक्व व भोजन सुधां याकल ।

चकरि तय्

थुगु कार्य याय्त् राजा व जजमानया पूजाभः कयाः विधि थे पूजा याय् । थां ४ ग्वः मेथ ४ ग्वः अले चकरिपौ एवं दुथगरप ८ ग्वः थाम्य, छिँस्वतँ चकरिस पूजाविधि उत्थे—शून्यादि विमोक्ष विणुद्धया हूँकार समतावज्रः दिक्षुविदिक्षु स्वसंस्थाप्यः—धइगु वाक्यकथं क्रमशः थःथःगु दिग विदिग अनुसारं पञ्चबुद्ध, पञ्चतारा, दशक्रोधादि स्वरूपं पूजा यासे स्थापना याय् जुल ।

संक्षिप्तकथं छिँस्वचकरि त्रयोदशभूमि विणुद्धि भावनाकथं गर्भ्य स्वथनेगु—

- | | | | |
|-----------------|-----------------|-------------------------|-----------------|
| (१) शीलस्कन्ध | विणुद्धी — रत्न | (५) विमुक्तिज्ञान दर्शन | ” — बीज |
| (२) समाधिस्कन्ध | ” — भैषज्य | (६) वज्रमय भूमि | विणुद्धी — वज्र |
| (३) प्रज्ञा | ” — धातु | (७) ज्ञानवती भूमि | ” — इन्द्रनील |
| (४) विमुक्ति | ” — गन्ध | (८) समन्तप्रभा भूमि | ” — पुष्पराग |

(९) धर्ममेघा भूमि विणुद्धी - पद्मराग	(१५) अस्मिन्मती भूमि विणुद्धी - स्फटिक
(१०) साधुमति भूमि " - मरकट	(१६) प्रभाकरी भूमि " - वैदूर्य
(११) अचला भूमि " - शेखर	(१७) विमला भूमि " - भिष्म
(१२) दुरङ्गमा भूमि " - सुवर्ण	(१८) प्रमुदिता भूमि " - मुक्ता
(१३) अभिमुखी भूमि " - राजावर्त्त	(१९) प्रज्ञोपाय भूमि " - सुवर्णरूप्यपद्मयोः
(१४) सुदूर्जया भूमि " - विद्रुम	

निचकरि

आषाढकृष्ण चतुर्थीखुनु विधिवत् पूजा यानाः निचकरि तं गु जुल । थुक्रिया जजमान मदुत्वाःया तमोत सकले मुनाः खर्च यात ।

स्वचकरि

आषाढकृष्ण सप्तमीखुनु स्वचकरि तया जजमान मोसोतयापि जुल ।

प्यतंगु चकरि

आषाढकृष्ण नवमीखुनु नःघः व असंत्वाःया वतेजुपाखे मा.गु पूजा खर्च हनाः ज्या जुल ।

न्यातंगु चकरि

आषाढकृष्ण एकादशीखुनु सिख्वंमूया वदेजुपिनिगु सहयोगद्वारा स्थापना जुल ।

खुतंगु चकरि

आषाढकृष्ण द्वादशी कर्कट संक्रान्तिया दिनय् पूजाविधिया जजमान ओमबाहाःया ।

न्हसगु व च्यातंगु चकरि

आषाढकृष्ण द्वादशीखुनुसंतुं इतुं बाहाःया व लगंया वदेजुपिनि धर्मचित्त जुयाः चकरि तय्गु ज्या सम्पन्न जुल ।

गुतंगु व झितंगु चकरि

आषाढकृष्ण चतुर्दशीखुनु जजमान असंत्वाःया साहुत व लगंया वदेजुतपाखे विधि सम्पन्न यात ।

झिछतंगु चकरि

आषाढकृष्ण चतुर्दशी प्र अमावासिखुनुया जजमान वंतुबाहाःया ज्येष्ठ महामुनिजु, मुनिजु, धंजुपि जुल ।

त्रिनिचकरि

आषाढकृष्ण अमावासि प्र श्रावणशुक्ल प्रतिपदाखुनुया जजमान स्यंगुवदेजुपि जुल ।

त्रिस्वतंगु चकरि

श्रावणशुक्ल प्रतिपदाखुनुया जजमान लाय्कूया जुजु जयप्रकाश जुल । विधि थे पूजा जुल ।

अम्बसाहा

श्रावणशुक्ल तृतीयाया दिनय् जजमान जमलगण्ठिया वदेजुत जुल ।

थामखतजल

श्रावणशुक्ल चतुर्थीया दिनय् कुंथां खतजला तयाया जजमान जुजु तुं जुल । थुक्रिया उपलक्षय् पताः छायाः विधि थे मङ्गलोत्सव यानाः जीर्णोद्धार कार्यं सम्पूर्ण जुल^१ ।

थुगु स्वयम्भू महाचैत्य जीर्णोद्धार कार्यं जूगु व लिस्से काठमाण्डूया कुमारी छेयागु नं प्रतिष्ठा कार्यं सम्पन्न जूगु महान् उपलक्षया समारोहय् सकल सम्यक देवता व मेपि ततः थपि देवदेवीपि नं विधिवत् नीतं पूजा वनाः निमन्त्रणा यानाः^२ ने. सं. ८७७ भाद्रशुक्ल^३ द्वितीयाया शुभदिनय् लाय्कुलिइ विज्याकल । थुखुनु अनेक नृत्य गीत वाद्यवादन सहित यानाः कान्तिपुर महानगर परिक्रमा याकूगु जुल । नापं नगर परिक्रमा सिधय्वाः पूजा यानाः दान दक्षिणा तयाः स्वागत सत्कार यात, थवया लिस्से अनेक प्रजागणपित प्रसाद नं वितरण यानाः बडो उल्लासपूर्ण कार्यं सुसम्पन्न जुल ।

१- जीर्णोद्धार कार्यं सम्पन्न जूगु उपलक्षय् दशकर्म विधिस भाग काःवःपि :-

- (१) दुसर अग्नि स्थापना दिनरात्रि जातकर्म जुक्व जुजुया ।
 - (२) दृष्टिदान क्रिया दिनरात्रि लगंया ।
 - (३) नामाकर्ण न्हिच्छि भोतेबाहाःया ।
 - (४) फलप्रासन्न न्हिच्छि सिकमगुरिया ।
 - (५) कण्ठखुइ न्हिच्छि यतखा दरछे व मखंया ।
 - (६) अन्नप्रासन्न न्हिच्छि ग्वाःपसःया व माछिपातया ।
 - (७) चूडाकर्म दिनरात्रि न्यत इतुं बाहाःया ।
 - (८) व्रतादेश दिनरात्रि वँतुबाहाःया ।
 - (९) समावर्त न्हिच्छिचिच्छि केलया ।
 - (१०) पाणिग्रहण न्हिच्छि असंया, नःघःया चिच्छि ।
- पूर्ण गजूछा सद्यकौमारी पूजा थुलि जुजुयागु तुं जुल ।

- भोजमानपति पुस्तक, पृ. १८

२- लाय्कू बहीया भोजमानपति वज्राचार्यजुया थ्यासफुति ।

३- थुगु दैय् जाकि छमोहःया फँ ३ जुल - भोजमानपति गुर्जुया सफुति ।

थुगु स्वयम्भू जीर्णोद्धार कार्य सम्पन्न जूगु उपलक्ष्य उपस्थित याःपि निमन्त्रित बौद्धविहारया दीपङ्करपि व अन्य देवदेवीपनिगु नामावली :-

- | | |
|---|-----------------------------------|
| १. सेगु देओहा ५ (स्वयम्भू) | ३१. महाबुद्धवाहा १ |
| २. सितगर २ क्वाचपाल (सिगः) | ३२. मूवाहा १ |
| ३. जमगंथि २ क्वाचपाल (जमोवाहाः) | ३३. तओघंवाहा १ दीपङ्कर १ |
| ४. गुवाहा १ | ३४. च्यावाहा १ |
| ५. वज्रयोगिनी १ | ३५. जमचावाहा १ |
| ६. मञ्जुश्री १ | ३६. ओतुछेवाहाष ३ दीपङ्कर ३ |
| ७. पुरांसेगु १ (पुलांस्यंगु) | ३७. समेहो १ असंवाहा १ |
| ८. मयजु १ (हारती) | ३८. न्हूवाहा १ पक्वहिति |
| ९. तेनुमहाकार १ (तिनिख्यः महाकाल) | ३९. दबूवाहा १ |
| १०. थंवही चकंदेव १ | ४०. सुरुथां १ |
| ११. भीमसेन हा ५ | ४१. ओतवाहा १ |
| १२. गदे भेरू १ | ४२. जरजुयावाहा १ |
| १३. विद्याश्वर २ वहिदपं (विजयेश्वरो) | ४३. महाबुद्ध १ |
| १४. सेगु क्वाचपा १ बहि १ | ४४. दुगंवहिषत १ दीपङ्कर २ |
| १५. किंदोवाहा १ | ४५. तेवाहा १ पल्हादेव (पद्मान्तक) |
| १६. तओछेवाहा १ ग्यानरा हा १ (तःछेवाहाः) | ४६. गनावाहा, निगुरि २ |
| १७. क्वाठवाहा १ (क्वाःवाहाः) | ४७. केरलोकेश्वर १ (जनवाहाःद्यः) |
| १८. खेतवाहा १ | ४८. मषंवाहा १ |
| १९. धोकावाहा १ | ४९. मषंवहिष १ दीपङ्कर ३ |
| २०. गंवाहा १ दीपङ्कर २ | ५०. तुछेवाहा १ |
| २१. न्हूरवाहा १ (न्हूवाहाः) | ५१. इतुंवाहाष १ दीपङ्कर २ |
| २२. ग्वाछेवाहा १ | ५२. गुरुखाकाष १ दीपङ्कर १ |
| २३. चावाहा १ | ५३. पमधिजु दीपङ्कर १ |
| २४. हखावाहा १ | ५४. यतखावाहा १ |
| २५. गुवाहाचाया बहि १ दीपङ्कर १ | ५५. अरखुबहिष १ दीपङ्कर ३ |
| २६. ऊवावाहा १ | ५६. मुकूबहिष १ दीपङ्कर १ |
| २७. महामण्डल १ | ५७. न्हूवाहाषत २ |
| २८. नओघवाहा १ दीपङ्कर १ | ५८. इकुवाहाष १ दीपङ्कर १ |
| २९. असंछे दीपङ्कर १ | ५९. रगंवाहाष २ दीपङ्कर ३ |
| ३०. कमिराछेया दीपङ्कर १ | ६०. क्वाथवाहाष १ दीपङ्कर १ |

६१. तमुगूवाहा १ दीपङ्कर १
६२. क्वंसारण १
६३. मसूवाहा १ लोकनाथ १
६४. महाबुद्ध १ तोकंवाहा १
६५. रायकूवहि १
६६. सिकंमुगूवाहा १ दीपङ्कर १
६७. सिकंमुगू दूउताष १
६८. पदुजुया वाहा १
६९. ऊवछेवाहा १ नितेधं १
७०. मदुबहिष १ दीपङ्कर ४
७१. छ्वासपावाहा १ दीपङ्कर १
७२. रगंवाहा १ दीपङ्कर २
७३. रगंतओवाहा १ दीपङ्कर २
७४. ओतावाहा १
७५. पाराछेषत २
७६. खुसिवहिष १ दीपङ्कर १
७७. नवहिष १ दीपङ्कर ४
७८. पोदेछेष १ दीपङ्कर १
७९. तरवाहाया दीपङ्कर १ दुंतस
८०. भोंवाहा १ बहिचा दीपङ्कर १

८१. न्हूछेष १ इमुननिवाहा १
८२. न्हाकंवहि १
८३. ज्याबहि १
८४. पासाचि १ (खास्ति चोवाहाः)
८५. चावहि १ (चारुमति विहार)
८६. नंसाष २ (नंसाःवाहाः)
८७. धंदोदेव १ (धर्मदत्त चोवाहाः)
८८. देओदबहि १
८९. केरसमेकष २ दीपङ्कर १
९०. एतावाहा १
९१. मिखावाहा १
९२. न्हूगवाहा १
९३. ओवाहा २ दीपङ्कर १
९४. त्वाकेववाहा १
९५. केवछेवाहा १
९६. क्वायपाछे १
९७. नबहिष २
९८. नवाहा १
९९. थानावाहा १
- थुति देओ बुद्धमथन वोङ्ग जुर ।

शिवमथया

- | | |
|------------------------|------------------------|
| १. पशुपति १ | १०. ग्वकर्णेश्वर ३ |
| २. वाशुकि १ | ११. वभरु १ |
| ३. चगु १ | १२. जयमंगरादेवी १ |
| ४. मृगस्थरी, रूचराहा १ | १३. लोहसारा चाभै |
| ५. ग्वरपनाथ १ | १४. ह्योसपि १ |
| ६. गुह्येश्वरी २ | १५. भैरव गोकर्णया १ |
| ७. जयवागेश्वरी १ | १६. भवानि, विसुरूपसं १ |
| ८. वच्छरादेवी १ | १७. भुयूजरसि १ |
| ९. हरनेश्वर १ | १८. विसुरूप १ |

१६. महिषासुर १
२०. परमश्वहिति १
२१. कमरातिर्थ १
२२. पासिको १
२३. श्वभायगति १
२४. महाविसुरूप १
२५. भगवति चिकंअत १
२६. अजाभैरओ १
२७. पचिरिदेओ १
२८. रुमधिष २
२९. फिव १
३०. लषुतिर्थ १
३१. रूतिष ३
३२. प्यायश्वनकि १
३३. कहग १
३४. क्वरांभरु १
३५. डतभरु १
३६. चन्दरषु १
३७. असंभरु १
३८. न्हयकंतारा १
३९. ओतुभरु १
४०. धर्माथरी १
४१. श्रीकुमारी १
४२. बलिरोहो १

४३. डायसोर १
४४. राजभैरव १
४५. हनुमन्तह्य २
४६. दिगुतरेजु १
४७. मिह्यजुजु १
४८. महांकारजु १
४९. क्वथुपिथि १
५०. मयति १
५१. देओरपु १
५२. सरमा १
५३. मडामयजु १
५४. रुचुंभरु १
५५. नओरि १
५६. फूत १
५७. चुगां इन्द्रायणी १
५८. होरोचो, चोनिदेओ १
५९. तोदर १ मोरपतादे १
६०. नंसार भगवति १
६१. धरंपुरिया १
६२. चण्डेश्वरी १
६३. राजइनाय १
६४. सिथिदेव १
६५. कमरातिर्थ १
६६. रदरया १

स्वयम्भू व शान्तिपुर विषय कयाः लामा पाल्देन येशेताशिजुं श्री ५ बडामहाराजयात चेतावनी

स्वयम्भू महाचैत्यप्रति श्रद्धाभक्ति केवल नेपाःमि जनतां जक तया वइच्चंगु मखु, हिमालय प्रदेश सुदूर उत्तरापन्थ समस्त तिब्बती जनतां नं छ्वोर्तेन नाम्वासुम् त्रिमहाचैत्य (स्वयम्भू, खास्ति चीवाहाः व नमबुद्ध) धालकि थुलि श्रद्धा व विश्वास तः कि दर्शन, स्पर्शन एवं स्मरण याना मात्रं जीवन सार्थक धइगु इमि थःगु परम्परा खः, देशधर्म खः ।

थुजाःगु प्रकारं तिब्बती जनतां उक्त त्रिमहाचैत्यप्रति श्रद्धाभक्ति तय्फुगु थ्व परम्परा स्वानाच्चंगु हे धर्मगुरु प्रसिद्ध अवतारी लामा, घेस्ये, धेलोङ्ग आदिपिनिगु धर्मोपदेशद्वारा हे श्रद्धा निश्चय दइवइच्चंगु खः । थुकियागु ज्वलन्त उदाहरण मध्यय् छगू थ्व नं खः—स्वयम्भू महाचैत्यप्रति अपार श्रद्धाभक्ति तयाः नेपाल राष्ट्र निर्माता श्री ५ बडामहाराजाधिराज पृथ्वीनारायण शाहजुयात विवेकपूर्वक पाल्देन येशे ताशि (श्रीमान् ज्ञानमङ्गल) लामाजुं थथे चेतावनी ब्यूगु दु—

छिमेकी मित्र राष्ट्र भोट देसया ततःधंपि धर्मगुरु अवतारी लामाजुपिनिगु मनय् नं थथे सम्कय् जुयाच्चन—बौद्धतीर्थस्थल गोर्खालो खसतय्सं नष्ट भ्रष्ट याइ ला धइगु तस्सकं धन्दा पीर कयाः गोर्खाधोश जुजु पृथ्वीनारायण शाह वयाः काठमाण्डू उपत्यका आक्रमण यानाच्चंगु समयय् युद्धया क्रमय् स्वयम्भूया चव्य पवित्र डांडाय् थानाचौकी तयाब्यूगुलि यानाः बौद्धतय्त थ्व भय व शंका कन अप्पो जुल । उकि थुगु हे इलय् पाल्देन येशेताशि लामाजुं अमि थःगु तिब्बती पञ्चाङ्गकथं—पुरुषं धुं वर्षया न्हापांगु महिना फिखुन्हु दुबलय् (ने. सं. ८८५ स) छपौ पो च्वःगु दु । उकिया अर्थ थथे खः—

१- पाल्देन येशे ताशि जीवन चरित्र भाग १, पृष्ठ २८९

- पृथ्वीनारायण शाह जीवनी चरित्र, नेपाल विजय, पृष्ठ १६१

“नेपाःया तःधंगु नगर (काठमाण्डू) ककुच्छन्द तथागतयागु खः । उकिं छं शान्तिपुरया—
चक्रसम्बर, महासम्बर, स्वयम्भू महाचैत्यया देवप्रासाद स्यंकेमते । थ्व देवालय छुं गनं स्यंकल धाःसा
छंगु शरीरय् नं भिनी मखु । छं नेपाःदेया मेगु गुगुं देवालय नं स्यंकेमते ।”

थुगु पौया आशयकथं थ्व ज्ञात जू—पाल्देन येशेताशि लामाजुं स्वयम्भू महाचैत्यप्रति तःधंगु
श्रद्धा भक्ति तयाः भ्याः भचा हे मग्वासे गोर्खाया जुजु पृथ्वीनारायण शाहयात चेतावनीया रूप्य
शुभसन्देश वियाच्चंगु खः ।

थुकथं सँदेया प्रसिद्ध धर्मगुरु अवतारी लामाजुपिके स्वयम्भू महाचैत्यस गुलि गथे श्रद्धा विश्वास
दु धइगु स्पष्ट भाव व्यक्त याः । उकिं थुगु स्वयम्भू क्षेत्रय् ततःधपि लामाजुपिनिगु श्रद्धा सत्कीर्ति छुं
कम मजू । प्रमाण स्वरूप थौतकं स्वयम्भू चाकलय् प्यंगू खुगू अनुपम उपहार स्वरूप गुम्वात सुरक्षित
जुयाच्चंगु दनि ।

श्री ५ रणबहादुर शाहया शान्तिपुर प्रवेश परिणाम


श्री ५ रणबहादुर शाह वडो तेजस्वी एवं थःगु हे तालयाह्य जुजु जुयाचवन । थ्वय्कःया राजराजेश्वरी, सुवर्णप्रभा, कान्तवती तथा त्रिपुरासुन्दरी रानीपि दु । खास थः विवाहिता रानी सुवर्णप्रभा पाखे जन्म जूह्य रणोद्यत शाह दय्क दय्कं कान्तवतीया प्रेमं विह्वल जूह्य रणबहादुर शाहं गीर्वाणयुद्ध विक्रम शाहयात हे नेपाःयागु राजसिंहासनय् तय्गु बिचाः यानाचवन । थःगु शेष धुंकाः थ्व ज्या सम्भव जुइ मखुगुलि जीवित अवस्थाय् हे थ्व ज्या पूर्वकेमाः धइगु विचार कोजित । रणोद्यत शाह भित्रीनीयापाखे दुह्य काय् धकाः घोषित यानाविल । थुलि जुयाः नं थः सी धुंकाः काजि भारदारतय्सं गीर्वाणयुद्ध विक्रम शाहयात थःगु हे बैध राजा मानय् य यगु खँय् सन्देह जुयाच्वंगुलि रणबहादुर शाहं छिमेकी पहाडखण्डया विशेष बलवान् व प्राचीन राजवंशया उत्तराधिकारी पाल्पाया जुजु पृथ्वीपालसेनया ल्हातं गीर्वाणयुद्ध विक्रमयागु राजतिलक विइकेगु निश्चय यात । धया गथे अथे हे पृथ्वीपालयात काठमाण्डूस सःतालि वइगु हे ल्हातं वि. सं. १८५५ सालं गीर्वाणयुद्ध विक्रमयागु राज्याभिषेक सम्पन्न याःगु जुल । ज्या पक्काह्य रणबहादुर शाहं जेठी महारानी राजराजेश्वरीदेवीयात बालक श्रीगीर्वाणयुद्ध विक्रमया संरक्षिका यानाः लःल्हानाविल । थुलि जुसेलि रणबहादुर शाहं संन्यास ग्रहण यात । उबलेनिसे वइगु नां स्वामि निर्गुणानन्द धइगु जुल । संन्यास ग्रहण याःसा नं रणबहादुर शाहं कान्तवती महारानीयात तोतेफुगु मखु । व हे कारणं कान्तवती नं स्वामि महाराज नापं ग्वलय् वनाः च्वंवन ।

ग्वलय् च्वंवनाः गुलिचां मदुवं थः प्रियतमा कान्तवतीयात क्षयरोगं ग्रष्ट जुल । क्षयरोगं सारं ग्रष्ट जुसेलि थाय् हिलाविल धासा रोग शान्त जुइ धइगु विचारकथं रणबहादुर शाह थः महारानीलिसे यलय् वनाः च्वंवन । थः कलाःयागु रोग शान्ति निम्ति ब्राह्मण, जोतिषी एवं गुरु पुरोहित व गुभाःजुपिसं अनेक प्रसिद्ध देवदेवीया थासय् पूजा पाठ होम व दान प्रदान याकेविल । गुलिखय् उपाय जत्त जुक्ति

श्रीस्वयम्भू महाचैत्य



स्वामि जुजुया निम्हतिपू



यानाः नं छुं लगय् मजुल, आखिर वि. सं. १८५६ कान्तवतीया व हे त्वचं देहान्त जुल । धयातःगु दु^१—कान्तवती वियोग जूगुलि सारै शोक कयाः थः कलाःयागु लं थःगु छातिइ दिकाः तच्चोगु विरह यानाः खल ।

प्रेमं विह्वल जूह्य स्वामि जुजुया थः कलाः सिनावसेलि वइत थुजाःगु विह्वलता उत्पन्न जुल, गुकि यानाः वं वयाय् ज्यू थ्वयाय् मज्यू धइगु तकं भाःपी मफयाः थः कलाःया लागी गन गन देवदेवतापिथाय् भावभक्ति याके व्यूगु खः ठिक विपरित अन अन च्वंपि देवदेवता व पूजारीपित नं अपमान व विनाश याना हयाच्वन । ब्राह्मणपित दान प्रदान यानात गु नं लितकयाहल^२ । लिसेलिसें धमाधम थाय्थासय् उपद्रव मचय् याना हयाच्वन^३—करवीर श्मशान ध्वंश याकेविल, येँया तलेजु भवानी स्यंके विल, गुह्येश्वरी कुण्डलस प दुछ्वय्के विल, ग्वलया मिलह्य बैद्यया छेँय् मि तल, लामलया जैनसि बैद्य प्रमुखं ग्वलया बैद्यतय् मि या रापया न्ह्योने तयाः शास्ति यात, ग्वलया बैद्य व सक्व वज्रयोगिनीस पुरश्चरण तयापि सिद्धानन्द, जयन्तपित प्राण दण्ड तकं विल । क्वन्ति महादेवयाथाय् खिकुं थन, थुखुनु न्हिनय् उरो व्वल । तुण्डिखेलया महाकालया न्हाय् त्वाल्हाकल^४ । अथे हे स्यंगुया हारतीमाजुयात मिइ उत^५, इत्यादि विघ्न उपद्रव यानाः नं मत्सरी जुयाः हानं स्वयम्भूया प्रसिद्ध शान्तिपुर गुफाय् जवरजस्ति ताः फोरय् यानाः दुहांवने धकाः जवगु पलाः छपलाः जक तय्वं जवगु मिखां मखन, अथे नं स्वामि जुजुं फूर्ति हे यात कि जवगु मिखां मखंसां खवगु मिखां जूसां ज्या काय् ज्यूनि, अन दुने दुहांवनाः शान्तिपुरस मि तयाः भश्म यानाबिइ धइगु घोर दुर्मति यानाः दुहांवनेगु कोशिश यानाः हानं खवगु पलाः जक तय्वं खवगु मिखां नं मखन । थथे जूगु खनाः तस्सकं ग्याकाः हतरपतरं पिहांवल । थथे जूगु खनाः दर्शकजनपि आश्चर्य जुल । थुलिमछि देवदेवतापिसं सुनां छुं प्रत्यक्ष क्यने मफु थुह्य साक्षात् परमेश्वर श्रीशान्तिपुरया अधिष्ठातृ महासम्बरगर्णपि धन्य धन्य धकाः प्रशंसा यानाच्वन । थुखे स्वामि जुजुया धाःसा मिखां मखंकाः महाधन्दा पीर कयाच्वन । उवलय् अन च्वंपि पूजारी व बुरापाकातय्सं विन्ति यात—‘महाराज ! किसली तयाः अपराध क्षमा पवन विज्याहुँ ।’ थःगु दृष्टि बन्धन मोचनया लागी असर्फि दक्षिणा तयाः किसली देच्छायाः अपराध क्षमा पवन । उघरिमय् जवगु मिखा चाल । थथे जूगु स्वयाः हानं शान्तिपुरया पूजारीं धाल—‘मखु महाराज ! छगः किसली तयाः क्षमा पवनेवं छगः मिखा चाल धाःसा हानं मेगु किसली छायाबिल धाःसा निसन्देह मेगु मिखा नं चाली ।’ थ्व खँ तर्क संगत खः धकाः मनं मनं भाःपाः हानं असर्फि तयाः किसली द्वहलपाः दुनुगलंनिसे अपराध क्षमा पवन । फलस्वरूप निगः मिखा नं न्हापाथेंसंतुं चक्कना

१- त्रिरत्न सौन्दर्य गाथा, पृ. १६१

२- ऐतिहासिक रूपरेखा, पृ. २४८

३- थ्यासफू, हर्षरत्न शाक्यया संग्रह, पृ. ३४

४- महर्षी माधवलाल जोशीया जीवन चरित्र, पृ. ५६-५९

५- देवमाला वंशावली पृ. ७४ तथा प्राचीन नेपाल सं. २४, पृ. ६

वसेलि स्वामि जुजुया अपार हर्ष जुल^१ ।

थ्वसपोल साक्षात् परमेश्वर शान्तिपुरयात गुगु जि दुर्मति तयाः अहङ्कार यानाः जवरजस्ति शान्तिपुर प्रवेश जुयागु फलं जिगु मिखां मखने धुंकूगुलिइ पूजारीपिनिगु सरसल्हानुसार सुवर्ण दक्षिणा तयाः किसली छायाः अपराध क्षमा फवनागुलि न्हापाथे^२ तुं मिखा चक्कना वन । थथे जुसेलि शान्तिपुरया प्रति तच्चोगु श्रद्धाभक्ति उत्पन्न जुयाः अर्थात् थगु मिखा चक्कनावंगु महान् उपलक्ष्य तःधंगु लसताय् थुगु थासय् सदांया लागी स्वामि जुजुं स्वयम्भू शान्तिपुरप्रति विधिवत् पूजा यानाः दच्छिया निगु अर्सफि छायागु गुठी संकल्प यानाथकूगु जुल । अद्यापि थुगु थिति यथावन् कायम जुयाच्चंगु दनि । थुगु थासय् रणवहादुर शाहयागु प्रस्तर मूर्ति (सालिक) नं खने दुगुलि अज्ज थुगु थितियात संरक्षकत्व यानाच्चंगु दु धइगु स्पष्ट जू^३ ।

थुगु थिति प्रत्येक दं कार्तिक पूर्णिमा व माघ पूर्णिमाया दिनय् श्री ५ या सरकार गुठी खर्च अहां व स्वयम्भूया थकालि एवं शान्तिकर गुरुजुया सन्तान येँ मखंवाहाःया वज्राचार्यपि च्वनाः थुगु थिति अद्यापि चलय् याना वइच्चंगु दनि ।

१- नेपाल म्यूजियमय् च्वंगु वंशावलीया टिपोट, आनन्दमुनि वज्राचार्यजुया संग्रहपाखे । थ्व हे इतिहासया प्रमाणकथं आनन्दमुनि वज्राचार्यजुं उगु अर्सफि फुक्क लितकाय्गु विषय कयाः सिंहदरवारय् अग्निकाण्ड जुइ न्ह्यो गुठी संस्थानयात कारवाहीया निम्ति निवेदन तःगु दु । उगु अर्सफि लितकयाःलि शान्तिपुरय् लुपौ तय्गु धकाः जिक्र याःगु खः । थौतक उकिया निर्णय छुं सिइ मदुनि ।

२- थुगु सालिक वर्तमान स्वयम्भू मूर्ति संग्रहालयय् सुरक्षित यानातःगु दु - उकिइ पादपीठस अभिलेख नं दु - “श्री ३ रणवहादुर शाह महारानि जोगमाया” ।

श्री ५ गीर्वाणयुद्ध विक्रमया शान्तिपुरस महापूजा गुठी

स्वामि जुजुया तस्सकं प्रेमोह्य स्वामिनी कान्तवतीयात क्षयरोगं कयाः यानायानागु उपायं मजियाः वया मृत्यु जुल । थुह्य कान्तवतीनाप वियोग जुइमाः गु कारणं यानाः स्वामि महाराजया तमं छुं मिखां मखनाः अनेक उपद्रव मचय् यात नं गुलिखय् देवदेवतापिसं स्वामि जुजुयात छुं प्रत्यक्ष क्यने मफुत । याक्वपाक्व सकार जूगु थें जुल । तर थ्व हे क्रमय् शान्तिपुरीइ नं गुगु दुर्मति तयाः जवरजस्ति दुहांवनेगु स्वत, उवलय् अन थःत वज्रप्रहार जूगु थें थःगु मिखा निपां मखसॅलि साक्षात् शान्तिपुरयागु प्रत्यक्ष खनाः तच्चोगु भय त्राशं विह्वल जुयाः सुवर्ण दक्षिणा तयाः अपराध क्षमा फवंगुलि न्हापाथे तुं छुं स्वाय्क मिखां खसॅलि उगु महान् हर्षया उपलक्षय् शान्तिपुरीस भव्यपूर्वक क्षमा पूजा जूगु जुल ।

थुगु प्रकारं स्वामि जुजुया मिखां खंगुलि राजपरिवार सकले हर्ष जुल, लिस्सें नकतिनि राजसिंहासनय् च्वंहा मचाचाहा जुजु श्री ५ गीर्वाणयुद्ध विक्रमया संरक्षिका जुयाच्चं पि महारानी राजराजेश्वरी, सुवर्णप्रभा, ललितत्रिपुर सुन्दरीपिसं अत्यन्त धन्दा कयाः थथे धाःगु दु— थुह्य मचाहा जुजुयागु शरीरय् गुगु देसय् फइलय् जुयाच्चगु तःकै आदि छुं दोष मवय्मा, लिस्सें देसय् विघ्न बाधा अशान्ति मजुइमा । थज्याःगु मतिइ तयाः शुभ संकल्प यानाः स्वयम्भू शान्तिपुरस महापूजा याकेबिल । छुं दिन लिपा थ्व थिति चिरस्थायी जुइमा धइगु हेतुं गुठी नं तयाव्यूगु जुल । धयातःगु दु— थुगु महापूजा क्षमापूजा लसतापूजाय् थः पुरोहित श्रीदेवजकेशरी पण्डितजुं विधिवत् शुभ संकल्प वाक्य परलपाः वि. सं. १८५६ आश्विनशुक्ल अष्टमीया दिनय् सुवर्ण दक्षिणा तसे पूजा याकूगु जुल । लिस्सें थुगु महापूजा यानाः बाःछि लिपा आश्विनकृष्ण अष्टमीखुनु श्री ५ गीर्वाणयुद्ध विक्रम शाहजुं २२४ मुरि उठ्य जुइगु कूशोदक जग्गा शान्तिपुरया नामय् प्रदान यासे ताम्रपत्र वक्सय् जूगु जुल ।

थुगु ताम्रपत्रया साक्षि खः- मन्त्रीनायक, पञ्च, श्रीरणोद्यत शाह, श्रीसमरशेर शाह, श्रीबलभद्र शाह, श्रीबिदुर शाह ।

श्री ५ गीर्वाणयुद्ध विक्रम शाहं शान्तिपुरय् महापूजा निमित्त गुठी समर्पण याय् धुंकाः निदं लिपा श्रीस्वयम्भू हारतोदेवीघात नं वि. सं. १८५८ साल अक्षय तृतीया दिनय् हारतीया मन्दिरय् लुंगजू द्रहलपा बिल^१ ।

थुगु समय प्रजागणपिनि मस्तय्के शितला रोग (तःकै) मचय् जुयाच्चन, उगु रोग सरय् जुइ योगु जूया निमित्त मचाचाह्य जुजु गीर्वाणयुद्धयात नं शितला रोगं कल धाःसा छुयाय् धइगु मतिइ तयाः मत्यवं मांह्यथेसंतु^२ वियोग जुइका च्वने मालिइ धकाः महाधन्दा कयाः संरक्षका जुयाच्चंहा जेठी महारानी राजराजेश्वरीं स्वामि महाराजया हजुरीइ बित्ति यात- 'महाराज ! छलपोलया अत्यन्त योह्य सुपुत्रयात शितला रोग पाखे^३ बचय् याय्त छु याय्माःगु खः जत्त याना बिज्याहुं ।' थुलि महारानोपिनिगु वचन न्यनाः स्वामि महाराज मन्त्री, भारदारपि न्ह्योने सःताः हुकूम जुल- 'थ्व जिगु देसय् हाकुगु^४ दुने कचिमचात तय् मदु धकाः नाय्खि च्वय्का ब्यु । यदि नाय्खि च्वय्काः नं पिहांमवन धाःसा सिपाहिंतय्सं घेरय् याकाः अनेक शास्ति यानाः पिछ्वया ब्यु ।' स्वामी जुजुयागु क्रूर वचन न्यनाः त्वाःत्वालय् थासंथासय् नाय्खि च्वय्का बिल ।

स्वामि महाराजयागु आदेशानुसार कचिमचा दुपि मां-अबुपि सर्गतं क्वच्यूवःगु थे^५ त्राहित्राहि जुयाः चलाखिपि ज्ञां दुपि उख्ये थुख्ये गुप्तवास जुयाः सुलाः सुलाः च्वन । गुलिं विस्युं वनेमलाःपि सुले मफुपि सोका सिधापित ज्वनाः ज्वनाः धमाधम हाकुगुं पितिन । गुलिं मवसे धिसमिस यानाच्चंपित सिपाहिंतय्सं ज्वंज्वं न्हाय्कंप्वांचं दादां कचिमचात पितिनाछ्वत । नसावजि ब्यकुं च्यानाः कचिमचा लुकुं छिनाः मां-बौ तामाखुसि पारीइ वन । लैय् ईमस तस्सकं दुःख सिल । ये^६ देसं दनावनाः ख्वपय् वासं च्वन, अनं वनाः वनेपा, पलांचोक, दोलखा, जुनाः तामाखुसि पारीइ थ्यंकःवन । थाय् थासय् च्वांपि तलेजु, चण्डेश्वरी, भगवतो, भीमसेन व महादेव दर्शन यानाः मचातय्गु सुरक्षा-वर पवंपवं वन । मचा जक छुं मजूसा बखुं छजो ब्वय्केगु व लुं वहःया दाफस्वां शितलामाजुयात छायागु भाकल यात । अय् नं मचात तःकै वया पुकुपुकु सित । सिइह्य मचायात थुनेगु उर्दी मदुगुलिं बाह्यमचा मामं ज्वनाः बाह्यमचा बौनं ज्वनाः खुसिइ कुर्के छ्वत ।

थुकथं स्वामि जुजुया धर्म मदयाः प्रजां तस्सकं दुःख स्यूगु खं शितलामाजुयागु थासंथासय् हाला वइच्चंगु लोकगीतं स्पष्ट नक्सां न्व्वानाच्चंगु दु^७ ।

१- हारतीदेगःया लुंगजूया अभिलेखपाखे । थ्व अभिलेख क्यनादिइह्य - श्रीचिनिआकाजी ताम्रकार, मदु पीगंननि ।

२- बाखं मे, पृ. ७४, प्रकाशक - च्वसापासा, ने. सं. १०९३

शितलामाजुया लोकगीत स्वामि जुजुया करतूत

(राग कहकोला, ताल परताल)

सितलामाजु स्वहुने परजाया गथिन हवाल ।धु।
न्यनामदु खनामदु कचिमचा तय मदु
महाराजया हुकूम जुल ।१।
नायखिन बाजन थायेका सिपाहीन घेरे याका
कचिमचा पतिना व छवत ।२।
नसावजि व्यकुंच्यासे कचिमचा लुकुंछिसे
वनेमाल तामाखुसि पारि ।३।
छहामचा लुकुंछिसे छहामचा व्यकुंच्यासे
छहामचा लुतुलुसे वने ।४।
यँदेशं दनावना खोपदेशे वास जुल
तलेजुमाजु दरसन यासे ।५।
खोपदेशं दनावना बंदेपास वास जुल
चण्डेश्वरी दरसन याये ।६।
बंदेपानं दनावना पलांचोस वास जुल
भगवती दरसन यासे ।७।
पलांचोकं दनावना दोलाघाते वास जुल
भीमसेन दरसन याये ।८।
दोलाघातं दना वना तामाखुसि वाल जुल
वनेमानि तामाखुसि पारि ।९।
दोलखा देशं दना वना तामाखुसि पारि थ्यन
महादेव दरसन याये ।१०।
नययात नसा मदु तिययात वस मदु
चवनेयात जित वास मदु ।११।
लसि मखु पसिमखु न्हाकंप्वाचं दायाहल
सिपाहीनं घेरे याना हल ।१२।
कई वीह्य कछलामाजु लखजायकीह्य सितलामाजु
यनकीह्य बछलामाजु याके फोने ।१३।

ध्वहे मचा रहेजूसा जोलिजोल बखुन बोयके
लुंयागु ओहयागु दाफोस्वान छाये ।१४।
सुरजकोमजो थास चिकुं पुना मचासित
माम बुबां नुग दाया खोल ।१५।
सीह्य मचा उये मदु मचागाले थुने मदु
परजाया गथिन हवाल ।१६।
बाह्यमचा मामं जोसे बाह्यमचा बुबां जोसे
तामाखुसि कुतकाव छवत ।१७।
स्वामि जुजुया धर्ममदया कचिमचा वाकेछवत
वनेमाल तामाखुसि पारि ।१८।
नेपालया छत्रपति श्रीरणबहादुर
परजान अतिदुःख सिल ।१९।
मतेमते सितलामाजु सहस्र विनति छिके
याहुने लोक उद्धार ।२०।

स्वयम्भू महाचैत्यप्रति लामा देवाधर्मजुया जग्गा व ग्राम प्रदान

सँदेया^१ प्रसिद्ध देवाधर्मा लामाजु नेपाः वयाः श्रीस्वयम्भू महाचैत्य दर्शन यानाः छुं कारणवश शाक्य संबत् १७०८ स स्वामि जुजु रणबहादुर शाहयात नापला वंगु जुयाचवन^२ । थथे जुजु नापलायगु अवसर प्राप्त जूगुलि लामा देवाधर्माजुं निवेदन चह्लय् यात । उगु निवेदनय् थथे धयातःगु दु— ‘महाराजया तापाःवाज्या श्रीनरभूपाल शाहया सन्तान मदयाः सारै चिन्तित जुयाचवंह्येसित जिमि तापाःवाज्यां थःगु शास्त्र विधि यत्न युक्ति यानाबिल, फलस्वरूप सरकारया वाज्या दिग्विजय याइहा सपूतहा कौशल्या महारानीया पाखे पृथ्वीनारायण शाह जन्म जुल ।’

पृथ्वीनारायण शाह जन्म जूगु घटनाक्रम प्रसंगवश छत्वाःचा खँ न्ह्यथने^३—

न्ह्यापा पृथ्वीनारायण शाहया अबु महाराज नरभूपाल शाहया निहा महारानीपाखे नं सन्तान मदयाचवन । नि सन्तान जुल धकाः जुजुया मनय् चिन्तित जुयाचवन । छन्हु कौशल्या महारानीया ह्यगसय् थथे ह्यानाचवन कि देवाधर्मया छहा तःधंहा लामा छहा दु, वइत हयाः उपाय यात धाःसा छंत सन्तान प्राप्त जुइ धकाः धाःगु थुगु स्वप्न सन्देश जुजुयात विस्तारं खँ कन । थुगु खँ न्यनाः जुजुं गुरु पुरोहित मन्त्री भाइभारदार मुंकाः सल्हा यात । ‘थुकिइ छु उपाय जत्न याय् मालिइ ?’ धकाः न्यंबलय् व हे देवाधर्मा लामाजुयात जूगु खँ तयाः छिकय् यानाछ्वत— ‘छ पि बिज्यानाः उपकार यानाबिल धाःसा जिमित सन्तान दइ । यदि सन्तान दत धाःसा छःपिसं धा गु जि बिइ’ थुकथं व्यहोरा च्वयाः लालमोहर समेत तयाछ्वत । अथे नं लामाजुया कारण विशेषं ‘जि आः थथे वय्मलानि,

१— देवाधर्मा लामाजु गुटान देसयाहा धकाः च्वयातल—हिमालचुली, वर्ष १०, अंक ९

२— देवमाला वंशावली, पृ. २५

३— श्री ५ पृथ्वीनारायण शाहको उपदेश व्याख्या, पृ. ९००

लिपा जक वयां ज्युसा जि वय् ।' धकाः लामाजुबागु लिसः थ्यँसेलि महाराज, नरभूपाल शाहं हानं पौ च्वयाः 'छःपि मवसें मजिल' धयाः मेगु लालमोहर समेत तयाः लिस्सें सरदार छ्वयाः सःतके छ्वत । सरदारनाप लामाजु गोरखाय् थ्यंकःवल । लामा थ्यँसेलि बडो स्वागत सत्कार यात, थःत जूगु व्याक्क खँ नरभूपाल शाहं कन- 'जितः सन्तान दत धाःसा छःपिसं गुगु धाल उगु जि विइगु जुल ।' उगु हुकुम न्यनाः लामाजुं आज्ञा जुल- 'आः थत्थेंयात जितः छुं माःगु मदु । जि जत्त उपाय यानाः जन्म जुइहा काय्मचा लर्तर जुइमखु तःधंहा पराक्रमिहा जुइ ।' 'वं लिपा आर्जन याःगु मुलुकय् छःपिसं गुगु फवन उगु विइ' धकाः व्यहोरा च्वयाः लालमोहर यानाः ह्लातय् लःह्लानाबिल ।

थुलि जुसेंलि लामाजुं उपाय यानाबिल । छुं दिन लिपा महारानीया गर्भ धारण जुसेंलि लामाजुं लिहांवनेत विदा फवन । तर 'आः थत्थे' छःपिसं विदा काय् मज्युनि' धकाः सम्फ्य यात । थ्व खँ न्यनाः लामाजु छुं दिनतक गोरखाय्संतुं च्वन ।

महारानीया गर्भ धारण जुयाः न्हय्ला दुबलय् सन्तान जन्म जुल । पृथ्वीनारायण शाह धइगु नामकरण यात । जन्म जूहा मचा समर्थवान् जुइहा खः धइगु महशूस जुसेंलि लामाजुयात बडो आदर सत्कार यानाः विदा बिल, लामाजु लिहांवन । जुजु तस्सकं खुशि जुया च्वंच्वन ।

थथे नरभूपाल शाहयागु महान् समस्या पूर्ति यानाव्यूगु उपलक्षय् वियातइतःगु लालमोहर समेत क्यनाः विन्ति याःगुलि जुजु रणवहादुर शाहजु अत्यन्त प्रशन्न जुयाः थुहा देवाधर्मा लामाजुया नामय् नीखः २० बुँ व पहाडपाखे यागु १५।२० ग्राम समेत वक्सय् जुयागु दु धकाः लालमोहर यानाबिल ।

थुगु लालमोहरय् च्वया व्यूगु सम्पूर्ण जग्गा जमीन एवं ग्रामया आयस्ता समेत श्रीस्वयम्भू महाचैत्ययात भक्तिपूर्वक समर्पण यानाथकूगु जुल । थुकियागु आयस्तां स्वयम्भू अमिताभ बुद्धया न्ह्योनेसं च्वंगु गुम्बा दय्काः शोभावृद्धि यानाबिल । लिस्सें पर्वपर्वकालय् चलय् याय्माःगु पूजा आज्ञा सम्बन्धी गुठी समेत दय्काः थुगु धर्मकीर्ति चन्द्र सूर्य दत्तले स्थिर जुइमा धकाः शुभ संकल्प यासे थःगु थासय्तुं लिहांवन ।

महापण्डित शाक्यभद्रया स्वयम्भूपति श्रद्धा चन्दा

स्वयम्भू महाचैत्य वन जंगलया दथुस लानाच्वंगुलि यानाः थुकिइ प्राकृतिक तथा मानवीय प्रकोपपाखे वरावर अनेक प्रकारं क्षतिग्रष्ट जुयाच्वंगु खँ इतिहासय् थाय्थासय् उल्लेख जुयाच्वंगु दु ।

स्वइगु पालय् अथवा छु वर्षय् थ्व धाय् थाकु, छःहु स्वयम्भू महाचैत्ययागु यष्टिदारू (योसिँ) त्वःधुयाः उकियागु जीर्णोद्धार याय्गु आवश्यक जुयाः श्रद्धा चन्दा संकलन जुयाच्वन । थ्वहे श्रद्धा चन्दा संकलनया प्रसंगय् सँदेसय् थ्यंक नं प्रचार जुजुं वन । धर्मयाप्रति श्रद्धा भक्ति दुपि उकिइसं स्वयम्भू महाचैत्य जीर्णोद्धार धालकि कन अप्पो श्रद्धां भय्ब्यूपि सँदेया श्रद्धालु दातापि मध्यय् ख्याति प्राप्तह्य फ़िखाछेँया महापण्डित श्रीशाक्यभद्रजुं लुँचुं स्वमना व लुँ फ़िन्यातोला चह्लय् यानाहल ।

थ्व हे इलय् जूगु स्वयम्भू जीर्णोद्धार कार्य निम्ति नेवाःत व भारतीय एवं थाकुरतय्सं नं अनेक ज्वाहारात दोहलपाः सहयोग प्रदान यागु खँ न्ह्यथनातल ।

थुगु पटकयागु प्रपुष्टगु यष्टिदारू पोतोङ्ग धाःगु याउँसे च्वंगु सिँयागु योसिँ ७२ कु जाः उच्चगु धयातल । थ्व योसिँस फ़िछह्य जीवरत्न माताया कार्यापि लीन जुयावंगु दु । थुकिइ सुनां गुह्यसिनं पट्भद्रौषधी लेपन यात धाःसा दुर्भिक्ष कल्प रोगं मुक्त जुइ । छत्र चह्लय् यानाः गणचक्र पूजा यात धाःसा अनिकाल कल्पं रहित जुइ । हानं थःथःह्य उत्पन्न जूपि ५८ ह्य गुह्य देवतापि बिज्याःगु थुगु योसिँयात श्रद्धाभक्ति तल धाःसा आपालं पुण्य प्राप्त जुइ धकाः कनातल^१ ।

स्वयम्भू महाचैत्यस लामा श्यामापजुया दिव्य घण्ट समर्पण व शिलापत्र जीर्णोद्धार

सँदेया बौद्धधर्मकथं थःगु परम्पराय् तस्सकं प्रसिद्धह वैशाली महाविहार (गुम्बा) स च्वंह
श्रीश्यामार्पा लामाजुया किगूगु अवतारी जुयाच्वंह अपराजित श्रीमान् धर्मसिद्धि सागर (छ्वेडवै
धुवाग्याछो) नामक लामा जुयाच्वंगु व्यलय् श्रीस्वयम्भू धर्मघातु दर्शन याय् निम्ति नेपाः विज्यात^१ ।

वय्कः लामाजुं स्वयम्भू महाचैत्यप्रति अत्यन्त श्रद्धा भक्ति तथाः दर्शन व पूजन यानाः तःखःगु
दिव्य घण्ट छगः नं स्थापना यानाथकूगु दु । थुगु दिव्य घण्टया विषयय् थथे उल्लेख याना तइतःगु दु—
जम्मा धानि १७० ग्यंगु थुकिइ उगु समययागु दरभाउ अनुसारं कँसया मू व ज्याला समेत यानाः
व्याक्कयां किस्वसः व ख्वीमोहः १३६० तूगु खँ न्ह्यथनातल । नापं कालिगरतय्गु नां नं अङ्कित
यानातःगु जुल— सोवाहाःजुया विष्णु, वँतुवाहाःया लखेमुनि, भाजुसि, कृष्णरखेपति एवं छत्रसि आदि ।
वर्तमान थुगु घण्ट प्रतापपुर मन्दिरया लिक्क वैरोचन तथागतया न्ह्योनेसं स्थापना यानातःगु जुल ।

जुजु जयप्रकाश मल्लया समयय् वज्रआयुरीसमणि लामाजुयागु महान् संकल्प अनुसार
जीर्णोद्धार जगु विषय उल्लेख याना तइतःगु शिलापत्र मिइ लाना तज्ज्यानाः आपालं स्यंनाच्वंगु खनाः
थुगु संसह ल्वहं उद्धार याय् निम्ति उकियागु प्रतिलिपि मापि च्वइतःगु ल्हासा देसय् तयातःगु काय्के
छ्वयाः न्हापा गथे खः अथे हे संतुं संसह ल्वहं किइका स्थापना यानाविल धइगु खँ अङ्कित याना
तइतःगु जुल । थुगु शिलालेखय् वय्कः श्यामार्पा लामाजुयात— “श्री ३ रक्तमौलिधर महासत्गुरु
निर्माणकाय” धकाः प्रशंसा यानातःगु दु^२ ।

१- स्वयम्भू स्थित घण्टाभिलेखद्वारा ।

२- स्वयम्भू स्थित विशाल शिलापत्र ।

स्वयम्भू महाचैत्यया प्राचीन घण्ट लामा थिलेन्द्रज्ञद्वारा पुनर्निर्माण

स्वयम्भूप्रति श्रद्धा तयाः कवीन्द्र जयप्रताप मल्ल जुजुं दोहलपावंगु घण्ट जीर्ण जुयाच्वंगु खनाः येँया जुजु भूपालेन्द्र मल्लयाके सहमति कयाः यलया जुजु योगनरेन्द्र मल्लं तयाथकूगु घण्ट प्राकृतिक तथा मानवीय प्रकोपद्वारा अति जीर्ण जुयाच्वंगु खनाः लामा देवाधर्म थिलेन्द्रज्ञजुया धर्मचित्त उत्पत्ति जुयाः हानं निकोगु पतिइ थुगु घण्ट पुनरुद्धार याय्गु विचार कोजित^१ ।

तर थुगु घण्टय् अङ्कित अभिलेखय् न्हापायापि स्वह्य जुजुपिनिगु नाम अङ्कित जुयाच्वंगु खनाः लामाजुया मनय् सन्देह उत्पन्न जुल- थःगु मनय् थुगु घण्ट जीर्णोद्धार याय्गु मतिइ दुसां ऊवात्त छुं याय् मछालाः तत्कालीनया राजा श्रीरणवहादुर शाहया हजुरीइ जाहेर यानाः अनुमति कयाः जक न्हापा स्वयाः नं विशाल रूप प्रदान यानाः श्रीस्वयम्भूया घण्ट पुनर्निर्माण यानाव्यूगु जुल ।

थुगु दिव्य घण्ट निर्माण याय् निम्ति लामाजुनाप उग्येन विस्येतजुं नं भाग कयादीगु खँ न्ह्यथनातःगु दु । थुगु कार्य निम्ति हेरविचार याय्गु अभिभारा कयाच्वंपि स्यंगुया रविपतिजु, देवफुगजेन्द्र, अविआल तथा वँतुवाहाःया व्यापारी कृष्णजु, लहपतिजु, छत्रसिजु, रखेपतिजु, सिजु पुनः स्यंगुया मधमसि, तोयूसि जुल ।

थुगु दिव्य घण्ट तयार जूगु उपलक्षय् विधिवत् श्रीस्वयम्भू महाचैत्य पूजा यानाः ने. सं. १९१२ बैशाखपुन्हिखुनुया दिनय् प्रतिष्ठा याःगु जुल । वर्तमान थुगु घण्ट विशाल सुवर्ण वज्र अङ्कित धर्मधातुया खःपाखे प्रतापपुर लिक्क तयातःगु दु ।

१-स्वयम्भूस्थित - घण्टाभिलेखपाखे उद्धृत ।

लामा धर्मसिद्धिसागरजुया स्वयम्भूस दिव्य घण्ट समर्पण

संदेया वैशाली महाविहार्य बिज्यानाच्चंहा श्रीश्यामार्पा लामाजुया किगूगु अवतारी अपराजित श्रीधर्मसिद्धिसागरसेन नामक लामा जुयाच्चंगु व्यलय् श्रीस्वयम्भू महाचैत्य दर्शनार्थ थःशिष्यगण सहित नेपालय् थ्यंकःबिज्यात ।

थ्वसपोल स्वयम्भूइ बिज्यानाः थःमनमाथं पूजाभाव भक्ति यानाः प्रदक्षिणा यानाबिज्यात । थन उगु व्यलय् प्रतापपुर मन्दिरया लिक्कसं च्वंगु पुलांगु घण्टया जो मिलय् यानाः अनन्तपुर मन्दिरया लिक्कसंतुं शोभायमान जुइक श्रीधर्मधातु वागीश्वर महाचैत्यस दिव्य घण्ट ने. सं. १३१ बैशाखपुन्ही बुधवारखुनु भक्तिपूर्वक दोहलपा बिज्यात ।

धयात.गु दु- थुगु घण्ट दय्के निर्मित कँस १७० धानि व ज्यालाया मू समेत जम्मा तूगु खर्च १३६० मोहः जुल । थुगु घण्ट निर्माणया लागी ज्या याःपि व्यापारी सोबाहाःया विष्णु, वँतुबाहाःया लखेमुनि, भाजुसि, प्रखं, कृष्णरख व छर्तसि जुल ।

स्वयम्भू महाचैत्यनिसें तीर्थ सेवा

प्रागैतिहासिक कालनिसें अनेक तीर्थ व प्रसिद्ध पर्वत चाःहुलाच्चंगु देवभूमि नेपाल जम्बुद्वीपया मूलगु पुण्यभूमि धकाः प्रसिद्ध जुयाच्चंगु दु । थन हे द्वादश तीर्थ, उपतीर्थ, अष्टवीतराग, पीठोपपीठ, श्मशानो पश्मशानपाखे चाःहुलाच्चंगु श्रीसम्बर मण्डलाकार जुयाच्चंगु सुदुर्जया भूमि नेपाल तीर्थमय स्थान जुयाच्चंगु पवित्रभूमि जूयानिम्ति थन तीर्थयागु महात्म्य यक्व दु ।

उकि थन न्हापांनिसें पराम्परागत द्वादश तीर्थ सेवा वनाः अष्टमी व्रत धलं दनाः श्रीआर्या-वलोकितेश्वर अमोघपाश लोकेश्वरयागु उपासना याय्गु चलन दइच्वन ।

स्वयम्भू पुराणयागु धापूकथं विचाः याय्बल्य गुलितं थन तीर्थ, पर्वत व विभिन्न देवदेवता धर्म संस्कृति आदि दइवइच्चंगु खः उपि व्याक्कया आदि कारण मूलश्रोत श्रीस्वयम्भू महाचैत्ययात मान्य याना वइच्चंगु खनेदु धाय्माः ।

थ्व हे आदर्शयात अपनय् यानाः श्रद्धा भक्ति तयाः सुवर्ण प्रणाली महानगर थँहित्वाःया धर्मात्मा मानन्धर कृष्णसिंह प्रभृति गुठीहार मुनाः तीर्थयात्रा स्वयम्भूनिसें शुभारम्भ यानाः ह्यय्पि थ्यंकाः परिसमाप्ति याःगु जुल । थ्व तीर्थयात्रा सम्पूर्ण जूगु शुभ उपलक्ष कयाः योगाम्बर श्रीज्ञानडाकिनी (ह्यय्पि) न्होने ने. सं. ६३१ फाल्गुणशुदी द्वादशीखुनु धर्मशाला प्रतिष्ठा यानाब्यूगु खँ न्ह्यथनातःगु दु ।

स्वयम्भू महाचैत्यया पूजा निमित्तं वार्षिक खर्च नियत - भीमसेन थापापारखे

थःअबुजु काजी अमरसिंह थापां वय्कःयागु कम उमेरय् हे श्री ५ रणबहादुर शाहया हजुरोइ जागीर यानाविल । लिपा वय्कःया उमेर वधय् जूलिसे नापनापं शूरवीर व बुद्धि पराक्रम आदि नं वधय् जुजुं बल ।

खजा थ्वय्कः उत्तिकं सुधारवादी धकाः नं धाः । जनरल भीमसेन थापाजुं थःगु शासनकालय् आपालं ज्या याःगु खनेगु । पृथ्वीनारायण शाहं खडा यानाथकूगु विशाल नेपाल राज्यय् आपालं थितिरिति कायम यानाः शान्ति हल । गोर्खाया रामशाह व कान्तिपुरया जयस्थिति मल्लपिसं गुगु स्थिति वन्देश यानावंगु खंत खालि भवतय् जक उल्लेख जुयाचवंगुलिइ वय्कलं हानं नेपालभर लागू यानाविल । खतु थ्वय्कःया थःगु ३१ दँया उमेरया मुक्तियारकालय् थप दर्जा नं प्राप्त जुल । सन् १८११ तदनुसार ने. सं. १३१, वि. सं. १८६८ सालय् वय्कलं 'जनरल' मानपदवी प्राप्त जुसेलि वडो हर्षपूर्वक थःगु निर्देशनय् नेपाःया ततःधंपि प्रसिद्ध देवदेवीयाथाय् लसताःया रूपय् वार्षिक पूजा खर्च नियुक्त यानाव्युगु जुल^१—


(१) स्वयम्भू महाचैत्यप्रति	तका ८००।-
(२) मत्स्येन्द्रनाथप्रति	तका ५०००।-
(३) पशुपतिनाथप्रति	तका ७०००।-
(४) तलेजु भवानीप्रति	तका ५०००।-
(५) नुवाकोट भैरवीप्रति	तका १६००।-
(६) गोर्खा कालिकाप्रति	तका २५००।-

१- हजसनजुया संग्रहपाखे - प्रो० तुलसीराम बैद्यजुया सौजन्यद्वारा प्राप्त ।

श्रीस्वयम्भू महाचैत्य



शाक्यश्री लामाजुं जीर्णोद्धार याग् न्ह्योयागु स्वयम्भू



जुजु गीर्वाणयुद्ध व राजेन्द्र विक्रमया सदिच्छानुसार स्वयम्भू महाचैत्यया पुनर्जीर्णोद्धार

स्वयम्भू महाचैत्य न्हापांनिसें जङ्गलया दथुस लानाच्वंगु जूया निम्ति थुकिइ बारंवार ततःसकं जल वर्षा व फय् वया; प्वं गानाः, च्वापुं दायाः अनेक प्राकृतिक प्रकोपया प्रहारं यानाः समय समयय् विभिन्न श्रद्धालु दानपतिपिनिगु सत्प्रेरणा प्राप्त जूगुलि यानाः बारंवार थुकियागु जीर्णोद्धार जुयावया-च्वन ।

खतु व हे परम्पराकथं जुजु जयप्रकाश मल्लया शासनकालं लिपा धाय्कि ५६।१ न्येगुदँ व लच्छि जूवल्य् हानं स्वयम्भू चैत्य जीर्णोद्धार याय्माःगु परमावश्यक जूवल । प्राचीन इतिहासया साक्षि स्वरूप नेपाःया सर्व प्राचीन धर्मकीर्ति नेपाल गौरव श्रीस्वयम्भू महाचैत्य क्षतिग्रष्ट जुयाच्वंगु अवस्था खनाः राजा श्री ५ गीर्वाणयुद्ध विक्रम व राजेन्द्र विक्रमया सदिच्छानुसार काथोरिम्पोछे लामाजुया निर्देशनय् साहुजु तुंछेँया विसन्ध्र, न्यतया लन्हिसिजु, न्यतपसःननिया श्रीकृष्णजु जजमानपिनिगु रेखदेखकथं मूलाचार्य- लायकू बहीया थाकू, कर्माचार्य, उपाध्या, तःछेँबाहाःया वज्रहर्ष, अभिहर्ष तथा लायकूयापाखे निरीक्षक जूपि कपर्दार भोतु पाँडे व डिट्टा लक्ष्मण आदि च्वनाः जीर्णोद्धार याय्गु ज्या जुल । थ्व हे शुभ समाचार प्राप्त जूगु अनुसारं ल्हासा व फिखाछेँस च्वंपि साहु महाजनपिनिगुपाखे यथाश्रद्धा सरसामग्री व चन्दा प्राप्त जूगु दु ।

उपर्युक्त शुभ संयोग चूलाःगुलि हानं जीर्णोद्धार याय्गु ज्या शुरु जुल^१—

महाराज गीर्वाणयुद्ध विक्रमं ने. सं. ६३६ कार्तिककृष्ण अमावासी शनिश्चरवारया दिनय्

१- सप्तमुनि वज्राचार्यद्वारा प्राप्त ।

हेटौंडाय् योसिँ स्वकूगु जुल । तर लँ मदु धकाः उगु योसिँ मकाल । थनंलि छेभुया क्वस्स इन्द्रायणी घातया थितास च्वंगु कायगु विचार कोजित ।

ने. सं. ६३६ मार्गशुक्ल षष्ठीखुनु भोतु पाँडे कपर्दारं राजगुभाःजु लाय्कू बहीया थाकूभाजु व वज्रपाणियात साःताः सुचं न्यंकल- 'स्वयम्भू महाचैत्यया योसिँ थनेगु विषय मुचुल्का च्वकाः सही तयकाः काःगु जुल, यदि छुं जुया बाधा अडकाउ हानी नोक्सान यात धाःसा छिमिगु सर्वस्व अपहरण जुइ ।'

पौषशुक्ल षष्ठीखुनु योसिँ थय् प्यन्हु न्ह्यो स्वयम्भू भगवान निमन्त्रणा पूजा जुल । पौषशुक्ल सप्तमीखुनु विधिवत् पूजा यासे योसिँ घाकयाः कोथल । पौषकृष्ण दशमीखुनु योसिँ साय्कः वन । योसिँ पुइके मफ्याः व बिघ्न शान्ति नागपूजा यासे बल्ल पूजा सिधय्काः योसिँ पुइके फत । माघकृष्ण सप्तमीखुनु भोतु पाँडे कपर्दार, लक्ष्मीनारायण डिट्टा निह्य वन । येँ देसया ७०० प्रजायात ह्यति निमोहः निमोहः बियाः वाःछियात सामो ज्वनाः योसिँ साःवन । अथे हे यलदेसया प्रजा ७०० यात नं ह्यति निमोहः निमोहः जुजुं बिल । वाःछियात सामो ज्वनाः इपि नं योसिँ साःवन । माघकृष्ण दशमीखुनु देवदेवता पूजा यानाः योसिँ साय्कल । तर ल्वहँतय् कानाः संके मफु । छुं दिनतक दिका तय् माल । पौषशुक्ल अष्टमीस योसिँ पूजा यानाः बलि बियाः थाय्थासय् द्यो पूजा यानाः पुइँहायाः सालाहल । गुभाःजु, स्यंगुवदे, कर्मि, बोस्य, सालमि थुलियात ह्यति २ मना जाकि व केँ-चि भोतु कपर्दारं इना बियातल । प्रजायात जक छेँखां छतका छतका दां बियाछ्वत । स्यंगू देसया प्रजापि पालंपाः छ्वयाः योसिँ साय्के छ्वःगु जुल । येँ, यल व ख्वपया ७०० ह्य ल्याखं २१०० ह्य प्रजापि वनाः सालाहल । थुगु ज्याया बिचाः संचाः याःह्य कपर्दार भोतु पाँडे जुल । फाल्गुणकृष्ण प्रतिपदाखुनु योसिँ साय्कः वन, १२ कु जक सालेफु, लिक्वखोला व्यासिस थ्यन । फाल्गुणकृष्ण चतुर्थीखुनु भुवाक्वस थ्यन । थन तक्वस्यालतिखोला खुसिस थ्यन । फाल्गुणकृष्ण अष्टमीस योसिँ साल, संके मफु, कपर्दारं दुलुतसे बजि ह्वय्कल, बल्ल ओस्यालति खुसिया तँचाया च्वय् जक थ्यन । फाल्गुणकृष्ण नवमीखुनु तँयाजकालिसे सालाहयाः अंबोद्या व्यासि धयागु थासय् तक थ्यंकल । फाल्गुणकृष्ण दशमी अंबोद्या व्यासिया तँगिलिसे सालाहयाः सिंव्याताल, फूलेस्यातँगिखोला छिके मफु, थुखुनु क्वय्छि ति थ्यन । फाल्गुणकृष्ण एकादशी-खुनु खुसिस क्वफानाः हस्यातिखुलिसे सालाहल, खुसिपाकस ध्वदुयाः सालेमफु । थ्वयां सतिखुनु खोलागा व्यासि तँगिलिसे सालाहल, व्यासिफुल्य् च्वंगु खुसिहोंस थ्यन । थुखुनु स्यंगुया गुणानन्द व लामाजु चाःह्यूल । फाल्गुणकृष्ण त्रयोदशीखुनु ताउतक साय्काः हतछत्वाफ थ्यंकेहल । थ्वयां सतिखुनु निसें स्वचा प्यन्हुतकं इकिधिकि नं संके मफु । चैत्रशुक्ल द्वितीयाखुनु बलि बियाः नागराजयात दुरुं लुनाः सालाहल, योसिँ घुछिति जक वल । थ्वयां सतिखुनु स्वव्वय् छव्व ति थ्यन । थ्वयां सतिखुनु कपर्दार भोतु पाँडे थः छेँ-ज्या दु धकाः लक्ष्मीनारायण-डिट्टायात भाला बियाः लिहांवन । थन प्रजागणपि नं विस्वुंवन । लस्कर मगानाः सकलसितं बिदा बियाहल । लक्ष्मीनारायण डिट्टा व सालमित च्वनाः योसिँयात रक्षा याय् निम्ति पलि चिनाः सकले लिहांवल । थुगु दँय् अथे जुल ।

असामयिकवश कालगति यानाः महाराज गीर्वाणयुद्ध विक्रमया आयुवं मलाना वनाः महाराज

श्रीराजेन्द्र विक्रम शाहदेवया पर्यायस ने. सं. ६३७ पौषशुक्ल १३ वृहस्पतिवारखुनु सिख्वंमूया गुजु चिकिधीनं योसिं साय्कः वन । दुलक्वनिसें सालाहल । पौषकृष्ण दशमीखुनु लेचो थ्यन । थुखुनु महादीप व चाकःमत नं छ्वयकल । पौषकृष्ण एकादशीखुनु हःपाःविइह्य सालमियात वसः हिइकाः पसार वियाः चामर लःह्लानाः चामरं गाय्काः योसिं सालाहल, योसिं साःवःपि सकसितं भोजन नं याकूगु जुल । पौषकृष्ण द्वादशीखुनु तँक्व थ्यन, थ्वयां सतिखुनु तँक्वलिसे सालाहयाः टोखा दोपात थ्यन । पौषकृष्ण १३ स स्यंगु थ्यंक सालाहल, गल्य् वनदेवी पूजा व बलि बिल । थ्वयां सतिखुनु स्यंगु थसाल, विधिपूर्वक लसकुस यानाः दुकाल ।

क्षमापूजा

माघशुक्ल त्रयोदशी प्रचतुर्शो पुनर्वसुनक्षत्र प्रीतियोग शुक्रवारखुनु स्वयम्भू महाचैत्यया न्यास पिकाय्यात क्षमापूजा निमित्त कलश पूजा ग्वय्दां तय्गु विधि थे क्रिया जुल ।

न्यास पिकाय्

माघकृष्ण पञ्चमी हस्तानक्षत्र वृहस्पतिवार घटि ५ विना घटि ८ न्ह्यो यथा विधि थे जीवन्त्यास पिकाःगु जुल । मूलाचार्य लाय्क् वहीया थाक्, उपाध्या असं तःछेँवाहाःया अभिर्हर्षभद्र, कर्माचार्य अतिर्हर्षपि च्वनाः ज्या जुल ।

फर्किवाता क्वकाय्गु व प्वाथ पिइगु

माघकृष्ण षष्ठी व सप्तमीखुनु फर्किवाता क्वकाय्गु व प्वाथ पिइगु ज्या विधि विधान थे पूजा यानाः कार्यकारिणीपि च्वनाः माःगु ज्या जुल ।

खः ग्वय्, योसिं स्वाय्

माघकृष्ण द्वादशी प्रत्रयोदशी पूर्वाषाढा नक्षत्र शुद्धियोग वृहस्पतिवार घटि ५ विना ७ घटि न्ह्यवःनिसें खः ग्वय्, सामग्री परिशोधनलिसें सिंस घाक्य् नापं खः ग्वय्, योसिं स्वाय्या विधि थे पूजा याय् ।

थुगु खः ग्वय्त प्रयोग याःगु सामग्री विषय्य् थथे उल्लेख यानातल—

मुगल खः ग्वय्यात आवश्यक वस्तु—

ताताःहाकःगु योसिं	६०	ग्वः
तँतँ तय्गु तँचासिं	३६०	ग्वः
लाछिलाय् धलि	२२०	ग्वः
बालासिं	३३०	
बिलावसिं	१००	ग्वः

लगवसिँ	माक्व
ओल	”
सःखि खिपः	”
सूत्र	”
पउ	”

योसिँ ध्यने

फाल्गुणशुक्ल द्वितीया रात्रिस योसिँ ध्यनेत विधि थें पूजा जुल । फाल्गुणशुक्ल एकादशीखुनु प्वाथ पिइगु ज्या क्वचाय्कल ।

रत्नन्यास

फाल्गुणशुक्ल प्रतिपदाखुनु विधिवत् पूजा जुल । फाल्गुणशुक्ल एकादशीखुनु योसिँ मुगल खतस दुत यनेत सन, तर दुत यने मफु । थुकिया शान्ति- फर्पिङ्ग वज्रयोगिनीस पुरश्चरण तल । लगंया आनन्दभद्र, ऊवाःवाहाःया वज्रधर व आनन्दवज्र, ओंवाहाःया भानरसि सहित यासे थुखुनु तिनिख्यलय् च्वंहा श्रीमहाकालयाथाय् पुरश्चरण च्वन । अथे हे तिनिख्यलय् च्वंहा लुमरिस पूजा पुरश्चरण च्वन, तःछेया श्रीहर्ष, अभिहर्ष, वज्रहर्ष, सिख्वंमूया थाकूपि च्वनाः ज्या जुल । थुलि विधि पूर्ण जुसेलि योसिँ दुथ्यंक साले फत । योसिँ दुने मतःतले गुलिखे श्रद्धालु दर्शकपित कूर्मशीला त्वहंया प्वाः दर्शन वियातल । थुगु प्वाल्य् श्रद्धालु भक्तजनपनिगु इच्छानुसार यथा श्रद्धा हेरा, मणि, सुवर्ण, रूप्य दान दक्षिणा समर्पण याःगु जुल । देस विदेसं नं श्रद्धा दु थें तोपं वल ।

पाद स्थापना

फाल्गुणकृष्ण द्वितीयाखुनु विधिपूर्वक पाद स्थापनाया क्रिया जुल ।

योसिँ अग्नि संस्कार

फाल्गुणकृष्ण सप्तमीया रात्रिस विधि थें पुलांगु योसिँ अग्नि संस्कार यानाः छ्वय्कल ।

योसिँ स्वानाया

फाल्गुण कृष्णाष्टमीया दिनय् योसिँ थासय्लाक स्वाःगु जुल । थुखुनु विधि थें पूजा धुंकाः हःपाः ब्यूहा सालमिया पताः, लामाजुया क्वेचिङ्ग पताः, जुजुयागु पताः छायेके छ्वल, तस्सकं शोभावृद्धि जुल ।

भष्म प्रवाह

फाल्गुणकृष्ण दशमीखुनु पुलांगु योसिँ अग्नि संस्कार यानागु नलि विधिपूर्वक भष्म प्रवाह यात । योसिँस सिजःपति भुनाः गलपस त्वहंतं सिल । थुखुनुसंतु अतं दनाहल ।

चैत्रशुक्ल तृतीया प्रचौथीखुनु न्यतया श्रीकृष्ण साहुजुं न्हापा योसिं थंवल्य् काथोरिम्पोछे लामाजुं स्यंगुद्योया गलतुकिया न्होनेसं नैऋत्यकोणय् तयातःगु पिण्डिकर्म मण्डल कोथासं ह्यातःगु पूजा यात ।

चैत्रशुक्ल नवमीखुनु गलतुकिनी स्वनागु जुल । एकादशीखुनु योसिं हिले यात, विज्याःह्य न्हुवा लामाजुं गलतुकिया च्वस्सं योसिया पूर्वय् योसिं लिधंकाः सिजःया गम् दय्काः तःधंसफू तयाबिल । थुखुनु देसछियागु यथा श्रद्धाद्वारा प्राप्त जूगु अनेक सुवर्ण रत्नादि नं स्वथंगु जुल ।

चैत्रकृष्ण द्वादशीखुनु इतुंवाहाःया बदेजुतय्सं चकरी दय्केयात सिंघाकयाः पूजा यात । चैत्रकृष्ण चतुर्दशीखुनु थ्वयां न्हापा योसिं हिलावल्य् काथोरिम्पोछे लामाजुं तयातःगु पिण्डिकर्म मण्डल लिक्कातःगु गलतुकिया अग्निकोणय् तल । थुकिया बिचाः-संचाः न्हुओ लामाजुं याःगु जुल ।

बैशाख पूर्णिमाया दिनय् गलतुकिया निन्हाः तल । सएव दिनय् न्हापाया योसिंस सिजःपति भुनातःगु गलतुकि तक जक दइच्चंगुलिइ थुकिइ मेगु मगाःगु न्यत पसःननिया साहुजु श्रीकृष्णजुं सिजःपति तनाबिल । थ्व सिजःपति न्हुओ लामाजुं शोधन याकाः योसिं दुछि सिजःपति भुंकेव्यूगु जुल ।

क्वथु चकुरि

ज्येष्ठशुक्ल द्वितीयाखुनु विधिवत् क्वथु चकुरि तया । अनेक व्वति व यन्त्र तयाः किरण मन्त्रं अधिष्ठान यासे विधि थें पूजा यानाः थां स्वानाः दथुथां, पिथुथां स्वानाः मेथ तया । गलतुकिया पूर्वय् लुं पति भुन । लामाजुं कःमि नायोजुयात दक्षिणा बिल । थुगु पूजाया ऊवल्य् मय्जुदेव, पवन भैरव, फसखा, मञ्जुश्री, पुलांस्यंगु, सुयिनाय, बुयिनाय, फोसिदो तथा शान्तिपुरीस यथा विधि थें पूजा जुल ।

नितंगु चकुरि

ज्येष्ठशुक्ल चतुर्थीखुनु विधि थें पूजा यानाः नितंगु चकुरि तल ।

स्वतंगु चकुरि

थुखुनुसंतुं स्वतंगु चकुरि तय्गु ज्या जुल । तर न्हापायापि जजमानपि मवयाः लामाजुं तयातःपि न्यतया साहुपिसं माःगु सामग्री ताःलाका बिल ।

प्यतंगु चकुरि

ज्येष्ठशुक्ल षष्ठीखुनु प्यतंगु चकुरि तय्गु विषयय् सिख्वंमूया बेकोमिखा नन्दं कर्माचार्य जि जुइमा धकाः रुगडा यात । उख्ये असं तःछे बाहाःया अभिहर्ष व अतिहर्ष निह्य तंचायाः मवः, उपाध्या व कर्माचार्य निह्य जिपि जुइगु खःसा जक वय् धकाः धयाच्वन, थथे जुयाः पूजा बन्द जुयाच्वन । थ्व खं भोतु पाँडे कपर्दार व लक्ष्मीनारायण दिट्टा निह्य वयाः उगु विषयय् बुक्य् याना स्वसेलि साबिक वमोजिम तःछे बाहाःया गुणेन्द्रजु थहरय् जुल । अभिहर्ष व अतिहर्ष तय्माः धकाः महारानी हुकूम जुल । थुगु हुकूम मुताविक प्यतंगु चकुरि तय्गु ज्या जुल । थुकिया जजमान नःघःया बदेजुति ।

न्यातंगु चकुरि

ज्येष्ठशुक्ल नवमीखुनु न्यातंगु चकुरि तय्यात माक्व सामग्री सिख्वंमूया वदेजुतय्सं ताःलाका बिल । विधि उत्थे जुल ।

चौकासिं काय्

ज्येष्ठशुक्ल दशमी हस्तनक्षत्र शुद्धियोग सोमवारया घटि ३ बिना घटि ४ न्ह्यो चौकासिं काय्गु ब्यला जुल । चौकासिं काःवनेत विधि थे पूजा यानाः शुभसाइतय् सगं कयाः स्वस्ति मंगल यानाः स्यंगुया सुन्दरीपि मिसा निह्यसिनं दुदंघः ज्वनावःगुलि नस्ला कयाः चौकासिं काय्त्त गमन जुल । मञ्जुश्री पर्वस्थानया क्वस्सं भिगु बांलाःगु ग्वय्छाःसिं लुइकल । कःमि नायकजुयागु धापूकथं थ्व हे सिं काय्गु निर्णय जुसेलि उगु ग्वय्छाःसिं सिमायात विधि थे वनदेवी पूजा जुल । ज्येष्ठशुक्ल एकादशी प्रद्वादशीखुनु सुथ न्हापां दनाः सकसियां स्नान यानाः शुचि-नीचि यानाः विधि थे पूजा यानाः लँस्वयाः चौकासिं थासय् थ्यंकेहल ।

खुतंगु चकुरि

ज्येष्ठशुक्ल त्रयोदशीखुनु खुतंगु चकुरि तयाया विधि थे पूजा जुल । थुकिया जजमान ओंवाहाःया वदेजु ।

न्हय्तंगु चकुरि

ज्यापुन्हीखुनु न्हय्तंगु चकुरि तय्यात जजमान इतुंवाहाःया थपाजु विद्याकर प्रभृति किछ्हा थरपाजुपि जूगु जुल ।

च्यातंगु व गुतंगु चकुरि

ज्येष्ठकृष्ण प्रतिपदाखुनु जजनान लगंया वदेजुपि व असंत्वाःया थकालि भलि बिगछेया साहु प्रतापसि वदेजुपिनिगुपाखे सहयोग प्राप्त जुयाः च्यातंगु व गुतंगु चकुरि तयाया विधि थे पूजा जुल ।

झितंगु व झिछतंगु चकुरि

ज्येष्ठकृष्ण द्वितीयाखुनु नितंया चकुरि तय्गु ज्या जुल । थुगु नित चकुरियां माःगु खर्च लगं व वंतुवाहाःया वदेजुतसे नालाकाः मवयाः लायकूपाखे ज्वरय् यानाबिल ।

झिनितंगु चकुरि

थुगु हे दिनय् जजमान स्यंगुया वदेजुतसे विधि थे पूजा याकाः झिनितंगु चकुरि तयाबिल ।

झिस्वतंगु चकुरि

व हे दिनय् झिस्वतंगु चकुरिया जजमान महाराज राजेन्द्र विक्रम शाहजुया चिता याकनं ज्वरय् यानाबिल । छन्हुं हे प्यंगू चकुरि तःगु जुल ।

चौकासिं छायाया

ज्येष्ठकृष्ण तृतीयाखुनु चौकासिं छायाया विधि थे' माक्व पूजा यात । चकुयात सिं चकु थःपिसं फक्व फक्व सिं तल, मचाक्व लामाजुया दामं न्यानाविल । अन्य भक्तजनपिसं नं फक्व तयाः चकुलिया ज्या सिधय्कल । सतिखुनु चतुर्थीया जज्ञ जुल ।

गुरु अध्येषण

ज्येष्ठकृष्ण चतुर्थीखुनु लायकू वहीया थाकूयाके गुरु अध्येषण यानाया पूजा जुल ।

गुरुजु	- थाकू	- लायकू वही
उपाध्या	- अभिहर्ष	- तःछे'बाहाः
कर्माचार्य	- अतिहर्ष	उसांय् मदयाः वज्रहर्षे जुल
पूर्णाचार्य	- इतु'बाहाःया	- धनपति
दक्षिणाचार्य	- ऊवाःबाहाःया	- देवानन्द
पश्चिमाचार्य	- "	- वज्रपाणि
उत्तराचार्य	- ववाःबाहाःया	- बुद्धजु
गीताचार्य	- तःछे'या	- जिनेन्द्र
"	- मखंबाहाःया	- भाजुमुनि
"	- लगंया	- रविकर
जजमान	- स्यंगुया	- थकालि
नकिजु	- स्यंगुया	- २ ह्य
जजमान	- तुंछे'या	- विसन्ध
जजमान	- न्यतया	- लन्हसिजु
जजमान	- न्यत पसःननिया	- श्रीकृष्ण

श्रुति समोहन जुसे गुरु मण्डल दनाः रत्न मण्डल दोहलपा समयाचक्र गणचक्र पूजा याःगु जुल ।

जज्ञपाद स्थापना

ज्येष्ठकृष्ण पञ्चमीखुनु स्यंगुदेव प्रतिष्ठा याय् निर्मित जज्ञ याय्त यज्ञकुण्डया पाद स्थापना जूगु दिन ।

आखा स्वनाया

जज्ञपाद स्थापना जूगु दिनसंतु' आखा स्वनेगु ज्या जुल । स्यंगुया वहिलिइ ईशानकोणय् देव तय्यात खः दय्काः पूजा यात ।

अम्बसाहा तयाया

आखा स्वनाः सतिखुनु जमलगण्डिया बदेजुत मवयाः जजमान कजिकं चिता यानाः तल ।
थुखुनुसंतुं विधिवत् पूजा यानाः चौकुलां थां खजला तयागु जुल ।

सीकाय्या (वज्रगीत नृत्यनाथ आराधन)

प्रतिष्ठा दिन सत्तिना वःगुलिं थुखुनुसंतुं आखालय पुलुछेँ दय्काः सीकयाः पूजा यात ।
उपाध्यां निमित्त काय् वाक्य ब्वने—

वज्रगीत नृत्यनाथ भट्टारकस्य ऋद्धिसिद्धि फल कामनार्थं अस्मिन्दिने पूजनार्थं क्रियाकर्तुं अहं
इत्यादि ।

पूजा सिन्दुरार्चन, धर्मोदया, सलाका, अर्घपात्र आदि स्वनाः विधि थें पूजा याय् । गुह्यचर्य
वसतं पुनाः पुलुछेँ पिहांवयाः गाछे प्यनाः पञ्चतालया मंत्र पोंगा पुयाः नन्दी नमस्कार रागमाला
पञ्चतालया द्योल्लानाः विश्व सरोरुह, हलसिल, त्रिभुवन ज्वलित एवं किञ्चित्कल्पमित्यकारयेत् गीतया
पदपदस प्वंगा पुयाः व नृत्य अभिनय यानाः विधि थें गणचक्र पूजा याय् ।

यचि कयाया

ज्येष्ठकृष्ण सप्तमीखुनु यचि सालागु स्यंगु बदेजु भाजुपतिया छेँस तया जुल । समयाचक्र,
गणचक्र पूजा याय् ।

थुखुनु पञ्चतथागतयाके लामाजुं देवदेवता अंग विन्यास जन्त्र मन्त्र तन्त्र स्वथनाः देव शोधन
यात, अथे हे गुरुजुं नं थुखुनु देव लुं सिल ।

- | | | |
|------------|---|---|
| वैरोचन | - | पुलांहा दुने तयाः न्हूहा लुं सियाः ओंवाहाः
लेवा (लुं कः मि) व कोछेँया बनिया निहासिनं । |
| अक्षोभ्य | - | हषावाहाःया जगतसि, थाकूसि |
| रत्नसंभव | - | तुं छेँया विमुन्धर देव |
| अमिताभ | - | लक्ष्मीनारायण पमानं |
| अमोघसिद्धि | - | सिधुग्वडाया तयूसि सिँकः मि
लगंया बदे भाजुधं
लगंया बदे भाजुद्यो |

पीठ पूजा

ज्येष्ठकृष्ण अष्टमीखुनु पीठ पूजा वनाः न्हापां लुतीस सेवाजोलं, पासिक्व कमलाती, लुमधी,
फिओ, पचली, कहंग, चन्दलखु आदिस विधि थें पूजा प्वंगा पुयाः नाय्बाजं, काहा, म्वाहाली पुयाः
पूजा याय्, अले छाया-छो यानाः समयाचक्र यानाः किसली लाना ह्य्, आवाहन यानाः कयाह्याः

स्वयम्भूया वज्रधातु मण्डलयाथाय् थ्यंकाः थकालि नकिजुं नं बलि पियाः दुकाय् । स्वयम्भू महाचैत्य छ्चा उलाः यचि कयाः थासय्तुं तय् ।

न्यासघल लुनाया

ज्येष्ठकृष्ण नवमी उत्तरभद्रनक्षत्र आदित्यवारखुनु स्वयम्भू चैत्यय् न्यास लुना दिन । आवश्यक विधि थें सामग्री ज्वरय् यासे सहस्राहूति यज्ञ यासे न्हापां फकिवाता तया थ्वयां लिपा वैरोचन न्हापा याह्य लिपयाः ओमवाहाःया बोधन, जुजुमुनि, कोछेया वनिया मन थुपि स्वह्यसिनं तःधोह्य वैरोचन दय्काः तल । भुवनलक्ष्मी महारानीं तयातःह्य वैरोचन लिपयाः शान्तिपुरीस दुत छ्वयातल । उह्य द्यो मथ्यनाः अर्कय् जुयाचवन । न्हापायागु दिन वितय् जुया वनाः न्यासबौ बियाः फसखास बलि वाय्गु ज्या जुल । थनंलि हानं दिन दय्काः न्यास लुनाः रात्रिया घटि २ न्ह्यो न्हापां न्यासघलयाथाय् वनाः शताक्षर धारणी परलपाः न्यासघल पूजा याय्थाय् बिज्याकेत थकालि निह्यसेनं बँपुइकाः लः दुरु धारा हाय्काः बसा लायाः गुरुवाहाःजुजु दक्कसिनं स्वस्तिमंगल गाथा परलपाः दक्क वाद्य थाकाः न्यासघर न्यास पिकयाः कर्माचार्य अतिहर्ष ज्वंकाः चतुर्मुख देवावतार जव लाकाह्याः श्रीस्वयम्भू चैत्य छ्चाः उइकाः पूजायाथाय् बिज्याकाः थनंलि लिचाय्काः दशदिगाचार्यपिसं गुरु मण्डल समाधि दंके । पञ्चगव्य साधन यासे उपाध्याजुं दिगबलि पा ४ बिसे पूजा छ्वय् । थन वज्रधातु देगुरि पाठ ग्वय् । थन सगन, इन्द्रकलश, ताहाँफ-कलश, नागकलश विधि थें पूजा याय् । थनंलि न्यास थलय् विधि थें, पूजा लोहाग्नि रक्षा विधि थें पञ्चोपचार, लास्या, घण्ट वादन, स्तुति व तर्पण बिइ । थुलि धुंकाः ब्यला जुइवं पञ्चविंशति सूत्रं न्यासदेवस्के क्यंकाः फकिवाताय् क्यंकाः मूलाचार्य ज्वनाः क्वतह्य—उपाध्या अभिहर्ष, कर्माचार्य अतिहर्ष श्रोहर्ष, वज्रहर्ष न्याह्यसिनं लाजा क्षतादि पुष्पमाला ज्वनाः न्यास पिकाय्था मन्त्रं जाप यानाः न्यास प्रवेश जुसेलि स्वह्यसिनं वज्रसूचि पदं वनाः रात्रिया घटि २ स अमिताभनिसं पञ्चतथागत न्याह्येसितं न्यास लुनाः च्वय् जक मुस्या च्यानावनाः फकिवाताय् न्यास लुनाः अनं क्वहांवयाः थःथःथासं च्वनाः थन अग्नि स्थापन अग्न्याहूति बिइ । थनंलि देव न्याह्येसितं जातकर्मनिसं व्रतादेश तक क्रिया यानाःलि थन न्याह्य देवस्त प्रतिपार पूजा देवताहूति याय् धुंकाः पञ्चसूत्रकां अमिताभयाके क्यंकाः लाजाक्षतादि सहितेन जाप यासे सिफँ लुनाः ॐ सुप्रतिष्ठित वज्रे स्वाहा धकाः परलपाः वज्राधिष्ठान याय् ।

थनंलि आहूति बियाः उपाध्यां खासिवलि चतुर्विंशतिबलि बिइ, छाग हाय्के, आशीर्वाद बिइ, चेतपूजा, दक्षिणा बिइके । थनं राजा रानीयात स्वां तय्, पञ्चविंशतिका पञ्चसूत्रका न्यासघलया जल आगं तयाः थकालि प्रमुखं सकसितं सिन्हः तिके, बाधां छुइ, निसलाः बिइ । थुलि क्रिया सिधसेलि क्षमापन यानाः शेषाहूति बियाः विसर्जन याय् । थुलि याय् धुंकाः क्रमशः शान्तिपुरी, मय्जुदेव, पवन भैरव, फसखा, मञ्जुश्री, पुलांस्यंगु तथा सुयिनाय, बुयिनाय, फोसिदो आदि स्थानय् विधि थें पूजा याय् । थनंलि गुरुवाहाःजु व न्हिसेवा खलः, माहान माफीकपिनि समयाचक्र, कौलक, गणचक्र याय् । थुलि न्यास लुनाया ज्या जुल । थुलि याय् धुंकाः जजमानपिनिपाखें गुरुवाहाःजुपित ग्वसगं सगुन बियाः स्वस्ति मंगल यात ।

मारीचि पता: ब्वय्के

ज्येष्ठकृष्ण द्वादशीखुनु श्रीस्वयम्भू महाचैत्य प्रतिष्ठा याय् यात पूर्वय् मारीचिपताः, पश्चिमय् प्रतिसरा पता: दत्थुइ उष्णीष विजय पता: ब्वय्का: दिगविदिगस पञ्चदशपता: ब्वय्का: विधि थे पूजा या:गु जुल ।

सूर्यगण्ठि अग्नि काय्

ज्येष्ठकृष्ण त्रयोदशीखुनु अग्नि स्थापना याय् यात सूर्यगण्ठि मि पिकया: मत च्याका: मत मसिइक तया: पूजा यानातय् । थुगु मि पुसा कया: यज्ञशालाय् तया: विधि थे होम याय् ।

पद साधन क्रिया

पद साधन क्रिया याय् न्ह्यथुखुनु ज्येष्ठकृष्ण द्वादशीस सिन्दुरार्चन पूजा यासे थन आदि ग्राहक मूलाचार्य सम्पूर्ण चक्रसमाधि, कर्माचार्य वज्रवाराही समाधि, उपाध्यां चण्डमहारोषण समाधि यासे दिगाचार्यपिसं चतुर्योगिनीयागु थ:थ: दिगदिगया मन्त्र जाप याना: समाधि याय् । थुगु क्रियाया ऊवलय् विभिन्न पद्धति उल्लेख यानातल—मामकी पूजा, दशक्रोध जज्ञमण्डलय् तारण, मण्डलद्वारा उद्घाटन परिक्रमण सिन्दुरं तिइ, नापं एकमुख ववखागा न्यया: नासमहनी तिइ । दिगाचार्यपिसं थ:थ: वसतं तिया: मुद्रा पूजा याना: मुद्रां तिइ, गीत—धरधर शून्य हाला: प्यहांवया: पञ्चताल देव ह्लासे मन्त्र पोंगा द्योल्लाना: पद्म नृत्येश्वर नमस्कार याय् । रागमाला गीत विश्वसरोरूह, हलसिल । गीत—त्रिभुवन ज्वलित, अकारसंजात, परमरतो । श्लोक— नित्य ध्यान । गीत— कोलयी । श्लोक— यस्मात् केकराक्षं । गीत— नमामि श्रीहेरूक । श्लोक— हूँजात । गीत— हूँहूँदेह । मूलश्लोक— कालीद्या कर्म वामेतर्जनी । गीत— नम हूँ । यथाविधि अनुसार— गीत व श्लोकया दत्थुइ दत्थुइ पञ्चताल वाद्यया शूरय् पद साधन नृत्य जुयाच्चनी, क्रमश: विधिवत् पूजा नं जुयाच्चनी ।

पिण्डिकर्म मण्डल चवय्

ज्येष्ठकृष्ण चतुर्दशीखुनु विधिवत् धर्मधातु मण्डल व पिण्डिकर्म मण्डल चवय् ।

भू दुसलंया

ज्येष्ठकृष्ण अमावासीखुनु प्रतिष्ठा याय् यात जज्ञमण्डपय् अधिवासनया माक्व सामग्री ज्वरय् याना: व देव महासंवर आखाद्यो सालाहया: स्थापना यानाया विधि थे पूजा याय् ।

अग्नि स्थापना

आषाढशुक्ल प्रतिपदाखुनु लक्षाहूति जज्ञ आरम्भ निमित्त अग्नि स्थापना याय् । विधि थे वज्रधातु देगुरि पूजा याय् लिस्से धर्मधातु मण्डल, पिण्डिकर्म मण्डल नं । पञ्चताल वाद्य थाका:

कर्माचार्यं चामुतपुलि पुसे वज्रघण्ट ज्वसे छत्रं कुसे पिखाद्योनिसें छचालंच्वपि तारादि सहितं लास्या कयाः पूजा याय् । थुलि याय् धुनेव दथुगल पिथुगल न्यंक पाखातय् क्वहांवनाः गल उवने, यथाक्रमं पूजा याय् जुल ।

रात्रिया पूजा प्रथम होम

आषाढशुक्ल प्रतिपदाया रात्रिस शिराहूति ज्वलं माक्व ताःलाकाः मूलाचार्य, कर्माचार्य उपाध्या स्वहासिनं मुद्रां तियाः माक्व विधि थे पूजा यानाःलि पञ्चताल वाद्य सहित यासे योगिनी मुद्रां तियाः पञ्चधारा हाय्काः आचार्योपाध्यायनी व थकालि नकिजुपि योगिनी स्वरूपं च्वनाः मूलाचार्य वज्रसूचिपदं नृत्य यासे विधिपूर्वक क्रिया सिधय्के, थुलि प्रथम होम रात्रि कया जुल ।

द्वितीय होम

प्रथम होम यानाः सतिखुनु पूर्ववत् क्रिया अनुसारं द्वितीय रात्रि होम क्रिया याय् । थुगु रूपं तृतीय, चतुर्थ, पञ्चम, षष्ठ, सप्तम एवं अष्टम रात्रिया छम्हू छम्हू यानाः च्यान्हुयंकं यथाविधि अनुसारं यज्ञोत्सव जूगु जुल ।

प्रतिष्ठा कर्म

आषाढशुक्ल नवमी हस्तानक्षत्र सोमवारया घटि ११ विना पला १६ न्ह्यो सुवर्ण कलश ध्वजारोहण (सर्वबुद्ध महामुकुट श्रीचूडामणि विश्वमणि खचित) गजू छायाः प्रतिष्ठा जूगु जुल । विधि थे पूजारम्भ यानाः त्रिसमाधि मण्डल थापना यानागु कलशंनिसें पूर्ण कलश, इन्द्र कलश, सर्वकर्मिक कलश आदि दिगदिगस स्वनातयागु चिन्ह कलश फुकय्सं विधि थे पूजा यानाः कर्माचार्य दिग पूजा वने ।

अमिताभंनिसें माक्व पूजा यानाः गल उलावय् धुसेलि थाहांवयाः पाःच्वय् लंस्वया हय् । थनंलि यज्ञमण्डपय् मारीचि पताः आदि दशलोक बलि बियाः दुहांवनाः मातृका पूजा, किरण पूजा थनंलि सम्बन्धित कःमि नायोतय्गु ज्याभः व हाथ पूजा यानाः दक्षिणा विइ, पाय्छि शुभमुहूर्तय् चौडामणि छत्र स्थापना यानाः क्वहांवयाः पञ्चविंशतिकां पूर्णकलशय् चिसे पञ्चबुद्ध थुपि न्याह्यसिके नं कयंकाः च्वय् थतयनाः फकिवाताय् कयंकाः हानं क्वतहयाः मूलाचार्य स्वांमाला ताय् अक्षत ज्वनाः वज्रमुकुटं पुसे प्रतिष्ठा मन्त्रं जाप याय् धुसेलि आचार्यपि स्वहां आश्रमं दनाः वज्रसूचिपदं गमन यानाः अमिताभयाके स्वांमालां क्वखाय्काः लाजाक्षतादि लुनाः पञ्चाभिषेक बियाः थिरवाक्य ब्वनाः ॐ सुप्रतिष्ठित वज्रे स्वाहा धयाः वज्राधिष्ठान याय् । थनंलि च्वय् थहांवनाः फकिवाताय् येधर्मा हेतुप्रभवा गाथा ब्वनाः पञ्चाभिषेक बियाः थिरवाक्य परलपे । थुलि धुनेवं पं. ला. घ. स्तुति यानाःलि पुनः उणीष चूडामणि धर्मच्छत्रय् अथे हे तुं अधिष्ठान याय् । थनं क्वहांवयाः थःगु थासंतुं च्वनाः अमिताभनिसें पिखादेवसके पूजा निराञ्जन मत ताःचाफँ त्वय्, देवताहूति बिसे फकिवाताय् थयंक

श्रुवापातन अधिष्ठान याके छव्य, फलाभिषेक बिइ—पं. ला. घ. स्तु. त. याय् धुसेलि थनंलि आहूति बिसे कर्माचार्यजुं बलिपात बियाः उपाध्यां खासिबलि, चतुर्विंशतिबलि बिइ, चाक्र पूजा वने, हारिती छाहाय्के, एवंक्रमं क्रमशः पवन भैरवस सेवाज्वलं, फसखा भुनाः, शान्तिपुरोस सेवाज्वलं पूजा, सुयिनाय, बुयिनाय, फोसिदोस पूजा छव्य, मञ्जुश्री व पुलांस्यंगु, पाखाय् चवन, योगाम्बर करवीरसके कलंज्वलं बियाः पूजा याके छव्य जुल ।

थनंलि स्यंगुया प्यखा छेयापि थकालि व नकि प्रमुखं चितायाक साहुजुपि दक्कसियां पूजा वय् । स्यंगुमि, लेवा, तबोत, नायक कःमि, हःपाःब्यूह साय्मि थुलि सकलसितं पञ्चसूत्रका ज्वंकाः शिष्याधि-वासना मण्डल थिइकाः कितना पूर्णा यानाः लोकपनि जथाश्रद्धा दक्षिणा, वस्त्र सुलापातय् देछाकाः पूर्णा यानाः यज्ञ रक्षा सकलसितं बियाः मण्डल विसर्जन याय् । सगुन तनाः चेतपूजा गुरु आचार्यपित यथाश्रद्धा वस्त्र, दक्षिणा बिइ । राजा रानीयात स्वां तय्, सकलसितं स्वां—सिन्हः तिइके । चतुखण्ड प्रज्ञापारमिता, दशभूमीश्वर, सद्धर्म पुण्डरीक, पञ्चरक्षा एवं स्वयम्भू पुराण पाठ यानातयागु दक्क समाप्त यानाः पाठ सिधय्के । बाधां छुइके, निसलाः बिइ, शेषाहूति यानाः मण्डल निगुलि विसर्जन याय् । मूलाचार्यनिसे दिगाचार्य आदि माक्कयात कलश लःह्लानाः थनंलि मण्डलया रज शिरय् तय्काः थकालि निगू मण्डलयां रज मुनाः कलश दुछवसे तय् । थनंलि देशबलि, खासिबलि छव्य, थन जुजुया प्रतिनिधि जुयावःह्य दिट्टायात इन्द्र कलश लःह्लानाः व थकालियात पूर्ण कलश लःह्लाय् थन तूर्यताडा-वचर दक्क बाद्य थाकाः मूलाचार्यादि स्वस्ति वाक्य मङ्गलाचरण परलपाः श्रीस्वयम्भू महाचैत्य परिक्रमा यानाःलि लायकूयापाखे ज्वरय् याकातःगु समयाचक्र गणचक्र याय्, मूलाचार्य आदि समस्त कार्यकर्तापित नं बिइ ।

थुलि यानाः नं स्वयम्भू महाचैत्य जीर्णोद्धार कार्य सम्पन्न जूगुया उपलक्षया प्रतिष्ठा कार्य यानागु जुल ।

रजप्रवाह

ने. सं. ६३७ आषाढशुक्ल दशमीखुनु स्वयम्भू चैत्य प्रतिष्ठा यानागु, मण्डल च्वयागु रंगीन रज नदी प्रवाह याय्त् माक्क सामग्री ज्वरय् यानाः कलश थकालियात लःह्लानाः दक्क बाद्य थाकाः स्वयम्भू चैत्य छचाःहुलाः अग्निपुरं शान्तिपुर ववहांवने । भःचाखुसि होंस फि द्रं चिनाः अष्टदल पद्म च्वयातयाथाय् मध्यस धर्मधातु मण्डलया कलश, थ्वया जवय् पिण्डिकर्म मण्डलया कलश, खवय् चिह्न कलश तयाः नवनाग पूजा यानाः विधिकर्म खंकाः लिहांवयाः पाःचवय् वज्रधातुयाथाय् थ्यंकाः लँस्वयाः दुकाय् जुल ।

सद्यकौमारी बिज्याके

सद्यकौमारी बिज्याकेत सिन्धलं वज्रवाराही मण्डल च्वयाः मण्डलय् पुष्प न्यास यासे मण्डल परिक्रमं पूजा याय् । थनंलि अष्टश्मशान बलि, नन्दाबलि बिइ, छाहाय्के, विधि थे बलि पूजा

यानाःलि देवप्रतिपार पूजा त्रिसमाधि दने, सगन मामकी पूजा सिधय्काः थन सप्तकौमारीयात वस्त्र ज्वनावनाः लँस्वयाः वस्त्र तिइकाहयाः पाःचव्य वज्रधातु मण्डलयाथाय् थयंकाः विधि थे दुवाल्या तसे सप्तकौमारीयात बलि पियाः लँस्वयाः वसलायाः निमन्त्रणा याय्, यथास्थानय् बिज्याके धुँसेलि विधि थे पूजा याय् । सद्यकौमारी दर्शन व पूजा यानाः भोजन प्रसाद वितरण आदि क्रिया जुल ।

लोकोत्तर विधि

लोकोत्तर चर्या निम्ति माक्व सामग्री ताःलाकाः पूजा जुइ—गीत—मध्ये मेरू देवप्रतिपार पूजा कंजल साधन याय्, आदिग्राहकं त्रिसमाधि दने । थुक्रिया गीत— अनिल मामकी पूजा, गीत— रक्तवर्ण, देवचचा नमहूँ, थनंलि मूलाचार्य मण्डलय् थहांवनाः नृत्य याय्, गीत— त्रिभुवन ज्वलित, श्लोकनत्वा सर्वतथागत थनं क्वहांवयाः हानं पिण्डिकर्म मण्डल याःगुलिइ नृत्य यायां गीत— प्रमोदित हालाः विधि यायां पूजा मण्डल थिलाः किंगः तने, सगुन छाया, देगुसह्यच इनाबिइ, थुलि क्रिया धुंकाः जा माक्व तयाः जा ताकाः हारिती वज्र महायक्षणी बलि प्रथम कायकं वाके छ्वय् इत्यादि क्रिया यानाः सिधय्के ।

चतुर्थी याय्

आषाढशुक्ल द्वादशीखुनु चतुर्थी पूजा निम्ति होम यासे ह्वापा आखालं सालाहया तयापि द्योपि सकले आखालय्संतुं तय्के छ्वय् । शान्तिपुरया द्यो शान्तिपुरीसं तय्के छ्वय् । पञ्चदशपताः मारीचि, उष्णीष विजय, प्रतिसरा पताः, अष्टमातृका, दशक्रोध विसर्जन यासे थःथःथाय् तय्के छ्वयाः लिस्से पीगं पतिकं कलः पूजा छ्वयाः शान्तिपुरीस सेवाज्वलं पूजा यानाः समयाचक्र, गणचक्र यानाःलि चतुर्थीया पूजा याःगु जुल ।

यचि लितय्

आषाढशुक्ल त्रयोदशीखुनु यचि लितय्या कलश पूजा जुल । यचि तयातयागु देव पितकयाः विधि थे पूजा यानागु विसर्जन यानाः देवकिसली व द्योया न्हीवा बौ बियागु किस्वां तयाः इनायदेवस्त तय्के छ्वयाः मूद्यो जक स्यंगुद्योयाके तय्के छ्वयाः दिगुद्यो पुलांस्यंगुस तय्के छ्वयाः, शान्तिपुरया द्यो शान्तिपुरीस तय्के छ्वयाः, एवंक्रम गुह्येश्वरीया किसली गुह्येश्वरीस तय्के छ्वयाः थुगु कार्यया माःगु विधि थे क्रिया सिधय्कागु जुल ।

थुखुनु श्रीलामाजुया थःगु सद्विच्छा पूर्ण जूगु स्वयाः श्रीस्वयम्भू महाचैत्य सभक्ति प्रदक्षिणा यानाः सम्बन्धित कार्यकर्तानाप कुशल वार्ता यानाः व सहर्ष लिहांबिज्यात । थ्वय्कः लामाजु लिहांबिज्याय् पञ्चबुद्धयात दक्षिणा मोहः छायाः नापं मूलाचार्य कर्माचार्य उपाध्याजुपित भुलाय्गा छपु छपु व दक्षिणा कितका कितका नं ब्यूगु जुल । ऊवाःबाहाःया वज्रपाणिजुं लामाजुयात मंगलास्तव गाथा ब्वनाः लँस्वःवन, बातँ थ्यंवल्य लामाजुं मोहः दक्षिणा बियाः लिछ्वयाहल ।

श्रीस्वयम्भू महाचैत्य जीर्णोद्धार निमित्त योसिं थंनिसें प्रतिष्ठा क्रिया सिमधःतले माक्व कर्मयात गुलि माल उलि खर्च यानाः माक्वसित प्रशाद बियाःलि थःह्यं नं माक्व कर्म क्रिया धुंकाः निर्विघ्न-पूर्वक लामाजु लिहांवंगु जुल ।

आखा लितयाया

आषाढ पूर्णिमाखुनु विधि थें पूजा यानाः आखा लितया-न्ह्यापां न्हिथं न्हिथंयागु आखाबौपा १ बिइ धुंकाः न्हसह्यस्यां वर्ण वसतं तियाः सकस्यां नासमहनि तिनाः गाछि खुसे बलिपा बियाः नन्दी नमस्कार- विश्व सरोरुह छपु गीत हालाः मूलाचार्यादि न्हसह्यस्यां वज्रघण्ट ज्वंसे पञ्चताल सहितं द्योल्लानाः विधि थें क्रिया यानाः वज्रसिद्धि नृत्यनाथ स्वस्थान विसर्जन पूजनार्थ धकाः वाक्य ब्वनाः माःगु विधि यानाः आखा लितयाःगु जुल ।

वंजला वनाया

आषाढकृष्ण द्वितीयाखुनु गुह्येश्वरीस वंजला वनाया न्याह्य जोगिनी च्वनाः विधि थें सिन्दुरार्चन पूजा जुल । श्रीस्वयम्भू धर्मधातु जीर्णोद्धार कार्य प्रतिष्ठा सुसम्पन्न जूगु उपलक्ष्य सानन्दपूर्वक द्यो लितयाया वन जात्रा जुल ।

बिदा बियाया

आषाढकृष्ण तृतीयाखुनु स्वयम्भू जीर्णोद्धार कार्यय् ज्या याक्व सकलसितं आशीर्वाद एवं धन्यवाद विसे कृतज्ञता ज्ञापन यासे 'थुगु पुण्यानुभावं ननानं जगत् प्राणि सकलयां अनुत्तरबोधि प्राप्त याइपि जुइमा' धकाः आशिका यासे बिदाबाजी बियाछ्वःगु जुल ।

गुरु शय्यादान

थुगु महान् शुभ कार्य निर्विघ्नपूर्वक सिद्ध जूगु उपलक्ष्य गुरु व जजमानपिनि परस्परय् लसता जुयाः धौसगं ग्वःसगं बियाः गणचक्र याकल । मूलाचार्य व उपाध्याजुयात ६४ ता प्रकारया सामग्री सहित शय्यादान बिल ।

कःमि नायक- तेजनारां, लन्हपति, भाजुनारां न्याह्ये सित ह्यति ३० स्वीतका स्वीतका सिरपाः ब्यूगु जुल ।

क्षमा पूजा

स्वयम्भू महाचैत्य जीर्णोद्धार प्रतिष्ठा कार्य सुसम्पन्न जुसैलि छुं दिन लिपा सम्बन्धित कार्य-कर्तातिसै उगु महान् शुभ कार्यय् गुलि नं विधि विधान जुल, उकिइ विचय् विचय् गनं गुगु थासय् द्वं-विद्वं जूगु दत्त धाःसा अपराध क्षमा यानाः सुप्रशन्न जुइमाल धकाः थःथः समूह मुनाः क्षमापूजा याःगु जुल । आश्विनशुक्ल द्वितीयाखुनु राज गुभाःजु, थाकूपिनि इनाकाःगु दक्षिणा दामं क्षमा पूजा यात ।

जीर्णोद्धार कार्य सिद्ध जूगु विषयय् सँदेयात सन्देश छ्वःगु

श्रीस्वयम्भू महाचैत्य जीर्णोद्धार निम्ति सँदेया प्रसिद्ध भूमि ह्लासा व फ़िखाछेँस च्वनाः बत्तीस व्वथिया बन्द व्यापार चल्य् यानाच्च्वपि श्रद्धावन्त साहुमहाजनपित शुभ सन्देश प्राप्त जूगु अनुसारं 'छिस्करपिनि धर्मचित्त उत्पत्ति जुयाः यथा श्रद्धानुसार गुगु श्रद्धा चन्दा वियाहयादिल, उगु सहयोगप्रति चितायाक विमुन्धर, लह्लसि श्रीकृष्ण साहुजुपिनि भाषानं दुनुलंनिसे धन्यवाद' धकाः छवल ।

राजा प्रजा साहु महाजन सकसिगुं हारगुहार स्वयम्भू जीर्णोद्धार कार्यया प्रतिष्ठा समेत निर्विघ्नं सिद्ध जुल । विशेषं श्रीलामाजुं महाधन्दा कयाः माःथाय् माःगुकथं खर्च यानाः थःह्यं विधि विधान कर्म खंकाः आपाढशुक्ल त्रयोदशीया दिनय् लामाजु सँदेस थहांविज्यात ।

थुगु प्रतिष्ठा कार्ययागु पञ्चविंशतिका स्वांप्वल प्रसाद तसे शुभ कुशल विचाःभाषां लिसः छ्वया हयाच्च्वना । थुगु पुण्यं छिकपित आयु आरोग्य सुखसम्पत्ति लाभ जुयाः ननानं बोधिज्ञान प्राप्त जुइमाल जुल ।

शुभ नेपाल संवत् ६३७ आश्विनकृष्ण अष्टमी ।

। शुभमस्तु सर्वजगताम् ।

स्वयम्भू महाचैत्य गुला व नीच्यान्हु लिपा पुनर्जीर्णोद्धार

जुजु राजेन्द्र विक्रम शाहया पर्याय ने. सं. ६३८ वैशाखशुक्ल सप्तमीया दिनय् अचानक घनघोर वाफ्य वयाः श्रीस्वयम्भू महाचैत्यया च्वलामू (गजू) लुँस्वांमाः (फुलडर) त्वधुइक स्यन ।

थुगु उत्पात बिघ्न शान्तिया निर्मित जुजुं माक्व पूजा सामग्री बियाः विधिपूर्वक शान्ति याकेबिल ।

गिरिवर साह्रेंगुं पर्वतय् शोभायमान जुइक सुप्रतिष्ठित जुयाच्चंगु स्वयम्भू चैत्यया च्वलामू व लुँस्वांमाः क्षतिग्रष्ट जूगु खनाः समस्त धर्मभीरु प्रजापिनि सारै मनय् सन्देह उत्पन्न जुल कि व हे छह्य जुजुया शासनकालय् जीर्णोद्धार यानाः गुलिचां मदुवं नेपालया धर्मराजिक श्रीस्वयम्भू महाचैत्य निकोगु जीर्णोद्धार याय्मागु अवस्था जुल धकाः तस्सकं धन्दा पीर कयाच्वन ।

खतु, ने. सं. ६३७ माघशुक्ल त्रयोदशीखुनु जीर्णोद्धार प्रारम्भ यानाः ने. सं. ६३७ आषाढशुक्ल नवमीया दिनय् प्रतिष्ठा जुल । थुगु प्रतिष्ठा यानाः गुला व नीच्यान्हु लिपा अति बेगं वाफ्य वयाः थःगु श्रीशोभा विनष्ट जुइका च्वनेमाल ।

यथे वसपोल श्रीस्वयम्भू महाचैत्यया च्वलामू भङ्ग जूगु स्वयाच्वनेगु राष्ट्रनायक व देशवासीपित तच्चोगु अशान्ति अमंगल जुइगुलि यानाः उगु दोष निवारणया लागी व क्षतिग्रष्ट स्वयम्भू चैत्य सुधार व उद्धार निर्मित दुःख व संदिग्धयात त्वःताः पुण्य साधन याय्गु प्रबल इच्छां यानाः धैर्यपूर्वक हानं स्वयम्भू चैत्य जीर्णोद्धार याय्गु तत्पर जुल ।

स्वयम्भूप्रति श्रद्धां प्रेरित जुयाः वीर्योत्साह पिकयाः पुनः शुभ मुहूर्त ल्ययाः जीर्णोद्धार कार्यक्रम कथं क्रमशः चौकासिं हिलाः विधिवत् योसिं थनेगु ज्या जुल ।

श्रद्धालु देश नरेश, प्रजा, साहु महाजनपिनिगु विभिन्न सहायताद्वारा पूर्ववत् ने. सं. ६३८ आषाढशुक्ल अष्टमीखुनु मङ्गलोत्सवपूर्वक लक्षाहूति विधि यासे स्वयम्भू महाचैत्यया प्रतिष्ठा कार्य सुसम्पन्न याःगु जुल ।

स्वयम्भू चैत्यया वैरोचन तथागतयात लुँपलिं चिन

स्वयम्भू महाचैत्यया पूर्वपाखे च्वंहा पिखाद्यो बोध्यंगमुद्रा यानाच्चंहा श्रीवैरोचन तथागतया
देगल्य् श्रद्धालु दातापिनि धर्म चित्त उत्पत्ति जुयाः पौष पूर्णिमाखुनु लुँपलिं चिइत कार्य शुभारम्भ
याःगु जुल ।

लच्छि लिपा ने. सं. ६३८ माघ पूर्णिमाया दिन्य् ओंवाहाःत्वाःयापि धर्मात्मापि मुंकाः द्वादशी
तीर्थ सेवा साङ्गि जूगु उपलक्ष्य सकल तीर्थयात्रिपिनिगु श्रद्धा चन्दा मुंकाः वैरोचन तथागतया देगल्य्
विधिवत् सुवर्ण कलश लुँगजू प्रतिष्ठा यानाः तयाव्यूगु जुल ।

पण्डित अमृतानन्दलिसे हजसनजुया स्वयम्भूया मूर्ति व चैत्य अध्ययन

विश्व प्रसिद्ध यल श्रीमहाबुद्ध मन्दिरया संस्थापक बौद्धाचार्य अभयराज शाक्यजुया वंशय् जन्म जुह्य अमृतानन्द खः । जुजु श्री ५ गीर्याणयुद्ध विक्रम व श्री ५ राजेन्द्र विक्रम शाहदेवया पालय् तर्क यलया लब्धप्रतिष्ठ विद्वान् जुयाच्चंहा अन्तरराष्ट्रय् तर्क नांदनाच्चंहा बौद्धविद्वान् नं खः ।

थ्वसपोलं थःगु मांभाय्प्रति अगाढ श्रद्धा तसे नेपाल भाषां व्याकरण नं दय्कावन । उगु व्याकरण, अपशोचया खँ, कीगु जन्मभूमिइ खनेमदय् धुंकल, थौं बिलायत देसया अक्सफोर्ड युनिभर्सिटीया पुस्तकालयय् 'अमृतानन्द बदेया व्याकरण' नामं सुरक्षित् यानाः सम्मानपूर्वक तयातल । उक्रियागु प्रतिलिपि भाजु कमलप्रकाश मल्लजुं माईक्रो फिल्म यानाहया दिइगु दु । उगु माईक्रो फिल्मया आधारय् उतार यानाः चवसापासाया २५ दँ बुदिया उपलक्षय् पिदंकेगु नं प्रस्ताव स्वीकृत जुइ धुंकूगु खः, तर प्रकाशय् मवःनि । पण्डित अमृतानन्दजुं पाल्पाया जुजु श्रीपृथ्वीपाल सेनयात नेपाल भाषा स्यनेगु नं ज्या यानादिइगु खँ यल न्यूतटोलया दैवज्ञ ललितराजया संग्रहय् च्वंगु नेपाल भाषां च्वयातःगु हनुमान नाटकया अन्तिम पुष्पिका वाक्यं स्पष्ट नक्सां धयाच्चंगु दु । उदाहरणया लागी उगु वाक्य थन प्रस्तुत याय्—

श्रीपृथ्वीपालसिंहारव्य पर्पारीयनृपाज्ञया ।

व्यरचयच्छ्रीमदमृतानन्दः काष्ठपण्डपे ॥

नेपालभाषया वर्षेखाक्षिरत्न समन्विते ।

माधवेमासि धवले गुरौवारेन्तके हरो ॥

श्रीपृथ्वीपालसिंह जुजुया हुकुमनं देवयाननंद दयूका
नेपालभाषां गुलिमिखारतन युक्त नेपाल संवत्
वच्छलाया शुक्लपक्षे तिथिससमच्छिसं इन्द्रयागुर्जु वारे
क्षमायाओ भाषासं जिवमजिवगुली भाषापण्डितपनीसे

श्रीपृथ्वीपालसिंह जुजुमुकूटमणिक सद्यनारायणं खव ।
 कोर्तितोयुमिलाथ्ये' सियमदुसिमाथ्ये' दानयायगुलीस ॥
 बानलाकामदचोथ्ये' जुधिष्ठिरजुजुथ्ये' सत्यवादिप्रतापी ।
 निभादचोथ्ये'वललाक रणयाशत्रुथ्ये' थमंती तिजमथ्ये' ॥
 बांवालामयजुचापि अतिरसिकमिखां
 प्वालाकस्वया मुसुहुं ह्लिलाओ
 भायमस्यु जुजुधनि प्रभुं हे
 धाय्वेले जवाफ वियफयक्ययातं
 दयक्य नेपाल भाषां श्रीपृथ्वीपालसिंहो
 जुजुया हुकूमनं देवयाननन्दं
 तओप्वालं मिखापालं नेपालयागुली
 वद्धोलाथ्वक षष्ठी ग्रन्थदयका निवा भाषां
 ज्यूसामज्यूसाम दयकाथ्व भाषां
 जुजुया आज्ञा शिरसं तयाओ
 आज्ञा प्रभावं मभिनं भिनजू ।

थ्व पद्यमय नेपाल भाषाया रचनां थ्व आशय बुक्य जू—पश्चिम पात्पाया जुजु श्रीपृथ्वीपाल
 सेन श्री ५ गोर्वाणयुद्ध विक्रम शाहदेवयात शुभराज्याभिषेक विइ निम्ति काष्ठमण्डपय् वयाच्वंगु इलय्
 स्थानीय जन भाषा नेपाल भाषा सय्केगु जिज्ञासा जुयाःलि तत्कालीन नेवाःसमाजय् प्रसिद्ध विद्वान्
 जुयाच्वंह्य यल महाबुद्धया पण्डित अमृतानन्द वदेजुयाके नेपाल भाषा स्यनाकाःगु खनेदु । थ्व भाषा
 सय्केत पण्डित अमृतानन्दजु अति रसिक मिखा जुयाच्वंपि बांवांला पि नेवाःनीतनाप ख्याल ठट्टा
 याय्गुनिसें नेवाःभाय सय्केगु शुरु याःगु खनेदु । थुगु प्रकारं नेवाः भाषा स्यना यंकुयंकुं बांलाक नेपाल
 भाषाय् दखल दसेलि हानं जुजुयागु इच्छानुसारं पद्यमय नेपाल भाषां हनुमान नाटक चवयाविल ।

पण्डित अमृतानन्दजु नेपाल भाषाया जक विद्वान् मखु परन्तु संस्कृतय् नं उत्तिकं विद्वान्हा खः
 धइगु प्रमाण महाकवि भदन्त अश्वघोषं दय्कूगु 'बुद्धचरित्' नामक पुस्तक सूर्यनारायण चौधरीजुं
 सम्पादन यानाः हिन्दी भाषां अनुवाद यानातःगु बुद्धचरितया भूमिकाय् थथे च्वइत गु दु—साकेत
 निवासी सुवर्णाक्षी ब्राह्मणया काय् महाकवि अश्वघोषं थःगु ब्राह्मण धर्मया शिक्षा-दीक्षा अध्ययन यानाः
 नं आखिर बुद्ध धर्मप्रति श्रद्धां प्रेरित जुयाः बौद्ध जूगु जुल । स्वयं बौद्ध जक जुयाः नं सन्तोष मजुयाः
 उख्येथुख्ये चाःहुलाः उपदेशक व प्रचारक नं जुल । थुगु ज्याया निम्ति काव्य व संगीतयागु नं सहारा
 कयाः गायक गायिकापिनिगु दलबल सहित यानाः बाजा थाथां जीवनया अनित्य चलन विषय कयाः
 बांवांलाःगु सारभूतगु मे हाहां मनुतय्त बुद्धधर्मपाखे ध्यान आकृष्ट यानाविल । थ्वय्कः गुलि विद्वान्
 धइगु बारय् काव्य विकासयागु ऊवल्य् बाल्मीकियां लिपा कालिदास स्वयाः नं ह्लापायागु मर्यादाक्रमय्
 तयातल । उकिं महाकवि कालिदासयात अश्वघोषया ऋणी धयातल । तर थुगु अश्वघोषयागु महाकाव्य

बुद्धचरितय् किंल्लय्गू सर्गं जक जुयाच्चंगुलिइ महाकवि अश्वघोषयागु असाधारण विद्वतायागु काव्यामृत रस नाप मिलय् जुइक सिइमदय्क अन्तिम प्यंगू सर्गं संस्कृत श्लोकं छन्दबद्ध मिलय् जुइक तनाबिया बिज्यात धकाः च्वयातल । थुलि जक मखु हानं नेपाःयागु बौद्ध साहित्य गद्यमय संस्कृतं च्वयातःगु ललितविस्तर, स्वायम्भू पुराण नं पद्यमय संस्कृतं च्वयाथकूगु नं खनेदु । थथे थःगु नामं छन्दोऽमृतलता नामक छन्द शास्त्रं च्वयाथकल ।

छन्हु थ्वसपोल पण्डित अमृतानन्दजुयात यल हःखात्वाःया श्रद्धालु धनभाजु शाक्यजुया अनुरोधकथं गुरु उपाध्याया रूपय् मार्गदर्शक थें यानाः छगू दलबल सहित बुद्धगयाय् तीर्थयात्रा वन । थुगु तीर्थयात्रा वंगुलिइ दानपति धनभाजु, शुभाकरमुनि, भाष्करमुनि व रजुधनपिनिगु नां न्ह्यथनातःगु दु । थुगु तीर्थयात्रा शुभारम्भ याःगु दिन खः ने. सं. १३५ पौषशुक्ल अष्टमी । थुखुनु थःह्यं दय्कागु 'नेपाल देवता कल्याण पञ्चविंशतिका' नामक स्वस्ति कल्याण वाक्य परलपाः सकसितं उत्साहित एवं प्रेरित याःगु दु । थुकिइ नेपाःया प्रतिष्ठित ऐतिहासिक देवदेवतापिसं जिमिगु यात्रागमनय् निर्बिघ्नपूर्वक रक्षा याय्माः धकाः आशिका फवनातःगु जुल ।

थुपि सकलें बुद्धगयाय् थ्यँसेलि अक्षय तृतीया दिनय् स्नान दान कर्म यानाः बुद्धपूजा यानाः पिण्डपात्र दहलपाः लिस्सें पितृलोकया नामं श्राद्धकर्म इत्यादि यानाः सकुशल लिहांवल ।

बुद्धगयाय् च्वंगु श्रीशाक्यसिंह तथागतयागु चरण कमल पादुका थानाहःगु वस्त्रयात जीवदान विइ थें यानाः बांलाक मण्डलाकार रूपय् च्वयाः बुद्धपादुकायात उचित सम्मान यासे बांलाःगु पौवाहाः दय्कातल^१ । थुगु पौवाहाः ब्वयाः प्रत्येक वर्ष पञ्चाष्टीखुनु आगंपूजा यानाः छय्मचा भिनमचा समेत नकेमाःगु गुठी समेत तयाथकल । थुगु कार्यय् व हे पण्डित अमृतानन्दजुया सन्तानत सःताः नकेमाःगु थिति अद्यापि परम्परा चलय् जुयाच्चंगु दनि ।

उगु बुद्धपादुका मण्डल पौवाहाःया क्वस्सं पण्डित अमृतानन्द व श्रद्धालु दातापिनिगु चित्र नं च्वइतःगु दु, लिसेलिसें नां नं अङ्कित यानातल । थ्व हे दानपतिपिनिगु दथुस पण्डित अमृतानन्दजुयागु थःगु ह्लातं च्वइतःगु अभिलेख नं दु :—

बुद्धोबुद्धमया बोधिवृक्षस्था नारजिद्वभौ ।

तत्पादपद्य युगलमाश्रये बोधिप्राप्तये ॥

श्रीपण्डितामृतानन्दो नुजो भाजुधनो गमत् ।

पाटलीपुत्र गङ्गाया स्नात्वा

ददौ बोधिजिन प्राप्त पिण्डपात्रं स्वयम्भूकम् ॥

थुगु बुद्धपादुका मण्डलया प्रतिलिपि थानाकाःवल्यसिगु छगू अनुश्रुति थ्व दु कि पण्डित अमृतानन्दजु बुद्धगया विज्याःवल्य उगु 'बुद्धपादुका' यात अन च्वंपि ब्राह्मण पण्डित पन्दातय्सं 'विष्णुपादुका' धकाः साइनवोर्ड तयातःगु जुयाच्चन । उगु साक्षात् बुद्धपादुकायात बुद्धपादुका मधासे

१- थ्वहे बुद्धपादुकाया फोटो ब्लक श्रीमनवज्र वज्राचार्ययागु 'मध्यकालीन कला' स प्रकाशय् वय् धुंकूगु दु ।

विष्णुपादुका धकाः च्वयातःगु खनाः विद्वान् अमृतानन्दजु गन सुम्क च्वने फइ ? थ्व बुद्धपादुकायात विष्णुपादुका धकाः च्वयातःहा सु उल्लु धकाः हालाच्वन, उवल्य अन च्वंपि काशि सहरया प्रकाण्ड विद्वान्पि वयाः शास्त्रार्थ याःवल । इमिगु विचय् निर्भीकसाथ धुमधामं शास्त्रार्थ जुल, अन्तय् पण्डित अमृतानन्दजु अर्थविनिश्चय नामक ग्रन्थय् च्वइतःगु ८० व्यञ्जनया टोकाय् च्वयातःगु प्रमाण व तर्क वियाः थथे धाःगु दु—थुकिइ अङ्कित यानातःगु जवगु पालिइ च्वंगु नन्दावर्त श्रीवत्स चिह्न धइगु भगवान् बुद्धयाके दइ, मेपिके दइमखु । तर, थ्वहे 'नन्दावर्त श्रीवत्स चिह्न' ब्रह्माया कपालय् दइ, विष्णुया नुगःपाचय् दइ, अथे हे महेश्वरयाके त्यफु ववस्सं दइ धकाः धाःगु खँ न्यनाः वादीजनत चित्त बुक्य जुल, अले दर्शकगणपि सकसिनं सहर्ष स्वीकार यासे करतलध्वनिद्वारा पण्डित अमृतानन्दयात अभिवादन यात ।

थुगु इलय् भारतय् ब्रिटिशतय्गु शासन चल्य जुयाच्वंगु समयय् इमिसं नेपा व भारतया विद्वान्पिनि विचय् बुद्धगयाय् तस्सकं शास्त्रार्थ जूगु सियाः ब्रिटिश सरकारं विजय प्राप्त विद्वान् अमृतानन्दयागु विद्वतायात कदर यासे काठमाण्डू लैनचौरय् च्वंगु ब्रिटिश दूतावासय् थ्वसपोलयात जागीर बियातल^१ । पण्डित अमृतानन्दजु थःके च्वंगु ज्ञान गुण शास्त्र विद्या स्यने कने यानाः ब्रिटिशतय् प्रभावित यानातल । थुगु समय बिलाइतया प्रसिद्ध विद्वान् हजसन साहेबजु नेपाः थ्यंकः काःगु जुल ।

थ्वय्कः साहेबजु पण्डित अमृतानन्दजुयागु सहयोग कयाः काठमाण्डू उपत्यकायागु धार्मिक, सांस्कृतिक एवं ऐतिहासिक व कला सम्बन्धी ज्ञान सय्कल, लिस्सें नेपाःयागु बुद्धधर्मया महत्व । वय्कः विद्वान् हजसन निम्ति थःहा गन गुथाय् क्यने यंकूगु खः अन उगु ऐतिहासिक स्थलयागु विवरणात्मं परिचय न्यंकूगु खँत लिपिवद्ध याना तइतःगु 'धर्मकोषसंग्रह' नामक ग्रन्थ कोगु राजकीय पुस्तकालय वीरलाइब्रेरीइ वर्तमान राष्ट्रिय अभिलेखालयय् सुरक्षित जुयाच्वंगु दु । थ्व सफू विलायतय् यंकाः लितहःगु धकाः उकिइ हे च्वयातःगु नं दु । सौभाग्यवश थौं थुगु ग्रन्थ नं डाक्टर लोकेशचन्द्र महोदयजुपाखें लिथो प्रेस जुयाः पिदने धुंकूगु दु ।

१- वसपोल पण्डित अमृतानन्दजु भारतय् वनाः ब्रिटिश सरकारयापाखें सम्मान प्राप्त यासेलि थुख्ये उगु इलय् अमृतानन्दया किजा पण्डित सुन्दरानन्दजु थ्व विचाः याःगु दु कि तत्कालीन नेपाःया जुजु, महारानी व प्रधानमन्त्री स्वह्मसितं प्रशन्न याय्या लागी त्रिरत्न समान प्रशंसा यानाः तत्कालीन नेपाःयागु परिस्थिति यात नं घयपुनाः 'त्रिरत्नसौन्दर्य गाथा' नामक ग्रन्थ दय्काः जुजुया हजुरीस चह्ल्य यात । लिस्सें हनुमानढोकाय् च्वंगु कवीन्द्र प्रताप मल्लं च्वयाथकूगु फिन्याताजि आखः कियातःगु जधुंया अभिलेख नं वनाः अर्थ छ्यानाः थःगु विद्वताया परिचय बिल । थुजाःगु प्रकारया विद्वता खनाःलि नेपाल राजकीय पुस्तकालयय् पण्डित सुन्दरानन्दजु यात नं उचित सम्मान यानाः जागीर बियातःगु जुल । अज्ज पण्डित सुन्दरानन्दजुया शाखासन्तान दत्तले खोसमिस मडुगु यानाः विर्ता खान्गी वक्सय जूगु दु । व हे परम्परानुसार राजकीय पुस्तकालय (वीर लाइब्रेरी) स विर्ता खान्गी वियाः पं० यज्ञानन्दजुयात तक नं जागीर बियातःगु जुल । अज थौंकन्ह्य नांदनाच्वंगु डिनेल राईट महोदयजु च्वःगु गुगु 'नेपाल वंशावली' नं थ्व हे सुन्दरानन्दजुया सन्तान पण्डित गुणानन्दयागु अनुकृति खः ।

थुगु धर्मकोश संग्रह सफूया आधारकथं विचाः याय्वलय् विद्वान् हजसनजु काठमाण्डूस् थ्यँसेलि नेपाःया दकलय् सकलय् मुख्यगु अति पवित्रगु धार्मिक स्थल गोपुच्छगिरि पर्वतय् विराजमान जुयाच्चंहा वसपोल श्रीस्वयम्भू महाचैत्य नि ह्लापालाक दर्शन, प्रदक्षिण एवं अध्ययन याःगु खनेदु । वय्कः हजसनजुयात सन्तोषजनक जुइक थुइक स्यने-कने फुह्य उगु समयया सुयोग्य विद्वान् अमृतानन्द शाक्यजुं थाय्भासय् क्यने यंकूगु जुयाच्वन ।

विद्वान् हजसन स्वयम्भूइ थ्यँसेलि अप्पो यानाः वय्कःयात स्वयम्भूया छ्वाःख्यरं च्वंगु मूर्ति-कलापाखे ध्यान आकर्षित जूवन । अनयागु महत्वपूर्ण एवं कलात्मक दुर्लभ मूर्तितय्गु विषय कयाः पण्डित अमृतानन्दजुं बांलाक ध्वाथुइक खँ कनाब्यूगु खनेदु । तर, अपशःच उगु मूर्तिविवरण सूचिकथं विचाः यानाः स्वय्वलय् थोंकल्लय् उगु दुर्लभ महत्वपूर्ण प्रामाणिक मूर्तित गुलि असुरक्षित जुल, गुलि भूगर्भय् दुने विलुप्त जुल, गुलिजा अपहरण नं जुल । न्ह्यागु थजु, विद्वान् हजसनयागु अनुरोधकथं पण्डित अमृतानन्दजुं थःगु धर्मकोष संग्रह पुस्तकय् स्वयम्भूया मूर्तितय्गु विवरण च्वयाः रिकर्ड तयाथकल, बौद्धअनुसन्धानया क्षेत्रय् थ्व छगू महत्वपूर्ण ज्या खः, पण्डित अमृतानन्दयागु परिचायक नं खः ।

हजसनजुयात केवल स्वयम्भूयागु मूर्तिकलायागु जक परिचय विचाः सन्तोष याःगु मखु परन्तु अन दइच्चंगु विभिन्न प्रकारया चैत्यतय्गु नं विवरण न्यंकूगु खनेदु । थन दइच्चंगु स्वयम्भू महाचैत्य, धर्मधातु चैत्य, वज्रधातु चैत्य, अशोक चैत्य, शिखरकूट चैत्य, चतुर्व्यूह चैत्य, ज्वालाबालि चैत्य, धर्मधातु जिनालय चैत्य, पद्माकृति चैत्य, कूटागारोपरि सप्तपद्मासन चैत्य, रम्यकूटागार चैत्य, हर्म्याकृति चैत्य, कलशाकार चैत्य, जलहयोपरि पञ्चजिनालकृत चैत्य, भुवनाकृति (सुमेरु) चैत्य एवं मंगलबहुद्वार चैत्य आदि यात कयाः निर्देशन यानाक्यंगु जुल । अज्ज शाक्यमुनि बुद्धया जीवनी सम्बन्धी चर्चा यायां शाक्यमुनि बुद्धं श्रीस्वयम्भू महाचैत्य दर्शन याय्त विज्याःगु खँ नं न्ह्यथनातःगु दु । थ्वसपोल विद्वान् अमृतानन्दयागु धापूकथं स्वयम्भूया दक्षिणपाखे (किण्डोल) पर्वतय् अशोक महाराजं अन नं चैत्य निर्माण यानाथकूगु आशय क्यंगु दु । लिस्सें साहेबजुयात स्वयम्भू सम्बन्धी उत्पत्ति व अले उकिया अर्थविशुद्धि नं कनाविज्यात । लिस्सें स्वयम्भू विषय खँ कने धुंकाःलि अनं सरासर देवपत्तन ग्वलया प्रसिद्ध प्राचीन चैत्य धनदोचीवाहाःया चाकलय् च्वंगु विविध मूर्तितय्गु नं वर्णन न्यंकल । थनंलि आर्यघातया विरुपाक्ष मूर्तियागु पृष्ठभूमि नं कनाब्यूगु जुल । थनं वयाःलि पण्डित अमृतानन्दया थःगु विहार रुद्रवर्ण महाविहार व महाबुद्ध देगः नं क्यनेहल, नापनापं योतालिविया सुन्दर चैत्ययागु नं वर्णन न्यंके धुंकाः थनं लिपा हिरण्यवर्ण महाविहार क्वाःवाहाः क्यने यंकल, थनच्चंगु चैत्यया सन्दर्भय् योगाम्बरया अर्थ नं न्यंकाविज्यात । थुगु प्रकारं ऐतिहासिक स्थल निरीक्षण याके धुंकाःलि हानं थःगु छेँय् ब्वनाह्याः थःकेच्चंगु बौद्धग्रन्थया संग्रह नं क्यंगु दु, उवलय् उगु ग्रन्थया नं सारांशं परिचय न्यंकाः बुद्धधर्मया महत्व व आदर्श नं थुइकाब्यूगु दु । थ्व हे प्रसङ्गय् आर्यनामसंगीतिया टीका अमृतकणिका, आचार्य क्रियासमुच्चय, ॐ मणिपद्मे हूँया अर्थ, नागार्जुन रचित धर्मसंग्रह, चूडाकर्म विषय चर्चा, भूतचिकित्सामतं द्वादश ग्रहया ध्यान व अले बुद्धधर्मया सारभूत तत्त्व त्रिरत्नया अर्थ विशुद्धि तथा युग

सम्बन्धी विवेचना इत्यादि खँ कनाः विद्वान् हजसनजुयागु मन बुद्ध धर्मपाखे ध्यान आकर्षित यानाविल ।

थ्व व्याक्क विषय कयाः दूरदर्शी पण्डित अमृतानन्दजुं हजसनजुयागु अनुरोध अनुसार 'धर्मकोषसंग्रह' नामक ग्रन्थ चव्याब्यूगु दु । थ्व ग्रन्थ चव्य सिद्धयूगु दिन खः—ने. सं. १४६ श्रावण-कृष्ण षष्ठीया दिनस ।

ऋतूदधिनिधौ वर्षे श्रावणे कृष्ण आरुणे ।

श्रीसाहेवाज्ञया लेखदमृत शाक्यशासनः ॥

स्वयम्भूया चाकलय् तेजनारां तुलाधरं त्वहंतं सियाब्यूगु

येँया मदुटोल कोदेविदे ग्वाःपसः इमासिकोल यंताछेँया तुलाधर लाओत तेजनारांया धर्म चित्त उत्पत्ति जुयाः श्रीस्वयम्भू महाचैत्यप्रति अतिकं श्रद्धाभक्ति तथाः विवेक विचारं खंकाः स्वयम्भूया चाकलय् छचाःखयरं उख्येथुख्ये फोहर मजुइकेत ध्याचः मजुइकेत न्ह्याबले सुगधर सफा याय्त बांलाकेत यचुक पिचुकेत चक्कं ज्याछिके निम्ति त्वहंतं सियाब्यूगु जुल^१ ।

श्रद्धालु धर्मात्मा दाता तेजनारांजुं थुगु स्वयम्भू महाचैत्यया प्रदक्षिणापथ छचाः जक त्वहंतं सियाब्यूगु मखु निम्नलिखित स्थानय् नं माःथाय् माःकथं व्यवस्था मिलय् यानाः दिक्क व अत्सि मचासे उत्साहपूर्वक पटक पटक यानाः बांलाक ज्याछिक त्वय्क चक्कं त्वहंतं बँ सिइकूगु जुल ।

- (१) ह्वापालाक स्वयम्भू महाचैत्यया चाकलय्
- (२) करुणामयया थासय्
- (३) चिकंकुथिस
- (४) फसखाद्यो (वायुपुर) स
- (५) क्रकुच्छन्दया चैत्ययाथाय्
- (६) देवावतार (बही फलय् च्वंहा तःधिकःहा भविष्य व्याकरण मुद्रा बुद्ध) या न्ह्योने
- (७) शान्तिपुर वनेगु मूलपुस
- (८) शान्तिपुरया पिथुगलस
- (९) साम्भतदेयाथास
- (१०) वसिगाल (नागपुर) स
- (११) गुम्बाया न्ह्योने
- (१२) मय्जुदेव (हारती) या न्ह्योने

थुगु शुभकार्य ने. सं. १९६३ मार्गकृष्ण पञ्चमीया दिनय् विधि थें पूजा उत्सव यासे सिधय्कूगु जुल ।

स्वयम्भू महाचैत्यया च्वलामू व लुँस्वांमाः तस्सकं वाफ्य वयाः तोधुल

प्यख्यरसं वन जंगलं चा हुलाच्चंगु काठमाण्डू उपत्यकाया पश्चिमपाखे लानाच्चंगु गिरिवर साह्रेंगु पर्वतय सुप्रतिष्ठित स्वयम्भू चैत्य जूया निर्मित बारंवार प्राकृतिक प्रहार लानाच्चंगु खँ इतिहासं कनाच्चंगु दु ।

विगत ने. सं. ६३८ सालं थुगु स्वयम्भू चैत्यय वाफ्य वयाः गुगु प्रकारं क्षतिग्रष्ट यात, उगु किसिमं निको खुसिइ पीदँ लिपा ने. सं. ६७८ चैत्रकृष्ण द्वादशीखुनु बहनीसिया ७ ह्यघौ जाःबलय आकाकां महान् बेगं वाफ्य वयाः व स्वयम्भूया च्वलामू व लुँस्वांमाः प्यमालं तोधुइक विनाश जुल । तर मेगु गनं छुं मजू ।

थुगु स्वयम्भू चैत्ययागु दुरावस्था खनाः श्रद्धालु धर्मात्मापिनिगु सहयोगद्वारा पुनः च्वलामू (गजू) लुँस्वांमाः (कलडर) बांलाक दय्काः विधिवत् जीर्णोद्धार यानाव्यूगु जुल^१ ।

स्वयम्भू महाचैत्यस न्याद्वः व सच्छिवः पञ्चोपचार पूजा याकूगु

पुण्यभूमि नेपाल मण्डल्य गुबल्य श्रीस्वयम्भू ज्योतिरूप महाचैत्य उत्पन्न जुल उबलयनिसें वसपोलप्रति श्रद्धा भावभक्ति तसे इलय-व्यलय बुद्धबोधिसत्त्व एवं सिद्ध विद्याधर योगीजन तथा ऐतिहासिक राजा महाराजपिसं अनेक माथं पूजादि स्वागत सत्कार याना वइचवन । थ्व हे ऊबलय इहत्र सुख सस्पत्ति परत्र मोक्षगतियागु आश्रय यानाः गुलिसिनं गुगु प्रकारं उदारता व्यक्त यानाः श्रद्धा भावभक्ति प्वंका वइचवन, थ्व हे सन्दर्भ्य स्वयम्भूया परम भक्त जुयाच्चंहा येँया यतखाबाहाःया साहु श्रीधनसिंह ताम्रकार सुदूर उत्तरापन्थ चीन देसं सकुशल थ.गु छेँय लियसेलि नेपाल प्रतिष्ठाता भक्तिया चूडामणि धर्मराजिक श्रीस्वयम्भू महाचैत्यय तच्चोगु हर्ष व उल्लासपूर्वक ने. सं. १८२ फाल्गुण-शुक्ल चौथी अश्विनीनक्षत्र ब्रह्मयोग मंगलवारया शुभदिनय पञ्चतथागतया न्होने दशांशहोमादि क्रिया याकाः न्याद्वः व सच्छिवः पञ्चोपचार लास्या घण्ट वादन स्तुति याकूगु जुल ।

थ्व हे न्याद्वः व सच्छिवः प्रमाणं स्वयम्भूइ पञ्चोपचार पूजा उत्सव जूगु महान् शुभ उपलक्ष कयाः लिसें छेँखां छहा छहा येँया वज्राचार्यपित निमन्त्रणा यानाःलि स्वयम्भूइ समाधि योग याकूगु खँ नं उल्लेख यानातः गु दु' । लिसेलिसें दानपति धनसिं साहुयागु थःगु ह्लातं निसः व पीगुकु दइच्वंगु पताः नं स्वयम्भू महाचैत्यय छायाव्यूगु खँ नं न्हयनातल ।

थुगु क्रियाया प्रमुख कार्यकर्ता थःगुरु क्वंसाःबाहाःया जुजुधं वज्राचार्य मूलाचार्य जूगु जुल । थ्वय्कःया काय मानवीरयात कर्माचार्य यानाःलि अथे हे तःछेँबाहाःया प्रत्यहर्षमान उपाध्या व नरुवहीया हर्षमानन्द वज्राचार्ययात गीताचार्य यासे थुगु कार्य मंगलपूर्वक सम्पन्न याःगु जुल ।

थुगु क्रियाया दरु न्याय्कूखुनु ने. सं. १८३ कार्तिककृष्ण ११ स दानपतिया छेँस तओमातनया सद्यकौमारी विज्याकाःलि महारहस्य ताहासिदूराचर्चन पूजा यानाः सिध्यकूगु खँ नं अङ्कित यानातल । थुक्कियागु लसताय काठमाण्डू उपत्यकाय दकलय सकतय विशालगु वज्रासन स्थित ह्यूमत बुद्धवारीया दीपङ्कर बुद्धमूर्ति जीर्णोद्धार कार्यय नं सक्रिय भाग कयाः आवश्यक सहयोग नं यानादिले ।

स्वयम्भूप्रति विहार स्वरूप छे शुभ संकल्प

सहस्रदल रत्न सरोजया द्योने उत्पन्न जुया विज्या ह्य श्रीज्योतिरूप स्वयम्भू धर्मधातु वागीश्वर नामक आदि बुद्ध श्रीस्वयम्भू महाचैत्ययात युगयुगनिसें अनेक उपलक्ष विषय कयाः बुद्ध, बोधिसत्व, सिद्ध, विद्याधर योगी, आचार्य एवं भिक्षुपिसं उपासक उपासिकापिसं इलय्-व्यलय् विविध पुण्यतिथिइ थःथःगु श्रद्धा भक्ति अनुसारं फुह्यं फुथे अनेक पूजोपचार पूजोपहार तथा दानदक्षिणा रत्नमण्डल आदि चढ्य यानावंगु खँ इतिहासं कनावइच्चंगु दु ।

थ्व हे ऊवल्य कान्तिपुर सुवर्ण प्रणाली महानगर यटखाटोल स्थित यटखाबाहाःया ताम्रकार धनसिंह साहु सुदूर उत्तरापन्थ चीन देस थ्यंक कायाः लँयागु अनेक दुःख कष्ट सहः यानाः उत्साह व वीर्य पिकयाः आपालं समयतक वितय् यानाः चीन देसया लब्धप्रतिष्ठ महानुभावपिलिसे सम्पर्क तयाः गुलिख्य धन श्रीसम्पत्ति कमय् यानाः आनन्दपूर्वक थःगु छेय् लिथ्यंगु उपलक्ष्य अनेक बिघ्न शान्ति निर्मित श्रीस्वयम्भू महाचैत्य व श्रीवज्रयोगिनीया नामय् विहार सहितगु थःगु छे विधिपूर्वक शुभ संकल्प यानाः प्रदान यानादिल ।

थन विहार प्रदान यात धकाः मेमेगु बही, बाहाः, कच्चाबाहाः थें प्यख्यरसं छे दय्काः चूखंका दय्कातःगु विहार मखु थ्व केवल थःगु छेय्संतुं छ्यलिइ जक साधारण विहारया लक्षण थें जक च्वंक मिलय् यानाः दय्कातःगु जक खः । थन छ्यलिइ दुने उत्तराभिमुख श्रीसमन्तभद्र तथागत प्रतिष्ठा यानाः न्ह्योने दृष्टिया सत्ता देव मूर्ति तथा दय्कातइतःगु थःगु हे तालगु चैत्य दु । थ्वया लिक लिक वज्रपाणि, हारिती व पात्रोपरी स्थित भगवती काष्ठमय सिंहासन व लिस्से वज्रयोगिनी युक्त संसःत्वहं नं दु । थ्व हे संसःत्वहंतय् च्वइतःगु दु—‘थ्व विहार सहित छे श्री ३ वज्रयोगिनी श्री ३ स्वयम्भूयात दोहलपा ।’ थ्व हे छेयापाखे श्रीस्वयम्भू पूजा निमित्त नीफा जाकि बीगु खँ नं अङ्कित जूगु जुल ।

थुकिया दानपति खः यटखाबाहाःया ताम्रकार धनसिंह, भार्या दयालक्ष्मी, पुत्र हर्षरत्न, पौत्र दानवीरसि आदि परिवार सहित । थ्व शुभ संकल्प जूगु दिन खः ने. सं. ६८२ फाल्गुणशुक्ल सप्तमी ।

धनसिंह साहुया स्वयम्भू जीर्णोद्धार

श्री ५ सुरेन्द्र विक्रम शाहदेवया छद्म विश्वासपात्र जुयाच्चंहा काठमाण्डू यतखावाहाःया ताम्रकार धनसिंह साहु खः । श्वय्कः कुशल नीतिज्ञ व चातुरी व्यापारी जूहा जुया निम्ति नेपाल सरकारी सम्बन्धी ज्याखँय आवश्यक व्यवस्था मिलय यानाः चीन देसय नियुक्ति यानाछ्वःगु जुयाच्वन ।


नेपाल सरकारीयागु ओहदाय च्वनाः चीन देसय गुलिछि समयतक वितय यात । श्वय्कः धनसिंह साहु सरकारीयागु उच्च पदाधिकारी नियुक्ति जुयावसां व्यापार बुद्धि दुहा जुयाः अप्रत्यक्ष रूपं व्यापार नं यानादीगु जुल । उकिं चीन देसय च्वनाः नं आपालं धन सम्पत्ति कमय यानाः श्रीसमृद्धिवन्त जुयाः सकुशल नेपाः थ्यंकः छाःगु जुल । श्वय्कः चीन देसय च्वंच्वंवलय अनयापिं गणय मान्य प्रतिष्ठित अनेक विद्वान, व्यापारी एवं कुशल कलाकारपिनाप परिचित जुइगु स्वाभाविक हे धाय्माल ।

परन्तु श्वय्कः साहु नेपाः थ्यँसेलि श्रीसमृद्धिवन्त जुयावःगु खना मित्रवर्गपिनि अनुमोदन व शत्रुवर्गपिनि विरोध जुइगुजा श्व संसारया चलन हे जुल ।

श्वय्कलं सुदूर उत्तरापन्थ चीन देस थ्यंक छायाः मार्गन्तरयागु अनेक दुःख कष्ट सहः यानाः धैर्य व साहस पिकयाः सरकारीयागु ज्या नं सफल यानाः थःगु मनोवाञ्छा नं पूर्ति यानाः सकुशल थःगु जन्मभूमि थ्यंकः वय्फुगुलि अत्यन्त हर्ष जुयाःलि श्वय्कलं थुगु अवस्थाय स्वयम्भू महाचैत्ययागु दुर्दशा क्षतिग्रष्ट जुयाच्चंगु स्वयाच्वने मफुत । थःह्यं चीन देसय वनाः उपार्जन यानाहयागु धनराशि सदुपयोगय ह्यगुलिइ तच्चोगु तत्पर जुल, वय्कःयागु सम्यक संकल्प थुगु स्वयम्भू महाचैत्ययात पूर्ण रूपेण शास्त्रोक्त विधिपूर्वक जीर्णोद्धार याय्गु शुभ संकल्प यानादिल ।

धनसिंह साहु स्वयम्भू महाचैत्ययागु पूर्ण रूपेण जीर्णोद्धार याइगु जुल धइगु शुभ सन्देश ह्यियाह्यिथं प्रचार जुजुं वनाच्वन । श्वय्कःया विरोधी पक्षतसें कमय यानाहःगु खनाः स्वयम्भूपुसिं अनेक प्रकारया दोषारोपन यानाः चूक् माला जुयाच्वन—गथे यानाः धनसिंह साहुयागु श्रीसम्पत्ति ताईजाद याके धइगु विषय कयाः कुत्रयास यानाच्चं पिं शत्रु पक्ष नं उत्तिकं बल्लानाच्वन । संसारय न्यागुं ततःधंगु धर्मकार्य जुइवलय अनेक किसिमया मार विघ्न उपद्रव पिहांवइगु जुयाच्वन खनी ।

श्रीस्वयम्भू महाचैत्य



वज्रधातु मण्डल

गुकिया फलस्वरूप विरोधीतय्गु जाहेरी न्यनाः सरकारं नं उत्तिकं शंका उपशंकाया दृष्टि धनसिंह साहुप्रति बांमलाःगु दृष्टि स्वयाचवन ।

विरोधी दलतय्गु कुप्रयास व सरकारयागु बांमलाःगु दृष्टिपात जूगु चतुर साहु धनसिंहजुं बांलाक बुक्य जूगुलि निगू पक्षयागु जालचक्रपाखे मुक्त जुइगु लागी थःह्यं नं जत्तन युक्ति याना हे चवन । तथापि उगु जालचक्रं मुक्त जुइगु लागी इहत्र परत्र निगू लोकयात नं सुधार जुइगु किसिमं सरकारयागु जालपाशं वचय् जुइत थःगु छेँ तक नं गुठोया रूपय् परिणत याय्गु विचार कोछित । थ्व हे विचारकथं यटखावाहाःया दक्षिण लइया ऊवल्य च्वंगु न्यापाः सँऊयाः दइच्चंगु छेँया छ्यलिइ दुने जक पाय्छिगु वःचाधंगु विहारया रूपय् परिकल्पना यानाः समन्तभद्र तथागत तयाः थ्वया न्ह्योने थःगु हे तालगु विशेषता दइच्चंगु चैत्य व हारिती, भगवती एवं वज्रपाणि स्थापना यानाव्यूगु जुयाचवन । थुगु धनसिंवाहाः (समन्तभद्र विहार) ने. सं. १८२२ फाल्गुणशुक्ल सप्तमीया दिनय् सुरेन्द्र विक्रमया पर्यायस थः धर्मपत्नी दयालक्ष्मी, काय् हर्षरत्न व छय् दानवीरसिंह आदि परिवार सहित जुयाः साहु धनसिंहजुं श्रीवज्रयोगिनी व स्वयम्भू महाचैत्ययात चढय् यानाव्यूगु जुल^१ । थ्व शिलापत्रय् थ्व नं उल्लेख यानातःगु दु— थुगु छेँया पाखे श्रीस्वयम्भूइ नित्यपूजायात २० पाथि जाकि विइगु व सम्यक भोजनय् बिज्याकिइह्य सुवर्णमय बुद्धमूर्ति छह्य नं स्वयम्भूइ प्रीति याःगु जुल । थुगु शिलापत्रया दत्थुइ वज्रयोगिनीया मूर्ति कियाः थक्याः शोभावृद्धि यानाव्यूगु दु । थ्व शिलापत्रया थःगु हे विशेषता खः ।

थुख्ये थःगु छेँ स्वयम्भू व वज्रयोगिनीया नामय् समर्पण यानाविल, उख्ये स्वयम्भू महाचैत्य-यागु जीर्णोद्धार कार्य नं जुयावं चवन । थ्वय्कः धनसिंह साहुजु चीन देसनाप यक्व घनिष्ठ सम्बन्ध दय्छुं कूहा जुया निर्मित थ्व हे स्वयम्भू जीर्णोद्धार कार्ययागु लागो वि. सं. १९२० (ने. सं. १८३२) सालं चीनया कुशल कलाकार कालीगडयात सःताः आवश्यक निर्देशन बियाः ज्या याकूगु जुयाचवन^२ ।

थ्वय्कः धनसिंह साहु वज्रयोगिनी व स्वयम्भूया परमभक्त खः । उकिं थ्वय्कः ह्ति ह्ति स्वयम्भू महाचैत्य प्रदक्षिण मयासें लुमधंहा सन्तोष मजूहा जुयाचवन । छन्हु साहुजु स्वयम्भू महाचैत्य प्रदक्षिण यायां मानय् चाःहुइकु हुइकु अकस्मात् हृदयगति बन्द जुया थःगु प्राण सदांया लागो स्वयम्भू महाचैत्यस विलीन जुयावन । थ्वय्कः साहुजु असामयिकवश देहावसान जूगुलि थःगु शुभ संकल्प अनुसार स्वयम्भू जीर्णोद्धार कार्य परिसमाप्त जूगु स्वयम्भूकंतुं थुगु लोक तोतावन ।

छुं दिन लिपा थ्वय्कःया सुपुत्र हर्षरत्न साहुजुं थःअबुजुयागु महान् शुभ प्रतिज्ञा दिव्य भावना अपरिमित पुण्य कार्य साङ्गि याय्गु लागी दिवंगत पितायागु महान् सदिच्छा पूर्ति निर्मित आवश्यक व्यवस्था मिलय् यानाः यथा विधि अनुसारं सुरत श्रीमहाविहारया मूलाचार्य श्रीसमन्ताहर्ष वज्राचार्य उपाध्या लायकू बहीया श्रीपुण्यमानपति एवं कर्माचार्य सुरत श्रीमहाविहारया रत्नचूडामणिपिनिगु संविधानत्वय् ने. सं. १८७७ सालं महामङ्गलपूर्वक जीर्णोद्धार प्रतिष्ठा कार्य सुसम्पन्न याःगु जुल ।

१- धनसिंह साहुया छ्यलिइ च्वंगु शिलापत्र ।

२- ऐतिहासिक कुण्डलीपाखे उद्धृत, १८६

स्वयम्भू लक्षावती पाठ याय्गु गुठी तःगु

स्वयम्भू महाचैत्यप्रति श्रद्धाभक्ति तसे लिस्सें थः दिवंगत अबुजु रेखरत्नया नामं दुर्गति परिशोधन कामना यासे दँय्दँसं श्रीस्वयम्भू आदिबुद्धया अग्र्य् धर्मश्री प्रज्ञापारमिता लक्षावती पञ्चविंशति सहस्रिका सद्धर्मग्रन्थ पाठ याकेगु गुठी तयाव्यूगु जुल । थुलि जक मखु दानपतिजुं थ्व नं बिचाः याःगु दु कि त्रिरत्नालोक शासन कीर्ति अर्थ विशुद्धि नाप मिलय् याय्गु प्रमाणकथं हानं संधनायक श्रीआर्यावलोकितेश्वर करुणामययात नं आदर सत्कार तयाः खर्च हनेगु गुठी समेतं तयाव्यूगु दु^१ ।

थुकिया दानपति खः असन त्यौडत्वाःया श्रद्धालु द्रव्यरत्न तुलाधर । थुगु गुठी तःगु ने. सं. १००० सालस जुल ।

१- स्यंगु तँन थहांवनेवं खःपाखेच्चंगु शिलापत्र ।

स्वयम्भूष प्रज्ञापारमिता युक्त त्वहंथां स्वाःगु

स्वयम्भू महाचैत्यप्रति श्रद्धाभक्ति तसे ख्वप तचपालटोलया चित्रकार कृष्णवीर, सिधवीर, जोगवीरपिनि धर्म चित्त उत्पत्ति जुयाः स्वयम्भू अमिताभ बुद्धया न्ह्योनेच्चंगु सुवर्ण रज्जित मयूरध्वज स्तम्भया जःखः शोभायमान जुइक सुन्दर कलात्मक धर्मश्री प्रज्ञापारमिता लुं सियाः धातुया मूर्ति सुसज्जित यासे त्वहंथां स्वानाः तयाव्यूगु जुल ।

लिस्सें थ्व हे मयूरध्वज स्तम्भया खःपाखे संघश्री षडक्षरी लोकेश्वरयागु नं लुं सियाः धातुया मूर्ति दय्काः त्वहंथां तयाविल ।

थुगु निगः त्वहंथां प्रतिष्ठा याःगु दिन जुल श्री ५ पृथ्वीवीरविक्रम शाहदेवया पर्यायस ने. सं. १००३ श्रावणशुक्ल नागपञ्चमीखुनु । थ्व हे उपलक्ष्य उगु त्वहंथांया क्वस्सं क्वस्सं थःगु नामं धातुया सालिक नं तयाव्यूगु दु प्रार्थना मुद्रा सहित यानाः ।

स्वयम्भू अमिताभया न्ह्योने निह्य भव्य रूप आर्यतारा मूर्ति प्रतिष्ठा

महायान जगत्य आर्यतारायागु असंख्य महत्व दु धइगु सिइकाः कुशल आचार्यपिनिगु निर्देशनकथं आर्यताराया भावभक्ति यानाच्चंहा येँ ध्याचालखु त्वालय् च्वंहा धिर्जलक्ष्मी महर्जननीनं थःकाय्पि कृष्णसिं, सिमनसि निह्यसिगु सदिच्छानुसारं सहमत जुयाः सद्धर्म चित्त उत्पत्ति यानाःलि श्रीस्वयम्भू महाचैत्य अमिताभ बुद्धया न्ह्योने निह्यं जोलाक उति न्यंक आर्यतारा मूर्ति सभक्तिपूर्वक प्रतिष्ठा याःगु जुल ।

थुगु भव्य रूप धातुया आर्यतारा मूर्ति निह्यं व हे आसन व मुद्राय् त्रिभंग पोज्य् अर्द्ध समपद आसन यानाः वरद व अभय मुद्रा यासे शान्तपूर्वक दनाच्चंगु दु । थुगु मूर्तिया पद्मासनया द्योनेच्चंगु त्वाकलय् थ्व नं उल्लेख यानातःगु दु कि निह्यं सच्छि व किन्याधानि किन्याधानि ग्यंपि धकाः च्वइतल । थुलि भव्यगु धातुमय आर्यताराया मूर्ति काठमाण्डू उपत्यकाय् गनं बहो विहार्य् मदु धाःसां अप्पो जुइ मखु ।

थुपि निह्यं आर्यतारापि ने. सं. १००७ सालं स्वयम्भूया अग्र्य् शोभायमान जुइक विधिपूर्वक थापना यानातःगु खनेदु ।

वसपोल स्वयम्भूया पश्चिम भाग्य् च्वंहा अमिताभ तथागतया न्ह्योने आर्यताराया मूर्ति छाय् तल धइगु विषय छत्वाःचा खँ न्ह्यथने—

ताराया नामं हे सिइ दु कि थ्व भवसागरया सम्पूर्ण दुःख त्रास भयपाखे तरय् याइहा जुयाः हे 'तारा' धयातःगु खः । उकिं वसपोलयात ताराशत नाम स्तोत्र्य् धयातःगु दु—अमिताभ तथागतया न्ह्योने च्वनाः आर्यतारां हे थथे प्रतिज्ञा यानाविज्याःगु दु?—

तारयिष्याम्यहं नाथ ! नानाभयमहार्णवात् ।
तेन तारोति मां लोके गायन्ति मुनिपुङ्गवाः ॥

अर्थात् हे नाथ ! अमिताभ गुरु !! जि अनेक प्रकारया भय रूपी महासागरं तरय् याना विइ, थ्व हे कारणं लोकय् जितः मुनिजनपिनि श्रेष्ठपिसं तारा धइगु नामं कीर्तन यानाच्चन । अथे हे महान् उग्र आपत्ति भय नाश यानाः तरय् याइह्य जुयाः उग्रतारा धकाः नं धयातल । हानं अनन्त कल्पयागु अज्ञान क्लेश रूपी अन्धकार फुकाविइह्य जुयाः गनं गनं प्रज्ञाश्री बुद्धिवर्द्धनी धकाः सम्बोधन यानाः वइच्चन । थुलि जक मखु, छगू मात्र विशुद्धगु परम उद्देश्य महासुख निर्वाण विइह्य जुयाः 'एकजटा' धकाः नं प्रसिद्ध जुयाच्चन ।

गनं गनं आर्यतारा उत्पत्तिया वारय् थथे नं धयातःगु खनेदु—

थ्व संसारय् च्वंपि प्राणिपि अनादिकालंनिसें असंख्य कल्पया दुने बोधिसत्त्व महासत्त्व महाकारुणिकपि विज्यानाः गुलिखय् पटकतक प्राणिपित उद्धार याय् धुंकल, तथापि दुःख त्रास भयपाखे विह्वल जुइकाच्चंपि अचिन्त्य प्रमाणं वाकि ल्यना हे च्वनतिनि । थुमित गुवल्य जक उद्धार याय् फइ धकाः वसपोल आदिबुद्ध पुत्र आर्यावलोकितेश्वरया महाधन्दा पीर जुयाः प्राणिपिनिगु भय त्रास दुःख खनाः थःगु मिखां मचाय्क ख्वबि निफुति तिकिनन । व हे ख्वबि निफुतिपाखे थ्व हे प्राणिपित उद्धार याय्गु तत्पर जुयाः त्रिकालबुद्धपिनिगु सम्पूर्ण करुणायागु अधिकार ज्वनाः पृथ्वी मण्डलय् अवतरित जुल । व थुपि खः—आर्यतारा व भृकुटीतारा । थुपि निह्य करुणामयया जःखः च्वनाः प्रार्थनाया रूपय् 'भो करुणामय आर्यावलोकितेश्वर ! छलपोलयागु महाप्रणिधान आशिका प्रतिज्ञा पूर्ति याय् निम्ति थ्व संसारिक प्राणिपिनिगु दुःख त्रास भय परित्राणया लागी माःथाय् माःगु किसिमं उद्धार यानाः विइ' धकाः अधिष्ठान यानाविज्यात ।

थ्व हे कथायागु आदर्श अनुरूप थुगु आर्यतारायागु निगू मूर्ति पद्मकुलया नाथ अमिताभ बुद्धया न्ह्योने उपस्थित यानातःगु जुल । थुगु हे रूपं नेपाःयागु बौद्धकला प्रदर्शनी— गुंलां बहीद्यो व्वइवल्य नं अमोघपाश लोकेश्वरया जःखः आर्यतारा भृकुटीतारा व्वय्गु चलन अद्यापि परम्परा चल्य जुयाच्चंगु खनेदु । थुलि जक मखु, श्रीकरुणामय बुंगमलोकेश्वर न्ह्यात्थाय् विज्याकूसां वसपोलया नापनापं यंकिइगु मञ्जुषाय् दुने नं थ्व हे निह्य आर्यतारायागु सुन्दर सजीव मूर्ति सुरक्षितपूर्वक तयातःगु दु धाइ ।

स्वयम्भू महाचैत्यया पूर्वपारखेच्चवंगु कचादेगःया जीर्णोद्धार

स्वयम्भू महाचैत्यया छचाःख्यरं चाकःउड्कातःगु पिखाद्योया दत्थुइ च्वंगु वैरोचन तथागतया देगः जीर्णवस्था जुयाच्चवंगु खनाः दानपति असंत्वाःया चित्रकारी भानिदासं धर्म चित्त उत्पत्ति जुयाः जीर्णोद्धार याय्गु मतिइ तल ।

थुगु कचादेगः जीर्णोद्धार याय्या निर्मित स्वयम्भू प्यखाछेँया स्थवीर तेजपति व नोकू कुलमान-याके छमोहः व प्यदां दां तयाः अनुमति कयाः जीर्णोद्धार विधि अनुसार न्यास पिकयाः न्यासघल स्यंगुया आगमय् तःगु जुल ।

ह्लापायागु अप्पां दनातःगु वैरोचनयागु देगः स्यनाः छगलं पियाः हानं नःखतं वांलाक ल्वहँतं दनाविल । थुगु देगः दनेगु ज्या सिधसेलि विधि विधान अनुसारं पूर्वाचार्येपिसं यानावंगु थें ने. सं. १०१६ सालं जीर्णोद्धार कार्यं सम्पन्न याःगु जुल ।

थुगु कार्यया निर्मित मूलाचार्य जूहा तरुमूल श्रीविहारया रत्नचूडामणि वज्राचार्य जुल ।

स्वयम्भू अमिताभ बुद्धया क्वरसं ह्यस्वा द्वहलप्युगु

स्वयम्भू महाचैत्यया पश्चिम भाग्य च्वंहा सुखावति भुवनया स्वमि श्रीअमिताभ तथागतप्रति
येँ इखापुखूया चपाछेँस च्वंहा दर्शनधारी कापालि शिवगोत्र सिंहनाथ जोगि श्रद्धा भक्तिपूर्वक लुं सियाः
धातुया ह्यस्वा दय्काः द्वहलप्युगु जुल ।

थ्व ह्यस्वा ने. सं. १०१७ सालं त गु धकाः थ्व हे सुवर्ण रञ्जित धातुया ह्यस्वाया पादपीठस
अभिलेख अंकित यानाव्यूगु दु ।

स्वयम्भूस वज्रसत्त्व युक्त स्तम्भ स्वाःगु

ये मणिसिंह महाविहार मुसुंवाहाः (धर्मचक्र महाविहार) या वज्राचार्य कुलमानजुया धर्म चित्त उत्पत्ति यानाः स्वयम्भू महाचैत्य अमिताभ बुद्धया न्ह्योनेच्चंगु पुलां गुम्बाया ववम्सं श्रीहारिती- देवीया श्रद्धा अभिव्यक्त यासे त्वहंथां स्वानाथकल । उगु त्वहंथामय च्वय सुवर्णमय धातुया कलात्मक श्रीवज्रसत्त्व मूर्ति तथाः शोभावृद्धि यानाव्यूगु जुल । थुगु मूर्ति ने. सं. १०२३ सालं विधिवत् प्रतिष्ठा यानाबिल ।

खतु थुगु वज्रसत्त्व मूर्ति नं आदिबुद्ध स्वयम्भू धर्मधातु स्वरूप जुयाच्चंहा पञ्चबुद्धया अंशं उत्पत्ति जूहा धकाः उल्लेख यानातल^१—

आदि समुद्भूत धर्मधातु स्वरूपकः

पञ्चबुद्धांश संजात वज्रसत्त्व विनायकः ।

थ्व गाथाया अर्थकथं विचाः याय्वलय् पञ्चबुद्धया प्रतिनिधि यानाविज्याःहा वज्रसत्त्व जूगुलि कीगु परम्परागत चलय् जुयावइच्चंगु नेपाःया दकलय् सकलय् अति प्रसिद्धगु श्रीवरुणामय बुंगद्योयागु रथजात्रा जुइवलय् रथया दक्कसिवय् च्वय धक्किवाय्मोलय् विज्याकिइहा सुवर्णमय धातुया गुगु मूर्ति खः उगु वज्रसत्त्वयात स्यंगुद्यो धाय्गु नं चलन मदुगु मखु ।

१- गुणकारण्डव्यूह प्रथम परिच्छेद ।

स्वयम्भू महाचैत्यय वहः पातां भुनेगु देवशम्शेरया महान् संकल्प

देवशम्शेर थः प्रधानमन्त्री जुइवं देस व जनता जिइके भिके निम्ति गुलि ज्या यात व अतिकं प्रशंसनीय जू । थः प्रधानमन्त्री जुइवं अनेक सुधार कार्यत याकेबिल । थ्वय्कलं यानादिइगु खास खास ज्या खः—

देसदेसान्तरयागु समाचार गतिविधि दुनियातय्त बोध याके बिइया निम्ति साप्ताहिक गोरखापत्र प्रकाशित यात । साधारण दुनियातय्गु शिक्षा व मनोरञ्जनया लागी तिनिख्यलय् हरिकीर्तन याकेगु व निःशुल्क सिनेमेटोग्राफि क्यनेगु नं व्यवस्था यानाबिल । हलिने १२ वजय् तोप तय्गु चलन यात । त्वाःत्वाल्य पाठशालात चाय्के बियाः थः रानी कर्मकुमारीया नामं भिच्छाखोरीया जंगलय् धारा व थाय्थासय् पुखू नं दय्का बिल । थुलि जक मखु थःगु देस सुधार व उद्धार याय् कारणय् जनतापिनिगु सुकाव आह्वानया लागी थाय्थासय् पत्रमञ्जुषा नं तयाव्यूगु दु । लिस्से प्रजातन्त्र ढंगं राजकाज चलय् याय्गु मतिइ तयाः पार्लियामेण्ट स्थापना याय्गु विचार नं यात, थुकिया विषयय् विदेसं आपालं बुद्धिजीवी विशेषज्ञपि सल्लाकारत नं सःतूगु दु ।

इत्यादि देस व जनता सुखी शान्ति जुइगु आपालं सुधार कार्य प्रस्तुत यानाच्चंगु इलय् थ्वय्कलं बुद्धधर्मप्रति नं उत्तिकं हे श्रद्धा भक्ति तयाः गुगु काठमाण्डू उपत्यकाया श्रीशोभा जुयाच्चंगु साह्येगु गिरिवर स्यंगु डाँडाय् सुप्रतिष्ठित जुयाच्चंगु न्हात्थासं स्वसां तारिफ नक्सां दर्शन दइच्चंगु श्रीस्वयम्भू महाचैत्यया स्तूपाकार ग्वलय् गर्भगृहय् आपालं अशोभनीय घाँय्पु व वंगलसिमा आदि बुयावयाः उकिइसं सख्याःपा यानातइतःगु धो धो ग्वाराग्वारा सिइदइच्चंगु छु छु थे च्वच्चंगुयात सदांया लागी सुचुसे यइपुसे च्वंक ज्वालालालां थिइकेगु विचारकथं स्वयम्भू महाचैत्यया त्रयोदश चक्रावली बाहेक मेगु

वाकि ग्वः छगलं वहः पातां भुनेगु महान् शुभ संकल्प यानादीगु नं खः^१ ।

खतु वय्क देवशम्शेर कमरचीफ जुयाच्चंगु इलय् हे येँया (?) विहारया श्रीमोक्षानन्द वज्राचार्यजुनाप घनिष्ठ सम्बन्ध दइच्चंगुलि थ्वय्कः वज्राचार्यजुं स्वयम्भूचैत्ययागु विशेष महात्म्य न्यंकाव्यूगुलि यानाः विशेष प्रकारं श्रद्धाभक्ति उत्पन्न जूगु जुल । थ्वय्कः कमाण्डर इन चीफ जनरल जुयाच्चंगु बखतय् स्वयम्भू हारितीयागु पूजा सम्बन्धी व्यवस्थायागु वि. सं. १९४० प्रथम भाद्रवदी ३ रोज ७ स काष्ठपत्रया रूक्का तानातइतःगु हारिती मन्दिर न्ह्योनेसंचंगु गुम्बाया निनालय् तानातइतःगु दु^२ ।

थुगु शुभकार्यय् अधिकारीवर्ग स्वयम्भूया द्योपाःलाः व मल्लकालया राजगुरु जुयाच्चंगुपि तरूमूल श्रीमहाविहार, राजकुल महाविहार, सुरतश्री महाविहारया प्रतिष्ठित वज्राचार्यजुपि स.ताः सरसल्ला नं यानादिइगु खः । गुगु श्री ३ महाराज देवशम्शेरजुं श्रीस्वयम्भू महाचैत्ययात वहः पातां भुनिइगु दुसाखँ थ्वय्कः वज्राचार्यपिनिगुपाखे दुने दुने प्रचार यानाः जुयाच्चन । स्वयम्भू महाचैत्य आः धाःसा तस्सकं बांलानाः पूर्णचन्द्रया थे जहांथिनाः ह्लिनय् सूर्य थे रश्मि तलललं थिनाः अतिकं शोभावृद्धि जुइगु जुल धकाः समस्त बौद्धजन तस्सकं लय्तायाच्चन ।

थुजाःगु प्रकारं देवशम्शेरं गुगु प्रजागणपिनिगु मन ठुकाव थःपाखे ह्यगु देसय् सुख शान्ति विइगु लागी अनेक सद्धर्म कीर्ति उज्ज्वल याय्गु प्रवल इच्छां गुगु ह्लियाह्लिथं शुक्लपक्षया चन्द्रमा समानं सुधार कार्य जुजुं वइच्चंगु खनाः श्री ५ महाराजाधिराजतकयागु ठुकाव व विदेसीतय्गु सल्लां यानाः निरडकुश राणा परिवारयागु स्वार्थय् तःधंगु हानी जुइगु खनाः कूटनोतिज्ञ चन्द्रशम्शेरयागु जालचक्रय् लानाः देवशम्शेर थःगु देस तोताः धनकुटाय् बिस्युं वनेमाल । अन छुं दिन च्वनाः वय्कः मसूरी कुरीपारी धइगु थासय् वनाःच्चवन । वि. सं. १९७१ सालं अन हे वय्कःयागु देहावसान नं जुल ।

१- बौद्ध तीर्थ यात्रा रिपोर्ट, पृ. ३

२- काष्ठपत्र स्वयम्भू न्ह्योनेच्चंगु गुम्बाया निनालय् च्वंगु ।

स्वयम्भू तन्नय त्वहंत्वाथःया व्यवस्था

सुन्दर रमणीय कालिहृदया द्योने रत्न सरोज्य उत्पन्न जुयाविज्याःह्य ज्योतिरूप आदिबुद्ध श्रीस्वयम्भू धर्मधातु वागीश्वर समुद्र सतहं ५००० फीट उच्चा जुयाच्वंगु गिरिवर साह्ये गुँ पर्वतय शोभायमान जुयाच्वन ।

काठमाण्डू उपत्यका न्ह्यात्थासं स्वःसां स्वच्छ तुइसे च्वंगु धान्यराश्याकृति स्तूपया द्योने प्यख्यरसं महाकरुणा दृष्टि अवलोकन यानाच्वंगु चकू, थ्वया च्वस्सं पञ्चकुलया चिह्न दुगु तोरणाकृति रूपय हलपति तयातःगु, थ्वया नं च्वय् फिस्वतँ दइच्वंगु सुवर्ण छत्राकृति तगितगि लुइकातःगु, अज्ज थ्वया नं द्योने किङ्किनी जालया क्लडर सहितगु तप्पाःगु अतिकं शोभायमानगु सुवर्ण छत्रपाखें सुसज्जित जुयाच्वंगु त्रिलोकय दुर्लभगु थुजाःगु स्वयम्भू महाचैत्य कीगु न्ह्योने सुप्रतिष्ठित जुयाच्वंगु जुल ।

नेपालया अधिष्ठाता धर्मराजिक श्रीस्वयम्भू महाचैत्य स्वागत सत्कार निम्ति भावभक्ति याःवइपि, स्वयम्भूया धर्मपालिका बालबालिका रक्षा यानाच्वंह्य हारितीदेवी दर्शन याःवइपि, कालिहृदया लः छ्वनाः नेपाल देस दय्काविज्याःह्य गुरु वागीश्वर मञ्जुश्रीयागु पूजा भावभक्ति याःवइपि व अन्य शान्तिपुर आदि पञ्चपुर रत्नपीठ दर्शन याःवइपि, गुलि काठमाण्डू दृश्य अवलोकन याय्त वइच्वनिइपि, गुलि वनरमिता वनभोजन आदिया लागी वइच्वनिइपि अथवा थ्व हे स्वयम्भूया चाकलय वसोवास यानाच्वंपि स्थानीय जनतापिनिगु लागी जक मजुसे कातीसेवा, गुंलासेवा, नित्यसेवा निम्ति शुद्ध वाचाइलय, नसंचाइलय द्यो ख्युंसे च्वंबलय स्यंगुवनया पालय थहां ववहां जुयाच्वनिइपि गुलि विशेष पर्व उत्सव कालय देके वइपि, गुठी पर्व न्याय्कः वइच्वनिइपि इत्यादि जनतापिनिगु सेवा प्रस्तुतया लागी अःपुकेत सुविधा प्रदान याय्गु कारणय ध्यान आकर्षित यासे थुगु त्वहंत्वाथः दय्केगु व्यवस्था जूगु जुल ।

थुगु व्यवस्थाया मुख्य दानपति खः येँ मखंत्वाःया नांदंह्य धर्मात्मा न्हुच्छेराज, तीर्थराज मानन्धरपि । थ्वय्कःपिनिगु सद्विद्वानुसारं थुगु ताःहाकःगु तब्यागु यइपुसेच्वंगु ज्याछिगु त्वहंत्वाथः तयार जुसेलि वर्षाकालं जुइगु थुगु लैपुया दुरावस्था लै चुलुइगु, वथं गइगु, जो दइगु, कथिपुथि कारपातं लै

त्वपुङ्गु आदि दोष सदाया निम्ति निवारण जुल ।

स्वयम्भू महाचैत्यया पूर्वपाखे अक्षोभ्य तथागतया सन्मुख्य च्वंगु विशाल सुवर्णया वज्र अंकितगु धर्मधातु मण्डलया क्वस्सं च्वंगु दक्खिण्य ताःहाकःगु तब्बागु तःजाःगु त्वहंत्वाथः दय्केगु निम्ति हर्षनरसिह व कुटिसुन्दर नायो ल्यःगु जुल । श्वय्कः नायोजुपिनिगु निर्देशन्य 'स्वयम्भूदर्शन-प्रस्तरमय सोपान' निर्माणार्थ आवश्यक ज्यामि हनाः माःथाय् माःगु किसिमं ज्या याकाः विभिन्न प्रकारया त्वहंत ल्हय्काः छिक त्वय्क बांलाक न्यादँ विक ज्या याकाः थुगु त्वहंत्वाथःया ज्या सिधय्कूगु धाय्माल ।

थुगु शुभकार्य विधिवत् संकल्प यानाः शुभारम्भ याःगु दिन्य शुभलक्षण क्यनेया लागी नागराज पिहांवल । त्वाथः दय्केत गाः म्हुया स्वःगु थाय् लिच्छवीकालया विभिन्न मुद्रात उपलब्ध जुल । श्व हे त्वाथःया ज्या यानाच्चव्वं छन्हु छह्य अलंगि रूप नं खने दय्कःवल । थथे जूगु खँसेलि धन्य धन्य स्वयम्भू महाचैत्ययागु प्रभाव धकाः गुलिसिनं प्रशंसा यानावन ।

श्व त्वाथःया शिरोभाग्य करुणामयया शिरय् वज्रत्वास्वां थे' अतिकं शोभायमानगु वज्रधातु मण्डल सुशोभित जुयाच्चव्वं दु । दक्खिण्य क्वय् धर्मधातु वागीश्वरया पादुका श्रीचरणकमल तयातल । श्व हे त्वाथःया विचय् जय् जनी चिइ थे' कालीनागया मूर्ति प्रतिष्ठित जुयाच्चन । अथे हे त्वाथलं थहांवनेवल्य् ह्मापांगु कासु लंकेगु थासय् बुद्धशासन रक्षक स्वरूपं चतुमहाराज व तेजसा भैरव एवं गणेश कुमार स्थापना यानातल । अथे हे श्व हे त्वाथःया दथुं दथुं अथवा जःखः विभिन्न प्रकारया चैत्यत स्थापना यानातइतःगु खनेदइचवनी । थुलि जक मखु श्व हे त्वाथःया ऊवल्य् विशालकाय शान्तमूर्ति ततःधिकःपि बुद्धमूर्तित भूस्पर्श मुद्राय् च्वनाच्चव्वं दु । मन्त्रमूलक सप्ताक्षर कूटाक्षरी युक्त शिलाखण्ड व लिस्सें तन्त्र वज्रयानया सारभूत सूत्र मन्त्र गाथा एवं धारिणी अङ्कितगु ततःग्वःगु त्वहंत थासंथासय् स्थिरं च्वंच्वन । दुष्ट दमन व बुद्धशासन रक्षाकर्ता महाकाल आदिपिनिगु मूर्तित नं थासंथासय् रक्षक स्वरूपं तयातःगु दु । उकिं थुगु त्वाथःया थःगु हे विशेषता व महत्व यक्वं दु ।

श्व हे स्वयम्भू त्वाथः दय्केत स्यंगु जंगलया पाःया त्वहं चिइकाः व हे त्वहंत कःमि थःत माःगु किसिमं त्वहं छिनाः दय्का यंकाच्चन । गुलि हात्तिवन व मछिगां, बखुसि एवं गुणागुलि आदि थासं हया २१०० फीट जाः १० फीट व्या दुगु न्होनेसंचव्वंगु ३१८ स्वसः व कित्वाथः दइच्चव्वंगु त्वहंत्वाथः तयार यात । अथे हे वायुपुर थासं क्वहांवनेगु व थुख्ये शान्तिपुरपाखे' मञ्जुश्री पर्वस्थान वनेगु त्वहंत्वाथः नं छसोकथं सिधय्कल । थुगु त्वाथः दय्कूवल्य् हाकुत्वहं, भ्वासात्वहं, छाःगुत्वहं, फिल्वहं, ज्वनात्वहं, सियूलोहं, भुयूल्वहं, वाउँनःगु त्वहं, ह्याउँनःगु त्वहं, ह्यासुनःगु त्वहं, वँचुनःगु त्वहं, दुरुत्वहं, पोताय्त्वहं, गोछाःत्वहं, कोजुत्वहं, कोटखात्वहं, यटखारत्वहं, हाकुफिल्वहं एवं बिखूत्वहं आदि जातं जातया त्वहंत लुयावयाच्चन, खने दइच्वन, थयंकेहयाच्चन ।

श्व स्वरूपरसंचव्वंगु त्वहंत्वाथः दय्के सिधःवल्य् ५ दँ वित । थुगु कार्य सुसम्पन्न जूगु दिन खः ने. सं. १०३४ आश्विनशुक्ल प्रतिपदा घटस्थापनाखुनु । थुलि जुसेलि दातापिनिगु महान् सदिच्छा पूर्ण जुल । सकलें लय्ताल । स्वयम्भू वन जंगलं थःत गौरव भाःपिल । आगन्तुकपित न्ह्याइपु ताल । स्वयम्भू दर्शन या वनिइपित लसकुसया लँपु चाल । स्वयम्भूया इतिहासय् छगू न्हूगु अध्याय तपं च्वन ।

सिक्किमया जुजुं गुम्बा पुनर्निर्माण यानाव्यूगु

लामा देवाधर्माजुं जुजु श्री ५ रणबहादुर शाहयात खुशि यानाः प्राप्त यानाकाःगु गुलि नं जग्मा व ग्राम खः उकियागु सम्पूर्ण आयस्ताद्वारा स्वयम्भूया पश्चिम भागय् च्वंगु दक्कसिवय् पुलांगु मार्मेल्लाखां नामक गुम्बा निर्माण यानावन ।

थ्व गुम्बा दय्कावनाः सच्छि व नीदँ लिपा ने. सं. १०२८ सालं अकस्मात् अग्नि प्रकोप जुयाः सम्पूर्ण भस्म जुइक मिनल । थुगु हे इलय् सिक्किमया जुजु ताशिनाम्ग्याल्या महारानी जुजु श्री ३ चन्द्रशम्शेरया महारानी नाप त्वाय् चिनेत काठमाण्डूस काःगु दु । उबलय् थ्व गुम्बा अग्निग्रष्ट जुयाच्च्वंगु खनाःलि लिहांवनाः थः स्वामियात वृत्तान्त खँ कनाबिल । थ्व हे खँयात ध्यानय् तयाः श्रीस्वयम्भू महा-चैत्ययात श्रद्धाभक्ति तसे उगु गुम्बा पुनर्निर्माणया लागी आवश्यक आर्थिक सहायता बियादिल ।

थुगु गुम्बा दय्काः तयार जुसेलि थुगु गुम्बाय् विज्याकेत त्र्ययध्वगत प्रमाणं अतीत अनागत प्रत्युत्पन्नस विज्याःपि त्रिकाल बुद्ध-दीपङ्कर, शाक्यमुनि व आर्य मैत्रेय स्वह्य प्रतिष्ठा याःगु जुल । थुकिया दानपति जूह्य असंत्वाः ज धुंछेया कुलवीरसि तुलाधरजु खः । थुगु स्वंगू मूर्ति नं ने. सं. १०२६ फाल्गुणशुक्ल तृतीयाखुनु प्रतिष्ठा याकूगु जुल^१ ।

थुपि त्रिकाल बुद्धमूर्ति प्रतिष्ठापित याय् धुसेलि हानं खुदँ लिपा वि. सं. १९७१ तदनुसार (ने. सं. १०३५) साल कार्तिकशुक्ल तृतीयाया दिनय् पुखूचां न्हूसाल निवासी मानवीर मानन्धरं अमिताभ तथागत व भैषज्यराज तथागत प्रतिष्ठा याकूगु जुल ।

थुगु गुम्बा मिनय् ह्येदँ न्ह्यो ने. सं. १०२१ साल श्रावणशुक्ल अष्टमीखुनु तरुमूल श्रीमहा-विहारया शाक्यभिक्षु देवधंजुं थुगु गुम्बाय् तयातःगु तःखःगु माणे जीर्णोद्धार यानाबिल ।

थ्व गुम्बा स्वयम्भू महाचैत्य अमिताभ तथागत व हारितीया न्ह्योनेसंच्वंगु पूर्वाभिमुख निगू

तले ५ कवः दइच्वंगु खः । थुकिइ द्योने सँदेया ढाँचां कःसि तयातःगु दु । छ्यलिइ तल्लाय् ५ कवः
दलां ऊवःलाक तयाः उकिइ द्योने मातं तल्लाय् ३ पाः तिकिऊयाः दु । थुगु स्वपाः तिकिऊयाः मध्यय्
२ पाः तिकिऊयाः लुँऊयाः खः ।

थन गुम्बाय् प्रतिष्ठापित मूर्तित

- (१) दीपङ्कर तथागत सुवर्णलेपित धातुया
- (२) शाक्यमुनि तथागत सुवर्णलेपित धातुया
- (३) आर्य मैत्रेय बोधिसत्व सुवर्णलेपित धातुया
- (४) अमिताभ तथागत सुवर्णलेपित धातुया
- (५) भैषज्यराज तथागत सुवर्णलेपित धातुया
- (६) शरहपाद सिद्ध ल्वहंयागु
- (७) लामा देवाधर्मया सालिक व्वचाया

छ्यलितल्ला दलां कवल्य् दुनेच्वंगु ल्वहंया मूर्तित

- | | | | |
|-------------------------|--------------------|------------------------|---------------------|
| (१) सप्तलोचनी तारा | (२) वज्रसत्व | (३) धर्मचक्र शाक्यमुनि | (४) ध्यानीबुद्ध |
| (५) भूमिस्पर्श बुद्ध | (६) ध्यानीबुद्ध | (७) पद्मपाणि | (८) ध्यानीबुद्ध |
| (९) शाक्यश्री लामा | (१०) महाकाल | (११) षडक्षरीलोकेश्वर | (१२) मञ्जुघोष |
| (१३) ध्यानीबुद्ध | (१४) वज्रगुरु | (१५) आर्यतारा | (१६) हलाहल लोकेश्वर |
| (१७) समन्तभद्र बोधिसत्व | (१८) काग्युपा लामा | (१९) भूस्पर्श बुद्ध | (२०) ध्यानीबुद्ध । |

द्यःपाःलाः च्वनिङ्गु छ्यलिइ दुनेच्वंगु मूर्तित

- | | | |
|--------------------------|------------------------------------|--------------------|
| (१) पद्मपाणि लोकेश्वर | (२) बुंगमलोकेश्वर | (३) अक्षोभ्य तथागत |
| (४) षडक्षरी एवं आर्यतारा | (५) धर्मधात्वेश्वरी श्वेततारा | (६) विरूपासिद्ध |
| (७) हलाहल लोकेश्वर | (८) महावैरोचन | (९) सप्तलोचनी द्वय |
| (१०) शाक्यश्री लामा | (११) शिवपारवती फुसय् चैत्य अंकित । | |

स्वयम्भू जीर्णोद्धारार्थं लामा देवाधर्मायात भोतु पाँडेजुया पौ

धर्म धालकि तस्सकं श्रद्धा व वीर्यं दुपि तिब्बती बौद्ध जनतापि आपालं वास यानाच्चंगु प्रमुख स्थान ल्हासा व खाम एवं भुटान जुयाच्चन । ल्हासा देसया धर्मराज श्रीपतला लामा, खामदेसया महागुरु सिद्धेश्वर श्रीशाक्यश्री लामा अथे हे भुटानया प्रमुख धर्मगुरु जुयाच्चंहा देवाधर्मा लामा थुपि स्वह्मं चन्द्र सूर्य अग्नि थे छह्म उत्तिकं प्रबलपि थःथःगु क्षेत्रय् आपालं अधिकार सम्पन्नपि ख्याति प्राप्तपि लामाजुपि खः ।

एशिया महाद्वीपय् सुदुर्लभगु नेपाल प्रतिष्ठाता धर्मराजिक श्रीस्वयम्भू महाचैत्य जीर्ण जुयाच्चंगु महशूस यासे श्रीमान् सिद्धेश्वर शाक्यश्री लामाजुयागु महान् सदिच्छा व वसपोलयागु आह्वानकथं खाम देसय् स्वयम्भू जीर्णोद्धार निमित्त धमाधम श्रद्धा चन्दा संकलन जुयाच्चन । अथे हे ल्हासा देसया धर्मस्वामि श्रीदलाई लामाजुं नं थ ह्मं फुगुचाःगु आर्थिक सहयोग प्रदान याना हइच्चन ।

स्वयम्भू महाचैत्ययागु गुण धर्मयात ह्यसिइकाः श्रद्धां प्रेरित जुयाच्चंहा कपर्दार भोतु पाँडेजुं उगु समयय् थ्व विचाः याःगु दु कि तिब्बती बौद्धजगतय् अतिकं नांदंगु स्वंगू देस मध्यय् ल्हासा व खामपाखे चन्दा संकलन जुयाच्चन, तर भुटान देसपाखे धाःसा छुं खइखबर मदुनि धइगु मतिइ च्वनाः भुटान देसया धर्माधिकार लामाजु श्रीदेवाधर्माजुयात शुभ सन्देश छ्वःगु दु'—

वि. सं. १९७२ (ने. सं. १०३५) चैत्रवदी ३० स च्वःगु उगु शुभ सन्देश प्राप्त जुसेलि देवाधर्मा लामाजुं भुटानया जुजु उर्भ्येन्वाङ्छ्युयात उगु पौ क्यन, लिस्सें अत्यन्त हर्षित जुयाः स्वयम्भू महाचैत्यप्रति श्रद्धा अभिव्यक्त यासे यथाश्रद्धा चन्दा प्रदान यासे करुणामय अवतारी श्रीदुक्पा लामाजु (शेराव्दोर्जे) यात नियुक्त यानाहःगु जुल । धयातःगु दु, थ्वसपोलनाप खामतोव्देन् शाक्यश्रीया काय् व

छेवाङ्गजिग्मे समेत भुटानपाखे काठमाण्डू थ्यंकःबिज्यातः ।


थुगु स्वयम्भू जीर्णोद्धार कार्यय् प्रारम्भनिसे परिसमाप्ति तक नं वसपोल श्रीमान् शेराव्दोर्जे दुक्पा लामाजुयागु निर्देशन अनुसारं ज्याखँ जूगु जुल । वि. सं. १९७५ (ने. सं. १०३८) बैशाख १८ मंगलवारखुनु वसपोलपिनिगु थःगु विधि विधानकथं समारोहपूर्वक भव्य उत्सव याताः जीर्णोद्धार प्रतिष्ठा कार्य सम्पन्न याःगु जुल ।

१- थुगु स्वयम्भू जीर्णोद्धार कार्यय् भुटानपाखे प्राप्त जूगु श्रद्धा चन्दा अंक वसपोल दुक्पा लामाजुया काय्चा श्रीछेचुकुस्योग् लामाजुया सौजन्यद्वारा प्राप्त रेकर्ड अनुसार थथे खः—


- १, भुटानया जुजु उग्येन्वाङ्ग्यु पाखे भा. रु. ४०,०००।-
- २, भुटानया लामा शेराव्दोर्जे पाखे भा. रु. १५,०००।-
- ३, दुक्पा लामाजुया ज्ञातिवर्ग पाखे भा. रु. १०,०००।-
- ४, दुक्पा लामाजुया थःथिति पाखे वहः वस्तु १०,०००।-
- ५, दुक्पा लामाजुया शिष्यपिनिगु " भा. रु. १०,०००।-

कूल ८५,०००।-

श्रीस्वयम्भू महाचैत्य



स्वयम्भू महाचैत्यया जीर्णोद्धार



शाक्यश्री लामाजुयागु महान् शुभ संकल्पकथं दुक्पा लामाजुयागु निर्देशनय् धमां साहुयापाखे स्वयम्भूया जीर्णोद्धार

जम्बुद्वीपया मूलगु पुण्यभूमि नेपालय् स्वयं उत्पन्न जूह्य आर्य स्वयम्भू धर्मधातु धकाः प्रसिद्ध जुयाच्चंगु, थुकिइ ह्यगू पर्यायसं विज्याःपि सप्ततथागतपिनिगु अस्थिधातु तयातःगु, इहत्र सुख सम्पत्ति परत्र मोक्षगति आश्रय याइपि श्रद्धालु भक्तजनपिनि पूजा याय्गु उत्तमगु आश्रय स्थान जुयाच्चंगु, विश्वय् ज्वरा मदुगु स्वयम्भू महास्तूपया विषय कयाः छन्हु उजाःगु हे महान् शुभ मुहूर्तय् सुदूर उत्तरापन्थ ह्लासां च्वय् खामदो धइगु थासय् विज्यानाच्चंह्य अतिकं प्रसिद्ध जुयाच्चंह्य नीगू शदीया महासिद्ध गुरु शाक्यश्रीनं थथे अन्तर्ध्यानं स्वयाः विचार यानाविज्यात ।

समस्त भूमण्डलय् प्रस्थापित गुलि-स्तूप, चैत्य विद्यमान जुयाच्चन, उलि मध्यय् नं सर्व प्राचीन व विशेष महत्व दइच्चंगु महान् आदर्शयुक्त थुगु धर्मराजिक ज्योतिरूप स्वयम्भू महाचैत्य प्राकृतिक तथा मानविक प्रकोपद्वारा जीर्ण जुयाच्चंगु खनाः जीर्णोद्धार याय्माःगु आवश्यक लक्षण खन । धयातःगु दु, स्वयम्भू महाचैत्यया उष्णीष चूडामणि त्रयोदश चक्रावली उत्तर दिशापाखे स्वयाः धेचुलाच्चन । नापनापं अथे हे खासैचेन महाकूट चैत्य (खास्ति चीवाहाः) स वंगलसिमा बुयावयाच्चन, नमबुद्धचैत्य (नम्बुद्ध चीवाहाः) जक च्वलामू कुतुंबय्त् तयार जुयाच्चंगु खनाः व विशेष श्रद्धा चित्त उत्पत्ति जुयाः जीर्णोद्धार याय्गु महान् शुभ संकल्प यानाविज्यात ।

थुगु थःगु शुभ प्रतिधान अन्तस्करणया विचार साकार रूप याय्या निर्मित संदेया विश्वासपात्र नेपाःया छह्य नांदंह्य थः शिष्य धर्ममानसिजु (धमांसाहु) यात पौ च्वयाः थ्व खँ खः मखु बुरुय् याकेबिल । निश्चय नं पक्का खःगु जुयाच्चन । थुगु हे इलय् शाक्यश्रीया शिष्य संयोगवश आचालामा नेपाः वयाच्चंगु जुयाच्चन । थ्वय्कलं स्वयम्भूया जीर्ण-शीर्ण जुयाः भ्वाभः दइच्चंगु भग्नावशेष नमुना

स्वरूप खामदो थ्यंक यंकाः क्यने यंकूगु जुयाच्चन । थ्व सिँ प्रसाद स्वरूपं लिपा थाय्थासय् इनाविल^१ ।

स्वयम्भू महाचैत्य जीर्णोद्धारया सन्दर्भय् विचारवान जुयाच्चंहा धमांसाहुजुं जोगवीर नायोया-
थाय् वनाः स्वयम्भू जीर्णोद्धार याय्त गुलि गथे खर्च आवश्यक जुइ धइगु विषय प्रश्न जुल । थ्वय्कः
साहुजुयागु प्रश्न अनुसारं स्वंगू प्रकारया इष्टमेट दय्काः न्होने तयाव्यूगु जुल ।

ह्लापांगु इष्टमेट नीनिद्वः २२०००।—

निगूगु इष्टमेट स्वीखुद्वः ३६०००।—

स्वंगूगु इष्टमेट ह्यन्याद्वः ७५०००।—

थुगु स्वंगू लगत अनुसारं स्वंगू हे प्रकारया नक्सा प्रतिलिपि चवयाः श्रीमान् शाक्यश्री लामाजुया
न्होने तयाविल । थुगु नक्सा स्वयाः लामाजु अतिकं प्रशन्न जुयाः दक्कसिबय् अप्पो अङ्क दुगु लगत
इष्टमेटयात हे सहर्ष स्वीकार यासे तस्सकं उदारता व्यक्त यानाविज्यात । लामाजुयापाखें थुगु शुभ
सन्देश हर्ष समाचारया लिसःपौ धमांसाहुया ह्लातय् प्राप्त जुसेलि थुगु महान् अपरिमित पुण्य कार्य
शुभारम्भ याय्त असं धालसिकोया रामसुन्दर साहुजुयात स.ताः सरसल्लाह यात । थ्वय्कः रामसुन्दर
साहुजुं धयादोगु दु—स्वयम्भूप्रति श्रद्धाभक्ति तसे थुगु जीर्णोद्धार कार्य निमित्त जुइगु खर्च मध्यय्
स्वव्वय् छव्व जिगु धुकुति खर्च हनेगु जुल धकाः पूर्ण अभिभारा कुवियादिल । उख्ये शाक्यश्री लामाजुया
विचारकथं थपाय्धंगु अप्रमेय पुण्य कार्यय् श्रद्धालु भक्तजनपिनिगु छुं अंश लाके विइमाः धइगु अत्युत्तम
भाःपाः तालो दावा धाङ्गपोही छेश्यार् धइगु पवित्र दिनय् थः शिष्यवर्गपित आह्वान यानाविज्यात—
'विश्वय् महान्गु चैत्य आर्य स्वयम्भू जीर्णोद्धार जुइगु जुयाच्चंगु दु, थुकिइ फुहां फुथे यथाश्रद्धा चन्दा
प्रदान यात धाःसा महार्थ सिद्ध जुइ ।' गुरुरत्न शाक्यश्रीयागु वचन न्यनाः उपस्थित शिष्यगणपिसं
प्रदान याःगु चन्दा संकलन जुल । थ्व चन्दादातापिनिगुपाखें प्राप्त जूगु चन्दा संकलन पुस्तिकां थ्व खँ
सिइदु—मिसातय्गुपाखें जक प्राप्त जूगु तिलहिल सुवर्ण रूप्यया अलंकार जकया मूल्याङ्कन हिसाव
याःवलय् रुन्दै जीर्णोद्धार याय्त आर्थिक सहायता गाइ थें जुल । स्वयम्भू महाचैत्यया प्रभावं प्राप्त
जूगु चन्दा संकलन राश खनाः जीर्णोद्धार कार्य सम्पन्न मजुइ धइगु धन्दा पीर काय्म्वाल । रुन्दै थ्व
स्वयाः नं अप्पो विशाल रूप प्रदान याय् फइगु शुभ लक्षण खनाः ह्लापा स्वयाः अप्पो उत्साह उमंग
अभिवृद्धि जुल ।

थ्व हे महान् कार्यया प्रसङ्गय् छन्हु शासन रक्षकपाल राहुल धर्मपालं भेषधारी जुयाः ह्याउँ-
खाःया उनह्वा बालभिक्षु शाक्यश्रीया न्होने उपस्थित जुयाः धाल—थुगु स्वयम्भू महाचैत्य जीर्णोद्धार

१- थ्व हे स्वयम्भू जीर्ण जूगु सिँ ल्हासा खाम देसय् थ्यँसेलि प्रसाद स्वरूप वितरण जुल । संयोगेवश ओलम्बु
गुम्बापाखें जफत जुयावःगु अनेक सामग्रीत मध्यय् 'स्वयम्भू जीर्ण जूगु सिँया टुका' धकाः आदरपूर्वक प्वःचिना-
तःगु नं लुयावल । थ्व सिँया टुका १०९६ सालं लाउनी म्यूजियमय् थ्यँकेहल । उगु टुका पुरातत्त्व विभागीय
साक्षि रूपय् वनाबलय् जिं खनागु —हेमराज शाक्य ।

कार्य निश्चय नं निर्विघ्नपूर्वक सिद्ध जुइ, नापं छंगु यश कीर्ति अटल जुजु वनी । थुकिइ छं छुं हे धन्दा काय्मते ।' थुलि धयाःलि आश्वासन नं वियाः अनसं लोप जुयावन ।

थथे साक्षात् धर्मपालपि हे विज्यानाः निसन्देह कार्य सिद्ध जुइ धकाः आश्वासन वियावंगु खँयात लुमंकाः चन्दा संकलनया लागी गुरु शाक्यश्री ह्यालुंङ्ग धइगु थासय् विज्याःवल्य् निर्मल आकाशय् पञ्चरश्मि वःगु खनाः अद्भूत दृश्यावलोकन जूगुलि ह्यालुंङ्गयापि जनतां कं अप्पो श्रद्धा चन्दा सङ्कल्प यात । अन नं गुलिखय् चन्दा लाभ जुल । थवयां लिपा शाक्यश्री गुरुं थः परम हितैषी शिष्य सिदा लामाया नेतृत्वय् ह्लादेन, छेवाङ्गजग्मे आदिपित चन्दा संकलन याके छवयाहल । थुपि चन्दा संकलक दलत चाङ्गयेचेर धइगु थासय् थयंकाः तिब्बतया धर्मराज श्रीकरुणामय अवतारी दलाई लामाया फिस्वंगूगु अवतारी जिनसवंज थुव्तेन ग्याछोया हजुरीइ नं निवेदन प्रस्तुत याःगु जुल । थव निवेदन पत्रयात नं गुलिछि समयतक नं छुं कारवाइ मयासे केवल पतला दरवारयागु तन्ता अलमलय् जक व्यस्त जुयाचवन । उबलय् अन मुख्यगु विहारया गजुलिइ कुपंक्षि जुत, पूर्वोत्तरपाखे च्वंगु हितिमंग या हिति मभिगु लः हाल, धोँत बथान वयाः खःवल इत्यादि विविध अमंगल जूगु खनाः थुकिया हेतु विचाः यानाः स्वयाविज्यात । थव तःथं द्योयागु दोष धकाः सिइकाः तुरन्त स्वयम्भू जीर्णोद्धार कार्य निम्ति पतला लामाजुं फिदो दां श्रद्धा चन्दा प्रदान यात ।

थुगु समाचार सियाः भुटान देसया जुजु देवाधर्म उग्येन् वाङ्ग छ्युं नं पण्डित शेराव्दोजे (दुक्पा लामाजु) यागु नेतृत्वय् व्याक्कमुनाः भारतीय दां पीढः ४०,०००।- श्रद्धा चन्दा वियाहःगु जुयाचवन । थुगु रूप सिक्किमया जुजुं नं ह्यय्दः ७००० चन्दा वियाहल ।

स्वयम्भू जीर्णोद्धारया लागी लामाजुपिसं विश्वास व्यानाः पत्याः यानातःह्य धमां साहुजुं ख्वीद्वलं मयाक श्रद्धा चन्दा समर्पण याःगु जुयाचवन ।

अन्य श्रद्धालु भक्तजनपिसं नं फुह्वं फुथे आर्थिक चन्दा व श्रमदान व्युपि उलिथुलि मदु ।

थुगु महान् शुभकार्य प्रारम्भ निम्ति स्वयम्भू जीर्णोद्धार कमिटीया निर्णय अनुसारं राष्ट्रनायक श्री ५ महाराजाधिराज व तत्कालीन प्रधानमन्त्रीया हजुरीस विन्तिपत्र तथाः अनुमति कयाः ज्या थालय् याःगु जुल । नापं थुगु ज्याया निम्ति खः ग्वय्त सरकारयागुपाखे आवश्यकगु सिँ व पं वियाः सहयोग व्यूगु जुल ।

थुगु महान् शुभकार्य प्रारम्भया लागी आपालं सूत्र तन्त्रया विशेषज्ञ ज्वरा मदुह्य धुरन्धर विद्वान् जुयाच्वंहा धर्मस्वामि ऊयाङ्गचे छ्वेजे रिम्पोछे लामाजुयात श्रीमान् गुरुरत्न शाक्यश्रीजुं मूलाचार्यया रूपय् नियुक्त यानाः छवयाहल । थव्यकः मूलाचार्ययागु सम्बिधानत्वय् विधिवत् पूजा यानाः जीवन्यास पिकाल । नापं शान्ति स्वस्तिया लागी विधि थे क्रिया यानावं चवन । धयातःगु दु-थुगु जीर्णोद्धार कार्य निम्ति जीवन्यास पिकाःगु व्यलय् स्वयम्भू ज्योतिरूपयागु रश्मि साक्षात् ह्याय्कनय् दुने प्रवेश जूगु खनेदय्क साधन यानाकाःगु जुल ।

थुगु महान् कार्य संचालन निम्ति गठन जूगु अस्थायी जीर्णोद्धार कमिटीया व्याक्क कार्यकारिणी

जूपि ४० पीहसिनं तच्चोगु धन्दा कयाः माःथाय् माःगु किसिमं उत्साहपूर्वक ज्या यानाबिल । थुगु ज्याया निम्ति कःमि नायक जूहा जोगवीर तुलाधरजु खः ।

स्वयम्भू जीर्णोद्धारया थुगु पटकय् यलसिं हिलेमाःगु छुं आवश्यक मदु । जुजु राजेन्द्र विक्रमया पर्यायस जिर्णोद्धार याःगु ब्यलय् स्थापना जूगु व हे यलसिं आःतकं सुरक्षित पूर्वक स्थिर जुयाच्चंगु दनि ।

नेपाल सम्बत् १०३७ सालं जीर्णोद्धार जूगु थुगु आर्य श्रीस्वयम्भू महाचैत्यया अर्द्ध भागनिसें विधिवत् बल्लाक बांलाक स्यल्लाक ह्लापा ह्लापा जीर्णोद्धार जूगु स्वयाः नं विशेष प्रकारं पूर्ण रूपं ज्या सिधय्कूगु जुल । छ्वाःख्यरं च्वंगु रत्न बुट्टाया किङ्किणी जालमाला बांलाक लुं सियाः ह्लापा स्वयाः ताःहाकः तब्या यानाः फय्गं नं चाःहुइकाः त्रयोदश चक्रावली अतिकं लक्षण प्रमाण मिलय् यानाः सुशोभित यानाबिल । थुकिइ श्रीहेरुक कूटागार मण्डल निगुलि ह्लापासिबय् बांलाक दय्काब्यूगु जुल । सर्वोपरि स्थित सुवर्ण कलश लुंगजू आदि विशेष अलंकार सहित यानाः माःथाय् माःगु प्रकारं श्रीशोभा वृद्धि यानाब्यूगु दु । थथे सुन्दर पवित्रताया प्रकाश जाज्वल्यमानं थिनाच्चंगु खनाः देव मनुष्यपिनिगु चित्तय् आभाश्वर सुख प्राप्त जुइ धकाः प्रशंसा यानातल ।

थुकिइ ह्लापायापि श्रद्धालु दातापिसं तयावंगु कीर्तिया ल्यंपुल्यं मुनाः नापं थःपिसं संदेसं हयागु दुर्लभ बहुमुल्य दर्शनीय मङ्गलमय वस्तुत आपालं सिति मवंक माःथाय् माःगु ज्याय् दुग्यय्काबिल, गर्भय् तल । थुगु त्रयोदश चक्रावलीयागु ज्या सम्पूर्ण जूबलय् प्यलाति समय बितय् जुल ।

थुगु जीर्णोद्धार कार्य सुसम्पन्न जुसेलि शास्त्रोक्त विधि थें प्रतिष्ठा याके निम्ति श्रीमान् सुमति मुनि सागर (लोसाङ थुव्तेन ग्याछो) दलाई लामाया आज्ञानुसार प्रतिष्ठा विधि अवतारी लामाजुपिसं याकाबिज्यात । लिस्सें थुगु स्वयम्भू जीर्णोद्धार कार्य सिद्ध जूगु उपलक्षय् महान् अनुमोदन यासे खाम देसय् विज्यानाच्चंहा थुगु अपरिमित पुण्य कार्य निम्ति सर्वप्रथम महान् शुभ संकल्प यानाबिज्याःह्य महान् सिद्धेश्वर (धुव्पै वाङ् छ्चु छेन्पो) शाक्यश्री लामाजुं चाह्निहेछे कियफुग् धइगु थासय् च्वनाः परमार्थ ज्ञानयापाखे योग समाधिइ च्वनाः किगः तनाः प्रतिष्ठा यानाहःगुलि स्वयम्भू महाचैत्यय् फिल्तुङ्ग वृष्टि जुल । थुगु कार्य शुभारम्भ याय्या निम्ति शाक्यश्री गुरुं व हे थासय् च्वनाः बिघ्न मजुइकेत रक्षाचक्र विधि यानाबिज्याःगु इलय् उखुनु हे नेपालय् प्रचण्ड वायु न्ह्याःवःगु थें तुं थन नं आचार्य खेरिम्पोछे व थुग्श्रेह्ला शाक्यश्रीया काय्पि च्वनाः प्रतिष्ठा विधिकथं किगः तंगु समयय् अद्भूतपूर्वक आकाश पुष्पवृष्टि जूगु खनेदत । लिस्सें स्वयम्भू महाचैत्यया च्वलामूस ज्योतिरश्मि प्रकाश जूगु नं प्रत्यक्ष दर्शन बिल । थ्व हे समयय् गोश्रृङ्ग पर्वतया लिउनेसंच्वंगु गुलिखय् समयतक नं लः सुकय् जुयाच्चंगु बुंगाःचाय् निर्मल जल परिपूर्ण जूगु आदि अनेक मङ्गलसूचक चिह्न खने दइवल ।

* *

थुलि स्वयम्भू चैत्य जीर्णोद्धार सम्बन्धी उल्लेख तिब्बती इतिहासकथं वर्णन जूगु जुल ।

आः हाकनं नेपाःया थःगु परम्पराकथं जूगु विधि विधानया विषय कयाः संक्षिप्त रूपं खँ न्ह्यथना-
चवना^१—

ने. सं. १०३७ श्रावणकृष्णया सप्तमीखुनु स्वयम्भू महाचैत्य जीर्णोद्धार याय्त ह्वापालाक
किलाघःया त्रैलोक्य गुरुजुया विधि थें पूजा याकाः सिंघाः काःगु जुल । थथे भाद्रशुक्लया सप्तमीया
दिनय् सिजःया ज्या याय्गु नं साइत याःगु जुल ।

खामदो देसं गुलि नं प्राप्त जूगु श्रद्धा चन्दा संकलन यानातःगु सम्पूर्ण आर्थिक भार ज्वनाः
शाक्यश्री लामाजुया काय्पि व शिष्यपि स्वयम्भू पर्वतस्थानय् थ्यंकःवल । थुखुनु हे संतुं धर्ममानसि
साहुं सुरतश्री महाविहारया गुह्यहर्ष वज्राचार्यजुयात सःताः स्वयम्भू जीर्णोद्धार सम्बन्धी अनेक खँह्ला-
बह्ला जुल, न्यास पिकाय्गु थल्लिइ प्यन्हु जक मानि धकाः धयादिल । थ्वखँ न्यनाः गुह्यहर्ष
धयाविज्यात—‘थल्लिइ प्यन्हुत्वालं जीवन्यास पिकाय् फइमखु । कारण ह्वापा ह्वापा जीर्णोद्धार
याःबलय् नं आपालं पुरश्चरण चवनावंगु दु । उकिं पुरश्चरण मच्चैसे ज्या याय् फइमखु ।’ थथे धासेलि
उगु दिन क्वःथयाः मेगु दिन छुनाः न्यास पिकाय्गु ज्या जुल ।

ने. सं. १०३८ पौषशुक्ल अष्टमीया दिनय् शाक्यश्री लामाया काय्पि स्वहासिनं इमि थःगु
विधि अनुसारं न्यास पिकाय्गु पूजा जुल । थुखुनुसंतुं नेपाःया थःगु विधिकथं वज्राचार्यपि चवनाः
निमन्त्रणा आवाहन पूजा जुल ।

ने. सं. १०३८ पौषशुक्ल त्रयोदशीखुनु का स्वानाः पूजा यानाः खः ग्वय्गु ज्या आरम्भ जुल ।
थुगु जीर्णोद्धार कार्यय् मूलाचार्य मखंवाहाःया त्रिभुवन विलास वज्राचार्य, उपाध्या तःछेँवाहाःया
गुह्यहर्ष वज्राचार्य, कर्माचार्य लायकू बहोया जुजुमानसि जुल । पौषशुक्ल चतुर्दशीनिसं स्वहा थःथःगु
थासय् चवनाः पुरश्चरण चवनेगु ज्या आरम्भ यात ।

माघशुक्ल तृतीयाखुनु शास्त्रोक्त विधि थें वज्रधातु देगुरि क्रमेण न्यास पिकाय्गु ज्या जुल ।
एवंक्रमं माघशुक्ल नवमीखुनु यथा विधि थें पूजा यानाः उष्णीष चूडामणि फकिवाता क्वकयाहयाः
न्यासघलया लिकसंतुं तयातल । माघकृष्ण सप्तमीखुनु ह्वापाया विधि थें चौकासिं संस्कार याय्गु
ज्या जुल । थ्वयां सतिखुनु ह्वापां भुवनलक्ष्मी महारानी तयातःह्य वैरोचन तथागतया मूर्ति चीधिकः
जुल धकाः ओमवाहाःया जुजुमुनि, कोछेँया बनिया मनजु थुपि निहा जानाः तयातःह्य वैरोचनया
हस्तमुद्रा अःखः जूगुलि व नापं अज्ज चीधिकः जुल धकाः थुगु पटकय् हस्तमुद्रा न्ह्यःखः यानाः ह्वापा
ह्वापा स्वयाः नं भव्य रूप यानाः बांलाक लक्षण प्रमाण त्वय्क दय्का बिइ धकाः रामसुन्दर साहुं
धयादिल । थुखुनुसंतुं गःतगिनय् च्वनिइगु चकूया थां स्वाय्गु पूजा यानाः थां स्वात । थुगु पटकय्
लः व निभालं मकय्मा परन्तु सुरक्षित् जुइमा धइगु हेतुं ३६ गः थामय्संतुं सिजःपातां भुनेगु ज्या
जुल । थुखुनुसंतुं पुलांस्यंगुया लिउनेसंच्वंगु ग्वय्छाःसिमा ध्यनाः पूर्ववत् विधिकथं चौकासिं काय्गु
ज्या जुल । माघकृष्ण दशमीखुनु असंत्वाः व थँहितित्वाःयापिनिगु श्रमदानद्वारा चौकासिं स्यंगुस

१- पण्डित अमोघवज्र वज्राचार्यजुया सौजन्यद्वारा प्राप्त ।

थ्यंकल । फाल्गुणशुक्ल पञ्चमीखुनु स्वयम्भू महाचैत्यया दुने च्वंगु अवधूति धुछिया दुने बहुमूल्य रत्न अनेक सिद्धौषधी असंख्य दुर्लभ दर्शनीय मङ्गलमय वस्तु आदि दिव्य पदार्थ जाय्कातःगु सिद्ध विद्याधर डाकडाकिनीपिसं अधिष्ठान यानाः तइतःगु असंख्य असंख्य रहस्यमय वस्तुपाखे छायापातःगु ३३ स्वीस्वंगः मञ्जुषा घानाः तइतःगु दु । मेगु अर्थय् त्रायत्रिंश भुवनया प्रतीकात्मक भावना नं खः । फाल्गुणशुक्ल सप्तमीस चौकासिं स्वाय्त विधि थे पूजा जुल । लिस्सें ह्लापायाह्य वैरोचन मूर्ति लिकाय्त माःगुकथं विधि नं यात । थुगु दिनतिसें पूर्ववत् स्वयम्भू महाचैत्यया फिस्वंगू तलाया चकू सम्बन्धित श्रद्धालु भक्तपिसं क्रमशः क्वथुकूनिसें च्वय्थ्यंक विधि थे पूजा यानातःगु जुल । फाल्गुण पूर्णिमाखुनु फिस्वतंगु चकू जुजुयागु जूया निमित्त लायकूयागु पूजा कयाः मर्यादानुसारं स्थापना याःगु जुल । फाल्गुणकृष्ण द्वितीयास अम्बसाहा तयाया ह्लापा थे पूजा यात । फाल्गुणकृष्ण अष्टमीखुनु सकल लोकयात फकिवाता दर्शन विइत क्वापाछेस खः ग्वयाः उकिइ द्योने शोभायमान जुइक ब्वयाः प्रदर्शन बिल । फाल्गुणकृष्ण द्वादशीखुनु लामाजुपिसं २१६ तका दां बियाः विश्वकर्मा पूजा याकाः भोजन याकल । चैत्रशुक्ल नवमीया दिनय चौकासिं तयागु जुल । चैत्रशुक्ल त्रयोदशीखुनु नवनिर्मित वैरोचन तथागत जात्रा याय्त सम्यक द्यो दीपङ्कर तथागतपिं दक्क निमन्त्रणा याय्माः धइगु सल्ला यात ।

उगु सल्लानुसारं ने. सं. १०३८ चैत्रकृष्ण प्रतिपदाखुनु निमन्त्रित दीपङ्कर सकले असंत्वाःलय विश्राम याकाः वैरोचन तथागतया सुवर्ण मूर्ति भव्य रूप खः दय्काः उकिइ तयाः अनेक वाद्यवादन नृत्य गीत सहित यानाः छत्र ध्वज पताकादि सुशोभित यानाः महोत्सवपूर्वक नगर परिक्रमा यानाः स्वयम्भू पर्वस्थानय् थतयंकाः महादीप छ्वय्काः दीपङ्कर जुव्व भुइख्यलय् बिज्याकाः यथायोग्य प्रमाणं स्वागत सत्कार यानाः विदा बियाछ्वःगु जुल । चैत्रकृष्ण द्वितीयाखुनु विधि थे वैरोचन तथागत स्थापना यानाः उखुनुतुं चतुर्विदिग स्थित ताराया च्वलामू नं तःगु जुल । जुजुया प्रतिनिधि स्वरूपं जुजुया तलवारं निमन्त्रणा यानाः दशपत्र देच्छाया छ्वत । थुगु महान् उपलक्षय् लामाजुपिसं उत्तमगु पातवस्त्रया न्याता उनगु पञ्चपताः न्यापु गजुलिइ छायाः तस्सकं वांलाक ब्वय्काविल । चैत्रकृष्ण अष्टमीस शाक्यश्री लामाया काय्पि स्वह्यं न्यास मलुसय्तुं लिहांवन । हानं पतला लामाजुयापाखे छ्वयाहःपि ततःधंपि लामाजुपिसं इमिगु विधिकथं न्यास लुनाः प्रतिष्ठा कर्म याय् धुसैलि गुंगः कचादेगःया व्याक्क ज्या सिमधःसां लिपा विस्तारं छिमिसं फुक्क ज्या सिधय्काः न्यास लुनाः माःगु तक या धकाः वचन बियाः लिहांवन ।

बैशाखशुक्ल षष्ठीखुनु स्वयम्भूया जःखःच्वंगु ताताःहाकःगु गंथकूट शैली प्रतापपुर, अनन्तपुर देगः जीर्ण जुयाच्वंगु खनाः वांलाक दय्के निमित्त थुगु देगः नं पियाहल । बैशाखकृष्ण पञ्चमीस निगः देगलय्सं विधि थे चौकासिं स्वाःगु जुल ।

१- स्वयम्भू जीर्णोद्धार कार्यय् दैकःमि नायो जूहा भीमराज शाक्यजुं धया बिज्याःगु—थुगु जीर्णोद्धार जूगु लसताय् श्री ५ मुमा बडामहारानी लक्ष्मी दिव्येश्वरी थः हे सवारी जुयाः कःमिपा फःवःगु दु । लिस्सें जीर्णोद्धार कार्यय् ज्यामितय्गु न्हिज्याला विषय नं थथे धाःगु दु :—

आषाढशुक्ल द्वितीयास समारोहपूर्वक विधि थे स्वयम्भू महाचैत्यय् फकिवाता स्थापना यात । श्रावणकृष्ण द्वितीयाखुनु पुलांहा वैरोचन तथागत शान्तिपुरस दुहांविज्याकल । थुखुनु स्वयम्भू चैत्यय् ह्लापा स्थापना यानातःपि तारादेवी अःखः जुल धकाः वायुव्यकोणपाखे च्वंहा तारा ईशानकोणय्, हानं ईशानकोणय् च्वंहा तारा वायुव्यकोणय् तथाः हिलाबुला यानातल ।

ने. सं. १०३८ भाद्रशुक्ल तृतीयास शास्त्रोक्त विधि थे वज्रधातु देगुरि क्रमेण मङ्गलोत्सवपूर्वक जीवन्यास लूगु जुल । अनंलि खासि बलि वियाः, न्यास लुनाया प्रसाद मर्यादानुक्रम थे जुजुयागु तलवारं निसे सम्बन्धित सकसितं इनाबिल । शान्तिपुर, पवन भैरव, फसखा थ्वतेस सेवाज्वलं तथाः पूजा जुल । हारिती अजिमायात छाहाय्काः मेथाय् पुलांस्यंगु, मञ्जुश्री, योगाम्बर आदि थासय् कलःपूजा छ्वयाः आपालं गुरुजुपिसं पाठ याकूगु जुल । शान्तिपुरस समयाचक्र, गणचक्र विधि थे पूजा यानाः सतिखुनु चतुर्थीया जज्ञ जुल ।

जीर्णोद्धार कार्यक्रमकथं न्यास लुङ्गु ज्या सिधसेलि पताः छायागु, आखाल स्वनेगु, पीठपूजा पद साधन क्रिया, सिन्दुरार्चन पूजा, अधिवासन, दुसल क्रिया, अग्नि स्थापन अहोरात्र विधि, रजप्रवाह, कौमारीपूजा, क्षेमापूजा आदि ज्याखँ छुं समयतक लिकुनाच्वन । कारण, थुगु स्वयम्भू क्षेत्रया उख्येथुख्ये स्यनाच्वंगु देगः चीवाहाः, सतः, त्वाथः सिमाया चाकः फलय् पःखाः, पुखू, हिति बुंगाःचा इत्यादियागु नं जीर्णोद्धार पुनर्निर्माण व नवनिर्माण याय्माःगु आवश्यक जुयाच्वन । अथे थथे यानाः निदँ व गुला लिपा जक जीर्णोद्धार सम्बन्धी त्यनाच्वंगु लिचो हानं स्वाकूगु जुल ।

ने. सं. १०४१ बैशाखशुक्ल प्रतिपदाखुनु स्वयम्भू जीर्णोद्धार प्रतिष्ठा याय्गु विषय सल्लासाहुति यात । बैशाखशुक्ल तृतीयास उपाध्याया छेँस विधि थे मत पूजा यात । बैशाखशुक्ल पञ्चमीया दिनय् गुरुपूजा यानाः रत्नमण्डल दोहलपा जुल । बैशाखशुक्ल सप्तमीयाखुनु सच्छि व गुकु १०६ दइच्वंगु पताः छायाः विधि थे पूजा यात । बैशाखकृष्ण द्वादशीखुनु अहोरात्र याय्यात बल ग्वयाः थुखुनुसंतुं बहिलिया अग्निकोणया छेडिस लितय् पूजा विधि थे जुल । ज्येष्ठशुक्ल चतुर्थीया दिनय् आखाल स्वना । ज्येष्ठशुक्ल अष्टमीखुनु ह्लापाया विधि थे लुतिनिसे पीठपूजा वन । दशमीखुनु मूल सिद्धि दनाः द्वादशीखुनु विधि थे पताः स्वानाः थुखुनुसंतुं पद साधन क्रिया निम्ति छ्वय्लाभू जुल । त्रयोदशीखुनु पद साधन क्रिया याय्यात स्वयम्भू वहीया मातं तलाया अग्निकोणया कोथाय् अभ्यन्तर

सिँकःमि नायोजुयात	ज्याला	१५०
सिँकःमितय्त	"	१४०
दँकःमि नायोजुयात	"	१५०
दँकःमितय्त	"	१४०
वज्रकःमि	"	१४०
ज्यामि नायोयात	"	१२०
ज्यामितय्त	"	११२

दयकाः विधि थे' सिन्दुराच्चर्चन सहभाजन पर्यन्त धुनेव मण्डल्य प्रवेश जुयाः पद साधनया सफू स्वयाः
क्रिया याःगु जुल । ज्येष्ठ पूर्णिमानिसें स्वन्हृतक धर्मधातु मण्डल चवल । ज्येष्ठकृष्ण तृतीयास अधिवासन
दुसल क्रिया यानाः श्वयां सतिखुनु अग्नि स्थापना क्रिया विधि थे' धुनेव पालं यानाः मोल्हुयाः रात्रिक्रिया
शिराहुति विधि थे' फिस्वन्हृत्यकं समारोहपूर्वक अहोरात्र होम सम्पन्न यासे सम्पूर्ण प्रतिष्ठा कार्य समाप्त
याःगु जुल । आषाढशुक्ल द्वितीयाखुनु मण्डल स्वनागु रजप्रवाह यानाः विधिवत् सद्यकौमारी विज्याकाः
पूजा यानाःलि सकलयात प्रसाद वितरण याःगु जुल ।

स्वयम्भूया गुंगः कचादेगः साहु हर्षसुन्दर रामसुन्दरद्वारा निर्मित

थुगु स्वयम्भू महाचैत्य जीर्णोद्धार कार्यक्रम अन्तर्गत शाक्यश्रो गुरुं धमां साहुया नामय् गुगु पौ छ्वयाहल उगु पौया विषय कयाः धमां साहु व रामसुन्दर साहुपिनि गुगु खँ सल्लासाहुति जूगु खः उगु निर्णयकथं स्वयम्भू जीर्णोद्धार कार्यय् तुक खर्चया स्वव्यय् छव्व अधिभार कुबियादिल । थःह्यं गुगु धयागु खः उगु सत्य निष्ठा वचन पालन याय् निर्मित असं धालसिकोया हर्षसुन्दर साहुजुं थः किजापि रामसुन्दर, पुष्पसुन्दरपिके सल्ला यानाः पञ्चबुद्ध व चतुर्तारादेवीपि बिज्याकेगु स्वयम्भूया छचाःख्यरं च्वंगु गुंगः कचादेगः थःपिनिगुपाखे दय्केगु कोजित । स्वयम्भूया गर्भगृह प्वाथं च्वय् च्वंगु सम्पूर्ण भाग लामाजुपिनिगु आर्थिक सहायताद्वारा धमां साहुया तजबीजं दय्कूगु जुल । आः ल्यन व्वय्यागु गुंगः कचादेगः जक ।

ह्लापा थुगु स्वयम्भू चैत्यय् पिखादेगः धकाः पञ्चबुद्ध न्याहा जक तयाः कचादेगः दय्का तःगुलिइ स्वयम्भू जीर्णोद्धार कमिटीया निर्णय अनुसारं प्यकुनय् प्यह्य तारादेवीपि स्थापना याय् धइगु संकल्प जुइ धुंकूगुलि- हर्षसुन्दर, रामसुन्दर एवं पुष्पसुन्दर साहुपिसं तच्चोगु हर्षचित्तं श्रद्धापूर्वक ने. सं. १०३८ माघकृष्ण नवमीखुनु गुंगः देगःयागु विधि थे पाद स्थापना यात । लिस्से कुशल कलाकारपि तयाः बांलाक चैत्यशैली मन्दिरया रूपय् देगःचात दय्काः शोभायमान जुइक सुवर्णमय यानाबिल । लिस्से अज्ज थुकियागु शोभा वृद्धि याय् निर्मित उगु थाय्यात त्वय्क छिक बांलाक रज्जनालिपि 'ॐ मणिपद्मे हुं । ॐ वागीश्वरी हुं । ॐ वज्रपाणि हुं ।' मन्त्र अंकितगु छगू तँया माणे चाहुइकाः प्यंगू तँया चाकःदलू (दीपावली) तयाव्यूगु जुल ।

एवंरूपं कार्यं समाप्त जुसेलि ने. सं. १०३८ चैत्रकृष्ण द्वितीया आदित्यबारखुनु वैरोचन तथागत व प्यह्य तारादेवी (सप्तलोचनी, मामकी, पाण्डरा तथा तारा) या सुवर्ण रज्जित सुन्दर मूर्ति विधिवत् प्रस्थापना याःगु जुल ।

स्वयम्भू महाचैत्य जीर्णोद्धार निमित्त श्रद्धा चन्दा प्रदान याःपि श्रद्धालु दातापि

- | | |
|--|-----------------|
| (१) सर्वश्री शाक्यश्री लामाजुपाखे
मेगु सच्छिगू चानचुन धिल्ले वहः | ने. रु. २००००।- |
| (२) शाक्यश्री गुरुयागु आह्वानय् श्रद्धा चन्दा प्रदान याःपि
मिसातय्गु पाखे प्राप्त जूगु तिलहिल वस्तु अन्दाजी | ने. रु. ७५०००।- |
| (३) श्रीमान् पतला लामाजुपाखे | ने. रु. १००००।- |
| (४) भूटानया राजा उर्ग्येन्वाङ्छ्युपाखे | भा. रु. ४००००।- |
| (५) लामा शेराव्दोर्जे (दुक्पा लामा) जुया | भा. रु. १५०००।- |
| (६) दुक्पा लामाजुया ज्ञातिवर्गपाखे | भा. रु. १००००।- |
| (७) दुक्पा लामाया हे थःथितिपाखे वहः वस्तु | १००००।- |
| (८) दुक्पा लामाजुया शिष्यपिनिगुपाखे | भा. रु. १००००।- |
| (९) सिक्किमया जुजुयापाखे | भा. रु. ७०००।- |
| (१०) छयान्जे धर्मा साहुजुपाखे | ने. रु. ७५०००।- |

सँदेसया थःगु परम्पराकथं विधि विधानय् ब्वतिकाःपि लामाजुपिं

- (१) थुग् श्रेल्ला सिदालामा
- (२) थुग् श्रेल्ला ल्लादेनलामा
- (३) मूलाचार्य- ऊयाङ्छेवेजे रिम्पोछे
- (४) लामा खेरिम्पोछे
- (५) लामा शेराव्दोर्जे (दुक्पा लामा)
- (६) प्रतिष्ठा निमित्त दलाई लामाजुं नियुक्त यानाहःपि नीछ्हा मध्यय् मुख्यह्मा- थिरमुची थिन्छेन् डावानोर्बु लामाजु समेत ।

नेपाःया थःगु परम्पराकथं विधि विधानय् ब्वतिकाःपिं गुरुजुपिं

- (१) मूलाचार्य - त्रिभुवनविलास वज्राचार्य, मखंवाहाः
- (२) उपाध्या - गुह्यहर्ष वज्राचार्य, तःछेवाहाः

१- ४, ५, ६, ७, ८ तकयागु चन्दा अंकयागु रेकर्ड लामा छेचुकुःप्योग्द्वारा प्राप्त ।

- (३) कर्मचार्य - जुजुमान देहावसान जुयाः भोजमान पति वज्राचार्य लायकू वही
 (४) पूर्वाचार्य - तुयू, मूवाहाः
 (५) दक्षिणाचार्य - चिकी, मखंवाहाः
 (६) पश्चिमाचार्य - कांछा, किलाघः
 (७) उत्तराचार्य - चित्तहर्ष, तःछेँवाहाः
 (८) चचापा नायो - तैलोक्य, किलाघः
 मेपि चचापा जूपि पासापि- ५३ दु ।

जीर्णोद्धारया ज्याखँय् जूपि कःमि नायोत

- (१) कःमि नायो - जोगवीर तुलाधर, नूवाहाः, थाय्मदु
 (२) नेवाःज्याया नायो - धीर्जवरसि ताम्रकार, मरु
 (३) लुँकःमि नायो - धीर्जवरसि हे तुं जुल
 (४) सिँकःमि नायो - हर्षरत्न तुलाधर, तेवाहाः
 (५) दँकःमि नायो - भीमराज शाक्य, यल ईवाहाःवहीः
 (६) वज्रकःमि नायो - सप्तरत्न वज्राचार्य, तेवाहाः
 (७) ल्वहँकःमि नायो - कुतिसुन्दर, दोखाधः
 (८) नँकःमि नायो - मोतिमान, कुसुमलाछि
 (९) ज्वाहाराति -
 (१०) ज्यामि नायो - स्वयम्भूया

थुगु प्रकारं स्वयम्भूयागु सम्पूर्ण जीर्णोद्धार कार्य सिधय्के धुँसँलि गुलि नं चन्दा प्राप्त जूगु घेबा खः यक्वं ल्यंदनिगु जूया निम्ति थनं लिपा खासौचेन महाकूट चैत्य (खास्ति चीवाहाः) यागु विधिवत् जीर्णोद्धार यानाबिल । अज्ज पूर्व संकलित चन्दा ल्यंदनिगु जुयाः निर्माया योगीयागु चलन क्यना- बिज्याःपि लामाजुपिसं हानं थन नं नमबुद्ध (नमुरा) यागु चैत्य जीर्णोद्धार कार्य साहु दानरत्न जगतरत्नपिनिगु तजवीजय् जूगु जुल । थुगु प्रकारं नेपाःया अतिकं प्रसिद्धगु त्रिमहाचैत्य बांलाक जीर्णोद्धार यानाः नं अज्ज छुं भचा ल्यनाच्वंगु धनश्रोसम्पत्तियागु आयस्ताद्वारा उत्तरापन्थ खाम देसय् च्वंगु चाल्हिकिफु धइगु थासय् गुरु शाक्यश्रीया नामं शाक्यश्रीस्मृति चैत्य दय्काः पूजाया निम्ति आयस्ता गुठी समेत दोहलपाः स्वयम्भू महाचैत्य जीर्णोद्धारया लागी प्राप्त जूगु सम्पूर्ण श्रद्धा चन्दा धनराशि समाप्त जूगु जुल ।

स्वयम्भू स्थानय् स्वदैयंकं पण्डित बुद्धिराज शाक्यद्वारा धर्म व्याख्यान

नेपाल अधिष्ठाता श्रीस्वयम्भू महाचैत्य स्थानय् विभिन्न समयय् विभिन्न श्रद्धालु धर्मात्मा भक्तजनपिसं अनेक प्रकारं स्वयम्भू महाचैत्यप्रति श्रद्धा अभिव्यक्त यानाः पठन पाठ, पूजा, स्तोत्र धारणो, मन्त्रजाप, प्रदक्षिण, दण्डवत आदि यानावइच्चंगु प्रमाण स्वरूप इतिहास साक्षि दु ।

थुगु रूपं विविध प्रकारं पुण्य साधन याय्गु कर्म मध्यय् छगू विशेष प्रकारगु स्वपरहित जुइगु वसपोल स्वयम्भूयागु गौरवमय गाथा महात्म्य इतिहास प्रकाश याय्गु आदि मध्यय् अन्त्यय् कल्याण दायक जुइगु गुगु उत्तम चर्या खः उकियात कीसं धर्मोपदेश, धर्म व्याख्यानया रूपय् मानय् याना वइच्चंगु जुल ।

उकि कीगु धार्मिक सांस्कृतिक परम्पराकथं इलय्-ध्यलय् व्रत उपासना कर्मय् विशेष पर्व दिनय् एवं चतुर्मास प्यलायंक अथवा गुंला लच्छि, माघ लच्छि, धंजलियाखुनु छन्हू जूसां थःथःगु सदिच्छा-नुसार श्रोतागणपिनिगु अनुरोधकथं धर्मभाणकजुं वाखं कंका वइच्चंगु खनेदु । थ्व परम्परा अद्यापि विद्यमान तिनि ।

छगू हर्षया विषय थ्व खः—श्रीस्वयम्भू महाचैत्य स्थानय् छन्हू निन्हू स्वन्हू प्यन्हू न्यान्हू, छवाः, बाःछि, लच्छि, लत्या, प्यला, खुला दच्छि जक मखु स्वदैयंकं ह्तिह्ति सुथसिया ६ ताः इलंनिसें ६ । १० ताः इलय् तक बौद्ध चरित्रानुसार थःगु परम्पराकथं स्वयम्भू महाचैत्यया अग्रय् चवनाः श्रोतागणपि न्ह्योने तयाः धर्मासनय् चवनाः शान्तदान्त पूर्वक धर्म व्याख्यान यानाविज्यात ।

थ्व धर्म व्याख्यान शुभारम्भ यानाविज्याःगु दिन खः—ने. सं. १०४० माघशुक्ल श्रीपञ्चमी-खुनुनिसें । गुह्यसिनं उत्साहपूर्वक वोर्य साधन यानाः अलिस व दिक्कयात तोताः स्वयम्भूप्रति श्रद्धा तयाः श्रोतागणप्रति अनुकम्पा तसे थःगु निम्ति सम्बोधि प्राप्ति कामना यासे स्वयम्भू महाचैत्यया उत्तर भागया फलचाय् चवनाः धर्म व्याख्यान शुभारम्भ यानाः खुला तक थ्व हे थासय् चवनाः

बाखं कनाःलि अनं लिपा स्वयम्भूया पूर्वं भाग्यं सिद्धः तिकीगु फलचाय् च्वनाः कन । थन नं लिपा जू लिसे बाखं न्यंवइपिनिगु संख्या अभिवृद्धि जुजुं वःगुलि अन्तय् स्वयम्भूया पश्चिम उत्तरया कुलामय् क्वापाःद्योया फलय् च्वनाः वाकिगु सम्पूर्ण समय थन हे च्वनाः वितय् यानाः निर्विघ्नपूर्वक धर्म व्याख्यान परिसमाप्ति याःगु जुल ।

थ्वय्कः पण्डितजुयागु विषयय् श्रोतागणपिसं थथे धयातःगु दु—श्रोतागणपित बोध जुइक न्यथुइक शब्द शब्दार्थ पद पदार्थ स्पष्ट जुयाः नं उगु धर्म व्याख्यानय् गन थाय् गुजाःगु प्रकारं अभिव्यक्त याय्माःगु खः अन उजाःगु हे प्रकारं थ्वय्कः धर्मभाणकजुं ठिक व पाय्छि जुइक माःथाय् माःगु किसिमं करुणा, वीर, विभत्स, हास्य, रौद्र, भयानक, शान्ति, एवं वात्सल्य आदि भाव व्यक्त यानाः धर्म व्याख्यान याय्सःह्य नासलं लिइह्य लोकं ह्याःह्य धकाः धाइ । थथे नासः दइच्चंगु सिद्धि ल्युगुया कारणं थथे धइतःगु दु—थ्वय्कः पण्डितजुं थुगु धर्म व्याख्यान याय् न्ह्यो सिद्धिदातृ चोभार क्वय्ना जलविनायकयाथाय् वनाः वाःछि तक पुरश्चरण च्वने थे सेवा भावभक्ति यानावःगुलि यानाः जूगु धाइ ।

थुगु स्वयम्भू पर्वस्थानय् स्वदैयंकं धर्म व्याख्यान यानाविज्याःगु सद्धर्म ग्रन्थ निम्न प्रकारः—

- (१) स्वयम्भू महाचैत्यया गुण वर्णन स्वयम्भू पुराण
- (२) बुद्धजीवनी ललितविस्तर
- (३) पुण्य साधन कर्मया फल प्रशंसा युक्त कथावस्तु— विचित्रकणिकावदान
- (४) बोधिसत्व जीवनय् बुद्ध यानाविज्याःगु पारमिता चर्याया कथावस्तु— ३२ गू जन्मया जातक कथा ।

थ्वसपोल पण्डित बुद्धिराज शाक्यजु यल महाबुद्ध मन्दिरया संस्थापकजु बौद्धाचार्य अभयराज शाक्यजुया सन्तति बहीबूकओया छह्य काय्मचा उकुवाहाःबहीया मुनिराजया सुपुत्र खः । थ्वय्कःया थुगु समय ठिक उमेर २५ दैया वयस जुयाच्चन । थ्व धर्म व्याख्यानया जोछि बुद्धिराज पण्डितजु स्वदैयंकं स्वयम्भूइ वासं च्वनाविज्याःगु जुयाच्चन, मां-बौ समेत थःनापं तयाः ।

थुगु रूपं स्वयम्भू पर्व स्थानय् च्वनाः तस्सकं परिश्रमपूर्वक अधिष्ठान यानाः श्रद्धाभक्तिपूर्वक धर्म व्याख्यानयागु पुण्यानुभावं बोधिसत्व क्यान्छ्या लामाजुयागु धर्म व्याख्यानय् थ्वय्कःयात दोभाषे रूपय् सहयोग प्रदान याय्गु अवसर प्राप्त जुल । थुलि जक मखु नीगू शताब्दीया सिद्ध योगी शाक्यश्री लामाजुया मूल शिष्यपि मध्यय् छह्य पाता लामा डावाङ लोसाङ नांग्याल् (वागेन्द्र सुमति विजय) नामक लामाजुया शिष्यत्व ग्रहण याय्गु सौभाग्य प्राप्त जुल । थ्वय्कः पाता लामाजुयागुपाखे गृहस्थी तोतकाः प्रवर्जित नं जुल । उवलय् थ्वय्कःयागु नामकरण डावाङ जिम्वा (वागेन्द्र दत्त) धइगु जुल । थ्वसपोल क्यान्छ्या लामा व पाता लामापिनिगु सत्संगतद्वारा— पालुङ तिष्टुङ सन्निवर्ति स्थित प्रसिद्ध पवित्र भूमि छ्युमि ज्यांछुवदुचि (जलाग्नि बोधि अमृत) नामक तीर्थस्थान शान्त वातावरण वन जंगलया दत्थुइ तमना ऋषीश्वर धइगु थासय् ४० दै मयाक तपोवनाश्रित जुयाः थःगु जीवन सफल यानाविज्यात ।

गुरु धर्मादित्यजुया स्वयम्भू दर्शन व किन्नुबाहा: जीर्णोद्धारया प्रथम आयोजक

महापण्डित शाक्यभिक्षु श्रीगौतमश्रीनं दय्का थकूगु यल सप्तपुर, महाविहारया संघय् जन्म जूह्य वृषमान बैद्यया कनिष्ठ सुपुत्र जन्तमान बैद्य भारतय् वना: विद्याध्ययन या:वन । वसपोल विद्याय् अत्यन्त व्यसन व प्रवीणह्य जुया: क्रमश: अंग्रेजी एम० ए०, हिन्दी साहित्यरत्न, बौद्धसाहित्य रत्न एफ० आर्० इकन (लण्डन), धर्मआदित्य, सद्धर्मरत्नाकर एफ० बि० एम० (वर्मा) कविराज, भिषगूरत्न, भिषगाचार्य इत्यादि उपाधि प्राप्त यानाविज्यात ।

कलकत्ताय् चवना: ने. सं. १०४४ सालनिसें वसपोलं नेपा:यागु बुद्धधर्मय् अर्थात् नेपा:या बही विहार व अनर्चवपि बौद्धसंघ शाक्यभिक्षु ब्रह्मचर्य भिक्षु एवं वज्राचार्यपिनिगु कुरीति कुप्रथा हतय् याना: विशुद्ध रूपं बुद्धधर्म चलय् याकेगु अभियान शुभारम्भ याना: ह्यापालाक सुधारवादी जूह्य वसपोल धर्मादित्यजुं थ: वन्धुजन ज्ञातिवर्गपि नापलाय्त् कलकत्ता तोता: नेपा: विज्यात । उबलय् वसपोलं नेपा:या बुद्धधर्मया मुख्यगु केन्द्रीय स्थान जुयाच्चंगु श्रीस्वयम्भू महाचैत्य दर्शन व पूजन याना:लि अनं सरासर वया: किण्डोल विहार निरीक्षण या: विज्या:गु जुल ।

उगु समयय् स्वयम्भू धर्मधातु वागीश्वर सन्निधानय् च्वंगु किण्डोनाम महासिद्ध क्षेत्रय् दय्कात:गु नेपा:या विभिन्न प्रसिद्ध ऐतिहासिक बही विहारत मध्यय् छगू अतिकं प्रसिद्ध जुयाच्चंगु थुगु किण्डोल विहार सारै क्षतिग्रष्ट जुया: ह्याय्कं का: जुयाच्चंगु खना: तस्सकं खेद प्रकट यानाविज्यात । उबलय् वसपोलं थुगु विहारया दुर्गति खना:लि उकियात सुधार व उद्धार याय्गु दृढ संकल्प यासे उकियागु फोटो खिचय् याना: थ:गु 'बुद्धधर्म' पत्रिकाया ह्यापांगु अंकया मुखपत्रय् छापय् याना: संसारया न्ह्योने तयाविल । उगु तस्वीरय् भगवान् बुद्धया खवपाखे वज्रासन याना: ध्यानमुद्रा यासे थ:गु चित्र नं सम्मिलित यानाव्यूगु दु । लिस्सें वसपोलं श्रद्धालु दानपतिपित नं थुगु विहार जीर्णोद्धार

याय्माःगु विशेष कारण व उकियागु महत्व विषयय् खँ कनाविज्यात^१ ।

फलस्वरूप वसपोलयागु सारगर्भित उपदेशयात सहर्ष स्वीकार यासे येँया प्रतिष्ठित साहु महाजनपिसं हार गुहार यानाः किण्डोल विहारया वर्तमान स्वरूप जन समक्षय् प्रस्तुत याकाविल । थुगु जीर्णोद्धार कार्यय् भाग कयादिइपि श्रद्धालु दानपति सर्वश्री असं धालसिकोया साहु बुद्धरत्न बोधिरत्न व महाबुद्ध तःखाछेँया ताम्रकार सिद्धिरत्न, वृषमानपिसं आवश्यक खर्च हनाः ने. सं. १०४६ सालं जीर्णोद्धार कार्य सम्पन्न यानाव्यूगु जुल^२ । थ्व हे विहारया फुसय् भगवान् बुद्धया च्वस्सं करुणामय अवतारी दुक्पा लामाजुयागु आज्ञानुसार सहस्रभुज लोकेश्वर मूर्ति १००० द्वःछि अले थ्वया नं च्वय्यागु तल्लाय् अमिताभ बुद्धया मूर्ति १००० द्वःछि नं तथाः शोभावृद्धि यानाव्यूगु दु । थुगुकथं मूर्ति सजय् याना तइतःगु काठमाण्डू उपत्यकाय् मेगु वही विहारय् गनं मदु धाःसां ज्यू । खतु थुगु विहार जुजुं पार्थिवेन्द्रया पर्यायस ने. सं. ८०७ सालं इतुंवाहाःया शाक्यभिक्षु श्रीसिङ्जुं दय्काव्यूगु खः । उवलय् थुगु विहार प्रतिष्ठा कार्य उत्सवस जुजु पार्थिवेन्द्र नं सवारी जूगु खँ न्ह्यथनातःगु दु^३ । थनया शिलापत्रय् थ्व विहारया नां किण्डोल विहार मधासे 'कीर्त्तन महाविहार' धकाः उल्लेख याना तइतल । लिस्से 'किण्डोनाम महासिद्ध क्षेत्र' धकाः नं च्वयातल ।

वसपोल धर्मादित्य गुरुं थुजाःगु हे प्रकारं नेपाल व भारतया बुद्धधर्मय् सुधार उद्धार याय्गु ज्याखँय् यक्व यक्व कोशिश यानाच्चंगु खनेदु, अज्ज नेपाल भाषा साहित्य उत्थान व पुनर्जागृति याय्गु विषयय् नं । प्रसंगवश उदाहरणया लागी वसपोलं यानाविज्याःगु निगू प्यंगू कार्य विवरण न्ह्यथने—

- १, किण्डोल विहारया मुख्यह्य आयोजक ।
- २, नेपालय् स्वांयापुह्ली बुद्धजयन्तीकथं नखः न्याय्केगु थिति हःह्य ।
- ३, नेपालय् बुद्धधर्म उद्धार संघया स्थापना व बुद्धोपासक संघ, बुद्धोपासिका संघ दय्कूह्य ।
- ४, कलकत्तां ने. सं. १०४५ स्वांयापुह्लीखुनुनिसे 'बुद्धधर्म' नांया धार्मिक पत्रिका पितकयाःलि वया निदँ लिपानिसे 'बुद्धधर्म व नेपाल भाषा' पत्रिका धकाः धर्म व साहित्यया पत्रिका सम्पादन याःह्य ।
- ५, कलकत्ताय् नेपाली बुद्धमार्गी संघ दय्कूह्य ।
- ६, प्रयागय् जूगु पाश्चात्य बौद्धजगत्या बौद्धसभास नेपाल भाषा व वया साहित्यया चर्चा याःह्य ।
- ७, कलकत्ताय् धर्मराजिक चैत्य विहारय् भगवान् बुद्धया मूर्ति स्थापना याःह्य ।
- ८, व हे धर्मराजिक चैत्य विहारय् ने. सं. १०४८ श्रीपञ्चमोखुनु नेपाल भाषा साहित्य मण्डल स्थापना याःह्य । थ्व हे साहित्य मण्डल स्थापना जूगु उत्सव समारोहय् स्वयम्भू व मञ्जुश्रीप्रति श्रद्धाञ्जलि द्रहलपाः स्वयम्भू पुराणया छुं सारांशं न्हूगु कविता रचना दय्काः ब्वनावयंह्य—

१- किनूबाहाः दुहांवनेवं खवपाखे च्वंगु शिलापत्र ।

२- किनूबाहाः दुहांवनेवं जवपाखे च्वंगु शिलापत्र ।

कलकत्ताय नेपालवासिपिनि मञ्जुश्री पूजा

(शार्दूलविक्रीडित छन्द)

मञ्जुश्री छलपोलया चरणसं साष्टाङ्ग याना अती ।
प्राचीनया इतिहास याय् वरणन नेपालयागु भती ॥
नेपाले भगवान् स्वयम्भू दु धका श्रीमञ्जुनाथं सिया ।
याये दर्शन धैगु वीर हृदये उत्पन्न इच्छा जुया ॥१॥ इत्यादि
थुगुकथं २१ पु श्लोक रचना याःगु दु^१ ।

— धर्मआदित्य धर्माचार्य

— योगवीरसिंह

थुलि जक मखु कि वसपोल धर्मादित्य गुरुं सर्वप्रथम बुद्धधर्म पिकाःगु दँ ह्यापांयागु पत्रिकाय् 'नेपाल देसया आदिगु धर्म बुद्धधर्म' धकाः शोषक बियाः वया क्वस्सं स्वयम्भू पुराणयागु वर्णनकथं नेपालय् सप्तबुद्ध आगमन जूगु खँ न्ह्यथनाः स्वयम्भू चैत्ययागु गुण वर्णन यानाः संसारया न्ह्योने नेपाल भाषां च्वयाः छापय् यानाः प्रकाशय् हयाः स्वयम्भूयागु सेवा याःह्य ।

- ६, धर्माङ्कुर विहारया बंगाली बौद्धमार्गी संस्थाया सचिव जूह्य ।
- १०, नेपाली 'हिमालय बौद्ध' अंग्रेजी 'बुद्धिष्ट इण्डिका' नामक पत्रिका पिकाःह्य ।
- ११, दार्जिलिङ्गय् छगू कन्या विद्यालय चाय्कूह्य ।
- १२, कालिङ्गपोङ्गय् उपासक संघ दय्काः पुस्तकालय नं तःह्य ।
- १३, कलकत्ता व पटनाया विश्वविद्यालयय् नेपाल भाषा दुकाय्केत प्रयत्न याःह्य ।
- १४, विलायतय् थ्यंकातःगु शालिपुत्र व मौङ्गल्यायनया अस्थिधातु भारतय् लितहय्माः धइगु प्रस्ताव तःह्य ।
- १५, बुद्धगयाया मन्दिर महन्तपिके लिक्काः बौद्धतय् लःह्याय्माः धइगु मुकदमाय् जाः वंह्य ।
- १६, लुम्बिनी वनय् च्वंह्य रूपन्देही (मायादेवी) याथाय् चलय् जुयाच्वंगु हिंसा रोकय् याकूह्य ।
- १७, वि. सं. २०१७ सालं त्रिभुवन विश्वविद्यालयय् प्राचीन इतिहास व संस्कृति व मेगु पालिया पाठ्यक्रमय् सदस्यता यानाः पालिया अस्थायी लेक्चरर्या रूपय् नियुक्त जूह्य ।

१- बुद्ध धर्म व नेपाल भाषा, दँ ३ अंक ५-६

स्वयम्भू जीर्णोद्धार याय्त ज्यामि जुयावःह्य छिरिङ्नोर्बु लामाजुया देन

महायान बौद्धजगतं श्रद्धा व भक्ति तयावइच्चंगु एशिया महाद्वीपय् दुर्लभगु नेपाःया अतिकं प्रसिद्धगु थःगु हे विशेष महिमा व गौरव दइच्चंगु थुगु स्वयम्भू महाचैत्य अति जीर्ण जुयाच्चंगु सियाःलि खाम देसया शाक्यश्री लामाजुयागु पूर्ण सहयोगं धर्ममान साहुजुयागु तजवीजं जीर्णोद्धार जुयाच्चंगु इलय्—

स्वयम्भू महाचैत्यप्रति अतिकं श्रद्धाभक्ति दइच्चंगु छिरिङ्नोर्बु लामाजुं उगु स्वयम्भू महाचैत्य जीर्णोद्धार जुयाच्चन धइगु शुभ समाचार सियाः उगु अपरिमित पुण्य कार्य जीर्णोद्धारस ज्यामिया रूपय् सम्मिलित जूवःगु जुल । खतु थ्वय्कः लामाजुया स्वरूप साधारण थें जूसां वसपोलयागु चरित्र विचित्र खनी । छिरिङ्नोर्बु लामाजुं ने. सं. १०३८ सालनिसें १०४१ सालतक जीर्णोद्धार जुयाच्चंगु इलय् थःगु श्रद्धा व समर्थ अनुसारं फुवल्य् फुथे यक्व यक्व श्रमदान बिया वयाच्चन ।

थुगु महान् कार्य स्वयम्भू महाचैत्य जीर्णोद्धारया ज्या-खँ सुसम्पन्न जुसेलि थ्वसपोल लामाजु सांसारिक गृहस्थी जञ्जालय् च्वने मछूह्य एकान्त प्रेमी चर्याचारी लामा जूया निर्मित थनं सरासर जामाचो पर्वतया क्वस्सं च्वंगु ल्हुति महासिद्ध गुहास वनाः ६ दँ तक योगसमाधिइ च्वंवन । थ्वसपोल थथे योग समाधिइ च्वंच्चन धइगु सियाः लामा-धर्मप्रति श्रद्धा व विश्वास दुपि गुलिख्य् मनूत वसपोलया शिष्य जूवन । थःगु अधिष्ठान बमोजिम ६ दँ तक तपस्या च्वनाः पिहांवयाः आपालं शिष्यपित नं सद्धर्म बोधिज्ञानया खँ कनाः बोध यात । लिस्से बुद्ध शासनय् प्रवज्यायागु महत्व असंख्य तःधं धइगु नं ध्वाथुइक खँ कनाः प्रचारय् ह्याबिल^१ ।

नेपाःयागु बुद्धधर्मय् जुजु जयस्थिति मल्लं अनेक थितिरिति दय्काः जाति उपजातिया स्थिति

१- धर्मादित्य धर्माचार्य व नेपाल भाषा व थ्वया साहित्य, पृ. ६

बन्देज याय् धुँसेलि नेपाःया बुद्धशासनय् च्वं च्वं पिं ब्रह्मचर्यं भिक्षु शाक्यभिक्षु एवं वज्राचार्यपिं बन्देछुनाः केवल प्यन्हु जक भिक्षु जुयाः प्रवज्याव्रत ग्रहण याय् धुनेव गाःगु थे' सम्क्य् जुयाः नं लिस्से' अबौद्धत बदे छुइ मज्जु धइगु कत्तरपना भावनां जायाच्चंगु इलय् उकियात छगू न्हूगु क्रान्तिया सूत्रपात यानाः विनयानुसार थ्व हे ल्हूति महासिद्ध गुहास न्याह्य भिक्षु छुनाविल, उपि सु सु धाःसा सर्वश्री प्रेमबहादुर श्रेष्ठ, बुद्धरत्न शाक्य, दालचिनी मानन्धर, बेखाराज ब्रह्मचर्य भिक्षु व ज्ञानरत्न शाक्यपिं खः । थ्वय्कःपित प्रवजित याय् धुँसेलि वसपोलपित थथे नां छुनाविल—महाप्रज्ञा, महाचन्द्र, महाज्ञान एवं महावीर्य, महाक्षान्ति ।

थथे तिब्बती तालं भिक्षु छुनाः पितहसेलि भिक्षुया महत्व मथूपिं मयोपिं उजाःपिसं सरकारीया हजुरीस वनाः अनेक चुक्रि यानाविल । फलस्वरूप भिक्षु जूपिं व भिक्षु छूह्य आचार्ययात नं जेल सजाय जुइगु सवाल सनद दय्काः उपि खुद्दासितं नेपालं पितिनाछ्वत । थुपिं सकले' कलकत्ता थ्यँसेलि उगु वखतय् अन विज्यानाच्चं ह्य यल चिकं वहीया गुरु धर्मादित्यजुं उपि खुद्दासितं शिष्टाचारपूर्वक नापलानाः अनया महाबोधि सोसाइटीलिसे सम्पर्क तयाः सकसितं माःमाःगु स्यने-कने यानाः गुहालि बिल । इमिगुप्रति जूगु अन्यायया खँ सकतां भारतया पत्रपत्रिकाय् प्रकाशित नं यानाविज्यात । अनंलि लिपा इपिं न्याह्य भिक्षुपिं गुलिं तिब्बत वन, गुह्यं आक्याव (बर्मा) पाखे वनाः बुद्ध धर्म अध्ययन याःवन ।

थुलि जुसेलि कालान्तरय् वसपोल छिरिङ्गनोबुं लामाजु मणिचू दहनय् थ्यंकः विज्यात, गुलिछि लिपा वसपोलं आफ्नानिक योगय् च्वनाः देह तोता विज्यात ।

स्वयम्भू महाचैत्य दर्शनार्थ क्यान्छया लामाजु आगमन

ऊवात्त स्वयम्बल्य् क्यान्छया लामाजु छह्य साधारणह्य व्यक्ति जुयाः नं सद्धर्मप्रति महान् उदारता व सङ्गुरुप्रति अनन्य भक्ति दुह्य खः । थ्वय्कःयागु जन्मभूमि ग्यांची धइगु थाय् जुयाच्वन ।

मनुष्य जन्म सफल जुइगु—सद्धर्म छगू ह्यसिइकेत दकल्य् ह्यापां सङ्गुरु नालेमा धइगु दूढ संकल्प यासे ह्यासा देसं च्वय् सुदूर उत्तरापन्थ खाम देसयागु गोङ्गु धइगु थासय् बिज्यानाच्वंहा सङ्गुरु श्रीमान् चावैलामा दर्शन याय्त थःगु सर्वस्व त्याग यानाः अभिनिष्क्रमण जुल ।

गुगु थासय् थःगु भाग्य संस्कार स्वानाच्वंहा सङ्गुरु बिज्यानाच्वन अन निर्विघ्नपूर्वक थ्यंकःवन । अन थ्यंकाः थःगु परम्परानुसारं सद्धर्मोपदेशक करुणावतार श्रीमान् गुरुरत्नयात भक्तिपूर्वक अभिवादन यासे दर्शन याःगु जुल, नापं शिष्यत्व ग्रहण यात ।

छन्हु थः गुरुं नेपाल स्थित श्रीस्वयम्भू महाचैत्यया विषयय् आपालं प्रशंसा न्यंकूगु जुयाच्वन । फलस्वरूप श्रीधर्मधातु वागीश्वर स्वयम्भू महाचैत्य दर्शन याःवनेगु अत्यन्त उत्सुक जुल । तर, नेपालय् धाःसा गुबले वनेमनंनिगु जुयाः स्वयम्भू दर्शन याःवनेगु लँ सिइकेगु विषयय् गुरुयाके प्रार्थना यात । तदनुसार थः शिष्ययागु शुद्ध चित्तया आशय थुइकाः गुरुह्येसिनं थःगु पुण्य व समाधिया बलं मन्त्र व ब्वति प्रयोग यानाः ज्वलाह्याय्कनय् दुने स्वयम्भू महाचैत्ययागु छायां छर्लंग जुइक प्रदर्शनी क्यानाविल । थथे विस्मयपूर्वक स्वयम्भूया किचः क्यानाः गुरुह्येसिनं आज्ञा प्रशन्न जूगु दु—

‘श्रीस्वयम्भू महाचैत्य दर्शन याःवनेबलय् लँपु गनं गुथाय् त्वःमंगु थे’ अथवा भूल जूगु थे जुलकि थ्व जि क्यानागु ज्वलाह्याय्कयात श्रद्धा निश्चय तयाः स्मरण यानाः ध्यान या, उबलय् छर्लंग ह्याय्कनय् दुने स्वय् थे लँ मद्धंकरासर फागपासिकुन् (आर्यसिगु) स्वयम्भू महाचैत्य गन च्वनाच्वंगु खः उगु लँपु निश्चय नं खनी ।’ गुरुया वचन शिरोपर यायां थःगु प्रतिज्ञानुसार नेपाःपाखे स्वयाः प्रस्थान यानावल ।

क्यान्छ्या लामाजुं थःगुरुया आश्रम तोते न्ह्यो स्वयम्भू दर्शन याःवनेगु विषय कयाः थथे दृढ प्रतिज्ञा महान् संकल्प यानाबिज्याःगु दु—लँया बिचय् सुख दुःख न्ह्याग्गु जूसां— वा वः, फय् वः, चिकु तांनो च्वापु गाइगु आदि मार्गान्तरय् जुइगु अनेक दुःख कष्ट सहः यानाः जि थ्व अधिष्ठान यानागु थुगु गुरुया आश्रमनिसें—श्रीस्वयम्भू महाचैत्यया थासय् मथ्यंतले कथिपुथि फिगः च्याफि फारपात कं आदि दइच्चंगु दुष्कर मार्ग जूसां किञ्चित् पर्वाह मतसे जिगु थ्व अनित्य शरीरं असारगु संसारय् सत्सारगु सद्धर्म बोधिज्ञान प्राप्ति निम्ति थल्लिनिसें ह्यधु दानाः वनेगु जुल धकाः धयाः थःगुरुयाके शुभ आशिर्वाद सहित विदा कयाः उगु दिननिसें शुभारम्भ यायां श्रीस्वयम्भू महाचैत्य तक साष्टाङ्ग दण्डवत प्रणाम यायां वःगु जुल ।

थ्वय्कः क्यान्छ्या लामाजुया थःगुरुया शुभ आशिर्वाद व गुरु बुद्ध बोधिसत्त्वपिके श्रद्धा भक्ति तथाः एवं प्राणिपनिगु उपरय् बोधिचित्त करुणा तथावःगु व थःगु शुद्ध चित्तया प्रभावं दिक्क व अत्ति मचासे निर्भय व निःशंक जुयाः वीर्य साधन यायां थःगु शुभ प्रणिधान निर्बिघ्नपूर्वक सिद्ध यात । थुगु प्रकारं गुरुकुलनिसें गिरिवर स्वयम्भू पर्वस्थानतक थ्यंकेत लँ न्यासि वय्गुया सत्ता साष्टाङ्ग दण्डवत प्रणाम यानाः ह्यधु दादां बिज्याःगु व्यलाय् ठिक प्यदँत्या दुबलय् ने. सं. १०४५ फाल्गुण पूर्णिमाया दिनय् स्वयम्भू जङ्गलय् थ्यंकाः श्रीस्वयम्भू महाचैत्यया दर्शन व पूजा यानाःलि अत्यन्त हर्ष जुल ।

स्वयम्भू महाचैत्य दर्शन याय् धुँसेलि विस्तारं थ्वय्कः लामाजुयागु ज्ञान गुण एवं चरित्र विषयय् तिब्बती बौद्धधर्मय् श्रद्धा दुपिसं थ्वय्कःयात ह्यसिइकल । नेपाल आगमन समयय् सर्वप्रथम थ्वय्कःयात ह्यसिइकूह्य येँया तंलाछिइ च्वंहा साहुजु धर्ममानसि तुलाधरजु खः । थ्वय्कः धर्ममानसि साहुं क्यान्छ्या लामायात थःगु पूजाकोथाय् बिज्याकाः आपालं श्रद्धा भक्ति तथाः स्वागत यानातल । धर्ममानसि साहुयागु प्रार्थनानुसार वय्कःयागु हे निवासस्थानय् च्वनाः सर्वश्री कुसाङ लामेश्यालुङ्ग (समन्त भद्र मुखदर्शन) नामक सद्धर्म ग्रन्थयागु विषयय् व्याख्यान यानाबिज्यात ।

थुगु सद्धर्म पुथियागु धर्म व्याख्यान उपदेश चर्चा जुजुं नेपाःमि बौद्धजनपि आपालं बोध जुल । थ्वय्कः निर्माया योगी क्यान्छ्या लामाजुया गुण गौरव सत्कीर्ति—वसपोल स्वयम्भू महाचैत्य दर्शनार्थ थःगु शरीरयागु माया मकासे आपालं कष्टपूर्वक साष्टाङ्ग प्रणाम यानाः दण्डवत यानावःगु पुण्यानुभावं धया थें क्रमशः ह्लियाह्लियं शुक्लपक्षया चन्द्रमा समानं सद्धर्मप्रति श्रद्धा वृद्धि जुजुं वल । थुगु सद्धर्मपुथि व्याख्यान समाप्त जुइ धुँसेलि वसपोलयागु सद्धर्ममृत रसपानय् अनुरत जूपि श्रद्धालु श्रोतागणपिसं हानं थासं थासय् धर्मचक्र याकेगु अनुरोध यात । वसपोल लामाजुं करुणा तथाः उगु प्रार्थनायात सहर्ष स्वीकार यासे निम्नलिखित स्थानय् धर्मोपदेश जुजुं वयाच्चन—

- (१) स्वयम्भू गोपुच्छ गिरि पर्वतस
- (२) यल, नागवाहाःल इलन्हेननीस
- (३) धाखाः साहुपिनिगु निवासस्थानस
- (४) ख्वप आदिपद्म महाविहारस
- (५) अमरावती महाविहार बुङ्गस
- (६) कीर्तिपुर

एवंक्रमं थाय्थासय् च्वनाः धर्मं व्याख्यानयागु प्रभावं उपत्यकाय् दुनेच्वंप्पि आपालं बौद्ध अबौद्ध श्रोतागणपि बोध जुयाः सद्धर्म परिचित जुल । थ्वसपोलया धर्मोपदेश याइगु थासय् उपस्थित जूप्पि नेपाली बौद्ध जनता न्याद्वः खुद्वः दयाच्वनी । निःसन्देह थ्व जमघट नेपाःया धार्मिक इतिहासय् असाधारण खः^१ । नापं श्रोतागणपि उत्तिकं सुविनीत भाव जू ।

गुलि नं वसपोलं धर्मं व्याख्यान यानाबिज्यात उकिइ खास यानाः मुख्य निगू विषय कयाः प्रस्तुत जूगु खनेदु^२—

(क) छिडवेन्दु— पिनें ह्लापालाक सिइकाः सय्काः वनेमाःगु बोधिमार्गय् दुग्यकेगु प्यंगः रत्नया ज्ञान ।

(ख) नाडघीडवेन्दु— दुनें ह्लापालाक अभ्यास यानाः वनेमाःगु चर्या खुगु ।

थुलि धर्म प्रचार यानाः दँबदँतक नेपालय् बिज्यानाः थनं मानसरोवर बिज्यात । नेपालय् च्वंप्पि शिष्यपिनिगु लागी अनुकम्पा तसे हानं नेपाः बिज्यानाः शिक्षा-दीक्षा प्रदान यायां धर्म दिन हनाच्वन ।

ने. सं. १०६० साल कार्तिककृष्ण चतुर्दशी शनिश्चरवारया दिनय् स्वयम्भू पर्वस्थानय् शान्ति-पुरया न्होने रात्रि समयय् अकस्मातं प्राण त्याग यानाबिज्यात ।

थ्वय्कः छह्हा तिब्बती नागरिक जूया निम्ति थ्वय्कःया मातृभाषा नं तिब्बती भाषा जुइगु स्वाभाविक हे जुल । गुह्यसिनं सँदेया भासं धर्म देशना यानाबिज्याइगु नेपाली जनसाधारण थुइके मफइगुलि यानाः येँया यट्खावाहालय् च्वंहा बेखारत्न साहुजुं भाषान्तर यानाः नेवाःभासं कनादिइगु जुयाच्वन । तर श्रोतागणपिनिगु संख्या द्वलंद्वः दइच्वंगुलि यानाः बेखारत्न साहुया सः चीसःगु व नापं भाषा शैली शब्द विन्यास मिलय् मज्जुगु थें जुयाः उगु व्याख्यान बेखारत्न साहुजुं धयादिइगु आधारय् दोभाषीया रूपय् हानं यल उकुवाहाःया पण्डित बुद्धिराज शाक्यजुं सकसितं चित्त बुक्य जुइक कनाः सहयोग प्रदान यानावइच्वंगु धाय्माल । खतु थ्वय्कः पण्डित बुद्धिराज शाक्यजुं वसपोलयागु हे उपदेश व आदेशं प्रेरित जुयाः थःगु सम्पूर्ण गृहस्थी जीवन तोताः एकान्तवास निम्ति तमना ऋषिश्चरे स्वीदँ मयाक च्वनाः धर्मं जीवन हनाबिज्यात ।

थथे क्यान्छ्या लामाजुयागु आत्मीय सन्देश धर्मोपदेश श्रवणद्वारा काठमाण्डू उपत्यकाया बौद्ध जनजीवनय् निम्नप्रकारं आचार विचार सुधार जुजुं वयाच्वंगु खनेदु—

- (१) त्रिशरण शिक्षाया महत्व प्रतिपादन
- (२) बोधिचित्त उत्पत्ति याय्माः धइगु
- (३) कुशलाकुशल ह्यसिइकेगु आवश्यक
- (४) मद्य मांस धुम्रपान तोतके बिइगु चर्चा
- (५) त्रिवोधि चित्त विधिकथं धर्मचर्या याय् सय्केमाः

१- विश्वय् बुद्धधर्म, भाग १, पृष्ठ १२

२- कुसाङ लामेश्यालुङ—धइगु सफू स्वयाः सिइकेमाः ।

- (६) बहिद्योया प्राचीन मूर्तित गुम्बाया रूप्य स्थापना याय्गु प्रेरणा
- (७) पुरश्चरणादि साधनय् त्यवा बिइगु
- (८) गुफा पाकु आदि एकान्त थासय् चवनेगु अभ्यास
- (९) प्रवजित जुइगुया महत्व कयनाबिइगु
- (१०) तिब्बती बौद्धग्रन्थ अध्ययन आवश्यक धइगु
- (११) नेपाल तिब्बती बौद्धसंस्कृति तुलनात्मक अध्ययन
- (१२) श्रद्धा निश्चय दुपित जाति भेद मतसे शिक्षा-दीक्षा बिइ ज्यू धइगु
- (१३) धर्मया नामय् हिसादि पशु बलि मबिइगु
- (१४) आर्यभद्रचरी व धारणीया महत्व प्रचार,

इत्यादि उपर्युक्त सद्गुण सुधार व विकास जुया वइच्चंगु थ्व व्याक्वया मूल कारण वसपोल श्रीस्वयम्भू महाचैत्यया प्रसादं जूगु धकाः धाय्फु ।

गन स्वयम्भू महाचैत्य सुप्रतिष्ठित जुयाचवन अन थ्यंक सँदेसनिसें साष्टाङ्ग दण्डवत प्रणाम यानाबिज्याःगु थ्व कयान्छ्या लामाजुयागु अकथनीय परिश्रम खः । सद्धर्मप्रति विश्वास व स्वयम्भूप्रति अपार श्रद्धा भक्तिया महान् प्रेरणा नं खः । स्वयम्भू दर्शनार्थ गुलि नं आचार्य, पण्डित, भिक्षु व दानपति आदिपि वयावन इमिगु बिचय् थ्व घटनाया थःगु हे विशेषता दु ।

स्वयम्भूस लाठसाहेब जुद्धशम्शेरद्वारा सवालाख छोपूजा

जुजु चन्द्रशम्शेरया पर्यायस लाठसाहेब जुयाचव्हं जुद्धशम्शेरयात तस्सकं वांमलाःगु रोग कयाचवन । उगु ल्वय् लाय्के निम्ति डाक्टर, कम्पाउण्डर व वैद्यराज वयनाः अनेक प्रकारया वासः यात नं रोग शान्त जूगु लक्षण खने मंत । उगु समयय् जुद्धशम्शेरया सकल परिवार व नोकर चाकरतय् समेत तच्चोगु धन्दा पीर जुइकाचवन, थः मालिक स्वामि लाठसाहेबयात सुनां गुह्यसितं उपाय यांनाः रोग शान्त यांनाः विइगु जुइ धकाः मतिइ चिन्तना यांनाचवन । लिस्सें स्वयं लाठसाहेबजुयात जा कन हे थःगु जीवन आशा व निराशाय बिचय् लानाचवन । चीफसाहेब भीमशम्शेरया ल्यू थः जुजु जुयाः नेपाःया सार्वभौमिक सत्ता अधिकार चल्य् यांनाः प्राइमिनिष्टर जुइ मदइ धकाः महाधन्दा पीर कयाचवन । थुजाःगु इलय् उगु रोग व मानसिक चिन्ता शान्त यांनाः विइह्य सु कल्याणमित्र चूलाइ धकाः उख्ये थुख्ये बुद्धिजीविपिनिगुपाखे सरसल्ला कयाचवंगु इलय् —

सौभाग्यवश जुद्धशम्शेरया त्वाय् समानं विश्वास यांनातःह्य मैयां क्वहिंतिइ चव्हं साहु कुलधर शाक्यजुयागु पाखे छगू थुजाःगु शुभ सन्देश प्राप्त जूवल कि निर्माया योगी सिद्धवान लामाजु करुणामय अवतारी दुक्पा लामा शेरावदोर्जे (प्रज्ञावज्र) जु पाखे वासः याकेगु सरसल्ला निर्णय जूवल । उगु निर्णयकथं चर्याचारी करुणामय अवतारी दुक्पा लामाजुया न्ह्योने वनाः थःमालिकप्रति तस्सकं विवेक विचारं खंकाः लामाजुयाके 'निकट भविष्यय् प्राइमिनिष्टर जुइह्य लाठसाहेबजुयागु आपद विपद विषयय् कयाः' प्रार्थना याःगु जुयाचवन ।

लामाजुं उगु प्रार्थनायात सहर्ष स्वीकार यासे इमि थःगु विधि विधान अनुसारं नेपाःया अधिष्ठाता श्रीस्वयम्भू महाचैत्यस सवालाख छो चह्य् यांनाः अष्ट महाभय हरण याइह्य आर्यतारायागु पूजा याकेगु खं कोजित । थुगु शुभ सन्देश लाठसाहेबजुया हजुरीस साहु कुलधर शाक्यजुं बित्ति जाहेर यासैलि लाठसाहेबजु अतिकं प्रशन्न जुयाः आवश्यक सम्पूर्ण खर्च बक्सय् जुल ।

थुगु तःधंगु ग्वसाःकथं स्वयम्भू महाचैत्य व आर्यतारादेवीयागु सवालाख छो^१, सवालाख दिवा, सवालाख ति चह्लय् यानाः पूजा मण्डल, आर्यतारा मण्डल, धर्मधातु मण्डल दय्काः भव्य रूपं समारोहपूर्वक पूजा याय्माःगुलि व जेचुन्मा फामा धोल्मा- एकविंशति आर्यतारा स्तुति सवालाख पाठ ब्वनिइपि घेलोङ्क व अनो (भिक्षु, अनागारिका) पि च्वनाः करीब लच्छियंकां पूजा याय् माःगुलि स्वयम्भू महाचैत्यया छचाःख्यरं विभिन्न चैत्य एवं मूर्ति जायाच्वंगु थासय् ज्यामछिगुलि व थाय् चीधंगुलि यानाः थुगु महोत्सव पूजा वर्तमान मञ्जुश्री पर्वस्थानय् च्वंगु धर्मचक्र गुम्बाया न्होने च्वनाः याःगु जुल । थुगु पूजाय् जेचुन्मा फामा धोल्मा स्तुति पाठ याःपि उगु समयय् चुंगुम्बा व पासि गुम्बाया घेलोङ्क व अनीपि जुयाच्वन । थुगु पूजाय् सिद्धवान् श्रीमान् दुक्पा लामाजुं उगु पूजा विधिया ळवल्य् प्रसाद बिया विज्याहुँ धइगु स्तुति ब्वनाः थःगु ह्लिक्पाचाल (स्वयंविद्य समाधि) प्रकाश यानाः वसपोलं उक्त गाथा ब्वनाहःगु इलय् उगु पूजा जुयाच्वंगु थासय् आकाशं अमृत विन्दु प्रसाद वृष्टि जुल । थ्व अद्भूत घटना खनाः अन च्वंपि कार्य कारिणीत व दर्शकगणपि सकले अद्भूत आश्चर्य जुल । अले वसपोल दुक्पा लामाजुप्रति न्यैक्व स्वक्व ताक्वसिया उलि थुलि मदय्क श्रद्धा भक्ति उत्पन्न जुल । थुगु पूजा विधि समारोह सुसम्पन्न जुइवं दायक लाठसाहेव जुद्धशम्शेरयागु रोग नं क्रमशः शान्त जुजुं वनाः पूर्ण आरोग्यता प्राप्त जुल ।

थुगु पूजा विधि समारोह ने. सं. १०४५ फाल्गुणशुक्ल दशमीया दिनय् प्रारम्भ याःगु जुयाच्वन ।

थथे स्वयम्भू महाचैत्य स्थानय् गोपुच्छ पर्वतय् सवालाख छोपूजा नं सिधल, लाठसाहेवजुया पूर्ण आरोग्यता नं लाभ जुसेलि लसताःया उपलक्ष्य लाठसाहेवजुं वसपोल गुरु दुक्पा लामाजु नापलानाः शिष्टाचार पूर्वक स्वागत सत्कार यात, कुशलवार्ता जुल । ‘छलपोल लामाजुयागु विधि विधान व स्वयम्भू महाचैत्य एवं आर्यतारायागु प्रभावं जिगु असाधारण रोग शान्त जुयाः शारीरिक कष्ट वेदनां मुक्त जुयाः पूर्ण रूपेण आरोग्यता नं प्राप्त जुल । उकिं छलपोलयागु उपाय कुशल खनाः जि अत्यन्त अनुगृहित व प्रभावित जुइधुन, अतःएव छःपि खनाः जि तस्सकं सुप्रशन्न जुइधुन ।’ धकाः थःगु श्रद्धानुसार पारितोषिक स्वरूप हार्दिक उपहार चह्लय् यात । ‘अज्ज छःपिनि छुं इच्छा दुसा धया बिज्याहुँ !’—थुलि लाठसाहेवयागु वचन न्यनाः निर्माया योगी लामाजुं धयाबिज्यात— ‘जिगु लागी छुं आवश्यक मदु, अथे नं छिसं छुं सेवा याय्गु खः धइगु जूसा थ्व स्वंगू ज्या याना व्यु :-

(१) तिब्बती बौद्धधर्म न्ह्यात्तासिनं याय्गु स्वतन्त्र दय्मा ।

(२) सँदेसपाखे फैत नेपालय् क्वमकाय्गु कारण इमिगु हत्या रोकय् याय् निम्ति पशुतय्गु सुरक्षाया लागी ।

१- धयातःगु दु—उगु छोपूजा निम्ति छगः छोया छमना सत्वयागु अनुमान याःगु दु । थुगु अनुमानकथं हिसाब याय्बलय् ब्याक्क छो मुरि ७८१।५ खर्च जूगु खनेदु ।

(३) थुगु पूजाय् उपस्थित जुयाः 'जेचुन्मा फामा धोल्मा' ब्वंप्पि चुंम व पाप्सि गुम्बायाप्पि घेलोङ्ग व अनीतय्त भोजन निम्ति आयस्ता प्राप्त जुइमा ।

लामाजुयागु थ्व स्वंगु इच्छा पूर्ति निम्ति आवश्यक सम्बन्धित सरकारी कर्मचारीपित ज्या अह्लय् यानाः लामाजुयागु इच्छा पूर्ति यानाब्यूगु जुल ।

थुलि धयाःलि शारीरिक रोग व्याधि मुक्त जूसां परन्तु मानसिक व्यथा अन्तस्करणया प्रबल इच्छा विषयय् कयाः थथे मतिइ तयाः प्रश्न याःगु जुल- 'जि प्राइमिनिष्टर जुइ दइला ? यदि प्राइमिनिष्टर जुइगु जूसा गुबलय् जुइ फइ ?' थुकथं थःगु महान् इच्छा प्रकट यात ।

गुगु लाठसाहेबयागु आश्रयप्रति ध्यान आकर्षित यानाः लामाजुं बांलाक बिचाः यानाः धर्मपाशा ह्वानास्वयाः वइगु कर्मविपाक फल निर्देशन यानाः प्राइमिनिष्टर जुइगु तिथि निश्चित यानाब्यूगु जुयाच्वन । फलस्वरूप उगु निर्देशानुसार ताविस्तार मजुइक प्राइमिनिष्टर जुइदुगुलि अत्यन्त हर्ष प्रकट यासे हानं निको खुसिइ श्रीमान् दुक्पा लामाजुयात प्राइमिनिष्टर श्री ३ जुद्धशम्शेर वनाः दर्शन याःवंगु जुल ।

लामाजुयागु आज्ञानुसार पाय्छि इलय् थः प्राइमिनिष्टर जुइ खँगुलि महान् अनुमोदन यासे लामाजुया धर्मचर्या सहस्रभुज लोकेश्वरयागु व्रतोपासना (न्यूने) यात आयस्ता स्वरूप दच्छिया किनिसः मोहः गुठी तयाब्यूगु जुल ।

वसपोल गुरु देहावसान जुइ धुंकाः नं हानं अवतारी बिज्यानाः थौंकल्लय् हेलम्बु स्थित बाखाँ गुम्बाया मूलगुरु जुयाः बिज्यानाच्वन । थ्वसपोल करुणामय अवतारी लामाजुया संरक्षकया रूपय् लामा छेचुकुस्योभ्पाखे आवश्यक व्यवस्था याना वइच्वंगु दु ।

स्वयम्भू दर्शनार्थ चुंगुम्बानिसे दण्डवत यांना: वःह्य भिक्षु धर्मगुरुजु

यल ॐ कुली श्रोरुद्रवर्ण महाविहार (उकुबाहाः) या सर्वसंघपिनिगु ग्वसाःकथं गोगु च्यान्हु गुन्हु तक प्याखं हुइकेमाःगु ललितविस्तरया आधारकथं दय्कूगु सर्वार्थसिद्धया प्याखं ने. सं. १०४५ सालं पिदन । थ्व सर्वार्थसिद्ध प्याखंया थःगु हे विशेषता दु, महत्व दु, अतिकं लोकप्रिय जू । थुकिइ प्याखंमो जूपि छह्यति छह्य पात्रत प्रभावकारी जू । वसः तिसाया शृङ्गार पतार तस्सकं चमत्कारपूर्ण जू । थ्व सर्वार्थसिद्धया प्याखंया चर्चा प्रत्येक नेवाःमितय्गु छेँय् छेँय् ह्यापा लिपा नं दइमखु धयाथे प्रशंसा यानाच्चनी । उकिइ मध्यय् देवदत्त जूह्य ला धाय् हे म्वाः, कं चर्को ।

उगु प्याखनय् देवदत्तं गुबले खःगु भिगु बांलाःगु ज्या मयाः— हाय्केगु, ख्वय्केगु, दुःख विइगु जालकेल याय्गु सिवाय् । थ्व प्याखनय् देवदत्त जूह्य हर्षदेव शाक्यजु खः । थुगु प्याखं सिधय्काः लित तय् धुंकाः थ्वय्कःयात थुजाःगु पश्चाताप जुल कि निर्दोषी जशोधरा व सर्वार्थसिद्धयात गुगु प्रकारं थःगु स्वार्थ सिद्ध याय्त जि छल कपट याना, अनेक प्रकारं दुःखकष्ट बिया, अपराध यानावयागु थुगु प्रायश्चित्त शुद्ध याय्त गृहस्थी तोताः भिक्षु जुइगु धकाः सद्धर्म चित्त उत्पन्न याःगु जुल ।

थथे भिक्षु जुइगुलिइ श्रद्धा उत्पत्ति जुयाच्चंगु इलय् पण्डित निष्ठानन्द वज्राचार्यजुं बुद्ध-जीवनी दुगु ललितविस्तर नेपाल भाषां भाषान्तर यानाः प्रकाशय् हयाच्चन, उख्ये क्यान्छ्या लामाजुं प्यंगः रत्नयागु ज्ञान प्रचार यानाहयाच्चन, थुख्ये करुणामय अवतारी दुक्पा लामाजुं षडक्षरी महामन्त्रया महत्व व सहस्रभुज लोकेश्वरयागु न्युनेब्रतयागु उपासना याकावइच्चंगु सत्संगतयागु प्रेरणाद्वारा कं हे छ्वःमिइ ध्यः लुइ थे जुयाः अनित्य वैराग्य चित्त उत्पन्न जुयाः दुक्पा लामाजुयागु शिष्यत्व ग्रहण याःवंगु जुल । छुं समय लिपा दुक्पा लामाजुं थः शिष्यपिनिगु लागी अनुकम्पा तयाः अठार सय खोलाय् च्वंगु चुंगुम्बाय् विज्यात । वसपोलया ल्यूल्यु हर्षदेव शाक्यजु नं अन थ्यंक वंगु जुल ।

वसपोल दुक्पा लामा शेराव्दोर्जे (प्रज्ञावज्र) यागु उपदेशं प्रभावित जुयाः गृहस्थी तोताः

चुंगुम्बाय् च्वनाः भिक्षु जुल । श्वय्कः भिक्षु जुसेलि कोन्छ्यो दोर्जे (त्रिरत्नवज्र) धइगु नामकरण यात । भिक्षुव्रत प्राप्त जूगु उपलक्षय् कयाः तच्चोगु हर्ष गुर्यागु आश्रमं (चुंगुम्बा) निसें स्वयम्भू पर्वस्थान थ्यंक ह्यधु दानाः साष्टाङ्ग दण्डवत प्रणाम यानाः स्वयम्भू महाचैत्य दर्शन याःवःगु जुल । श्व प्रेरणा उत्साह श्रीमान् दुक्पा लामाजुयागु उपदेशया प्रभाव, प्रवज्याव्रत लाभ जूगु हर्षया उपलक्षय् श्रीमान् क्यान्छ्या लामाजु खामनिसें दण्डवत यानाः स्वयम्भू दर्शन याःविज्याःगुया अनुकरण व स्वयम्भूप्रति अपार श्रद्धाभक्तिया अभियान खः । थुगु इलय् श्वय्कः त्रिरत्नवज्रया उमेर २६ दँ क्यंगु जुयाच्चन । थथे ला नं ला विक पहाड पर्वतया लँपुस दण्डवत यानाः ह्यधु दानाः दुष्कर चर्या याय्गुलिइ नेवाःसमाजय् श्वय्कः सर्वप्रथम जूवइ ।

अठार सय खोलाय् च्वंगु चुंगुम्बानिसें दण्डवत यानाः ह्यधु दानाः स्वयम्भू महाचैत्य दर्शन यानाविज्याःगु पुण्यानुभावं कं हे सद्धर्मय् वीर्य उत्साह बढय् जुयाः काठमाण्डू उपत्यकाया सम्पूर्ण तीर्थ उपतीर्थ छथाय् हे मुं वनिइगु कूटपाले तीर्थ (क्वदुवाल) स स्वदैतक दुष्कर चर्या यानाः आर्य महायान नामसंगिति सूत्रयागु अभियान प्रारम्भ यानाविज्यात । फलस्वरूप श्वसपोलं अनेक गां गामय् त्वाः-त्वालय् विहारय् थासं थासय् मिसा मिजं मस्तय्त नामसंगितियागु अध्ययन अध्यापन पठन पाठन याकेगु हे श्वय्कःया जीवनया मूल उद्देश्य जूवन । श्वसपोलया थःगु शेष जीवन स्वयम्भू सन्निवर्ती स्थित किण्डोल विहारय् च्वनाः वितय् यात । स्थानीय जनतापिसं श्वसपोलयात त्रिरत्नवज्र मधासे धर्मगुरुजु नामं व्यवहार याना वइच्चंगु जुल ।

स्वयम्भू महाचैत्यपारवे ज्योतिरश्मि दर्शन व्यूगु

श्व स्वयम्भू महाचैत्यया दुने सुन्दर निर्मल कालीहृदया संक्षिप्तीकरण अवशेषया रूप्य सुरक्षित जुयावइच्चंगु छगू पलेस्वां पुखू सदांया लागी अटल जुयाच्चंगु दु । श्व हे शुद्ध निर्मल पुखूया दत्थुइलाक द्वःछिहः दुगु पलेस्वांया द्योने ज्योतिरूप श्रीस्वयम्भू रश्मिमय जुयाः निरन्तर जाज्वल्यमान प्रकाश जुयाच्चंगु दु धइगु जनविश्वास व बौद्धइतिहास स्वयम्भू पुराणं कनावइच्चंगु जुल ।

गुवल्य श्व ज्योतिरूप रश्मि प्रकाशयात कलिकालयागु क्लेशमार व प्राकृतिक प्रकोपद्वारा बच्य याय्त सर्वप्रथम आचार्य शान्तिकरजुं स्वयम्भू महाचैत्याकार रूप्य परिणत यानाः निर्माण यानाबिल, उबलय् दूरदर्शी शान्तिकरजुं श्व महाचैत्य दय्कूगु इलय् गथे कीगु शरीर्य पञ्च ज्ञानेन्द्रिय व पञ्च कर्मेन्द्रिय तयाः शरीरयागु पूर्ण अवयव खडा यानाः प्राण प्रतिष्ठा जुयाच्चन, अथे हे थुगु स्वयम्भू चैत्य दुने नं उद्धर्गति ज्योतिरश्मि पिहांवइगु प्वाः व अधोर्गति पलेस्वां पुखूया जल पिहांवइगु प्वाः तयाः दय्काव्यूगु जुयाच्चन । एवंक्रमं शरीरया लागी श्वास प्रश्वास गति संचारणया निम्ति ह्वाय्प्वाः व म्हुतुप्वाः तयाव्यू थे यानाः थुकिइ गलतकिया थासय् ह्वः तयाव्यूगु नं दु । श्व हे ह्वतं कीसं घेवा कुतका स्वय्बल्य बांलाक ह्वाय्पं बियाः न्यना स्वय्बल्य तुप्लुंक लख्य क्वहांवंगु शब्द पिहांवइ धयातल ।

थुगु स्वयम्भू चैत्यराजया चव्य च्वंगु ब्रह्मरन्ध्र चसुप्वालं ज्योतिरश्मि बराबर अवभास जूगु खने दयावइ, क्वय् च्वंगु नवछिद्र द्वारं स्वयम्भूया गर्भगृहया दुने च्वंगु पुखूया लः वर्षाकृतुं भय्बियाः स्वयम्भू पर्वतं थाय्थासं पिहांवयाच्चनी । श्व स्वयम्भू गः चाःहुलाच्चं पिं भक्तजनपिसं बराबर खनाच्चंगु न्यनाच्चंगु दु ।

स्वयम्भू महाचैत्यप्रति बांलाक शुद्ध चित्तं श्रद्धाभक्ति तयाः सेवा चाकरी यानाच्चं पिं निश्चय दुपि भाग्यमानी कुलपुत्र कुलपुत्रीपिसं श्व स्वयम्भू चैत्य पुङ्ग वयाः अवभास प्रस्फुरण जुयाः पिहांवःगु तेजरश्मि ज्योतिरश्मि दर्शन लाःपि गुलिख्य श्रद्धालु धर्मात्मापि बितय् जुयावने धुंकल ।

प्रसंगवश थन पाठकवर्गपिनिगु न्ह्योने उगु स्वयम्भू चैत्यराजं रश्मि पिहांवःगु तिथिमिति निश्चित जूगु छगू शुभहूर्तया घटना उदाहरणया लागी प्रमाण प्रस्तुत यानाचवनाः :-

स्वयम्भू चैत्यराजं रश्मि पिहांवःगु

बैशाखपुत्लीखुनुया दिनय् स्वयम्भू धर्मधातुं रश्मि पिहांवःगु जि हे साक्षात् दर्शन यानागु दु । थल्लि १७-१८ दैति ह्लापा तदनुसार (ने. सं. १०५०) जि लंका मवनानिबल्य् छेँ-गृहस्थीयागु कचमच जंजालं मुक्त जुयाः एकान्तय् चवनेया लागी किण्डोल विहारय् दच्छिति च्वंवना । उगु समयय् किण्डोल विहार नकतिनि जक जीर्णोद्धार याय् सिध्यकातःगु अवस्था जुयाचवन । अन वास यानाच्वं च्वं छन्हु बैशाखपुत्ली थ्यंकःवल । उखुनु अत्यन्त तःधंगु दिन खः, विशेष यानाः बौद्धतय्, उगु दिनय् दानादि आपालं पुण्यकर्म याय्माः धकाः उपासक उपासिकापि २०-३० ह्यति नापं, करुणामय अवतार ह्लापा स्वयम्भू भगवान् ल्ह्वं बिज्याःह्य दुक्पा लामां चल्य् याना थकाबिज्याःगु न्यूने वर्त (सहस्रभुज लोकेश्वरयागु व्रत) च्वं च्वना । उखुनु वहनी करीब ८-९ वजेति सकले तलय् द्यःक्वथाय् मुनाः गुह्यस्यां जप यानाचवन, गुह्यस्यां धारणी ब्वनाचवन, हानं गुह्यस्यां मत च्याकाः धर्मपुस्तक स्वयाचवन । इपिं उपासकपि मध्यय् छ्हा उपासिका पिसाब याय् धकाः बाहालं पिहांवनाः स्वयम्भू पर्वतपाखे स्वःवल्य् अन ह्याउँगु, ह्यासुगु, वँचुगु इत्यादि पञ्चवर्ण दुगु रश्मि पिहांवयाः च्वय् आकाशय् थहांवनाच्वंगु खन । वं जक उलि खनेवं मेपि दुने च्वं च्वनापि जिमित सकसितं 'स्वःवा ! स्वःवा !! गथिजाःगु स्वयम्भू भगवानयागु प्रातिहार्य, अहो ! आश्चर्य !!' धकाः सःताः क्यन । वइगु सः ताय्वं जिपि सकले काचाकाचां बाहालं पिने वयाः स्वःवया । उगु वखतय् जिमिसं छुं नं मखना । अय् जूसां जिमिसं व प्रातिहार्य दर्शन याय्गु आशा भङ्ग मयासे मनय् हर्ष उत्साहित यानाः थौं थ्व प्रातिहार्य दर्शन मयाकं द्यने हे मखु धइगु शुभकामना यानाः पियाः स्वयाचवना । तदनन्तर भतीचा जायकाः व उपासिकां कं थे तुं तुयूगु ह्यासुगु आदि अने अनेगु वर्ण दुगु रश्मि ज्योति स्वयम्भू चैत्यराज स्थानं पिहांवयाः आकाशपाखे थहांवन । रश्मि गवले थिना वइ गवले खिखि धायावनी । थुगुकथं निको प्यकोति जुइ धुंकाः वया क्वस्सं हानं तस्सकं थिइगु विजुलो मत ऊवःलाक च्याके थे छ्धाःया ल्यू ल्यू छ्धाः छ्धाः यायां न्याधाः च्याना वयाः, हानं छसेनिसे छ्धाःया ल्यू ल्यू छ्धाः छ्धाः तुं ऊवःलाकं लोप जुयावन ।

उगु अवस्थाय् जिगु मतिइ थथे वल कि थ्व पक्का स्वयम्भू चैत्यराजया छ्चाःख्यरं अमृताम्भ, अमोघसिद्धि, वैरोचनादि पञ्चबुद्धयागु प्रतिमा दु । थ्व हे शास्तापि न्याह्यसिगु मूर्ति प्रत्यक्ष याय्या निम्ति थ्व मत न्याधाः च्यानावःगु जुइमाः । मखइगु कारण नं छुं खनेमदु ।

महापण्डित राहुलजुया स्वयम्भू दर्शन व शिलालेरव अध्ययन

स्वनाम धन्य भारतया बहुमुखी प्रतिभाशाली सुप्रसिद्ध विद्वान् महापण्डित राहुल सांकृत्यायनजु भारतया आजमगढ जिल्लाय् कनैला गांया गोबर्द्धन पाण्डेयया श्रीमती कुलवन्तीया गर्भ जन्म जूह्य खः । वयात केदारनाथ धइगु नां छुत । क्रमशः वयस जाया वसेलि शिक्षा-दीक्षा प्राप्त जुजुं वल । थ्वय्कः थःगु हे प्रयत्नं तीक्ष्ण बुद्धि यांनाः समय व परिस्थिति अनुसारं पलाः न्ह्याकेफुगुलिं ववतासि मद्युसे कोशिश यांना जूगुलिं यांनाः साधारण कोखय् जन्म जूसां विलक्षण प्रतिभा दइवंच्वन ।

खतु थ्वय्कलं थःगु जीवनय् सर्वप्रथम वैष्णव सम्प्रदायय् दुहांवनाः मठाधीशनाप यक्वं सत्संगत प्राप्त यांनाः उकिइ हे दीक्षित जुयाः केदारनाथयात रामउदारदास धइगु साधुबेसय् परिणत जुल । अथे हे वेदान्त शास्त्र आर्य समाजया सत्यार्थ प्रकाश, ईसाईया बाईबल तथा अरबीया कुरान् आदि ग्रन्थत अध्ययन व तत्सम्बन्धी विद्वानपिनाप यक्वं सत्संगत प्राप्त यात । तथापि वय्कःयात शान्ति व सन्तोष मजुल, उगु विषय व्याक्व हाकुतिनाः ईश्वर व वेद विरोधी बौद्ध साहित्य अध्ययन यायां लंकाय् वनाः त्रिपिटक ग्रन्थ अध्ययन यांनाः अन्तय् प्रवर्जित जुल । अन वय्कःयात राहुल सांकृत्यायन धइगु नां छुत, क्रमशः वय्कः त्रिपिटकाचार्य नं जुल ।

भारतय् साधुत्वया ह्यासुगु वस्त्रं चाःहिलेत ग्वहाःलि याः थें एशिया व यूरोप चाःहिलेत बौद्ध भिक्षुत्व व विद्वतां ग्वहाःलि यात । थ्वय्कः हिन्दी, संस्कृत व पालीया प्रकाण्ड विद्वान जुयाः नं अन्य भाषा भाषीया नं यक्व दखल दुह्य खः । उकिं थ्वय्कःयात वाराणसीया विश्वविद्यालयं 'महापण्डित' धइगु उपाधि देछाल । अनेकं सत्संगत व विलक्षण बुद्धि दइच्चंगुलिं यांनाः २५० निसःत्यां मयाक्क धात्थें धात्थेंयागु सफू च्वःह्य भारतीय भूमिइ राहुल छह्य हे जक दु । फ्रान्स, जर्मनी, विलायत, रंगून, पोनाग, सिगापुर, हंगकंग, संघाई, जापान, कोरिया, मंचुरिया, रूस व इरान एवं नेपाल, चीन तिब्बत आदि थासय् चा हुलाः बौद्धधर्म, इतिहास, संस्कृति व पुरातत्त्व आदि विषयय् अध्ययन व अनुसन्धान

यानाविज्यात । उकिं थव्यकःयात विश्वया बौद्ध विद्वानं ह्यस्य । धात्थे' धाय्माल धाःसा नेपाःया बुद्ध
शासन प्रचार व प्रसारय् आपालं सहयोगी जूह्य नेपाःयात नेपाःकथं विश्वया न्होने तःह्य धकाः धाइ ।

थव्यकःयात आपालं विद्वान्पिसं प्रशंसा यानातःगु दु- 'नीगू शदीया ह्वेनसाङ्ग जुइह्य—
बोधिसत्वया अनुज पृथ्वीइ तस्सकं थिइगु नगु'—गञ्जे आचार्य शान्तरक्षित् दीपङ्कर श्रीज्ञान आदिपिसं
बौद्धधर्म प्रचार व अनुसन्धानया निर्मित थःगु जीवन समर्पण यानाविज्याः थे' विज्याःह्य अन्तय्
वज्रयानया आदर्श अपनय् यानाः भारत भूमि अद्वितीय महारत्न धाय्कावन ।

थवसपोल नेपाल बिज्याःगु समयय् ई. सं. १९३६ अप्रैल ७ (ने. सं. १०५६) या दिनय् नेपाल
बौद्ध संस्कृतिया केन्द्र प्रागैतिहासिक कालनिसें प्रसिद्ध जुयाच्चंगु खुला संग्रहालय गन कि सलंसः
शिलाभिलेख, सलंसः चीवाहाः, सलंसः बौद्धमूर्तिपाखे सुसज्जित जुयाच्चंगु सजीव संग्रहालय धर्मराजिक
श्रीस्वयम्भू महाचैत्य दर्शन याःगु जुल ।

थुजाःगु पुरातात्त्विक व ऐतिहासिक वस्तुया जमघट जुयाच्चंगु थासय् थ्यनाः नं पुरातत्त्वान्वेषक
महापण्डितजु गुबलय् सुम्क चवनेफइ । वय्कलं ने. सं. ४७० सालय् बङ्गालया सूरत्राण शमसुद्दीन
बागरा वयाः नेपालय् आपालं मन्दिर मूर्ति स्यंकूगु विषयय् उल्लेख जुयाच्चंगु शिलापत्र लुइकल ।
तर थ्व खँ राजगुरुनाप छलफल जुल, थुकिया विषयय् वय्कलं धयादिल- 'नेपालय् सुं मुसल्मान
विजेतापिसं पलाः मतःनि ।' थुगु विषयय् राजगुरुयात म्हुतुप्वाः जाय्क राहुलजुं लिसः बिल । थ्व हे
शिलालेख जायसवालजुयात धयाः वय्कःपाखे सर्वप्रथम प्रकाशित याकेबिल^१ ।

डा० विनयतोष भट्टाचार्यजुया स्वयम्भू दर्शन व मूर्तिकला अध्ययन

भारतीय विभिन्न विद्वान्पि मध्यय् छह्ण डा० विनयतोष भट्टाचार्यजु नं उत्तिकं लब्धप्रतिष्ठह्य विद्वान् खः । खास यानाः थ्वय्कःयागु थःगु मुख्य अभिरुचि व अध्ययन 'बौद्धमूर्ति प्रतिमा लक्षण' विषय कयाः न्ह्यात्थाय् न्ह्याबले गवेषण व अनुसन्धान याना जुयाच्चनी । तर थ्वय्कःयाके नेपाःयागु धर्म, संस्कृत, कला व दर्शन एवं इतिहास विषय कयाः ग्रन्थ च्वय्गु नं उत्तिकं प्रबल इच्छा दइच्चंगु खः । इच्छा दयाः नं नेपाःयागु गतिविधि छकः अध्ययन मयाय्कं गथे च्वय् फइ धइगु मनय् सारै अन्दोलन जुयाच्चन लिसेलिसें नेपाः वय्गु बारय् सरकारी स्तरीय सुविधा एवं सहयोग प्राप्ति निम्ति आवश्यक जनसम्पर्क तयावंच्वन । थुनिया फलस्वरूप ई. सं. १९२२ (ने. सं. १०४२) सालं वय्कः-पिनिगु छेय् धुमधामं उत्सव नं मानय् यात, कारण वय्कःयात नेपाल सरकारयापाखे नेपाःया सांस्कृतिक गवेषणया लागि नेपालय् वनेगु शुभ समाचार छ्वयाहःगुलि । उगु समयय् वय्कः ढाका विश्वविद्यालयया डाक्टरेटया विद्यार्थी जुयाच्चन, अथे जूसां उवलय् हे बौद्ध प्रतिमा लिखनया प्रबन्ध च्वय्गुलिइ संलग्न जुयाच्चन । लिसें वय्कलं भारतया अलग अलग पुरातन वस्तु संग्रहालय व उत्खनित बौद्ध स्थलय् लुयावइच्चंगु सामग्रीतय्गु सम्पूर्ण अध्ययन याय् धुंकूह्ण खः । अथे जूसां उगु अध्ययनं थःत उस्त सन्तोषप्रद मजुल, गुलि विस्तृत अध्ययन निम्ति पूर्ण रूपेण सामग्रीत यक्व हे सोमित तिनि धइगु मनंतुनाः थःत थःह्यं निराश थें जुयाः उगु विषय तोताछ्वय्गु नं छकः विचाः याय् धुंकूगु खः ।

थुजाःगु प्रकारया मनय् संदिग्ध व निराश थें जुयाच्चंगु इलय् नेपाल भ्रमण याय्गु सुविधा प्राप्त जुल । तदनुसार तीर्थव्रतीया रूपय् वय्कःपि थःगु स्वर्ग व आकर्षणाशक्त देस नेपाल प्रस्थान जूगु जुल । वय्कःपि रक्सौलनिसें काठमाण्डू तक नं सम्पूर्ण लै न्यासि हे वनेमाल खनी, कारण उगु बखतय् भीमफेदीतक नं रेलयागु आवागमन महुनि । काठमाण्डू थ्यँसेलि राजकर्मचारीतय्सं वय्कःपित

हार्दिक स्वागत यासे राजकीय अतिथिपित दइगु किसिमं सुविधा नं प्राप्त जुल ।

काठमाण्डू थयनाः निन्हुखुनुनिसे थःगु सदच्छा गुगु 'बौद्धमूर्ति प्रतिमा लक्षण शास्त्र अध्ययन व अध्यापन' याय्गु खः, उगु विषयय् महायान तथा तन्त्र वज्रयान सम्बन्धी बौद्ध मूर्तितय्गु जमघट जुयाच्चंगु सजीव मूर्ति संग्रहालय थे जुयाच्चंगु श्रीस्वयम्भू महाचैत्य दर्शन यानाःलि अन छ्वाःख्यरं च्वंगु विभिन्न सुन्दर कलात्मक मूर्तितय्गुपाखे दृष्टिगोचर जूवन, लिस्सें प्रदक्षिण व निरीक्षण नं जुल । थुगु थाय्पागु दिव्यभावनाया प्रतीक अमूल्य निधि अनुपम उपहार कलात्मक कीर्तित खंबल्य् विनयतोष भट्टाचार्यजुं धयादिइगु दु- 'बौद्धदेव तथा देवदेवीपिनिगु अविश्वस्य प्रतिमा निधि थुपि हे खः' ।

स्वयम्भू प्रदक्षिण व निरीक्षण सिधय्काः थनं सरासर मेगु प्रसिद्ध बौद्ध स्तूप खास्ति चीवाहाः-यागु निरीक्षण याःवंगु जुल । थनं लिपा यल व येँया अनेकानेक बौद्ध विहारतय्गु निरीक्षण जुल । थुपि विहारतय्गु विभिन्न धातुया उत्कृष्ट शिल्प पुरातन संग्रह खंबल्य् वय्कः तस्सकं लय्ताःगु दु, लिस्सें आश्चर्य नं जुल । थुपि बही विहारयागु अतुल्य सांस्कृतिक निधि खनाः थथे नं धयादिइगु दु- 'थुकियागु विषयय् सम्पूर्ण रूपं विवेचना याय्गु मनूतय्गु निम्ति तस्सकं थाकु, असंभव थे जुइ, छ्वाःधाःसा न्ह्यात्थे कम नं क्रिदंतकया लागी यथेष्ट मात्रां ज्या दइ ।' वय्कलं लच्छिया दुने स्वसःपाः तस्वीर खिचय् यानाःलि थ्व सम्पदशाली भण्डार ज्वनाः वय्कः नेपालं खिन्न चित्त जुयाः याकनं लिहां काय्माल । थःगु ज्या पर्याप्त मजुवं वय्कः याकनं लिहां काय्माःगुलि आपालं खेद प्रकट नं यानादिइगु जुल ।

वय्कः थन च्वना दित्तलय् सुरतश्री महाविहारया प्रसिद्ध बौद्ध विद्वान् अध्येता पण्डित सिद्धिहर्ष वज्राचार्यजुनाप आपालं घनिष्ठ सम्बन्ध तयाः वसपोलयापाखें वज्रयानयागु बारय् आपालं ज्ञान हासिल यानादिइ दुगुलि थःत भाग्यवान् सम्झय् जूगु दु । बौद्ध प्रतिमा लक्षण शास्त्र च्वय्गु अनुसन्धान याना जुयाच्चंगुलि यानाः पालराजा धर्मपालद्वारा प्रतिष्ठापित विक्रमशील विहारया अध्येता अभयाकर गुप्तजुं बौद्ध देवदेवीपिनिगु विषयय् च्वयाथकूगु विरल व महत्वपूर्ण ग्रन्थ निष्पन्न योगावलीयागु पाखे पं० सिद्धिहर्षजुं ध्यानाकर्षित याकेबिल ।

वय्कलं थ्व नं विश्वास प्रकट यानादिइगु दु कि साधनमाला व निष्पन्न योगावली ग्रन्थ बिना भारत, नेपाल, तिब्बत, चीन, मञ्चुरिया, मंगोलिया एवं जापान आदि महायानिक देसय् उषलब्ध जुइगु असंख्य मूर्तितय्गु वर्गीकरण जुइफइमखु ।

वय्कः नेपालय् च्वनाच्चत्तलय् गथे पं० सिद्धिहर्षजुं बौद्ध प्रतिमा लक्षण अध्ययन अध्यापनया बारय् आपालं वय्कःयात प्रभावित यात अथे हे बौद्ध प्रतिमा चित्र चित्रण याय्गुलिइ कलाकार वीरमान चित्रकारयागुपाखे नं वय्कःयात यक्वं सहायता प्राप्त जूगु खनेदु, लिस्सें वय्कलं च्वःगु खृष्टाब्द १९२४ सालं प्रकाशित 'दि इण्डियन बुद्धिस्ट इकोनोग्राफि' नामक पुस्तकय् जनबाहाःया १०८ रूपया लोकेश्वर चित्र च्वयाव्यूगु दु । उकिं हे थुगु सफूयात भारतीय इतिहास एवं संस्कृति विषयय् एम० ए० कक्षाया

पाठ्यक्रमयागु सिलेवत्तः आपालं यानाः भारतीय विश्वविद्यालयस्वीकृत जूगु दु ।

अन्तय् वय्कलं नेपालप्रति आपाः आपालं उद्गार व्यक्त यासे थथे धयादिइगु दु- 'जि छु खः व नेपालं दय्काब्यूह्य खः ।' थुलि जक मखु अज थथे नं धाःगु दु- 'नेपाःया बौद्ध धर्म विषयक प्राचीन ग्रन्थत नेपालं तातापाःगु देस विलायत, फ्रान्स, इटाली व रूस तथा बंगालयागु एशियाटिक सोसाइटी, कलकत्ता, ओरिण्टल इन्स्टिट्यूट बडौदा व बम्बईयागु रोयल सोसाइटीया बौद्ध संग्रह्य भेलाजूवन ।' थुलिया निम्ति भारतया बौद्ध संग्रह फुक्क धया थें नेपाःयागु हे धाय्फु । क्याम्ब्रीज विश्वविद्यालयया पुस्तकालययागु सेसिल बेण्डालया बौद्ध ग्रन्थया सूचीपत्र व महामहोपाध्याय हरिप्रसाद शास्त्रीजुया नेपाल सूचीपत्रया निगू थेलि नं नेपालं हे वइच्चंगु बौद्धग्रन्थया परिचायक सूचीपत्र खः । नेपाःया ग्रन्थया मेगु महत्वपूर्ण सूचीपत्र राजा राजेन्द्रलाल मिश्रया 'नेपालीय बौद्ध वाङ्मय' खः । नेपाःया ग्रन्थतय्गु सूचीकरण संसारया बौद्ध अनुयायीपिनिगु निम्ति थुगु समृद्ध देसय् दइच्चंगु बौद्ध-संस्कृतिया आद्यग्रन्थ प्रकाशन याय्गु दृष्टिकोणं यक्व यक्व ज्या याय्फु । थ्व नं धयातःगु दु कि संसारया जनसंख्या मध्यय् स्वव्वय् छव्व बौद्ध अनुयायीत दु, गुकिइ मूल रूपय् बौद्ध संस्कृत वाङ्मय प्रबुद्ध जुयाच्चंगु दु । बौद्ध संस्कृत वाङ्मययागु विषयय् नेपाःयागु संग्रह सम्भवतः समृद्धतम जू ।

थ्व अज्ज नं आधुनिक भारतय् बौद्ध संस्कृतियागु निम्ति समृद्धतम भण्डार दु । नेपाःया बौद्धधर्म अद्यापि जीवित धर्म धकाः धाय्फु, गुकियागु अध्ययन थुकियागु प्राप्तन निष्कलुषता व महिमाय् याय्फु । च्वापुगुं चाःहुइकातःगु थुजाःगु रहस्यमय देसय् इलं संस्कृतियागु गुगु देन वियाथकल, उकियात संरक्षण मयात धाःसा बौद्धधर्म गुगुं वखतय् न्ह्यात्थें जाःगु अध्ययन नं असम्पूर्ण जुइ । संक्षिप्तं धाय् धाःसा बौद्धधर्मया अध्येताया निम्ति नेपाः स्वर्ग खः ।

स्वयम्भूया जंगलय् खानी विभागपारवे लुँ खानी लुइकूगु

थ्व स्वयम्भू पर्वत धार्मिक, सांस्कृतिक, पुरातात्विक एवं कलात्मक दृष्टि जक महत्वपूर्ण मजुसे आर्थिक दृष्टिकोणं नं उत्तिकं महत्वपूर्ण जू धइगु खँ कीसं अःपुक अनुमान याय्फुगु खँ खः । कारण 'वाउँगु बन नेपाःया धन' धयातःगु उखान जा सकसिनं सियाच्चंगु हे दु । स्वयम्भू डाँडाया पृष्ठभूमि थ्व कीगु काठमाण्डू उपत्यकां खनेदइच्चंगु प्यंगू प्रसिद्ध ऐतिहासिक पर्वत (धेनाचो, फूचो, सिफुचो व जामाचो) मध्यय् उच्चगु धइगु सिद्ध जू । थ्व उच्चगु जामाचो पर्वतया न्ह्योनेसं च्वंगु युग भेदं प्यंगू नां दइच्चंगु साह्योगु पर्वतय्—

नानारत्नमयैः स्वस्ति

नानाधातुभिः संयुत

धकाः अनेक रत्नं व धातु सहित जुयाच्चंगु दु धइगु खँ स्वयम्भू पुराणय् कना तइतल । थुलि जक मखु जिनवज्रं च्वइतःगु तिब्बत भाषायागु स्वयम्भूयागु इतिहासय् नं थथे वर्णन याना वइच्चंगु दु^१ :—

स्वयम्भूया प्यंगू दिशाय् प्यंगू तःधंगु खानी दु । थ्व खानी सिद्ध नागार्जुन आचार्य तेरया रूपय् गोप्य यानाथकूगु दु । उकिं थ्व प्यंगू खानी संसिद्धिया रूपय् संस्मरणया लागी स्वयम्भू महाचैत्यया प्यख्यरसं छगू छगू मण्डल तयाः पुस्पा तयातःगु धाइ । हानं स्वयम्भू पर्वतया उत्तरय् च्वंगु काश्यप चैत्यया न्ह्योनेपाखे वर्तमान आनन्द कुटी दय्कूगु थासय् लुँ खानी दु धकाः ग्याल्पो सेर्गि घोछे धइह्य-सिगु पालय् नं आशिका यानाः अधिष्ठान यानाथकूगु दु धकाः च्वइतल । थ्व थासं पिहांवःगु उत्तमगु निर्मल स्वयम्भू ज्योति प्रकाश जुयाच्चंगु जल अभिषेक काल धाःसा क्लेश व्याधि मुक्त जुइ धयातल ।

थुजाः थुजाःगु इतिहासया अनुश्रुति व स्थानीय बुरापाकातय्गु परम्पराकथं धयातःगु गुलि तक

१- जिनवज्र लिखित—तिब्बत भाषां च्वइतःगु स्वयम्भू परिचय ।

सत्य खः धइगु विषयय् नेपाल सरकारं खानी विभागया प्रमुख अधिकृत इञ्जिनियर श्रीखड्गनरसिंह राणाजुयागु ध्यान आकर्षित जूवन । थ्वय्कःयागु हे निर्देशनय् थ्व परम्परागत खः मखु परीक्षणया लागी राष्ट्र समृद्धिया हेतु भारतया छह्य तःधंह्य विद्वान् खानी विशेषज्ञ श्री ए० जी० कीनग्रानजुयागु सहायता कयाः नेपाल सरकारया सम्बन्धित विभागं थ्व थासय् लुं खानी दु धइगु सिइकल ।

परन्तु, जनश्रुति, पुराण व इतिहासया वर्णन जक मजुसे निश्चय नं लुं खानी दइगु थासय् दय्माःगु गुलि नं लक्षण प्रमाण ठीक ठीक मिलय् जू वःगु खनाः सकसियां लय्ताः वल । थथे जुसेलि नेपाल सरकारयागु सहमति अनुसारं खानी लुइकेगु म्हुइकेगु गुगु प्रकृया खः, उगु कार्यक्रमकथं इस्वी १९४१ तदनुसार ने. सं. १०६१ सालं खानी म्हुया यंकूबलय् छगू टन चट्टानय् ३४२ ग्राम लुं लुइकूगु जुल* ।

थुलि जुसेलि स्वयम्भूप्रति श्रद्धाभक्ति दुपि भक्तजनपिसं अप्पोसिनं विरोध यात कि छुं भचा धनया लोभय् नेपाःया धर्म संस्कृति कला व पुरातत्त्व विषय ज्वलन्त उदाहरण जुयाच्चंगु थ्व महान् ऐतिहासिक पुण्यभूमि ह्यास याय् मज्यू धकाः जनतायागु अनेक आवाज उठय् जुसेलि सरकारं थुगु ज्या दिकूगु धाय्माल ।

१- श्री ५ या सरकार खानी विभागया रिपोर्ट अनुसार ।

स्वयम्भूस ज्ञानमाला भजन खलःया सेवा भक्ति

बुद्ध जन्मभूमि नेपालय् जन्म जूपि जूसां अपशोचया खँ बौद्ध दाजुकिजापि, अशिक्षित् व दरिद्र भावं यानाः सद्धर्म शासनय् मत्वःगु ज्या जुयाच्वन, ऊन ऊन सम्यक दृष्टि तापानावन, उकिइसं अंगालयात कंगाल दशा धयातः थे' एकतन्त्री हुकूमी शासनया क्रूरतां यानाः पन्जलय् च्वंहा ऊंगः थे' स्वतन्त्रता मदय्काः थःगु मातृभाषां तक नं न्वँवाय्गु अधिकारं वञ्चित जुइकाच्वंगु उगु इलय् कीगु समाजय् देसय् तस्सकं बांमलाःगु कुरीति व परिस्थितिया फसं कय्काः इपांथिपां मसिइका च्वनेमाल ।

बुद्धयागु उपदेशकथं थःत हित सुख याना काय्मफुत । रूढीबुढी मिथ्या दृष्टि विश्वासय् लानाच्वन । अन्याय अनीति शोषण व धर्मन्धितां चिइकाच्वन । जाति भेद अनुसारं धर्म व संस्कार विधि फरक दु धइगु उगु वाक्ययात हे धर्मशास्त्रया वचन भाःपियाच्वन । सम्यक् रूपं संघ संगठन याय् मसयाः केवल भव्य नय्गु मात्रया भाःबिलं गुठी गाना न्याय्का वइच्वन । धर्मया नामय् पञ्चशीलय् विपरीतगु ज्या जुयाच्वन । बुद्धशासनयागु ज्यासः गन कि बहो विहारय् भलिक्वथा दय्कल, सद्धर्म ग्रन्थया पुस्तकालय जुइमाःथाय् हासि कसि भ्यगः सुखू कुइँ त्वाकः जःसि आदियां भण्डार जूवन । चतुर्ब्रह्म विहारकथं व्यवहार याय् मसयाः परस्परय् द्वेष ईर्ष्या वैमनस्य भाव यानाच्वन । थःथव्य् एकता सहयोग सहानुभूति मदयावन, थःह्यं नं याय्मफु कपिसं याःगु खनाः नं स्वय्मफुत । सद्धर्म शासन कीर्ति बौद्ध सांस्कृतिक कलात्मक वस्तु बहीद्योया सामग्रीत ह्लित्थं अपहरण जुजुं वन । कीगु अमूल्य दुर्लभ प्राचीन कलात्मक पुरातात्त्विक वस्तु की पुर्खापिनिगु सद्भावनाया प्रतीक राष्ट्रिय सम्पत्ति नेपाः व नेपाःमितय्गु अस्तित्व अज्ञान व दरिद्रया कारणं प्रलोभवश मियाः थःपि च्वत्यंकाच्वन । कीगु राष्ट्रिय वेश भूषाः नय्-त्वने रीतिरिवाज, चाहाड पर्व धर्म संस्कृति मचाय्क तनावन—गधायागु उखान थे' जूवन । नौ व कौ निसें ब्रम्हू तक चूडाकर्म याइगु देसय् हिन्दूयात बौद्ध धर्मय् यंके मज्जुगु कानूनं चित, जातपात मानय् याकल, देसय् क्वह्यं थे' जाःगु लुँज्या सुज्या बियाः ब्रह्मचारी चूडाकर्म

प्राप्त वा प्रवर्जितपित गृहस्थोऽथुन, अले धर्म थुइके मफयावन । बहाः बहीया संगठन माः थे' मावव भि याय् मखन, संघ सुसंगठित मजुयाः बही विहार फिजांमिजां दनावन । उकिइसं बिना विवेक विचारं थथे याय्ज्यू अथे याय्मज्यूया मात्र वन्देजं चिकातःगु देस धाःसा बांमलाःगु राजनैतिक शक्तिया ह्लातय् । स्वयम्भूया देगः बांलाके धयागु संकल्प हे नं मेथाय् लाकाबिइगु मभिगु कुतः जुयाच्चंगु । बौद्धयात मत्वःगु ज्या तोति धकाः जक धाय्वं अनेक शंका याइगु थाय् । सच्चिदानन्द स्वामि थे' जाःपि वयाः अहिंसाया प्रचार जुया च्वंसां शास्त्र सम्मत हिंसायात प्रमाण मालाच्चनिइगु व ई । बौद्धयात नं अनुत्साहित याय्त् तर्क मन्त्रया तिवः दयाच्चने धुंकूगु ई । स्कूल, कलेज चाय्केव थःगु शासनया आयु हे पाः जुइ थे' भाःपिइगु बिचाः । थुख्ये ज्ञान व ध्यान जिगु जन्मसिद्ध ज्या व अधिकार धाइगु पुरोहितवाद । मिसातय्गु स्कूल छगू मदुनिबल्य मिसातय्सं आखः ब्वं धाय्व लाःसा अप्पां कय्कः वइगु ई ।

थुजाःगु इलय् नेपाल सुधारक उद्धारकया रूपय् सुप्रतिष्ठित जुयाच्चंगु नेपाःया सम्पूर्ण धर्म संस्कृति दर्शन इतिहासया प्रतिनिधित्व जुयाः जुगांजुग निसें कोगु न्ह्योने सेवा व भक्ति याकाः इहत्र सुख सम्पत्ति परत्र दिव्य सम्पत्ति प्राप्त याकेत च्वनाच्चंगु जम्बुद्वीपय् प्रतिष्ठित गुलि नं स्तूप चैत्यत मध्यय् सर्वश्रेष्ठगु श्रीस्वयम्भू महाचैत्ययागु प्रभावं स्वयम्भू ज्योतिपाखे' धर्मज्योतिया जति वल, स्वतन्त्रताया नसंचा वल, नेपाःया बौद्ध धर्माधिकारीपि (वज्राचार्य, शाक्यभिक्षु, ब्रह्मचर्यभिक्षु व चैलक) आदि बौद्धजनपित न्ह्यलं चाय्केगु सद्धर्म चेतना बिइगु सौभाग्यया लक्षण खने दइवल । थुगु इलय् सुदूर उत्तरापन्थ हिमालय प्रदेश (खाम देस) निसें क्यान्छ्या लामाजु साष्टाङ्ग दण्डवत प्रणाम यानाः स्वयम्भू महाचैत्यया दर्शन याःवल । उवल्य वसपोल बोधिसत्व अंशधारी क्यान्छ्या लामाजुं महायानिक सद्धर्मभेरी पुयाविल । थुख्ये भारतपाखे' गुरु धर्मादित्यजुं बुद्धधर्मया सन्देश विगुल पुयाः न्यंकाः वइच्चन, लिसेलिसें स्थवीरवादी भन्तेपिसं शील प्रदान यानाः बुद्धधर्मया महत्व प्रकाशय् हयाच्चन । थुगु महान् शुभ मुहूर्तय् उत्तरापन्थपाखे' न्ह्याःवंगु महायानिक सन्देश व दक्षिण दिशापाखे' प्रवाह जुयावःगु श्रावकयानिक उपदेश थ्व निगू शुभ संयोग जुयाः सलँसः दँतक लिकुनाच्चंगु नेपाःमि बौद्धतय्गु थःगु मातृ भाषां नुगःघा, उदवेग, आत्मीय सन्देश, विवेकपूर्ण भावना उत्सुक उमंगया अभिव्यक्ति इलं ब्यूगु हःपाःया धारा प्रवाह एवं शुद्ध हृदयया गुगु उद्गार प्वंकूगु खः व हे थौं कोगु न्ह्योने 'ज्ञानमाला भजन' नामं अतिकं प्रसिद्ध जुयाः सम्यक दृष्टिवथं भावना जागृत यानाः बिब्युं वइच्चन ।

थ्व हे नेपाः दय्के, नेपाःमि जिइके भिके धकाः वःगु मेपुचःयात 'ज्ञानमाला' धाइ । देसय् स्वतन्त्रता हय्त हःपाः, देसया अज्ञानता व निर्धनता हाकुतिइत वःगु सल्लाया पुचःमे 'ज्ञानमाला' खः । व ख्यूँगु इलय् नं धात्थे' थ्वं थुलि तुयूजः विल, उकि थ्वया नां 'ज्ञानमाला' च्वन । अज्ज अवलय् ज्ञानमालाया छपु मे' थौंया गुगु बांलाःगु फिल्म सिबय् नं अप्वः लोकप्रिय जू । उकि नेपाल भाषाया माध्यमं नेपाःदेया नुगःचुइ च्वंपि जनताया नुगलय् दुहांवनेफुगु धर्मया शिक्षा, मानववादी उपदेश, युगवादी सन्देश वाहक 'ज्ञानमाला' या स्थान धात्थे' धात्थेगु सारयुक्तगु धर्मग्रन्थ ति हे ग्यसु दु ।

उकिया हे फल खः अजाःह्य सुं नेपाल भाषा भाषी मल्यन, गुह्यसिनं 'ज्ञानमाला' या नां मस्यु, नेपाःया दक्क नेपाल भाषाया सफू मध्यय् ज्ञानमाला अप्वः चू । ज्ञानमाला छह्य तःमियात नं यः, वं व न्याः, छह्य चीमिह्य मनुखं नं थ्व सफू न्याः । थ्वया ह्यय्गू संस्करण जुल । १२००० किनिद्वलं मयाक सफू वने धुंकल, थुलि प्रेमं, थुलि याउँक, थुलि अप्वः मेगु शायद् हे गुगुं सफू बन जुइ, चुल जुइ ।

ज्ञानमालाया थ्व हे आकर्षण अथे हे छपुचः छपुचः मनूत दःवल । मुनाः सभा दय्केगुया अःखः सभा अथे हे दःवयाः मुनेगु ज्या जुया वंच्वन । थ्व भजन लोकप्रियया कारणं विहार विहारय् त्वाः त्वाल्य जुल । थ्व 'ज्ञानमाला' यात सरकारं स्वयम्फुत । अले ज्ञानमालाया क्रान्तिया ज्वाला व राणा सरकारया तंया ज्वालाय् संघर्ष जुल । धर्मगत क्वपुं बुद्धि व भाषागत कय्कुंगु नुगलं थुकिइ ध्यः लुनाबिल । अले परिणामतः बुद्धया जन्मभूमिस बुद्धया उपदेश प्रचार याःपि बुद्धया जन्मभूमिया नागरिक भिक्षुपित देसं पितिनाछ्वत । ज्ञानमाला भजन खलकं ज्वनाः तारीख्य तयाबिल ।

थ्व घटना फाल्गुण ३ गते २००२ साल सुथय् श्रीस्वयम्भूइ भजन यानाच्वंगु इलय् जूगु खः । थ्वयां सतिखुनु ज्ञानमालाया पासापि पद्मशम्शेरया लायकुलिइ उवल्य अन लायकुलिइ पद्मशम्शेर व केशरशम्शेर निह्यसिया सल्ला यानाः प्रधानमन्त्री पद्मशम्शेरं हुकूम जुल—'ज्ञानमाला सफू बांलाः, जि स्वयधुन, छिकपित दच्छिया दुःख जुल । छिकपिनि थःथःगु धर्म या ।'

थुलि जुसेलि ज्ञानमाला हानं च्यानावं वन । त्वाःत्वाल्य भजन जुयावं वन । छगू खलः धकाः मदय्कूसां छगू धर्मया श्रद्धाया भक्तिया अज्ज दकलय् सकलय् तस्सकं मिलय् जूगु खलः जुयावं वन । देसय् नसंचा ह्य्व धर्म व विद्याया महत्ता थुइकेत कुतः यायां वँवं देसय् नसंचा वल । देस स्वतन्त्र जुल । छह्यसिया हुकूम न्यारव्यार जुइगु, छह्यसिया हुकूम सर्वस्व काइगु व्यवस्थां मुक्त जुल । भाषा व धर्मया स्वतन्त्रया नं प्राप्त जुल । भाषाया कारणं जेलय् वंपि मुक्त जुल । धर्मया कारणं देसं पितिना-छ्वःपि ऊं हे बांलाक दुहांवयाः नं निर्धक्कं ज्या याय्दत । अथे थथे जुयाः ज्ञानमालाया पासापि वि. सं. २००८ साल बैशाख १६ गते खुनु संस्थागत रूपय् 'ज्ञानमाला भजन खलः' स्वनेगु ज्या जूगु जुल ।

ज्ञानमाला भजन खलःया मूल उद्देश्य स्वंगू दु

- (१) स्वयम्भू महाचैत्य स्थानय् नित्य भजन याय्गु ।
- (२) स्वयम्भू स्थान व अन्य बौद्ध विहार सुधार याय्गु ।
- (३) ज्ञानमाला भजनद्वारा मानव कल्याण याय्गु ।

थुगु ज्ञानमाला भजन खलःया संस्था चिरस्थायी निम्ति निम्नलिखित महानुभावपिनिगु पदाधिकार नियुक्त जूगु जुल :—

- | | |
|---------------------------------|-----------------|
| (१) भिक्षु श्रीअमृतानन्द स्थवीर | - मूनायः |
| (२) श्री माणिकमान | - नायः |
| (३) श्री महारत्न | - नोकु |
| (४) श्री रत्नवीरसिंह | - नोकु |
| (५) श्री तीर्थनारायण | - मन्त्री |
| (६) श्री अमृतलाल | - उपमन्त्री |
| (७) श्री पूर्णमान | - प्रचारमन्त्री |
| (८) श्री कांछाबुद्ध | - प्रचारमन्त्री |
| (९) श्री द्वारिकादास | - प्रचारमन्त्री |
| (१०) श्री भक्तिलाल | - कोषाध्यक्ष |

अतिरिक्त सदस्य वर्ग :-

श्री दयावीरसिंह, श्री सिद्धिरत्न, श्री द्वारिकाप्रसाद, श्री पूर्णकाजी, श्री नाति गुरुजु, श्री नन्दरत्न, श्री रत्नबहादुर, श्री केदारदास, श्री रत्नपति, श्री तुयू, श्री आशोरत्न, श्री तेजमुनि, श्री साहिंला, श्री चिनियादास, श्री सानुकाजी, श्री भाईराज, श्री न्हुछेरत्न, श्री भाईकाजी ।

ज्ञानमाला भजन खलःया तत्त्वावधानय् जूगु ज्याखँ निम्नप्रकार

(१) दकलय् ह्लापां स्वयम्भूया शोभा व रक्षा निम्ति स्वयम्भू वन संरक्षणया लागी कीथाय् सरकारी रूपं वन महोत्सव धयागु उस्त चाला मदुनिबलय् गोवर्ण वनं ६०० मा सिमा हयाः २००८, आषाढ १३ गतेखुनु थन वन महोत्सव सम्पन्न याःगु जुल ।

(२) स्वयम्भू गःचाहिलेगु लँपु बांलाकेत छगू कार्य साधक समिति दय्काः ७२ ह्य सदस्यपि पालंपाः ह्नि न्याह्य ज्या नायः जुयाः कुतः यात । अथे नं थ्व ज्याय् थःपिनिगु दुर्बल व कुतः मगानाः थःगु इच्छा थें ज्या पूर्वके मफुगु खः । तर अथे नं थौं गुगु तव्यागु छिगु लँपु दु उकिइ ज्ञानमाला भजन खलःया श्रद्धा व कुतः दु ।

(३) निगूगु उद्देश्यकथं अन्य विहार स्थानया सुधार याय्गु मतिइ तयाः निरीक्षणकथं बाःछि वाःछिइ बुद्धपूजा विहार पूजा याय्गु विचार कोजित । सकसिनं थुगु पुण्य कार्य महान् भाःपाः स्वीकार यात । सकसिनं धर्मशीलाचरणकथं बुद्धपूजा याय्गु अले ज्ञानमाला प्रचार यानाः धर्म देशना याकेगु आदि निर्णय जुल ।

वि. सं. २०१७ ज्येष्ठ २७ गते व श्रावण १० गतेयागु निर्णयकथं अष्टमी अष्टमी पत्तिकं करीव ५०० ति भक्तजनपि सम्मिलित जुयाः कान्तिपुरया सम्पूर्ण विहार व ललितपुर, भक्तपुरयागु प्रसिद्ध बही विहारय् जक नं मजुसे नेपाःगाःया ऐतिहासिक थासय् थ्यंक बुद्धपूजा जुयावं वन ।

थुगु शुभकार्य सकलया श्रद्धां जाःगु श्रीस्वयम्भू महाचैत्यनिसें प्रारम्भ याःगु जुल ।

(४) थुगुकथं बाःछि बाःछिइ उपत्यकाय् दुनेच्वंगु वाहाः बहिलिइ बुद्धपूजा याना वँव धर्म श्रवण यायां आपालं बुद्ध व बुद्धधर्मप्रति श्रद्धा दत । भगवान् बुद्धया जीवन व वसपोलया श्रीचरणकमलं पवित्र जुयाच्वंगु बौद्धतीर्थ स्थलया महत्व व गौरव कं दकलय् थुयाः श्रद्धा निश्चय उत्पन्न जुल । छख्ये सकलया नुगलय् स्वां ह्वःगु श्रद्धा मेख्ये धर्मज्ञान बौद्ध तीर्थदर्शन व पूजन याःवनेगु इच्छा सकलया नुगलय् बुयावल । थुगु श्रद्धा व भक्तिया संवेगकथं २०२१ कार्तिक ३ गतेखुनु मुंज्याया नियम अनुसारं नेपाःया बौद्धपिनिगु सुख समृद्धि व एकताया उद्देश्य ज्वनाः ज्ञानमाला भजन खलः स्वयम्भूया तत्त्वावधानय् ११५ गू विहार विहारय् पाक्षिक बुद्धपूजा परिसमाप्ति जुसेलि हानं व हे ऋतुवलय् तथागतया श्रीचरणं पवित्र जुयाच्वंगु बुद्धया जन्मभूमि नेपाः व बुद्धया कर्मभूमि भारतया बौद्ध तीर्थस्थलत दर्शनार्थ अनुगमन जूगु जुल ।

कछलागाः ३, १०८५ (७ मार्ग २०२१) निसें रक्सौल स्वयाः वनेगु ज्या जुल ।

थुगु बौद्धतीर्थ यात्री खलःत—महास्थवीर, भिक्षु, श्रामणेरे व उपासक, उपासिका आदि ५३० ह्य जनसंख्या दुगु जुयाच्वन । थ्व बौद्ध तीर्थ यात्रा अनुगमन सुव्यवस्थितया लागी भिक्षु सुदर्शनजुया नेतृत्वय् माःथाय् माःगुकथं ज्या जुयावंगु जुल ।

थ्व स्वयम्भू महाचैत्यसं ह्लि ह्लि भजन यानावयाच्वंगु ज्ञानमाला भजन खलःया तत्त्वावधानय् थह्लिइ न्यादँ न्ह्यो थ्व हे पवित्र स्वयम्भू निसे न्यासलं मयाक श्रद्धालुपिनि श्रद्धां प्रारम्भ यानागु अष्टमी अष्टमीया पाक्षिक बुद्धपूजा येँया फुक्क बाहाः बहिलिइ यल व ख्वपया गुगुं सूबाहालय् नेपाःया बौद्ध ऐतिहासिक स्थानय् अज्ज कछलागाः ५, ने. सं. १०८५ स लुम्बिनी, बुद्धगया, सारनाथ व कुशीनगरय् थ्यंक यानाः फुक्क सच्छि व स्वीनिकः सच्छि व स्वीनिथाय् सम्पन्न यानागु उपलक्ष्य सम्बत् १०८५ सालं, चिल्लागाः अष्टमीखुनु सुसम्पन्न कार्य स्वयम्भू महाचैत्यया अग्रय् हे जुल ।

(५) ज्ञानमाला भजन खलःपाखे जूगु कार्य गतिविधि अंकितगु सिजःपौ ताना तइतःगु सतः थःगु हे अर्थात् ज्ञानमाला भजनया हे आह्वानय् सकलया श्रद्धां वि. सं. १९९८-९९ सालय् निर्माण जूगु खः । हानं अन गन कि थःपिसं ह्लि ह्लि स्वयम्भू महाचैत्यया सन्मुखय् च्वनाः श्रद्धा भक्तिपूर्वक भजन नं याना वइच्वन, यानावं च्वनी तिनि ।

(६) थथे ज्ञानमाला भजन खलः स्वयम्भूपाखे निर्विघ्नपूर्वक शान्त प्रमुदित भावं गुगु येँ, यल व ख्वपया ऐतिहासिक विहार व मेमेगु प्यंगू बौद्धतीर्थ धाम अनुत्तर पुण्य क्षेत्र आदियागु दर्शन व पूजन यानाः कार्य सुसम्पन्न जुसेलि थ्व हे पुण्यया प्रभावं पल्लवित पुष्पित एवं विकसित जुयाः न्यादँ लिपा हानं प्रमुख प्यंगू बौद्ध तीर्थ जक मखु बुद्धया कर्मभूमि भारतयागु विभिन्न बौद्ध तीर्थ (कुशीनगर, लुम्बिनी, कपिलवस्तु, जेतवन विहार, लखनउ, आगरा, ताजमहल, मथुरा, दिल्ली, साँची, अजन्ता, एलोरा, बम्बई, इलिफायन्ट केम, सारनाथ, बनारस एवं बुद्धगया, राजगृह, नालन्दा, गया, कलकत्ता) आदि प्रसिद्ध नगर समेत चाःहुलेगु ज्या वि. सं. २०२६, मार्ग ६ गते निसे शुरु यानाः पौष २० गते

तकया दुने निर्विघ्न विशाल बौद्ध तीर्थयात्रा भ्रमण कार्य परिसमाप्ति जूगु जुल । थुगु बौद्ध तीर्थ गमनय् ह्लापायागु पटकय् थे ५३४ ह्य जक मखु करीव ८०० च्यासः ह्यति यात्रोत छगूपाखं मुनाः भिक्षु सुदर्शनजुया नेतृत्वय् सुसम्पन्न जूगु जुल ।

थ्व थौतकयागु बौद्ध इतिहासय् थःगु हे देन खः । विशेषता खः । अभूतपूर्व घटना खः । थपाय्धंगु पुण्य कार्य सफल जूगु वसपोल स्वयम्भू महाचैत्ययागु सेवा भक्तियागु प्रसादं जूगु धाय्फु^१ ।

(७) थ्व हे ज्ञानमाला भजन खलःया निर्देशनय् ह्लापायागु पटकय् बाहाः बही बाःछि बाःछिइ अष्टमी पत्तिकं बुद्धपूजा विहारपूजा जुयावन । निकोगु पतिइ बौद्ध तीर्थयात्रा नं सम्पन्न जुयावन, अथे हे आः हाकनं लच्छि लच्छिइ चैत्यपूजा बुद्धपूजा थ्व हे २०२६ माघपूर्णिमानिसें प्रारम्भ याःगु जुयाच्चन । थ्व चैत्यपूजा बुद्धपूजा ग्वसाः ग्वःगुया मुख्य उद्देश्य—‘लुम्बिनी विकास कार्यक्रमय् सक्रिय सहयोग प्रदान याय् निर्मित व लिस्सें बुद्धधर्म प्रचार व प्रसार याय्त जूगु खः^२ ।’

(८) स्वयम्भू तैनय् न्ह्योनेपाखे तँतँस्वाःगुलिं यांनाः भक्तजनपि थहां क्वहां जुइत सेँसेँ व फुंफुं मिगु लंकेत सुविधा बिइया लागी आरामदायक मेच थाय्थासय् स्थायी रूपं तयाब्यूगु दु ।

१- कीगु बौद्ध तीर्थयात्रा वृत्तान्त, अमृतमान शाक्य ।

२- ‘लुम्बिनी’ पत्रिका, पृ. ५

विविध चैत्य व मूर्तितय्गु जीर्णोद्धार अभियान

युगयुगंनिसे नेपाल मण्डलयागु सम्पूर्ण अज्ञान अन्धकार क्लेश विनाश यानाः सम्यक सम्बोधि ज्ञानया ज्योतिर्मय अखण्ड प्रकाश याय्त कीगु न्ह्योने प्रकाश जुयाच्चंगु गोपुच्छ गिरि साह्योगु पर्वतस विराजमान जुयाच्चंगु श्रीस्वयम्भू महाचैत्य जुल । थ्वसपोल चैत्यकुल नायक श्रीस्वयम्भू महाचैत्ययागु दर्शन व पूजनया कारण इलय्-व्यलय् वयाच्चंगु बुद्ध बोधिसत्व, सिद्ध विद्याधर योगी आचार्य एवं भिक्षु ज्ञानी गुणी विद्वान् आदि उपासक उपासिकापिसं थःथःगु श्रद्धाभक्ति अनुसारं अनेक दिव्य भावनाया महान् प्रतीक स्वरूप विभिन्न प्रकारया चैत्य व मूर्तित प्रस्थापना यानाथकल ।

उक्त चैत्य व मूर्ति प्रस्थापन वर्णनं जायाच्चंगु ऐतिहासिक घटनाक्रम अङ्कित जुयाच्चंगु शिलालेख आदि प्राचीन अभिलेखत उख्ये थुख्ये विद्यमान जुयाच्चन । थुजाःथुजाःगु पुरातात्विक, ऐतिहासिक एवं कलात्मक धार्मिक सांस्कृतिक विधिपाखे जायाच्चंगु सजीव संग्रहालय तुल्य जुयाच्चंगु नेपाःया छगूमात्र विशेषतां परिपूर्णगु थुगु स्वयम्भू पर्वस्थान समस्त नेपाली बौद्ध जातितय्गु कलाशालाया रूप्य प्रसिद्ध जुयाच्चंगु दर्शनीय संरक्षणीय गौरवमय पवित्र स्थल धकाः अन्तर्राष्ट्रिया विद्वान् एवं पर्यटकपिसं प्रशंसा याना तइतःगु थःगु हे परम्परागत ऐतिहासिक पृष्ठभूमि दइच्चंगु अन्तर्राष्ट्रिय बौद्ध जगत् निम्ति अनुपम स्थल धकाः प्रसिद्ध जुयाच्चंगु स्थान जुल ।

धाय् कि थन श्रावक, महायान एवं तन्त्रवज्रयान सहजयान कालचक्रयानपाखे पिज्वःपिं गुरुदेव, डाकडाकिनी, धर्मपाल, लोकपाल, क्षेत्रपाल तथा शासनधर सिद्ध, विद्याधर, आचार्य, भिक्षु व वाचिक शासन कीर्ति धर्मश्री प्रज्ञापारमिता, आर्यतारा, वसुन्धरा, जोगिनी एवं चैतसिक शासन-गुरुबुद्ध, वज्रधर, वज्रसत्व, समन्तभद्र व ऐतिहासिक मानव बुद्ध आदिपिनिगु नं यक्व यक्व मूर्तित दइच्चंगु स्थान, नापं धातु चैत्य, परिभोग चैत्य, धर्म चैत्य व उद्देश्य चैत्य अन्तर्गत उष्णीष धर्मपारंगत चैत्य, दुर्गति परिशोधन मण्डल चैत्य, स्वयम्भू चैत्य, धर्मधातु वागीवश्वर चैत्य, वज्रधातु चैत्य, रत्न चैत्य, लयन चैत्य, विम्ब चैत्य, बहुद्धारमंगल चैत्य, कूटागार चैत्य, शिखरकूट चैत्य, चतुरव्यूह चैत्य, रम्यकूटागार चैत्य, पद्म चैत्य, ज्वालावली चैत्य, अष्टकोणाकृति चैत्य, जलहयोंपरि पञ्चजिनालय चैत्य,

एवं भुवन (सुमेरु) चैत्य आदि अनेक किसिमया चैत्यत प्राकृतिक तथा मानवीय प्रकोपद्वारा गुलिख्य मूर्ति व चीवाहाःयागु असामयिकवश क्षतिग्रष्ट जुल, अंग भंग जुल ।

स्वयम्भू महाचैत्ययागु भव्य रूप शोभायमानया न्ह्योने स्वयम्भू पर्वस्थान, मञ्जुश्री पर्वस्थान, गोपुच्छाग्र चैत्यस्थान एवं शान्तिपुर स्थान आदि थासय् उख्ये थुख्ये च्वंगु चैत्य व मूर्तितय्गु दुर्दशाय लानाच्च्वंगु खनाः थुकियात इलय् हे समुचित कदर यानाः जीर्णोद्धार एवं संरक्षण मयात धाःसा उपरोक्त पुरातात्त्विक, ऐतिहासिक तथा कलात्मक बौद्ध संस्कृति विनष्ट मजुइमा अपहरण मजुइमा ध्वया अस्तित्व सुरक्षित जुयाच्च्वनेमा धइगु महान् शुभ संकल्प यासे स्वयम्भू सेवक येँया वज्रशील महाविहारय् च्वंह्य वज्राचार्य श्रीआनन्दमुनिजुं जीर्णोद्धार अभियान चलय् याय्गु सम्यक प्रतिज्ञा याना बिज्याःगु जुल ।

थुगु महान् शुभ संकल्प सम्यक प्रतिज्ञायात साकार रूप ह्य्या लागी अस्थायी रूपय् वि. सं. २००३ सालं कमिटी छगू गठन याःगु जुल । थुगु अपरिमित पुण्यकार्यय् निम्नलिखित श्रद्धालु महानुभाव दायकपिनिगु आर्थिक अनुदान श्रमदानपाखे थुगु जीर्णोद्धार कार्य वि. सं. २००६ सालं विधिवत् सुसम्पन्न याःगु जुल । धयातगु दु, थुगु पुण्य कार्य प्यदयंकं ज्या याना जम्मा १२६ चैत्यतय्गु जीर्णोद्धार जुल, लिस्से विभिन्न मूर्तितय्गु नं ।

थुगु पुण्य कार्यय् ब्वतिकया बिज्याःपिं व दिइपिं श्रद्धालु दाता व कार्यकारिणीपिनिगु नामावली थथे खः—

- (१) सर्वश्री साहु बुद्धरत्न, बोधिरत्न तुलाधर, असं धालासिको
- (२) साहु बेखारत्न तुलाधर, यतखावाहाः
- (३) साहु भाजुरत्न कंसकार, केलत्वाः
- (४) साहु हर्षवरसिंह कंसकार, केलत्वाः थछेँ
- (५) साहु कृष्णमान, कोछेँ
- (६) शाक्यभिक्षु बेखारत्न, इतुंवाहाः

जीर्णोद्धार कार्यय् विधिवत् क्रिया कर्म याःपिं गुरुजुपिनिगु नामावली

- (१) सर्वश्री शुभ प्रतिज्ञा याःह्य व मूलाचार्य जूह्य वज्राचार्य आनन्दमुनिजु, इकुवाहाः
- (२) उपाध्या जूह्य भाजुगुरुजु, तःछेँवाहाः
- (३) कर्माचार्य जूह्य धनजीवरत्न, धोकावाहाः
- (४) जजमान जूह्य चैतन्यमुनि, इकुवाहाः
- (५) जजमान जूह्य अष्टलोकेन्द्रमुनि, इकुवाहाः
- (६) जजमान जूह्य रूपस्कन्धमुनि, इकुवाहाः
- (७) पूजा सामग्री ज्वरय् याःपिं गुरुमांजु पूर्णमाथा, इकुवाहाः
- (८) पुरश्चरण च्वंगु स्थान बुद्धाचार्य सानुकाजि, स्वयम्भू

स्वेनाम्तिङ्जिन् लामाजुया स्वयम्भूस काङ्ग्युर पाठ व प्रदक्षिणा

थ्वसपोल लामाजु काश्मीर याह्य छह्य नागरिक खः । थ्वसपोलयात सद्गुरुपिनिगु सत्संगतं यानाः खाम देसया प्रसिद्ध धुपैवाङ्छु शक्यश्री लामाजुया शिष्यत्व ग्रहण याय्गु सौभाग्य प्राप्त जुल । क्रमशः वसपोलयापाखे आपालं शिक्षा-दीक्षा लुङ् वाङ् (व्याकरण अभिषेक) प्राप्त यात । गुलिछि समय लिपा श्रीस्वयम्भू महाचैत्य दर्शन निम्ति नेपाः थ्यंकःवल । स्वयम्भू महाचैत्य आदि प्रसिद्ध ऐतिहासिक स्थल तीर्थस्थल दर्शन याय् धुंकाः एकान्तय् च्वनाः योग साधन धर्मचर्या याय् निम्ति तमनाऋषिश्वरय् च्वनाः गुलिखय् समय बितय् यात ।

उथाय्तक वसपोलया शिष्य मस्त सुं मदुगुलि पूजा चह्य याय्गु सरसामग्री व थःत नय्गु सामोतक नं उस्त चूमलाःगुलि येन केन प्रकारं दुःख सुख सहः यानाः सद्धर्म छगुलिइ भरोसा व्यानाः जीवन हनाच्चन, गुकि यानाः धर्म पासा व शिष्य मस्त दइवल, वसपोलयागु ज्ञान गुण सिद्धि ह्लियाह्लिथं प्रचार जुजुं वल ।

थथे जुसेलि शिष्यपिनिगु लागी अनुकम्पा तयाः तमनाऋषिश्वरय् तापाःगु व उकिइसं जुइ च्वने थाकुगुलि भुइजःसि नारायण थासं च्वय् वाक्द्वार वनेगु लँया विचय् च्वंगु नाघि धइगु पर्वत शिखरय् छगू थाय् नालाकयाः पर्णशाला छगू दय्काः च्वन । तमनाऋषिश्वर स्वयाः थ्व थाय् जुइ च्वनेत अनुकूल मिलय् जूगु यक्वं सुविधा दुगुलि यानाः शिष्यतय्गु आवागमन बढय् जुजुं वल । लिसेलिसें धमाधम सद्धर्म चर्या शिक्षा-दीक्षा प्रचार याना हयाच्चन ।

स्वयम्भू महाचैत्य दर्शन निम्ति सँदेसपाखे विज्याइपि गुलि नं ततःधंपि गुलि निग्मापा शासनयापि गुलि काग्युया शासनयापि गुलि साक्यापा शासनयापि व गुलि हानं घेलुग्पा शासनयापि तुल्कु (अवतारी) घ्येसे (विद्वान्) लोप्वेन् (आचार्य) लामा (गुरु) गेलोङ् (भिक्षु) धाःपि विज्याःसां थःके सद्धर्म ज्ञान गुणया भण्डार यक्व यक्व दुपि जूसां नेपाःमि जनतातय्सं थुइके फइगु भाय् मसःगुलि

सद्धर्म प्रचार यानावने मफु, निह्य प्यह्य सँदेशया भाय् सःपित बाहेक । स्वयम्भू महाचैत्यप्रति अपार श्रद्धा भक्ति तयाः खामनिसे दण्डवत यायां स्वयम्भू महाचैत्य दर्शन याःविज्याःह्य बोधिसत्वया अंश दुह्य कयान्छ्या लामाजुं धर्म व्याख्यान यानाविज्याःबल्य् नं धमां साहु बेखारत्तन साहु पण्डित बुद्धिराज शाक्यपि च्वनाः दोभाषी जुयाः तिनि सभाषर्पित खँ थुइके मालावन । न्ह्याह्यसित नं थथे निह्य निह्य स्वह्य स्वह्य दोभाषीयागु सहयोगं धर्म व्याख्यान याय्गु न्ह्यावले साध्य जुइगु खँ मखु ।

तर वसपोल स्वेनामतिङ्गजिन् लामाजु काठमाण्डू उपत्यकाय् च्वँच्वं नेपाली, तामाङ्ग व नेवाःभाय् समेतं सय्कल, गुर्कि यानाः धर्मोपदेश विइत शिष्यपित शिक्षा-दीक्षाया खँ थुइकेत स्यने-कने याय्त यक्व यक्व अःपुल । थथे भाषायागु माध्यमं यानाः वसपोलं येँ यल व ख्वपया नेवाःत एवं गांगांया तामाङ्ग शेर्पा आदिपित बोध यायां शिष्यपि अप्पो संख्याय् दत्त । थथे अप्पो संख्याय् शिष्य मस्त दसेलि गुरुयागु निवासस्थान पर्णशालायात वृहत् रूप विब्युं गुम्बायागु रूप खडा जूगु जुल । लिपा जूलिसे लामाजुं छगू निगू गुम्बा दय्कल ।

थुगु नाधि पर्वतय् स्वेनामतिङ्गजिन् लामाजु च्वँच्वं आपाः आपालं तिब्बती महायान धर्म तन्त्र वज्रयान प्रचार याःगु खनेदु । धात्थे धाय् धाःसा थ्व नाधि पर्वत नेपाःया निम्ति थैया नीगू शदोइ वज्र पर्वत श्री पर्वत थे वज्रयान सम्बन्धी चहलपहल जुयावने धुंकूगु थाय् खः धाःसां छुं अप्पो जुइमखु । फलस्वरूप नेपालय् दकल्य् सकल्य् तःधंगु श्री ५ वीरेन्द्र सरकारं समुद्घाटन याकाः श्रीमान् ग्याल्वा कार्मापा लामाजुं प्रतिष्ठा यागु उग्येन्तुल्कु लामाजुं आपालं दुःख कष्ट सियाः देसदेसान्तर चाःहुलाः चन्दा संकलन यानाः दय्कूगु खास्ति चीवाहाःया न्ह्योने च्वंगु कानिङ्गशेधुवलिङ्ग गुम्बा नं थ्व हे नाधि गुम्बायागु हे प्रसादसिद्धि धाःसां पाइमखु ।

कारण स्वेनामतिङ्गजिन् लामाजु थः वृद्धावस्था जुसेलि वसपोलया देहान्त जुल । थ्वय्कः लामाजुया देहान्त जुसेलि नाधि गुम्बायागु धार्मिक आचरणय् व गुम्बायागु सांघिक नियमय् अनेक कलंक वल । थथे जूगु सिङ्काः वसपोलया मुख्य मुख्यपि शिष्यपि मुनाः थुगु नाधि गुम्बायागु संरक्षण व समुन्नति सुनां याइ धइगु विषयय् कयाः सभा जुल । उगु सभां अन्तय् निर्णय यात—काग्युपा शासनया सूर्य समानं उदय जुयाच्चवंह्य श्रीमान् ग्याल्वा कार्मापा लामाजुयात थुगु गुम्बा लःल्लानाबिल धाःसा भविष्यय् उज्ज्वल जुइ धइगु आशा यासे कार्मापागुरुयात लःल्लानाबिल । अले वसपोल कार्मापागुरुं थुगु नाधि गुम्बायागु विषयय् पूर्ण रूपं व्यवस्था याय्फुह्य शिक्षा-दीक्षा व्याकरण अभिषेक विइफुह्य लिस्सें शिल्प विद्यायागु अनुभव दुह्य सुयोग्य विद्वान् वसपोल उग्येन्तुल्कु लामाजुयात सम्पूर्ण अधिकार बियाः नियुक्ति यानाहःगु जुल ।

वसपोल गुरु स्वेनामतिङ्गजिन्जुं सिङ्ग दँवदँ न्ह्यो स्वयम्भू महाचैत्यया अग्रय् च्वनाः सम्पूर्ण बुद्धधर्मया प्राण स्वरूप जुयाच्चवंगु तथागतपिनिगु उपदेशं जायाच्चवंगु भविष्यया श्रमण भिक्षु महात्मा बोधिसत्व एवं सिद्ध विद्याधरपिनि नं ज्ञानया निधि जुयाच्चवंगु काङ्ग्युर नामक सद्धर्मपुथि १०१ थू विस्तारपूर्वक श्रद्धा निश्चय तयाः याकःचां पाठ यानाः क्वचाय्का विज्यात । थ्व पाठ यानाविज्याःगु

दिन खः ने. सं. १०६६ ज्येष्ठपुत्नीनिसें शुभारम्भ यानाः फागुपुत्नीया दिनय् परिसमाप्त यानाविज्याःगु जुल ।

थ्व काङ्ग्युर सफू पाठ याः जोछि गनं उख्येथुख्ये विमज्यासे छगू हे आश्रमय् स्थिरं च्वनाच्चंगु दु । तर पाठ याय् न्ह्यवः सुप्रभात इलय् दनाः छकः ह्लिच्छियागु पाठ सिध्याकाः वहनिइ छकः ह्लि निकः स्वयम्भू महाचैत्य नं प्रदक्षिणा यानाविज्याइगु जुयाच्चन, गुबले गुबले ह्लिनय् फामु लंके थे यानाः नं ।

वसपोल गुरु स्वेनामत्तिङ्गजिन्जुं पाठ यानाः च्वनिइथाय् जि नं बरावर वनेगु चलन दु । उबलय् वसपोलं पाठया दिपु दिपुलिइ आराम कयाविज्याइवल्य् उकियागु महत्वपूर्ण खंत कना विज्याइ । जि नं उगु सद्धर्म ग्रन्थमा विषय कयाः प्रश्न यानाच्चने, अले वसपोलं निसंदिग्धपूर्वक करुणा तयाः प्रश्न समाधान यानाविया च्वनी । उबलय् वसपोलं आज्ञा जूगु अनुसारं उगु सद्धर्म ग्रन्थ काङ्ग्युर सफूया धलः थन प्रसंगवश उद्धृत यानागु जुल ।

थुगु तिब्बतया धर्मप्राण सद्धर्म ग्रन्थ सूत्र, विनय, अभिधर्म व तन्त्र समेत यानाः जम्मा सच्छि व छथू १०१ दु । उकियात काङ्ग्युर ग्रन्थ धकाः मानय् यानाः वइच्चन । उगु मूल बौद्धवाङ्मय संस्कृत ग्रन्थ अनुवाद याय्त भारत, नेपाल व चीन विज्याःपि विद्वान्पि व सँदेसया लोचाव (दोभाषी) जूपि पण्डितपिनिगु नां थन प्रसङ्गवश न्ह्यथना च्वना^१ :—

प्रथम विनयपिटक अनुवाद यानाविज्याःपि

- | | |
|-------------------------------|---------------------------------|
| (१) सर्वज्ञदेव | (२) विद्याकर पद्म |
| (३) धर्मकर | (४) धर्मश्री भद्र |
| (५) वन्देश्वरी- तिब्बती लोचाव | (६) वन्देनाग- तिब्बती लोचाव, इ० |

सूत्रपिटक अनुवाद यानाविज्याःपि

- | | | |
|----------------|-------------------|----------------------|
| १. जिनमित्र | २. सुरेन्द्रबोधि | ३. शाक्यसेन |
| ४. ज्ञानसिद्धि | ५. सुभाषित | ६. दीपङ्कर ज्ञानश्री |
| ७. प्रज्ञावर्म | ८. शीलेन्द्र बोधि | ९. विद्याकर |
| १०. विमलमित्र | ११. आनन्दश्री | १२. दानशील |
| १३. मुनिधर्म | १४. कमलशील | १५. विशुद्धशील |
| १६. सर्वज्ञदेव | १७. ज्ञानगर्भ | १८. कमलगुप्त |

१- धर्मोदय पत्रिका, वर्ष १, पूर्णाङ्क १००, पृ. ५०६

१६. शाक्यप्रभ	२०. विजयशील	२१. बुद्धभद्र
२२. धर्मपाल	२३. मञ्जुश्री गर्भ	२४. रत्नरक्षित्
२५. धर्मश्री भद्रप्रभ	२६. विद्याकरप्रभ	२७. धर्मकर
२८. शाक्यसिद्ध	२६. धर्मश्री भद्र	३०. ज्ञानश्री गुप्त
३१. शाक्यसिंह	३२. आनन्दश्री	३३. अजितश्री भद्र
३४. वन्देज्ञान सँदेसया दोभाषी	३५. वन्दे धर्मशील सँदेसया दोभाषी	३६. वन्दे रत्नभद्र सँदेसया दोभाषी
३७. जिनाङ्कर "	३८. वन्देभीकू "	३९. वन्दे रत्नसेन "
४०. वन्दे गगन "	४१. वैरोचन रक्षित् "	४२. वन्दे श्रीस्वर "
४३. सुसेनरत्नश्री "	४४. देवेन्द्र रक्षित् "	४५. कुमार रक्षित् "
४६. देवचन्द्र "	४७. वन्दे तोड आचार्य—	४८. हेहास्याङ्गशामो "
४९. निर्विकल्पे	चीनया दोभाषी	५०. शीलधर्म
५१. वन्दे शाक्यबुद्धि	५२. शुभमति	५३. भद्रपाल
५४. थुमिसम्भोत	५५. ज्ञानगर्भ	५६. दानगर्भ
५७. ह्वाफाबुस्युङ चीन देसया	५८. वन्दे शुभमति सागरसेन, इ०	

अभिधर्मपिटक व तन्त्र अनुवाद यानाबिज्याःपिं

१. श्रद्धाकर वर्म	२. कमलगुप्त	३. सोमनाथ
४. भद्रबोधि	५. समन्तश्री	६. स्मृतिज्ञानकीर्ति
७. गयाधर	८. महायोगेश्वर	९. प्रज्ञागुप्त
१०. पद्मकर	११. दीपङ्कर श्रीज्ञान	१२. ज्ञानश्री
१३. आनन्द	१४. वरइन्द्र	१५. वनरत्न
१६. अद्वयवज्र	१७. ज्ञानकर	१८. जयसेन
१९. गयाधर कायष्ठ	२०. अभयकर गुप्त	२१. गयाधर
२२. जिनवर	२३. अतुलेशवज्र	२४. गृष्म महापण्डित
२५. रत्नश्री	२६. सुजनश्री ज्ञान	२७. धर्मश्री भद्र
२८. पुण्यमति— नेपाःयाह्य	२९. देवपुण्यमति— भारतयाह्य	३०. अभयश्रीमति
३१. अवयुगतिल	३२. रत्नकीर्ति	३३. भारोमहापण्डित— वरसिद्धि
३४. अमोघशक्तिपद	३५. राहुलश्री भद्र—पाकिस्तानया	प्राप्तह्य, नेपाःयाह्य
३६. वज्रश्री खलरूप	३७. बलचन्द्र	३८. बलचन्द्रगुरु
३९. कर्मवज्र	४०. पद्मकर धर्म	४१. ज्ञानवज्र—पाकिस्तानया
४२. शान्तिगर्भ	४३. मन्त्रकलश	४४. सुगतश्री

४५. भट्टारकदेवीन्द्र
 ४८. चेलु
 ५१. ज्ञानगर्भ
 ५४. दानशील
 ५७. विमलमित्र
 ६०. ज्ञानसिद्धि
 ६३. धर्मसेन
 ६६. विद्याकरसिंह
 ६९. वज्रपाणि
 ७२. मञ्जुश्री वर्म
 ७५. वागीश्वर
 ७८. धर्मगुप्त
 ८१. मञ्जुघोष
 ८४. दान रक्षित्
 ८७. दोभाषी भिक्षु सँदेसया
 भद्र धीरबुद्धि
 ९२. शाक्यज्ञान
 ९५. धर्मगुण
 ९८. मार्वा
 १०१. सायेन
 १०४. धर्मप्रभ
 १०७. भिक्षु सिद्धाकर्णश्री
 ११०. भिक्षु सूर्यध्वज
 ११३. भिक्षु आनन्द
 ११६. भिक्षु जयरक्षित्
 ११९. भिक्षु धर्मबुद्धि
 १२२. भिक्षु शुभमति
 १२५. भिक्षु शीलरश्मि
 १२८. भिक्षु श्रीभूति
 १३१. भिक्षु वैरोचन

४६. मणिश्री ज्ञान
 ४९. उपसम रक्षित्
 ५२. जिनमित्र
 ५५. विद्याकरप्रभ
 ५८. कुमारकलश
 ६१. शाक्यप्रभ
 ६४. रिहत् भद्र
 ६७. प्रज्ञावर्म
 ७०. पुण्यसम्भव
 ७३. प्रज्ञाकर
 ७६. सुगतश्री
 ७९. दानगुप्त-पाकिस्तानया
 ८२. सिद्धप्रभ
 ८५. श्रीकीर्ति-नेपाःया
 ८८. प्रज्ञाकीर्ति
 ९०. चन्द्रप्रभ
 ९३. शाक्यवीर्य
 ९६. खुन्वेवेधुव्
 ९९. लोचाव धर्मेश्वर
 १०२. ध्वजकीर्ति
 १०५. श्रामणेर गुरुकीर्ति
 १०८. भिक्षु महायोगेश्वर
 १११. भिक्षु थोफु
 ११४. भिक्षु मैत्रिश्री
 ११७. भिक्षु आनन्दध्वज
 १२०. भिक्षु नागेन्द्र
 १२३. भिक्षु शाक्यमति
 १२६. भिक्षु प्रज्ञामति
 १२९. भिक्षु देवज्ञानध्वज
 १३२. भिक्षु ज्ञानकुमार

४७. शीलेन्द्रबोधि
 ५०. कुमारवज्र
 ५३. कृष्ण
 ५६. सुरेन्द्रबोधि
 ५९. विशुद्धसिंह
 ६२. अमोघवज्र
 ६५. महाज्ञान-पाकिस्तानया
 ६८. धर्मश्री मित्र
 ७१. सोमश्री भद्र
 ७४. भट्टारिका वज्रसत्त्व-मिसाह्य
 ७७. बुद्धाकरवर्म
 ८०. हर्षवज्र
 ८३. धर्मबोधि
 ८६. पद्मसम्भव
 ८९. धर्मकीर्ति
 ९१. वन्दे प्रधान
 ९४. कुमारश्री
 ९७. चन्द्रकीर्ति
 १००. शीलजिन
 १०३. शान्तिप्रभ
 १०६. भिक्षु हालोवज्रकीर्ति
 १०९. भिक्षु अमोघवज्र
 ११२. भिक्षु जगन्मित्र
 ११५. भिक्षु कुमारशील
 ११८. भिक्षु आर्यप्रज्ञा
 १२१. भिक्षु वरिलोचाव
 १२४. भिक्षु घोमत्वेन्पा
 १२७. भिक्षु प्रज्ञासम्भव
 १३०. भिक्षु बोधिसत्त्व
 १३३. जुजु थिसुङ्गदेहुचेन्, इ०

थुलि आदि विभिन्न विद्वान् व लोचाव (दोभाषी) पि च्वनाः यक्वं श्रद्धा भक्तिपूर्वक अमृत्य
 समय, सम्पत्ति व बुद्धि खर्च याताः परस्परय् एकता, सहयोग सहानुभूति तयाः धैर्यपूर्वक अनुवाद
 यातातःगु काङ्ग्युर सफूया धलः निम्नप्रकारः—

- १, [का] विनयवस्तु
- २, [खा] "
- ३, [घा] "
- ४, [ङा] "
- ५, [च्या] विनय प्रातिमोक्ष
- ६, [छ्या] विनय विभङ्ग
- ७, [ऊया] "
- ८, [न्ह्या] "
- ९, [ता] विनय भिक्षुणी प्रातिमोक्ष
- १०, [था] विनय क्षुद्रक वस्तु
- ११, [धा] विनय मूल
- १२, [ह्ला] विनय उत्तरग्रन्थ
- १३, [पा] "
- १४, [का] शतसाहस्रिका प्रज्ञापारमिता
- १५, [खा] "
- १६, [घा] "
- १७, [ङा] "
- १८, [च्या] "
- १९, [छ्या] "
- २०, [ऊया] "
- २१, [न्ह्या] "
- २२, [ता] "
- २३, [था] "
- २४, [धा] "
- २५, [ह्ला] "
- २६, [का] पञ्चविंशति साहस्रिका प्रज्ञापारमिता
- २७, [खा] "
- २८, [घा] "
- २९, [का] अष्टादश साहस्रिका प्रज्ञापारमिता
- ३०, [खा] "
- ३१, [घा] "
- ३२, [का] दश साहस्रिका प्रज्ञापारमिता

- ३३, [का] अष्ट साहस्रिका प्रज्ञापारमिता
- ३४, [का] सुविक्रान्त विक्रमी परिपृच्छा
- ३५, [का] रत्नकूटे शत साहस्रिकाग्रन्थे समवर
निर्देश
- ३६, [खा] रत्नकूटे अक्षोभ्यतथागत सुव्यूह
- ३७, [घा] रत्नकूटे बोधिपरिपृच्छ पिटक
- ३८, [ङा] रत्नकूटे मञ्जुश्रीबुद्धक्षेत्र गुणव्यूह
- ३९, [च्या] रत्नकूटे उग्रपरिपृच्छा
- ४०, [छ्या] रत्नकूटे सुस्थितमति देवपृच्छा
- ४१, [का] अवतंशक महावैपुल्यसूत्र
- ४२, [खा] "
- ४३, [घा] "
- ४४, [ङा] "
- ४५, [च्या] "
- ४६, [छ्या] "
- ४७, [का] भद्रकल्पिकावदान
- ४८, [खा] ललितविस्तर
- ४९, [घा] भगवन्ज्ञानविपुल
- ५०, [ङा] कुशलमूत्रपरिधर
- ५१, [च्या] सन्धिनिर्मोचन
- ५२, [छ्या] घनव्यूह
- ५३, [ऊया] सद्धर्मपुण्डरीक
- ५४, [न्ह्या] महापरिनिर्वाण
- ५५, [ता] समाधिराज
- ५६, [था] प्रत्युत्पन्न बुद्धसंमुखावस्थित समाधि
- ५७, [धा] अविकल्प प्रवेश धारणी
- ५८, [ह्ला] सागरमति परिपृच्छा
- ५९, [पा] ब्रह्मपरिपृच्छा
- ६०, [फा] मञ्जुश्री परिपृच्छा
- ६१, [भा] पञ्चपारमितानिर्देश
- ६२, [ह्या] श्रद्धावला धानावतारमुद्रा
- ६३, [चा] बुद्धपिटकदुःशीलनिग्रहः

- ६४, [छा] रत्नमेघसूत्र
 ६५, [जा] धर्मसंगीतिनामसूत्रादि
 ६६, [ह्ला] सद्धर्मनाम महायानसूत्र
 ६७, [श्या] बुद्धनाम सहस्र
 ६८, [स्था] अचिन्तराजसूत्र
 ६९, [हा] सद्धर्मस्मृत्युपस्थान
 ७०, [ह्या] "
 ७१, [हा] कुशलमूल सूत्रादि
 ७२, [ह्ला] अभिनिष्क्रमण सूत्रादि
 ७३, [ष्या] कर्मशतक
 ७४, [सा] कर्मशतकादि
 ७५, [हा] अवदान शतक
 ७६, [आ] पुण्यवलादान
 ७७, [का] विशस्तव
 ७८, [का] महानिर्वाणसूत्र
 ७९, [खा] "
 ८०, [का] मञ्जुश्रीज्ञानसत्त्वस्य परमार्थ सङ्गीति
 ८१, [खा] तन्त्रराज श्रीलघुसम्बर नाम
 ८२, [घा] डाकार्णव महायोगिनीतन्त्र
 ८३, [डा] अनाविल तन्त्रराज

- ८४, [च्या] चण्डमहारोषण तन्त्र
 ८५, [छ्या] नीलाम्बर धरवज्रपाणि रुद्र टिप्पणी
 ८६, [ऊया] सर्वतथागत कायवाक् चित्त कृष्ण
 यमारि तन्त्र
 ८७, [न्ह्या] वज्रशिखर महागुह्ययोग तन्त्र
 ८८, [ता] सर्वदुर्गतिपरिशोधन तेजोराजस्य कल्प
 ८९, [था] आर्याचल महाक्रोध राजस्य कल्प
 ९०, [धा] आर्यमहामणि प्रतिष्ठित धारणी
 ९१, [ह्ला] सुवर्णप्रभास
 ९२, [पा] महासाहस्रप्रमर्दनी
 ९३, [फा] अचल धारणी
 ९४, [भा] अमोघपाश हृदय
 ९५, [ह्या] अमोघपाश कल्पराज
 ९६, [चा] सर्वकर्मावरण विशोधनी
 ९७, [छा] आर्यतारा मूलकल्प
 ९८, [जा] आर्यमणि भद्रधारणो
 ९९, [ह्ला] सर्व धर्म महासम्बोधि चित्त कुलयराज
 १००, [श्या] सर्वतथागत चित्तगुह्य ज्ञान अर्थ गर्भ
 १०१, [स्था] देवीजाली महामायातन्त्र

स्वयम्भूस नित्यपूजा पर्वपूजा निमित्त बसाः ज्वलं द्वहलप्युगु

वसपोल स्वयम्भू महाचैत्यया स्वागत सत्कार निमित्त थःथःगु श्रद्धा भक्ति अनुसारं अनेक माथं पूजोपकरण व कीर्तिवस्तु द्वहलपावर्पि विभिन्न श्रद्धालु दातापि मध्यय् यल इखाछेँस च्वर्पि हेरामाया तःरिमाया निह्य तःकेहेँयागु नां नं न्ह्यथनातःगु दु^१ । थ्वय्कःपिसं स्वयम्भू बातँनय् च्वंगु चैत्य जीर्णोद्धार याःगु उपलक्षय् श्रीस्वयम्भूस नित्यपूजा पर्वपूजा निमित्त उपयोगी जुइगु किसिमं पूजा सामग्री व बसाः ज्वलं दय्काः यल क्वन्ति वाउँछेँस च्वंह्य बाज्या अजि व अबुया नामं सभक्तिपूर्वक ने. सं. १०७२ स समर्पण याःगु जुल ।

१- स्यंगु बातँनय् च्वंगु शिलापत्र ।

हुलाक सेवा विभागया स्वयम्भूप्रति आस्था

स्वयम्भू महाचैत्ययागु आदर्श व गौरवप्रति श्रद्धा भक्ति तथा: गुलिसिनं दर्शन व पूजन यात, गुलिसिनं भक्ति भाव यात, गुलिसिनं अनेक कीर्ति स्थिति तथा: सेवा प्रस्तुत यानावन धइगु खँ स्थानीय अभिलेखं कनाच्वंगु दु ।

थुगु रूपं पठन पाठ पूजा स्तोत्र याना: प्रदक्षिण याय्गु अनेक कीर्ति तय्गु जप तप ध्यान याय्गु इलय्-ब्यलय् अनेक उत्सव याना:लि वसपोलयागु गुणगान याना: भजन कीर्तन आदि याना: सेवा याय्गु थ्व प्राचीनकालनिसें चल्य जुयावइच्वंगु छगू प्रकारया परम्परागत धर्म खः ।

न्ह्यात्थाय् न्ह्यागुं ज्या-खँ पुलांगु तालं जक याना: नं उकियागु विकास व समुन्नति जुइ फइ मखुगुलि युगानुकूल अनुसारं वसपोल स्वयम्भू महाचैत्ययागु यश कीर्ति आस्था प्रतिस्था देस विदेस अन्तरराष्ट्र जगतय् संसारया कुंकुलामय् थ्यंक प्रचार प्रसार याय्त अर्थात् अन्तरराष्ट्रया पर्यटक व विद्वान् एवं श्रद्धालु भक्तजनपिनिगु जिज्ञाशा तथा उत्सुकता ध्यान आकर्षित याय्गु विचारकथं स्वयम्भू महाचैत्ययागु सुन्दर चित्र अंकित याना: टिकट प्रकाशय् ह्याब्यूगु जुल, गुकि याना: नेपा:देयागु अस्तित्व व महत्व विश्वया न्ह्योने अभिवृद्धि जुजुं बन ।

खतु, नेपा:यागु हुलाक सेवा विभागयागु इतिहासय् वि. सं. २००५ सालतकं प्रायः छगू हे किसिमया टिकट धयाथे जुयाच्वंगुलि वि. सं. २००६ सालनिसें श्री ५ या सरकार, सञ्चार मन्त्रालय हुलाक सेवा विभागं नेपा:या धर्ममूलक संस्कृतिमूलक एवं अनुपम कलाया नमूना स्वरूप जुयाच्वंगु निम्न च्यागू प्रकारया दिव्य भावनाया शुभ प्रतीक स्वरूप श्रीस्वयम्भू महाचैत्यनिसें कया: श्रीपशुपति, श्रीगुह्येश्वरी, श्रीमहाबुद्ध, श्रीकृष्णमन्दिर आदि पुरातात्त्विक, ऐतिहासिक, धार्मिक, सांस्कृतिक तथा शैक्षिक आदिया केन्द्रीयभूत जुयाच्वंगु दर्शनीय पवित्र स्थलयात कया: नं टिकट छापय् यानाब्यूगु जुल ।

थुगु टिकट वि. सं. २००६ साल आश्विन १५ गते विजयादशमीया दिननिसें शुभारम्भ याना: प्रकाशय् ह्याबिल, गुकि याना: उक्त पवित्र स्थल अन्तरराष्ट्रिय जगतय् प्रचार प्रसारं जुजुं बन ।

लिसेलिसे' नेपाःयागु टिकटयागु महत्व नं बढ्य जुजु वनाच्चन^१ ।

क्र. सं.	गौरवमय स्थल	टिकटया मू
(१)	श्रीस्वयम्भूनाथ	२ पैसे
(२)	श्री पशुपतिनाथ	४ पैसे
(३)	श्री त्रिचन्द्र कलेज	६ पैसे
(४)	श्रीमहाबुद्ध मन्दिर (पाटन)	८ पैसे
(५)	श्रीकृष्ण मन्दिर (पाटन)	१६ पैसे
(६)	श्री मध्य काठमाण्डू	२० पैसे
(७)	श्रीगुह्येश्वरी	२५ पैसे
(८)	श्री बाईस धारा	३२ पैसे

थुलि जक मखु अज्ज संयुक्त राष्ट्रसंघया महासचिव महामहिम श्री उथान्तजुं बुद्ध जन्मभूमि लुम्बिनीप्रति अपार श्रद्धाभक्ति तसे 'लुम्बिनी विकास' निर्मित अपूर्व देन प्रदान यानथकल । गुकियागु फलस्वरूप थौं लुम्बिनी विकासया लागी अन्तर्राष्ट्र जगतं श्रद्धा चन्द्रा प्रदान याना हयाच्चन । विस्तार विस्तारं लुम्बिनी विकास कार्य सञ्चालन जुजु वयाच्चन । उथान्तजुं लुम्बिनी दर्शन यासे स्वयम्भू महाचैत्य नं दर्शन व पूजा याःवःगु जुल ।

थुकियागु तःधंगु लसताःयागु उपलक्ष्य कयाः नेपाल हुलाक सेवा विभागं २०२४ सालं - १७५ धेवा वंगु टिकटय् भूस्पर्श मुद्रा शाक्यमुनि श्वया जवपाखे बुद्ध जन्मस्थल पवित्र उद्यान लुम्बिनी व अले खवय् धर्मराजिक श्रीस्वयम्भू महाचैत्य नं अंकित यानाब्यूगु जुल ।

स्वयम्भू महाचैत्ययागु महत्व व गौरवप्रति ध्यान आकर्षित यासे हानं ई. सं. १९७५ (वि. सं. २०३२) सालं - १२५ धेवा वंगु टिकटय् नं श्व हे स्वयम्भू महाचैत्य चित्रांकित यानाः 'एशियाली पर्यटन वर्ष' यागु उपलक्ष्य कयाः प्रकाश यानाब्यूगु दु ।

हुलाक सेवा विभागं विभिन्न समयय् विभिन्न उपलक्ष्य विभिन्न महत्वपूर्ण आदर्शयुक्त ऐतिहासिक तीर्थस्थलतय्गु सुन्दर चित्र अंकित यानाः टिकट पिकयाच्चन । तर, स्वयम्भू महाचैत्ययागु जक थुकि निकःगु पिकयाब्यूगु जुल । उकिं थुकि स्पष्ट सिद्धत कि स्वयम्भूप्रति हुलाक सेवा विभागया विशेष श्रद्धा दु खनी धइगु ।

गुलिसिनं धाय्फु—थथे 'एशियाली पर्यटन वर्ष' मानय् याःगु उपलक्ष्य विशेष स्वयम्भू महाचैत्ययात हे कयाः छाय् अंकित यात, एशिया महाद्वीपय् प्रतिष्ठापित असंख्य बौद्ध स्तूप चैत्यत मध्यय् पूर्णता एवं उत्कृष्टगु युक्तगु संस्कृतिया अतुल सम्पत्ति धकाः प्रशंसा यानातःगुलि जुइमाः^२ । लिस्से नेपाल सृष्टिया आदिकारण स्वरूप जूगुलि नं अवश्य जुइफु । उकिइसं मित्र राष्ट्रया अतिथि महानुभाव

१- गोरखापत्र, २०२०।६।५

२- जालन्धरपाखे प्रकाश जूगु "वीरप्रताप" नामक पत्रिका, १९७५, नोभेम्बर १७

पर्यटक विद्वान् एवं शाही अतिथिपि काठमाण्डू उपत्यकाय् थ्यनेवं सर्वप्रथम दृष्टिपात जुइगु मुख्यगु स्थान जूगुलि नं धाय्माः । अज्ज थुलि जक मखु—गथे कीगु छेया दक्खिसिबय् च्वय्च्वंगु तत्तायात कःसि धयाच्चना अथे हे काठमाण्डू उपत्यका दृश्यावलोकन याय्गु तस्सकं आनन्दगु न्ह्याइपुसेच्वंगु छगू नक्षत्र वङ्गला थे जुयाःच्वंगु उच्च ध्वज विमान थे च्वय् लानाच्वंगु राजधानीया छांत कांत रूपरेखा स्वयाः अध्ययन याय्त ज्वरा मदुगु स्थान, गन च्वनाः स्वय्बलय् नाकं सतिइगु नं मखु तापाःगु नं मखु छख्ये अलग्ग लानाः तस्सकं ज्याछिनाच्वंगु हरेक दृष्टिकथं उत्तम जुयाच्वंगु स्थान जूगुलि नं जुइमाः । अज्ज जितः थ्व नं धाय् मास्ति वः—थुगु थासय् विलायत, यूरोप, एशिया एवं बौद्ध अबौद्ध हिन्दू मुस्लिम आदि फुक्क मानवजातियात स्वागत दइच्वंगु सकलयात समान अधिकार दइच्वंगु परन्तु पशुपतिइ थे ‘हिन्दूमात्र प्रवेश’ धकाः धयामतःगु सुयातं गनाः पनाः ख्याच्चः वियामतःगु सकलयात दर्शन व पूजन याय्त स्वतन्त्र दइच्वंगु स्थान धकाः अतिकं प्रसिद्ध जूगुलि ।

स्वयम्भू विकास मण्डल स्थापना

समस्त नेपाल व नेपाःमिया सौभाग्यया महान् शुभ प्रतीक ज्योतिरूप आदिवुद्ध श्रीस्वयम्भू महाचैत्य प्रागैतिहासिक कालनिसें प्रादुर्भाव जुया वइच्चंगु दु । थ्व स्वयम्भू चैत्य नेपाःया निम्ति जक मखु सकल बौद्धजगतया निम्ति नं अत्तिकं हे पवित्रगु तीर्थस्थल खः । थ्वसपोलयागु हे प्रभावं विपश्ची, शिखी, विश्वभू, क्रकुच्छन्द, कनकमुनि, काश्यप व शाक्यमुनि, मञ्जुश्री आदि अनेक सिद्ध, गुरु, आचार्य भिक्षु एवं प्रतिष्ठित ज्ञानी, गुणी, विद्वान् एवं विश्वया कुंकुलामय् च्वं पिं बौद्धजनपिं, पर्यटकपिं, शाही अतिथिपिं थन विज्यानावन, काया वन । कान्तिपुर उपत्यकाया धर्म, संस्कृति, कला व दर्शन आदिया केन्द्रविन्दु जुयाच्चंगु थ्व स्वयम्भू महाचैत्यं कीत महान् विशुद्धगु अपरिमित पुण्य क्षेत्रया रूपय् लक्यना वइच्चंगु दु । अशान्ति जगतय् शान्ति प्रभाश्वर प्रदर्शन याना वइच्चन । अज्ज स्वयम्भू चैत्य केवल बौद्धजगतया निम्ति जक सुप्रसिद्ध जुयाच्चंगु मखु^१—शैव, शाक्त, वैष्णव एवं सौर सम्प्रदायपिनि नं दर्शनया कारण जुयाः नं सम्पूर्ण हेतुकारणया नं कारणान्तक जुयाः अन्तय् कारणात्मक स्वरूप जुयाः कीगु न्ह्योने जुगांजुग निसें सुप्रतिष्ठित जुयाच्चंगु जुल । थ्व कीगु जन्मभूमि मातृभूमि नेपाःया महान् गौरवया ज्वलन्त प्रमाण खः, साक्षि खः ।

नेपाःया अद्वितीय महान् विशुद्ध कीर्ति स्वयम्भूयागु गौरव गाथायात सदां थिइका तय्त, अटल याय्त, सुरक्षा याय्त व विकास याय्तगु महान् शुभ संकल्प यासे थीकल्लय्यागु युग परिस्थिति अनुसारं माःथाय् माःगु किसिमं ज्या याय् निम्ति वसपोल श्रीस्वयम्भू धर्मधातु वागीश्वरप्रति अत्यन्त श्रद्धा भक्ति प्रेरित जुयाः स्थानीय प्रतिष्ठित गण्यमान्य श्रद्धालु ज्ञानी, गुणी, सज्जन, दानपतिपिनिगु एकता, सहयोग व सहानुभूति तथा हार्दिक अनुमोदनद्वारा शुभ नेपाल संवत् १०७४ साल गुंला महिनास 'स्वयम्भू विकास मण्डल' नामं संस्था स्थापना जूगु जुल ।

१- स्वयम्भू स्थित राजा कवीन्द्र प्रताप मल्लया शिलालेख—मञ्जुश्री कृतरम्य स्तोत्र श्लोक १६ या प्रमाणानुसारः—

शैव सौगात शाक्त वैष्णव सौर दर्शन कारणं ।

सर्व कारण कारणान्तक कारणात्मक रुपिणम् । १६।

खतु थुजाःगु महान् पवित्रगु स्वयम्भू चैत्ययागु प्रचार प्रसार एवं प्रकाश व विकास युगयुगतक यायम्वाःला वंसां थौकल्लय्यागु समययागु आह्वानकथं जनतापिनिगु उत्सुककथं विश्वभ्रातृत्व नाप यक्व यक्व सम्बन्ध दसेलि संघ संस्थायागु आवश्यक माय्काच्चंगु सकसिनं स्यू, सकसिनं चाः । तर गुलिसिनं धाय्फु— स्वयम्भूया सेवा चाकरी निम्ति 'स्वयम्भू विकास मण्डल' छाय् माल ? की पुर्खापिसं चल्य याना वइच्चंगु इलय्—व्यलय् बँ पुइगु, सफा याय्गु सखाःपा याय्गु, महादीप छ्वय्क्वगु, पताः छाय्गु, भजन याय्गु, तुतः ब्वनेगु इत्यादि गुलि नं गुथि दत, तयावन, उलि दय्व हे गाः ।

खः प्राचीन समयय् उलि दय्व हे गानाच्चन, पाय्छि जुयाच्चन, ईयात त्वःगु जुयाच्चन । थौयागु पाश्चात्य वैज्ञानिक युगय् प्रजातन्त्रया जमानाय् उगु किसिमं गुठी न्याय्का च्वनां मगाःगु जुल । कीसं थ्व अपुक अनुमान याय्फु, स्वयम्भूया नामय् गुलि नं गुथिगाना दत्तसत्त दइच्चन उकिइ पूर्ण रूपं विकास याय् मफुगु खनेदु, केवल आजुपुलां ताल जक जुयाच्चन ।

धात्ये स्वयम्भू महाचैत्ययागु गुण गौरव व इतिहासया पृष्ठभूमियात त्वय्क थौकल्लय्यागु ईयात मिलय् जुइक पाश्चात्य विद्वान्पिसं अनुमोदन याइगु किसिमं थःगु राष्ट्रया प्रतिष्ठा च्वनिइगुकथं विशुद्ध रूपं पुण्य प्राप्त याय्गु कारणय् स्वयम्भू महाचैत्ययात आवश्यक व्यवस्था याय्या लागी समस्या पूर्ति याय्त थ्व 'स्वयम्भू विकास मण्डल' संस्था प्रस्थापन जूगु जुल ।

थ्व विकास मण्डलया इनापकथं थथे धइतःगु दुः—

स्वयम्भू नेपाःदेया ऐतिहासिक तथा धार्मिक दृष्टिकोणं महत्वपूर्ण व अन्तरराष्ट्रिय जगतं बांलाक परिचित याकेत की नेपाःमित सकले जानाः श्रद्धापूर्वक उत्थान यानाहय्गु कीगु परम कर्तव्य खः । थ्व थासं न्हयथनावनिइगु सांस्कृतिक उत्थान ऐतिहासिक स्मृति व अनुसन्धान कार्यं देसव्यापी जुयाः संसारय् न्यंक नं आभास दयावनी । थ्व थाय्या आस्था प्रत्येक मतमतान्तरयात दु । अथे नं बौद्धमार्गीतय्गु छगू तःधंगु तीर्थ खः । हानं विश्व शान्तिया द्योतक भगवान् बुद्धया प्रतिपादित मूर्ति सुसज्जित जुयाच्चंगु थाय् थ्व खः । उकि थाय्या महत्व दयाच्चंगु थ्व स्वयम्भू विकास मण्डलं स्वयम्भू स्थित नेपाल राष्ट्रायात उच्चतम सुसंस्कृत सभ्य देस दय्केगु प्रयास याइ । उकिया लागी थ्व मण्डल अटल अमर जुयाच्चनी ।

स्वयम्भू स्थलया पृष्ठभूमि

समुद्रया सतहं ५००० फीट च्वय्च्चंगु गुँया दथुस छगू निर्मल पुखु दयाच्चंगु ज्योतिरूपया दर्शन उपलब्ध जुयावःगु छगू पलेस्वां (गुकिइ पञ्चरश्मि जायाः ह्वइच्चंगु) उत्पत्ति जुल । प्रथमतः थ्व ज्योति दर्शनया निम्ति महाचीनं महामञ्जुश्री बिज्यानाः दहः जुयाच्चंगु नेपाल देसयात जलामय प्राकृतिक क्रूरतां बच्य यानाथकल । थनं लिपा भारतं विश्वभू, ऋकुच्छन्द, कनकमुनि आदि तथागतपि बिज्यानाः

१- ने. सं. १०७७ गुंला, प्रकाशित—स्वयम्भू विकास मण्डलया संक्षिप्त परिचय पम्प्लेटपाखे ।

ज्योतिरूप दर्शन यानाविज्यात । महामञ्जुश्रीनं स्थापना यानाथकूहा धर्माकर जुजु यानाः मञ्जुपट्टन धकाः नां छुनाः नगर वसय् यासैलि प्रचण्डदेव आदि जुजुपिसं थ्व स्वयम्भूयात छगू तःधंगु स्तूप चैत्य व विभिन्न पुर पञ्च तत्त्वया चि (शान्तिपुर, वसुपुर, अग्निपुर, नागपुर व वायुपुर) वैज्ञानिक विशुद्धतास तःधंगु कीर्ति तथा थकाविज्यात, गुगुयात क्रमशः पुरातन तत्त्व निर्देशीतसे निसे जयदेव प्रथम (नेपाःदेया प्रथम ऐतिहासिक जुजु) व वयां लिपा लिच्छवी, मल्ल तथा शाह जुजुपिसं थ्व थाय्था सुसज्जित सांस्कृतिक कला प्रदर्शनयात कं कं बांलाका यंकेगुलिइ भाग कयादिल । थ्व हे स्वयम्भूया पुलांगु सिंहावलोकन खः । गुकिइ नेपाःमितय्गु संस्कृति व सभ्यताया गौरवपूर्ण चि दु । प्रकृति छायापातःगु थुगु ऐतिहासिक स्थानयात फयांफक्व बांलाकेगु रक्षा याय्गु व विकास यानायंकेगु की नेपाःमि सकलया परम कर्तव्य खः ।

उकि कीसं स्वयम्भू विकास मण्डलय् दुहांवनाः थुकियागु उन्नति याय्गु ज्याय् फक्व सनेमाल । मण्डलया उद्देश्य नेपाल संस्कृतिया उत्थान व स्वयम्भू स्थानया सर्वतोमुखि विकास याय्गु खः । थुकिया मुख्य ज्या अन्वेषण व ऐतिहासिक विवेचना खः । स्वयम्भूया बहुमुखि विकासयात अनेक तत्कालीन व दीर्घकालीन योजना दय्काः ज्या यानायंकेगु हानं थुकिइ देसया मेमेगु सांस्कृतिक उद्देश्यस च्वंच्वंगु संस्थातलिसे व अन्तरराष्ट्रिय सांस्कृतिक संघलिसे सम्पर्क तयाः इमिगु प्रकारया कीपाखे स्वानाः ज्याख्यलय् यानायंकेगु खः ।

थत्थे याय्माःगु ज्या

- (१) स्वयम्भूया सफाई सुघर याय्गु ।
- (२) स्वयम्भूया मन्दिर व वन रक्षा याय्गु ।
- (३) स्वयम्भूस लःया व्यवस्था व यातायातया सुप्रबन्ध ।
- (४) दय्दसं वन महोत्सव यानाः स्वयम्भू उपवनस जातं जातया सिमां सुसज्जित जुइकाः भौतिक शास्त्रया अन्वेषकतय्त् ज्याख्यलय् दइगु वनस्पति उद्यान दय्केगु ।
- (५) स्थानीय (स्वयम्भूस) जनतास शिक्षा प्रचार याय्गु ।
- (६) स्वयम्भू व नेपालया ऐतिहासिक सांस्कृतिक खँत अन्वेषण व अध्ययन यानाः प्रकाश व प्रचार याय्गु ।

बुलुहुं यानायंकेगु ज्या

- (१) सांस्कृतिक अनुसन्धानशाला दय्केगु ।
- (२) विशाल पुस्तकालय (बौद्धग्रन्थागार) या निर्माण ।
- (३) गेष्ट हाउस (अतिथि सत्कार गृह) दय्केगु ।

(४) संग्रहालय (प्राचीन तथा अर्वाचीन वस्तुया संग्रह यानातय्गु छे) दय्केगु ।

(५) नेपाःया बुद्धधर्म सुधार व उद्धार निम्ति शिक्षा-दीक्षायागु स्कूल स्थापना ।

स्वयम्भू विकास मण्डलया उद्देश्य पूर्ति याय्त जनबल मालाच्वंगु दु । जन गठित कार्य तत्परतां हे उक्त ज्या नं सफल जुइ । उकि प्रत्येक नेपाःमित थ्व मण्डलया सदस्य जुया श्रमदान, बुद्धिदान, धनदान बियाः ग्वहाःलि यानादिसँ । कीसं की सकले जानाः मण्डलयात ब्वलका ह्यनु ।

ने. सं. १०७७ गुंला

स्वयम्भू

स्वयम्भू विकास मण्डल

(प्रचार विभाग)

थ्व हे स्वयम्भू विकास मण्डलया पवित्र उद्देश्यकथं अथक प्रयास यासे सम्बन्धित थासय् इनाप यानाः थौतकया दुने जूगु ज्या थथे खः—

(१) मण्डलया अथक प्रयासं स्वयम्भूइ लःया स्थायी प्रबन्ध जुल ।

(२) ऊनै स्वयम्भूइ च्वय् थ्यंक मोटर वनिइगु लँया लिस्सें गःचाहिलेगु लँ धुच्छि दय्काः नं पीच यानाबिल । थुगु शुभ कार्य सफल याय्गुलिइ श्री दयावीरसिंह कंसकारया अथक प्रयासं येँ, यल, खप व केपूयापि श्रद्धालु महानुभावपिसं नं श्रमदान बियादिइगु दु, लिस्सें परोपकार शाखाया स्वयं सेवकपि व परोपकार अनाथालयया मस्तय्सं नं गुहाःलि ब्यूगु खँ न्ह्यथनातल ।

(३) स्वयम्भूइ प्यंगु दिशासं नँया लुखा खापा तयाः सुरक्षित् यानाबिल ।

(४) क्षियाक्षिथं थाय्थासय् बँपुइपि सुघर सफा याइपि नं व्यवस्था याःगु जुल ।

(५) स्वयम्भू दर्शनाभिलाषी शाही अतिथिपित आवश्यक स्वागत सत्कार याना वइच्वन ।

(६) थुगु स्वयम्भू पर्व स्थानय् थ्यंक बुद्धजयन्तीया उपलक्षय् स्वदयंक स्वंगु सहरया सम्यक छापि निमन्त्रणा यासे उचित पूजादि सत्कार जुल ।

(७) अथे हे शाही दूतावासपाखे प्राप्त जूगु बौद्ध जनजीवन सम्बन्धी भव्य रूप सुन्दर तस्वीर व लिस्सें नेपाः व तिब्बती शैली चित्रमय बौद्ध विषयक मूल्यवान सुन्दर पौभाःतय्गु नं प्रदर्शन जुल ।

(८) थाय्थासय् माःथाय् माःगु किसिमं बिजुली मतयागु नं व्यवस्था यात ।

(९) स्वयम्भूइ उख्येथुख्ये लानाच्वंगु अनेक प्राचीन व अर्वाचीन अमूल्य दुर्लभ मूर्तित तना मवनेमा धकाः छथासं मुंकेया लागी छगू मूर्ति संग्रहालय नं स्थापना जुल ।

(१०) बुद्ध धर्म अध्ययन याय्त थन विश्वया कुंकुलामं विद्वान्त वयाच्वनी । तर दुःखया खँ कीगु जन्मभूमि नेपाल बुद्ध जन्मभूमि धाःसा नं कीथाय् छगू जक हे बौद्ध पुस्तकालय मदु । वरु की आजुपिसं अध्ययन यानाः च्वयावंगु यक्व सफू किलं नकाः ध्वगिकाः छ्वयाच्वन । उकिया उपयोग कीसं याय् मसयावन । उकि थुजाःगु समस्या व अभाव पूर्ति निम्ति थुगु मण्डलं स्वयम्भूइ छगू 'अन्तरराष्ट्रिय पुस्तकालय' नं स्थापना याःगु दु ।

(११) स्वयम्भू एरिया दुने लाना च्वंक्व सम्पूर्ण देवदेवालय स्थापत्य कला, जलाश्रयपुखू, हिति जंगलया सिमा आदि पर्यन्त दर्शनीय उल्लेखनीय भिन्नकं बांलाक विस्तारपूर्वक सांकेतिक अंकित याना: छगू तःधंगु लुधनापुसे च्वंगु तस्सकं परिश्रम याना: दय्कातःगु मानचित्र नक्सा छगू नं तयार याय् धुंकूगु दु ।

(१२) 'स्वयम्भू महाचैत्यया इतिहास' निर्माण जुइ धुंकूगु दु, गुगु सफू छिकपिनिगु ल्लातय् हे दु । थुकिइ कालीहृदया दृश्यनिसें कया: स्वयम्भू उत्पत्ति जूगु निसें खँ कया: थौतकयागु ऐतिहासिक कालक्रम मिलय् याना: विस्तृत रूपं अनुसन्धनात्मक अध्ययन याना: अथक परिश्रम यासे तस्सकं महत्वपूर्ण जुइक च्वयातःगु दु ।

थुगु रूपं मेमेगु आवश्यक ज्या-खँ नं धमाधम गुरु याना वइच्चंगु दु, ग्वसा: ग्वयाच्चंगु दु ।

थ्व हे विकास मण्डलया पवित्र उद्देश्ययात अटल व अमर याय्गु विचारं निम्नप्रकारं समिति व उपसमिति नं गठन जूगु दु :—

- (१) संचालक समिति
- (२) सल्लाकार समिति
- (३) स्वास्थ्य तथा सफाई उपसमिति
- (४) प्रचार तथा प्रकाशन उपसमिति
- (५) शिक्षा तथा सांस्कृतिक उपसमिति
- (६) संगठन उपसमिति
- (७) अर्थ सञ्चय उपसमिति
- (८) बौद्ध ग्रन्थालय विकास उपसमिति
- (९) संग्रहालय विकास उपसमिति
- (१०) स्वयम्भू जीर्णोद्धार पुनर्निर्माण नव निर्माण सम्बन्धी विचार उपसमिति
- (११) स्वयम्भू दर्शनार्थ आगमन अतिथि स्वागत उपसमिति
- (१२) अन्तरराष्ट्रिय बौद्ध सांस्कृतिक संघ संस्थातनाप सम्पर्क उपसमिति

वर्तमान स्वयम्भू विकास मण्डलया पवित्र उद्देश्य सफलताया लागी श्रद्धापूर्वक ज्या याना बयाच्चं पि कार्यकारणी समितिया महानुभाव सदस्यपिनिगु नां :—

- (१) अध्यक्ष— श्री भक्तवीरसिंह तुलाधर
- (२) उपाध्यक्ष— श्री दयावीरसिंह कंसकार
- (३) सचिव— श्री हर्षदास तुलाधर
- (४) कोषाध्यक्ष— श्री कुलवीरसिंह तुलाधर

- (५) सदस्य - श्री अकलमानसिंह तुलाधर
 (६) " - श्री आशाराम शाक्य
 (७) " - श्री दानवीरसिंह तुलाधर
 (८) " - श्री लोकरत्न तुलाधर
 (९) " - श्री सूर्यरत्न तुलाधर
 (१०) " - श्री चिनीकाजी ताम्रकार
 (११) " - श्री बुद्धिरत्न तुलाधर
 (१२) " - श्री पूर्णवीरसिंह ताम्रकार
 (१३) " - श्री भाइराजा तुलाधर
 (१४) " - श्री चैत्यरत्न तुलाधर
 (१५) " - श्री मणिरत्न तुलाधर
 (१६) " - श्री दिव्यरत्न तुलाधर
 (१७) " - श्री रत्नकाजी शाक्य

पण्डित गुरु रत्नबहादुरजुं स्वयम्भूयात स्वायम्भू पुराण द्वहलप्युगु

वसपोल पण्डित गुरु रत्नबहादुर वज्राचार्यजु यलया यशोधर महाविहारया संघय् जन्म जूहा खः । थ्वसपोलं गुगुं शिक्षण संघ संस्थाय् (स्कूल, कलेज, विश्वविद्यालय) विद्याध्ययन यानाबिज्याः ह्य मखु, खास यानाः वसपोलया मातामह कुलमानसिंहजु सभ्य संसारय् नांदनाच्वंगु वीर पुस्तकालयया प्रकाण्ड विद्वान् धाय्काः राजपण्डित सरह जुयाच्वंह्य वसपोलपाखे शिक्षा-दीक्षा प्राप्त यानाकया बिज्यात । वसपोलपाखे व्याकरण, कोश, काव्य, छन्द एवं न्याय व अलंकार, चतुर्वेद आदि कम उमेरय् हे सय्कूगु जुल । लिस्सें विभिन्न प्राचीन लिपि शास्त्रय् नं उत्तिकं हे दखल दु ।

खतु थ्वसपोलं नेपाःया बौद्धग्रन्थ सूत्र तन्त्र आपालं अध्ययन अनुभव यानाः नं नेपाःयागु बौद्ध वाङ्मय संस्कृत साहित्य जक स्वयाः नं बुद्धधर्मयागु ज्ञान पर्याप्त मजुनि धइगु महशूस यासे लिपा युवावस्थाय् फ़िखाछेय् वनाः अनया घ्यसे (विद्वान्) लामा (गुरु) धाःपिके नं सत्संगत यानाः तिब्बती बौद्धग्रन्थ नं अध्ययन याःगु जुल । सँदेसय् च्वँच्वं वसपोलं थ्व नं बिचाः याःगु दु कि जिमि अबुं यानावःगु व्यापार सम्बन्धी ज्यां केवल तःमि जक जुइगु खः परन्तु उकिं सम्यक् आजीविका याय् फइमखु, लिस्सें नेपाःयागु बुद्धधर्म सकसितं सय्काः सिइकाः बिइफइमखु हानं संस्कृत साहित्यं च्वयातःगु बौद्धशास्त्र सूत्र तन्त्रयागु अनुवाद एवं सम्पादन कार्यं नं याय् फइमखु; उकिं वसपोलं थः अबुजुं क्वकखायावःगु ज्या जूसां हाकुतिनाः दूरदर्शी पण्डित गुरु थःगु जीवन बौद्ध विद्वान् जुयाः बौद्धसमाजयागु छुं सेवा यानाथकेमाःगु खः धइगु दृढ संकल्प यासे थुगु उत्तम कार्यय् थःगु जीवन समर्पण याना-बिज्याःगु जुल ।

सँदेसं लिहांवसांनिसें थाय्थासय् बोधिचर्या सम्बन्धी उपदेश बिब्युं कुटी थ्यंवल्य् अन स्वला प्यलातक च्वनाः सर्वप्रथम आर्यगुणकारण्डव्यूह महायान सूत्र व्याख्यान यानाबिज्यात । अनं लिहांवयाः थःगु छे थ्यंकाः सद्धर्म ग्रन्थ च्वयाबिइगु ल्ह्यायाबिइगु यानाः सम्यक् आजीविका चल्य् यानाः परिवार

पालन यानावइच्चन । लिस्सें यल, ये, ख्वप स्वंगू सहरय् बौद्धसमाजय् अतिकं प्रसिद्धहा बौद्ध विद्वान जुयाः पिहांवल । थुगु नातां वसपोलयात पण्डित गुरु धकाः गुरु स्थापना यानावयाच्चन । धात्थे वसपोलं यानाबिज्याःगु नेपाल भाषा व नेपाःयागु महायानी बौद्ध दर्शनयागु क्षेत्रय् वसपोलं गुलि नं थाकु थाकूगु ज्या यानावन, उकियागु धलःपौ ब्वने मात्रं अवश्यं विवेकवान् सज्जनपिनिगु हृदय प्रभावित जुइ । नेपाल भाषा व साहित्यया धुकुतिइ थथे महायानी बौद्ध दर्शनं जाय्कावंहा मेहा व्यक्ति मालेत थाकुइ । संस्कृत थे जाःगु उत्कृष्टगु भाषाय् च्वयातःगु महायानी वज्रयानी बौद्ध दर्शनया सूत्र तन्त्र सफूत थःगु मांभाषाय् हिइकाः अज्ज उकिइ थःगु मौलिकता क्यनाथका बिज्यात^१ । थुलि जक मखु छुं वर्षतक यल नागवाहालय् खोलय् जूगु धर्मोदय पाठशालास प्रधानाध्यापक नं जुल । थ्व हे इलय् धाखाः साहुपिनिगु छेय् नेपाःया बुद्धधर्मया मूलगु सद्धर्मग्रन्थ रूपय् मानय् यानातःगु श्रद्धोत्पाद शास्त्र आर्थ नवखण्ड महायान सूत्र तन्त्रयागु व्याख्या यानाः बौद्ध दर्शनयागु गौरव व महत्व क्यनाथका विज्यात । थ्व हे ऊवलय् भारतया प्रकाण्ड विद्वान महापण्डित राहुल सांकृत्यायनजुं स्वलातक थ्वसपोल पण्डित गुरुयापाखे तन्त्रात्मक वज्रयान सहजयानयागु खं न्यनाः थुइकाः सत्संगत याःगु खं थन विशेष उल्लेखनीय जू । उकि वसपोलया नां 'रत्नबहादुर' धाः थे तुं वसपोलयागु प्रतिभा व ज्यायागु स्तरं विश्लेषण याना स्वयंबलय् वसपोल नेपाःदेया हे छगः अमूल्यगु 'रत्न' सिद्ध जूवः ।

थथे बौद्ध साहित्य बौद्ध दर्शन सम्बन्धी जक सेवा यानाः नं सन्तोष मजुयाः वसपोलं ऋषिश्वर तमनांस तःकोमछि पुरश्चरण च्वन, उत्कान्ति तक्यागु सहजयोगाभ्यास नं यानाबिज्यानाःलि अनंनिसें जटा पालय् याय्गु नं चलन यानाबिज्यात ।

थ्वसपोल पण्डित गुरुं नेपाल प्रतिष्ठाता श्रीस्वयम्भू धर्मधातुप्रति श्रद्धा भक्ति तयाः ने. सं. १०६४ सालं थःगु हे ह्लातं हरिताल भ्वं मसि समेतं दय्काः 'स्वायम्भू पुराण' नामक ग्रन्थ मूल श्लोक व अर्थ सहित यानाः ग्रन्थ च्वयाः विधिपूर्वक चल्हय् यानाबिज्यात । उवलय् वसपोलं वर्तमान मैत्रि गुम्बाया लिउने मञ्जुश्री वनेगु लँपुया सिथय् पञ्चत्रिशबुद्धमूर्ति अंकितगु चीबाहाःया न्होनेलाक थः पूर्वजपिनिगु दिवंगत आत्माप्रति शान्ति कामना यासे शिलामय सुमेरु चैत्य व धर्मधातु नं तयाथकूगु दु ।

थुलि जक मखु वसपोलं थ्व नं बिचा याःगु दु— नेपाःया थःगु परम्परागत बुद्धधर्मया जजमान व शिष्यपित जन्मनिसें अन्त्येस्थि^२ कृया तकं क्रिया कर्म संस्कार खंकाः मोक्षमार्ग क्यनिइपि गुरुकुल

१- बौद्ध प्रथम शिक्षा, भूमिकापाखे

२- आर्यनामसंगीति अर्थ सहित भूमिकाया पण्डित गुरुया संक्षिप्त जीवनी परिचयपाखे ।

३- गर्भ उत्पत्ति, रजस्वला कृया, षष्ठमास कृया, सीमन्तोपनयन, शिठार पूजा, षष्ठी जागरण, नामकरण, अन्नप्रासन, कण्ठ शोधन, उपासना, विद्यारम्भ, चूडाकर्म, व्रतमोचन, कर्णभेद, आचार, स्नान, भोजन, नित्यकर्म, प्रायश्चित, शुचिनियम, विवाहकर्म, दीक्षाप्रदान, गुरु शिष्य परीक्षा, गुरु मण्डल, पुरश्चरण, भीमरथ, देवरथ, महारथ, मृत्युलक्षण, कालवञ्चन, अन्त्येस्थिकथन, अस्थिसंचय, तृतीयाह कृया, पञ्चाह कृया, सप्ताह कृया, दशपिण्ड विधान, गृह शुद्धिकरण, त्रिपक्ष विधान, मासिक पिण्ड, समान पिण्ड, नैमित्तिक पिण्ड, लक्षचैत्य विधान, इ० ।

वज्राचार्यपित सुधार व उद्धार याय्त इमिगु हित सुख चिन्तना यानाः हिरण्यवर्ण महाविहार्य
 'पुण्याश्रम विद्यालय' चाय्काः इमित शिक्षा-दीक्षा नं बिइगु यात । थ्व हे सन्दर्भय् अन्तरराष्ट्रिय बौद्ध
 धर्मावलम्बीतय्गु न्ह्योने नेपाःयागु बुद्धधर्मयागु रितिथितिइ दुने छु दु धइगु वयनेया लागी 'पुण्याग्रदूत'
 नामक छगू पत्रिका नं पिकयाविल । थुकिया व्यवस्थापक व सम्पादक नं थः हे जुल ।

पण्डित गुरुं नेपाल भाषां अनुवाद यानाथकूगु सफूया धलःपौ

- (१) अष्टसाहस्रिका प्रज्ञापारमिता
- (२) लक्षावती प्रज्ञापारमिता प्रथम खण्ड व द्वितीय खण्ड
- (३) दशभूमीश्वर सूत्र
- (४) समाधिराज
- (५) बोधिचर्यावतार (प्रकाशित)
- (६) गुणकारण्डव्यूह
- (७) स्वायम्भू पुराण
- (८) ललितविस्तर
- (९) अशोकावदान
- (१०) बोधिसत्वकल्पलतावदान (छुं अंश प्रकाशित)
- (११) भवोत्पत्त्यावदान
- (१२) सहस्राहूति विधि
- (१३) दशकर्मविधि
- (१४) दीक्षाविधि
- (१५) आर्यनामसंगीति (प्रकाशित)
- (१६) आर्यभद्रचरी गाथा
- (१७) चक्रसम्बर समाधि
- (१८) त्रिस्कन्धपापदेशना
- (१९) पञ्चरक्षा
- (२०) सम्बरोदय तन्त्र
- (२१) कलवीर तन्त्र
- (२२) गुरुमण्डलार्चन विधि
- (२३) ये धर्मा गाथा (प्रकाशित)
- (२४) नामसंगीति संस्कृत, तिब्बत सहित

थःह्यं रचना यानाथकूगु

- (१) सृष्टिक्रम बोधिचर्या
- (२) बौद्ध प्रथम शिक्षा (प्रकाशित)

थासं थासय् बाखं कनाबिज्याःगु

- | | |
|-----------------------|-------------------------|
| (१) गुणकारणडव्यूह | - कुटो |
| (२) नवखण्ड | - धाखाः साहुया छेँय् |
| (३) प्रज्ञापारमिता | - साहु बोधिरत्नया छेँय् |
| (४) सुखावतीव्यूह | - तमना ऋषीश्वर |
| (५) तन्त्रात्मक रहस्य | - इखाछेँय् |
| (६) स्वायम्भू पुराण | - टंगवाहालय् स्वदयंक |
| (७) अशोकावदान | - नःत्वाः |
| (८) ललितविस्तर | - बूबहाः |
| (९) नामसंगिति | - तःजलय् छेँय् |
| (१०) दीक्षायागु खँ | - थःगु छेँय् |

थ्व च्वय् च्वयागु सम्पूर्ण ज्या-खँ सिधय् धुंकाः नं स्वयम्भू स्थित भुइख्यलय् स्थापना जूगु जगतोद्धार महाविहारय् च्वंगु बौद्ध छात्रावास बोर्डिङ्ग स्कूलय् पं० जोगमुनि वज्राचार्ययागु अनुरोधकथं वि. सं. २००६ सालं बौद्ध संस्कृत स्यनेगुलिइ शिक्षक जुल । अनंलि व हे दै श्रो ५ या सरकार वीर पुस्तकालयय् तिब्बती व नेपाल भाषा विभागय् नियुक्ति जुल । श्री ५ या सरकारयागु नोकरी यायां अकस्मात् त्वचं कल, ने. सं. १०७५ आषाढकृष्ण दशमीखुनु थुगु लोकयागु सेवाकार्य सुविमुक्त जुयाः देह तोताबिज्यात । अन्तय् वसपोलयागु गुण गौरवप्रति श्रद्धां प्रेरित जुयाः वसपोलया शिष्यपि मुनाः शिष्य मण्डल नं गठन जूगु जुल ।

कलाविद् जोगमान शाक्यजुया धातुमय स्वयम्भू महाचैत्य दय्केगु शुभ संकल्प

यल महाबुद्ध थैनात्वाः सिकुचोवाहाःया जोगमान शाक्य बहुमुखि प्रतिभा दुह्य प्रसिद्ध कलाकार खः । थ्वय्कः शिल्पकला शास्त्रय् निपुणह्य उकिइसं संस्कृत व्याकरण, कोश नं व्वनातःह्य, लिसेलिसे नेपाःयागु परम्परागत महायानी बुद्धधर्म सम्बन्धी पूजाविधि, चर्या गीत, दाफा भजन व तुतः, नामसंगिति व्वनेगुलिइ स्यनेगुलिइ नं गुरु जुयाच्चंहा । थुलि जक मखु हानं परम्परागत चित्रकला एवं रेस्मी रपफु भरय् यानाः पौभाः दय्केगुलिइ नं दखल दुह्य खः ।

थ्वय्कः जोगमान शाक्यजु थौयागु २० गूगु शदीया अरनिको धाःसा नं अप्पो जुइ सखु^१ । तर अरनिकोया बारय् चिनियातय्सं संगीत व वाद्यवादन चर्चा यानातःगु मदुर । परन्तु थ्वय्कः जोगमान

१- पुरातत्त्व एक रोचक कथा, पृ. ७७ । प्रसंगवश अरनिकोया संक्षिप्त परिचय थन च्वयाच्चना—अभय मल्ल जुजुया पालाय् १३ गूगु शदीइ पतला लामाजुयागु सौहार्दपूर्ण निमन्त्रणाकथं नेपालं ८० ह्य कलाकारपि ल्हासा वन । उकिइ सर्वश्रेष्ठ कलाकार जुयावंहा सुप्रसिद्ध कलाकार अरनिको खः । वय्कःयागु हे निर्देशनय् अन शाक्य विहार विशाल सुवर्णया चैत्य दय्केगु ज्या जुल । थुगु प्रशंसनीय ज्या खनाः अन च्वपि धर्म व कलाप्रति श्रद्धाभक्ति दुपि लामाजुपि यक्वं सन्तोष व प्रभावित जुल ।

लिपा थुकियागु प्रसिद्धि यानाः चीनया बादशाह कुबलैखाङयागु निमन्त्रणा थ्यंकःवल । उगु निमन्त्रणा-यात सहर्ष स्वीकार यासे अरनिकोजु चीनय् थ्यंकःवन । अन नं स्वयम्भू आकृति स्वरूपगु श्वेत महाचैत्य निर्माण याय्गु महत्वपूर्ण ज्या जुल । थ्वय्कःयागु अनुपम सुन्दर कलाकौशलता खनाः सकल आश्चर्य व चकित जुल । श्व हे कारणं चीनया कला परिषद्या नायक पदय् नियुक्त जुल, लिस्से मिङ्हाई आदि अनेक पुरस्कार व शान्त्वना नं प्राप्त जूगु जुल ।

२- पुरातत्त्व एक रोचक कथा, पृ. ८४

शाक्यजु स्थापत्य कला, शिल्पकला एव चित्रकला अतिरिक्त वाद्यवादन संगीत कलाय न उत्तिकं हे अनुभव सिद्ध जूगु खनेदु ।

वौद्धाचार्य अभयराज शाक्यजुं दय्काथकूगु नेपाल गौरव विश्व प्रसिद्ध यलया महाबुद्ध देगः विगत १९९० सालयागु महाभूकम्पं विनष्ट जुयाः क्षतिग्रष्ट जुसेलि जीर्णोद्धार याःगु समयय् थ्वय्कः जोगमान शाक्यजुं उगु ज्याय् फुक्क कलाकारपिनि गुरु नाइकेया रूपय् ज्या गुरु यानाः सुप्रसिद्ध महाबुद्धयागु वर्तमान स्वरूप अनुपम सुन्दर मन्दिर ह्लापा गथे खः अथे हे च्वंक तयार यात ।

थुगु देगःया जीर्णोद्धार कार्य सम्पन्न जुसेलि महाबुद्ध देगः दर्शन व पूजन याःवःपि दर्शक एवं भक्तजनपिसं थ्वय्कः जोगमानयात आपाःसिनं प्रशंसा यानावन ।

थःगु कुशल नेतृत्वय् उगु देगः जा जुसेलि थःत तच्चोगु हर्ष व आनन्द प्राप्त जुल । उगु शुभ प्रेरणाद्वारा हानं वय्कः शिल्पकलाभिज्ञ जोगमानजुं थुजाःगु शुभ संकल्प यानाविज्यात कि नेपाःया अत्तिकं प्रसिद्धगु पवित्र ऐतिहासिक स्थल स्वयम्भू महाचैत्य, खास्ति चीवाहाः, नमबुद्ध एवं महाबुद्ध गथे च्वंगु खः अथे हे च्वंक थःगु ह्य धुच्छिया प्रमाणं उच्चा यानाः धातुया प्रतिमूर्ति दय्के धइगु दृढ संकल्प यानाविज्याःगु जुल ।

उगु शुभ संकल्प जूगु ग्वसाःकथं सर्वप्रथम अल्सि व दिक्कयात तोताः उत्साहपूर्वक धातुया महाबुद्ध देगः तयार यात । थ्व देगः तयार जूगु शुभ सन्देश तत्कालीन नेपाल उद्योग परिषद्या संचालक गुरु धर्मादित्यजुं प्राइमिनिष्टर जुद्धशम्शेरया हजुरीइ बाहादुर शम्शेरयात उगु महाबुद्ध देगःया महत्व व कलाविद् जोगमानयाःगु विषय कयाः बांलाक खँ थुइकाव्यूगु जुल । व खँ न्यनाः तस्सकं खुशि जुयाः उचित मूल्य बियाः कदर यानाः न्यानायंकल । थुजाःगु अनुपम कलाकृति जायाच्वंगु महाबुद्ध मन्दिर धातुया प्रतिमूर्तियात खनाः तत्कालीन नेपाल म्यूजियमया क्यूरेटर कलाया मर्म शूह्य चन्द्रमान मास्केजुं बाहादुर शम्शेरया हजुरीइ वनाःलि अनुरोध याःगु दु—थुगु सुन्दर कलात्मक महाबुद्ध मन्दिर राजदरवारय् तयातय्गु सत्ता म्यूजियमय् तयाबिल धाःसा सकल दर्शकपिनिगु लागी उपयोगी व म्यूजियमयागु शोभा वृद्धि जुइ, उकिइसं हजूरया बुबायागु नामं तयार जूगु जुद्ध जातीय कलाशालाय् यंकाः प्रदर्शित याय् दुसा सदांया लागी महत्वपूर्ण जूवनी । थ्वय्कः क्यूरेटरजुयागु अनुरोध मनासिब सम्झ्य जुयाः जुद्ध जातीय कलाशालाया निम्ति समर्पण यानाव्यूगु जुल । थुगु धातुया महाबुद्ध मन्दिर उगु म्यूजियमय् थौतकं सुरक्षित पूर्वक उचित सन्मान यानाः प्रदर्शित याना तइतःगु दु ।

थ्व महाबुद्ध मन्दिरयात धलवतय् ढालय् यानाः दय्कातःगु खनाः कलापारखी क्यूरेटरजुं कलाविद् जोगमान शाक्यजुयागु ह्लाःया शीपं जाःगु थुजाःगु प्रकारया महत्वपूर्ण कलाकृति मेमेगु नं छुं दु ला धकाः न्यनादिल । थ्व खँ न्यनाः जोगमान शाक्यजुं थःगु ह्लातं दय्कातःगु यल बुंगद्यो व चाकवाहाःद्योगागु रथ गथे च्वंगु खः अथे हे च्वंक दय्कातःगु हिसिचा दुगु त्वःवनापुसे च्वंगु सुन्दर कलाकृति नं न्होने तिइजक ब्वय्हेल । अले थ्व बाहेक मेगु छुं दनि ला धकाः हानं लिसा काकां क्यूरेटरजुं न्यनादिल । जोगमान शाक्यजुं मुसुमुसु ह्लिलाः थःगु ख्यूगु क्वथाय् दुहांवनाः वप्पा चाय्काः रेश्मियागु रफ्फु भरय् यानातःगु निपाः प्यपाः पौभाः नं क्यनेहेल । थुजाःगु ब्याक्व छगू ति छगू

प्रशंसनीय शिल्पकला खनाः वय्कः प्रभावित जुल । अले वय्कलं उगु कलाकृतियात उचित सम्मान
यानाः जुद्ध जातीय कलाशालाय् यंकाः प्रदर्शित यानाव्यूगु जुल ।

थुजाःगु प्रकारं जोगमान शाक्यजुयागु हस्तकलायागु ह्लियाह्लिथं चमत्कार बढ्य जुजु वनाच्वंगु
इलय् बसपोलया थःगु सदिच्छा शुभ संकल्प अनुसार ग्वसा ग्वःगु 'स्वयम्भू महाचैत्य गथे च्वंगु खः
अथे हे च्वंक जनसमक्षाय् प्रस्तुत याय्' धकाः सनाच्वैच्वं अनेक पंगलःत न्ह्योने च्वंवल, लिस्सें अकस्मात्
त्वचं कयाः असामयिकवश बसपोलयागु ने. सं. २०१३ साल ज्येष्ठ महिनाय् देहावसान जुल ।

स्वयम्भूप्रति गोरखापत्र संस्थानया आस्था

नेपाल अधिराज्यय् दुने विभिन्न अञ्चलय् प्रकाशित जुयाच्चंगु गुलि नं पत्रपत्रिका सन्देश समाचार अखबारत दु इपि मध्यय् अप्पो ग्राहक दइच्चंगु श्री ५ या सरकारया प्रमुख समाचार नेपाल राष्ट्रया प्रधानगु सर्वश्रेष्ठगु 'गोरखापत्र' खः । थ्व हे गोरखापत्रं अविच्छिन्न रूपं इलय्-व्यलय् नेपाःयागु प्रमुख घटना व संसारया गतिविधि क्यनेत न्यंकेत सिइके विइत देश व नरेशयागु कल्याण निम्ति न्ह्योने बढय् जुयावनाच्चंगु नेपाःदेया मुख्यगु समाचार नामं प्रसिद्ध जुयाच्चंगु जुल ।

थ्व हे गोरखापत्रया मुखपत्रया नं चव्य प्रमुख स्थान बियाः ह्लापालाक हे स्वयम्भू महाचैत्ययागु फोटो बियाः थ्वया क्वस्सं शान्तिनायक गौतमबुद्धयागु सुन्दर चित्र अङ्कित यानाब्यूगु जुल । थथे गोरखापत्र संस्थानं स्वयम्भू महाचैत्यप्रति श्रद्धा तसे सम्मानपूर्वक स्थान बियाः अभूतपूर्व नक्सां सेवा याःगु थ्व ह्लापांगु प्रयास खः । थ्व दिन खः वि. सं. २०१३ ज्येष्ठ १२ गते शुक्रबारयागु अङ्कय् लाःवंगु जुल । खास यानाः थुकिइ प्रमुख स्थान प्राप्त जूगु उपलक्षय् खः—नेपाल, भारत, लङ्का, चीन, जापान आदि एशियाइ देस व यूरोप, अमेरिकाय् समेत 'बुद्ध महापरिनिर्वाण समारोह धुमधाम नक्सां मानय् याःगु' शुभावसरय् तयाब्यूगु जुल ।

थथे वि. सं. १०१३।२।१२ तकया दुने गोरखापत्रं प्रसिद्ध देवदेवी स्वयम्भू अतिरिक्त पशुपति, गुह्येश्वरी एवं बुंगद्यो, चाकबाहाःद्यो, जनबाहाःद्यो, सक्व वज्रयोगिनी, दक्षिणकाली व चांगुनारायण, भुइजःसिनारायण, कृष्ण मन्दिर, तजेलुभवानीपिनिगु फोटो चित्र दकलय् सकलय् चव्य लाःवंगु मदुनि धाःसां छुं अप्पो जुइमखु ।

अन्तरराष्ट्रिय बौद्ध प्रतिनिधि मण्डलपिनि स्वयम्भू महाचैत्य दर्शन व पूजन

विशाल च्वापुगुंया मुल्य् च्वनाच्चंगु थ्व प्राकृतिक सुन्दर कीगु नेपाल प्रागैतिहासिक इलंनिसें थन बौद्धतय्गु इतिहास लिसेलिसें शुरु जुल धाःसां छुं अप्पो जुइमखु । कीगु प्राचीन इतिहास अनुसार तथागत शाक्यमुनि बुद्ध प्रादुर्भाव जुइ न्ह्यो थुगु सुन्दर काठमाण्डू उपत्यकाय् जलामय जुयाच्चंगु व विपश्ची, शिखी, विश्वभू, ऋकुच्छन्द, कनकमुनि, काश्यप इत्यादि बुद्धपिनिगु थन आवागमन जुइ धुंकूगु खँ जामाचो, फूचो, सिफुचो, धिनाचो पर्वतया च्वय् च्वंगु चैत्य व स्वयम्भू महाचैत्यं थौतकं कनावइच्चंगु दु । कालान्तर लिपा महाचीनं गुरु मञ्जुश्री विज्यानाः थनयागु लः क्वदुवाःपाखे क्वछ्वयाः सहर दय्के धुंकाः तक नं थ्व काठमाण्डू नगरय् बौद्धतय्गु प्रधान हे जुयाच्चने धुंकूगु खः । थुगु प्रकारं प्रागैतिहासिक इलंनिसें भगवान् बुद्धयागु अमरवाणी प्रचार यायां वयाच्चंगु देसय् वर्तमान शाक्यमुनि बुद्धयागु जन्म जूगु थ्व नेपाःया निम्ति निश्चय नं अत्यन्त महान् गौरवयागु खँ खः ।

बुद्धया जन्म बुद्धत्व प्राप्ति व महापरिनिर्वाणया दिं स्वांयापुह्ली बौद्धमात्रया निम्ति जक मखु मानवमात्रया निम्ति महत्त्वपूर्ण व पवित्रतम जू । बुद्धकालीन समाजनिसें थौतक थ्व दिनया संस्मरणय् प्रायः प्रत्येक दैय् थःथः श्रद्धानुसारं देस काल परिस्थिति अनुकूल विविध उत्सव धर्म कर्म यांना वइच्चंगु दु । फुक्क शदीइ भारत छगू राष्ट्रं जक थ्व दिं मानय् यांना वइच्चंगु मखु, गुगुं शदीइ दक्षिणया ताम्रपर्णी द्वीपं मानय् याःसा, गुगुं शदीइ उत्तर तिब्बत व उख्ये वयाः चीनं धुमधामं मानय् यात, हानं गुगुं शदीइ पूर्व सुवर्णभूमि व सुवर्णद्वीपं अरु तापाक वनाः पोन्तियानक यवद्वीपं मानय् याःसा गुगुं शदीइ अफगानिस्तान आदि पश्चिम देसं यात । अले वंगु पुनर्जागृति युगंनिसें थ्व दिंया उत्सव समारोह विश्वया कुंकुलामं यात । हानं थ्व दै बुद्धया महापरिनिर्वाण २५०० दै दुगु जुयाः कं विशेष रूपं स्वांयापुह्ली मानय् याय्गुलिइ गुगुं छगू बौद्ध देसया जनता व अनया सरकारं मेगु देस स्वयाः लिउने लाकेत तयार मजू । सारा संसार विशेष यांनाः एशियां थ्व २५०० गूगु बुद्धजयन्ती

सर्वाधिक उपयोगिक रूपं विशेष प्रकारं मानय् याय् तत्पर जुयाच्चंगु दु ।

थ्व हे शुभ अवसरय् धर्मोदय सभां विश्वया तमाम बौद्धतय्गु चतुर्थ महाअधिवेशन (चतुर्थ विश्वबौद्ध सम्मेलन) सःतेगु सुअवसर प्राप्त जूगु नेपाःया निर्मित अत्यन्त तःधंगु गौरवया खँ खः ।

प्रागैतिहासिक कालनिसें बौद्धसंस्कृतिइ सुसंस्कृत जुयाच्चंगु देस थ्व छीगु नेपालय् जूसां थन वैदिक प्रभाव नं कम मजू । तर, नेपाःया लागी थ्व छगू अत्यन्त गौरवया खँ खः कि धर्मया नामय् थन छफुति हि न्ह्याकेगु जा अथे ति छगू छाःगु वचन सम्म नं सुनानं धाःगु मताया । थुगु देसयागु सहिष्णुता पारस्परिक मित्रता बन्धुत्वया भावना थुकथं निगू धर्मया अविच्छिन्न सम्पर्क यानाः नेपाःयागु छगू थःगु हे तालगु संस्कृतिया प्रादुर्भाव जुल, गुगु आः वयाः नेपाःया छगू अत्यन्त मजबुतगु शक्ति जूवःगु दु । तर अदूरदर्शी एकतन्त्री सरकारया अदूरदर्शी नीति यानाः थनया भिक्षुपित पित्रिका चवनेमाल । थुगु रूपं नेपालं पित्रिकाचवंपि भिक्षुपिसं सारनाथय् थःगुरु चन्द्रमणि महास्थवीरया नेतृत्वय् धर्मोदय सभायागु स्थापना यात । वसपोलपिनिगु निर्मित माःगु ज्या थ्व हे सभापाखे जुल । लिपा लंकापाखे भिक्षु अमृतानन्द सहित न्याम्हेसिगु छगू शिष्टमण्डल नेपालय् थ्यँसेलि हानं तत्कालीन सरकारं थःगु भूल महशूस यासे भिक्षुपित नेपालय् दुहांवय्गु अनुमति विल । अले लिस्से धर्मोदय सभा नं नेपालय् हल ।

नेपालय् बुद्धधर्मयागु प्रचार व पुनरुद्धार याय्गु भिक्षुपिसं गुगु अथक प्रयत्न यात व नेपाःयागु बुद्धधर्मयागु इतिहासं गुबले त्वःमंके फइगु खँ मखु । तर वसपोलपिनिगु शिक्षा विशेष यानाः लंका व बर्मापाखे जूगुलि नेपाःया थेरवादी (हीनयानी) बौद्ध भिक्षुतय्गु विशेष सम्पर्क बर्मा व लंकापाखे जूगु खः व थुकियागु कारणं लंकाय् डाक्टर मलयशेखरजुया प्रयत्नपाखे 'बौद्ध विश्व भ्रातृत्व संघ' स्थापना जूसानिसे हे धर्मोदय सभां भाग कया वःगुलि धर्मोदय सभा नेपाःयागु छगू रिजनल सेन्टरया रूपय् स्वीकृत जुल । थ्व बौद्ध विश्व भ्रातृत्व संघयागु विधान अनुसार विश्वया सम्पूर्ण बौद्धतय्गु दत्थुइ एकत्व स्थापना यानाः विश्वय् भगवान् बुद्धयागु शान्ति सन्देशयागु प्रचार यानाः विश्वयात संहारपाखे सुरक्षित याय्गु प्रयत्न जूवंगु खः । थ्व हे सन्दर्भय् खृष्टाब्द १९५० स लंकाय् सर्वप्रथम विश्व बौद्ध सम्मेलन जुल । थ्व हे सम्मेलन पाखे व्यावक बौद्धतय्गु एकतायागु सूत्रय् प्रतिबद्ध जुइगु लिसेलिसें थौंयागु संसारयात भगवान् बुद्धयागु शिक्षां जक शान्ति कायम याय्फइगु खः धइगु नं विश्वास काय्के व्यूगु दु ।

नेपालय् जुइगु थ्व सम्मेलन थ्व हे ऊवलय् वयाच्चंगु चतुर्थ विश्व बौद्ध सम्मेलन खः । थ्वया न्ह्यो बर्माय् जूगु विश्व बौद्ध सम्मेलनयागु निमन्त्रणा नेपालयात नं वःबलय् तत्कालीन प्रधानमन्त्री श्री मातृकाप्रसाद कोइरालां थुजाःगु प्रकारया सम्मेलन याय् दुसा नेपाःयात धार्मिक दृष्टिकथं जक मखु मेगु दृष्टिकोणं नं लाभदायक सिद्ध जू वइगु खनेदु धइगु स्वर्गीय श्री ५ महाराजाधिराज त्रिभुवन वीर विक्रम शाहदेवजुया हजुरीस विचार प्रकट याःगु व्यलय् मौसूफ सरकारं बेस जुइगु खः धकाः हुकूम वकसय् जूगु अनुसारं चतुर्थ विश्व बौद्ध सम्मेलन धर्मोदय सभायागु तत्त्वावधानय् याय्गु अनुरोध सहित छगू सन्देश नं मौसूफपाखे थनपाखे वंगु प्रतिनिधि मण्डलया उपनेता भिक्षु अमृतानन्द स्थवीरजु

(धर्मोदय सभाया तत्कालीन सेक्रेटरी) यात बक्सय् जूगु दु । व हे अनुसारं थ्व चतुर्थ विश्व बौद्ध सम्मेलन खृष्टाब्द १९५६ या नोभेम्बरय् जुइगु जुयाच्चंगु दु व फुक्क रिजनल सेन्टर्सतय्गु पाखे निमन्त्रणा स्वीकार नं जुइ धुंकूगु खः ।

तत्कालीन श्री ५ महाराजाधिराज महेन्द्र वीर विक्रम शाह देवजुपाखे नं थुगु चतुर्थ विश्व बौद्ध सम्मेलनपाखे विशेष अभिरुचि कयाः थ्व सम्मेलन न्ह्यागु यानाः नं सफल याय्गुलिइ धर्मोदय सभायात आवश्यक ज्या-खँय् सहयोग बक्सय् जुइगु आश्वासन बियाबिज्याःगुलि थ्व सभायात नेपालय् जुइगु थःगु ढंगयागु थ्व विशाल सर्वप्रथम अन्तरराष्ट्रिय सम्मेलन याय्गु उत्साहित जुयाः सकसिगुं सहयोग प्राप्त याय्गु अगसर जुयाच्चंगु दु ।

वर्तमान नेपाःयागु अन्तरराष्ट्रिय क्षेत्रय् ह्लियाह्लिथं बढय् जुजुं वनाच्चंगु प्रतिष्ठा व इज्जतयात ध्यानय् तयाः कं कं अन्तरराष्ट्रनाप मित्रता अटल याय्गु सिद्धान्तयात समक्षय् तयाः श्री टंकप्रसाद आचार्यजुया नायकत्वय् गठन जूगु तत्कालीन सरकारं चतुर्थ विश्व बौद्ध सम्मेलनयात न्ह्यागु पाखे नं सफल याय्गु आवश्यक सहयोग प्रदान याय्गु वचन व्यूगु जुल ।

थ्व थःगु हे प्रकारया ह्लापांगु विशाल अन्तरराष्ट्रिय सम्मेलन सफल याय्गुलिइ धर्मोदय सभायागु जक मखु बौद्धतय्गु जक नं मखु परन्तु सम्पूर्ण नेपाःमितय्गु मात्रया गौरव इज्जत व देन दु । तर थपाय्धंगु सम्मेलन धर्मोदय सभां जक नं सफल याय् फइगु मखु । थ्व सम्मेलनया सफलताया निर्मित जा समस्त नेपाःमितय्गु सहयोग निःतान्त आवश्यक जू । उकिं जाति धर्म वर्णया भेदभाव मतसे नेपाःमिमात्रं धर्मोदय सभायात हार गुहार यानाः थ्व सम्मेलन सफल याय्गुलिइ सकसिनं हार्दिक अनुरोध याःगु दु । जिमित आशा एवं विश्वास दु कि विदेशी राष्ट्रपिनिगु न्ह्योने आतिथ्य सत्कार कीसं कयावया च्वनागु गौरव व इज्जतय् भ्याःभचा हे कम याके बिइमखु ।

थ्व सम्मेलनयागु विभिन्न ज्यायागु विषयय् ध्यान तयाः धर्मोदय सभां करीब ने. रु. १,८६,००० - भा. रु. १,७७,२५०।- यागु खर्चया बजेट सरकारयात पेश याःगु दु । तर नेपाल सरकारं सम्मेलन सम्पन्न याय् आः थत्थेंयात भा. रु. १,००,०००।- व ने. रु. ५०,०००।- जक चन्दा प्रदान याःगु दु । थुकिया निर्मित धर्मोदय सभां हार्दिक धन्यवाद अर्पण याःगु दु । थ्व बाहेक सम्मेलन सम्बन्धी व्याक्क ज्या सुचारू रूपं चलय् याय् माःगु निकासा बिइगु बिइकेगु तत्कालीन श्री ५ महाराजाधिराजया प्रमुख नीजि सचिव श्री लोकदर्शन वज्राचार्यजुया अध्यक्षताय् छगू कमिटी नं गठन याःगु दु ।

थ्व च्वय्यागु प्रबन्धयागु व्यवस्था जूसा नं थ्व सम्मेलनयागु विशालताप्रति ध्यान आकर्षण यानाः स्वयावलय् समस्त जनतायागु सहयोग तस्सकं आवश्यक खनेदुगुलि धर्मोदय सभां सकल सज्जन वृन्दयाके सहयोग प्राप्तिया लागी नं अपील याःगु दु ।

थ्व सम्मेलन सम्बन्धी ज्या-खँ सुचारू रूपं चलय् याय् धर्मोदय सभां क्वय् च्वयागु कमिटीत गठन याय्गु नं निर्णय याःगु दु व उत्साही पासापिसं थःपि कमिटीइ च्वनाः आवश्यक सहयोग बियाः थ्व सम्मेलन अवश्य सफल यानाबिइ ।

थ्व सम्मेलन सफल याय्त ग्वसा ग्वःगु विभिन्न कमिटी थथे खः३ —

- (अ) सर्वसाधारण ज्याया सञ्चालन याय्गु धर्मोदय सभा
- (आ) स्वागत समिति
- (इ) प्रोग्राम कमिटी
- (ई) भोजन प्रबन्ध कमिटी
- (उ) डेरा प्रबन्ध कमिटी
- (ऊ) यातायात प्रबन्ध कमिटी
- (ए) स्वयंसेवक संगठन कमिटी
- (ऐ) प्रचार कमिटी
- (ओ) सम्पादक कमिटी
- (औ) अनुवादक कमिटी
- (अं) चन्दा कमिटी

थुगु किसिमं प्रबन्ध व व्यवस्था मिलय् यानाः धर्मोदय सभायागु नेतृत्वय् तत्कालीन सरकारयागु पूर्ण सहयोग एवं उत्साहित श्रद्धालु पासापिनिगु आवश्यक हारगुहारद्वारा थुगु 'चतुर्थ विश्व बौद्ध सम्मेलन' यागु ज्या-खँ कार्यक्रम निर्विघ्नसाथ आनन्दपूर्वक अन्तरराष्ट्रिय जगतय् नेपाःयागु प्रतिष्ठा व गौरव च्वंक शान्तिनायक भगवान् बुद्धयागुप्रति अपार श्रद्धाभक्ति तयाः याकनं विश्व शान्ति कायम जुयाः बुद्धशासन सदां चिरस्थायी जुइमा धइगु महान् सदिच्छा तसे बांलाक अभूतपूर्व नक्सां सुसम्पन्न जूगु जुल ।

थ्व हे सम्मेलनयागु ऊवलय् अन्तरराष्ट्रिय बौद्ध देस ४२ गुयात औपचारीक रूपं निमन्त्रणा वन । तथापि ४२ बौद्ध देस व्याक्कं उपस्थित जुइ मफुसां २८ गू देसयापि अन्तरराष्ट्रिय बौद्ध प्रतिनिधि मण्डल जक सम्मेलनय् भाग काःवःपि जुल । थुपि बौद्ध प्रतिनिधि मण्डलत काठमाण्डू उपत्यकाय् थ्यनेवं प्यख्यरसं खने दइच्चंगु गोपुच्छ गिरि साह्योँगु पर्वतय् विराजमान जुयाच्चंगु समस्त भूमण्डलयात प्रज्ञोपाय दृष्टि अवलोकन यानाच्चंगु चक्रावली, छत्रावली, ज्वालावली एवं सर्वबुद्ध महामुकूट उष्णीष चूडामणि सहित जुयाः अति शोभायमान जुयाच्चंगु चैत्यकुल नायक श्रीस्वयम्भू महाचैत्ययात खनाः बुद्धकुलयात श्रद्धा विश्वास दुपि शान्तिप्रेमी भाग्यमानो कुलपुत्र कुलपुत्रीपिनि दर्शन, स्पर्शन, चिन्तन एवं प्रदक्षिण याय्गु महान् अभिलाषा सुया जक मजुइ ?

थ्वय्कःपिनिगु थ्व हे सदिच्छा महान् अभिलाषायात थुइकाः थ्व हे सम्मेलनयागु कार्यक्रमानुसार थन विज्याःपि काःपि महोदय प्रतिनिधिपित १९५६ नोभेम्बर १८ तदनुसार (वि. सं. २०१३ साल मंसिर २ गते) सुथसिया ८.३० ताः इलय् किण्डोल विहार गुगु कि नेपाःया बुद्धधर्मया पुनरुत्थान स्थल खः अन काठमाण्डू सहरयात जक मखु अज्ज विश्वयात सद्धर्म चेतनायागु हःपाः बियाच्चंगु सुन्दर वन

जंगलया च्वस्सं सुप्रतिष्ठित जुयाच्चंगु विश्वय् अद्वितीय जुयाच्चंगु सर्वसुगत गर्भगृह श्रीस्वयम्भू महाचैत्य स्थानय् व्वनायंकल^१ ।

थुपि बौद्ध प्रतिनिधि मण्डलत विभिन्न देस विदेसं बिज्याःपि काःपि थुगु श्रीस्वयम्भू धर्मधातु वागीश्वर मण्डल स्थानय् थ्यनेवं इमि थःथःगु श्रद्धा भक्ति व सांस्कृतिक विधि विधान अनुसारं स्वयम्भू महाचैत्ययात दर्शन स्पर्शन चिन्तन यानाः अनेक माःथं थःथःगु उद्गार प्वंकल, प्रदक्षिण यात । विश्वय् दुर्लभगु थःगु हे विशेषता दइच्चंगु स्वयम्भू महाचैत्ययात खनाः इपि सकले प्रशन्नपूर्वक तच्चोगु सन्तोष व हर्षमान जुयाच्चन । लिस्से थुकियागु हे विषयय् चर्चा व प्रशंसा यायां थःथःगु स्थानय्तुं लिहांवन ।

१- चतुर्थ विश्व बौद्ध सम्मेलन रिपोर्ट, पृ. ३०

प्रधानमन्त्री चाउएनलाईया स्वयम्भू दर्शन व निरीक्षण

तत्कालीन श्री ५ या सरकारया प्रधानमन्त्री श्री टङ्कप्रसाद आचार्यजुया निमन्त्रणानुसार जनवादी चीन देसया महामहिम प्रधानमन्त्री श्री चाउएनलाईजु नेपाः थ्यंकःकाल । उबल्य काठमाण्डू उपत्यकाया प्रसिद्धगु सामाजिक संस्था परोपकार, शिक्षण संस्था आनन्दकुटी विद्यापीठ निरीक्षण यानाः वि. सं. २०१३ माघ १३ गते शनिश्चरवारखुनु स्वयम्भू पर्वत स्थान थ्यंकःकाल^१ । नेपाःया मुख्यगु बौद्ध स्थल श्रीस्वयम्भू महाचैत्ययात दर्शन व पूजन यानाः छचाःख्यरं निरीक्षण यानादिल । लिस्से स्वयम्भू विकास मण्डलयागु उन्नति व प्रगति निर्मित छिद्वः दां १००००।- चन्दा प्रदान यानादिल ।

थ्वय्कःयागु सम्मानय् आनन्दकुटीइ स्वागत याःबल्य धर्मोदय सभाया उपाध्यक्ष कविकेशरी श्रीचित्तधर 'हृदय'जुं छत्वाःचा स्वागत भाषण न्यंकादीगु दु^२—

हनेबहःपि पासापि व दाजु किजा तःक्यहेपि !

थौं छिकपित जिमि प्रिय जन्मभूमि नेपालया मुख्य बौद्धस्थल स्वयम्भू स्थानय् स्वागत याय् दयाः धर्मोदय सभां थःत गौरवशाली भाःप्यु । छायाःसा थ्व उगु स्थान खः, गन थ्व नेपाःगाः नागवास दहँ तिनिबल्य ज्योतिरूप स्वयम्भू प्रकाशमान जुया विज्यात । हानं थ्व व स्थान खः, गन महाचीननिसें विज्याःह्य महामञ्जुश्रीनं व नागवास दहँया लः छवनाः सदांया निमित्त वसपोल ज्योतिरूप दर्शन याय् वने जिइका बिल । थौं व हे पवित्र स्थानय् व हे जगत्गुरु महामञ्जुश्रीया जन्मभूमि महान् चीननिसें काःपि सांस्कृतिक बन्धुपित स्वागत याय् दुगु कीगु नेपाल व चीनया पुलांगु बन्धुता गुलि पुलां लुमंकेगु खः । उकिं छिकपि सकसितं स्वागत दु, कासँ !

१- गोरखापत्र, २०१३ माघ १४, आदित्यबारया अङ्क ।

२- नेपाल संस्कृति, चित्तधर 'हृदय', पृ. ११८

वसपोल ज्योतिरूप स्वयम्भूया उत्पत्ति यानाः थ्व नेपालयाके स्वाभाविक 'विश्ववन्धुता' खनेदत, गुकि यानाः मञ्जुश्रीयात गुरु नालाः मञ्जुश्री नांगु न्हूगु पर्वतय् बिज्याकल । अथे हे समय समयय् महाचीनया धर्माकर जुजुनिसें कयाः अनेक जुजुपि, आचार्यपि व अनेक विद्वान्पि नं नेपाल समाजय् दुथ्याकाकाल । थ्व हे स्वाभाविक नेपाल-संस्कृतियात नेपालपुत्र शाक्यमुनि बुद्ध मध्यम मार्गया नामं बांलाक थुइक जगतया न्ह्योने तयाबिल, छु आदरणीय सुयेनच्चांग, शीलमञ्जु आदि आचार्यपिनिद्वारा छिकपिनि चीनय् नं व बौद्ध संस्कृतिया हार्दिक स्वागत जुल । उकिं व हे संस्कृति ह्योपि वन्धुपिसं थ्व नेपालयात थःगु हे छेँ भाःपाः विश्वासपूर्वक दिसँ !

छिकपि, अमर कलाकार अरनिकोया 'ह्वाइट पागोडा' तुयू चीभाः व अनेक प्रकारया 'पागोडा' देगःयात आदरपूर्वक थः नालाः वयाच्चपि कलाविर्दित चीभाःया नायो स्वयम्भू चैत्यराजया नाप नेपालया बौद्धपूजाय् पञ्चोपचार जक मखु गीत, वाद्य व नृत्य नं दुथ्याः धयागु प्रमाण स्वरूप षोदशलास्या (फिखुहा पूजादेवी) पि नं दुगु हारती अजिमाया देगः नं न्ह्योनेसं वयनेदुगु की बौद्धधर्मया सर्वतोमुखी विचार स्वतन्त्रताया परिचय बिइगु खः, उकिं छिकपिनिगु अमूल्य समय भति अप्पो फुसा स्वयादिसँ नेपालया संगीत व कलां जाःगु बौद्धसंस्कृति !

छिकपिनिगु कलाप्रेमी सांस्कृतिक चीनं धर्म, संगीत व कलाया नाप नाप नेपालया लिपियात नं कला हे भाःपाः नेपालया 'रञ्जना' आखःया अनेक कूटाक्षर (मनोग्राम) ग्रेट् ह्वाइट पागोडाय् व अनेक चीभाः देगलय् दुथ्याकातःगु दु । अनेक विहारय् बौद्ध मन्त्र थ्व हे आखलं च्वयातःगु व गनं गनं थ्व रञ्जना आखःया शिलापत्र नं क्रियातःगु दु । आः व हे आखः व मेमेगु नेपालया तःताजि आखलं च्वयातःगु अनेक सफू व शिलापत्र नं दुगु थ्व महाविहारय् फाय्काः छिकपि नापलाय् दुगुलिं धर्मोदय सभा व नेपालया जनता तस्सकं लयूताः ।

अन्तय् वन्धुपिनि न्ह्योने थ्व छगू नं निवेदन याय्—थज्याःगु अनेक लुं च्वयागु, वहलं च्वयागु सफू व सांस्कृतिक कलाकृति जायाच्चंगु महाचीनया मञ्जुश्री गुरुं काशीया आचार्य धर्मश्रीमित्रयात दर्शन व्यूगु ऐतिहासिक थाय् 'थँबही' कान्तिपुरया थःनेपाखे दनिगु छिकपिसं सि हे स्यू ।

चीन सांस्कृतिक प्रतिनिधि मण्डलया स्वयम्भू तथा मञ्जुश्री दर्शन

विश्वय् गुलि नं स्तूप व चैत्यत दइच्चन उकिइ मध्यय् थःगु हे किसिमं पृष्ठभूमि दइच्चंगु प्रागैतिहासिक इलंनिसें सुप्रतिष्ठित जुयाच्चंगु सप्तबुद्धपिसं वन्दना यानाः तइतःगु चैत्यकुल नायक श्रीस्वयम्भू महाचैत्य दर्शन व पूजन निम्ति वि. सं. २०१४ आषाढ ४ गते चीनया सांस्कृतिक प्रतिनिधि मण्डलत स्वयम्भूस थ्यंकःवल^१ ।

थ्वय्कःपिसं फिस्वतँ दुगु सुवर्ण छत्रं सुशोभितगु शान्त गम्भीरगु पञ्चबुद्धात्मक स्वयम्भू महाचैत्य खनाःलि अत्यन्त प्रशन्न जुल, लिस्सें सुविनीत भावं श्रद्धा अभिव्यक्त यासे दर्शन व पूजन यानाः प्रदक्षिण यानादिल । थुगु प्रतिनिधि मण्डलया नायो जुयाः काःह्य श्रीचुतुनान् व सांस्कृतिक उपमन्त्री श्रीहुयूची खः । थ्वय्कःपिनिगु सम्मानय् स्वयम्भू विकास मण्डल व धर्मोदय सभायागुपाखें स्वयम्भूया अग्रय् तयाः शिष्टाचारपूर्वक स्वागत नं यात ।

थुगु स्वागत उत्सवय् येँया गुरुजुपिसं नेपाःया थःगु हे पहःगु परम्परागत चलय् जुयावयाच्चंगु वज्रयानी चर्यागीत चचा हालाः सांस्कृतिक प्रतिनिधिपित प्रभावित यात । उगु स्वागत समारोह्य न्यंकूगु चचाया नां निम्न प्रकार खः—

- (१) नमामि २ जिनधातु । राग — नाट
- (२) सरोजपत्र । राग — रामवटी
- (३) अरुणवर्ण । राग — कौशिक वसन्त

लिस्सें थुगु स्वागत समारोह्य धर्मोदय सभाया उपाध्यक्ष पदं महाकवि चित्तधरजुं अभिनन्दन न्वचु न्यंकादिल । थुकिया लिसलय् चीन सांस्कृतिक प्रतिनिधि मण्डलया नेता श्रीचुतुनान्जुं उद्गार

१— गोरखापत्र, २०१४, आषाढ ६ अनुसार ।

व्यक्त यानादीगु दु—नेपाः व चीनया दत्थुइ मैत्री सम्बन्ध हियात्तिथं थीक रूपं सुदृढ जुजुं वनी धकाः
अभिलाषा प्रकट याःगु दु ।

एव हे सन्दर्भय् स्वयम्भूया गुम्वातय्गु पाखें नं लामाजुपिसं वय्कःपिनिगु सम्मानार्थं तिब्बती
लोकनृत्य नं क्यनाबिल ।

थुपि ब्याक्क कार्यक्रम सिधसेलि वय्कःपिं गाक्कं प्रभावित जुल । अले स्वयम्भू विकास कार्यया
लागी श्रीचुतुनान्या पाखें द्रःछि १०००।- दां नं लस्ताः देच्छायाः लिहांकाल ।

उपत्यकाञ्चल तात्कालीन सुधार समितिद्वारा स्वयम्भूप्रति छुं सेवा

थ्व स्वयम्भू मन्दिर नेपाल राजधानी उपत्यका दुने पश्चिम भागय् तज्जाःगु भव्य सुन्दर स्थान गोपुच्छ पर्वतया च्वय् लानाच्चंगुलि काठमाण्डू उपत्यकाया न्ह्यात्थासं स्वःसां छर्लंग दर्शन खनेदु । थ्व थासं पूर्वपाखे दृश्यावलोकन यानाः स्वयंबल्य काठमाण्डू राजधानीया सम्पूर्ण दृश्य बांलाक खनेदु । उकिं थुगु थासय् च्वनाः पर्यटकजनपिसं अनेक तमासा स्वयाः तस्सकं लय्लय्तायाः सन्तोष प्रकट यानावनी । थन थासय् धार्मिक, सांस्कृतिक, ऐतिहासिक एवं कलाकृति दृष्टिकथं विचाः याय्वल्य नं अत्यन्त महत्वपूर्ण जू ।

थ्व हे स्वयम्भू क्षेत्रयागु महत्व व गुण गौरवयात लुमंकाः उपत्यकाञ्चल तात्कालीन निर्माण सुधार सतिमिपाखे काठमाण्डू उपत्यकास जीर्णोद्धार अभियान चल्य जुयाच्चंगु इलय् स्वयम्भू महाचैत्य-यागु फ्लडर, कुं पा, ध्वज, पताः एवं उख्येथुख्येयागु पःखाः जीर्णोद्धार यासे थ्व थासय् अभाव जुयाच्चंगु भक्तजनपिनिगु सुविधाया लागी आधुनिक ढाँचां बाथरुम नं दय्काव्यूगु दु । जम्मा खर्च किन्याद्वलं चाछि वि. सं. २०१५ सालय् स्वयम्भूप्रति छुं सेवा यानाव्यूगु जुल^१ ।

पण्डित जवाहरलाल नेहरुजुया स्वयम्भू दर्शन तथा आनन्दकुटीस भाषण

नेपालय् निरङ्कुश राणाशासन अन्त जुसेलि प्रजातन्त्र शासन स्थापना जुल । थ्व हे प्रजातन्त्र शासन जगिजगि जुया च्वंगु इलय् तत्कालीनया प्रधानमन्त्री श्रीविश्वेश्वरप्रसाद कोइरालाजुया निमन्त्रणा- कथं विशाल गणतन्त्र भारतया प्रधानमन्त्री महामहिम पण्डित श्रीजवाहरलाल नेहरुजु नेपालय् थ्यंकः काल । उबलय् काठमाण्डू उपत्यकाया प्रमुख दर्शनीय ऐतिहासिक स्थल श्रीस्वयम्भू महाचैत्य विराजमान जुयाच्वंगु स्वयम्भू पर्वत स्थान दर्शन व निरीक्षण यानादिल । थ्व दिन खः वि. सं. २०१६ ज्येष्ठ २६ गते खुनु^१ ।

थुखुनु हे थ्वय्कःयागु सम्मानया रूपय् स्वयम्भू स्थित आनन्दकुटी विद्यापीठं आवश्यक व्यवस्था मिलय् यानाः स्वागत याःगु जुल । धयातःगु दु—स्वयम्भू दर्शन याय् न्ह्यो पशुपति, गुह्येश्वरी व यल महाबुद्धयागु नं दर्शन याःवंगु जुल । स्वयम्भू दर्शन याय् धुंकाः आनन्दकुटीइ वनाः छत्वाःचा भाषण नं यानादिल । थुगु भाषणय् वय्कलं धयादीगु दु^२—‘थुगु बांलाःगु यइपुगु थाय् खनाः व लिस्सें भगवान् बुद्धयागु नां न्यने दयाः जितः धात्थे तस्सकं लय्ताल । थुगु देसया छगू कुनय् भगवान् बुद्धया जन्म जुल अले व भारतय् वन । भारत व नेपाल सम्बन्ध स्वाकेगुया छगू तस्सकं बांलाःगु खँ थ्व दु कि बुद्ध भगवान् यागु गुगु महान् सन्देश दुनियाँतय्गु निम्ति खः व नं जिमिगु देसनाप स्वानाच्वंगु दु । जि आशा याय्, उगु सन्देश प्राणिपिनिगु हित सुखया लागि जुइ ।’

१- गोरखापत्र, २०१६ आषाढ १

२- नेपालमे प्रधानमन्त्री श्रीनेहरुके भाषण, पृ. २४

नेपाल राष्ट्र बैंकया स्वयम्भूप्रति आस्था प्रतिष्ठा

नेपाल अधिष्ठाता श्रीस्वयम्भू धर्मधातु वागीश्वर गुह्य खः वसपोल बोध्यङ्गमुद्रा वैरोचन, भूस्पर्शमुद्रा अक्षोभ्य, वरदमुद्रा रत्नसंभव, ध्यानमुद्रा अमिताभ एवं अभयमुद्रा अमोघसिद्धि मण्डलपाखें परिलक्षित जुयाच्चंगु थुगु स्वयम्भू ज्योतिरूप दर्शन याय् निम्ति विज्यानाच्चंगु ज्ञानमुद्राय् प्रतिष्ठित गुरु मञ्जुश्री एवं थ्वसपोल स्वयम्भू ज्योतिरूप त्वपुइत अर्थात् चैत्याकार रूपय् परिणत याय् विज्याःह्य गुरु शान्तिकराचार्य योगमुद्राय् च्वनाः वज्रहूँकारमुद्राय् च्वंच्वं पि गुह्यसम्बर गणपि आराधना यानाच्चंगु अति प्रसिद्धगु शान्तिपुर गुहा आदिपाखें सुशोभित जुयाच्चंगु प्राचीन युगनिसें थःगु हे गौरब व ऐतिहासिक पृष्ठभूमि दइच्चंगु प्यंगू युगय् प्यंगू नामं विख्यात जुयाच्चंगु श्रोसाह्वेगुँ गिरि स्वयम्भू पर्वत महामुद्राशासन चलय् जुयाच्चंगु सम्बर मण्डलाकार युक्तगु सुदुर्जया भूमि नेपाल मण्डलया प्राण स्वरूप जुयाच्चंगु काष्ठमण्डपया शिर थेँ उच्च स्थानय् विराजमान जुयाच्चंगु जुल ।

थुजाःगु अति पवित्रगु गौरवमय आदर्श पूर्णगु नेपालया धर्म, संस्कृति, कला, ज्ञान-विज्ञान एवं दर्शन आदिया केन्द्रीय स्थल रूपय् परम्परागत मानय् याना वइच्चंगु स्वयम्भू महाचैत्यप्रति श्री ५ या सरकार अर्थमन्त्रालय नेपाल राष्ट्र बैंकं छगू न्हूगु किसिमं युगानुकूल श्रद्धा अभिव्यक्त याःगु दु— स्वयम्भूयागु सेवा भाव भक्ति केवल पठन पाठ पूजा स्तोत्र जक याय्गु सम्झय् मयासे वसपोलयागु गौरवमय कीर्ति सकभनं प्रचार प्रसार याय्गु नं छगू उत्तमगु सेवा भाःपाः नेपाल राष्ट्रिय मुद्राय् ५।— न्यातका वंगु व १०००।— द्वःछि वंगु नोटय् स्वयम्भू महाचैत्ययागु सुन्दर चित्र अंकित यानाः पवित्र व शोभा वृद्धि याना ब्यूगु जुल ।

थुकि यानाः नेपाःयागु मौद्रिक इतिहासय् थःगु हे विशेषता व महत्वपूर्ण छाप अंकित यानाब्यूगु दु । न्यागूगु शदीनिसें चलय् जुया वइच्चंगु थैतकयागु मुद्रा इतिहासय् गुलि नं लिच्छवी जुजुपि मानदेव, शिवदेव, नरेन्द्रदेव, जयदेव, थकुरी जुजुपि अंशुवर्मा, जिष्णुगुप्त, गुणकामदेव व मल्ल जुजुपि

मध्ययु येँया महेन्द्र, शिवसिंह, लक्ष्मीनरसिंह, प्रताप, चक्रवर्तेन्द्र, पार्थिवेन्द्र, भूपालेन्द्र, नृपेन्द्र, भास्कर, ज्योतिप्रकाश, जयप्रकाश अथे हे यलया सिद्धिनरसिंह, श्रीनिवास, योगनरेन्द्र, वीरमहीन्द्र, इन्द्र, लोकप्रकाश, वीरनरसिंह, महोन्द्रसिंह, योगप्रकाश, विष्णु, राज्यप्रकाश, विश्वजीत, तेजनरसिंह थथे हे ख्वपया जगतप्रकाश, जितामित्र, भूपतीन्द्र व रणजीत, थ्व थेँ शाहजुजुपि दलमईन, पृथ्वीनारायण, प्रतापसिंह, रणबहादुर, गीर्वाणयुद्ध विक्रम, राजेन्द्र विक्रम, सुरेन्द्र विक्रम, त्रैलोक्य विक्रम, पृथ्वी वीर विक्रम, त्रिभुवन वीर विक्रम, ज्ञानेन्द्र वीर विक्रम, महेन्द्र वीर विक्रम, एवं वीरेन्द्र वीर विक्रम आदि शासकतय्सं प्रचारय् हःगु नेपालो राष्ट्रिय मुद्राय् अङ्कित जुयाच्चंगु सिंह, लक्ष्मी, सल, ब्वसल, कामधेनुसा, किसि, वैश्रवण, वज्र, पलेस्वां, चन्द्र, सूर्य, त्रिशूल, द्वहं, दमरु युक्त त्रिशूल, कलश, आभरण युक्त खड्ग, ज्वलाह्वायकं, सिंहःमू, पादुका, अष्टमंगल, शंख चक्र गडा पद्म, धनुषबाण पूर्णकलश एवं तान्त्रिक देवदेवीपिनिगु यान्त्रिक मण्डल तथा प्राकृतिक प्रधानमूलक वस्तु चन्द्र, सूर्य, हिमाचल, पहाड पर्वत, ऋरना एवं राष्ट्रिय एकताया शुभ प्रतीक राजमुकुट व राजारानोया अनुहार राष्ट्रिय पुष्प गुराँस, राष्ट्रिय पंक्षि डाँफे व पञ्चायती दर्शनया प्रतीक हस्ताङ्गुली आदि विभिन्न समयय् विभिन्न प्रकारया धार्मिक, सांस्कृतिक, सामाजिक एवं राष्ट्रिय चिह्नत अङ्कित याना वइच्वन, उकिइ गनं गुवलेँ नेपाःया धर्ममूलक सांस्कृतिक स्रोत विशुद्ध दर्शनया केन्द्रीयभूत नेपाःया सर्वप्राचीन विशुद्ध कीर्ति जुयाः नं प्रागैतिहासिक इलंनिसेँ साक्षि स्वरूप ३३ कोटि देवताया आत्मा स्वरूप जुयाच्चंगु श्रीस्वयम्भू महाचैत्ययागु छाप अंकित यानातःगु खनेमदु । अज्ज धात्थेँ धाय्धाःसा स्वयम्भू महाचैत्य-यागु नां तकं उल्लेख जूगु मदुनि । स्वयम्भू ज्योतिरूप स्वयाः नं गुलिखय् लिपा लिपा खनेदय्कः वःपिँ वैश्रवण, शिव, पशुपति, वृष तथा लोकनाथ, करुणामय, कुमारी, भवानी, तलेजु माजु, गुह्येश्वरी, हरसिद्धि एवं गोरखनाथ, पशुपतिनाथ न्ह्यथनातःगु मुद्रात उख्येँ थुख्येँ राष्ट्रिय संग्रहालय, मुद्रा संग्रहालय दुने वनाः स्वयंवलय् कीसं खंकेफु । तर, अपशोच नेपाल अधिष्ठाता श्रीस्वयम्भू महाचैत्ययागु प्रतिमूर्ति व नां अंकित जुयाच्चंगु मुद्रात थौतकं गनं उपलब्ध जूगु खनेमदुनि । परन्तु, जितः आशा दु— प्रथम ऐतिहासिक मानदेव राजाया तापाःआजु बुद्धधर्मय् अतिकं श्रद्धा भक्ति दुहा शान्तिशील भिक्षु जुयाः शिष्यत्व ग्रहण याःह्य स्वयम्भू ज्योतिरूपयात पुनः चैत्याकार रूपय् निर्माण यानाब्यूहा ‘राजोत्तम सुगतशासन पक्षपाती’ धइगु उपाधि विभूषित जुयाच्चंगु वृषदेव राजायागु यदि मुद्रात लुयावल धाःसा निसन्देह उकिइ श्रीस्वयम्भू महाचैत्य चित्र अंकित जूगु दय्माः ।

संसारय् न्ह्यात्थाय् न्ह्यावलेँ ततःधंगु परिवर्तन वय्त, शुभ कार्य जुइत, ई-व्यः मजुइकं छुं ज्या अःपुक सफल मजु धइगु खँ इतिहासं कना मच्चंगु मखु । गथे हिन्दुस्तानय् अंग्रेजतय्गु पाखेँ स्वतन्त्र जुसेलि विशाल गणतन्त्र भारतं थःगु राष्ट्रिय मुद्राय् शान्तिनायक भगवान् बुद्धप्रति श्रद्धा अभिव्यक्त यानाः बुद्धजीवनीया सारांश लुमन्तिकथं मुख्य मुख्यगु घटनाया शुभ प्रतीकत अंकित यानाः पवित्र व शोभा वृद्धि यानाः बुद्धया शान्ति सन्देश सकभनं प्रचारय् हयाविल । थुगु अशोक स्तम्भय् मायादेवीया स्वप्न दर्शनया अर्थय् किसि, सर्वार्थसिद्ध जन्म जुयाः सप्तपद गमन याःगु अर्थय् पलेस्वां, हानं जन्म जुइसाथ प्यंगु दिशा स्वयाः सिंहनाद यानाविज्याःगु अर्थय् प्यहा सिंह तःगु जुल, सर्वार्थसिद्ध जम्बुवृक्षया

वव्य च्वनाः प्राणिपिसं आहार निमित्त दुःखसियाच्चंगु दृश्य खंगु अर्थय् द्वहं, अथे हे संसार खनाः विरक्त जुयाः महाभिनिष्क्रमण जूगु अर्थय् सल तयातःगु जुल, मेगु चला जक सर्वार्थसिद्धं अनुत्तर सम्यक् सम्बोधिज्ञान लानाः बुद्ध जुइ धुँसेलि थःह्वां प्राप्त यानागु ज्ञान ऋषिपत्तन मृगदावनय च्वनाः धर्मचक्र याःगुया अर्थय् चक्र चिह्न नं तःगु जुल धयातःगु थे' तुं नेपालय् नं एकतन्त्री हुकूमो शासन अन्त जुसेलि २००७ सालं लिपा प्रजातन्त्र वसेलि पक्षपात रहित जुयाः ह्लापाह्लापा थे' श्रीपशुपतिनाथयात जक महत्व मव्युसे श्रीस्वयम्भू महाचैत्ययात नं गौरवपूर्ण स्थान विइमाःगु खः धइगु महशूस यासे नेपाल राष्ट्र बैकया विवेकपूर्ण निर्णयकथं स्वयम्भू महाचैत्यप्रति श्रद्धा भक्ति तसे वि. सं. २०१६ फागुन ७ गतेया दिनय् ५।- न्यातका वंगु नोट व वि. सं. २०२६ पौष १४ गते खुनु हानं १०००।- द्वःछि तका वंगु नोटय् नं स्वयम्भू महाचैत्ययागु चित्र अंकित यानाः प्रचारय् हयाव्यूगु जुल ।

थ्व समस्त बौद्धतय्गु निमित्त तःधंगु हर्षथा विषय खः । बौद्ध शैव समन्वयवाद नेपाःमितय्गु सांस्कृतिक परम्परायात तस्सकं त्वःगु निष्कलंकगु ज्या खः । किन्यासःदं न्ह्योनिसें नेपाःयागु मौद्रिक इतिहासय् गुगु बुद्धधर्मप्रति सन्तोष मजूगु खः व समस्यायात पञ्चायती प्रजातन्त्र प्रवर्तक युग नेता स्वर्गीय श्री ५ महेन्द्रयागु विवेकपूर्ण व्यवस्थां समाधान यानाबिल । अज्ज आशा दु, नोट मुद्राय् जक मजुसे परन्तु धातु मुद्राय् नं श्रीस्वयम्भू महाचैत्ययागु चित्र अंकित जूगु स्वय्दइ धइगु । अले धाःसा निश्चय नं स्वयम्भू ज्योतिरूप प्रादुर्भावपाखे' उत्पन्न जूगु बुद्ध जन्मभूमि नेपाल देसयात 'बुद्ध जन्मभूमि' धकाः गौरवान्वित जुयाच्चंगु सार्थक जुइ । थुलि जक मखु समस्त हिन्दू धर्मावलम्बीतय्सं 'नवम अवतार बौद्धावतार' धकाः हालाच्चंगु नं खँ व ज्या मिलय् जुइ ।

खतु, कीगु जन्मभूमि नेपाल ह्लापांनिसें बौद्ध शैव निखलः नं छगू हे शाखा प्रशाखा थे' च्वनाः सुख दुःख हनाः समान रूपं व्यवहार यानावइच्चंगु खः । थुनिया ज्वलन्त उदाहरण छगू यल टंगवाहाः चाकबाहाःद्योया देगलय् च्वंगु तुनासि क्यनाच्चंगु दु । बौद्ध व शैव गुलि अभिन्न अंग धकाः स्पष्ट यानातःगु दु । उकिइ मूल कचाय् स्वयम्भू चैत्य, थुनियागु कचाय् शिवलिंग तयाः क्यना तइतःगु दनि । थुलि जक मखु कि शिवलिंगया गुगु आसन जलहरी खः व हे जलहरीया द्योने पञ्च बुद्धात्मक चैत्य तयाः दय्कातःगु नं मदुगु मखु । अज्ज विरूपाक्षया कथाया आधारकथं विचाः याय्वलय् नं श्रीपशुपति-नाथं मुखोऽष्टमीया दिनय् स्वयम्भू बुद्ध भगवान्या मुखलं पुयाः विरूपाक्षयागु अपराधपाखे वचय् जूगु व अले नेपाःया दकलय् सकलय् महत्वपूर्णगु व विशेषता दइच्चंगु अतिकं भव्यगु त्रिभुवनय् दुर्लभगु श्रीकरुणामय बोधिसत्व आर्यावलोकितेश्वर मत्स्येन्द्रनाथ बुंगद्योयागु रथजात्रा जुइवल्य् नं उगु रथया दकलय् च्वय् धकि वाय्मोया च्वस्सं श्रीस्वयम्भू आदिबुद्ध विज्याकेगु परम्परा थौतकं विद्यमान तिनि । इत्यादि सांस्कृतिक परम्परायागु पृष्ठभूमिपाखे नं प्रसिद्धि दइच्चंगु स्वयम्भू महाचैत्ययागु गौरवयात लुमंकाः उकियागु स्वागत सत्कारया लागी नेपाःयागु राष्ट्रिय मुद्रा न्यातका व द्वःछि वंगु नोटय् स्वयम्भू चित्र अङ्कित यानाव्यूगु जुल ।

गुलिसिनं धाय्फु न्यातका व द्वःछि वंगु नोटय् जक छाय् स्वयम्भू चित्र अंकित जुल ? उक्त राष्ट्र बैकया सर्वसम्मति बांलाःगु हे न्याय व तर्क संगत विचार अपनय् यानाः भावना अर्थ तत्त्व

विशुद्धि मिलय् जुइक दय्कूगु खनेदु । स्वयम्भूया आत्मकथा स्वयम्भू पुराणया प्रमाण अनुसारं मिलय्
 याःगु खनेदु—कारण, थ्व पञ्च महाभूतमय संसारय् पञ्च रश्मिमय ज्योतिरूप श्रीस्वयम्भू आदिबुद्धपाखें
 पञ्चबुद्ध दर्शन बियाः पञ्च महाविलोकन याताः पञ्च स्कन्धया आत्मा प्राणिपिनिगु पञ्च इन्द्रिय विशुद्ध
 याताः पञ्च ज्ञान-पञ्चबुद्धया शिक्षा-दीक्षापाखें जीवनया अन्तिम दर्शन यथार्थ तत्त्व विशुद्ध महासुख
 निर्वाण धातु धर्मधातु वज्रधातुपाखें परिलक्षित जुयाच्चंगु श्रीस्वयम्भू महाचैत्ययात पञ्च तत्त्वया महान्
 शुभ प्रतीक भाःपाः निर्विवाद सिद्ध याःगु जुल । थुगु तर्क संगत व प्रमाण युक्त जूगुलि न्यातका वंगु
 नोटय् स्वयम्भू तयाबिल, पाय्छि हे जुल । हानं द्वःछि वंगु नोटय् नं छाया स्वयम्भू चैत्ययात स्थान बिल
 धइगु विषय नं छकः बिचाः याता स्वय्, वसपोल स्वयम्भू महाचैत्य उत्पत्ति जुइन्ह्यो अर्थात् नेपाल
 कालीह्रद जुयाच्चंबलय् अकस्मात् सहस्र दल रत्नसरोज द्वःछि हः दइच्चंगु विशुद्धगु अलौकिक पलेस्वां
 ह्वल, उकिइ हे ज्योतिरूप प्रकाश जुयाः पञ्च रश्मिपाखें पञ्चबुद्ध दर्शन बिल, अले थुपि न्याह्यं छह्य
 जुयाः कालान्तरय् स्वयम्भू महाचैत्य रूपय् परिणत जूगु जुल । थ्व हे विषय कयाः गोशृङ्ग व्याकरण
 सूत्र अनुसारं थथे नं धयातःगु दु—वसपोल स्वयम्भू महाचैत्यया प्रभावं सप्त तथागतपि थन बिज्याः
 थे हानं भद्रकल्पया द्वःछिह्य बुद्धपि नं बिज्यानाः स्वयम्भू महाचैत्य दर्शन व पूजन याः बिज्याइ तिनि,
 लिस्सें व हे बुद्धपि सकसिनं थुगु पुण्यभूमि नेपाःदेयात पञ्च कषायपाखें रहित जुयाः प्राणिमात्रयात हित
 सुख शान्ति जुइगु बुद्धशासन चिरस्थायी जुयाच्चवनी धकाः अधिष्ठान (शुभ आशीर्वाद) बियावनी तिनि
 धइगु अर्थयात त्वःगु किसिमं संकेत यानाव्यूगु जुल ।

स्वयम्भूस भव्य रूपं बुद्धजयन्ती जूगु

नेपाःया निर्मित्थ्व स्वयम्भू महाचैत्य तस्सकं प्रसिद्धगु महत्त्वपूर्णगु अति प्राचीन तीर्थ स्थल जूगुलि दैय्दँसं बैशाख पूर्णिमाया दिनय् थ्व पवित्र स्थानय् बुद्धजयन्ती न्यायकूसां तवि बुद्ध संवत् २५०६ दै क्यंगु तदनुसार ने. सं. १०८६ स स्वयम्भू विकास मण्डलया ग्वसाःकथं विशेष रूपं समारोह न्यायकूगु जुल । थ्व बुद्धजयन्ती समारोह आःतक स्वयम्भू क्षेत्रस जूगु मध्यय् उल्लेखनीय जूगुलि थन प्रसंगवश थुगु कार्यक्रम विषयय् पाठकपिनिगु न्ह्योने प्रस्तुत यानाच्चवना :—

(१) सुप्रभात इलय् श्रीस्वयम्भू महाचैत्यया परम्पराकथं नित्यपूजा व आर्य महायनिक नामसंगिति सूत्र पाठ ।

(२) सुथसिया ८ ताः इलय् शील प्रदान ।

(३) सुथसिया ८.१५ ताः इलय् बुद्धपूजा ।

(४) सुथसिया ९ ताः इलय् न्याह्य वज्राचार्यपिसं निमन्त्रित सम्यक् देवता दीपंकरादिपिनिगु स्वागत सत्कार निर्मित्थ्व षोडशलास्य पूजा जुल ।

(५) बाल्हि न्ह्यो बाल्हां छुइगु, छाया-छी याय्गु, तपं वनेगु ज्या जुल ।

(६) आचार्य व भिक्षुगणपित भोजन प्रदान यात ।

(७) सम्यक् विधिकथं दान प्रदान जुल ।

(८) स्वपहः इलय् स्तुति पाठ पूजा यात ।

(९) ह्लिच्छिसंतुं पौभाः (बौद्ध चित्रकला) सम्यक् देवतापिनिगु भव्य रूपं सुन्दर मूर्ति प्रदर्शन तथा ज्ञानमाला भजन जुयाच्चवना ।

(१०) सन्ध्या इलय् आर्यनामसंगिति कीर्तन ।

(११) बहनी थाय्थासय् दीपावली व तुतः ब्वनाच्चंगु दु ।

(१२) छन्हु निन्हु न्ह्यवः हे थुगु महान् उत्सव बुद्धजयन्तीया लागी थाय्थासय् ध्वजा पताकादि किङ्कीनीजालपाखें सुशोभित यानाः तइतःगु दु । लिस्सें सुघर सफाई यानाः नस्वाः थनातःगु, उकिइसं

विशुद्धि मिलय् जुइक दय्कूगु खनेदु । स्वयम्भूया आत्मकथा स्वयम्भू पुराणया प्रमाण अनुसारं मिलय्
 याःगु खनेदु—कारण, थ्व पञ्च महाभूतमय संसारय् पञ्च रश्मिमय ज्योतिरूप श्रीस्वयम्भू आदिबुद्धपाखें
 पञ्चबुद्ध दर्शन बियाः पञ्च महाविलोकन यानाः पञ्च स्कन्धया आत्मा प्राणिपिनिगु पञ्च इन्द्रिय विशुद्ध
 यानाः पञ्च ज्ञान-पञ्चबुद्धया शिक्षा-दीक्षापाखें जीवनया अन्तिम दर्शन यथार्थ तत्त्व विशुद्ध महासुख
 निर्वाण धातु धर्मधातु वज्रधातुपाखें परिलक्षित जुयाच्चंगु श्रीस्वयम्भू महाचैत्ययात पञ्च तत्त्वया महान्
 शुभ प्रतीक भाःपाः निर्विवाद सिद्ध याःगु जुल । थुगु तर्क संगत व प्रमाण युक्त जूगुलि न्यातका वंगु
 नोटय् स्वयम्भू तयाविल, पाय्छि हे जुल । हानं द्वःछि वंगु नोटय् नं छाया स्वयम्भू चैत्ययात स्थान विल
 धइगु विषय नं छकः बिचाः याना स्वय्, वसपोल स्वयम्भू महाचैत्य उत्पत्ति जुइन्ह्यो अर्थात् नेपाल
 कालोह्रद जुयाच्चंबल्य् अकस्मात् सहस्र दल रत्नसरोज द्वःछि हः दइच्चंगु विशुद्धगु अलौकिक पलेस्वां
 ह्वल, उकिइ हे ज्योतिरूप प्रकाश जुयाः पञ्च रश्मिपाखें पञ्चबुद्ध दर्शन विल, अले थुपि न्याह्यं छह्य
 जुयाः कालान्तरय् स्वयम्भू महाचैत्य रूपय् परिणत जूगु जुल । थ्व हे विषय कयाः गोश्रृङ्ग व्याकरण
 सूत्र अनुसारं थथे नं धयातःगु दु—वसपोल स्वयम्भू महाचैत्यया प्रभावं सप्त तथागतपिं थन बिज्याः
 थे हानं भद्रकल्पया द्वःछिह्य बुद्धपिं नं बिज्यानाः स्वयम्भू महाचैत्य दर्शन व पूजन याः बिज्याइ तिनि,
 लिस्सें व हे बुद्धपिं सकसिनं थुगु पुण्यभूमि नेपाःदेयात पञ्च कषायपाखें रहित जुयाः प्राणिमात्रयात हित
 सुख शान्ति जुइगु बुद्धशासन चिरस्थायी जुयाच्चवनी धकाः अधिष्ठान (शुभ आशीर्वाद) बियावनी तिनि
 धइगु अर्थयात त्वःगु किसिमं संकेत यानाव्यूगु जुल ।

स्वयम्भूस भव्य रूपं बुद्धजयन्ती जूगु

नेपाःया निम्ति थ्व स्वयम्भू महाचैत्य तस्सकं प्रसिद्धगु महत्वपूर्णगु अति प्राचीन तीर्थ स्थल जूगुलि दैय्दँसं बैशाख पूर्णिमाया दिनय् थ्व पवित्र स्थानय् बुद्धजयन्ती न्यायकूसां तवि बुद्ध संवत् २५०६ दै क्यंगु तदनुसार ने. सं. १०८६ स स्वयम्भू विकास मण्डलया ग्वसाःकथं विशेष रूपं समारोह न्यायकूगु जुल । थ्व बुद्धजयन्ती समारोह आःतक स्वयम्भू क्षेत्रस जूगु मध्यय् उल्लेखनीय जूगुलि थन प्रसंगवश थुगु कार्यक्रम विषयय् पाठकपिनिगु न्ह्योने प्रस्तुत यानाच्चना :—

(१) सुप्रभात इलय् श्रीस्वयम्भू महाचैत्यया परम्पराकथं नित्यपूजा व आर्य महायनिक नामसंगिति सूत्र पाठ ।

(२) सुथसिया ८ ताः इलय् शील प्रदान ।

(३) सुथसिया ८.१५ ताः इलय् बुद्धपूजा ।

(४) सुथसिया ९ ताः इलय् न्याहा वज्राचार्यपिसं निमन्त्रित सम्यक् देवता दीपंकरादिपिनिगु स्वागत सत्कार निम्ति षोडशलास्य पूजा जुल ।

(५) बाल्हि न्ह्यो बाल्हां छुइगु, छाया-छी याय्गु, तपं वनेगु ज्या जुल ।

(६) आचार्य व भिक्षुगणपित भोजन प्रदान यात ।

(७) सम्यक् विधिकथं दान प्रदान जुल ।

(८) स्वपहः इलय् स्तुति पाठ पूजा यात ।

(९) ह्लिच्छिसंतुं पौभाः (बौद्ध चित्रकला) सम्यक् देवतापिनिगु भव्य रूपं सुन्दर मूर्ति प्रदर्शन तथा ज्ञानमाला भजन जुयाच्चन ।

(१०) सन्ध्या इलय् आर्यनामसंगिति कीर्तन ।

(११) बहनी थाय्थासय् दीपावली व तुतः ब्वनाच्चंगु दु ।

(१२) छन्हु निन्हु न्ह्यवः हे थुगु महान् उत्सव बुद्धजयन्तीया लागी थाय्थासय् ध्वजा पताकादि किङ्कीनीजालपाखें सुशोभित यानाः तइतःगु दु । लिस्सें सुघर सफाई यानाः नस्वाः थनातःगु, उकिइसं

लः त्वंकेगुनिसैं कयाः आकस्मिक प्राथमिक उपचारया लागी परोपकार संस्थाद्वारा आवश्यक उपचार यानाः भैषज्य वितरण याकातःगु नं दु ।

(१३) वज्राचार्यपिसं बुद्धजीवनी ललितविस्तर महावस्तु अवदान व स्वयम्भू महात्म्य स्वयम्भू पुराण बौद्ध दर्शन सम्बन्धी ज्ञान प्रज्ञापारमिता पुस्तक पाठ याका तइतल ।

(१४) पञ्चबुद्ध स्वरूपं थःथःगु वेशभूषाय् वज्राचार्यपिसं गुरु मण्डलार्चन यानाच्वन ।

(१५) पण्डित जोगमुनि वज्राचार्यद्वारा स्वयम्भू धर्मधातुयागु महिमा व बौद्ध दर्शन विषय्य व्याख्यान याकूगु दु ।

(१६) नेपाःया थःगु परम्पराकथं साहु बुद्धरत्न बोधिरत्नपिनिगुपाखें २१ ह्य वज्राचार्यपिसं सहस्र विधि अनुत्तर पूजाद्वारा धर्मधातु महामण्डल पूजा याकातःगु दु ।

(१७) तिब्बती महायानीकथं लामाजुपिसं थःथःगु वेशभूषाय् शानदारपूर्वक स्वयम्भू महाचैत्य परिक्रमा यायां विशेष प्रकारं स्वयम्भूयागु पूजा याःगु जुल ।

(१८) अथे हे थेरवादी (हीनयानी) भिक्षुपिनिगु तत्त्वावधानय् नं पालीवाङ्मयकथं बुद्धपूजा जुल ।

(१९) महायानी व थेरवादीया उपासक उपासिकापिनिगुपाखें थःथःगु गच्छे श्रद्धानुसारं पूजादि सत्कारया लागी तोपं वयावं च्वन, श्रद्धा अभिव्यक्त याःवयाच्वन ।

(२०) येँया किसानी दाजुकिजापिनिगुपाखें नं पछिमा भजन व प्वंगा पुयाः वाद्य थानाच्वन ।

(२१) थुख्ये मित्रराष्ट्रया पर्यटक वन्धुपिसं थुगु भव्य रूप महोत्सव समारोहयागु क्वांकी उत्सव गतिविधि मंगलमय वातावरण प्रचार व प्रसार निम्ति फोटो खिचय् याय्गु व फिल्म सुटिङ्ग याय्गुलिइ तत्पर जुयाच्वन ।

(२२) उख्येथुख्ये शाही अतिथि व पर्यटक एवं निमन्त्रित राजदूतावासपित स्वयम्भूया महत्व विषय्य अर्थ प्रतिपादन याके निम्ति प्रो० आशाराम शाक्यजुं परिचय न्यंकाच्वंगु खनी ।

(२३) थाय्थासय् बुद्धवचन व धर्मोपदेशया सारयुक्त सन्देशया उक्तित उख्येथुख्ये तूलकापतय् च्वयाः सजय् याना तइतःगु खनेदयाच्वनी ।

(२४) अले स्वयम्भू विकास मण्डलया प्रचार विभागद्वारा पुस्तिका, माय्प, पम्प्लेट कार्यक्रम आदि न्हून्हुगु शुभ सन्देशत वितरण यानाः वाय्ज नं इना वियाच्वंगु दु ।

(२५) २१ ह्य आचार्यपिसं बोधिसत्वपिनिगु पवित्र उद्देश्यं जायाच्वंगु सुन्दर पद्य आर्यभद्रचरी प्रणिधान च्वं च्वंगु ताय् दयाच्वनी ।

(२६) थ्व हे उपस्थित दीपङ्करादि सम्यक् देदतापित तोपं वयाच्वंगु दान प्रदान जुयाच्वंगुया छगू छगू दान गाथाया सुन्दर घोष उच्चारण जुयाच्वंगु सः ताय्दयाः शान्तं दानशील भावनाया आभास फल्कय् जुयाच्वनी ।

(२७) परोपकार अनाथालयया मस्तय्सं उख्येथुख्ये दीपावली च्याकेत सहयोग प्रदान याना वइच्वंगु नं मदुगु मखु ।

(२८) स्वयम्भू वर्णनपाखें सहित जुयाच्वंगु नेपाल भाषां च्वइतःगु 'भाषाभिलाष' नामक पुस्तिका नं थाय्थासय् इनाच्वंगु खनेदु ।

(२९) थुजाःगु समारोहय् माननीय मन्त्रीगण, वैदेशिक कूटनैतिक राजदूत व गण्यमान्य प्रतिष्ठित व्यक्ति तथा श्रद्धालु सज्जन भक्तजनपि स्वयम्भू महाचैत्ययागु आभास प्रतिभास स्वयाः आनन्द कयाः गौरव तायाचवनी ।

(३०) सम्बन्धित कार्यकर्ता वरिष्ठ सदस्यत आवश्यक ज्या-खँय् उख्येथुख्ये थःथःगु कार्यभार ज्वनाः अलिस व दिक्कयात तोताः उत्साह व वीर्य पिकयाः तत्पर जुयाच्वंगु खनेदइ ।

(३१) उपर्युक्त समारोह सुसम्पन्न याय्या कारणय् आवश्यक सरसामग्री माइक, लाउडस्पीकर, बिजुली, टेपरेकर्ड आदि आदियागु उचित व्यवस्था जुयाच्वंगु नं दु ।

(३२) थुगु बुद्धजयन्तीयागु भव्य रूप समारोहय् ब्वयातइतःपि बौद्ध मूर्तिकला ज्वलन्त उदाहरण स्वरूप निमन्त्रित सम्यक् देवता दीपङ्करादि बुद्ध बोधिसत्व एवं आर्यतारादि गण तथा बौद्ध चित्रकला श्रावक महायान व वज्रयानया शान्त क्रोधया देवदेवी, गुरु देव डाकिनी सम्बर धर्मपाल आदिया सुन्दर प्रतिभराद पौभाः निम्नप्रकारं उपस्थित याका तइतःगु खनेदु—

कान्तिपुर महानगरया सम्यक् देवतापिं

१. श्रीस्वयम्भू भगवान् अमिताभ तथागत सूवर्ण मूर्ति कुछिहाकः खजला सहित ।	
२. इतुंवाहाःया सम्यक् देवता दीपङ्कर काष्ठ अलंकारित कृत्याहाकः ।	
३. इतुंवाहाःया सम्यक् देवता सुवर्णया अलंकारित	५ कुहाकः
४. इतुंवाहाःया सम्यक् देवता काष्ठ रंगीन अलंकारित	४ ^१ "
५. वँतु बिच्छेवाहाःया सम्यक् देवता सुवर्णया अलंकारित	५ "
६. वँतु चीधंवाहाःया सम्यक् देवता सुवर्णया अलंकारित	५ "
७. वँतु चीधंवाहाःया सम्यक् देवता काष्ठ रंगीन अलंकारित	४ "
८. जनवाहाः सम्यक् देवता काष्ठ रंगीन शिलाकुपिण्डपात्र धारी	४ "
९. दुगंबही सम्यक् देवता काष्ठ रंगीन अलंकारित	४ "
१०. थँवही गर्जु वज्रधातु चैत्य सुवर्णया क्वलाछि	
११. इतुंवाहाः ज्यासःननि दीपङ्कर सुवर्णया अलंकारित	५ "
१२. असंचुक धालासिको " " "	५ "
१३. क्वहिति " " "	५ "
१४. लगंवाहाः " " "	५ "
१५. " चैत्य "	२ "
१६. खुसिबही दीपङ्कर काष्ठया	४ "

सप्ताक्षरी कूटाक्षर हृदयफो सहित ।

१७. खाई सिमाक्व	दीपङ्कर	सुवर्णया	अलंकारित	४ $\frac{१}{२}$	कुहाकः
१८. तु छेँ न्यतपाःचो (चैत्य सहित)	"	"	"	५	"
१९. ओमवाहाः (थासंचो सहित)	"	"	"	४ $\frac{१}{२}$	"
२०. अरकोबही	दीपङ्कर	काष्ठमय रंगीन		४ $\frac{१}{२}$	"
२१. श्रीघःविहार	"	"			
२२. श्रीघःविहार	"	सुवर्णया	अलंकारित	४ $\frac{१}{२}$	"
२३. इतुं बाहाः	"	"	"	५	"
२४. लगं बाहाः (थासंचो सहित)	"	"	"	५	"
२५. पुं छेँ बाहाः	"	"	"	४ $\frac{१}{२}$	"

उष्णीष विजय थासंचो सहित ।

२६. टेकं बाहाः भोताहिति शिलाकुपिण्डपात्रधारी सुवर्ण मूर्ति म्हुछिहाकः
 २७. यो बाहाः सम्यक् देवता काष्ठया रंगीन म्हुछि
 २८. ते बाहाः सम्यक् देवता सुवर्णया अलंकारित १ $\frac{१}{२}$ "
 २९. न्यत पसःननि सम्यक् देवता सुवर्णया कर्मत्वाक सहित विशेष

अलंकारित सहित २ $\frac{१}{२}$ "

ने. सं. ६४४ भाद्रकृष्ण २ शुक्रवार कान्तिपुर डत यंकुल विहारया तोलाधर बालकृष्ण ।

अलंकार :- हावादारी किकीपा, मुकुट, छत्र, कर्णपताक, कर्णध्वज, जडाड सहित पिफो कुण्डल, बाहुपताक, वनमाला, मोहमाला, शिखरीमा, कण्ठीमा, नागमा, अष्टमंगलमा, हृदयफो, चुल्या, पलेफो, नवरत्न सहित हृदयफो ।

३०. अरकोबही (धर्मवंशी) सम्यक् देवता सुवर्णया थासंचो सहित अलंकारित	१ $\frac{१}{२}$	कुहाकः
३१. यतखा दीपङ्कर काष्ठया रंगीन	१	"
३२. न्यतबाहाः (लगं पाखे) दीपङ्कर काष्ठया रंगीन	१	"
३३. सिख्वंमूवाहाः दीपङ्कर काष्ठया रंगीन	२	"
३४. खुसिबही दीपङ्कर सुवर्णया अलंकारित	२	"

जःखः भिक्षु समेत सुवर्णया ।

३५. ध्वाकाबाहाः शाक्यमुनि बुद्ध सुवर्णया	१	"
३६. जःधुं छेँ थासंचो समेत	दीपङ्कर सुवर्णया अलंकारित	४ $\frac{१}{२}$ कुहाकः

३७. यतखावाहा: (दानजीव)	दीपङ्कर	सुवर्णया	अलंकारित	५	कुहाक:
३८. थाय्मरु (सिद्धिरत्न)	"	"	"	५	"
थासंद्यो समेत					
३९. नःघ गंवाहा:	"	"	"	४ $\frac{१}{२}$	"
४०. धालासिको	"	"	"	३ $\frac{१}{२}$	"
थासंद्यो समेत					
४१. नबही	"	"	"	४	"
ने. सं. ६२३ स जीर्णोद्धार जूगु ।					
४२. नःघ: (माणिक साहु)	"	"	"	५	"
४३. थाय्मरु न्हुवाहा: (जोगवीर)	"	"	"	५	"
थासंद्यो समेत ने. सं. १०१८					
४४. ब्रम्हत्वा: तःननि (कुलमान)	"	"	"	५	"
४५. कोसावाहा: (ह्युमतत्वा:) दीपङ्कर काष्ठया रंगीन अलंकारित					
४६. इतुंवाहा: लःकाःननि दीपङ्कर सुवर्णया अलंकारित				४	"
४७. न्ह्योखा (सम्यकरत्न तुलाधर) दीपङ्कर सुवर्णया अलंकारित				४ $\frac{१}{२}$	"
थासंद्यो सहित					
४८. तःवाहा: लगं दीपङ्कर सुवर्णया अलंकारित				१ $\frac{१}{२}$	"
४९. इतुंवाहा: लःकाःननि ललितासनी तारादेवी, थ्वया मुल्य् बालक मां					
घय्पुना: दनाच्चंगु दु, काष्ठमय रंगीन				२	"

थ्व हे सम्यक् देवतापिनिगु ऊवल्य् छचाःख्यरं शोभायमान जुइक ब्वयातइतःगु विभिन्न प्रकारया पौभाः—

स्यंगुबहीया अंगःया पाताय् ब्वयातइतःगु

१. लुम्बिनी वन जात्रा (तिब्बती शैली)
२. शाक्यमुनि बुद्ध तोरण व आसन सहित
३. वसुन्धरादेवी मण्डल थ्वया छचालं सूर्योदय राजाया जीवनी अङ्कित
४. तिलाव्रतया महात्म्य
५. नीलाचल मण्डल
६. चक्रसम्बर मण्डल
७. स्वीन्याहा तथागतया दथुस हेवज्ज नैरात्मा
८. आकाशयोगिनी प्रमुख धर्मगण्डी महाकाल, चक्रसम्बर, लामाजु, सिद्ध, चित्तिपति सहितगु पौभाः काचोपि भरय् याना तइतःगु ।

६. मेषसम्बर (वज्रभैरव)
 १०. अष्ट तारादेवीया दथुस आर्यतारादेवी
 ११. सप्तलोचनी आर्यतारा
 १२. ध्वजाग्र केयूरी

स्यंगुबहीया चव्यागु अंगलय्

१३. षोडश महास्थवीरपिनिगु सुन्दर मूर्ति अङ्कितगु ६ खुपाः पौभाः ।
 १८. शाक्यमुनि तथागतया जःखः अग्रश्रावक शालिपुत्र व महामौङ्गल्यायन सहित ।
 १९. षडक्षरी लोकेश्वर व त्रिकुलनाथ ।

जीवगुजुया छेया लङ्पाखे चव्यागु भागय्

२०. लुम्बिनी वनय् मायादेवीया सर्वार्थसिद्ध जन्म जूगु दृश्य ।
 २१. शुद्धोदन महाराजायाके मायादेवीया इनाप वन विहारया लागी ।
 २२. शाक्यसिंह तथागत स्वर्गावतरित ।
 २३. शाक्यमुनिया धर्मोपदेश ।
 २४. शाक्यमुनिया जःखः शालिपुत्र व महामौङ्गल्यायन ।
 २५. शाक्यमुनिया मार विजय ।
 २६. शाक्यसिंह तथागत सिंहशय्यासनय् विराजित ।
 २७. शाक्यमुनिया जःखः षडक्षरी लोकेश्वर व आर्यतारा थःथः गण सहित यासे कूटागारपाखे सुशोभित याना तइतःगु, लिस्से त्रिकालबुद्ध सहित जूगु ।
 २८. गुरु वज्रधर हृदि स्थित शाक्यसिंह तथागत दत्थुइ तयाः थ्वया छ्चालं गुह्यदेवता धर्मपाल सहित यासे थ्वया नं पिने स्थवीरवादी भिक्षुपि व महासांघिक बोधिसत्व गण ।
 २९. विशुद्ध श्रावक संघया गुरु परम्परानुसार गुरु सुमति सिद्धि कीर्ति (चोङ्खापा) या नेतृत्वय् संघायन जुयाच्चंगु दृश्य ।
 ३०. शाक्यमुनि बुद्ध (२८ नं. अनुसारगु) ।
 ३१. खङ्ग पुस्तक धारण यानाः धर्मचक्र मुद्रा यानाच्चंह्य ललितासनय् उपस्थित जुयाच्चंह्य छ्हा लामाजु ।
 ३२. थ्व हे (३१ नं. अनुसारं) वज्रासन यानाच्चंह्य गुरु चोङ्खापा ।
 ३३. गुरु चोङ्खापाया मेगु मूर्ति ।
 ३४. सुरम्य कूटागारया दत्थुइ आर्यतारादेवी थ्वया छ्चालं अष्टतारादेवीपि ।

३५. शालिपुत्र, मौद्गलि सहित शाक्यमुनि ।
३६. अपरिमिता, उष्णीष विजय, सप्तलोचनी तारा स्वह्म ऊवःलाक ।
३७. वज्रयोगिनी ।
३८. आर्यतारादेवी ।
३९. गरुड गयाच्वंह्य खड्गवीर महाकाल ।

जीवगुर्जुया छेया मातं तल्लाय् ब्वयातःगु

४०. छ्वेदाग् (अधोदृष्टि शास्त्रार्थ मुद्रा) ।
४१. छ्योग्ल्लाङ्ग (उर्ध्व दृष्टि तर्कसंछेद मुद्रा) ।
४२. फिग्न्हेन् (शान्तदृष्टि लेखनी संचारित मुद्रा) ।
४३. लुङ्गधुव् नागार्जुन (उपदेश मुद्रा) ।
४४. योन्तेन्ह्वे (गुणप्रभ) थःगु मुल्य् धर्मग्रन्थ अवलोकन यानाः जःखः शिलाकू व पिण्डपात्र तयाच्वंह्य ।
४५. बोधिवृक्ष मूल्य् शाक्यसिंह तथागत ।
४६. आर्यदेव वितर्क मुद्रा अभय ।
४७. असंग धर्मग्रन्थ सहित उपदेश मुद्रा ।
४८. शाक्यप्रभ ।
४९. षोडश महास्थवीरपिनिगु ६ खुपाः पौभाः ।
५५. बुद्धजन्म लुम्बिनी दृश्य ।
५६. मायादेवी महाराज शुद्धोदनयाके अनुमति पवनाच्वंगु ।
५७. सिद्धार्थ गौतमया चूडाकर्म ।
५८. रत्नप्रभ तथागत ।
५९. शाक्यमुनि तथागत ।
६०. भविष्य व्याकरण मुद्रा बुद्ध ।

अग्निपुरपाखे च्वंगु छेया इवल्य् छ्यलि तल्लाय्

६१. त्रिकोण मध्यस्थ विद्याधरीदेवी ।
६२. कालचक्र ।
६३. नैरात्मा गुह्येश्वरी ।
६४. वज्रबाराही ।

६५. वज्रयोगिनी व लिक-मार्फा, मिलारेपा सहित ।
 ६६. अष्टतारादेवीया दत्थुइ आर्यतारा ।
 ६७. कालचक्र ।
 ६८. वज्रयोगिनी ।
 ६९. हेवज्र नैरात्मा ।
 ७०. श्वेतयोगिनी (ज्ञान डाकिनो) डमरु ज्वनाः च्वेत् यानाच्च्वं पि न्यागू गण सहित ।
 ७१. हाकुगु भूमिइ लुं च्वयातइतःगु रक्तवर्ण अग्निज्वालाया दत्थुइ मेषसम्बर ।
 ७२. श्वेतजोगिनी (७० नं. अनुसारगु)
 ७३. छ्वासकामिनो (७१ नं. अनुसारगु)

अग्निपुरपाखे च्वंगु छेँया निगूगु तल्लाय्

७४. शाक्यमुनिया मार विजय ।
 ७५. शाक्यमुनि तथागत स्वर्गावतरित ।
 ७६. शाक्यसिंह तथागत सिंह शय्याय् बिज्याःगु ।
 ७७. स्वर्गावरित शाक्यमुनि बुद्ध ।
 ७८. अष्ट बोधिसत्व सहित कूटागारय् अमिताभ बुद्ध ।
 ७९. शाक्यमुनि व थ्वया शिष्य ।
 ८०. एकादश शीर्ष सहस्रभुज लोकेश्वर ।
 ८१. कारण्डव्यूह लोकेश्वर ।
 ८२. श्वेतवर्ण वज्रसत्त्व ।
 ८३. छ्वासकामिनी देवी ।
 ८४. खड्गाचल ।

शान्तिपुरया लँपुइ ध्वाकाफुसय्

- ८५-८२. प्रभा व आसन सहित शाक्यमुनि कार्चोपि भरय् याना तइतःगु (चीन शैली) तस्वीरया रूपय् ।

सानुगुजुँया छेँया छ्यलि तल्लाय्

८३. जेरमुचिया छोसिङ्ग ।
 ८४. कूटागार सहित उकिइ अपरिमिता तथागत ।

६५. शाक्यमुनि बुद्ध ।
६६. शाक्यसिंह तथागत ।
६७. महिष सम्बर ।
६८. चतुर्भुज प्रज्ञापारमिता देवी ।
६९. एवंकारया विशुद्धिचक्र मण्डल (वज्रवाराही मण्डल) ।
१००. अपरिमाता तथागत ।
१०१. शाक्यसिंह तथागत ।
१०२. शाक्यसिंह तथागत ।
१०३. शाक्यसिंह तथागत ।
१०४. कूटागारया दुने अमिताभ तथागत ।
१०५. उपदेश मुद्रा शाक्यमुनि बुद्धया छ्चालं बुद्धजीवनीया किनिगू चरित्र अंकितगु ।

उत्तर लङ्का छेँया छ्यलि तल्लाय्

१०६. श्वेतवर्ण द्विभुज प्रतिमुख वज्रपर्यंक आसन प्रथम हस्त वरद मुद्रा, द्वितीय हस्त पद्मोपरी खङ्ग (मञ्जुश्री विशेष ?)
१०७. षडक्षरी लोकेश्वर, मञ्जुश्री वज्रपाणि ।
१०८. श्वेतवर्ण सिंहवाहिनी देवी प्रथम हस्त वज्र द्वितीय हस्त कलश ।

उत्तर लङ्का छेँया निगूगु तल्लाय्

१०९. कूटागार सहित आर्यतारा ।
११०. आर्यतारा देवी ।
१११. श्वेतवर्ण वज्रसत्त्व ।
११२. विद्याधरी ।
११३. सुखावती भुवनय् गणचक्र सहित अमिताभ तथागत ।
११४. त्रिकाल बुद्ध मूर्ति पञ्चबुद्ध अष्ट बोधिसत्त्व व षोडशस्थवीर प्रभृति ।
११५. तोरण आसन युक्त शाक्यमुनि ।
११६. अमिताभ तथागत ।
११७. रत्नसंभव तथागत ।
११८. वैरोचन तथागत ।

हारितीया लिउनेपाखे च्वंगु छैया निगूगु तल्लाय्

११९. उष्णीष विजय व थ्वया छचालं रक्तचन्दनं च्वइतःगु १०० ह्य उष्णीष विजय ।
१२०. मामकीदेवी—त्रिनेत्र प्रतिमुख अष्टादश भुज पञ्चनागोपरी स्थित पात्रया द्योने मत्स्य आसन यानाः नृत्यपद मुद्राय् दनाच्चंह्य ।
थुकिइ हे हेवज्र कालचक्र, चक्रसम्बर, षड्योगिनी एवं महावज्रसत्त्व आदि धर्मपालपिं उपस्थित यानातःगु दु ।
ने. सं. १०१४ थिलाथ्व १० स इत पसननी यंकुलविहारया तोलाधर बुद्धरत्न संघरत्न, चक्ररत्न स्वह्यसिनं च्वचका जुल ।
१२१. अष्टश्मशान परिवृत वज्रवाराही मण्डल ।
१२२. चतुर्भुज महाकाल, रत्नमहाकाल, धर्मगण्डी महाकाल एवं छ्वासकामिनी सहित ।
१२३. वज्रपाणि थ्वया जःखः चैत्य अले विश्ववज्र धर महाकाल घण्टधर महाकाल नं समाबेस जुयाच्चंगु दु । थुकिइ सकभनं रञ्जना लिपि 'ॐ अमरणि जीवन्ति स्वाहा' नामक मन्त्रपदं जाय्काः शोभा वृद्धि याना तइतःगु नं खना ।
१२४. चक्रसम्बर मण्डल ।
१२५. एकादश लोकेश्वर मण्डल षट्गति उद्धारक षट्मुनि सहित ।
१२६. शाक्यमुनि तथागत ।
१२७. अपरिमिता तथागत थ्वया छचालं ह्याउँ मसि च्वइतःगु १०८ ह्य अपरिमिता ।
१२८. सिंह शय्यासनय् शाक्यसिंह तथागत ।
१२९. सिद्ध मार्फा, नारोपा तिलीपाया च्वस्सं गुरु वज्रधर ।
१३०. भैषज्यराज तथागत, ध्वजाग्रकेयूरी, शुद्धजीव राजा (थिसुङ्ग देहुचेन) जम्बद आदि थ्वया लिक्क क्वस्सं रत्नमण्डल दोहलपाच्चंह्य छह्य लामा ।
१३१. वज्रवाराही ।
१३२. चतुर्भुज महाकाल ।
१३३. खङ्ग पुस्तक व खट्वांग धारी छह्य लामाजुया चित्र ।
१३४. शाक्यसिंह तथागत (२८ नं. अनुसार)
१३५. वज्रयोगिनी व चित्तिपति सहित ।
१३६. आर्यतारादेवीयागु छोसिङ्ग ।
१३८. महाप्रत्यङ्गिरादेवी ।
१३९. दण्डी व पाश ज्वनाः सल गयाच्चंह्य क्रोध मूर्ति छह्य धर्मपालया मूर्ति ।
प्रसङ्गवश थ्व हे पौभाः ब्वयातःगु ऊवलय् तस्वीरत नं प्रदर्शित जुयाच्चंगु खनेदु :—
१. राहुलयात गौतमबुद्धं उपदेश बियाच्चंगु ।

२. महासत्त्व राजकुमारयागु जीवनी सम्बन्धी विविध तस्वीर १२ पाः ।
 १३. सिंहल सार्थबाहुयात करुणामयं उद्धार याःगु विषय जम्मा ६ पाः ।
 २२. सिद्धार्थयात कुलदेवता दर्शन याके यंकूगु ।
 २३. कामरुकामाक्ष देसय् बुंगद्योया अबुनाप आचार्य बन्धुदत्त, जुजु नरेन्द्रदेव व रथचक्र भरिया स्वह्य मुनाः सत्यकराल याकाच्चंगु ।
 २४. वहःपाताय् लुम्बिनी वन जात्रा कियाः थकयाः लुँयागु जलप तथाः बांलाकातःगु कलात्मक तस्वीर ।
 २५. थुगु हे रूपं रूप्यमय भूमिइ देवदेवता जुक्व लुं सियाः दय्कातःगु स्वयम्भू उत्पत्ति व सप्ततथागतपि आगमन जूगु दृश्य अंकित तस्वीर ।
 २६. बन्धुदत्तयागु आराधनाकथं करुणामय थःगु लुखां पिहांवनेत तत्पर जुयाच्चंबलय् वया मामं लुखाखलुइ थस्सःपायाः सँ फं फं तथाः घनाच्चंगु दृश्य ।
 २७. पौभाःया रूपय् च्वइतःगु चक्रसम्बरयागु महामण्डल अतिकं बांलानाः नं तस्सकं मिहीन जुइक दय्कातःगु ।
 २८. त्रिस्कन्धया स्वीन्याह्य तथागतपिनिगु चित्र लुं च्वयातःगु तस्वीर ।

थुगु रूपं २५१० दँ क्यंगु बुद्धजयतीया उपलक्षय् स्वयम्भू महाचैत्यया चाकलय् ललितपुर महानगरया सम्यक् देवतापि निमन्त्रणा याःगु जुयाच्चन । उपस्थित सम्यक् देवतापिनिगु नामावली थथे खः—

१. स्वयम्भू भगवान्
२. टंगबाहाः
३. धुँबाहाः
४. चुकबाहाः
५. कुलिमबाहाः
६. क्वाःबाहाः भलिभारो सहित ।
७. ओमबाहाः
८. दौबाहाः
९. तःबाहाः
१०. बूबाहाः
११. हकबाहाः
१२. ज्योबाहाः
१३. गुजिबाहाः

सुवर्णया दीपङ्कर अलंकार युक्त	४	कु
धातुया दीपङ्कर	५	कु
सुवर्णया दीपङ्कर	२	कु
सुवर्णया दीपङ्कर	५	कु
सुवर्णया दीपङ्कर	४ $\frac{१}{२}$	कु
" "	५	कु
" "	५ $\frac{१}{२}$	कु
" "	४	कु
" "	४	कु
" "	४	कु
" "	४ $\frac{१}{२}$	कु

१४. भिन्धेबाहाः१	सुवर्णया	दीपङ्कर	४ $\frac{१}{२}$	कु
१५. सुबाहाः	"	"	४ $\frac{१}{२}$	कु
१६. यच्छुबाहाः	काष्ठ रंगीन	दीपङ्कर	३ $\frac{१}{२}$	कु
१७. नौद्वँबाहाः	सुवर्णया	दीपङ्कर	५	कु
१८. मिच्छुबाहाः	"	"	१ $\frac{१}{२}$	कु
१९. जेमाद्यो क्वाःबाहाः	"	"	३ $\frac{१}{२}$	कु
२०. दारिकाबाहाः	"	"	१ $\frac{१}{२}$	कु
२१. इखाछेँबाहाः	"	"	१ $\frac{१}{२}$	कु
२२. आनवाहाः	ताम्रधातु	"	१ $\frac{१}{२}$	कु
२३. अकिवाहाः	काष्ठ रंगीन	"	१ $\frac{१}{२}$	कु
२४. अथवाहाः	सुवर्णया	मैत्रेय	१	कु
२५. मूबाहाः	सुवर्णया	दीपङ्कर	२	कु
२६. नागबाहाः कमलाजु	"	"	५ $\frac{१}{२}$	कु
ने. सं. ७५४ लुचि दुनय् षडक्षरी अंकित ।				
२७. नागबाहाः चीबाहाः चुक कनकजु	सुवर्णया	दीपङ्कर	५	कु
२८. ओनवाहाः उज्जदेव	"	"	५	कु
२९. दुरुख्यःबाहाः (वादेस)	"	"	४ $\frac{१}{२}$	कु
३०. बूबाहाः (गणेशमान)	"	"	४ $\frac{१}{२}$	कु
३१. सिबाहाः	"	"	५ $\frac{१}{२}$	कु
३२. सिबाहाः कचाबाहाः	"	"	५ $\frac{१}{२}$	कु
शिलाकुपिण्डपात्रधारी काष्ठमय मूर्ति				१ कु
३३. नकबही भाईआजु	सुवर्णया	दीपङ्कर	५	कु
ताराखो सहित ।				
३४. मूबाहाः	"	"	५	कु
लण्डिकुण्ड आजु सहित ।				
३५. यताबाहाः कमीचा आजु	"	"	३ $\frac{१}{२}$	कु
३६. नकबही शिलाकु पिण्डपात्रधारी			३ $\frac{१}{२}$	कु
३७. ईवही थासंद्यो सहित	"	"	४ $\frac{१}{२}$	कु
३८. भिन्धेबाहाः	"	"	१ $\frac{१}{२}$	कु

१- भिन्धेबाहाःया क्वस्सं उबाहाःया दीपङ्कर जुइमागु खः, तर छुं कारणवश थन उपस्थित याय् मफुत । थथे हे मेमेथाय् नं जूगु दु ।

३६. सुबाहा:	सुवर्णया	दीपङ्कर	४	कु
४०. थकुं बाहा: प्रभा सहित	"	"	१२	कु
४१. इलायबही	"	"	२२	कु
४२. तवाहा: जेमाद्यो	"	"	५१	कु
४३. ताजाफ हिला आजु	"	"	५१	कु
४४. न्याचूक धर्मसिंह आजु	"	"	५१	कु
४५. ह:खा प्याकलां आजु	"	"	५	कु
ने. सं. ६५४ स निर्मित ।				
४६. नागबाहा: मुनिधं आजु	"	"	५	कु
ने. सं. ६६८ स निर्मित धाखा: साहु ताराखो सहित ।				
४७. नागबाहा: धर्मध्वज आजु खिचाखा: साहु ताराखो सहित "	"	"	५	कु
४८ ओनबाहा: बेखाराज धूस आजु	"	"	५	कु
ताराखो सहित ।				
४९. नागबाहा: गजेन्द्रवज्र आजु खिचाखा:	"	"	५	कु
ताराखो सहित ।				
५०. नागबाहा: दानमुनि धाखा:	"	"	४१	कु
५१. इकुलि वागनरसि लामाजु	"	"	४१	कु
५२. क्वा:बाहा: साखती जेमा	"	"	४१	कु
५३. हकबाहा: जोगाजु	"	"	४	कु
५४. क्वा:बाहा:				

स्वयम्भू विकास मण्डलया आयोजनाकथं स्वयम्भू क्षेत्रय् स्वदैयंकं स्वंगू सहर येँ, यल व ख्वपया सम्यक् देवता स:तेगु निर्णय जूगुलि थुगु बुद्ध संबत् २५११ दै क्यंगु उपलक्षय् भक्तपुरया सम्यक् देवतापि निमन्त्रणा या:गु जुल । उपस्थित सम्यक् देवतापिनिगु धल: थथे ख:—

१. श्रीस्वयम्भू भगवान् सुवर्णया अक्षोभ्य तथागत ।
२. साकु कोथाया चतुर्ब्रह्मविहार जयरत्न आजु सुवर्णया दीपङ्कर ने. सं. ८०७ ५ कु
३. साकु कोथाया जयरत्नकाय ५ कु
४. साकु कोथाया जयमुनि ५ कु
५. साकु कोथाया सुवर्णया कूटागाराकृति चैत्य २ कु
थ्व चैत्य थ:गु हे विशेषता पूर्ण १५ गू शदी ।
६. क्वाथन्दौ प्रशन्नशील महाविहार सुवर्णया दीपङ्कर ५१ कु
७. ठिमी हेमवर्ण प्रशन्नशील महाविहार सुवर्णया ५१ कु
८. ठिमी गुणकीर्ति प्रशन्नशील महाविहार सुवर्णया ५१ कु

६. ठिमी हेमवर्ण प्रशन्नशील महाविहार सुवर्णया दीपङ्कर	३	कु
१०. ठिमी हेमवर्ण प्रशन्नशील महाविहार शिलाकु पिण्डपात्र युक्त	२१	कु
११. ठिमी पाटीबाहाः काष्ठमय दीपङ्कर	४	कु
१२. भोत पारावर्त विहार काष्ठमय दीपङ्कर	४	कु
१३. भोत पारावर्त विहार काष्ठमय दीपङ्कर	४	कु
१४. नालादेस उत्तरापन्थ महाविहार काष्ठमय दीपङ्कर	३१	कु
१५. खम्पु मन्त्रसिद्धि महाविहार काष्ठमय दीपङ्कर	४१	कु
१६. खम्पु मन्त्रसिद्धि महाविहार काष्ठमय दीपङ्कर		
१७. पनौति धर्मधातु महाविहार—पमादिटोल काष्ठमय दीपङ्कर	४१	कु
१८. पनौति काशीवर्ण महाविहार नूवाहाः काष्ठमय दीपङ्कर	४१	कु
१९. ठिमो दथुबाहाः काष्ठमय दीपङ्कर	४	कु

प्रधानमन्त्री उनूया स्वयम्भू महाचैत्य दर्शन व पूजन

राष्ट्रनायक श्री ५ महाराजाधिराज सरकार महेन्द्र वीर विक्रम शाहदेवजुया निमन्त्रणानुसार बर्माया महामहिम प्रधानमन्त्री श्रीउनू थःगु दलया नापं नेपाः काल । थ्वय्कःनाप श्रीमती उनू नं दु । उवल्य् नेपाःया बुद्धधर्मया केन्द्रविन्दु श्रीस्वयम्भू महाचैत्य दर्शन व पूजन निम्ति वि. सं. २०१८ पौष २५ गते सुथसिया क्तिताः इलय् स्वयम्भू पर्वतय् थ्यंकःकाल ।

स्वयम्भू पर्वत स्थान थ्यँसेलि काठमाण्डू उपत्यकाया उच्च ध्वज विमान् थे' शोभायमान जुयाच्चंगु रमणीय स्थल स्वयम्भूइ च्वनाः पहाड पर्वतं चाःहुलाच्चंगु नेपाःया राजधानी काठमाण्डू सहरयात दृश्यावलोकन यानादिल । लिस्से' सर्वसुगतगर्भ श्रीस्वयम्भू महाचैत्यया अमिताभ बुद्धयाथाय् सुविनीतपूर्वक पूजा अर्चना यानाः प्रदक्षिणा यानादिल ।

थनंलि आनन्द कुटी थ्यँसेलि स्वयम्भू विकास मण्डल, आनन्द कुटी विद्यापीठया विद्यार्थी व भन्तेपिसं शिष्टाचारपूर्वक वय्कःयागु स्वागत यात । लिस्से' भिक्षु अमृतानन्द भन्तेनं स्वागत भाषणया सन्दर्भय् नेपाल सुपुत्र शान्तिनायक भगवान् बुद्धयागु महत्त्व बारय् चर्चा यायां महामहिम प्रधानमन्त्री उनूयागु यात्रा सफल कामना यानाबिज्यात । थुकियागु हे लिसलय् प्रधानमन्त्रीजुं थनयापिनिगु बुद्धप्रति श्रद्धा भक्ति व वसपोल तथागतयागु उच्च शिक्षा एवं सिद्धान्तयागु विषय कयाः उद्गार व्यक्त यानाः सकुशल लिहांकाल' ।

डेपुटी डाइरेक्टर कृष्णदेवद्वारा स्वयम्भू स्थित मूर्तिकलाया सर्वेक्षण

काठमाण्डू उपत्यकाय् दुने थाय्थासय् अनेक बौद्ध विहार, देवदेवालय वास्तुकला व मूर्तिकला आदि पुरातात्त्विक व ऐतिहासिक साधनत सांस्कृतिक वस्तुत यक्वं असुरक्षित व अपरिचित रूपय् उख्येथुख्ये लानाच्चंगु खनेदु, गुगु अमूल्य दुर्लभ महत्वपूर्ण राष्ट्रिय सम्पत्ति जननिधि चाय्कं वा मचाय्कं अपहरण जुजु वनाच्चन ।

थुजाःगु राष्ट्रिय सम्पत्तितय्गु दुर्दशा खनाः उकियागु समुचित कदर निम्ति श्री ५ या सरकार पुरातत्त्व विभागं विवरणात्मक तथ्याङ्क सूची प्रस्तुत याय्गु विचारकथं सरसल्ला निम्ति भारतीय पुरातत्त्व विभागयात अनुरोध याःगु जुल । थुगु अनुरोधयात सहर्ष स्वीकार यासे भारतीय पुरातत्त्व विभागं वास्तुकला एवं मूर्तिकला विषयय् योग्य विद्वान् नियुक्त जुयाःकाःह्य डेपुटी डाइरेक्टर जनरल कृष्णदेव व सूक्ष्मछविकार अजितगुप्ता खः ।

थ्वय्कःपि काठमाण्डू थ्यँसेलि दकल्य् सकल्य् पुलांगु धार्मिक सांस्कृतिक एवं ऐतिहासिक दृष्टि अत्यन्त महत्वपूर्ण सजीव संग्रहालय तुल्य जुयाच्चंगु स्वयम्भू क्षेत्र :—

युगे सत्ये पद्मगिरि : त्रेतायां वज्रकूटकः ।

गोश्रृङ्ग द्वापरे ख्यातः कलौ गोपुच्छ पर्वतः ॥

नाना रत्नमयैः स्वस्ति नाना धातुभिः संयुतः ।

नाना गुणैः समायुक्तः त्रैलोक्येऽपि सुदुर्लभः ॥

युग भेदं प्यंगू नां प्रसिद्ध जुयाच्चंगु सकसितं स्वतन्त्र दइच्चंगु स्वयम्भू महाचैत्य विराजमान जुयाच्चंगु थुगु थासय् सर्वप्रथम वय्कःया मूर्तिकला सर्वेक्षण याय्गु ध्यानाकर्षित जूगु जुल ।

इस्वी संवत् १९६३ अप्रिल तदनुसार ने. सं. १०८३ बैशाख निलायंकं थ्वय्कः थन कायाः

पुरातात्विक ऐतिहासिक व कलात्मक दृष्टि महत्वपूर्णगु मूर्तितयगु सर्वेक्षण निरीक्षण यांनाः अनुसन्धानात्मक अध्ययन यांनाः छपाः छपाः दत्तल्य तस्वीर खिच्य यांनाः श्री ५ या सरकार पुरातत्त्व विभागया भण्डार्य सुरक्षित यांनाः प्रतिवेदन प्रस्तुत यांनाथकलः ।

थुकियागु हे परिणाम स्वरूप स्वयम्भूया नैऋत्य कुलाम्य वायुपुरया लिक स्वयम्भू विकास मण्डलया अथक प्रयासकथं अन्तररीष्ट्रिय मूर्ति संग्रहालय छगू नं दय्के धुंकल । लिस्से उगु संग्रहालयय् च्वंगु फुक्क सुवर्णमय प्रस्तरमय कलात्मक मूर्तितयगु क्याटलग नं तयार याके धुंकल ।

१- नेपाःया छगू मात्र केन्द्रीय सचिवालय सिंहदरबार विगत २०३० आषाढ २५ गतेयागु दुःखद अग्निकाण्डय् लानाः सम्पूर्ण फोटो विनष्ट जुयावन ।

स्वयम्भू महाचैत्यप्रति पुरातत्त्व विभागया सहयोग

नेपाल अधिराज्यया दुने लानाच्वंगु सम्पूर्ण मानव सभ्यता (जातीय संस्कृति) पुरातात्त्विक, ऐतिहासिक, धार्मिक एवं सांस्कृतिक स्थलतय्गु संरक्षण यानायकेगु व प्राचीन कालनिसें भूगर्भय् दुने सुलाच्वंगु लुकुं बिनाच्वंगु ऐतिहासिक महत्वपूर्ण भग्नावशेष स्थलतय्गु अन्वेषण, गवेषण यानाः उत्खनन-पाखे प्राप्त जूगु गुलि नं पुरातात्त्विक सम्पत्ति दइच्वनी उकियागु महत्व एवं इतिहास जन समक्षय् प्रकाशय् हयाबिइगु हे श्री ५ या सरकार पुरातत्त्व विभागया मुख्य उद्देश्य खः, गुकि यानाः नेपाःयागु गौरव अटल व अमर जुजु वनी ।

थ्व हे उद्देश्ययात ध्यान आकर्षित यानाः श्री ५ या सरकार पुरातत्त्वं वि. सं. २००६ सालनिसें पुरातात्त्विक क्षेत्रय् अन्वेषण व अनुसन्धान जाहेरी याना वइच्वंगु दु । लिसेलिसें राष्ट्रिय गौरव अधूरा इतिहास—नेपाल सुपुत्र शान्तिनायक तथागत शाक्यमुनि बुद्धया कुलछेँ कपिलवस्तु महानगरया मुख्य मुख्यगु प्रमाण एवं बौद्धविहार किराती राजप्रासाद लिच्छवी राजप्रासाद (मानगृह, कैलाशकूट भवन, भद्राधिवास भवन) आदि आदि लुइकेगु अत्यन्त महत्वपूर्णगु ज्या जुयाच्वंगु दु, थ्व सकसिनं स्यूगु हे विषय खः ।

थ्व हे सन्दर्भय् श्रीस्वयम्भू महाचैत्य सेवार्थ स्वयम्भू विकास मण्डलयागु अनुरोधकथं थ्वया जःखः द्वारपाल स्वरूप च्वनाच्वंगु गंथकूट शैली अनन्तपुर, प्रतापपुर मन्दिरया न्ह्योनेपाखे च्वंगु पाः कोतुना वनिइथे वनिइथे च्वंगु व अत्यन्त रहस्यमयगु गुप्तगत जुयाच्वंगु स्वयम्भूया इतिहास ति हे पुलां जुयाच्वंगु नेपाल सहकाल निम्ति वर्षापण विधि साधनया केन्द्रस्थल जुयाच्वंगु शान्तिकर थे जाःह्य प्रसिद्ध आचार्य तपस्या यानाच्वंगु विभिन्न गुफात मध्यय् थःगु हे विशेषता दइच्वंगु शान्तितुर गुफायागु सुरक्षित निम्ति वि. सं. २०२२ माघपाखे आवश्यक जीर्णोद्धार यानाबिल^१ । लिस्सें स्वयम्भूया

१- गोरखापत्र, २०२२ भाद्र २५,

न्ह्योनेच्वंगु पठन पाठ पूजा याइपि भक्तजनपि च्वनिइगु छचलि तल्ला कय्कुंगु ज्यामछिगु थाय्यात
बांलाक तब्याक ज्याछिक चक्कं थाय् दय्काः बढ्य् यानाव्यूगु दु ।

अथे हे दुक्पा लामा श्रीछेचुकुस्योयागु अनुरोधकथं नं थ्व हे छचलि तल्लाया च्वस्सं च्वंगु
पुलांगु गुम्बा नं ज्याछिक तःधं यानाः द्योपिनिगु थाय् सरय् यानाः छसि अलग तयाः गुम्बायागु शोभा
वृद्धि यानाव्यूगु जुल । थ्व ज्या जक वि. सं. २०३० साल पाखे जूगु खः ।

एवंप्रकारं हानं स्वयम्भू विकास मण्डलयागु निवेदन अनुसार स्वयम्भू महाचैत्यया धर्मपाल
स्वरूप जुयाः देस रक्षा निम्ति बिज्यानाच्वंह्य श्रीहारितीदेवीयागु दक्कसिबय् च्वस्सं च्वंगु लुँपौ धेचुलाः
क्षतिग्रष्ट जुइत तयार च्वंगु थुगु पोल पिइकाः बांलाक बल्लाक ह्वापा थे च्वंक दय्काबिल । थ्व ज्या
सम्पन्न जूगु खः वि. सं. २०३३ साल ।

राष्ट्रपति मार्सल अयूबखाँया स्वयम्भू दर्शन

श्री ५ महाराजाधिराज महेन्द्र वीर विक्रम शाहदेवजुया निमन्त्रणाकथं शाही अतिथिया रूप्य पाकिस्तानया राष्ट्रपति श्रीमार्सल अयूबखाँ औपचारिक रूपं नेपाः काःगु जुल ।

थ्व हे सन्दर्भ्य प्राकृतिकमय सुन्दर वातावरणं न्ह्याइपुसे च्वनाच्वंगु च्वापुगुँया क्वस्सं च्वंगु अनेक अनुपम कलाकौशलं जायाच्वंगु विविध धार्मिक सांस्कृतिक थितिरिति गुञ्जायस जुयाच्वंगु आपालं मथ मन्दिर व वही विहारत इलिलिलि खनेदइच्वंगु काठमाण्डू उपत्यकाय् न्ह्यात्थासं स्वःसां शोभायमान जुइक खनेदइच्वंगु एशिया महाद्वीपय् प्रतिष्ठापित असंख्य बौद्धस्तूप चैत्यत मध्यय् सर्वोत्कृष्टगु अतुलमय गौरव दइच्वंगु साह्रोंगु गिरि पर्वतय् विराजमान जुयाच्वंगु श्रीस्वयम्भू महाचैत्य वि. सं. २०२० बैशाख २६ गते दर्शन व पूजन यासे स्वांमाः क्वक्खाय्काः भक्तिपूर्वक अभिवादन यासे परिक्रमा नं यानादिइगु जुल ।

थ्वय्कःया ल्यू ल्यू अनेक वाद्यवादन सहित यासे भिक्षुपिसं स्वागत नं यात । लिस्सें थ्वय्कःयात स्वयम्भू विकास मण्डलपाखे छ्वालियागु कलात्मक बुद्ध मूर्ति दय्काःतगु नं उपहार द्दहलपिल । थुगु अवसरय् राष्ट्रपतिजुं नेपाःया लागी पाकिस्तानी राजदूत जुयाः काःह्य श्री आगाहिलालीयात स्वयम्भू विकास मण्डलयात सहयोगार्थ चन्दा प्रदान याय्गु नं आदेश बियाः लिहांकाल ।

जर्मनीया राष्ट्रपति हेनरी लुबकेद्वारा स्वयम्भू पूजा

श्री ५ या सरकारया निमन्त्रणाकथं शाही अतिथिया रूप्य संघीय गणतन्त्र जर्मनी देसया राष्ट्रपति डा० हेनरीक लुबके तथा श्रीमती लुबके औपचारीक भ्रमणकथं नेपाः काःगु जुल । थ्व हे सन्दर्भ्य वि. सं. २०२३ साल चैत्र १ गते मञ्जुश्रीकृत रम्य पर्वत स्वयम्भूस कायाः सुथसिया प्रहर्य विधिपूर्वक स्वयम्भूनाथ स्थित मूल भगवान् श्रीअमिताभ तथागतयात श्रद्धापूर्वक पूजा यानादिल ।

शाही अतिथिपि स्वयम्भू थ्यंकाः स्वयम्भू विकास मण्डलं ग्वसाग्वयातःगु विभिन्न सांस्कृतिक वाद्यवादनयागु मङ्गलध्वनि सहित वय्कःयात स्वागत याःगु जुल । थ्वय्कःपिसं स्वयम्भू महाचैत्य तस्सकं ध्यान तथाः प्रदक्षिण व निरीक्षण यात ।

थनं लिपा थ्वय्कःपि सुमति मैत्रिशासन महाविहार (मैत्रिगुम्बा) य् नं दुहांकाल । थन नं वय्कःपित मङ्गलध्वनिपूर्वक महायानी भिक्षुपिसं अभिवादन याःगु जुल । थुगु अवसर्य डा० हेनरी लुबकेजुं स्वयम्भू विकास मण्डल व मैत्रिगुम्बा निगूयात नं यानाः जर्मनी मार्क द्व. छि (ने. रु. १६००।-) दां चन्दा स्वरूप सहायता प्रदान यानादिल ।

महासचिव उथान्तजुया स्वयम्भू दर्शन व पूजन

संयुक्त राष्ट्रसंघं गुगु महान् पवित्र उद्देश्य तथा: जनहित सुख शान्ति निमित्त अर्थात् विश्व कल्याणया लागी सुधारक उद्धारक जुया राष्ट्रं राष्ट्रायात परस्परय् चतुस्संग्रह वस्तु (दान, प्रियवचन, अर्थचर्या व समानार्थता) तथा: अमूल्य समय, सम्पत्ति बुद्धि तथा परिश्रम खर्च यानाविया वइच्चन, उकिया लागी समस्त देसदेसान्तरं आपा: आपालं प्रशंसा यानाच्चंगु जुल ।

थुजा:गु महान् पवित्रगु संयुक्त राष्ट्रसंघया उद्देश्य सदां अटल जुयाच्चनेमा लिस्सें उकियागु कार्यक्रम सुचारू रूपं चलय् जुया: सुख समृद्धि जुजुं वनेमा धइगु हेतुं शान्तिनायक भगवान् बुद्ध शाक्यमुनियागु जन्मभूमि लुम्बिनीयागु विकास व उन्नतिया महान् संकल्प ज्वना: बुद्ध जन्मभूमि नेपा:या राष्ट्रनायक श्री ५ महाराजाधिराजया दर्शन भेट याय्गु मतिइ तथा: उथान्तजु काठमाण्डू उपत्यकाय् थ्यंक:काल । थ:गु सदिच्छानुसार श्री ५ महेन्द्र वीर विक्रम शाहदेवजु नापलाना: लुम्बिनी विषय कया: आपालं खँह्लावह्ला जुल । थ्वय्क: महासचिवजुयागु प्रस्तावयात श्री ५ या सरकारं नं सहर्ष स्वीकार यासे 'लुम्बिनी विकास निमित्त' न्ह्यात्थाय् न्ह्यावले तत्पर जुयागु दु धइगु किसिमं पूर्ण रूपं आश्वासन विल ।

उवलय् वय्क: उथान्तजुं नेपा:या बुद्धधर्मया केन्द्रीय स्थल श्रीस्वयम्भू महाचैत्ययागु दर्शन व पूजन याय्गु महान् अभिलाषा व्यक्त यानादिल । लिस्सें वि. सं. २०२४ बैशाख १ गते स्वयम्भू पर्वत स्थान काया: सुविनीत भावं दर्शन व पूजन याना: प्रदक्षिण यानादिल^१ ।

थ्वय्क: महासचिव उथान्तजुयागु सम्मानय् स्वयम्भू विकास मण्डलपाखे स्वयम्भू आदिबुद्धया न्ह्योने तथा: सुमेरुचैत्य ह्लाय्कं दुगु शोकेसय् दुने तथा: उपहार स्वरूप प्रदान या:गु जुल । लिस्सें स्वयम्भू महाचैत्यया चाकलय् च्वंगु गुम्बा गुम्बात नं निरीक्षण याना: लिहांकाया: बुद्ध शाक्यमुनियागु जन्मभूमि लुम्बिनी दर्शन या: का:गु जुल । उवलय् अन श्री ५ या सरकार पुरातत्त्व विभागया

१- गोरखापत्र, २०२४ बैशाख २ गते ।

डाइरेक्टर श्रीरमेशजङ्ग थापाजुं थ्वय्कःयात गाइड यानादिइगु खः । थ्व बुद्ध जन्मभूमि लुम्बिनी थ्यनेवं शान्तिनायक तथागत सम्यक् संबुद्धप्रति अपार श्रद्धा निश्चय उत्पन्न जुयाःलि पञ्च प्रणाम यासे छुं मिनेटया लागि समाधि च्वने थें यानाः मौनधारण यानाः नतमस्त जुयाः अभिवादन चह्य् यात ।

थ्व हे बुद्ध जन्मभूमि लुम्बिनीयागु विषय कयाः संयुक्त राष्ट्रसंघया न्ह्योने तच्चोगु लसतां महासचिव उथान्तजुं उद्गार व्यक्त याःगु दु । व उद्गार प्रसङ्गवश थन प्रस्तुत यानाच्चवना^१—

‘बुद्धयागु जन्मस्थल लुम्बिनी संसारभरया बौद्ध अनुयायीतय्गु पवित्रस्थल खः । थ्व संसारया अन्य धर्मावलम्बीतय्गु तीर्थस्थल सरह पवित्र जुयाच्चवंगु दु । अप्रिल १९६७ स जि लुम्बिनी वनाबलय् थ्व थाय्पागु सुनसान व साधारण पर्यटक व तीर्थयात्रीत थ्यनिइगु बाहेक मेगु छुं मखंगुलि जितः तच्चोगु चोट परय् जुल । थथे जूसा नं बुद्धं आन्तरिक शान्ति व थः समानपिं मनूतय्गुप्रति सहृदयता व सहिष्णुता निगुलि ग्रहण याय्गु गुगु आधारयागु प्रचार यात उकियागु उच्च आध्यात्मिक व नैतिक मूल्यप्रतियागु थःगु श्रद्धां यानाः हरेक वर्ष द्वलंद्वः तीर्थयात्रीत लुम्बिनी वय्गु वनेगु यानाच्चवन् ।

राजकुमार सिद्धार्थयागु जन्म ६२३ ई. पू. स लुम्बिनीइ जूगु जुल । वसपोलं ३५ दँ या बैसय् बुद्धत्व प्राप्त यात व बुद्धत्व प्राप्त याःह्य बुद्ध जुल । बुद्ध गम्भीर बुद्धि, अपार दया व मानवतायागु सेवाप्रति आस्था दुह्य मनू जुल । इतिहासयागु न्ह्यागु ई स्वयाः नं बुद्धयागु सन्देश थौं अप्पो सारपूर्ण जूगु दु ।

१९६८ यागु गुरुनिसें नेपाल सरकार व संयुक्तराष्ट्र संघया संगठनं यानाः विकासया विभिन्न पक्षयागु ज्यात यानावयाच्चवन्, उगु योजना आः पर्यटक व तीर्थयात्रीपिनिगु निम्ति ऐक्षिक दान दातव्य तय्गु आर्थिक सहायता आवश्यक जुइगु स्थितिइ थ्यनाच्चवंगु दु । थुगु विषयय् नेपाल सरकारं ह्वापा हे थालय् याय् धुंकूगु कदमतय्गु लागि जिगु व्यक्तिगत रूपं वय्कःपित प्रशंसा याय् । थुकिइ अभिरुचि दुपि सरकारी व्यक्तित व निजी संघसंस्थातय्सं जि सवोत्कृष्ट भाःपियागु थुगु आयोजना (प्रोजेक्ट) यागु कार्यान्वयनया लागि नगद वा जिन्सी न्ह्यागु रूपय् आर्थिक अनुदान उदारतासाथ प्रदान याइ धकाः जि थःगु सच्चा आशा प्रकट मयाय् ला ?’

१- आवास तथा भौतिक परियोजना ‘लुम्बिनी समिति नेपाल’ नामक पुस्तिकापाखे उद्धृत ।

स्वयम्भू क्षेत्रय् अन्तरराष्ट्रिय सफाई आन्दोलन सेवा

वसपोल ज्योतिरूप स्वयम्भूया उत्पत्ति यानाः कीगु नेपाःदेसय् इलय्-ब्यलय् स्वाभाविक विश्व वन्धुत्व खनेदत, गुकिं यानाः स्वयम्भू दर्शनार्थ सप्तबुद्धपि थःथः इलय् वयाः छगू छगू कीर्ति तयावन; अथे हे महाचीनं गुरु मञ्जुश्री बिज्यानाः वन । थुगुकथं जुजु धर्माकरंनिसे कयाः अनेक जुजुपि अनेक आचार्यपि एवं अनेक विद्वान्पि नं नेपाःया समाजय् दुथ्याकाकाल । थ्व स्वयम्भू महाचैत्ययागु अनुभावं जूगु धकाः धाय्फु ।

थ्व स्वयम्भू क्षेत्रय् युगयुगनिसे राजनैतिक, जातपात व सम्प्रदायिक भेदभाव मतसे संसार सकभनंयापि मानवमात्रयात समान रूपं व्यवहार यानाः चतुर्ब्रह्म विहारयात त्वःगु किसिमं विश्वधैव कुटुम्बकं धयातः थे ज्या जुया वइच्चंगु दु, सकसिगुं लागी लँ चाय्कातःगु दु, स्वागत यानाच्चंगु दु ।

परन्तु थौयागु नीगू शदीइ वैज्ञानिक युगय् नं हिन्दूमात्रया देवाधिदेव महादेव नेपाःया पशुपति-नाथया पश्चिम मूलद्वारय् 'हिन्दूमात्रको प्रवेश' धकाः सूचनापट्ट तानातःगुलि यानाः अन पशुपति क्याम्पय् दुने सुं विलायत यूरोपियन पर्यटक व शाही अतिथिपि तक नं दुतमछ्वः, थ्व सकसिनं स्यूगु हे खँ खः । तर मानवमात्रयात समान अधिकार ब्यूहा शान्तिनायक भगवान् बुद्धयागु धर्मय् थुगु प्रकारं गनं असमान मज्जुगुलि न्ह्याह्वं स्वतन्त्र रूपं सहर्षपूर्वक थुगु स्वयम्भू महाचैत्ययात दर्शन पूजन एवं स्पर्शन याय् ज्यू ।

उकिं हे स्वर्गवासी श्री ५ महेन्द्र आह्वान यानाबिज्याःगु 'गाउँफर्क राष्ट्रिय अभियान' या सन्दर्भय् अन्तर्राष्ट्रिय संस्था 'सभिस सिभिल इन्टरनेशनल' पाखें काठमाण्डू उपत्यकाय् सर्वप्रथम स्वयम्भू क्षेत्रय् अन्तर्राष्ट्रिय सफाई आन्दोलन सेवा वि.सं. २०२५ साल पौष ५ गतेनिसें १६ गतेतक बाःछियंक 'अन्तरराष्ट्रिय वर्क क्याम्प' जुयावन ।

थुगु वर्क क्याम्प स्वयम्भू महाचैत्य विराजमान जुयाच्चंगु थासय् च्वंपि स्यंगुमितय्गु निम्ति गुगु

किसिमं थुगु पवित्र तीर्थस्थल सुघर सफा यानाः सुस्वास्थ्यपूर्वक जीवन हनेफइ धइगु शिक्षा बिइ निम्ति थःगु संस्थायागु आदर्शयात ध्यान तथाः गाउँफर्क राष्ट्रिय अभियानयात सहयोग ब्यूगु खः । थ्व सफाई आन्दोलन सेवा थौंयागु नीगू शताब्दीस कीसं गुगु प्रकारं सुघर सफा जुयाच्चनेमाः धइगु जनचेतना ह्यगु उद्देश्यं कयाः याःगु छगू नमुना क्यनेगु गुल्पं छुइगु प्रयास खः ।

थ्व वर्क क्याम्पपाखे जूगु ज्या थथे खः— स्यंगुमितयगु छेँखा पतिकं निह्य निह्य स्वयंसेवक वनाः इमित फोहर कसिगर सुचुकेगु जतन स्यनाबिइ । नापं सकसिगु साकागु फोहर कसिगर वायगु छगू थाय्यागु नं प्रबन्ध याइ । थन स्वयम्भू मन्दिरय् विशेष पूजा व भोजन याःवइपिनिगु पाखे जुइगु फोहर मैला गन्ध हटय् यायगु निम्ति नं विचार विमर्श याइ । थ्व वर्क क्याम्पयागु ज्या जुयाच्चतल्य स्वयंसेवकपिसं हे स्वयम्भू महाचैत्यया छ्चाःख्यरं वँपुइगु ज्या जूगु जुल । थ्व ज्याय् केवल सुथसिया प्रहरय् जक मखु ह्लिनय् व सन्ध्याइलय् तकं माःथाय् माःगु तालं ज्या जुया हे चवनी ।

थुगु वर्क क्याम्पय् ज्याय् नियुक्त जूपि स्वयंसेवकत जम्मा ३० ह्य दु, गुपि मध्यय् नेपाःमि स्वयंसेवकत २० ह्य व मेपि मित्रराष्ट्र बेल्जियम, बिलायत, फ्रान्स, जापान, सिलोन, तथा भारत, पाकिस्तानया समेतं उत्तिकं श्रद्धा व सुविनीतपूर्वक थःगु उद्देश्य सफल लागी स्वयम्भू क्षेत्र सफाई अभियानय् भाग काःपि जुल ।

डेनमार्कया युवराज्ञीद्वारा स्वयम्भू पूजा

श्री ५ युवराजाधिराज वीरेन्द्र वीर विक्रम शाहदेवजुया निमन्त्रणाकथं शाही अतिथि रूप्य डेनमार्कया युवराज्ञी मार्गरेथ तथा वय्कःया भाःत राजकुमार हेनरीकपि औपचारीककथं नेपाः काःगु जुल ।

श्व हे सन्दर्भय् प्राकृतिकमय सुन्दर वातारणं जायाच्चंगु अनेक देवदेवतां जमघट जुयाच्चंगु काठमाण्डू उपत्यकाय् न्ह्यात्थासं स्वःसां शोभायमान जुइक खनेदइच्चंगु श्रीस्वयम्भू महाचैत्य विराजमान जुयाच्चंगु साह्रोंगु पर्वतय् वि. सं. २०२५ माघ २१ गतेखुनु स्वयम्भू चैत्ययागु दर्शन व पूजन यानादिल । स्वयम्भू विकास मण्डलया सदस्यपिसं स्वागत सत्कारया लिस्से शाही अतिथिपित शान्तिनायक बुद्धमूर्ति व मेगु कलात्मक मन्दिर उपहार स्वरूप चढ्य यात ।

श्वय्कःपिनिगु सम्मान निम्ति की राष्ट्रनायक श्री ५ महेन्द्रया सुपुत्र श्री ५ युवराजाधिराज नं वय्कःपि लिसेलिसे विज्यानाः स्वयम्भू महाचैत्ययागु दर्शन यानाविज्याःगु जुल ।

स्वयम्भूया अग्र्य छह मिसाया आमरण अनशन

काठमाण्डू उपत्यकाय् न्ह्यात्थासं स्वःसां छर्लंग खनेदय्क दर्शन बिया विज्यानाच्चंहा स्वयम्भू महाचैत्यं बोधिचित्त महाकरुणापाखे सुदृष्टि स्वयाः प्यख्यरसं ध्यान दृष्टि कनाः (धर्मचक्षु, दिव्यचक्षु, समन्तचक्षु, ज्ञानचक्षु एवं बुद्धचक्षु) अवलोकन यानाः प्रज्ञोपायात्मक तत्त्व स्वरूप न्ह्यावले आलोक प्रकाश यानाविज्याःहा श्रीस्वयम्भू महाचैत्य विज्यानाच्चन । थ्व हे पुण्यभूमि नेपाःदेसय् सत्य शान्ति करुणाप्रधानगु धर्म प्रचार प्रसार निम्ति बोधिचित्त महाकरुणा ज्वनाः बोधिसत्व श्वेतुकेतु तुषिता भुवनं हानं मर्त्यलोकय् अवतरित जुयाः लुम्बिनी वनय् जन्म जुल, गुह्यसिगु नामं शान्ति सन्देश विश्वय् प्रचार प्रसार जुयाच्चन ।

व हे बुद्धयागु जन्म, बुद्धत्व प्राप्ति एवं महापरिनिर्वाण त्रिमहापर्व संयोग चूलाःगु बुद्धजयन्ती स्वांयापुन्ही बैशाखपुह्लीखुनु श्री ५ या सरकारं राष्ट्रव्यापी बुद्धजयन्तीया बिदा घोषित याःसां बुद्धधर्मय् घोर विरुद्धगु मारचर्या हिंसाकर्म रोकका मज्जुगु खनाः अन्तरराष्ट्रिय बौद्धजगतं धिक्कार धाय्का च्वनेमाःगु थुजाःगु विपरीतगु हिंसाकर्म छाय् बन्द मज्जुल धइगु विषय कयाः सर्वधर्मया प्रतिनिधित्व यानाच्चंहा शरण दक्वया मूलश्रोत जुयाच्चंहा जगदीश्वर श्रीस्वयम्भू महाचैत्यया अग्र्य च्वनाः 'थ्व बुद्ध जन्मभूमि नेपालय् बुद्धजयन्तीया दिनय् सम्पूर्ण हिंसाकर्म रोकका जुइमाः, बन्द याय्माः, निषेध याय्माः' धकाः स्याञ्जा जिल्लाया छह साधारणह्य मिसा श्रीमती गौरी उपाध्यायनीनं थ्व हे स्वयम्भूया अग्र्य पूर्वपाखेच्चंगु अनन्तपुर मन्दिरया न्ह्योनेच्चंगु फलचाय् वि. सं, २०२६ साल भाद्र १ गतेनिसे आमरण अनशन प्रारम्भ याःगु जुयाच्चन ।

स्याञ्जा जिल्लाया छह नकिजु गौरी उपाध्यायनीनं काठमाण्डू उपत्यकाय् वयाः विवेकपूर्ण

दृष्टि खंकाः थःगु स्वार्थयात परवाह मतसे दुष्करचर्या थे यानाः बुद्धजयन्तीखुनु सम्पूर्ण हिंसा कर्म रोक्का जुइमा धइगु पवित्र उद्देश्य तथाः समुचित कदम न्होने न्ह्याःवंगु खनाः सकल दर्शकगणपिसं वय्कःयागु माग न्यायोचित खः धकाः वय्कःप्रति हार्दिक नैतिक सहानुभूति प्रकट यानावंपिं उलि थुलि मदु । फलस्वरूप थ्व आमरण अनशन च्वंगु उचित भाःपाः कदर यासे २०२६ भाद्र ६ गतेया दिनय् वागमती अञ्चलाधीश कार्यालयपाखे छगू सूचना प्रकाशित यात ।

बैशाख पूर्णिमाया पवित्र दिनय् नेपाल राज्यभर हिंसाकर्म बन्द याय्गु श्री ५ महाराजाधिराज सरकारं ७।११।१०१२ स लुम्बिनीइ बक्सय् जूगु घोषणायात कानूनी रूप बिइधुंगु दु धकाः उपर्युक्त अञ्चलाधीश कार्यालयपाखे प्रकाशित सूचना विज्ञप्ति थःगु मिखां स्वयाः ह्वाय्पनं न्यने धुँसेलितिनि वय्कः अनशन च्वनादिइहा गौरी उपाध्यायनीनं थःगु प्रतिज्ञा सफल जूगुलिइ सहर्ष अनशन तोताबिल ।

थ्व अनशन बुद्धजयन्तीखुनु हिंसाकर्म निषेध याय्गु विषय कयाः जक मजुसे स्वयम्भू जंगलय् तारा मक्य्केमा धइगु खँ नं न्ह्यथनातःगु दु ।

ग्याल्वा कर्मापा लामाया स्वयम्भू दर्शन व अभिषेक प्रदान

श्रद्धेय वयोवृद्ध श्रीधामार छाम्बे लामाजुं दय्काथकूगु स्वयम्भू महाचैत्यया उत्तर भागय् च्वंगु कर्मराज गुम्बाय् च्वंपि महायानिक भिक्षु संघयागु विशेष निमन्त्रणाकथं श्रीस्वयम्भू महाचैत्य दर्शनार्थ परम श्रद्धेय श्रीमान् ग्याल्वा कर्मापा लामाजु स्वयम्भूइ थ्यंकः बिज्यात ।

थ्वसपोल कर्मापा लामाजु जुजु जयप्रकाश मल्लया पर्यायस नेपाः बिज्यानाः कर्मापा थाम्चे ख्येन्पा मेघ सर्वज्ञ नामक लामा धाय्का च्वंबलय् ने. सं. ८७८ सालं श्रीस्वयम्भू महाचैत्य जीर्णोद्धार यानाथकूगु दु ।

थुगु जन्मय् नं थ्व हे कर्मराज महाविहार (गुम्बा) यागु जीवन्यास प्रतिष्ठा कर्म यानाःलि वि. सं. २०२६ पौष १२ गते थःशिष्यगणपित व अन्य श्रद्धालु भक्तजनपित अष्ट महाभय हरण याना- बिज्याइहा भगवती आर्यतारायागु वज्रयानया परम्पराकथं अभिषेक प्रदान यानाबिज्यात । लिस्से वसपोलं पुयाबिज्याइगु डाकिनी धर्मपालपिसं अधिष्ठान याना तइतःगु ब्वयावनी धकाः धयातःगु वज्र मुकूट तपुलि पुयाः दर्शन ब्यूगु जुयाच्चन । थुगु वज्र मुकूट दर्शन निम्ति वयाच्चंपि दर्शकगणपि तस्सकं हूलमूल जूगु खनाः हानं थ्वयां सतिखुनु भुइख्यलय् शोभायमान जुइक सिंहासन दय्काः अन बिज्याकाः सकल दर्शकतय्त दर्शन ब्यूगु जुल । लिस्से भुइख्यलय् उपस्थित जुयाच्चंपि श्रद्धालु भक्तजनपित स्वस्ति- कल्याण जुइगु भविष्यय् सद्धर्मशासन चल्य् याय् फय्मा धकाः प्रणिधान आशीर्वाद बियाबिज्यात ।

थुगु समारोहय् तिब्बती जनता तस्सकं हूलमूल जुल, मानो भुइख्यः छगुलिं ह्याउँसे नब्रुया वस्त्रं तोपुल ला धया थे च्वं । तिब्बती जनतातय् इमि थःगु धार्मिक विश्वास व परम्परानुसार थुजाःपि ततःधंपि गुरुपि अवतारी सिद्ध पुरुषपि महापुरुषपिनिगु रूप दर्शन याय्गु, पुण्य शरीर स्पर्शन याय्गु, व्याकरण उपदेश श्रवण याय्गु, अले वसपोलपिसं इनाबिइगु प्रसाद व अभिषेक प्राप्त याय्गु व लिस्से वसपोलपिनिगु गुणानुस्मरणय् एवं थःपित पुण्योपार्जनया लागी थःथःगु श्रद्धानुसारं उपहार स्वरूप

रत्नमण्डल (धन धान्य रत्न व वस्त्र दान दक्षिणा) द्वहलपेगु चलन दु । थुलि जक मखु अज्ज थःगु
जीवन सार्थकया लागी वसपोलपिके छुं ज्ञान ध्यान चर्या शिक्षा-दीक्षा काय् फय्केगु हे मनुष्य जीवनया
मुख्य कर्त्तव्य भाःपाः वसपोलया न्होने उपस्थित जुयाच्चं पि धर्मपिपाशु गेलोङ्ग अनि व गृहस्थी उपासक
उपासिकापिनिगु लस्करं भुइख्यः जाः । थ्व दृश्यं थःगु हे प्रकारं विशेषता प्रदर्शित याःगु दु ।

स्वयम्भू वन संरक्षण व आस्था निम्ति श्री ५ सरकारया हजुरीस बिनितपत्र

झीयोह्य राष्ट्रनायक श्री ५ महाराजाधिराज सरकारया
हजुरीस पीडित नेपालीतय्गु सविनय
भक्तिपूर्ण बिनितपत्र'

उप्रान्त सरकार !

यक्व यक्व वर्षनिसें स्वयम्भू किण्डोल व भिदुगां, हलचोकवासीपिसं श्री ५ सरकारया समक्ष इलय् इलय् स्वयम्भू छाउनीइ तारा कय्केगु कारणपाखे पश्चिमपाखे आवत जावत याइपिं द्वलंद्वः जनतायात ततःसकं पीर मर्का जुयाच्चंगु खँया विषयय् जाहेर बिनित यानावं वयाच्चंगु दु । छाउनीइ तारा कय्कूगुलि आपाःसिगु ज्यू-ज्यान वंगु तथ्य नं स्यूगु हे खँ खः । थुगु सन्दर्भय् गुगु तारा कय्केगु ज्या नं मेथाय् निर्जन थासय् ल्ह्याया ब्यु धकाः दँय्दँसं धयाथे नेपाली जनतां हार्दिक अनुरोध बिनित याना वयाच्चंगु खः । तर थुकिया बारय् श्री ५ या सरकारपाखे गुगु नं सहानुभूति मकयंगु व गुगु प्रतिक्रिया समेत मदुगुलि नेपाली युवक बौद्ध परिषदं थुगु विषयय् नेपालीतय् भाग्यविधाता एकमात्र नेपालया मुकुट दयासागर करुणानिधि कीयोह्य राष्ट्रपिता श्री ५ सरकारया हजुरीइ पीडित जनताया-पाखे हस्ताक्षर सङ्कलन यानाः मौसुफ सरकारया बाहुलीइ बिनितपत्र चढय् याय्गु धइगु नेपाली युवक बौद्ध परिषदयागु निर्णय जूगुकथं १०,००० फिद्वलं अप्पो सही सङ्कलन यानाः सरकारया बाहुलीइ चढय् याना छ्वयाहयाच्चनागु दु । जो हुकूम सरकार !

कीयोह्य श्री ५ सरकारया अतुल्य नेतृत्वय् समस्त नेपाःमितय्गु उपकार निम्ति २०१७ साल

लिपा प्रदान यानाविज्याःगु पञ्चायत दर्शन व उगु दर्शन अनुसार नेपाःमितय्गु भविष्य ह्लियाह्लिथं उज्ज्वल जुयाच्चंगु व नेपाःमित क्रमशः विकास जुजुं वनाच्चंगु खँ निर्विवाद ।

पञ्चायत व्यवस्था अन्तर्गत फुक्क धर्मावलम्बीतय्गु सुरक्षा एवं इमिगु धर्मस्थलतय्गु उचित मर्यादा तथा सुरक्षा ह्लापा स्वयाः आः आपालं हे बांलाना वइच्चंगु खँ दुनेनिसें विन्ति मयासे चवने मफु ।

छगू जक हिन्दू आर्यत्वयागु राजधानी व आर्यत्वया हिन्दूराज्यय् विभिन्न धर्मावलम्बीया बगैचा-यागु सुरक्षा जूगुलि थुकियागु महत्ता विश्वय् कन अप्पो जूवन । नेपाःमितय्के अथवा नेपाःयागु प्रायः धर्मावलम्बीत बुद्धमार्गी नं दयाच्चन । विश्वय् थौं नेपाःया सुपुत्र भगवान् गौतमबुद्धया त्याग तपस्याया प्रभावं व वसपोलयागु शान्ति सन्देशं यानाः नेपाःयागु इज्जत बढय् जुजुं वनाच्चंगु खँ नेपाःयागु लागी तस्सकं गौरबया विषय जूवंगु दु । थुपि ब्याक्क ऐतिहासिक तथ्य तथा वास्तविकता वर्तमान स्थिति नेपाःयागु इज्जत ह्लिथं वृद्धि याना यंकेगुलिइ छगू मात्र श्रेय सरकारया जनप्रियता, जनताप्रति सरकारया हृदयय् शुद्ध असिम प्रेम व ममता तथा अगाढ दया करुणा व कर्तव्यपरायणतायागु आदर्श कयनाविज्याइह्य कीयोह्य राष्ट्रनायक श्री ५ सरकार हे जूगु दु । थुगु तथ्ययात नेपाःयागुप्रति व्यक्तिगत ईर्ष्या याइपि विपक्षीतय्सं नं निर्विवाद स्वीकार यानाच्चंगु दु । जिपि सिधासादा नेपाःमि बौद्धतय्गु लागी थ्व अत्यधिक हर्ष सौभाग्यया विषय खः ।

सरकारयागु उदय जुसानिसें थुख्ये नेपाःमि बौद्धतय्गु सुरक्षा व थुमिगु धर्मस्थलतय्गु जीर्णोद्धार एवं सुव्यवस्थाया लागी समयोचित प्रोत्साहन दयाच्चंगु दु । भविष्यय् नं अज्ज थ्व स्वयाः नं अप्पो प्रोत्साहन दइ धइगु आशा नेपाःमि बौद्धतय्सं यानाच्चंगु दु ।

राणाशासन अन्त जुइ धुंकाः नेपाःयागु इतिहासय् सर्वप्रथम अन्तरराष्ट्रिय बौद्ध सम्मेलन जुल, गुकि नेपाःयात आपालं मुलुकं प्रत्यक्ष रूपं खन । थुकि नेपाः व मेगु मुलुकतय्गु दत्थुइ मैत्री सम्बन्ध स्थापना निम्ति तःधंगु योगदान बिल ।

नेपाःमि बौद्धत सदैव थः जुजुयात धर्मानुसार सम्मति देवतायागु रूपय् अगाढ भक्ति तथा श्रद्धा तथावइच्चंगु दु । यदि जिपि बौद्धतय्सं थः अबु समान जुयाच्चंह्य धर्माधिकार करुणावतार श्री ५ सरकारया हजुरीइ थुइका मव्युसे स्वइगु न्ह्योने विन्ति याय्गु ? उकि सरकार, क्षमा पवसे जिपि समस्त नेपाःमि बौद्धतय् जक मखु समस्त स्वयम्भू प्राचीन बौद्ध तीर्थ स्थलय् वइच्चनिइपि व स्वयम्भू गाउँ पञ्चायतया लिक लिक च्वंपि नागरिकपित ह्लिथं बढय् जुजुं वइच्चंगु दैनिक जीवनयात समेत तःधंगु बाधा जूवंगु खँ सरकारया न्ह्योने जिद्दी यासे विन्ति यानागु अनुसार क्षमा प्राप्त जुइमा, सरकार जो हुकूम ।

काठमाण्डू सहरनिसें स्वयम्भू दल्लु, किण्डोल व छाउनी तथा ताहाचल ह्लापा थें गां जक मजुसे काठमाण्डू सहरयागु छगू अंग जूवंगु दु । छुं दशक न्ह्यो थुगुपाखे गां थें जुयाच्चंगु तर आः सहरनाप ऊवःलाक छेँ स्वातुमतु स्वास्वां वइच्चन ।

स्वयम्भूपाखे चाःह्यू वइपि स्वदेशी व विदेशीतय्गु संख्या नं ह्लियाह्लिथं वृद्धि जुजुं वइच्चन ।

ह्लित्थं टेक्सी मोटरं विदेशी पर्यटकत नं वयाच्चन । थुलि बाहिक आनन्दकुटी विद्यापीठ व आनन्दकुटी साइन्स कलेजय् वइपि छात्रछात्रातय्गु नं हूल ह्लित्थं बढय् जुया वयाच्चन ।

थुजाःगु इलय् छाउनीइ तारा कय्केगु कार्यक्रमं यानाः लँय् जुइ-चवने याइपित तस्सकं ज्या मछिगु जक मजुसे तारा कय्किइगु गोलि लानाः दँय्दँसं मनूतय् ज्यान सम्म नं वनाच्चंगु दु । गुबले गोलि कयाः गुबले विजुलीयागु नांगातार चव्वुनाः उगु कारणं प्राण वनाच्चन । खास यानाः स्वयम्भू चैत्यय् वसोबास याइपि अहिसक वासिन्दातय्गु छेँय् छेँय् गोलि लाइगु, स्वयम्भू चैत्यया गजुलिइ तक नं गोलि लाइगु ।

तारा कय्किइगु थासं थिक्क लिउने धाय् बारुड खाना दु । थौंकल्लय् थुख्येपाखे नं वसोबास याइपि मनूतय्गु संख्या बढय् जुजु वनाच्चंगु दु । तारा कय्किइगु निशानया थिक्क वस्सं सहरय् वनिइगु लँपु दु । थ्व लं तारा कय्किइगु बन्द याइ, बन्द नं जुइमाः । बालाजु वनेगु लँय् नं छेँत धमाधम बढय् जुजु वनाच्चन । स्वयम्भू पहाडया उत्तरपाखेजा गोलि वया हे च्वंगु दु । छुं वर्ष लिपा थ्व स्वयम्भूपाखे काठमाण्डू नगर हे स्वाइगु आपालं संभावना जुइ धुंकूगु दु ।

छाउनी एरियाय् नं दँय्दँसं छेँत बढय् जुजु वनाच्चन । तारा कय्किइगु सलं यानाः सत्तिक च्वंपित तस्सकं चितासू मदु । तारा कय्केगु थासं सत्तिक गाउँलेतय्सं लः काःवनेमाः, वनं बन्द हे जुइ । लःयागु अभाव अवस्थाय् जनतातय्त लः बिना तःधंगु दुःख जुइ । स्वयम्भू येँ वनेगु सत्तिगु लँपु नं बन्द जुइ । थुकि यानाः लँय् जुइ-चवने याइपित बच्छि मयाक ताःहाकःगु लँ हिलावनेमालिइबलय् लँय् जुइपित समय यक्व सिद्धि वनाः इमिगु यातायात निम्ति कठिनाइ जुइगु जुल । विद्यार्थीपित नं व्व वइबलय् आपालं लँ चाःहुलाः वनेमाःगुलि इमित नं तस्सकं शारीरिक कष्ट भोग याय्मालाच्चंगु जुयाच्चन ।

यदि तारा कय्केगु ज्या थुगु इलाकाय् मजूगु जूसा थुपि चवय् वर्णन यानागु कठिनाइ सुयात नं दइमखु । अथे हे ज्यू-ज्यानयागु तक नं नोक्सानी मजुइगु जुइ ।

नगरया दत्थुइ धयार्थे तारा कय्केगु जूगुलि मिलिटरी शिक्षाया गोप्यता नं मदइगु थें खनेदत ।

थुगु छाउनी थासय् तारा कय्केगु यानाच्चंगु चलन नं आपा मदुगु स्यू ! ह्लापा राणा शासनय् थुगु थासय् निर्जन प्रायः स्थान जूगु खः । वसोबास याइपिनिगु संख्या नं नगण्य धाय्माः । तर थौं थुकियागु स्थिति बिलकुल उल्टा जुयाः सहर थें जुइ धुंकूगु दु ।

थौं स्वयाः कल्लय् छेँत बढय् जुजु वनाच्चंगु कारणं यानाः याकनं हे थ्व थाय् सहरया अन्तर्गत लाय्त नं छुं बेर मदु । उगु बखतय् जा तारा कय्केगु स्थान मेथाय् साह्रय् मयासे गाइ मखु । छायाःसा सहरया दत्थुइ तारा कय्केगु प्रशिक्षण विइगु बांलाइ मखु । सुरक्षायागु व्यवस्था मिलय् याय्गु नं थौं स्वयाः नं आपालं असुविधा जूवइगु सम्भावना दु । थुगु सन्दर्भय् थुगु विषयय् आवंनिसें हे भविष्ययागु प्लानिङ्गया बारय् सोच विचार मयासे चवने फइमखु जुइ, अले सोच विचार याना यंकेगु हे भविष्यया प्लानिङ्गया लागी कल्याणकारक जूवनी जुइ, वरु भविष्यय् थुगु छाउनी थासय् गुगु मिलिटरी अथवा मेगु न्हागु शिक्षण कार्यया निम्ति परिणत यात धाःसा थुगु थाय्गागु सदुपयोग

जुयाः नगर व्यवस्थायात लवःगु बांलाःगु जूवनी । थ्व थाय् स्वास्थ्यकर जूगु जूया निर्मित शिक्षण केन्द्रया अति स्मरणीय जुइफु ।

तारा कय्केगु अभ्यासया ज्याया लागी सह्रं पिने मेथाय् गनं निजंन थासय् साह्रय् यानाविइगु हे वर्तमान स्थिति अनुसार बहुते जनकल्याण, थुजाःगु महान् महत्वपूर्ण ऐतिहासिक स्थलयागु समुचित कदर एवं विवेकपूर्ण सरकारयागु सद्नीति साकार रूप जुयाः जिपि बित्तिपत्र चढय् याःवयापि सरकारया अनन्त सेवकपिनिगु महान् आकाङ्क्षा समेत सफलीभूत जूवनी ।

तसर्थ सेवक आज्ञाकारी सरकारया बौद्ध जनताया दैनिक जीवनय् व बौद्धतय्गु तःधंगु धर्मस्थलयागु मर्यादा सुरक्षा याय्त जिपि असहाय जनताया दुःख जुयाच्चंगु व्यहोरा सरकारया कुशल गाथय् भक्तिपूर्वक जाहेर बित्ति चढय् यानागु दु । सरकारया प्रजावत्सलतापूर्ण तथा दया करुणां भरय् जूगु स्वकीय विवेक विचारं खंकाः जिपि गरीब अधना जनताया पुकारयात अनुकम्पापूर्वक विचार बक्सय् यानाः थुगु भेगया जनताया दैनिक जीवनय् भतीचा जूसां सुविधा प्रदान यानाविज्याइ धकाः पूरा बिश्वास यानाः आर्तनादं पुकार यानागु खः, सरकार जो हुकूम शिरोपर !

सरकारया सदा आज्ञाकारी
अहिंसक बौद्ध जनतायापाखें

स्वयम्भूप्रति महाकवि चित्तधर 'हृदय'जुया कलात्मक वस्तु उपहार प्रदान

नेपाया गौरव अमूल्य निधि परम श्रद्धेय महान् तीर्थस्थल श्रीस्वयम्भू महाचैत्य काठमाण्डू उपत्यकाया अति शोभनीय दर्शनीय पर्यटकजनपिनिगु निमित्त आकर्षक केन्द्र जुयाच्चंगु थुजाःगु पवित्र चैत्यराजयागु सुरक्षा युग युगतक याय्म्वाःला वंसां थौंकल्लय्या परिस्थिति याय् माय्काच्चंगु सकसिनं स्यू, सकसिनं चाः । उकिं स्वयम्भूयागु गौरवगाथायात थिइका तय्त् स्वयम्भू विकास मण्डलं जिव्व कुतः यानाः माःगु पलाः अटूट रूपं च्वय्काच्चंगु दु । मण्डलया तःधंगु प्रयासं उख्येथुख्ये लानाच्चंगु स्वयम्भूयागु अनेक प्राचीन व अमूल्य मूर्तित तना मवनेमा धकाः छगू अन्तरराष्ट्रिय मूर्ति संग्रहालय व मेगु अन्तरराष्ट्रिय बौद्ध ग्रन्थालय थे जाःगु तःधंगु योजनाया ग्वसाः ग्वयाः माःगुकथं भवन तयार याय् धुंकूगु दु । थुगु ग्रन्थालयया निमित्त नेपाःया तःगू विदेशी राजदूतावासपाखे महत्वपूर्ण बौद्धग्रन्थ व तस्वीरत नं प्राप्त जुइ धुंकूगु दु ।

कीथाय् कला व संस्कृति प्रेमी नेवाःतय्गु अप्पोसिगु छेय् छेय् धयाथे सफू, मूर्ति पौभाः किल नकाछ्वय्गु परम्परा थे जुयावयाच्चंगु दु । थ्व अवश्य नं महत्व थुइका मच्चनागुया दसि खः धाय्माः ।

थथे थःत अन्धकारय् लिकुंका तय्यासिकं थःके दइच्चंगु प्राचीन हस्तलिखित ग्रन्थं मेपित ज्ञान कनेगु विद्यादानं सर्वदानं प्रधानं धयातः थे तस्सकं उत्तम भाःपाः की नेपाल भाषाया महाकवि कविकेशरी चित्तधर 'हृदय' जुं कला व संस्कृतिइ अतिकं ह्यःह्य कलाकार थः परम पूज्य अबुजु श्री द्रव्यधर साहुजुया संस्मरणकथं आजु तापाःआजुपिसं संग्रह यानाथकूगु महायान बुद्धधर्मया अनेक हस्तलिखित सफूत, लुं सियातःपि सम्यक् दीपङ्कर व मेमेपि अनेक देवदेवतापिनिगु मूर्तित व सुन्दर चित्र पौभाः कलात्मक वस्तु आदि यानाः ब्याक्क खीगुता ६६ प्रकारया अमूल्य सांस्कृतिक सम्पत्ति व हे अन्तरराष्ट्रिय मूर्ति संग्रहालय व अन्तरराष्ट्रिय बौद्ध ग्रन्थालयया लागी लःल्लानाव्यूगु जुल ।

शुभ नेपाल सम्बत् १०६० साल बछलाश्वः चौथो तदनुसार (वि. सं. २०२७ बैशाख २६ गते) संचवाःखुनु कान्तिपुर न्यत तुंछेया तुलाधर चित्तधर 'हृदय', क्यहेपि मोतिलक्ष्मी, न्हूछे लक्ष्मी व भिचा केशरीलक्ष्मीपिनि धर्म चित्त उत्पत्ति जुयाः व स्वर्गीय अबुजु द्रव्यधर, मांहा ज्ञानलक्ष्मी, कलाः ज्ञानप्रभा, क्यहेपि बेतिलक्ष्मी व मणिलक्ष्मी थुपि न्याहासिया नामं आमन्त्रित सज्जनवर्गपिनिगु न्होने विशेष यानाः साक्षि जूपि सहअश्वलाधीश श्रीलक्ष्मण विक्रम भण्डारी, प्रधानपञ्च का. न. पं. श्रीगणेशमान, सरदार श्रीभूपालमानसिंह प्रधान, पुरातत्त्व विभागया श्रीसाफल्यप्रसाद अमात्य, निर्देशक पर्यटक विभागया श्रीतीर्थराज तुलाधरपिनिगु न्होने स्वयम्भू विकास मण्डलं न्हू चाय्केत्यंगु स्वयम्भू बहिलिइ च्वंगु अन्तरराष्ट्रिय बौद्ध ग्रन्थालय व वायुपुर नापं दय्कूगु अन्तरराष्ट्रिय मूर्ति संग्रहालयस सदांया लागी प्रदर्शनीया रूप्य ब्वय्त दिवंगत पूर्वजपिनिगु सुख शान्ति प्राप्ति कामना यासे श्रीस्वयम्भू महाचैत्यप्रति विधिपूर्वक श्रद्धाञ्जलि शुभ संकल्प यासे क्वय् धलख्य च्वयागु सम्पूर्ण वस्तु सहर्ष प्रदान यानादिइगु जुल । अन्तय् थ्व सम्पूर्ण वस्तु स्वयम्भू विकास मण्डलया अध्यक्ष श्रीभक्तवीरसिंह तुलाधरजुया ह्लातय् दानपत्र सहित लःह्लाया धुंसेलि थ्वय्कः 'हृदय'जुं उक्त समर्पित वस्तुप्रति माया व ममता क्यनाः थथे धयादिइगु दु—'थुनियात नेपाःया राष्ट्रिय मंकाः सम्पत्ति भाःपाः बांलाक लः, मि, छुं, खुं, कुं, सू (धिकं) आदि विकारपाखे थिइमफ्य्क विचाः संचाः यानाः सुरक्षित याना तइ ।'

थथे संग्रहित जूवइगु पुरातात्त्विक सांस्कृतिक एवं ऐतिहासिक, कलात्मक सफू, चित्र, मूर्ति इत्यादि दय्दसं द्वलंद्वः नेपाः काइपि विदेशी पर्यटक अन्वेषक विद्वान् तथा नेपाःदेया अभिरुचि तइपि नेपाःमितय्गु निम्ति नं अध्ययन व अनुसन्धान याय्त छगू दुर्लभगु थाय् व साधन अवश्य जूवनी भाःपा । उकिं थ्वय्कः 'हृदय'जुया थ्व तःधंगु उदारता विवेकपूर्ण त्याग व लिपायापि श्रद्धालुपिनिगु निम्ति आदर्श रूपकथं स्वयम्भू विकास मण्डलयात तःधंगु उत्साह ब्यूगु दु ।

खतु कीथाय् पय्ह्लं बिइबलय् मिसातय्त दैनिक जीवनय् हनेमाःगु अनेक सरसामग्री क्वसःया रूप्य बियाछ्वय्गु चलन दु । व हे क्वसः लिपा पय्ह्लं वःह्य भलिमचा देहान्त जुइ धुंकाः वइगु निम्ति परत्रय् उपभोग याय् दय्मा दिव्य सम्पत्ति लाभ जुइमा धइगु हेतुं देगः देगल्य् वही विहारय् शिवे ताय्गु चलन यात । गुलिसिनं व हे शिवेवस्तु बहियो ब्वइबलय् वही बाहालय् प्रदर्शनीया रूप्य ब्वयावइच्वंगु खनेदु^१ । थथे सी धुंकाः जक शिवे ताय्गु व ब्वय्गु मयासे थः जीवित अवस्थाय् थःगु हे मिखां खंक खंक शिवे तय्ज्यू धइगु न्हूगु चलन थ्वय्कः 'हृदय'जुं क्यनादिल । थ्व प्रशंसनीय विषय खः । थौकह्लय् वैज्ञानिक युगयात तस्सकं त्वःगु ज्या खः । श्रद्धालुजनपिनिगु निम्ति छगू न्हूगु लँपु धाःसां अत्युक्ति जुइमखु । उकिं वय्कलं थःगु आत्मोय सन्देशय् 'सी धुंकाः जक दइगु स्वर्ग छुयाय्त ?' धयादिइगु धापूयात त्वय्क सार्थक यानादिल । थ्व तस्सकं बांलाःगु ज्या जुल ।

व थे हे मेमेपि यक्वं दातापिनिगु नुगलय् नं थ्वय्कःयागु थुगु पुण्य कार्य न्हूगु उत्साह व धर्म चित्त उत्पत्ति यानाविइ धकाः स्वयम्भू विकास मण्डलं कामना यानाच्वंगु दु । मण्डलं आशा व

विश्वास या:गु दु—छिकपिसं नं थथे हे बौद्ध ग्रन्थ, मूर्ति, पौभाः, कलात्मक वस्तु इत्यादि चन्दा स्वरूप मण्डलयात प्रदान यानाः अन्तरराष्ट्रिय मूर्ति संग्रहालय व अन्तरराष्ट्रिय बौद्ध ग्रन्थालयया महत्व विश्वया न्ह्योने ज्वला ह्याय्कं थे थिइका विइगुलिइ अवश्य सहयोग प्रदान याना दी ।

श्रीचित्तधर 'हृदय'जुं दुंता यानादिइगु वस्तुया धलःपौ

१. पञ्जदांघो दीपङ्कर— लुं सियाः प्रभा आसन सहित नाप इच्च जाः ३३" ने. सं. ६६३
२. महाअक्षोभ्य— लुं सियाः प्रभा आसन नाप नाप इच्च जाः १६" ने. सं. ६३८
३. महाअमिताभ— लुं सियाः प्रभा आसन प्रभृति नाप इच्च जाः १८" ने. सं. ६६६
४. यमारि त्वहंया मूर्ति जाः १६"
५. ग्वय्वाता लीलया जाः १५" कलात्मक भव्य
६. फारी लीलया जाः ६"
७. मोहमाः वहःया थान् २३ (मल्ल व शाहकालया)
८. थथिक्वथिचुपि वहःया सिखः दाप सहितगु १५ इच्च
९. माणे वहःया
१०. लचदलू धलवतया चिन्तामणि लोकेश्वर सहितगु दिवा
११. पूजाभः कायभ नैवद्य खला दिवा सहित
१२. त्रिनिरञ्जन बुद्ध, त्रिकालबुद्ध सप्तबुद्ध, पञ्चबुद्ध अष्टबोधिसत्व
पोदशबोधिसत्व सहित पौभाः २८ x ३८ ने. सं. ६१८
१३. सप्तलोचनी तारा पौभाः १० x १७ इच्च
१४. आर्यतारा चौरभयतारिणी पौभाः ११ x १५ "
१५. आर्यतारा सिंहभयतारिणी पौभाः १० x १५ "
१६. अचल मण्डल पौभाः १६ x २३ "
१७. महिष सम्बर पौभाः ने. सं. १०११ १७ x २४ "
१८. चक्रसम्बर गुरुजोग पौभाः १६ x २७ "
१९. हेवज्र नैरात्मा पौभाः १८ x २६ "
२०. वज्रबाराही षट्योगिनी ३६ संवरादि पौभाः २२^१/_२ x २६^१/_२ ने. सं. १०४६
२१. अमोघपाश लोकेश्वर पञ्चबुद्ध नवव्याकरण प्रज्ञापारमिता,
अष्टबोधिसत्वयुक्त पौभाः २३ x ३० " ने. सं. १०५२
२२. शाक्यसिंहया चूडाकर्म व सुजाताया क्षीरदान सहित पौभाः १८ x २५ "
२३. परोपकार संस्थाद्वारा आयोजित नेपाल राष्ट्रिय प्रदर्शनीया विशेष प्रशंसापत्र फ्रेम सहित
२४. फ्लडर सहितगु क्वैय्चिया इलां

२५. सिंहनाद लोकेश्वर तस्वीर

१४ x १८ "

२६. धर्मसार समुच्चय पुस्तक

२७. धारणो संग्रह १३ चित्र सहित

ने. सं. ६१२

२८. सुखावतीव्यूह

ने. सं. ६२६

२९. कारण्डव्यूह

ने. सं. ६२८

३०. निष्पन्न योगाम्बर तन्त्र

ने. सं. १०११

३१. अमरकोश बनारस लिथोथासा

वि. सं. १६१४

३२. धर्म समुच्चय सँय् आखः सँय्भाय् सहितगु

ने. सं. १०१५

३३. वज्रसत्त्व कवच

३४. वज्रसत्त्व, हारतो, कालचक्र नीलपत्रय् लुं च्वइतःगु

३५. वसुन्धरा धारणी नीलपत्रय् लुं वहलं च्वइतःगु चित्र १ सहित

३६. चिनिया चित्र चिनिया वत्ता सहित

३७. थःगु लिखित प्रकाशित व सम्पादित सफूत प्रति ३१

स्वयम्भू महाचैत्य निमित्त उपत्यका मर्मती डिभिजनया सहयोग

स्वयम्भू विकास मण्डलया अनुरोध व पुरातत्त्व विभागयागु सिफारिश निगू पक्षयात नं ध्यान आकर्षित यासे आवास तथा भौतिक परियोजना विभाग अन्तर्गत उपत्यका मर्मती डिभिजनपाखे श्रीस्वयम्भू महाचैत्यप्रति श्रद्धां प्रेरित जुयाः निम्नलिखित मर्मत तथा जीर्णोद्धार यानाब्यूगु दु ।

स्वयम्भू स्थित प्रसिद्ध गुफा शान्तिपुरया पौ ल्ह्वनेगु ज्या व प्रतापपुर मन्दिरयागु नं आवश्यक मर्मत यानाब्यूगु दु । थ्व ज्या वि. सं. २०२२ साल माघ महिनां शुभारम्भ जूगु जुल । लिस्से वि. सं. २०२८ साल माघपाखे हानं थ्व हे मर्मती डिभिजनं स्वयम्भू स्थित अन्तरराष्ट्रिय मूर्ति संग्रहालय भवनया जःखः नं ल्वहंबै सियाः शोभा वृद्धि यानाब्यूगु जुल । थ्व मर्मती डिभिजनं याःगु निगू ज्या नं कार्यभार कुवियाः सम्पन्न याःह्य ल. पु. भिन्छेँबाहाःया आशाकाजी वज्राचार्य खः ।

स्वयम्भू महाचैत्यप्रति छह्र चित्रकारया शान्तिपुरस चित्रपूजा

ख्रिस्तु शताब्दीपाखे नेपालय अनावृष्टि जुल । उगु दुर्भिक्ष अनावृष्टि दोष शान्त याय् निर्मित स्वनाम धन्य महाराज जुजु प्रताप मल्लजुं अनेक अतिकं प्रशन्न चित्त जुयाः थः प्रजापतिगु उपरय् करुणा तयाः व थुगु स्वयम्भू पर्वस्थित प्रसिद्ध गुहा शान्तिपुरय् दुने विधिपूर्वक दुहांवनाः व थःगु मनोरथ पूर्ण यानाः अति गम्भीरगु भयङ्करगु घोरान्धकारगु शान्तिपुरं निर्विघ्न आनन्दपूर्वक पिहांवयाः नेपालय सुवृष्टि यानाः सहकाल यानाविल ।

उगु इलय् जुजु कवीन्द्र जयप्रताप मल्लजुयात उगु शान्तिपुरय् दुहांवनाः थःगु कार्य सफल याय्फुगुलिं तच्चोगु हर्ष आनन्द प्रीति सुख प्राप्त जुल । लिस्से वय्कलं थःह्यं अन शान्तिपुरय् दुने खनागु विविध दृश्य सम्बन्धी थःत अनुभव प्राप्त जूगु विषय कयाः थःह्यं उगु चित्राङ्कण यानाः सदा स्मरणया लागी चित्र चवयाः पौभाः दय्काः सुरक्षित याना तइतल । थ्व हे पौभाःयागु प्रतिलिपि निपाः प्यपाः जुजुया विश्वासी पात्रपित च्वकेबिल जुइ धइगु अःपुक अनुमान याय्फु^१ ।

थ्व हे शान्तिपुरय् दुनेच्वंगु अद्भूत कौतुकमय दृश्ययागु पौभाःया रूपय् च्वके धुँसेलि साहित्य संगीत व कलाय् अतिकं प्रवीण व निपूणह्य जुजु प्रताप मल्लजुं स्वयम्भू महाचैत्ययागु आत्मकथा स्वयम्भू ज्योतिरूपयागु उत्पत्ति विस्तार वर्णन जुयाच्वंगु स्वयम्भू पुराणयागु आधारकथं थ्व हे शान्तिपुरया पिनेसं च्वंगु क्वथाय् कुशल कलाकार चित्रकारयात सःताः जुजुयागु निर्देशन अनुसारं भित्तीचित्र बांलाक च्वकेव्यूगु जुल । लिस्से दूरदर्शी प्रताप मल्ल जुजुं उगु प्रत्येक घटनाक्रमयागु सम्पूर्ण भित्तीचित्रया क्वस्सं क्वस्सं आखः चवयाः परिचय बियातःगु जुयाच्वन । विश्वय् दुर्लभगु थपाय्धंगु स्वयम्भू महाचैत्य विराजमान जुयाच्वंगु स्वयम्भू पर्वस्थानय् व हे नेपाल गौरव स्वयम्भू महाचैत्ययागु

१- थुजाःगु पौभाः तःछें बाहाःया वज्राचार्य देवहर्ष व किण्डोलया भिक्षु वागेन्द्रवज्रयाके जिं खना ।

वर्णन लिपिवद्धया रूप्य जक मखु परन्तु चित्रात्मक रूप्य नं स्वयम्भूया चर्चा जनसमक्ष्य प्रस्तुत याय् खंगुलि जुजु अतिकं प्रशन्न जुल^१ ।

लिपा जूलिसे कलायागु महत्व स्वयाः नं धर्मयागु महत्व अप्पो क्लक्य् जूपि धर्मभीरु श्रद्धालु धर्मात्मापिसं थन धुं धुपाय् व इताःमत ध्यःदिवा च्याकूगु कुं व धुलं व्याप्त जुयाः थ्व भित्तीचित्र क्रमशः अस्पष्ट जुजुं विलीन जुयावन । थुगु चित्र स्थुंया वंगुलि यानाः क्कन वास्ताकिस्ता मदयाः उकियागु महत्व मथुयाः प्राकृतिक तथा मानविक प्रकोपद्वारा गुलिखय् क्षतिग्रष्ट जुजुं वन ।

थुजाःगु महत्वपूर्ण कलात्मक भित्तीचित्रयागु दुर्दशा खनाः येँया क्वहितित्वाःया मनछेँस च्वंद्वा स्वयम्भू भक्त कुशल कलाविद् चित्रकार हर्षमानजुं थःमांभौपिनिगु सुख शान्ति कामना यासे थ्व सम्पूर्ण जीर्ण-शीर्ण जुयाच्वंगु भित्तीचित्रयात खनाः पुनर्निर्माण नवनिर्माण याय्गु तःधंगु श्रद्धा चित्त उत्पत्ति यानाः शुभ संकल्प यानादिल ।

संसारय् देवया लीला अपार । थ्वय्कः चित्रकारीजुं थुगु शान्तिपुरय् दुने भित्तीचित्र च्वकेगु शुभ प्रतिज्ञा मनसुवा मात्र यानाः छुं समय लिपा अकस्मात् त्वचंकयाः प्राण संकष्ट जुयाः प्राण तोते मफयाच्वंगु व्यलय् वय्कःया श्रीमती दशलक्ष्मी मय्जुं थः स्वामियात तच्चोगु प्राण संकष्ट जुयाच्वंगु खनाः थथे मतिइ चिन्तना यात—प्रभु स्वामि तःधंछो स्वयम्भू शान्तिपुरस स्वयम्भू पुराणया महात्म्य च्वके धइगु गुगु शुभ प्रतिज्ञा यानादिइगु खः उगु शुभ प्रतिज्ञा जि पुरय् याना बिइगु जुल । कलाःह्यासिनं थथे भाकल याय् धुँसेलि तिनि वय्कः चित्रकारी उगु प्राण संकष्ट व दुःखं मुक्त जुयाः थःगु नश्वरदेह-यात आनन्दपूर्वक तोताः स्वर्गारोहण जूगु जुल ।

थ्वय्कः चित्रकारीजुयागु देहावसानं लिपा वय्कःयागु थःगु जाति संस्कार अनुसारं याय्माःगु क्रमशः सतिष्ठया सिधय्काः अले वय्कः दशलक्ष्मी मय्जुं थः धर्मस्वामियागु सत्यवाक्य शुभ प्रतिज्ञा महान् सदिच्छा पूर्ति निम्ति श्रीस्वयम्भूप्रति श्रद्धा भक्ति तथाः शान्तिपुरया भित्तीचित्रय् शोभा वृद्धि याय्त् थःस्वामि आदि पूर्व दिवंगत मां-बौपिनिगु सुखावति प्राप्ति कामना यासे थःगु परम कर्तव्य भाकल सफलया लागी अर्थात् स्वयम्भू महात्म्ययागु चित्रात्मक व्याख्या थुगु अंगलय् परन्तु सुरक्षित जुयाः ह्यापायागु लुमन्तियात साकार रूप बिइत सदां अटल व चिरस्थायी याय् कारण्य् थ्वय्कः दशलक्ष्मी मय्जुं येँया तःछेँबाहाःया वज्राचार्य रत्नचूडामणि गुरुजुयागु निर्देशनकथं चित्रमय स्वयम्भू महात्म्य च्वकेगुलिइ आवश्यक खर्च हनाः कुशल कलाकारपिनिगु सहयोगद्वारा थुगु अपरिमित पुण्य कार्य श्री ५ पृथ्वी वीर विक्रम शाहदेवजुया पर्यायस ने. सं. १०२४ श्रावण सुदी अष्टमी वृहस्पतिवारखुनु विधिपूर्वक च्वज्या सिधय्कूगु जुल^२ ।

थुगु भित्तीचित्र च्वय् सिधसेलि हानं खुला लिपा कर्म खंके निम्ति विधि विधानुसारं ने. सं. १०२५ फाल्गुणशुक्ल तृतीया रेवती नक्षत्र ब्रह्मयोग वृहस्पतिवारया दिनय् प्रतिष्ठा याःगु जुल^३ ।

१- स्वयम्भू स्थित बौद्धाचार्य सानुकाजी गुरुजुया थ्यासफूया छकू टुक्रापाखें उद्धृत ।

२- शान्तिपुरया भित्तीचित्रय् च्वयातःगु अभिलेख ।

३- शान्तिपुरया दुने च्वंगु सिजःपौ ।

थुगु चित्रकर्मया प्राण प्रतिष्ठा सिधय्काः गुलिचां मदुवं ६८ दँ लिपा हानं ह्लापाथे तुं थुगु भित्तीचित्र नष्ट भ्रष्ट जुल । कारण, गुकिइ मध्यय् पोल स्यनाः लः ज्वयाः रंग नायावन थाय्थासय् अंगः तज्यानाच्वन, ह्लियाह्लियं भक्तजनपिसं च्याकिइगु धुं धुपाय् व इताःमत ध्यःदिवाया कुं व धुलं कःगु व पर्व पर्वकालय् रहस्याच्वन पूजा आगंपूजा आदि जुइवलय् जज्ञ होम याइगु कुं व्याप्त जुयाः व भवय् न्याय्कः वइपिसं मोहनीसिह्लः भ्याचं अंगलय् हुइगु आदि विविध कारणं थौं उगु सुन्दर भित्तीचित्र बुलुगु चर्कय् जूगु बःचा बःचा ब्वलावःगु पाखे थौं थ्व धार्मिक सांस्कृतिक ऐतिहासिक एवं कलात्मक दृष्टि महत्वपूर्णगु चित्रकला क्षतिग्रष्ट जूगु स्वयाच्वने माःगु अवस्था जुल ।

थुगु भित्तीचित्र पुनः जीर्णोद्धार आदि याय्माःगु अवस्था जुयाच्वन । न्ह्यागुं ज्या सुधार व उद्धार याय्त छगू छगू शुभ संयोग माःगु जुयाच्वन खनी । थन कलामर्मज्ञ श्री ५ युवराजाधिराज वीरेन्द्र वीर विक्रम शाहदेवजु सवारी जूवलय् थुगु गौरवपूर्ण ऐतिहासिक भित्तीचित्रयागु महत्वप्रति विवेकपूर्ण ध्यान आकर्षित जूवन, उवलय् युवराजाधिराज सरकारं थुकियागु समुचित व्यवस्था जुइमाःगु खः धकाः महशूस याना बिज्यासेलि थुगु भित्तीचित्रया पुनः सौभाग्य उदय जुल, आनन्दगु सासः ह्लाफ्त, पुनरुद्धार याय्गु लुखा चाल । फलस्वरूप गुठी जीर्णोद्धार एवं निर्माण समितिपाखे ने. सं. १०६१ सालं पुरातात्त्विक प्राविधिज्ञपिनिगु सहयोगद्वारा वैज्ञानिक रसायनिक प्रयोग यानाः उगु भित्तीचित्रय् लापर्वाही जुयाः कलङ्क जुयाच्वंगु हाकः, सिह्लः, चिकं, कुं, धू, खप माखापिखा आदियागु पाखे जिनाच्वंगु खिति यच्चुक च्वत्तुक हुइगु ज्या जुल । ह्लापा गथे च्वयातःगु खः अथे हे दुरुस्त जुइक ह्लाय्कंया खिति हुयाः थःगु ख्वाः खने दइ थें ह्लापा थें च्वंक थःगु स्वरूप छीगु न्ह्योने तीजक खने दय्कःवल ।

थुगु भित्तीचित्रया लागी करीब फिदोति दां खर्च यानाः सम्यक् रूपं जीर्णोद्धार यानाब्यूगु जुल^१ । तर थ्व जीर्णोद्धार कार्यया थःगु हे विशेषता दु, महत्व दु—कारण थुकिइ जीर्णोद्धार धकाः उगु भित्तीचित्रय् गनं रंग व वार्नेस थपथाप यानाः चित्रकारं उकिइ थ गु ज्याभः प्रयोग याःगु मदु । केवल थुलि हे जक जुल—थौंकह्लय् वैज्ञानिक युगय् आविष्कार जूगु चमत्कारपूर्ण रसायनिक चिकं जक प्रयोग यानाः विस्तार विस्तारं घालय् वासः तय् थें तस्सकं आदरपूर्वक ध्यान तयाः मौलिक रूप मस्यनिइगुकथं उगु वासः चिकनं जक इलाः इलाः हु जक हुयाः उगु सम्पूर्ण भित्तीचित्र स्वलाया भित्रय् यथावत् थःगु पूर्व रूप प्रदर्शित यानाः सुरक्षित यानाब्यूगु जक खः । थुगु ज्याय् आद्योपान्त सहयोग यानादिईपि रसायनिक विशेषज्ञपि श्री ५ या सरकार पुरातत्त्व विभागपाखे नियुक्त यानाहःपि अधिकृत अफिसर निह्य जुल । थ्वय्कःपिनिगु नां खः—श्रीउपेन्द्रनाथ सापकोटा व श्रीभीमवर थापा ।

थुगु भित्तीचित्रय् च्वयातइतःगु चित्रमय स्वयम्भू पुराणया कथा ब्याक्क फिगू अध्यायय् विभक्त यानाः च्वइतःगु दु धकाः उल्लेख याना तइतल^२ :—

१- हाम्रो संस्कृति, वर्ष ६, अंक २, पृ. १३ — भीमवर थापा ।

२- नेपाल भाषा साहित्यया जातः, पृ. २६३ — चित्तधर 'हृदय' ।

- (१) सर्वप्रथम स्वयम्भू उत्पत्ति
- (२) पूजा वर्णन
- (३) महाह्रद संशोषण
- (४) वीतरागादि संजात
- (५) तीर्थ संजात पुण्य महात्म्य
- (६) धर्मधातु वागीश्वर प्रसिद्धि
- (७) धर्मधातु वागीश्वर गुप्ति
- (८) नागसाधन
- (९) महा आचार्य शान्तिकर
- (१०) सुभाषित धर्म (उपदेश)

खतु थ्व फ़िगू अध्यायय् दुनेलानाच्चवंगु विविध घटनाक्रम जक च्वयाः सिधय्कातःगु मखु कि थुकिइ तन्त्र वज्रयानया अधिष्ठातृ देवता गुरु देव डाकिनी धर्मपालपिनिगु सुन्दर चित्र व क्षपु हितिमंगः सहित यानाः भव्य रूप तोरणाकृति सुसज्जित यानाः अतिकं शोभा वृद्धि यानातःगु खनेदु । लिस्से बौद्ध दृष्टिकोणं नृत्य वाद्य संगीत कला आदिया अधिष्ठातृ देवता पद्मनृत्येश्वरयागु भव्य रूप चित्र नं थुकिइ शान्तिपुर प्रवेशद्वारया फुसय् समावेश यानातःगु जुल ।

स्वयम्भूनिसें चन्दा संकलन शुभारम्भ - लुम्बिनी विकास निम्ति

प्रागैतिहासिक इलंनिसें नेपालय् श्रीस्वयम्भू महाचैत्ययागु प्रभावं धयार्थे नेपाःयागु सम्पूर्ण धर्म, इतिहास, कला, दर्शन व संस्कृति आदि अनेक तीर्थोपतीर्थ देवदेवालययागु सृष्टि जुल । थ्वसपोलयागु अनुभावं हे सप्त बुद्ध, महामञ्जुश्री, मैत्रेय, नागार्जुन, वसुवन्धु, अतिशा दीपङ्कर, पद्मसंभव, ओदियाना-चार्य, वज्रपाद, रत्नरक्षित आदिपिनिगु शुभागमन जुल, फलस्वरूप थन अनेक सद्धर्मकीर्तित प्रतिष्ठापन जुजुं वयाच्वन ।

उकिं थ्व हे परम्परा व विश्वासकथं काठमाण्डू उपत्यकाय् दुने छुं छुं ततःधंगु धर्म धार्मिक सांस्कृतिक महान् कार्य जुइबलय् स्वयम्भू महाचैत्य साक्षि तयाः वसपोलयागु सन्मुखय् च्वनाः अथवा वसपोलयागु गुण गौरवप्रति स्मरण, साधन, ध्यान एवं भावनापाखे मिलय् यानाः धर्मकार्य शुभारम्भ यानावइच्चंगु अनेक इतिहास साक्षि दु । गथे कि गुबलय् नेपालय् अनावृष्टि जुइ अबलय् वर्षापन विधिद्वारा महामेघ साधन यानाः नेपाल सहकाल निम्ति कृया यानाः वइच्चंगु खनेदु । सम्यक् विधि थें जाःगु उच्चकोटि भावनां परिपूर्णगु ज्या-खँय् नं थ्व हे स्वयम्भू क्वस्सं भुइख्यलय् सम्यक् न्याय्का वइच्चन । अथे हे जम्बुद्वीपय् दुर्लभगु अत्यन्त महत्वपूर्णगु बौद्ध, शैष्णव एवं सौर सम्प्रदायं नं उत्तिकं समान आदर तयाः स्वागत याना वइच्चंगु बोधिसत्व श्रीकरुणामय मत्स्येन्द्रनाथयागु भव्यगु महत्वपूर्णगु रथ जात्राय् उगु रथया सर्वोपरी स्थान धकिवायमोलय् स्वयम्भू भगवान् विज्याका वइच्चंगु व पशुपति-नाथया शिरय् दच्छिइ छक्कः मुखोऽष्टमीखुनु स्वयम्भू भगवान्या मुखलं पुइका वइच्चंगु आदि विविध महत्वपूर्ण कारणं यानाः स्वयम्भू क्षेत्र अतिकं प्रसिद्ध जुयावइच्चंगु खँ सकसिनं स्यूगु हे विषय खः । अज्ज शाहवंशया कुलय् अतिकं नादंहा स्वामि जुजु श्री ५ रणबहादुर शाहजुं थःह्यं यानागु कुकृत्य अपराध दोष क्षमा याचनाया लागी थौतकं दच्छिया निक्कः असर्फि दक्षिणा छाया वइच्चंगु इतिहासं कनाच्चंगु दु । १७ गू शदीया कान्तिपुरया प्रसिद्ध जुजु कवीन्द्र जयप्रताप मल्ल थें जाःह्य शैव, सौगत,

वैष्णव शाक्त तथा सौर दर्शनया नं कारण छलपोल हे खः धकाः 'मञ्जुश्रीकृत रम्य पर्वत' नामक स्तुतिस प्रशंसा याना वइच्चंगु विविध कारण अत्यन्त महत्वपूर्ण विशुद्ध पुण्यभूमि स्वयम्भू क्षेत्र मान्य याना वइच्चंगु कीगु सांस्कृतिक परम्परां न्वँवाना वइचन ।

थुजाःगु महान्गु विशुद्धगु पवित्र भूमिस सुप्रतिष्ठित जुयाः विज्यानाच्चंहा आदिबुद्ध श्रीस्वयम्भू धर्मधातु वागीश्वरया सन्मुख्य च्वनाः छुं शुभकार्य प्रारम्भ याय्गु अत्यन्त परिशुद्ध भाःपाः 'लुम्बिनी विकास निम्ति' परम्परायागु आदर्श अनुरूप थुगु थासंनिसें सर्वप्रथम चन्दा संकलन अभियान शुभारम्भ याःगु जुल^१ ।

थुगु अभिमान ने. सं. १०६३ गुंलाथ्वः तृतीया सञ्चवाः तदनुसार वि. सं. २०२६ श्रावण २८ गतेखुनु सुथय् अनेक सांस्कृतिक वाद्यवादन सहित निर्विघ्नपूर्वक थुगु महान् कार्य सिद्ध जुइमा धइगु हेतु श्रीस्वयम्भू महाचैत्य प्रदक्षिण यासे स्वयम्भूनिसें श्रद्धा दिवस जात्रा विशाल जन समूह सहित प्रस्थान जुयाः जुलुस राजप्रासाद हनुमान ध्वाकाय् थ्यँसेलि उक्त श्रद्धा दिवस जात्रा समारोह्य परिणत जुल ।

हनुमान ध्वाकाय् आयोजित समारोह्य प्रधानमन्त्री श्री कीर्तिनिधि विष्टजुं धयादिइगु दु— विभिन्न देसया दत्थुइ जुयाच्चंगु पारस्परिक घृणा, वैमनस्य, द्वेष पाखे दूषित जुयाच्चंगु वातावरण्य गुज्जय् जुयाच्चंगु खतरापूर्ण मानव-जीवनया कल्याण निम्ति भगवान् बुद्धयागु आदर्श अनुरूप आचरण याना यंकेगु आवश्यकता कीसं जक मखु विश्वं महशूस याना वइच्चंगु दु ।

भगवान् बुद्धयागु सम्पूर्ण मानव-कल्याण याय्गु संकल्प न्हागु यानाः नं आस्था व विश्वास लिसे ज्या याना यंकल धाःसा विश्व शान्ति, कायम जुइ धइगु विश्वास व्यक्त यायां वय्कलं बुद्धयागु उपदेशयात पालन याय्गु हे कीगु जीवन सार्थक जुइगु खः, नापं नेपाल भगवान् बुद्धयागु जन्मस्थल जूगुलि नं कीत शक्ति व प्रतिष्ठा दइच्चंगु यानाः हे नेपाल चीधं जूसां नं विश्वया ध्यान थन आकर्षित जूगु खः धयादिल ।

थुगु श्रद्धा दिवस जात्राय् प्रधानमन्त्री, प्रधान न्यायाधीश, मन्त्रीगण व राजदूत लिस्सें भिक्षुगण, उपासक उपासिकापि व द्वलंद्वः श्रद्धालु भाजु मय्जुपिसं नं भाग कयादिइगु दु । कल्लय्खुनुनिसें त्वाः त्वाः पतिकं चन्दा संकलन कार्य शुरु जुजु वनी । थुगु कार्यक्रम 'लुम्बिनी विकास सहयोग समिति' यागु तत्वावधान्य जूगु खः ।

लुम्बिनी विकास योजना चन्दा संकलन समितिया आव्हान^१

समस्त धर्मावलम्बी देशवासीपिके अनुरोध—नेपाःया सुपुत्र भगवान् बुद्धयात अन्तरराष्ट्रिय जगतया मनूतय्सं शान्तिया दूत थःनाय्कूगु दु । वसपोल स्वयं शान्तिया पुरुष जक मजुसे संसारया सकल प्राणीयात शान्तिप्रिय याकेगुलिइ सफल जूगुलि वसपोलयात शान्तिया अग्रगामि नं धाःवन । थुगुकथं थःगु शिक्षा व शक्तियापाखें संसारया कुंकुलामय् च्वंपि प्राणीपिसं ह्यसिइकूह्य भगवान् बुद्धयागु पवित्र जन्मभूमि लुम्बिनी जूगु खः ।

थुगु पवित्र भूमिस सर्वप्रथम इस्वी पूर्व २४६ दँ न्ह्यो सम्राट् अशोकं तीर्थयात्रा याःगु खः । अनं लिपा न्यागूगु शदीया शुरुपाखे चिनीया यात्री फाहियान व ह्यगूगु शदीपाखे युवान् च्वाङ् नं थुगु पुण्यभूमिस तीर्थयात्रा याःगु खः । श्वय्कः महापुरुषपनिगु वर्णन अनुसार लुम्बिनीयागु स्थिति उगु इलय् सुसम्पन्न अवस्थाय् च्वनाः सुन्दर रमणीय उद्यान जुयाच्चंगु खँ बोध जूवःगु दु ।

वि. सं. २०२४ साल बैशाख महिनाय् नीगू शदीया अन्तरराष्ट्रिय युग पुरुष संयुक्त राष्ट्र संघया महासचिव श्रीउथान्तजुं थुगु भगवान् बुद्धयागु जन्मस्थल लुम्बिनीयागु दर्शन यात । महामहिम उथान्तजुयात थ्व थासं शान्त वातावरणया आनन्द बिल नं विभिन्न खँय् असम्पन्न अवस्थां आकर्षित यात । व हे असम्पन्न खँत फुकसिगुपाखें सुसम्पन्न यानाः थुगु पवित्र स्थलयात अटल व अमर याय्गु निर्मित दृढ संकल्प यानादिल । फलस्वरूप थुगु लुम्बिनी विकासया लागी विभिन्न बौद्ध देस व मेगु देसयाके यानाः रु. ५,६६,०००००।- अनुदान प्राप्त जूगु जुल ।

१- चन्दा संकलन समिति केन्द्रीय कार्यालय, बबरमहलद्वारा प्रकाशित पम्प्लेट ।

भिक्षु प्रियदर्शी महास्थवीरद्वारा स्वयम्भू दर्शन व प्रवचन

स्वयम्भू महाचैत्ययागु गौरव व महत्व थुइकाः गुलि नं विश्वया कुंकुलामय् च्वंपि अनेक बौद्ध विद्वान् सिद्ध आचार्य एवं भिक्षुपि स्वयम्भू दर्शन व पूजन निम्ति वयावन इपि मध्यय् थेरवादी शासनया छह्ना तस्सकं नांदंहा प्रकाण्ड विद्वान् थ्वय्कः भिक्षु प्रियदर्शी महास्थवीरजु नं छह्ना खः ।

श्रीलंकायागु सम्मानय् बौद्ध भिक्षु प्रियदर्शी महास्थवीरजु अखिल नेपाल बौद्ध संघयागु निमन्त्रणाकथं बुद्ध जन्मभूमि नेपालय् वयाच्चंगु दु । थ्व नेपाःमि बौद्धतय्गु लागी छगू खुशिया खँ खः । थ्वय्कः महास्थवीरजु संयुक्त राज्य अमेरिकाया हार्डवर्ड विश्वविद्यालयया विश्वधर्म सम्बन्धी छह्ना नांदंहा अन्वेषक विद्यार्थी खः । वसपोल विश्वया सुदूर पूर्वी तथा पश्चिमी देस थ्यंक बुद्धधर्म प्रचारकया रूपय् यात्रा याय् धुंकूहा नं खः । अज्ज वय्कलं गुलिखय् अन्तरराष्ट्रिय सांस्कृतिक एवं धार्मिक सम्मेलनय् श्रीलंकायागु प्रतिनिधित्व याय् धुंकूगु दु । थौंकल्लय् वय्कः बुद्धयागु शान्ति सन्देश लिसे विश्वया कुनाकुन य् थ्यंक नं सद्भावनापूर्ण यात्रा याना विज्यानाच्चंगु दु । थ्वय्कः छह्ना प्रसिद्ध ग्रन्थकार नं खः । थ्वय्कःयागु कृतित मध्यय् रिचर्ड एण्ड कम्पनी लण्डनद्वारा प्रकाशित 'द बुद्धज् आयनसेन्ट पाथ' नामक पुस्तकयात आलोचकतसें छगू आधिकारिक बौद्ध प्रकाशनया रूपय् ग्रहण याय् धुंकूगु दु । लिस्से थ्वय्कः बौद्ध प्रकाशन समितिया प्रधान सम्पादकजु नं खः ।

थ्वय्कः नेपालय् वइच्चंगु इलय् काठमाण्डू उपत्यकाया विभिन्न बौद्ध संघ, संस्था, समिति व समाज, मण्डलयागु अनुरोधकथं निम्न विषयय् कयाः थाय्थासय् कृपापूर्वक निसंदिग्धसाथ प्रवचन यानाविज्यात—

- (१) बुद्धयात गथे ह्यसिइकेगु
- (२) लुम्बिनीयागु सन्देश
- (३) बुद्धधर्म व आधुनिक समाज

- (४) बौद्ध समाधि
- (५) बुद्ध धर्मम् मिसाया स्थान
- (६) बुद्ध धर्म्य युवा शक्ति
- (७) निर्वाण
- (८) बुद्धधर्मया रूपरेखा
- (९) बुद्धधर्म छगू विश्वधर्म
- (१०) व्यावहारिक बुद्धधर्म
- (११) आधुनिक संसार्य बुद्धधर्म
- (१२) संसारया स्तूप चैत्य मध्यय् स्वयम्भू महाचैत्यया थःगु विशेषता
- (१३) बुद्धधर्म्य उन्नतिया मार्ग
- (१४) क्रीत धर्म छाया आवश्यक
- (१५) बुद्धधर्म्य भक्तिया स्थान
- (१६) चतुर्ब्रह्म विहार
- (१७) बौद्ध मनोविज्ञान
- (१८) एशियाली बुद्धधर्मयागु प्रभाव

थ्व हे प्रवचनया ऊवल्य ने. सं. १०६३ पोहेलागाः ५ तदनुसार वि. सं. २०२६ माघ १० खुनु स्वयम्भू विकास मण्डलपाखें वसपोलयात सौहार्दपूर्ण निमन्त्रणा जुल । वसपोल महास्थवीर प्रियदर्शीजु स्वयम्भू थ्यनेवं सर्वप्रथम चैत्यकुल नायक भव्य रूप श्रीस्वयम्भू महाचैत्ययात खनाः दर्शन व स्पर्शन यानाः सुविनीतभावं प्रदक्षिण यानाविज्यात । अनंलि वसपोलयात स्वयम्भूइ च्वंगु अन्तरराष्ट्रिय बौद्ध ग्रन्थालयस विज्याकाः थःगु कार्यक्रमकथं 'आधुनिक संसार्य बुद्धधर्म' धइगु विषयय् प्रवचन याय्त अनुरोध याःगु जुल ।

उगु अनुरोधकथं आधुनिक संसार्य बुद्धधर्मया छु आस्था प्रतिष्ठा दु व थौयागु युगयात छाया आवश्यक जुल अले उकियागु छु विशेषता दु धइगु विषय कयाः छु भचा व्याख्या याय् धुंकाः खास यानाः संसारया स्तूप चैत्यत मध्यय् स्वयम्भू महाचैत्यया थःगु हे विशेषता, इतिहास, जनविश्वास एवं महत्व दु धइगु खं न्ह्यथनाः थथे धयाविज्याःगु दु कि अन्तरराष्ट्रिय बौद्ध जगत्य नांदनाच्चंगु अतिकं प्रसिद्धगु चैत्यत खः—

- (१) श्रीलंकाया चैत्य — सुवर्णमाली (थूपाराम)
- (२) बर्माया " — श्वेतगाउँ, आनन्दाभय
- (३) जापान " — शान्तिमहाचैत्य
- (४) जाभा " — वरोबुदुर

- (५) कम्बोदिया चैत्य - अङ्कोरवात्
- (६) चीनया " - ह्वाइट पागोडा (श्वेतचैत्य)
- (७) श्यामया " - महापपु
- (८) भारतया " - साँची स्तूप, रत्नगिरिया विश्वशान्ति स्तूप

उपरोक्त चैत्य स्तूपत मध्यय् थुकिइ प्यख्यरसं विशाल नेत्र—ध्यानदृष्टि, कारुणिक अवलोकन अंकित व अथे हे प्यख्यरसं पञ्चबुद्धयागु मूर्ति प्रतिष्ठापित जूगु हे थुकिया विशेषता खः, विलक्षण खः । श्व प्यख्यरसं च्वंगु विशाल नेत्र सम्पूर्ण त्रिपिटकया सारांश प्रज्ञा व करुणाया परस्पर सम्बन्ध खः, बुद्धया शिर मस्तिक हे प्रज्ञाज्ञान, बुद्धया हृदय्य बोधिचित्त महाकरुणा खः । भौतिक संसारया आहार निर्मित अक्षय निधि भूमि जग्गा खः, अथे हे आध्यात्मिक चिन्तनया पराकाष्ठा उच्चकोटि दर्शनया स्वरूप चैत्य खः । वर्तमान युग्य प्रजातन्त्रवाद व विज्ञानवाद निगू अतिकं व्यापक व अत्यन्त लोकप्रिय जुयाच्चन, अथे हे लोकोत्तरवाद निर्मित परमार्थ शून्यतावादया महान् दिव्य प्रतीक श्व हे स्वयम्भू महाचैत्यं प्रतिनिधित्व यानाच्चंगु दु ।

थुगु प्रवचन समारोह्य उपस्थित गण्यमान्य निमन्त्रित व्यक्तिपिनिगु सेवार्थ थापाथली स्थित ब्लूस्टार होटेलया संस्थापक साहु श्रीकुलवीरसिंह तुलाधरजुपाखे जलपानया व्यवस्था नं याःगु जुल ।

फुजिई गुरुजुया स्वयम्भू दर्शन

स्वयम्भू महाचैत्य दर्शन व पूजन निमित्त बौद्ध जगत्य प्रतिष्ठित अनेक धर्मगुरु सिद्ध, आचार्य, भिक्षु, श्रमण विद्वान्पि इत्येव—व्यत्येव वयाच्वंगु इतिहासं कनाच्वंगु दु ।

थ्व हे परम्पराकथं 'नेपाल बौद्ध समाज' या निमन्त्रणानुसार जापान बौद्धसंघया महाध्यक्ष परम पूज्य वयोवृद्ध भिक्षु निचिदात्सु फुजिई गुरुजु ८८ दँया बैसय् थः शिष्यगण सहित वसपोलपि ने. सं. १०६३ थिलाथ्वः ११ तदनुसार वि. सं. २०२६ पौष २ गतेखुनु स्वयम्भूस थ्यंकःवल ।

उगु समयय् नेपाल बौद्ध समाज व स्वयम्भू विकास मण्डलया संयुक्त प्रयासं थ्वसपोलपित स्वागत सम्मान यात । अले वसपोलपिसं स्वयम्भू महाचैत्य प्रदक्षिणा याय् धुंकाः नमु—म्योहो—रेंग्ये—क्यो (नमः सद्धर्म पुण्डरीक सूत्राय) निसें प्रारम्भ यासे गाथा व्वनाः इमि थःगु विधिकथं जापानी वाद्य सहित श्रद्धा व भक्तिपूर्वक पूजा व स्तुति यानाबिज्यात ।

स्वागत समारोहय् वसपोलयागु परिचय बिब्युं थथे धाःगु दु—थल्लिइ नीस्वसःदँ न्ह्यो भारताधिपति सम्राट् अशोकं बुद्धधर्म प्रचार निमित्त थाय्थासय् धर्मप्रचारकपि छ्वयाः ८४००० धर्म-राजिक अशोक चैत्य देसदेसान्तरय् प्रतिष्ठापित यानाः विशाल भारतय् उख्येंथुख्यें अशोकस्तम्भ नं स्वनाथकल, गुगु अशोकस्तम्भ लुम्बिनी अञ्चलय् निगः नं लाःगु दु । अथे हे थौंया नीगू शदीइ वसपोल-यात सम्राट् अशोक समान खः धकाः प्रशंसा याःगु दु ।

थ्वसपोल नेपाः बिज्याःगु मुख्य कारण थ्व खः—स्वयम्भू दर्शन यानाःलि काठमाण्डू उपत्यकाय् दुने नं छगः विशाल बौद्ध स्तूप (विश्वशान्ति स्तूप) निर्माण याय्गु प्रतिज्ञा ज्वनाः बिज्याःगु खः । थ्व हे शुभ प्रतिज्ञा ज्वनाः विश्वशान्ति स्तूप निर्माणया लागी अनेक थाय् ल्यल, अन्त्य वसपोल बुद्ध जन्मभूमि लुम्बिनी थ्यँसेलि उगु थाय्थागु शान्त वातावरण खँसेलि तथागत शाक्यमुनियागु शान्ति सन्देशयात लुमंकाः वसपोलयागु पवित्र जन्मभूमि लुम्बिनीइ हे दय्केगु निर्णय याःगु जुल ।

बौद्ध चैत्य परम्परायागु सम्प्रभुत्तायागु मार्मिक व्याख्यायागु गुण गौरवयात लुमंकाः जापानया — हानावकार्ये, क्युसुटापु, हुकूइ, क्युसिरो, होकाइदो, सप्परो, हिमेजि, आतामि, शाकाउरा, वाकामात्सु,

ओशाका, गोतेम्बा, फुसिकि, आवोमोरो, उत्तुनोमिया, हिरोशिमा, नीजुकोमोरो, शेन्स्युइको, आकिता, कियोसुमि, सानरिजुका, वाकासामा एवं भारतया राजगृह व कलिग आदि थासय् विश्वशान्ति चैत्य निर्माण यानाविज्या ह्य भिक्षु श्रीनिचिदात्सु फुजिई गुरुजुपाखे लुम्बिनीइ नं विश्वशान्ति चैत्य दय्केगु वःछित । वसपोलं दय्किइगु विश्वशान्ति चैत्य लुम्बिनी गुर्योजना क्षेत्र लिक अथवा दक्षिण पश्चिम दिशापाखे दय्किइगु जुयाच्चन^१ ।

राजगृहय् स्थापना जूगु विश्वशान्ति चैत्यया विषयय् थथे धइतःगु दु^२—

शाक्यमुनि भगवान् तथागतयागु शान्ति सन्देश लुमंके निम्ति जापान बौद्ध संघया परम पूज्य फुजिई गुरुजुया परिकल्पनाया साकार रूप गन भगवान् बुद्धं महायानया विषयय् धर्मचक्र प्रवर्तन जुल अन उगु पवित्र स्थान राजगृहया गृद्धकूट पर्वतया जवपाखे च्वंगु रत्नगिरि पर्वतया चवकाय् थुगु विश्वशान्ति स्तूप निर्माण यानाबिल ।

थुगु स्तूपया योजनाया कार्याविधि अनुमानित छिदँ बित । थुगु स्तूपया शारोरिक निर्माण जक प्यदँत्या बित । थुकिया जाः शिखरतलनिसे १६० फुट चवय् लाः । स्तूपया गर्भगृहय् सुन्दर कलात्मकं जायाच्चंगु छगू सन्दुकय् सप्तरत्न व भगवान् बुद्धया अवशेष तःगु दु, गुगु स्तूपया चित्तय् शान्ति मैत्री करुणाया त्रिवेणी अन्तर्निहित जुयाच्चंगु दु । लिस्सें सद्धर्म पुण्डरीक प्यंगू लाख व न्येद्वः धार्मिक शब्दत छगू छगू त्वहँतय् प्यंगू लाख व न्येद्वः श्रद्धालु व्यक्तिपिनिगुपाखे चवकाः प्रत्येकसिगु हस्ताक्षर याकाः स्तूपय् दुने सुरक्षित यानाः तयाव्यूगु दु ।

जापान बौद्ध संघया महाध्यक्ष फुजिई गुरु नेपाः विज्यानाः लुम्बिनीइ विश्वशान्ति स्तूप निर्माण जुइगु शुभ समाचार न्येदेयाः तस्सकं लयतासे अज्ज नेपाल बुद्धधर्म सम्बन्धी ठोस ज्या याय्माःगु महशूस यासे नेपाल समाचार दैनिक पत्रिकाया सम्पादकीय लेखय् आशा व उद्गार व्यक्त यासे महत्वपूर्ण सुक्राव नं पेश यानाः थथे धइतःगु दु^३—

जापान बौद्ध संघया अध्यक्ष श्रीफुजिई व वय्कःया शिष्यपि बौद्धधर्म सम्बन्धी ज्ञान हासिल याय् निम्ति बुद्धया जन्म देस नेपाल भ्रमणय् वयाच्चंगु दु । थथे यानाः विभिन्न देसया सम्बन्धित विद्वान्त इलय्-व्यलय् नेपाः वयाच्चंगु खँ सकसिनं स्यूगु खः । बुद्ध व हिन्दू धर्मया समन्वयभूमि नेपालय् थ्व निगू धर्मया छगू मेगुपाखे प्रभावित जू व थनयागु बुद्धधर्म अत्यन्त विशिष्ट जू । थ्व हे विशेषताया कारणं व थ्व बुद्धयागु देस जूया निम्ति भगवान् बुद्धयागु जन्मस्थल लुम्बिनी संयुक्त राष्ट्र संघया प्रयत्नं व्यापक योजना प्रारम्भ जुइत्यंगु दु । थ्व तस्सकं खुशि व उत्साहवर्धक खँ खः ।

लुम्बिनी विकासागु परिणाम स्वरूप नेपालय् बौद्ध धर्मावलम्बीतय्गु आवागमन क्रमशः बढ्य जुजु वनिइगु खँ निश्चित जू । थुगु स्थितिइ बुद्धधर्म सम्बन्धी विशेष अध्ययन व अध्यापनप्रति नेपालं

१- लुम्बिनी पत्रिका, वर्ष १, अंक १, पृ. ६

२- राजगीर—विश्वशान्ति स्तूप, संक्षिप्त परिचय ।

३- नेपाल समाचार, दैनिक पत्रिका, २०२९ पौष ११

विचार याय्माःगु खनेदु । बौद्धधर्म सम्बन्धी महत्वपूर्ण ग्रन्थत थन दइच्चंगु दु व बुद्धयागु हे जन्मदेस नेपालय् बुद्धधर्म गुगु प्रकारं प्रचलित जू धइगु विषयय् विश्वया बौद्धमार्गीत उत्सुक जुयाच्चनिइगु स्वाभाविक खः । तर थौतक बुद्धधर्मयागु व्यापक व वैज्ञानिक ढंगं अध्ययन याय्गु चलन प्रारम्भ जूगु मदुनि । नेपालय् प्रचलित बौद्धधर्मया प्रामाणिक व विशिष्ट व्याख्या याय्गु विद्वान्तय्गु थन तस्सकं कम तिनि । बुद्धया जन्मदेस नेपालय् थुगु सन्दर्भय् विद्वान्तय्गु अभाव जूगु मछालेपुगु खँ खः । उकिं नेपाःयागु बुद्धधर्मयागु विशिष्टतायागु लिस्सें विश्वय् प्रचलित बौद्धधर्मयागु तुलनात्मक अध्ययनयागु थिति नेपालय् याकनं हे चालू याय्गु मदय्क मगाःगु थें अनुभव जू । अज्ज थुगु विषयय् अध्ययन लुम्बिनीइ हे याय्गु व्यवस्था जसा उत्तम जुइ ।

नेपाःयागु महत्व व विशेषता विश्वयात क्यनेगु व थुइकेगु ज्या विशेष यानाः सरकारं ध्यान तय्माः । बुद्धधर्म तथा हिन्दूधर्मयागु समन्वयात्मक सिद्धान्त व व्यवहार गुगु नेपालय् प्रचलित दु, थुकियागु अध्ययन अध्यापन वैज्ञानिक किसिमं याय् दत धाःसा नेपाःयागु गौरव वृद्धि जुइ धइगु खँय् छुं शंका मदु ।

स्वयम्भूस युवा कलाकारपिनिगुपारखे बुद्धजीवनी प्रदर्शनी

बुद्ध सम्बत् २५१८ दै क्यंगु (ने. सं. १०६४) बुद्धपूर्णिमा बुद्धजयन्तीयागु लसताय् स्वयम्भू विकास मण्डलयागु विशेष आयोजनाकथं युव कलाकार समूहद्वारा स्वयम्भू महाचैत्यया पश्चिमोत्तरया कुलामय् चैत्य पार्कस शाक्यमुनि बुद्धया जीवनी सम्बन्धी कला प्रदर्शनी जूगु जुल । खास यानाः थ्व कला चायागु ब्वति मिलय् यानाः दय्काःलि उकिइ माःथाय् माःगु किसिमं रंगरोगन तथाः बांलाका-तःगु, लिस्सें गन गुगु वसः तिसा तिइकेमाःगु खः उगु प्रकारं तालमान संतुलन मिलय् यानाः नं उगु घटनास्थलयागु दृश्य फलक क्यनाब्यूगु दु । थुगु किसिमया 'बुद्धजीवनी कला प्रदर्शनी' शायद् नेपालय् ह्लापांगु प्रदर्शनी जुइफु ।

थुगु कलाकृति तयार याय्त करीब पीह्यति कलाकारपि मुनाः फुह्मं फूगु हारगुहार सहयोग बियाः स्वयम्भू बहिलिइ हे ज्यासः दय्काः अन च्वनाः मूर्ति जक निलाया दुने दय्के सिधय्कल । अले थाय्थासय्यागु खुसि, पहाड पर्वत, जंगल, ख्यः लाय्कू, रथबग्गी आदियागु दृश्य जक कलाकारपिसं थःथःगु छेय् छेय् च्वनाः दय्काहःगु जुल । बुद्धजीवनी मूर्तित निम्नप्रकारया घटनाक्रम नाप मिलय् जूपि—

- (१) जवगु ह्लातं अभय बियाः खवगु ह्लातं गुलपाः ज्वनाः चारिका यानाबिज्याःगु भव्य सुन्दर मूर्ति^१ ।
- (२) लुम्बिनी वनय् सर्वार्थसिद्धया जन्म प्रसव वेदना इलय् मायादेवीयात छह्य चारिकां बहः बियाच्चंगु ।

१- १ व ९ संख्याया मूर्तित की मनु पाय्धिकः जुलं मयाः, मेगु व्याक्क म्हुछि व कुछि प्रमाण जू ।

- (३) सन्ध्या इल्य् रथ्य् च्वनाः चाःह्य् वंवल्य् राजकुमार सर्वार्थसिद्धं रोगी, बुढा, सिद्धि व भिक्षु खंगु लिस्सें सर्वार्थसिद्ध व छन्दक निहसिया खँल्लाबल्ला जुयाच्चंगु ।
- (४) २६ दँ या बैस्य् राजकुमार सर्वार्थसिद्धं गृहत्याग यानाबिज्याःगु, थःकलाः यशोधरायात व काय् राहुलयात घय्पुनाः यशोधरा द्यनाच्चंगु इल्य् सर्वार्थसिद्ध लुखाय् दनाः विचार यानाच्चंगु ।
- (५) बोधिज्ञान मालेत कन्थकसल गयाः पिहांबिज्याःगु । सर्वार्थसिद्ध सल गयाः पिहांबिज्याःगु खनाः छन्दक बिलाप यानाः स्वयाच्चंगु ।
- (६) थःगु सँ थःगु हे तलवारं ध्यनाः चूडाकर्म यानाबिज्यानाः चीवरं पुनाबिज्याःगु । सर्वार्थसिद्धया न्ह्योने छन्दकं प्रार्थना यानाच्चंगु ।
- (७) खुदँतक दुष्करचर्या यानाः तपस्या यानाबिज्याःबल्य् गंसि जुयावँव सि व क्वँय् जुइक गंसि जुयावँगु ।
- (८) बुद्धगयाय् बोधिवृक्षया क्वय् च्वनाः तपस्या यानाबिज्याना च्वंवल्य् बैशाखपुल्लिया प्रथम प्रहर्य् सिद्धार्थ बोधिसत्त्वयात बोधिज्ञान प्राप्त जुल । अनंलि वसपोल सम्यक् सम्बुद्ध तथागत जुयाबिज्यात ।
- (९) चय्दँ क्यंगु बैस्य् महापरिनिर्वाण प्राप्त यानाबिज्यात ।

थुगु मूर्ति निर्माण कार्यय् सहयोग प्रदान यानादिइपि युवा कलाकारपिनिगु नामावली प्रसंगवश प्रस्तुत यानाच्च्वनाः—

- (१) पुष्परत्न शाक्य (२) केशरत्न वज्राचार्य (३) चिनीकाजी ताम्रकार (४) शान्तमान वज्राचार्य (५) मदनलालसि सुवाल (६) नारायणलक्ष्मी श्रेष्ठ (७) अरुणादेवी श्रेष्ठ (८) वसुन्धरा श्रेष्ठ (९) शीलशोभा शाक्य (१०) हेम पौद्याल (११) ज्ञानुलाल श्रेष्ठ (१२) तान्तिकमुनि वज्राचार्य (१३) अशोकरत्न वज्राचार्य (१४) श्यामलाल श्रेष्ठ (१५) चैत्यनारायण मानन्धर (१६) गोपाल चित्रकार (१७) गौतमरत्न तुलाधर (१८) बालकृष्ण श्रेष्ठ (१९) सुनिता वज्राचार्य (२०) वैकुण्ठमान श्रेष्ठ (२१) रवीन्द्र ज्यापु (२२) जुजुरत्न ताम्रकार (२३) ध्रुवरत्न ताम्रकार (२४) कृष्ण मानन्धर (२५) श्याम चित्रकार (२६) उज्ज्वलकुण्डन ज्यापु (२७) हीरालाल महर्जन (२८) तीर्थनारायण डंगोल (२९) फणीन्द्रनाथ न्यौपाने (३०) सिद्धिराम श्रेष्ठ (३१) रवि मानन्धर (३२) श्याम घिमिरे (३३) ईश्वरीदास अधिकारी (३४) शारदामान श्रेष्ठ (३५) हरि-प्रसाद शर्मा (३६) विजय श्रेष्ठ (३७) मोहनलाल बैद्य (३८) पुष्पलाल श्रेष्ठ (३९) दिलप्रभा ताम्रकार (४०) चिनीशोभा तुलाधर ।

लिस्सें स्वयम्भू विकास मण्डलपाखे दँय्दँसं न्याय्का वइच्चंगु बुद्धजयन्तीया महान् उपलक्ष्य् थ्व हे स्वयम्भू स्थित चैत्य पार्कया न्ह्योने जय् खव्य् अंगःपाताय् ब्वयातइतःगु विभिन्न प्रकारया चित्रकलात्मक सुन्दर पौभाःया संक्षिप्त विवरण थथे जुल—

अग्निपुराणा लिकचवंगु छेया पिने अंगलय् खायाः ब्वयातःगु

१. ह्लासाय् चलय् जूगु प्रसिद्ध धर्म गेलुग्पा शासनया महान् प्रवर्तक लामा चोङखापा वज्रासन स्थित खङ्ग पुस्तकधारी अभय यासे पिण्डपात्र ज्वनाचवंगु ।
२. चोङखापा धर्मचक्र युक्त खङ्ग पुस्तकधारी ।
३. चोङखापा वरद मुद्रा यासे कलश धारण यानाः खङ्ग पुस्तक ज्वनाचवंगु ।
४. चोङखापा पद्मोपरी खङ्ग पुस्तक सहित अभय बियाः जवगु ह्लातं सफू ज्वनाचवंगु ।
५. चोङखापा पद्माङ्कुरोपरी खङ्ग पुस्तक सहित वरद मुद्रा यानाः पिण्डपात्र धारण यानाचवंगु ।
६. चोङखापा अभय मुद्रा यासे खङ्ग पुस्तक ज्वनाचवंगु ।
७. चोङखापा वज्रयुक्त अभय घण्ट युक्त लास्य ज्वनाचवंगु ।
८. चोङखापा अभय मुद्रा यासे पिण्डपात्र ज्वनाचवंगु ।
९. चोङखापा अभय व पुस्तक ज्वसे ।
१०. चोङखापा निखे ह्लातं अभय बियाचवंगु ।
११. चोङखापा अभय व पुस्तक ज्वसे ।
१२. चोङखापा समाधि मुद्रा यासे ।
१३. चोङखापा डमरु व घण्ट ज्वनाः वज्रावेश मुद्रा यासे ।
१४. चोङखापा अभय व पिण्डपात्र ज्वनाचवंगु ।
१५. चोङखापा भूमिस्पर्श यासे पिण्डपात्र ज्वनाचवंगु ।

थुपि पौभाःत ब्याक्क भिगु मसीनगु रेस्मीइ भरय् यानाः रंगं च्वयातःगु थे यानाः सिइमदय्क रफ्फु भरय् यानातःगु तस्सकं मेहनत तुइक दय्कातःगु चमत्कार युक्त पौभाः मुस्ताङ्ग्यापि खचरा सँय् साहुतय्गु पाखे ब्वय्हःगु जुयाचवन ।

१६. महास्थवीर प्यहा
१७. महास्थवीर स्वहा
१८. शाक्यमुनि बुद्ध
१९. गुरु गुणभद्र शास्त्रार्थ मुद्रास, रेस्मीइ रफ्फु भरय् यानातःगु ६३ हाकः जाः दुगु ।
२०. महास्थवीर स्वहा
२१. " प्यहा
२२. " छहा
२३. " छहा
२४. वज्रनैरात्मादेवी मण्डल

चैत्य पाकंया न्होनेच्चंगु क्वाःपाःछेया अंगलय्

२५. स्वर्गावतरित बुद्ध शाक्यमुनि ।
२६. ह्लासाया ज्येरमुछि (शाक्यमुनि बुद्ध)
२७. ग्याल्पो थिसुङ्देहुचेन् (शुद्धजीव राजा)
२८. लामा चोङ्खापा (सुमति सिद्धि कीर्ति)
२९. सिंहवाहन युक्त मञ्जुश्री
३०. व्याघ्रवाहन युक्त खङ्गपात्रधारी मञ्जुश्री ?
- ३१-३८. षोडश महास्थवीरपि मध्यय् गुपाः पौभाः ।

क्वाःपाःछेया क्वय्यागु तल्लाय्

३९. चतुर्भुज महाकाल
४०. द्विभुज महाकाल
४१. गण्डीधर महाकाल (वज्रसाधु)
- ४२-४८. षोडश महास्थवीरपि मध्यय् ह्यपाः
४९. भैषज्यराज तथागत
५०. सप्तलोचनी तारा
५१. अवलोकितेश्वर
५२. सप्तलोचनी तारा
५३. वज्रभैरव
५४. महिषसम्बर
५५. महिषसम्बर
५६. गुह्यसमाज
५७. चक्रसम्बर

स्यंगु बहीया अंगलय् च्वंगु

५८. गृहस्थ जीवनय्-सिद्धार्थ
५९. धनुषविद्याया चमत्कार-सिद्धार्थ
६०. व्याघ्रजातक-महासत्त्व राजकुमार
६१. सिद्धार्थया चूडाकर्म व ओजस्वीबल प्रदान

- ६२. मारविजय एवं धर्मचक्र प्रवर्तन
- ६३. धर्मप्रचारार्थ देशाटन
- ६४. महापरिनिर्वाण

स्यंगु बहिलिइ दुने चाकल्य् च्वंगु वाटरकलरं च्वइतःगु आधुनिक चित्रकारतय्गु हस्तकला प्रदर्शनी

- ६५. आर्यावलोकितेश्वर
- ६६. रफु भरय् यानातःगु हिमालय दृश्य
- ६७. शिवपार्वतीया छगू रहस्यमय लीला
- ६८. छह्म मिसां सुकुण्डा मत ज्वनाः चाघःया लः हाय्काः सँ फिजय् यानाः पर्वत अभियान यानाच्च्वंगु ।
- ६९. शुद्धरात्रिया हिमालय दृश्य ।
- ७०. आर्यतारा
- ७१. चक्र व पलेस्वां ज्वनाच्च्वंगु लोकेश्वर
- ७२. आर्यतारा सुवर्ण मूर्तिया कपि
- ७३. सिद्धार्थया महाभिनिष्क्रमण अनोमानदी पार दृश्य
- ७४. हिमालय क्वस्सं लालि गुराँसया स्फूर्ति
- ७५. स्वयम्भू महाचैत्य
- ७६. ख्वपया न्यातपौदेगः
- ७७. न्यातपौदेगःया न्ह्योनेच्च्वंगु दृश्य
- ७८. खास्ति चीबाहाःया लिकच्च्वंगु छगू जनजीवनया क्वांकी ।
- ७९. थँहितित्वाःया छगू दृश्य
- ८०. मध्य तराईया छगू दृश्य
- ८१. स्वयम्भू जङ्गलया छगू दृश्य
- ८२. पहाडी क्षेत्रया छगू दृश्य
- ८३. स्वयम्भू डल्लूबजारया छगू दृश्य
- ८४. स्वयम्भू दर्शन याःवनेगु छगू पथ प्रदर्शनया छगू दृश्य
- ८५. लेक बेसीया छगू दृश्य

अन्तरराष्ट्रिय बौद्ध ग्रन्थालयया छ्चलिइ दुने ब्वयातःगु

- ८६. वज्रधातु मण्डल
- ८७. महाकाल मण्डल
- ८८. महामञ्जुश्री मण्डल
- ८९. वसुन्धरा मण्डल
- ९०. महाप्रतिसरा मण्डल
- ९१. वज्रभैरव

पोताय्चुंयात कचिरंगय् छिनाः केवल पति निपति जक
संकाः च्वइतःगु ।

- ९२. त्रिकाल बुद्ध व बोधिसत्व
- ९३. अमोघपाश लोकेश्वरया गणचक्र
- ९४. चक्रसम्बरया गणचक्र
- ९५. जोगिनीया गणचक्र
- ९६. सप्तलोचनी तारा
- ९७. हेवज्र व अष्ट डाकिनी
- ९८. अचलवीर मण्डल
- ९९. वज्रपाणि व धर्मपाल गण

१००. बुद्धजीवनीया दथुस वरद मुद्रा शाक्यमुनि बुद्ध ।

१०१. अर्द्धवज्रपर्यङ्क आसनय् महामञ्जुश्री दथुस अङ्कित यासे थ्वया छ्चालं अष्ट मंगलया चिह्न व वज्रावलि चाःहुइकातःगु, थ्वयां पिने अष्ट बोधिसत्व व थ्वयां क्वस्सं क्वस्सं हितिमंगः निह्य निखे स्वकाः तइतल । अष्ट बोधिसत्वया दत्थुइ दत्थुइ मलः वॉन्याकातःगु छ्चपू तयाः तस्सकं शोभा वृद्धि व उपयुक्त जुइक दय्कातःगु दु ।

थुकिइ कलाकारं न्हूगु थःगु हे तालगु विशेषता क्यनातःगु जुल । थ्व छ्चगू प्रकारं मण्डलया रूपय् निर्माण जूगु खः । थुकिइ रंग व कचिरंग मतसे रंग विशेषं ह्यासु, ह्याउँ, तुयूगुयात ली, सिजः, वहःपातायात माःथाय् माःगुकथं कः त्रियाः रंगया रूपय् त्वयाः महामञ्जुश्रीया मण्डल थें यानाः दर्शकपिनिगु समक्षय् प्रस्तुत याःगु जुल । थुकिया कलाकार खः येँ मरु पीगंननिया चिनीकाजी ताम्रकार ।

इरानी शाहज्यादीद्वारा स्वयम्भू दर्शन

राष्ट्रनायक श्री ५ महाराजाधिराज वीरेन्द्र वीर विक्रम शाहदेवजुया निमन्त्रणाकथं इरानी देसया शाहज्यादी असराफ पहलवी नेपाः काल । थ्वय्कः नेपाः कायाः काठमाण्डू उपत्यकाया विभिन्न ऐतिहासिक स्थल भ्रमण व निरीक्षण यानादिल । थ्व हे ऊवल्य् काठमाण्डू उपत्यकाय् न्ह्यात्थासं स्वःसां अतिकं शोभायमान जुइक खनेदइच्चंगु प्रागैतिहासिक इलनिसें थःगु हे स्वरूपं स्थिर जुयाच्च्वंच्चंगु श्रीस्वयम्भू महाचैत्य दर्शन व स्पर्शन याय्गु अत्यन्त लालायित जुयाः स्वयम्भूस थ्यंकः काःगु जुल^१ ।

स्वयम्भूस थ्यंकाः वसपोल श्रीस्वयम्भू महाचैत्यया दर्शन व प्रदक्षिण याना लिल थन हे च्वंगु अन्तरराष्ट्रिय मूर्ति संग्रहालय एवं अन्तरराष्ट्रिय बौद्ध ग्रन्थालय नं स्वयादिल । नापं वय्कः स्वयम्भूस च्वंगु कर्मराज विहार नामक गुम्बाय् थ्यंकाः स्वयाम्भू विकास मण्डलया अध्यक्षजुं वय्कःयात सम्मानार्थ स्वयम्भू महाचैत्ययागु सुन्दर प्रतिमा उपहार स्वरूप प्रदान यानाव्यूगु जुल ।

थ्व दिन खः वि. सं. २०३० साल भाद्र १७ गते आदित्यवारखुनु ।

स्वयम्भूस ज्ञानमाला भजन सम्मेलन विशेष कार्यक्रमकथं

श्रद्धा भक्ति निश्चयया केन्द्रीय स्थल धर्मराजिक श्रीस्वयम्भू महाचैत्यस गुखुनु स्वयम्भू ज्योतिरूप उत्पत्ति जुल उखुनुनिसे युगयुगय् पर्वपर्वय् पुण्यतिथिस अनेक बुद्ध, बोधिसत्व, सिद्ध, विद्याधर, देव, मनुष्य आदिपिसं थःथःगु श्रद्धा भक्ति अनुसारं भक्तिभाव प्वंकावइच्चंगु खँ इतिहासं कनावइच्चंगु दु ।

थ्व हे परम्परानुसारं सम्पूर्ण दिनघात पर्व उत्सवकालय् इलय्-ब्यलय् छगू न छगू पुण्य सिद्धि प्राप्ति याय्गु इच्छा इहत्र सुख सम्पत्ति परत्र मोक्षगति लाभ याय्गु हेतुं परन्तु सद्धर्मशासन सुरक्षित जुइमा धइगु उद्देश्यं चैत्य कुलनायक श्रीस्वयम्भूयागु पवित्रस्थान विशुद्ध भूमिस विशेष समारोहपूर्वक विभिन्न प्रकारया शुभकार्य जुयावन । थ्व हे ऊवलय् स्वयम्भू ज्ञानमालायागु ग्वसाःकथं अशान्ति जगतय् शान्ति जुइमा धइगु कामना यासे विशेष समारोहपूर्वक ज्ञानमाला भजन सम्मेलन न्याय्कूगु जुल । खजा गुबलय् स्वयम्भूस ज्ञानमाला भजन खलः स्थापना जुल उवलसंनिसे प्रत्येक पर्व उत्सवकालय् स्वयम्भू ऋःऋः धाय्क ज्ञानमाला भजन याना वइच्चंगु धाय्माल । तथापि ने. सं. १०६४ सालया अनाला भाद्र २ निसे ३१ गते तक लच्छियंकं येँ, यल, रुदप, भोँत, ठिमो व क्यपू थ्यंक च्वंपि ज्ञानमाला भजनया संघ संस्थातय्त निमन्त्रणा बियाः उत्साह उमंगपूर्वक स्वयम्भूस भजन याकूगु जुल । थ्व अनाला लच्छि भजन जूगुलि गुखुनु गनयापिसं भाग काल धइगु खँ क्वय् च्वयागु कार्यक्रम तालिकां क्यनी । लिस्सें थ्व लच्छियंकं भजन याःवःपिं श्रद्धालु भक्तजनपित अथे हे स्वयम्भूप्रति श्रद्धा उत्पन्न जूपिं श्रद्धालु दातापिसं छन्हु छन्हु छह्य छह्यसिनं थःथःगु गच्छे अनुसारं जलपान तुच्चा याकेगु नं व्यवस्था याःगु दु ।

थथे अनाला लच्छियंकं भजन याय् सिधय्काः परिसमाप्ति जूगु दिन आश्विन १ गते मंगलवार-खुनु जक येँया नांदंपि मुख्यमुख्यगु दापा भजन खलःतय्त सःताः भजन याकूगु जुल, उकिइ मध्यय् भोँतया चण्डेश्वरी दापा भजन खलःतय्त नं । थुपिं ज्ञानमाला भजन खलः व दापा भजन खलः

निखलःसिनं नं अत्सि व दिक्क मचासे थःगु ह्लिज्यायागु अर्थ लाभ जुइगु यात नं माया मकासे स्वयम्भू-
प्रति श्रद्धां प्रेरित जुयाः उत्साहपूर्वक शान्तदान्तं च्वनाः उल्लास उमंगं भजन याःगु जुल । गुलिसिनं
'ज्ञानमाला भजनया ठवल्य् जक छाय् दापा भजन जुल ?' धइगु शंका याय्फु—भक्तिमार्गया दृष्टि
न्ह्यागु भजन खलः नं सम्मिलित जुइफु । उकिइसं नेपाःयागु भजनयागु इतिहासयागु दृष्टि ज्ञानमाला
भजन स्वयाः यक्व न्ह्योनिसें चल्य् जुयावइच्चंगु नेपाःया थःगु हे तालगु थःगु हे पहःगु प्राचीन भजन
खः । थुगु दापा भजन केवल भक्तिमार्गया प्रेरणा जक मजुसे परन्तु थुकिइ नेपाल भाषायागु प्रचार,
साहित्ययागु प्रस्फुरण, इतिहासयागु संस्मरण एवं संगीतयागु जागरण, देवदेवतायागु गुण वर्णन व
संस्कृतियागु प्रसारण स्वरूप जुयाः कीगु न्ह्योने परम्परागत न्ह्यानावइच्चंगु थुगु महत्वपूर्णगु दापा
भजनयात जक छाय् स्थान मविइगु धइगु विवेक दृष्टि खंकाः नं अन्तिम दिनखुनु छन्हु जक जूसां दापा
भजन याकेगु निर्णयकथं जूगु जुल ।

थ्व ज्ञानमाला भजन व दापा भजन निगुलि सम्पन्न जूगु महोत्सवया दिनय् थाय्थासं वयाः
ज्ञानमाला भजन याःवःपि संघ संस्थायात व अले दापा भजन खलःतय्त जलपान याकःवःपि श्रद्धालु
दायकपित नं कजिखलः स्वयम्भू ज्ञानमाला भजन खलःपाखें इमित दसिपौ नं इनाविइगु ज्या जूगु
जुल । नापं येँ न्हूसाःया प्यदँति दुह्य दोपक मानन्धरयात नं थ्व हे समारोहस हिसिचादय्क बांलाक
चत्तच्चवंक दर्शकगणपि आश्चर्य जुइक धिमे, खिँ, नगरा व कोँचाखि थानाः चमत्कार वयंगु लसताय्
दसिपौ प्रदान याःगु जुल । थुह्य मचायात गुलिसिनं प्रशंसा यात, नासःद्योया अंश दुह्य धकाः नं
धाल । गुलिसिनं थ्व मचायात वाद्यवादन स्यनाब्यूह्य गुरुह्येसित नं उत्तिकं धन्यवाद जापन यानावन ।
गुलिसिनं धयावन स्वयम्भू ज्ञानमाला भजन खलःपाखें जुयाच्चंगु विभिन्न प्रकारया स्तुत्यकार्य मध्यय्
थ्व नं छगू खः ।

स्वयम्भू धर्मधातु वागीश्वरया न्ह्योने जूगु ज्ञानमाला भजन सम्मेलनया कार्यक्रम

अनाला (भाद्र)	भजन खलः	थाय्
१. पारु आदित्यवार	धर्माश्रम भजन खलः	बागवजार, येँ
२. द्वितीया सोमवार	कमलाछि भजन खलः	कमलाछि, येँ
३. तृतीया मंगलवार	तारेमाम् संघ	नागवाहाः, यल
४. चतुर्थी बुधवार	ज्ञानमाला संघ	श्रीवाहाः, यल
५. पञ्चमी वृहस्पतिवार	ज्ञानमाला संघ	नःबाहाः, यल
६. षष्ठी शुक्रवार	त्रिरत्न भजन संघ	ओकुवाहाः, यल
७. सप्तमी शनिवार	ज्ञानमाला भजन संघ	बूवाहाः, यल
८. अष्टमी आदित्यवार	ज्ञानमाला भजन संघ	भिछेवाहाः, यल

अनाला (भाद्र)भजन खलःथाय्

६. नवमी सोमवार	जनबाहाः भजन खलः	जनबाहाः, येँ
१०. दशमी मंगलवार	ज्ञानमाला भजन खलः	भुजिद, पांगा
११. एकादशी बुधवार	ज्ञानमाला भजन खलः	पातिबाहाः, ठिमी
१२. द्वादशी वृहस्पतिवार	ज्ञानमाला भजन खलः	बलम्बु
१३. त्रयोदशी शुक्रवार	बालकुमारी भजन खलः	बालकुमारी, येँ
१४. चतुर्दशी शनिवार	भगवान् बाहाः भजन खलः	थँवही, येँ
१५. पुह्ली आदित्यवार	थँहिति ज्ञानमाला भजन खलः	थँहिति, येँ
१. पारु (गाः) सोमवार	ज्ञानमाला भजन खलः	समंकृतविहार, ख्वप
२. द्वितीया मंगलवार	ज्ञानमाला भजन खलः	दीपङ्करविहार, ख्वप
३. तृतीया बुधवार	ज्ञानमाला भजन खलः	क्वाथण्डौ, ख्वप
४. चतुर्थी वृहस्पतिवार	ज्ञानमाला भजन खलः	चोबाहाः
५. पञ्चमी शुक्रवार	त्योड भजन खलः	त्योड, येँ
६. षष्ठी शनिवार	क्षत्रपाल भजन खलः	पकनाय्जोल, येँ
७. सप्तमी आदित्यवार	शोभाभगवती भजन खलः	विष्णुमती, येँ
८. अष्टमी सोमवार	श्वेतकाली भजन खलः	न्यत, येँ
९. नवमी मंगलवार	ह्याय्पि भजन खलः	ह्याय्पि, येँ
१०. दशमी बुधवार	नारानथान भजन खलः	नारानथान, भोँत
११. एकादशी वृहस्पतिवार	असं भजन खलः	असं, येँ
१२. द्वादशी शुक्रवार	पुलां गुह्येश्वरी भजन खलः	लखपात, येँ
१३. त्रयोदशी शनिवार	पचलि भजन खलः	पचलि, येँ
१४. चतुर्दशी आदित्यवार	लायकूसाः ज्ञानमाला खलः	लायकूसाः, येँ
१५. औंसी सोमवार	चस्वां भजन खलः	चसंदी, येँ
१. यंलाथ्वः पारु	चण्डेश्वरी भजन खलः	चण्डेश्वरी, भोँत
आश्विन १ गते		

भजन जुइगु ई :-सुथय् ६ ताः इलंसिं ७.४५ ई तक

थुगु कार्यस जलपान याकाः सहयोग प्रदान याःपि जलपानदातापिनिगु धलः

२०३१ भाद्रदाताया नांथाय्

२ गते आदित्यवार	पूर्णमान उपासक	तेबाहाः
३ गते सोमवार	भाईकाजी रञ्जित	मजिपाः

४ गते मंगलवार	द्वारिकाप्रसाद	मरुहिति
५ गते बुधवार	हर्षबहादुर मानन्धर	चसांदो
६ गते वृहस्पतिवार	जनकरत्न तुलाधर	तंलाछि
७ गते शुक्रवार	धर्मवीर नरेशवीर	जमोबाहा:
८ गते शनिवार	धर्मसागर तुलाधर	कमलाति
९ गते आदित्यवार	हर्षरत्न स्थापित	छुस्याबाहा:
१० गते सोमवार	बाबुरत्न हीराभाई	पुतलीसडक
११ गते मंगलवार	नेपाल ऊल हाउस	भोताहिति
१२ गते बुधवार	बुद्धमान चतुरमान	सुईका:गल्ली
१३ गते वृहस्पतिवार	थीज: खल:	असं
१४ गते शुक्रवार	द्रव्यरत्न तुलाधर	असं
१५ गते शनिवार	ग्राण्ड ऊल सेन्टर	असं
१६ गते आदित्यवार	लोकदर्शन वज्राचार्य	कमलाति
१७ गते सोमवार	बेखानारायण मानन्धर	कमलाति
१८ गते मंगलवार	भक्तिलाल श्रेष्ठ	थापाथली
१९ गते बुधवार	इन्द्रमान मानन्धर	छेत्रपाति
२० गते वृहस्पतिवार	तुलसीनारायण मानन्धर	छेत्रपाति
२१ गते शुक्रवार	धर्मदास	स्वांछपू
२२ गते शनिवार	भक्तवीरसिंह तुलाधर	असं
२३ गते आदित्यवार	वसन्तबहादुर शाक्य	असं
२४ गते सोमवार	नन्दसिद्धि वज्राचार्य	मखं
२५ गते मंगलवार	बाबुरत्न व पासापि	भोताहिति
२६ गते बुधवार	हर्षरत्न स्थापित	छुस्याबाहा:
२७ गते वृहस्पतिवार	भाईसाहु प्रत्येकमान पासापि	न्यत
२८ गते शुक्रवार	सप्तवीरसिंह	ज:धुंछे
२९ गते शनिवार	तीर्थनारायण मानन्धर	कमलाछि
३० गते आदित्यवार	नाति व चैत्यनारायण	लायकूसा:
३१ गते सोमवार	तेजमान शाक्य	लाजिम्पात
१ गते आश्विन मंगलवार	द्वारिकाप्रसाद मानन्धर	मरुहिति
	हीरारत्न स्थापित	चल्चा

ज्ञानमाला भजन सम्मेलन सम्पूर्ण याय्गु समारोह

सुप्रभात

- ६-७.४५ चण्डेश्वरी भजन खलः, भोत ।
६-१० चस्वांदो दापा खलः ।
१०.३० भोजन पूजा- भिक्षुसंघ, लामाजुपि व अनागारिकापित भोजन प्रदान ।
१०.३०-१२ त्यंगः दापा खलःयापाखे भजन ।
१२-१.३० असं दापा खलःया पाखे भजन ।
३ ताः इलय् ४ दँ दुह्य न्हूसाःया दीपक मानन्धरयापाखे धिमे, खि व कोचाखि थानाः
सम्मेलन शुरु ।

- (१) सभापतिया ल्यज्या
(२) लसकुस न्वचु
(३) ज्ञानमाला खलःया इतिहास
(४) रा. प. स. माननीय पूर्णमान शाक्यया ह्लातं लच्छियंकं ज्ञानमाला भजन सम्मेलनय्
व्वति काःगु भजन खलः व जलपान दातापित दसिपौ लःह्लाय्गु ज्या
(५) धन्यवाद ज्ञापन
(६) लसताःभव्य्

बहनी

स्वयम्भू महाचैत्यस चाकःमत च्याकेगु ।

सम्मेलन विसर्जन

स्वयम्भू जंगलया शोभा वृद्धि निम्ति स्वद्वःति सिमा पिङ्कूगु

अनेक देवतापिसं पूजा यानाः मानय् याना तइतःगु अतिकं प्रसिद्ध जुयाच्चंगु जगतया स्वामि धाय्का बिज्याःह्य श्रीस्वयम्भू धर्मधातु विराजमान जुयाच्चंगु थुगु पवित्र स्थान युग भेदं (सत्य, त्रेता, द्वापर, कलि) पद्मगिरी, वज्रकूट, गोशृङ्ग व गोपुच्छ धइगु नामं प्रसिद्ध जुयाच्चंगु जुल । थ्व हे साह्योगुं पर्वतस अनेक रत्न व धातु संयुक्त जुयाः गुरु मञ्जुश्रीया प्रभावं सुमेरु पर्वत स्वयाः नं अप्पो गौरव दइच्चंगु, लिस्सें स्वयम्भूया प्रसादं मृतसञ्जीवनी वासः दयाः अनेक जातं जातया तृण गुल्म लता वृक्ष एवं भैषज्यबस्तु दइच्चंगु विविध गुणं परिपूर्णगु वैजयन्त प्रासाद थें शोभा दइच्चंगु न्यात्थासं स्वःसां खनेदइच्चंगु थुजाःगु पर्वत त्रैलोक्य दुर्लभगु धकाः प्रशंसा याना तइतःगु स्वनाम धन्य स्वयम्भू पर्वत जुल ।

थुजाःगु त्रैलोक्य दुर्लभगु पर्वत वन जंगल संरक्षणया लागी सदां श्रद्धा व आकर्षकया केन्द्र जुइकेया निम्ति इलय्-ब्यलय् लिच्छवी, मल्ल एवं शाह कालया जुजुपिसं नं आस्था प्रतिष्ठा तयाः थुगु वन संरक्षणया लागी यानावंगु जुजु जयप्रकाश मल्लयागु आदेश पत्र स्वयादिसं । अथे हे ह्येसेताशि लामाजुयागु चेतावनीकथं श्री ५ बडा महाराजाधिराज पृथ्वीनारायण शाहजुं नं थुकियात आवश्यक कदर यानावन । लिस्सें स्वयम्भू भुइख्यलय् दय्कूगु जगतोद्धार महाविहार (बौद्ध छात्रावास) उद्घाटन जूगु उपलक्ष्य राष्ट्रपिता श्री ५ त्रिभुवन सवारी जूबलय् नं वसपोलया न्ह्योने भिक्षु अमृतानन्दजुं थःगु भाषणया सन्दर्भय् थथे धयाबिज्याःगु दु—‘गथे थ्व स्वयम्भू जंगलयागु चाय्कं वा मचाय्कं अनेक सिमायागु क्षतिग्रष्ट जुजुं वन, उकिइसं छाउनी ख्यलं तारा कय्किइगु आदि कारणं यानाः स्वयम्भू पर्वत गंसि जुयाः क्वय् छ्वां छ्वां वयाच्चन, उकियागु हे प्रतिफल नेपाल राष्ट्रया समृद्धि नं गंसि जुयाः क्वय् छ्वां छ्वां चवनावनी ।’ वयां लिपा बौद्ध युवक परिषद्यापाखे श्री ५ महेन्द्रयागु हजुरीइ नं फिद्धः जनतां मयाक जनतापिनिगु सहि तयाः ताःहाकःगु बित्तिपत्र जाहेर याःगु जुयाच्चन—स्वयम्भू जंगलया

सुरक्षा निमित्त तारा मकय्केमा धइगु विषय कयाः । गुलिचां मदुवं हानं पश्चिम स्याञ्जा निवासी छह्ना नकिंजु गौरी उपाध्यायनीनं स्वयम्भूया अग्र्य् आमरण अनसन चवन । थ्व अनसन बुद्धजयन्तीखुनु हिसाकर्म निषेध याय्गु विषय कयाः जक मजुसे स्वयम्भू वन जंगल संरक्षण निमित्त तारा मकय्केगु नं जुइमाः धइगु विषय न्ह्यथनातःगु जुल । अज्ज थ्व हे वन जंगलयागु विशेष महत्वप्रति ध्यान आकर्षित यासे 'थुगु वन जंगल सुरक्षा व सुघर सफा याय्गु' विषय कयाः नं अन्तरराष्ट्रिय संस्था सभिसि सिभिल इन्टरनेशनलपाखे काठमाण्डू उपत्यकाय् सर्वप्रथम स्वयम्भू पर्वस्थानय् अन्तरराष्ट्रिय सफाई आन्दोलन सेवापाखे बाःछियंकं 'अन्तरराष्ट्रिय वर्क क्याम्प' जुयावन ।

थुगु प्रकारं वन जंगल आरक्षा व शोभा वृद्धि लागी इलय्-ब्यलय् फुह्यं फुगु चाःगु तालं सेवा प्रस्तुत यानावन । थ्व हे ऊवल्य प्रागैतिहासिक इलंनिसें धार्मिक, सांस्कृतिक, पुरातात्विक एवं परम्पराया दृष्टि गौरव व महत्व दइचवंगु थुगु स्वयम्भू महाचैत्ययागु उचित सम्मान व संरक्षणया निमित्त करीव स्वद्वःति सिमा पिनाः वृक्षरोपन समारोह न्याय्कूगु जुल । थ्व छगू तःधंगु हर्षया खँ खः ।

थुगु वृक्षरोपन समारोह जूगु विशेष कार्यक्रम थथे खः—

वि. सं. २०३१ आषाढ १५ गतेखुनु वागमती अञ्चल वृक्षरोपन शाखाया ग्वसालय् वन मन्त्रालय अन्तर्गत सी. सी. एफ. कार्यालय फरेष्ट रिसोर्सेज विकास योजना राष्ट्रिय निकुञ्ज कार्यालय, वनस्पति विभाग, इन्धन संस्थान व शाही औषधी लिमिटेडया अधिकृतपिसं नं हर्षपूर्वक भाग कयादिइगु जुयाचवन ।

थ्व हे वृक्षरोपन अन्तर्गत अनुमानित स्वयम्भूयागु २४ नीप्यपीया ब्वति नांगागु जग्गाय् विभिन्न प्रकारया स्वद्वःति सिमात पिनाब्यूगु जुल ।

राष्ट्रिय पञ्चायतया अध्यक्ष श्री नयनबहादुर स्वांरजुं थुगु वृक्षरोपन कार्य शुभारम्भ यानादिल । लिस्सें थ्व ज्याय् सहयोगी जूपि राष्ट्रिय पञ्चायतया उपाध्यक्ष श्री डम्बरबहादुर बस्नेत, वन सहायक मन्त्री श्री बहादुरसिंह ऐतवाल तथा राष्ट्रिय पञ्चायतया सदस्यत श्री गणेशबहादुर खत्री, श्री समशुलहक, श्री आडदण्डी लामा, श्री लबर राणा, श्री केदारनाथ पाण्डे, श्री चैतुलाल चौधरी, श्री अमृतलाल शेरचन, श्री टेकबहादुर रावल, श्री भक्तबहादुर कार्की आदिपिसं नं वृक्षरोपन यानादिइगु जुल ।

समाचारय् थ्व नं धयातःगु दु—थ्व स्वयम्भू वन जंगलय् सर्वप्रथम वृक्षरोपन याय् सिधय्काः थ्वया ल्यू निन्हु लिपा पशुपति क्षेत्र वनकालीस वृक्षरोपन याःवंगु जुल ।

स्वयम्भूस श्री ५ अधिराजकुमारीपिनिगुपारखें वृक्षरोपन जूगु

विगत २०३१ आषाढ १५ गते वागमती अञ्चल वृक्षरोपन शाखाया ग्वसालय् विभिन्न संघ संस्थाया अधिकृतपि च्वनाः स्वयम्भूस वृक्षरोपन जुल । व हे पवित्र उद्देश्ययात लुमंकाः हानं स्वयम्भू वन जंगलप्रति आस्था तथाः श्री ५ बडामहारानी ऐश्वर्य राज्य लक्ष्मीदेवी शाहया २६ गूगु जन्मोत्सवया उपलक्ष्यय् २०३१ साल कार्तिक २३ गतेखुनु सुप्रभात समयय् श्री ५ अधिराजकुमारीपि कोमल राज्य लक्ष्मी देवी शाह व प्रेक्षा राज्य लक्ष्मी देवी शाहपिसं स्वयम्भू डाँडाया उत्तरी भागपाखे वृक्षरोपन यानादिल ।

अनुमानित १६ रोपनीया जग्गाय् २१०० सिमात प्यूगु जुल । स्वयम्भूयागु उगु नांगागु डाँडाय् प्यूगु सिमात खः—कागियो, कल्की, जाकरन्डा, चिलाउने, कपूर, खोटे व सल्ला ।

थुगु ज्याय् भाग कयादिइपि वन राज्यमन्त्री श्री नारायण भट्ट, वन सहायक मन्त्री श्री बहादुर-सिंह ऐतवाल, नेपाल महिला संगठनया केन्द्रीय सभापति श्रीमती पुण्यप्रभादेवी ढुंगाना तथा संगठनया अन्य पदाधिकारीपि व वन मन्त्रालय अन्तर्गतया उच्च पदाधिकारी एवं वागमती अञ्चलाधीश व स्थानीय जनतापि नं सम्मिलित जूगु जुल ।

वंगुसाल तकया दुने स्वयम्भू जंगलय् न्याद्वःति विभिन्न प्रकारया सिमात पिइ धुकूगु खँ समाचारय् न्ह्यथनातःगु जुल^१ ।

महर्षी महेशयोगीया स्वयम्भू दर्शन

पवित्र पुण्यभूमि नेपालया उपत्यकाय् गुलि नं साधु सन्त ऋषिमुनि योगी महात्मात वयावन, इमिसं थुगु सुन्दर शान्त उपत्यकायात खनाः आपालं प्रभावित जुयाः सन्तोष जुयावंगु खँ उल्लेख यानातल । थुजागु उपत्यकाया सर्वश्री चूडामणि गज्जू थें न्ह्यात्थासं स्वःसां खने दइच्चंगु स्वयम्भू महाचैत्यया श्रीशोभा खनिइवल्य् कं हे अप्पो आगन्तुक अतिथि महोदयपिनिगु श्रद्धा व भक्ति एवं जिज्ञासा आकर्षित जुइगु जुल । खतु थःगु कार्यकारण व भाग्यया संजोगं अन थ्यनी मथ्यनी व मेगु हे खँ जुल ।

थ्व हे ऊवल्य् थौयागु २० गू शदीया छह्य तस्सकं ख्याति प्राप्तह्य ऋग्वेद भगवद्गीता व ब्रह्मसूत्रया अनुपम टीकाकार एवं आध्यात्मिक पुनरुत्थान आन्दोलनया संस्थापक तथा वेद व विज्ञान समन्वय याय्गु उद्देश्य ज्वनाः महर्षी महेश योगीजु काठमाण्डूस थ्यंकःवल ।

थुगु हे शुभावसरय् वि. सं. २०३१ कार्तिक २३ गते शुक्रवारया दिनय् स्वयम्भू महाचैत्ययागु दर्शन व पूजन यानावन' । लिस्सें स्वयम्भू ज्ञानमाला भजन नं ध्यानपूर्वक न्यनाः उकियागु डकूमेण्ट व टेपरेकर्ड नं भरय् यानायंकल । ज्ञानमाला विषय कयाः अभिरुचिपूर्वक छलफल नं यानादिल ।

थ्वय्कलं चेटनायागु पूर्ण विकास याय्गु सरल तरिका थुइका बी धइगु उद्देश्यं राष्ट्रिय कवच निर्माण याय्गु प्रयोगात्मक विधि स्यने-कनेगु विचारकथं येँ, यल व ख्वपय् वनाः नं प्रवचन यानादिल । प्रत्यक्ष वा अप्रत्यक्ष रूपं आपालं शिष्यपि दय्केगुलिइ गुलिखय् धन खर्च नं यानाथकल । तर गुलि जुइमाःगु खः उलि सफल जुइ मफुत, कारण थ्वय्कः अमेरिकी सरकारया गुप्तचर धकाः नं यक्वसिनं शंका याःगु जुल । थ्व हे कारणं गुन्दातय्सं गोलमाल नं यात, योगीजुयात सन्तोष नं मजुल, थुकि यानाः हथासं लिहां नं वन ।

स्वयम्भूप्रति महाकवि चित्तधरजुया निक्वःगु सांस्कृतिक वस्तु उपहार प्रदान

नेपाःयागु धर्म संस्कृति कला व नेपाल भाषाप्रति अगाढ माया ममता दुह्य कविकेशरी श्रीचित्तधर 'हृदय'जुं विगत ने. सं. १०६० सालं थःगु पुर्खापिसं संकलन यानाथकूगु व थःगु संकलन नितां मिलय् यानाः सांस्कृतिक वस्तु उपहार स्वरूप श्रीस्वयम्भू महाचैत्यप्रति श्रद्धाभक्ति तसे स्वयम्भू विकास मण्डलयात विधिवत् हस्तान्तरित यानादिल ।

व हे त्याग चित्त सद्धर्म चित्तयागु वीजाङ्कुर पल्लवित पुष्पित एवं विकसित जुयाः हानं खुदं लिपा अर्थात् ने. सं. १०६६ गुंलाथ्वः ११ स सन्ध्याइलय् स्वयम्भू महाचैत्यप्रति हानं चित्तय् स्वांह्वल कि दानपति श्रीचित्तधर 'हृदय'जु व क्यहेँमय्जु मोतिलक्ष्मी निह्यासिनं दिवंगत अबुजु द्रव्यधर व मां ज्ञानलक्ष्मीपिनिगु नामं स्वयम्भू विकास मण्डलया न्हू चाय्किइगु चित्र संग्रहालयय् ब्वय्त निम्नलिखित धलः अनुसार चित्र पौभाः व तस्वीर एवं स्वयम्भूस दइच्चंगु अन्तरराष्ट्रिय बौद्ध ग्रन्थालय निम्ति छुं हस्तलिखित ग्रन्थ नं उपस्थित निमन्त्रित वर्गपिनिगु न्ह्योने विधिवत् स्वयम्भू विकास मण्डलयात लःल्लानादिइगु जुलः—

१. रक्तजम्बल चित्र— द्रव्यधरजुं च्वयादिइगु
२. वज्रपाणि चित्र
३. बुद्ध, मञ्जुश्री, करुणामय— चित्तधरजुं च्वयादिइगु
४. बुद्ध
५. सामाधलखय् च्वयातःगु चित्रत— अमिताभ, चिन्तामणि लोकेश्वर, जम्बल, आर्यतारा खड्गजोगिनी, बुंगद्यो, वसुन्धरा, न्यतमदु अजिमाया गँछि । —चित्तधरजुं च्वयादिइगु
६. कापःयागु तिब्बती सफुतिइ रेखाचित्र— दीपङ्कर, शाक्यमुनि, मैत्रेय ।
७. चित्तधरजुं च्वयातःगु चित्र

८. चित्तधरजुं मसिं जक च्वयातःगु सिमधःनिगु चित्र
९. हयग्रीवयागु पौभाः
१०. सिंयागु पौभाः ब्लक कियातःगु थान १० - आर्यतारायागु बाखं व गँछि दुगु, मण्डल, महाप्रत्यङ्गिरा, अष्टमंगल, विश्ववज्र, मण्डल, षोडशबोधिसत्त्व, त्रिस्कन्ध बुद्धगण, मन्त्र-मण्डल दुहा गणेश, मन्त्रमण्डल दुहा सल, जम्बल मण्डल, तारामण्डल ।
११. अष्टश्मशानया मापि च्वयातःगु छथू
१२. चिनीया पौभाः
१३. चिचीपाःगु फ्रेम सहितगु तस्वीर ३५ - बुद्ध, धर्म, संघ, समन्तभद्र, वज्रसत्त्व, अपरिमिता, नामसंगिति, सप्तलोचनीतारा, मञ्जुश्री, उष्णीष विजय, तारा, जम्बल, वसुन्धरा, रक्तजम्बल, वज्रहेरूक, वज्रवाराही, हेवज्रनैरात्मा, डाकिनी, रामा, खण्डरोहा, रूपिनी, अचल, कृष्णयमारी, सिंहमुखी, मामकी, वज्रपाणि, यमान्तक, पञ्चपुष्प युक्त हारिती, हारिती, प्याथ्वनकी-लहुति, छास्कामिनी, छास्कामिनी, सल गःह्या, क्षेत्रपाल, सल गःह्या क्षेत्रपाल, महाकाल ।
१४. पञ्चदानया ज्वलं पञ्चवृहीया त्वाचा
१५. फं
१६. सिंयागु बापाचाया छकू टुक्रा
१७. शाक्यमुनि गुरुजोग कचिभ्वँतय् च्वयातःगु
१८. अमोघपाशलोकेश्वर ”
१९. पौभाः च्वय्त मापि च्वयातःगु
२०. मन्त्रमण्डल
२१. विभिन्न देवता चित्र दुगु छगू फाइल
२२. हेरूकाभिधान महामंत्रराज सम्बरोदय सफू
२३. अभिधानोत्तर मन्त्रराज सफू
२४. बैद्यग्रन्थ स्वथी दुगु सफू
२५. बैद्यग्रन्थ मेमेगु स्वंगू सफू
२६. देवमनुष्य तुतःया अर्थ व १०८ लोकेश्वरया नां
२७. तिब्बती सफू
२८. हेरूक चक्रसम्बर दुगु सँय् सफू
२९. स्वर्गीय द्रव्यधरजुया किपा- चन्द्रमान मास्केजुं च्वयातःगु ।

स्वयम्भू महाचैत्यया हलपौया छत्र, गजू झल्डर आदि मर्मत

श्रीमान् सिद्धेश्वर शाक्यश्री लामाजुयागु आह्वानकथं सकल श्रद्धालु दातापिनिगुपाखें चन्दा संकलन यानाः ने. सं. १०३८ सालं श्रीस्वयम्भू महाचैत्ययागु बांलाक जीर्णोद्धार जुयावन । उबलेंनिसें हलपति चवय्यागु भाग्य छुं मर्मत याय्माःगु आवश्यक मदुनि । तर हलपति चवय्यागु भाग- छत्र, झल्डर, कुं पा, गजू एवं रत्नकुप्पा आदियागु थाय्थासय् स्यनाः मर्मत याय्माःगु आवश्यक जूवल ।

थुजाःगु अवस्था खनाः शाक्यश्री लामाजुयागु आज्ञानुसार माःथाय् माःगुकथं अतिकं धन्दा कयाः थःगु हे ज्या भाःपाः अमूल्य समय, सम्पत्ति, बुद्धि व परिश्रम खर्च यानाः मुख्यह्य कार्यकर्ताया रूपय् भाग कयादिइह्य श्रीधर्ममान साहुजु खः । वय्कःया काय् त्रिरत्नमान, छय् प्रत्येकमान साहुपिसं उगु दुरावस्था जुयाच्चंगु स्वयाच्चने मफुत । थुकियात इलय् हे संरक्षण मयात धाःसा थुकिइ कं कं अप्पो क्षतिग्रष्ट जुयावनी धइगु विचारं खंकाःलि थाय्थासय् स्यनाच्चंगु हलपौया छत्र, झल्डर, गजू व रत्नकुप्पा आदि स्यनाच्चंगु जीर्णोद्धार याकेगु शुभ संकल्प यासे धमाधम ज्या थालय् याना हयाच्चन । उबलय् वय्कःपिसं स्वयम्भूयागु ज्या स्वयम्भूइ तयाः ज्या याकेगु बेस जुइ धइगु मतिइ तयाः मरु पीगंननिया कलाकार चिनीकाजी ताम्रकार व यल थैनाया रुद्रराज शाक्यपित सःताः स्वयम्भूइ तयाः ज्या याकादिल । थवय्कःपिनिगु सदिच्छानुसार बांलाक मिलय् जुइक उगु ज्या पूर्वकाबिल ।

थुगु महान् पवित्रगु शुभ कार्य निर्मित साहु त्रिरत्नमान प्रत्येकमानपित जक नं भार कुमबिकुसे निम्नलिखित श्रद्धालु चन्दा दातापिसं नं थुकिया लागी आर्थिक सहयोग प्रदान यानादिइगु दु । थुगु जीर्णोद्धारया ऊबलय् स्वयम्भू रत्नसम्भव तथागतया जवय् च्वंहा भिक्षुया मूर्ति अति जीर्ण जूगु खनाःलि उगु मूर्ति नं न्हूहा दय्का तयाब्यूगु जुल ।

चन्दा दातापिनिगु शुभ नाम—

(१) धुव्थो रिमुचि

मञ्जुश्रीपर्वस्थान

लुं तोला १।०।०

(२) चन्द्रकाजि	इतुं बाहा:	लुँ तोला	• १३१ •
(३) बुद्धिरत्न शाक्य	ह्मायकंत्वा:	"	• १२१५
(४) स्यावाआङ्घ्रिकु	ज्याथा	तका	३००१-
(५) साहु ईश्वरीमान	महाबुद्ध	"	३००१-
(६) ऊयाम्वा शोभा	छेत्रपाति	"	१४८१-
(७) फिजो नोबु	छेत्रपाति	"	१३५१-
(८) ज्यानबहादुर	क्वहिति	"	१२५१-
(९) छिरिङ्ग्याङ्गजु	महाबुद्ध	"	११११-
(१०) जगतरत्न	तंलाछि	"	१००१-
(११) हर्षरत्न, पद्मदेवी	मरु	"	१००१-

थुपिं छिछ्हा दातापिं बाहेक मेपिं ४२ ह्य चन्दा दातापिनिगु नां न्ह्यमथना, चानचुन रकम जूया निर्मित । जम्मा दां सहयोग प्राप्त जूगु १८१४१- तका दु । उकिइ लुँ जक १।५।२२३ तोला दुगु जुल, अनं वाकि आवश्यक सम्पूर्ण खर्च मुख्य दाताया पाखे हनेचने यानाः थुगु जीर्णोद्धार कार्य ने. सं. १०६५ सालं शुभारम्भ यासे दच्छि लिपा सम्पन्न याःगु जुल ।

स्वयम्भूया न्ह्योने छन्हुसंतुं लक्षावती प्रज्ञापारमिता पाठ याकूगु

नेपाःयागु बुद्धधर्मय् मूल सद्धर्म ग्रन्थया रूपय् नवखण्ड (नव व्याकरण) यात मानय् याना वइच्चन । उकिं नेपाःयापिसं थःगु परम्परागत धर्म मण्डलयात पूजा याइबल्य् आर्य महायान सूत्र नव व्याकरण— प्रज्ञापारमिता, गन्धव्यूह, दशभूमीश्वर, समाधिराज, लङ्कावतार, सद्धर्मपुण्डरीक, तथागत-गुह्यक, ललितविस्तर एवं सुवर्णप्रभास्या नामोच्चारण यानाः स्वां ब्वय्गु चलन यानावइच्चगु परम्परागत अद्यापि विद्यमान तिनि । थुगु नवखण्डया ऊवल्य् मर्यादाक्रमानुसार सर्वश्री प्रज्ञापारमिताया नां दकल्य् च्वय् तथातल । थ्व हे खँयात ध्यानय् तथाः आर्य मायाजाल तन्त्रोद्धृत नामसंगितिया सारभूत अन्तिम वचन थथे धयातःगु दु—‘बुद्धानां विषयह्येष प्रज्ञातत्त्व त्वमागतः’ (सम्पूर्ण बुद्धपिनिगु विषय हे थ्व खः कि प्रज्ञातत्त्वय् छलपोलपिं बिज्यानाच्चन ।) थुगु आदर्शयात लुमंकाः श्रद्धा अभिव्यक्त यासे नवखण्ड सफू मध्यय् प्रज्ञापारमिता सफूयात तच्चोगु आदर सत्कार यानाः नीलपत्रस सुवर्णाक्षर रञ्जना लिपिं च्वय्गु यानावइच्चन । थ्व प्रज्ञापारमिता बाहेक मेगु अष्टम खण्ड सुवर्णाक्षरं ग्रन्थ च्वयातःगु खनेमदु धाःसां अप्पो जुइमखु । थुलि जक यानाः नं सन्तोष मजुयाः अज्ज की पूर्वाचार्यपिसं प्रज्ञापारमिता सफूयात नगर परिक्रमा यानाः दे चाहुइकाः जात्रा याय्गु थिति समेत वन्देज यानाथकल । थ्व जात्रा प्रत्येक वर्ष चैत्रकृष्ण प्रतिपदाखुनु कान्तिपुर महानगरया विक्रमशील महाविहार (थँबही) स च्वंगु नीलपत्रय् रञ्जना लिपिं सुवर्णाक्षरं च्वइतःगु आर्य शतसाहस्रिका लक्षावती प्रज्ञापारमिता तःधं सफू चकंद्यो नापनाप गीतवाद्य नृत्य सहित उत्सव यानाः जात्रा याय्गु यानावइच्चन ।

थ्व सफू ने. सं. ३४४ सालं पण्डित जिनश्रीज्ञानजुं थःगु हिचःति हाय्काः कमय् यानातःगु धन

मुंकाः असाधारण मेहनत यांनाः वडो धैर्यपूर्वक श्रद्धाभक्ति तयाः विधिपूर्वक चवयाःलि श्रीधर्मधातु विहारया परमगुणालङ्कृतज्ञान संघयात द्वहपा तइतःगु सद्धर्म ग्रन्थ जुल । थुगु सफूया दकलय् सकलय् चवय्चवंगु स्वपौ गुरु मञ्जुश्रीनं चवयाथकूगु धकाः परम्परागत श्रद्धा निश्चय तयावइचवंगु दु । उकि थुगु सफूया गौरव महत्व ह्यसिइकाः विद्वान् कवीन्द्र प्रताप मल्ल जुजुं थः महारानी लालमती सहित व्वनाः ने. सं. ७६६ सालं दर्शन याःवःगु दु । उवल्य् राजारानी निह्यसिनं थुगु सद्धर्म ग्रन्थया वारय् अतिकं प्रशंसा यांनाः संस्कृत श्लोकं व हे सफूया अन्तिम पृष्ठपाखे रञ्जना लिपितुं चवयाथकूगु दनि । थ्व सफूया महिमा तिब्बत चीन थ्यंक नं प्रचार जुयाचवंगुलि यांनाः अन यापि तीर्थयात्रीत वइबल्य् भेटी स्वरूप दक्षिणा दस्तुर तय्काः दर्शन विइगु यांनावइचवन । थ्व अमूल्यगु दुर्लभगु सद्धर्म रत्नग्रन्थ न्हावले दर्शन याय् दइगु मखु, केवल गुंलां वहीद्यो व्वयातइबल्य् लच्छितक जक खः । थ्वयां ह्यापा लिपा दर्शन याय्माल कि थुकिया चिछ्या व गुठीहारत साक्षि तयाः दस्तुर पुलाः जक दर्शन प्राप्त जुइ । थुजाःगु लुंया मसि रञ्जना आखलं चवयातःगु शतसाहस्रिका प्रज्ञापारमिता सफू मेमेगु बौद्धदेस्य् गनं दइमखु धाःसां ज्यू । तर थये हे लुं आखलं वहः आखलं चवइतःगु अष्ट साहस्रिका प्रज्ञापारमिता धाःसा यल हिरण्यवर्ण महाविहार, अंकुलिश्रीरुद्रवर्ण महाविहार आदि थासय् सुरक्षित पूर्वक तइतःगु दनि । हिरण्यवर्ण महाविहारयागु प्रज्ञापारमिता सफूया नं थःगु हे पृष्ठभूमि व महत्व दु—सुं गुह्य श्रद्धालु भक्तजनपिनि थःगु मानसिक शान्ति मदइबल्य् अन्तराय भयत्राश उत्पन्न जुइबल्य् अथवा थःगु मनोवाञ्छा पूर्ति निम्ति विघ्न बाधा निवारण जुइमा धइगु भाकल यासे गुलिखय् भक्तजनपिसं थुकियागु थितिरिति अनुसारं वारम्बार पाठ याकावइचवंगु खनेदु । थुकिया लागी गुंला महिना जक पिकाय्माः धइगु प्रतिबन्ध मदु । थ्व सफू पाठ याकेगु प्रचलनय् थःगु हे विशेषता दु ।

महायान बौद्ध जगतय् प्रज्ञापारमिताया नामं निम्नलिखित गुं गू प्रकारया नां उपलब्ध जुयाचवंगु खनेदु ।

१. शतसाहस्रिका प्रज्ञापारमिता
२. पञ्चविंशति साहस्रिका प्रज्ञापारमिता
३. अष्टादश साहस्रिका*
४. दशसाहस्रिका*
५. अष्टसाहस्रिका
६. सप्तशतिका
७. वज्रच्छेदिका
८. एकविंशति
९. प्रज्ञापारमिता हृदय

चतुराशीतिसहस्र ८४००० धर्मस्कन्ध मध्यय् नं सर्वश्रेष्ठगु मूलगु थुगु सद्धर्मरत्न ग्रन्थ प्रज्ञापार-

*— थुगु ग्रन्थ तिब्बत व चीन भाषाय् उपलब्ध जूगु दु ।

मिताप्रति श्रद्धाभक्ति तयाः थँवही काठमाण्डू गेष्ट हाउसया संस्थापक वसन्तबहादुर कर्णबहादुर शाक्यपिसं धर्म चित्त उत्पत्ति यानाः थः अबुजुयागु दिवंगत आत्माप्रति शान्ति कामना यासे वि. सं. २०३२ मंसीर २० गतेखुनु वसपोल श्रीस्वयम्भू महाचैत्यया न्होने तयाः लक्षावती शतसाहसिका प्रज्ञापारमिता छन्हुसंतुं क्वचाय्क पाठ याकूगु जुल । खतु थ्व लाखपु श्लोक दइच्वंगु प्रज्ञापारमिता छन्हुं पाठ सिधय्केत फिहा नोहा गुरुजुपि तयाः पाठ- समाप्ति याय् थाकुगु महशूस यासे पाठकवर्गपिनिगु सुविधाया लागी याकनं पाठ धुंकेत जम्मा १०८ ह्य वज्राचार्यपि तयाः पाठ याकूगु जुल । उपस्थित सकल गुरुजुपिसं नं श्रद्धां प्रेरित जुयाः अत्ति मचासे जजमानयागु सदिच्छानुसार उत्साहपूर्वक इलय् हे पाठ क्वचाय्का विल । थुगु पाठया कार्यक्रम व्यवस्था याःह्य गम्वाहाःया अमोघवज्र गुरुजु जुल ।

थुगु सद्धर्म ग्रन्थ पाठ सिधःगु उपलक्ष्यय् उपस्थित जजमान सपरिवार व पाठकवर्ग अन्य श्रोतागणपित तत्कालीन बौद्धसमाजया विद्वान् ऋद्धिवज्र गुरुजुं 'प्रज्ञापारमिता'या विषय कयाः संक्षिप्तं उकिया महत्व वारय् कनाबिज्यात । खतु थ्व प्रज्ञापारमिताया खँ न्ह्यथने न्ह्यो स्वयम्भूया न्होने च्वनाः व्याख्या याःगु जुयाः श्रीस्वयम्भू महाचैत्ययागु वन्दना स्वरूप ह्यापालाक 'स्वयम्भू' शब्दया व्युत्पत्ति यानाः उकिया अर्थ कनाबिज्यात, अनंलि धर्मधातुया विषय खँ कन, वयां लिपा गुरु वज्राचार्यया खँ न्ह्यथन । थ्वयां ल्यु 'प्रज्ञापारमिता' यागु खँ कनाः उपस्थित श्रोतागणपित प्रभावित यात । हानं कल्लय्खुनु थ्व हे जजमानपिनिगुपाखें प्रज्ञापारमिता पाठ याःबिज्याःपि सकल गुरुजुपित सःताः भुइख्यलय् तयाः 'आर्यभद्रचरी प्रणिधान' छगू छगू प्रति दान बियाः पाठ याकूगु जुल । थुगु प्रणिधान पाठ सिधय्वं थन च्वनाः नं वसपोल ऋद्धिवज्र गुरुजुं छुं छत्वाःचा न्वचु वियाबिज्यात- बिना 'प्रज्ञातत्त्व-बोधिचित्त' ह्यमसिइकं कीसं थःत सम्यक् रूपं वज्राचार्य धाय् फइमखु । गुबलय् तक थ्व निगू ज्ञानयात साक्षात्कार याना काय् फइमखुनि उवल्य् तक सम्पूर्ण बुद्धधर्मया सारतत्त्व मूलतत्त्व जुयाच्वंगु 'अनुत्तरसम्बोधिज्ञान' थुइका काय्फइमखु । थुगु विषयय् चर्चा याय् धुंकाः हानं लिसा काकां थ्व नं धाःगु दु- नेपाःया थःगु बौद्ध संस्कार अनुसारं- न्ह्यागु विधि विधान कर्मकाण्ड याःसां ह्यापालाक कीसं 'गुरुमण्डल' दनाः पूजा याय्गु यानावयाच्वनागु खः । अले व गुरुमण्डल कीसं ह्यापालाक छाया दनेमाल उकिइ दुने छु छु ज्ञानतत्त्व सुलाच्वंगु दु धइगु विषय कयाः नं दिग्दर्शन यानाक्यंगु दु ।

ऋद्धिवज्र गुरुजुयागु न्वचु सिधय्वं उपस्थित गुरुजुपित दान प्रदान व भोजन याकाः सिधय्कूगु जुल ।

स्वयम्भू डाँडा सुरक्षित निम्ति आवास तथा भौतिक परियोजनाया सेवा

नेपाःया अनेक प्रसिद्ध ऐतिहासिक धार्मिक स्थल मथ मन्दिर विहार एवं पवित्र तीर्थस्थल तथा सिद्धतपोभूमि-पर्वत गुफा मध्ययु नं मुख्यगु युग भेदं प्यंगू नां प्रसिद्ध जुयाच्चंगु साह्यंगु गिरि पर्वतस विराजमान जुयाच्चंगु श्रीस्वयम्भू महाचैत्य जुल ।

थुजाःगु मुख्यगु धार्मिक केन्द्रस्थान सांस्कृतिक निधि स्वयम्भू महाक्षेत्र प्राकृतिक तथा मानविक प्रकोपद्वारा क्षतिग्रष्ट जुयाच्चंगु खनाःलि स्वयम्भू विकास मण्डलं तच्चोगु धन्दा कयाः थुकियागु इलय् हे संरक्षण मयात धाःसा नेपाःयागु अस्तित्व मदयावनो धइगु विषय कयाः निम्नलिखित सरकारी मन्त्रालय, विभाग, कर्पोरेशन आदियात अनुरोध यानाः छगू कमिटी गठन याःगु जुल—

- (१) आवास तथा भौतिक परियोजना
- (२) पुरातत्त्व विभाग
- (३) एन० सी० सी० एन० सडक विभाग
- (४) निर्माण यातायात मन्त्रालय
- (५) नगर विकास योजना

थुगु कमिटीया निर्णयकथं थःथःगु अधिकार विशेषं सहयोग प्रदान याय्गु ज्या जुल । मुख्यतः थुगु ज्याया सम्पूर्ण आर्थिक अभिभार आवास तथा भौतिक परियोजना विभाग बबरमहलं व्यहोरय् यानाः रिटेनिङ्गवाल दय्काः टेवा बियाः प्रतापपुरया न्होनेसंचंगु उगु क्षतिग्रष्ट स्थानयात सुरक्षित यानाः श्रीस्वयम्भू महाचैत्ययागु सेवा याःगु जुल ।

थुगु महान् उद्धार कार्य सम्पन्न जुसेलि २०३३ साल भाद्र २८ गतेयागु गोरखापत्रय् समाचार नं ब्यूगु दु ।

आयुष्मान् ति. योशिओकाजुया स्वयम्भू दर्शन

जापानय् चलय् जुयाच्चंगु विभिन्न बौद्ध सम्प्रदायत मध्यय् छगू विशालगु जेन सम्प्रदाय खः । श्व हे जेन विहार अर्थात् मन्दिरया प्रतिष्ठित आयुष्मान् पुज्य भिक्षु श्री ति० योशिओकाजुयागु नेतृत्वय् छगू दल स्वयम्भू दर्शनार्थं ओहमोरिफुकुसिमा काठमाण्डू थ्यंकःबिज्याःगु जुल । थुकिइ जेनसम्प्रदाययागु परम्पराकथं चीवरं पुनाच्चं पि भिक्षुपि किनिहा दु, अले मेपि दानपति उपासकोपासिकापि न्याहा खुहा दु ।

खतु वसपोलपिनिगु आदर सत्कार निम्ति श्व वंगु स्वांयापुह्नी बुद्धजयन्तीयात हे नेपाः थ्यंकःबिज्याहुँ धकाः स्वयम्भू विकास मण्डलं विशेष निमन्त्रणा बियाछ्वःगु खः । व हे निमन्त्रायात सहर्ष स्वीकार यासे वि. सं. २०३३ मंसीरपाखे जक थ्यंकःबिज्यात ।

वसपोलपिनिगु शिष्टाचार भेट निम्ति प्रोफेसर आशाराम शाक्यजुं जिगु अफिस पुरातत्त्व विभागय् 'कीगु स्वयम्भू विकास मण्डलया अतिथि रूपय् बिज्याःपि जापानी भन्तेपि बिज्यानाच्चंगु दु, लिस्सें वसपोलपिनि स्वयम्भू महाचैत्य सम्बन्धी प्रश्नोत्तर याय्गु नं खँ जुयाच्चंगु दु, उकिं छःपि ठीक इलय् थ्यंकःबिज्याहुँ' धकाः फोनं सुचं बियाहल । अलय् वसपोलनाप लाजिम्पातय् च्वंगु शङ्कर होटलय् वनाः आमन्त्रित अतिथि भन्तेपि नापलाःवना । वसपोलपिसं तलय् सिटिङ्ग हलय् ब्वनायंकल । पारस्परिक परिचय बियाः शिष्टाचार भेट जुल । श्व हे सन्दर्भय् आयुष्मान् पूज्य भन्ते ति० योशिओकाजुं छत्वाःचा न्वँवाना बिज्यात— श्व च्वापुगुँया क्वस्सं च्वंगु सुन्दर उपवन थे जाःगु सांस्कृतिक निधि जायाच्चंगु न्हाइपुसे च्वंगु बुद्ध जन्मभूमि नेपाःया राजधानी काठमाण्डू उपत्यकाय् स्वयम्भू विकास मण्डलया निमन्त्रणानुसार सकुशल जिपि थन थ्यन, जिपि तस्सकं लय्ताः । लिस्सें कल्लय् ह्लिनसिया पाय्छि स्वताः इलय् जिपि स्वयम्भूस थ्यंकः वय् धकाः नं उजं बिल । थुकियागु लिसलय् प्रो० आशाराम शाक्यजुं वसपोलपित नेपाःया बुद्धधर्मया गतिविधि विषय कयाः न्वँवाना बिज्यात — बुद्ध जन्मभूमि लुम्बिनीयागु सेवाया लागी जापानी सरकार व अनया जनतापिनिगुपाखें गुगु सहयोग

प्राप्त जुयाच्चन उकिया निर्मित हार्दिक कृतज्ञता प्रकट यासे स्वयम्भू विकास मण्डलयागु निमन्त्रणा स्वीकार याना विज्याःगुलिइ जिपि तस्सकं लय्ताः ।

कह्लय्खुनु वि. सं. २०३३ मंसीर २४ गते शुक्रवार पाय्छि ३ ताः इलय् वसपोलपिं स्वयम्भूस थ्यंकःबिज्यात । प्रो० आशाराम शाक्यजुं वसपोलपित स्वयम्भू महाचैत्ययागु उत्पत्ति व महत्व बारय् प्रकाश यानाः न्यंकल, अलय् वसपोलपिसं श्रीस्वयम्भू महाचैत्ययात भक्तिपूर्वक पूजा यानाःलि प्रदक्षिणा व निरीक्षण यानाबिज्यात । अनंलि स्वयम्भू विकास मण्डलं उचित सम्मान यानाः स्वागत यात, परस्परय् खँल्लावल्ला जुल । निखलःसियां उपहार नं आदान प्रदान जुल । आनन्द कुटीपाखे पूज्य भन्ते महानाम व कुमारकाश्यप नं थुगु स्वागत कार्यक्रमय् सम्मिलित जूगु जुल । जापानी भन्तेपि स्वयम्भू महाचैत्य दर्शन व पूजन याय् दुगुलि आपालं हर्ष प्रकट यासे गौरवान्वित जुयाः लिहांवन ।

स्थान परिचय

अभिप्रेत फाष्ट

स्वयम्भू पथ प्रदर्शन एवं दर्शनीय स्थानतय्गु परिचय प्रस्तुत

‘श्रीस्वयम्भू महाचैत्यया इतिहास’ नांगु थुगु ग्रन्थया दकल्य् च्वय् कालीहृदया दृश्य व उकिइ श्रीस्वयम्भू ज्योतिरूप उत्पत्ति जूगु खँ अनंलि वसपोल ज्योतिरूप श्रीस्वयम्भू दर्शनार्थ चतुर्दिशां विज्याःपि बुद्ध, बोधिसत्व, आचार्य, सिद्ध, विद्याधर, राजा महाराज तथा पर्यटक एवं विद्वान् आदिपि वयाःलि दर्शन व पूजन यानाःलि व वसपोलपिसं गुवल्य् गन छु यानावन धइगु विषय कयाः थनं च्वय् ऐतिहासिक घटनाक्रमकथं संक्षिप्तं उल्लेख याय् धुंगु जुल । लिस्सें विभिन्न धर्मात्मा श्रद्धालु भक्तजन-पिसं श्रीस्वयम्भू महाचैत्यप्रति आस्था प्रतिष्ठा तयाःलि अनेक प्रकारं पूजा भाव भक्ति यानावन । गुलिसिनं उपयुक्त थासय् उपयुक्त धर्मकीर्ति तयाः शोभा वृद्धि यानाथकल । गुलिसिनं महत्वपूर्ण सुधार कार्य यानाः नं इलय्-व्यलय् जीर्णोद्धार यानावंगु खँ समेत कयाः संक्षिप्तं वर्णन याय् धुंगु जुल ।

आः थनं क्वय् थ्व हे स्वयम्भू महाचैत्य विराजमान जुयाच्चंगु साह्येगु गिरि पर्वत व वया छ्चालं उख्येथुख्ये लानाच्चंगु मथ, मन्दिर, मूर्ति, चैत्य, गुम्बा, विहार, पुर आदि महत्वपूर्ण ऐतिहासिक स्थानतय्गु नं स्वयम्भू पथ प्रदर्शनकथं क्रमागत रूपं ऊवःलाक मिलय् याताः प्रसंगवश थन संक्षिप्तं विवरण प्रस्तुत यानाच्चनाः—

[१] भूमिखेल (भुइख्यः)

थ्व भूमिखेल स्वयम्भू डांडाया क्वस्संच्वंगु पवित्रगु छगू स्थान खः । थन ऐतिहासिक पुखू, हिति, बुँगाः दयाः शोभा दइच्चंगु स्वयम्भू दर्शन याःवनेत मुनेगु प्यखे स्वांनाच्चंगु दिपु नं खः । खास याताः थुगु थासय् नेपाःमि बौद्धतय् दकल्य् सकल्य् तःधंगु महान् धार्मिक उत्सव सम्यक् न्यायकिइगु थाय् जुयाच्चन । खजा थुगु थासय् मञ्जुश्री गुरु मञ्जुपत्तन सहर दय्के धुँसेलि उगु

महानगरया सर्वप्रथम राजा घोषित याः ह्य धर्माकर जुजुयात शुभराज्याभिषेक प्रदान याः गु पवित्र थाय्या रूप्य नं मानय यानावइच्चंगु जुल ।

थ्व हे ऐतिहासिक परम्परानुसार श्रीस्वयम्भू महाचैत्यया छत्रछायाय लानाच्चंगु थुगु थासय च्वनाः सम्यक् धर्मया विधिकथं तूर्यताडावचर पञ्चताल वाद्य थानाः लसकुस यानाः राष्ट्रनायक श्री ५ महाराजाधिराज सरकार भव्य रूपगु सम्यक्या मण्डपया सिंहासनस बिज्याकेगु यानावइच्चन । थुगु उत्सव समारोहय जङ्गी निजामति कर्मचारी आदिपि च्वनाः सलामि बियाः अभिवादन नं टक्य याइ । लिस्सें कलशाभिषेक लः ह्लानाः सम्यक्या महादान वाक्य परलपाः जुजुयात लिख्यचाय्के धुंकाः उपस्थित सम्पूर्ण सम्यक् देवता दीपङ्कर तथागत चङ्क्रमष देवता, क्वाचपाल देवता, गन्धुरी देवता, आर्यतारा, वसुन्धरा, प्रज्ञापारमिता एवं श्रीस्वयम्भू देवता समेत अनेक देवदेवता बिज्याकाः काठमाण्डू उपत्यकाया चैलक, श्रामणेर, ब्रह्मचर्य भिक्षु, शाक्यभिक्षु तथा बुद्धाचार्य वज्राचार्य आदिपित सम्यक्या विधि विधानुसार इलय्-व्यलय् दान प्रदान यानावइच्चंगु स्थान जुल । अद्यापि किनिदँ छकः जा अनिवार्य रूपं द्वादशवर्षीय महागुठी सम्यक् समारोह न्यायका वइच्चंगु दनि ।

प्रसङ्गवश थ्व समारोहया विषय कयाः छत्वाःचा खँ न्ह्यथने—काठमाण्डूया वज्राचार्य, शाक्य व उदासपिनि बिचय् यक्व समय तकं विवाद घण्ट ल्वापु जुयाच्चंगु खः । उगु ल्वापु २०११ सालं मक्क संक्रान्तिखुनु न्याय्कूगु सम्यक्या प्रभावं पारस्परिक वैमनस्य ईर्ष्या दइच्चंगु शान्त जुयाः परस्परय सुदृढ मैत्री सम्बन्ध स्थापित जुयाः उगु सम्यक् समारोह सफलतापूर्वक जुल धइगु विषय कयाः गोरखापत्रं प्रकाशित याःगु दु ।

थुगु उपलक्षय वज्राचार्य, शाक्य व उदाय्तय प्रतिनिधिपिसं थवंथः वंगु नीच्यादँनिसेंयागु ढगडा समाधान याय्गु खुशिराजि जुयाः सुयागुं व्यक्तिगत स्वार्थ व करकापय लगय मजुसे उगु ल्वापु बांलाक समाधान जुल । उगु समारोह सहयोग व शान्तिया वातावरणं सम्पन्न जुल ।

उगु सम्यक् समारोहय राजकीय परिषद्या अध्यक्ष श्री ५ युवराजाधिराज अतिरिक्त प्रधानमन्त्री जनरल कोईराला तथा मेपि मन्त्रीत व आपालं प्रतिष्ठित व्यक्तिपि उपस्थित जूगु दु । विशेष मन्त्र (सम्यक् मण्डप) या सिंहासनय तयातःगु श्री ५ महाराजाधिराजया प्रतीक स्वरूप खड्गस नियमानुसार पूजा समारोह शुरु जुल । उगु समारोहय किद्वलं मयाक दर्शकगणपि वयाः स्वःवयाच्चन ।

समारोहय शाक्यतय्गुपाखे प्रो० श्रीसूर्यवहादुर, उदाय्तय्गुपाखे श्रीदयावीरसिंह व वज्राचार्य-पिनिगुपाखे श्रीलोकदर्शनजुं भाषण बियाः २८ दँ न्ह्योनिसेंयागु ल्वापु शान्तिपूर्ण समाधान जूगुलि खुशि प्रकट याःगु जुल ।

थुगु मेलमिलाप याय्गु ज्याखँय श्रीदयावीरसिंह, श्रीलोकदर्शन, गृह सेक्रेटरी श्रीनीलराज, राज्य व्यवस्थाया का. मु. सेक्रेटरी श्रीमाणिकलाल श्रेष्ठ, काठमाण्डू उपत्यकाया का. मु. कमिश्नर

श्रीदेवीप्रसाद उपाध्याय, तथा का. मु. मज्झिमे-श्रीवद्वीप्रसाद, इनस्पेक्टर जनरल श्री जी. बी. याकथुम्बा तथा प्रो० श्रीसूर्यवहादुरपिनिगु नां उल्लेखनीय जू ।

थुगु सम्यक् समारोह्य सामेल जुइमाः धकाः सरकारीयापाखे नायव सुब्बा तक व उगु सरहया अन्य कर्मचारीतय्त नं उपस्थिति जुइगु उर्दी जूगु दु व मेपि कर्मचारीपित उगु दिनस बिदानं व्यूगु दु ।

थ्व सम्यक् महादान गुठी श्री ५ पृथ्वीनारायण शाहदेवजुं नेपाः विजय याय् न्ह्यो तक इतुं बाहाः, वँतुबाहाः व लगं बाहाः स्वंगू बाहालं मिलय् जुयाः ४।५ दँय छकः पालं पाः सम्यक् न्याय्का वइचवन । लिपा श्री ५ पृथ्वीनारायण शाहजु बिज्यानाः समस्त नेपाःया छह्य हे जक जुजु जुसेलि कारणवश थ्व सम्यक् महादान गुठी बन्द जुल । थ्व खँ श्री ५ बडामहाराजाधिराज पृथ्वीनारायण शाहजु सियाः वसपोलं थ्व सम्यक् छिनिदँय छकः न्याय्केगु यानाः आवश्यक गुहाःलि बियाः सदांया थें स्वयम्भूया ववय् भुइख्यलय् थःह्य नं भाग कयाः परम्परा थें हानं सम्यक् महादान गुठी न्याय्के बियाबिज्यात । थौंतकं थ्व सम्यक् न्याय्का हे वयाचवन तिन । अले नेपाल अधिराज्यया जुजु सम्यक्या प्रमुख अतिथि जक मखु परन्तु प्रमुख अभिभावक जुयाच्वंगु थ्व हे सम्यक् प्रथां कयनाच्वंगु दु^१ ।

थुगु भुइख्यः नेपाःमि बौद्धतय् जक बौद्ध सम्मेलन जुइगु थाय् मजुसे वर्तमान तिब्बती बौद्धतय्सं नं थुगु थाय्यात सुयोग्य स्थान भाःपाः तिब्बती शरणार्थीपिसं परम पूज्य धर्मस्वामि श्रीदलाई लामाजु-यागु जन्मोत्सव समारोह मानय् याय्गु नं यात । थुलि जक मखु २०२६ साल पौष १२ गते तिब्बत जगतय् अतिकं प्रसिद्ध परम श्रद्धेय गुरु कर्मापा लामाजु नं थ्व हे थासय् च्वनाः डाकिनी धर्मपालपिसं अधिष्ठान यानातःगु 'वज्रमुकूट' तपुलि पुयाः दर्शन व्यूगु दु । फलस्वरूप थुगु थासय् सँदेया श्रद्धालु धर्मात्मा दानपतिपिसं स्वयम्भू दर्शन याःवनेगु अति भव्य व कलात्मक सुन्दर प्रवेश द्वार ध्वाका दय्काबिल । थुगु सुन्दर प्रवेश द्वारयात ल्वय्क बांलाक थ्वया जःखः सिजःपातायागु माणे सच्छि व नीछ्गः अले ७ फुट जाःयागु तगोगु सिंयागु रंगोन यानाः माणे छगः नं तथाः शोभा वृद्धि याना तइतःगु दु ।

थुगु भुइख्यलय् गुवलय् सुनां सम्यक् महादान न्याय्का वन धइगु विषय कयाः उदाहरणया लागी छुं टिपोट थन प्रस्तुत यानाच्वना^२—

- (१) ने. सं. ७७३ सालं कवीन्द्र जयप्रताप मल्ल जुजु सिंहासनस बिज्याकाः दानपति केलत्वाःया कंसकार धर्मज्योतिं सम्यक् यात ।
- (२) ने. सं. १०८ सालं शाक्यभिक्षु ज्ञानपतिजु
- (३) ने. सं. १५१ सालं विष्णुधर तुलाधर, न्यत तुंछें
- (४) ने. सं. १८२ सालं भाजुवन्तसिंह तुलाधर, असं जःधुंछें

१- ने. सं. १०८५, स्वांयापुन्हीया देछाः—'नेपाःया सम्यके दीपङ्कर तथागत' पृ. ३,

प्रकाशक—स्वयम्भू विकास मण्डल ।

२- प्रस्तुत ग्रन्थया परिशिष्टया अभिलेख सूची ।

- (५) ने. सं. १८३ सालं चिधन ताम्रकार, यतखावाहाः
 (६) ने. सं. १८३ सालं शंखसिंह तुलाधर, जःधुंछे
 (७) ने. सं. १८६ सालं दानवीरसिंह तुलाधर, असं जःधुंछे
 (८) ने. सं. १००२ सालं ज्ञानवीरसिंह तुलाधर, न्यत वनेमा
 (९) ने. सं. १००८ सालं कृष्णसुन्दर तुलाधर, असं धालासिको
 (१०) ने. सं. १०१८ सालं जोगवीर स्थापित, थाय्मदु न्हुवाहाः
 (११) ने. सं. १०२६ सालं कुलवीरसिंह तुलाधर
 (१२) ने. सं. १०५२ सालं भक्तवीरसिंह तुलाधर, न्ह्योखा
 (१३) ने. सं. १०६७ सालं मोतिमान रंजितकार, चिकंमुगल
 (१४) ने. सं. १०७२ सालं सम्यक्कर्त्त तुलाधर, न्ह्योखा

[२] सिखःत्वहं

थ्व सिखःत्वहं भुइख्यःया उत्तरपाखे च्वंगु पलेस्वांपुखूया सिथय्लाक तयातःगु दु । थ्व त्वहँतय् स्थानीय बुरापाकातय्गु धापूकथं सिखःया चि आःतक सिइदिनि धाइ । प्रसङ्गवश थुकिया छत्वाःचा परिचय थन च्वयाच्वना—

जुजु गुणकामदेवया पालय् जल वृष्टि मजुयाः गुरु शान्तिकरया आज्ञानुसार सकल नागराजपि निमन्त्रणा यात, सकल उपस्थित जूवल । तर उगु नागसभाय् कर्कोटक छ्हा जक उपस्थित मजू । बिना कर्कोटक नागराज मदय्कं उगु महामेघ साधन वर्षापण कार्यक्रम पूर्ण जुइमखुगुलि उगु साधनक्रमय् उत्तरसाधक जूहा गुणकामदेव राजायात गुरु शान्तिकरं कर्कोटकयात सःतके छ्वय्गु विषयय् थथे आज्ञा जूगु दु—

‘भो उत्तरसाधक गुणकामदेव ! थ्व जि बियागु निबिघ्न जुइगु रक्षाजन्त्र साधनसिद्ध ब्वति (दाफस्वां) ज्वनाः सरासर कर्कोटक गन च्वनाच्वन अन दुहां हूँ । मानमिजास यानाः धयाः वःसा वल यदि मवल धाःसा वइगु चसु ज्वनाः लुयाहति’ धका धाःगु गुरयागु वचन शिरोपर यानाः निर्भीक-पूर्वक नागभुवनय् वनाः कर्कोटक नागराजयात नापलाः वन ।

‘भो कर्कोटक नागराज ! छःपि बिमज्याःगुलि उगु वर्षापणकार्य रोक्का जुयाच्वन । सतार्थ हित सुख जुइगु उजाःगु महान् कार्यय् छाया विलम्ब यानागु, बिज्याहूँ, नु ।’ धाल नं मवसेलि धया गथे खः अथे हे चसु ज्वनाःहल । स्वयम्भू डाँडा क्वस्सं थ्यनेवं थःगु विरूप खनाः सारै लाचार जुयाः अनसंतुं पयतुना बिल, इकिधिकि संके मफु । उगु इलय् कर्कोटक बिस्युं वनी धकाः ताडन तयाः वज्रफोट सिखलं चिना तइतःगु थाय् जूया निम्ति थौतकं थुगु थाय्पा नां ‘सिख त्वहं’ नामं प्रसिद्ध तिनि ।

कर्कोटकयाह सिखःत्वहंतय् चिनाःलि उत्तरसाधक गुरुयाथाय् वनाः प्रार्थना यात । 'भो गुरु ! छःपिनिगु आज्ञानुसार कर्कोटकयात चसु ज्वनाः हय् धुन । तर थुगु नागसभाय् वय्गु मञ्जुर मयाः उकिं छःपिसं छु याय्माःगु याना बिज्याहुं ।' धकाः धासैलि गुरु शान्तिकरं कर्कोटकया गलः तगो जुयाः विरूप जूगुलि सुन्दर रूप नागराजपिनि न्ह्योने वय् मछाल जुइ धकाः सिइकाः थः हे स्वयम्भू वयत्तक वयाःलि कर्कोटकयात शिष्टाचारपूर्वक नापलानाः थःगु वृत्तान्त खँ कन । अले कर्कोटकं गुरु शान्तिकरयात विनम्र निवेदन यात— 'भो गुरु ! छलपोलयागु सदिच्छा पूर्ण याय्गुलिइ सहयोग बिइत जि न्ह्यावले' तत्पर दु । तर शान्तिपुरय् दुने जुयाच्चंगु नागसभाय् छता यंका बिज्याय् मते, कारण संसारय् वरु सिनावने अःपु लाज शर्म तोते थाकु, जिगु गलः तगो जुयाः सारै विरूप जूगुलि जि उगु सभाय् वनेगु इच्छा मदु ।' थुलि धासैलि शान्तिकर गुरु कर्कोटक नागराजयात शपथ ग्रहण याकेबिल । अले कर्कोटकं गुरु शान्तिकरयागु आज्ञानुसार थःगु नुगःचुयागु हि पिकयाः सहि समेत यानाबिल ।

थुकिया बांलाक विवरण प्रस्तुत ग्रन्थया २६ गूगु अध्यायय् च्वयागु दु । थ्व कर्कोटक नागराज फन्ना कयाः मंमदु मंमदु नागबेली कयाः चाःहुला वःगु थाय्पात थौतकं छाउनीख्यःया ववस्सं च्वंगु लँ 'ताहाचल' धइगु नामं प्रचलन जुयाच्वन । थ्व कर्कोटक नागराजया गलः त्वपुइगु लाज शर्म वचय् याय्गु हिसावं बुंगद्योया घःमालय् च्वंहा कर्कोटकयात धकि कापतं त्वपुइगु चलन परम्परां क्यनाच्चंगु दनि ।

[३] पलेस्वांपुखू (भुइख्यःपुखू)

थ्व पुखू भुइख्यलं उत्तरपाखे स्वयम्भू वनेगु लँया सिथय्संतु च्वंगु खः । थ्व पुखुलिइ मनूतय्सं अनादर यानाः न्ह्योने ध्वदुथे फोहर यानाः अनियमित याना व्यूगुलि थौकह्लय् थ्व पुखुलिइ लः स्थिर रूपं मच्चं ।

थ्व पुखूया विषयय् थथे धयातःगु दु— श्रीस्वयम्भू महाचैत्य एवं गुरुवागीश्वर मञ्जुश्रीयागु नित्य अखण्ड भक्ति यानाच्चंहा चूडाभिक्षुणोनं थ्व हे निर्मल दहः पुखुलिइ स्नान यानाः थ्व हे पुखुलिइ ह्वयाच्चंगु पलेस्वां उफोस्वां चवःस्वां आदि थ्वयाः ह्लित्थं श्रीस्वयम्भू व मञ्जुश्रीयात द्वहलपाः भक्तिभाव यानाच्चन धइगु खँ प्रस्तुत ग्रन्थय् उल्लेख जुइ धुकूगु दु । गुलिसिनं धाइ कि शान्तिकर गुरु शान्तिपुरय् नागसाधन याःवलय् उपस्थित जूपि नागराजपित विश्राम याकेत दय्कातःगु खः ।

१— थथे थःगु हि पिकयाः सहि तय्गु चलन प्राचीनकालय् जक मखु थौया वैज्ञानिक जगतय् नं चलन खनेदु—

पेरिस स्थित युनेस्को भवनया न्ह्योने बौद्धभिक्षुतय् छहा नेता नगुएनथान थाई धइहास्यां थःगु हि छिनातःगु छकू कापतय् कलम थुनाः दक्षिण भियतनामया राष्ट्रपति नागेदिन्ह दिमयागु सरकारयागु विरुद्धय् छगू वक्तव्य च्वयाः व्यूगु दु । विश्व बौद्ध धर्मावलम्बीतय्गु संगठनया महामन्त्री नगुएनथान थाईजुं चिपुचागु छुरां थःगु नुगःपाचय् कियाः हि पिकयाबिल धकाः वि. सं. २०२०, आश्विन ३ गतेयागु गोरखापत्रय् समाचार व्यूगु दु ।

[४] त्वहंहिति

थुगु त्वहंहिति भुइख्यःया उत्तरपाखे च्वंगु स्वयम्भूइ थहांवनेगु मूलपुया सिथय्संतुं लानाच्चंगु पूर्व अभिमुख यानाः जलधारा प्रवाह जुयाच्चंगु प्राचीन जल प्रणाली खः । थ्व हितिस प्रवाह जुयाच्चंगु लः स्वयम्भू ज्योतिरूप गुगु नागवास पुखुलि उत्पन्न जुल व हे स्वयम्भू महाचैत्यया दुनेच्चंगु कालीहृदया लः पञ्चबुद्धया अभिषेक स्वरूपगु अति पवित्रगु विशुद्धगु लः धकाः मानय् यानातःगु जुल । खतु थ्व स्वयम्भू पर्वतय् दुनेच्चंगु कालीहृदया लः आषाढ, श्रावण, भाद्र महिना पाखे थ्व पुखूया लः भय्भय् ब्रियाः थासंथासय् स्वयम्भू डाँडां लिज्वयाः वयाच्चंगु खनेदु । उवलय् थ्व जलयात स्वयम्भू गः चाःहिलाः प्रदक्षिणा यानाः भक्तिभाव याःवइपिसं उगु जल कयाः थःत पवित्र भाःपाः आत्मा सन्तोष जुया वयाच्चनी कि मानों पञ्चबुद्ध स्वयम्भूयागु अभिषेक कयागु तुल्य गौरवान्वित जुयावनाच्चनी ।

गुलिसिनं थ्व हितिया लः गुसाईकुण्डनिसें वयाच्चंगु धकाः धाइपिं नं मदुगु मखु ।

[५] बुद्धपादुका मण्डल

थ्व बुद्धपादुका मण्डल स्यंगुया पूर्वपाखे च्वंगु कलात्मक सुन्दर प्रवेश द्वारया न्ह्योनेपाखे पीचरोडया लिकसं लाःगु दु । थ्व मण्डल तःफिगु प्यकुंलाःगु त्वहंतय् भूपुराकृति मण्डल कियाः उकिया दथुस श्रीस्वयम्भू धर्मधातु आदिबुद्धयागु चरणकमल पादुका अङ्कित यानाः प्रदर्शित यानातल । थ्व पादुका मण्डल स्वयम्भू दर्शनार्थ अनुगमन जुइपिं भक्तजनपिसं वन्दना यानाः अनि यानाः वनेगु यानावइचन । लिस्सें स्यंगुगः चाःहुलाः वनिइपिं प्रदक्षिणार्थी भक्तजनपिसं नं भागि यानाः चरणकमल भवपुया वनिइगु चलन जुयाचन । थ्व स्वसः व फित्वाथः ३१८ दइच्चंगु स्वयम्भूया मूत्वाथःया न्ह्योनेसंतुं लानाच्चंगु जुल । ह्लापायागु पादुका मण्डल चीधं जुयाः व स्वयाः नं बांलाक बल्लाक तःधं यानाः यल इलन्हेया श्रद्धालु धर्मात्मा शोभानरजुं ने. सं. ६८१ सालं तयाथकूगु जुल ।

थुगु बुद्धपादुका लँया सिथय् थ्यंक छाय् तल धइगु विषयय् छत्वाःचा खँ न्ह्यथने— बुद्धधर्मय् सर्वप्रथम अनुगमन जुइत ह्लापालाक “त्रिशरण बोधिचित्त उत्पत्ति मयाय्कं उह्य व्यक्ति बुद्धशासनय् दुहां वंहा जुइमखु” धयातःगु थुगु शिक्षाया अनुरूप स्वयम्भू स्थानय् प्रवेश जुइत बुद्धया चरणकमल दर्शन बियाः अर्थात् बुद्धया शरणय् छवय्गु आशयं उपाय कुशल ज्ञान स्यूपिं पूर्वाचार्यपिसं लँया सिथय् न्ह्योनेसंतुं बुद्धपादुका तयाः दर्शन बियातःगु जुल । मेगु अर्थय् स्वयम्भू महाचैत्य च्वय् डाँडाया च्वकाय् थ्यंक लाःगु जूया निम्ति अन थ्यंक थहांवनाः च्वने मफुपिं बाल, वृद्ध व रोगीपिनिगु निम्ति महाकारुणिक वसपोल बुद्धं लँया सिथय् थ्यंक वयाः दर्शन व्यू बिज्यानाच्चंगु धकाः नं धाय्फु । थुलि जक मखु ‘द्विपदानामग्रं बुद्धं’ निपा तुति चूपिं देव मनुष्यपिं मध्यय् उत्तम जुयाच्चंहा न्ह्योने लानाच्चंहा वसपोल तथागत शास्तां प्राणिपिनिगु हित सुख शान्ति लागी उद्धार याय्त न्ह्योने न्ह्यज्यानाच्चंगु धइगु दिव्य सन्देशया शुभ प्रतीक नं खः । अज्ज श्रद्धाभक्ति निश्चय दुपिं संस्कार स्वानाच्चंपिं भाग्यमानिपित बुद्धया करुणा सतिइ तापाः धइगु मदुगु भावनाकथं नं प्रदर्शित यानातःगु जुल ।

थुगु बुद्धपादुकानिसें स्वयम्भू जंगलयागु मूत्वाथः ३१८ क्रमशः थहांवने सिधयाः पार जुइवं वसपोल श्रीस्वयम्भू धर्मधातु वागीश्वरया दर्शन प्राप्त जुइ । थ्व धयागुया मतलब थ्व खः कि बुद्धपादुका दर्शनया अर्थ त्रिशरण शिक्षानिसें अनुगमन जुयाः विस्तारं थहांवें प्रस्थान जुजुं स्वसः व खिच्यागु शिक्षापद पालन यायां मार्गफल्य प्रतिष्ठित जुसेलि उह्येसित अनुत्तर सम्यक् संबोधि भास्कर सर्वनुगत हृदय श्रीस्वयम्भू ज्योतिरूप धर्मधातु वागीश्वरयात साक्षात्कार यानाः काय्फुह्य जुइ धइगु भाव प्रदर्शित याय् कारण्य उपाय कुशल ज्ञान स्यूपि की पूर्वाचार्यपिसं थुगु बुद्धपादुका न्ह्योने तयाः वयां ल्यु ३१८ शिक्षापद रूपी त्वाथलं थतयंकाः श्रीस्वयम्भू महाचैत्य दर्शन याका तइतःगु भाव स्पष्ट जू ।

उगु ३१८ शिक्षापदया नां प्रसंगवश थन उद्धृत यानागु जुल :—

१. त्रिशरण गमन	३	२४. विशत्याकारसम्बोधि	२०
२. त्रिवोधिचित्त उत्पत्ति	३	२५. चतुआरूप्यसमापत्ति	४
३. षट् भावना	६	२६. अष्टविमोक्ष समापत्ति	८
४. सप्तविधानुत्तर पूजा	७	२७. नवानुपूर्वविहार समापत्ति	६
५. चतुस्संग्रहवस्तु दान	४	२८. त्रिविमोक्ष	३
६. पञ्चस्कन्ध	५	२९. षडभिज्ञा	६
७. अध्यात्मषडायतन	६	३०. दशतथागत बल	१०
८. बहिर्धायतन	६	३१. चतुर्वैशारद्य	४
९. षट्विज्ञान	६	३२. चतुःप्रतिसम्बित	४
१०. षट् संस्पर्शप्रत्ययवेदना	६	३३. अष्टादशावेणिका बुद्धधर्मा	१८
११. षट् धातु	६	३४. षट् अनुशय	६
१२. द्वादशाङ्ग प्रतीत्यसमुत्पाद	१२	३५. पञ्चदृष्टि	५
१३. षट्पारमिता	६	३६. दशपर्यवस्थान	१०
१४. द्वयः सत्य	२	३७. षट्क्लेशमल	६
१५. अष्टादशशून्यता	१८	३८. त्रिआश्रव	३
१६. चतुस्मृत्युपष्ठान	४	३९. षट्संयोजन	६
१७. चतुस्सम्यक्प्रहाण	४	४०. षट्क्लेश महाभूमि	६
१८. चतुःकृद्विपाद	४	४१. दशपरित्तक्लेशभूमि	१०
१९. पञ्चेन्द्रिय	५	४२. दशाकुशल	१०
२०. पञ्चवल	५	४३. त्रिधातुज्ञान	३
२१. आर्याष्टाङ्गिकमार्ग	८	४४. दशज्ञान	१०
२२. चतुरार्यसत्य	४	४५. दशधारणीमुख	१०
२३. चतुर्थ ध्यान	४	४६. त्रयोदशभूमि	१३

उपर्युक्त स्वसः व किंच्यागू शिक्षापदस गुगुं ज्वनेमाःगु, गुगुं त्वःतेमाःगु, गुगुं भावना याय्-
माःगु, गुगुं पार जुइमाःगु अर्थात् गुगुं स्वभावय् दय्माःगु समेत यानाः अलग अलग विषय विभाजन
जुयाच्वंगु दु । थुगु व्याक्क ज्ञानपाखें पार जुल कि संसारसागरयागु दुःखं पार जुयाः सम्यक् संबुद्धपिनिगु
आज्ञानुसार भूमि प्राप्त जुयाःलि अन्तय् प्रभाश्वर धर्मकाय स्वयम्भू ज्योतिरूप धर्मधातु ज्ञान यथार्थ
रूपं अवबोध जूह्य जुइ ।

[६] स्वयम्भू प्रवेश द्वार

थुगु नवनिर्मित प्रवेश द्वार बुद्धपादुकाया लिउनेसं च्वंगु थःगु हे ढंगं दय्कातइतःगु स्वयम्भू
दर्शन निमित्त दुहांवनेगु मुख्यगु ध्वाका खः । स्वयम्भू दर्शनाभिलाषी भक्तजनपिनिगु लागी न्ह्यावले खुल्ला
जुयाच्वंगु रोक-तोक मदुगु सुन्दर कलात्मक भव्यगु द्वारय् अनेक दिव्य भावनाया शुभ प्रतीक माङ्गलिक
चिह्नपाखें सुसज्जित यानाः स्वागत यानातइतःगु खनेदु । थुगु ध्वाकाया फुलडर युक्त पौया छोने
लक्षण प्रमाण मिलय् यानाः गजूया रूपय् हरिश्चक्र धर्मचक्र तयाः शोभा वृद्धि यानातःगु दु । थुकिया
अर्थ खः—शाक्यमुनि बुद्धं अनुत्तर सम्यक् संबोधिज्ञान प्राप्त याय् धुंकाः थःह्यं सय्का सिइकागु ज्ञान
त्रिपरिवर्त द्वादशाकार प्रतोत्यसमुत्पाद चतुरार्यसत्य ज्ञान वाराणसी ऋषिपत्तन मृगदावनय् बिज्यानाः
सर्वप्रथम धर्मचक्र प्रवर्तन यानाबिज्याःगुया संस्मरणकथं तयातःगु जुल ।

प्रवेश द्वारया न्ह्योनेपाखे ध्वाकाया फुसय् च्वापुगुंया दृश्य तयाः उकिइ दत्थुइ भूस्पर्शमुद्रा
शाक्यमुनि बुद्ध तइतःगु दु । थ्वया अर्थ खः शाक्यमुनि बुद्ध च्वापुगुंया मुलय् बास यानाच्वंगु नेपाःया
लुम्बिनी गामय् जन्म जूह्य धइगु सम्फुनाया रूपय् तःगु जुल । थुगु ध्वाकाया जवं खवं प्रज्ञोपायया दृष्टि
स्वरूप प्राणिपिनिगु उपरय् सदां सुदृष्टि स्वयाः महाकरुणाया दृष्टि चाय्काः अतिथि अभ्यागतपित
प्रशन्नगु दृष्टि स्वयाः स्थिर दृष्टि अवलोकन यानाच्वंगु जुल । थुगु दृष्टिया क्वस्सं क्वस्सं अष्टमंगलया
चिह्न अङ्कित यानातःगु दु । थ्वया मतलब खः—थ्व प्रवेश द्वार स्वागत द्वारं दुहां पिहां जुइपिं श्रद्धालु
भक्तजनपित थ्व च्यागू मंगल चिह्नया प्रभावं इमित न्ह्यात्थाय् न्ह्यावले स्वस्ति कल्याण मंगल याय्मा
धइगु भितुना देच्छायातःगु जुल । खतु थ्व च्यागू मङ्गल चिह्नया थःथःगु अर्थ दु ।

थ्व अष्टमङ्गलया विषयय् बुद्धधर्मय् विभिन्न दृष्टिकथं महत्त्व बियातःगु दु—गुबले बुद्धशासनय्
दय्माःगु गुण धर्मया उपमा बियातल, गुबले बुद्धयागु स्वागत निमित्त उपस्थित यानातल, गुबले
बुद्धशासनयागु अधिकार ज्वनाः जगत हितार्थ याइपिं अष्टबोधिसत्त्वपिनिगु चिह्न स्वरूप मानय्
यानातल—

अष्टमांगलिक युक्त बुद्धशासन

(१) श्रीवच्छ —अत्यन्त विशुद्ध जुयाच्वंगु अनुत्तर सिद्धि लाभ जुइगु सर्वज्ञ ज्ञान प्राप्त जुइगु थुगु
शासन ।

- (२) पुण्डरीक —पल्लेस्वां गथे भुतुनालं उत्पत्ति जूसां भुतुनालं मथ्युसे निर्मल च्वक्वा जुयान्वनी अथे हे क्लेश कल्पना जालपाखें अलिप्त जुयाच्वंगु थुगु शासन ।
- (३) ध्वज —गथे निर्मल गगनमण्डलय् शोभायमान जुइक् ध्वज ब्वया च्वनिइगु खः अथे हे दार्शनिक जगतय् शोभा दइच्वंगु थुगु शासन ।
- (४) कलश —आयु, पुण्य, ज्ञान, सिद्धिया थल बोधि अमृत जलं परिपूर्णगु दर्शन, स्पर्शन, स्मरण याना मात्रं महामंगल जुइगु थुगु शासन ।
- (५) चामर^१ —निर्मल यच्चुसे च्वंगु शान्तगु तुइसे च्वंगु चामरं आगन्तुक अतिथिपित स्वागत सत्कार याय्त तयार जुयाच्वंगु थुगु शासन ।
- (६) मत्स्ययुग्म —सुदुर्लभ जुयाच्वंगु महासंयोगं सौभाग्यवश दर्शन प्राप्त जुइगु प्रज्ञोपायपाखें छुट्य मजूगु महामुद्रां क्वात्तुक प्वःचिनातःगु आपत्ति दोषं रहितगु अचिन्त्य कुशल ज्ञानं पूर्णगु सर्वगुण सम्पन्नगु थुगु शासन ।
- (७) छत्र —गथे तांन्वयाच्वंगु सिचुसे च्वंकाः शान्त याना विइ अथे हे रोग शोक दुःख कष्टादि-यात शान्त यानाः पूर्ण आरोग्यता प्राप्त जुइगु जगत्संसारयात असंख्य विपुलगु महामैत्रिकरुणा मण्डल छत्रं कुइकाच्वंगु थुगु शासन ।
- (८) शंख —मोहान्धकारं ख्युंसे च्वनाच्वंगु रात्रि तृष्णा रूपी लासाय् विषय जंजाल रूपी सिलखं त्वपुयाः अज्ञान रूपी न्ह्यलय् स्वप्नान्तरय् अनेक भय शंका त्रास उत्पत्ति जुइकाच्वंपि काल सर्प वल नं न्ह्यलं मचाःपि थुजाःपि सुषुप्तावस्थाय् लानाच्वंपित पूर्ण रूपं जाग्रत अवस्थाय् हय्त धर्मशंख महानाद पुयाः सद्धर्मोपदेश जुयाच्वंगु थुगु शासन ।

तथागत सम्यक् संबुद्धयात पूजा याय्बलय् थ्व अष्टमंगल गन गुथाय् चह्लय् याय्गु व उकिं छु पुण्य प्राप्त जुइ धइगु विषयय् थथे धयातःगु दु :-

- (१) श्रीवच्छ —चित्तय् द्वहलपाः पूजा यानागुलिं सर्वज्ञानसिद्धि प्राप्त जुइ ।
- (२) पुण्डरीक —श्रीमुखमण्डलय् द्वहलपाः पूजा यानागुलिं विषयं अलिप्तगु शान्ति प्राप्त जुइ ।
- (३) ध्वज —ब्वहलय् द्वहलपाः पूजा यानागुलिं विशुद्धकीर्ति प्राप्त जुइ ।
- (४) कलश —प्लाथय् द्वहलपाः यानागुलिं आयु, पुण्य, ज्ञान, सिद्धि लाभ जुयाः बोधिचित्त प्राप्त जुइ ।
- (५) चामर —ह्लातय् द्वहलपाः पूजा यानागुलिं तीर्थिक दमन यानाः अतिथि स्वागत याय्गु समर्थ प्राप्त जुइ ।
- (६) मत्स्ययुग्म —मिखाय् द्वहलपाः पूजा यानागुलिं प्रज्ञोपाययागु चलनपाखें उपाय याय् सःह्य जुइ ।

१- तिब्बत महायान जगतय् चामरया थासय् 'चक्र' चिन्ह तयातःगु दु—थुकिया अर्थ खः अज्ञान क्लेश अन्धकारय् लानाच्वंपि प्राणिपित सुख शान्ति विइगु त्रियात (श्रावक, प्रत्येक, महायान) या धर्मचक्र जुयाच्वनिइगु थुगु शासन धइगु अर्थय् तयातःगु जुल ।

(७) छत्र -बुद्धया शिरय् द्वहलपाः पूजा यानागुलि क्लेशाग्नि शान्त जुयाः मैत्रि करुणा छत्र प्राप्त जूहा जुइ ।

(८) शंख -बुद्धया दन्तय् द्वहलपाः पूजा यानागुलि वाक्सिद्धि दयाः व्याख्यान शक्ति प्राप्त जुइहा जुइ ।

भगवान् बुद्ध थःगु जन्मभूमि लुम्बिनीइ बिज्याःबलय् वसपोलया स्वागत निमित्त गुगु अभूतपूर्व उत्सव जुल, उबलय् थ्व अष्टमंगल चिह्न दुथ्याःगु खनेदु-

(१-२) श्रीवच्छ व शंख नारायणजुं ज्वनाः उपस्थित जुल ।

(३) कलश ज्वनाः नागराजं जलधारा हाय्कावल ।

(४) ध्वज वायुदेवतां ज्वनाः शोभायमान यात ।

(५) छत्र देवराज इन्द्रं ज्वनाः बुद्धयात कुइकावल ।

(६) चामर भिक्षुगणं गाय्काः सेवा याकाः वल ।

(७) पुण्डरीक आदि पुष्पपाखे देवतापिसं आकाशं पुष्प वृष्टि यानाहल ।

(८) मत्स्ययुग्म जलाशय पुखुलिइ मत्स्ययुग्मया संमिलन क्यनाः लःहू बांलाकाः वल ।

थ्व अष्टमंगल च्यागूया च्याहा बोधिसत्वया प्रतिनिधि रूपय् मानय् यानावइच्चंगु छगू ज्वलन्त प्रमाण काठमाण्डू उपत्यकाया छचाःखयरं च्वंगु अष्टवैतराग धलं दंवेनेबलय् छगू छगू थासय् छगू छगू अष्टमंगल चिह्न चह्यय् याय्गु परम्परा अद्यापि विद्यमान तिनि-

(१) मैत्रि बोधिसत्व	मणिचूदहनय्	श्रीवच्छ
(२) गगनगञ्च बोधिसत्व	गोकर्णेश्वरय्	पुण्डरीक
(३) समन्तभद्र बोधिसत्व	चाङ्गुस	ध्वज
(४) वज्रपाणि बोधिसत्व	कुम्भेश्वरय्	कलश
(५) मञ्जुश्री बोधिसत्व	फम्पिइ	चामर
(६) सर्वनिवरणविष्कम्भि	शिखरनारायण	मत्स्ययुग्म
(७) क्षितिगर्भ बोधिसत्व	चोभारय्	छत्र
(८) खगर्भ बोधिसत्व	आदेश्वरय्	शंख

प्रवेश द्वारया लिउनेपाखेया वर्णन

ध्वाकाया फुसय् त्रिकुलनाथ मञ्जुश्री, वज्रपाणि, अवलोकितेश्वर तथाः थ्वया क्वस्सं क्वस्सं रञ्जना आखलं व तिब्बती आखलं ॐ पद्मोष्णीष विमलेहूँ फट् धकाः च्वइतःगु दु । थुगु किसिमं तय्गु परम्परा तिब्बत बौद्धजगतय् प्रचार जुयाच्चंगु खनेदु । हरेक गुम्बा गुम्बा, नगर प्रवेश द्वार, गुफा पाकु आदि स्थानया लुखाफुसय् अथवा छेय् छेय् द्योक्वथा पतिकं धयाथे मूर्ति अथवा चित्र जक जूसां तय्गु चलन दु । थुगु किसिमं त्रिकुलनाथया प्रतिमाप्रति अप्पां श्रद्धा तथावयाच्चंगुया मतलव थ्व खः- बुद्ध महापरिनिर्वाण जुइत्यंगु अवस्थाय् बुद्धं थःगु सम्पूर्ण शासनाभिभार थःगु काय वाक् चित्तया गुण कर्म

सिद्धिज्ञानं थुपिं स्वह्यसिनं चलय् याइ धकाः धयाथकूगु दु । बुद्धयागु शरीरं याइगु कार्यभार आर्यावलोकितेश्वरयात व्युगु जुल, अथे हे बुद्धया सम्पूर्ण वाक्या अभिभार गुरु मञ्जुश्रीयात विल, हानं बुद्धया चित्तया कार्यभार वज्रपाणि बोधिसत्वयात लल्लाना थकल । उकिं थुपिं स्वह्यसित श्रद्धाभक्ति तल धाःसा त्रिकालया बुद्धपित पूजा सत्कार यानागु समानं पुण्य प्राप्त जुइ धइगु महायानी परम्पराकथं विश्वास यानावइच्वंगु जुल । उद्धार कार्ययागु अवलोकितेश्वरं याइ, शिक्षा-दीक्षा उपदेश विइगु ज्या मञ्जुश्रीनं याइ, अथे हे सम्पूर्ण मार विघ्न हतय् याय्गु ज्या वज्रपाणि याइ । संक्षिप्तं धाल धाःसा बुद्धशासनयागु याय्माःगु सम्पूर्ण ज्या बुद्धं थुपिं स्वह्यसित अधिकार प्रदान यानाथकूगु धयाच्वन । थ्व हे कारणं महायान जगतय् थुपिं स्वह्यसिगु आपालं प्रसिद्धि प्राप्त जुयाः महत्व दइच्वंगु खः ।

थुगु त्रिकुलनाथया क्वस्सं जःखःपाखे पञ्चकामगुण व धर्मया प्रतीक अङ्कित यानातःगु दु :-

- (१) रुपया प्रतीक - ज्वलाह्वायकं
- (२) शब्दया प्रतीक - वीणा
- (३) गन्धया प्रतीक - शङ्ख
- (४) रसया प्रतीक - सिसाफल
- (५) स्पर्शया प्रतीक - वज्रगथि चिनातःगु धर्मवस्त्र
- (६) चिन्तनया प्रतीक - सद्धर्मग्रन्थ प्रज्ञापारमिता सफू

थ्वया क्वस्सं जःपाखे छेरिन्धु (षट्दीर्घजीवि) छह्य ज्याथः लामाजुया तोर्माताशि मङ्गलवलितर्पण वियाच्वंगु दृश्य अङ्कित यानातःगु जुल । थुकिइ दीर्घायु पुरुष, वृक्ष, पर्वत, करना, मृग, पंक्षि आदि सहित यानातःगु दु ।

खःपाखे जक छमा सिमा क्वस्सं चतुशीलव्रतस अधिष्ठान सहित सुदृढ जुयाच्वंपि किसिया द्योने माकः, माकःया द्योने खराःचा, खराःचिया द्योने क्कंगःचा छह्य तयाः क्यनातल । थुकिया मतलब थ्व खः- किसि, माकः खराःचा व क्कंगः थुपिं प्यह्यं छथासंतुं च्वनाः चतुशील (प्राणाति पाप, अदत्तादान, काममिथ्या, मृषावाद) थुगु अकुशल कर्म याय् मखु धकाः छह्यसिनं छगू छगू अधिष्ठान यानाः छमा सिमाया क्वय् च्वनाः अबसं च्वनाच्वंगु जुल । मेगु अर्थय् थुपिं प्यह्यसियां चरित्र व स्थान फरक जूसां परस्परय् चतुर्ब्रह्म विहार (मैत्रि, करुणा, मुदिता, उपेक्षा) धारण यानाः क्यनाच्वंगु नं धयातल । आखिर थुपिं प्यह्यं छथासं च्वनाः व हे छमा सिमायागु जक आश्रय कयाः सुयातं दुःख मव्युसे विशुद्ध शील पालन यानाच्वंगुया छगू ज्वलन्त उदाहरण प्रस्तुत यानातःगु नं धाल । थुपिं प्यह्यसिगु विषयय् छगू जातक कथा उल्लेख जुयाच्वंगु दु । वास्तवय् थुपिं बुद्ध शाक्यमुनि, शालिपुत्र, मौङ्गल्यायन व आनन्दयागु पूर्व जन्मयागु महान् संयोगं छथासंतुं लानाच्वंगु जातक कथायागु छगू आदर्श अनुरूप मानय् यानातःगु जुल ।

थुगु स्वयम्भू प्रवेश द्वारया जःखः च्वंगु कपनय् समस्त नेपाली जनताया अभिभावक राष्ट्रनायक श्री ५ महाराजाधिराज वीरेन्द्र वीर विक्रम शाहदेव तथा श्री ५ बडामहारानी ऐश्वर्य राज्य लक्ष्मी देवी शाहयागु सुन्दर चित्रया किपा नं तयातःगु खनेदु ।

थुजाःगु लक्षण प्रमाण मिलय् यानातःगु भव्य रूप कलात्मक सुन्दर प्रवेश द्वार वि. सं. २०३३ साल श्रावण महिना निर्माण कार्य सम्पन्न याःगु जुल । थुगु कीर्ति श्रीस्वयम्भूप्रति श्रद्धा भक्ति तथाः मानाङ्ग निवासी श्रद्धालु दाता श्रीस्वेनाम् सिद्ध लामा आदि विभिन्न मानाङ्ग लामातय्गु दानशीलया पाखे पिज्वःगु धर्मकीर्ति जुल । थुगु सुन्दर प्रवेश द्वार दयकूहा कलाकार यल पित्तुवहीया न्हुच्छेराज ब्रह्मचर्य भिक्षु खः ।

[७] माणेषुङ्ग्युर

थ्व माणेषुङ्ग्युर (माणेह्लाखाङ्ग) स्वयम्भू जंगल प्रवेश द्वारया जःपाखे च्वंगु बःचाहंगु छगू गुम्बा खः । थुकिइ दुने सुन्दर लिपि रञ्जना आखलं षडक्षरी मन्त्र 'ॐ मणिपद्मे हूँ' च्वइतःगु तगोगु बांलाःगु दर्शनीय माणे छगः स्थापना याना तइतःगु दु । थ्व माणे स्वयम्भू क्षेत्रय् च्वंगु गुम्बाया माणेत मध्यय् दकलय् सकलय् भव्यगु शोभायुक्तगु माणे खः । थ्व माणे स्वयम्भू गःचाःहुलेगु लँया सिथय्संतुं सकल भक्तजनपिनिगु निम्ति दर्शन, स्पर्शन एवं चिन्तन याय् छिक माणे चाःहुइके ज्याछिक अःपुक स्वयंबलय् मनयात आनन्द जुइक दयकातःगु जुल ।

धयातःगु दु- थुगु माणे हिइकः वईपि सुं श्रद्धालु भक्तजनपिनिगु काय वाक् चित्त परिशुद्ध निम्ति इमिगु कर्मक्लेश फुके लागी उपाय स्वरूप थुगु माणेया दुने निम्नलिखित प्यहा द्योयागु मन्त्र विधिपूर्वक न्यागू करोड छापय् यानाः गर्भय् दुने स्वथना तइतःगु दु । थुगु माणे छकः चाःहुइकेबलय् न्यागू करोड जाप यानागु समानं पुण्यलाइ धइगु अर्थ जुल । उकिं सुं श्रद्धालु भक्तजनपिसं वसपोल करुणामय अवलोकितेश्वर अनुस्मरण यानाः चतुर्बलदेशना सहित यानाः थुगु माणे हिइकल धाःसा निश्चय नं आत्मा परिशुद्ध जुयाः सुखावतीइ वनिइहा जुइ ।

- (१) वज्रसत्त्वया मन्त्र तयागुलि - पापक्लेश शुद्ध जुइ ।
- (२) पद्मसंभवया मन्त्र तयागुलि - मार विघ्न दोष शान्त जुइ ।
- (३) अपरिमिताया मन्त्र तयागुलि - आयु आरोग्य सुख प्राप्त जुइ ।
- (४) अवलोकितेश्वरया मन्त्र तयागुलि - बोधिचित्त महाकरुणा उत्पन्न जुयाः जगत हितार्थ याय्गु समर्थ लाभ जुइ ।

थुपि प्यहा द्योयागु मन्त्र धारणी विद्या उकिइ दुने सुरक्षित यानाः तइतःगुया संस्मरण स्वरूप थुगु माणेया पिने वज्रसत्त्व, पद्मसंभव, अपरिमिता एवं अवलोकितेश्वर (षडक्षरी लोकेश्वर) यागु प्रस्तर मूर्ति प्रतिष्ठा याना तइतःगु नं दु । खतु थन दुने अंगलय् छचालं अनेक गुरु बुद्ध बोधिसत्त्व आर्यतारा एवं धर्मपाल गणपिनिगु सुन्दर चित्र च्वयाः सुशोभित यानाः तइतःगु दु ।

पूर्वपाखेया अंगलय् च्वयातःगु

वज्रसत्त्व, अक्षोभ्य, भैषज्यराज तथागत, पाल्देनह्लामो (छ्वास्कामिनी) गोम्पोलेदेङ्ग ।

दक्षिणपाखेया अंगल्य चवयातःगु

शाक्यमुनि बुद्ध, शालिपुत्र, मौद्गल्यायन, गुरु पद्मसंभव, ह्येसे छोग्याल्, खान्दोछोग्याल्, ह्लिमाह्वेसेर, शाक्यसिङ्गे, दोर्जेधोले, सिङ्गे धादो, ग्याल्वा लोङ्छेन्वा, द्विजोम्रिम्पोछे, शाक्याघोमो, घेवारिम्पोछे (दलाई लामा) ग्याल्वाकर्मापा ।

पश्चिमपाखेया अंगल्य चवयातःगु

अमिताभ तथागत, अवलोकितेश्वर, वज्रपाणि, पूजादेवीपि तथा अष्टबोधिसत्व- मञ्जुश्री, क्षितिगर्भ, गगनगञ्ज, अवलोकितेश्वर, वज्रपाणि, मैत्रेय, समन्तभद्र, सर्वनिवरणविष्कम्भि, शाक्या-पण्डित, जेचुन्चोङ्खापा, धाक्णल्लाजे ।

उत्तरपाखेया अंगल्य चवयातःगु

अपरिमिता तथागत, उष्णीषविजय, सप्तलोचनीतारा, सहस्रभुजलोकेश्वर, मञ्जुश्री, वज्रपाणि, महापाल्मोघेलोङ्मा (श्रोकान्ताभिक्षुणी), धावाग्याछेन् ।

थुगु माणधुङ्गयुर गुम्बा वि.सं. २०३२ आश्विन १६ गतेखुनु वन तथा जल विद्युत् राज्यमन्त्री श्रीगुञ्जेश्वरीप्रसादसिंहजुं शिलान्यास यानादिल । थ्व गुम्बा करीब स्वंगू लाख खर्च तयार जुइगु हिसाबं दय्कूगु जुल । थ्व शिलान्यास जूगु उपलक्ष्य लामा कुस्योग्छेचुजुं षडक्षरी मन्त्रयागु महत्व वारय् न्वँवानाविज्यात । लिस्सें थ्व माणेया दानपति साम्तेन् लामाजुं धयादिइगु दु- थ्व माणे छह्वा व्यक्तियागु जक मजुसे विश्वकल्याणयागु लागी खः । थुगु गुम्बा २०३३ कार्तिकशुक्ल सप्तमीया दिनय् ऊयातां लामा साङ्ग्येदोर्जेजुं विधिवत् प्रतिष्ठा याकूगु जुल । थ्वय्कः दानपति खाम्बारेखे छ्योम्दो धइगु थासय् च्वंह्वा खः, थौकल्लय् ठमेलपाखे च्वनादिइगु दु । थुगु गुम्बाया भित्तीचित्र चवयादिइह्वा ल्लासाया फेन्थोजोम्पो चित्रकार जुल ।

प्रसंगवश षडक्षरी मन्त्रया विषयय् छत्वाःचा खँ न्ह्यथने- थुगु षडक्षरी मन्त्रया मुख्य अधिष्ठात्री देवता आर्यावलोकितेश्वरयात मानय् यानातल । वसपोल करुणामयं अचिन्त्य प्राणिपिनिगु लागी आशा इच्छा पूर्ण याय्तः चिन्तनानुसार वरदान बिइया निम्ति जवगु ल्लातं वरदान बियाच्चन, अथे हे खवगु ल्लातं भय त्राशं विह्वल जुयाः आशा भरोशा छुं मखनाच्चंपित सद्धर्मबोधिज्ञानया उपदेश स्वरूप अभयदान बियाच्चन । लिस्सें थ्व हे ल्लातं निर्मल पलेस्वां ज्वनाच्चंगु खनेदु । थुकिया मतलब खः- षड्भक्ति प्राणिपित दुर्गति थतकयाः उद्धार यानाः परमानन्दगु महासुख भुवन सुखावतीइ थ्यंक ब्वना-यंकिइगु गुरु अमिताभ तथागत दर्शन याःवनेनु छगू प्रकारया उच्च ध्वज विमान स्वरूप जुयाच्चंगु धकाः मानय् याना वइच्चन ।

थुगु प्रकारं वसपोलयागु शारीरिक लक्षणया अर्थ विशुद्धि विचाः यानाः स्वयम्बल्य ज्ञानमय, धर्ममय, गुणमय एवं करुणामय जुयाच्चंगु खना वइ । थुलि जक मखु वसपोलयागु विशुद्ध निर्मल हृदय कारुणिक चित्तयागु अभिलाषा एवं शुद्ध प्रणिधानयागु अधिष्ठान चर्या विचाः याना स्वत धाःसा नं अपार करुणासागर, अनुपम शान्ति, अचिन्त्य चरित्रया अवतार रूप्य मान्य यानाः असंख्य पूजादि सत्कार यानावइच्चंगु खँ सूत्र तन्त्रय् उल्लेख जुयाच्चंगु दु ।

थ्वसपोलयागु सत्यसिद्धि प्रणिधानपाखे अधिष्ठान यानातइतःगु वसपोलयागु आत्मीय सन्देश मूलमन्त्र 'ॐ मणिपद्मे हूँ' धकाः वर्णन यानातल । थ्व छगू प्राणिमात्रयात सम्बोधि मार्ग्य स्थापना याय्गु शान्ति सुख प्राप्त याय्गु वसपोल आर्यावलोकितेश्वर दर्शन प्राप्त जुइगु सकल बुद्धिपिनिगु अमृत वचनया सार स्वरूप जुयाच्चंगु एवं अशान्ति विश्वयात शान्ति ह्यगु अमोघ साधन स्वरूप सिद्ध जुयाच्चंगु षडक्षरी महाविद्याया नां जुयाच्चंगु थ्व महायान जगतया विश्वसनीय महामन्त्र खः ।

उर्कि थुगु मन्त्रया विषयय् कयाः गुणकारण्डव्यूह महायान सूत्रय् थथे प्रशंसा याना वइच्चन :-

यो मुदा श्रद्धया नित्यं जपेदिमां षडक्षरीं ।
सम्बोधि साधनीं विद्यां भद्रश्रीसद्गुणाकरीं ॥
सोऽचिन्त्य श्रीमहाभिज्ञः सर्वपारमिता प्रभुः ।
सर्वाच्च धारणीसर्वान्समाधिश्च लभेदपि ॥
सर्वविद्याधिपशास्ता सर्वधर्माधिपः प्रभुः ।
अर्हन्मार विजेता च भवेत्सर्व हितार्थभृत् ॥

गुह्ये सिनं थुगु षडक्षरी मन्त्र शुद्ध चित्तं ह्लित्यं जाप याइ निश्चय नं उह्ये सित सम्बोधि साधन याय्फइगु विद्या लाभ जुइ, कल्याणगु श्रीसद्गुणया यश कीर्ति प्राप्त जुइ । चिन्तनापाखे अगोचरगु अनुपमगु महाभिज्ञ प्राप्त जुइ, थुगु मन्त्र सम्पूर्ण पारमिताया नं स्वामि जुयाच्चंगु सकल धारणी समाधि सुख लाभ जुइगु । समस्त शास्त्र विद्याया नं गुरु एवं सम्पूर्ण धर्मया नं अधिपति जुयाच्चंगु असंख्य पार बिघ्नयात विजय प्राप्त याय् फइगु, सकलयात हित सुख याय्गु समर्थवान् जुयाच्चंगु इत्यादि गुणं संयुक्त जुयाच्चंगु धयातल ।

ॐ मणिपद्मे हूँ—थुगु खुगः आखःयात प्यंगू पदय् विभक्त यानातःगु दु । थुकिइ थःथःगु अलग अलग महत्वपूर्णगु रहस्यमय अर्थ सुलाच्चंगु दु ।

ॐ — अत्यन्त विशुद्धगु सर्वगुण सम्पन्नगु अ + उ + म् = त्रिअक्षर संयुक्त जुयाः सिद्ध जुयाच्चंगु 'ॐ' धइगु आखल्य त्रिरत्नालोक पुण्य कीर्ति सम्पूर्ण त्रितत्त्व मिल्य जुयाच्चंगु धइगु संकेत खः ।

मणि — वसपोल करुणामययागु प्राण समान जुयाच्चंगु अनन्तोपकारी सर्वदर्शी अन्तर्यामी गुह्ये सित गुगु आवश्यक जुल उह्ये सित उगु तक प्राप्त जुइगु त्रिकाल बुद्धिपिसं आश्रय यानाच्चंगु महामणि—चिन्तामणि—अनुत्तर बोधिरत्न धइगु संज्ञा बियातल ।

पद्म - थुजाःगु अनुत्तर महारत्नयात थःगु श्रद्धा निश्चय रूपी चित्तया पलेस्वानय् सर्वत्र सर्वदाकालं सुशोभितपूर्वक तयातय् योग्यगु उच्चकोटि समादरणीय स्थान थ्व हे योग रूपी पलेस्वांया द्योने स्वागतपूर्वक तइतःगु जुल ।

हूँ - वसपोल आर्यावलोकितेश्वरया चित्त स्वरूप न्ह्याग्गु मन्त्र सिद्धि याय् कारणय् नं प्राणहंसया रूपय् अधिष्ठान याना तइतःगु दु । थुकिइ विभिन्न दृष्टिकोणं रहस्यपूर्ण अर्थ दु ।

थुलि जक मखु बोधिचित्त महाकरुणा धारणा यानाः षड्भूति प्राणिपि उद्धार याय् निम्ति संसार निर्वाण फरक मदुगु ज्ञानय् च्वनाः उपाय कुशलपाखें वसपोल आर्यावलोकितेश्वरया शिक्षा-दीक्षा प्राप्त याइह्य कुलपुत्र अथवा कुलपुत्रीपिसं निश्चय नं साधन याय्माः धकाः कनातल । थुगु साधन क्रमय् षडक्षरी मन्त्रया छगः छगः आखःयात निम्न प्रकारं भावना यानाः अभ्यास यायां वनेगु खँ कनातल—

ॐकार - वीजाक्षरपाखें वीणा ज्वनाच्चंहा तुयूहा करुणामय जुयाः देवलोक उद्धार याःवन । अन सिइ ह्यन्हु न्ह्योयागु तःधंगु दुःख फुकेगु खँ कनाः समताज्ञान प्राप्त याकाः तरय् यानाविज्यात ।

मकार - वीजाक्षरपाखें खड्ग धाल ज्वनाच्चंहा वाउँहा करुणामय जुयाः दैत्यलोक उद्धार याःवंगु जुल । अन परस्परय् प्रहार याइगु दुःख फुकेगु उपदेश बियाः कृत्यानुष्ठान ज्ञान प्राप्त याकाः मुक्त यानाविज्यात ।

णिकार - वीजाक्षरपाखें शिलाङ्कुश पिण्डपात्र ज्वनाच्चंहा ह्यासुहा करुणामय जुयाः मनुष्यलोक उद्धार याःवन । अन यो मयोया कारणं तन्ता अलमलय् भुलय् जुयाः लिमलानाच्चंगु दुःख फुकेगु खँ कनाःलि सुविशुद्ध ज्ञान प्राप्त याकाः महामोक्ष छवयाविज्यात ।

पकार - वीजाक्षरपाखें प्रज्ञा पुस्तक ज्वनाच्चंहा वँचुहा करुणामय जुयाः तिर्यकयोनि उद्धार याःवन । अन अज्ञानं त्वपुयाः खँह्लाय् मसःगु दुःख फुकेगु खँ कनाः धर्मधातु ज्ञान प्राप्त याकाः तरय् यानाविज्यात ।

च्चेकार - वीजाक्षरपाखें चिन्तामणि रत्न ज्वनाच्चंहा ह्याउँहा करुणामय जुयाः प्रेतलोक उद्धार याःवन । अन प्यास पित्याःगु तःधंगु दुःख फुकेगु उपाय कनाः प्रत्यवेक्षणा ज्ञान प्राप्त याकाः उद्धार यानाविज्यात ।

हूँकार - वीजाक्षरपाखें कलश व अग्निज्वाला ज्वनाच्चंहा कुँया वर्णहा करुणामय जुयाः नरकलोक उद्धार यात । अन सहः यानां सहःयाय् मफुगु क्वाःगु खाउँगु तच्चोगु दुःख शान्त जुइगु सद्धर्मोपदेश बियाः आदर्श ज्ञान प्राप्त याकाः तरय् यानाविज्यात ।

थुजाःगु सर्वगुण सम्पन्नगु षडक्षरी महामन्त्र नियमानुसार श्रद्धा निश्चयपूर्वक चित्त परिशुद्ध यानाः वसपोल महाकारुणिक आर्यावलोकितेश्वर ध्यान यानाः बोधिचित्त उत्पत्ति यानाः सच्छिकः जक जाप यासां काय वाक् चित्तयागु पाप नाश जुयावनी । द्वःछिकः तक जाप यात धाःसा कर्तव्य भ्रष्ट जूगु पापकर्म परिशान्त जुइ । छगू लाख जाप यात धाःसा सुमेरु पर्वत समानगु पाप जूसां परिशुद्ध जुइ । फ़िगू लाख जाप याःह्य भक्तजन गुबले नारकीय दुःख भोग याय् माली मखु । यदि फ़िगू करोड

तक जाप यानावन धाःसा निसन्देह सम्बोधि ज्ञान प्राप्त जुयाः अविवर्त्तिक बोधिसत्व जुइ धकाः वर्णन यानातल ।

उपर्युक्त वर्णित अनुसार अपरिमित पुण्यफल प्राप्त जुइ धइगु आशा भरोशा यानाः श्रद्धालु धर्मात्मापिसं थुगु षडक्षरी महामन्त्र 'ॐ मणिपद्मे हूँ' बेला बखतय् थासंथासय् धारणा याय्गु याकेगु व कपिसं याःगु खंसा नं अनुमोदन याय्गु आदि विस्तारपूर्वक थुकियागु सुकीर्तिमय प्रकाश समस्त महायान बौद्धजगतय् प्रतिष्ठा प्राप्त जुयाच्चंगु जुल । अज्ज थुलि जक मखु लामा गुरुपिनिगु सत्संगतं यानाः एशिया, यूरोप, इङ्गलाय्ण्ड आदि अन्तरराष्ट्र जगतय् थ्यंक नं थुगु मन्त्रया प्रभाव फैलय् जुजुं वनाच्चंगु दु ।

जितः विश्वास दु—थुगु मन्त्रया विषयय् महानुभावपिसं ध्यान तयाः अनुसन्धान याना स्वत धाःसा गुलि नं वाह्य गुह्य अभ्यन्तरया देवदेवीपि मन्त्रत सृष्टि जुयाच्चन उलि मध्यय्सं थ्व हे 'ॐ मणिपद्मे हूँ' मन्त्र हे सर्वाधिक प्रचार प्रसार जुयाच्चंगु खने दय्फु ।

छगू उदाहरणया लागी धाय्—'ॐ मणिपद्मे हूँ' या प्रसङ्ग रूपय् अनेक प्रकारया सलंसः अवतारी गुरुपि बिज्यानाच्चन । द्वलंद्वः विहार गुम्बात निर्माण जुल । लखंलख विभिन्न धातुया माणेत स्थापना जुल । अथे हे आर्याविलोकितेश्वर षडक्षरी सम्बन्धी विभिन्न मूर्ति व सद्धर्म ग्रन्थत उलि थुलि मदय्क दय्का वइच्चन । लिस्से कोटान्कोटि जाप याइपि अनुयायीत दइच्चन । अरबंअरब थुगु मन्त्र—त्वहं, सिं, सिजःपाता, वहःपाता, लुंपाता आदिस अङ्कित यानावन । गनं गनं धयातःगु दु—पर्वतय्, लखय् व आकाशय् दुने तक नं वज्रलेख समानं सुरक्षित याना तइतल । थ्व हे मन्त्र उत्तरी भेग तिब्बत प्रदेशया पहाड पर्वत, गांगामय्, गुफा, गुम्बा तथा लैय् लैय् तक नं श्रद्धा तयाः माणे हिइकेगु व जाप याय्गु यानावइच्चंगु क्हीसं खनाच्चना । विभिन्न पर्व उत्सवकालय् विभिन्न थासय् च्वनाः वसपोल आर्याविलोकितेश्वरयागु सुदृष्टि वरदान प्राप्त जुइमा धइगु प्रवल इच्छा यानाः वसपोल करुणामययागु न्ह्योने च्वनाः प्रज्ञा, मुद्रा, मण्डल, व्याकरण, अभिषेक, मन्त्र न्यास ध्यान साधन सिद्धि पुरश्चरण निम्ति पूजा, पाठ, स्तोत्र, प्रणिधान आदि भक्तिपूर्वक यानावइच्चंगु जुल ।

ॐ मणिपद्मे हूँ ! ॐ मणिपद्मे हूँ !! ॐ मणिपद्मे हूँ !!!

[८] विशाल अक्षोभ्य बुद्धमूर्ति

स्वयम्भू जंगलया न्ह्योनेपाखे च्वंगु नवनिर्मित प्रवेश द्वारं दुहांवनेवं ह्यापालाक खने दय्कः वइह्य पूर्वाभिमुख श्री अक्षोभ्य तथागत शान्त गम्भीरपूर्वक च्वनाच्चंगु दु । थ्व विशाल बुद्धमूर्ति जुजु लक्ष्मी-नरसिंह, कवीन्द्र प्रताप मल्लया शासनकालय् ने. सं. ७५७ साल श्रीपञ्चमीखुनु जमलेश्वरस्थान केलत्वाःया रथन भारो धइह्यस्यां स्थापना यानाथकूगु जुल ।

थुजाःपि प्रस्तरमय विशाल बुद्धमूर्ति थ्व स्वयम्भू जंगलय् वज्रासन यासे शान्त गम्भीरपूर्वक



त्रि विशाल बुध्दमूर्ति, स्वयम्भू जंगल

चवनाच्वंगु खुगू मूर्ति खनेदु । खजा थुलि हे विशालगु मेगु छगू मूर्ति शान्तिपुरया न्ह्योनेपाखे नं छह्य प्रतिष्ठापित यानातःगु दु । थुपि ल्ह्यह्य तःधिकःपि बुद्धमूर्ति स्वयम्भू महाचैत्य दर्शनार्थ युगयुगय विज्याःपि सप्त तथागत (विपश्ची, शिखी, विश्वभू, क्रकुच्छन्द, कनकमुनि, काश्यप व शाक्यमुनि) पिनिगु प्रतिनिधिकथं अर्थात् स्वयम्भू पुराणयागु इतिहास संस्मरण निम्ति श्रीस्वयम्भू जंगल शोभा वृद्धि अर्थय् कीगु न्ह्योने प्रदर्शित यानातःगु जुल । थ्व स्वयम्भू जंगलय् च्वंपि सप्त विशाल बुद्धमूर्ति मध्यय् थुगु बुद्धमूर्ति दकलय् सकलय् ह्यापालाक स्थापना यानातःगु खनेदु । थ्वयां ल्यु शान्तिपुरया न्ह्योनेच्वंगु जुल । अनंलि न्याह्य बुद्धमूर्ति जक शाहकालपाखे निर्माण जूगु जुल । थुपि न्याह्य बुद्धमूर्तिया दानपति व साल मिति थथे खः—

केहरमान रंजितकार	मञ्जुश्रीत्वाः	ने. सं. १०१४
भवानीदास		ने. सं. १०१२
		ने. सं. १००४
बेखानारां महर्जन	दुगंबही	ने. सं. १०२५

[६] प्यकुंलाःगु गालय् मण्डल

थ्व थाय् स्वयम्भू जंगलय् दुहांवनेवं ह्यापालाक खनेदय्कः वइह्य अक्षोभ्य तथागतया सन्मुखय्-संतुं च्वंगु मण्डपाः खः । थुगु मण्डलया पूर्वपाखे बाहेक स्वख्यरसं चिकिचा जाःगु पःखालं चाःहुइकाः सुरक्षित यानातःगु दु ।

थ्व मण्डलया विषयय् विभिन्न धारणा खनेदु—गुलिसिनं मनूत परलोक जुइबलय् वनिइगु यमद्वार धकाः नं धाल । गुलिसिनं धयाच्वन—स्वयम्भूइ च्वंह्य स्यंगुमि छह्यसिया निःसन्तान जुयाः सन्तान प्राप्ति निम्ति अनेक धर्म कर्म यानाः साङ्गि जूगु उपलक्षय् सायात छ्व नकेगु थाय्या रूपय् मण्डल दय्कातःगु । थौतक थ्व थासय् दच्छिया छकः भाद्र १ गतेखुनु सातय्गु जमाथ मुंकाः थ्व थासय् तथाः सायात छ्व नकावइच्वन । थुकिया लागी श्री ५ या सरकार गुठी संस्थानं थुगु गुठीयात प्यमुरि छ्व बियावयाच्वन तिनि । गुलिसिनं थथे नं तर्क याःगु दु—श्रीस्वयम्भू महाचैत्य विराजमान जुयाच्वंगु साह्येगु पर्वतयात गुबले गावशृङ्ग—गोशृङ्ग एवं गोपुच्छ पर्वत सायागु नामं प्रसिद्धगुलि सायागु महत्व बियाः सायात छ्व नकेगु यानावइच्वंगु खः ।

मेगु अर्थय् थथे नं धाःगु दु—स्वयम्भू जंगलया पिने पिने प्यख्यरसं चतुर्महाराजया प्रतिनिधिकथं प्यपाः मण्डपाः तइतःगु दु । थुगु मण्डपाः पूर्वया अधिपति धृतराष्ट्र महाराजया संस्मरण रूपय् मानय् यानातःगु खः ।

खतु थथे सुं छह्य द्योया न्ह्योने मण्डपाः दय्का तय्गु चलन नेपाःया थःगु संस्कृति परम्परानुसार प्राचीनकालनिसें चलय् जुया वयाच्वंगु खनेदु । तदनुसार थुगु मण्डपाःया न्ह्योने च्वंह्य विशाल अक्षोभ्य

तथागत प्रतिष्ठा याःवल्य् छुं महान् धार्मिक क्रिया जुयावंगु पवित्र भूमिया रूप्य आदर सत्कार याना-
तइतःगु स्थान जुइ । हानं थ्व हे बुद्धमूर्ति स्थापना जूगु संस्मरणार्थं बुसाधं गुठीखुनु पूजा आज्ञा जज्ञ
आदि याइगु छगू स्वागत मण्डप नं जुइगु सम्भव दु ।

[१०] गणेश व कुमार

थुगु मूर्ति स्वयम्भू धर्मधातु वज्रधातु दर्शन याःवनेगु ३१८ त्वाथः दइच्चंगु मूलगु त्वाथलं
थहांवनेवल्य् लँया विचय्संतुं जःखः तइतःगु गणेश व कुमारया मूर्ति खः । मण्डल पदासनय् थःगु हे
पोजय् गणेश च्वनाच्चंगु दु, उखे कुमार जक ह्याय्खा गयाः आनन्दपूर्वक च्वंच्वन । खास यानाः थ्व
मूर्ति तयातःगुया भतलव थ्व खः— स्वयम्भू जंगलयात हे धर्मधातु मण्डल स्वरूप मानय् यानातःगु
जूया निम्ति उगु धर्मधातु चैत्यया पिने त्वाथल्य् च्वंच्वंपि ब्रह्मादि देवदेवतापिनि गणचक्रय् लानाच्चंपि
कार्तिकेय कुमार व गणपति गणेश जुल । थुपि पिनेपाखे वइगु अनेक प्रकारया मार बिघ्न रूपी
आक्रमण रोकय् याय्त द्वारपाल रूप्य तयातःगु जुल ।

थ्व कुमारयागु वर्षवन्धन याय्गु विषयय् कयाः ने. सं. ८०६ सालं शान्तिगलया कुसुमसिं भारोनं
गुठी तयाथकूगु शिलाभिलेख नं थन हे संतुं दनि ।

[११] आजु अजि (भैरव भैरवी)

गणेश कुमारया लिकसं श्रुतीचा च्वय् न्ह्योनेपाखे शक्ति सहित शून्य भैरव स्थापना यानातःगु
जुल । थुगु मूर्ति शान्तिकराचार्य स्वयम्भू संरक्षण निम्ति दुष्टगणपित संत्राश विइया लागी प्रहरी रूप्य
थ्व स्यंगुगःया दुने थाय्थासय् यानाः खुहा प्रसिद्ध भैरव स्थापना यानाथकूगु दु । उकिइ मध्यय् थ्व पूर्व
मार्गान्तरया क्वय्पाखे तयातःह्य खः । थन शक्ति सहितह्य शून्यभैरव धकाः खास मूर्ति खनेमदु— भैरव
जक गोलाकारगु त्वहं थे जुयाच्चन, थ्वया स्त्री जक छगू त्वहंया खम्वा थे यानाः थनातःगु दु ।
थ्व स्वयम्भू जंगल संरक्षण निम्ति गुप्तचर रूप्य च्वंच्वंपि जूया निम्ति थुमिगु रूप अप्रत्यक्ष रूपं उकिइ
दुने सुलाच्चंगु दु धाइ । यदि कालान्तरय् आवश्यक जुल धाःसा भ्वाथःग्वाराया ख्याः जुया पिहांवइ थे
थुगु ग्वारागु त्वहंतं भैरव स्वरूप जुयाः पिहां वइ धयातःगु जुल । उकि थुमिगु रूपं प्रत्यक्ष रूपं
क्यनामतःगु धाइ । गुवले गुवले स्वयम्भूस ततःधंगु धार्मिक क्रिया सम्यक्, नरां, पञ्चायन, सखापा
आदि जुइबलय् थुगु त्वहंतय् चित्रकारं मिखा ह्याय् म्हुतु च्वया थकिइगु जक चलन दु । थुमित स्थानीय
जनतापिसं आजु अजि धकाः सम्बोधन यानावइच्चन । थुकियागु पृष्ठभूमिइ थःगु हे रहस्यमय
कथा दु ।

थुगु स्वयम्भू जंगलय् च्वंप्पि शान्तिकर गुरुं स्थापना यानाथकूपिनिगु नां थथे खः—

- (१) शान्तिपुरया दक्षिणय् आलि स्वरूपह्य भयानक पृथ्वी भैरव च्वंच्वन ।
- (२) स्वयम्भूया पूर्वपाखे अन असितांग (अप भैरव) दु । थन उच्छिष्टवली विइगु कल वाइगु थाय् ।
- (३) स्वयम्भू पर्वतया क्वय् पूर्वपाखे तेजसा (पाताल) भैरव च्वंच्वन ।
- (४) स्वयम्भू पर्वतया क्वय् वनय् नैऋत्य कुनय् वायु भैरव च्वंच्वन ।
- (५) स्वयम्भूया पश्चिमपाखे आकाश (स्फोटाख्य) भैरव तयातल ।
- (६) स्वयम्भू जंगलया पूर्व मार्गान्तरया क्वय्पाखे शक्ति सहितह्य शून्य भैरव स्थापना यानातल ।

थुपि खुह्य भैरवयागु विषयय् थथे उल्लेख याना तल' :-

ततोऽपि षष्ठमं किञ्चित् पूर्वमार्गेऽध उपरौ ।
 शून्य भैरवं सुशक्तिं च वनेऽपि स्थापितं गुरुः ॥
 ये च या वा मनुष्याश्च भैरवं विधि पूजितम् ।
 तस्मात् भैरव प्रसादाश्च षड्भक्तिश्च न लभ्यते ॥

गुह्य मनुष्यं श्व शक्ति सहितह्य शून्य भैरव सहित खुह्येसित नं विधिपूर्वक पूजा याइ, उह्य व्यक्ति षड्भक्तिइ जन्म काःवने माली मखु धयातल ।

[१२] चतुर्महाराज

श्व चतुर्महाराजया प्रस्तर मूर्ति स्वयम्भू तैनय् थहांवनेबलय् गणेश कुमार थासं पुलावनेवं विभिन्न चीबाहाःतय्गु श्रेणी गुरु जुइवं ठिक उगु थासय् चैत्यया न्ह्योनेसं ऊवःलाक तइतःगु दु । थुपि चतुर्महाराजपि खास यानाः चतुर्दिशाया अधिपतिया रूपय् मानय् यानातःगु खः । थुपि बौद्ध दृष्टिकोणं बुद्धशासन सेवा निम्ति अर्थात् बुद्धशासनय् च्वंच्वंप्पिनिगु आरक्षाया लागी पाला प्रहरीया रूपय् च्वंच्वंप्पि धाइ । श्व हे कारणं विहार विहारय् गुम्बा गुम्बाय् चतुर्महाराजया मूर्ति वा चित्र अंकित याय्गु याना-वइच्वन । थुगु थासय् नं व हे आदर्श अनुरूपं चतुर्महाराजया मूर्ति दय्काः मेघमाला आसन याकाः तइतःगु जुल । गुबलय् गन बुद्धधर्म सम्बन्धी उत्सव जुयाच्चंगु दु अन उबलय् आरक्षा निम्ति हेरविचार याय्गुकथं सुपाँचय् च्वनाः गगन विहार यानाः चाःचाःहुलाः अवलोकन याना जुइपि धयातल । उकि थुमिगु आसन अथवा वाहन सुपाँय्यात मानय् यानातःगु जुल ।

- (१) पूर्वया मालिक धृतराष्ट्र - वीणा ज्वनाच्चंहा वीणाराज ।
- (२) दक्षिणया मालिक विरुपाक्ष - खड्ग ज्वनाच्चंहा खड्गराज ।
- (३) पश्चिमया मालिक विरुद्धक - ध्वज ज्वनाच्चंहा ध्वजराज ।
- (४) उत्तरया मालिक वैश्रवण - चैत्य व नवःचा ज्वनाच्चंहा चैत्यराज ।

थुपि चतुर्महाराजपित नं शान्तिकर गुरुं थ्व हे स्वयम्भू जंगलयागु पिनेयागु चाकल्य चतुर्दिशाय चतुर्महाराजयागु प्रतिनिधित्व यानाः प्यखे छगू छगू मण्डल तयाथकूगु खनेदुः—

तत्पर्वते चतुर्दिक्षु वनस्य बाह्य सन्निभे ।
 चत्वारोऽपि मण्डलञ्च शान्तिकर प्रस्थापितम् ॥
 मारादि विघ्नदुष्टाञ्च शीघ्रं नाशाय स्थापितम् ।
 चत्वारो राज भावेन मण्डलं स्थापितं गुरुः ॥

- (१) स्वयम्भू जंगलया विशाल अक्षोभ्य बुद्धया न्ह्योनेच्वंगु पूर्व मण्डलयात धृतराष्ट्रया रूप्य मानय यातातल ।
- (२) दक्षिणपाखे मञ्जुश्री थ्हांवनेगु लँया सिथय निगः चीवाहाः तइतःगु थासय लानाच्चंगु दक्षिण मण्डलयात विरुपाक्ष रूप्य मानय यातातल ।
- (३) पश्चिमपाखे इचंगु वनेगु निपु लँया बिचय छगू पुखू दु, पुखूया लिकच्वंगु चैत्यया सन्मुखय च्वंगु पश्चिम मण्डलयात विरुद्धक रूप्य मानय यातातल ।
- (४) उत्तरय आनन्द कुटीया क्वस्सं खाउँ बुंगापाखे छगू गुमज दय्का तःगुलिइ दुने लानाच्चंगु थ्व वैश्रवणया रूप्य भावना यातातल ।

[१३] सूर्यमुख गणेश, दक्षिणमुख गणेश

थ्व सूर्यमुख गणेश (सूर्यविनाय) स्वयम्भू जंगलं पूर्वपाखे जंगलया सिथय वर्तमान न्हू दय्कूगु ध्वाकाया खःपाखे माणे पःखाः पुलेवं खनेदुगु मूर्ति खः । थ्व गणेशया जःखः प्रस्तरमय सिंह तयाः शोभा वृद्धि यातातःगु दु । अथे हे दक्षिणमुख गणेश (क्वयिना गणेश) मञ्जुश्री दर्शन याःवनेगु त्वहंत्वाथः शुरु जुइवं न्ह्योनेसं वःचागःगु देगःचा खनेदइ, व हे देगःचाय् दुने थःगु पोजं च्वंच्वंगु दु । थ्व दक्षिणमुख गणेशयात पूजाभाव यात धाःसा थःगु बुँइ सयसाहास वस्तु (चौपाया) जन्तुपिसं दुःख बिइमखु धाइ ।

श्रीस्वयम्भू महाचैत्य



वासुकी (कालीनाग)

थ्व सूर्यमुख गणेश व दक्षिणमुख गणेशया वारय् थथे धयातःगु दु१- सूर्यमुख गणेश गुरु शान्तिकरं सर्वकर्म सिद्धिया लागी स्थापना यानाथकूगु अले दक्षिणमुख गणेश जक अनेक विघ्न हरण याय्गु उद्देश्यं स्थापना याःगु जुल ।

ततोऽपि च द्वौ गणेशौ अस्मि वने प्रस्थापितम् ।
 शान्तिकर सिद्धाचार्यः सर्वकर्म प्रसिद्धकान् ॥
 प्रथमं पूर्वमुखेन सूर्यमुखं गणेश्वरम् ।
 विधिभिश्च तस्मै पूज्य स्थापितञ्च शान्तिकरः ॥
 पश्चाद्वितीयं गणेशं दक्षिणाभिमुखमपि ।
 अनेक विघ्न नाशाय दक्षिणस्यां प्रस्थापितम् ॥

[१४] काली महानाग (वासुकी नागराज)

थ्व नागराजया मूर्ति स्वयम्भू जंगलया च्वय् च्वंगु स्वह्य तःधिकाःह्य बुद्धमूर्तिया लिउने पाखे धस्स्वाःगु तँया क्वस्सं वनेबलय् देपापाखे तयातःगु मूर्ति जुल ।

थुगु काली नागराजया मूर्ति छपाः ख्वाः निपा ह्लाः सुविनीतपूर्वक प्रार्थना यानाच्चंगु, लिस्सें नागपाशया द्योने उत्कुटुक आसन यानाच्चंगु दु । थ्वया लिक छगू हे नागपाशय् मेह्य छह्य नागराज नं दु, थ्व खः कुलिक नागराजया रूपय् मानय् यानातःगु ।

खतु थ्व काली नागराजयात वासुकी नागराज नं धाइ । कालीनाग धाःगुया मतलब थ्व खः- थ्व नेपागाः कालीहृद जुयाच्चंबलय् उगु सम्पूर्ण लः दुकुसे वँचुसे च्वंच्वंगु ऊन जुया च्वंगुलि यानाः कालीञ्जल धयातःगु जुल । व हे कालीञ्जल लः भरय् जूगु दहः जूया निम्ति कालीहृद धया वइच्वन । थ्व हे कालीहृदय् बास यानाच्चंह्य मुख्यह्य नागराजयात वासुकी धाइगु जुयाच्च्वन, उकिं थ्व हे कारणं नेपाः वासुकी क्षेत्र धकाः प्रसिद्ध जुयाच्चंगु जुल ।

स्वयम्भू ज्योतिरूप दर्शनार्थ महाचीनंनिसें विज्याःह्य गुरु मञ्जुश्रीनं देव मनुष्यपिनिगु हित निम्ति थःगु चन्द्रहास खड्गं थुगु कालीहृदया लः छ्वनाः अनेक दुष्कर पर्वत विस्फोट याःगु खनाःलि वासुकी कालीनाग अत्यन्त त्रात्रि त्राहि जुयाः थःगु नाग परिवार रक्षा निम्ति वसपोल जगदीश्वर श्रीस्वयम्भू ज्योतिरूपयाके भक्तिपूर्वक प्रार्थना यानाच्चंगु भाव अभिव्यक्त यानाच्चंगु जुल । थ्व हे खँयागु आशय थुइकाः गुरु मञ्जुश्रीनं वासुकीयात शान्तवना बियाः बोध यानाः थन हे बासं बियाः धर्मधातु मण्डल स्वरूप थुगु स्वयम्भू पर्वतयागु रक्षा निम्ति थन अधिष्ठान यानाथकूगु धाइ । खतु थ्व वासुकी नाप कुलिक नागराजयागु मूर्ति नं समावेश यानाः क्यनाः तइतःगु दु । थ्व नं छगू युक्ति संगत घटना नाप मिलय् यानातःगु खनेदु- गुरु मञ्जुश्री कालीहृदया लः छ्वनाः देस दय्के धुँसेलि मञ्जुश्री

महाचीनयसंतुं लिहांविज्यात धइगु समाचार सिइकाः गुलिखय् लिपा हानं थःगु दलबल सहित जुयाः कुलिक नागराजं थः वन्धुबान्धवपि मुंकाः जलथल याय्त कोशिश यात । उबलय् समन्तभद्र बोधिसत्व विज्यानाः नेपाःदे रक्षा निम्ति कुलिक नागराजयात दमन यानाव्यूगु खँ कीलेश्वर वीतराग उत्पत्ति कथास उल्लेख जूगु दु । थ्व हे कारणं कुलिक नागराजयात नं वासुकी नागराज नापं तयात गु जुल ।

थ्व हे घटनाक्रमयात लुमंकाः गुरु शान्तिकरं कालीनागयात थन स्थापना यानाथकूगु धाइ^१ :-

ततस्तत् एकनागं कालीनागं च स्थापितम् ।
तत्पर्वते पूर्वमार्गे मध्ये वै उत्तराननम् ॥
ये च या वा मनुष्याश्च नेपाले च नवृष्टिके ।
तस्मै नागाय संपूज्य वृष्टिपूर्णं भविष्यति ॥

[१५] पञ्चबुद्धया वाहन (सिंह, गज, अश्व, मयूर, गरुड)

स्वयम्भू पञ्चबुद्ध वैरोचन, अक्षोभ्य, रत्नसम्भव, अमिताभ, व अमोघसिद्धिया थःथःगु वाहन— सिंह, किसि, सल, ह्याय्खा तथा गरुड खः । थुपि न्याह्मं स्यंगुया पूर्वमार्गया वातनं च्वनिसें थःथःगु पोजं स्फूर्ति नक्सां च्वंच्वंगु दु । पञ्चबुद्धपि गनं गुथाय् सवारी जुइमाल धाःसा वसपोलपिनिगु सेवाया लागि उख्येंथुख्यें गनं मवसे स्थिरं च्वंच्वंगु दु । गथे जुजुया राज्याभिषेक उत्सव सिन्दुर जात्रा जुइबलय् किसिया छ्यँनय् सुवर्ण कलश दयाः श्रीशोभा वृद्धि जुयाच्चनी, अथे हे थुपि न्याह्मसिके नं पञ्चबुद्धया चिह्न स्वरूप सिंहया छ्यँनय् चक्र, किसियाके वज्र, सलयाके रत्न, ह्याय्खायाके पद्म एवं गरुडयाके विश्ववज्र अंकित जुयाच्चनिइगु जुल । गुबलें गुबलें थुपि न्याह्मं थ्व हे स्वयम्भू जंगलय् आनन्दपूर्वक वन विहार यानाः विचरण यानाच्चंगु खनी । स्वयम्भूयागु सेवा भक्तिया लागि न्ह्यावलें अजरामरण थें तत्पर जुयाः न्ह्योने उपस्थित जुयाच्चंगु धयातल ।

थुपि न्याह्मसिगु स्वभाव गुणया विषयय् थथे चर्चा यानावइच्चंगु दु—

- (१) सिंह — धर्मशंख महानाद स्वरूपं सर्वधर्म शून्यतायागु उच्चघोष यानाः निर्भीक स्वरूपं च्वंच्वंह्य ।
- (२) किसि — शान्त गम्भीर पूर्वेष्ठ पृथ्वी समानं शान्तिगुण बल धारण यानाच्चंह्य ।
- (३) सल — छगू क्षणलव मुहूर्त त्रिसाहस्र लोकधातु भ्रमण याय्गु ऋद्धिपाद दुह्य ।
- (४) ह्याय्खा — सम्पूर्ण विषयात शोधन यानाः अमृतगुणयागु शोभा रूपी पंखा फिजय् यानाच्चंह्य ।
- (५) गरुड — त्याग व वीर्य रूपी पपू संकाः धर्मप्रति भावपाखें सर्वत्र थासय् थ्यंकेगु साहस यानाच्चंह्य ।

[१६] योगाम्बर, गुह्येश्वरी

थुगु स्थान स्वयम्भू धर्मधातुया क्वस्सं च्वंगु क्वतलय् छगु ग्वाखंचा थे यानाः तइतःगु दु । थन दुने योगाम्बर गुह्येश्वरी (ज्ञान डाकिनी) यागु भावना यानातःगु स्थान जुल । थुकिइ मूर्ति खनेमदु । तर योगाम्बर गुह्यदेवतायात नेपाःया वज्रपानी सम्प्रदायपिसं देगुद्योया रूप्य मान्य यानावइच्चन । देगुद्यो धाय्वलय् अप्पोसिया पिने रूप मूर्ति क्यनेगु चलन मयाः । थ्व हे कारणं धयाथे थन नं योगाम्बरया मूर्ति क्यनामतःगु जुइफु । तन्त्रवज्रयान्य महासम्बर, चक्रसम्बर, हेवज्र, कालचक्र, गुह्यसमाज एवं योगाम्बरपनिगु मूर्ति विशेष यानाः अति गोप्य याय्गु परम्परा जुयाच्चंगु दु । थुगु थासय् योगाम्बरयागु मूर्ति आचार्य शान्तिकरं स्थापना यानाथकूगु मूर्तियागु अनुक्रमय् लानाच्चंगु खनेमदु । स्थानीय बुरापाकातय्गु धापू अनुसारं गुरु शान्तिकरया आगं धकाः मान्य यानातःगु ह्यसगीठ योगाम्बर ज्ञान डाकिनीपि आदिबुद्ध श्रीस्वयम्भू समागम याय् धकाः विज्याःवल्य थुगु थासय् थ्यंवल्य वसपोल स्वयम्भू भगवान् क्वहांविज्यानाः शिष्टाचार भेटघात यानाः नापलाना विज्याःगु धकाः श्रद्धा विश्वास यानावइच्चंगु स्थान जुल ।

[१७] धर्मपाल (सुशक्ति भैरव)

थुगु थाय् योगाम्बर गुह्येश्वरी धकाः मान्य यानातःगु स्थानपाखे भचा च्वय् ततलय् नं अथे हे छगु ह्वाकुं वनाच्चंगु प्वाः छप्वाः दु । थुकियात वसपोल श्रीस्वयम्भू धर्मधातुया शासन संरक्षण याइह्य अर्थात् वसपोलया क्वथामचात मध्यय् छह्य मान्य यानावइच्चंगु जुल ।

[१८] धर्मधातु वागीश्वर मण्डल

थ्व धर्मधातु मण्डल स्वयम्भूया न्ह्योनेच्चंगु ३१८ त्वाथः दइच्चंगु ताःहाकःगु त्वाथःया शिरोभागय् लानाच्चंगु दु । श्रीस्वयम्भू महाचैत्यय् सुप्रतिष्ठित अक्षोभ्य तथागतया सन्मुख्य तइतःगु प्रस्तरमय विशेष प्रकारया धर्मधातु खः । थुकिइ मेमेगु थासय् बहो विहारय् स्थापना यानातइतःगु धर्मधातु स्वयाः विशेषता खनेदु । मेमेगु धर्मधातुस नागःया क्वस्सं अप्पो थासय् अष्टकोणाकृति पाताय् अष्टबोधिसत्त्व तयातइ अथवा गनं गनं अष्टबोधिसत्त्वया प्रतीकात्मक अष्टमांगलिक चिह्न श्रीबच्छ, पुण्डरीक आदि अङ्कित यानातइ । तर थुकिइ अष्टकोणाकृति रूप्य मदय्कुसे गोलाकृति यानाः उकिइ छचालं तिब्बती ज्योतिष गणनानुसार फिनिगु महिनाया वर्षफलया रूप्य फिनिह्य हे जन्तुतय्गु मूर्ति प्रस्तुत यानातःगु खनेदु :—

(१)	मलः	सिल्ला	माघ
(२)	सर्प	चिल्ला	फाल्गुण
(३)	सल	चौला	चैत्र
(४)	फई	बछला	बैशाख
(५)	माकः	तछला	ज्येष्ठ
(६)	फ्रंगः	दिल्ला	आषाढ
(७)	खिचा	गुंला	श्रावण
(८)	फा	जंला	भाद्र
(९)	छुँ	कौला	आश्विन
(१०)	द्वहं	क्वय्ला	कार्तिक
(११)	धुँ	थिला	मार्ग
(१२)	खराचा	पोहेला	पौष

थुगु शान्त शुद्धगु धर्मधातु मण्डल्य थथे विभिन्न जन्तुत तयातःगु खनिइबल्य साधारण मनूतयत् छगू अद्भूत जुइफु । तर बांलाक विवेक दृष्टि बिचाः यानाः स्वत धाःसा युक्ति संगत थे नं जूवइ । धाय् कि थ्व संसार्य् सम्बृत्ति व परमार्थ निगू दु । वास्तव्य थ्व निगू नं तत्त्वदर्शीपिनिगु न्ह्योने निगुलि छगू जुयाच्चंगु खनेदइ—थ्व हे महासन्धिधातु धर्मधातुस निगू विभाजन यानाः क्यनातइतल— थ्व संसार्य् निगू क्षेत्र दु— सत्वक्षेत्र, जिनक्षेत्र । जिनक्षेत्र तथागतपि ज्ञानसत्व जूया निम्ति वसपोलपि सर्वत्र सर्वदाकालं परम अद्भूतगु श्रेयस्करगु दिव्यज्ञान प्रभाश्वर धर्मधातुस विश्राम यानाच्चनी । तर की सत्वक्षेत्र प्राणिपि सभयसत्व जूया निम्ति स्वाधिष्ठानपद प्रज्ञापारमिताया ज्ञान सत्संगत मदुगुलि कीपि न्ह्याबलें कर्मक्लेशया वश्य लानाः समयचक्र कालचक्रं हितुमतु हिइकातल, कालयागु अधिनपाखें छुट्य जुइमफयाः कल्पान्कल्पतकं कर्मक्लेश आदि नवग्रहया जञ्जालं मुक्त जुइमफयाः दुःखचक्र्य भुल्य जुयाच्चन ।

थुगु दुःखचक्रपाखें अलिप्त जुइत धर्मचक्र धर्मधातुस थ्यंकेतः अष्टविज्ञान (चक्षु विज्ञान, श्रोत्र विज्ञान, घ्राण विज्ञान, जिह्वा विज्ञान, काय विज्ञान, मनोविज्ञान, क्लेश विज्ञान एवं आलय विज्ञान) पाखें रहित जुइगु अर्थ्य थुकिइ अष्टबोधिसत्व तयातल । थुकिइ निगू तहः पलेहः तयाः क्यनातःगु दु । थ्वया मतलब थ्व खः कि वास्तव्य सम्पूर्ण भवदोषं छुट्य जुइगु कारण्य निगू तहः पलेस्वां तयाः क्यनातःगु जुल । क्वय्यागु पलेहः अष्टलोक धर्म (लाभ, अलाभ, सुख, दुःख यश, अपयश, निन्दा, प्रशंसा) तथा च्वय्यागु पलेहः अष्टौमायोपम (इन्द्रजाल, मरिचि, उदकचन्द्र, स्वप्न, प्रतिशुल्क, प्रतिभास, गन्धर्वनगर, प्रतिविम्ब) पाखें सर्वथा निर्मल जुयाः विशुद्ध जुइबल्य च्यागू हे धातु आकाशधातु, धर्मधातु, अचिन्त्यधातु, विरागधातु, निरोधधातु, प्रहाणधातु, सुविशुद्धधातु एवं महाज्ञान-

धातु (वज्रधातु) यात पूर्णरूपेण साक्षात्कार यानाः काइह्य जुइ । थुगु थासय् थ्यने धुंकूपि तत्त्वदर्शी योगीपिसं धर्मधातुयात थुगु किसिमं उद्गार व्यक्त यानातल^१ :-

न द्वय नाद्वयं शान्तं शिवं सर्वत्र संस्थितम् ।
 प्रत्यात्मवेदचह्यचलं प्रज्ञोपायमनाकुलम् ॥
 तदेव सर्वबुद्धानां आलय परमात्माद्भुतम् ।
 श्रेयः सम्पत्करं दिव्यं धर्मधातु प्रकीर्तितम् ॥

धर्मधातुमयं चैत्यं सर्वाकार स्वरूपिणम् ।
 आलय सर्वबुद्धानां धर्मधातुं नमाम्यहम् ॥

[१६] विशाल रूप सुवर्ण वज्र

स्वयम्भू महाचैत्यया अक्षोभ्य तथागतया सन्मुख्य च्वंगु धर्मधातु मण्डलया द्योने सुशोभितपूर्वक स्वागत सत्कार यानाः तइतःगु सुवर्णया वज्र खः । थुलि विशालगु सुवर्ण वज्र काठमाण्डू उपत्यकाय् गनं दइमखु धाःसां अत्युक्ति जुइमखु । थ्व वज्र खः कवीन्द्र जयप्रताप मल्लं प्रस्तरमय धर्मधातु मण्डलया उपरी भागय् ने. सं. ७८८ आषाढशुक्ल षष्ठीखुनु प्रतिष्ठा याःगु जुल । थुकिइ निष्पन्न योगावली, वज्रावली आदि ग्रन्थया प्रमाणकथं फिखुगू द्वार युक्त यानाः सुवर्णया धर्मधातु मण्डल नं तयातःगु दु । थुकिइ विद्वान् कवीन्द्र मल्लजुं निम्नलिखित वाह्य गुह्य अभ्यन्तरया देवदेवतापि अङ्कित यानाथकूगु खनेदु :-

- (१) श्रीधर्मधातु वागीश्वर
- (२) पञ्चबुद्ध
- (३) पञ्चतारा
- (४) षोडशबुद्ध
- (५) अष्टौष्णीष तथागत
- (६) चतुराकर्षण भैरव
- (७) द्वादश भूमिदेवता
- (८) द्वादश पारमितादेवी
- (९) द्वादश धारणी

- (१०) चतुःप्रतिसम्बिद्
- (११) चतुर्लश्यादेवी
- (१२) षोडश बोधिसत्त्व
- (१३) दशक्रोध भैरव
- (१४) अष्टपूजादेवी
- (१५) चतुष्कुलदेवता
- (१६) पञ्चवज्री
- (१७) आदित्येय विश्ववसु तुषितआभाश्वरगण
- (१८) अष्टनाग
- (१९) अष्टपर्वत
- (२०) अष्टयक्ष
- (२१) अष्टाविंशति नक्षत्र
- (२२) चतुराकर्षण आदि जम्मा २५२ ह्य देवदेवतापि दुथ्याकातःगु खनेदु ।

थुगु धर्मधातु मण्डलया दथुस अङ्कित यानातःगु वज्रया मतलब थथे खनेदु— सुं योगी वा तपस्वी, आचार्य, तत्त्वदर्शी सिद्धपुरुषपिसं धर्मधातुया ज्ञान प्राप्त जुइ धुं कूहासित निश्चय नं वइगु आत्मा धर्मकाय वज्रधर पदय् थ्यंहा जुइ धइगु अर्थ जुल । ज्योतिरूप श्रीस्वयम्भूस मतेमत सरय् जुइ थें छगू हे जुइहा जुइ धयातल । थ्व हे नेपाःयागु बुद्धधर्मय् उच्चकोटि दर्शनया आधार खः । थ्व हे कारणं पूर्वाचार्यपिसं थ्व सम्पूर्ण ज्ञानया दिव्य प्रतीक रूपय् 'वज्र' यात सर्वोपरी स्थान वियावइच्चंगु खनेदु । गुलि नं नेपालय् चलय् जुयावइच्चंगु तन्त्र वज्रयान सम्बन्धी विधि विधान कर्मकाण्ड अध्ययन व अनुसन्धान यानाः स्वतः धाःसा नं वज्रयागु स्थान अति प्रसिद्ध जुयाच्चंगु खनेदइ । प्रसंगवश उदाहरणया लागी छत्वाःचा खँ न्ह्यथनेगु युक्ति संगत जुइ :-

अप्रतिस्थितं यथाकाशं व्यापि लक्षण वर्जितम् ।
 इदं तत्परमं तत्त्वं वज्रज्ञानमनुत्तरम् ॥
 दृढसारमसौवीर्यं अच्छेद्याभेद लक्षणम् ।
 अदाहि अविनाशि च शून्यता वज्रमुच्यते ॥

वज्र धइगु वज्रयानया मुख्यगु चिह्न खः । थ्व वज्र शब्दया वास्तविक अर्थ विशुद्ध तत्त्व रहस्य प्रतिपादन याय्त ह्यापालाक वज्रयानया प्रसिद्ध आचार्य सिद्धनागार्जुन, अद्वयवज्र, वज्रशेखर आदि विद्वान्पिनिगु धापू अनुसार योगयोगिनीतन्त्र, तत्त्वसिद्धि ज्ञानतन्त्र, प्रज्ञोपायविनिश्चय सिद्धितन्त्र, वज्रच्छेदिका प्रज्ञापारमिता एवं वज्रभूमिया टीकाटिप्पणी स्वयमाः, अध्ययन याय्माः । उगु ग्रन्थय् वज्रया वाच्यार्थ अविनाशी अच्छेद्य, अभेद्य, दृढ, सार, गगन स्वभाव निरञ्जन निराकार आदि अनेक

गुणं संयुक्तगुणं शून्यता महाकरुणा प्रज्ञोपायात्मक अनुत्तरसिद्धिं सुरत महाचक्रवर्ती सहजमयसुखं सन्निहितगुणं धइगुणं सिद्धं जूवइ । श्व हे आदर्शयात अपनय यांनातःगु वज्रयानया परिभाषा नं व हे गुणज्ञानं युक्तगुणं परम विशुद्धगुणं दार्शनिक दृष्टिकोणं अतिकं च्वन्ह्याःगु धर्म धइगु खनेदःवइ ।

श्व हे धर्म दर्शनय अनुशरण याइपित तन्त्रयान, मन्त्रयान, सहजयान, कालचक्रयान एवं प्रज्ञायान, सिद्धियान, साधनयान आदि समावेश जुयाच्वंगु वज्रयानी बुद्धधर्म धाःवनी । श्व हे वज्रयान अन्तर्गत वीर सम्बर योगिनी आदि विभिन्न भयङ्कर एवं आश्चर्यजनक ज्ञानकाय मूर्तित कीगु न्ह्योने खनेदय्कःवइ । तर सम्बरोदयतन्त्र सम्पूटमहातन्त्र, कलवीरतन्त्रय धयातःगु अनुसारं छगू प्रकारं विपरीत सम्बर शिक्षा खः । बाह्य दृष्टि स्वयंवलय लोक व्यवहारनाप मिलय मज्जुगु अःखःगु ज्ञान थें च्वनेफु अर्थात् ऋद्धिपाद दुपि पुरुषार्थीपिनिगु लागी निषेध कार्य धइगु छुं मदु । गुगु विपरीत सम्बर शिक्षानुसार योगचर्याभूमि लाभ जुइबलय धर्मपारङ्गत जुइ धुंकूपिनिगु अनुभवसिद्ध ज्ञान प्राप्त यानाबी- गथे छगू उपमा काय, डाक्टरतय्सं चिरफार आदि प्रयोग याइगु ज्ञान अथवा विषयात शोधन यानाः अमृत याय्गु आयुर्वेदयागु ज्ञान नाप मिलय जूवनी धयाथें जुइ ।

वज्रयानयागु दर्शन व उपदेश एवं प्रक्रियानुसार काय वाक् चित्त शुद्ध जुइबलय परमार्थ तत्त्व संसार व निर्वाण निगूयात नं छगू हे तत्त्वज्ञानय महासन्धि महाधातुइ थ्यंकावी । लिस्सें प्रज्ञोपाय महाकरुणाद्वारा दुष्कर चर्या यानाः तपस्या याय् स्वाय्क स्वल्प प्रयत्नपाखें महासुख अनुत्तर तत्त्वसिद्धि प्राप्त याकिइगु छगू अद्भूत शक्ति सम्पन्नगु रहस्यमय उत्तमगु साधन मार्ग धकाः मानय यानावइच्वंगु जुल ।

श्व हे दर्शन व उद्देश्ययात साकार रूप हय्त तन्त्र वज्रयानया रहस्यमय तत्त्वज्ञान थुइकेत वज्रयानया मूलगु ज्याभः स्वरूपगु महान् दार्शनिकया शुभ प्रतिक 'वज्र' यात अपनय यानावइच्वंगु जुल ।

अतःएव वज्रयानया सिद्धयोगी विद्याधर एवं आचार्यपिसं न्ह्यात्थाय् न्ह्यावले थुगु वज्रयात सर्वोपरी स्थान वियाः अपार श्रद्धा तयाः स्वागत सत्कार यानावइच्वन । अज्ज वज्रयानया सुप्रसिद्ध गुरु देव डाकिनी एवं धर्मपालपिसं नं यथोचित सम्मान यासे धारण यानावइच्वंगु खनेदु । अज्ज प्रागैतिहासिक इलंनिसें प्रख्यात जुयाच्वंगु श्रीस्वयम्भू महाचैत्यया अभिमुखय च्वंगु धर्मधातु वागीश्वर मण्डलस सुवर्णवज्र दय्काः सुशोभितपूर्वक प्रदर्शित यानातल । श्व हे वज्रयात आदिबुद्ध गुरु वज्रधर, वज्रसत्त्व एवं हेरुक, चक्रसम्बर, योगाम्बर, अचलवीर एवं महामञ्जुश्री, वज्रडाकिनी, वज्रयोगिनी, वज्रवीर महाकाल तथा वज्रपाणिपिसं मूलगु ज्याभः स्वरूप यानाः निरन्तर धारण यानावइच्वन । एवं रूपं श्रीस्वयम्भू महाचैत्यया पञ्चज्ञान दृष्टिया च्वस्संच्वंगु त्रयोदश भुवनया दकलय् सकलय् च्वय्च्वंगु समन्तप्रभा निरुपमा ज्ञानवती भूमियात वज्रभूमि धइगु संज्ञा वियावइच्वंगु जुल ।

[२०] अनन्तपुर, प्रतापपुर

थ्व अनन्तपुर, प्रतापपुर निगः देगः नं स्वयम्भू महाचैत्यया जःखः अग्निकोण व ईशानकोणपाखे गन्थकूट शैली रूप्य निर्माण यानाः तइतःगु खः । अग्निकोण्य च्वंगु अनन्तपुर मन्दिर छगू तहः पेटी तयाः उत्तरपाखे स्वकाः दय्कातःगु च्वाउँसे सुलुप मिल्य जुयाः थहांवनाच्चंगु मन्दिर जुल । थुगु अनन्तपुरया लुखाया जःखः काकाश्या उलूकाश्या देवीपिं द्वारपाल तइतःगु दु । थुगु मन्दिर्य दुने श्रीएकजटा श्रीउग्रतारा एवं श्रीनीलसरस्वती परमेश्वरीपिं स्थापना यानातःगु जुल । थुपिं परमेश्वरीपिं न्ह्याबलें सर्वसाधारणपिनिगु लागि दर्शन सुलभ मजू । स्वयम्भू महाचैत्ययागु विशेष धार्मिक कार्यक्रम्य सख्याःपा आदि याइबलय् जक खापा चाय्किइगु चलन जुयाच्चन ।

थुगु मन्दिर कवीन्द्र प्रताप मल्लया महारानी अनन्तप्रिया देवीयागु नामं दय्कातःगु जुल । उकिं थुगु मन्दिरयात अनन्तप्रिया महारानीया नां क्वकयाः 'अनन्तपुर' धइगु नामं प्रसिद्ध यानाव्यूगु जुल । थुगु मन्दिर प्रतिष्ठा कार्य सम्पन्न जूगु उपलक्ष्य कवीन्द्र जयप्रताप मल्ल जुजुं थःगु विद्वता परिचय बिइया लागि एकजटा वज्रयोगिनीया नामं संस्कृत भासं जातिमुद्गर छन्दं स्तोत्र रचना यानाः थुगु हे देगःया क्वस्सं शिलापत्र तयाथकूगु अद्यापि दनि ।


थुगु मन्दिर ने. सं. ७७५ साल आषाढशुक्ल नवमीखुनु विधिवत् उत्सव यानाः सम्पूर्ण प्रतिष्ठा कार्य सम्पन्न याःगु जुल ।

उख्येपाखे च्वंगु ईशानकोणस अवस्थित प्रतापपुर मन्दिर नं अनन्तपुर मन्दिरया धाँचा साइज मिल्य यानाः जोलाक दय्कातःगु दु । थ्व मन्दिरया लुखा जक दक्षिणपाखे स्वकातःगु जुल । खास थुगु देगः जुजु कवीन्द्र जयप्रताप मल्लया नामं दय्कूगु जुयाः थुकिया नां 'प्रतापपुर' अथवा 'कवीन्द्रपुर' नामं विख्यात जूगु जुल । थुगु देगलय् मुख्यह्मा परमेश्वर महासम्बर विराजमान यानातःगु दु धाइ । थन नं न्ह्याह्मासिगु लागि दर्शन पूजन सुलभ मजू । विशेष धार्मिक कार्यक्रम्य जक खापा चाय्किइगु यानावइच्चंगु खः । थुगु मन्दिरयागु प्रतिष्ठा कार्य नं अनन्तपुर मन्दिरयागु प्रतिष्ठा जूगु दिन्य हे मान्य यानातल ।

अनन्तपुर मन्दिर्य दुनेच्चह्मा एकजटादेवी अनन्तप्रिया महारानीं स्थापना याकूगु धइगु खँ मिल्य मजू थें च्वं, कारण थुगु स्वयम्भू क्षेत्र्य करीब खुसःदँ न्ह्यो हे 'एकजटादेवी' विराजमान जुयाच्चने धुंकूगु खनेदु । थुगु मूर्ति प्राकृतिक तथा मानविक प्रकोपं विनष्ट जूगु खनाःलि महामन्त्री मदनरामवर्द्धन धइह्मास्यां ने. सं. ५०२ साल बांलाक जीर्णोद्धार संस्कार यानाथकूगु खनेदु^१ ।

१- प्रस्तुत ग्रन्थया ५८ अध्याय स्वयादिसँ ।

श्रीस्वयम्भू महाचैत्य



वसुपुर

[२१] विहङ्गम दृश्य स्थान

स्वयम्भू महाचैत्यया जःखः च्वंगु अनन्तपुर, प्रतापपुरया न्ह्योनेपाखे खुल्ला जुयाच्च्वंगु फराकिलागु स्थान दु । थुगु थाय् मित्रराष्ट्रया पर्यटक एवं विद्वान् तथा शाही अतिथिपि स्वयम्भूस थहांवइबलय् इमित काठमाण्डू उपत्यकायागु दृश्य अवलोकन याकेगु थाय् मानय् यानातःगु जुल । थुगु थासय् च्वनाः काठमाण्डूया मुख्य मुख्यगु थाय् ललितपुर, देवपत्तन, बौद्धनाथ, पशुपतिनाथ व भक्तपुर, ठिमी, कीर्तिपुर, त्रिभुवन विश्व विद्यालय आदि आदि छर्लंग जुइक गनं मपंक न्ह्याइपुसे यइपुसे च्वंक मानों मानचित्र कयने थें यानाः स्थान परिचय बिइगु यानावइच्चन । थुगु थासय् थ्यनेवं न्ह्याम्हं नवागन्तुकपिसं तारिफ मयासे च्वनेमफु । इमिगु लागि न्ह्याबलें रमणीय स्थल थें जुयाच्च्वनी । थुगु थासय् थ्यनेवं काठमाण्डू सहरयागु फुक्क धयाथें गगनचुम्बी स्थानत निर्देशन यानाः कयने ज्याछिगु जूया निर्मित थन थासय् च्वनेवं उच्च ध्वज प्रासादय् च्वनागु तुल्य न्ह्याइपुसे च्वनाच्च्वनी । अज्ज थन च्वनाः स्वयंबलय् काठमाण्डूयात सदां पवित्र निर्मित अभिषिञ्च याय्त्त थःगु गति स्वच्छन्दं न्ह्यानाच्च्वंगु वहःपताः थें तललं थिनाच्च्वंगु वाग्मती, विष्णुमती, मनोहरा आदि तीर्थोपतीर्थत चाःहुलाच्च्वंगु खने दयाच्च्वनी । अतःएव थुगु थासं काठमाण्डू उपत्यकायागु भौगोलिक स्थिति अध्ययन याइपिनिगु निर्मित कःसि थें ज्वलाह्वाय्कं थें ज्या बियाच्च्वंगु खनेदु ।

[२२] वसुपुर

थ्व वसुपुर स्वयम्भू महाचैत्यया पूर्व दक्षिणया दत्थुइ च्वंगु अनन्तपुर मन्दिरया लिउनेसं च्वंगु स्थान खः । वर्तमान थ्व थाय् खुल्ला थासय् मलासे छखा छेंया तःलय् छचलियागु दलां कवलय् लानाच्च्वंगु दु । थ्व वसुपुर उत्तराभिमुख यानाः स्वयम्भूया दृष्टिगोचरय् लाकातइतल । थ्व थासय् शान्तिकर गुरुं पृथ्वीतत्त्वयागु विकारपाखें जुइगु भूमिकम्प आदि दोष मवय्मा धइगु हेतुं वसुन्धरा साधन कलश पूर्णघट स्थापना यानाः सुवर्ण ध्वज स्वानाः अधिष्ठान यानाथकूगु स्थान जुल । थुलि जक मखु देसय् सदांया निर्मित सयसाह्या आदि धनधान्य रत्न सुसमृद्ध जुयाच्च्वनेमा धकाः नं सिद्धौषधी स्वनाथकूगु नं धाइ । गुह्यसिनं श्रद्धा तयाः विधिपूर्वक थुगु थासय् पुरश्चरणादि च्वनाः सेवा यात धाःसा निश्चय नं दारिद्र दुःख शान्त जुयाः धनाढ्य जुइ धयातःगु दु :-

द्वितीयं वसुपुरञ्च शम्भुवोग्रे प्रस्थापितम् ।
सुवर्णध्वज संयुक्तं एकपुरं प्रस्थापितम् ॥

श्रीवसुन्धराञ्च देवीं जम्भरेण सह किलः ।
 शान्तिकर सिद्धाचार्यः इत्थं पुरं प्रस्थापितम् ॥
 मनुष्याः ये च या तस्मै धान्यादि वृहि पूजितम् ।
 ते च फलं सुसंप्राप्ता धान्यादि वृहि सम्पदम् ॥

नेपाःयागु बौद्धसमाजय् दुने दुने चलय् जुयाच्चंगु रीतिथितिकथं बिचाः याय्बलय् वसुन्धरा वसुन्धरा जक मजुसे आर्यतारा, प्रज्ञापारमिता, महालक्ष्मी, कौमारी एवं कोलमुखी वज्रदेवी थुपि न्याहासिगु नं तत्त्व आर्य वसुन्धरादेवीयाके समावेश जुयाच्चंगु खनेदु । ऊवात्त स्वय्बलय् श्रीवसुन्धरा- देवी छपाः खाः खुपा ह्लाः धारणा यानाः ललितासनय् च्वनाः कलशया द्योने बिज्यानाच्चंगु खनेदु । गनं गनं स्वपाः खाः दु धकाः उल्लेख यानातल, अथे हे प्यंगू युगया भेदं प्यंगू हे नामं प्रसिद्ध जुयाच्चंगु धकाः नं वर्णन यानावइच्चंगु जुल । गथे स्वयम्भू पर्वतयात प्यंगू युगय् युग भेदं नां दु धकाः धयातल अथे हे वसुन्धरादेवीयात नं सत्ययुगय् वज्रदेवी, त्रेतायुगय् वसुन्धरा, द्वापरयुगय् महालक्ष्मी व कलियुगय् कौमारी नामं प्रसिद्ध जुल । वसुन्धराया जवगु ख्वाल कुंकुमवर्ण महालक्ष्मी, खवगु ख्वाल ह्यंगुलिवर्ण कौमारी, दथुयागु ख्वाल ह्यासुगु वसुन्धरादेवी ।

वसुन्धराया जवगु प्रथमगु ह्लातं वरद मुद्रा यानाः आर्यतारायागु प्रतिनिधि यानाच्चन । जपमाला व पुस्तक ज्वनाः प्रज्ञापारमितायागु प्रतिनिधित्व यात । अथे हे वागुइँ व रत्न ज्वनाः महालक्ष्मीयागु प्रतिनिधि स्वरूप जुयाच्चन, सम्पूर्ण अलक्षण वर्जित जुयाः सर्व लक्षण संयुक्तगुलि कौमारी जुल । नैरात्मा वज्रदेवी कलशं उत्पन्न जूगुलि नं कलश आसन यानाः क्यनातल । थुगुकथं फुक्क ज्ञान गुणं लक्षणं पूर्ण जूगुलि अभेद्य ज्ञान स्वरूपगुलि वज्रदेवी धयातल । सत्ययुगय् सूर्योदय राजायात उद्धार याय्त्त वइगु अहंकारी दुराचारी स्वभाव दमन याय्त्त कोलमुखी जुयाः उद्धार याःगुलि नं वज्रदेवी स्वरूप जुयाक्यंगु जुल ।

गथे अष्टोत्तरशत तारानाम स्तोत्रय् आर्यतारायागु १०८ गू नां उल्लेख जुयाच्चन अथे हे वसुन्धराकल्पसूत्रय् वसुन्धरायागु नं १०८ नामं स्तुति यानातःगु खनेदु । प्रसंगवश उगु स्तोत्रयागु छत्वाःचा श्लोक थन उद्धृत यानागु जुल :-

दिव्यरूपी सुरूपी च सौम्यरूपी वरप्रदा ।
 वसुधरी वसुधारी वसुश्री श्रीकरीवरा ॥
 धरणी धारणी धातृ शरण्या भक्तिवत्सला ।
 प्रज्ञापारमितादेवी प्रज्ञाश्री बुद्धिवर्द्धनी ॥
 दहनी मारणी चण्डी शवरी सर्वमातृका ।
 कृतान्त त्राशनी भोमा कौमारी विश्वरूपिनी ॥
 तथागती महारम्या वज्रिणी धर्मधारिणी ।
 मातरी सर्वबुद्धानां रत्नधात्वेश्वरी तथा ॥
 शून्यता भावनादेवी भावना भाव विवर्जिनी ।

वसुपुरय् दुनेच्वंगु मूर्ति

(१) वसुपुरया मूलदेवताया रूप्य पूर्णकलश स्थापना यानातःगु दु । थुगु पूर्णकलशयात वसुन्धरा भावना यानातल । थुगु कलशयात प्रभामण्डलया रूप्य प्रस्तरमय तोरणाकृति अंकित यानाः शोभा वृद्धि यानातःगु दु । प्रस्तुत तोरणया न्होनेसं वसुन्धराया मूर्ति स्थापना यानातल । थुगु मूर्ति ने. सं. १०६५ साल अक्षय तृतीया दिनस काठमाण्डू दछेसालया श्रद्धालु दानवहादुर मानन्धरं तिलाव्रत साङ्गि जूगु लसताय् प्रतिष्ठा याःगु जुल ।

(२) पद्मपाणि लोकेश्वर (३) वज्रपाणि बोधिसत्व (४) मञ्जुश्री (५) अमोघपाश लोकेश्वर (६) सप्तलोचनी तारा (७) भूमिस्पर्शमुद्रा बुद्ध मूर्ति ४, (८) आर्यतारादेवी (९) प्रज्ञापारमिता देवी (१०) रत्नधात्वेश्वरी रत्नतारा ।

थुगु वसुपुरया लिकसं च्वंगु छेया मातं ऊयालय् १६ गूगु शदीया रञ्जना लिपि क्रियातःगु ऊयाःक्वताःपौ तयातःगु दु । तर थ्व क्वताःपौ प्राकृतिक प्रकोपं जीर्ण जुयाच्वने धुंकल । थुजाःगु क्वताःपौ स्वपाः ऊयालय्सं दय्माःगु खः । थौंकल्लय् छपाः ऊयालय् जक ल्यंदनि । थ्व ल्यनाच्वंगु काष्ठ अभिलेखयागु आशय बिचाः याय्वल्य् छुं ऐतिहासिक घटना उल्लेख मजुसे पुण्य प्रशंसा विषयय् च्वयातइतःगु खनेदु । काठमाण्डू उपत्यकाय् उपलब्ध जूगु आःतकयागु काष्ठपत्राभिलेखय् गनं रञ्जना लिपि अङ्कित यानातःगु खनेमदुगुलि थ्व अभिलेख अपूर्ण जूसां जीर्ण जूसां थुकिइ थःगु हे विशेषता दु, महत्व दु ।

[२३] ग्वहः (पञ्चाङ्ग निर्देशिकापत्र)

थ्व ग्वहः पञ्चाङ्ग निर्देशिका काष्ठपत्र स्वयम्भू महाचैत्यया दक्षिण भागय् वसुपुरया खवपाखे च्वंगु छगू फलेचास सदांया लागी प्रदर्शित यानातःगु जुल । थ्व ग्वहः धइगु ह्वापा ह्वापा प्रारम्भिक विद्यार्थी जीवनय् गुरयाथाय् वनाः आखः ब्वंवनिइबल्य् आखः च्वय् सय्केत गुरुं ह्वापालाक आखः गियाः गुरुपं च्वयाबी, अले व स्वयाः स्वयाः आखः च्वय् सय्केगु छगू साधन विशेष खः । थुजाःगु ग्वहः केवल मस्तय्सं आखः ब्वंवनेत जक ज्वना जुइगु मखु परन्तु जातः स्वया जीविका याइपि ज्योतिषतय्सं जन्मकुण्डल लग्न ज्याय्त प्रयोग याइगु सिपौ नं खः । अज्ज थुगु ग्वहलय् पञ्चाङ्ग पात्र छापय् याय्गु चलन मवःनिबल्य् सर्वसाधारण जनतापिनिगु लागी दिनघात पर्व उत्सव नखः चखः सिइके सय्के बिइत कुशल ज्योतिषी भाजुपिसं सूर्यसिद्धान्त गते व चान्द्रसिद्धान्त तिथि आदिया ज्ञान स्यने कने म्वाय्क सर्वसाधारणया लागी जानकारी निम्ति ब्वयातइगु जुल । स्वयम्भू महाचैत्यय् सेवा भाव भक्ति याःवइपि भक्तजनपिनिगु निम्ति ह्वाति ह्वाति दय्का च्वनेम्वाय्क दच्छि दच्छिया लागी थुगु थासय् तयाः प्रदर्शित यानातइतःगु खः ।

खतु थुजाःगु पञ्चाङ्ग निर्देशिका ग्वहः अप्पो संख्याय् मनूतय्गु दृष्टिगोचर जुइथाय् प्रसिद्ध धार्मिक स्थलय् सुरक्षितपूर्वक थपक्क तयातइ । थुजाःगु ग्वहः थौकल्लय् पञ्चाङ्गपत्र छापय् जुयावसेलि यक्व थासय् लोप जुइ धुंकल । तर परम्परायागु श्रद्धाया दृष्टि थ्व थासय् ब्वय्गु चलन यानावयाच्चन तिनि ।

पञ्चाङ्ग छुकियात धाइ धइगु विषयय् पञ्चाङ्ग विज्ञानय् थथे च्वयातःगु दु :—

तिथि वार नक्षत्रश्च योगं करणमेवच ।

यत्रै तत्पञ्चकं स्पष्टं पञ्चाङ्गं समुदीरितम् ॥

तिथि १५, वार ७, नक्षत्र २७, योग २७, करण ११ ।

[२४] वायुपुर (फसखाद्यो)

थ्व थाय् स्वयम्भू महाचैत्यया दक्षिण पश्चिमया कुलामय् प्रतिष्ठा यानातइतःगु स्थान खः । थ्वया लिउनेसं अन्तरराष्ट्रिय मूर्ति संग्रहालय दय्कातःगु दु । थुगु वायुपुर फसखाद्यो (फस्खाद्यो) साधारण किसिमगु चैत्य शैली देगःचाय् दुने लानाच्चंगु दु । थ्व द्यो पूर्वाभिमुख जुयाच्चन ।

थ्व थाय्यात नं गुरु शान्तिकरं थ्व मतिइ तयाः अधिष्ठान यानाबिज्याःगु दु—गुलि नं फय्या पाखे जुइगु आँधी हुरी उपद्रव शान्ति निम्ति । थथे नं धयातःगु दु—थुगु थासय् बात-ल्वय् जूपिसं चला तोताः सेवा यात धाःसा बात-ल्वय् शान्त जुइ । हानं सुनां गुम्हेसिनं श्रद्धा तयाः पुरश्चरण च्वन धासाः वायुयोग याकनं सिद्ध जुइ । थन विधि थे पूजा यानाः सेवा याःपि इपि तिर्थकयोनि कुंगः पंक्षि पशुयोनिइ जन्म काःवने माली मखु नं धयातल^१—

तृतीयं वायुपुरश्च शम्भू नैऋत्य स्थापितम् ।

वायु भैरवं सशक्ति महाकाल स्वरूपकम् ॥

ये च या वा मनुष्याश्च हिच्छादि विधि पूजितम् ।

तस्मात्पुण्य प्रसादाश्च तिर्यकं न प्रलभ्यते ॥

थन श्रीकरुणामय बुंगमलोकेश्वरयागु जात्रा जुइवलय् फय्प्वाः तिइगु धकाः बुंगया पाञ्जु भायोजुपि वयाः बाहाँचा समेत तयाः रात्रि पूजा याःवय्माःगु थिति अद्यापि प्रचलन दनि ।

थुगु स्थानप्रति श्रद्धा तयाः वंगः बाकुननि यताछेँया नापित भाजुरामं थःपुर्खापिसं दय्काथकूगु देगः जीर्ण जूगु खनाःलि ने. सं. १९६८ फाल्गुणशुक्ल प्रतिपदाया दिनय् फसखाद्योया देगः पुनर्निर्माण

१- स्वायम्भू पुराण, पृ. ४२६

श्रीस्वयम्भू महाचैत्य



वायुपुर

यानाव्यूगु जुल । अथे हे वि. सं. १९९६ सालं कुलधर शाक्यजुं थुगु देगः शोभा वृद्धि निर्मित मार्वल ल्वहूतं सिया थकल ।

थन दुने फसखाद्योया मूर्ति खनेमदु, केवल नँखिपाँय् थे जाःगु छगू ल्वहंग्वारा तयातःगु दु, थुकियात महाकाल स्वरूपी शक्ति सहित वायुदेव भावना यानावइच्चन । लिस्सें थन दुने १६ गूगु शदीया सुन्दर गणेश मूर्ति प्रतिष्ठा यानातइतःगु नं खनेदु ।

[२५] मङ्गल बहुद्वार चैत्य (ताशिगोमों छोर्तेन्)

थुगु चैत्य फसखाद्योया न्होने पाखे स्वयम्भूयागु प्रदक्षिण पथया लिक्क नैऋत्य कुलांपाखे छेखे अलग स्थापना यानातइतःगु खः । थुगु चैत्य काठमाण्डू उपत्यकाय् निर्मित जुयाच्चंगु विभिन्न प्रकारया चीवाहाःत मध्यय् थ्व थःगु हे स्वरूपं च्वनाच्चंगु दु । थुगु चैत्य सुं छह्य अलग दानपतियागु नीजी कीर्ति मजुसे तःधंगु ग्वसाःकथं स्वयम्भू महाचैत्य जीर्णोद्धार जूबल्य् दय्काः प्रतिष्ठा यानातःगु धाइ ।

थथे नं धयातःगु दु—श्रीस्वयम्भू महाचैत्यस श्रीहेवज्र व धर्मधातु मण्डल स्वरूपं दुने गर्भगृहय् तय्त गनं गुगु थासय् गुगु किसिमं मूर्तित सजय् याय्माःगु खः, अन उगु रूपं तय्या निर्मित मूर्ति च्वय् क्वय् मलाक मद्रक मर्यादाक्रमानुसार शास्त्रोक्त प्रमाण थें मिलय् जुइक छगू नमुना स्वरूप दय्कूगु दु । उगु भावनाकथं थुकिइ दुने नं सुरक्षित याना तइतःगु दु । अज्ज थुगु चैत्यया पिनेपाखे हानं महान् शुभ कार्य अहोरात्र विधि उत्सवय् गुरु वज्राचार्य साक्षात् वज्रसत्त्व स्वरूप जुयाः विशुद्ध भावनाकथं श्रीमान् आलीढपद, समपद, विसमपद, महाकूर्मपद, वैशाखपद, मण्डलपद, प्रत्यालीढपद, प्रकटितपद एवं सिंहविक्रान्तपद आदिपाखे पालिख्वाँय् कयाः पद संचारण यानाः मण्डलागार कूटागारया दत्थुइ च्वनाः विघ्नोत्सारण निर्मित भूमि परिशुद्ध याइगु दु । लिस्सें विभिन्न तत्त्व ज्ञान स्वरूपं लाश्या मुद्रा कयाः आचार्य नृत्यपद संचारण यानाः गुगु क्रिया याइगु खः उकियागु सस्मरणकथं थुगु चैत्यय् ग्वाख ग्वाखचा तयाः बहुद्वार खुल्य् यानाः प्रत्येक द्वार पतिकं विभिन्न मूर्तित निर्माण यानाः तयाव्यूगु खनेदु' :—

श्रीमानालीढ पादः समविसममहाकूर्म वैशाखपादः ।
प्रत्यालीढांघ्रिपाद प्रकटित नियतं सिंहविक्रान्तपादा ॥
पश्चाच्छ्रीमण्डलाख्य कथितदवरैरैष्टभिर्भूमिशुद्धा ।
आचार्योनृत्यकारी भ्रमतिदशदिशो मण्डलागारमध्ये ॥

थुकिइ अनेक सद्भावना प्रदर्शित यानातइतःगु द्वारत यक्व सजय् याना तइतःगुलि थुगु

चीषाहायात 'मङ्गल बहुद्वार चैत्य' धयागु नामं प्रसिद्ध यानाव्यूगु जुल । लिस्से थुक्रियात तिब्बती भासं 'ताशिगोर्मो छोर्तेन्' धकाः नं धाइ ।

खः थुगु चैत्यय् अङ्कित विविध देवदेवतापि तय्गुलिइ नेपाःया गुरुजु वज्राचार्यपि व सँदेसया ध्येशे लामात च्वनाः निखलःसिगु पारस्परिक सल्लानुसार दय्कूगु धयातल, गुकि यानाः भविष्यया आचार्यपिनिगु लागी पद संचारण व हस्तमुद्रा अध्ययन याइपिनिगु निम्ति आदर्श अनुरूप जूवनी ।

थुगु चैत्यय् छगू छगू दिशा पत्तिकं सुइगू सुइगू द्वार तइतःगु दु । प्यख्यरसं यानाः जम्मा सच्छि व नीगू द्वार तयातल । थुगु १२० गू द्वारया विभिन्न पद संचारण एवं हस्तमुद्राया भेद अनुसारं निम्नप्रकारं नाम उल्लेख यानातइतल :—

१. आलीढपद	२३. वरदा मुद्रा
२. प्रत्यालीढपद	२४. समाध्यंगो मुद्रा
३. बैशाखपद	२५. अभयप्रदानाभिनय
४. मण्डलपद	२६. पद्मासनाभिनय
५. समपद	२७. वज्रलाश्याभिनय
६. कूर्मपद	२८. वज्रमालाभिनय
७. एकपद	२९. वज्रगीताभिनय
८. कूर्मपद	३०. वज्रनृत्याभिनय
९. बैशाखपद	३१. वज्रधूपाभिनय
१०. बैशाखपद	३२. वज्रपुष्पाभिनय
११. एकपद	३३. वज्रदीपाभिनय
१२. एकपद	३४. वज्रगन्धाभिनय
१३. आलीढपद	३५. वज्रसत्वाभिनय
१४. आलीढपद	३६. वज्रराजाभिनय
१५. समपद	३७. वज्ररागाभिनय
१६. जानपद	३८. वज्रसाध्वभिनय
१७. प्रत्याजातपद	३९. वज्ररत्नाभिनय
१८. विकटपद	४०. वज्रतेजोभिनय
१९. प्रविकटपद	४१. वज्रकेत्वभिनय
२०. सिंहविक्रान्तपद	४२. वज्रहासाभिनय
मुद्रा सम्बन्धी	४३. वज्रधर्माभिनय
२१. बोध्यंगीनाम मुद्रा	४४. वज्रतीक्ष्णभिनय
२२. भूस्पर्श मुद्रा	४५. वज्रहेत्वभिनय
	४६. वज्रभासाभिनय

श्रीस्वयम्भू महाचैत्य



मङ्गल बहुद्वार चैत्य (ताशिगोमो)

४७. वज्रकर्माभिनय
४८. वज्ररक्षाभिनय
४९. वज्रयक्षाभिनय
५०. वज्रसन्ध्यभिनय
५१. मैत्रयाभिनय
५२. अमोघदर्श्याभिनय
५३. सर्वपापञ्जहाभिनय
५४. सर्वशोकतमोनिघाटना
५५. गन्धहस्त्यभिनय
५६. शूरंगमाभिभिनय
५७. गगनगञ्जाभिनय
५८. ज्ञानकेत्वभिनय
५९. अमृतप्रभाभिनय
६०. चन्द्रप्रभाभिनय
६१. भद्रपालाभिनय
६२. जालिनीप्रभाभिनय
६३. वज्रगर्भाभिनय
६४. अक्षयमत्याभिनय
६५. प्रतिभानकूटाभिनय
६६. समन्तभद्राभिनय
६७. वज्रांकूशाभिनय
६८. वज्रपाशाभिनय
६९. वज्रस्फोटाभिनय
७०. वज्रावेशाभिनय
७१. उत्कृटासन
७२. वामांगुष्ठसंस्थातुमारावश्च
७३. वज्रमुष्टि
७४. वज्रानलमहाहूत
७५. कर्ममुद्रा
७६. बाहुसंकोचमुद्रा
७७. पृष्ठतः परिवर्तिता
७८. ज्वालीहलिङ्गमोचा

७९. बाहुसंकोच वज्रातुपृष्ठत
८०. सगर्वमुखदंष्ट्राग्रं
८१. दण्डाघातप्रपातिता
८२. वज्रविनायकमहाचेट
८३. सर्वहारिणी निचेट मुद्रा
८४. वज्रमुखि आनय वज्रदंष्ट्रि
८५. वज्रसंकल
८६. वज्रशोधनी
८७. चेटिस्वसमय कर्ममुद्रा
८८. ललितासना
८९. कर्ममुद्रा अग्नि
९०. कर्ममुद्रा यम
९१. कर्ममुद्रा नैऋत्य
९२. कर्ममुद्रा वरुण
९३. कर्ममुद्रा वायु
९४. कर्ममुद्रा कुबेर
९५. कर्ममुद्रा ईशान
९६. कर्ममुद्रा सूर्य
९७. कर्ममुद्रा चन्द्र
९८. कर्ममुद्रा ब्रह्मण
९९. कर्ममुद्रा वेमचित्र
१००. कर्ममुद्रा पृथ्वी
१०१. कर्ममुद्रा नाग
१०२. स्वस्तिकासन
१०३. स्वस्तिकासन
१०४. अवलोकनात् पराङ्मुखः

अतिरिक्त मेगु मूर्ति व वाहन व मेगु
चिह्नत :-

१०५. वज्रधारी महाराज
१०६. अंकुशधारी महाराज
१०७. पाशधारी महाराज
१०८. ध्वजधारी महाराज

१०६. रत्नवीर
११०. खड्गवीर
१११. ध्वजवीर
११२. पद्मोपरी रत्न
११३. सिंह
११४. अश्व

११५. मयूर
११६. गरुड
११७. पद्मोपरी ज्वलात्मायकं
११८. पद्मोपरी सर्वनिधानकलश
११९. पद्मोपरी चक्र
१२०. पद्मोपरी मणिरत्न, चन्द्रसूर्य

थुपि १२० मूर्तिपाखें अलग दकलय् सकलय् चवय् चतुः तथागत मूर्ति खनेदु :-

१. अक्षोभ्य
२. रत्नसम्भव

३. आमताभ
४. अमोघसिद्धि

[२६] स्वयम्भू मूर्ति संग्रहालय

थुगु संग्रहालय स्वयम्भूया नैऋत्यकोणपाखे वायुपुरया लिउनेसं लानाच्वंगु दु । थ्व थाय् छगू तला जक यानाः पूर्व पश्चिम लड्ग ताःहाकः यानाः दय्कातःगु खः । थुगु संग्रहालयया न्ह्योनेपाखें मञ्जुश्री पर्वस्थान वनेगु लैपु नं स्वानाच्वंगु दु । थुकिइ स्वयम्भूया चाकलय् उख्येथुख्ये छरय् जुयाच्वंगु असुरक्षित अवस्थाय् लानाच्वंगु दर्शनीय दुर्लभ एवं कलात्मक मूर्तितय्गु संग्रह खः । गुगुं जा स्वयम्भू-प्रति श्रद्धा तयाः अर्थात् थुगु संग्रहालययागु व्यवस्थाप्रति अनुमोदन यानाः थः पूर्खापिसं संचय यानाथकूगु मूर्तित नं श्रद्धा चन्दा स्वरूप समर्पित याय्हुःगु नं दुथ्यानाच्वंगु दु । खतु थ्व स्वयम्भू शिखरय् धार्मिक सांस्कृतिक एवं कलात्मक दृष्टि महत्वपूर्णगु पुरातात्त्विक सम्पदातय्गु सजीव संग्रहालय थें जुयाच्वंगु दु, तथापि वर्तमान क्यूरियो जमानाय् थासंथासय् च्वंगु असंख्य मूर्तित चाय्कं वा मचाय्कं दुसुना वनाच्वंगु सांस्कृतिक राष्ट्रिय सम्पत्ति ह्लियाह्लियं पाः जुजुं वनाच्वंगु इलय् स्वयम्भू विकास मण्डलं महत्वपूर्ण कदम उठय् यानाः थुगु संग्रहालय वि. सं. २०२८ सालं चाय्कूगु जुल । थुगु संग्रहालय चाय्केगुलिइ श्री ५ या सरकार पुरातत्त्व विभागं आवश्यक सहमति प्रदान याःगु दु ।

थुगु संग्रहालय प्रदर्शन व अध्ययन निम्ति विना टिकटं क्यनाः जनतायागु सेवा यानावइच्वन । प्रस्तुत संग्रहालय सुसमृद्धि व संरक्षणया लागी सुं महानुभावपिसं श्रद्धा चन्दा प्रदान याय्गु मनसुवा जुल धाःसा वय्कःपिनिगु निम्ति चन्दा वाकस नं तयातःगु दु । लिस्सें दर्शक एवं यात्रुगणपिनिगु सुविधाया लागी गाईडयागु नं व्यवस्था जुयाच्वंगु दु । थुगु संग्रहालययागु इतिहासय् सर्वप्रथम लुं सिया धातुया मूर्तित द्वहलपाः सहयोग प्रदान यानादिइह्य कविकेशरी चित्तधरजुया नां न्ह्योने च्वंवइ । श्री ५ या सरकारयागु संग्रहालय बाहेक नेपालं दकलय् सकलय् ह्लापां युगानुकूलयात ल्वःगु किसिमं संग्रहालय स्थापना यानाः पथ प्रदर्शन यानाक्यंह्य स्वयम्भू विकास मण्डल धाःसां अत्युक्ति जुइमखु । आशा दु- अन्य संघ संस्थां थुगु आदर्श अनुशरण यानावनी ।

थुगु संग्रहालयस प्रदर्शित मूर्तितयगु धलः

<u>क्र. सं.</u>	<u>मूर्तिया नां</u>	<u>सेण्टिमिटर नाप</u>	<u>सम्बत्</u>
१.	बुद्ध भविष्यव्याकरण मुद्रा	१८४ x ५६	
२.	पद्मपाणि लोकेश्वर	५१ x २२	
३.	समन्तभद्र बोधिसत्व	५२ x २७	
४.	प्रतिसरा देवी	३३ x २८	
५.	षड्क्षरी लोकेश्वर	२७ x १८	
६.	लोकेश्वर शक्ति सहित	४६ x २७	ने. सं. ७४३
७.	अमोघपाश लोकेश्वर	६८ x ३२	
८.	वज्रवीर महाकाल	७२ x ३८	
९.	अमोघपाश लोकेश्वर	५५ x ३३	
१०.	प्रज्ञापारमिता	३१ x १६	
११.	षट्भुज मञ्जुश्री	५६ x ४१	
१२.	अरपचन वागीश्वर मञ्जुश्री (नामसंगिति परिवार)	४३ x ३२	
१३.	मञ्जुश्री गणेश महाकाल सहित	४२ x २४	ने. सं. ७८२
१४.	सुखावती लोकेश्वर	३६ x २५	
१५.	वज्रवीर महाकाल	७८ x ४०	ने. सं. ७०५
१६.	चतुर्भुज महाकाल	६६ x ५४	
१७.	पद्मपाणि लोकेश्वर	५८ x ३२	
१८.	श्यामार्पा लामा	४२ x २४	
१९.	सुखावती लोकेश्वर	६७ x ८२	
२०.	अक्षोभ्य तथागत	६७ x ५८	ने. सं. ७४६
२१.	पद्मपाणि लोकेश्वर परिवार सहित	६४ x ४४	
२२.	चिन्तामणि लोकेश्वर	८७ x ४८	ने. सं. ५३६
२३.	अरपचन वागीश्वर मञ्जुश्री	५४ x ३६	ने. सं. ७६८
२४.	वज्रवीर महाकाल		
२५.	प्रज्ञापारमिता, स्वयम्भू चैत्य सप्तलोचनी तारा सहित	५८ x ४४	
२६.	लोकेश्वर क्वस्सं शिवपार्वती	४८ x ३६	ने. सं. ७६७
२७.	वज्रवीर महाकाल	७४ x ४०	
२८.	शिवपार्वती	२८ x २३	

२९.	पद्मपाणि लोकेश्वर	३१ X २३	
३०.	आर्यतारा	३० X २२	
३१.	वज्रवीर महाकाल	६९ X ४२	
३२.	आर्यतारा	३३ X २७	
३३.	चन्द्रमा सप्तहंस युक्त	३२ X २३	
३४.	आर्यतारा	३६ X २७	
३५.	शिलापत्र (स्वयम्भूयात पताः, हारतीयात किर्किपा द्वहलप्युगु)	४७ X ३३	ने. सं. ९६६
३६.	दानपतिया निह्वातिपू		
३७.	षट्कोणया दथुस चक्र	२७ X १७	
३८.	वज्रवीर महाकाल	६८ X ४८	
३९.	पद्मपाणि लोकेश्वर	८७ X ४०	
४०.	सुखावती लोकेश्वर	७१ X ५६	
४१.	वसुन्धरा, वज्रसत्त्व, वैरोचन सहित	७६ X ४०	ने. सं. ७८१
४२.	धर्मचक्र लोकेश्वर	४६ X २८	
४३.	पद्मपाणि लोकेश्वर	७३ X ३२	ने. सं. ७२०
४४.	शक्ति सहित धर्मचक्र लोकेश्वर	३८ X २९	
४५.	सप्तलोचनी तारा	३७ X २७	
४६.	पद्मपाणि लोकेश्वर	३४ X २५	
४७.	वज्रवीर महाकाल (संग्रहालयया लुखाय् च्वंगु)	१८५ X ६४	ने. सं. ६९६
४८.	महाकाल (संग्रहालयया लुखाय् च्वंगु)	१२४ X ४६	ने. सं. ७९४
४९.	रञ्जना आखःया शिलापत्र (शाक्यभिक्षु मैत्रिचन्द्रया स्वयम्भू जीर्णोद्धारयागु)	८६ X ४०	
५०.	यमारि	२८ X २०	
५१.	उपदेशमुद्रा अवलोकितेश्वर (घातु)	४४ X १७	वि. सं. २०२७
५२.	शिलापत्र (क्रकुच्छन्द चैत्य आदि थासय् त्वहँतं सियाव्यूगु)	५० X ४०	ने. सं. ९६३
५३.	महाअक्षोभ्य तथागत लुं सिया धातुया	४६ X ३०	ने. सं. ९३६
५४.	दीपङ्कर तथागत लुं सिया धातुया	८४ X ४६	ने. सं. ९९३
५५.	महाअमिताभ तथागत लुं सिया धातुया	४० X २८	ने. सं. ९४४
५६.	महावैरोचन तथागत (धातुयागु)		ने. सं. ९४३
५७.	मन्त्रिवर भीमसेन थापा	२० X १०	
५८.	हरिहरिवाहन लोकेश्वर (अभिलेख युक्त)	२८ X २६	
५९.	वैरोचन तथागत (अभिलेख युक्त)	२५ X २२	

श्रीस्वयम्भू महाचैत्य



चिन्तामणि लोकेश्वर

६०.	अक्षोभ्य तथागत, महाकाल	
६१.	श्री ३ रणवहादुर शाह जोगमाया महारानी	३० x २३
६२.	अक्षोभ्य बुद्ध	२५ x २०
६३.	शिलापत्र (स्वयम्भू महाचैत्य जीर्णोद्धार वज्रआयुरोषमणि लामाद्वारा) खण्डित जूगु बाकूदःगु	६२ x ५२ ने. सं. ८७८
६४.	अमोघपाश मण्डल (कचिरंग भरय् यानाः पोतासं च्वयातःगु)	११८ x ११८
६५.	भिक्षाटन बुद्धमूर्ति (मृत्तिकामय मूर्ति)	२२० x ७५
६६.	महापरिनिर्वाण मूर्ति बुद्ध (मृत्तिकामय मूर्ति)	२२४ x ६४
६७.	वैरोचनया न्ह्योने सतल स्थापना शिलापत्र	६२ x ५३ ने. सं. ६६०
६८.	दोर्जे छेवाङ्ग नोर्बु	४३ x २८
६९.	पञ्चरक्षा युक्त काष्ठतोरण (अभिलेख युक्त)	८२ x १२१

[२७] चिन्तामणि लोकेश्वर

थ्व चिन्तामणि लोकेश्वर मंगल बहुद्वार चैत्यया लिउनेसं च्वंगु छेया किलासय् लिधंकाः तइतःगु खः । वर्तमान थुगु मूर्ति स्वयम्भू मूर्ति संग्रहालय दय्के धुँसेलि अन दुने तयाः आदरपूर्वक सुरक्षित यानातःगु दु । थुगु मूर्ति स्वयम्भू स्थित विविध मूर्तित मध्यय् छगू उत्कृष्टगु सुन्दर मूर्ति खः ।

थुगु मूर्ति चिन्तामणि वृक्षया क्वस्सं शालत्रज्जिका मुद्गा यानाः त्रिभंग पोजय् अर्द्धसमपद आसन यानाः दनाच्चंगु दु । जवगु ह्लातं वरदान स्वरूप रत्नमाला ज्वनाः खवगु ह्लातं चिन्तामणि वृक्षया सिमा कचा क्वछुइके थे यानाः ज्वनाच्चन । थ्वसपोल चिन्तामणि लोकेश्वरया उष्णीष चूडामणि युक्त शिरस न्याचो दइच्चंगु रत्नमुकूट, ह्वाय्पनय् रत्नकुण्डल व कर्णपुष्पिका एवं ब्वहलय् कुलिचिगु थःगु सँ क्वकयातल । नुगःपाचय् कण्ठी व अले थ्वया क्वस्सं रत्नमाला व पुष्पमालाया रूपय् निपु सिखः क्वक्याय्कातःगु दु । ह्लातय् रत्नया बाजु व चुल्या न्ह्याकातल । उकिइसं खवगु ह्लाया च्वलापचि व अंगूपचिनय् नवरत्न जडित अंगू अथे हे सिकापचिनय् नं सुवर्णया अंगू न्ह्याकाः सुसज्जित यानातल, अथे हे जवगु ह्लातय् नं । त्यफुचिया क्वस्सं मोतिया मेखला जभि एवं सालुगु धर्के बुट्टा दइच्चंगु पातवस्त्रया धोति चिकातइतल । पालि च्वस्सं रत्न जडित अलङ्कार खनेदु ।

थुगु मूर्तिया जःखः निखेसं चिन्तामणि वृक्ष अङ्कित यानातल । थुगु चिन्तामणि वृक्षयात थुगु प्रकारं भावपूर्ण अलङ्कार सजय् यानाः शोभा वृद्धि यानातःगु जुल—

थुकिइ रत्नमञ्जरी वान्याकातःह्य ह्यखा जुकाः निधिदर्शन नागराजं सिमा कचा बेह्य जुयाः वनाच्चंगु क्यनातल । एवंकमं थुगु सिमाय् ह्वाय्च्वंगु सयाच्चंगु दरिद्र दुःख शान्त जुइगु अमूल्य रत्न, सकल व्याधि दुःख शान्त यानाः पूर्ण आरोग्यता प्राप्त जुइगु भैषज्य जात सुगन्ध सुन्दर पुष्प तथा

दिव्य सुख सौभाग्य लाभ जुइगु दिव्य अलङ्कार, थःम्हं इच्छा यानागु तक दइच्चंगु भद्रघट कलश, जिनक्षत्रयात स्वागत सत्कार याय्गु पूजा परिष्कार—सिन्दुरदानि, दीपभाण्ड, स्फटिकमणि, स्वांधकि समेत तयाः छायापा तइतःगु । उकिइसं थुगु सिमाया फुसय् त्रिरत्न फल तकं सय्काः क्यनातःगु दु । थुगु सिमा कचाया उख्येथुख्ये फसि पाकय् जुयाच्चंगु खनाः माकःत हर्षित जुयाच्चंगु अथे हे कंगः पंक्षित प्रफुल्लित जुयाच्चंगु भाव प्रदर्शित यानातःगु नं दु । गथे सिमाया नां खः अथे हे भक्तजनपिनिगु चिन्तनानुसार फल विइगु सिमा जुयाच्चन । लिसेलिसें थ्व नं क्यनातःगु खनेदु—चिन्तामणि वृक्षया क्वस्सं च्वनाः जगतोद्धार याय् धकाः प्रतिज्ञा यानाच्चंह्य गुह्यसिनं गुगु चिन्तना यात उम्हेसित उगु तक वरदान विइत तत्पर जुयाच्चंह्य वसपोल श्रीचिन्तामणि लोकेश्वरया पूजा सत्कार निम्ति नं थुकिइ जलधारा प्रवाह याकातःगु सुन्दर दृश्य नं अङ्कित यानातःगु जुल । मेगु अर्थय् आशा तृष्णातुरं छतपटय् जुइकाच्चं पि प्राणिपित बोधि अमृत जलधारा त्वंकाः तृप्ति यानाः परम सन्तोष प्रदान यानाच्चंगु नं जुल ।


थ्व हे चिन्तामणि वृक्ष क्वस्सं स्वां छफो छफो ज्वनाः सुविनीतपूर्वक प्रार्थना यायां थःगु सदिच्छा पूर्ति निम्ति वसपोल चिन्तामणि लोकेश्वरया खाः तुंके स्वयाः प्रार्थना यानाच्चं पि निह्य भक्तजनपि नं उपस्थित यानातल ।

थुगु मूर्तिया दानपति वणिक व्यापारी जीवभारो धइह्यसिनं व्यापार लक्ष्मी वृद्धि जुइमा धइगु कामना यासे अतिकं श्रद्धा भक्ति तयाः लक्षण शास्त्रया प्रमाणकथं तालमान मिलय् जुइक दय्के सःह्य कुशल कलाकारयागु ह्लातं दय्के बियाःलि ने. सं. ५३६ आश्विन पूर्णिमाया दिनस प्रतिष्ठा याकूगु जुल ।

[२८] देवाधर्मा गुम्बा (मार्वेल्हाखाङ्)

थ्व गुम्बा भुटान देसया प्रसिद्ध लामा देवाधर्मा धइह्यसिनं नेपाः व तिब्बतया बुद्धधर्म समन्वयात्मक प्रतिनिधित्व याय्त धर्मराजिक वसपोल श्रीस्वयम्भू महाचैत्यया पश्चिमपाखे निगू तला यानाः नेपाः व सँदेसया कलाकृति जाय्काः थःगु हे पहलं दय्कातःगु गुम्बा जुल । थुगु गुम्बाया न्ह्योनेपाखे लुंया तिकिळ्याः तयाः च्वय् कःसि तिब्बती ढंगं चाःतूगु पौ तयाः शोभा वृद्धि यानातःगु दु । थ्व गुम्बा दय्का वनाःलि करीब सच्छि व फिदँ फिन्यादँ लिपा ने. सं. १०२८ सालं अकस्मात् मिं नयाः क्षतिग्रष्ट जुल । थ्व हे दँ सिक्किमया जुजु ताशिनाम्ग्यालया महारानी श्री ३ चन्द्रशम्सेरया महारानी नाप त्वाय् चिने धकाः वयाच्चंगु इलय् थुगु गुम्बाया दुरावस्था खनाः थः स्वामियात जाहेर यानाः आर्थिक सहयोग कयाः थुगु गुम्बाया पुनर्निर्माण यानाब्यूगु जुल । वर्तमान थुगु गुम्बाया स्वरूप

श्रीस्वयम्भू महाचैत्य



देवाधर्मा गुम्बा

अग्निकाण्डं लिपायागु खः । तर ह्लापा दय्कातःगु गुम्बा थौंकल्लय्यागु स्वयाः नं विशाल व कलात्मक
जू धइगु स्थानीय बुरापाकातय्गु धापू दु ।

थुगु गुम्बा तयार जुसेलि ने. सं. १०२६ फाल्गुणशुक्ल तृतीयाखुनु विधिवत् जीर्णोद्धार प्रतिष्ठा
जुल । थुगु गुम्बाय् निम्नलिखित बुद्ध मूर्ति तयातःगु खनेदु :—

- | | | | | | | |
|-----|-------------|-------|---------------|-----|------|--------|
| (१) | दीपङ्कर | तथागत | वज्रासनास्थित | लुं | सिया | धातुया |
| (२) | शाक्यमुनि | " | " | " | " | " |
| (३) | आर्यमैत्रेय | " | " | " | " | " |
| (४) | अमिताभ | " | " | " | " | " |
| (५) | भैषज्यराज | " | " | " | " | " |

दीपङ्कर, शाक्यमुनि, मैत्रेय बुद्ध थुपिं स्वहा असं जःधुंछेया कुलवीरसिंह तुलाधरं ने. सं.
१०२६ फाल्गुणशुक्ल तृतीयाखुनु तःगु जुल । अमिताभ व भैषज्यराज तथागत वि. सं. १६७१ कार्तिक-
शुक्ल तृतीयाखुनु न्हूसालया मानन्धर मानवीरं प्रीति याना थकल । ने. सं. १०२१ सालं सिख्वंमू
बाहाःया शाक्यभिक्षु देवधं चन्द्रमायां जीर्णोद्धार यानाः तग्गवःगु माणे छगः नं तयाथकूगु दु । लिस्सें
ने. सं. १०३८ सालं श्रीस्वयम्भू महाचैत्य जीर्णोद्धार याय्त आपालं श्रद्धा चन्दा संकलन यानाः
दानपति स्वरूप जुया विज्याःपि गुरु शाक्यश्री व दुक्पा लामा शेराव्दोर्जेपिनिगु प्रतिमूर्ति नं दय्काः
व्वयातःगु खनेदु । लिस्सें सँदेसया धर्मप्राण काङ्ग्युर नामक सद्धर्म ग्रन्थ १०१ थू नं दराजय् तयाः
सुरक्षित यानातःगु दु । अज्ज थन सुमेरुया ध्यानकथं मिलय् यानाः दय्कातःगु धलवतयागु रत्नमण्डल
छगू नं दत्थुइच्चंगु ऊयाःफलय् तयाः प्रदर्शित यानातल ।

थुगु गुम्बाय् विशेष पर्व दिन व अले सुं मृतात्मा व्यक्तिपिनिगु शान्ति कामना यासे सलंसः
द्वलंद्वः छोकुं चा ध्यःदिवा च्याकाः पाठ पूजा याःवइपिं भक्तजनपिं नं कम मजू । थन अखण्ड दीपया
रूपय् तप्त्वाःगु ध्यःदिवा छप्वाः नं न्ह्यावले च्याकातइतःगु दइ । थ्व हे कारणं थ्व गुम्बाया नां सँदेसया
भासं 'मार्मेह्लाखाङ्' धयातःगु जुल । गुलिसिनं थथे नं धाःगु दु—थुगु गुम्बाया प्रमुख देवता दीपङ्कर
तथागत जूया निम्ति नं मार्मेसाङ्गयेया नामं मार्मेह्लाखाङ् जुल । सर्वप्रथम थुगु गुम्बा दय्कूह्य दानपति
देवाधर्मा लामाजु जूगुलि वसपोलया नामं 'देवाधर्मा गुम्बा' धकाः नं धाइ ।

थुगु गुम्बाय् च्वंगु भित्ती चित्रया नां थथे खः—

- | | | | |
|-----|----------------|---|----|
| (१) | पञ्चत्रिंश | तथागत | ३५ |
| (२) | अमिताभ | तथागत | १ |
| (३) | अष्टबोधिसत्व | | ८ |
| (४) | षडक्षरी | लोकेश्वर | १ |
| (५) | गुरु पद्मसम्भव | | १ |
| (६) | देगःया | चव्य् मण्डलाकारया रूपय् वज्रसत्त्व मण्डल | १ |
| (७) | उख्येंथुख्यें | लामा लामाजुपिनिगु चित्रत नं खनेदु । गुगुं नष्टभ्रष्ट जुयाः सिइ मदय्
धुकूगु नं दु । | |

श्रीस्वयम्भूया अग्र्य च्वनाः पठन पाठ पूजा यानाः भक्तिभाव याइपि च्वनेत ज्याछिकेत थाय् चकंकेत स्वयम्भू विकास मण्डलयागु अनुरोध व लामा कुस्योछेचुयागु सदिच्छाप्रति नं ध्यान तयाः छुं वर्ष न्ह्योतकं कय्कुंगु थें ज्यामछिगु थें जुयाच्चंगु महशूस यासे श्री ५ या सरकार पुरातत्त्व विभागं समुचित व्यवस्था यासे सुविधा प्रदान यानाब्यूगु दु ।

थुगु गुम्बाया छचलि तलाय् विभिन्न प्रकारया मूर्तित पंक्तिबद्ध रूप्य सुरक्षित याना तइतःगु दु :—


- | | |
|-----------------------|-----------------------|
| १. षडक्षरी लोकेश्वर | ११. वैरोचन तथागत |
| २. शाक्यश्रीलामा | १२. कर्मापा लामा |
| ३. महाकाल | १३. सप्तलोचनी तारा |
| ४. षट्भुज वागीश्वर | १४. बुद्ध शाक्यमुनि |
| ५. समन्तभद्र बोधिसत्व | १५. अमिताभ तथागत |
| ६. अमिताभ | १६. अक्षोभ्य तथागत |
| ७. अमिताभ | १७. पद्मपाणि लोकेश्वर |
| ८. वज्रगुरु पद्मसंभव | १८. वज्रसत्व गुरु |
| ९. अमिताभ | १९. अमिताभ तथागत |
| १०. अवलोकितेश्वर | २०. वैरोचन तथागत |

[२६] हारती मन्दिर (रत्नपीठ)

थुगु मन्दिर स्वयम्भू महाचैत्यया पश्चिम उत्तरया कुनय् लानाच्चंगु निगू तला दइच्चंगु दक्षिण-पाखे स्वयाच्चंगु छत्रशैली मन्दिर खः । हारती अजिमायाप्रति श्रद्धा भक्ति तयाः विभिन्न भक्तजनपिसं इलय्-व्यसय् अनेक कीर्ति द्रवहलपा तइतःगुलि यानाः थुगु देगः छगलं धयाथे सुवर्णमय उज्ज्वलपाखे सुशोभित जुयाच्चंगु खनेदु । हारती मन्दिरय् दुहांवनेगु लुखाफुसय् लुं सियातःगु धातुया कलात्मक तोरण स्वंगू ऊवःलाक तयातल । मूलगु तोरणय् पञ्चरक्षादेवी सुसज्जित यानातल । अथे हे लुँपौया कवस्सं कवस्सं तयातःगु लुँया तिकिऊयाःया विचय् विचय् षोदश पूजादेवीपिनिगु लुं सियाः मूर्ति अङ्कित यानाः विलंपौ तुनासिँ तयाः स्वागत यानातल ।

थुहा हारती अजिमा वसपोल श्रीस्वयम्भू महाचैत्यया धर्मपाल स्वरूपं संरक्षिका जुयाच्चंगु जुल । सुतां गुम्हेसिनं श्रीस्वयम्भू महाचैत्यप्रति दोष व अपराध कर्म याइ उम्हेसित दमन याइहा जुयाः भक्तजनपित शान्ति, पुण्टी, वशी, सिद्धि बियाबिज्याइहा धकाः प्रसिद्ध जुयाच्चन । थुलि जक मखु अज्ज थ्व हारतीदेवी पाञ्चिका नाम यक्ष (जम्बल) या स्त्री जूया निम्ति आपालं धन धान्यरत्न वरदान बिइफुहा दारिद्र दुःख फुकाबिइहा धकाः नं प्रशंसा यानातल । थ्व हे कारणं हारती

श्रीस्वयम्भू महादेव



हारति देगः

79

15

• ति

महायक्षिणीया सगणपरिवारिणि च्वनाः स्वयम्भूया भूगर्भय् च्वंगु रत्ननिधियात सुरक्षित च्वंगु जूया निर्मित नं थुगु थाय्यात रत्नपीठ (रत्नपुर) धकाः नं धयातल । उकिं हारतीयात छाहाय्केगु पूजा-सफुतिइ थथे स्तोत्र यानावयाच्वन :-

रत्नपीठस्थिता देवीं गौरवर्णसहप्रभां ।
 इसद्वशीत वदनाग्नि नमामि जगत्मोहिनीम् ॥
 पञ्चाणां शतपुत्राणां परिवारमहोत्सवाम् ।
 बुद्धशासन स्थिता देवीं हारतीं प्रणमाम्यहम् ॥

अज्ज हारतीयागु विषय कयाः पञ्चरक्षा महामायूरी अध्यायय् थथे धयातःगु दु- पाटलीपुत्र वरदेसया शुचिगन्ध नगरया सर्वतोभद्रविमान नामक प्रासादय् च्वनाच्वंह्य । थ्वय्कः हारतीया काय्पि ५०० म्हाय्पि ५०० व अले जिलाजं ५०० परिवारया समूहल्य् च्वनाः महोत्सव यानाच्वंह्य । थुह्य यक्ष राक्षसपि मध्यय् तच्चोगु ऋद्धि व बल दुह्य देसदेसान्तरय् अलग अलग थाय् दय्काच्वंह्य हारती महायक्षिणी जुल । तर थुपि फुक्क काय् म्हाय्पिनिगु प्रतिनिधिकथं स्थानीय जनसमाजय् न्याह्य मस्तय्गु नां उल्लेख जुयाच्वंगु खनेदु :-

- (१) धनभाजु - लुकुंछिसे
- (२) धनमय्जु - व्यकुंच्यासे
- (३) वासिभाजु - जवय् मुलय् तसे
- (४) वासिमय्जु - खवय् मुलय् तसे
- (५) जिलंभाजु - मुलक्वस तसे (लाताभाजु)

उकिं न्ह्यात्थाय् नं हारतीयागु मूर्ति, चित्र दय्काः च्वयातःसां थुपि न्याह्य मस्त दया हे च्वनी । स्थानीय जनतातय्सं हारतीयात विभिन्न नामं पुकारा यानावइच्वंगु खनेदु :-

- (१) हारती माजु
- (२) अजिमा द्यः
- (३) मय्जुदेव
- (४) हारती महायक्षिणी
- (५) हारती वज्रयक्षिणी
- (६) सातला माजु
- (७) स्वयम्भू संरक्षिका धर्मपाली
- (८) धाक्वसिक्वमा मचाप्यासि, इ०

श्वसपोल हारतीदेवीयागु विषयय् कयाः स्वायम्भू पुराणय् थथे वर्णन याना तइतल? :-

ततश्च हारतीदेवीं पञ्चपुत्र शतैर्वृताम् ।
श्रीस्वयम्भू पश्चिमाग्रे दक्षिणास्यं संस्थापितम् ॥
ये च या वा मनुष्याश्च पञ्चोपचारकैरपि ।
मदचधारादिभिः पूज्यैः मांसैर्वलिभिर्मीनकैः ॥
लेह्यैः पेयैः खानैः पानैः भक्तपिण्डास्यां पूजितम् ।
तस्या पुण्या प्रसादाश्च न जातु इत्युपद्रवान् ॥
इति ज्ञात्वा च मानूष्यास्तथा सेवां सदा कृतात् ।
सदा ये या मानूष्याश्च निरोगीपदं लभ्यते ॥
अत्रजा अन्यजा लोकाः शैवापि बौद्धसेवकाः ।
हारोत्थामपि यक्षीण्यां सदा मुदा प्रपूजितम् ॥
अथवान्यत्रजाश्च बौद्धाश्चापि सेवां कृतम् ।
हारीत्याश्च सुदेव्याश्च सदा च मानितं मुदा ॥
सर्वेषामपि बौद्धानां बहिर्विहारे आश्रमे ।
अतीत बुद्धस्याज्ञया सदा विघ्नान् सुरक्षितम् ॥
इत्येवश्च प्रकारेण स्वयमभोश्च प्रभावतः ।
हारीत्या किल देव्याश्च अत्र कित्तरक्षितम् ॥

थुह्य हारतीदेवीयागु विषयय् परम्परागत रूपं चलय् जुयाच्चंगु छगू जनश्रुति नं दु—

गुवलय् थ्व ज्योतिर्मय श्रीस्वयम्भू त्वपुइत शान्तिकर गुरुं सकल देवदेवतापित आवाहन यानाः
स्वयम्भू ज्योतिरूपयात विधिवत प्रतिष्ठा यानाः त्वपुयाः श्रीस्वयम्भू महाचैत्य तयार यात । थ्व स्वयम्भू
महाचैत्ययागु निर्माण कार्यय् दशदिग् लोकपाल ब्रह्मा, विष्णु, महेश्वर, इन्द्र, यम, वरुण, कुवेर, अग्नि,
नैऋत्य, वायु, ईशान, चन्द्र, सूर्य एवं यामा, तुषिता, निर्माणरति, परनिर्मित वशवर्ति, ब्रह्मपार्षद्य,
ब्रह्मकायिक, ब्रह्मपुरोहित, महाब्रह्मा, परिताभा, अप्रमाणाभा, आभाश्वरा, सुदर्शना आदि देवभुवनं
देवतापि विज्यानाः थःथःगु अधिकार विशेषं छगू छगू ज्या यानाः सहयोग प्रदान यानावन^२ । लिस्से
सुखावती भुवनं अपरिमिता तथागत विज्यानाः तयाथकूगु स्वयम्भू महाचैत्यया दकलय् सकलय् च्वय्च्वंगु
उष्णीष चूडामणि सुवर्णं छत्र छगू धाःसा धेचुला बेक्वयाच्वन ।

थथे जूगु खनाः कार्यकारिणी एवं दर्शकजनपि सकलें आश्चर्य जुल । उकिइसं गुरु शान्तिकरजु-
यात जा तच्चोगु विस्माद जुयाच्वन । जि उलिमछि देवदेवतापिनिगु हारगुहार कयाः थुगु स्वयम्भू

१- स्वायम्भू पुराण, पृ. ४२८

२- स्वायम्भू पुराण, पृ. ४१८

महाचैत्य तयार याना तर गजू छगू धाःसा न्ह्याक्व याःसां संसां थिक रूपं बतांजुक्व थातं तय्मफु । गुबले उख्ये गुबले थुख्ये स्वयाः घेचुला च्वनिइगु थ्व छु जुल गुगु जुल धकाः अथे थथे धाय् मफुसेलि शान्तिकर गुरुं हानं पुरश्चरण च्वनाः वसपोल स्वयम्भू भगवान्याके प्रश्न न्यना स्वत । स्वयम्भू भगवानं प्रश्न जुसे आज्ञा जुल—

‘भो शान्तिकर ! थुगु स्वयम्भू महाचैत्ययागु सुवर्ण कलश ध्वज गजू फस्वःगु घेचूगु कारण मेगु मखु, छता हे जक दु व छु धाःसा—

हारती महायक्षिणीनं श्रीस्वयम्भू भगवान्यागु सेवा भक्ति यानाच्चने धकाः ह्लापांनिसे थन वयाच्चंम्हेसित मद्यमांस आहार याइह्य धकाः दोषारोपन यानाः शंका यानाः हारतीयात थुगु थासं हतय् याय्गु छं मतिइ तल । हारती महायक्षिणीनं थ्व आशिका यानाच्चंगु दु कि थुगु पवित्रभूमि जि गुबले स्थानान्तर जुइ म्वाःलेमा न्ह्याक्वले श्रीस्वयम्भूयागु जक सेवा भाव भक्ति यानाच्चने दय्मा धकाः प्रार्थना यानाच्चंगु जूया निम्ति सुवर्ण कलश ध्वज गजू थातं च्वनेमफुगु खः । गुबलय् हारती महायक्षिणीयागु इच्छा पुरय् जुइ उबलय् थुगु गजू इकिधिकि मसँसे स्थिरं च्वनाच्चनी, थुकिइ छुं बिघ्न उत्पात जुइ मखु ।

अतःएव भो शान्तिकर ! वइत योगु थाय् व हे रत्नपीठ व वया इच्छा जूगु भोजन भुक्तिमुक्ति तत्त्व मिलय् यानातःगु नय्गु त्वनेगु सामग्री ज्वरय् यानाः न्ह्योने तया व्यु, लिस्से अनयात योग्यगु ज्याया अभिभार बिया ति । थुलि यात धाःसा तिनि थुगु महाचैत्ययागु गजू स्थिरं तप्यंक च्वनाः देसय् महामङ्गल जुयाच्चनी ।’

थुलि स्वयम्भू भगवान्यागु दिव्यसन्देश न्यनाः गुरु शान्तिकर अत्यन्त हर्षित जुयाः वसपोलयागु आज्ञानुसार हारती महायक्षिणीयागु इच्छा पुरय् यानाव्यूगु जुल । थ्वया नापनापं शान्तिकर गुरुं हारतीयात ‘छलपोल थुगु थासय् च्वनाःलि छु ज्याया अभिभार कयाः बिज्याय्गु ? अथे सुमुक च्वनाच्चने मज्यू ।’ धकाः धासेलि थुकिया लिसलय् श्रीहारती महायक्षिणीनं थ्व वाचा ह्लाःगु दु—

- (१) गन गन बुद्ध भगवान्पिनिगु मूर्ति व चित्र प्रतिष्ठापित जुयाच्चनी, अन अन वनाः ह्लि स्वंगू प्रहरय् बिचाः याःवने ।
- (२) अतीत बुद्धपिनिगु आज्ञानुसार वही विहारय् सकभनं मार बिघ्न दोषयापाखें रक्षा याय्गु ज्या यानाच्चने ।
- (३) जि मस्तय्के गुलि माया ममता दु, उलि हे फिनिदँ मदुनिपि मस्तय् जि सुदृष्टि स्वयाः बिचाः यानाच्चने ।
- (४) स्वयम्भू धर्मधातु वागीश्वरयागु सेवा भक्ति यानाः थुगु स्थानयात नं बिचाः संचाः यानाच्चने ।
- (५) गन गन बुद्धधर्मयागु उत्सव जुयाच्चनी, अन अन सेवा चाकरी यानाः गगनविहारी जुयाः चाःहुलाच्चने ।

थुलि हारती महायक्षिणीयागु बाचा न्यनाःलि शान्तिकर गुरु तस्सकं खुशि जुयाः अनुत्तरतन्त्र वज्रयानया विधिकथं वसपोल हारतीमातायात परितुष्टि व देस शान्ति एवं दानपतिया सर्व कार्य सिद्धि प्राप्तिया लागी 'छाहाय्के बलि-पूजा' याय्गु स्थिति वन्देज दय्का थकल, गुगु प्रथा थौतकं परम्परा कायम जुयाच्चंगु दनि । थुकिया कारणं स्वयम्भू क्षेत्रयागु प्रतिष्ठा ह्लियाह्लियं वृद्धि जुजु वनाच्चंगु दु ।

थ्वसपोल हारतीमाता स्वयम्भू धर्मधातुया प्रमुख सेक्रेटरी रूपय् धर्मपाल थें जुयाच्चंगु दु, लिस्सें कोगु देसय् सकभनं आकाशचारी जुयाः चाःचाःहुलाः छेँय् छेँय् नं बिचाः संचाः याःवनाच्चनी । थथे धकाः स्थानीय जनतापिसं तःधंगु श्रद्धा विश्वास तयावयाच्चंगु खनेदु । थुकियागु कारणं थौयागु युगय् मातानीतय्गु गुगु अभिमान शुरु जुयाच्चन उगु विश्वासयागु ज्वलन्त उदाहरण खः । गुलिसितं हारतीमाता हे विज्याइ, गुलिसितं लाताभाजु गुलिसितं धनभाजु आदि थः मस्तय्त नं दूत स्वरूप छ्वयाच्चनी । मातानीतय्गु विषयय् श्रद्धा तयाः अध्ययन व अनुसन्धान याना स्वया यंकल धाःसा थ्व खँ पूरा असत्य धकाः धाय्फइ मखु । थुकिइ दुने थ्व हारती मातायागु निःसन्देह छगू रहस्य सुलाच्चंगु दु । थ्व हे कारणं थ्वसपोल हारती मातायागु प्रभाव (सत्य-सिद्धि-प्रत्यक्ष) प्रति विश्वास याइपि नं कम मजू ।

शाक्यमुनि बुद्धं हारती महायक्षिणीयात गुगु प्रकारं दमन यात उपदेश बिल धइगु अप्पो खँ सिइकेगु इच्छा दुपिसं प्रस्तुत ग्रन्थया २६ गूगु अध्याय स्वयादिसं ।

[३०] स्वयम्भू बही

थुगु बही हारती मन्दिरया जवपाखे निगू तला दइच्चंगु पूर्वाभिमुख यानाः दय्कातःगु विहार जुल । थुगु बहिर्लि पिहांवय्वं न्ह्योनेसंतुं हारतीमाजुयागु देगः लानाच्चंगु दु । खतु थुगु बही प्राकृतिक तथा मानविक प्रकोपया कारणं ह्लापायागु स्वरूप मखय् धुंकल, परिवर्तन जुल । थन दुने ह्लापा ह्लापायागु वास्तुकला शैलीनाप मिलय् जूगु बही विहारय् दय्माःगु प्राचीन कला संस्कृतियागु स्वरूप आपालं ह्रास जुइ धुंकल ।

थुगु बही ने. सं. ५१३ सालं श्रद्धालु दानपति जोतिराज धइह्यसिनं निर्माण यानावंगु जुल । थुगु बहीया पूजारी व बिचाः संचाः याय्त पारावर्त महाविहार (इतुं बाहाः) या शाक्यभिक्षु श्रीमधंजु-यात लःह्लानाथकूगु जुल । थ्व हे परम्पराकथं थुगु बही इतुं बाहाःयापिसं अधिकार चलय् याना वइच्चंगु धयातल । गुलिसिनं थथे नं धाःगु दु- इतुं बाहाः दय्कूह्य केशचन्द्र ह्लापा सारै दरिद्र जुयाच्चंबलय् वइत थ्व हे स्वयम्भू जंगलय् च्वंपि बखुंतय्सं लुँखि फाना ब्यूगुलि यानाः थुगु आयस्तां इतुं बाहाः निर्माण जुल । थ्व हे कारणं थ्व इतुं बाहाःयापिसं स्वयम्भूया बही बिचाः याकेगु यानातःगु ।

थुगु बहिलिइ मेमेगु बही विहारय् थे छह्य जक महाकाल प्रतिष्ठा यानावइच्चंगु मखु कि खुह्य महाकाल ऊवःलाकं तयातःगु खः । थुगु थासय् खुह्य महाकाल तःगुया रहस्य छु खः व कारण थुइके मफुनि । अथे नं जितः विश्वास दु, षट्कृतया प्रमाणं तयातःगु जुइफु धइगु । थ्व छगू अनुसन्धानया विषय खः । थौं थुपि महाकालत छह्य नं थुगु विहारय् खनेमदय् धुंकल । थुगु बही जीर्ण जुयाः स्यनावसेलि स्वयम्भू विकास मण्डलयात न्ह्योनेयागु छद्या अन्तरराष्ट्रिय बौद्ध ग्रन्थालय दय्के निम्ति तोताव्यूगु जुल । उवलय् थुगु थाय् पूर्ण रूपेण नवनिर्माण याय्गु आवश्यक जुसेलि थुगु बहीया महाका-
छय्लिइ च्वंपि व्याक्व महाकाल स्वयम्भूस दय्कूगु अन्तरराष्ट्रिय मूर्ति संग्रहालयय् यंकाः सुरक्षित यानाव्यूगु दु ।

स्वयम्भू शान्तिपुर महाविहारस गुबलय् नेपाःया निम्ति बुद्धधर्म अध्ययन याय्गु केन्द्र जुयाच्चन उवलय् थ्व बही बुद्धधर्मया प्रकाण्ड विद्वान जुयाच्चंपि आचार्य प्राध्यापकपि बासं च्वनिइगु थाय् नं जुयावन । फलस्वरूप थौं थुगु थासय् स्वयम्भू विकास मण्डलयागु कुतलं 'अन्तरराष्ट्रिय बौद्ध ग्रन्थालय' प्रस्थापन जूगु जुल । थ्व गौरवया विषय खः ।

थुगु बहीया दुने भगवान् बुद्धया जःखःच्चंगु मूर्ति :-

- | | |
|-----------------------------|---------------------|
| (१) बुद्ध भूमिस्पर्श मुद्रा | (२) सप्तलोचनी तारा |
| (३) पद्मपाणि लोकेश्वर | (४) त्रिरत्न मूर्ति |
| (५) षडक्षरी लोकेश्वर | (६) आर्यतारा देवी |

बहिलिइ दुहांवनेबलय् खवपाखे अंगलय् च्वंपि :-

- | | |
|-----------------------|------------------------------------|
| (१) धर्मचक्र लोकेश्वर | (२) प्रज्ञापारमिता |
| (३) सप्तलोचनी | (४) धर्मधातु वागीश्वर महामञ्जुश्री |
| (५) सप्तलोचनी | (६) मञ्जुश्री |
| (७) आर्यतारा | |

[३१] अन्तरराष्ट्रिय बौद्ध ग्रन्थालय

स्वयम्भू बहीया आधिकारिक श्रद्धालु दातापिनिगुपाखें स्वयम्भू बहीया न्ह्योनेच्चंगु छद्या धुछि बही छेँ स्वयम्भू विकास मण्डलयात हस्तान्तरित यानाबिल । विकास मण्डलं बसपोलपित आपाः आपालं धन्यवाद देछासे सहर्ष उगु स्थान स्वीकार यानाकाःगु जुल ।

थुगु जग्गा प्राप्त जुसेलि न्हूगु व्यवस्था यानाः आमूल परिवर्तन यानाः थुगु थाय्यात त्वःगु किसिमं ह्नाय्कं खापा सहित यानाः पञ्चऊयाः तयाः शोभा वृद्धि यानाः दय्काव्यूगु जुल ।

श्रीस्वयम्भू महाचैत्य दर्शन, पूजन एवं अध्ययन, अनुसन्धान याय् वइच्चनिइपि स्वदेशी तथा

विदेशी विद्वान् व पर्यटकपिनिगु लागी उपयोगी जुइगु किसिमं थुगु ग्रन्थागार वि. सं. २०२७ सालं स्थापना जूगु खः । थ्व भवनया शिलान्यास तत्कालीन प्रधानमन्त्री श्री सूर्यवहादुर थापाजुं यानादिइगु खः ।

थुगु ग्रन्थागारं बुद्ध जन्मभूमि नेपाःयागु छगू समस्या पूर्ति यानाब्यूगु दु । काठमाण्डू उपत्यकाय् येँ, यल, खप्त, सक्व, क्यपू आदि थासय् गुलि नं बौद्ध विहारत दइच्चन अन उगु थासय् 'बौद्ध ग्रन्थागार' दु धकाः गनं इतिहासय् च्वयातःगु खनेमदु ।

स्वयम्भू विकास मण्डलं थुगु महत्वपूर्ण ज्या याःगु सियाःलि भारत, पाकिस्तान, बर्मा, लंका, थाई, जापान आदि शाही दूतावासपाखें नं बौद्ध ग्रन्थत उपलब्ध जूगु दु । लिस्सें श्रद्धालु उपासक उपासिकापिसं नं थुगु ग्रन्थागार समृद्धि निम्ति थःके दइच्चंगु विभिन्न हस्तलिखित ग्रन्थत व थुगु थाय्यात आवश्यकगु नगदी जिन्सी सामानत नं बियाः सहयोग प्रदान यानादिइगु दु । थुकिइ नोलपत्रय् लुं आखलं च्वइतःगु बहुमूल्य ग्रन्थत नं दुथ्यानाच्चंगु खनेदु । नेपाःया बौद्ध वाङ्मय संस्कृत ग्रन्थ, संदेसया बौद्ध वाङ्मय तिब्बती ग्रन्थ व लंका बर्माया बौद्ध वाङ्मय पाली ग्रन्थत नं थन तइतःगु दु । अज्ज नेपाल भाषा, नेपाली भाषा, हिन्दी भाषा व अंग्रेजी भाषां छापय् यानातःगु विभिन्न बौद्ध पुस्तकत नं खनेमदुगु मखु । आशा दु, श्रद्धालु सज्जन महोदयपिनिगु सद्भावना व दानशील वृद्धि जुजुं वन धाःसा निःसन्देह थुगु ग्रन्थागार सुसमृद्ध जुजुं वनी । स्वयम्भू विकास मण्डलयागु विभिन्न रचनात्मक कार्यत मध्यय् थ्व 'अन्तरराष्ट्रिय बौद्ध ग्रन्थालय' नं छगू ज्वलन्त उदाहरण खः ।

[३२] देवावतार बोधिसत्व (भविष्यव्याकरण मुद्रा बुद्ध)

थुगु भव्य रूप सुन्दर शान्तगु बुद्ध मूर्ति ह्लापा थ्व हे स्वयम्भू बहीया उत्तर लङ्गया पिनेपाखे तयाः पश्चिमपाखे स्वकातःगु खः । आः थौंकल्लय् थुगु बही पुननिर्माण निम्ति स्थानान्तर यानाब्यूगुलि यानाः थ्व हे बहीया लिउनेपाखे ध्याकुंचाय् लाक तयाःलि पूर्व स्वकाः तयाब्यूगु जुल ।

स्वयम्भू क्षेत्रय् नं गुलि नं दनाच्चंगु मूर्तित खनेदु उलि मध्यय्सं विशालगु प्रस्तरमय मूर्ति थ्व हे धाय्फु । अज्ज काठमाण्डू उपत्यकास च्वंगु दनाच्चंगु त्वहंयागु बौद्ध, शैवया सम्पूर्ण मूर्ति स्वयाः नं थ्व हे तःधिकः जुइफु । उकिइसं छगू विशेषता थ्व नं दु — पद्मासनं निसें उष्णीष चूडामणि तक व प्रभामण्डल सहित छकू छधी हे जुयाच्चंगु मास रंगगु भुयूलाकंगु त्वहँतय् दय्कातःगु जुल ।

थुगु मूर्ति दय्कूगु समय अनुमानित ह्लय्गूगु शदी धकाः मानय् यानातल । थुगु मूर्तिया जवगु पालि भतीचा न्ह्यचिइकाः खवगु पालि छुं भचा लिसालाः मानो जगत् हितार्थया लागी प्रस्थान जुइत तयार जुयाच्चंह्य थें यानाः शान्त गम्भीरपूर्वक च्वनाच्चंगु दु । थ्व मूर्ति तालमान लक्षण मिलय् यानाः द्विभंग पोजय् उपस्थित यानातल । जवगु ह्लातं वरद मुद्रा याकाः खवगु ह्लातं थःगु वस्त्र चीवरचो ज्वंकाः ब्वहःया कवस्सं दिकाः क्यनातःगु दु । थुगु मुद्रायात भविष्यव्याकरण मुद्रा धकाः धाइ । उकि



भविष्य व्याकरण मुद्रा बुद्ध
(लिच्छवीकालीन)

थुगु मुद्राया नामं थुहा बुद्धयात 'भविष्यव्याकरण मुद्रा बुद्ध' धकाः मूर्तिकला शास्त्रविद् विद्वानतय्सं उल्लेख यानातल । खतु थुगु मूर्तियात थनया परम्पराकथं 'देवावतार बोधिसत्व' धाय्गु यानावइचवन । तर थ्व बोधिसत्वया मूर्ति मखु ।

थुगु मूर्तियात कुशल कलाकारं निर्जीव प्रस्तरयात सजीवता प्रदान याय्गुलिइ सफल जूगु खनेदु । छायाःसा थुगु मूर्तिया न्ह्योने च्वनाः स्वयाच्चव्वं मुसुहुं हिलाः धुसुहुं न्ह्याःविज्याइहा तुल्य यानाः नं थुकिइ शान्ति व महाकरुणाया आभास कल्का प्रदर्शित यानाव्युगु दु । थुकिइ आःतकं गनं अङ्ग प्रत्यङ्ग स्यंगु खने मदुनि, तर जवगु ह्याय्पनय् छुं भचा स्यनाच्चंगु खनेदु । मेगु सकभनं यथावत् सुरक्षित जुयाच्चंगु दु ।

[३३] स्वयम्भू क्वापाःछेँ

स्वयम्भू महाचैत्यया वायव्यकुलांपाखे चैत्य पार्कया न्ह्योने विहार रूप्य मानय् यानातःगु स्थान जुल । थ्व थाय्यात स्थानीय जनपिसं क्वापाःछेँ धकाः सम्बोधन यानावइचवन । थ्व क्वापाःछेँया छ्यलितलाय् क्वाचपाल देवता (क्वापाःद्यः) प्रतिष्ठा यानातःगु दु । थ्व हे क्वाचपाल देवताया कारणं थ्व छेँया नां नं क्वापाःछेँ जूवंगु खः । क्वापाःद्यः धइगु हे भगवान् बुद्धयागु नां खः । प्राचीन नेपाल भाषां भिक्षु संघपि च्वनिइगु थाय्या नां 'क्वाच' धाइ, थ्व हे भिक्षु संघपिनि नायक रक्षक पालक जूया निर्मित क्वाचपाल धाःगु खः । थ्व क्वाचपालया अपभ्रंश क्वापाःद्यः जूवन ।

थुगु थासय् स्वयम्भू महाचैत्यया पूजारी जुइपि द्योपाःलाः जुइपि बुद्धाचार्य शाक्यभिक्षुपिनि जक चूडाकर्म यानाः ह्याय्पलाः छिके धुंकाः क्वापाःद्यः अनि याकेत भागि याकेत संघय् दुथ्याकेत दुतयंकाः आवश्यक क्रिया याइगु थाय् जुल । थ्व थाय् स्वयम्भूया बुद्धाचार्यपिनि जक स्वतन्त्रगु विहार रूप्य मानय् यानावइचवंगु स्थान जुल । थुगु विहारयात श्रीसाह्येगु महाविहार धयावयाचवन ।

[३४] स्वयम्भूया चैत्य पार्क

हारती देगःया लिउनेपाखे क्वापाःछेँया न्ह्योने छगू खुल्ला स्थान दु । थन थुगु थासय् विभिन्न इलय् विभिन्न भक्तजनपिसं विभिन्न शैलीं निर्माण यानातइतःगु चीवाहाःतय्गु जमघट जुयाच्चंगु दु । गथे चन्द्रमाया ल्यूत्यू अनेक तारागण नक्षत्र चाःहुलाचवनी, अथे हे थुगु साह्येगु पर्वतय् चैत्यकुलनायक वसपोल श्रीस्वयम्भू महाचैत्य विराजमान जुयाच्चंगुलि यानाः थुगु थासय् चीवाहाःतय्गु जमघट जुयाचवन । थन थे इलिलिलि चीवाहाःत मुनाच्चंगु थाय् काठमाण्डू उपत्यकाय् गनं दइमखु । थुगु थाय् खास यानाः विभिन्न शैलीया चैत्यतय्गु खुल्ला संग्रहालय धाःसां अप्पो जुइमखु ।

चैत्य पार्कय् खनेदुगु प्रतिष्ठापित चैत्यतय्गु शैलीया नां थथे खः—

- (१) अशोक चैत्य (लिच्छवी चैत्य)
- (२) शिखरकूट चैत्य
- (३) वज्रधातु चैत्य
- (४) बोधिसत्व चतुर्व्यूह चैत्य
- (५) जलहर्षोपरि जिनालंकृत चैत्य
- (६) धर्मधातु जिनालंकृत चैत्य
- (७) ज्वालाबली युक्त चैत्य
- (८) अष्टकोणाकृति पद्मचैत्य
- (९) बुद्धचतुर्व्यूह चैत्य
- (१०) सुमेरू चैत्य


खतु थ्व चैत्य पार्कया न्ह्योने श्रीस्वयम्भू महाचैत्ययागु प्रभावं स्वयम्भू विकास मण्डलयागु ग्वसाःकथं ह्लापा लिपा मज्जुगु छांतं स्वदयंक येँ, यल व ख्वपया सकल सम्यक् देवता दीपङ्कर तथागतपि बिज्याकाः विधिवत् स्वागत याके धुंकूगु दु । लिस्सें अनेक सुन्दर चित्र दर्शनीय बहुमूल्य पौभाःतय्गु नं प्रदर्शनी जुयावन । थुलि जक मखु युवा कलाकारपिनिगु पूर्ण सहयोगं बुद्धजीवनी प्रदर्शनी नं जुयावने धुंकल । थुगु वर्षय् बुद्धप्रति स्वागत लुम्बिनी वन जात्रायागु काँकी प्रदर्शनी जुइगु दु । आशा दु, मेमेगु वर्षय् नं विभिन्न बोधिसत्वपिनिगु त्यागमय आदर्शयागु काँकी प्रदर्शनी जुजुं वनी ।

[३५] सख्वाः दय्केगु थाय्

थुगु थाय् शान्तिपुरं स्वयम्भूपाखे वनेबल्य् लँया सिथय् लानाच्चंगु अर्थात् चैत्य पार्कया लिक्संतुं च्वंगु थाय् खः । थुगु थाय् छगू जुयाः नं गाः निगू क्यनातःगु दु । छगू गालय् सख्वाः पवय्गु, मेगु गालय् लः मुंकेगु यानातल । खास यानाः श्रीस्वयम्भू महाचैत्यस सुं धर्मात्मापिनि सख्वाःपा याय्त सख्वाः दय्केगु थाय् धकाः नालातःगु थाय् जुल । स्थानीय बुरापाकातय्गु धापू अनुसार थन तुयूह व ह्याउँह नागराज दु धाइ ।

थ्व थाय् ऊवात्त स्वयंबल्य् प्राचीन मन्दिरया भग्नावशेष थे च्वं । छायाधाःसा प्राचीनकालयागु मन्दिर अथवा छुं ऐतिहासिक भवनयागु त्वहंयागु थां, क्वखलु, मेथ, तथा पुलांगु जःधुंया जलहरी आदि खनेदयाच्चंगु दु । थ्व सख्वाः पवय्गु थासय् प्यख्यरसं विभिन्न साइजयागु पुलां पुलांगु त्वहंत तयातःगु खनेदुगुलि थ्वया तःलय्पाखे ह्लानाच्चंगु महत्वपूर्ण भग्नावशेष पुरातात्विक सम्पदा अवश्यं दय्फु । करीव ३५ । ४० दँ न्ह्यो वीर पुस्तकालयं प्राचीन अभिलेखया प्रतिलिपि काय्कूबल्य् स्वयम्भूया सर्व प्राचीन शिलापत्र थ्व हे थासं उपलब्ध जुल धकाः वीर पुस्तकालययागु रेकर्दय् च्वयातःगु दु ।

श्रीस्वयम्भू महाचैत्य



स्वयम्भूया चैत्यपार्क

स्वयम्भू क्षेत्र्य आःतकयागु अनुसन्धानय् लिच्छवीकालयागु शिलालेख निगू लुयावय् धुकूगु खँ इतिहासकारतय्सं प्रकाशय् हयाब्यूगु दु^१ । तर अपशोच उगु निगू शिलालेख नं कीगु न्होने लुकु बिनाः सुलाकासा ह्मिताच्वन । विचाः यानाः स्वयादिसँ, ३५।४० दया दुने थुगु स्वयम्भू क्षेत्र्य च्वंगु महत्वपूर्ण प्रामाणिक शिलालेख निगू कीसं सिइक सिइकं चाय्क चाय्कं तंकाच्वना धाःसा कीसं मखंगु मस्यूगु गुलि महत्वपूर्ण ऐतिहासिक पुरातात्विक सामग्रीत विलुप्त जुल जुइ । थ्व धाय्फुगु खँ मखु । उकिं जितः विश्वास दु- थ्व सखाः दय्केगु गालय् छकः पुरातात्विक विधिकथं अनुसन्धान एवं उत्खनन याना स्वतः धाःसा इतिहास क्षेत्र्य अवश्यं न्हूगु उपलब्धि जुइफु, गुकि यानाः स्वयम्भू महाचैत्ययागु ऐतिहासिक पृष्ठभूमि पुरातात्विक आधार थौयागु स्वयाः नं यक्व च्वन्हायाना वनिइगु सम्भव दु । अतःएव थ्व थासय् सम्बन्धित विभाग व मण्डलं यथाशीघ्र ध्यान आकर्षित याइ ।

[३६] गुप्तगत सर्व प्राचीन अभिलेख

स्वयम्भूया छ्वाःख्यरं उख्येथुख्ये छितरवितर जुयाच्वंगु शिलालेख, पादपीठलेख, ताम्रपत्र, काष्ठपत्र, स्वर्णपत्र, रूप्यपत्र एवं लोहपत्र, इष्टिकापत्र आदि यानाः स्वसः प्यसलं मयाक ऐतिहासिक सामग्रीत उपलब्ध जुयाच्वंगु दु । उकिइ मध्यय् गुलिखे मूर्तिया पादपीठ लेख, शिलाभिलेख तनावन विनष्ट जुल । थुपि सम्पूर्ण आःतक दइच्वंगु अभिलेख मध्यय् दकलय् सकलय् पुलांगु अभिलेख थ्व हे सखाः दय्केगु गालय् लुयावःगु लिच्छवीकालीन शंकरदेव राजायागु शिलालेख जुल ।

थुगु अभिलेखय् स्वयम्भू स्थित विहार निर्मित अक्षयदान स्वरूप जग्गा प्रदान यासे आयस्ता तयाब्यूगु खँ न्ह्यथनातल । थुकिया विषयय् चर्चा प्रस्तुत ग्रन्थया ३५ अध्याय स्वयाः सिइकादिसँ ।

[३७] नागपुर (बशिगाः)

थ्व नागपुर स्वयम्भू महाचैत्यया उत्तरपाखे अमोघसिद्धि तथागतया न्होनेसंतुं च्वंगु प्यकुंलाःगु ताःहाकः बानगिगु गाः खः । थुकियात स्थानीय भासं बशिगाः धकाः नं धाइ । थुगु थाय् नं ऊवात्त स्वयंबलय् छुं पुलांगु भग्नावशेषयागु त्वाःबत्वाः त्वहंथां तयाः दय्कातःगु थे च्वं ।

थ्व थासय् नं गुरु शान्तिकरं जलतत्त्वया पाखे जुइगु बिध्न उपद्रव शान्त याय्त जलाधिपति नवनागराजपिनिगु आश्रम स्वरूपं बशिगाः दय्काः अधिष्ठान यानाथकूगु जुल । थन सेवा यात धाःसा

१- पूर्णिमा ९ पूर्णाङ्क, अभिलेख संग्रह न्हापांगु अङ्क ।

अनावृष्टि, खण्डवृष्टि, अतिवृष्टि व उत्पातवृष्टि दोष शान्त जुयाः सुवृष्टि जुइ^१ । देसय् सहकाल जुइ, लिस्से^२ धयाढ्य नं जुइ ।

पञ्चमं नागपुरञ्च वरुणादि नागराजकान् ।
स्थापितं विधिभिः नूनं शान्तिकर जगद्गुरुः ॥
ये च या वा मनुष्याश्च दुग्धादिषु पञ्चामृतैः ।
नागेभ्यस्तेभ्यः पूज्याच्च अत्र वृष्टिदोषं न हि ॥

[३८] कर्मराज गुम्बा

थ्व गुम्बा स्वयम्भू महाचैत्यया उत्तरपाखे च्वंगु दक्षिण अभिमुख यानाः दय्कातःगु गुम्बा खः । थ्व गुम्बा स्वयम्भूपाखे^३ स्वय्बल्य् स्वतँ जाः खनेदु, तर गुम्बाया लिउने जंगलपाखे^४ स्वय्बल्य् खुतँ जाः यानातःगु जुल । अज्ज पिने^५ स्वय्बल्य् थुकिइ दुने छगू हे जक गुम्बा थे^६ च्वं । तर थ्व गुम्बाया दुनेपाखे^७ प्रदक्षिण यानाः वनेबल्य् मेगु छगू नं गुम्बा स्वाकातःगु खनेदइ । थुगु किसिमं छगू थासय् निगू गुम्बा स्वाकाः दय्कातःगु काठमाण्डू उपत्यकाय् थ्व हे छगू जक जुइ ।

ह्लासाया कोरिम्पोछे श्रीशाक्यसिंह तथागत पाय्धिकः यानाः थुगु गुम्बास मूर्ति प्रतिष्ठा याय्गु शुभ संकल्प जूगु अनुसारं च्याकु हाकःह्य शान्तिनायक तथागत शाक्यमुनियागु सिजःपाताया मूर्ति दय्काः लुं सियातःगु जुल । थुगु मूर्ति दय्केगुलिइ सम्पूर्ण आर्थिक अभिभार कुवियादिइह्य दानपति खः कान्तिपुर महाबुद्धया जुजुमान ताम्रकार । अले थुगु मूर्ति निर्माण यानाविज्याःह्य कलाकार जक यल महाबुद्ध थैनाया कुवेरसि शाक्यजु खः । थुगु मूर्तिया दुने भगवान् बुद्धयागु अस्थिधातु तयाः प्राण प्रतिष्ठा यानातःगु जुल । थुगु शाक्यमुनि बुद्धया जवय् गुरु पद्मसम्भवयागु लुं सिया धातुया मूर्ति दय्कातल । थुगु मूर्ति दय्कूह्य कलाकार नं यल महाबुद्धया मानजोति शाक्य खः । थुक्किया दानपति कयरंया लामाजु कुस्योकाग्यु जुल । अले खवय्पाखे च्वंगु गुरु ग्याल्वा कर्मापायागु व्वचायागु मूर्ति जुल । थुगु मूर्ति दय्कूह्य कलाकार खाम्देसया छोतेन् । थ्वय्कलं ह्लागामाय् तयातःपिं गुरु वज्रधर, धुईसुम्सेम्पा कर्मापा, षोदश महास्थवीर एवं लामै ग्युपाया विभिन्न मूर्ति समेतं दय्काव्यूगु जुल ।

थुगु कर्मराज गुम्बाया मुख्य व्यवस्थापक एवं दानपति जूह्य ह्लासा धेपुङ्गु गुम्बाया धाग्मार छाम्बे लोशाङ्ग यांफी धइह्य वयोवृद्ध लामाजु जुल । थ्वसपोल लामाजुया सहयोगी मित्रया रूपय् लामा नोनो देछेन् दोर्जे नं नापं दुगु जुल । धामार् छाम्बे लामाजु आपाः थासय् उख्येथुख्ये चाःहुलाः दुःख कष्ट मधासे गुलिखे चन्दा संकलन यायां यंकल । थुगु महान् शुभ कार्यस श्री ५ महेन्द्रवीर विक्रम

१- स्वायम्भू पुराण, पृ. ४२६

शाहदेव व ह्लासाया जिनराज ग्याल्वा रिम्पोछे (दलाई लामा तेन्जिन्ग्याछो) पिनिगु नां नं न्ह्यथना-
तःगु दु' । लिस्सें थुगु गुम्बा दय्केत भूमिदान यानाबिज्याःपि स्वयम्भूया नाति गुरुजु व सानुकाजी
गुरुजुया नां उल्लेख यानातल । थुगु प्रसङ्गय् थ्व नं धयातःगु दु- नेपाल, भारत, तिब्बत, चीन सरकारं-
निसें कयाः सुं श्रद्धालु पुण्यात्मापिनिगु दान व विश्व बौद्ध सम्मेलनय् बिज्याःपि ४२ राष्ट्रया
प्रतिनिधिपिनिगु सहयोगं थुगु कर्मराज गुम्बा निर्माण याय्गु सम्पूर्ण ज्या सम्पन्न जूगु जुल ।

तर तःधंगु अपशोचया खँ- थुगु गुम्बाया लागी पूर्ण रूपेण व्यवस्था निम्ति आयस्ता संकलन
याय् धकाः दृढ संकल्प यासे पुनः ह्लासा बिज्याःह्य संस्थापकजु रिम्पोछे धामार छाम्बे लामाजु वयोवृद्ध
जूगु कारणं लँया बिचय् आकस्मिक देहावसान जुल । तथापि वसपोलयागु शुद्ध चित्त शुद्ध प्रणिधानयागु
प्रभावं थुगु गुम्बाय् जुइमाःगु सम्पूर्ण ज्या याउँक सिधयावन ।

थुगु गुम्बा पूर्ण रूपेण तयार जुसेलि संस्थापकजुयागु आज्ञानुसार लुङ्थोग्याछो धइह्य सोपुताः
लामाजुं थुगु गुम्बाया जीवन्यास प्रतिष्ठा यानाबिज्यात । थुगु गुम्बाया जीवन्यास प्रतिष्ठा याना-
बिज्यात । थुगु गुम्बायागु नक्सा व इष्टिमेट ज्ञानरत्न स्थापितं यानादिल, लिस्सें थ्वय्कःयागु सहयोग
रूपय् ज्या सिमधःतले धन्दा कयाः श्रमदान बियादिइह्य लोकरत्न तुलाधर ।

थुगु महान् अपरिमित पुण्य कार्य वि. सं. २०११ सालं गुम्बायागु निर्माण कार्य शुभारम्भ
जुल । वि. सं. २०१५ साल स्वांयापुह्लीखुनु विधिवत् प्रतिष्ठा कार्य सुसम्पन्न जुल ।

थुगु गुम्बाया नां कारणवश स्वंगु नां अङ्कित जुयाच्चंगु खनेदु :-

- (१) प्रथम ह्लापां धामार् छाम्बे लामाजुं प्राणिमात्रयात सुख शान्ति जुइमा, विश्वयागु
अशान्ति कलह शान्त जुइमा धइगु आशिका यानाः दय्कूगु जुयाः थुगु गुम्बाया नां
'विश्व शान्ति महाविहार' धाल ।
- (२) थुगु गुम्बायागु पूर्ण रूपेण व्यवस्थाया निम्ति छुं वर्ष लिपा थुकिया व्याक्क अधिकार
संरक्षकत्व ग्याल्वा कर्मापा लामाजुयात तोता बिसेलि 'कर्मराज महाविहार' धइगु
नामकरण जुल ।
- (३) अनंलि थुगु गुम्बाय् तिब्बती महायान संघद्वारा संचालन याय्गु व्यवस्था जुसेलि हानं
'शेधुव् छ्वेखोर् धार्ग्ये लिङ्ग चुग्ल्लाखाङ्ग' नामं साईनबोर्ड तयाव्यूगु खनेदु ।

थुगु गुम्बाय् प्रतिष्ठापित शाक्यमुनि बुद्धया ह्लातय् तयातःगु लुं सियाः सिजःया पिण्डपात्र
नेपाःया अधिराज्यय् दकलय् सकलय् तग्गवःगु जुइ । थ्व पिण्डपात्र छमुर्नि मयाक जाकि न्ह्यंगु हिसाबं
दय्कातःगु धयातल । थौंकल्लय् थुगु पिण्डपात्र भगवान् बुद्धया क्वस्सं तयाः ब्वयातःगु दु ।

थन महायान श्रावक अनुसार भिक्षुपि च्वनाः ह्लित्थं पाठपूजा व पर्वपर्वकाल्य विशेष समारोह-
पूर्वकं भिक्षु संघपि मुनाः भव्य रूपं पूजा पाठ जुयाच्चवनी । थुगु पूजाया विचय् विचय् मूलाचार्य,
उपाध्या एवं भिक्षुपि च्वनाः वज्रघण्टि, डमरु, डा थानाः धुङ्ग, ग्यालिङ्ग व कांसु पुयाः भुस्याः छुस्याः
थानाः सुमधुर घोषपाखे थुगु पवित्र स्वयम्भू स्थल गुञ्जायस जुयाच्चवनी ।

थुगु गुम्बाया अंगःया कपं कपन्य् ह्लापायापि पुलांपि उख्येथुख्ये लानाच्चंगु मूर्तित तना मवनेमा
अनादर मजुइमा धइगु सम्यक् विचारं खंकाः ग्वाख दय्काः सुरक्षित यानातइतःपि मूर्तित खः-

- | | |
|-----------------------------------|---|
| १. सुखावती लोकेश्वर | २३. सरस्वती |
| २. बुंगम लोकेश्वर | २४. सृष्टिकर्ता लोकेश्वर |
| ३. आर्यतारा | २५. आर्य मैत्रेय |
| ४. प्रज्ञापारमिता | २६. त्रिबोधिसत्त्व- मैत्रेय, वज्रपाणि, पद्मपाणि |
| ५. द्वयहस्ताभ्यां पद्मधर लोकेश्वर | २७. भविष्यव्याकरण मुद्रा बुद्ध |
| ६. मारविजय शाक्यमुनि | २८. अमिताभ |
| ७. राजमुद्रांकित तारा | २९. आर्यतारा |
| ८. सप्तलोचनी तारा | ३०. आर्यतारा |
| ९. अमोघपाश लोकेश्वर | ३१. सप्तलोचनी |
| १०. अमोघपाश लोकेश्वर | ३२. सप्तलोचनी |
| ११. अमिताभ | ३३. खसर्पण लोकेश्वर |
| १२. आर्यतारा | ३४. अमिताभ |
| १३. अक्षोभ्य तथागत | ३५. आर्यतारा |
| १४. शाक्यमुनि तथागत | ३६. आर्यतारा |
| १५. आर्यतारा | ३७. महामञ्जुश्री, धर्मश्रीमित्र, मोक्षदादेवी सहित |
| १६. शाक्यमुनि | ३८. त्रिमुख अष्टभुज महामञ्जुश्री |
| १७. प्रज्ञापारमिता | ३९. दुर्गतिपरिशोधनी तारा |
| १८. शाक्यमुनि | ४०. पद्मपाणि लोकेश्वर |
| १९. षडक्षरी लोकेश्वर | ४१. अरपचन वागीश्वर महामञ्जुश्री |
| २०. कनकमुनि बुद्ध | ४२. अमोघपाश लोकेश्वर |
| २१. अमोघसिद्धि | ४३. आर्यतारा समूह |
| २२. पद्मपाणि लोकेश्वर | ४४. पद्मपाणि लोकेश्वर |

[३६] पवन भैरव

कर्मराज गुम्बाया न्होने वशिगालं पूर्वपाखे वःचागःगु गन्थकूट शैली देगःचा छगः दु । थ्व देगः पूर्व अभिमुख यानाच्चंगु जुल । थुकिइ दुने शक्ति सहित सुखासनय् च्वंच्वंहा प्रस्तरमय पवन भैरव मूर्ति स्थापना यानातःगु दु ।

थुहा पवन भैरवया वारय् छगू लोकविश्वास थ्व दु— थ्वसपोल पवन भैरवयात अनास्था यानाः इथिमिथि यात धाःसा तस्सकं ग्वःफय् वयाः जल वृष्टि सुपांय्यात हटय् यानाः आकाशय् मेघ शून्य यानावी, गुकिं अनावृष्टि यानाः देसय् उत्पात मचय् याइ । थथे जूगु सिइकाः थुहा पवन भैरवयात आदरपूर्वक क्षमा पवनाः स्वागत सत्कार यानाः पूजाभाव यात धाःसा तुरन्त मेघ गर्जन साथं जल वृष्टि जुइ । आःतकं थ्व हे परम्परानुसार शान्तिपुरय् मेघ साधन क्रिया जुइवल्य् थुगु थासय् नं पूजा याना-वइच्चन तिनि ।

थुहा पवन भैरवया मूर्तिया वर्णन थथे खः—

छपाः खाः प्यपा ल्लाः धारण यानाः सत्वपर्यङ्क आसनय् च्वंच्वंहा नागया तिसां तियाः मुण्डमालां क्वक्खायाः बेताल आसन यासे स्वंगः मिखा कनाः क्रोध मूर्ति जुयाच्चंहा । प्रथमगु निपा ल्लातं वज्रकर्तिपात्र ज्वनाः, द्वितीयगु निपा ल्लातं त्रिशूल खट्वांग ज्वनाच्चंहा । थुहा पवन भैरवया मुल्य् ललितासनय् च्वंच्वंहा छपाः खाः निपा ल्लाः दुहा शक्ति सहित जुयाच्चन । जवगु ल्लातं पवन भैरवयात घय्पुनाः थीथी खाः स्वयाः खवगु ल्लातं वायु ध्वज युक्त पताः ज्वनाच्चन । थुगु मूर्तिया प्रभामण्डल्य् शुष्कमुण्ड एवं अग्निज्वाला बुत्तां चाःहुइकाः शोभा वृद्धि यानातःगु जुल ।

[४०] स्वयम्भू भजन सतः

स्वयम्भूया पूर्वपाखेया तँया दकलय् च्वय् सिथय्संतुं लानाच्चंगु प्रतापतुर मन्दिरया न्होनेसं दय्कातःगु थुगु भजन सतः जुल । थ्व सतः न्होने स्वयंबल्य् निगू तला जक थे च्वं, तर थुगु सतःया भूसतहं क्वय्पाखे क्वहांवनाः हानं स्वंगू तला दनि । थुगु भजन सतलय् बुद्धजीवनी व बुद्धया पूर्वजातक कथा अङ्कित चित्रमय तस्वीर भजन याइथाय् छचालं ब्वयाः शोभा वृद्धि यानातःगु खनेदु ।

थुगु सतलय् स्वयम्भू महाचैत्ययागु भक्ति याइपि उपासकपि मुनाः अर्थात् ज्ञानमाला भजन संघया सदस्यपि च्वनाः ह्लियाह्लिथं सुप्रभात इलय् भक्तिपूर्ण रसं सहितगु भगवान् बुद्धयागु विशुद्ध उपदेश नाप मिलय् जूगु शुभ सन्देशं युक्तगु ज्ञान गुणया खं भरिपूर्णगु सारयुक्त वचन व अनेक देवदेवता-पिनिगु महिमां जायाच्चंगु ज्ञानमालाया मे हालाः तालमान मिलय् यानाः भजन यानाच्चनी । थुगु भजनय् हारमोनियम, तबला, सितार, गितार, तिछु आदि वाद्यवादनया सूर तालय् सुमधुर ध्वनि

गुञ्जायस यानाः भजन यानाच्चनिइगुलि यानाः शान्तिमय आनन्दमय भक्तिया जागरण सृजना जूगु थे अनुभव जुयाच्चनी ।

थुगु ज्ञानमाला भजन थ्व स्वयम्भूइ गुबल्य् निसें शुरु जुल, गथे जुयाः थुक्तिया सृजना जुल, अले थ्व ज्ञानमाला भजन सदस्यपिसं छु छु कठिनाई अनुभव याय्माल, लिस्सें थुगु भजन संघयागु तत्त्वावधान्य गुबल्य् छु छु ज्या जुयावन एवं ज्ञानमाला धइगु गुलि महत्वपूर्ण व उपयोगी सिद्ध जू धइगु विषय्य कयाः नं प्रस्तुत ग्रन्थ्य उल्लेख याय् धुंगु दु ।

थुगु भजन फलचाय् केवल ज्ञानमाला भजन याय्गु जक थाय् मजुसे गुबलें गुबलें दाफा भजन, पच्छिमा मृदङ्ग, कोंचाखि आदिया सूर ताल्य् नं इलय्-व्यलय् भजन जुयाच्चनी । थुलि जक मखु पूजा, पाठ, स्तोत्र व दण्डवत प्रणाम याइपिं भक्तजनपि च्वनाः नं पुण्य साधन याय्गु यानाच्चनी । उकिइसं प्रसिद्ध धर्मावतार महिना जुयाच्चंगु गुँला महिना वलकि थुगु भजन सतलय् च्वनाः लच्छियंकं बाखं कनेगु नं ज्या जुयाच्चनी । गुँलासेवा वइपिं भक्तजनपि च्वनाः धर्म उपदेश न्यनाच्चनी । अप्पो यानाः थुगु थासय् स्वयम्भूया गुरुजुपि च्वनाः स्वयम्भू पुराण, सुइनिगू जातकया बाखं, गुणकारण्डव्यूह, ललितविस्तर, अशोकावदान आदि विषय्य कयाः बाखं कनेगु यानावइच्चंगु खनेदु । हानं थुगु थासय् दैय्दँसं वइगु मुखोष्टमीखुनु आर्य अमोघपाशयागु मण्डल दय्काः अष्टमीव्रत धलं दनिइपिं ब्रतीजनपि जायाच्चनी । अथे हे भाद्रकृष्ण तृतीयाखुनु श्रीवसुन्धरायागु तीलाव्रत दनेगु नं यानाच्चं । गुबलें गुबलें धर्मधातु मण्डल पूजा जुयाच्चनी, एवंक्रमं सप्तशतसहस्रादिक ताराधर्म, सत्वधर्म, त्वंछापूजा आदि नं जुयाच्चनी ।

थुगु भजन फलचाया कुनेयागु तलाय् जक इलय्-व्यलय् पर्व उत्सवकालय् स्वयम्भूस गुँलासेवा, कातीसेवा, शान्तिपुरस रहस्यपूजा, यँलासेवा, मञ्जुश्री थास वसन्त सेवा ससुपूजा व हारतीस छाहाय्के पूजा, चापूजा एवं वन भोज आदि यानाः भव्य न्याय्कः वइपिं च्वनाः न्ह्याइपुसे च्वंक भव्य नयावनिइगु थाय्या रूप्य ज्या कयाच्चनिइगु थाय् जुल ।

[४१] बुद्धप्रतिमामार आक्रमण

थुगु कलात्मक सुन्दर मूर्ति स्वयम्भू महाचैत्यया अक्षोभ्य बुद्धया क्वस्सं खवपाखे तइतःगु खः ।

थुकिइ कुशल कलाकारं ललितविस्तर्य उल्लेख जूगु मारपरिवर्त अनुसारं थुगु बुद्धप्रति मार आक्रमण चित्त अङ्कित यानाः भाव प्रदर्शित यानातःगु खनेदु :-

खतु थुकिइ न्यागू तहलय् विभाजित यानाः क्यनातल । ह्लापांगु तहलय् वसपोल शाक्यसिंह तथागत सिंहासनया द्योने वज्रासन यासे भूमिस्पर्श मुद्रा यानाः शान्त गम्भीरपूर्वक च्वनाच्चंगु क्यनातल । थुगु बुद्ध मूर्तिया जःखः मारश्रेष्ठ कृष्णवन्धु नमुचिमारया मुख्य मुख्यपिं सेना अफिसरत वयाः



बुद्धप्रति मार आक्रमण

विभिन्नकथं भीषण रूप धारण यासे सशस्त्र ज्वनाः प्रहार याय् तयार जुयाच्चंपिनिगु दृश्य क्यनातल । थुपि मध्यय् गुलिसिनं तपस्या भंग याय् थें ध्वाति पुयाच्चन । गुलिसिनं खङ्ग ज्वनाः प्रहार याय् त सनाच्चन । गुलिसिनं भालां सुइत तातुनाच्चन । गुलिसिनं पर्वतं चिइत कोशिश यानाः पर्वत ल्हना हयाच्चन । गुलिसिनं धनुष वाणं कय्केत तांछा कसय् यानाच्चन । गुलिसिनं दना वने कि मवने धयाःलि सिंहासन ल्हनाः वांछवय् त बल यानाच्चन । थुलि जक मखु सम्पूर्ण मारक्लेशया प्रतिनिधि स्वरूप जुयाच्चंपि चतुर्मार नं थःथःपिनिगु वाहन गयाः भगवान् बुद्धया न्होने उपस्थित जुयाः तमासा स्वयाच्चन :-

- (१) स्कन्धमार - ह्यै गयाच्चंहा ब्रह्मा
- (२) क्लेशमार - गरूड गयाच्चंहा विष्णु
- (३) मृत्युमार - द्रुहं गयाच्चंहा महेश्वर
- (४) देवपुत्रमार - किसि गयाच्चंहा इन्द्र

निगूगु तहल्य् बुद्धया आसन त्वाकःया क्वप्पयल्य् साक्षि स्वरूप पृथ्वीमाता तयातल । थुकिया अर्थ खः—बुद्ध व मारश्रेष्ठ कृष्णबन्धु नाप खँ जूबल्य् धाःगु नं दु । ‘हे मारश्रेष्ठ कृष्णबन्धु ! छं फिछकः निर्गनाद यज्ञ यानावःगु पुण्यं छ कामधातु भुवनया मालिक जुल । परन्तु सत्त्वार्थ हित सुख निम्ति अनुत्तर सम्बोधिज्ञान प्राप्त याय् त जि असंख्य स्वंगू कल्प वर्ष तक पारमिता चर्या चल्य् याना वय्धुन । उगु कुशल मूल पुण्यानुभावं थौं जि बुद्ध जुया ।’ धकाः आज्ञा जूबल्य् कृष्णबन्धुमारं लिसः बिल—‘भो शाक्यसिंह ! छं धाःगु खँ थिक हे जू । जि निर्गनाद यज्ञ यानावयागुया साक्षि जा छ हे जुल ! तर छं पारमिता चर्या चल्य् यानावयागुया साक्षि सु दु ले ?’ थुगु समयय् भगवान् बुद्धं थःगु जव ह्लाः तिइजक पिकयाः भूमिस स्पर्श यानाः थियाक्यंगु जुल । उगु इलय् तुरन्त हे भूमिपाखे पृथ्वीमाता पिहांवया साक्षि जुया न्वंवाःगु दु—‘वसपोल बुद्धं अनेक जन्मजन्मान्तरय् प्राणिपिनिगु लागी बोधिचित्त उत्पत्ति यानाः सम्बोधि चर्या पारमिता चर्या चल्य् याःगु थ्व हे पृथ्वीमण्डलय् खः, मेथाय् मखु, उकिया साक्षि जि हे खः ।’ थुगु घटनाया संस्मरणकथं थन बुद्धया क्वस्सं पृथ्वीमाता अङ्कित यानातःगु जुल ।

स्वंगूगु तहल्य् बुद्धयागु अद्भूत चमत्कार अलौकिक प्रातिहार्य खनाः मारश्रेष्ठ कृष्णबन्धु मूर्च्छित जुयाच्चंगु दृश्य क्यनातल । थ्वया खःपाखे कृष्णबन्धुया म्हायपिसं कामुकभाव प्रदर्शित यानाः अभिनय यानाः बुद्धयागु दृष्टि चूलाकेत जत्तन यानाच्चंगु दु । अले थ्वया जःपाखे बुद्धप्रति मार आक्रमण नं छुं याय् मफुसेलि बुद्धं मारगणयात त्याके धुंसेलि ‘मारजिल्लोकजिज्जिन’ धायकूगु महान् शुभ उपलक्षस बुद्धयात पूजा सत्कार याय् त पूजा सामग्री ज्वनाः वयाच्चंपिनिगु छगू पंक्तिबद्ध खनेदइ । थुपि खः—प्रस्तु मूर्ति निर्माण याके ब्यूपिनिगु दानपतिया परिवार । थ्वया क्वस्सं थुगु प्रतिमा प्रस्थापनाया विषयय् अभिलेख अङ्कित यानातःगु जुल । ने. सं. ७७६ सालं साह्रेंगु महाविहारया

शाक्यभिक्षु चिन्तामुनि धइहसिनं थःसुपुत्र धनदेवया स्मृतिस थुगु मारविजय शाक्यमुनि बुद्ध प्रीति यानाव्यूगु खँ कियातःगु जुल ।

ध्वया क्वस्सं प्यंगूगु तहल्य् माकलं भूमि पुलि चुयाः निपा ह्लातं दलूपा मत ज्वनाःलि थःगु छ्यँनय् दिकाः आदरपूर्वकं द्रहलपे थें यानाः क्यनातल । थ्व हे माकःया जःखःच्वंपिं किसि निहसिनं उगु दलूपा ल्ह्वने थें यानाच्वंगु खनेदु । थुकिया आशय थ्व बुक्य् जू—मार धयापिसं गुबलें गनं खःगु भिगु माःगु ज्या मयाः, न्ह्याबले न्ह्यात्थाय् नं मखुगु मभिगु म्वाःमदुगु जक ज्या याय्गुलिइ न्ह्याचिली, अथे हे संतुं माकःया स्वभाव चरित्र उथेउथेंतुं मिल्य् जू । उकिं थुजाःपिं निर्बुद्धि प्राणिपिनिगु आचार विचार सुधार याय्त प्रज्ञाज्ञान रूपी ज्योति प्रकाश मजुइकं वास्तविक सुख शान्ति दइमखु धइगु अर्थय् माकःया छ्यँनय् दलूपा मत च्याकातःगु जुल । थुगु हे रूपं सिह्लःमोहनी फयाः आगंपूजा आदि जुइबलय् नं माकःया नुगःपाचय् लाक मत च्याकाः मोहनी फय्गु यानावइच्वंगु ज्वलन्त प्रमाण दु । कर्मकर्म फलकथं विचाः याय्बलय् अज्ञानया कारणं तिर्यकयोनि पशु पंक्षिकुलय् जन्म काःवनी धयातल । थुपि पशु पंक्षि मध्यय् नं अप्पो मूर्ख बुद्धि जुयाः मार स्वरूपं त्वहः कारण मदय्क माःसां म्वाःसां बिघ्न उपद्रव जुइगु ज्या सनाजुइ, उकिइसं ताःहाकःगु द्वेष ईर्ष्या तयाः तं पिकयाः दागा तयाच्वनी । थुजाःपिनिगु हृदयय् याकनं प्रज्ञाज्ञान प्राप्त जुयाः पशुत्वं मुक्त जुयाः दिव्यत्व प्राप्त जुयाः उद्धार जुइमा धइगु भित्तुना देच्छायातःगु जुल ।

न्यागूगु तहल्य् वयाः दकलय् सकलय् च्वय् भगवान् बुद्धया फुसय् पलेस्वांया द्योने स्वयम्भू चैत्य अङ्कित यानातल । थ्व खः त्रिकालबुद्धपिनि आश्रय स्थान वास्तविक स्वरूप अनुत्तर सम्यक् सम्बोधि ज्ञान । थ्व हे ज्ञानयात परम विशुद्धगु दिव्य प्रतीक रूपय् मानय् यानातःगु शान्त शुद्ध प्रभाश्वर धर्मकार्य ज्योति रूप श्रीस्वयम्भू महाचैत्य जुल । उकिं हे सप्तबुद्धपिसं नं श्रीस्वयम्भू ज्योतिरूप आदि-बुद्धयात दर्शन व पूजन यानावइच्वंगु खँ इतिहासं कनाच्वंगु दु ।

थुगु किसिमं बुद्धप्रति मार आक्रमण दृश्य अङ्कित यानातःगु प्रस्तर मूर्ति आःतकयागु अनुसन्धानय् काठमाण्डू उपत्यकाय् लुयावःगु खनेमदुनि धाःसां अत्युक्ति जुइ मखु । तर प्रस्तर मूर्ति बाहेक मेगु सिँ, दन्त व लुं सिया धातुयागु अन्यत्र स्थानय् उपलब्ध जूगु खनेदु ।

- (१) बुद्धप्रति मार आक्रमण दृश्य अङ्कित काष्ठमय तोरण इतुं बाहाःया लुखाफुसय् तयातःगु ।
- (२) थुजाःगु हे किसिमगु लुं सिया धातुयागु जाम्बुनन्दवन महाविहारस गुँलां बहिद्यः ब्वइबलय् प्रदर्शनी जुइगु दु ।
- (३) गोपीचन्द्र महाविहारय् नं गुँलां बहिद्यः ब्वइबलय् क्यनातःगु दु, तर दन्तयागु दय्कातःगु । थुकिइ बुद्धजीवनी नाप मिल्य् जूगु मेमेगु दृश्यत नं क्यनातःगु खनेदु । वर्तमान थुगु महत्वपूर्ण चीज क्यूरियो हल्य् ब्वाय् धुंकल, इ० ।

[४२] वैरोचन तथागत

श्रीस्वयम्भू महाचैत्यया दथुस बिज्यानाच्वंह्य वैरोचन तथागतया संक्षिप्त परिचय :-

वसपोल आदिबुद्ध ज्योतिरूप श्रीस्वयम्भू प्रभाश्वर धर्मकाय धर्मधातुपाखे उत्पन्न जूगु त्रिरत्नया छेँ जुयाच्वंगु, बुद्धबोधि प्राप्त यानाः निर्वाण जूपि सम्पूर्ण तथागतपि लीन जुइगु, प्रज्ञोपायया आत्मा स्वरूप जुयाः शून्यता ज्ञान वज्रपाखे अचिन्त्य प्राणिपिनिगु हित सुख शान्ति निर्मित ज्योतिरूप पञ्चज्ञान रश्मि पञ्चबुद्ध प्रकाश जुयाबिज्यात धकाः वर्णन यानातल ।

रत्नपद्मकेशर रूपी पलेस्वांपाखे ज्योतिरश्मि प्रकाश जुयाः सुविशुद्ध धर्मधातु ज्ञान रूपी ॐकार बीजाक्षरपाखे सिंहचक्रया द्योने महानन्द वज्रासनय् च्वनाः आकाश मुद्रा (बोध्यङ्ग मुद्रा) यासे परम शान्त शुक्लवर्णह्य श्रीवैरोचन तथागत उत्पन्न जुयाबिज्यात ।

वसपोलयागु हस्त मुद्रां थ्व भाव प्रदर्शित यानाक्यंगु दु—अनादिकालनिसे स्वभावतः शुद्धगु अनुत्पन्नगु अनिरोधगु प्रकृति सुनिर्वृत्ति जुयाच्वंगु विशुद्धगु शान्तगु स्वयं धर्मचक्र जुयाच्वंगुलिइ, अज्ञान क्लेश कल्पना जालपाखे जि जिगु जि याना धइगु आत्मभावय् लानाः थः कतः दय्काः अनादिगति संसार चक्रय् चाःचाःहुलाः दुःख सियाच्वंपिनिगु उपरय् महाकरुणा तयाः वसपोल आकाश मुद्रा यानाः क्यनाच्वंगु जुल । खतु थुगु मुद्रायात मेगु अर्थय् बोध्यङ्ग मुद्रा धकाः नं धयातल । छाय्धाःसा संसारय् दइच्वंगु सम्पूर्ण अर्थ तत्त्व ज्ञान विशुद्धि दर्शन मध्यय् नं आदर्श पूर्णगु ज्वरा मदुगु 'अनुत्तरबोधि' यात साक्षात्कार यानाः काय्फ्य्केगु हे जीवनया मूलगु उद्देश्य खः धइगु प्रतीकात्मक उपदेश बियाच्वंगु जुल । हानं मेगु अर्थय् परम्परागत थथे नं धयाच्वंगु दु—वैरोचन तथागतं थःह्यं थ्व संसार सृष्टि यानागु जूसां अहङ्कार अभिमान गुमान फुकेया कारणय् थःगु पति थह्यं ज्वनाः बोध्यङ्ग मुद्रा यासे थ्व धयाच्वन कि थ्व संसारय् मन बुद्धि कर्मयागु संयोगपाखे जक दयाच्वंगु खः । जि जिगु जि याना धयागु छुं मदु, स्वभावपाखे आफै धर्म जुयाच्वंगु धकाः थःगु पति थःह्यं ज्वनाः भाव प्रदर्शित यानाच्वंगु जुल ।

गुह्यसिनं वसपोलयागु ध्यान ज्ञान चर्याय् च्वनाः अभ्यास यानावनी उह्य भाग्यमानी साधकयात निश्चय नं सुविशुद्ध धर्मधातु ज्ञान प्राप्त जुयाः वैरोचन तथागत बिज्यानाच्वंगु भुवन वज्रधातुस जन्म काःवनिइह्य जुइ ।

१. वैरोचनया शब्दार्थ^१ :-

लोचना वज्रसत्वानां दीप्यमाना स्वभावतः ।

ज्ञानं तथागतं शुद्धं तद्वैरोचन मुच्यते ॥

२. कलाः - वज्रधात्वेश्वरी (प्रज्ञापारमिता)
३. काय - समन्तभद्र बोधिसत्व
४. भलि - सीततारा
५. कुल - चक्रकुल (कुलत्रयकुल)
६. भुवन - वज्रधातु
७. मुद्रा - आकाश मुद्रा (बोध्यंग मुद्रा)
८. ज्ञान - सुविशुद्ध धर्मधातु
९. तत्त्व - जल (आपधातु मारणी)
१०. वर्ण - श्वेत
११. बीजाक्षर - ॐकार
१२. वर्णाक्षर - कवर्ग (कखगघङ)
१३. वाहन - सिंह
१४. इन्द्रिय - चक्षु
१५. समय - ब्रह्ममुहूर्त
१६. दिशा - मध्य स्थान
१७. गुण - शान्त रूप
१८. वैरोचनया कुलं उत्पन्न जूपि ईश्वरपि :-
उष्णीष विजय नामसंगिति, मारिची, सीतातपत्रा, साहस्र प्रमर्दनी, वज्रवाराही,
ग्रहमातृका, इ० ।

वैरोचन स्तुति :-

मध्य वैरोचनं बुद्धं मध्य समन्तभद्रकः ।

मध्य सिंहासनं पद्मं श्वेतवर्णं नमोस्तुते ॥

[४३] वज्र धात्वेश्वरी (प्रज्ञापारमिता)

वैरोचन तथागतया लिकसं जःपाखे शून्य रूपं छगू ह्वःचा छह्वः तथाः वैरोचनया शक्ति रूपं मानय यानावइच्चन । थुकिइ मूर्ति मदुसां निरञ्जन निराकार महाशून्यताया प्रतीककथं उक्कियात देवतात्मक रूपं भावना यासे छगू तोरणाकृति तथाः स्वागत यानावइच्चंगु जुल । वर्तमान थुगु तोरण ने. सं. ८७२ सालं ज्ञानपतिदेवजुं स्वयम्भू धर्मधातुयात द्रहलपा तइतःगु खः । वज्रधात्वेश्वरी

(प्रज्ञापारमिता) यागु रूप संकल्प विकल्प रहित निर्विकल्प जूया निम्ति थन मूर्ति रहित यानाः भावना मात्रया स्थान मानय् यानातल । धयातःगु दु, प्रज्ञापारमिता एकविंशति स्तोत्रय् :-

निर्विकल्पे नमस्तुभ्यं प्रज्ञापारमितेऽमिते ।
यात्वं सर्वानवदद्यां निरवन्द्यै निरक्षसैः ॥
आकाशमिव निर्लेपां निष्प्रपञ्च निरक्षराम् ।
तवचार्य गुणाढ्याया बुद्धस्य च जगद्गुरुः ॥

थ्व ह्वः तयातःगु विषयय् थथे नं धयातःगु दु- वसपोल श्रीस्वयम्भू ज्योतिरूपयागु श्वास प्रश्वास वइगु वनिइगु प्राणवायु संचारण जुइगु थाय्या रूपय् मानय् यानावइच्वन । मेगु अर्थय् वैज्ञानिक दृष्टिकथं थुकियात विचाः यानाः स्वत धाःसां थुकिइ दुने ज्योतिरूप स्वयम्भू विराजमान जुयाच्वंगु पुखूया लः न्ह्याबले स्वच्छ व निर्मल याय्त लःया वासनाय् असर परय् मजुइकेत फसं ह्वाकेत तयातःगु धकाः नं धाइ । हानं म्वाःमदुगु ज्या सनिइपिं अज्ञानी मस्तय्सं न्ह्योने ध्वदूथे सनी धकाः ह्वःया चिह्न मात्र क्यनाः त्वपुयाः सुरक्षित यानातइतःगु धकाः नं धाइ ।

[४४] अक्षोभ्य तथागत

स्वयम्भू महाचैत्यया पूर्व दिशाय् बिज्यानाच्वंह्य अक्षोभ्य तथागतया संक्षिप्त परिचय :-

रत्नपद्मकेशर रूपी पलेस्वांपाखे ज्योतिरश्मि प्रकाश जुयाः आदर्श ज्ञान रूपी हूँकार वीजाक्षर-पाखे वैदूर्यमहामणि सूर्य प्रकाश जूगु थे असंख्य वैचुगु रश्मि प्रकाश यानाः अभिरति भुवनं बिज्यानाः गजरत्न गयाः महानन्दं वज्रासनय् च्वनाः भूस्पर्श मुद्रा यानाः वज्रकुलया अधिपति जुयाबिज्याःह्य वसपोल श्रीअक्षोभ्य तथागत उत्पन्न जुयाबिज्यात ।

प्राणिपिनिगु हित सुख शान्ति निम्ति सत्यधर्मपाखे थ्व पृथ्वीमण्डल स्थिर जुया च्वनेमा धकाः प्रतिज्ञा यानाः भूमिस थियाः अधिष्ठान यानाः ध्यान यानाबिज्यानाच्वन ।

गुह्यासिनं वसपोलयागु ध्यान ज्ञान चर्याय् च्वनाः अभ्यास यानावनी उह्य भाग्यमानी साधकयात निःसन्देह आदर्श ज्ञान प्राप्त जुयाः अक्षोभ्य तथागत बिज्यानाच्वंगु अभिरति भुवनय् वनाः जन्म काःवनिइह्य जुइ ।

१. अक्षोभ्यया शब्दार्थ :-

सर्वानिष्टजनैः ज्ञानं मिथ्यागुरु जनैरपि ।

अप्रकम्प्य स्वभावत्वात् अक्षोभ्योऽसौ प्रकथ्यते ॥

२. कलाः - लोचनीतारा (वज्रतारा)

३. काय् - वज्रपाणि (महाबल)
४. भलि - उग्रतारा
५. कुल - वज्रकुल (लोकालोककुल)
६. ज्ञान - आदर्श ज्ञान
७. भुवन - अभिरति भुवन
८. तत्त्व - आकाश धातु पद्मज्वालनी
९. वर्ण - नीलवर्ण
१०. वीजाक्षर - हूँकार
११. वर्णाक्षर - चवर्ग (चछजकृज)
१२. मुद्रा - भूमिस्पर्श
१३. वाहन - गजरत्न
१४. इन्द्रिय - श्रोत्र
१५. समय - सुप्रभाव
१६. दिशा - पूर्वदिशा
१७. गुण - ज्ञान रूप
१८. अक्षोभ्य कुलं उत्पन्न जूपि ईश्वरपि :-

चण्डमहारोषण, हेरूक, चक्रसम्बर, महामाया, अचल, विघ्नान्तक, वज्रहूँकार, त्रैलोक्य विजय, वज्रसत्त्व, वज्रधर, वज्रयोगिनी, इ० ।

अक्षोभ्य स्तोत्र :-

पूर्व अक्षोभ्यसम्भव वज्रपाणि महाबलः ।
गजवाहन सम्पूर्ण नीलवर्ण नमोस्तुते ॥

[४५] सप्तलोचनी तारा

अक्षोभ्य तथागतया खःपाखे ईशानकोणय् च्वंहा सप्तलोचनी तारा अक्षोभ्य तथागतया शक्ति रूपय् मानय् यानातल । थ्वसपोल वज्रपर्यङ्क आसनय् च्वनाः जव ह्लातं वरद मुद्रा यासे खव ह्लातं अभयदान वियाच्चंगु दु । थ्वया ख्वालय् स्वंगः मिखा पाह्लातय् निगः व पालितःलय् निगः समेतं यानाः जम्मा ह्लय्गः मिखा दइच्चंहा जुयाः वसपोल सप्तलोचनी तारा धइगु नामं प्रसिद्ध जूगु जुल ।

खतु स्वयम्भू पुराणय् अक्षोभ्यया शक्ति लोचनी तारा धइगु नां जक खनेदु परन्तु सप्तलोचनी तारायागु वर्णन यानातःगु खनेमदु । लोचनीतारा वज्रपर्यङ्क आसन मजुसे अर्द्धवज्रपर्यङ्क आसन यासे

वरद व अभय मुद्रा यानाः निखे पलेस्वां ज्वनाच्चंगु दइ । उगु पलेस्वानय् थःह्य उपाय स्वरूप पुरुषया गुगु कुल खः उगु कुलया चिह्न अङ्कित याना तयातइ । थुगु पलेस्वानय् अक्षोभ्यकुलया चिह्न वज्र अंकितगुलिं गनं गनं थुह्य लोचनीतारायात वज्रतारा धकाः नं धाः ।

शूक्ष्मौदारिकं रूपं त्रैकाल्यं परिभावितं ।
दृश्यते सर्व क्षेत्रस्थं लोचना तेन कथ्यते ॥

[४६] रत्नसम्भव तथागत

श्रीस्वयम्भू महाचैत्यया दक्षिण दिशाय् बिज्यानाच्चंगु रत्नसम्भव तथागतया संक्षिप्त परिचय :-

रत्नपद्मकेशर रूपी पलेस्वांयाके ज्योतिरश्मि प्रकाश जुयाः समताज्ञान रूपी त्रैकार वीजाक्षरपाखें आपालं पूट बियाः पाःकयातःगु जाम्बुनदसुवर्ण थे अंसंख्य उज्ज्वल ह्यासुगु रश्मि प्रकाश यानाः रत्नावती भुवनं अश्वरत्न गयाः महानन्दं वज्रासनय् च्वनाः वरद मुद्रा यानाः रत्नकुलया अधिपति जुयाबिज्याःह्य वसपोल रत्नसम्भव तथागत उत्पन्न जुयाबिज्यात ।

थ्वसपोलं प्राणिपित रक्षाया लागी महाकरुणा तयाः थ्व संसारय् गुह्यसिनं गुगु वीजारोपण यात उगु उगु अङ्कुरित पल्लवित एवं पुष्पित जुयाः फल सय्मा धकाः पृथ्वीधातु सृष्टि यानाः गुम्हेसित गुगु माल उगु तक वरदान बिइ धकाः वरद मुद्रा यानाः ध्यान यानाबिज्यानाचन ।

गुम्हेसिनं वसपोलयागु ध्यान ज्ञान चर्याय् च्वनाः अभ्यास यानावनी उह्य साधकयात अवश्यं समता ज्ञान प्राप्त जुयाः रत्नसम्भव तथागत बिज्यानाच्चंगु रत्नावती भुवनस जन्म काःवनिइह्य जुइ ।

१. रत्नसम्भवया शब्दार्थ :-

रत्नानि प्रभवन्त्येव बुद्धादि नियतो घ्रुवम् ।

ज्ञानं सत्त्वार्थ युक्तं तद् रत्नसम्भव मुच्यते ॥

२. कलाः - मामकीतारा
३. काय - रत्नपाणि बोधिसत्व
४. भलि - रत्नतारा
५. कुल - रत्नकुल
६. ज्ञान - समताज्ञान
७. मुद्रा - वरद मुद्रा
८. तत्त्व - पृथ्वीधातु पातनी
९. भुवन - रत्नावती भुवन

१०. वर्ण - पीत वर्ण
 ११. बीजाक्षर - त्राँकार
 १२. बर्णाक्षर - टवर्ग (टठडढण)
 १३. वाहन - अश्व
 १४. इन्द्रिय - घ्राण
 १५. समय - मध्याह्न
 १६. दिशा - दक्षिण
 १७. गुण - वरदान रूप
 १८. रत्नसम्भवया कुलं उत्पन्न जूपि ईश्वरपि :-

वसुन्धरा, महाप्रतिसरा, अपराजिता, रत्नवीर महाकाल, प्रशन्नतारा, इ० ।

रत्नसम्भव स्तोत्र :-

दक्षिण रत्नसम्भव रत्नपाणि महातेजाः ।
 तुरंगवाहन सम्पूर्ण पीतवर्ण नमोस्तुते ॥

[४७] मामकीतारा

रत्नसम्भव तथागतया खःपाखे अग्निकोणस च्वंह्य अर्द्धवज्रपर्यङ्क आसन यासे निखे पलेस्वां
 ज्वनाः वरदाभय मुद्रा यानाच्च्वंह्य । उगु पलेस्वांया उपरी भागय् उपाय स्वरूप थःपुरुषया कुलया चिह्न
 रत्न अंकित यानाः शोभा वृद्धि यानातल । थुगु कारणं गनं मामकीतारायात रत्नतारा धकाः नं नां
 बियातःगु खनेदु ।

सर्वतथागतं ज्ञानमात्मानं मामकं यतः ।
 अभ्योन्य व्यापकादेव मामकी तेन तत् स्मृतम् ॥

[४८] अमिताभ तथागत

श्रीस्वयम्भू महाचैत्यया पश्चिम दिशास विज्यानाच्च्वंह्य अमिताभ तथागतया संक्षिप्त
 परिचय :-

रत्नपद्मकेशर रूपी पलेस्वांपाखे ज्योतिरश्मि प्रकाश जुयाः प्रत्यवेक्षणा ज्ञान रूपी ह्रींकार वीजाक्षरपाखे माणिकया श्रीसूर्य प्रकाश जुइ थे अत्यन्त ह्याउँगु रश्मि फिज्य यांनाः सुखावती भुवनं ह्याय्खा गसे परमानन्दं वज्रासनय् च्वनाः पद्मकुलया अधिपति जुयाबिज्याः ह्य श्रीअमिताभ तथागत उत्पन्न जुयाबिज्यात ।

श्वसपोलं प्राणिपित उद्धार याय् निम्ति महाकरुणाया दृष्टि स्वयाः विचाः यांनाच्वंगु दु—श्व संसारय् गुह्यसिनं गुगु कुशलाकुल, धर्माधर्म, ज्ञानविज्ञानया वीजारोपण यात उह्यसिनं उगु उगु कर्मफल भुक्तमान याइ धकाः सारा ब्रह्माण्ड स्वरूप पृथ्वीपात्र धारण यांनाः प्रत्येक प्राणिपिनिगु विचित्र कर्मया गति अचिन्त्य स्वभाव चलन ह्याय्कनय् दुने स्वय् थे स्पष्ट रूपं खंकाः स्थिर दृष्टि यांनाः समाधियोग यांनाः ध्यानय् च्वनाः स्वयाच्वंगु जुल ।

गुह्यसिनं वसपोलयागु ध्यान ज्ञान चर्याय् च्वनाः अभ्यास यांनावनी उह्य साधकयात निश्चय नं प्रत्यवेक्षणा ज्ञान लाभ जुयाः अपरिमित गुण सञ्चय नाम लोकधातु सुखावती भुवनय् आनन्दं जन्म काःवनिइह्य जुइ ।

१. अमिताभया शब्दार्थ :-

अप्रतिष्ठित निर्वाणं अलिप्तं भव निर्वृत्तौ ।

असंख्यगुण संयोगात् अमिताभः स उच्यते ॥

२. कलाः - पाण्डुरातारा (पद्मिनीतारा)
३. काय् - पद्मेपाणि लोकेश्वर (सृष्टिकर्ता लोकेश्वर)
४. भलि - भृकुटीतारा
५. कुल - पद्मकुल (लोकालोकोत्तर कुल)
६. ज्ञान - प्रत्यवेक्षणा ज्ञान
७. भुवन - सुखावती भुवन
८. मुद्रा - ध्यान मुद्रा
९. तत्त्व - अग्नि (तेजोधातुराकर्षणी)
१०. वर्ण - रक्त वर्ण
११. वीजाक्षर - ह्रींकार
१२. वर्णाक्षर - तवर्ग (तथदधन)
१३. वाहन - मयूर
१४. इन्द्रिय - जिह्वा
१५. समय - अपराह्न
१६. दिशा - पश्चिम
१७. गुण - करुणा रूप

१८. अमिताभया कुलं उत्पन्न जूपि ईश्वरपि :-

अवलोकितेश्वर, पद्मिनीतारा, कुरुकुल्ला, महाशीतवती, अमोघपाश लोकेश्वर, षडक्षरी लोकेश्वर, इ० ।

अमिताभ स्तोत्र :-

पश्चिम अमिताभव पद्मपाणि कृपावन्तं ।

मयूरवाहन सम्पूर्ण रक्तवर्ण नमोस्तुते ॥

[४६] पाण्डूरातारा

अमिताभ तथागतया खःपाखे नैऋत्यकोणस च्वंहा पाण्डूरातारा अमिताभ तथागतया शक्ति खः ।
श्वसपोल अर्द्धवज्रपर्यङ्क आसन यासे निखे पलेस्वां ज्वनाः वरदाभय मुद्रा यानाच्चन । उपाय स्वरूप
थःपुरुषया कुलया चिह्न स्वरूप पलेस्वां धारणा यानातःगु दु । थुगु कारणं श्वइत पद्मिनीतारा धकाः नं
धाइ ।

[५०] अमोघसिद्धि तथागत

स्वयम्भू महाचैत्यया उत्तरपाखे च्वंहा अमोघसिद्धि तथागतया संक्षिप्त परिचय :-

रत्नपद्मकेशर रूपी पलेस्वांपाखे ज्योतिरश्मि प्रकाश जुयाः कृत्यानुष्ठान ज्ञान रूपी खँकार
बीजाक्षरपाखे असंख्य उज्ज्वलगु वाउँगु तेज प्रकाश यानाः अमोघवती भुवनं गरुड गयाः महानन्दं
वज्रासनय् च्वनाः अभय मुद्रा यानाः कर्मकुलया अधिपति जुयाबिज्याःहा वसपोल अमोघसिद्धि तथागत
उत्पन्न जुयाबिज्यात ।

श्व संसारयागु मार बिघ्न दोष भय त्राश शान्त याय्या लागी महाकरुणा तथाः षट्गति
प्राणिपित ग्याय् मते ग्याय् मते धकाः भरोशा बियाः अभय मुद्रा यानाः अभयदान बियाच्चन ।
लिस्से अज्ञान क्लेश फुकेत सद्धर्म बोधिज्ञानया उपदेश बियाः ध्यान यानाच्चंगु जुल ।

गुह्यसिनं वसपोलयागु ध्यान ज्ञान चर्याय् च्वनाः अभ्यास यानावनी उह्य साधकयात निःसन्देह
कृत्यानुष्ठान ज्ञान प्राप्त जुयाः अमोघसिद्धि तथागत बिज्यानाच्चंगु अमोघवती भुवनय् जन्म काःवनिइह्य
जुइ ।

१. अमोघसिद्धिया शब्दार्थ :-

सर्वसत्त्वार्थ कर्माणि प्रसाधक तमः स्वयम् ।

अवन्ध्यं तत् महाज्ञानं अमोघसिद्धिरुच्यते ॥

२. कलाः - आर्यतारा
३. काय - विश्वपाणि
४. भलि - विश्वतारा
५. कुल - कर्मकुल (मन्त्रविद्याधरकुल)
६. ज्ञान - कृत्यानुष्ठान ज्ञान
७. भुवन - अमोघवती भुवन
८. मुद्रा - अभय मुद्रा
९. तत्त्व - वायु (वायुधातु पद्मनृत्येश्वरी)
१०. वर्ण - हरित वर्ण
११. बीजाक्षर - खँकार
१२. वर्णाक्षर - पवर्ग (पफवभम)
१३. वाहन - गरुड
१४. इन्द्रिय - काय
१५. समय - रात्रि
१६. दिशा - उत्तर
१७. गुण - विद्या रूप
१८. अमोघसिद्धिया कुलं उत्पन्न जूपि ईश्वरपि :-

वज्रामृत, खडिखतीतारा, महाश्रीतारा, आर्यतारा, पर्वणशवरी, महामायूरी, इ० ।

अमोघसिद्धि स्तोत्र :-

उत्तर अमोघसम्भव विश्वपाणि विद्याधर ।

गरुडवाहन सम्पूर्ण श्यामवर्ण नमोस्तुते ॥

[५१] आर्यतारा

अमोघसिद्धि तथागतया खःपाखे वायव्यकोणस च्वंह आर्यतारा अमोघसिद्धि तथागतया शक्ति खः । श्वसपोल अर्द्धवज्रपर्यङ्क आसन यासे निखें पलेस्वां ज्वनाः जव ह्लातं वरद मुद्रा यासे खव ह्लातं अभयदान विद्याचवन । उपाय स्वरूप थःपुरुषया कुलया चिह्न उगु पलेस्वांया द्योने विश्ववज्र अङ्कित यानातइतःगु जुल ।

महाकरुणया नित्यं जगदुद्धरणाशयम् ।

सत्त्वोत्तारण दक्षत्वात् ताराज्ञानं प्रकाशितम् ॥

[५२] स्वयम्भू महाचैत्यया माणे चक्रा

स्वयम्भू महाचैत्यया गर्भगृहस छचाःखयरं पञ्चबुद्ध व चतुःतारादेवीपिनिगु सुवर्णमय धातुया भव्य रूप कलात्मक मूर्ति दय्काः स्थापना यानातइतःगु दु । थुपि गुह्यसित नं अलग अलग धातुया सुवर्ण मन्दिर दय्काः आदरपूर्वक शोभा वृद्धि यानातःगु जुल । अले थ्व हे गुंगः कचादेगःया बिचय् बिचय् छचालं बल्लाक बांलाक नँवा तयाः माणेपाखे च्चाःहुइकातल । थुगु माणे व्याक्क सिजःपातायागु दय्कातःगु खः । थुगु माणे फुकय्सं त्रिकुलनाथ अवलोकितेश्वर यागु मन्त्र 'ॐ मणिपद्मे हूँ' । मञ्जुश्रीयागु मन्त्र 'ॐ वागिश्वरीमुं ।' वज्रपाणियागु 'ॐ वज्रपाणि हूँ' धइगु मन्त्रत रञ्जना आखलं सहित यानातल ।

स्वयम्भू चाःहुलेगु प्रदक्षिण पथया छचाःखयरं माणे तयातःगुया मतलब थ्व खः—स्वयम्भू प्रदक्षिणा यायां सेवा भक्ति याःवइपि श्रद्धालु भक्तजनपित माणे चाःहुइके विइया निम्ति तयातःगु जुल । थुगु माणे चाःहुइकागु पुण्यं इमिगु पाप क्लेश शुद्ध जुयाः बोधिचित्त करुणा उत्पत्ति याकाः उद्धार याकेगु छगू उपाय कुशलया लागी प्रेरणा विइगु साधनया रूपय् तयाथकूगु जुल । थुकिइ उल्लेख यानातइतःगु मन्त्रया अधिष्ठातृ देवता खः—महाकारुणिक अवलोकितेश्वर, महाप्रज्ञा वागिश्वर मञ्जुश्री एवं क्रोधराज महाबल वज्रपाणि थुपि स्वह्यसिगु चर्चा महिमा महायान बौद्धजगतय् असंख्य महत्वपूर्ण जुयाच्चंगु दु । थुपि स्वह्यसिगु विषयय् कयाः बुद्ध शाक्यमुनि थः महापरिनिर्वाण जुइ न्ह्यो आज्ञा जुयाबिज्याःगु दु—'थुगु लोकय् जि मदुसां तबि बुद्ध शासनयागु सम्पूर्ण कार्यभार थुपि स्वह्यसिनं चलय् याइ :—

१. उद्धारकार्ययागु ज्या अवलोकितेश्वरं याइ ।
२. शिक्षा-दीक्षा उपदेश विइगु ज्या मञ्जुश्रीनं याइ ।
३. मार बिघ्न हटय् याय्गु सम्पूर्ण ज्या वज्रपाणि याइ ।'

थ्व हे उपदेश व आदर्शयात श्रद्धा विश्वास तयाः थौतकं महायान बौद्धजगतं आस्था प्रतिष्ठा ततं वयाच्चंगु जुल ।

थुगु स्वयम्भू महाचैत्यय् गुंगः कचादेगः सुनां दय्काव्यूगु खः वय्कः दानपति थ्व माणे चक्रा तयाः शोभा वृद्धि यानाव्यूगु धयातल ।

[५३] दीपावली चाकःमत (चाकःदलू)

थ्व हे स्वयम्भू महाचैत्य प्रदक्षिण पथया लिक लिकसं चाःहुइकातःगु माणेया क्वस्सं क्वस्सं स्वंगू तहः यानाः दीपावली चाकःमतया रूपय् छचालं चाकःदलूपातं चाःहुइकाः शोभा वृद्धि यानातःगु दु । नेपाःया निम्ति महादीप स्वरूप गुबले सिइमखुगु सर्वत्र सर्वदा कालं दनननं थिनाः च्यानाच्चंगु

वसपोल ज्योतिरूप श्रीस्वयम्भूया छ्वाःख्यरं सलंसःलं मयाक इलिलिलि च्वंक चाकःमत चाकःदलू तयाः दीपावलीया लागी सजय् यानातःगु जुल ।

थुकिइ विभिन्न भक्तजनपिसं विशेष पर्वकाल पुष्पतिथिस छगू छगू उपलक्ष विषयय् कयाः वसपोल ज्योतिरूप श्रीस्वयम्भू भगवान्या न्होने मत छ्वय्कः वइगु जुयाच्चन । उगु बेलायात उपयोगी जुइगु किसिमं श्रद्धालु दानपतिपिसं तयाथकूगु जुल । थुगु चाकःदलूपातय् थःथःगु श्रद्धाभक्ति अनुसार गुलिसिनं घ्यः तयाः च्याकी, गुलिसिनं चिउरीघ्यः तयाः च्याकी अथवा हामोचिकं, तूचिकं तयाः चाकःमत छ्वय्काः सक्वफक्व स्तोत्र, गीत, धारणी ब्वनाः पाठ यानाः एवं मन्त्र जपय् यानाः विभिन्न आशिका प्रणिधान आदि यानाः श्रीस्वयम्भू महाचैत्य स्वकः न्याकः ह्यय्कः नीछ्कः अथवा सच्छिक्कः व च्याकः आदि फक्व प्रदक्षिणा एवं दण्डवत् यानाः पुण्य आर्जन यानावनो । श्रीस्वयम्भूयात प्रदीपद्वारा पूजा यानागुया पुण्य प्रशंसा थथे वर्णन यानातःगु दुः :-

तैलाज्यादि प्रदीपञ्च यो ददद्याज्जिनपुङ्गवे ।
नेत्राभिरामकोभोगी दिव्यचक्षुखाप्नुयात् ॥
यक्षासुरमनुष्याणां नागगन्धर्व रक्षति ।
अन्येषां दुष्टजन्तुनां भयं नास्ति कदाचनः ॥
कुष्ठादि पाप रोगाश्च कुदृष्टि ग्रह शत्रवः ।
डाकिनी ग्रहपीडाश्च नाशयन्ति तदा घ्रुवम् ॥
धनधान्य समृद्धिश्च शिवशक्ति समन्वितः ।
अन्य जन्म विपत्तिश्च हत्वायान्ति सुखावतीम् ॥
कलु खमिव दृश्यन्ते दूरस्थोगतिरस्कृतम् ।
तत्सर्वं दीपदानस्य फलं ज्ञेयं स्वयम्भुवे ॥

गथे सहस्र तारागणया विचय् तुयूमिला थिनाच्चनी अथे हे भद्रकल्पया अन्तरय् विज्याइपिं सहस्र बुद्धपिनि नं आत्मा स्वरूप जुयाच्चव्ह आदिबुद्ध ज्योतिरूप श्रीस्वयम्भू विराजमान जुयाः शोभायमान जुयाच्चंगु दु धइगु उदाहरण स्वरूप स्वयम्भू महाचैत्यया छ्वालं थुगु सहस्र दीपावली चाकःदलू तयाः भावपूर्ण दृश्य प्रदर्शित यानातःगु जुल । खतु थ्व हे श्रीस्वयम्भू भगवान् आदिबुद्धयागु ज्योतिरूपपाखे पञ्चरश्मि पिहांवल, गुगु पञ्चरश्मिपाखे पञ्चबुद्ध प्रकाश जुल । हानं व हे पञ्चबुद्धयागु थःथः रश्मिपाखे वाह्य गुह्य अभ्यन्तरया दृष्टि अनेक देवतात्मक तत्त्व प्रस्फुरण जूगु धयातः थे अनुत्तर ज्ञान स्वरूप प्रभाश्वर धर्मकाय धर्मधातु आदियागु कारणं प्रज्ञापायात्मक तत्त्वपाखे आपालं सूत्र, तन्त्र, ग्रन्थ विस्तार जुयाच्चन ।

थुगु हे रूपं धर्म संस्कृति कलाप्रति अगाध श्रद्धा दुपि नेवाःतय्गु संस्कृतिइ दुने गवेषण व

प्रवेशन जुयाः अनुसन्धान यानाः स्वतः धाःसा नेवाः समाज्य दुने कार्य कारण भेदं अनेक किसिमया चाकःदलू, चाकःमत थे जाःगु तःताजिया मत खनेदयाच्चनी । प्रसङ्गवश उदाहरणया लागी निगू प्यंगू नां प्रस्तुत यानाच्चना :-

१. चाकःदलू - पद्माकृतिया द्योने ज्योतिस्वरूपगु मत
२. खादलू - छेय् छेय् ऊयालं पिने खायातइगु मत
३. इनायदलू - देवस्थल व गुठिस च्याकिइगु मत
४. माकःदलू - रहस्यपूजास साधनाया रूप्य च्याकिइगु मत
५. शालिकदलू - दिवंगत आत्माप्रति प्रकाश निमित्त च्याकिइगु मत
६. ध्यःदिवा - भक्तिया रूप्य देवस्थलय् पूजाया प्रकरण्य च्याकिइगु मत
७. पाल्चामत - छुं उत्सव विशेष अथवा हनेबहःपि परिचित व्यक्तिपित सन्मानया लागी वितरण जुइगु मत
८. त्वाःदिवामत - छुं उत्सव समारोह्य न्ह्योने ब्यहइगु मत
९. द्वाल्यारवमत - व्रतवन्ध, विवाह आदि उत्सव्य लसकुस यानाः दुकाइबलय् जःखः ब्यहइगु मत
१०. म्वास्याप्वाः - जात्रा उत्सव्य द्यःया न्ह्यो न्ह्यो च्याकावनिइगु मत
११. आरतीमत - पूजादि भजन सिध्यकेत आरती रूप्य न्ह्योने च्याकिइगु मत
१२. सुकुन्दामत^१ - कर्मकाण्ड पूजाविधि विधान जुइबलय् साक्षि रूप्य च्याकातइगु व गनं द्यःया थासय् मत व्यूवनिइबलय् च्याकिइगु मत
१३. मकुन्दामत - आकार प्रकार सुकुन्दा थे जूसां नागछत्र मदुगु मत, जिचाभाजु ससलय् दुचाय्कः वनिइबलय् ज्वनावनिइगु मत
१४. ह्यूमत - विशेष यात्रा उत्सव्य द्यःखः जात्राय् हिइकाः च्याकातइतगु चक्रप्रदीप मत
१५. हेलंव्युमत - ततःधंगु जात्रा उत्सव्य हेलंव्यु हेलंव्यु धकाः नारा लग्य यानाः जुलुस सहित जुयाः च्याकावनिइगु तोरणाकृति मत
१७. महादीमत - ततःधंगु पुण्यतिथि व विशेष धार्मिक उत्सव कार्य व जात्राया उपलक्ष्य थःगु शरीरया भावनाकथं च्याकिइगु महादीप मत
१८. ग्वदारमत - जात्राया छ्वय्लाभू, भुजायाःखुनु लैया बिच्य अथवा उच्चस्थान्य दबुलिथाय् तयाः तिकिऊयाःया रूप्य शिखरशैली मन्दिराकृतिकथं पञ्जः ग्वयाः तिकिऊयाःया ह्वःचा पतिकं पाल्चामत दलूपामत तयाः सजधज साथ प्रदर्शनी रूप्य च्याकिइगु मत

१- थुकियागु विस्तृत विवरण प्रस्तुत ग्रन्थया लेखकयागु 'नेपाल संस्कृतिया मूलुखा' स्वयादिसँ ।

इत्यादि प्रकारया नेवाः संस्कृति दइच्चंगु विभिन्न तालगु मतत मध्यय् थ्व स्वयम्भू चाकलय् च्वंगु चाकःदलूया थःगु हे पृष्ठभूमि दु ।

[५४] गणावर्त्त मण्डल

थ्व गणावर्त्त मण्डल स्वयम्भू महाचैत्यया बेदिकाय् छ्वाःख्यरं तयातःगु विभिन्न प्रस्तर मूर्तित खः । थुगु मूर्तित स्वयम्भूया प्रदक्षिणा स्वरूप विभिन्न चैत्य व मूर्तिपाखे रत्नया किनारय् ज्वाहारात जडय् यानाः शोभा वृद्धि याय् थे यानाः तयातःगु खनेदु । थुपि मूर्ति व चैत्यत श्रीस्वयम्भू महाचैत्यया थःगु गण स्वरूप पारिवारिककथं चाकःहुलाः च्वनाच्चंगु जूया निम्ति थुकियात 'गणावर्त्त मण्डल' धयातःगु जुल ।

खतु थ्व गणावर्त्त मण्डल गथे मण्डल मण्डलय् ज्वालावली, पद्मावली, वज्रावली तय् थे यानाः मण्डलयागु लक्षण प्रमाण मिलय् याय्त तयातःगु धकाः नं धाइ । ज्वालावलीया अर्थय् दीपावली चाकःमत तयातल । पद्मावलीया रूपय् पलेस्वां ज्वनाच्चंगु पद्मपाणि अवलोकितेश्वरयागु मणिपद्म चाःहुइकाः माणे तयाविल; अथे हे वज्रावलीया विगुद्विकथं वज्रभूमिया परिवार वज्रधातु चैत्य अङ्कित यानाः तइतःगु जुल ।

थन स्वयम्भूया चाकलय् स्वंगु किसिमया आवर्त्त चाःहुइकातःगु खनेदु । व छु छु धाःसा :-

१. चाकःमत दीपावली — ज्वालावली
२. माणेया चक्का — पद्मावली
३. गणावर्त्त मण्डल — वज्रावली

ज्वालावलीया मतलब संसारयागु अज्ञान रूपी अन्धकारपाखे छुतय् जुयाः प्रज्ञाज्ञान रूपी ज्योतिर्मय प्रकाशय् थ्यनकि वास्तविक ज्योतिरूप स्वयम्भूयात दर्शन व स्पर्शन याय् फइ धइगु अर्थ जुल ।

पद्मावलीया अर्थ—गथे पलेस्वां भुतुनालं उत्पत्ति जूसा भुतुनाल मथ्युसे अलग जुयाः शुद्ध पवित्र जुयाच्चन अथे हे थ्व प्राणिजित नं कर्मक्लेश रूपी भुतुनालं थकयाः असत्मार्गपाखे बचय् यानाः सम्बोधि मार्गय् तयाः उद्धार यानाः ज्योतिर्मय श्रीस्वयम्भूस थ्यनी धइगु भाव मिलय् यानातःगु जुल ।

वज्रावलीया आशय थथे खनेदु—ज्वालावली, पद्मावली निगू भूमिपाखे पार जुलकि वइत यथार्थगु वज्रभूमि प्राप्त जुयाः सुविशुद्ध धर्मधातु ज्ञानय् थ्यनाःलि वसपोल ज्योतिरूप श्रीस्वयम्भू भगवान्यात साक्षात्कार यानाः काय्फुहा जुइ धइगु संकेत जुल ।

प्रसङ्गवश थुगु स्वयम्भूया बेदिकाय् चाःहुइकातःगु गणावर्त्तस अङ्कित मूर्तितय्गु नां न्ह्यथना- च्वना ।

स्वयम्भूया गर्भगृह्या पश्चिमाभिमुख अमिताभ बुद्धया जवंनिसें शुरु यानागु जुल :-

१. अक्षोभ्य तथागत
२. अमिताभ तथागत
३. सप्तपद्मोपरी स्वयम्भू चैत्य
४. षडक्षरी, प्रज्ञापारमिताया चवस्सं चैत्य
५. निहा भक्तया चवस्सं चैत्य
६. निहा भक्तया चवस्सं चैत्य
७. पद्मांकुरोपरी चैत्य, थ्वया जःखः भक्त
८. " "
९. " "
१०. केशिनी उपकेशिनीया दत्थुइ मञ्जुश्री, थ्वया चवस्सं चैत्य
११. किनिहा भक्तया चवस्सं चैत्य
१२. थः शक्तिया दत्थुइ मञ्जुश्री, थ्वया चवस्सं चैत्य
१३. पद्मया द्योने चैत्य
१४. मञ्जुश्रीया जःखः थः शक्ति, अले थः फुसय् चैत्य
१५. पद्मोपरी चैत्य
१६. धर्मचक्र तारा
१७. पद्मांकुरोपरी अक्षोभ्य युक्त चैत्य, थ्वया जःखः भक्तजन प्यहा नं दु
१८. सुखासनय् शक्ति सहित लोकेश्वर
१९. पद्मांकुरोपरी सप्तलोचनी तारा, थ्वया जःखः नं तारा
२०. पद्मपाणि लोकेश्वर, थ्वया जःखः खालिगु द्वार युक्त
२१. पद्मांकुरोपरी भक्तजन प्यहा, थ्वया चवस्सं अक्षोभ्य बुद्ध
२२. मञ्जुघोष
२३. पद्मांकुरोपरी अमोघसिद्धि बुद्ध, थ्वया चवस्सं चैत्य व क्वय्पाखे भक्त निहा
२४. " " "
२५. स्वहा भक्तया चवस्सं चैत्य
२६. पद्मांकुरया द्योने चैत्य
२७. निहा भक्तया दत्थुइ पद्मांकुरोपरी चैत्य
२८. पद्मांकुरोपरी चैत्य
२९. वैरोचन बुद्धया चवस्सं चैत्य, थ्वया जःखः भक्त
३०. मञ्जुश्रीया चवस्सं चैत्य
३१. पद्मोपरी चैत्य, थ्वया जःखः भक्त

३२. पद्मपाणि लोकेश्वर
३३. जम्बल थे च्वंहा
३४. पद्मांकुरोपरी चैत्य
३५. पद्मपाणि लोकेश्वर
३६. पद्मांकुरोपरी चैत्य
३७. "
३८. "
३९. "
४०. "
४१. जःखः धर्म व संघ, थ्वया दत्थुइ चैत्य
४२. पद्मांकुरोपरी चैत्य
४३. जःखः धर्म व संघ, थ्वया दत्थुइ चैत्य
४४. पद्मांकुरोपरी चैत्य
४५. जःखः प्रज्ञापारमिता, षडक्षरी, दत्थुइ चैत्य
४६. पद्मांकुरोपरी चैत्य
४७. वैरोचन बुद्ध अङ्कित चैत्य, थ्वया जःखः भक्तजन प्यहा
४८. पद्मांकुरोपरी चैत्य
४९. "
५०. "
५१. पद्मांकुरोपरी फिहा भक्तया निळवः, थ्वया च्वस्सं त्रिरत्न मूर्ति अले थ्वया नं च्वय् चैत्य
५२. पद्मांकुरोपरी वज्रपाणि
५३. पद्मांकुरोपरी षडक्षरी लोकेश्वर, थ्वया जःखः भक्त
५४. पद्मांकुरोपरी मञ्जुश्री
५५. पद्मांकुरोपरी चैत्य
५६. "
५७. "
५८. "
५९. पद्मांकुरोपरी आर्यतारा, थ्वया जःखः सेविका
६०. पद्मांकुरोपरी चैत्य
६१. कीर्तिमुख युक्त तोरणया क्वस्सं प्यहा भक्त सहित सप्तलोचनी तारा, थ्वया च्वस्सं अक्षोभ्य अले थ्वया नं च्वय् चैत्य
६२. षडक्षरी लोकेश्वर

६३. पद्मांकुरोपरी चैत्य, श्वया जःखः भक्त
 ६४. "
 ६५. "
 ६६. "
 ६७. "
 ६८. "
 ६९. "
 ७०. "
 ७१. "
 ७२. पद्म रूपी अंकुरीया द्योने चैत्य, श्वया जःखः भक्त
 ७३. " "
 ७४. " "
 ७५. " "
 ७६. पञ्चबुद्धया चवस्सं चैत्य
 ७७. "
 ७८. षडक्षरीलोकेश्वर, श्वया जःखः भक्त
 ७९. पद्मोपरी चैत्य
 ८०. "
 ८१. "
 ८२. "
 ८३. पद्मया द्योने चैत्य
 ८४. "
 ८५. "
 ८६. "
 ८७. पद्मांकुरोपरी चैत्य, श्वया जःखः भक्त
 ८८. "
 ८९. "
 ९०. "
 ९१. "
 ९२. "
 ९३. पद्मांकुरोपरी अङ्कित चैत्य, थुकिइ भक्त स्वहा
 ९४. पद्मांकुरोपरी चैत्य, जःखः भक्त



वज्रसाधु महाकाल

६५. पद्मांकुरोपरी चैत्य, जःखः भक्त
 ६६. "
 ६७. "
 ६८. "
 ६९. पद्मांकुरोपरी चैत्य, भक्त स्वह्य
 १००. पद्मोपरी पद्मपाणि, जःखः भक्त
 १०१. पद्मांकुरोपरी चैत्य, थ्वया जःखः भक्त
 १०२. पद्मांकुरोपरी सुखावती लोकेश्वर शक्ति सहित
 १०३. पद्मोपरी चैत्य, थ्वया जवं खवं भक्त
 १०४. पद्मोपरी छत्र युक्त चैत्य, थ्वया निखे भक्त
 १०५. ध्यानी बुद्ध अमिताभया च्वस्सं चैत्य, थुकिइ भक्त खुह्य दु
 १०६. ध्यानी बुद्ध अमिताभया च्वस्सं चैत्य, थ्वया जःखः भक्त
 १०७. पद्मांकुरोपरी चिन्तामणि लोकेश्वर, थ्वया च्वस्सं चैत्य अङ्कित अले थ्वया जःखः भक्त
 १०८. चैत्याङ्कित तोरणया दुने सुखावती लोकेश्वर, थ्वया जःखः नं लोकेश्वर तयातल
 १०९. पद्मांकुरोपरी धर्मचक्र तारा, थ्वया जःखः बोधिसत्व
 ११०. पद्मांकुरोपरी अक्षोभ्य बुद्ध, जःखः बोधिसत्व
 १११. सप्तबुद्धया च्वस्सं आदिबुद्ध वज्रधर
 ११२. अमिताभ तथागत
 ११३. पद्मांकुरोपरी चैत्य, जःखः भक्त खुह्य दु
 ११४. अक्षोभ्य तथागत, थुकिइ च्याह्य भक्तजन उपस्थित यानातल

[५५] वज्रसाधु महाकाल

स्वयम्भू महाचैत्यया उत्तरपाखे वर्तमान अतिथि सत्कारया रूप्य सिमन्ति धलान यानाः दय्कातःगु छगू मण्डप दु । थुगु मण्डपया च्वस्सं पश्चिम अभिमुख यानाच्चंहा महाकाल खः । थुजाःगु किसिमया महाकाल काठमाण्डू उपत्यकाय् गनं मदु धाःसां ज्यू । अप्पो यानाः थुजाःह्य महाकाल तिब्बती गुम्बा गुम्बाय् जक खनेदु । थ्वइत तिब्बतीतय्सं घुरगोम्पो धकाः धाइ । थुह्य महाकालयात विभिन्न नामं सम्बोधन यानावइच्चन :-

१. वज्रसाधु महाकाल
२. धर्मगण्डीधर महाकाल
३. पञ्जर महाकाल
४. वसन्तर्तु महाकाल

थुहा महाकाल शान्त स्वभाव ज्ञानीहा जूया निम्ति वज्रसाधु महाकाल धयातल । मेमेपि महाकाल थे उलि हारां मजू, क्रोधी मजू । कारण बडो आदरपूर्वक प्रेमपूर्वक धर्मगण्डीयात थःगु मुल्य तथाः घय्पुनाः तइतःगु दुगुलि 'वज्रसाधु' धइगु संज्ञा व्युगु खः । थ्व धर्मगण्डीया विषयय् थुजाःगु कथन दु—श्रावकचर्यय् च्वनाः भिक्षुपिसं गुलि नं थःथःगु विहारय् च्वनाः गुम्बाय् च्वनाः पालन याय्माःगु शील नियम धर्म विनय अनुरूप भिक्षुपित इलय्-व्यलय् सञ्चोदन विइगु सुचं विइगु छगू मुख्यगु साधन विशेष मानय् यानावइच्चंगु जुल ।

थुगु धर्मगण्डी थौतकं कौगु मूलगु विहार विहार पत्तिकं धयाथे दुने क्वाःपाःयाथाय् तथातःगु दनि । नेपाःया बौद्ध संस्कृति अनुसारं ह्लिच्छिया प्यकः धर्मगण्डी थाय्गु यानावइच्चंगु दु । थ्व धर्मगण्डीयात कौसं गम्भासि थाय्गु धकाः धयावइच्चन । तर थ्व गम्भासि थानाच्चैतले उगु विहारय् पलाःछी मज्जू, न्यासिवना च्वंसां उगु धर्मगण्डी थानाहःगु सः ताय् दय्वं थपक्क दनाः श्रद्धापूर्वक उगु धर्मगण्डी श्रवण यानाच्चनेगु चलन दनि । थुगु धर्मगण्डी श्रवण याना मात्रं पुण्य प्राप्त जुइ, रोगव्याधि शान्त जुइ धयातःगु दु^१ । थौतकं थ्व धर्मगण्डी धाइहा छःपाःलाःनं चीवरवस्त्र क्वक्खायाः जक थाय्गु अधिकार वियातल । थ्व धर्मगण्डी थाय्गु अलग हे विधि दु, नियम दु । थुकि स्पष्ट जू वः—शील नियम विनय पालन मज्जुपिसं धर्मगण्डी थाय् मत्यः धइगु परम्परा चलय् जुयावइच्चन । थ्व धर्मगण्डी थाय्गुया थःगु हे अर्थ दु, विधान दु । थुगु धर्मगण्डी ह्लिच्छिया प्यंगू प्रहरय् थाय्गु यानावइच्चन :-

१. सुथह्लापां - त्रिशरण बोधिचित्त उत्पत्ति यानाः समाधिस च्वनेगु ।
२. माजं ई - विहारय् बुद्धपूजा व पाठ स्तोत्र याय्गु ।
३. स्वफः ई - विहारय् धर्म श्रवण याय्गु व उकिया विषयय् धर्मसाकच्छा याय्गु ।
४. सन्ध्या ई - अनित्य दुःख अनात्माया भावनाय् च्वनेगु, प्रतीत्यसमुत्पाद विचाः याय्गु ।

उकि थुहा वज्रसाधु महाकालं धारणा यानाच्चंगु धर्मगण्डी ऊवात्त स्वयंबल्य् छगू दण्डी थे च्वंसां थुकिइ दुने बुद्धधर्मयागु रहस्य अर्थ तत्त्व विशुद्धि सुलाच्चंगु खनेदु । प्रसङ्गय् थुहा महाकालयागु ध्यान रूप थन न्ह्यथनाच्चना :-

शवासनया द्योने उत्कुटुकासन यानाः पुतुहुं च्वने थे यानाः पयतुनाच्चंह्य । क्रोध रूप छपाः ख्वाः स्वंगः मिखा कनाः शिरय् अक्षोभ्य तथागत अङ्कित पञ्चशुष्कमुण्ड युक्त मुकुतं पुयाः षण्मुद्रा धारण यानाः नरशिरमालां क्वक्खायाच्चंह्य । जवगु ह्लातं वज्रकर्ति व खवगु ह्लातं कपालपात्र ज्वनाः धर्मगण्डीयात नं थःगु मुल्य आदरपूर्वक तथातल । मेमेपि महाकालया तुलनाय् थ्व थःगु हे विशेषता खः ।

१- यत्र विहारे गण्डिका आकोद्यते तत्र विहारे भिक्षुभिक्षुण्योपासकोपासिकानां सर्वव्याधिरूपशाम्यति । बोधौ परिनायको भवति० ।

[५६] विरूपाक्ष मूर्ति

स्वयम्भूया उत्तरपाखे सिमन्ति धलान यानाः दय्कातःगु छगू मण्डप दु । थ्व हे मण्डपया लिकसं च्वंगु चीवाहाःया वेदिकाय् दक्षिण अभिमुख यानाच्च्वंगु मूर्ति खः ।

विरूपाक्षया नां काय्वं विरूपाक्षया मूर्ति खनेवं अथवा मुखोऽष्टमीखुनु पशुपति महादेवं स्वयम्भूया मुखलं पुइगु इतिहासया पृष्ठभूमि लुमनेवं नेपाल संस्कृतिया जनजीवनय् थ्व खँ न्ह्योने च्वंवइ—

विरूपाक्षं थःगु छेँ तोताः छाया पिहांवन, लिस्सें काय्यात माले धकाः वया मां गन वन ? इपिं निह्मं गुबले गन नापलात ? इमि छु खँल्लाबल्ला जुल ? आखिर गथे जुयाः मां व काय् निह्मं कामसम्भोगय् व्यस्त जुल । अनं लिपा मां व काय् धकाः परस्परय् परिचित्त जुसेलि गुजाःगु प्रायश्चित्त भोगय् यात ? उगु प्रायश्चित्त कर्मभोग फुके निम्ति पशुपति महादेवं छु उपाय बिल ? उगु उपाय वइत छु जुइत्यन ? पशुपति महादेवयात तोताः बुद्धया शरणय् छाया वन, लिस्सें बुद्धं छु खँ कनाः वइगु पाप परिशुद्ध यानाबिल ? अन्तय् पशुपति महादेवं स्वयम्भू पञ्चबुद्ध भगवान्यागु मुखलं छाया पुइमाल धइगु इत्यादि खँत लुमना वय् धुंकी ।

थुकियागु विस्तार खँ प्रस्तुत ग्रन्थया ३१ गूगु अध्याय स्वयाः सिइकादिसं ।

[५७] हरिहरिहरिवाहन लोकेश्वर

स्वयम्भू अग्निपुरया न्ह्योनेपाखे शान्तिपुर क्वहांवने थाय् च्वंगु चःस्वां सिमाया चाकलय् पश्चिम अभिमुख यानाच्च्वंगु मूर्ति जुल । थुगु मूर्ति प्यंगू तहलय् विभक्त जुयाच्च्वंगु दु । दकसिबय् क्वय् सिंह, सिंहया द्योने नाग क्वकखायाच्च्वंहा गरुड, अले गरुडया च्वस्सं नारायण, थ्व हे नारायणया च्वस्सं षड्भुज लोकेश्वर करुणामय तयातःगु खनेदु । थुगु मूर्तिया लिउनेसं प्रभामण्डलया रूपय् चम्पक वृक्ष अङ्कित यानाः शोभा वृद्धि यानातल । थुगु मूर्तिया जवपाखे चतुर्भुज वसुंधरा, आर्यतारा व वैनतेज । अले खवपाखे जक सरस्वती, यमराज एवं भृकुटीतारा तयातःगु जुल ।

प्रसंगवश थुहा लोकेश्वरयात छाया हरिहरिहरिवाहन लोकेश्वर धाल धइगु विषयय् छत्वाःचा खँ न्ह्यथने :-

स्वयम्भू पुराणया धापू अनुसार^१ कालीदहनय् सहस्रदल पलेस्वांया द्योने श्रीस्वयम्भू ज्योतिरूप प्रकाश जुल । थुगु स्वयम्भू ज्योतिरूप दर्शन निम्ति गुरु महामञ्जुश्री विज्यानाः कालीदहःया लः छ्वनाः देवमनुष्यया हित सुखया लागी नेपाल मण्डल मञ्जुपत्तन सहर दय्कल । लिपा बिबिध

१- राष्ट्रिय अभिलेखालय वि. सं. ३३२, स्वायम्भू पुराण, पृ. ९७

कारणवश पुण्यतीर्थ, शान्ततीर्थ आदि किनिगू तीर्थत उत्पन्न जुल । थुगु वाग्मतो व अमोघफलदायनो नदी संगम जुयाच्चंगु पवित्र शोधनतीर्थ नाम पुण्यतीर्थय् तक्षक नागराजं थःगु कुष्ठरोग शान्ति निम्ति ह्लित्थं स्नान कर्म यानाः उपोषध शीलय् च्वनाः त्रिरत्नया सेवा यानाः षड्क्षरो मन्त्र जाप यानाः तपस्या यानाच्चन । थुगु प्रकारं तपस्या यानाच्चव्वं थुगु पुण्यया फलं उगु कुष्ठरोग लायावनाःलि स्वस्थ दिव्य शरीर प्राप्त जुल । थुगुकथं पुण्यतीर्थय् ह्लित्थं सेवा यानाच्चव्वं छन्हु पालं याय् सिधय्काः थुगु तीर्थया किनारय् च्वनाः निभाः पानाः आराम कयाच्चंगु इलय् आकाशमार्गं गरुड ब्वयाः तक्षक नागराजया न्ह्योने थ्यंकःवल ।

उगु इलय् गरुडं तक्षक नागराजयात ज्वनेत तयार यात । तक्षकं गरुडयात धाल—‘भो गरुड ! छ थःगु लं लिनाः हुँ, थन पियाच्चनां छंत छुं लाभ जुइमखु ।’ नागराजयागु खँ न्यनाः गरुड तंम्बयाः धाल—‘छ जिगु नय्गु नसा खः, छं फूर्ति यानां छु याइ !’ थथे हाहां निह्यसिया बिचय् अनेक खँ जुल । आखिर निह्यसियां थःथःगु बल प्रदर्शन क्यनाः संघर्ष जुल । तक्षक नागराजयागु धर्मया फलं गरुड जूसां वइगु न्ह्योने थःगु शक्ति क्षीण जुल । अन्तय् तक्षक नागराजं गरुडयात हितुमनुहिनाः सने-सिने मफय्का तल । उगु आतुरय् गरुडं थः स्वामि बैकुण्ठ भुवनय् च्वंहा नारायणयात अनुस्मरण यात । ‘भो प्रभु ! थुगु अवस्थाय् जितः रक्षा यानाबिज्याहुँ ।’ धकाः आराधना याय्वं नारायणजु हतरपतरं ब्वांवयाः छुं खँ-खँ बुक्य् मयासे छत्थुं तक्षक नागराजयात सुदर्शन चक्रं प्रहार याय्त सन । नारायणं थःत सुदर्शन चक्रं प्रहार याइन धइगु सियाःलि तक्षक नागराजं थःम्हं व्रत उपासना यानाच्चनाह्य आर्याष्टांग उपोषध व्रतया स्वामि देवातिदेव श्रीकरुणामययात लुमंकाः प्रार्थना यात— ‘भो प्रभु ! छलपोलयागु सेवा यानाच्चनाह्य जि अनाथ सेवकयात बिना अपराधं गरुडयागु खँ न्यनाः नारायणजुं जितः सुदर्शन चक्रं प्रहार याइन । थुगु आपद् भयं रक्षा यानाः उद्धार याय्त याकनं बिज्याहुँ ।’ तक्षक नागराजयागु थुगु आपद् सियाःलि भक्तया उपरय् करुणा सुदृष्टि तयाःलि सुखावती भुवनय् बिज्याना-च्वंहा श्रीकरुणामयं सिंह गयावयाः उघरिमय् घटनास्थलय् थ्यंकःबिज्यात । वसपोल श्रीकरुणामय थ्यनेवं इमि परस्परय् जुद्ध जुयाच्चंगु शान्त जुल । नागराज व गरुड निम्हेसिया बिचय् छाया ल्वापु जूगु खः व कारण बुक्य् याना स्वःबलय् गरुडयागु भूल जूगु खन । उकिइसं बैकुण्ठया अधिपति जुयाच्चंहा नारायणं छुं न्याय निसाफ विवेक मयासे छत्थुं गरुडयागु खँ न्यनाः निर्दयी जुयाः तक्षक नागराजयात सुदर्शन चक्रं प्रहार याय्त्यंगु कं तःधंगु भूल खः धइगु सिइकाः श्रीकरुणामयं नारायणयात सम्बोधि ज्ञान खँ कनाः बोध यात—

- (१) थ्व संसारय् थःम्हं छु पिना उगु बुया वइ, थःम्हं वैरि भाव यासेंलि निःसन्देह थःत संकष्ट जुवइ ।
- (२) गुह्यसिनं कर्पित वैरि भाव मतसे करुणा तयाः क्षमादान यात धाःसा निश्चय नं वइत सुख शान्ति जुइ ।
- (३) परयात दुःख बिलकि न्ह्यात्थाय् नं थःत शस्त्रया भय उत्पन्न जुइ ।

- (४) संसारय् गुलि नं शत्रु-मित्र एवं सुख दुःख धइगु दइच्चन थुपि ब्याक्वया हेतु थःगु कर्तव्य हे खः ।
- (५) हे नारायण ! छ जुल दुष्ट पापीतय् नाश यानाः पुण्यात्मा साधु सन्तपित उद्धार याय्गु छंगु ज्या मखु ला ? छं यो मयोया कारणं पनपक्ष यानाः धर्मात्मा पापात्मा हे बिचाः मयासे थःत मतेना कर्पित शत्रु भाःपियाः पुण्यतीर्थय् तपस्या यानाच्चंहा तक्षकयात छं मोचन याय्त सन तर मोचके फइमखु, अल्पायु जुइगु दीर्घायु जुइगु थःथःगु कर्तव्य खः । हे हरि ! थ्व कर्मभूमि संसारय् न्ह्याह्य हे जूसां थःगु कर्तव्य थःम्हं भोग याइ, सुनानं इना काइ मखु । थ्व तक्षकं स्वइतं स्यंकूगु मदु । छं जा पनपक्ष यानाः सुदर्शन चक्रं प्रहार याय्त सन । गुलि नं प्राणिपिसं कर्म भुक्तमान यानाच्चन व ब्याक्व थःगु हे अज्ञान क्लेशं यानाः जुइगु जुयाच्चन ।

थुलि खँ नारायणयात संक्य् याके धुँसेलि थुखे तक्षक नागराजयात नं छुं शब्द बोध याना-
बिज्यात :-

हे तक्षक नागराज ! संसारय् द्वेष समान पाप मेगु मदु । थ्व द्वेष रूपी मि पुसां यानाः असंख्य कल्प पुण्य यानातयागु दुसां गथे कपाय्या द्योने मि पुसा कुतुंबनी थे संपूर्ण पुण्यराशि भष्म याना बिइफु । उकिं न्ह्यागु यानाः नं क्षान्ति गुण धर्म रक्षा याय्गुया लागी कोशिश याय्गु स्व ! हे तक्षक ! छं गरुडयात शत्रु भापी मते, पूर्वजन्मयागु पाप क्लेश फुकेया लागी कल्याणमित्र स्वरूप जुयावःह्य धकाः मतिइ ति ।

श्रीकरुणामययागु थुलि सम्बोधिज्ञानयागु खँ न्यने धुँसेलि परस्परय् इमि द्वेष भाव मदयाः सद्भावना उत्पन्न जुयाः थवं थः कल्याणमित्र स्वरूप जुल । थुगु बेलाय् देवातिदेव श्रीकरुणामयं तक्षक नागराजयात कयाः गरुडयागु गःपतय् क्वक्खाय्काः मित्रभाव याकाविल । नारायण व गरुडं श्रीकरुणामययात अनेक प्रकारं पूजादि सत्कार यानाः चरणकमलय् भवपुयाः सिंहया ह्यय् गरुड तथाः हानं गरुडया द्योने नारायण च्वनाःलि थःगु ह्यय् देवातिदेव आर्यावलोकितेश्वर श्रीकरुणामय अति शोभायमान जुइक बिज्याकल । थ्वसपोल करुणामय थुगु घटनाया कारणं 'श्री हरिहरिहरिवाहन लोकेश्वर' धइगु नामं प्रसिद्ध जूगु जुल । थुपि सकलयां अति हर्षमान जुयाः थुगु थासं ब्वयावनाःलि चारुगिरि धइगु चांगु पर्वतय् बिज्यानाः अन्तरध्यान जुयाः उगु थासय् सिद्ध जुया बिज्याःगु जुल ।

उकिं सुनां गुह्यसिनं थुगु महत्वपूर्ण घटनायात लुमंकाः श्रद्धा तथाः थुगु चारुगिरि चांगु पर्वत गइ इमित शत्रुभाव मदयाः मैत्रिभाव उत्पन्न जुयाः सुख शान्ति प्राप्त जुइ धयातल ।

[५८] यज्ञशाला (यज्ञमण्डप)

स्वयम्भू अमिताभ बुद्धया न्ह्योने च्वंगु गुम्बाया क्वस्सं धातुयागु यज्ञशाला दय्कातःगु दु । थ्व यज्ञमण्डप सदांया लागी स्थायी रूपं तयातःगु जुल ।

खतु जज्ञशाला धाय्वं श्व भाव स्पष्ट जूवइ- श्रीस्वयम्भू महाचैत्यप्रति श्रद्धाभक्ति तथाः इहलोक व परलोक सुधार निम्ति गुलि नं धर्मात्मा दानपति एवं जजमान आदिपिसं अनेक कीर्ति स्थिति गुठी तथाथकूगु दु, उगु पुण्य कार्य धर्म कार्य शुभ कार्ययागु वार्षिक जयन्तीया उपलक्ष्य बुसाधं याइपिनिगु लागी उपयोगी जुइगु किसिमं जज्ञ याय्त ज्याँछिक दय्कातःगु जुल । अज्ज देसय् शान्ति स्वस्ति याय्गु निम्ति नं ।

- (१) दिन जज्ञ
- (२) सहस्राहूति जज्ञ
- (३) अयूताहूति जज्ञ
- (४) लक्षाहूति जज्ञ
- (५) कोट्याहूति जज्ञ, इ०

उपर्युक्त किसिमं जज्ञ याःवइपिं श्रद्धालु दातापिनिगु सुविधा प्रदानया लागी स्थान निर्दिष्ट यानाः कयनातःगु खः । थुकिइ अनेक भावपूर्ण शुभ प्रतीकत अङ्कित यानाः पवित्र यानातःगु दु । थुगु यज्ञमण्डपय् जज्ञ याय्त शास्त्रया प्रमाणकथं कुशल आचार्य निम्न प्रकारया चिह्न अङ्कित याइ :-

- | | | | | |
|-----|----------|-----------|----------|-----------------|
| (१) | पूर्वय् | वज्रचिह्न | इन्द्रया | प्रतिनिधि रूपय् |
| (२) | दक्षिणय् | दण्ड | यमराजया | " |
| (३) | पश्चिमय् | नागपाश | वरुणया | " |
| (४) | उत्तरय् | स्वां | कुवेरया | " |
| (५) | अग्नेयय् | सुलापा | अग्निया | " |
| (६) | नैऋत्यय् | खड्ग | राक्षसया | " |
| (७) | वायव्यय् | ध्वज | वायुया | " |
| (८) | ईशानय् | त्रिशूल | ईशया | " |

अज्ज थुगु च्यागू दिशापाखें पिने प्यंगू दिशाया चुलिचू चतुराकर्षण भैरवया चिह्नत तथातइ :-

- (१) पूर्वय् - अंकुश
- (२) दक्षिणय् - जुताः
- (३) पश्चिमय् - सिखः
- (४) उत्तरय् - स्वां

थुपि व्याक्वया विचय् जज्ञशालाया दत्थुइ 'वज्र' अङ्कित यानाः तथातइ । थुगु वज्रयात 'वज्रानल' धइगु संज्ञा बियातल । कारण, ततःधंगु यज्ञ याय्वलय् सूर्ययागु रश्मिपाखें मि च्याकागु मि पुसा कयाः होम याय्गु चलन जुयाच्चन । थुकियागु रहस्य बडो महत्वपूर्ण जू- सूर्य रूपी सर्वज्ञ ज्ञान भास्करयागु तेज रश्मिद्वारा कीगु अज्ञान कर्म क्लेश भस्म यानाः थःगु आत्मा ज्योतिर्मय तत्त्वय् विलीन याय्गु निम्ति थःगु चित्त वज्र समान जुयाः वज्र ज्ञान प्राप्त यानाः वज्रभूमि वज्रधातुस थ्यंकाः आदिबुद्ध वज्रधरयागु पदय् थ्यंकेगुकथं भावनाय् मिलय् यानातःगु साधन प्रक्रिया खः ।

थुक्रियात बांलाक की पूर्वाचार्यपिसं यज्ञमण्डपयागु विधिविधानय् निर्देशन यानाः कयनातःगु जुल । उकिं थुगु यज्ञमण्डपया दत्थुइ अङ्कित यानातःगु वज्रयात आचार्यपिसं 'वज्रानल' धयातल । थुगु वज्रानलयागु ध्यान ज्ञान चर्यापाखे बिचाः यानाः यंकल धाःसा थ्व त्रिसाहस्र महासाहस्र लोकधातुयागु सम्पूर्ण अज्ञान क्लेश भस्म याय्गु सामर्थ्य युक्तगु वज्र अग्नि जूया निर्मित थुक्रियात अतीत आचार्यपिसं तर्क प्रमाण अर्थ सिद्ध यानाः 'वज्रानल' धइगु संज्ञा व्यूगु जुल । थ्व वज्रानलपाखे पिहांवःगु प्रज्वलित अग्नि रूपी ज्ञान रश्मिपाखे गुलि नं ज्या जुइ उगु व्याकवया कारण अन्तय् स्वभावतः शान्ति स्वस्ति कल्याण मङ्गल जुइ । थुजाःगु हे जक सर्वत्र स्वस्ति कल्याण जुइगु ज्या याइगु ज्या जुइगु जूया निर्मित थुगु मण्डपय् योग्यगु भिगु बांलाःगु ज्या जुइगु जुयाः यज्ञशाला धाय्गु यानावइच्चंगु खनेदु ।

थुगु यज्ञमण्डपय् प्रयोग याइगु जज्ञशालाय् दुइगु अष्टादशोषधी, अष्टादशवृही, पञ्चामृत आदि यात नं छगू छगू ज्ञानय् मिलय् यानाः कयातःगु खनेदु^१ :-

- | | |
|-------------------|------------------------------|
| १. भूमि | - बुँ जग्गा बधय् यानाबिइगु |
| २. कुण्डं | - आवासस्थान बधय् यानाबिइगु |
| ३. घ्यलं | - सकतां सम्पत्ति दय्का बिइगु |
| ४. सिं | - शौर्य बधय् यानाबिइगु |
| ५. कूशं | - सकल रक्षा याइगु |
| ६. तुयू ईकां | - शान्ति याइगु |
| ७. जाकिं | - पुष्टि याइगु |
| ८. हाम्बलं | - पाप हरण याइगु |
| ९. वां | - सयसाह्या बधय् याइगु |
| १०. मासं | - महाबल बिइगु |
| ११. तछ्वं | - ऋद्विवेग बधय् जुइगु |
| १२. गुंतूनं | - आयु बधय् जुइगु |
| १३. कस्ति, दुरुं | - ज्ञान बिइगु |
| १४. धौबजिं | - सकतां सुख बिइगु |
| १५. छ्वं | - रोग नाश याइगु |
| १६. अग्नि | - थःत माःगु सकतां बिइगु |
| १७. थः इष्टदेवतां | - मोक्षपद बिइगु |
| १८. पात्रीं | - प्रज्ञा स्वरूप |
| १९. सुलापा | - उपाय स्वरूप |

१- सम्बरोदय तन्त्र, अध्याय २३ स उल्लिखित अनुसार ।

२०. थुकि पिहांवःगु ध्यः — प्रज्ञाज्ञान अमृतरस पाखे' सकल देवता अग्नि, आत्मा सचराचर सम्पूर्णयात तर्पण बियागुलि थुगु होम प्रकृयाद्वारा सिद्धि सौभाग्य सम्पत्ति प्राप्त जुइ धयातल ।

पात्रीप्रज्ञा श्रुवोपाय तच्छ्रेयोऽद्वय भावना ।
ततो विनिर्गतं सर्पि र्महाज्ञानामृतं मतं ॥
तेन संतर्पयेदग्निमात्मानं सचराचरं ।
एवं करोति यो होमं सिद्धिसौभाग्य सम्पदम् ॥

[५६] अग्निपुर

थ्व अग्निपुर स्वयम्भू महाचैत्यया वायव्य कुलांपाखे शान्तिपुर क्वहांवनेगु लँया विचय् खुल्लागु थासय् लानाच्वंगु दु । थ्व अग्निपुरया प्रमुख देवता अण्डाकार थे' जाःगु छगः त्वहँतय् सख्वालि पानाः उकिइ चित्रकारं स्वंगः मिखा च्चकाः त्रिअग्नि (चन्द्र, सूर्य, अग्नि) या प्रतिनिधित्व यानाः कयनातइतःगु जुल ।

थुगु स्थानय् गुरु शान्तिकरं अग्नि तत्त्वपाखे' विकार मजुइमा धकाः विधिवत् अधिष्ठान यानाथकूगु दु । थुह्म अग्नि देवतायात धाःसा वसपोलया प्रभावं देसय् अग्नि भयपाखे' जुइगु उपद्रव शान्त जुइ धयातल^१ :-

चतुर्थमग्निपुरश्च बह्निदेव प्रस्थापितम् ।
तस्यग्निः प्रभावाच्च जातु औपद्रकं नहि ॥
ये च या ता मनुष्याश्च मदचधारैः प्रपूजितम् ।
तस्य पुण्य प्रसादाश्च बह्नि भयं नहि कदा ॥

थुगु अग्निपुरया लिकसं विभिन्न मूर्तित खनेदु :-

१. अष्टकोणाकार पद्मोपरी
जिनालंकृत चैत्य
२. शिखरकूट चैत्य
३. मञ्जुश्री पादुका

१- स्वायम्भू पुराण, पृ. ४२६

श्रीस्वयम्भू महाचैत्य



अग्निपुर



गुरू वागीश्वर परिवार व मञ्जुश्री पादुका

४. पद्मपाणि लोकेश्वर
५. मञ्जुश्री
६. आर्यतारा
७. खडिखती तारा
८. शक्ति सहित मञ्जुश्री
९. सप्तलोचनी तारा

[६०] गुरु मञ्जुश्री पादुका

श्व पादुका मण्डल अग्निपुरया लिकसं पश्चिमपाखे स्वकाः तइतःगु जुल । थुगु पादुका मण्डल भुपुर यन्त्राकारया दत्थुइ पद्मचन्द्र मण्डलया द्योने गुरु मञ्जुश्रीयागु पादुका श्रीचरणकमल अङ्कित यानातःगु दु । थुकियात आदरपूर्वक प्रभामण्डलया रूप्य छगू तोरण तयाः शोभा वृद्धि यानातःगु खनेदु । उक्त तोरण व पादुका मण्डलय् थःगु हे प्रकारया विशेषता क्यनातल । वर्तमान मञ्जुश्री पर्वस्थानय् तइतःगु गुगु मञ्जुश्री पादुका मण्डल खः व स्वयाः नं थुगु पादुका मण्डल यक्व यक्व प्राचीनता खनेदु लिस्से कलाया दृष्टि व भावनाया दृष्टि नं उत्तिकं महत्वपूर्ण जू ।

पञ्चशीर्ष पर्वत महाचीनं गुरु मञ्जुश्री विज्याःगुया अर्थय् थुगु मण्डलया छचालं विभिन्न शिखराकृति बुत्ता अङ्कित यानातल । स्वयम्भू ज्योतिरूप दर्शनार्थ मञ्जुश्री विज्याःगु जूया निर्मित थुगु तोरणया फुसय् दकलय् चव्य् चैत्य अङ्कित यानातल । श्वया जःखः मृग निह्य तयाः नेपाःया धर्मचक्र श्व हे स्वयम्भू महाचैत्यया आत्मकथानिसे सृजना जुयाच्चंगु खः धइगु भावना प्रदर्शित यानातःगु दु । ऋद्धिसिद्धि विना विद्याया शोभा दइमखु धइगु संरुनाया अर्थय् गणेश व महाकाल द्वारपालया रूप्य उपस्थित यानातःगु दु । आर्य नामसंगितिया सार रूप द्वादशाक्षर अर्थया शिक्षा-दीक्षा प्राप्ति निर्मित महापण्डित धर्मश्रीमित्रयात गुरु मञ्जुश्रीनं गुरुमाजु सहित महामञ्जुश्रीनं थःगु स्वरूप दर्शन व्युगु गुगु रूप खः उकिया संस्मरणार्थ शक्ति सहित ज्ञानकाय महामञ्जुश्रीया मूर्ति प्रदर्शित यानातल । लिपा धर्मश्रीमित्रजुं गुरु मञ्जुश्रीयात खनाः नं मखना धकाः अपमान याःगु प्रायश्चित्त स्वरूप गुरु मञ्जुश्रीया पालि भवपूवलय् थःगु मिखा निगलं गुरुयागु पालिइ कुतुंवन । व हे मिखा अङ्कित जुयाच्चंगु मञ्जुश्रीया पादुका थन न्होने क्यनातःगु जुल । श्व हे कारणं धर्मश्रीमित्रयागु नां लिपा ज्ञानश्रीमित्र जूवंगु खः ।

महापण्डित धर्मश्रीमित्रं गुलि खँय् महामञ्जुश्री नापलाः विज्यात ? महामञ्जुश्रीनं गन गुथाय् छु यानाः क्यन ? गथे छु जुयाः मञ्जुश्री गुरु धकाः ह्यसिइके फत ? थः शिष्ययागु चित्त परीक्षा निर्मित गुरु गुजाःगु स्वरूप धारणा यानाः क्यन ? अले गुलि खँय् गुरुयात अपमान जुल ? अन्तय् धर्मश्रीमित्रयागु मिखा गुरु मञ्जुश्रीया पालिइ गथे जुयाः कुतुंवन ? लिपा धर्मश्रीमित्रयागु नां ज्ञानश्री-

मित्र छाया जूवन धइगु विषयय कयाः प्रस्तुत ग्रन्थया २२ गू अध्यायय चवय धुंगु जूया निर्मित उगु खँ
थन हानं लिसा कया मच्चना ।

[६१] विशाल बुद्ध मूर्ति

थुगु प्रस्तरमय विशाल बुद्ध मूर्ति शान्तिपुरया न्होनेपाखे स्वयम्भू वनेगु त्वाथःया चवस्सं
दय्काः तइतःगु अनुमानित फिखुगु शताब्दीयागु मानय यातातल । सिंह युक्त सिंहासन त्वाकःया चवस्सं
पद्मचन्द्रय आनन्दपूर्वक वज्रासनय चवनाः भूमिस्पर्श मुद्रा याताचवंगु शान्त गम्भीरगु मूर्ति जुल ।
थुगु मूर्ति पूर्वपाखे स्वकाः प्रतिष्ठा यातातःगु दु । स्वयम्भूइ गुलि नं पयतुनाचवंगु मूर्तित दु उकिइ मध्यय
दकलय सकलय भव्यगु मूर्ति धकाः धाय्फु । थ्व मूर्ति सुनां गुबलय स्थापना यात धइगु उल्लेख खनेमदु ।
तर वि. सं. १९९० साल मार्ग ७ गतेया दिनय कान्तिपुर मरु इलाछेया श्रद्धालु दानपति ताम्रकार
प्रसासि, हलमहारत्न व कुलरत्न थुपि स्वहासिया परस्परय धर्मचित्त उत्पत्ति जुयाः विधिवत् जीर्णोद्धार
प्रतिष्ठा यातातःगु खँ प्रस्तुत मूर्तिया सिंहासनय अङ्कित जुयाचवंगु खनेदु । थुगु मूर्तिया जःखः शिलाकु
व पिण्डपात्र धारणा याताचवंपि निहा अग्रश्रावक शालिपुत्र व मौद्गल्यायनया मूर्ति तयातल ।

थुगु भव्य मूर्तियात अक्षोभ्य तथागत धकाः नामाङ्कित यातातल तर अक्षोभ्य तथागतया मूर्ति
मखु, कारण थुकिइ आसनय किसि मतसे सिंह तयातःगुलि ध्व शाक्यमुनि बुद्धयागु मूर्ति धइगु
प्रमाणित जू ।

[६२] अरपचन वागीश्वर महामञ्जुश्री (नामसंगिति)


स्वयम्भूया बहीफलय चवंगु तःग्वःगु शिलापत्रया लिकसं चवंगु ऊवलय पूर्वपाखे स्वकाः तइतःगु
थुगु नामसंगिति मूर्ति जुल । थुगु मूर्ति कलात्मक रूपं बांलाक दय्काः तालमान मिलय याताः तइतःगु
दु । वर्तमान थुगु मूर्ति मूर्ति संग्रहालयय दुने तयाः प्रदर्शित यातातल ।

थुगु मूर्ति सिंहासनया चवय पद्मचन्द्रया द्योने फिनिपा ह्लाः धारण याकाः वज्रासन याताः
समभंग रूपय मिलय याताः दय्का तल । प्रथमगु निपा ह्लातं ह्लाः थकयाः शिरोपरी अध्येषण मुद्रा
याकातल । द्वितीयगु निपा ह्लातं आदर्श रूप कयने थें याताः ह्लाः चक्कंकाः अभयदान बिइ थें
यातातल, गनं गनं थुगु मुद्रा धर्मचक्र मुद्रा यातातःगु नं खनेदु । तृतीयगु निपा ह्लातं पिण्डपात्रय ह्लाः
दुछ्वयाः छुं लिकाय त्यंगु थें याताः कयनातल अर्थात् वरदान रूप थें । चतुर्थगु निपा ह्लातं ध्यान
मुद्रा याताः पिण्डपात्र धारण याताचवन । थुगु पिण्डपात्रय शान्ति व महाकरुणाया प्रतीक बुद्धशिर्ष
खनेदय्काः कयनातःगु नं दु । पञ्चमगु निपा ह्लातं शर धनुषया प्रतीक रूपय मुद्रा ज्याताः ह्लाः छव्वय्काः

श्रीस्वयम्भू महाचैत्य



अरपचन वागीश्वर महामञ्जुश्री (नामसंगीति)



क्यनातल । गुगुं मूर्तिइ शर धनुष हे ज्वंकातःगु नं दु । अले षष्ठमगु निपा ह्लातं षट्कुलयात प्रतिनिधित्व यानाच्चंगु खट्वांगु धारण याकातल । गनं गनं षट्कुलया चिह्न अंकितगु खट्वांग मजुसे चन्द्रहास खड्ग व प्रज्ञाज्ञान पुस्तक जक तयाः क्यनातःगु नं खनेदु ? । शुगु मूर्ति ने. सं. ७६८ सालं मञ्जुदेव धइहासिनं थः अबुजुया नामं दिवंगतप्रति शान्ति कामना यानाः स्थापना यानाः तइतःगु जुल ।

थुजाःगु किसिमया मूर्ति अथवा चित्र पौभाः खनिइवल्य उकियात कीसं 'नामसंगिति' धकाः धाःवनी । खास थ्व द्यःयात नामसंगिति धाय्गु युक्ति संगत मजू । खतु थ्व नामसंगिति धयागु वसपोलयागु अर्थ तत्त्व विशुद्धि ज्ञान गुण महिमां जायाच्चंगु नाम शब्द संग्रहयात संगिति रूप्य माःहनाः दय्कातइतःगु छगू संगिति जक खः । थूगु नामसंगितिया द्यःया नां खः "अरपचन वागीश्वर महामञ्जुश्री ।"

वसपोल अरपचन वागीश्वर महामञ्जुश्री (नामसंगिति) धइहा वैरोचन आदि पञ्चबुद्ध न्याहां छहा जुयाः बिज्यानाच्चन धकाः अद्वयपरमार्थ नामसंगितिइ कनातल । उकिं थुगु नामसंगितिया अन्तिम चरणपाखे 'पञ्चतथागत स्तुति पञ्च' धकाः धयातःगु जुल । थ्वसपोलया नां नामसंगिति मायाजालाभिसंबोधिक्रम गाथा परिच्छेदय् थुपि न्याहा पञ्चतथागत व न्याहां छहा जुयाच्चंहा महामञ्जुश्री समेतं खुहासिगु नां अलग अलग बियातःगु दु । थुगु हे रूपं थ्वसपोलपिं खुहासिगु खुगू हे नां षट्कुलावलोकन गाथाय् उल्लेख यानातःगु खनेदु । प्रसङ्गवश थुगु कुलया नां व वसपोलपिनिगु नां थन उद्धृत यानाच्चना^१ :-

- | | | | |
|-----|-----------------|--------------|-------------------------|
| (१) | महावैरोचनया | हृदयस च्वंहा | - मञ्जुश्री ज्ञानसत्त्व |
| (२) | अक्षोभ्यया | " | - वज्रखड्ग मञ्जुश्री |
| (३) | रत्नसम्भवया | " | - वागीश्वर मञ्जुश्री |
| (४) | अमिताभया | " | - वज्रतीक्ष्ण मञ्जुश्री |
| (५) | अमोघसिद्धिया | " | - ज्ञानकाय मञ्जुश्री |
| (६) | बोधिचित्तवज्रया | " | - अरपचन मञ्जुश्री |

थुपि खुहासिगु कुलया नां निम्नप्रकारं उल्लेख यानातःगु जुल^२ :-

१- थुजाःगु किसिमया मेगु नामसंगिति परिवार सहितगु मूर्ति शान्तिपुरया न्होने च्वंगु विशाल बुद्ध मूर्ति क्वस्सं त्वाथः लिक तयातःगु दु । वर्तमान थुगु मूर्ति नं मूर्ति संग्रहालयय् यंकातःगु दु ।

२- अद्वय परमार्थ नामसंगिति

— पं० दिव्यवज्रद्वारा सम्पादित भूमिकापाखे ।

३- आर्यनामसंगिति गाथा अर्थ सहित

— पं० रत्नबहादुरद्वारा सम्पादित, पृ. १४

- (१) वैरोचनया कुल कुलत्रय कुल
- (२) अक्षोभ्यया " लोकालोक कुल
- (३) रत्नसम्भवया " महोष्णीष कुल
- (४) अमिताभया " लोकालोकोत्तर कुल
- (५) अमोघसिद्धि " मन्त्रविद्याधर कुल
- (६) महामञ्जुश्री " महामुद्रा बोधिचित्त वज्रकुल

ध्वसपोल अरपचन वागीश्वर महामञ्जुश्रीयागु ध्यान रूपकथं विचाः याय्वलय् नं पञ्चबुद्ध न्याह्यं छह्य जुयाच्वंगु व षट्कुल धारणा यानाच्वंगु खः धइगु स्पष्ट रूपं भाव क्यनातइतःगु खनेदु । थुगु मूर्तिइ ध्यान मुद्रा यानाः अमिताभ बुद्धयागु प्रतिनिधित्व यानाच्वन । अथे हे ध्यान मुद्राया द्योने च्वंगु पृथ्वीपात्र स्पर्श यानाः अक्षोभ्यया रूप क्यनाच्वन । हानं व हे पृथ्वीपात्रपाखें छुं लिकयाः वरदान विइत तयार जुयाच्वंगुलि रत्नसम्भवयागु भाव क्यनातल । एवं रूपं थ्वया च्वस्सं च्वंगु ह्लातं अभय व उपदेश मुद्रा यानाः अमोघसिद्धियागु स्वरूप क्यनाच्वन । एवंप्रक्रमं थ्वया जःखः च्वंगु ह्लातं शर धनुष मुद्रायागु संकेत विचाः लिस्सें जःखः च्वंगु खट्वांगस खङ्ग पुस्तक अंकित यानातःगुलि महामञ्जुश्रीयागु प्रतिनिधित्व यानाच्वंगु खनेदु । उकिइसं षट्कुलया चिह्न—चक्र, वज्र, रत्न, पद्म, विश्ववज्र, तथा वज्रतीक्ष्ण खङ्ग अङ्कितगु निखे निपु खट्वांग धारणा यानाच्वन । दकलय् सकलय् च्वय् शिरोपरी अध्येषणा मुद्रा यानाः क्यनाच्वंगु दु ।

थुगु अध्येषण मुद्राया दुने सर्वज्ञ ज्ञान भास्कर अनुत्तर महासुख बोधिचित्त वज्रयात सुरक्षित-पूर्वक महामुद्रां क्वात्तुक प्वःचिनाः थःगु शिरोपरी तयाः उच्च कोटि पूजा सत्कार यानातःगु जुल । मेगु अर्थय् थ्व अध्येषणा मुद्राया विषयय् थथे नं धयातःगु दु—वसपोल नामसंगिति पञ्चबुद्ध न्याह्यं छह्य जुयाच्वंह्य जगद्गुरु महामञ्जुश्री थःके सर्वज्ञ ज्ञानयागु अक्षय भण्डार दुसां नं लेस मात्र हे अभिमान मदुगुया चिह्न स्वरूप त्रिकालया गुरु बुद्ध बोधिसत्त्वपित अध्येषणा यानाः प्रार्थना यानाच्वंगु । थुलि जक मखु जगत हित सुख शान्ति जुइगु सम्बोधि ज्ञानया निधि जुयाच्वंगु अद्भूतमय चिन्तामणि महारत्न अनुत्तर रत्न ज्वनाः भक्तजनपित उद्धार याय्त वरदान विइत तत्पर जुयाच्वंगु किसिमं मानय् यानावइच्वंगु नं खः ।

आर्य नामसंगितियागु खँ कयाः भगवान् बुद्धं गन स्वइत आज्ञा जुयाविज्यात धइगु विषयय् थथे चर्चा यानातःगु दुः—

वसपोल तथागत गृद्धकूट पर्वतय् विज्यानाः आपालं बोधिसत्त्वपि मुंकाः महाकरुणा (बोधिचित्त) महाश्रून्यता (प्रज्ञापारमिता) यागु धर्मचक्र प्रवर्तन यानाविज्यात । अनंलि उगु इलय् मगधया दक्षिणपाखे धान्यकटक श्रीपर्वतया महाचैत्यया क्वस्सं धर्मधातु वागीश्वर मण्डलया च्वय् श्रीकालचक्र महामण्डलय् दिगुदिशाया जिनपुत्रपि सकले मण्डलय् विज्याकाः मुनिचन्द्र श्रीशाक्यमुनि बुद्ध स्वयं मण्डलया दत्थुइ

विराजमान जुयाविज्यात । उबलय् अन गुह्याधिपति वज्रपाणि व वीर वीरेश्वरपि सकभनं परिपूर्णं जुइक उपस्थित जूगु जुल । उगु समयय् वज्रपाणि बोधिसत्त्वं अध्येषण यासैंलि महामण्डलयागु अभिषेक वियाः छगू जन्मं बुद्धत्व प्राप्त जुइगु उत्तमगु अनुत्तर वज्रयान धर्मचक्र प्रवर्तन यानाविज्यात । उकिइसं सूत्रतन्त्र दक्कया निधि जुयाच्चंगु सारसारगु जक ल्ययाः अधिष्ठान यानातःगु आर्यमञ्जुश्री परमार्थ नामसंगिति आज्ञा दय्काविज्यात । थुकिइ अरपचन वागीश्वर महामञ्जुश्रीयागु षट्चक्र मण्डल दु :-

(१)	वज्रधातु ज्ञान मण्डलया देवता	८६
(२)	सुविशुद्ध धर्मधातु ज्ञान मण्डल देवता	१८१
(३)	आदर्श ज्ञान मण्डल देवता	७१
(४)	प्रत्यवेक्षणा ज्ञान मण्डल देवता	२७५
(५)	समता ज्ञान मण्डल देवता	१०४
(६)	कृत्यानुष्ठान ज्ञान मण्डल देवता	६५

जम्मा ८१२

थुगु षट्चक्रमण्डलयात सच्छि व सुइपु १३० श्लोकय् संक्षिप्तीकरण यानाः वर्णन यानातल । थुगु श्लोकय् जम्मा च्यासः व फिनिगू मन्त्राक्षर पद संयुक्त यानातःगु खनेदु । थुगु प्रत्येक मन्त्राक्षर पदपाखे अरपचन वागीश्वर महामञ्जुश्रीयागु अवतार भेद स्वरूप ज्ञानरश्मिपाखे ८१२ देवतात्मक तत्त्व निर्देशन यानाः क्यनातःगु जुल ।

थ्व नामसंगिति धइगु विद्या स्वंगू वखतया तथागतपिसं आज्ञा दय्कातःगु फिखुद्धः दइच्चंगु मायाजालतन्त्रं पिकयातःगु आदि मध्यय् अन्तय्सं स्वस्ति कल्याण जुइगु । सकल देवमनुष्यपिसं पूजा यानातःगु थ्व नामसंगितिया प्रभावं मुनीश्वर तथागतपिसं सम्पूर्ण पारमिता पुरय् यानाविज्यात । सम्बोधिज्ञान लानाः तथागत जुयाः लोकपित भवसागरं थतकयाः बोधिमार्गय् तयाः निर्वाण पद लानावन । लौकिक गणपित स्वर्ग बिइगु ग्रह दोष पीडा निवारण जुइगु । लोकोत्तरपित सम्बोधि बिइगु, निर्वाण लाइगु, विद्या धारणी योगया नं महाउत्तम जुयाच्चंगु समाधि मन्त्रया नं सार जुयाच्चंगु त्रियानिक (श्रावक, प्रत्येक व महायान) पित सिद्धि बिइगु । थुकियात स्मरण याना मात्रं भय नाश जुइगु । पाठ यानागुलि सकतां ऐश्वर्य सुख बह्य् जुइगु । योग ध्यानय् च्वनाः जाप यात धाःसा असंख्य पुण्य प्राप्त जुयाः पञ्चबुद्धयागु भूमि प्राप्त जुइगु । थुकिइ श्रद्धा निश्चयपूर्वक पाठ याःपित लौकिक देवतापिसं सदां रक्षा याइ । हानं वसुधरा, वज्रविदारणी, गणपति हृदय, उष्णीष विजय, पर्णशवरी, वज्रवाराही, महाप्रत्यंगिरा, महासाहस्र प्रमर्दनी, मायूरी, शीतवती, महामन्त्रानुसारणी, प्रज्ञापारमिता, आर्यतारा, आर्यावलोकितेश्वर आदि देवतापिसं वइत रक्षा याइ । हानं ब्रह्मा आदि देवता लोकपाल-गणपिसं, महाकालगण, भैरवगण, मातृकागण, गणेश, कुमार, हारती हनुमन्तपिसं थ्व पाठ याःह्यात स्वंगू सन्ध्यासं प्रणाम याइ, नमस्कार याइ । लिस्सें चतुर्महाराजपि वइगु सेवा निमित्त उपस्थित जूवइ ।

थुगु मायाजाल तन्त्र अनुत्तर वज्रयान दक्कया स्थिति व मूलगर्भं जुयाबिज्याःह्य मञ्जुश्री ज्ञानसत्त्वयागु परमार्थ नामसंगितिया प्रशंसा बारय् थथे धइतःगु दु—गथे सां घांय् नयाः दुरु बिइ, उगु दुरुया नं सार धउ जुयाच्चन, धउया नं सारगु ध्यः जुयाच्चन धयातः थें सम्पूर्ण त्रिपिटक ८४००० धर्म स्कन्ध व ६४००००० लाख तन्त्र एवं ५५ कोटि पारमिता शास्त्रया नं सारभूत जुयाच्चंगु थुगु आर्यमञ्जुश्री नामसंगिति चिकिचाहंगु गाथा जूसां चिन्तामणि रत्न थें अमूल्य जुयाच्चंगु ज्वरा मदुगु, गुहासित गुगु माल उगु उगु दइच्चंगु, गथे—श्रावकयानीपित 'चतुरार्यसत्य' एवं प्रत्येकयानीपित 'प्रतीत्यसमुत्पाद ज्ञान' तथा महायानीपित 'दशपारमिता दशभूमि', व थें तुं तन्त्रवज्रयानीपित 'उत्पत्ति क्रमयोग व निष्पत्तिक्रमयोग प्रभाश्वर धर्मकाय महाशून्यता प्रज्ञोपायात्मक तत्त्व ज्ञान' सुलाच्चंगु चतुतन्त्रया नं सारगर्भित जुयाच्चंगु धकाः प्रशंसा यानातःगु जुल ।

थुलि तक महत्त्वपूर्णगु सर्वगुण सम्पन्नगु उच्च कोटि आदर्शपाखे परिलक्षित जुयाच्चंगु अति गम्भीरगु थुगु नामसंगितिप्रति विभिन्न इलय् विभिन्न सिद्ध योगी एवं विद्वान्पिसं श्रद्धापूर्वक आपाः आपालं अर्थ खुलस्त यानाः टिका टिप्पणी यानाः भाष्य च्वयाथकूगु खनेदु :-

कालचक्रया टीका विमलप्रभाय् छधालं धया थें नामसंगितिया पुण्डरीकया विषयय् सम्मानपूर्वक उद्धरण यानातःगु दु । गुम्हेसिनं नामसंगितिया ज्ञान बांलाक थुइमखु उम्हेसिनं आदिबुद्ध वज्रधरयागु ज्ञान प्रतिपादन यानाकाय् फइमखु । अर्थात् वज्रयानयागु रहस्य बुक्य् यानाकाय्गु समर्थ दइमखु धकाः सिद्ध नारोपां सेकोद्देश धइगु ग्रन्थय् उल्लेख यानाथकूगु दु । साधनमालाय् नं नामसंगितियागु विंशति नमस्कार समेत उद्धरण यानातल । लिस्से नामसंगिति गुगुकथं पाठ याय्माः धकाः बांलाक वर्णन यानातःगु जुल । उकिइ मध्यय्—

- | | |
|--------------------------------|--|
| (१) श्रीलीलावज्रं | — आर्यनामसंगितिया टीका च्वल । |
| (२) श्रीडोम्बिहेरुकं | — नामसंगिति वृत्ति च्वल । |
| (३) श्रीअद्वयवज्रं | — नामसंगिति उपसंहार वितर्क व आर्य मञ्जुश्री नामसंगिति टीका सारोपायिका च्वयाथकल । |
| (४) श्रीअनुपमराक्षितं | — आर्यमञ्जुश्री नामसंगिति वृत्ति च्वल । |
| (५) श्रीइन्द्रभूति | — आर्यमञ्जुश्री नामसंगिति वृत्ति च्वल । |
| (६) श्रीरत्नाकर गुप्तं | — आर्यमञ्जुश्री नामसंगिति पञ्जिका च्वल । |
| (७) श्रीबोधिसत्त्व मञ्जुश्रीनं | — महापण्डित धर्मश्रीमित्रयात नामसंगितियागु द्वादशाक्षरयागु अर्थ विशुद्धि कन धकाः स्वयम्भू पुराणय् उल्लेख यात । |
| (८) भदन्तश्रीज्ञानध्वजं | — ह्यासा पोतल दरबारया ह्यापां याह्य दलाई लामाजुया गुरु तिब्बती भासं टीका च्वयाथकल । |

१- आर्य मञ्जुश्री नामसंगिति अर्थ तथा भावार्थ सहितगु

— भिक्षु धर्मसागरजुं सम्पादन यानादिइगु भूमिकापाखे ।

- (६) पण्डित श्रद्धाकर वर्मा } थुपि स्वहा मिल्य जुया सँदेसया निर्मित संस्कृतयात
 (१०) कमल गुप्त } तिब्बती भाषां अनुवाद यानाथकूपि जुल ।
 (११) रत्नभद्र (रिन्छेन्शाङपो) }
 (१२) सँदेसया धर्मराज घेलुकपा शासनया मुख्यह्य गुरु चोङखापा (सुमतिसिद्धिकीर्ति) धइह्य-
 सिनं तन्त्रराज आर्यमञ्जुश्री नामसंगितियात थः ईष्टदेवता भाःपाः अतिकं श्रद्धा भक्ति
 तयाः नं ह्लियाह्लिथं नसंचा इलय दनाः स्वधाः स्वधाः छन्हु हे तुतय मजुइक पाठ
 यानावइच्चन धकाः धयातल ।

थुकिइयागु महत्व व आदर्शयात ध्यान आकर्षित यासे आर्यमञ्जुश्री नामसंगितियात अत्यन्त
 श्रद्धा व भक्ति तयाः परम्परागत थौतकं नेपाल, तिब्बत, चीन, जापान एवं मङ्गोलिया आदि सम्पूर्ण
 महायान बौद्ध जगतं पठन पाठ पूजा व स्वागत सत्कार यासे धारणा यानावइच्चंगु खनेदु । अज्ज
 थुकियागु गौरव व महत्वप्रति श्रद्धां प्रेरित जुयाः छुं वर्ष न्ह्यो इण्डो-एशिया लिटरेचरयागु १८
 भोलमय रञ्जना, तिब्बती, चीन व मङ्गोलियन तथा देवनागरी लिपि सहितगु आर्यमञ्जुश्री नाम-
 संगिति भारतया प्रसिद्ध विद्वान् डाक्टर लोकेशचन्द्रजुया अब्रुजु आचार्य रघुवीरं सम्पादन यानाः
 पिकयादी धुंकूगु दु । थुगु पुस्तक अत्यन्त सजधज धंगं वँचुनःगु भिगु बांलाःगु भवैतय मुद्रित यानातल ।
 नेपालय् अप्पो यानाः नामसंगितियागु प्रचार येँ, यल, ख्वप गां गामय स्वयाः नं ललितपुर महानगरय
 जुयाच्चन धाःसां छुं अप्पो जुइ मखु ।

[६३] योगाम्बर स्थान (नमसिं कौशि)

थ्व थाय् अग्निपुरं शान्तिपुर वनेबलय देपापाखे पःखालं चाःहुइकातःगु एकान्तगु शून्यगु छगू
 थाय् खः । थन साधारणगु पःखाः लुखा छगू तयातःगु दु । थन दुहांवनाः स्वयंबलय खास छःया मूर्ति
 खनेमदु केवल शून्य कल्पितगु छगू ह्वःचायात तोरण अंकित यानाः योगाम्बरयागु स्थान धकाः निर्देशन
 यानातःगु जुल । थ्व हे योगाम्बरया न्ह्योनेपाखे च्वंगु पःखालय थःगु हे तालगु कलात्मक प्रस्तरमय
 तोरण थां तयाः लुखायागु संकेत बियातःगु दु । तथापि थ्व लुखा सदांया लागी बन्द थें यानाः
 लुखाप्वाः तिनातल । थ्व थःगु हे विशेषता खः । थ्व थाय् ह्याय्पिया प्रतिनिधित्व यानातःगु धकाः नं
 धाइ ।

थन दुने जुइगु वास्तविक रहस्यमय प्रक्रियायागु रीतिथिति बुक्य याना स्वत धाःसा थ्व थाय्
 साधारण थें च्वंसां थ्व थासं बिइगु सत्यसिद्धि अद्भूत खनेदु । योगाम्बरतन्त्रयागु वर्णन नाप मिल्य
 जू वः ।

थ्व थासय् यलय् बुंगछः रथय् बिज्याकेत साइत कावइगु थाय् धकाः मानय यानातल । थन
 बुंगया पांजुतसें पूजासामग्री ज्वनाः बाहां समेत हय्माः । तर बुंगया पांजुतय्सं थन पूजा याय्गु

अधिकार मद्दु । थन स्वयम्भूया थकालि, नोकु निह्य जक च्वनाः रहस्य पूजा याइ । थुगु थासय् पूजा यानाः ल्यंगु अवशेषत छुं पितहय्मद्दु । थन हे सं तुं सुचुकेमाः धयातल । थन थासय् पूजा जुइ न्ह्यो स्वयम्भू चाकल्य् घण्टा घोषण याय्माः, उगु इलय् स्यंगुमितय्सं जूसां सुनानं ऊयालं तकं क्वस्वय् मज्जू । थ्व थासय् जुइगु सम्पूर्ण वरिसमाप्ति जुलकि शान्तिपुरया न्ह्योनेपाखे स्वयम्भू जंगलय् क्वहांवने थाय् च्वंगु छासयाथाय् च्वनाः स्वयम्भूया थकालि व नोकुं बुंगमि पांजुतय्त बुंगद्यः रथय् बिज्याकेगु साइतपत्र लःह्लाय्गु ज्या जुइ । थुगु थासय् जुइगु पूजाया निम्ति गुठी खर्च अहां २१ पा अप्पा बिइमाः धयातःगु दु । थुगु थासं बियाछ्वःगु साइतपत्र अनुसार पाय्छि इलय् बुंगद्यः रथय् बिज्याके धुंकाः हानं बुंगद्यःया रथय् लःस्वां छायेपेत स्वयम्भूया पञ्च स्थवीरपि वनाः वचन बिइमाः, इमिगु वचन बिना लःस्वां तिइके मद्दु ।

थुजाः थुजाःगु महत्वपूर्ण प्रकृया जुइगु थाय् बुंगद्यः व स्यंगुद्यः नाप घनिष्ठ सम्बन्धया स्वापू स्वाकेगु थाय्या रूपय् मानय् यानातःगु थःगु हे पृष्ठभूमि दइच्चंगु थाय् जुल । गुलिसिनं थुगु थाय्यात 'नमसि कौशि' धकाः नं धाइ ।

[६४] शान्तिपुर

स्वयम्भूया पश्चिम उत्तरया बिचय् मञ्जुश्री पर्वस्थान वनेगु लँया जःपाखे लानाच्चंगु थाय् जुल । थुगु थाय् ऊवात्त स्वयंबलय् गुगुं देगः आगंछे, दिगी, सतः चपाः आदियागु वास्तुकला नाप मिलय् मजू । थ्व थःगु हे प्रकारया विलक्षण धंगं दय्कातःगु थाय् खनेदु । थुकिइ दक्षिण उत्तरलङ्क ताःहाकः यानाः पूर्व पश्चिम लङ्क चीव्या यानाः ऊया-ऊी ह्वः प्वाः मतसे दक्षिण अभिमुख यानाः लुखा छदुवाः जक तयाः दय्कातःगु कान्तिपुर नामं प्रसिद्ध जुयाच्चंगु थाय् जुल । थुगु लुखाय् आगं आगमय् तइगु किङ्किनीजाल युक्त धकिबुत्ता सहित यानाः लुँया खापा तयाः शोभा वृद्धि यानाः लक्षण प्रमाण मिलय् यानातःगु दु । उकिइसं थुगु लुखाय् दयातःगु ताः अन्य देवस्थल वही विहार मन्दिर आदि थासय् दयातःगु ताःलिसे मिलय् मज्जू थःगु हे किसिमं दय्कातःगु चतुराकर्षणया प्रतीककथं वज्रगथि तयाः पात्रोपरि खड्ग अङ्कित यानाः क्वय् कण्ठी (लाफः) तयाः वज्रयानी आचार्यपिनिगु निर्देशन अनुसार अद्भूतगु किसिमं दय्कातःगु जुल । थुगु लुखाया जःखः द्वारपालया रूपय् काकाश्या, उलूकाश्याया मूर्तित सजय् यानातःगु दु । थुगु लुखाया न्ह्योनेसं कलात्मक भावपूर्णगु ल्वहंयागु प्रदीप स्तम्भ छगू स्वानाः तइतल । थन सर्वसाधारण शान्तिपुर सेवक भक्तजनपिनिगु लागी पूजा पाठ स्तोत्र यज्ञ यागादि एवं रहस्याच्चन पूजा आदि निम्ति वाह्यकोष्ठ भाग दय्कातःगु दु । थन अंगलय् छ्वाःख्यरं स्वयम्भू पुराणयागु वर्णनानुसार स्वयम्भू ज्योतिरूप उत्पत्तिनिसें द्वादश तीर्थ अष्ट वैतराग उत्पत्ति एवं सप्तबुद्ध मञ्जुश्री आगमनया संक्षिप्त दृश्य चित्रित यानातःगु खनेदु । थुकिइ प्रत्येक चित्रया क्वस्सं क्वस्सं विवरण नं उल्लेख यानातल । अज्ज थुकिइ स्वयम्भू पुराणया आधारकथं चित्राङ्कन जक मजुसे हानं

श्रीस्वयम्भू महाचैत्य



शान्तिपुरया पिनेयागु दृश्य

गुरु वज्रधर, नारोपा, तिलोपा, पद्मनृत्येश्वर, वज्रयोगिनी, विद्याधरी एवं काकाश्या, उलूकाश्या आदिया वज्रयानी सम्बन्धी भित्ति चित्र नं दुथ्याकातःगु दु । थुगु शान्तिपुरया पिनेपाखे करीव सच्छि मयाक बुद्ध बोधिसत्व आर्यतारादि विभिन्न बौद्ध देवता छ्वाःख्यरं चाःहुइकाः शोभा वृद्धि यानातल । लक्षण प्रमाण मिलय् यानाः तइतल । उकिं स्वयम्भू पुराणय् शान्तिपुरया छगू नां 'महाप्रमाणानिगृह' धइगु संज्ञा बियातल ।

खतु थुगु थाय् काश्यप तथागतयागु उपदेशं प्रभावित जुयाः स्वयम्भू ज्योतिरूप भगवान् दर्शन याय्त बिज्याःहा प्रचण्डदेव राजा नेपाः थ्यँसेलि गुरु मञ्जुश्रीया शिष्य महाभिज्ञ श्रीगुणाकर भिक्षुया शिष्यत्व ग्रहण यानाः शान्तश्री भिक्षु जूगु जुल । थ्वसपोल शान्तश्री भिक्षुजुं श्रीस्वयम्भू ज्योतिरूप दर्शन यानाःलि थथे मतिइ चिन्तना यानाबिज्यात—

कलिकालय् सद्धर्म विमुख जुयाः पञ्चकाम गुणय् अधिक रसय् भुलय् जुयाः कर्तव्याकर्तव्य म्हंसियाः राग द्वेष मोह काम क्रोध लोभं ग्रास जुयाः अज्ञान क्लेशं व्याकुल जुयाच्वं पि लोकजनं निश्चय नं थुगु स्वयम्भू ज्योतिरूपयात बांलाक आदर सत्कार यानाः संरक्षण यानातइमखु, विशुद्धगु निर्मलगु ह्याय्कनय् पञ्चकषाय रूपी दोषमेलं किकाः अनास्था याइ, उगु पाप कर्म यानाः थुपि नरकगामि जुइ, असह्य दुःख वेदना भोग याःवनिइपि जुइ । उकिं थुजाःगु दोष अपराध कर्म स्वयम्भू-प्रति अनास्था मजुइकेत वसपोल त्रिकालदर्शी शान्तिकर आचार्य स्वयम्भू ज्योतिरूपयात पञ्चकषाय दोषं मथिइकेत सदांया निम्ति आदार सत्कार तय्केत गथे प्राणहंस संरक्षण व सत्कार निम्ति कीगु शरीर खदा जुल अथे हे वसपोल ज्योतिरूप श्रीस्वयम्भूया शरीर रूपी स्वयम्भू महाचैत्याकार रूपय् विधिवत् प्रतिष्ठा यानाः त्वपुयाबिल धकाः धयातल^१—

तदा कथमयं श्रीमान् ज्योतिरूपः प्रभाश्वरः ।
रत्नपद्मासनासीनं एवं तिष्ठे जगद्धिते ॥
तूनं यो लोभिनोदुष्टो क्लेशव्याकुल मानसः ।
इमं चैत्यं प्रतिक्षिप्य रत्नान्याहरे सर्वदा ॥
एवं भविष्ठाकाले च भविष्यति सुदोर्घिके ।
अत्रान्येवासिनः सर्वे अत्यर्थं दुःख भागिनः ॥
इति संचिन्त्य आचार्य मनसापि विचार्यकम् ॥

थुगु स्वयम्भू ज्योतिरूपयात महाचैत्याकार रूपय् परिणत याय्त सिद्ध शान्तिकर गुरुयागु महान् सदिच्छा पूर्ति निम्ति सहयोग प्रदान याःवःपि श्रमदान व्यूवःपि कार्यकारिणीतय्गु नां व ज्या थुगु किसिमं बियातल^२—

१- स्वायम्भू पुराण, पृ. ४१३

२- स्वायम्भू पुराण, पृ. ४१४

सिद्धगुरु शान्तिकराचार्य थःगु ऋद्धिबल व आराधनायागु प्रभावं श्रीस्वयम्भू ज्योतिरूपयागु प्रति अपार श्रद्धा भक्ति तयाः सर्वसत्त्व प्राणिपिनिगु हित सुख शान्ति निम्ति इमिगु उपरय् पुण्य साधन याकेगु कारणय् थःगु अनन्त जन्मयागु प्रणिधान सिद्धया लागी जम्बुद्वीपय् असंख्य तःधनाच्चंगु नेपाल देस सदांया निम्ति पवित्र व शान्ति स्थापित याय्त् ह्यापालाक वसपोलं थुगु स्वयम्भू ज्योतिरूपयात वज्रकूट प्रमाणं सुदृढ जुइक क्वात्तुक बल्लाक सुरक्षा निम्ति छचाःख्यरं उत्तम उत्तमगु त्वहँतं त्वपुयाः वज्रकूट प्राकार दय्कल । थुलि त्वपुइवं वसपोलयागु आराधनानुसार नेपालय् गावश्चुङ्ग पर्वतय् श्रीशान्तिकरं स्वयम्भू ज्योतिरूपयात उपयुक्त प्रमाणं आवास दय्किइन धइगु दिव्य सञ्चोदनाद्वारा चव्य्कूगुलि सकल देवता व यक्ष राक्षस अप्सरागणपि उपस्थित जूवल । अले अन रत्नशिला त्वहँतं त्वपुयाबिल । उगु रत्नशिलाया चव्य् त्रयोदश कोष्ठ तयाः ईशान कुनय् छप्वाः ह्वः तयाः उकिइसं द्योने थःगु ऋद्धिवेगं तपफाःगु त्वहँतं त्वपुल । उगु त्वहँतय् नं फिस्वंगू खण्ड यानाः प्वाकः तयाः लि उकिइ बहूमूल्य रत्न सुवर्ण रूप्य तयाः स्वां व्वय् थें शोभा युक्त यानाबिल । थुकिइ थःथःगु श्रद्धानुसारं स्वर्गया इन्द्र आदि देवतापिसं नं अनेक रत्न व जाम्बुनद सुवर्ण छाय्पे हल । थुकिइ धृतराष्ट्र, गन्धर्व, कुंभाण्ड, विरूढक, विरूपाक्ष, वैश्रवण व नागराज तथा चन्द्र सूर्य नक्षत्र तारादि अग्नि, वायु, पृथ्वी देवता सकसिनं उगु रत्नन्यासया क्वथा क्वथा पत्तिकं श्रद्धा प्वंकाः पूजा यात । अज्ज थुकिइ यामा भुवनया याम देवता, तुषिता भुवनया तुषित देवता, निर्माणरति भुवनया निर्माणरति देवता, वशवर्ति भुवनया वशवर्ति देवता, ब्रह्मपार्षद्य भुवनया ब्रह्मपार्षद्य देवता, ब्रह्मकायिक भुवनया ब्रह्मकायिक देवता, परिताभ भुवनया परिताभ देवता, प्रमाणाभ भुवनया प्रमाणाभ देवता, आभाश्वर भुवनया आभाश्वर देवता, सुदर्शन भुवनया सुदर्शन देवता तथा अकनिष्ठ भुवनया अकनिष्ठ देवता आदि दशदिगं वःपि सकल देवतापि गोश्चुङ्ग पर्वत स्वयम्भूस थ्यंकःवल । इपिं सकलसिनं थुगु रत्नन्यास विवरयात दर्शन व पूजन यानाः असंख्य रत्न ह्वलाः श्रीस्वयम्भूयात प्रदक्षिणा यानाः लि गौरवान्वित जुयाच्चन । उगु समयय् शान्तिकरं थः पत्नी सहित जुयाः पुष्प, धूप, दीप, गन्ध, रस, छत्र, ध्वज, पताः, अमृत आदि तयाः पूजा सत्कार यात । थुगुकथं शान्तिकर गुरुं पूजा यानाच्चंगु खनाः देवराज इन्द्रं शान्तिकरयाके प्रार्थना यात—

‘भो शान्तिकर आचार्य ! छःपिसं जक थुगुकथं छाय् ज्या यानाच्चना, जिमित नं थुगु महान् अपरिमित पुण्य कार्यस जोजलपेगु वचन बियाबिज्याहुँ । छःपिसं धाःगुलिइ जिमिसं याय्गु तत्पर जुयाच्चनागु दु ।’ थुलि देवराज इन्द्रयागु प्रार्थना न्यनाः सहर्ष स्वीकार यासे वचन बिल—थुगु महान् सुदुर्लभगु पुण्य कार्यय् फुह्यं फुगुचाःगु सक्रिय भाग काय्गु समान अधिकार दु धासैलि देवराज इन्द्रं स्वर्ग भवनय् दिव्य सुख उपभोग यानाच्चंपि त्रयोदश भुवनया देवतादि लोकपाल एवं विश्वकर्मागणपित चव्य्काः ज्यामि व्वनाहल । अले अन इमिसं स्वयम्भू महाचैत्य निर्माण निम्ति आवश्यक सरसामग्री त्वहँ, चा, अप्पा, सिं जाम्बुनद सुवर्ण आदि विविध धातु व रत्न न्ह्योने थ्यंकेहल । सामग्री व्याक्व ज्वरय् जुसैलि देवराज इन्द्रं स्वयम्भू महाचैत्ययागु लक्षण प्रमाण गुगु प्रकारं दय्के माली धकाः बिचाः यानाच्चन । उगु इलय् विभिन्न देवदेवतापिसं थःथःगु ज्या ज्वनाः न्ह्योने बह्य जुल :—

- (१) यक्षगणपि वयाः स्वयम्भू दय्केत विधिपूर्वक मृत्तिका पूजा यात ।
- (२) वरुण नागराजपि वयाः सुवर्णघट ज्वनाः चा ह्नाय्त लः लह्याबिल ।
- (३) विष्णु देवराजपिसं अप्पा छिइत चा ह्नायाः चा ग्वारा चिनाविल ।
- (४) यमादि किङ्करपि वयाः धमाधम अप्पा छिना बियाच्वन ।
- (५) वायु देवतागण वयाः छिनातःगु अप्पा गंकेत सुगन्ध फसं ह्नाकाः अप्पा गंकाच्वन ।
- (६) नैऋत्य राक्षसगणपि वयाः अप्पा छिनातःगु खड्गं धिनाः लह्वनाः बांलाक पाचुक पिचुका बियाच्वन ।
- (७) विश्वकर्मादि देवतापि वयाः विधि अनुसार अप्पा अतगः पूजा यानाबिल ।
- (८) अग्नेय लोकपालपि वयाः अतगल्य मि च्याकाः बांलाक बल्लाक अप्पा उनाः बुकाबिल ।
- (९) ईशानया महादेव थः गणपि सहित व्वनाः उगु अप्पा धमाधम लह्याः स्वयम्भू पर्वतय् थ्यंके ह्याच्वन ।
- (१०) शान्तिकर गुर्या प्रणिधान व स्वयम्भूया प्रभावं थुगुकथं स्वयम्भू महाचैत्य दय्के निम्ति सामग्री ज्वरय् जुजुं वयाच्वन । अले थुगु चैत्यया गर्भय् तय्त आधार स्तम्भ मेरुदण्ड यष्टिदारु (यलसिँ) लागी विश्वकर्मा लक्षण प्रमाण थें ज्यानाच्वन ।
- (११) यष्टिदारु तयार जुसेलि सहापति ब्रह्मादि देवतापि वयाः यलसिँ थनेगु ज्या जुल ।
- (१२) यलसिँ थने धुँसेलि चन्द्र सूर्यादि तारागण वयाः यलसिँया द्योने गलतुकि तयाःलि प्यख्यरसं दृष्टि उद्घाटन यानाः गभष्टि रश्मिमालाया रूपय् सुवर्णतिलक तयाबिल ।
- (१३) श्वया द्योने चतुर्महाराजपि वयाः हलिपताः हलिपौ तयाः शोभा वृद्धि यानाथकल ।
- (१४) विश्वकर्मा दय्कूगु जाम्बुनन्दादि सुवर्णयागु त्रयोदश चक्राबली मध्यय् ह्नापांगु चकलि त्रयत्रिंशदेवतापिसं तयाथकल ।
- (१५) श्वयां च्वय् नितँगु चकलि यामादेवतापि वयाः तयाथकल ।
- (१६) स्वतँगु चकलि तुषितकायिक देवतापिसं तयाबिल ।
- (१७) प्यतँगु चकलि निर्माणरति देवतापिसं तयावन ।
- (१८) न्यातँगु चकलि परनिर्मित वशवर्ति देवतापिसं तल ।
- (१९) खुतँगु चकलि ब्रह्मपार्षद्य "
- (२०) ह्नाय्तँगु चकलि ब्रह्मकायिक "
- (२१) च्यातँगु चकलि ब्रह्मपुरोहित "
- (२२) गुतँगु चकलि महाब्रह्मा "
- (२३) फितँगु चकलि परिताभ "
- (२४) फिछ्तँगु चकलि महाप्रमाणाभ "
- (२५) फिनिँगु चकलि आभाश्वर "
- (२६) फिनिँगु चकलि सुदर्शन "

- (२७) फिस्वतँगु चकलि चव्य विश्वमणि (सर्वबुद्ध महामुकूट चूडामणि) अकनिष्ठ भुवनया देवतापि वयाः तयाथकल ।
- (२८) थुगु विश्वमणिया द्योने सुखावती (अपरिमित गुण सञ्चय) भुवनं अपरिमिता तथागत विज्यानाः वसपोल आदिबुद्ध सर्वज्ञ श्रीस्वयम्भू ज्योतिरूपया दकलय् सकलय् चव्य असंख्य शोभायमान जुइक रत्नया किङ्किनीजाल युक्त सुवर्ण छत्र तयाथकल ।
- (२९) थुगु स्वयम्भू महाचैत्यया प्यख्यरसं प्यंगू दिशासं थःथःगु मुद्रा व ध्यानय् मिलय् जुइक तथागत व ताराया मूर्ति विश्वकर्मा देवतां दय्काब्यूगु जुल ।
- (३०) थुगु प्रकारं सकल देवदेवतापिनिगु श्रम व सहयोगं श्रीस्वयम्भू महाचैत्य तयार जुसेलि साक्षात् वज्रसत्त्व समानह्य श्रीशान्तिकर गुरुं स्वयम्भू महाचैत्यया चतुर्दिगय् अक्षोभ्य, रत्नसम्भव, अमिताभ, अमोघसिद्धि व चतुर्विदिगय् लोचनी, मामकी, पाण्डूरा तारा स्थापना यानाःलि विधिवत् सम्पूर्ण प्रतिष्ठा कार्य महामङ्गलपूर्वक सुसम्पन्न याना- विज्यात ।

थुगुकथं स्वयम्भू महाचैत्य प्रतिष्ठा याय् धुंकाः त्रिकालदर्शी गुरु शान्तिकरं नेपालय् अनिकाल, दुर्भिक्ष, बिघ्न उपद्रव अशान्ति मजुइमा सदां सुख सुभिक्ष शान्ति मङ्गल जुइमा धइगु प्रतिज्ञा यासे थन पञ्चकर्म ज्ञान, गुण, कर्म, सिद्धि, सौभाग्य पुरय् जुयाच्चनेमा धकाः न्यागू पुरयागु परिकल्पना यानाः साधन सिद्ध यानाथकूगु दुः—

ततः पश्चात्स आचार्यः पञ्चपुरि प्रस्थापितम् ।
 पञ्चकर्म प्रसिद्धाय सम्यक्पुरि कृतादपि ॥
 शान्तिपुर्या महावीरः सम्बरोजगदीश्वरः ।
 पञ्चभूतात्म देवाश्च भावेन स्थापितं गुरुः ॥
 अभ्यन्तर नवकोष्ठे मध्ये सहस्र भुजकम् ।
 महावीर सम्बरश्च प्रज्ञोपाय स्थापितम् ॥
 ये च या वा मनुष्याश्च तस्मिन्पूजाविधि कृतम् ।
 शान्त्यादि फललब्धाच्च मोक्षफलं प्रलभ्यते ॥

थ्वसपोल शान्तिकर गुर्यागु प्रभावं आपालं देव, मनुष्य, यक्ष, गन्धर्व, असुर आदि वयाः माःथाय् माःगु किसिमं सहयोग बियावन । गुकि यानाः स्वयम्भूयागु प्रतिष्ठा कार्य नभूतो नभविष्यति धाःगु थे जुल । थुजाःह्य महान् पराक्रमी ऋद्धिवान् सिद्धयोगेश्वर शान्तिकर गुरुं स्वयम्भू महाचैत्य सेवा चाकरा निम्ति नेपाल देसय् बिघ्न अशान्ति मदय्केया लागी चिन्तामणिरत्न मत च्याकाः शान्तिपुर

महासिद्ध गुफाय् दुने च्वनाः आष्फानिक योग्य बिज्यानाः योगेश्वर धाय्काच्चन । स्वसःदँ न्ह्यो कवीन्द्र जयप्रताप मल्ल जुजु शान्तिपुर दुहांबिज्याःवल्य् तकं छ्यंगू व क्वय् जक बाकि दनिह्य परन्तु प्राणहंस दनिह्य गुरु वज्राचार्य शान्तिकर दर्शन यानावया धकाः उल्लेख यानातल । तर शून्यगु वा एकान्तगु समय्य् चाह्य् अथवा नसंचा इलय् वसपोल शान्तिकर गुरु श्रीस्वयम्भू महाचैत्य प्रदक्षिणा याःवया- च्वनिइगु खना धाःपि भक्तजनत नं मदुगु मखु । गुबलय् नेपाल्य् श्रीस्वयम्भू महाचैत्ययागु भाव भक्ति सेवा चाकरी याःवइपि शून्य जुइ, सद्धर्म म्हंसियावनी, उगु इलय् वसपोल शान्तिकर गुरु शान्तिपुरं पिहांबिज्यानाः हानं अवतारी बिज्यानाः स्वयम्भू महाचैत्ययागु गुण धर्म प्रचार यानाः नेपाल उद्धार याय्त बिज्याइ तिनि धइगु परम्परागत विश्वास यानावइच्चन ।

ख नं खः थ्वसपोल शान्तिकर गुरुयात विभिन्न समय्य् विभिन्न सिद्धवान् पुरुषपिसं दर्शन लाःगु अथवा कुशल वार्ता जूगु खँ स्वयम्भू पुराण व प्राचीन अभिलेखं कनावइच्चंगु खनेदु । आःतकयागु रिर्कड अनुसारं खनेदुपिनिगु नां थथे खः—

१. सिद्धनागार्जुन
२. गुणकामदेव राजा
३. नरेन्द्रदेव राजा
४. सिद्धिमुनिदेव शाक्यभिक्षु
५. कवीन्द्र जयप्रताप मल्ल राजा

उकिं नेपाःयापि वज्रयानीपिसं थःगु परम्परानुसार शान्तिकर गुरुया मृत्यु जुइ धुंकल धकाः गुबले धाय्मफु, निश्चय नं वसपोल शान्तिपुर्य् दुने च्वनाः कालयात छलय् याय्गु प्रभाश्वर धर्मधातु-यागु ज्ञान्य् च्वनाः छुं नय्म्वाःगु केवल श्वास प्रश्वासयागु आधार्य् जीवित जुयाच्चने फइगु आष्फानिक योग ध्यान्य् बिज्यानाः अटल जुयाच्चंगु दु धइगु विश्वास यानाच्चन । थ्व हे आदर्शयात अपनय् यानाः थन शान्तिपुर्य् दुने सुं गुह्यसियां दिवंगत आत्माप्रति शान्ति कामना निम्ति चिट्ठी कुतुकेगु 'पारलौकिक पोष्टबक्स' धकाः मानय् याइपि नं दु । थ्व प्रथा थौंकल्लय् प्रायः लोप जुइ धुंकूगु खनेदु । थुगु थासय् पारलौकिक निम्ति दिवंगत आत्मापित चिट्ठी कुतुकेगु थाय् धाय्बलय् अन्धविश्वास थें जुइ । तर थ्व धयातःगुया मतलब थ्व जुइफु, सर्वशक्तिमान सिद्ध गुरु शान्तिकर थन दुने जीवित जुयाच्चंगुलि वसपोलयात थुगु लुखाय् च्वनाः अमुक दिवंगतया नामं वइगु शान्ति निम्ति शान्तिकर छःपिसं शान्तिविधि अथवा योगद्वारा वइगु जीवन शान्तिमय सुखमय सुखावतिस छ्वया ब्यु धकाः दुनुलंनिसें श्रद्धा विश्वास तयाः सन्देश न्यंकेगु सन्देश गृह धकाः नं धयाच्चन^१ । गुम्हेसिनं थन मृतात्मायागु नामं सन्देश कंवइ, वइगु नामय् वसपोल शान्तिकर गुरु अनुकम्पा तयाः योगसमाधिइ च्वनाः अन्तर्ध्यानं खंकाः स्वत धाःसा षट्गतिलोक न्ह्यात्थाय् जन्म काःवंसां अथवा अन्तराभवय् लानाच्चंसां वइगु

१- स्वयम्भूया थकालि जीवगुरुजुया धापू अनुसार ।

प्राणविज्ञान चित्तविज्ञान आत्माविज्ञानयात खंकाः साधनद्वारा थिक थासय् लाकाः वइत जीवन मुक्त
यानाः परम शान्ति प्राप्त याकाबी । थ्व छगू थःगु हे प्रकारया श्राद्ध प्रकृया खः, विशेषता खः ।

थ्वसपोल शान्तिकर गुरु गुलि समर्थवान् धइगु वारय् थथे च्वइतःगु दुः—

शान्तिकर सिद्धाचार्य नामार्थेन च सादृशः ।
सर्वेषामपि लोकानां शान्तिकृतां विनायकः ॥
शान्तिपौष्टिकं यश्यमभिचार कर्ममपि ।
जम्भनस्तम्भनादि सर्वकर्म कृतां गुरुः ॥
योगिनां योगविन्नाथः ध्यानिनां ध्याननाथकः ।
मन्त्रिणां मन्त्रनाथत्वं प्रज्ञोपाय स्वरूपिनी ॥
सर्वेषामपि ज्ञानिनां देवासुरादिनामपि ।
शान्तिकर जगन्नाथ वज्रसत्त्वमिव स्थितः ॥
सर्वेषामपि सत्त्वानां शास्ता वज्रगुरुः स्थितः ।
यथामेरौ वज्रसत्त्व ध्यानेन संस्थितं मुदा ॥
तथैव शान्तिकृत् गुरु स्थितं भवति शम्भुवि ।
सर्वेषां वज्रिणां मध्ये एव शास्ता वज्रगुरुः ॥
तेन शासिना चापि शान्तिकर नामेन च ।
सदा मुदात्र नेपाले सर्वान् लोकान् सुरक्षितम् ॥
यथा सर्वज्ञनाथेन त्रैलोक्यं च सुरक्षितम् ।
तथैव तेन नाथेन नेपालं च सुरक्षितम् ॥

सिद्धिपिनि आचार्य जुयाच्चंहा शान्तिकरया गथे नां खः अथे हे ज्या यानाविज्याःहा । सकल
लोकपित शान्ति याय्गुलिइ विशेषं नायक जुयाच्चंहा । शान्तिक, पौष्टिक, वशोकरण, अभिचार,
जम्भन, स्तम्भनादि सकतां कर्म याय्गुलिइ गुरु जुयाच्चंहा । योगीपिनि योगया नाथ जुयाच्चंहा,
ध्यानीपिनि ध्यानया नाथ धाय्काच्चंहा । मन्त्रसाधकपिनि मन्त्रया नाथ जुयाः प्रज्ञोपाय स्वरूप
जुयाच्चंहा । सकल ज्ञानी व देव असुरादि जगतया नाथ जुयाः वज्रसत्त्व समान जुयाच्चंहा शान्तिकर ।
सकल सत्त्वया शास्ता धाय्काः वज्रगुरु जुयाच्चंहा । गथे सुमेरु पर्वतय् वज्रसत्त्व ध्यानय् च्वनाच्च्वन अथे
हे शान्तिकर गुरु स्वयम्भू गोपुच्छ गिरिस ध्यानय् च्वनाच्च्वन । सकल वज्रयानीपिनि मध्यय् नं गुरु
धाय्काच्चंहा वज्रगुरु गथे त्रैलोक्यात सर्वज्ञनाथं उद्धार यात अथे हे नेपाल देसयात रक्षा यानाः
विज्यानाच्चंहा धकाः वर्णन यानातल ।

थजाःह्य महागुरु सिद्धगुरु वज्रगुरु शान्तिकर गुरु विज्यानाच्वंगु शान्तिपुरया नां विभिन्न समय्य विविध कारणं विभिन्न नां उल्लेख जुयाच्वंगु खनेदु :—

- (१) शान्तश्रीपुर—ह्लापा प्रचण्ड स्वभाव जुयाच्वंह्य जुजु प्रचण्डदेवयात लिपा काश्यप तथागतयागु सद्धर्ममृतं प्रेरित जुयाः शान्त स्वभाव जूगुलि शान्तश्री भिक्षु जुल । थ्वयां लिपा हानं महाभिज्ञ गुणाकर भिक्षुया शिष्यत्व ग्रहण यानाः आचार्यभिषेक कयाः शान्तश्री आचार्य जुल । थ्वसपोलं प्रतिष्ठा याःगु स्थान जुयाः थुगु थाय् शान्तश्रीपुर धइगु नामं प्रसिद्ध जुल ।
- (२) शान्तिपुर—स्वयम्भू महाचैत्ययागु प्रतिष्ठा कर्म सम्पूर्ण जुसेलि नेपाःया लागी भविष्यवाणी यानाः शान्तश्रीपुरय् दुहांवनाः आष्फानिक योग्य च्वनाः तपस्या यानाच्वन । कालान्तर्य गुणकामदेव राजायागु पर्यायस जल वृष्टि मजुयाः नेपालय् आपालं हाहाकार जुल, अशान्ति जुल, उगु अशान्ति शान्ति याय्या लागी सकल नागराजपि आवाहन यानाः जल वृष्टि यानाः प्रजापिनिगु दुःख शान्त यानाव्यूगुलि उवचनेनिसे वसपोल शान्तश्री आचार्य शान्तिकराचार्य धइगु नामं विख्यात जुल । उगु इलंनिसे तिनि हानं शान्तश्रीपुरयात शान्तिपुर धइगु नां जूगु जुल ।
- (३) गुह्यपुर—गुह्याति गुह्यापि महासम्बर आदि अगोचरपि देवतापि विराजमान जुयाच्वंगु स्थान जूया निम्ति गुह्यपुर धइगु नां जुल । मेगु अर्थ्य थथे नं धयातःगु दु—थुकिइ गनं ऊयाः—की ह्वः प्वाः मतसे गनं तुयूजः वइगु थाय् मदुगु पुरा गोप्य यानातःगु थाय् जुयाः नं ।
- (४) साम्बपुर (सम्बरपुर)—सम्बर सम्बर महासम्बरगणपिनिगु अद्भूतगु दिव्य मूर्तित तथाः दय्कातःगु शान्तिकर गुरुया अधिष्ठात्रि देवतापि तथातःगु वसपोलया आगं जूया निम्ति सम्बरपुर धाःवंगु जुल ।
- (५) आकाशपुर—शान्तिकर गुरु पञ्चकर्म सिद्ध याय् निम्ति आकाशयागु प्रतिनिधित्व यानाः पञ्चपुर मध्यय् ह्लापालाक स्थापना यानातःगु जूया निम्ति आकाशपुर धयातःगु जुल । मेगु अर्थ्य थथे आकाश विषय प्रपञ्चपाखे अलग जुयाः शुद्ध निर्मल जुयाच्वन अथे हे शान्तिकर गुरुयागु स्वस्थान नं उलि हे शान्त शुद्ध प्रभाश्वर जुयाच्वंगु दु धइगु भावनाकथं मिलय् यानातःगु जुल ।
- (६) साम्हेगु गुफा—नेपाःया विभिन्न गुफा पाकु स्वयाः थ्व थःगु हे किसिमया सत्य सिद्धि प्रत्यक्ष दइच्वंगु अद्भूतगु प्रसिद्धगु गुफा जूया निम्ति साम्हेगु गुफा नामं प्रसिद्ध जूगु जुल ।

(७) महाप्रमाणानिगृह—ध्व गुफा जूसां ऊवात्त पिनें स्वयंबल्य् छगू साधारणगु छेँ थें च्वंसां छेँ मखु, देगः मखु, दिगि मखु, चपा मखु, सतः मखु तथापि थुकियात 'महाप्रमाणानिगृह' धयातल । थुकिइ तःधंगु पुरातात्त्विक, ऐतिहासिक, दर्शनीय दुर्लभगु साधनादि वस्तु सिद्धौषधी अमूल्य सम्पदाया निधि स्वरूप जुयाच्चंगु दइ धइगु अनुमानयात प्रमाणित याइगु प्रमाणादि संग्रह युगयुगंनिसें सुरक्षित जुयाच्चंगु स्थान जूया निम्ति 'महाप्रमाणानिगृह' धयातःगु जुइफु ।

(८) सिद्धतपोभूमि—थन दुने उच्च कोटि दर्शनया आधार जीवनया सारभूत तत्त्व संसार निर्वाणया एकत्व प्रतिपादन याय्गु योगध्यान्य अभ्यास याइपि सिद्धयोगीपि च्वनाः तपस्या याइगु सिद्धभूमि धकाः नं परम्परागत मान्य यानावइच्चंगु स्थान जुल ।

थुगु शान्तिपुरय् दुने विभिन्न ग्रन्थ व इतिहास अभिलेख एवं जनश्रुतिकथं बिचाः यायंबल्य् निम्नलिखित दर्शनीय दुर्लभ एवं अमूल्य पुरातात्त्विक सम्पदा सांस्कृतिक निधित दइच्चंगु आशय क्यंगु दु :—

- (१) गुरु शान्तिकरया न्होने गुबलें सिइ मखुगु चिन्तामणि मत च्यानाच्चंगु दु ।
- (२) अनावृष्टि दोष निवारण जुइगु नागराजपिनिगु कबुलियतनामा दु ।
- (३) नाग लिपि च्वइतःगु पाठ यातकि निभालय् पातकि जल वृष्टि जुइगु महामेघसूत्र सफू दु ।
- (४) बोधिसत्व नागार्जुनं साधन यानावंगु सामग्रीत व वसपोलं च्वयाथकूगु प्रज्ञापारमिता सद्धर्म ग्रन्थ नं पिलाय् दुने तयाः स्वथनातःगु दु ।
- (५) महासम्बर वीरसम्बरगणपिनिगु अद्भूत भयंकर मूर्ति प्रतिष्ठा यानातःगु दु ।
- (६) नागराजपिनिगु हि छिनातःगु च्वयातःगु आश्चर्ययुक्त पौभाः सिजःयागु दुङ्गुरय् तयाः स्वथनातःगु दु ।
- (७) छ्यंगू व क्वय् जक बाकि जुयाः कङ्काली रूप जुयाः जीवित जुयाः आष्फानिक योग्य च्वनाः ध्यानमग्न जुयाच्चंगु शान्तिकर गुरु दनि ।
- (८) थन दुने पाखें गन गन वने ज्यू धइगु बारय् थथे आशय क्यंगु दु—
 - (क) स्वयम्भू ज्योतिरूप दर्शन याःवनेगु छपु लँपु ।
 - (ख) नाग भुवनय् क्वहांवनेगु छपु लँपु ।
 - (ग) बिघ्नभुवन यक्ष पिशाचपि च्वनिइथाय् लाइगु छपु ।
 - (घ) स्वयम्भू ज्योतिरूप उत्पन्न जूगु पलेस्वांया हा वनाच्चंगु गुह्येश्वरी तक वनेगु छपु लँपु ।
- (९) थन दुने स्वंगू तला दु । छगू छगू तला पत्तिकं गुंगू गुंगू क्वथा यानाः जम्मा २७ क्वथा दु । थन दुने सिद्धपि च्वनाः योग यानाच्चंगु खनेदइ ।

- (१०) थन हे दुने चिन्तामणि सिमा थे' अद्भूतगु सिमा छमा नं दु ।
 (११) साधनद्वारा सिद्ध यानातःगु दर्शन याना मात्रं पाप क्लेश शुद्ध जुयाः सद्धर्मचित्त उत्पत्ति
 जुइगु श्रून्याकार जन्त्र छगू नं दु ।
 (१२) लःगुजि सनाच्चंगु लःहू खनेदइच्चंगु पुखू नं खनेदु ।
 (१३) लःया ह्व बास वःगु सिरिसिरि फय् वयाच्चंगु दु ।
 (१४) स्वय् हे ग्यानापुसे च्वंप्पि सारै पिरय् याय् योप्पि भूत प्रेत पिशाच थाय्थासय् खनेदु ।
 (१५) भयङ्करप्पि नागराजप्पि लाय्खि थे' उख्येथुख्ये प्वाय् प्वाय् खनेदइच्चनी ।
 (१६) कवीन्द्र प्रताप मल्ल जुजुया सुन्दर चित्र अङ्कित यानातःगु नं खनेदु ।


शान्तिपुरयागु ऋद्धिसिद्धि प्रभावप्रति श्रद्धा अभिव्यक्त यासे इलय्-व्यलय् श्रद्धालु भक्तजनपिसं
 थुगु थासय् भावभक्ति यानावइच्चंगु खनेदु । उदाहरणार्थ निगू प्यंगू खँ थन न्ह्यथनाचवना—

- (१) स्वयं शान्तिकर गुरु हे थःगु ऋद्धिसिद्धि एवं शुद्ध प्रणिधान तथा योगबलद्वारा थुगु
 थाय्यात आभ्यन्तर प्रेरणा पाखे' अद्भूत कल्पना यानाः थुगु शान्तिपुरयागु निर्माण
 यानाथकल । थुगु थाय्यागु वर्णन अनुसार बिचाः याना स्वत धाःसा शायद स्वर्ग मर्त्य
 पातालय् हे नं गनं दइमखु जुइ । स्वयं शान्तिकर गुरु' थःम्हं दय्कूगु जूसां थौतकं थुगु
 थासय् चवनाः अदृश्य रूपं श्रीस्वयम्भू महाचैत्ययागु अखण्ड भक्ति यानाः योगय्
 चवनाच्चंगु दनि धइगु परम्परागत विश्वास यानावइच्चन तिनि । गुबले' गुबले' शुद्ध
 बाचा इलय्, नसंचा इलय् श्रीस्वयम्भू महाचैत्य, गुरु वागीश्वर मञ्जुश्री दर्शनार्थ
 चाःह्यवःगु पाःलाइबलय् खना धाःप्पि दनि । तर आश्चर्य, सुनानं न्ह्योनेपाखे' खना
 धाःप्पि मद्दु, अप्पोसिनं लिउनेपाखे' जक खना धाइगु । नापलाके धकाः दर्शन याय् धकाः
 ब्वां ब्वां वनाः स्वःवन धाःसा तुरन्त अन्तर्धान जुइगु, अन खनाह्य अन खनी मखुगु ।
 थ्वसपोलयात खंप्पि पुण्यात्मा श्रद्धालु भक्तजनपिसं थथे धाःगु दु—तुयूगु जामालँनं
 फिनाः वँचुगु जनिखं चिनाः ह्याउँगु कषागां न्ययाः जापमाला हिइकाः तुतामं चुयाः
 वृद्धाया रूपय् पिहांबिज्याइ ।
 (२) सिद्ध नागार्जुन बोधिसत्व श्रीस्वयम्भू महाचैत्यय् गुलिखे समय तक द्योपाःलाः जुया-
 बिज्याःगु दु । तर वसपोलयात नं थुगु शान्तिपुरं यक्व यक्व प्रभावित याःगु दु ।
 (३) जुजु कवीन्द्र मल्लयागु इलय् नं गुलिखे समय तक जल वृष्टि मजुल । जल वृष्टि निम्ति
 जुजु प्रताप मल्लं तन्त्रविद साधक गुरु वज्राचार्य व ब्राह्मणप्पि सःताः सरसह्ला यानाः
 पशुपति, गुह्येश्वरी, वज्रयोगिनी, चांगुनारायण व गोकर्ण आदि प्रसिद्ध देवस्थलय्
 पुरश्चरणादि तल, पाठ पूजा याकल । अथे नं जल वृष्टि मजुल । अन्तय् थ्व हे
 शान्तिपुरय् स्वयं राजा हे दुहांवनाः विधि विधान यानाः अन दुने च्वंगु सफू व पौभाः

पिनेहयाः श्रीसूर्यताप क्यनाः निभालय् पाना बिइवं ह्लापाह्लापाया नागराजपिनिगु सत्य वाक्य अनुसार घनघोर जल वृष्टि जुल, सकसियां वा पिइखन, देसय् सहकाल जुल । थुजाःगु सत्यसिद्धि प्रत्यक्षया भण्डार क्वथा जुल ।

- (४) पृथ्वीनारायण शाहदेवं काठमाण्डू आक्रमण यानाच्वंगु इलय् तिब्बतया येशेताशि लामाजुं पृथ्वीनारायण शाहयात चेतावनी रूपय् चिट्ठी च्वयाहःगुलिइ थथे धयातःगु दु—छिसं काठमाण्डू उपत्यका आक्रमण याय्वलय् यदि श्रीस्वयम्भू महाचैत्य व शान्तिपुरी स्यंकल धाःसा अवश्य छंत भिज्या जुइमखु । थुकिं सिइदत कि शान्तिपुरया महिमा गौरव नेपालय् जक मखु तिब्बती बौद्धजगतय् नं यक्व प्रसिद्ध जू खनी ।
- (५) स्वामि जुजुया थः कलाः कान्तवती महारानीया रोग शान्तिया लागि गुलिखे तःधंछःया-थाय् पुरश्चरणादि तयाः धर्म कर्म यात नं रोग शान्त मज्जुगु क्छोकं अनेक देवस्थलय् विनाश यात, अपहरण यात, उबलय् सुं तःधं देवतापिसं स्वामि जुजुयात प्रत्यक्ष क्यनेमफुत, तर शान्तिपुरं सातु कया ब्यूगु दु^१ । फलस्वरूप उकियागु अपराध क्षमाकथं थौंतकं दच्छिया निगू अर्सिफि छाय्गु गुठी तयाथकूगु दनि ।
- (६) थ्व थासय् दुहांवनेत मेमेगु अभ्यन्तरादि आगमय् थें केवल दीक्षा दय्वं मगाः । सुयाके पुरश्चरणादि योगसिद्धि तन्त्रविधि दखल मदय्कं शक्ति समर्थ मदय्कं ऊवात्त सुं नं दुहांवनेगु साहस याय् फइमखु । थ्व थाय्यागु चलन बडो गम्भीर एवं अत्यन्त रहस्यमय जुयाच्वंगु दु ।
- (७) थुगु थाय्यागु अद्भूत चमत्कार व महत्वप्रति श्रद्धा तसे थः अबुजुं अर्सिफि छाय्गु गुठी तयाथकूगु थें तुं श्री ५ गीर्वाणयुद्ध विक्रम शाहदेवं महापूजा गुठी संकल्प यानाः करीब निसःपि जग्गां मयाक आयस्ता तयाथकूगु दु ।
- (८) नेपाःया वज्रयानयागु इतिहासय् सर्वप्रथम वज्राचार्य जूह्य गुरु शान्तिकर आचार्य विराजमान जुयाच्वंगु पवित्रस्थान जूया निर्मित थ्व हे थासय् काठमाण्डूया वज्राचार्य संघं देआचाःगुठी न्याय्का वयाच्वन प्रत्येक वर्ष फाल्गुणकृष्ण अष्टमीखुनु ।
- (९) प्रत्येक वर्ष गुंलाधर्म परिसमाप्तिखुनु शान्तिपुरया छ्वाःख्यरं च्वनाः धालचा थ्याकाचां चाःहुइकाः मोहनो-सिह्लः फयाः लँपिचा ज्वनाः पूजा याःवइपिनिगु ताँति लगय् जुयाच्वनी ।
- (१०) स्वयम्भू महाचैत्य स्थानय् ततःधंगु धर्मकर्म सम्यक्, नरां, पञ्जरां, सख्याःपा, सिथार-पूजा, पञ्चायन, जीर्णोद्धार कार्य एवं वर्षापणविधि आदि विधि विधान जुइबलय् नं थुगु थासय् यथाविधि थें पूजा जुयाच्वनी ।

श्रीस्वयम्भू महाचैत्य



वसुवन्धुचैत्य
भुवन लक्ष्मीदेवी महारानीद्वारा जीर्णोद्धार जूग

- (११) नेपाल तन्त्रयान वज्रयान प्रधान देस जूया निम्ति थन दुने इलय्-ब्यलय् रहस्यार्चन, महासिन्दुरार्चन आदि अनेक गुह्यपूजा याइवल्य् वज्रयानी विधिकथं चर्यागीत हालाहङ्गु स्वर ताय्दइच्चनी ।
- (१२) बौद्ध संस्कार अनुसार चूडाकर्म याय् धुंकूपि दीक्षा काय् धुंकूपि बौद्धाचार्यपिसं गुरु शान्तिकरया न्ह्योने प्रमाण प्रस्तुत याय्गु भावनाकथं थःथःपिनिगु श्रद्धा भक्ति अनुसारं लैपिचा कलः आदि ज्वनाः पूजा याःवइपिनिगु संख्या नं कम मजू ।

[६५] वसुवन्धु स्मृति चैत्य

थुगु चैत्य स्वयम्भू डाँडाया लिउनेपाखे वर्तमान मोटर पार्क चवस्सं शान्तिपुर व आनन्द कुटी वनेगु लैया बिचय् च्वंगु वज्रधातु शैली तःग्वःगु चीवाहाःयात आचार्य वसुवन्धुयागु स्मारक स्वरूप मानय् यानातःगु जुल । खतु वसपोल वसुवन्धु आचार्य श्रीस्वयम्भू महाचैत्य दर्शनार्थ नेपाः बिज्याःगु समयय् वृद्धावस्था जूया निम्ति वसपोलया देहावसान नं थन हे जुल धयातल । अले वसपोलया नामं अस्थिधातु तयाः उष्णीष विजय धर्म पारङ्गत चैत्य दय्काथकूगु जुल । आपालं समय बितय् जुइ धुंकूगु जूया निम्ति उष्णीष विजय धर्म पारङ्गत चैत्ययागु स्वरूप परिवर्तन जुयाः वर्तमान वज्रधातु चैत्यया रूपय् परिणत जुल ।

भुवनलक्ष्मी महाराणी ने. सं. ८३३ सालं श्रीस्वयम्भू महाचैत्यय् च्वंगु ह्लापायागु पुलांगु चतु- तथागतया ल्वहंया मूर्ति लिक्कायाः धातुया मूर्ति प्रतिष्ठा यासेलि उगु मूर्ति जगेडा च्वन । छुं समय लिपा उगु मूर्ति हयाः थुगु वसुवन्धु स्मृति चैत्य पिखाद्यःया रूपय् तयाः सुरक्षितपूर्वक आदर यानातःगु धयातल । हानं जुजु प्रताप मल्लं श्रीस्वयम्भूया न्ह्योने च्वंगु ह्लापायागु ल्वहंयागु धर्मधातु मण्डल व उकिइ तयातःगु ल्वहंयागु वज्र लिक्कायाः सुवर्णमय धर्मधातु मण्डल व वज्र तयाबिसेलि पुलांगु धर्मधातु मण्डल व वज्र जगेडा ल्यनाच्चंगु गुलिखे समय लिपा थुगु वसुवन्धु चैत्यया न्ह्योने तयाः शोभा वृद्धि यानाब्यूगु धकाः धाइ । थ्व हे कारणं गुलिसिनं थुगु चीवाहाःयात प्रताप मल्लं दय्काथकूगु धकाः धाइपि नं मदुगु मखु ।

अपशोचया खँ—इतिहास अनभिज्ञया कारणं छगूयात छगू धाःवनिइगु अथवा विद्यमान जुयाः नं उकियागु नां तकं मसियावनिइगु चलन यक्व दु । धाय् कि, थन हे स्वयम्भू क्षेत्रय् ‘ऋकुच्छन्द चैत्य’ दु धकाः शिलालेखय् अङ्कित जुयाच्चंगु दु । तर दयाः नं उगु चैत्य गुगु खः गन खः पत्ता लगय् याय् मफुनि । अथे हे परम्परायागु थितिरीति परिलोप जुजुं इतिहास ल्वःमना वँवं स्वयम्भूयागु वास्तविक तथ्य प्रमाण ह्लियाह्लियं अन्धकारय् लानावयाच्चन । गुलि जा थःगु मौलिक संस्कृति धर्मयागु महत्त्व गौरव मथुयाः चाय्कं वा मचाय्कं न्हून्हुगु संस्कृति त्वपुइत सनाच्चपि नं मदुगु मखु । उदाहरणया लागी थ्व हे चैत्यय् स्थापना यानातःपि पञ्चबुद्ध मध्यय् पूर्वया अक्षोभ्य तथागत अपहरण जुयाः मेह

न्हूह्य दय्काः पलेसा तःबल्य् उष्णीष चूडामणि मदुह्य व ह्लाःपति प्यपति नं बराबर यानातःह्य बुद्ध मूर्ति तयाव्यूगु जुल । थ्व नेपाःयागु बुद्धधर्म्य् अप्रत्यक्ष रूपं छगू आन्दोलन धाःसां अत्युक्ति जुइमखु ।

[६६] मञ्जुश्री पर्वस्थान

स्वयम्भू डाँडाया पश्चिमपाखे लिउने वःचाहंगु छगू पर्वस्थान दु, थुकियात मञ्जुश्री पर्वस्थान धाइ । थन गुरु मञ्जुश्रीया नामं वज्रधातु चैत्य शैलोगु मञ्जुश्री स्मृति चैत्य दय्काः तइतःगु दु । थुगु चैत्यया न्होनेसं गुरु वागीश्वरया मण्डल स्वरूपं छगू मण्डःपा तयातल । थुकियात गुलिसिनं मञ्जुश्री पादुका धकाः नं धाइ । थुगु चैत्यया छचालं अनेक बौद्ध देवदेवीपिनिगु मूर्ति सजय् यानातःगु पःखालं चाःहुइकातल । थुगु पःखाःया पूर्वपाखे ल्वहंया तोरण तयाः ध्वाका छगू तयाः शोभा वृद्धि यानातल, लिस्सें थुगु चीवाहाःया न्होने पश्चिमपाखे ह्लापायागु सतः स्यनाःलि थौंकल्लय्या धाँचां भव्य रूपं छगू सतः दय्का तइतल ।

तर थनयात मञ्जुश्री पर्वस्थान छांय् धाल धइगु विषय्य् कयाः छत्वाःचा खँ न्हयथने :—

गुरु मञ्जुश्री बोधिसत्व वसपोल श्रीस्वयम्भू ज्योतिरूप दर्शन याय्त महाचीनया पञ्चशिर्ष पर्वतं थन विज्यात । उबल्य् वसपोलं विवेक दृष्टि खंकाः करुणा तयाः देवमनुष्यपिनिगु हितया निम्ति कालीहृदया लः पिछ्वयाः मञ्जुपत्तन सहर निर्माण यानाविल । श्रीस्वयम्भू ज्योतिरूप दर्शन व पूजन यानाः देस दय्के धुँसेलि हानं थ्व हे थासय् च्वनाः महाभिज्ञ भिक्षु गुणाकर आदि आपालं शिष्यपि दय्काः इमित माःगु तक शिक्षा—दीक्षा ज्ञान—विज्ञान शिल्पशास्त्र आदि स्यने—कने यानाः थःगु ज्या पुरा जुसेलि थुगु थासं राजहंस थे' आकाशमार्गं गमन जुया थःगु थासय्तुं लिहांविज्याःगु जुल ।

थ्व हे खँयात ध्यानय् तयाः महाविचक्षणह्य सिद्धगुरु शान्तिकरं गुरु महामञ्जुश्रीयागुप्रति श्रद्धा अभिव्यक्त यासे गुरु मञ्जुश्रीयागु आदर्श अनुरूप आचरण याइपिं लिपायापिं श्रद्धालु भक्तजनपिनिगु लागी अनन्तकाल तकं ल्वःममनिगु किसिमं सदांया लागी थुगु थासय् 'मञ्जुश्री स्मृति चैत्य' प्रतिष्ठापित यानाथकूगु जुल । लिसेलिसें शान्तिकर आचार्य थ्व नं बिचाः याःगु दु—

मञ्जुश्री गुरुं महापण्डित धर्मश्रीमित्र भिक्षुयात आर्य मञ्जुश्री नामसंगितियागु द्वादशाक्षर मन्त्रया अर्थ विशुद्धि खँ कनेत अभिषेक विइत धर्मधातु वागीश्वरयागु मण्डल दय्कूगु उकियागु लुमन्तिकथं भावभक्ति याकेगु निम्ति थ्व हे चैत्यया न्होनेसं छगू मण्डल अधिष्ठान यानाथकल । धयातःगु दु—श्रद्धा भक्तिपूर्वक सुनां गुह्यसिनं पूजा सत्कार यानाः गुरु वागीश्वर अनुस्मरण यानाः ॐ नमोवागीश्वराय, अआइई, कखगघङ इत्यादि आखः च्वयाः वसपोलयात पूजा भाव भक्ति यानाः धारणी स्तोत्र मन्त्र जाप यानाः सेवा यात धाःसा निश्चय नं उम्हेसित शिल्पशास्त्र आदि सकल

श्रीस्वयम्भू महाचैत्य



मञ्जुश्री स्मृति चैत्य

विद्यायसं सिद्धि प्राप्त जुयाः सप्त वृद्धि परिपूर्ण जुयाः अन्तय् संसारसागरं पार जुयाः निर्वाण सम्पत्ति
लाभ जुइहा जुइ धयातलः :—

ततोऽपि च स आचार्यः शान्तिकर जगद्गुरुः ।
एकचैत्यं प्रतिष्ठाप्य मञ्जुदेवास्यावासते ॥
प्रतिष्ठादि विधिञ्चापि शास्त्रोक्त विधिना अपि ।
शान्तिकरः स आचार्यः इत्थं चैत्यकृतमिति ॥
यत्र मञ्जुदेवाचार्य मण्डलं स्फारितं कृतम् ।
धर्मश्रीनाम भिक्षव अर्थदन्त दिक्षा कृतात् ॥
इत्थं द्वादश अर्थानां अर्थं दद्याय च अपि ।
सकृतमण्डल पृष्ठे एकचैत्यं प्रस्थापितम् ॥
देवतारभिसंयुक्त समन्ततः सुशोभितम् ।
यत्र मञ्जुदेव कृते मञ्जुश्री मण्डपे इति ॥
पूजा कृतं ये च या वा नाना विद्या प्रलभ्यते ।
धर्मधातु वागीश्वरं मञ्जुश्री मण्डलमिति ॥
मनुष्या अपि तस्मिन् च सदा मुदा पूजां कृतम् ।
अक्षरैर्लिखितैः स्तोत्रैः पूर्वोक्तेन पूजाकृतम् ॥
सदा तस्य प्रपूजित्वा सर्वविद्या प्रलभ्यते ।

स्वयम्भू ज्योतिरूपया प्रभावं अति उत्तम जुयाच्चंगु थुगु थासय् गुरु मञ्जुश्री बोधिसत्व
विज्यानाच्चंगु वसपोलयागु गुणानुस्मरणय् शान्तिकर गुरुं मञ्जुश्री स्मृति चैत्य स्थापना यानाथकूगु
ऐतिहासिक पवित्र स्थान जूया निर्मित्ति थौतकं मञ्जुश्री पर्वस्थान धकाः प्रसिद्ध जुयाच्चन ।

महायान बौद्ध संस्कार अनुसार गुरु मञ्जुश्रीयागु विषयय् थथे वर्णन यानातःगु खनेदुः :—

तत्र अस्ति गुरु शास्ता मञ्जुदेवतु नाम च ।
आचार्य सर्वविन्नाथः मञ्जुश्री प्रतिरूपजः ॥
द्वात्रिंशलक्षणधरं अशीतिव्यञ्जनैर्युतः ।
सदेव मानुष्याणां च लोके शास्ता जगद्गुरुः ॥

१- स्वायम्भू पुराण, पृ. ४२३

२- स्वायम्भू पुराण, पृ. १५४

सहस्र सूर्यादधिकं तेजसा च सुपूरितम् ।
 चन्द्रमसः सहस्रञ्च अधिकं कोमलं ततः ॥
 इत्थंगुणमयं अङ्गं सर्वज्ञ सर्वविद्गुरुः ।
 पञ्चाभिज्ञ मञ्जुदेवः ख्यातः साहस्रलोकिके ॥
 शिल्पतुलादि उद्दारे शास्त्रादि वेद पारगः ।
 नानाधातु कलाभिज्ञः भाषागाथादिगानवित् ॥
 वेदवेदाङ्ग विन्नाथ ब्रह्मज्ञान विदाम्बरः ।
 शून्यता शून्यता नाथः बोधिज्ञान विदाम्बरः ॥
 योगिनांयोगविन्नाथः ज्ञानीनांज्ञानपारगः ।
 सर्वज्ञज्ञानविन्नाथः सर्वविद्या सुपारगः ॥
 तत्त्वानांतत्त्व विन्नाथः तन्त्राणांतन्त्रपारगः ।
 एवमादिगुणैर्युक्तः मञ्जुश्री रिवशादृशः ॥
 सर्वेषामपि विद्यानां सच्छास्ता च जगद्गुरुः ।
 विश्वकर्मासिख ख्यातः मञ्जुश्री यश्च गौरवम् ॥
 सर्वेषां देवलोकानां मर्त्यानां च तथा अपि ।
 पातालजानां लोकेषु सर्वविद्यासु सद्गुरुः ॥
 प्रज्ञापारमितानाञ्च अर्थ सत्वाय देशकः ।
 मञ्जुदेवो गुरुशास्ता अस्ति नेपालमण्डले ॥
 चक्षुषा दिव्यज्ञानेन श्रोत्रेण च प्रजानितः ।
 स्वयम्भूपूजनार्थं च सत्कारार्थं मुदागतः ॥

मञ्जुदेव नां जुयाच्चंह्य शास्ता गुरु वसपोल थन विज्याःगु दु । सकल आचार्यपिनि नं नाथ
 धाय्काच्चंह्य वसपोल मञ्जुश्रीयागु प्रतिरूप उत्पन्न जूगु थाय् धकाः मानय् यानातःगु थन । वसपोल
 सुइनिता लक्षण चय्ता व्यञ्जनं युक्त जुयाच्चंह्य सकल देवमनुष्यपिनिगु लोकय् जगद्गुरु शास्ता
 धाय्काच्चंह्य । सहस्र सूर्य स्वयाः नं अप्पो रश्मि जायाच्चंह्य द्वःछि शान्तरश्मि चन्द्रमा स्वयाः नं
 अधिक कोमल जुयाः सुकुमारयागु रूप जुयाच्चंह्य थुजाःगु गुणं युक्तगु शरीर जुयाः सकलया गुरु सर्वज्ञ
 जुयाच्चंह्य । द्वलंद्वः लोकधातुइ न्यागू अभिज्ञं युक्तह्य मञ्जुश्री धकाः प्रख्यान्त जुयाच्चंह्य जुल । वसपोल
 शिलाशास्त्र, तौलनाप परिमान शास्त्र एवं वेदं पारङ्गत जुयाः उद्धार यानाविज्याःह्य । अनेक
 धातुकलायागु ज्ञान स्यूह्य अथे हे भाषा साहित्य संगीत विषयय् नं विचक्षणह्य वेदवेदाङ्गया तत्त्व स्यूह्य
 ब्रह्मज्ञानया सागरं पारह्य । शून्यता ज्ञानय् लगय् जूपि परमार्थीपिनि नं नाथ जुयाच्चंह्य, बोधिज्ञानया
 सागरं पारह्य सर्वज्ञज्ञान स्यूपिनि नं नाथ जुयाच्चंह्य, सम्पूर्णं विद्यां भिन्नकं पारङ्गत जुयाविज्याःह्य ।
 सारभूत ज्ञान तत्त्वया नं तत्त्व स्यूह्य तन्त्रयागु नं तन्त्रं पार जुयाविज्याःह्य । थुजाःगु इत्यादि गुणं युक्त

जुयाच्चंह्य शास्ता धाय्काच्चंह्य मानों विश्वयागु रचना कार्यकारण हेतु यथार्थ अवबोध जुयाविज्याःह्य धकाः प्रसिद्ध जुयाच्चंह्य मञ्जुश्री थन विज्याःगुलि थुगु स्थान अधिक गौरव एवं महत्व दइच्चंगु जुल । स्वर्ग मर्त्य एवं पातालय् च्वंपि सकलसिनं समस्त विद्याय्सं सद्गुरु धाय्काच्चंह्य, प्रज्ञापारमितायागु अर्थ देशना यानाविज्याःह्य मञ्जुश्री गुरुं दिव्यचक्षुं स्वयाः न्यनाः थुइकाः नेपालया जल कालीह्रदस उत्पन्न जुयाच्चंह्य श्रीस्वयम्भू ज्योतिरूपयात पूजादि सत्कार निम्ति हर्षपूर्वक थन विज्याःगु जुल ।

थुजाःगु शास्त्रोक्त वचन ऐतिहासिक घटनायात लुमंकाः थुगु पवित्र स्थानयागु महत्व थुइकाः परम्परागत थौतकं मञ्जुपञ्चमी (श्रीपञ्चमी) खुनु पाठशाला, माध्यमिक स्कूल, उच्च शिक्षालय एवं विश्वविद्यालयया छात्र, छात्रा, विद्यार्थी, शिक्षक, स्नातक, प्राध्यापक तथा प्राचार्य आदिपिसं नेपाःया विद्याया मूल केन्द्र स्थल^१ रूप्य महागुरु मञ्जुश्री दर्शन व पूजन यानाः विद्यासिद्धि प्रसाद प्राप्त जुइ धइगु उद्देश्यं श्रद्धा भक्ति तयाः स्वागत सत्कार याय्त वयाच्चंपि असंख्य भक्तजनतय्गु हूल जुयाच्चनी । गुरु मञ्जुश्रीनं निर्माण यानाथकूगु थुगु मञ्जुपत्तन महानगर (काठमाण्डू) उपत्यका निवासीपिसं वसपोलयागु गुणानुस्मरण यानाः गुरु वागीश्वर मञ्जुश्रीयात वन्दना याय्गु अर्थय् विद्याध्ययन शुभारम्भ याय्त सर्वप्रथम कीसं 'नमोवागीश्वराय' धकाः ब्वनावयाच्चना, च्वयावयाच्चना, थ्व परम्परा अद्यापि विद्यमान तिनि ।

थ्व हे कारणं इतिहासकारतय्सं अर्थात् संस्कृतिप्रेमी श्रद्धालु सज्जनपिसं थुगु स्वयम्भू मञ्जुश्री पर्वस्थानयात विभिन्न अभिलेखय् 'श्रीस्वयम्भू धर्मधातु वागीश्वर स्थान' धकाः अङ्कित यानावयाच्चंगु जुल । काठमाण्डू उपत्यकाय् गनं वागीश्वरया नामं थाय्या नां उल्लेख जुयाच्चंगु मदु । तर देवपत्तन ग्वलय् छथाय् 'जयवागीश्वरी' धाय्गु चलन खनेदु । कीसं गुगु विद्यारंभ याय्त ब्वनावयाच्चनागु वाक्य 'नमोवागीश्वराय' खः थ्व अकारान्त पुलिङ्ग शब्द खः । तर जयवागीश्वरी थे ईकारान्त स्त्रीलिङ्ग शब्द मखु ।

थुगु थाय्यागु महत्व व गौरवप्रति श्रद्धा तयाः प्रजागणपिसं जक पूजा यानावइच्चंगु मखु कि— सरकारी पूजा नं नित्य अखण्ड चल्य जुयाच्चंगु दु । थ्व पूजा थौतकं वज्राचार्यपिसं याकावइच्चंगु खनेदु^२ । थुगु नित्यपूजाय् मञ्जुश्री पादुका अङ्कितगु वहःयागु मण्डःपा ह्लित्थं थापं यानाः पूजा याय्गु यानावइच्चन ।

थुगु मञ्जुश्री चाकलय् विभिन्न इलय् विभिन्न समयय् विभिन्न श्रद्धालु भक्तजनपिसं थःथःगु त्याग निश्चय अनुसार अनेक धर्मकीर्ति, मूर्ति, अभिलेख तयाथकूगु दु । थन दइच्चंगु अभिलेखत मध्यय्

१- नेपाःया विद्याया मूल केन्द्रीय स्थल विषयय् प्रस्तुत ग्रन्थया ८६ अध्याय स्वयादिसँ ।

२- वर्तमान सुरत श्रीमहाविहारया तेजमानन्द वज्राचार्य यानावइच्चंगु जुल । नित्य पूजाया लागी किन्यातका लच्छिया दस्तुर व श्रीपञ्चमीखुनु छन्हुया लागी जज्ञ याय्त चय्तका दस्तुर बियावइच्चन धकाः पूजारी तेजमानन्द धाःगु दु ।

छगू विशेषता थ्व दु—उगु सिलापत्रय् सुनां छुं गुगु धर्मकीर्ति तयातःगु व व्यवस्थायागु थितिरीति चलय् याय्गु आदि विषयय् मजुसे वसपोल गुरु वागीश्वर मञ्जुश्रीयागु 'धारणी विद्या' जक अङ्कित यानातःगु जुल । थुगु अभिलेख मञ्जुश्रीया खवय्संतुं स्वानातइतःगु खनेदु । थुकिइ अङ्कित यानातइतःगु धारणी विद्या थथे खः^१—

ॐ नमः श्रीमञ्जुश्री कुमार भूताय बोधिसत्वाय
महासत्वाय सहाकारुणिकाय । तद्यथा ।
ॐ अरजे विरजे शुद्धे विशुद्धे शोधनी
विशोधनी अमले विमले निर्मले जयवाहिनी
रुरु चले हूँ हूँ फट् फट् स्वाहा ।

महायानी बौद्ध देवतापिनिगु धारणी संग्रह यानातइतःगु धारणी संग्रहलय् थुगु धारणी नं उल्लेख यानातःगु दु । सुनां गुह्यसिनं श्रद्धा भक्तिपूर्वक नियमानुसार थुगु धारणीयात धारणा यात धाःसा उम्हेसित निश्चय नं निम्नलिखित फल प्राप्त जुइ धयातलः—

एक लक्ष जापेन पण्डितो भवति ।
द्वितीय लक्ष जापेन विद्याधरो भवति ।
तृतीय लक्ष जापेन मञ्जुश्री रूपं पश्यन्ति ।


मञ्जुश्रीया चाकलय् उत्तर लङ्गया पःखालय् च्वंगु मूर्तित^२ :—

१. पद्मासन गणेश
२. गमनपद गणेश
३. त्रिमुखषट्भुज देवी विशेष
४. नागासन स्थित गणेश
५. उत्कुटुकासन महाकाल
६. स्थानासन महाकाल
७. स्थानासन महाकाल

१- थुगु सिलापत्रय् कियातःगु धारणी अशुद्ध जूगुलि धारणी संग्रह सफू स्वयाः पाठ शुद्ध यानाबियागु दु ।

२- गुठी जीर्णोद्धार एवं निर्माण समिति व आनन्दमुनि गुरुजुयागु संयुक्त प्रयासं थुगु थाय् न्हापा स्वयाः बांलाकल, ज्याँछिकल; तर उगु समयय् थुगु थासय् च्वंगु मूर्तित उखेलाः थुखेलाः मदयाः तनावंगु नं दु । न्हापायागु मूर्तितय् धलः प्रस्तुत ग्रन्थया परिशिष्टय् च्वयाबियागु स्वयाः सिइकादिसँ ।

श्रीस्वयम्भू महाचैत्य



गोपुच्छाग्र चैत्य (पुराण स्वयम्भू)

८. सप्तलोचनी तारा
९. मञ्जुश्री
१०. चैत्यराज
११. आर्यतारा
१२. द्वय शक्ति युक्त मञ्जुश्री
१३. शीतवती
१४. बुंगमलोकेश्वर
१५. अमोघपाश लोकेश्वर
१६. चतुर्भुज वसुन्धरा
१७. अमोघसिद्धि
१८. चिन्तामणि लोकेश्वर
१९. अभयमुद्रा बुद्ध
२०. वज्रवीर—ध्वाकाया जःखः च्वंह
२१. खङ्गवीर—ध्वाकाया जःखः च्वंह

[६७] गोपुच्छाग्र चैत्य (पुलां स्यंगु)

मञ्जुश्री स्मृति चैत्य दर्शन यानाः लिहांवनेबल्य् पर्वस्थानया उत्तरपाखे च्वंगु पःखालं चाःहुइकातःगु थाय् खः । थन पश्चिम व पूर्वपाखे यानाः निगू द्वार तइतःगु दु । थन दुनेच्वंगु चीबाहाः-यात गोपुच्छाग्र चैत्य अर्थात् पुच्छाग्र चैत्य नितां नां चल्य् जू । थन गुगु चैत्य प्रस्थापित जुयाच्वंगु खः व हे चैत्यया नामं थुगु थाय्या नां प्रसिद्ध जूगु खः ।

खास यानाः थुगु गोपुच्छाग्र चैत्यया विषय्य् थथे वर्णन यानातःगु दु^१—गुरु वागीश्वर मञ्जुश्रीयागु धातु तयाः उकिइ द्योने अनेक विधि कर्म संयुक्त यानाः लक्षण प्रमाण मिल्य् यानाः गोपुच्छाग्र चैत्य स्थापना याःगु जुल । थुगु चैत्य निर्माण याय्त लक्षण प्रमाण मिल्य् याय्गुलिइ विश्वकर्मा एवं दशदिग्लोकपालपिसं नं सक्रिय रूप्य् भाग काःगु दु । थुगु प्रतिष्ठा कार्यं निम्ति अनेक विधि कर्म खंकाः सुशोभित यानाव्यूगु खँ न्ह्यथनातल । लिस्से थुगु चैत्यया लक्षण प्रमाण विषय्य् थथे धइतःगु दु—चन्द्रोपरी द्योने कलश तयाः प्यखे चतुतथागतया मूर्ति सुसज्जित यात, थुकिया नं च्वय् गलतुकि तयाबिल, अज्ज थ्वया नं द्योने नवस्वर्ग विशुद्धि प्रमाणं गुंगू चक्रावली सहित यानाः दय्का-व्यूगु जुल । थुकिइ गुरु मञ्जुश्रीयागु जक मखु अतीत व प्रत्युत्पन्न बुद्धपिनिगु नं धातु गर्भय् तयाः

पवित्र यासे विशुद्ध यानाव्यूगु दु । थुगु गोपुच्छाग्र चैत्य तयार जुसेलि गुरु शान्तिकराचार्य विधि विधान पूर्वक प्रतिष्ठा यानाविल । लिस्से ध्वया चाकलय् हेवज्र भैरव व नागराजपि आवाहन यानाः साधन यानातइतःगु दु ।

शान्तिकर आचार्योऽपि कृतं पुच्छाग्र पर्वते ।
 अनेककर्मभिर्युक्तं मञ्जुश्री धातुकोपरी ॥
 गोपुच्छारव्यञ्च सुचैत्यं कृतं लक्षण भूषितं ।
 दशभिलोकपालैश्च तस्य सर्वं कर्म कृतम् ॥
 विधिविधानकैश्चापि पुच्छाग्रचैत्यं कर्मपि ।
 विश्वकर्मा भिदेवैश्च तच्चैत्यस्य सुलक्षणैः ॥
 युक्तं कृतं विधिभिश्च समन्ततः सुशोभितम् ।
 चन्द्रोपरिकलशश्च चतुतथागतानपि ॥
 तत्रोपरिगलश्चापि न च चक्रं तत्रोपरि ।
 तत्रोपरि उष्णीषश्च सर्वलक्षण संस्कृतम् ॥
 नवनाक विशुद्धत्वान्नवचक्रश्च संस्कृताम् ।
 अतीता प्रत्युत्पन्नानां तथागतानां धातुके ॥
 नवचक्र प्रयुक्तेन विश्वकर्म चैत्यं कृतम् ।
 शास्त्रोक्त विधिविधानैः स आचार्य शान्तिकरः ॥
 प्रतिष्ठादिकं सम्पूर्णं चैत्यं पुच्छाग्रकर्मपि ।
 हेवज्रमपि गुह्येशं भैरवं नागराजकम् ॥
 इत्थं सम्पूर्णं युक्तेन पुच्छाग्रे च संस्थापितम् ।

थुगु थायात स्थानीय भाषां 'पुलां स्यंगु' धयाच्वन । थ्व पुलां स्यंगुया अर्थ गुलिसिनं थथे नं धाःगु दु—स्वयम्भू महाचैत्य स्वयाः नं थुगु गोपुच्छाग्र चैत्य पुलांगु धयाच्वन । थ्व धारणा बिलकुल मिलय् मजू । पुलां स्यंगुया अर्थ उगु किसिमं मखु । शास्त्र सम्मत अर्थ थथे खनेदु—

थुगु थासय् च्वनाः गुरु वागीश्वर मञ्जुश्री थः शिष्य गुणाकर भिक्षु आदि आपालं शिष्यपित शिक्षा-दीक्षा व्यूगु दु, स्यने-कने याःगु दु । श्रीस्वयम्भू ज्योतिरूपयागु महिमां जायाच्वंगु पुराणादि शास्त्र स्यंगू जूया निम्ति 'पुराण स्यंगू' थाय् धयातःगु खः । थुकियागु भाव अर्थ मथुयाः मसियाः पुराण स्यंगू वाक्यया अपभ्रंशया रूपय् अशुद्ध उच्चारण यानाः पुलां स्यंगु जूवंगु खः । स्यंगु स्वयाः पुलां धाःगु नं मखु हानं पुलां जुयाः स्यनावंगु धयातःगु नं मखु । हानं थ्वयां लिपा नं शान्तिकर गुरु महाभिज्ञ गुणाकर भिक्षुयाके शिक्षा-दीक्षा कागु थाय् नं थन हे धकाः मानय् यानावइच्वन । थ्व हे कारणं स्वयम्भूइ च्वपि शाक्यभिक्षुपि बुद्धाचार्य जुइत आचार्य जुइगु अभिषेक कर्म खंकेगु विधि विधान थौतक

नं थ्व हे थासय् वयाः परम्परा कायम यानावइच्चंगु खनेदु । थुलि जक मखु शाक्यमुनि बुद्ध श्रीस्वयम्भू महाचैत्य दर्शन याय्त बिज्याःवल्य् नं आर्यमैत्रेय बोधिसत्व, चूडाभिक्षुणी एवं हारती महायक्षिणी आदि १३५० भिक्षुपिनिगु उपस्थितिइ वसपोल श्रीस्वयम्भू महाचैत्ययागु उत्पत्तिक्रम इतिहास स्वयम्भू पुराण सर्वप्रथम देशना यानाबिज्याःगु थाय् धकाः मानय् यानावइच्चन । उकिं थुगु थाय्यात 'पुराण स्यंगु' धयातःगु जुल । थन हे स्वयम्भूइ च्वंप्ति शाक्यभिक्षु बुद्धाचार्यपिनि देगुपूजा मानय् याइगु योगाम्बरया प्रतिनिधित्व यानातःगु नं खनेदु ।

खतु थुगु गोपुच्छाग्र चैत्यया पूर्वपाखेया बेदिकास छगू शिलाभिलेख अङ्कित यानातःगु दु । थुकिइ श्री ५ पृथ्वीवीरविक्रम शाहदेवया पर्यायस ने. सं. १०१४ वैशाखशुक्ल द्वितीया रोहिनी नक्षत्र शोभनयोग सोमबारखुनु थँहिति क्वाःबाहाःया वज्राचार्य जोगपालजुया संविधानत्वय् विधिवत् थुगु चैत्य जीर्णोद्धार प्रतिष्ठा याःगु खँ न्ह्यथनातल । थ्वया दानपति खः थँहिति कुसुं देओ लाछिस च्वंहा शिलाकार पशुं मुनि थः पूर्वज दिवंगत तापाःबाज्यापिनिगु संरुनाकथं शान्ति सुख प्राप्त जुइमा धइगु हेतुं जीर्णोद्धार याकूगु जुल । लिसे लिसे थुगु संवच्छल ल्वहँतय् गोपुच्छा गिरि चैत्य प्रस्थापन जूगु संक्षिप्त पूर्व इतिहास नं अङ्कित यानातइतःगु दु ।

थुगु चैत्ययात तिब्बतीतय्सं काश्यप तथागतयागु अस्थि धातु तथाः दय्कातःगु धकाः विश्वास यानावइच्चन । उकिं थुगु चैत्ययात इमिसं 'ह्वेसुङ्छोर्तेन्' धकाः धाइ ।

दक्षिण लङ्ग्या पःखालय् च्वंगु मूर्तितः—

- | | |
|----------------------|--|
| १. महाकाल | ८. मञ्जुश्री |
| २. धर्मचक्र लोकेश्वर | ९. बुंगमलोकेश्वर |
| ३. सुखावती लोकेश्वर | १०. भविष्यव्याकरण मुद्रा बुद्ध |
| ४. प्रज्ञापारमिता | ११. बुद्ध शाक्यमुनि |
| ५. सुखावती लोकेश्वर | १२. अमोघसिद्धि |
| ६. प्रज्ञापारमिता | १३. गणेश |
| ७. बुंगमलोकेश्वर | १४. हर्षवीर चित्रकारीया शालीक, उत्तरया पःखालय् |

[६८] पर्वस्थान (धर्मचक्र विहार)

मञ्जुश्री स्मृति चैत्यया थिक पूर्वपाखे वःचाहंगु दोमार छगू दु । थ्व हे पर्वस्थान नामं प्रसिद्ध जुयाच्चन । थन नं गोपुच्छाग्र चैत्यया चाकलय् थें संतुं छचाःख्यरं पःखालं चाःहुइकातःगु दु । क्रमशः थन न्हून्हूगु गुम्बात निर्माण जुजुं उगु पःखाः नं खने मदयावन । थन दुहांवनेत स्वपु लंपु खुलय् जुयाच्चंगु खनेदुः—

१. मञ्जुश्रीया न्होनेपाखे' थहांवनेगु पश्चिमया लँपु
२. गोपुच्छाग्र चैत्यया लिस्से' थहांवनेगु उत्तरया लँपु
३. नवचैत्य पाखे थहांवनेगु पूर्वया लँपु

थुगु थासय् वर्तमान निगू गुम्बा दु—पश्चिमपाखे धर्मचक्र गुम्बा, पूर्वपाखे न्यूनेह्लाखाङ्ग गुम्बा व अले थ्व निगू गुम्बाया दत्थुइ थ्व थाय्‌यागु पूर्व इतिहासयागु घटना लुमंकेगु वज्रधातु शैलीयागु पुलांगु चोबाहाः छगः प्रतिष्ठा यानातःगु दु । खास यानाः थुगु थासय् सप्तबुद्धपिनिगु अनुक्रमय् दकलय् लिपा श्रीस्वयम्भू महाचैत्य दर्शन याय्त बिज्याःह्य शाक्यमुनि बुद्ध बिज्यानाः स्वयम्भूया विषयय् कयाः मैत्रेय बोधिसत्व आदि १३५० भिक्षुपि मुंकाः धर्मचक्र प्रवर्तन यानाबिज्याःगु थाय् खः । थुगु थाय्‌यागु बारय् थथे उल्लेख यानातःगु दु^१ :—

अथ धीमान्महासत्वो मैत्रेय स जिनात्यजः ।
 भगवन्तं पुनर्नत्वा साञ्जलिरे वमव्रवीत् ॥
 भगवच्छ्रोतुपिच्छामि स्वयम्भूत्पत्ति सत्कथाम् ।
 तद्भूवान्समुपाख्यातु लोकानां संप्रबोधने ॥
 इति संप्रार्थिते तेन मैत्रेयेन सुधीमता ।
 भगवान्तान्समालोकान्संपश्यनेवमादिसत् ॥
 साधु मैत्रेय सर्वेऽपि सभालोकाः समादरात् ॥
 शृणुध्वं संप्रवक्षामि स्वयम्भूत्पत्ति सत्कथाम् ॥

गुगु थासय् च्वनाः भगवान् बुद्धं स्वयम्भूया विषयय् कयाः धर्म व्याख्यान यानाबिज्यात व हे थासय् थुगु चैत्य स्थापना यानाः आदर सत्कार यानातःगु जुल । थुगु चैत्यय् दुने भगवान् बुद्धं धर्मचक्र प्रवर्तन याय्त आसन यानाबिज्याःगु सिंहासन गर्भय् तयातःगु धाइ । उकिं थुगु चैत्ययात शारीरिक चैत्य, धर्म चैत्य, उद्देश्य चैत्य मधासे परिभोग चैत्यया रूपय् गणना यानातल ।

थ्व हे परम्पराकथं लोकजनपिसं थुगुयात धर्मचक्र पर्वतस्थान धकाः नं धयावयाच्वन । थ्व हे आदर्शयात ध्यान तयाः स्वयम्भू महाचैत्य दर्शन निम्ति सुदूर उत्तरापन्थ खामंनिसें दण्डवत प्रणाम यायां ह्यधु दादां स्वयम्भूइ थ्यंकः बिज्याःह्य क्यान्छ्या लामाजु बिज्याःबलय् नं थ्व हे थासय् च्वनाः धर्म व्याख्यान यानाबिज्यात । फलस्वरूप उबलसंनिसें काठमाण्डू उपत्यकाय् तिब्बती महायान धर्म ह्लियाह्लियं विकास जुजुं वल । थुगु थासय् वसपोल क्यान्छ्या लामाजुं बाःछि नीन्हुतक धर्म व्याख्यान यानाबिज्यात । थुगु व्याख्यान कार्यय् दानपति जूह्य स्वयम्भू जीर्णोद्धार कार्यय् अग्रसर जुयादिइह्य धर्मां साहुजुं बाखं न्यवक्व श्रोतागणपित ह्लि ह्लि जलपानयागु नं व्यवस्था यानादिइगु दु । थुगु धर्मोपदेशं

प्रभावित जुयाः बाखं न्यंवयाच्चंपि श्रोतावर्गपिनिगु संख्या ह्नि ह्नि १८०० किंच्यासः दुः । क्यान्छ्या लामाजुयां लिपा नेपालय् थेरवादी शासन दुहांवसेंलि हानं थ्व हे थासय् च्वनाः अमृतानन्द भन्तेनं लच्छियंकं धर्मोपदेश यानाबिज्यात । उवलसंनिसें लंका वर्मापाखेयागु थेरवादी शासन नं प्रचार जुजुं वयाच्चन । अनंलि हानं थुगु थासय् च्वनाः रिमुचि धुव्थो लामाजुं सहस्र भुजलोकेश्वर करुणामययागु व्रतधर्म (न्यूने) प्रचार यानावंच्वन । थुकियागु पुण्यानुभावं थ्व हे थासय् भव्य रूप थुगुजेछेन् छ्वेलिङ्ग गुम्बा (न्यूनेल्लाखाङ्ग) तयार जूगु जुल धाःसां अत्युक्ति जुइ मखु ।

[६६] छ्वेकीखोर्लो गुम्बा (धर्मचक्र विहार)

पर्वस्थानया चाकलय् पूर्व अभिमुख यानाः दय्कातःगु छगू तला जक दुगु गुम्बा खः । तर थ्वया लिउनेपाखे स्वयंबलय् निगू तला यानातःगु खनेदु । थ्व गुम्बा श्याफर धइगु थासय् च्वंहा शेराव्दोर्जे धयाहा लामाजुं दय्कूगु जुयाः गुलिसिनं श्याफर गुम्बा धकाः नं धयाच्चन । तर खास यानाः थुगु गुम्बाया नां छ्वेकीखोर्लो गुम्बा (धर्मचक्र विहार) धकाः धाइ । कारण शाक्यमुनि बुद्ध श्रीस्वयम्भू महाचैत्य दर्शनार्थं बिज्याःबलय् थन च्वनाः स्वयम्भू उत्पत्ति व थुकियागु महत्वया विषयय् कयाः धर्म व्याख्यान याःगु थासय् थुगु गुम्बा निर्माण याःगु जूया निम्ति 'धर्मचक्र विहार' धकाः नामकरण याःगु जुल । उकिं थुगु गुम्बाया प्रमुख देवता नं शाक्यमुनि बुद्ध लुं सियाः सिजःपाताया मूर्ति तयाः शोभा वृद्धि यानाबिल । थ्वया जःखः मञ्जुश्री व पद्मसम्भवया मूर्ति तयातल । थुगु मूर्तित दय्कूहा कलाकार यल थैनात्वाःया कुवेरसिं शाक्यजु खः ।

थुगु गुम्बा निर्माणया लागी आवश्यक सहयोग प्रदान याःपि निम्नलिखित श्रद्धालु महानुभाव-पिनिगु नां न्ह्यथनातल :—

(१) साहु कुलबहादुर मानन्धर (२) ज्ञान नायकी (३) सु. गङ्गाप्रसाद (४) साहु बोधिरत्न तुलाधर (५) कम्पनी साहु तुलाधर (६) सर्दार कृष्णलाल चित्रकार (७) साहु भाजुरत्न कंसकार, इत्यादि ।

थुगु गुम्बाय् अङ्कित भित्तीचित्र निम्नप्रकारं च्वयातःगु खनेदु :—

पूर्व — ह्याव्श्रेसुम् (मञ्जुश्री, वज्रपाणि, अवलोकितेश्वर) या प्रतिनिधि यानाच्चंपि स्वहा प्रसिद्ध लामा गुरुपि ।

अनागत आर्य मैत्रेय ।

शिथोया क्रोधगण—छेछोहेरुक, बुद्धहेरुक, वज्रहेरुक, रत्नहेरुक, पद्महेरुक, कर्महेरुक व विभिन्न शिर्षाकृति सम्बरगण इत्यादि ।

१- थ्व खँ जितः थुगु व्याख्यानय् दोभाषी जुयाबिज्याःहा यलया पं० बुद्धिराज शाक्यजुं कनाबिज्याःगु खः ।

शिथोया शान्तगण—समन्तभद्र तथागत, महावैरोचन, महाअक्षोभ्य, महारत्नसम्भव, महाअमिताभ, महाअमोघसिद्धि व अन्य षट्मुनि, इत्यादि ।

दक्षिण - गुरु पद्मसम्भव, गुरु धोल (पद्मसम्भवया क्रोध मूर्ति) सिंहमुख, पेल्छेन च्याहा, वज्रसत्त्व, नारोपा, तिलीपा, दनाच्वंहा षडक्षरी लोकेश्वर, डमरु ज्वनाच्वंहा जोगिनी, एकजटी, राहुल ।

पश्चिम - शाक्यमुनि बुद्ध, मैत्रेय, पद्मसम्भव, मञ्जुश्री, आर्यतारा । छेलानाम्सुम् - अपरिमिता, सप्तलोचनी तारा, उष्णीष विजय ।

उत्तर - ख्येन्लाव् छ्वेसुम् - गुरु पद्मसम्भव, थिसुङ् देहुचेन्, आचार्य ? । अपरिमिता तथागत । शाक्यमुनि बुद्ध व वसपोलया प्रमुख शासनधर फिखुहा महास्थवीरगण । ह्याश्याङ्, ह्यामोछेरिङ् चेङ्ङा, घेनिङ् धर्मताला ।

उर्द्धभाग - च्येन्रेशि दुङाल् हाँधल (सर्वदुर्गतिसुविमुक्त करुणा मण्डल) पञ्चत्रिंश तथागतया विभिन्न चित्र ।


गुम्बाया प्रवेशद्वारया जःखः च्वंप्पि - अपरिमिता, सप्तलोचनी, उष्णीष विजय । चतुर्महाराज । छेरिङ्धु, सोग्पो ताग्थि, थुम्बाप्युङ्सि ।

थुगु गुम्बाया संस्थापकजु शेराव्दोर्जे लामाजु थःगु कालगति परलोक जुयावसेलि थुक्कियागु संरक्षण व पूर्ण व्यवस्थाया लागी रिमुचि धुव्थो लामाजु च्वनाः थःगु परम्पराकथं थुगु गुम्बाय् च्वनाः बांलाक धर्म चल्य् यानाच्वन । खास यानाः थ्वसपोल धुव्थो लामाजुं महाकारुणिक सहस्रभुज-लोकेश्वरयागु न्युनेब्रत चल्य् यानाच्वंगु जुल । थुगु न्युनेब्रतप्रति श्रद्धा भक्ति तयाः न्युनेब्रत च्वंवइप्पि उपासक उपासिकापिनिगु संख्या वृद्धि जुजुं थुगु गुम्बाय् नं मन्ह्यनाः पिनेच्वंगु चैत्यया छ्चालं चाःहुइकाः च्वनेमाःगु अवस्था तकं जुल । थथे स्थानाभाव जूगु महशूस यासे वसपोल लामाजुं द्वितीय धर्मचक्र गुम्बा दय्केगु प्रणिधान यानाविज्यात । फलस्वरूप थुगु गुम्बाया न्ह्योनेसं धर्मचक्र गुम्बा स्वयाः नं ज्याछिक् बांलाक भव्य रूपं स्वंगू तला यानाः न्युनेल्लाखाङ् धइगु गुम्बा दय्काविज्यात ।

[७०] पर्वस्थानया नवचैत्य

धर्मचक्र गुम्बाया पिनेसं नवनिर्मित न्युनेल्लाखाङ्गया क्वस्सं गुंगः चीवाहाः दय्कातःगु दु । थुगु गुंगः चीवाहाःया दत्थुइ च्वंगु केन्द्रवर्ति चैत्ययात स्थानीय शिलालेखय् दुर्गतिपरिशोधन चैत्य धकाः नाम उल्लेख यानातल । थ्व चैत्य श्री ५ राजेन्द्रविक्रम शाहदेवमा पर्याय ने. सं. १४३ सालं दिवङ्गत पितृगण सकल उद्धार जुइमा धइगु कामना यासे थुगु शुद्धभूमिस न्यत यंकुरिवाहाःया रत्नसिं तुलाधरं स्थापना यानाथकूगु जुल ।

श्रीस्वयम्भू महाचैत्य



शालीपुत्र भिक्षु

थुगु केन्द्रवर्ति चैत्यया छ्चालं च्वंगु मेमेगु चीवाहाःत नं अथे हे दिवङ्गत आत्माप्रति शान्ति कामना यासे छ्हा छ्हा दानपतिपिसं छ्गः छ्गः चैत्य तयाथकूगु खनेदु, गुकिइ मध्यय् साधारण व्यक्ति-पिनिगु जक चैत्य मजुसे श्रीस्वयम्भू महाचैत्य दर्शन निम्ति खाम देसंनिसे दण्डवत यायां नेपाः विज्याःह्य बोधिसत्वया अंश दुह्य निर्माया योगी श्रीमान् क्यान्छ्या लामाजुयागु स्मृति चैत्य नं थुकिइ दुथ्याःगु दु । अथे हे नागि पर्वतय् च्वनाः आपालं धर्म यानाच्चंहा काश्मिर याह्य लामाजु स्वेनामृतिङ्-जिन्यागु नामं दय्कातःगु चैत्य नं थुकिइ मदुगु मखु । अथे हे नेपालय् विज्यानाः महायान बौद्धधर्म प्रचार यानाविज्याःपि पेमाकुन्साङ्ग छ्वेईन् (जटावाल लामाजु) व शाक्यश्री गुरुया शिष्य पाता लामाजु अले स्वयम्भू जीर्णोद्धार कार्यय् अग्रसर जुयादिइह्य धमां साहुजुपिनिगु स्मृति चैत्य तक नं थुकिइ लानाच्चंगु दु । थुपि व्याक्व चैत्यत सर्वदुर्गति परिशोधन निम्ति प्रतिष्ठा यानातइतःगु जुल ।

[७१] धार्मिक अवशेषतय्गु संग्रह कथा

पर्वस्थान पाखे न्ह्योने वढ्य जुयावनेबलय् चीवाहाःतय्गु छ्गू पंक्तिबद्ध खनेदइ । थन हे माथुलिइ अलग उत्तर अभिमुख यानाः दय्कातःगु बःचाह्लंगु क्वथा छ्गू दु । थ्व छुं सतः फतः क्वतः अथवा मथ, मन्दिर नं मखु । अथे नं वन्दनीय स्थान रूपय् मानय् यानातःगु दु । थन दुने स्वयम्भू एरियाय् च्वंगु अनेक धार्मिक अवशेष मूर्ति, तन्त्र, चित्रतय्गु छ्गू संग्रह थे खः । संग्रह धकाः खास उल्लेखनीय संग्रहालय नं मखु ।

थुगु थाय् दय्कूगुया मुख्य उद्देश्य थ्व खः—स्वयम्भू पर्वस्थान, मञ्जुश्री पर्वस्थान, गोपुच्छ पर्वस्थानयागु गुलि नं विनष्ट जुयाः स्यना—सिनाच्चंगु अंगभंग जुवाच्चंगु उख्येथुख्ये वांछ्वयातःगु मूर्तितय्गु अवशेष, मन्त्र युक्त पताका धार्चो कण्डा ब्वय्कातःगु उकियागु टुक्रा—टाक्रि, अपूर्ण जुवाच्चंगु चोपो मदयाच्चंगु अभिलेखत न्ह्याः हाचांगायाः थ्वानाः अनादर याना जुइ अथवा अपवित्रस्थानय् लाइ, गुकि यानाः पाप लाइ, दुर्गतिइ वनी धइगु पाखे बचय् याय्त ।

थुलि जक मखु गुलिसिनं आयुसाधन यानाः, तारापूजा यानाः, दशा फाय्केगु आदि ग्रहमण्डल पूजा यानाः अथवा पुण्य प्राप्ति निम्ति अनेक मूर्तित थानाः लक्ष चैत्यव्रत दनाः लुचिद्यः थानागु आदि सुरक्षित निम्ति आदर सत्कार यानातय्त थन दुने स्वथने हइपि नं मदुगु मखु ।

थुगुकथं सुरक्षित याय्गु चलन केवल धार्मिक दृष्टिकोणं जक मखु पुरातात्विक दृष्टिकथं नं उत्तिकं महत्वपूर्ण जू धइगु विवेकं खंकाः थुगु थाय् दय्कातःगु जुल ।

थुगु थाय्या लुखाया जःखः महत्वपूर्ण कलात्मक प्राचीन मूर्ति द्वारपालया रूपय् तयातःगु दु । थुपि खः अग्रश्रावक शालिपुत्र व मौङ्गल्यायन भिक्षुपि । थुमिसं कारण्डव्यूह लोकेश्वर प्रतिमा अंकित शिलांकुश व पिण्डपात्र धारण यानाच्चंगु खनेदु । थुगुकथं शिलांकुश धारण याय्गु चलन थेरवादी

(हीनयाने) खनेमदु, गुलि दु महायान जगत्य् जक । थ्व शिलांकुशय् अनेक सारभूत ज्ञान सुलाच्वंगु दु, लिसेलिसे उपसम्पदालाभि भिक्षुपिसं पालन याय्माःगु सिइके माःगु सूत्र, विनय, अभिधर्म आदिया ज्ञान सारांश रूप्य् थुकिइ समावेश यानाः तइतःगु दु धाइ । थुगु शिलांकुशयात मेगु शब्दय् खिखिलिका धकाः नं धयातःगु दु^१ :—

समन्वाहरतु आर्य संघा अहमित्थं नामा

आर्यसंघानध्येषयामि इमां खिखिलिकामधि तिष्ठन्तु ।

[७२] मैत्रि गुम्बा (सुमति मैत्रिशसन विहार)

थुगु गुम्बा स्वयम्भूया लिउने च्वंगु मोटर पार्कया क्वस्सं दक्षिण अभिमुख यानाः निगू तला यानाः दय्कातःगु जुल । थ्व गुम्बाया संस्थापकजु खः असं धालासिकोया श्रद्धालु साहु बोधिचित्तरत्न तुलाधर । थ्वय्कः श्रद्धालु दानपति केवल गुम्बा जक दय्काः धर्मकीर्ति तयाथकूगु मखु कि गुम्बा प्रतिष्ठापनया ल्यू ल्यू थ्व नं बिचाः याःगु दु—

वर्तमान नेपाःयागु बुद्धधर्मय् शाक्य, वज्राचार्यपि खालि गृहस्थी जक जूगुलि वास्तव्य बुद्ध धर्मय् गुलि उन्नति व विकास जुइमाःगु खः उलि जुइ मफुत, उकिइसं बुद्धधर्म अध्ययन व साधन चर्यापाखे ह्लियाह्लिथं लोप जुजुं वनाच्वंगु महशूस यासे विशुद्ध रूपं बुद्धशासन सेवा याय्गु उद्देश्य तयाः महान् शुभ संकल्प व प्रणिधान यासे थुगु गुम्बा दय्कूगु जुल । थ्व हे पवित्र उद्देश्यपाखे ध्यान आकर्षित यासे ह्लासाया प्रसिद्ध धेपुङ्ग गुम्बाया संघनायक नाप सरसह्ला यानाः थुगु गुम्बा निर्माण याःगु जुयाच्वन । अले वसपोल संघनायकजुं थुगु मैत्री गुम्बायागु पूर्णरूपेण शिक्षा-दीक्षा व्यवस्थाया लागी धेपुङ्ग गुम्बाया सुयोग्य विद्वान् च्योङ्ला रिम्पाछे छह्ला नं नियुक्त यानाहःगु दु । लिस्सें नेपालं वनाच्वंपि ह्लासा देसय् च्वनाः भिक्षु जुयाच्वंपि न्याह्य भिक्षुपित वय्कः दानपतिजुं आवश्यक व्यवस्था मिलय् याय्गु यानाः निमन्त्रणा छ्वःगु जुल । उगु निमन्त्रणायात सहर्ष स्वीकार यासे मैत्रि गुम्बायात माःगु तक धर्मग्रन्थ, पूजा सामग्री, मूर्ति, पौभाः एवं उपसम्पदा जुइत माःगु सम्पूर्ण सांघिक उपकरण वस्तुत समेत थःगु साथय् ज्वनाः भिक्षु सुमतिशीलजुया नेतृत्वय् न्याह्य भिक्षुपि नेपाः थ्यंकः बिज्यात ।

(१) ज्ञानमानसि तुलाधर	भिक्षु सुमतिशील	धेपुङ्ग गुम्बां बिज्याःह्य
(२) महाचन्द्र शाक्य	भिक्षु महाचन्द्र	छेचोलिङ्ग गुम्बां बिज्याःह्य
(३) देवकुलसि तुलाधर	भिक्षु सुमतिशासन	गण्डे गुम्बां बिज्याःह्य
(४) मुनिभद्र	भिक्षु मुनिभद्र	खतो नेना गुम्बां बिज्याःह्य
(५) न्हुछे शाक्य	भिक्षु मुनिशासन	फुपुचोया गुम्बां बिज्याःह्य

श्वसपोलपि नेपाः थ्यँसेलि सर्वप्रथम किण्डोल विहारय् वासस्थान वियाः तइतल । थन गुलिखे समय तक वसपोलपि च्वनाः थःगु नियमानुसारं धर्म यांनाः दिन हनाच्वन । किण्डोल विहारय् सदांया लागी वसपोलपित च्वनेत स्थानं अनुकूल मिलय् मजुयाः गन गुथाय् तय्गु धइगु विषय कयाः साहु श्रीकुलरत्न धाखाः, सुब्बा श्रीविहारीलाल श्रेष्ठ अले दानपति श्रीबोधिचित्तरत्न साहु व ह्लासां बिज्याःपि न्याहा भिक्षुपि समेत च्वनाः सभां अन्तय् मञ्जुश्री पर्वस्थानया क्वस्सं गुम्बा दय्केगु निर्णय यात । उगु निर्णयानुसारं साहु बोधिचित्तरत्नजुं आवश्यक सम्पूर्ण खर्च हनाः गुम्बा तयार यांनाविया-दिल । विधिवत थःत माःकथं माःगु किसिमं गुम्बा खडा जुसेलि थुगु गुम्बाय् न्याहा जक भिक्षुपि दयाः नं मगाःगु जूया निम्ति पुनर्व्यवस्थाया लागी हानं न्याहा भिक्षुपि वृद्धि याःगु जुल—

- | | |
|-------------------------|-------------------------|
| (१) विहारीलाल सुब्बा | भिक्षु बुद्धसागर |
| (२) शुभराज शाक्य | भिक्षु मञ्जुशासन |
| (३) गजेन्द्रानन्द शाक्य | भिक्षु वागेन्द्रवज्र |
| (४) केशरत्न तुलाधर | भिक्षु सुमति धर्मवृद्धि |
| (५) संघमित्र शाक्य | भिक्षु सुमति संघ |

थुगु गुम्बा दय्के धुसेलि गुलिखे समय तक भिक्षु सुमतिशीलयागु निर्देशनकथं चल्य जुवाच्वन ।

सँदेसय् गुगु राजनैतिक क्रान्ति जुल, सांस्कृतिक परिवर्तन जुल, थुकि यांनाः परम श्रद्धेय दलाई लामाजु नं थःगु जन्मभूमि ह्लासा देसयात तोताः भारतय् वयाः च्वनेमाःगु परिस्थिति जुल । थ्व हे कारणं कय्यन् तिब्बतीत भारत व नेपालय् वयाः शरण काय्माल । उवलय् सँदेसया ततःधंपि विद्वान्, आचार्य, लामा, भिक्षु धाःपि नं छितरबितर जुल । थ्व हे सन्दर्भय् ह्लासा गण्डे गुम्बाया मूलाचार्य श्रीशेकुधोर्जेछ्याङ लामाजु नं नेपाः वयाः थ्व हे मैत्रि गुम्बाय् स्थायी रूपं च्वनेगु यात । लिपा श्वसपोलया शिष्यपि तिब्बती भिक्षुतय्गु संख्या वृद्धि जुजुं वल ।

थुगु मैत्रि गुम्बाया मूलदेवता अनागत बुद्ध आर्यमैत्रेय मैत्रि गुम्बाया संस्थापकजुं तयादिइगु मखु । थुकिया लागी अलग दानपति जुयादिइहा खः केलटोल तःधंलिवि भन्साः छेँस च्वंहा लानिमाया कंसकारनी जुल । थ्वय्कः साहुनीया सद्धर्मचित्त उत्पत्ति जुयाः व दिवंगत ससःअबुजु लक्ष्मीकृष्ण थः धर्मस्वामि लक्ष्मीवीरसिंह (लामा साहु) या नामं दिवंगत आत्माप्रति शान्ति कामना यासे सुवर्ण लेपित धातुया ह्यकु हाकःहा प्रलम्बपादासनय् च्वनाः धर्मचक्र प्रवर्तन यांनाच्वंहा अनागत बुद्ध आर्यमैत्रेययागु भव्य रूप शान्त गम्भीर मूर्ति ने. सं. १०७५ कार्तिकशुक्ल अष्टमीया दिनय् प्रतिष्ठापन याःगु जुल । थुगु मूर्ति दय्कूहा कलाकार यल महाबुद्धया मानज्योति शाक्यजु खः ।

थुगु गुम्बा तयार जुसेलि छु मूर्ति स्थापना याय् गुगु मूर्ति स्थापना याय् धइगु विषयय् कयाः आपालं विचार विमर्श जूगु दु । अन्तय् थ्व हे निर्णय जुल कि गोपुच्छ पर्वतय् च्वनाः शाक्यमुनि बुद्ध आर्यमैत्रेय बोधिसत्व प्रभृति सभालोकपित स्वयम्भूया विषयय् कयाः धर्मव्याख्यान यांनाबिज्याःगु पवित्र ऐतिहासिक स्थानयागु महत्वप्रति ध्यान आकर्षित यांनाः पर्वस्थानय् च्वंगु धर्मचक्र विहारया क्वस्सं थुगु

मैत्रेय बुद्धया मूर्ति स्थापना याय्गु यानाः मैत्रि गुम्बा दय्कूगु जुल । मेगु अर्थय् मैत्रेय बोधिसत्वया विषयय् थथे नं धयातःगु दु—शाक्यमुनि बुद्धयागु शासनं लिपा पञ्चकाम विषयय् भुल्य् जुयाः तन्ता अलमल्य् जक लानाः सद्धर्म ह्यमसियाः पञ्चकषाय दोष अधिक जूगुलि शून्यकल्प अन्धकल्प थें जुयावनाः लोकजनपिसं 'नमो बुद्धाय, नमो धर्माय, नमो संघाय' तकं धाय् मफयावनिइगु समयय् कलिकालय् मनुष्यतय्गु परमायु च्यादँ जक जुइबल्य् हानं जगत् हितार्थं निम्ति सद्धर्म बोधिज्ञान प्रचार याय्त तुषिता भुवनं वसपोल मैत्रेय बोधिसत्व थ्व लोकय् अवतार विज्यानाः नागवृक्ष (ताय्गःसिमा) या क्वस्सं च्वनाः अनुत्तर सम्यक् सम्बोधिज्ञान प्राप्त यानाः जगत् उद्धार यानाविज्याइ धइगु अर्थय् नं भविष्य युगया लागी आशा भरोशा यानाः थुगु गुम्बाय् मैत्रेय बोधिसत्वया मूर्ति प्रतिष्ठा याःगु जुल । वसपोल मैत्रेय बोधिसत्वयागु विषयय् थथे धयातःगु दु :—

जातिं विप्रस्यवंशे नृपवर महिते
केतुमत्यां गृहित्वा ।
बुद्धत्वं यः करीष्यत्यमितगुणनिधि
नागवृक्षस्य मूले ।
अष्टाद्वायुतं निक्षिपति भगवतो
भावि यस्याग्रमायुः ।
वन्दे मैत्रेयनाथं तुषितपुरवरा
वस्थितं तं मुनीन्द्रम् ।

थुगु मैत्रेय बोधिसत्वया जःखः निम्नलिखित मूर्ति निम्नलिखित दातापिसं तयाथकूगु जुल :—

- (१) धातुया सुवर्ण लेपित अक्षोभ्य तथागत—थ्वया दानपति मैत्रि गुम्बाया संस्थापक ।
- (२) धातुया सुवर्ण लेपित सुमति सिद्धिकीर्ति (लामा चोङखापा), थ्वया जःखः वसपोलया शिष्यपि ग्याछ्याव्जे, ख्येधुव्जे । थुकिया दानपति भिक्षु सुमतिशासन ।
- (३) सप्तलोचनी तारा—थ्वया दानपति भिक्षु वागेन्द्रवज्र ।
- (४) महाकारुणिक अवलोकितेश्वर
- (५) आर्यतारा
- (६) महीषसम्बर

[७३] आनन्द कुटी (श्रीलङ्काचैत्य विहार)

थुगु थाय् मञ्जुश्री पर्वस्थानया लिउनेपाखे पश्चिम उत्तरया विचय् लानाच्चंगु छगू रमणीय स्थल खः । थन मनूतय्गु उस्त आवागमन मदुगु एकान्तगु जङ्गलया दत्थुइ लानाच्चंगु जूया निम्ति

शान्त वातावरणगु थाय् जुयाः आनन्द कुटी धइगु नामकरण यांनाः साधारण किसिमगु बङ्गला छाँतगु मन्दिर दय्काः उकिइ भूमिस्पर्श मुद्रा भगवान् बुद्ध स्थापना यांनातःगु जुल । थ्व मन्दिरया अभिमुख उत्तरपाखे स्वकाः तइतःगु दु । थन दुने दर्शनीय चतुमहापुण्य क्षेत्र (लुम्बिनी, बुद्धगया, सारनाथ एवं कुशीनगर) यागु दृश्य चित्रण यांनाः भित्ती चित्र अङ्कित यांनातल । थ्व थाय् खास यांनाः महायान वज्रयान प्रधान नेपाल देसय् ह्लापालाक थेरवादी शासन (हीनयान) या भन्तेपि दुहांबिज्यानाःलि थेरवादी शासनया जग स्वंगु धाःसां अत्युक्ति जुइमखु । प्रसङ्गवश थ्व थाय्यागु संक्षिप्त परिचय प्रस्तुत यांनाच्वना^१ —

भिक्षु धर्मालोक स्थवीरं श्रीस्वयम्भू महाचैत्यया पश्चिम खण्डया गःचाकलय् आनन्द कुटी दय्केगु शुभ संकल्प यासे ने. सं. १०६२ आषाढ पुह्लीखुनुनिसे प्रारम्भ याःगु जुल । ने. सं. १०६३ चित्लाथ्वः तृतीयाखुनु महास्थवीर चन्द्रमणि भन्ते नेपाः विज्यानाः आनन्द कुटी निरीक्षण याः विज्यात । थ्व थासय् भगवान् बुद्धयागु मूर्ति मदुगु महशूस यासे वसपोल चन्द्रमणि भन्तेन ने. सं. १०६४ कछला थ्वः १५ स बर्मायाह्य दुरुल्वहंया बुद्ध मूर्ति काठमाण्डूस थ्यंकेहल । स्वयम्भू आनन्द कुटी थे जाःगु थासय् नेपालय् थेरवादी शासन निम्ति उपयुक्तगु स्थान दय्कल धइगु शुभ समाचार सियाःलि लङ्का अनुराधपुरय् च्वंहा उपासिका श्रीमती हरमानि सनोनायात लङ्काया सुवर्णमाली चैत्य जीर्णोद्धार याःबलय् प्राप्त जुयाच्वंगु सर्वज्ञ तथागतयागु अस्थिधातु ज्वनाः नापं श्रीलङ्का कोलम्बो सहरया बजिरा-रामविहारय् विज्यानाच्वंह्य पुज्य नारदथेरा व नेपाःयाह्य भिक्षु अमृतानन्द सहित शिष्टमण्डल ने. सं. १०६६ चउलाथ्वः १५ स नेपाः थ्यंकःवल । थ्व हे सालं अक्षयतृतीयाखुनु भगवान् बुद्ध आश्रमय् विज्याकाः उद्घाटन जुल । अले स्वांयापुह्लीखुनु लङ्काचैत्य दय्केत जग स्वनाविज्यात । हानं ने. सं. १०६६ चउलागाः ३० स द्वितीयवार नारदथेरा नेपाः विज्यानाः बछलाथ्वः १४ स भिक्षु संघया उपोषधकर्म खंकेगु सिमा पिइत जग स्वन, लिसेलिसें स्वांयापुह्लीखुनु चैत्यया दुने गर्भय् सर्वज्ञ बुद्धया अस्थिधातु स्वथनाः श्रीलङ्का चैत्य नामं प्रतिष्ठा व समारोहपूर्वक उद्घाटन नं जुल । थुखुनुया ह्लिनसिया प्रहरय् लङ्का अनुराधं हयाविज्याःगु बोधिवृक्ष सिमा पिनाविज्यात, थुगु शुभ उपलक्षय् बहनिनिसे चच्छि तं नियमानुसार महापरित्राण पाठ याकाःलि आनन्द कुटीयात 'श्रीलङ्काचैत्य विहार' नामं नामकरण यांनाः दानशाला सहित प्रतिष्ठा कर्म सुसम्पन्न याःगु जुल । थुगु कार्यया मूल व्यवस्थापक स्थवीर धर्मालोक भिक्षुजु जुल ।

[७४] बोधिवृक्ष सिमा

थ्व बोधिवृक्ष सिमा आनन्द कुटी श्रीलङ्काचैत्यया न्ह्योनेसं उत्तरपाखे च्वंगु त्वाथलं क्वहांवनेवं

चौताराय् पिनातःगु खः । थ्व बोधिवृक्षया पुसा लङ्काया अनुराधपुरनिसें बांलाक बिचाः यानाहयाः
ने. सं. १०६६ साल स्वांयापुह्लीखुनु पुज्य महास्थवीर नारदथेराजुं पिनाथकूगु जुल ।

खतु थ्व बोधिवृक्षयागु मूल हांगा भगवान् बुद्धं गन च्वनाः बुद्धत्व प्राप्त यानाबिज्याःगु खः
उगु थासय् च्वंगु धकाः परम्परागत संसारं मानय् यानातःगु दु । थल्लिइ नीस्वसःदँ न्ह्यो भारताधिपति
सम्राट् अशोकया काय् महीन्द महास्थवीर व म्हाय् संघमित्रां बुद्धधर्म प्रचारया लागी श्रीलङ्काय्
यंकाः पिनाथकूगु गुगु बुद्धगयायागु बोधिवृक्ष सिमा खः उकियागु हे शाखा प्रशाखाया रूपय् श्रद्धाभक्ति
तयाः मानय् यानावइच्चंगु जुल ।

थौं अन्तरराष्ट्र बौद्धजगतय् बुद्धगया मन्दिरयागु गुलि प्रतिष्ठा दु महत्व दु व स्वयाः नं अप्पो
बोधिवृक्ष सिमायागु स्थान उच्च जुयाच्चन । कारण गुगु बोधिवृक्ष सिमाया मूलय् च्वनाः उकियागु हे
छत्रछायाय् च्वनाः बोधिज्ञान प्राप्त यानाःलि सर्वार्थसिद्ध राजकुमारं अनुत्तर सम्यक् संबुद्ध धाय्कल ।
उकिं थौं समस्त बुद्ध धर्मावलम्बीतय्सं बोधिवृक्ष सिमायात सिमा जक भाःमप्युसे साक्षात् बुद्धबोधि
आविर्भूत जूगु स्थान भाःपाः श्रद्धाभक्ति तयाः पूजा सत्कार यानावइच्चंगु खनेदु । थ्व हे कारणं
महाकवि अश्वघोषं बोधिवृक्ष सिमायात थथे प्रशंसा यानातःगु दु^१—

क्षमा हे वया जटा खः ।

धैर्य हे वया मूल हा खः ।

चरित्र हे वया स्वां खः ।

स्मृति व बुद्धि हे वयागु कचा खः ।

सद्धर्म हे वयागु फल खः ।

थुजाःगु ज्ञानवृक्ष बोधिवृक्षयात सुनानं स्यंके मज्जू, अनास्था याय् मज्जू । अज्ज समन्तभद्र
बोधिसत्त्वं नं बोधिवृक्षयागु महत्वप्रति श्रद्धां प्रेरित जुयाः थथे आशिका प्रणिधान यानाबिज्याःगु दु—

क्षिप्र स गच्छति बोधिद्रुमेन्द्र

गत्व निषीदति सत्त्व हिताय ।

बुद्धिय बोधि प्रवर्तयचक्रं

धर्षय मार स सैन्यकुसर्वम् ॥

सत्त्वहितार्थं निमित्त याकनं हे विस्तार मज्जुइक बोधिवृक्ष सिमाया क्वय् च्वनाः थःगु बुद्धिया
वलं बोधिज्ञान प्राप्त यानाः धर्मचक्र प्रवर्तन यानाः सम्पूर्ण मारसैन्ययात दमन याय् फय्मा । थ्व हे
बोधिवृक्षयागु महत्वप्रति श्रद्धा तसे गुलि बौद्धाचार्यपिसं थथे स्तोत्र यानावइच्चंगु खनेदु—

मूले बुद्ध त्वचि धर्म शाखा संघ स्तथैवच ।

पत्रेपत्रे देवपुत्रं द्रुमराजं नमाम्यहम् ॥

[७५] श्रीलङ्काचैत्य

थुगु चैत्य आनन्द कुटीस च्वंहा भगवान् बुद्धया जःपाखे प्रतिष्ठा यानातःगु दु । थुगु चैत्य नेपाःयागु गुलि नं चैत्य व स्तूपत दइच्चन उगु चैत्य व स्तूप नाप छुकिइसं मिलय् मजू । थुकिइ बुद्ध, बोधिसत्व व तारायागु मूर्तित गनं अंकित जुयाच्चंगु मदु, अज्ज धात्थे धाय् धाःसा दिव्य भावनाया प्रतीकत नं छुं खनेमदु । त्रयोदश भुवनाकृति नं खनेमदु । केवल सुच्चुक पिच्चुक दय्काः तुइसे च्वंक सख्वालं पानाः श्वेतचैत्यया रूपय् प्रतिष्ठा यानातःगु जुल । थुगु दिजाइन लङ्का अनुराधपुरयागु अनुकरण खः । श्व हे कारणं थुकियात 'श्रीलङ्काचैत्य' नामं सम्बोधन यानावइच्चंगु जुल ।

थुकिइ दुने लङ्काया सुवर्णमाली चैत्य जीर्णोद्धार याःबलय् प्राप्त जूगु सर्वज्ञ तथागतयागु अस्थिधातु लंका अनुराधपुर निवासी उपासिका श्रीमती हरमानि सनोनां हयाःलि थुगु चैत्यया गर्भय् दुने तयाव्यूगु दु । तर थुगु अस्थिधातु सदांया लागी लिकाय् मजिइक तयात गु मखु । थःपित मालिइगु इलय् लिकयाः दर्शन व स्पर्शन याय्छिक सेफय् दुने धनरत्न स्वथने थे यानाः सुरक्षित यानाः तइतःगु खः । श्व अस्थिधातु लिकयाः प्यदँय् छकः छकः बुद्धजयन्ती स्वांयापुह्नीखुनु सार्वजनिकयात दर्शन बियाःलि नगर परिक्रमा यानाः अस्थिधातु जात्रा याय्गु यानावइच्चंगु दु । नगर परिक्रमा सिधलकि उगु श्रीलङ्काचैत्यया दुनेसंतुं आदरपूर्वक सुरक्षित यानाः तइतःगु जुयाच्चन । श्व चैत्यया न्ह्योने तःखा खापा खने थे यानाः त्वहंफा लिकयाः दुने ताः खनाः चैत्यया गर्भय् दुने थ्यंक स्वथने ज्याछिक दय्कातःगु दु ।

श्व नेपाःयागु बुद्ध धर्मय् थेरवादी शासन दुहांवसेलि चलय् जूगु छगू न्हूगु थिति धाःसां ज्यू ।

[७६] आनन्द कुटी विद्यापीठ

स्वयम्भू मञ्जुश्री पर्वस्थानया लिउनेपाखे दय्कातःगु आनन्द कुटी विद्यापीठ खः । थुगु विद्यापीठ संस्थापन जूगुया मुख्य उद्देश्य श्व हे खः कि थन अध्ययन याःवइपि विद्यार्थी छात्रछात्रा-पित बौद्ध नैतिकता अनुसार इमिगु आचरण भिकेगुकथं दीक्षित् यानाः शिक्षा हासिल याकाः देसया सच्चा नागरिक दय्का यंकेगु धइगु सद्भावनां प्रेरित जुयाः महास्थवीर भिक्षु अमृतानन्दजुं थुगु विद्यापीठ स्थापना यानाबिज्याःगु जुल । थुगु विद्यापीठया उत्तरोत्तर वृद्धि निम्ति सुव्यवस्थित ढंगं चलय् याय्या लागी वसपोल भन्तेयागु अथक प्रयासद्वारा मित्र राष्ट्र व श्री ५ या सरकारयागु नं सहयोगकथं थुकियात मजबुत यानाव्यूगु दु । श्व थाय्यागु शान्त वातावरण व व्यवस्थाप्रति अनुमोदन यानाः संस्थापकजुया सुकीर्तिमय पृष्ठभूमि थुगु विद्यापीठयागु गौरव यक्वं च्वन्ह्यानाच्चंगु दु । लिपा श्री ५ या सरकारयागु न्हूगु शिक्षा नीति लागू जुसेलि थुकिया सम्पूर्ण अधिकार श्री ५ या सरकारयागु अधिनष्ठ जूवन ।

२०२५ सालयागु आनन्द कुटी विद्यापीठयागु प्रतिवेदन अनुसारः थन विद्याध्ययन याइपिनिगु संख्या २५० दु । अले थुमित स्यने-कने याइपि शिक्षकत जम्मा १५ ह्य दु । थुपि १५ ह्य शिक्षकत मध्यय् ६ ह्य स्नातक, ५ ह्य इन्टरमिडियट व १ ह्य म्याट्रिक दु धकाः धयातल । थुकिइ शिक्षक रूपय् भिक्षु कुमार काश्यप, भिक्षु अश्वघोष, श्रामणेर सुदर्शनपिसं नं भाग कयाबिज्याःगु दु । थुगु विद्यापीठ बि. सं. २००८ साल श्रीपञ्चमीया दिनय् जन्म जूगु जुल । तर औपचारिक रूपं थुकियागु विधिवत् उद्घाटन श्री ५ बडामहारानी रत्नराज्यलक्ष्मीदेवी शाहयागु ४० सौं शुभ जन्मोत्सवयागु उपलक्ष्य मौसूफ सरकारया ह्लातं थुगु आनन्द कुटी विद्यापीठ साइन्स कलेज २०२४ भाद्र १० गते रोज ७ स समुद्घाटन यानाबिज्यात । थुकियागु संरक्षकत्व श्री ५ महाराजाधिराज महेन्द्र वीर विक्रम शाहदेवजु जुया बिज्याःगु जुल ।

[७७] ध्यानकुटी (योगाश्रम)

आनन्द कुटी स्वयाः भतीचा चव्य पूर्वपाखे बंगला छेँ लसिःवगु छगू ध्यानकुटी दु । थ्व ध्यानकुटी वि. सं. २००२ सालं येँ मूलश्री महाविहारया योगरत्न वज्राचार्यजुं थः योग ध्यानय् चवनेत आश्रम दय्कातःगु खः । थ्व ध्यानकुटी निर्माणया लागी वसपोल योगरत्न गुरुजुया शिष्यपिसं नं थःम्हं फुगु चाःगु सहयोग प्रदान यानाः हारगुहार यानादिइगु दु ।

थ्वसपोल योगरत्न गुरुजु गृहस्थी तोताः थःथःम्हं भिक्षु जुयाः उख्येथुख्ये चाःहुलाः गन गन एकान्त जुल मनूतय्गु आवागमन मदु अन अन वनाः योग ध्यानय् जक चवनाबिज्याइह्य खः । गुबले मणिचूदहनय्, गुबले नमुराय्, गुबले गुह्येश्वरीइ आदि थासं थासय् चवनाः थःगु चित्तयात जक ह्यसिइकेगु योगचर्यास कोशिश यानाः बिज्यानाच्वंह्य खः । थ्वसपोलयात ऊवात्त स्वयंबलय् थेरवादी भिक्षु थे च्वंसां थेरवादी भन्तेपिनिगु आचार विचार नाप मिलय् मजू । धाय् कि थेरवादी भिक्षुपिसं थे उख्येथुख्ये वनाः शील बियाः, बाखं कनाः बुद्धपूजा याकाः, ज्ञानमाला हाय्काः मनू मुंकाः भाषण विइगु, उख्येथुख्ये उपासक उपासिकापिनिगु छेँय् छेँय् वनाः भोजन याःवनेगु थुजाः थुजाःगु चलन मदु । हानं स्वयं वज्राचार्य जुयाः नं गुरुजुपिसं थे पठन पाठ पूजा, जज्ञ होम, आगपूजा आदि सुं वाह्य गुह्य अभ्यन्तरया देवतापिनिगु भक्तिभाव याइह्य नं मखु । केवल योग ध्यान समाधिइ जक चवनाः थःगु चित्तयात ह्यसिइकेगु चर्या यानाबिज्यानाचवनी ।

थ्व हे योग ध्यानयागु प्रभावं थ्वसपोलयात छगू अद्भूतगु सिद्धि प्राप्त जूगु नं दु । थ्व हे अद्भूत सिद्धिया प्रभावं वसपोल गुलिखे रोगव्याधि ग्रष्ट जुयाच्वंपित रोग लाय्का बियाचवन । रोगीपित उपचार याइगु कथं व विधि नं थःगु हे किसिमं यानाबिज्याइ, गुबले स्वइतं वासः बिइगु चलन मदु ।

हानं तन्त्र मन्त्र यानाः जन्त्र घाकेगु तुफि संकेगु नं चलन मदु । ला-हि, चि-चिकं तयाः बउ वाकेगु नं मयाः, वसपोलं थुलि हे जक याना बिज्याइ कि—गन गन स्यात धाल अन अन स्पर्श याना मात्रं वेदना शान्त यानावियाचवनी, गुबले गुबले लः सम्म जपा त्वंकाचवनी ।

थ्वसपोल योगरत्न गुरुजु अप्पो यानाः थ्व हे ध्यानकुटीइ च्वनाः जीवन बितय् यानाविज्यात । थ्वसपोल देहान्त जुसेलि वसपोलयागु समकनाकथं थुगु ध्यानकुटी न्ह्योने चीवाहाः छगः नं स्थापना यानातःगु दु । गुलिसिनं थुगु चीवाहाःयात 'योगरत्न अनुस्मृति चैत्य' धाइ ।

भिक्षु योगरत्न गुरुजु स्वर्गीय जुसेलि छुं वर्ष लिपा थ्व थासय् कुति स्वन्ह्या च्वय् नेलाम् धइगु थासय् च्वंगु फेल्गेलिङ्ग गुम्बास च्वंपि लामा भिक्षुपि च्वनाः तिब्बती गुम्बाया ढाँचां धर्म कर्म यानाच्वन । वर्तमान थुपि भिक्षुपि स्वयम्भू डाँडाया क्वय् पूर्वपाखे बुँइ, बालाजु वनेगु लँया बिचय् स्वतन्त्र रूपं अलग छगु गुम्बा दय्का च्वनाच्वन ।

[७८] किण्डोल विहार

स्वयम्भू जङ्गलया जःपाखे किण्डोल नां जुयाच्वंगु दोमार छगु दु । थ्व दोमार दक्षिण उत्तर लङ्ग ताःहाकः जुयाच्वंगु दु । थ्व किण्डोल थःगु हे स्वरूपं साधारणगु शिखर रूपय् च्वनाच्वंगु खः । थुगु थाय्पात किण्डो नाम महासिद्ध क्षेत्र धकाः नं उल्लेख यानातल । थुगु किण्डो नाम महासिद्ध क्षेत्रय् विहार दय्कूगु जूया निर्मित उगु विहारया नां नं 'किण्डोल विहार' धइगु नामं प्रसिद्ध जुल । थुकियात छाय् किण्डोल विहार धाल धइगु विषयय् छत्वाःचा खँ न्ह्यथने?—

अतीतकालय् कनकावती सहरया छह्य विद्वान् पण्डित रति शर्मा ब्राह्मणया सन्तान मदयाः विपुलरत्न छत्र युक्त धर्मधातु चैत्य भक्ति याना च्वंवल्य् अकस्मात् उगु चैत्यया अनुभावं सर्वज्ञ मित्र बालक धर्मपुत्र प्राप्त जुल । उह्य बालक प्यदँ खुदँ दसेलि तीर्थ यात्रा निर्मित देस देसान्तर चाःहुलाः वँव नेपाल देसया ज्योतिरूप श्रीस्वयम्भू दर्शन यानाः पवित्र रमणीय भूमि किण्डोल धइगु स्थानय् निदँ प्यदँ बासं च्वन । थुह्य साधु तपस्वी भेष रति शर्मा ब्राह्मणं स्यनेकने यानाः धर्मोपदेश बियाः दिन बितय् यानाच्वन । फलस्वरूप आपालं शिष्यपि दत्त । उकिइसं श्रद्धालु दातापि यक्व दइवल । हित्थं थुमिसं दान प्रदान याय् हःगुलि आपालं धनराशि दसेलि धर्मचित्त उत्पत्ति यानाः व वसपोल श्रीस्वयम्भू ज्योतिरूप दर्शन व पूजन याय्त्त वइच्चनिइपि अतिथि अभ्यागत एवं तीर्थयात्रीत च्वनेत शोभायमान जुइक विहार व धर्मशाला दय्काबिल । थुगु विहार तयार जुसेलि विहारया नां छु तय् गुगु तय् धइगु मतिइ गुलिखे समय तकं आकुल व्याकुल जुइकाच्वन । आखिर थुगु विहारया नां उगु तय् थुगु तय् धकाः निश्चित याय् मफुसेलि गुलि मनय् अन्दोल यानाच्वने धइगु मति अन्तय् 'किम् इति आन्दोलम्—

किमान्दोल' धकाः मनय् तयाः थुगु विहारया नां 'किमान्दोल विहार' धकाः प्रसिद्ध यानाव्युगु जुल ।
श्व हे किमान्दोल विहारया अपभ्रंश किण्डोल विहार जूवन ।

गुलिसिनं धाःगु दु—थुगु थाय् वाद्वं जाकिद्वं सिद्ध जूगु थाय् जूया निम्ति किद्वल धाःगु खः ।
उकिं थुगु थाय्यात संस्कृत भासं 'धान्यकटक पर्वत' धकाः नं धाइ । थुगु किद्वलया लिउने पाखे छ्वकद्वल
धइगु नं दु, श्व छ्वकद्वल धइगु छ्वयागु द्वं सिद्ध जूगु थाय् धकाः मानय् यानावइच्चन । श्वया नं
लिउने पाखे सुनढिकी धइगु थाय् दु । वर्तमान श्व थाय्यात शरणपुर धकाः धयावयाच्चन । ह्लापा
ह्लापा सत्यधर्म व्यवहार यानावयाच्चंगु युगय् थुगु किद्वलया वा जाकि सरुवाकि एवं छ्वकद्वलया छ्व
थःत ह्लिच्छियात गाछि गाछि जक तुया यंकाःलि सुनढिकीया कुतिस यंकाः जाकि सुनाः कुतिवानाः
नइगु जुयाच्चन । लिपा कलि जुसेलि मनूतय्के असन्तोषी जुयाः लोभ पाप बढ्य् जूगुया कारणं कल्लय्
कंसयात नं धकाः अप्पो अप्पो यंकेगु चलन जूगुलि थुगु थासं नं थःगु सत्यधर्म नियम तोतल ।
उवलसंनिसें थुगु थाय् नाम मात्रया किद्वल जुल छ्वकद्वल जुल धयातल । खास यानाः थुगु थाय् आर्य
वसुन्धरा जम्बल कुवेरयागु स्थान रूपय् मानय् यानावइच्चंगु दु । उकिं थुगु किण्डोल विहारया भगवान्
बुद्धया लिकसं जःखः थौतकं जम्बल कुवेरयागु मूर्ति स्थापना यानातइतःगु धाइ । नेपाल देवभूमि
सिद्धभूमि जूया निम्ति ह्लापा ह्लापा वा, जाकि त्याय्गु, बसाःज्वलं न्येकाय्गु ख्वाल्चा दहनय् ख्वाल्चा
न्येकाय्गु एवं न्येकुचा महाद्यःयाथाय् धेबा त्याय्गु थुजाःथुजाःगु अद्भूत सिद्धि दइच्चंगु थाय् मदुगु
मखु । अज्ज उकिइसं किगः निगः स्वां छकू छयैनय् तया विइवं आवेश प्रवेश जुइगु, तःदहनय् पुइंहाय्वं
जल वृष्टि जुइगु इत्यादि चलन नेपालय् मदुगु मखु । थौं कीके उजाःगु श्रद्धा विश्वास शक्ति व भक्ति
मदयाः लोभ पाप बढ्य् जूगुलि यानाः उजाःगु सत्य सिद्धि प्रत्यक्ष ह्लियाह्लियं लोप जुजुं वयाच्चंगु दु ।

शाक्यमुनि बुद्धं श्रीस्वयम्भू महाचैत्य दर्शन याय् धुंकाः पर्वस्थानय् धर्मचक्र प्रवर्तन यानाः
लिहांविज्यानाःलि किण्डोल पर्वस्थानय् छुं दिन तक बिज्यात । थुगु स्थानय् बुद्ध शाक्यमुनि विज्याःगु
कारण विषयय् परम्परागत थुजाःगु धारणा दु—वसपोल ज्योतिरूप श्रीस्वयम्भूयागु प्रभाश्वर धर्मकाय
धर्मधातुयागु ज्ञान शिक्षा—दीक्षा अभिषेक कर्म प्रचार याय्त तन्त्र वज्रयान कालचक्रयान सहजयान
चर्या क्यनेत सुं योग्य पात्र दइ ला धकाः मतिइ चिन्तना यानाबिज्यात । थुगु आशय थुइकाः उवलय्
आर्यतारा बिज्यानाः धर्मचक्र अध्येषण यानाबिज्यात धकाः विश्वास याइपि नं मदुगु मखु । श्व हे
कारणं नेपाःया तन्त्रवज्रयानीतय्सं वज्रयान सम्बन्धी क्रियाकर्म जुइबलय् थापंकि तय्मालकि सरुवा
जाकि आसन तय्गु यानाच्चन धाइ । सरुवाकि सिद्ध जूगु थुगु किद्वल पर्वतय् च्वनाः भगवान् बुद्धं
वज्रयान सम्बन्धी खँ कनाबिज्याःगुया संस्मरणकथं परम्परा मानय् यानावइच्चंगुया छगू दसु खः ।
खतु शाक्यमुनि बुद्धं गृद्धकूट पर्वतय् बिज्यानाः महायानया खँ कन, अथे हे धान्यकटक पर्वत श्रीपर्वत
वज्र पर्वतय् च्वनाः वज्रयानया खँ कन धकाः मञ्जुश्री मूलकल्प तन्त्रय् उल्लेख यानातल । तिब्बतया
इतिहासय् थुगु किण्डोल पर्वतयात गृद्धकूट पर्वत धकाः नं धयावइच्चन ।

नेपाःयागु बौद्ध संस्कृति परम्पराकथं बही बिहारय् गन गन भगवान् बुद्ध स्थापना यानातल
अन अन भगवान् बुद्धया जवय् खवय् धर्म, प्रज्ञापारमिता, आर्यतारा, वसुन्धरा व संघ, अवलोकितेश्वर,

करुणामय, पद्मपाणि, षडक्षरो लोकेश्वर एवं अमोघपाश लोकेश्वरपिनिगु मूर्ति स्थापना यानावइच्चन । तर थुगु किण्डोल विहारय् भगवान् बुद्धया जवय् शून्यतावादया प्रवर्तक महान् आचार्य सिद्धनागार्जुनया भव्य मूर्ति व खवय् जम्बलया मूर्ति प्रस्थापन यानातइतःगुलि चवय् चवंगु खंयात प्रमाणित यानातःगु खनेदु । थुकि थव आशय स्पष्ट जूवःगु दु, थुगु थासय् आचार्य नागार्जुन बिज्यानाः नं तन्त्रवज्रयान सम्बन्धी निःसन्देह धर्म प्रचार यानावन जुइ । उकि थुगु विहारया शिलालेखय् थुगु थाय्या नां 'किन्दो नाम महासिद्ध क्षेत्र' धकाः स्पष्ट रूपं अङ्कित यानातःगु जुल ।

थुगु थाय्यागु महत्व व गौरवप्रति ध्यान आकर्षित यासे येँ पारावर्त महाविहार (इतुं बाहाल) या न्यत पिथ्याछेँ या शाक्यभिक्षु श्रीसिङ्जुया सद्धर्म चित्त उत्पत्ति जुयाः धर्मधातु वागीश्वर सन्निधानस किन्दो नाम महासिद्ध क्षेत्रय् श्रीवज्रधातु चैत्यस्थानय् विहार दय्केगु निम्ति वास्तु लक्षण शास्त्रया विधिकथं खुलाया दुने सम्पूर्ण यासे ने. सं. ८०७ ज्येष्ठशुक्ल अष्टमीया दिनय् प्रतिष्ठा कार्य सम्पन्न याःगु जुल । थुगु प्रतिष्ठा कार्य उत्सवय् जुजु पार्थिवेन्द्र मल्ल बिज्याकाःलि सुवर्ण कलश ध्वजारोहन याकूगु जुल । थुगु किन्दो नाम महासिद्ध क्षेत्रय् विहार दय्काः प्रतिष्ठा यानातइतःगु संवत्सर त्वहँतय् 'श्रीकीर्त्तन महाविहार' धइगु नां उल्लेख यानातःगु जुल ।

थुगु कीर्त्तन महाविहार (किण्डोल विहार) या प्राचीन स्वरूप गथे च्वं गुजाःगु छाँतं दय्कातल व कीसं धाय्फुगु मखु । कारण न्येदँ खुइदँ न्ह्यो हे प्राकृतिक तथा मानवीय प्रकोपया कारण क्षति ग्रष्ट जुयाः भूमिसात जूगुलि थुकियागु महत्व तक नं मसिया वनाः स्वयां वास्ता-किस्ता मदयाः ह्वाय्कं कालं व्याप्त जुयाच्चने धुंकूगु स्थान जुल ।

खतु ने. सं. १०४४ सालं यल सप्तपुर महाविहारया गुरु धर्मादित्यजुं थुगु किण्डोल विहारयागु दुरावस्था खनाःलि थुकियागु पुनरुद्धार याय्गु मतिइ तयाः स्वः बिज्याःगु जुल । नेपाःया विभिन्न विहारत मध्यय् थःगु हे ऐतिहासिक पृष्ठभूमि दइच्चंगु महत्व दइच्चंगु थुगु विहार सारै नष्ट भ्रष्ट जुयाः ह्वाय्कं काः जुयाच्चंगु खनाः उकियागु आवश्यक कदम उठय् याय्गु अभियान शुभारम्भ यानाबिज्यात । थुगु विहार सुधार व उद्धार याय्गु दृढ संकल्प यासे उकियागु तस्बीर खिचय् यानाः थःगु 'बुद्धधर्म' धइगु पत्रिकाया ह्वापांगु अङ्कया मुखपत्रय् छापय् यानाः संसारया न्ह्योने तयाविल । लिस्सें वसपोलं श्रद्धालु दानपतिपित नं थुगु विहार जीर्णोद्धार याय्माःगु आवश्यक व महत्व विषयय् खँ कनाबिज्यात ।

फलस्वरूप वसपोलयागु उपदेश न्यनाः येँया असं धालासिकोया साहु बोधिचित्तरत्न व महाबुद्ध तःखाछेँया ताम्रकार सिद्धिरत्न, वृषमानपिसं आवश्यक खर्च हनाः ने. सं. १०४६ पौषशुक्ल अष्टमीखुनु पुनरुद्धार कार्य सम्पन्न यानाव्यूगु जुल^२ ।

१- किण्डोल विहारया शिलापत्र ।

२- किण्डोल विहारया न्हू शिलापत्र ।

नेपाःया परम्पराकथं बाहाः बहिलिइ क्वाःपाःद्यःया फुसय् आगं दय्कातइ । थुगु विहारय् नं ह्लापा शाक्यभिक्षु श्रीसिङ्जुं दय्कूबलय् श्रीचक्रसम्बर, हेवज्ज आदि परमेश्वरपिं विज्याकाः आगं दय्कातःगु जुइ । तर वर्तमान थुगु विहारया फुसय् भगवान् बुद्धया च्वम्सं आगंया रूप मजुसे न्ह्याह्यं श्रद्धालु वनाः दर्शन याःवने ज्युगुकथं छिगुकथं गुम्बाया रूप वियातल । थन करुणामय अवतारी दुक्पा लामा शेराव्दोर्जेयागु आज्ञानुसार ह्लिमा लामाजुं न्यूनेब्रतया मुख्य देवता सहस्रभुज लोकेश्वरया भव्य रूप मूर्ति दय्काः शोभा वृद्धि यानातःगु दु । थ्वया छ्चालं चिचीधिकःपिं द्वःछिह्य सहस्रभुज लोकेश्वरया मूर्ति सजय् यानातल । अले थुगु तलाया फुसय् स्वंगूगु तलाय् गुरु अमिताभ बुद्धया द्वःछि मूर्ति दय्काः तयातल । थुकिया दानपति खः मानन्धर कुलबहादुर साहु । थुगुकथं द्वःछि सहस्रभुज लोकेश्वर द्वःछि अमिताभ बुद्धया मूर्ति सजय् यानातइतःगु काठमाण्डू उपत्यकाया गनं बाहाः बहिलिइ मदु धाःसां अत्युक्ति जुइ मखु । थ्व किण्डोल विहारया थःगु हे विशेषता खः ।

थुगु विहारय् यल रुद्रवर्ण महाविहारया हर्षदेव शाक्य (धर्म गुरुजुं) थौतकं नित्यपूजा याय्गु यानावइच्चन । धर्म गुरुजुं थन हे च्वनाः आर्यनामसंगिति प्रचार यानावइच्चन । थ्वसपोलं पाङ्गसि गुम्बानिसें दण्डवत् यायां स्वयम्भू दर्शन याः विज्याःह्य खः ।

थुगु विहारया दुने क्वाःपाःद्यःयाथाय् निम्नप्रकारया मूर्तित तयातःगु खनेदु :—

- (१) क्वाःपाःद्य भूस्पर्श बुद्ध अक्षोभ्य
- (२) आचार्य सिद्ध नागार्जुन
- (३) जम्बल कुवेर
- (४) शालिपुत्र, मौङ्गल्यायन
- (५) अमोघसिद्धि २
- (६) अमिताभ तथागत
- (७) नागनागिनी
- (८) प्रज्ञापारमिता
- (९) अन्नपूर्णदेवी
- (१०) प्रज्ञापारमिता
- (११) सिधिनी
- (१२) सिंहनाद लोकेश्वर
- (१३) शाक्यमुनि
- (१४) अहिच्छत्र युक्त त्रिबुद्ध मूर्ति—ध्यान मुद्रा, भूस्पर्श मुद्रा अभय मुद्रा सहित ।
- (१५) मञ्जुश्री जःखः शक्ति सहित
- (१६) पद्मपाणि लोकेश्वर जःखः तारा सहित
- (१७) धर्मचक्र बोधिसत्व
- (१८) शाक्यश्री लामा

थन दुने अङ्कित यानातःगु भित्ती चित्र :—

पूर्व—अवलोकितेश्वर, मञ्जुश्री, वज्रपाणि, अपरिमिता, सप्तलोचनी तारा, उष्णषविजय । प्रज्ञापारमिता, भैषज्य तथागत, ध्वजाग्रकेयूरी, महाकाल, खड्गराज, वीणाराज, काकाश्या ।

दक्षिण—दत्थुइ अमिताभ तथागत, ध्वया जःखः बोधिसत्वगण व सुखावतीया छगू चित्रण । चैत्यराज । शाक्यश्री लामा, लामा दुक्पा रिम्पोछे (शेरावदोर्जे) । गुरुवज्रधर, नारोपा, तिलीपा, मिलारेपा ।

पश्चिम—समन्तभद्र तथागत । वज्रसत्त्व गुरु । गुरु पद्मसम्भव व ध्वसपोलया शिष्यगण ।

उत्तर—शाक्यमुनि बुद्ध, पद्मपाणि, रत्नपाणि । लामा चोङखापा व शिष्यगण । सहस्रभुज लोकेश्वर, पञ्चतारा, महापाल्मो देवाधर्मा लामा (डावापासाङ्ग) छास्कामिनी ।

[७६] चीधंगु किनूवाहाः (तेजकीर्ति विहार)

स्वयम्भूया सन्निधानय् च्वंगु तःधंगु किनूवाहाःया लिकसं च्वंगु बःचाहंगु छगू तला जक दइच्च्वंगु पूर्वाभिमुख छगू विहार दु । थुगु विहारय् प्रलम्बपाद आसन यासे धर्मचक्र मुद्रा यानाच्च्वंगु अनागत बुद्ध आर्य मैत्रेय बोधिसत्त्व विज्याकातःगु जुल ।

थुगु विहार किण्डोल विहारया पूजारी भिक्षु धर्मगुरुजुया अनुरोधकथं येँ भीमसेनस्थानय् च्वंगु धर्मात्मा दानपति तेजनरसिं महर्जनया अति श्रद्धाचित्त उत्पत्ति जुयाः व थुगु सुवर्णपुरी किण्डोलय् थःगु नामं तेजकीर्ति विहार दय्काव्यूगु जुल^१ । थुगु विहार तयार जुसेलि ने. सं. १०५८ साल बैशाखशुक्ल अक्षयतृतीया दिनय् विधिवत् प्रतिष्ठा यानाबिल । हानं थुगु विहार प्रतिष्ठा यानाः प्यदं लिपा थुगु विहारया दत्थुइ धर्मधातु जिनालंकृत चैत्य तयाःलि दुने मैत्रेय बोधिसत्त्वया न्ह्योने धर्मधातु दय्काः उकिइ धातुया अमोघपाश लोकेश्वर मण्डल व अष्टबोधिसत्त्वया मूर्ति अङ्कित यानाव्यूगु दु । थुगु धर्मकीर्ति ने. सं. १०६२ साल अक्षयतृतीयाखुनु तःगु जुल ।

थन दुने अङ्कित यानातःगु भित्ती चित्र :—

पूर्व—अपरिमिता, सप्तलोचनी, उष्णीष विजय, महाकाल ।

दक्षिण—षोडश महास्थवीर मध्यय् च्याम्हेसिगु चित्र ।

पश्चिम—बुद्ध, धर्म—प्रज्ञापारमिता, संघ—अवलोकितेश्वर षडक्षरी अमिताभ, भैषज्यराज तथागत, शाक्यमुनि व शालिपुत्र, मौङ्गल्यायन ।

उत्तर—षोडश महास्थवीर मध्यय् च्याम्हेसिगु चित्र ।

१- थुगु विहारया शिलापत्र ।

[८०] महापरिनिर्वाण मूर्ति

चीधंगु किनूबाहाः तेजकीर्ति विहारया क्वस्सं वज्जला छाँतगु उत्तराभिमुख छगू मन्दिर दु । थन दुने भव्य रूप शान्त गम्भीरगु १० फीट लमाईया प्रमाणं तःधिकः यानाः दय्कातःह्य प्रस्तरमय शाक्यमुनि बुद्धया महापरिनिर्वाण मूर्ति प्रतिष्ठा यानातःगु जुल ।

थुगु मूर्ति दय्कूगुया खास उद्देश्य थ्व खः—स्थवीरवादया बुद्धधर्मय् अनागारिका विरति विमुखा प्रमुख सकल अनागारिका तथा श्रद्धालु उपासक उपासिकापिनि नित्य श्रद्धापूर्वक वन्दन, पूजन व भावना यानाः चित्त परिशुद्ध याय्त कुशीनगरय् थे' संतु' नेपालय् नं स्वयम्भू सन्निधानय् किण्डोल विहारया क्वस्सं तथागतया निर्वाण मूर्ति स्थापना याःगु जुल ।

थुगु निर्वाण मूर्ति स्थापना याय्गुलिइ सर्वप्रथम शुभ संकल्प यानाः अग्रसर जुयाविज्याःह्य असं ध्याक्वछेँया मानकाजी तुलाधरया श्रीमती रत्नमायाया सुपुत्री लक्ष्मोनानीं गृहस्थी तोताः अनागारिका जूह्य धर्मचारीजुं विभिन्न श्रद्धालुपिके सहयोग कयाः यल भिन्नेँबाहाःया शिल्पकार पञ्चराज वज्राचार्यया ह्लातं थुगु कलात्मक सुन्दर भव्य मूर्ति दय्के ब्यूगु जुल । थुगु मूर्ति दय्केगु लागी अतिकं परिश्रम यानाः ख्वानागुं थासं निसें कुबियाः येनकेन प्रकारेण निर्दिष्ट स्थानय् थ्यंके हःगु जुल । थुगु निर्वाण मूर्ति तयार जुसेलि श्री ५ त्रिभुवन वीर विक्रमया पर्यायस ने. सं. १०७२ मार्गकृष्ण प्रतिपदा बुधवारया दिनय् थेरवादी भन्तेपिनिगुपाखे' परित्राण पाठ याकाः देस विदेशया बौद्ध प्रतिनिधिपिनिगु सन्मुखय् श्री ५ युवराजाधिराज महेन्द्र वीर विक्रम शाहदेवजुया ह्लातं विधिपूर्वक उद्घाटन सुसम्पन्न याकूगु जुल ।

थुगु निर्वाण मूर्तिया न्ह्योनेपाखे मन्दिरय् दुने अंगःया कपनय् चिचीपाःगु तस्वीर थे' यानाः बुद्धजीवनी सम्बन्धी ल्वहंया मूर्तित कियाः सजय् यानाः तइतःगु खनेदु—सिद्धार्थया जन्म, जशोधराया स्वयम्बर, चूडाकर्म, तपस्या भङ्ग याय्त वयाच्चंप्पि अप्सरात, धर्मचक्र प्रवर्तन, थःगु लाय्कुलिइ भिक्षाटन, अबु नापलानाच्चंगु व अले जशोधरायात चूडाकर्म यानाच्चंगु दृश्यत प्रदर्शित यानाः- तइतःगु दु ।

थुगु शुभकार्यय् आर्थिक श्रद्धा चन्दा प्रदान याःपि श्रद्धालु दातापिनिगु नां—

शीलशोभा, असं धालासिको । सिंहरत्न, महाबौद्ध । वीरवहादुर, जुद्धसडक । माहिलाकाजी, मरु । धर्मवीरसिंह, केल । कालुराम मारवाडी । हिरादेवी, चोखाछेँगल्ली । हेरामानसिंह, इतुंवाहाः । बालकृष्ण, फोछेँ । जीवरत्न, मासंगल्ली । हेलथकुं, ह्याय्कंतला । कुलरत्न धाखाः, नागवाहाः । पुण्यमाया, ह्याय्कंतला । लपुलक्ष्मी, मरु पीगंननि । देवरत्न, खाछेँ, इत्यादि ।

[८१] बुद्धजननी मायादेवी

किण्डोल विहारया निर्वाण मूर्तिया थासं भचा क्वहांवनेबल्य् लँया जःपाखे मुगल शैलीया छगू बःचागःगु पूर्वाभिमुख देगःचा छगः दु । थुकिइ दुने लुम्बिनी वनय् मायादेवीया गर्भ बोधिसत्व सर्वार्थसिद्ध जन्म जुइ धुसेलि ह्लय्पलाः छिनावनाच्वंगु दृश्य चित्रण यानाः तइतःगु मूर्ति स्थापना यानातःगु जुल ।

थुगु धर्मकीर्ति जनबाहाःया तारावीरसिंह चन्द्रवीरसिंह कंसकारपिसं थः अबुजु धर्मवीरसिंह, मां पूर्णमायापिनिगु दिवङ्गत आत्माप्रति शान्ति कामना यासे स्थवीरवादी भन्तेपिनिगु विधि विधानकथं महापरित्राण पाठ याकाःलि प्रतिष्ठा कार्य सम्पन्न याःगु जुल । थुगु प्रतिष्ठा कार्य पौषकृष्ण प्रतिपदा ने. सं. १०६६ सालं जूगु खः१ ।

[८२] धर्मचक्र शाक्यमुनि बुद्ध

पञ्चभद्रवर्गी सहित धर्मचक्र शाक्यमुनि बुद्ध तयाः पूर्व अभिमुख यानाः छगू बःचागःगु चैत्य शैली देगःचा छगः दय्कातःगु दु । थुगु थाय् किण्डोल विहारया लिउनेपाखे पश्चिम उत्तरया कुनय्लाक प्रतिष्ठा यानातःगु जुल । थ्व थाय् सारनाथ ऋषिपत्तन मृगदावनया लुमन्तिकथं दय्कूगु खः ।

थुगु मन्दिर दय्केगुलिइ प्रथम संकल्प यानाः अग्रसर जुयाबिज्याःह्य विशाखा अनागारिका जुल । थ्वय्कःयागु अनुरोधय् प्रमुख सहयोगी जुयाः श्रद्धा तयादिइह्य येँ मरु पीगंननिया रत्नभाइ ताम्रकार व पूर्व १ नं. बारव्यासीइ च्वंह्य पुनमाया, आशामाया ताम्रकारनीपिनिगु नां न्ह्यथनातःगु दु२ ।

थुगु मन्दिर ने. सं. १०६३ सालं निर्मित जूगु जुल ।

[८३] शूक्ष्म बुद्धगया मन्दिर

साधारणगु बःचागःगु शूक्ष्म बुद्धगया मन्दिर किण्डोल विहारया दुनेपाखे जवय् च्वंगु बगैचाय् पूर्वाभिमुख यानाः दय्कातःगु दु ।

१- मन्दिरया दुने च्वंगु शिलापत्र ।

२- थ्व हे मन्दिरया क्वस्सं च्वंगु शिलापत्र ।

भिक्षु सुदर्शनजुया निर्देशनय् अनागारिका सुमित्रा व थँहितिइ च्वंहा चन्द्रलक्ष्मी शाक्यया पुण्य संयोजनय् कलाकार दिलबहादुर शाक्यं दय्कूगु खः । खतु थन थथे देगः दय्केगु पुण्य इच्छा स्व० मोतिमाया, स्व० कर्मशोभा उपासिकाया नं दुगु खः, तथापि थुगु देगःचा दय्के निम्ति विभिन्न श्रद्धालुपिनिगु पाखे श्रद्धादान प्राप्त जूगु दु । उकिइ मध्यय् दकलय् अप्पो चन्दा प्रदान याःहा चन्द्रलक्ष्मी शाक्यया थः पुरुष शुभरत्न जुल ।

खतु थुगु देगःचा ने. सं. १०६६ सालं हे दय्के सिधय् धुंकूगु खः, तर थुकिया प्रतिष्ठा कर्म ने. सं. १०६७ बछलाध्वः पञ्चमी सनिवारखुनु सम्पन्न जुल ।

[८४] जगतोद्धार महाविहार (बौद्ध छात्रावास)

स्वयम्भू ध्वाकाया न्ह्योनेपाखे भुइख्यलं विजेश्वरी वनेगु लँया जःपाखे दय्का तइतःगु छगू किसिमया विहार खः । थुगु विहार नेपाःयागु विधि विधान अनुसार स्थापना जूगु जूसां थुकिइ नेपाःयागु थःगु वास्तुकला शैलीनाप मिलय् मजू, बिलकुल आधुनिक ढंगं छात्रावास लसि वय्क दय्कातःगु जुल । थुकिइ गनं थःगु सांस्कृतिक कलात्मक लुखा, ऊयाः, तोरण, थां तयाः दय्कातःगु खनेमदु ।

थुगु विहारय् अनागत बुद्ध आर्य मैत्रेय बोधिसत्त्व प्रतिष्ठा यानाः थ्वया जःखः मञ्जुश्री व सप्तलोचनी तारा तयातल । स्वंगूगु तलाय् आगं-क्वथा दय्कातल । थुगु विहार श्रीस्वयम्भू महाचैत्य-पाखे अभिमुख यानातःगु जुल ।

थुगु जगतोद्धार महाविहार बौद्ध छात्रावास बौद्ध विद्यालय दय्केत सर्वप्रथम पण्डित श्रीजोगमुनि वज्राचार्यजुं थ्व विचाः याःगु दु—थौंयागु नेपाःयागु बुद्धधर्म अनुयायी श्रामणेर, चैलक, ब्रह्मचर्य भिक्षु, शाक्यभिक्षु एवं वज्राचार्य आदिपिनिगु आचार विचार सुधार यानाः शिक्षा-दीक्षा बियाःलि सुयोग्य बौद्ध छात्र छात्रापि पिदंकेगु सम्यक् संकल्प यासे थुगु जगतोद्धार महाविहारया नामं बौद्ध छात्रावास संस्थापन याःगु जुल ।

नेपालय् प्रजातन्त्र उदय जुसेलि शिक्षा प्रचारयागु स्वतन्त्रता दसेलि पण्डित जोगमुनिजुं सद्धर्मचित्त उत्पत्ति यानाः नेपाःयागु बुद्धधर्म उत्थान व समुन्नतिया लागी तत्कालीन बौद्ध समाजया ख्याति प्राप्त विद्वानत गुरु धर्मादित्य, गुरु रत्नबहादुर, गुरु जोमुगनि संस्थापकजु समेत च्वनाः सरसल्ला यानाः गुगु किसिमं शिक्षा प्रणाली अपनय् याय्माःगु खः उगु किसिमं देस काल परिस्थिति विचाः यानाःलि थुगु बौद्ध छात्रावास बौद्ध विद्यालय स्थापना याःगु जुल । लिस्से न्हूगु नियम दय्काः 'जगतोद्धार महाविहारस बौद्ध विद्यालय छात्रावासया विवरण पत्र' नामं छगू पुस्तिका नं प्रचार यानाव्यूगु दु ।

उगु विवरण पत्रय् धयातःगु अनुसारं थुगु जगतोद्धार महाविहार बौद्ध छात्रावासय् व्रनिइ-
पिनिगु निम्ति निम्नप्रकारं व्यवस्था जूगु दु :—

१. संस्कृत शिक्षाय् मध्यम परीक्षा तक
२. अंग्रेजी शिक्षाय् मिडिल क्लास तक
३. संस्कृत बौद्ध साहित्य नं व्वंकिइगु
४. पालि बौद्ध साहित्ययागु नं व्यवस्था जुइ
५. नेपाःया विभिन्न प्राचीन लिपि—नेपालाखल, रञ्जना, भुजिमो, गोमो, पाचुमो इत्यादि व अले तिब्बती लिपि तक नं स्यनेगु ज्या जुइ ।
६. बौद्ध दर्शनया आधारय् मूल मूलगु तत्त्व ज्ञान अध्ययन व चिन्तन याकेगु नं व्यवस्था जुइ ।
७. विशेष बुद्धधर्म जक व्वनेगु इच्छा याइपिनिगु लागी क्रमानुसार सर्वज्ञपद लाय्त माःगु तक शास्त्र नं स्यनाबिइगु इच्छा प्रकट यानातःगु दु ।
८. लिस्सें गृहस्थ जीवनयात आवश्यकगु सम्यकाजीविका निम्ति ज्या स्यनाबिइगु खँ नं न्ह्यथनातल ।
९. थुगु बौद्ध छात्रावासया लागी ने. सं. १०७१ नागपञ्चमीखुनु छगू पुस्तकालय नं स्थापना याःगु दु ।
१०. थुगु विवरण पत्रय् थ्व नं उल्लेख यानातःगु दु—बुद्धधर्म उन्नति व विकासया लागी स्थापना याःगु थुगु बौद्ध छात्रावासय् भर्ना जूवइपि छात्रछात्रापिनिगु भोजन निम्ति मांसवर्जित जुइ ।

थुजाःगु पवित्र उद्देश्य तयाः थुगु बौद्ध छात्रावास जगतोद्धार महाविहार स्थापना जुल । उगु दिनय् प्रजातन्त्र प्रवर्तक राष्ट्रपिता श्री ५ त्रिभुवन वीर विक्रम शाहदेवजु बिज्यानाः उद्घाटन सम्पन्न याःगु दु ।

तर अपशोचया खँ थुगु बौद्ध विद्यालय दच्छि निदँति जक चल्य् जुयाः बन्द जुयावन । तथापि साहस व धैर्य दुहा वसपोल जोगमुनि गुरुजुं थःगु शक्ति चाछि थुगु जगतोद्धार महाविहारय् च्वनाः नेपाःयागु बुद्धधर्म तन्त्रवज्रयान सम्बन्धी शिक्षा—दीक्षा प्रचार प्रसारया लागी अनेक सेवाभाव प्रस्तुत यानावइच्चंगु खनेदु ।

करपिनिगु आशा भरोशाय् लानाः थःगु उद्देश्य विफल जुसेलि बौद्ध विद्यालय संचालन याय् मफुत । अथे नं नेपाःयागु बुद्धधर्म व बौद्ध समाजया निम्ति थःम्हं फुगुचाःगु अवश्यं सेवा भाव यानावने धइगु विचारं हानं बौद्ध संस्कृति बौद्ध साहित्य प्रचारया लागी न्हूसतकय् च्वंगु थःगु छेय् तयातःगु थःगु स्वतन्त्र दइच्चंगु जगतोद्धार प्रेस भुइख्यलय् जगतोद्धार महाविहारय्संतुं तयाबिल । लिपा थुगु प्रेस नं ज्येष्ठ पुत्रयागु भागय् लासेलि हानं जनहित नामं मेगु प्रेस तल । थुगु प्रेसपाखे निम्नप्रकारया बौद्ध साहित्य छापय् जुजुं वन :—

१. नेपाःया छह्य प्रसिद्ध बौद्ध विद्वान् यलया पण्डित गुरु श्रीरत्नबहादुर वज्राचार्यजुं नेपाल भाषां अनुवाद यानाथकूगु अष्टसाहस्रिका प्रज्ञापारमिता सद्धर्मग्रन्थ सम्पादन यानाः हरिताल भ्वँतय् छापय् यानाः प्रकाश यानाबिल ।
२. अथे हे वसपोल पण्डित गुरुं अनुवाद यानातइतःगु लक्षावती प्रज्ञापारमिताया प्रथम खण्ड नं हरिताल भ्वँतय् छापय् यानाः सम्पादक व प्रकाशक जूगु जुल ।
३. थुगु हे रूपं स्वंगूगु अनुदित ग्रन्थ क्षेमेन्द्रकल्पलतावदान अन्तर्गत विभिन्न जातक माला नं देसि भ्वँतय् छापय् यानाः प्रकाशक जुल ।
४. प्यंगूगु अनुदित ग्रन्थ आर्यगुणकारण्डव्यूहयात नं हरिताल भ्वँतय् छापय् यानाः प्रकाशन यानाच्वन ।
५. एवरूपं स्वायम्भू पुराणया निगू अध्याय नं देसि भ्वँतय् छापय् यानाः प्रकाशन यानाबिल ।
६. एवंकर्म ज्ञानसाधनमाला भाग छि व नछि अध्ययन व अनुसन्धान यानाः प्रकाश यानाव्यूगु जुल ।

वसपोल जोगमुनि गुरुजुं थथे बौद्ध साहित्य सम्पादन यानाः प्रकाशक जक जुयाः बिज्याःगु मखु कि लिसेलिसें महायान बौद्ध दर्शन एवं तन्त्रवज्रयानयागु महत्व बारय् नं थ्व हे जगतोद्धार महाविहारय् च्वनाः इलय्-व्यलय् पर्वपर्वकालय् धर्म देशना यानाबिज्यानाच्वनी । हानं श्रोतागणपिनिगु अनुरोधकथं गन गन धाल अन अन तक नं बिज्यानाः खँ कनाच्वनी ।

गुबलें गुबलें तन्त्रवज्रयानयागु परम्परागत चलन अनुसार नृत्य गीत वाद्य सहित यासे ३६ संवर, बुद्धवर, हेरुक, चक्रसम्बर, चण्डमहारोषण आदिपिनिगु नं नृत्य उत्सव प्रदर्शित यानाच्वनी । तर नृत्य उत्सव प्रदर्शिनी धाय्वं राष्ट्रिय नाचघरय् कयनी थे टिकट शिष्टम मखु । थन दुने तन्त्रवज्र-यानयागु परम्परानुसार दीक्षा दुपि अभिषेक प्राप्तिपिनिगु निम्ति जक कयनेगु यानावइच्वंगु खः ।

धात्थे धाय्माल धाःसा थौयागु वैज्ञानिक युगय् धर्म संस्कृति व कलाप्रति श्रद्धा विश्वास कम जुजुं वनाच्वंगु इलय् छह्यति छह्यसिया गृहस्थी व्यवहारं लिमलानाः इतिमिति कनाच्वंगु इलय् वसपोल जोगमुनि गुरुजुं थःगु परम्परागत धर्म संस्कृति संरक्षणया लागी व लिस्सें उकियागु महत्व व गौरव प्रचार निम्ति यक्व यक्व कुतः यायां वनाच्वंगु दु । थ्व फुक ज्या जगतोद्धार महाविहारं हे पिदंगु धाःसां अत्युक्ति जुइमखु ।

[८५] फेलग्येलिङ् गुम्बा

थुगु गुम्बा भुइख्यलं बालाजु वनेगु लँया बिचय् जःपाखे बुँइ अर्थात् स्यंगुगलय् च्वंहा सूर्यमुख गणेशया न्ह्योने बुँया दत्थुइ लाक दक्षिण अभिमुख यानाः निगू तला यानाः दय्कातःगु जुल ।

थुगु गुम्बा कुतिया नं चव्य स्वन्हुया लैय् नेलाम् धइगु थासय् दय्का तइतःगु थःगु हे तालगु पुलांगु ह्लासा देसया सारा गुम्बायागु परम्पराकथं गेलुकपा शासन चल्य जुयाच्वंगु छगू प्रसिद्धगु गुम्बा खः । कालान्तरय् चीन देसय् जनवादीया महान् नेता माउत्सेतुङ्गयागु नेतृत्वय् शासन चल्य जुल । उबलसंनिसें सँदेसय् नं राजनैतिक क्रान्ति जुल, सांस्कृतिक परिवर्तन बल, गुकि यानाः धर्मचर्या यानाः जीवन हनेमाःपि लामा, तुल्कु, कुस्योग्, घ्येसे, गेलुङ्ग आदिपित धार्मिक स्वतन्त्रता मदुसैलि इपि थःगु जन्मभूमि थःगु गुम्बा धकाः पियाच्वने मफुत । अले इपि धार्मिक स्वतन्त्रता दइच्वंगु धर्म समन्वयवाद पुण्यभूमि नेपाल देसय् शरणार्थी रूपय् प्रवेश जुल । खतु आर्यावर्त पुण्यभूमि भारतय् नं ह्लापा तुगुलुक यवनम्लेच्छ मुसल्मान्तय्सं आक्रमन याःबलय् नं अनया विश्वविख्यात नालन्दा विहार, तक्षशील विहार, विक्रमशील विहार एवं ओदत्तपुरी जगदल विहार आदिया सुप्रसिद्ध विद्वान्, भिक्षु, आचार्य, सिद्ध, योगी आदिपि थःथःगु धर्मग्रन्थ शासनिक पुण्यकीर्ति दर्शनीय दुर्लभ अमूल्य वस्तुत ज्वनाः नेपालय् शरण वःगु खँ इतिहासं कनाच्वंगु दु । अथे हे सँदेसया विद्वान् आचार्य एवं लामा गुरु आदिपित नं व हे दशा जुल ।

धर्म संस्कृति कलाप्रति श्रद्धा निश्चय दुपि थुपि नेलाम् धइगु थासं वःपि फेल्भेलिङ्ग गुम्बाय् च्वंपि लामा भिक्षुपिसं उगु गुम्बाय् च्वंगु बुद्धशासनिक कीर्ति वस्तु—धर्मग्रन्थ, मूर्ति, पौभाः व उपसम्पदा जुइत आवश्यकगु सांघिक उपकरण वस्तुत नं ब्याक्व थःगु साथय् ज्वनाः स्वयम्भू पर्वस्थान किण्डोल विहारय् थ्यंकःबल । तर अपशोच थुमिगु लागी च्वनेत ज्याछिगु गुम्बायागु व्यवस्था मज्जुगुलि यानाः गन च्वने गन वने जुयाच्वंपित लामा छेचुकुस्योग्जुं छुं समय लागी वसपोलपित अस्थायी रूपं किण्डोल विहारय् बासं बिल । अन नं विविध समस्याया कारणं हानं वसपोल छेचुकुस्योग्जुं यल ज्याठावाहाल पद्मवर्ण विहारय् बासं बिइगु व्यवस्था मिलय् यानाबिल । थन नं दच्छि व निला प्यलाति च्वन । थुगु थासय् नं विविध कारण व समस्यां यानाः मेगु थाय् मालेगु बाध्य परय् जुल, उबलय् कुस्यो गुरुयागु वचन अनुसार प्रस्तुत ग्रन्थया लेखक नं इमिगु लागी मेगु ज्याछिगु त्वःगु थाय् प्राप्त मज्जुतले थःगु छेँय् बासं बिइगु खँ निर्णय जुल । तर भिक्षुपि गृहस्थीपिनिगु छेँय् च्वनेगु शासनय् बाधा परय् जूगुलि यानाः थाय् माला जुजुं स्वयम्भू जंगलय् च्वंगु योगरत्न गुरुजुयागु आश्रम स्थान ध्यानकुटी खालि जुयाच्वंगु सिइकाःलि उगु थासय् च्वनेगु यात । थुगु ध्यानकुटी नं इमिगु लागी खास सन्तोषजनक मज्जु, तर गृहस्थीपिनिगु छेँय् च्वनेगु स्वयाः नं जंगलय् एकान्तगु थाय् लाःगु जुयाः जक करबलं च्वनेगु बाध्य परय् जुल । थुगु थासय् नं इपि भिक्षु संघपि फुकं न्ह्यःगु मखु, केवल थःगु गुम्बायागु नित्य पाठ पूजा याय्त सम्म जक ज्यूज्यू थें च्वनाः ज्यामछिसां ज्याछि थें संक्य जुयाच्वंगु खः ।

थुगुकथं थ्व हे ध्यानकुटीस च्वनाः ह्युदँ च्यादँ समय बितय् यात । अन्तय् वसपोलपिसं ध्यानकुटीइ च्वँच्वं थ्व नं बिचाः याःगु दु—थुगु ध्यानकुटीइ च्वनाः इमि थःगु परम्परानुसार बांलाक ज्याछिगु गुम्बायागु नियम अनुसार चल्य याय् मछिगु महशूस यासे थःगु स्वतन्त्र दुगु मेगु हे छगू अलग गुम्बा दय्केगु निर्णय याःगु जुल । गन गुथाय् गुम्बा दय्के धइगु मतिइ तयाः जग्गा माः जुजुं

सौभाग्यवश थ्व हे श्रीस्वयम्भू धर्मधातु वागीश्वरया सन्निधानय् ईशान कोणपाखे थाय् लुल । थुगु थाय् दसेलि उख्येथुख्ये चाःहुला जुजुं थःपिनिगु शुभ प्रणिधान् दृढ संकल्प लामा गुरुपिनिगु शुभ आशीर्वाद एवं श्रद्धालु दातापिनिगु सहयोगं भिक्षु संघपिनिगु परिश्रमद्वारा वर्तमान फेल्ग्येलिङ्ग गुम्बा श्रीस्वयम्भूया गःया लिक तिब्बती ढंगं भव्य रूप जुइक थःगु सद्विच्छानुसार गुम्बा तयार याःगु जुल ।

स्वयम्भू चाकलय् च्वंगु प्यंगु खुगु गुम्बात मध्यय् थुगु गुम्बाया रूप विशालता खनेदु, कारण थुकिइ दुने आपालं भिक्षुपि च्वनाः पाठ पूजा यानाः धर्म देशना याय्त ज्याछिक दुने थाय् तःधंक दय्काव्यूगु दु । थन गुम्बाय् दुने मेमेथाय् थें भित्ती चित्र अङ्कित यानातःगु मदु । अंगलय् छचाःख्यरं इमि थःगु पुलांगु गुम्बायागु प्राचीन बहूमूल्य कलात्मक पौभाः जक ब्वयाः ऊवःलाक सजय् यानातल । थुगु पौभाः जेपाचुंनि (बुद्धजीवनी सम्बन्धी) च्वयातःगु खः । तर थुगु गुम्बा प्रवेश द्वारया जःखः धाःसा निम्नप्रकारया भित्ती चित्र च्वयातःगु खनेगु :—

१. रिक्सुङ्गोम्पो (त्रिकुलनाथ)
मञ्जुश्री, अवलोकितेश्वर, वज्रपाणि ।
२. भैषज्यराज तथागत
३. अपरिमिता तथागत
४. चतुर्महाराज—
धृतराष्ट्र, विरूपाक्ष, विरुद्धक, वैश्रवण ।
५. थुन्पापुङ्गशि (चतुशीलव्रतोपासन मैत्रि संग्रह)
६. कुन्शाङ्खोर्लो (समन्तभद्र चक्र)

थुगु गुम्बाया दुने प्रतिष्ठापित मुख्य मुख्यपि देवदेवतापि :—

१. लामा चोङ्खापा (सुमतिसिद्धिकीर्ति), थ्वया जःखः वसपोलया प्रमुख शिष्य
२. लामा ग्याल्छाव्
३. लामा ख्येधुव्
४. भूस्पर्श मुद्रा शाक्यमुनि बुद्ध
५. भिक्षु शालिपुत्र
६. भिक्षु महामौङ्गल्यायन
७. सहस्रभुज लोकेश्वर
८. गुरु पद्मसम्भव
९. सिद्ध जेचुन्मिलारेपा
१०. भगवती आर्यतारा

११. लामा ग्याल्वाछेयाङग्याछो धयाह्य गुरुं थःगु ऋद्विवलपाखे ल्वहँतय् पालिखाँय् छाप अङ्कित यानाथकूगु 'प्रस्तरमय पादुका' प्रदर्शित यानातल । इमि थःगु परम्परागत धापू अनुसार थ्व पादुका चिह्न परम श्रद्धेय दलाई लामायागु ह्यापायागु जुनियागु पालिखाँय् धकाः पूजा सत्कार यानावइच्चंगु जुल ।

थ्व हे गुम्बाया चाकलय् खःपाखे माणेह्याखाङ धइगु छगू थाय् नं दु । थ्व थाय् नं व हे गुम्बा प्रतिष्ठाखुनु संतुं प्रतिष्ठा जूगु खः । थन दुने नं तःग्वःगु माणे छगः नं तयाः सार्वजनिक लागी पुण्य वृद्धि निम्ति स्थापना यानाः तयातल । थन दुने नं निम्नप्रकार भित्ती चित्र चवयाः शोभा वृद्धि यानातःगु खनेदु—

पूर्व भित्ती चित्र—

वैरोचन तथागत, गुरु वज्रसत्त्व, अक्षोभ्य तथागत, जाम्ध्वेन् लोशाङ धाग्पा, घोङसाङापा छेन्पो, ऊयाछुव्छ्वर्तेन् (बोधिचैत्य)

दक्षिण भित्ती चित्र—

शाक्यमुनि बुद्ध, शालिपुत्र, मौङ्गल्यायन, आर्यनागार्जुन, छ्वेसुम्ख्येन्पो (त्रिधर्माचार्य)—
उर्ग्येन्साङग्येह्लिपा, ख्येन्छेन्शिवाछो, छ्वेग्याल्थिसुङदेहुचेन् ।

पश्चिम भित्ती चित्र—

अमिताभ तथागत, अवलोकितेश्वर, आर्यतारा, वज्रपाणि, सप्तलोचनी तारा, पाल्देन्ह्यामो (छास्कामिनी) गोम्पोमानिनागपो ।

उत्तर भित्ती चित्र—

ऊयाछेन्ह्लिङपे, कुन्ख्येन्लोङछेन् ह्यावऊयाम्, धुव्छेन् थातोङ ग्याल्पो, रिग्जिन्जिग्मेलिङपा, मञ्जुश्री, अवलोकितेश्वर, वज्रपाणि ।

थुजाःगु किसिमया गुम्बा व माणेह्याखाङ माणेधुङ्ग्युर आदि निर्माण कार्य पूरा जुसेलि गुम्बाय् प्रतिष्ठापित भव्य सुन्दर मूर्तिया जीवन्त्यास व गुम्बा प्रतिष्ठाया लागी ख्याति प्राप्त विद्वान् लामा श्रीमान् सेरकोङछेन्श्याव् लामा रिम्पोछेयागु कुशल नेतृत्वय् विधि विधान सम्पन्न यासे मङ्गल उत्सव-पूर्वक थुगु गुम्बाया प्रतिष्ठा कार्य सुसम्पन्न जुल । थ्व प्रतिष्ठा कार्य सम्पन्न जूगु दिन खः—वि. सं. २०३३ साल फाल्गुणशुक्ल त्रयोदशी तदनुसार चैत्र २० गते खुनु । थुगु गुम्बा नव निर्मित जूगु जूसां थुकिइ खास न्हूगु नां प्रयोग मयासे ह्यापायागु साबिक पुलांगु 'शेधुव् गादेन् फेल्ग्येलिङ चुग्ह्याखाङ' धइगु नां हे कायम यानाव्यूगु जुल । थुकियात संक्षिप्त रूपं 'फेल्ग्येलिङ गुम्बा' जक धाइ ।

थुगु गुम्बा प्रतिष्ठा कार्य सम्पूर्ण जूगु उपलक्ष्य वसपोल सेरकोड्छेन्श्याव रिम्पोछे लामाजुं गेलुक्पा शासनया अतिकं प्रसिद्धगु सद्धर्मग्रन्थ जे चोङ्खापायागु आज्ञानुसार दय्कातःगु 'ह्लाम्रिम्छेन्पो' नामक सफूयागु व्याख्यान यांनाविज्यात । धयातःगु दु—भुगु सद्धर्मग्रन्थ व्याख्यान परिसमाप्तिखुनु सद्धर्म प्रेमी भाजु मय्जु श्रद्धालु उपासक उपासिकापिसं चह्ल्य याय्हःगु व्याक्व उपहार नं थ्व हे गुम्बायागु व्यवस्था निम्ति सङ्कल्प यांनाविज्यात ।

[८६] सिद्धि विहार

फेल्ग्येलिङ्ग गुम्बाया लिउनेपाखे बालाजु वनेगु लँया बिच्य साधारण किसिमगु छगू बाहाःचा दय्कातःगु दु । थ्व विहार बुँया दत्थुइ गुरु वज्रधरया मूर्ति प्रतिष्ठा यांनाः वज्रधातु चैत्य स्थापना यांनाः विहारया संज्ञा बियातल ।

थ्व विहार येँ सुरतश्री महाविहार (तःछेँबाहाः) या वज्राचार्य सिद्धिहर्षजुया सद्धर्मचित्त उत्पत्ति जुयाः व श्रीस्वयम्भू महाचैत्यया ईशान दिशाय् मुक्तिवती तीर्थया समीपय् भद्रवतीतट धयागु भचातर्गि धइगु थासय् 'बोधिमण्डपसिद्धि विहार' धइगु नामं साधारणगु छगू विहार दय्काथकूगु जुल ।

थुगु विहारय् ने. सं. १०६३ साल ज्याःपुत्लीया दिनय् वज्रधातु चैत्य स्थापना यांनाः विधिवत् प्रतिष्ठा यांनातःगु जुल ।

अभिलेख-सूची

स्वयम्भू पर्वतस्थान अन्तर्गत उरत्येथुरत्ये च्वंगु अभिलेखया संक्षिप्त विवरण सूची

ल्याः	प्राप्ति स्थान	लिपि, भाषा	संबत्	पर्याय	दानपति	कीर्ति
१.	स्वयम्भूया सखाः दयकेगु गालय् च्वंगु शिलापत्र ।	पूर्व लिच्छवी लिपि, संस्कृत भाषा		राजा [शंक] र देव	जुजु शंकरदेव	गिरिवर महाविहार स्वयम्भूस च्वंगु ... विहार निर्मित अक्षयदान स्वरूप जग्गा प्रदान याःगु लिस्से यज्ञ याःगु । थौं थुगु शिलापत्र लुइके मफया च्वंगु डु । थुकिया प्रतिलिपि उतार वीर पुस्तकालय (राष्ट्रिय अभिलेखा-लय) स सुरक्षित जुयाच्चंगु डु । जुजु अंशुवर्मा [व] ज्ञयानयात लक्ष्य यानाः [स्वय]म्भू चैत्य भट्टारकयात गुठी चलय् यायगु विषयय् बियातःगु आदेश ।
२.	स्वयम्भूया अज्ञात स्थानय् लानाच्चंगु शिलालेख ? वर्तमान थुगु अभिलेख गोकर्णेश्वर महादेवया चन्दन घाटय् यायगु यानातःगु जुल ।	" "		अंशुवर्मा	जुजु अंशुवर्मा	
३.	प्रतापपुर देगःया ईशान कुलांया फलय् च्वंगु पादपीठ लेख ।	उत्तर लिच्छवी लिपि, संस्कृत भाषा				बुद्ध मूर्ति प्रतिष्ठा यानाः पूजाया लागी गुठी तःगु ।

ल्याः	पाप्ति स्थान	लिपि, भाषा	संबत्	पर्याय	दानपति	कीर्ति
४.	स्वयम्भू बहीफल्य् च्वंगु रञ्जना शिलापत्रया शिरो भाग्य् छु अंश उल्लेख यानातःगु ।	प्रा. ने. अ. नेपाल भाषा	ने. सं. २४६			स्वयम्भू जीर्णोद्धार विषय्य् च्वया-तःगु ।
५.	स्वयम्भू बहीफल्य् च्वंगु थौकन्ह्य् मूर्ति संग्रहालय्य् दुने तयातःगु शिलापत्र ।	रञ्जना लिपि संस्कृत भाषा		विजयकामदेव?	शाक्यभिक्षु मैत्रिचन्द्र	स्वयम्भू महाचैत्य जीर्णोद्धार याना-व्यगु । शिरो भाग्य् शिलांकुश व लः चालनी अंकित यानातःगुलि ध्व थःगु हे विशेषता खः । आःतक्यागु अनुसन्धान्य् थुजाःगु प्रतीक लुयामवःनि । अभय व उफास्वां ज्वसे खुपा ह्लाः धारण यानाच्चंह्य् महामञ्जुश्री मूर्ति प्रतिष्ठा याःगु । थुकिइ जःखः धर्मश्रीमित्र-ज्ञानश्रीमित्र मूर्ति नं समावेश यानातःगु दु ।
६.	मञ्जुश्री (सरस्वती) स्थानया सतलय् दुनेच्चंगु पादपीठ लेख ।	भुजिमो लिपि ने. भा.	ने. सं. ३६५	अभय मल्ल	शाक्यभिक्षु भद्रपाल	सुल्तान समस्सुदीनं आक्रमण याय् धुंकाःलि २० दै लिपा विधिवत् स्वयम्भू महाचैत्य जीर्णोद्धार याःगु । गिरिवर महाविहार श्रीस्वयम्भू महाचैत्य व स्वयम्भूया एकजटा जीर्णोद्धार विषय नं उल्लेख खनेदइच्चंगु ।
७.	स्वयम्भू वायव्य कुलां चःस्वां सिमाया कवस्सं च्वंगु शिलापत्र ।	ने. अ. सं. ने. भा.	ने. सं. ४६२	जयाज्जुन, जयस्थिति मल्ल	राजहर्ष भल्लोक	
८.	इतुं बाहाःया चीबाहाःघःया देगःया फलय् च्वंगु शिलापत्र ।	ने. अ. सं. भा.	ने. सं. ५०२	जयस्थिति मल्ल	महामन्त्री मदन-राम बर्द्धन	

ल्याः	प्राप्ति स्थान	लिपि, भाषा	संवत्	पर्याय	दानपति	कीर्ति
६.	स्यंगु बहीया मूल देवता भगवान् बुद्धया सिंहासन लेख ।	ने. अ. ने. भा.	ने. सं. ५१३	जयस्थिति मल्ल	जोतिराज हाकु भा, मदुटोल	स्वयम्भू महाचैत्यया अग्रस वही दयकाः व इतुं बाहाः या शाक्यभिक्षु श्रीमधंजुयात नित्यपूजा याकाः लःल्लानातःगु ।
१०.	देवपत्तन पशुपतिनाथया क्याम्पय् दुनेच्चंगु शिलापत्रय् नं चर्चा जुयाच्चंगु दु ।	ने. अ. सं. ने. भा.	ने. ५३३	जयज्योतिर्मल्ल	जयज्योतिर्मल्ल	स्वयम्भू धर्मधातु वागीश्वर जीर्णो- द्धार यानाव्यूगु लिस्से पशुपतिनाथ मन्दिरयागु नं ।
११.	ताशिगोर्मा चैत्यया लिकच्चंगु चिन्तामणि लोकेश्वर पादपीठ लेख । वर्तमान ध्व मूर्ति मूर्तिसंग्र- हालयय् दुने तयातल ।	ने. अ. ने. भा.	ने. सं. ५३६		वणिक जीव भारो	व्यापारलक्ष्मी वृद्धि कामना यासे चिन्तामणि लोकेश्वरया प्रस्तर मूर्ति स्थापना याःगु जुल ।
१२.	पुलां गुम्बाया क्वस्सं चीवाहाःया लिकच्चंगु शिलापत्र ।	ने. अ. ने. भा.	ने. सं. ६४२		जयन्तराज भारो	स्वयम्भूया न्ह्योने आर्यावलोकितेश्वर व वज्रपाणि स्थापना यानातःगु ।
१३.	बशिगाः पाखे च्वंगु चैत्यस अङ्कित लेख ।	ने. अ. ने. भा.	ने. सं. ६८०	नरेन्द्र मल्ल	रूपतेज वज्राचार्य	चैत्य स्थापना यासे अहोरात्रयज्ञ याःगु । अभिलेख अस्पष्ट ।
१४.	शान्तिपुरया चाकलय् च्वंगु हलाहल- लोकेश्वरया पादपीठ लेख ।	" "	ने. सं. ६६६			
१५.	मूर्ति संग्रहालय लुखाया लिकच्चंगु महाकाल पादपीठ लेख ।	" "	ने. सं. ६६६		जय सदाशिव हाकुभारो ताम्र- कार धर्मगोष्ठी	वज्रमहाकालया भव्य रूप मूर्ति दयकाः स्थापना याःगु । सह
१६.	स्यंगु बहीया दुनेच्चंगु महाकालया पादपीठ लेख ।	" "	ने. सं. ७०६			

ल्याः	प्राप्ति स्थान	लिपि, भाषा	संवत्	पर्याय	दानपति	कीर्ति
१७.	स्वयम्भू महाचैत्यया पूर्वपाखे हल-पतिइ च्वंगु सुवर्ण छत्र लेख ।	ने.अ. ने.भा.	ने. सं. ७११		अभयसिंह ताम्र-स्वयम्भू कार अभयजु शाक्यभिक्षु आदि	महाचैत्यया शोभायमान जुइक सुवर्ण छत्र द्रहलप्युगु ।
१८.	वायव्यकुलां चःस्वां सिमाया क्वस्सं च्वंगु शिलापत्र ।	" "	ने. सं. ७१५	शिवसिंह मल्ल	शाक्यभिक्षु जयलक्ष प्रभृति	स्वयम्भू महाचैत्य जीर्णोद्धार ।
१९.	नैऋत्य कुलांया तःग्बःगु चीवाहाःया क्वस्सं च्वंगु शिलापत्र ।	" "	"	"	काजिमान	चैत्य स्थापना यानाः अहोरात्र यज्ञ याःगु ।
२०.	स्वयम्भू पुलां गुम्बाया न्ह्योने पाखे च्वंगु शिलापत्र ।	" "	ने. सं. ...	"	वज्राचार्य	श्रीसाहो गुं धर्मधातु वागेश्वर पञ्च-तथागत चैत्य भराडसके अहोरात्र यज्ञ याःगु ...
२१.	वसुपुर छैया ऊयाःक्वताःपौया काण्ठाभिलेख ।	रञ्जना लिपि सं. भा.				पुण्य प्रशंसा विषयय् कयाः उल्लेख यानातःगु ।
२२.	स्यंगु बहीफल्य् च्वंगु पद्मपाणि लोकेश्वरया पादपीठ लेख ।	ने.अ. ने.भा.	ने. सं. ७२०		धर्म कंसाकार, केल	... यहदात्पुण्यत्रैषुदान..... शुद्ध पाव
२३.	स्यंगु बहीफल्य् च्वंगु अमोघपाश लोकेश्वर पादपीठ ।	" "	ने. सं. ७२२		मधनसिंह भारो शान्तिगर स्थान	पद्मपाणि लोकेश्वर स्थापना ।
२४.	चःस्वां सिमाया क्वस्सं च्वंगु शिलापत्र ।	" "	ने. सं. ७२५	शिवसिंह मल्ल	जयलक्ष शाक्यभिक्षु	अमोघपाश लोकेश्वर स्थापना । स्वयम्भूस वज्रमलः जवयाःलि क्षतिग्रष्ट जुसैलि जीर्णोद्धार याना-व्युगु ।

ल्याः	प्राप्ति स्थान	लिपि, भाषा	संबत्	पर्याय	दानपति	कीर्ति
२५.	स्यंगु बहोया दुनेच्वंगु अंगलय् च्वंगु लोकेश्वर विशेष मूर्तिया पादपीठ ।	ने.अ. ने.भा. " " " "	ने. सं. ७४३ ने. सं.			दिवंगत अबुजुया नामं ... मूर्ति स्थापना ।
२६.	अग्निपुरस च्वंगु चतुर्भुज मञ्जुश्रीया पादपीठ ।	" "	७५६			
२७.	स्वयम्भू जंगलय् च्वंगु विशालमय अक्षोभ्य तथागतया क्वस्सं च्वंगु शिलापत्र ।	ने. अ. सं. ने. भा.	ने. सं. ७५७	लक्ष्मीनरसिंह मल्ल	रथन भारो	स्वयम्भू जंगलय् विशालमय अक्षोभ्य तथागत स्थापना यासे, लिस्से ७५६ सालं गुठी तःगु ।
२८.	स्वयम्भू महाचैत्यया वैरोचनया देवापाखे च्वंगु शिलापत्र ।	ने.अ. ने.भा.		"		
२९.	स्यंगुवनय् सूर्यमुख गणेशया पूर्वपाखे बुँया द्यागिमय् च्वंगु शिलापत्र ।	" "	ने. सं. ७५६	जयप्रताप मल्ल		
३०.	स्यंगुवनया पश्चिमपाखे पतिशा-देवीया क्वस्सं च्वंगु शिलापत्र ।	" "	ने. सं. ७६१	"	जयतसिंह शाक्य-चैत्य जीर्णोद्धार । भिक्षु, नवघल देवसत्य भारो	
३१.	मूर्ति संग्रहालय लुखाया लिक्च्वंगु महाकाल पादपीठ ।	" "	"		वज्रमहाकाल स्थापना ।	
३२.	स्वयम्भू बहोफल्य् च्वंगु शिलाभिलेख ।	" " चीनाक्षरञ्च	ने. सं. ७६७	"	स्त्रीन, चीन देसया	स्वयम्भू महाचैत्यस लुँपौ द्रहलप्युगु । ध्व अभिलेख पुरातत्त्व वि- भागया रेकर्ड अनुसार च्वयागु जुल । तर शिलाभिलेख लुइके मफु ।
३३.	स्वयम्भू जंगलया उत्तरपाखे द्यपस च्वंगु पाटीया लिउने च्वंगु	ने.अ. ने.भा.	"	"	जिवराम महर्जन क्ववद्वटोल	गोमाता प्रीतिन जग्गा तोताब्यूगु ।

ल्याः	प्राप्ति स्थान	लिपि, भाषा	संबत्	पर्याय	दानपति	कीर्ति
शिलापत्र ।						
३४.	स्वयम्भू अमिताभ बुद्धया जःपाखे च्वंगु शिलापत्र ।	ने. अ. सं. ने. भा.	ने. सं. ७७०	जयप्रताप मल्ल	जुजु कवीन्द्र प्रताप मल्ल	मञ्जुश्री कृतरम्यभूमि- धइगु संस्कृत भाषां स्तुति यानाःलि शुकिइ बौद्ध, शैव, वैष्णव एवं शाक्तपिनि दर्शनया कारणया नं कारण स्वरूप 'श्रीस्वयम्भू महाचैत्य' धकाः स्तोत्र यानाः शिलालेख अङ्कित यानाव्यूगु जुल ।
३५.	भुइल्यःया दक्षिणपाखे च्वंगु चैत्यया लिकच्चंगु शिलापत्र ।	ने. अ सं. ने. भा.	ने. सं. ७७३	जयप्रताप मल्ल	धर्मज्योति कंसाकार, केल महारानी अनन्तप्रिया देवी	जुजु प्रताप मल्ल सिंहासनय् बिज्याकाः सम्यक् भोजन न्यायकूगु । श्रीगोपुच्छ पर्वत (स्वयम्भू) स अनन्तपुर देगः दय्काः व नील सरस्वती उग्रतारा एकजटी स्थापना यानाव्यूगु लिस्सें थः स्वामी कवीन्द्र मल्लं दय्कूगु वज्रयोगिनी स्तोत्र अङ्कित यानाव्यूगु जुल ।
३६.	अनन्तपुरया लिकच्चंगु शिलापत्र ।	ने. अ सं. ने. भा.	ने. सं. ७७५	"		
३७.	अक्षोभ्य तथागतया लिकच्चंगु मारविजय बुद्धया पादपीठ लेख ।	ने. अ. ने. भा.	ने. सं. ७७६		शाक्यभिक्षु चिन्तामुनि, सा- ह्येगु महाविहार ब्यूगु ।	काय धनदेवया स्मृतिस मार विजय बुद्ध स्थापना याना
३८.	कर्मराज गुम्बाया दुने महा- मञ्जुश्रीया आसन त्वाकलय् ।	"	ने. सं. ७७७		शिवराम	धर्मश्रीमित्र, मोक्षदादेवीया दत्थुइ गुरु महामञ्जुश्री स्थापना ।

ल्याः	प्राप्ति स्थान	लिपि, भाषा	संबत्	पर्याय	दानपति	कीर्ति
३९.	शान्तिपुरया दुने लुखाया लिकच्वंगु शिलापत्र ।	ने. अ. सं. ने. भा.	ने. सं. ७७८	जयप्रताप मल्ल	जयप्रताप मल्ल	अनावृष्टि दोष शान्ति निर्मित जुजु स्वयं शान्तिपुरीइ दुने प्रवेश जुयाः वृष्टिचिन्तामणि स्तोत्र यानाः जल वृष्टि यानाः नेपालय् सहकाल यानाब्यूगु खँ न्ह्यथनातःगु ।
४०.	कर्मराज गुम्बाया दुनेच्वंगु सृष्टिकर्ता लोकेश्वरया पादपीठ लेख ।	ने. अ. ने. भा.	ने. सं. ७८०			
४१.	स्यंगु बहीया पिने फलय् च्वंगु वज्रमहाकालया पादपीठ ।	" "	ने. सं. ७८१		जयसिंह	अबुया नामं वज्रधातु चैत्य, कलाःया नामं तारादेवी, काय्या नामं वज्रमहाकाल व पत्नीया नामं महाकाली स्थापना ।
४२.	स्यंगु बहीफलय् तयातःगु वसुन्धरा वैरोचन पादपीठ ।	" "	" "	कवीन्द्र प्रताप मल्ल	रामदेव भारो, मखन	स्वयम्भूया चैत्य न्ह्योने वज्रधातु चैत्य प्रतिष्ठा एवं जीर्णोद्धार जूगु उपलक्षय् वैरोचन वसुन्धरा स्थापना । अक्षोभ्य बुद्ध मूर्ति स्थापना ।
४३.	हारतो लिउने अक्षोभ्य बुद्धया पादपीठ ।	" "	" "		कुशल बाबुदेव मानन्धर नवपुखू	
४४.	कर्मराज गुम्बाया दुनेच्वंगु पद्मपाणि मञ्जुश्री त्वाकलय् ।	" "	" "		उल्लासि थापित	स्वयम्भू धर्मधातु स्थानय् पद्मपाणि मञ्जुश्री परिवार मूर्ति स्थापना ।
४५.	क्वाःपाःछेया न्ह्योने अक्षोभ्य बुद्धयागु आसन ।	" "	" "		कुशल मानन्धर	अक्षोभ्य बुद्ध स्थापना ।
४६.	अमिताभया न्ह्योनेच्वंगु तःग्वःगंया	" "	ने. सं.		विश्वभारो	स्वयम्भूयात घण्ट दहलप्यगु ।

ल्याः	प्राप्ति स्थान	लिपि, भाषा	संबत्	पर्याय	दानपति	कीर्ति
	क्वस्सं च्वंगु शिलापत्र ।		७८२	स्थापित		
४७.	विष्णुमतीया ताफुतिइ च्वंगु शिलापत्र ।	ने.अ. ने.भा.	ने. सं.	जयप्रतापमल्ल	जयप्रताप मल्ल	स्वयम्भू पञ्चतथागत व विजयेश्वरी निर्मित ताफू निर्माण यानाव्यूगु ।
४८.	मूर्ति संग्रहालय क्वस्सं रेष्टुराया न्ह्योने फलय् च्वंगु शिलापत्र ।	" "	" "	" "	शिवभारो सत्य- हरी भारो, केल	स्वयम्भूइ महादीप, चाकःदलू, त्वाःदिवा आदि मतपूजा यानाः पाठ यायगु गुठी तयाव्यूगु ।
४९.	स्यंगुःया उत्तरपाखे तकिया लिकच्चंगु शिलापत्र ।	" "	ने. सं.		विष्णुसिंह मुकुन्द	सूर्यग्रहणया दिनय् श्रीगोमाता प्रीति सिंह भारो, छुलंबु जग्गा वाजु यानाः तोता- यिताखा ब्यूगु । शिर्षचिन्ह चैत्यया जःखः सा इहं तयातःगु ।
५०.	सुवर्णमय वज्र व धर्मधातुया स्वर्णलेख ।	" "	ने. सं.	" "	जयप्रताप मल्ल	श्रीस्वयम्भू धर्मधातु वागीश्वरया न्ह्योनेच्चंगु धर्मधातु मण्डल शोभा निर्मित सुवर्णया मण्डल व वज्र दुन्ता ।
५१.	प्रतापपुरया लिकच्चंगु शिलापत्र ।	" "	ने. सं.		ज्ञानज्योति	स्वयम्भू तैनय् ५५ त्वाथः जोर्णो- कसाकार द्वार ।
५२.	क्वाःपाःछेया न्ह्योनेच्चंगु बुद्ध पादपीठ ।	" "	७९४			
५३.	स्यंगु बहीया फलय् च्वंगु अक्षोभ्य मूर्ति पादपीठ ।	" "	ने. सं.			
५४.	मूर्ति संग्रहालयय् दुने च्वंगु शिलापत्र ।	" "	७९६			
		" "	" "	जयप्रतापमल्ल	गुनज्ञानज्योति	दिवंगत शिलाकार गुरुदेवया नामं अक्षोभ्य बुद्ध मूर्ति स्थापना ।
		" "	" "	प्रमुखं १८	सल्लूसेवा खलःतसे	स्यंगुपाःया ५५ त्वाथः व मेगु न्हूगु २० त्वाथः

ल्याः	प्राप्ति स्थान	लिपि, भाषा	संबत्	पर्याय	दानपति	कीर्ति
५५.	स्यंगु तैया चैत्यया क्वस्सं च्वंगु शिलापत्र ।	ने.अ. ने.भा.	ने. सं. ७६७			दय्काःलि जीर्णोद्धार याय्गु गुठी तःगु ।
५६.	हारती देगःया लिउनेच्वंगु पद्यपाणि पादपीठ ।	" "	" "		विह्लामन मानन्धर	दिवंगत पुत्रया शान्ति कामना यासे पद्यपाणि लोकेश्वर स्थापना ।
५७.	अमिताभया पाखे च्वंगु तःग्वःगु गं लिकच्वंगु शिलापत्र ।	" "	" "		भिक्षुणी माता मांडु	स्वयम्भूस महाकाल स्थापना यासे धर्मशाला दय्काव्यूगु म्हाय्मय्जु शुभघरीया नामं ।
५८.	स्यंगु वहीफल्य् च्वंगु नामसंगीति पादपीठ ।	" "	ने. सं. ७६८		मञ्जुदेव	दिवंगत अबुजुया नामं नामसंगीति स्थापना याःगु ।
५९.	शान्तिपुरया दुनेच्वंगु लुं सिया खापास च्वंगु किङ्किनी जाल अभिलेख ।	" "	ने. सं. ७६९	जय मल्ल	शाक्यभिक्षु चिन्तामुनि	शान्तिपुर महासिद्ध गुहास च्वंगु मूलुखा निम्ति लुं सियाः किङ्किनी-जाल तयाव्यूगु ।
६०.	बशिगाःपाखे च्वंगु अमिताभ बुद्धया आसन लेख ।	" "	ने. सं. ८०४		शिवराम	अमिताभ बुद्ध स्थापना ।
६१.	किण्डोल विहार्य् फल्य् च्वंगु शिलापत्र ।	" "	ने. सं. ८०५	जय पार्थिवेन्द्र	शाक्यभिक्षु सिङ् इतुं बाहाः	किण्डोल विहारस अहोरात्र यज्ञ याःगु ।
६२.	भुइख्यःया चौघराया अंगलय् च्वंगु शिलापत्र ।	" "		"	रामकृष्ण भारो लगन	भुइख्यलय् चैत्य, सतः व जःधुं स्थापना ।
६३.	किनवाहाःया पिने सिमा क्वस्सं च्वंगु शिलापत्र ।	" "	ने. सं. ८०६		वीर शाक्यभिक्षु	धर्मशाला सतः निर्माण ।

ल्याः	प्राप्ति स्थान	लिपि, भाषा	संबत्	पर्याय	दानपति	कीर्ति
६४.	स्यंगु पूर्वपाखे विशाल अक्षोभ्य बुद्धया पाखे सिमा क्वस्सं च्वंगु शिलालेख ।	रञ्जना सप्ताक्षरी कूटाक्षर				थुगु शिलालेख्य खालि सप्ताक्षरी कूटाक्षर आखः छगः जक कियातःगु ।
६५.	किन्नुबाहाल्य दुहांवनेवं जःपाखे अंगलय् च्वंगु शिलापत्र ।	ने. अ. सं. ने. भा.	ने. सं. ८०७	जय पार्थिवेन्द्र	शाक्यभिक्षु श्रीसिद्धः	विधिपूर्वक किन्नुबाहाः दयकाः प्रतिष्ठा खनु जुजु समेत विज्याकूगु ।
६६.	स्यंगु तैया चैत्यया फलय् च्वंगु शिलापत्र ।	ने. अ. ने. भा.	ने. सं. ८०६	जय भूपालेन्द्र	रामभारो, त्यौड	स्यंगुस चैत्य स्थापना ।
६७.	स्यंगु बातैनय् चतुर्महाराजया न्ह्योनेच्वंगु शिलापत्र ।	" "	" "		कुसुमसिंह भारो शान्तिगर	चैत्य व कुमार बुसाधन यायत्त व सख्वाःपा यानाः मत छव्यकेगु गुठी तयान्यगु ।
६८.	नागपुरपाखे च्वंगु अमिताभ बुद्धया आसन ।	" "	ने. सं. ८१४		हरिकृष्ण प्रभृति	अमिताभ बुद्ध स्थापना ।
६९.	शान्तिपुरया चाकलय् च्वंगु हलाहल लोकेश्वरया पादपीठ ।	" "	ने. सं. ८१७		रच्छमीमयि ताम्रकार	हलाहल लोकेश्वर प्रतिष्ठा ।
७०.	स्यंगु त्वाथःया चैत्ययाथाय् च्वंगु शिलापत्र ।	" "	ने. सं. ८१६		राम भारो	स्वयम्भूस चैत्य स्थापना ।
७१.	प्रतापपुरया त्वाथःया शिलालेख ।	" "	ने. सं. ८२०	जय भूपालेन्द्र		नरदेवोइ च्वंपिसं तयातःगु ।
७२.	धर्मचक्र गुम्बाया न्ह्योने च्वंगु शिलापत्र ।	" "	ने. सं. ८२२	भाष्कर मल्ल	धर्मराय सिद्धि-मञ्जुश्रीयाथाय् चपाः दयकाब्यूगु । राय प्रमुख	
७३.	मञ्जुश्री तैया च्वय् च्वंगु ब्यू स्वानातःगु शिलापत्र ।	" "	" "			सरस्वतीयाथाय् सतः पाटी दयकूगु ।

ल्याः	प्राप्ति स्थान	लिपि, भाषा	संवत्	पर्याय	दानपति	कीर्ति
७४.	नागपुरया लिकच्वंगु महामञ्जुश्रीया ने.अ. ने.भा. आसन ।	ने. अ. ने. भा.	ने. सं. ८२२		जमनसिंह	स्वर्गीय देवसिंहया नामं मञ्जुश्री, हेरकीमयिया नामं सरस्वती स्थापना ।
७५.	स्वयम्भू श्रीअमोघसिद्धिया पादपीठ लेख ।	"	ने. सं. ८३३	भाष्कर मल्ल	महारानी भुवनलक्ष्मी देवी	स्वयम्भूया पिखाद्वार्य धातुया सुवर्ण लेपित यासे चतुर्थागत स्थापना
७६.	किनवाहाःया छःयाथाय् बैय् स्वानातःगु शिलापत्र ।	"	ने. सं. ८३७	जयमहीन्द्रसिंह	जुद्ध महर्जन, तंलाछि	किण्डोलय् सतः दय्कूगु ।
७७.	ख्वाउँ बुँगाःया पःखालय् ।	"	ने. सं. ८४०			अस्पष्ट शिलालेख ।
७८.	मञ्जुश्री स्मृति चैत्यय् च्वंगु अमिताभ बुद्धया पादपीठ लेख ।	रञ्जनाक्षर ने. भा.	ने. सं. ८६४		मस्करसि, केन्देछे	थः पूर्वजपिनिगु संस्मरणय् अमिताभ बुद्ध स्थापना ।
७९.	वैरोचनया लिकसं च्वंगु वज्र-धात्वेश्वरीया प्रस्तर तोरण लेख ।	ने.अ. ने.भा.	ने. सं. ८७२		ज्ञानपतिदेव	वैरोचन बुद्धया शक्तिवज्रधात्वेश्वरी-यात प्रस्तरमय तोरण हुन्ता याःगु ।
८०.	क्वाःपाःछेया लुखा खापाय् च्वंगु लेख ।	"	ने. सं. ८७३		अनन्तसिंह तुलाधर प्रमुखं	श्रीहारिती पटुनिमाजु प्रीतिन लिइया खापा दय्काः हुन्ता ।
८१.	स्वयम्भू नैऋत्य कुलांया तःग्वःगु चैत्य क्वस्सं च्वंगु शाक्यमुनि पादपीठ ।	"	"		यकूवाहाः मानध्वज, धन-देव प्रभृति, खिचापुलू	भूस्पर्श मुद्रा शाक्यमुनि बुद्ध स्थापना ।
८२.	स्यंगु बहीफलय् च्वंगु संसःल्वह (वर्तमान मूर्ति संग्रहालयय् तयातःगु) ।	"	ने. सं. ८७६	जयप्रकाश मल्ल	मेघसर्वज्ञ व वज्र आयुरीष-मणि लामाजु	स्वयम्भू महाचैत्य जीर्णोद्धार विषयय् वर्णन यानातःगु । थुगु शिलापत्र मि नयाः खण्डित जुयाच्वंगु हु ।

लयाः	प्राप्ति स्थान	लिपि, भाषा	संवत्	पर्याय	दानपति	कीर्ति
८३.	स्वयम्भूया दकल्य सकलय् तःग्वःगु शिलापत्र मूर्ति संग्रहा- लयया लिकच्वंगु ।	कूटाक्षर ने.अ. ति. अ. ने. ति. भा.	ने. सं. ८७६	जयप्रकाश मल्ल	धर्मस्वामि मेघसर्वज्ञ व वज्रआरीषमणि लामा स्यनाःलि श्यामार्पा लामाजु पौसा तयाथकू खः ।	स्वयम्भू महाचैत्य जीर्णोद्धार सम्बन्धी सविस्तार वर्णन यानातःगु । थुगु संसःत्वहं ह्वापायागु मि नयाः स्यनाःलि श्यामार्पा लामाजु पौसा तयाथकू खः ।
८४.	स्यंगु गःया न्ह्योने बुद्ध पादुका पाखे च्वंगु शिलापत्र ।	ने.अ. ने.भा.	ने. सं. ८८४	"	जेत मानन्धर प्रभृति	स्वयम्भूयात जग्गा प्रीति याःगु ।
८५.	शान्तिपुरया दुनेच्वंगु शिलापत्र ।	" "	ने. सं. ८८५	"	धनसि तुलाधर तंलाछि	शान्तिपुरस सुग्घर सफा याय्गु न्हू वन्देज ।
८६.	मञ्जुश्रीया पःखाःया लिउने च्वंगु शिलापत्र ।	ने.अ. ने.भा.	ने. सं. ८८६	"	सहजानन्द शाक्य भिक्षु व स्थानीय कूगु । जन	मञ्जुश्रीयाथाय् पःखालं चाःहुइ-
८७.	किण्डोलया मूलपुया दत्थुइ च्वंगु चैत्यया शिलापत्र ।	" "	"	"	विष्णुलक्ष्मी समेत पुखुलद्याङ्क	चैत्य दय्काब्यूगु ।
८८.	स्वयम्भूया उत्तरपाखे च्वंगु चैत्य त्वाथलय् च्वंगु शिलापत्र ।	" "	"	"	गार्वासि तुला- धर, असन	चैत्य जीर्णोद्धार ।
८९.	किन्वाहाः वनेगु मूलपुया सिथ्यसं च्वंगु चौताराया शिलापत्र ।	" "	ने. सं. ९००	श्री ५ रणबहादुर	परिखदेव मान- न्धर, ग्वाछे	पूर्वजपिनिगु नामं चपाः दय्काः गुठी तःगु ।
९०.	स्यंगु वहीया लुखाया जःपाखे च्वंगु शिलापत्र ।	" "	"	"	मुगल वेखासिदेव शाक्यभिक्षु,	ने. सं. ८३८ सालं दय्कूगु आरती गुठीया छेँ जीर्णोद्धार यानाब्यूगु ।

ल्याः	प्राप्ति स्थान	लिपि, भाषा	संबत्	पर्याय	दानपति	कीर्ति
					नःघल	
६१.	वशिगाःपाखे च्वंगु अक्षोभ्य बुद्धया पादपीठ ।	ने.अ. ने.भा.	ने. सं. ६००		कृष्ण मानन्धर मरु	अक्षोभ्य तथागत स्थापना ।
६२.	स्यंगुया दक्षिणपाखे च्वंगु त्वाथःया शिलापत्र ।	" "	ने. सं. ६०२		ज्ञानवन्त, मखनटोल	स्वयम्भूस चैत्य स्थापना ।
६३.	पलेस्वां पुखुया फलेचा अंगलय् च्वंगु शिलापत्र ।	" "	ने. सं. ६०३		धंजु कंसाकार, केल	फलेचा दय्काव्यूगु ।
६४.	क्वाःपाःछेया न्होनेच्वंगु शिलापत्र ।	" "	ने. सं. ६०४		छत्रसि तुलाधर असन	भुइख्यःया चौघरा ११ कवःया प्रमाणं दय्काव्यूगु ।
६५.	भुइख्यःया चौघराया अंगलय् च्वंगु शिलापत्र ।	" "	ने. सं. ६०५		शाक्यभिक्षु जयपतिदेव, क्वहिति	मञ्जुश्रीया न्होनेच्वंगु चपाः दय्काः गुठी तथाव्यूगु । थुगु पुण्यं भावी सन्तान सकल गुण ज्ञान शास्त्र विद्या लाभ जुइमा धयातःगु दु ।
६६.	मञ्जुश्रीया सतलय् च्वंगु शिलापत्र ।	" "	" "		धन्तसि तुलाधर यतखा	स्वयम्भूस चैत्य दय्कूगु ।
६७.	स्वयम्भूया उत्तरपाखे चैत्यया त्वाथलय् च्वंगु शिलापत्र ।	" "	ने. सं. ६०६	श्री ५ रणबहादुर	तुगु थाकुलि समेत	शान्तिपुरीस फलेचा दय्कूगु ।
६८.	शान्तिपुर फलेचाया अंगलय् च्वंगु शिलापत्र ।	" "	ने. सं. ६०७		ज्ञानपति शाक्य भिक्षु	भूमिक्षेत्रय् सम्यक् भोजन याकूगु ।
६९.	भुइख्यःया चौघराया त्वहंया मण्डल लेख ।	" "	ने. सं. ६०८	"	धर्मसिद्धिसागर	नेपाल देवस्थल तीर्थ दर्शन निमित्त
१००.	हारती देगःया गजूया क्वस्सं च्वंगु	" "	ने. सं.	"		

ल्याः	प्राप्ति स्थान	लिपि, भाषा	संबत्	पर्याय	दानपति	कीर्ति
	भगिण्या सिजःपौ ।		६१०		सेन श्यामार्पा लामाजु क्रिगूगु अवतारी	विज्याःगु बेलय् हारतीया देगलय् लुँ पलि च्यंगु । थुगु कार्यय् सिजः धानि ७३, लुँ तोला १००, पाधा धानि २ खर्च जूगु व लिस्से हिग्वाः, सप्पा, कर्मियात तूगु ज्याला समेतं उल्लेख यानातःगु दु ।
१०१.	स्वयम्भूया चैत्यया फः क्वस्सं च्वंगु शिलापत्र ।	ने.अ. ने.भा.	ने. सं. ६१२		जिवनर धनशंकर नापित, तलवोटोल	चैत्य जीर्णोद्धार ।
१०२.	प्रतापपुरया लिक्च्वंगु दिव्य घण्टाभिलेख ।	" "	" "	श्री ५ रणबहादुर	न्हपा प्रताप मल्लं दयकाथकूगु जीर्ण जुयाः व योगनरेन्द्र मल्लं तयाथकूगु घण्ट जीर्ण जुयाः पुनः लामाजु व वेस्येत उग्येन् निह्वासिनं घण्ट दुन्ता याःगु ।	
१०३.	स्वयम्भूया चैत्यया फः क्वस्सं च्वंगु ।	" "	ने. सं. ६१३		जगतसि लोहा- कार, वलाछि टोल	चैत्य स्थापना ।
१०४.	शान्तिपुरया मूलुखाया लुँखापाय् क्रियातःगु ।	" "	ने. सं. ६१४	" "	धनदरसि ताम्रकार, बहिलिकोरछे गोवद्धनसि तुलाधर, असन	श्व लुँखापा तःगु बेलय् भोटु पाण्डेया निर्देशनकथं तःगु आशय खनेदु । चैत्य निर्माण ।
१०५.	स्वयम्भूया पूर्वपाखेया चीबाहाःया त्वाथलय् च्वंगु शिलापत्र ।	" "	" "			

ल्याः	प्राप्ति स्थान	लिपि, भाषा	संबत्	पर्याय	दानपति	कीर्ति
१०६.	स्वयम्भूया नैऋत्य कुलांया तःग्वःगु ने.अ. ने.भा. चीवाहाः क्वस्सं च्वंगु शिलापत्र ।	ने. सं. ६१४	ने. सं. ६१४	श्री ५ रणबहादुर	कोठुपसल भाजुमचा धर्काननि	चैत्य जीर्णोद्धार ।
१०७.	स्यंगु वहीया मूल देवता अक्षोभ्य बुद्धया सिंहासन लेख ।	"	ने. सं. ६१५		पुण्यलक्ष्मीया काय् तमकार तधि, भाजु, पतांसि समुच्चयनं	स्यंगु वहीया मूलदेवता वज्रासन स्थित श्रीअक्षोभ्य बुद्ध दयकाः जीर्णोद्धार याःगु ।
१०८.	स्वयम्भूया उत्तरपाखे च्वंगु चीवाहाः त्वाथल्य् च्वंगु शिलापत्र ।	"	ने. सं. ६१६		कल्याण तुलाधर चैत्य स्थापना । असन	
१०९.	शान्तिपुरया न्ह्योने च्वंगु चीवाहाः क्वस्सं शिलापत्र ।	दे.अ. प.भा.	वि. सं. १८५६		श्रीवन्धुराणाया श्रीमती जय- कुमारी रत्नसि	स्वयम्भूस चैत्य स्थापना ।
११०.	शान्तिपुरया मूलुखाय् ग्वयातःगु ताजुया कण्ठी लेख ।	ने.अ. ने.भा.	ने. सं. ६२०			थुगु धातुया लुं सिया कण्ठीस वज्रकर्ति पात्र व अचलवीरया खङ्ग चिन्ह अंकित यानाः दयकाः द्वहलपातःगु ।
१११.	भुइख्यःया चाकःसिमाया थासय् च्वंगु शिलापत्र ।	"	"		साहु छत्रसिंह प्रभृति असन	थुजाःगु किसिमया जुताः गनं विहारय् देवमन्दिरय् खनेमहु धाःसां ज्यु । थुकिइ थःगु हे विशेषता दु । भुइख्यल्य् चौघराफल्य् दयकाःलि हित जीर्णोद्धार, निगू बुंगाः

ल्याः	प्राप्ति स्थान	लिपि, भाषा	संबत्	पर्याय	दानपति	कीर्ति
११२.	सरस्वतीस्थान वनेगु लैय् च्वंगु शिलापत्र ।	ने.अ. ने.भा.	ने. सं. ६२१		कृष्ण तुलाधर	दयकाः चौघरास अक्षोभ्य बुद्ध, हितिइ त्रिरत्न देवता स्थापना यासे गुठी समेत तःगु ।
११३.	हारती देगःया लुँगजुलिइ अंकित अभिलेख ।	दे.अ. प.भा.	वि. सं. १८५८	श्री ५ गीर्वाणयुद्ध	श्री ५ गीर्वाण- युद्ध विक्रम मुमा चैत्य चह्य् याःगु । महारानी सुवर्ण- प्रभादेवी	श्रीहारतीदेवीयात लुँगजू सुवर्ण
११४.	शान्तिपुरय् च्वंगु सिजःपौ ।	दे.अ. सं.भा.	शा. सं. १७२१	"	श्री ५ गीर्वाणयुद्ध	शान्तिपुरस महापूजा निर्मित २२४ क्षेत्र कूशोदक जगा द्रुहलपाः सुवर्ण रूप्य दक्षिणा सहित यासे गुठी चल्य् याय्गु खँ न्ह्यथना- तःगु ।
११५.	शान्तिपुरया फलेचाया अंगलय् च्वंगु शिलापत्र ।	ने.अ. ने.भा.	ने. सं. ६२५		आशामदु	तीर्थसेवा न्यायकाः क्वचाःगु लस- ताय् फलेचा दय्काव्यूगु ।
११६.	स्वयम्भूया दक्षिणपाखेया चीवाहाः क्वस्सं च्वंगु शिलापत्र ।	"	ने. सं. ६२६	भाजुर्धंसि तुला- धर, असन		चैत्य निर्माण विषय ।
११७.	स्वयम्भू त्वाथःया चैत्य क्वस्सं च्वंगु शिलापत्र ।	"	ने. सं. ६२७		चिकिधिकः आदि	स्वयम्भूया पुन्हीसेवा खलकं फलेचा दय्कूगु ।
११८.	स्यंगु तैया त्वाथलय् च्वंगु शिलापत्र ।	"	ने. सं. ६२८			

ल्याः	प्राप्ति स्थान	लिपि, भाषा	संवत्	पर्याय	दानपति	कीर्ति
११६.	मञ्जुश्रीया पःखालय् च्वंगु ।	ने.अ. ने.भा.	ने.सं. ६२८		लक्ष्मीसिंह	मञ्जुश्रीस्थानय् पःखाः दय्कूगु ।
१२०.	मञ्जुश्रीया दुने चाकलय् च्वंगु शिलापत्र ।	" "	" "		हेमन्तसि थापित मखं	" "
१२१.	मञ्जुश्रीया थान सिंहया त्वाकलय् च्वंगु ।	" "	" "			त्वहंयापि सिंह दय्कातःगु ।
१२२.	स्यंगु तैया चैत्य क्वस्सं च्वंगु शिलापत्र ।	" "	ने. सं. ६३१		धनसाहु तुलाधर चैत्य जीर्णोद्धार ।	
१२३.	स्यंगु तैया चैत्य क्वस्सं च्वंगु शिलापत्र ।	" "	ने. सं. ६३४		धर्मनारान्	" "
१२४.	मञ्जुश्रीया न्ह्योनेसं च्वंगु प्रस्तर- तोरणया पृष्ठभागय् अङ्कित लेख ।	" "	" "	श्री ५ गीर्वाणयुद्ध	कृष्णराम लोह- कार प्रभृति	पञ्चमीसेवा खलः मुनाः मञ्जुश्री- यात त्वहंया तोरण दुन्ता याःगु ।
१२५.	स्वयम्भूया दक्षिणपाखे चैत्यया क्वस्सं च्वंगु शिलापत्र ।	" "	ने. सं. ६३५		लानिथकुं, अतकोटोल	स्वयम्भूयात महेन्द्र मल्ली मोह द्वहलपाः व थःगु प्रतिमा तयाब्यूगु । चैत्य जीर्णोद्धार ।
१२६.	मञ्जुश्रीस्थान गणेशया लिकच्वंगु शिलापत्र ।	" "	ने. सं. ६३७		भाजुमन तुलाधर चैत्य स्थापना । नरदेवी	
१२७.	स्यंगु वातैनय् च्वंगु चैत्य लिकच्वंगु शिलापत्र ।	" "	ने. सं. ६३७		धर्मनारायण चैत्य स्थापना यासे गुठी तःगु ।	
१२८.	स्यंगु वातैनय् च्वंगु चैत्य क्वस्सं च्वंगु शिलापत्र ।	" "	ने. सं. ६३[८]			
१२९.	स्यंगु वातैनय् च्वंगु फलेचाया शिलापत्र ।	" "	ने. सं. ६३६		धनकृष्ण तुलाधर अनसं फलेचा दय्काब्यूगु ।	

ह्याः	प्राप्ति स्थान	लिपि, भाषा	संबत्	पर्याय	दानपति	कीर्ति
१३०.	स्वयम्भूया दक्षिणपल्ले च्वंगु चोबाहाः लिकच्चंगु शिलापत्र ।	ने.अ. ने.भा.	ने. सं. ६३६	श्री ५ राजेन्द्र	बालगोविन्द तुलाधर	स्वयम्भूस चैत्य स्थापना ।
१३१.	स्वयम्भूया मयूर ध्वज स्तम्भ लेख ।	" "	" "	" "	तेजनाराम पट्टोल कोदो- विदेगल	लुं सिया ह्यखा तसे ल्वहंथां स्वानाब्यूगु अमिताभ बुद्धया
१३२.	स्वयम्भू अग्निपुरया न्ह्योने चःस्वां सिमा क्वस्सं च्वंगु शिलापत्र ।	" "	ने. सं. ६४०	" "	विष्णुसि मान- न्धर प्रभृति	धुंकाःलि चःस्वां सिमा क्वस्सं चिकंअतः सियातःगुलिइ उकिइ द्योने ल्वहंतं सियाब्यूगु ।
१३३.	मञ्जुश्रीथासं स्वयम्भू वनेगु लैय् च्चंगु शिलापत्र ।	" "	ने. सं. ६४१		रत्नसि, ओबाहाः रणसि तुलाधर	फलेचा दय्काब्यूगु ।
१३४.	मञ्जुश्रीया फलेचाय् च्वंगु शिलापत्र ।	" "	ने. सं. ६४३		नरदेवी लक्ष्मीसिंह,	चैत्य स्थापना ।
१३५.	शान्तिपुरया चैत्यया क्वस्सं तयातःगु शिलापत्र ।	" "	ने. सं. ६४४		असन चिकिद्धी	चैत्य निर्माण ।
१३६.	स्यंगु बातैनय् च्वंगु सिमा क्वस्सं तयातःगु शिलापत्र ।	" "	" "	" "	धीर्जवीरसिंह, असन	अबुया नामं चैत्य स्थापना ।
१३७.	" "	" "	" "		चक्रधरसि	चैत्य स्थापना ।
१३८.	" "	" "	" "		ताम्रकार, मरु चक्रधरसि	" "
१३९.	स्यंगु तैया चैत्य लिकच्चंगु शिलापत्र ।	" "	" "		कंसाकार, केल	" "

ल्याः	प्राप्ति स्थान	लिपि, भाषा	संवत्	पर्याय	दानपति	कीर्ति
१४०.	शान्तिपुरया जीर्ण फलेचाय् च्वंगु शिलापत्र ।	ने.अ. ने.भा.	ने. सं. ६४४		धीर्जनारान्	
१४१.	शान्तिपुरं स्वयम्भू वनेगु लैय् च्वंगु शिलापत्र ।	" "	ने. सं. ६४५		बहादुर तुलाधर चैत्य स्थापना । वलाछिटोल	
१४२.	स्यंगु तैया चैत्यया फलय् च्वंगु शिलापत्र ।	" "	" "		धीर्जनारान् तुला-चैत्य निर्माण । धर, तंलाछि	
१४३.	स्यंगु तैया चैत्यया त्वाथलय् च्वंगु शिलापत्र ।	" "	ने. सं. ६४७		थाकुसि प्रभृति चैत्य जीर्णोद्धार ।	
१४४.	शान्तिपुरपाखेया चैत्य लिक्कच्वंगु शिलापत्र ।	" "	" "		बुद्धनारां रञ्जि-फलेचा जीर्णोद्धार । तकार, मजिम्पाट	
१४५.	हारती देगलय् च्वंगु लुँया तोरण लेख ।	" "	ने. सं. ६४६		बेखासिंह तुला-न्हापाया सिँया तोरण हिलाः व धर, न्यततुँछेँ लुँ सिँया धातुया तोरण द्रहलपा- ब्यूगु हारती अजिमाया लुखाफुसय् च्वंगु ।	
१४६.	स्यंगु तैया चैत्ययागु त्वाथलय् च्वंगु शिलापत्र ।	" "	ने. सं. ६५१		लक्ष्मीनरसि चैत्य निर्माण । तुलाधर, नरदेवी	
१४७.	" "	" "	" "		घन्तसि तुलाधर, वैतु	
१४८.	स्वयम्भू पुलां गुम्बा निनालय् च्वंगु सिजःपौ ।	" "	" "		विष्णुधर तुला-भुइख्यलय् सम्यक् धर, न्यततुँछेँ निमन्त्रणा पौ ।	न्याय्कगु
१४९.	क्वाःपाःछेँया न्ह्योनेच्वंगु	" "	ने. सं.		सिंह महर्जन चैत्य स्थापना ।	

त्याः	प्राप्ति स्थान	लिपि, भाषा	संवत्	पर्याय	दानपति	कीर्ति
	शिलापत्र ।		६५२		ओबाहाः	
१५०.	"	ने.अ. ने.भा.	"		चित्तराज	चैत्य स्थापना ।
					स्थापित	
१५१.	भुइख्यःया वंगलसिमा क्वस्सं	"	"		मत्यसिंह, ज्याथा वज्रधातु	चैत्य निर्माण ।
	च्वंगु शिलापत्र ।					
१५२.	स्वयम्भूस्थानया चैत्यया त्वाथल्य्	"	ने. सं.		वीरधरसि	चैत्य स्थापना ।
	च्वंगु शिलापत्र ।		६५३		तुलाधर, असन	
१५३.	धर्मचक्र गुम्बाया पिनेसं च्वंगु गुंगः	"	"	श्री ५ राजेन्द्र	रन्हसिंह	दिवंगत पितृगण सकल उद्धार
	चोबाहाःया शिलापत्र ।				तुलाधर, न्यत	कामना यासे दुर्गतिपरिशोधन
					यंकुरिबाहाः	चैत्य स्थापना याःगु ।
१५४.	नागपुरया लिकच्वंगु दीपंकरया	"	ने. सं.		कवीन्द्रमुनि	नहापाया मूर्ति जीर्ण जुयाः नव
	प्रभामण्डल लेख ।		६५४		ताम्रकार	निर्मित दीपङ्कर तथागत स्थापना
						याःगु ।
१५५.	स्यंगु तैन्य् च्वंगु चोबाहाःया	"	ने. सं.		भार्जुसि,	चैत्य निर्माण ।
	त्वाथल्य् तयातःगु शिलापत्र ।		६५५		रणमति	
१५६.	"	"	"		विष्णुसिंह मान-	"
					न्धर, थँहिहि	"
१५७.	स्वयम्भूपाखे' मञ्जुश्री वनेगु लैय्	"	"		ज्ञानसिरि	"
	च्वंगु शिलापत्र ।				तुलाधर, नरदेवी	
१५८.	स्यंगु वातैन्य् तःधीह्वा बुद्ध मूर्तिया	"	ने. सं.		हरीन्द्र	थः काय्या नामं वज्रधातु चैत्य
	लिउनेसं च्वंगु शिलापत्र ।		६५६		तुलाधर, असन	दय्कूगु ।

ल्याः	प्राप्ति स्थान	लिपि, भाषा	संबत्	पर्याय	दानपति	कीर्ति
१५६.	क्वाःपाछेया न्ह्योने च्वंगु शिलापत्र ।	ने.अ. ने.भा.	ने. सं. ६५६		धर्मनारान्, चैत्य निर्माण ।	
१६०.	शान्तिपुर पाखेया चीवाहाः त्वाथलय् च्वंगु शिलापत्र ।	" "	"		ओवाहाः हरिधर चैत्य निर्माण ।	
१६१.	क्वाःपाःछेया न्ह्योनेच्वंगु शिलापत्र ।	" "	"		तुलाधर, असन राजेन्द्र, सिखंमवाहाः गुणलक्ष्मी तुला-धर, भोताहिनि थाकुसि ताम्र-कार, महाबुद्ध पुण्यनारान् चैत्य निर्माण ।	
१६२.	स्वयम्भूपाखे मञ्जुश्री वनेगु लैय् च्वंगु शिलापत्र ।	" "	ने. सं. ६५७		आर्यावलोकितेश्वर जीर्णोद्धार ।	
१६३.	स्यंगु वार्तेनय् च्वंगु लोकेश्वरया न्ह्योनेच्वंगु शिलापत्र ।	" "	ने. सं. ६[५]७			
१६४.	स्यंगु वार्तेनय् च्वंगु चैत्यया त्वाथलय् च्वंगु शिलापत्र ।	" "	ने. सं. ६५६		गणपति शाक्य-भिधु, मरु बुद्धनारां रञ्जित-फलेचा जीर्णोद्धार ।	
१६५.	क्वाःपाःछेया न्ह्योनेच्वंगु चीवाहाः क्वस्सं च्वंगु शिलापत्र ।	" "	"			
१६६.	शान्तिपुरया फलेचाय् च्वंगु शिलापत्र ।	" "	ने. सं. ६६०			
१६७.	वैरोचनया न्ह्योने सतलय् च्वंगु शिलापत्र ।	" "	"		नारायण रञ्ज-असं धालासिकोया बालमुकुन्दं तकार मञ्जुसुलि दयकातःगु फलेचा जीर्ण जुयाःलि सतः दयकाः गुठी समेत तयाव्यगु ।	
१६८.	स्यंगु तैया न्ह्योने बुद्धपादुकाथाय् चैत्य लिकच्वंगु शिलापत्र ।	" "	ने. सं. ६६१		टोल रत्नसिंह, तःवाहाः	

लयाः	प्राप्ति स्थान	लिपि, भाषा	संबत्	पर्याय	दानपति	कीर्ति
१६६.	मञ्जुश्रीया चाकलय् च्वंगु शिलापत्र ।	ने.अ. ने.भा.	ने. सं. ६६२		देवितर थापित मुसुंवाहाः	मञ्जुश्रीयाथाय् त्वहंतं सियाव्यूगु ।
१७०.	मूर्ति संग्रहालयया दुने तयातःगु शिलापत्र ।	" "	ने. सं. ६६३		तेजनारां तुलाधर, मरु ग्वाःपसः	स्वयम्भूया चाकलय् करुणामयाथाय्, चिकं कुथिस, फसखादेवयाथाय्, ऋकुच्छन्दया चैत्यथाय्, देवावतार- याथाय्, शान्तिपुर वनेगु लैपुइ, शान्तिपुरया पीठगलय् सांभत- देयाथाय्, वशिगाःयाथाय्, गुम्बाया न्ह्योने एवं मय्जुद्यःया न्ह्योने समेतं त्वहंतं सियाव्यूगु ।
१७१.	मूर्ति संग्रहालय दुने च्वंगु शिलापत्र ।	" "	ने. सं. ६६६		जोगनारां थापित, तवटोल	स्वयम्भूयात १००० कुर्या प्रमाणं विस्तारगु पताः छायाः वहःया केतकीस्वां लुंया गुल्पाः द्रहलपाः लिस्सें हारतीयात नं केतकीस्वां छायाव्यूगु ।
१७२.	हारती देगःया च्वय्यागु दक्षिण लङ्गया म्हुहपौया सुवर्ण लेख ।	" "	" "	श्री ५ राजेन्द्र	धनलक्षिनरसि	हारती देगःया दक्षिणपाखेया च्वय्य- यागु लुंपौ तयाव्यूगु ।
१७३.	हारती देगःया पूर्व लङ्गया च्वय्यागु सुवर्ण म्हुहःपौ लेख ।	" "	ने. सं. ६६७	"	जयनरसि, ओलाछे	हारती देगःया पूर्वपाखेया च्वय्यागु लुंपौ द्रहलपातःगु ।
१७४.	हारती देगःया पूर्वपाखेया क्वय्यागु म्हुहःपौ लेख ।	" "	" "		वीरवन्तसि, तंलाछि	हारतीमांयात लुंपौ तःगु ।

ल्याः	प्राप्ति स्थान	लिपि, भाषा	संबत्	पर्याय	दानपति	कीर्ति
१७५.	वायुपुरया लिकच्वंगु पःखाःया शिलापत्र ।	ने.अ. ने.भा.	ने. सं. ६६८		भाजुराम नापित थः पुर्खा दयकूगु फसखा देगः वंगल बाकुननि स्यनाःलि हानं दयकाः गुठी तःगु । अमितासि मह- चैत्य निर्माण ।	
१७६.	शान्तिपुरया चैत्यय् च्वंगु शिलापत्र ।	" "	"		जैन, तरुगुल	
१७७.	हारती देगःया उत्तरपाखेया च्वय-यागु म्हुहःपौ लेख ।	" "	ने. सं. ६६९	श्री ५ सुरेन्द्र	धर्मनारां तुला- धर, तंलाछि	हारतीमाजुयात लुँपौ तःगु ।
१७८.	हारती देगःया पश्चिमपाखेया च्वययागु म्हुहःपौ लेख ।	दे.अ. प.भा.	"	"	सुब्बा शिवनरसि श्यामार्पा लामाजुं चह्रय् यानावंगु धनसि धर्म लुँपौ स्यनाःलि प्राईमिनिष्टर साहु कुंवर जङ्गबहादुर राणाया हजुरीइ जाहेर यानाः जीर्णोद्धार यानाब्यूगु ।	
१७९.	स्यंगु तैया चैत्य क्वस्सं च्वंगु शिलापत्र ।	ने.अ. ने.भा.	ने. सं. ६७१		भाजुनारां, चैत्य जीर्णोद्धार । मत्तिलाछि	
१८०.	शान्तिपुरया चीवाहाःया फलय् च्वंगु शिलापत्र ।	" "	"		पुंनारां, स्वयम्भूयात लुं सियाः बाजु बिज्यापुटोल द्रहलप्यूगु ।	
१८१.	स्यंगु वातैनय् चैत्य क्वस्सं च्वंगु शिलापत्र ।	" "	ने. सं. ६७३		वीरवरसि चैत्य निर्माण । तुलाधर	
१८२.	मञ्जुश्रीथासं स्वयम्भू वनेगु ल्यै च्वंगु शिलापत्र ।	" "	ने. सं. ६७४		ज्ञानवन्त थंवही "	
१८३.	हारतीया न्ह्योने च्वंगु भण्डार छयनिइ च्वंगु शिवपार्वती पादपीठ ।	" "	"		श्व अभिलेख ब्वने ज्यामछिगु थाय् लाःगु दु ।	

श्लोकाः	प्राप्ति स्थान	लिपि, भाषा	संवत्	पर्याय	दानपति	कीर्ति	
१८४.	शान्तिपुरया चैत्यया फलय् च्वंगु शिलापत्र ।	ने.अ. ने.भा.	ने. सं. ६७४		भाजुनरसि ता-प्रकार, महाबुद्ध	चैत्य निर्माण ।	
१८५.	स्यंगु त्वाथःया न्ह्योने च्वंगु बुद्धपादुका मण्डल लेख ।	"	ने. सं. ६८१		शोभानर, यल इल्लेहे	स्वयम्भूया न्ह्योने ३१८ त्वाथः दइच्चंगु लैपुया सिथय् तयातःगु स्वयम्भू धर्मधातु वागीश्वर पादुका स्थापना ।	
१८६.	पुलांगु गुम्बाया ऊयाःया थां कापिइ तानातःगु सिजःपौ ।	"	ने. सं. ६८२		भाजुवन्त तुला-धर. जःधुंछे	भुइख्यलय् सम्यक् न्यायकुगु निमन्त्रणा पौ ।	
१८७.	हारती देगःया उत्तरपाखेया म्हुलःपौ लेख ।	"	"	श्री ५ सुरेन्द्र	धर्मनारां तुलाधर हारती माजुयात लुपौ प्रीति याःगु ।	तंलाछि	
१८८.	ह्यू मत बुद्धवारी देगलय् दुने च्वंगु शिलापत्र ।	"	"		ताम्रकार धर्नसि स्वयम्भूइ न्याद्वः व साहु यतखावाहाः पञ्चोपचार पूजा याकूगु ।	सच्छिकः	
१८९.	"	"	"		"	खाछि आचार्यपि स्वयम्भूइ बिज्या-काः व समाधि योग याकूगु ।	
१९०.	पुलां गुम्बाया निनालय् च्वंगु सिजःपौ ।	"	ने. सं. ६८३		चिधन ताम्र-कार यतखावाहाः निमन्त्रणा पौ ।	भुइख्यलय् सम्यक् न्यायकुगु	
१९१.	"	"	ने. सं. ६८४		भाजुनरसि स्वयम्भूयात पञ्चोपकार सहित यासे तुलाधर, मरु भूजा द्रहलपेगु गुठी बन्दोबस्त ग्वाःपसल	यानाः आयस्ता तयावंगु खँ ।	
१९२.	मैत्रि गुम्बाया लिउने त्वाथःया च्वय् च्वंगु चीबाहाः क्वस्सं अपरिमिता बुद्ध पादपीठ ।	"	ने. सं. ६८५		अबुजुया नामं अपरिमिता बुद्ध स्थापना ।		

ल्याः	प्राप्ति स्थान	लिपि, भाषा	संवत्	पर्याय	दानपति	कीर्ति
१९३.	रत्नसम्भवया न्ह्योनेच्वंगु धातुया मण्डल लेख ।	ने.अ. ने.भा.	ने. सं. ६८६		विन्नर शिव, धर्मनारां भीम-नारां मानन्धर दछेसाल	धातुया मण्डल द्रहलपातःगु ।
१९४.	भजन फलेचाया न्ह्योनेच्वंगु धातुया मण्डल लेख ।	" "	" "		ज्येष्ठराज शाक्य- ८१ ह्य भिक्षु प्रभृति ओंबाहाः, बैलपु सँऊयाःछे तःगु ।	सिवाखलः मिलय् जुयाः अक्षोभ्य, अमोघसिद्धि तथागतया रत्नमण्डल द्रहलपा-
१९५.	भुइख्यःया भीमसेनया लिकच्वंगु शिलापत्र ।	दे.अ. ने.भा.	ने. सं. ६८८		भारान, चःस्वांद्व	भुइख्यल्य फलेचा दयकाः गुठी
१९६.	मञ्जुश्री चैत्य पादुकाया लिकच्वंगु शिलापत्र ।	ने.अ. सं.भा.				महामञ्जुश्री गुरुयागु धारणी विद्या कियातःगु ।
१९७.	मञ्जुश्रीस्थान बुद्ध पादपीठ ।	ने.अ. ने.भा.	ने. सं. ६९१		जगत्नारां मान- चैत्य स्थापना ।	
१९८.	स्यंगु तैया क्वस्सं भुइख्यःया मण्डल लेख ।	" "	ने. सं. ६९३		न्धर, कोछे सि तुलाधर, जःधुंछे	शंखसि चन्द्रवीर- भुइख्यल्य सम्यक् न्यायकूगु ।
१९९.	पुलां गुम्बाया ऊयाःया थां कापिइ च्वंगु सिजःपौ ।	" "	" "		" "	" "
२००.	स्वयम्भू मञ्जुश्री वनेगु लैय् च्वंगु शिलापत्र ।	" "	ने. सं. ६९५		चिकिधी भाजु महर्जन किलागल	चैत्य स्थापना ।

लघुः	प्राप्ति स्थान	लिपि, भाषा	संवत्	पर्याय	दानपति	कीर्ति
२०१०. हारती देगःया नितैंगु म्हुहःपौया लेख ।	ने.अ. ने.भा.	ने. सं. ६६७	श्री ५ सुरेन्द्र	विमलधर गुण- धर तुलाधर, न्यततुंछे	हारतीदेवीयात लुँपौ तःगु ।	
२०२. मूर्ति संग्रहालयया लुखाय् च्वंपि सिंहया पादपीठ ।	दे.अ. प.भा.	वि. सं. १६३५		सुब्बा धिर्ज- वीरसि, असं चीबाहाःननि	स्वयम्भूस्थानय् ल्वहंया छज्वः सिंह चहय् याःगु ।	
२०३. किण्डोलया मूलैपुइ च्वंगु चैत्यया लिकच्वंगु शिलापत्र ।	ने.अ. ने.भा.	ने. सं. ६६६			थकालि प्रभृति मुनाः फलेचा दय्कूगु ।	
२०४. पुलां गुम्बाया ऊयाःया थां कापिइ तानातःगु सिजःपौ ।	" "	"			दानवीरसि नन्द- वीरसि, असं जःधुंछे	भुइख्यलय् सम्यक् न्यायकूगु ।
२०५. स्यंगु तैनय् च्वंगु अशोक चीबाहाः लिकच्वंगु शिलापत्र ।	" "	"			हर्षवीर भाजु धन शिलाकार, मखंटोल	थुपि निह्य जानाः थुगु थासय् च्वंगु न्यागः चीबाहाः जीर्णोद्धार याःगु ।
२०६. स्यंगु तैनं थहांवनेवं खःपाखे च्वंगु शिलापत्र ।	" "	ने. सं. १०००			द्रव्यरत्न तुलाधर स्वयम्भू आदिबुद्धया अग्र्य धर्मश्री प्रज्ञापारमिता त्यौड	पाठ याकेगु व संघनायक आर्या- वलोकितेश्वरयात खर्च हनेगु गुडी तयान्यूगु ।
२०७. पुलां गुम्बाया ऊयाःया कापिइ तानातःगु सिजःपौ ।	" "	ने. सं. १००२			ज्ञानवीरसि तुलाधर, न्यत ओनेमागृह	भुइख्यलय् सम्यक् न्यायकूगु ।

ल्याः	प्राप्ति स्थान	लिपि, भाषा	संबत्	पर्याय	दानपति	कीर्ति
२०८	स्वयम्भू मञ्जुश्री वनेगु लंपुइ च्वंगु शिलापत्र ।	ने.अ. ने.भा.	ने. सं. १००३		बाबुकृष्ण	चैत्य स्थापना ।
२०९	हारतीया न्ह्योने गुम्बाया निनालय दे.अ. प.भा. तानातःगु काष्ठपत्र ।	दे.अ. प.भा.	वि. सं. १९४०		देवशम्शेर ज.व.रा.	स्वयम्भू हारतीया दुने लः चल्यु मज्जुपि अछूत जातित्यसं दुहांवनाः पूजा यायगु निषेध बार्य इस्तिहार तानाब्युगु ।
२१०	स्वयम्भूया न्ह्योनेच्वंगु षडक्षरी लोकेश्वर युक्त स्तम्भया सुवर्ण लेख ।	ने.अ. ने.भा.	ने. सं. १००३	श्री ५ पृथ्वीवीर	कृष्णवीर चित्र-सुवर्ण कार, तचपाल खप	रञ्जित धातुया षडक्षरी स्थापना यासे त्वहं खम्बा स्वानाब्युगु ।
२११	स्वयम्भूया न्ह्योनेच्वंगु प्रज्ञापारमिता अंकित शिलास्तम्भय च्वंगु लिलया पौ ।	"	"	"	"	लुं सिया धातुया प्रज्ञापारमिता मूर्ति सहित यासे त्वहंथां स्वाना-ब्युगु ।
२१२	मञ्जुश्रीया दुने चाकलय च्वंगु शिलापत्र ।	"	"		शिवरत्न स्था-पित मखं भेलाछे	अन हे पःखालय गुमोज लुखा तयाः जीर्णोद्धार यानाब्युगु ।
२१३	"	"	ने. सं. १००४		"	मञ्जुश्रीयाथाय तक त त्वाथः दयकाः व लुखातक त्वहंतं ब सियाथकगु ।
२१४	स्वयम्भूस्थान चैत्यया ववस्सं च्वंगु शिलापत्र ।	"	ने. सं. १००६		धीर्जवीर	चैत्य स्थापना ।
२१५	समुद्यःयाथासं स्वयम्भू वनेगु लैय च्वंगु चैत्यस च्वंगु शिलापत्र ।	"	ने. सं. १००७		लक्ष्मी थकु	"

ल्याः	प्राप्ति स्थान	लिपि, भाषा	संबत्	पर्याय	दानपति	कीर्ति
२१६.	स्वयम्भूया अग्र्य चर्वि भव्य रूप आर्यताराया पादपीठ लेख ।	ने.अ. ने.भा.	ने. सं. १००७		धिर्जलक्ष्मी महर्जन, ध्याचालखु	स्वयम्भू धर्मधातु वागीश्वरया अग्र्य १०५ धानि तुक धातुया निह्य दनाच्वंहा भव्य रूप आर्यतारा तयाः शोभा वृद्धि यानाथकूगु ।
२१७	मञ्जुश्रीया दुने चाकलय् च्वंगु शिलापत्र ।	"	"		जीवरत्न मिस्त्री मखं	मञ्जुश्रीया स्थान्य् तँ दयकाःलि श्व हे तँ ल्ह्वेनेयात आयस्ता स्वरूप ४३ बुँ तयाः श्रीपञ्चमीखुनु दीपावली छव्यकेगु गुठी तःगु ।
२१८.	स्यंगु तँ थहांवनेवं न्ह्योने पाखे च्वंगु शिलापत्र ।	"	ने. सं. १००८		वज्रमुनि शाक्य- भिक्षु, इतुंवाहाः न्ह्योने सहस्राहूति यज्ञ यासे षोदश ताहाःननि श्राद्ध यायगु गुठी तःगु ।	आश्विन पूर्णिमाखुनु वज्रधातु चैत्यया सहस्राहूति यज्ञ यासे षोदश श्राद्ध यायगु गुठी तःगु ।
२१९.	भुइख्यलय् च्वंगु मण्डल लेख ।	"	"		कृष्णसुन्दर तुला- धर, धालासिको	भुइख्यलय् सम्यक् न्यायकूगु ।
२२०.	क्वाःपाःछेया न्ह्योनेच्वंगु शिलापत्र ।	"	"		गुणलक्ष्मी तुला- धर, तौमुगः	चैत्य स्थापना ।
२२१.	ससुथानं स्यंगु वनेगु लैय् च्वंगु संसःत्वहं ।	"	ने. सं. १०१०		हेराकर ताम्र- कार, मरु	"
२२२.	स्वयम्भू क्वस्सं च्वंगु शिलापत्र ।	"	"		रत्नवीर मान- न्धर, न्हूसाल	"
२२३.	हारती देगःया कल्दर लेख ।	दे.अ. प.भा.	वि. सं. १९४७		काजिमान	हारती माजुया देगलय् लुं सियाः लिर्वि तयान्यगु ।

ल्याः	प्राप्ति स्थान	लिपि, भाषा	संबत्	पर्याय	दानपति	कीर्ति
२२४.	स्यंगु वातैन्य च्वंह्य तःधीह्य रत्नसम्भव बुद्धया आसन ।	दे.अ. ने.भा.	ने. सं. १०१२		भवानीदास	स्वयम्भू जंगलय विशालमय रत्न- सम्भव बुद्ध मूर्ति स्थापना ।
२२५.	मञ्जुश्रीया चाकलय च्वंगु चाकःदलुखय च्वइतःगु ।	ने.अ. ने.भा.	ने. सं. १०१३			तःधी वज्राचार्य, महामञ्जुश्रीया चरण सेवा धुंकाः कुलहर्ष तुलाधर व ल्वहंया चाकःमत दलूपा इहलपा- प्रभृति व्यूगु ।
२२६.	गोपुच्छाग्र चैत्यया ववस्सं च्वंगु शिलापत्र ।	" "	ने. सं. १०१४	श्री ५ पृथ्वीवीर	पर्शुमुनिराज	गोपुच्छाग्र चैत्य जीर्णोद्धार यासे शिलाकार कुसुं-थुग थासय् अप्पां सियाव्यूगु । देवलाछि थंहिति
२२७.	स्यंगु जंगलय च्वंह्य तःधिकःह्य अक्षोभ्य बुद्धया सिंहासन लेख ।	" "	" "		केहरमान रज्जि-भव्य रूप	अक्षोभ्य बुद्ध मूर्ति तकार मञ्जुश्री-स्थापना ।
२२८.	हारती देगःया लिउनेसं च्वंगु लुं सिया प्रभायुक्त द्वार लेख ।	" "	ने. सं. १०१६		चन्द्रमुनि ताम्र- कार प्रभृति, मरुटोल	हारती देगःया लिउनेसं लुं सिया प्रभायुक्त द्वार तथाः शोभा वृद्धि यानातःगु ।
२२९.	स्वयम्भूया बायव्यकोणस्थित तःग्वःगु चैत्यया फलय च्वंगु शिलापत्र ।	" "	ने. सं. १०१७		पञ्चनारां मानन्धर, पुखुल्द्याङ्क	विरुपाक्ष लिकच्वंगु चैत्य जीर्णो- द्धार ।
२३०.	स्यंगुया सूर्यमुख गणेशया न्ह्योने च्वंगु शिलास्तम्भ लेख ।	दे.अ. ने.भा.	" "		सूर्यमुख गणेशयात खड्गिकार, लायखटोल	ल्वहंया सिंह छज्वः तयाःलि शिलास्तम्भ तःगु ।
२३१.	अमिताभ बुद्धया ववस्सं च्वंगु	ने.अ. ने.भा.	" "		दर्शनधारी का-	अमिताभ बुद्धया ववस्सं च्वंगु सुवर्ण

ख्याः	प्राप्ति स्थान	लिपि, भाषा	संवत्	पर्याय	दानपति	कीर्ति
	लुं सिया धातुया ह्यखाया पादपीठ ।				पाली शिव गोत्र रञ्जित धातुया जोगि सिंहनाथ तःगु । इखापुखू, चपाछे	ह्यखा द्रहलपा-
२३२.	भुइख्यःया पूर्वपत्तिइ पःखालय् च्वंगु शिलापत्र ।	ने.अ. ने.भा.	ने. सं. १०१८		जोगवीर स्थापित भुइख्यः फराकिलो यानाः सम्यक् थाय्मडु न्हूबाहाः न्यायकगु । " " स्वयम्भूया प्यख्यरसं च्वंगु न्हापाया सिद्ध चैत्य अति जोर्ण जुयाच्वंगु जीर्णोद्धार यानाव्यूगु ।	
२३३.	हारतीया लिउनेसं च्वंगु चैत्यया बेदिकाय् च्वंगु शिलालेख ।	" "	ने. सं. १०२०		देवधं शाक्यभिक्षु माणे जीर्णोद्धार । सिखवंमूबाहाः	
२३४.	पुलां गुम्बाय् च्वंगु तःवःगु माणेया लेख ।	" "	ने. सं. १०२१	श्री ५	मानवीर मान-	लुं ऊयाः
२३५.	हारती देगःया ऊयाःक्वताःया सुवर्ण लेख ।	दे.अ. ने.भा.	ने. सं. १०२२	पृथ्वीवीर	न्धर, न्हूसाल तःगु ।	
२३६.	हारती देगःया दक्षिण छाया तुनाल लेख ।	ने.अ. ने.भा.	" "	"	मानकार्जि, चोखाछे	देवता सियाः तयाव्यूगु ।
२३७.	हारती देगःया चुलिचू स्वानातःगु वज्रसत्वयुक्त शिलास्तम्भ ।	" "	ने. सं. १०२३		कुलमान सुवर्ण रञ्जित धातुया वज्रसत्व वज्राचार्य, स्थापना यासे त्वहंखम्बा स्वाःगु मुसुं बाहाः हारती प्रीति यासे ।	
२३८.	हारती देगःया उत्तर लङ्गया ऊयाःया लेख ।	" "	ने. सं. १०२४		कुलरत्न शाक्य- भिक्षु, सिधल	सियाः ऊयाः छपाः तयाव्यूगु ।
२३९.	स्यंगु बातनय् च्वंगु शिलापत्र ।	" "	" "		दातिलक्ष्मी चैत्य जीर्णोद्धार ।	

त्याः	प्राप्ति स्थान	लिपि, भाषा	संवत्	पर्याय	दानपति	कीर्ति
२४०.	शान्तिपुरया भित्ती चित्र लेख ।	दे.अ. ने.भा.	ने. सं.	श्री ५	तुलाधर, असन	नहापाया भित्ती चित्र जीर्ण जुसें लि
			१०२४	पृथ्वीवीर	दशलक्ष्मी	चित्रकार मनछे हर्षमान चित्रकारं स्वयम्भू पुराणया
					ववहि	खँ चवकेगु संकल्प यानाः ज्या
						सिमधवं थः मृत्यु जुसेंलि हानं थः
२४१.	शान्तिपुरीइ दुनेच्वंगु सिजःपौ ।	" "	ने. सं.	"	"	पुरुषया नामं पूति यानाब्यूगु ।
			१०२५			थः स्वामि हर्षमानया नामं चित्रमय
						स्वयम्भू पुराणया कथा चवकाः
						जीर्णोद्धार कार्यं सम्पन्न याःगु ।
२४२.	स्यंगु जंगलय् च्वंह्य भव्य रूप	ने.अ. ने.भा.	"		बेखानारां मह-	भव्य रूप शिलामय अक्षोभ्य बुद्ध
	अक्षोभ्य बुद्धया आसन ।				जर्न, दुगंवही	स्थापना ।
२४३.	मञ्जुश्रीया तैन्य् च्वंगु सरस्वतीया	" "	ने. सं.		कुलमान वज्रा-	भव्य रूप प्रस्तरमय सरस्वती मूर्ति
	पादपीठ ।		१०२६		चार्य, मुमुंवाहाः	तःगु ।
२४४.	मञ्जुश्रीया तैन्य् च्वंगु मञ्जुश्रीया	" "	"		"	स्थूल रूप शिलामय मञ्जुश्री मूर्ति
	पादपीठ ।					तःगु ।
२४५.	भुइख्यलय् च्वंगु मण्डपा ।	" "	"		कुलवीरसि	सम्यक् न्यायकूगु ।
					तुलाधर	
२४६.	ववाःपाःद्या लुखाय् च्वंगु	" "	"		मानवीर मान-	ववाचपाल देवयात लिलया ववताःधी
	ववताःधीया लेख ।				न्धर, चःस्वांद्ध	दयकाब्यूगु ।
२४७.	स्वयम्भू ससुद्याःयाथाय् वनेगु	" "	ने. सं.		कुलमान,	स्वयम्भूयात पताः छाःगु ।
	बैय् च्वंगु शिलापत्र ।		१०२७		मखंवाहाः	
२४८.	खाउँ बुंगाया शिलापत्र ।	रञ्जना,	ने. सं.	श्री ५	देवघं, चन्द्रमाया श्रीस्वयम्भू	प्रोतिन खाउँ बुंगाः

ख्याः	प्राप्ति स्थान	लिपि, भाषा	संवत्	पर्याय	दानपति	कीर्ति
२४६.	स्यंगु तैया चैत्यया त्वाथलय् च्वंगु शिलापत्र ।	नेपालाखल देवनागरी तिब्बती अंग्रेजी	१०२७ वि. सं. १९६३	पृथ्वीवीर	शाक्यभिक्षु, श्रीखण्डमुगल	जीर्णोद्धार यानाव्यूगु । श्व अभिलेख्य न्यागू किसिम- या लिपि, भाषा व संवत् प्रयोग यानातःगु खनेदु ।
२४७.	ख्वाउँ बुँगाःया लिकच्वंगु शिलापत्र ।	ने.अ. ने.भा.	ने. सं. १०२७		आशामदु मह- र्जन, खिचापुखू	चैत्य जीर्णोद्धार ।
२४८.	स्वयम्भू नैऋत्य कुलाया तःग्वःगु चोवाहाः क्वस्सं च्वंगु शिलापत्र ।	"	"		देवीधन शाक्य- भिक्षु, मरु	बुँगाः जीर्णोद्धार ।
२४९.	पुलां गुम्बाया दीपङ्कर आसन लेख ।	"	ने. सं. १०२६		कुलवीरसि तुलाधर, असं	दीपङ्कर बुद्धया सुवर्ण मूर्ति स्थापना ।
२५०.	पुलां गुम्बाया शाक्यमुनि बुद्धया आसन लेख ।	"	"		जःधुंछे	ने. सं. १०२८ सालं थुगु गुम्बा मि नसें लि पुनः शाक्यमुनि बुद्धया न्हूगु सुवर्ण प्रतिमा स्थापना याःगु ।
२५१.	पुलां गुम्बाया मैत्रेय बुद्धया आसन लेख ।	"	"		"	अनागत बुद्ध आर्य मैत्रेय स्थापना ।
२५२.	पुलां गुम्बाया भगिन्य च्वयातःगु लिईपौ ।	दे.अ. ने.भा.	वि. सं. १९६६ ने. सं. १०२६			गुम्बाय् गजू निगः द्रहलपाव्यूगु ।

त्याः	प्राप्ति स्थान	लिपि, भाषा	संबत्	पर्याय	दानपति	कीर्ति
२५६.	हारती देगःया वहःया तोरणय् ।	दे.अ. ने.भा.	वि. सं.		अष्टमान	हारती माजुयात वहःया तोरण व लुखाया चौकोस तयाव्यूगु ।
२५७.	पुलां गुम्बाया अमिताभ बुद्धया आसन लेख ।	"	वि. सं.		मानवीर मान- न्धर, न्हसाल	गुम्बाय् अमिताभ बुद्धया सुवर्ण प्रतिमा स्थापना ।
२५८.	पुलां गुम्बाया भैषज्यराज तथागतया आसन ।	"	वि. सं.		मानन्धरसिया	गुम्बाय् भैषज्यराज तथागतया सुवर्ण प्रतिमा स्थापना ।
२५९.	स्वयम्भू वैरोचन तथागतया आसन लेख ।	"	ने. सं.		कायपि रामसुन्दर, पुष्पसुन्दर तुलाधर	पुलांह्म वैरोचन लिकया न्ह्म लुं सिया धातुया वैरोचन तथागत तसे लुं सियाः गुंगः कचादेगः दय्काः प्यकुनय् प्यह्म ताराया मूर्ति समेत तयाव्यूगु जुल ।
२६०.	स्वयम्भूया पूर्वया हलपतिह च्वंगु सुवर्णाक्षर ।	रञ्जना, सं.	"		शाक्यश्री लामा	ॐ बुद्धवैरोचनाय नमः । ॐ आर्य समन्तभद्राय नमः । ॐ आर्य क्षितिगर्भाय नमः । ॐ आर्य खगर्भाय नमः । ॐ नमः कन्हपाचर्यायः । ॐ बुद्ध साक्यसुनय नमः । ॐ गुरु नाघाज्जुं नाय नमः । ॐ आर्य मैत्रिनाथाय नमः । ॐ वागीन्द्र कित्याचार्याय नमः ।
२६१.	स्वयम्भूया दक्षिणया हलपतिह च्वंगु सुवर्णाक्षर ।	"	"		"	

त्याः	प्राप्ति स्थान	लिपि, भाषा	संबत्	पर्याय	दानपति	कीर्ति
२६२. स्वयम्भूया पश्चिमया हलपतिश्च च्वंगु सुवर्णक्षिर ।	रञ्जना सं.	ने. सं.	१०३८		शाक्यश्री लामा	ॐ बुद्ध अमिताभाय नमः । ॐ गुरु शान्तिगुप्ताय नमः । ॐ आर्यलोकेश्वराय नमः । ॐ आयान गुरु पद्माकराय नमः । ॐ जालन्धराचार्याय नमः । ॐ भैषज्यगुरु वैदुर्य प्रभराजाय नमः । ॐ वज्रपाणये नमः । ॐ गोरषवम्भय नमः । ॐ आर्य वज्र अ आर्य सर्वणिवरण विष्कथाचार्याय नमः । ॐ श्री आर्यतारायै नमः ।
२६३. स्वयम्भूया उत्तरया हलपतिश्च च्वंगु सुवर्णक्षिर ।	" "	" "	" "		" "	
२६४. स्वयम्भू अमोघसिद्धिया हेगास अंकित लेख ।	दे.अ. ने.भा.	ने. सं.	१०३९		गुणसुन्ध तुला- धर, सुवर्ण हेगा द्वहलप्युगु । प्रणाला	हेरासुन्दरया नामं चतुथागतयात
२६५. अग्निपुरया चैत्य क्वस्सं च्वंगु शिलापत्र ।	ने.अ. ने.भा.	ने. सं.	१०४२		दाति तुलाधरनी चैत्य जीर्णोद्धार । असन	
२६६. किण्डोल छाउनी वनेगु हितिफुसय् च्वंगु फलेचाया शिलापत्र ।	दे.अ. ने.भा.	वि. सं.	१९७९		गणेशदास मान- न्धर, कालिमाटी	फलेचा दयकाव्युगु ।
२६७. स्यगु तैनय् च्वंह्य सलया त्वाकलय् च्वंगु ।	" "	ने. सं.	१०४४		गजवीरसि स्यगु तैनय् रत्नसम्भव बुद्धया वाहन सल तःगु ।	

ल्याः	प्राप्ति स्थान	लिपि, भाषा	संवत्	पर्याय	दानपति	कीर्ति
२६८.	किनूबाहाल्य दुहांवनेवं खःपाखे च्वंगु शिलापत्र ।	दे.अ. ने.भा.	ने. सं. १०४६		सिद्धिरत्न, वृष-मान ताम्रकार महाबुद्ध कृष्णमान ज्येष्ठ बनिया नील-बहादुर ताम्रकार	सिद्धिरत्न, वृष-मान ताम्रकार जीर्ण जुयाच्चंगुयात पुनः नवनिर्माण याःगु । अजुरोनपुरुष ध्वाकाय् अजुरोनपुरुष तयाव्यूगु ।
२६९.	मञ्जुश्री ध्वाका लिक्सं च्वंगु शिलापत्र ।	" "	वि. सं. १९८३		जोगमाया सेरमां स्यंगु तैन्य सिह मूर्ति स्थापना ।	मञ्जुश्री ध्वाकाय् अजुरोनपुरुष तयाव्यूगु ।
२७०.	स्यंगु तैन्य च्वंह्य सिहया पादपीठ ।	" "	वि. सं. १९८६		जगत्मान सेजु छेत्रपाति	स्यंगु तैन्य अक्षोभ्य बुद्धया वाहन किसिया मूर्ति स्थापना ।
२७१.	स्यंगु तैन्य च्वंह्य किसिया पादपीठ ।	" "	ने. सं. १०४६		"	स्यंगु तैन्य लेया सिथ्य त्वहंतं सियाव्यूगु ।
२७२.	स्यंगु तैया च्वस्सं लिच्छवी चैत्य नापं च्वंगु शिलापत्र ।	" "	ने. सं. १०४८		अन हे सं पूर्वपाखे च्वंगु सतकया	लेपु ४०० गज लमाई त्वहंतं सियाः वाकी जुक अप्पां सियाव्यूगु ।
२७३.	स्यंगु तैया लेया सिथ्य च्वंगु शिलापत्र ।	दे.अ. प.भा.	वि. सं. १९८५		किसिया मूर्ति स्थापना ।	
२७४.	स्यंगु तैन्य च्वंह्य किसिया आसन लेख ।	दे.अ. ने.भा.	ने. सं. १०४९		भक्तवीरसि	थः अबु सम्यक्सिया पूर्वसंकल्पित
२७५.	पुलां गुम्बाया निनालय च्वंगु सिजःपौ ।	ने.अ. ने.भा.	ने. सं. १०५२		तुलाधर न्ह्योखा सम्यक् न्यायकूगु ।	
२७६.	शान्तिपुरया न्ह्योनेच्वंह्य विशाल रूप अक्षोभ्य बुद्धया सिहासन लेख ।	" "	वि. सं. १९९०		पसारसि प्रभृति अक्षोभ्य बुद्ध मूर्ति प्रतिष्ठा ।	जोर्णोद्धार

ल्याः	प्राप्ति स्थान	लिपि, भाषा	संबत्	पर्याय	दानपति	कीर्ति
२७७.	चीधंगु किनूबाहाःया लुखां दुहांवनेवं जवय् अंगलय् च्वंगु शिलापत्र ।	दे.अ. ने.भा.	ने. सं. १०५८		तेजनरसि महर्जन, भीमसेनस्थान	किण्डोल विहार लिकसं तेजकीर्ति विहार दयकाः व प्यदं लिपा थन हे वज्रघातु चैत्य व धातुया अमोघपाश मण्डल तयाः गुठी तयाव्यूगु ।
२७८.	स्वयम्भू भजन फलेचाया लिकच्वंगु त्वहंया लःपातय् कियातःगु ।	दे.अ. प.भा.	वि. सं. १९९२		रत्नप्रसाद मान- न्धर, बालाजु भिक्षु	श्रीहारती प्रीति यासे माकःतयत् लः त्वंकैगु लःपाः दयकाव्यूगु ।
२७९.	आनन्दकुटी श्रीलंका चैत्य विहारया देगलय् च्वंगु शिलापत्र ।	ने.अ. ने.भा.	ने. सं. १०६२		धम्मालोक	महायान बौद्ध देस नेपालय् थेरवादी शासन (हीनयान) भिक्षुपिनिगु आश्रम जग स्वनेगु उद्देश्यकथं श्रीलंका चैत्य विहार प्रतिष्ठा याःगु ने. सं. १०६९ स ।
२८०.	स्वयम्भू भजन फलेचाया लिकच्वंगु हितिइ कियातःगु शिलाभिलेख ।	दे.अ. ने.भा.	वि. सं. २०००			श्रीहारती माजुयात नित्य स्नान व प्राणिपित लः त्वंकैत हिति तयाव्यूगु ।
२८१.	भचातंगि बुँस च्वंगु सिद्धिबाहाः- चिया चैत्य क्वस्सं च्वंगु शिलापत्र ।	ने.अ. ने.भा.	ने. सं. १०६३		सिद्धिहर्ष वज्राचार्य, तःछेँवाहाः	स्यंगुया ईशानपाखे भचातंगि धइगु थासय् बोधिमण्डपसिद्धि विहारय् चैत्य स्थापना ।
२८२.	वसुपुरया लिकच्वंगु शिलापत्र ।	" "	ने. सं. १०६५		दानबहादुर मानन्धर, दछेसाल	तिलाव्रत साङ्गि जूगु उपलक्षय् वसुपुरया न्ह्योने ल्वहंतं सियाः व लिस्सें श्रीवसुन्धरा देवीया नवमूर्ति स्थापना ।

ल्याः	प्राप्ति स्थान	लिपि, भाषा	संवत्	पर्याय	दानपति	कीर्ति
२८३.	स्यंगु बातैनय च्वंहा मञ्जुश्रीया पादपीठ ।	दे.अ. ने.भा.	वि. सं. २००४		देवबहादुर, मरु दछेसाल	मञ्जुश्रीया सिमान्तिया मूर्ति स्थापना ।
२८४.	पुलां गुम्बाया निनालय च्वंगु सिजःपौ ।	" "	ने. सं. १०६७		मोतिमान रञ्जितकार, चिकंमुगल	भुइख्यलय सग्यक् न्यायकुगु ।
२८५.	पुलां स्यंगुया पःखालय च्वंगु मूर्तिया पादपीठ ।	" "	वि. सं. २००५		हीराबहादुर	गणेश मूर्ति स्थापना ।
२८६.	स्यंगु गःचाःहुलेवलय पूर्वपाखेया जीर्ण पाटीया अंगलय च्वंगु शिलापत्र ।	दे.अ. प.भा.	वि. सं. २००८		दर्दलाल श्रेष्ठ भोताहिनि	मांबौया नामं श्राद्ध यानाः स्वयम्भू-या माकःतयत् जाकि ह्वलाःलि थःगु छेय् लिहां वयाः स्वय् नकेगु खै न्ह्यथनातःगु ।
२८७.	" "	" "	" "		"	कलाःया नामं स्वयम्भूया लिकच्वंगु थःगु हे जगास पाटी पौवा दयकाः शहीद स्मारक स्थापना यानाः गुठी तःगु ।
२८८.	भुइख्यःया मण्डपाया ऊवलय च्वंगु मण्डपा लेख ।	दे.अ. ने.भा.	" "	श्री ५ त्रिभुवन	भक्तवीरसि तुलाधर, न्हायकतला	सम्यक् न्यायकुगु संस्मरणय् तथा-ब्यूगु मण्डल ।
२८९.	किण्डोल उपासिकारामया निर्वाण मूर्तिया देगलय दुनेच्वंगु शिलापत्र ।	" "	" "	"	अनागारिका धर्मचारी, असं ध्याक्वछे	ल्वहंया १० फुट हाकःहा बुद्ध महापरिनिर्वाण मूर्ति दयकाः देगः प्रतिष्ठा याःगु । उद्घाटन याना

ल्याः	प्राप्ति स्थान	लिपि, भाषा	संवत्	पर्याय	दानपति	कीर्ति
२६६.	कर्मराज गुम्बाया दुने अंगलय् च्वंगु शिलापत्र ।	दे.अ. ने.भा.	वि. सं. २०१५	"	जुजुमान ताम्रकार, महाबुद्ध	दयकूगु । कर्मराज गुम्बा तयार जुसेलि थुक्रियात त्वय्क लहासाया ऊयो-रिम्पोछे थे तुं द कु हाकःह्य सिज.पाताय् लुं सियाः भव्य रूप शाक्यमुनि बुद्ध दयकाः तयाव्यूगु । धनरत्न तुलाधर कर्मराज गुम्बाय् लिलया माणे बाबुकाजि तुला- दयकाः द्रहलप्यूगु । धर, धालासिको,
२६७.	कर्मराज गुम्बाय् च्वंगु तःग्वःगु माणेया अभिलेख ।	"	ने. सं. १०७८	"		
२६८.	किण्डोल वनेगु बजारया भजन फलेचाय् च्वंगु शिलापत्र ।	"	"	"	रत्नबहादुर मानन्धर मोहनवीरसि	स्वयम्भू मञ्जुश्री बजारय् भजन याय् निर्मित धर्मशाला दयकाव्यूगु । शान्तिपुरया लिक धर्मशाला दयका-व्यूगु ।
२६९.	शान्तिपुरया खवय् च्वंगु धर्मशालाया शिलापत्र ।	"	ने. सं. १०७९	"	तुलाधर, असन लतंकुमारी मानन्धर, छेत्रपाति	सर्वार्थसिद्ध लुम्बिनीस जन्म जूगु दृश्य अंकित यानातइतःगु शाल-भञ्जिका मुद्रा मायादेवी स्थापना ।
३००.	स्यंगु वार्तेनय् च्वंगु मायादेवीया पादपीठ ।	"	वि. सं. २०१९	"	तारावीरसि कंसाकार, केल	आनन्दकुटीस च्वंगु बोधिवृक्ष सिमा-तक त्वहंया त्वाथः दयकाव्यूगु ।
३०१.	आनन्दकुटी बोधिवृक्ष सिमाया थासं वनेगु त्वाथःया लिक च्वंगु शिलापत्र ।	"	वि. सं. २०२२	"		
३०२.	मञ्जुसुलि बजारया चौताराय् च्वंगु शिलापत्र ।	"	वि. सं. २०२३	"	लयतासि महर्जन, मखं	मञ्जुसुलि बजारय् च्वंगु वंगल-सिमाय् चौतारा दयकाव्यूगु ।

त्याः	प्राप्ति स्थान	लिपि, भाषा	संबत्	पर्याय	दानपति	कीर्ति
३०३.	शान्तिपुरया न्ह्योनेच्वंगु तःग्वःगु टर्चाकिइ च्वइतःगु ।	दे.अ. ने.भा	ने. सं. १०८७		साहु देवज्योति कंसाकार	स्व. साहु भाजुरत्नया पुण्य स्मृतिइ स्वयम्भू जंगलया रिजम्ब्यायर निसे स्वयम्भूइ च्वय् तक लः थ्यंकेत आर्थिक सहायता प्रदान याःगु ।
३०४.	स्यंगु तँ थहांवनेथाय् लँया सिथय् च्वंगु टर्चाकिइ च्वंगु ।	" "	वि. सं. २०२५		कीर्तिमान महर्जन	भुइख्यलं स्वयम्भू थहांवनेथाय् लँया सिथय् जल धाराया निर्मित टर्चाकि तःगु ।
३०५.	स्यंगु बातैनय् तेजसा भैरबयाथाय् च्वंगु शिलापत्र ।	" "	ने. सं. १०८८		भीमसेन मान-न्धर, थँहिति	चैत्य स्थापना ।
३०६.	स्वयम्भूया न्ह्योने स्वानातइतःगु धलवतया तःप्वाःगु घ्यःदिवाया लेख ।	" "	ने. सं. १०९०		ऊयापुलानि वज्राचार्य, तःछेँबाहाः	स्वयम्भूया अग्रय् घात छि धातुया दिवा चह्लय् यानातःगु ।
३०७.	स्यंगु गःया उत्तरपाखे च्वंगु दिपया पारीस च्वंगु शिलापत्र ।	दे.अ. प.भा.	वि. सं. २०३०		कुञ्जो, याङ्जेन उदास उदासनी च्वनिइपित थुगु ज्याय् सहयोगी लामा, किण्डोल ।	सिई उइत च्वनेगु व लँय जुइ धर्मशाला दय्काव्यूगु । सन्तबहादुर
३०८.	स्यंगु बातैनय् च्वंगु विश्वन्तर पादपीठ लेख ।	दे.अ. ने.भा.	ने. सं. १०९०		चन्द्रलक्ष्मी प्रभृति, थँहिति	दानवीर विश्वन्तर राजकुमार बैकवनय् च्वनाः थः कलाः काय् ह्याय्पि दान ब्यूगु दृश्य अंकित यानातःगु मूर्ति स्थापना ।
३०९.	किण्डोल सारनाथ देगःया शिलापत्र ।	" "	ने. सं. १०९३		विशाखा अनागारिका	पञ्च भद्रिका न्ह्योने धर्मचक्र प्रवर्तन बुद्ध मूर्ति तथाः देगःचा दय्काव्यूगु ।

ल्याः	प्राप्ति स्थान	लिपि, भाषा	संबत्	पर्याय	दानपति	कीर्ति
३१०.	स्यंगु बातैनय तेजसा भौरबपाखे च्वंगु शिलापत्र ।	दे.अ. ने.भा.	वि. सं. २०३१		भीमकुमारी मानन्धर, वंतु तारावीरसि चन्द्रवीरसि कंसा-कार, जनबाहाः	अमिताभ, करुणामय व वज्रपाणि त्रिमूर्ति स्थापना याःगु । सर्वार्थसिद्धं सप्तपदगमन यानाच्वंगु, मायादेवी सिमाकचा ज्वनाः दना-च्वंगु लुम्बिनी दृश्य अंकित याना-तःगु मूर्ति स्थापना ।
३११.	किण्डोलय च्वंगु लुम्बिनी देगःया दुनेच्वंगु शिलापत्र ।	" "	वि. सं. २०३२		शुभरत्न शाक्य चन्द्रलक्ष्मी शाक्य	किन्वाहालय दुने क्यबय् सिमन्ति-यागु शूक्ष्म बुद्धगया मन्दिर दय्काः स्थापना याःगु ।
३१२.	किन्वाहालय दुनेच्वंगु शूक्ष्म बुद्धगया मन्दिरया शिलापत्र ।	" "	ने. सं. १०६६		मानवहादुर खड्गिकार भौसिको	हारती देगःया छ्वालं प्रदक्षिण पथय् मार्वल त्वहंतं सियाव्यूगु ।
३१३.	हारती देगःया प्रदक्षिण पथय् अंकित शिलालेख ।	" "	वि. सं. २०३३			

**स्वयम्भू स्थित मञ्जुश्री पर्वस्थान गुरु वागीश्वर मञ्जुश्रीया चाकलय्
छ्वालं पःखालय् सुरक्षित् यानातःपिं विविध मूर्तिया
संक्षिप्त विवरण सूची^१**

ल्याः	देवदेवताया नां	संक्षिप्त विवरण
१)	मञ्जुघोष	खड्ग पुस्तक सहित धर्मचक्र मुद्रावस्थित दनाच्चंहा निपा ल्हाः जकहा ।
२)	गणेश	ललितासन स्थित प्यपा ल्हाः सहितहा ।
३)	पद्मनृत्य लोकेश्वर	नृत्यपद मुद्राय् च्वंहा किंच्यापा ल्हातं पलेस्वां ज्वनाच्चंहा ।
४)	शाक्यमुनि बुद्ध	भूमिस्पर्श मुद्रा वज्रासन स्थित ।
५)		आलिढपद कयाः स्वपाः ख्वाः खुपा ल्हाः धारण यानाः कर्तिपात्र ज्वनाच्चंहा ।
६)	वज्रसाधु महाकाल (गण्डीधर महाकाल)	पुतुहुं च्वनेथे च्वनाः छपाः ख्वाः निपा ल्हाः दुहा धर्मगण्डी सहित कर्तिपात्र ज्वंहा ।
७)	सप्तलोचनी तारा	छपाः ख्वाः निपा ल्हाः अभयवरद विद्याः वज्रपर्यङ्क आसनय् च्वंहा ।
८)	अमोघपाश लोकेश्वर	छपाः ख्वाः च्यापा ल्हाः अभय व कमण्डलु ज्वनाः दनाच्चंहा ।
९)	पद्मपाणि लोकेश्वर	पद्म सहित वरद अभय यानाः दनाच्चंहा ।

१- आतन्तमुनि गुरुजुयागु निर्देशनय् थुगु स्थान गुठी जीर्णोद्धार एवं निर्माण समिति व अन्य श्रद्धालु भक्तपिनिगु पाखे सहायता कयाः आमूल परिवर्तन यानाः पुनर्निर्माण यानाबिल, उकिं थुगु मूर्तित उख्येथुख्ये लाःगु खनेदु ।

ल्याः	देवदेवताया नां	संक्षिप्त विवरण
१०)	अमोघसिद्धि तथागत	अभय मुद्रा यांना: वज्रासनय् च्वनाच्वंहा ।
११)	चिन्तामणि लोकेश्वर	चिन्तामणि सिमा ववस्सं च्वना: वरद मुद्रा यांना: दनाच्वंहा ।
१२)	यक्षरूप (भगीरथ)	प्यपा ल्हा: दुहा, शंख व माला ज्वना: दनाच्वंहा ।
१३)	आर्यतारादेवी	ललितासनय् च्वना: वरदाभय मुद्रा यांनाच्वंगु ।
१४)	महाकाल	वज्रकर्तिपात्र ज्वना: दनाच्वंहा, निपा ल्हा: जक ।
१५)	गुरु वागीश्वरया अवतार भेद?	वज्रासन स्थित प्यपा: खा: च्यापा ल्हा: दुहा वज्र व उत्पल ज्वनाच्वंहा ।
१६)	महामञ्जुश्री	वज्रासन स्थित चतुर्भुजधारी मूल हस्तं खङ्ग पुस्तक धारण यांनाच्वंहा ।
१७)	महाकाल	ध्यान रूप ल्या: १४ कथं ।
१८)	महामञ्जुश्री	ध्यान रूप ल्या: १६ कथं ।
१९)	मञ्जुघोष	ध्यान रूप ल्या: १ कथं ।
२०)	अरपचनवागीश्वर महामञ्जुश्री (नामसंगीति)	मूलगु ल्हातं अध्येषण मुद्रा यांनाच्वंगु ।
२१)	वसुधरादेवी	ललितासन स्थित छपा: खा: प्यपा ल्हा:, मूलगु ल्हातं वरद व रत्न ज्वनाच्वंहा ।
२२)	गणेश	लैलदु ज्वनाच्वंहा, छपा: खा: प्यपा ल्हा: ।
२३)	विश्ववज्रधर गणेश	खङ्ग व विश्ववज्र ज्वनाच्वंहा, छपा: खा: प्यपा ल्हा: दुहा ललितासन स्थित ।
२४)	भग्नमूर्ति महाकाल	थुगु मूर्ति केवल पादुका व वेताल आसन जक बाकि, मेगु अंग खण्डित ।
२५)	अज्ञात मूर्ति ?	छपा: खा: प्यपा ल्हा: वज्रपर्यङ्क आसन स्थित ।
२६)	चतुराकर्षणी देवता ?	स्वपा: खा: प्यपा ल्हा: दुहा वज्रपर्यङ्क आसन यांनाच्वंहा, अंकुश व पुष्प ज्वनाच्वंहा ।
२७)	चैत्यराज (.)	चैत्य व सर्प ज्वना: ललितासन यांनाच्वंहा ।
२८)	वज्राङ्कुश महाकाल	छपा: खा: निपा ल्हा: आलीढासन स्थित वज्र अंकुश ज्वनाच्वंहा ।
२९)	खङ्गवीर महाकाल	छपा: खा: निपा ल्हा: आलीढासनय् च्वंहा खङ्ग व ढाल ज्वनाच्वंहा ।
३०)	अंकुशधारी महाकाल	ध्यान रूप ल्या: २९ कथं जूसां अंकुश ज्वनाच्वंगु जक पा: ।
३१)	महामञ्जुश्री	छपा: खा: खुपा ल्हा: धारण यासे दनाच्वंहा अभय व उफोस्वां ज्वना: । ने. सं. ३६५ ।

स्वयम्भू पर्वस्थान गोपुच्छाग्र चैत्यया चाकलय् सुरक्षित् यानातःपिं देवता मूर्तियागु संक्षिप्त विवरण सूची

ल्याः	देवदेवताया नां	संक्षिप्त विवरण
१)	वज्रवीर महाकाल	छपाः ख्वाः निपा ल्हाः, दनाच्चंहा, कर्तिपात्र ज्वनाच्चंहा ।
२)	समन्तभद्र बोधिसत्व	छपाः ख्वाः निपा ल्हाः, दनाच्चंहा, धर्मचक्र मुद्रा ।
३)	सुखावती लोकेश्वर	स्वपाः ख्वाः खुपा ल्हाः, पयतुनाच्चंहा, मूलगु ल्हातं धनुषतां- छाकार यानाच्चंहा ।
४)	षडक्षरी लोकेश्वर	छपाः ख्वाः प्यपा ल्हाः, वज्रासनय् च्वनाच्चंगु, मूलगु ल्हातं कृताञ्जलि मुद्रा यानाच्चंगु दु ।
५)	सुखावती लोकेश्वर	ध्यान रूप ल्याः ३ कथं मिलय् जू ।
६)	प्रज्ञापारमिता देवी	चतुर्भुज वज्रासन स्थित धर्मचक्र मुद्रा यानाच्चंगु ।
७)	पद्मपाणि लोकेश्वर	वरद अभय मुद्रा यानाः दनाच्चंहा ।
८)	लोकेश्वर	पलेस्वां ज्वनाः दनाच्चंहा ।
९)	पद्मपाणि लोकेश्वर	ध्यान रूप ल्याः ७ कथं ।
१०)	बुद्ध शाक्यमुनि	अभयपान वियाः दनाच्चंहा ।
११)	बुद्ध शाक्यमुनि	वज्रासन स्थित भूमिस्पर्श मुद्रा ।
१२)	अमोघसिद्धि तथागत	वज्रासनय् च्वनाः अभय मुद्रा यानाच्चंहा ।
१३)	गणेश	ललितासन स्थित चतुर्भुजधारी ।

स्वयम्भू पर्वस्थानया प्रसिद्ध शान्तिपुरीया छ्वाःख्यरं चाःहुइकातःगु विभिन्न मूर्तिया संक्षिप्त विवरण

१)	व्याघिनी	छपाः ख्वाः प्यपा ल्हाः, प्रत्यालीढासनी कर्तिपात्र ज्वनाच्चंहा ।
२)	अपरिमिता तथागत	वज्रासन स्थित ध्यान मुद्रा यानाः अमृतआयु पूर्णकलश ज्वना- च्चंहा ।
३)	शाक्यमुनि बुद्ध	वज्रासन स्थित भूमिस्पर्श मुद्रा ।
४)	अवलोकितेश्वर	वरदाभय मुद्रा यानाः दनाच्चंहा ।

ल्याः	देवदेवताया नां	संक्षिप्त विवरण
५)	चतुर्भुज महाकाल	आलीढासन यांना: वज्रकर्तिपात्र ज्वंहा ।
६)	अनागत बुद्ध (आर्य मैत्रेय बोधिसत्व)	उपदेश मुद्रा यांना: कलश धारण यांना: दनाच्वंहा ।
७)	अमोघसिद्धि तथागत	वज्रासन स्थित अभय मुद्रा युक्त ।
८)	रत्नसम्भव तथागत	वरद मुद्रा धारी वज्रासन स्थित ।
९)	षडक्षरी लोकेश्वर	छपा: खा: प्यपा ल्हा:, मूलगु ल्हातं कृताञ्जलि मुद्रा यांना: वज्रासनय् च्वंच्वंहा ।
१०)	मञ्जुघोष	स्थानासनय् च्वना: खङ्ग पुस्तक ज्वना: दनाच्वंहा ।
११)	जालिनीप्रभ बोधिसत्व	छपा: खा: निपा ल्हा:, दनाच्वंहा - खङ्ग व पद्मोपरी अर्द्ध-चन्द्र युक्त ।
१२)	गगनगञ्ज बोधिसत्व	छपा: खा: निपा ल्हा:, जवगुलि राममञ्जरी व खवगुलि अमृतसंजीवनी कचा ज्वनाच्वंहा ।
१३)	सूर्य रूप लोकेश्वर (द्वय अभय रूप)	निपा ल्हातं अभय विया: दनाच्वंहा ।
१४)	पद्मपाणि लोकेश्वर	ध्यान रूप ल्या: ४ कथं ।
१५)	पद्मपाणि लोकेश्वर	" "
१६)	पद्मपाणि लोकेश्वर	" "
१७)	सर्वनिवरण विष्कम्भी	जवगु ल्हातं खङ्ग व खवगु ल्हातं विश्ववज्र ज्वना: दनाच्वंहा ।
१८)	षट्कोणचक्र	अग्निज्वालाया दुने निगू षट्कोण दोवरय् जूगु, उकिइ दुने खङ्ग चिन्ह अंकित ।
१९)	?	वज्रपर्यङ्क आसनय् च्वंहा, प्यपा: खा: व च्यापा ल्हा: दुहा देवी ।
२०)	शक्रयात्मक भक्तजन	प्रार्थना मुद्राय् भक्तजन अले वय्क:या मुलय् धर्मपत्नी नं व हे मुद्राय् सहवास जुयाच्वंगु ।
२१)	शाक्यमुनि बुद्ध	ध्यान रूप ल्या: ३ कथं ।
२२)	सप्तलोचनी तारा	वज्रपर्यङ्क आसनय् च्वना: वरद अभय मुद्रा यांनाच्वंहा ।
२३)	पद्मपाणि लोकेश्वर	ध्यान रूप ल्या: ४ कथं ।
२४)	अमिताभ तथागत	वज्रासनय् च्वना: ध्यान मुद्रा यांनाच्वंहा ।
२५)	पद्मपाणि लोकेश्वर	
२६)	मूर्ति रहित तोरणाकृति मात्र क्षपु व हितिमंग: सहित तोरण ।	

ल्याः	देवदेवताया नां	संक्षिप्त विवरण
२७)	?	छपाः ख्वाः खुपा ल्हाः, ललितासन यानाच्वंहा, मुलय् शक्ति छ्हा नं दु ।
२८)	अभयंदद लोकेश्वर	हृदय मण्डलय् जवगु ल्हाः दिकाः अभय बियाः खवगु ल्हातं पलेस्वां ज्वनाच्वंहा ।
२९)	त्रिरत्न मूर्ति	दत्थुइ बुद्ध-शाक्यमुनि भूमिस्पर्श मुद्रा, थ्वया जवय् संघ-पद्मपाणि लोकेश्वर, खवय् धर्म-आर्यतारा सहित त्रिमूर्ति युक्त ।
३०)	द्विभुज धर्मचक्र मञ्जुश्री	छपाः ख्वाः निपा ल्हाः, स्थानासनय् च्वनाच्वंहा ।
३१)	महाकाल	आलीढासनय् च्वनाच्वंहा, छपाः ख्वाः निपा ल्हाः, कर्तिपात्र धारण यानाच्वंहा ।
३२)	प्रज्ञापारमिता देवी	धर्मचक्र मुद्रा यानाः वज्रपर्यङ्क आसनय् च्वंहा, छपाः ख्वाः प्यपा ल्हाः दुहा ।
३३)	हलाहल लोकेश्वर	प्रथम निपा ल्हातं तांछाकार व धनुष ज्वनाः शक्ति मुलय् तयाः ललितासनय् च्वंहा, स्वपाः ख्वाः खुपा ल्हाः दुहा । ने. सं. ८१७ स निर्मित ।
३४)	शाक्यमुनि बुद्ध	ध्यान रूप ल्याः ३ कथं ।
३५)	सप्तलोचनी तारा	" ल्याः २२ कथं ।
३६)	षडक्षरी लोकेश्वर	" ल्याः ६ कथं ।
३७)	हलाहल लोकेश्वर	" ल्याः ३३ कथं ।
३८)	षडक्षरी लोकेश्वर	ध्यान रूप ल्याः ६ कथं ।
३९)	रत्नसम्भव तथागत	" ल्याः ८ कथं ।
४०)	महाकाल	" ल्याः ३१ कथं ।
४१)	आर्यतारा	ललितासनय् च्वनाः वरदाभय मुद्रा धारण यानाच्वंहा ।
४२)	लोचनीतारा	वज्रपर्यङ्क आसन यासे जवगु ल्हातं अभय बियाः खवगु ल्हातं वज्रयुक्त पलेस्वां ज्वनाच्वंहा ।
४३)	पद्मपाणि लोकेश्वर	वरद मुद्रा यानाः पलेस्वां ज्वनाः दनाच्वंहा ।
४४)	त्रिरत्नमूर्ति	दत्थुइ आदि बुद्ध स्वरूप चैत्य, जवपाखे षडक्षरी लोकेश्वर, खवपाखे धर्मदेवी ।
४५)देवी ?	प्रत्यालीढासनी देवी हस्तपादादि खण्डित ।
४६)	बुद्ध	भूमिस्पर्श मुद्रा नष्ट रूप ।
४७)	भविष्य व्याकरणमुद्रा बुद्ध	जवगु ल्हातं वरद मुद्रा यानाः खवगु ल्हातं चीवरया च्वः ज्वनाः

ल्याः	देवदेवताया नां	संक्षिप्त विवरण
		दनाच्चंहा ।
४८)	कुवेर	ललितासन यानाः रत्न व नवःचा ज्वनाच्चंहा, भोरितःग्वःहा ।
४९)	कारण्डव्यूह लोकेश्वर?	छपाः ख्वाः खुपा ल्हाः, अर्द्धपर्यङ्क आसन, प्रायः विकृत रूप ।
५०)	समन्तभद्र बोधिसत्व	पद्मनाल सहित धर्मचक्र मुद्रा यानाः स्थानासनय् च्वनाच्चंहा ।
५१)	अभयंदद लोकेश्वर	ध्यान रूप ल्याः २८ कथं ।
५२)	बुंगम लोकेश्वर	वरद अभय मुद्रा यानाः दनाः शिरस इन्द्रशैली मुकुट धारण यानाच्चंहा ।
५३)	सप्तलोचनी तारा	ध्यान रूप ल्याः २२ कथं ।
५४)	प्रज्ञापारमिता	ध्यान रूप ल्याः ३२ कथं ।
५५)	पद्मपाणि लोकेश्वर	वरद मुद्रा यानाः पलेस्वां ज्वनाः दनाच्चंहा ।
५६)	सहस्रभुज लोकेश्वर	क्लिङ्गः छयं दोछिपा ल्हाः धारण यानाः दनाच्चंहा ।
५७)	पद्मपाणि लोकेश्वर	वरद मुद्रा यानाः पलेस्वां ज्वनाः दनाच्चंहा ।
५८)	सप्तलोचनी तारा	ध्यान रूप ल्याः २२ कथं ।
५९)	हलाहल लोकेश्वर	ध्यान रूप ल्याः ३३ कथं, प्रायः नष्ट रूप ।
६०)	महाप्रस्थान बुद्ध	ध्यान रूप ल्याः ४७ जूसां हस्तमुद्रा पाः ।
६१)	अमोघसिद्धि बुद्ध	ध्यान रूप ल्याः ७ कथं ।
६२)	महाकाल	ध्यान रूप ल्याः ३१ कथं ।
६३)	धर्मचक्र महामञ्जुश्री	स्वपाः ख्वाः च्यापा ल्हाः धारण यानाः वज्रपर्यङ्क आसनय् च्वनाः धर्मचक्र मुद्रा यानाच्चंगु ।
६४)	मारविजय मुद्रा बुद्ध	थःगु न्हातिकाया चुलिचू भूमिस्पर्श यानाः वज्रासन यानाच्चंगु ।
६५)	पद्मपाणि लोकेश्वर	ध्यान रूप ल्याः १४ कथं ।
६६)	महाकाल	ध्यान रूप ल्याः ३१ कथं ।
६७)	धर्मचक्र शाक्यमुनि	वज्रासन यासे धर्मचक्र मुद्रा यानाच्चंगु ।
६८)	महाकाल	ध्यान रूप ल्याः ३१ कथं ।
६९)	धर्मचक्र शाक्यमुनि	ध्यान रूप ल्याः ६७ कथं ।
७०)	अमोघसिद्धि बुद्ध	ध्यान रूप ल्याः ७ कथं ।
७१)	चतुर्भुज महाकाल	आलीढासन यानाः वज्रकर्तिपात्र ज्वनाच्चंहा ।
७२)	अमोघपाश लोकेश्वर	अभय वरदान व कमण्डलु ज्वसे च्यापा ल्हाः धारण यासे दनाच्चंहा । ने. सं. ५४८ ।
७३)	द्विभुज वसुधरा	रत्नमञ्जरी व अभय बिसे दनाच्चंहा ।

ल्याः	देवदेवताया नां	संक्षिप्त विवरण
७४)	महाप्रस्थान बुद्ध	जवगु ह्लातं वरद मुद्रा यासे खवगु ह्लाः क्वकयाः चीवर ज्वनाः दनाच्चंगु ।
७५)	अमृतप्रभ	कमलोपरी पुष्प व कलश ज्वँसे दनाच्चंह्य ।
७६)	महाकाल	वज्रकर्तिपात्र ज्वँसे दनाच्चंह्य ।
७७)	आर्यतारादेवी	ल्याः ४१ कथं ।
७८)	हलाहल लोकेश्वर	ल्याः ३५ कथं, ने. सं. ६६६ ।
७९)	धर्मचक्र बुद्ध	ल्याः ६७ कथं ।
८०)		छपाः ख्वाः खुपा ह्लाः ललितासन स्थित लिस्सें द्विभुजयुक्त शक्ति सहित ।
८१)	द्विभुज मञ्जुश्री	खङ्ग पुस्तक ज्वँसे दनाच्चंह्य ।
८२)	महाप्रस्थान बुद्ध	ल्याः ७४ कथं ।
८३)	सम्भोगकाय रूप्य धर्मचक्र बुद्ध	धर्मचक्र यासे वज्रासन स्थित, ने. सं. ७८८ ।
८४)	सिंघिनि	प्रत्यालीढासनय् च्वनाः चतुर्भुज धारण याःह्य
८५)	व्याघ्रिनी	" " " " } शान्तिपुर
८६)	काकाश्यादेवी	" " " " } लुखाया जःखः
८७)	उलूकाश्यादेवी	" " " " } च्वंप्पि ।

शान्तिपुरया खःपाखे च्वंगु धर्मशाला फलेचाया पिनेच्चंप्पिं

८८)		पलेस्वांकचा ज्वनाः वरद मुद्रा यानाः दनाच्चंह्य ।
८९)	प्रज्ञापारमिता	ल्याः ३२ कथं ।
९०)	पद्मपाणि लोकेश्वर	वरद अभय मुद्रा यानाः दनाच्चंह्य ।
९१)	महाप्रस्थान बुद्ध	जवगु ह्लाः वरद मुद्रा यासे खवगु ह्लाः चीवर संगृहीत ।
९२)	आर्यतारा	वरद व अभय यासे ललितासन यानाच्चंह्य ।
९३)	आर्यतारा	" "
९४)	अमोघसिद्धि बुद्ध	अभय मुद्रा यासे वज्रासन यानाच्चंह्य ।
९५)	प्रज्ञापारमिता	ल्याः ३२ कथं ।
९६)	माल्यादेवी	निपा ह्लातं पुष्पमाला ज्वनाः दनाच्चंह्य ।

ल्याः	देवदेवताया नां	संक्षिप्त विवरण
६७)	अमोघसिद्धि बुद्ध	ल्याः ६५ कथं ।
६८)	पद्मपाणि लोकेश्वर	ल्याः ६१ कथं ।
६९)	खड्गवीर महाकाल	आलीढासन स्थित चतुर्भुज ।

थ्व हे धर्मशाला फलेचाया दुनेच्वंणिं

- १००) विश्वकुलानुगत नामसंगीति- छपाः खाः च्यापा ह्लाः, वज्रासन यासे गरुड गयाच्वंहा ।
या छगू रूप ?
- १०१) समन्तभद्र बोधिसत्व धर्मचक्र मुद्रा यासे दनाच्वंहा ।
- १०२) प्रज्ञापारमिता ल्या ३२ कथं ।
- १०३) विरुपाक्षया अवलोकितेश्वर शिवपार्वतीया उपासक विरुपाक्षं अवलोकितेश्वरया शरण्यं
भक्ति वंगु छगू संस्मरण । लिस्सें अवलोकितेश्वरं महादेवयात भविष्य-
व्याकरण वियाच्वंगु ।

शान्तिपुरया न्होनेपाखें स्वयम्भूइ थहांवनेगु लँपुइ च्वंणिं

- १०४) अक्षोभ्य तथागत स्वयम्भूइ च्वंगु सम्पूर्ण मूर्तित मध्यय् विशालगु थुगु भूस्पर्श
वज्रासन स्थित बुद्ध मूर्ति, जीर्णोद्धार वि. सं. १९६० ।
- १०५) महावज्रसत्त्व स्वपाः खाः च्यापा ह्लाः दुहा, मूलगु ह्लातं वज्रधण्ट ज्वनाः
वज्रासन यानाच्वंहा ।
- १०६) त्रिरत्न मूर्ति न्हापां अक्षोभ्य बुद्ध, थ्वया क्वस्सं प्रज्ञापारमिता धर्म, थ्वयां
ल्यू षडक्षरी लोकेश्वर संघ ।
- १०७) महामायूरी ? प्रथमगु निपा ह्लातं कलश व तर्पण मुद्रा यासे प्यपाः खाः
च्यापा ह्लाः धारण यासे वज्रासन यानाच्वंहा ।
- १०८) महाकाल वज्रकर्तिपात्र धारण यासे दनाच्वंहा ।
- १०९) अमिताभ तथागत समाधि मुद्रा यासे वज्रासन यानाच्वंहा ।
- ११०) स्वपाः खाः खुपा ह्लाः धारण यासे वज्रासन यानाच्वंहा ।

ल्याः	देवदेवताया नां	संक्षिप्त विवरण
१११)	अरपचन वागीश्वर नाम- संगीति परिवार सहित	थुकिइ गुरु वज्रधरंनिसें कयाः नामसंगीति पञ्चबुद्ध, मञ्जुश्री, वज्रच्छेदिका प्रज्ञापारमिता एवं गणेश, महाकाल सहित अंकित यानातःगु दु ।
११२)	शक्ति सहित मञ्जुदेव	केशिनी उपकेशिनी (वरदा, मोक्षदा देवी) गणेश महाकाल जःखः तयाः दत्थुइ खङ्ग पुस्तक धारो मञ्जुश्री दनाच्चंगु ।
११३)	शक्तियुक्त धर्मचक्र महामञ्जुश्री	प्यपाः खाः च्यापा ह्लाः धारण यासे वज्रपर्यङ्क आसन यानाः धर्मचक्र यानाः शक्ति मुल्य तयाच्चंह्य । थ्वया छचालं अमिताभ तारा व प्रज्ञापारमिता अंकित यानातःगु दु ।
११४)	सुखावती लोकेश्वर	छपाः खाः खुपा ह्लाः, मुख्यगु ह्लातं धर्मचक्र यासे शक्ति मुल्य तयाच्चंगु दु । थ्वया लिक आर्यतारा व लोकेश्वर सहित जुयाच्चंगु ।
११५)	सप्तलोचनी तारा	ल्याः २२ कथं ।
११६)	पद्मपाणि लोकेश्वर	वरद मुद्रा यानाः पलेस्वां ज्वनाः दनाच्चंह्य ।

स्वयम्भूया वायव्यकुलां पाखे अग्निपुरया लिकच्चंगु

१)	पद्मपाणि लोकेश्वर	वरद मुद्रा यासे पलेस्वां ज्वनाः दनाच्चंह्य ।
२)	महामञ्जुश्री	छपाः खाः प्यपा ह्लाः धारण यासे वज्रासनय् च्वनाच्चंह्य । थ्वया लिसे लिसें आर्यतारा, मञ्जुदेव एवं प्रज्ञापारमिता दु । च्वय्पाखे स्वयम्भूया प्रतीक चैत्य अंकित यानातल । ने.सं. ७५६ ।
३) देवी	छपाः खाः प्यपा ह्लाः धारण यासे सत्वपर्यङ्क आसन याना- च्चंह्य ।
४)	शक्तियुक्त महामञ्जुश्री	स्वपा खाः खुपा ह्लाः धारण यानाः शक्ति मुल्य तयाच्चंह्य ।
५)	सप्तलोचनी तारा	वज्रपर्यङ्क आसन यासे वरद व अभय मुद्रा यानाच्चंह्य ।
६)	गुरु वागीश्वरया श्रीपादुका	द्वादशकोणाकार मण्डलया दत्थुइ पद्मचन्द्रया द्योने गुरु वागीश्वर मञ्जुश्रीया श्रीपादुका तयातःगु दु । थ्व हे पादुका जःखः गणेश महाकाल तयातल, थ्वया लिउनेसं विविध देवता व अष्टमंगलया चिन्ह अंकित यासे शोभा वृद्धि यानातल ।
७)	चूडाभिक्षुणी	शान्त रूप भिक्षुणीया रूप्य चीवरं न्ययाः जवगु ह्लातं वरद

मुद्रा यासे खवगु ह्लातं चीवरया च्वः ज्वनाः दनाच्वंगु ।

थौं थुगु मूर्ति अपहरण जुइ धुंकल, परन्तु थुगु मूर्ति यल महाबुद्धया पण्डित श्री अमृतानन्द शाक्यजुं स्वयम्भू सम्बन्धी मूर्तिया प्रसंग्य् थन्हि सत्यादं न्ह्यो धर्मकोष नामक सफुतिइ उल्लेख यानातःगु खनेदु ।

चःस्वां सिमाया चाकलय् च्वंगु मूर्ति

- १) हरिहरिवाहन लोकेश्वर नाग, सिंह, गरुड व नारायण वाहन यासे छपाः ख्वाः खुपा ह्लाः धारण यानाच्वंह्य । थ्वया जवपाखे वसुन्धरा, आर्यतारा व भक्तजन एवं खवपाखे सरस्वती, यक्षराज व भृकुटी तारा सहित यानातःगु दु । सर्वोपरी स्थान्य् अमिताभ तथागत सुसज्जित यानातल ।
- २) सरस्वतीदेवी छपाः ख्वाः प्यपा ह्लाः दुह्य, ललितासन यानाच्वंह्य ।
- ३) मारविजय शाक्यमुनि पुलि क्वस्सं भूमिस्पर्श मयासे पाय्छि मुलया दत्थुइ भूमिस्पर्श यानाः वज्रासन यानाच्वंगु । थ्वया जःखः हानं मेगु शाक्यमुनि व सप्तलोचनी तारा ।
- ४) शाक्यमुनि बुद्ध भूमिस्पर्श मुद्रा वज्रासन स्थित, चैत्य अंकित तोरण सहित ।
- ५) सप्तलोचनी तारा वज्रपर्यङ्क आसन स्थित वरद व अभय मुद्रा यानाच्वंह्य ।
- ६) शाक्यसिंह तथागत भूमिस्पर्श मुद्रा यासे वज्रासन यानाच्वंह्य । थ्वया जव्य् श्रावक भिक्षु व खव्य् महायानिक बोधिसत्व पद्मपाणि ।
- ७) अमिताभ तथागत वज्रासन यासे समाधि मुद्रा यानाच्वंह्य ।
- ८) महाशीतवती त्रिनेत्रयुक्त प्यपाः ख्वाः च्यापा ह्लाः धारण यासे वज्रपर्यङ्क आसन्य् च्वनाच्वंह्य ।
- ९) सम्बर विशेष ? त्रिनेत्रयुक्त पञ्चमुखी द्वादशभुजधारी आलोढासन स्थित । पादपीठस भक्तजनपि तथातःगु दु ।

हारती देगःया लिउनेनिसें नागपुरया जःखः च्वंगु मूर्तिंत

ल्याः	देवदेवताया नां	संक्षिप्त विवरण
१)	पद्मपाणि लोकेश्वर	वरद मुद्रा यासे पलेस्वां ज्वनाः दनाच्चंव्ह । थ्वया जःखः दनाच्चंव्हि तारादेवीपि दु ।
२)	अक्षोभ्य तथागत	भूमिस्पर्श यासे पिण्डपात्र ज्वनाः वज्रासन यानाच्चंव्ह । थुगु मूर्तियात शोभा वृद्धि निम्ति सुन्दर तोरण व किसि सिंह युक्त सिंहासन तयातःगु दु । लिस्सें निह्य निखे भिक्षुपि उपस्थित यानातल, आसनया क्वस्सं निह्य प्रार्थीजन नं । ने. सं. ७८१ ।
३)	अक्षोभ्य तथागत	वज्रासन यासे भूमिस्पर्श यानाच्चंव्ह । जःखः भिक्षु आसनय् छज्वः किसि शिरोपरी चैत्य अंकित प्रभा । थ्व हे मूर्तिया जःखः मञ्जुश्री व तारादि सहित यानातल ।
४)	वसुन्धरादेवी	छपाः ख्वाः प्यपा ह्लाः, दनाच्चंव्ह ।
५)	पद्मपाणि लोकेश्वर	ल्याः १ कथं ।
६)	पद्मपाणि लोकेश्वर	ल्याः १ कथं । थुगु मूर्तिया जःखः षडक्षरी लोकेश्वर व आर्यतारा । ने. सं. ७६७ ।
७)	सप्तलोचनी तारा	वरद व अभय बिसे वज्रपर्यङ्क आसनय् च्वनाच्चंव्ह ।
८)	विरुपाक्ष किरात्	जवगु तुति कय्कुंकाः खवगु तुति भ्यसें लुइकाः पर्वत गय्गु अभियान गुरु यानाच्चंव्हु थें यानाच्चवन । जवगु ह्लाः आकाशय् छव्वय्काः विश्वमय मुद्रा अथवा विजय मुद्रा रूपय् कयनाच्चंव्हु दु । गुलिसिनं धाःगु दु— अपराध कर्मपाखे विमुख जुयाः सचेष्ट प्रदर्शन यानाः बुद्धयाथाय् शरण वयाच्चंव्हु । थ्वया लिउने जन्हुफातय् निखे वलाकथि दुगु द्वकचा कुबियाच्चंव्हु खनेदु । लिस्सें थ्वया लिक महाकाल छह्य नं तयातल ।
९)	वज्रसाधु महाकाल	उत्कुटुक आसन यानाः तुक्कुक्क पयतुइ थें च्वनाच्चंव्हु । वज्रकर्तिपात्र व धर्मगण्डी नं ज्वनाच्चंव्हु दु ।
१०)	वज्रवीर महाकाल	वज्रकर्तिपात्र ज्वनाः दनाच्चंव्ह ।
११)	पद्मपाणि लोकेश्वर	वरद मुद्रा यासे पलेस्वां ज्वनाः दनाच्चंव्ह ।
१२)	शक्ति सहित महामञ्जुश्री	छपाः ख्वाः प्यपा ह्लाः धारण यासे वज्रासन यानाच्चंव्ह ।

ल्याः	देवदेवताया नां	संक्षिप्त विवरण
		लिस्सें शक्ति नं दु ।
१३)	अमिताभ तथागत	समाधि मुद्रा यासे वज्रासनय् च्वनाच्चंह्य । चैत्यांकित तोरण व आसनय् भक्तजन । ने. सं. ८०४ ।
१४)	शाक्यमुनि बुद्ध	जःखः शालिपुत्र व महामौङ्गल्यायन सहित यासे वज्रासनय् च्वनाः भूमिस्पर्श यानाच्चंगु ।
१५)	अमिताभ तथागत	बोधिवृक्षया क्वस्सं ध्यान मुद्रासन स्थित । आसनय् पूजोपकरण सहित भक्त । ने. सं. ८१४ ।
१६)	अक्षोभ्य तथागत	भूमिस्पर्श मुद्रा यासे वज्रासन यानाच्चंह्य । जःखः भिक्षु तथाः तोरण अंकित यानातःगु दु । ने. सं. ६०० ।
१७)	अमिताभ तथागत	वज्रासन यासे योग मुद्रा यानाच्चंगु । आसनया ऊवलय् दातापि दु ।
१८)	पद्मपाणि लोकेश्वर	ल्याः ११ कथं ।
१९)	अक्षोभ्य तथागत	भूमिस्पर्श यासे वज्रासन यानाच्चंगु । अभिलेख दुसां अस्पष्ट ।
२०)	अक्षोभ्य तथागत	भूमिस्पर्श यासे वज्रासन यानाच्चंगु । लिस्सें तोरण व भक्तजनपि दु ।
२१)	अक्षोभ्य तथागत	" " "
२२)	पद्मपाणि लोकेश्वर	वरद मुद्रा यासे पलेस्वां ज्वनाः दनाच्चंह्य । जःखः तारा व च्वय् चैत्य दु ।
२३)	महामञ्जुश्री	छपाः खाः प्यपा ह्लाः वज्रासन युक्त ।
२४)	पद्मपाणि लोकेश्वर	वरद मुद्रा यासे पलेस्वां ज्वनाः दनाच्चंह्य । जःखः देवपुत्रपि अंकित यानातल ।
२५)	महाप्रस्थान बुद्ध दीपङ्कर (?)	जवगु ह्लाः अभय मुद्रा यासे खवगु ह्लातं चीवरया च्वः ज्वनाः वरद मुद्राया रूप्य ह्लाः क्वकयाः महाप्रस्थान जुइत तत्पर जुयाच्चंगु । पभामण्डलय् अभिलेख अंकित यानातल । ने. सं. ६५४ ।
२६)	अक्षोभ्य तथागत	भूमिस्पर्श यासे वज्रासन यानाच्चंगु । थ्वया क्वस्सं भक्तजनपि तथातल ।
२७)	त्रिबुद्ध मूर्ति (विपश्चो, क्रकुच्छन्द व शाक्यमुनि)	विपश्चो बुद्ध धर्मचक्र मुद्रा, क्रकुच्छन्द बुद्ध समाधिमुद्रा व शाक्यमुनि बुद्ध भूमिस्पर्श यासे स्वह्मं वज्रासन यानाच्चंगुपि जुल ।
२८)	षड्भुज महामञ्जुश्री	छपाः खाः खुपा ह्लाः धारण यासे अर्द्धवज्रपर्यङ्क आसनय्

ल्याः	देवदेवताया नां	संक्षिप्त विवरण
-------	----------------	-----------------

चवनाः शक्ति घय्पुनातःगु दु । श्व हे शक्तियात सरस्वती नामं सम्बोधन यानातःगु दु । पादपीठया अभिलेख्य ने. सं. ८२२ ।

२६) प्रज्ञापारमिता

छपाः खाः प्यपा ह्लाः धारण यासे वज्रपर्यङ्क आसनय् चवनाच्चंगु । श्वया ववस्सं वसुन्धरादेवी व श्वया नं जःखः पयतुनाच्चं पि तारादेवीपि तयातल ।

३०) अमोघपाश लोकेश्वर

छपाः खाः च्यापा ह्लाः, दनाच्चंह्य ।

३१) स्थवीरवृद्ध

करतल आसनया द्योने थः पुज्य स्थवीर आजुयात सम्मान निम्ति रत्न मण्डल द्रव्यलपे थे यानाः करतलद्वारा स्वागत यानाच्चंगु छगू दृश्य । थुकिइ प्यह्य दानपतिपिनिगु समूह दु ।

३२) अक्षोभ्य तथागत

भूमिस्पर्श यासे वज्रासन यानाच्चंह्य । श्वया जःखः लोचनी, मामकी, पाण्डूरा, तारा तयातःगु दु । लिस्सें वैरोचन तथागत अंकित यानातःगु बोधिवृक्षया प्रभामण्डल थे यानाः कर्म तयातःगु दु ।

३३) पवन भैरव

गन्धकूट शैली देगल्य् च्वंगु छगू मूर्ति सत्त्वपर्यङ्क आसन यानाः छपाः खाः प्यपा ह्लाः धारण यानाः वज्रकर्तिपात्र ज्वनाच्चंह्य । वायुपताक ज्वनाच्चंह्य शक्तियात घय्पुनातःगु दु ।

प्रतापपुर अनन्तपुर लिक्कलिकच्चंगु मूर्ति

१) श्वानास्यादेवी

छपाः खाः प्यपा ह्लाः धारण यासे प्रत्यालीढासन यानाः वज्रकर्तिपात्र ज्वनाच्चंह्य ।

२) शूकरास्यादेवी

छपाः खाः प्यपा ह्लाः ज्वंसे आलीढासन पदय् चवनाः वज्रकर्तिपात्र ज्वनाच्चंह्य ।

३) काकास्यादेवी

प्यपाः खाः खुपा ह्लाः धारण यानाः नृत्यपद आसनय् चवनाः वज्रघण्ट ज्वनाः आलिगन मुद्रा यानाच्चंह्य ।

४) उलूकास्यादेवी

” ”

५) मारविजय शाक्यमुनि

अनेक सशस्त्र ज्वनाः विभिन्न भेष धारण यानाच्चं पि मारसैन्य-गणपिनि दत्थुइ चवनाः भूसाक्षि निर्देशन यानाः मारश्रेष्ठ

ल्याः	देवदेवताया नां	संक्षिप्त विवरण
६)	भूमिस्पर्श बुद्ध	नमुचिमार कृष्णवन्धुयात मूर्छित यानाः क्यनाच्चंगु, थुगु बुद्धमूर्ति वज्रासन यासे भूमिस्पर्श यानाच्चंगु दु । ने.सं. ७७६ । भूमिस्पर्श यासे वज्रासन यानाच्चंगु । थ्वया जःखः षडक्षरी लोकेश्वर, प्रज्ञापारमिता अंकितगु तोरण सहित यानातल ।
७)	हलाहल लोकेश्वर	छपाः खाः खुपा ह्लाः जुसे सत्वपर्यङ्क आसन यानाच्चंगु । लिस्सें शक्ति सहित ।

दक्षिणपाखे वसुपुरया दुनेच्चंगु मूर्तित

१)	सप्तलोचनी तारा	वरद व अभय मुद्रा यासे वज्रपर्यङ्क आसनय् च्वनाच्चंगु ।
२)	भूमिस्पर्श बुद्ध	वज्रासन यासे भूमिस्पर्श यानाच्चंगु ।
३)	भूमिस्पर्श बुद्ध	" "
४)	सप्तलोचनी तारा	ल्याः १ कथं ।
५)	जम्बलयक्ष	छपाः खाः निपा ह्लाः ललितासनय् च्वनाच्चंगु ।
६)	मञ्जुघोष	खङ्ग पुस्तक ज्वँसे दनाच्चंगु ।
७)	बुंगम लोकेश्वर	पलेस्वां ज्वँसे वरद व आह्वान मुद्रा यानाः दनाच्चंगु ।
८)	वसुन्धरादेवी	ललितासनय् च्वँसे छपाः खाः खुपा ह्लाः दर्शन वियाच्चंगु । थ्वया लिउनेसं सुन्दर कलात्मक प्राचीन तोरण छगू नं लिधंसा तयातःगु दु ।
९)	वज्रपाणि बोधिसत्व	जवगुलि वज्र ज्वँसे खवगुलि पलेस्वां ज्वनाः दनाच्चंगु ।
१०)	प्रज्ञापारमिता	छपाः खाः प्यपा ह्लाः धारण यासे वज्रपर्यङ्क आसनय् च्वनाच्चंगु । लिस्सें वसुन्धराया मूर्ति नं अंकित जुयाच्चंगु दु ।
११)	अमोघपाश लोकेश्वर	छपाः खाः च्यापा ह्लाः धारण यानाः दनाच्चंगु ।
१२)	भूमिस्पर्श बुद्ध	वज्रासन यासे भूमिस्पर्श यानाच्चंगु ।
१३)	अक्षोभ्य तथागत	" "
	धर्मचक्र अमोघसिद्धि	गरुडासनय् च्वनाः धर्मचक्र यानाच्चंगु ।
	धर्मचक्र रत्नसम्भव	अश्वासनय् " "

नैऋत्य कुलां वायुपुरपाखे च्वंगु मूर्ति

ल्याः	देवदेवताया नां	संक्षिप्त विवरण
१)	स्वयम्भू उत्पत्तिया संस्मरण मूर्ति	दत्थुइ वज्रासन स्थित भूस्पर्श मुद्रा अक्षोभ्य तथागत, श्वया जःखः षडक्षरी लोकेश्वर, प्रज्ञापारमिता व पञ्चबुद्ध युक्त तोरण, श्वया च्वस्सं शून्यनिरञ्जनया प्रतीक खालिगु स्थान अले आसन क्वस्सं गुह्येश्वरीया लुमन्तिकथं कलश तथातःगु दु । श्वया लिसेलिसे चतुर्महाप्राकार पर्वतया दृश्य अंकित यानातःगु जुल ।
२)	वज्रवीर महाकाल	वज्रकर्तिपात्र ज्वनाः वेताल आसन यानाः दनाच्चंहा, श्वया आसन त्वाकल्य भक्तजनपिनिगु परिवार उपस्थित जुयाच्चंगु दु ।
३)	चिन्तामणि लोकेश्वर	चिन्तामणि वृक्ष क्वस्सं अर्द्धसमपद आसन यानाः दनाः जवगु ह्लातं वरदान बियाः खवगु ह्लातं सिमाकचा ज्वनाच्चंगु । लिस्से ह्ये ज्वनाः फयाच्चंहा यक्षया मूर्ति नं खनेदु । ने. सं. ५३६ ।
४)	चतुर्भुज गणेश	खास वायुपुरया दुने हे च्वंगु थुगु मूर्ति आलोढासन पद कयाः दनाच्चंहा । अभिलेखया साल मिति नष्ट रूप खनेदु ।

ताशिगोमों चैत्यया लिक्च्वंगु तःग्वःगु चैत्यया वेदिकाय् च्वंगु

५)	हलाहल लोकेश्वर	छपाः ख्वाः खुपा ह्लाः धारण यासे अर्द्धवज्रपर्यङ्क आसनय् च्वनाच्चंगु दु । श्वया जःखः तारा व सप्तलोचनी तारा, फुसय् चैत्य अंकित यानातल । अभिलेख दुसां संबत् अस्पष्ट ।
६)	वज्रदेवी	खद्वांग व कपालं पात्र ज्वसे सुखासनय् च्वनाच्चंगु । अभिलेख दु, साल अस्पष्ट ।
७)	षडक्षरी लोकेश्वर	चतुर्भुज वज्रपर्यङ्क आसनय् च्वंहा ।
८)	वज्रवीर महाकाल	ल्याः २ कथं ।
९)	चतुर्भुज महाकाल	सुखासन यासे वज्रकर्तिपात्र ज्वनाच्चंहा ।

ल्याः	देवदेवताया नां	संक्षिप्त विवरण
१०)	शाक्यमुनि बुद्ध	वज्रासन यासे भूस्पर्श मुद्रा यानाच्चंहा । तोरण युक्त । ने. सं. ८७३ ।
११)	आर्यतारा	वरदाभय मुद्रा यासे ललितासनय् च्वनाच्चंहा ।
१२)	वीणाराज	वीणा ज्वँसे सुखासनय् च्वनाच्चंहा ।
१३)	शाक्यमुनि बुद्ध	ल्याः १० कथं ।
१४)	शाक्यमुनि बुद्ध	ल्याः १० कथं, तोरण सहित ।
१५)	आर्यमैत्रेय	चैत्य व कलश धारण यासे दनाच्चंहा । जःखः तारा निहा दु ।
१६)	अक्षोभ्य तथागत	किसि व सिंह युक्त सिंहासनय् च्वँसे भूमिस्पर्श मुद्रा यानाः वज्रासनय् च्वनाच्चंगु । वज्रसत्त्व, अमिताभ व अमोघसिद्धि अंकित तोरण दुगु ।
१७)	शाक्यमुनि बुद्ध	भूस्पर्श यासे पिण्डपात्र धारण यानाच्चंहा वज्रासनय् च्वनाः । थुगु मूर्तिया खवगु ब्वहःपाखे धर्मचक्र मञ्जुश्री छहा दु ।
१८)	वज्रवीर महाकाल	ल्याः २ कथं । आसनया ऊवलय् भक्तजनपि उपस्थित जुया-च्चंगु ।

स्वयम्भू अमिताभ बुद्धया न्होनेपाखे च्वंगु मूर्ति

- १) प्रज्ञापारमिताः शिलास्तम्भया द्योने तयातःगु- सुवर्णमय मूर्ति । छपाः खाः प्यपा ह्लाः वज्रपर्यङ्क आसन यासे धर्मचक्र मुद्रा यानाच्चंहा ।
- २) षडक्षरी लोकेश्वरः त्वहँथांया द्योनेच्चंगु- सुवर्णमय मूर्ति । छपाः खाः प्यपा ह्लाः वज्रपर्यङ्क आसन स्थित अञ्जलि मुद्रा यानाच्चंहा । ने. सं. १००३ ।
- ३) वज्रसत्त्वः वज्रघण्ट ज्वँसे वज्रासन यानाच्चंहा । थुगु सुवर्ण रञ्जित मूर्ति आदरपूर्वक शिलास्तम्भया द्योने तयातःगु दु । ने. सं. १०२२ ।
- ४) वज्रसत्त्वः " " "
- ५) आर्यतारादेवीः अर्द्धसमपद आसन यानाः दनाच्चंहा, वरद व अभय मुद्रा यासे । लिस्से थुगु भव्य मूर्ति पद्मासन व कर्म तयाः शोभा वृद्धि

१- थुगु तिमूत सुवर्णमय ।

२- थुगु मूर्ति जक धातुया ।

ल्याः	देवदेवताया नां	संक्षिप्त विवरण
-------	----------------	-----------------

यानातःगु जुल ।

६) आर्यतारादेवी^१

"

"

"

७) अंकुश महाकाल

आलीढासनय् च्वनाः वज्र पाश व अंकुश ज्वनाच्चंहा ।

८) दण्डीधर महाकाल

प्रत्यालीढासनय् च्वनाः वज्रपाश व विश्ववज्र युक्त दण्डी ज्वनाच्चंहा ।

स्वयम्भूया न्ह्योनेच्वंगु पुलांगु गुम्बाया छ्यलिइ च्वंगु मूर्तित

१) षडक्षरी लोकेश्वर

अञ्जलि मुद्रा यासे वज्रपर्यङ्क आसनय् च्वनाच्चंहा, प्यपा ह्लाः दुहा ।

२) शाक्यश्री लामा

वज्रासन यासे वज्र व पात्र ज्वनाः पुलिइ दिकाच्चंहा, उग्र रूप जुयाच्चंहा, रक्षाकवच योगपट्ट धारण यानाच्चंहा ।

३) महाकाल

आलीढासन स्थित वज्रकर्तिपात्र ज्वनाच्चंहा ।

४) वागीश्वर मञ्जुश्री

छपाः खाः खुपा ह्लाः धारण यासे दनाच्चंहा । प्रथम हस्त द्वयेन वरद मुद्रा यासे उत्पल पुष्प ज्वनाच्चंगु । श्वया जःखः केशिनी उपकेशिनी (वरदा, मोक्षदा) दनाच्चंगु दु ।

५) समन्तभद्र बोधिसत्व

धर्मचक्र यासे दनाच्चंहा ।

६) अमिताभ तथागत

ध्यानमुद्राय् च्वनाः वज्रासन यानाच्चंहा ।

७) अमिताभ तथागत

"

"

८) वज्रगुरु

वज्रासन यासे वज्र व पात्र ज्वनाः खट्वांग धारण यानाच्चंगु दु ।

९) अमिताभ तथागत

ल्याः ६ कथं ।

१०) अवलोकितेश्वर

वरदाभय मुद्रा यासे सुखासनय् च्वनाच्चंहा ।

११) वैरोचन तथागत

धर्मचक्र (बोध्यंग) मुद्रा वज्रासन स्थित । श्वया जःखः चतुर्बुद्ध व शिरोपरी चैत्यांकित यानातःगु दु ।

१२) ग्याल्वा कर्मापा

अभय व कलश ज्वसे वज्रासन यानाच्चंहा ।

१३) सप्तलोचनी तारा

वरद व अभय मुद्रा यासे वज्रपर्यङ्क आसन यानाच्चंगु ।

ल्याः	देवदेवताया नां	संक्षिप्त विवरण
१४)	अक्षोभ्य बुद्ध	वज्रासन स्थित भूमिस्पर्श यानाच्चंहा ।
१५)	अमिताभ तथागत	ध्यान मुद्रा यासे वज्रासन यानाच्चंहा ।
१६)	अक्षोभ्य तथागत	भूमिस्पर्श यासे वज्रासन यानाच्चंहा ।
१७)	पद्मपाणि लोकेश्वर	वरद मुद्रा यासे पलेस्वां ज्वनाः दनाच्चंहा ।
१८)	वज्रसत्त्व	वज्र व घण्ट ज्वसे वज्रासनय् च्वनाच्चंहा ।
१९)	अमिताभ तथागत	समाधि मुद्रा वज्रासन स्थित ।
२०)	वैरोचन तथागत	बोध्यंग मुद्रा यासे वज्रासन यानाच्चंहा ।

हारितीया भण्डार क्वथाय् च्वंगु मूर्ति

- १) पद्मपाणि लोकेश्वर वरद मुद्रा यासे पलेस्वां ज्वनाः दनाच्चंगु दु । थ्वया जःखः तारादेवी सहित जुयाच्वन ।
- २) बुंगम लोकेश्वर वरद मुद्रा यासे आह्वान मुद्रा यानाः पलेस्वां ज्वनाः दनाच्चंहा । जःखः आर्यतारा, भृकुटी तारा ललितासनय् च्वनाच्चंपि ।
- ३) अक्षोभ्य तथागत प्रस्तरमय पर्यङ्कयुक्त ग्वाखय् दुने थःगु हे तालं च्वनाच्चंगु किसिया द्योने भूमिस्पर्श युक्त वज्रासन स्थित अक्षोभ्य च्वनाच्वन । थ्वया जःखः वज्रांकुश व वज्रपाश ज्वनाच्चंपि आकर्षणी देवता तयातल, अथे हे आसन क्वस्सं वज्रावेश ।
- ४) षडक्षरी एवं आर्यतारा वज्रासन व ललितासनय् च्वनाच्चंपि देव देवी नापं तयातःगु दु ।
- ५) धर्मधात्वेश्वरी श्वेततारा निखे पद्मपुष्प ज्वसे धर्मचक्र मुद्रा यानाः अर्द्धवज्रपर्यङ्क आसन यानाच्चंहा । जःखः तारादि सहित ।
- ६) विरूपा सिद्ध सुखासनय् च्वनाः कपालपात्र ज्वनाः खवगु ह्लातं तर्जनी मुद्रा यासे ह्लाः छव्वय्काच्चंहा ।
- ७) शाक्यश्री लामा रक्षाकवच योगपट्ट धारण यानाः उग्र रूप जुयाच्चंहा, वज्रासन यानाः वज्र व पात्र ज्वनाः पुलिइ दिकाच्चंहा ।
- ८) हलाहल लोकेश्वर अर्द्धवज्रपर्यङ्क आसन यासे छपाः रुवाः खुपा ह्लाः धारण यानाच्चंहा । थःगु मुलय् शक्ति दु ।

ल्याः	देवदेवताया नां	संक्षिप्त विवरण
६)	महावैरोचन	प्यपाः ख्वाः छिनिपा ह्लाः धारण यानाः मूलगु ह्लातं चक्र व वज्र ज्वनाः वज्रासन यानाच्चंहा ।
१०)	सप्तलोचनी द्वय	वज्रपर्यङ्क आसन यासे छहसिनं अभय व वरद मुद्रा याना- च्वन, मेहसिनं वरद व अभय मुद्रा यानाच्वन ।
११)	शिवपार्वती	छपाः ख्वाः प्यपा ह्लाः धारण यासे अर्द्धपर्यङ्क आसन यासे जवगु ह्लातं वरद मुद्रा यासे खवगु ह्लाः पार्वतीया ब्वहलय् दिकाच्चंगु । लिस्सें पार्वती शिवजीया खवपाखे पुलिववस्सं च्वनाच्चंगु दु । अथे हे निह्य भक्त जःखः तयातल । अले शिवजीया शिरोपरी चैत्य अंकित यानातःगु जुल ।

स्वयम्भू बहीया दुने चाकलय् च्वंगु मूर्ति

१)	छपाः ख्वाः खुपा ह्लाः ललितासनय् च्वनाः शक्ति घय्पुना- च्चंगु दु । थुगु मूर्तिया तोरणय् पञ्चबुद्ध व चैत्य अलंकृत यानातल । ने. सं. ७४३ ।
२)	षट्भुज प्रज्ञापारमिता वज्रपर्यङ्क आसनय् च्वनाः छपाः ख्वाः खुपा ह्लाः धारण यानाच्चंहा । थ्वया जःखः आर्यतारा व भृकुटी तारा सहित जुयाच्वन ।
३)	पाण्डूरातारादेवी निखे' उत्पल पुष्प ज्वंसे वरद व अभय मुद्रा यासे ललितासनय् च्वनाच्चंगु ।
४)	महामञ्जुश्री स्वपाः ख्वाः खुपा ह्लाः धारण यासे वज्रपर्यङ्क आसनय् च्वनाच्चंगु । थ्वया जःखः धर्मधात्वेश्वरी व दुर्गति परिशोधन तारा तयातल । लिस्सें छचाःख्यरं चैत्यांकित तोरण तयाः शोभा वृद्धि यानातःगु दु ।
५)	कारण्डव्यूह लोकेश्वर आकाशगञ्ज ^१ छपाः ख्वाः खुपा ह्लाः धारण यानाः अर्द्धवज्रपर्यङ्क आसन यानाः धर्मचक्र यानाच्वन । थुगु मूर्तिया च्वस्सं अमिताभ तथागत तयातल, लिस्सें जःखः चामरधारी देवी निह्य व

१- महाबुद्ध देगःया वायव्यया कचा देगलय् दक्षिणय् च्वंगु समान ।

ल्याः	देवदेवताया नां	संक्षिप्त विवरण
		तारादेवी अले आसनया क्वस्सं नागकन्या अथे हे तोरणय् स्वागतार्थं पुष्पमालापित जलकन्या नागकन्या नं दु ।
६)	प्रज्ञापारमिता	वज्रपर्यङ्क आसनय् च्वनाः छपाः ख्वाः प्यपा ह्लाः धारण यानाच्चंव्ह । थुकिइ च्वंगु तोरण व थामय् प्रज्ञादेवी, नागकन्या एवं पृथ्वी देवी सहित यानातल ।
७)	पद्मिनी तारा	वज्रपर्यङ्क आसनय् च्वनाः अभय व वरद मुद्रा यानाः पलेस्वां ज्वनाच्चंव्ह ।
८)	धर्मधातु वागीश्वर महामञ्जुश्री	सिंहासनया द्योने वज्रपर्यङ्कासन यासे त्रिमुख अष्टभुजा सहित जुयाच्चंव्ह । थ्वया जःखः चामरधारी बोधिसत्व पद्मपाणि व छत्रधारी जलकन्या तथा चन्द्र सूर्य तथाः च्वय्पाखे वैरोचन महाबुद्ध, धर्मश्री प्रज्ञापारमिता एवं संघ षडक्षरी लोकेश्वर तथाः सुशोभित यानातल ।
९)	पद्मिनी तारा	ल्याः ७ कथं समान जूसां अभय व वरदया थासय् वरद व अभय जुयाच्चन । थुगु मूर्ति निर्माण कार्य सिमधःनिगु खनेदु ।
१०)	चतुर्भुज मञ्जुश्री	वज्रासन यासे प्यपा ह्लाः धारण यानाच्चंव्ह ।
११)	आर्यतारादेवी	ललितासनय् च्वनाः अभय व वरदान बियाच्चंव्ह ।

दुने भगवान्द्योयाथाय् च्वंगु मूर्तित

१२)	सप्तलोचनी तारा	ल्याः ५ कथं ।
१३)	पद्मपाणि लोकेश्वर	
१४)	त्रिरत्न मूर्ति	
१५)	षडक्षरी लोकेश्वर	छपाः ख्वाः प्यपा ह्लाः वज्रपर्यङ्क आसनय् च्वनाच्चंव्गु ।
१६)	आर्यतारादेवी	ल्याः ११ कथं ।
१७)	शाक्यमुनि बुद्ध	जवगु ह्लाः भूमिस्पर्श यासे खवगु ह्लातं पिण्डपात्र धारण यानाः वज्रासनय् च्वनाच्चंव्गु ।

बहिलिं दुने महाकाःछ्यलिइ च्वंगु मूर्तित

ल्याः	देवदेवताया नां	संक्षिप्त विवरण
१८)	द्विभुज महाकाल	वज्रकतिपात्र ज्वनाः दनाच्चंह्य ।
१९)	"	" "
२०)	"	" "
२१)	"	" "
२२)	"	" "
२३)	चतुर्भुज महाकाल	छपाः खाः प्यपा ह्लाः धारण यानाः सत्वपर्यङ्क आसनय् च्वनाच्चंगु दु । थुगु मूर्तिया जःखः कतिपात्र व डमरु खद्वाङ्ग धारण यानाच्चं पि देवीपि उपस्थित यानातल ।
२४)	चतुर्भुज महाकाल	छपाः खाः प्यपा ह्लाः धारण यानाः दनाच्चंह्य । ने.सं. ७६१ ।

बही लुखां पिहांवय्वं बहीफःलिसे च्वंगु मूर्तित

१)	कर्मापा थांचेख्येपा लामाजु	लामा पोशाक पुनाः वज्रासन यासे निपा ह्लातं भूमिस्पर्श यानाच्चंगु दु ।
२)	वज्रमहाकाल	वज्रकतिपात्र ज्वसे दनाच्चंह्य । थ्वया जःखः गणेश, महाकाली, आर्यतारा तयातःगु दु । ने. सं. ७८१ ।
३)	अक्षोभ्य तथागत	भूमिस्पर्श यासे वज्रासन यासे पयतुनाच्चंह्य । ने. सं. ७८६ ।
४)	पद्मपाणि लोकेश्वर	अभय विसे पलेस्वां ज्वनाः दनाच्चंह्य ।
५)	अरपचन वागेश्वर महा- मञ्जुश्री (नामसंगीति)	छपाः खाः छिनिपा ह्लाः धारण यासे वज्रासन यानाच्चंह्य । ने. सं. ७८८ ।
६)	वैरोचन तथागत	बोध्यंग मुद्रा यासे वज्रासन यानाच्चंगु । थ्वया जःखः आर्यतारा पद्मपाणि व वीणादेवी तयातल । ने. सं. ७८१ ।
७)	षट्भुज वसुन्धरा	छपाः खाः खुपा ह्लाः धारण यानाः ललितासन यानाच्चंगु दु । थ्वया लिस्से आर्यतारा व मञ्जुश्री तयातल । ने. सं. ७८१ ।
८)	पद्मपाणि लोकेश्वर	ल्याः ४ कथं ।

ल्याः	देवदेवताया नां	संक्षिप्त विवरण
६)	भविष्य व्याकरण बुद्ध	जवगु ह्लाः वरद मुद्रा यासे ह्लाः क्वकयाः खवगु ह्लातं चीवरया च्वः ज्वनाः ब्वहः क्वस्सं दिकाः दनाच्चंगु । थुगु मूर्ति स्वयम्भू चाकलय् दनाच्चंगुलिइ दक्वसिबय् तःधिकःह्य ।
१०)	अमोघपाश लोकेश्वर	छपाः ख्वाः च्यापा ह्लाः, दनाच्चंह्य । थ्वया जःखः सुधनकुमार व जम्बर यक्ष नं दु ।
११)	अमोघपाश लोकेश्वर	दनाच्चंह्य, च्यापा ह्लाः दुह्य, छपाः ख्वाः जुयाच्चंह्य । थ्वया लिसे जःखः अध्येषण मुद्रा बोधिसत्व व पद्मासनया क्वस्सं मारधर्षण मूर्ति दु । ने. सं. ७२२ ।
१२)	खसर्पन तारा	छपाः ख्वाः प्यपा ह्लाः, ललितासन स्थित ।
१३)	पद्मपाणि लोकेश्वर	वरद बिसे पलेस्वां ज्वनाः दनाच्चंह्य । ने. सं. ७२० ।
१४)	पद्मपाणि लोकेश्वर	वरद मुद्रा यासे पलेस्वां ज्वनाः दनाच्चंह्य ।
१५)	प्रज्ञापारमिता	छपाः ख्वाः प्यपा ह्लाः धारण यासे अर्द्धपर्यङ्क आसन याना-च्चंह्य ।
१६)	समन्तभद्र बोधिसत्व	धर्मचक्र मुद्रा यासे वज्रपर्यङ्क आसनय् च्वनाच्चंगु ।
१७)	पद्मपाणि लोकेश्वर	ल्याः ४ कथं ।
१८)	हलाहल लोकेश्वर	चतुर्मुख षट्भुज ललितासन स्थित ।

वायव्यकोण पाखे चैत्यपार्कय् च्वंगु मूर्तित

१)	चतुर्भुज महाकाल	आलीढासनय् च्वनाः वज्रकर्ति ज्वनाच्चंह्य । थ्वया जःखः माल्यार्पित पूजादेवी तयातःगु दु ।
२)	हलाहल लोकेश्वर	शक्ति सहित प्यपाः ख्वाः खुपा ह्लाः दुह्य, ललितासनय् च्वनाच्चंह्य ।
३)	वज्रधातु चैत्य	दत्थुइ वज्रधातु चैत्य, आदिबुद्धया रूपय् थ्वया जःपाखे प्रज्ञा-पारमिता, धर्मया रूपय् एवं खःपाखे आर्यतारादेवी ।

स्वयम्भू कर्मराज विहार गुम्बाय् च्वंगु मूर्तित

ल्याः	देवदेवताया नां	संक्षिप्त विवरण
१)	सुखावती लोकेश्वर	छपाः खाः खुपा ल्लाः अर्द्धवज्रपर्यङ्क आसन स्थित । शक्ति सहित । बुद्ध, धर्म व संघ अंकित तोरणयुक्त । थ्वया जःखः पद्मपाणि बोधिसत्व ।
२)	बुंगम लोकेश्वर	वरद मुद्रा यासे पलेस्वां ज्वनाः दनाच्चंह्य ।
३)	आर्यतारा	वरदाभय मुद्रा यानाः दनाच्चंह्य ।
४)	चतुर्भुज प्रज्ञापारमितादेवी	धर्मचक्र मुद्रा यासे अर्द्धवज्रपर्यङ्क आसन स्थित । जःखः तारादेवीपि दु ।
५)	सूर्य स्वरूप षडक्षरी लोकेश्वर	राज मुद्रा यासे निपा ल्लातं पलेस्वां ज्वनाः वज्रासनय् च्वना-च्चंगु । थ्वया जःखः बुद्ध व षडक्षरी लोकेश्वर सहित । थुकिइ प्यह्य सिंह दइच्चंगु सिंहासनया दत्थुइ वज्रपर्यङ्क आसन स्थित तारादेवी उपस्थित यानातल । उपरी भागय् चैत्य अंकित बोधिवृक्ष तयाः शोभा वृद्धि यानाव्यूगु दु ।
६)	मारविजय-शाक्यमुनि बुद्ध	थःगु खाःया चुलिचू भूमिस्पर्श यासे वज्रासन यानाच्चंगु ।
७)	राज मुद्रांकित तारा	राज मुद्रा यासे ललितासन स्थित । जःखः दनाच्चंवि तारा तयातल, आसनय् भक्तजनपि ।
८)	सप्तलोचनी तारा	वरदाभय यासे वज्रपर्यङ्क आसन यानाच्चंह्य । थुकिइ क्षपुयुक्त तोरण दु ।
९)	अमोघपाश लोकेश्वर	अष्टभुज धारण यासे दनाच्चंह्य । जवय् च्वंगु प्यपा ल्लातं अभय मुद्रा यानाः खवय् च्वंगु प्यपा ल्लातं कलश, कमल, पाश व त्रिदण्ड ज्वनाच्चंह्य, थ्वया जःखः दनाच्चंवि आर्यतारा भृकुटी तारा तयातल ।
१०)	अमोघपाश लोकेश्वर	छपाः खाः च्यापा ल्लाः धारण यासे दनाच्चंह्य ।
११)	अमिताभ तथागत	ध्यान मुद्रा यासे वज्रासन यानाच्चंह्य ।
१२)	आर्यतारा	वरदाभय मुद्रा यासे वज्रपर्यङ्क आसन ।
१३)	आर्यतारा	सत्त्वपर्यङ्क आसन यासे वरदाभय मुद्रा यानाच्चंह्य ।
१४)	अक्षोभ्य तथागत	द्वय हस्ति युक्त कुलथि सहित आसनया द्योने भूमिस्पर्श यासे वज्रासन यानाच्चंह्य ।

ल्याः	देवदेवताया नां	संक्षिप्त विवरण
१५)	शाक्यमुनि बुद्ध	भूमिस्पर्श यासे वज्रासन यानाच्चंहा ।
१६)	शाक्यसिंह तथागत	" "
१७)	प्रज्ञापारमिता	धर्मचक्र मुद्रा यासे वज्रपर्यङ्क आसन स्थित ।
१८)	शाक्यमुनि बुद्ध	ल्याः १५ कथं ।
१९)	षडक्षरी लोकेश्वर	राज मुद्रा यासे वज्रासन यानाच्चंहा ।
२०)	कनकमुनि तथागत	भूमिस्पर्श सहित वज्रासन यानाच्चंहा ।
२१)	अमोघसिद्धि तथागत	अहिछत्र युक्त आसनय् च्वनाः अभय मुद्रा यासे वज्रासन यानाच्चंहा ।
२२)	पद्मपाणि लोकेश्वर	ल्याः २ कथं ।
२३)	सरस्वती	चतुर्भुज धारण यासे वीणा थानाः ललितासनय् च्वनाच्चंहा ।
२४)	सृष्टिकर्ता लोकेश्वर	वरद मुद्रा यासे पलेस्वां ज्वनाः दनाच्चंहा । श्वया जःखः दिग्पाल स्वरूप च्यागू मूर्ति तथातल, उपरी भागय् चैत्य अंकित यानातःगु दु । ने. सं. ७८० ।
२५)	अनागत बुद्ध आर्य मैत्रेय	वज्रसत्त्वया भेषय् हस्त मुद्रा यासे वज्रासन यानाः निखे पद्माङ्कुरया द्योने चैत्य व चक्र अंकित यानातल ?
२६)	त्रिप्रधान बोधिसत्त्व	मैत्रेय, वज्रपाणि व पद्मपाणि थःथःगु ज्वँसा ज्वँसे दनाच्चंवि ।
२७)	भविष्य व्याकरण बुद्ध	जवगु ह्लातं वरद मुद्रा यासे खवगु ह्लातं चीवरया च्वः ज्वनाः ब्वहः क्वस्सं दिकाच्चंगु । श्वया जःखः पद्मपाणि व रत्नपाणि बोधिसत्त्व, थुपि स्वह्मा दनाच्चंगु दु ।
२८)	अमितप्रभ तथागत	ध्यान मुद्रा यासे वज्रासन यानाच्चंगु ।
२९)	आर्यतारा	ल्याः १२ कथं ।
३०)	आर्यतारा	" "
३१)	सप्तलोचनी तारा	
३२)	सप्तलोचनी तारा	
३३)	खसर्पन तारा	निखे निगू किसिमया स्वां ज्वनाः (पलेस्वां व उफोस्वां) थःगु तालय् दनाच्चंगु दु । थुकिइ स्वतँगि लूगु प्रभामण्डल तथाः शोभा वृद्धि यानातल । आसनय् जःखः प्रार्थना मुद्राय् पुलि चुयाच्चंवि निह्य भक्त सुविनीतपूर्वक च्वनाच्चन ।
३४)	अमिताभ तथागत	ल्याः ११ कथं ।
३५)	आर्यतारा	वरदाभय मुद्रा यासे ललितासनय् च्वंहा ।

ल्याः	देवदेवताया नां	संक्षि त विवरण
३६)	आर्यतारा	वरदाभय मुद्रा यासे ललितासनय् चवंहा ।
३७)	महामञ्जुश्री	चन्द्रहास खङ्ग ज्वनाः अभय मुद्रा यासे धनुष तांछाकार यानाः वज्रासनय् च्वनाचवंहा । श्वया जवय् महापण्डित धर्मश्री मित्र प्रश्न मुद्राय् च्वनाः खवय् मोक्षदादेवी ललितासनय् च्वनाचवंगु दु । ने. सं. ७७७ ।
३८)	त्रिमुख अष्टभुज महामञ्जुश्री	स्वपाः खाः च्यापा ह्लाः धारण यासे वज्रासन यानाचवंहा । प्रथम हस्त द्वयेन विन्दुपात्र? (धर्मचक्र?) खङ्ग पशू, शर धनुष एवं वज्र खट्वांग ?
३९)	दुर्गतिपरिशोधन तारा	धर्मचक्र यासे ललितासनय् च्वनाचवंहा कीर्तिमुखयुक्त तोरण सहित ।
४०)	पद्मपाणि लोकाेश्वर	वरद मुद्रा यासे पलेस्वां ज्वनाः दनाचवंहा । जःखः दनाचवंपि तारा । निम्न भागय् केशिनी उपकेशिनी व सरस्वतीया दत्थुइ मञ्जुश्री बोधिसत्व । ने. सं. ७८१ ।
४१)	आर्यनामसंगीति	प्रथम हस्त द्वयेन शिरोपरी अध्येषण मुद्रा यासे द्वादशभुज धारण यानाः वज्रासन यानाचवंहा ।
४२)	अमोघपाश लोकाेश्वर	ल्याः १० कथं ।
४३)	पद्मपाणि लोकाेश्वर	ल्याः २ कथं ।
४४)	आर्यतारा समूह	वरदाभय मुद्रा यासे ललितासन स्थित स्वहा ताराया छगू समूह ।

स्वयम्भू महाचैत्यया पिखाद्वारया क्वस्सं चवंगु प्यंगू कुलया प्रतीक

- १) अक्षोभ्य बुद्धया क्वस्सं निहा चलाया दत्थुइ वज्रचक्र ।
- २) रत्नसम्भव बुद्धया क्वस्सं निहा चलाया दत्थुइ रत्नचक्र ।
- ३) अमिताभ बुद्धया क्वस्सं निहा चलाया दत्थुइ पद्मचक्र ।
- ४) अमोघसिद्धि बुद्धया क्वस्सं नागपाशया द्योने निहा नागराज व अले श्वया लिकसं पद्माङ्कुरया द्योने अमोघसिद्धि ?

स्वयम्भूया न्होनेच्वंगु तं थहांवनेबलय् जःखःच्वंगु मूर्तित

ल्याः	देवदेवताया नां	संक्षिप्त विवरण
१)	सिद्ध नागार्जुन	सप्तफणिनागया द्योने सत्वपर्यङ्क आसन यासे न्हय्हा नागया छत्रं कुइकाच्वंह्य । जवगु ह्लातं उपदेश मुद्रा यासे खवगु ह्लाः उरुमुष्टि यानाच्वंगु । थ्वया आसन क्वस्सं गौरीसा छह्य नं दु ।
२)	शाक्यमुनि बुद्ध	वज्रासन यासे पिण्डपात्र ज्वनाः भूमिस्पर्श यानाच्वंगु ।
३)	विशाल रूप अक्षोभ्य तथागत	भूमिस्पर्श यानाः वज्रासन यानाच्वंगु । थ्वया जःखः भिक्षुपि निह्य दु । अले आसन क्वस्सं दानपतिपिनिगु प्रतिमा नं तयातल । ने. सं. ७५७ सालं निर्मित ।
४)	विशाल रूप अक्षोभ्य तथागत	भूमिस्पर्श यानाः वज्रासन यानाच्वंगु ।
५)	षडक्षरी लोकेश्वर	छपाः ख्वाः प्यपा ह्लाः वज्रासन स्थित । मूलगु निपा ह्लातं राज मुद्रा यानाच्वंगु ।
६)	प्रज्ञापारमिता	अर्द्धपर्यङ्क आसन यासे प्यपा ह्लाः धारण यानाः धर्मचक्र मुद्रा यानाच्वंह्य ।
७)	सरस्वती	छपाः ख्वाः प्यपा ह्लाः धारण यासे वीणा ज्वनाच्वंह्य, ललितासन स्थित ।
८)	विशाल रूप शाक्यमुनि बुद्ध	वज्रासन यासे भूमिस्पर्श मुद्रा यानाच्वंह्य ।
९)	द्विभुज महाकाल	वज्रकतिपात्र ज्वंसे दनाच्वंह्य ।
१०)	वज्रपाणि बोधिसत्व	पद्माङ्कुरया द्योने वज्र व कलश तयाः अभय मुद्रा यासे दनाच्वंह्य ?
११)	अवलोकितेश्वर	जवगु ह्लातं वरद मुद्रा यासे खवगु ह्लातं आह्वान मुद्रा यानाः दनाच्वंगु । थ्वया जःखः आर्यतारा व भृकुटी तारा दु ।
१२)	कुमार	छपाः ख्वाः प्यपा ह्लाः धारण यासे ह्यय्खा गयाच्वंह्य ।
१३)	नृत्य रूप गणपति	मण्डलपद आसनय् च्वनाः अभिनय यानाः प्यपा ह्लाः धारण यानाच्वंह्य ।
१४)	अवलोकितेश्वर	ल्याः ११ कथं ।

ल्याः	देवदेवताया नां	संक्षिप्त विवरण
१५)	ध्वजराज	मेघमण्डलया द्योने सुखासन यासे उच्च ध्वज व नवःचा ज्वना- च्वंहा ।
१६)	वीणाराज	वीणा ज्वनाः सुखासन यासे मेघमण्डल्य च्वनाः गगणविहार यानाच्वंहा ।
१७)	खड्गराज	खड्ग व सर्प ज्वनाः सुखासन यासे मेघमण्डल्य च्वनाच्वंगु ।
१८)	सरस्वती	ल्याः ७ कथं ।
१९)	महामञ्जुश्री	छपाः खाः प्यपा ह्लाः वज्रासन यानाच्वंहा । थ्वया जःखः शक्ति-लक्ष्मी व सरस्वती दु । वि. सं. २००४ ।
२०)	मायादेवी	शालभज्जिका मुद्रा यानाः अर्द्धसप्तपद यानाः वरद मुद्रा यासे दनाच्वंगु । थ्वया न्ह्योने सर्वार्थसिद्ध सप्तपद गमन यानाच्वंगु दृश्य क्यनातःगु दु । लिस्सें थ्वइगु उपचार व सुश्रूषाया लागी ब्रह्मादि देव एवं राजपरिवार उपस्थित जुयाच्वंगु क्यनातल । वि. सं. २०१९ ।
२१)	विश्वन्तर राजकुमार	
२२)	विशाल रूप अक्षोभ्य बुद्ध	हस्तिरत्न पाखे युक्तगु कुलथि सहितगु सिंहासनया द्योने भूमिस्पर्श यासे वज्रासन्य विज्याःह्य । थ्वया जःखः सेवकया रूप्य निह्य भिक्षुपि दु । थुगु भव्य रूप मूर्तिया लिउने च्वंगु प्रभामण्डल विविध उपकरण पूजा सामग्री ज्वनाच्वंपि मूर्ति पाखे चाःहुइकातःगु जुल । थ्वया च्वय् वज्रसत्त्व अंकित यानातल । ने. सं. १००४ ।
२३)	विशाल रूप रत्नसम्भव	अश्वरत्न सहितगु कुलथियुक्त सिंहासनया द्योने वज्रासन यासे वरद मुद्रा यानाच्वंगु दु । निखे निह्य भिक्षुपि उपस्थित यानातल । ने. सं. १०१२ ।
२४)	भव्य रूप अक्षोभ्य बुद्ध	ल्याः ३ कथं मूर्ति भव्य व ध्यान रूप समान जू । ने. सं. १०२५ ।
२५)	विश्वभूव तथागत	वरद मुद्रा यानाः पिण्डपात्र ज्वसे वज्रासन्य च्वनाच्वंहा ।
२६)	अवलोकितेश्वर	वरद मुद्रा यासे सपद्मनाल ज्वनाः आह्वान मुद्रा यानाः दनाच्वंहा । शिरस वितर्क मुद्रा युक्त वज्रासन स्थित बुद्ध अंकित यानातःगु दु ।
२७)	अमोघपाश लोकेश्वर	छपाः खाः च्यापा ह्लाः, दनाच्वंहा । मूलगु निपा ह्लातं अभय

ल्याः	देवदेवताया नां	संक्षिप्त विवरण
-------	----------------	-----------------

- २८) द्विभुज महाकाल
 २९) द्विभुज महाकाल
 ३०) काली महानाग

मुद्रा यासे कलश ज्वनाच्चंगु दु ।

वज्रकर्तिपात्र व खट्वांग ज्वसे दनाच्चंह ।

"

"

छपाः खाः निपा ह्लाः, नागपाशया द्योने उत्कुटु आसन यासे
 सुविनीतपूर्वक प्रार्थना मुद्रा यानाच्चंगु । श्वया खःपाखे काली
 महानागया सेवक रूप्य छह्य नाग नं उपस्थित यानातःगु
 जुल ।

स्वयम्भू अन्तर्गत उरत्येथुरत्ये चवंगु विविध चैत्यतयगु संक्षिप्त विवरण सूची

ल्याः	प्रस्थापित स्थान	चैत्यानां	अवस्था	शताब्दी	संक्षिप्त विवरण
१. भुइख्यः सम्यक् स्वागत मण्डलया लिकसं क्वक्वसिमाया न्ह्योनेच्वंगु ।		शिखरफूट चैत्य	नैऋत्य कुलांया फः स्यनाच्वंगु	१८ श.	थुकिइ प्रासादाकृति रूपय् अक्षोभ्य बुद्ध छह्म जक तयातःगु, मेगु मूर्ति तयातःगु मदु ।
२. थ्वया लिकसं च्वंगु ।		चतुर्व्यूह चैत्य	ईशान कुलांया फः स्यनाच्वंगु लिस्से च्वलामू खण्डित	"	चतुर्व्यूहया मूर्ति क्वस्सं पञ्चबुद्ध मूर्ति अंकित जुयाच्वंगु थ्व थुगु चैत्यया विशेषता खः ।
३. जगतोद्धार विहारया न्ह्योने पाखे पीचरोडया लिकसं ।		वज्रधातु चैत्य प्राचीन शैली	चीवाहाःया फः त स्यनाच्वंगु	१९ श.	थुकिइ अमोघसिद्धि मूर्ति बाहेक मेगु मूर्तित हरण जूगु दु ।
४. माणे धुङ्ग्युर गुम्बाया न्ह्योने पीचरोड लिकसं ।		"	पूर्णाविस्था	२० श.	थ्व चीवाहाः अप्पां दनाः वज्र प्लाष्टर यानातःगु । खतु थ्व चैत्यया पूर्वस्थान टुण्डिखेल महाकाल स्थानया न्ह्योनेपाखे वीर अस्पतालया कुनय् लैया सिथय् लानाच्वंगु १६ गूगु शदीयागु वज्रधातु चैत्य खः । तर वि. सं. २०१६ सालं

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
१२.	स्यंगुया ध्वाकां दुहांवनेवं खवय् च्वंगु ।	अशोक चैत्य	गर्भं गृह्य पत्र ब्वलाच्चंगु	६।१० श.	थुकिइ फः छचालं जीर्णं जुयाच्चंगु दु, लिस्सें सिमा नं बुयाच्चन ।
१३.	" "	"	चोबाहाः ग्व- लय पत्रपत्र ब्वलाच्चंगु	७।८ श.	" "
१४.	" "	वज्रधातु चैत्य	पूर्णविस्था	१६ श.	थुकिइ स्वख्यरसं फःया ववस्सं दानपति- पिनिगु शालिक अंकित ।
१५.	" "	शिखरकूट चैत्य	"	१८ श.	थुकिया चक्रावली सिमन्तियागु दयकाः तयाबिल, तर न्हय् तं जक खनेदु ।
१६.	" "	वज्रधातु चैत्य	"	१६ श.	थुकिइ फःया ववस्सं अभिलेख अंकित दु ।
१७.	" "	चतुर्व्यूह चैत्य	अंग भंग जुयाच्चंगु	२० श.	थुकिइ च्वय् ववय्या भाग खण्डित जुयाः दथुत्वाः छगू जक ल्यनाच्चंगु ।
१८.	स्वयम्भू तैया त्वाथः शुरु जुइव खःपाखे- च्चंगु ।	वज्रधातु चैत्य	पूर्णविस्था	१६ श.	थुकिइ रत्नसम्भव बुद्ध बाहेक मेगु मूर्ति मदय् धुंकल ।
१९.	तं थहांवनाः किसिचाया न्ह्योनेच्चंगु त्वाथःया दत्थुइ लाःगु ।	वज्रधातु चैत्य	पूर्णविस्था	१६ श.	थुकिइ ववय्यागु भाग अप्पां दनातःगु । अनं च्वय् त्वहंयागु तर थुकिइ सिमन्ति प्लाण्टर यानाः भिकातःगु दु । थुकिइ पिखाद्वार खालि ।
२०.	तैय् च्वंपि गणेश कुमारया दत्थुइ च्वंगु ।	ज्वालावर्त चैत्य	"	२० श.	सिन्हःमू आकार थें च्वंगु पञ्चावली

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
२१.	श्वया लिकसं खवय् च्वंगु ।	धर्मधातु जिना- लंकृत चैत्य	पूर्णावस्था	२० श.	युक्त चैत्य । वेदिकाय् अभिलेख व दानपति परिवार अंकित ।
२२.	श्वया लिउनेसं च्वंगु ।	"	"	"	थुगु चैत्यय् मेमेगु चैत्यया तुलनाय् दथुत्वाः मतसे ह्यं चाय्कातःगु खनेदु । दानपति व अभिलेख सहित ।
२३.	श्वया लिकसं ।	ज्वालावली चैत्य	"	"	प्रस्तुत चैत्य थुकिया नां 'पद्मधातु चैत्य' धकाः नाम उल्लेख यानातल । वि. . २०१८ सालं स्थापना । थुगु चैत्यया पूर्व वेदिकाय् महासत्त्व व मणिचूडया दृश्य प्रदर्शित यानातल । दक्षिण वेदि- काय् सिद्धार्थ जन्म, बुद्ध प्राप्ति, धर्मचक्र व महापरिनिर्वाण अंकित यानातल । अथे हे पश्चिम वेदिकाय् मञ्जुश्री, षडक्षरी लोकेश्वर ।
२४.	वातय् चतुर्महाराजया लिकसं च्वंगु ।	वज्रधातु चैत्य	खण्डिता- वस्था	१८ श.	थुकिइ पिखाद्वाराया मूर्ति मदय् धुंकल, लिस्से च्वलामू त्वःधुलाच्चन । श्व चैत्य त्वहयागु जूसां सिमन्ति प्लाष्टर यानातल ।
२५.	श्वया च्वस्सं च्वंगु ।	"	नष्ट रूप	१६ श.	" " थुकिइ वज्र प्लाष्टर यानातःगु दु ।
२६.	अज्ज श्वया च्वस्सं च्वंगु ।	"	पूर्णावस्था	१८ श.	पिखाद्वारय् बुद्ध मूर्ति सहित जू, तर

तथा:	प्रस्थापित स्थान	चैत्यया नां	अवस्था	शताब्दी	संक्षिप्त विवरण
					दक्षिण वेदिका क्वस्सं च्वंगु उष्णीष- विजय मूर्ति अपहरण जुल । उत्तर वेदिकाय् ज्वलान्हायकं आकारगु शिला- लेख अंकित यानातल । श्व चीबाहाया च्वलामू चकू धेचुलाच्वन ।
२७. स्यंगु तैया दथुत्वाः शुरु जुइवं न्ह्योनेच्वंगु ।		वज्रधातु चैत्य	पूर्णविस्था	१७ श.	थुकिइ नं सिमन्ति प्लाष्टर यानाः जीर्णोद्धार जुल । प्यखे बुद्ध मूर्ति साविक दनि ।
२८. स्यंगु तैया दथुत्वाः शुरु जुइवं न्ह्योनेच्वंगु ।		वज्रधातु चैत्य	पूर्णविस्था	१८ श.	थुकिइ चैत्य १८ शदी जूसां च्वलामू २० शदीइ दय्कातःगु दु । थुकिइ अर्द्धचन्द्राकार तयाः श्वया द्योने रत्न- चडामणि अंकित यानातःगु खनेदु । जीर्णोद्धार जबलय् सिमन्ति प्लाष्टर यानातःगु दु । थुकिइ अमिताभ बुद्ध मदय् धुंकल ।
२९. श्वया लिकसं च्वंगु ।		अशोक चैत्य (लिच्छवी चैत्य)	"		थुकिइ वज्रधातु चैत्यया दथुत्वाकय् अशोक चैत्यया भाग जवरय् यानाः च्वलामू तयाः पूर्ण यानातःगु खनेदु । गर्भगृहया क्वस्सं च्वंगु निरगः थाय्- थासय् स्यनाच्वन । उत्तरपाखे अमोघ- सिद्धि बुद्ध लिपा थप याःगु जुल । थुगु चैत्यया पूर्वं वेदिकाय् २० शदीया

ह्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
३०.	ध्वयां भचा उज्यां ।	वज्रधातु चैत्य	मूर्तित खण्डित	१८ श.	अभिलेख तयातःगु दु । थुगु चैत्यय् दक्षिण उत्तरया बुद्ध मूर्ति मदय् धुंकल । थुकिइ नं जोर्णोद्धार समयय् सिमन्ति प्लाष्टर जगु दु ।
३१.	ध्वया लिक्सं च्वंगु ।	कलश चैत्य	नष्ट रूप	१९ श.	थुगु चैत्यय् गर्भगृह मात्र ल्यंदनि । ध्वयां ववय्यागु भाग मदय् धुंकल । गर्भगृह नं बागः धइथे तज्ज्यानाः वाकि टुक्रा न्ह्योने खने मन्त ।
३२.	"	वज्रधातु चैत्य	पूर्णाविस्था	"	जीर्णोद्धार समयय् वज्र प्लाष्टर याना- तःगु दु, तर उत्तराभिमुख बुद्ध मदय् धुंकल ।
३३.	"	"	च्वलामू खण्डित	"	ध्व चोवाहाः जीर्णोद्धार याःबलय् सिमन्ति प्लाष्टर यानातल । थुगु चैत्य- या उत्तर वेदिकाय् राज मुद्रा मयासे वरद अभय यानाच्चव्हं पडक्षरी लोके- ध्वर तयातःगु दु । ध्व थुकिया विशेषता खः । लिस्से पश्चिम वेदिकाया भाग खण्डित जगु दु ।
३४.	"	"	नष्ट रूप	"	अग्नि कुलांया वेदिका स्यनाच्चन, च्वलामू धेचुलाच्चन, लिस्से खण्डित नं जगु दु । थुकिइ पिखाद्यः मदय् धुंकल ।

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
३५.	श्वया लिकसं च्वंगु ।	धर्मधातु जिना- लंकृत चैत्य	पूर्णाविस्था	२० श.	थुकिइ ने. सं. १०७२ सालया अभिलेख खनेदु ।
३६.	श्वया च्वस्सं च्वंगु ।	वज्रधातु चैत्य	खण्डितावस्था	१६ श.	थुकिइ पूर्वद्वारया मूर्ति बाहेक स्वख्यरसं च्वंगु मूर्ति खनेमदु ।
३७.	श्वया लिकसं च्वंगु ।	"	"	२० श.	थुकिया अग्नि कुलांया वेदिका खण्डित जुयाच्वंगु दु । लिस्सें पूर्व द्वारया बुद्ध मूर्ति बाहेक मेगु मदय् धुंकल । थुकिया च्वलामू धेचू ।
३८.	श्वया लिकसं मण्डःपा ऊवःलाकं दुथासय् च्वंगु ।	"	अपूर्णाविस्था	१६ श.	थुकिइ वायु कुलांया वेदिका खण्डित व प्यखे च्वंगु मूर्ति मदय् धुंकल । लिस्सें च्वलामू खण्डित जूगु दु ।
३९.	श्वया लिकसं विश्वन्तर राजकुमार मूर्तिया न्ह्योनेसं च्वंगु ।	"	पूर्णाविस्था	"	थुकिइ वज्रलेप व सख्वाःपा अधिकगुलि चैत्यया थःगु स्वरूप विकृत जूगु खनेदु । लिस्सें पश्चिम द्वारया मूर्ति अलग, मेगु मूर्तित मदय् धुंकल ।
४०.	" श्वया लिउनेसं ।	"	"	"	थूगु चैत्य जीर्णोद्धार समयय् गुबले वज्र प्लाष्टर यात, गुबले सिमन्ति प्लाष्टर जूगु खनेदु । थुकिइ प्यख्यरसं मूर्ति मदय् धुंकल ।
४१.	"	विम्ब चैत्य	"	२० श.	थूगु चैत्य गर्भगृह व च्वलामू जक तथाः दय्कातःगु जुल । थुकिइ चक्या क्वस्सं सिमन्ति तथाः दिनातःगु ।

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
४२.	विशाल त्रिबुद्ध मूर्तिया न्ह्योनेपाखे च्वंगु ।	वज्रधातु चैत्य	अपूर्ण	१९ श.	थुकिइ च्वलामू खण्डित व प्यख्यरसं च्वंगु मूर्तित मदय् धुंकल ।
४३.	मायादेवीया मूर्ति लिउनेसं च्वंगु ।	धर्मधातु जिना- लंकृत चैत्य	पूर्णविस्था	२० श.	ने. सं. १०८३ सालं निर्माण जूगु अभि- लेख युक्त, लिस्सें छचालं धयाथे' दान- पति परिवार अंकित ।
४४.	श्वया लिकसं च्वंगु ।	"	"	"	वि. सं. २०१७ सालं निर्मित जूगु ।
४५.	तःधीह अक्षोभ्य बुद्ध मूर्तिया न्ह्योनेसं च्वंगु ।	"	खण्डित	"	थुकिइ अभिलेख व दानपति परिवार अंकित यानातःगु दु ।
४६.	श्वया लिकसं च्वंगु ।	"	"	"	त्रयोदश चक्रावली मदया च्वंगु ।
४७.	तःधीह रत्नसम्भव बुद्धया न्ह्योनेसं च्वंगु ।	चतुर्व्यूह चैत्य	"	"	"
४८.	श्वया लिउनेसं च्वंगु ।	वज्रधातु चैत्य	पूर्णविस्था	१९ श.	त्रयोदश चक्रावली व वेदिका खण्ड खण्डित ।
४९.	श्वया खःपाखे च्वंगु ।	धर्मधातु जिना- लंकृत चैत्य	"	२० श.	चक्रावली व अम्बसाः छुं स्यनाच्चंगु दु ।
५०.	तःधीह रत्नसम्भवया लिउनेच्चंगु चैत्यया च्वस्सं च्वंगु ।	वज्रधातु चैत्य	खण्डित	१९ श.	च्वलामू कुतुवइ धकाः थुकिइ नैबलाखं हिनातःगु ।
५१.	श्वया लिकसं च्वंगु ।	"	पूर्णविस्था	"	च्वलामू त्वःधुलाच्चंगु व पिखाद्यः मदय् धुंकूगु, लिस्सें उत्तर लङ्गया वेदिका स्यनाच्चंगु ।
					श्वया पूर्व पाखे च्वंगु वेदिकाय् ने. सं. १५१ सालया अभिलेख सहित तोरणा-

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
५२. श्वया खःपाखे च्वंगु ।		घटकूट चैत्य लिच्छवी चैत्य	अपूर्णाविस्था	१६ श. ८ श.	कृति शिलालेख अंकित । थुकिइ घटकूट चैत्यया गर्भगृह व लिच्छवी चैत्यया जैत्वाः निगू मिलय् यानाः तयातःगु खः । श्वया पूर्वय् भूस्पर्श मुद्रा बुद्ध । दक्षिणय् अभय मुद्रा बुद्ध । पश्चिमय् ध्यान मुद्रा बुद्ध एवं उत्तरय् वरद मुद्रा बुद्ध निर्मित यानातल । श्व थःगु हे विशेषता खः । अभिलेख व दानपति परिवार अंकित ।
५३. अभय मुद्राधारी बुद्ध शीर्षयुक्त अवलोकितेश्वरया लिउनेसं च्वंगु ।		कूटागार चैत्य	पूर्णाविस्था	२० श.	
५४. श्वया जःपाखे च्वंगु ।		धर्मधातु जिना- लंकृत चैत्य	"	"	"
५५. व हे अवलोकितेश्वरया न्ह्योनेच्वंगु ।		वज्रधातु चैत्य	खण्डित	१६ श.	त्रयोदश चक्रावली खण्डित ।
५६. स्वयम्भू अक्षोभ्य बुद्धया न्ह्योनेच्वंगु ।		मण्डलाकृति धर्मधातु चैत्य	पूर्णाविस्था	१७ श.	थुकिइ लुं सियाः सिजःपाताया धर्म- धातु मण्डल व उकिइ द्योने सुवर्णवज्र तयाः शोभा वृद्धि यानातःगु, लिस्से ने. सं. ७८८ सालया अभिलेख युक्त । थुगु धर्मधातुस अष्टत्रोधिसत्त्व मतसे द्वादश महिनाया जनावर तयाः तिब्बती वर्षचक्र अंकित यानातःगु जुल । श्व थुकिया विशेषता खः । थुगु चैत्यया वेदिकाय् शक्ति सहित
५७. अनन्तपुरया न्ह्योनेच्वंगु ।		शिखरकूट चैत्य	"	१६ श.	

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
५८. श्वया लिकसं ।		शिखरकूट चैत्य	पूर्णावस्था	१६ श.	महा अक्षोभ्य, वज्रवीर, सुखावती
५९. श्वया नापनापं ।		"	च्वलाम् खण्डित	"	लोकेश्वर, व मञ्जुश्री तथातःगु दु ।
६०. श्वया लिकसं ।		ज्वालावली चैत्य	"	"	वेदिकाय् अभिलेख व दानपति सहित ।
६१. श्वया लिकसं अनंतुं ।		अशोक चैत्य	पूर्णावस्था	१० श.	थुकिइ चतुर्द्वार खल्य् यानातःगु तं निगू दु । लिपा स्वानातःगु थुगु चैत्य जीर्णो- द्धार यानाःलि वेदिकाय् आर्यतारा व लिस्सें दानपति परिवार अंकित याना- तल ।
६२. अनसंतुं च्वंगु ।		धर्मधातु जिनालं- कृत चैत्य	"	२० श.	ने. सं. १०६४ सालया अभिलेख सहित ।
६३. स्वयम्भूया दक्षिणपासे अनन्तपुरया खवय् च्वंगु ।		वज्रधातु चैत्य	"	१६ श.	२० शदीइ जीर्णोद्धार यानातःगु ।
६४. श्वया लिकसं च्वंगु ।		"	जीर्णविस्था	"	थुकिइ बुद्धमूर्ति मद्याच्वंगु ।
६५. श्वया नापसंतुं ।		प्रासादाकृति चैत्य	च्वलाम् खण्डित	"	प्रासादाकृति जूसां थुकिइ द्वार तथातःगु खनेमदु ।
६६. श्वया लिकसं ।		वज्रधातु चैत्य	पूर्णावस्था	२० श.	शूक्ष्म रूप शैलीकथं दय्कातःगु ।
६७. "		ज्वालावली चैत्य	"	"	
६८. "		शिखरकूट चैत्य	च्वलाम् खण्डित	१८ श.	थुगु चैत्यया वेदिका क्वस्सं स्वय्यरस मूर्ति तथातःगु दु- धर्मधातु वागीश्वर, मञ्जुश्री, आर्यतारा लिस्सें ने. सं. ६३६

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
					सालया अभिलेख युक्त ।
६६.	श्वया लिकसं ।	शिखरकूट चैत्य	पूर्णविस्था	१८ श.	शुकिइ षट्भुज अपरिमिता, प्रज्ञापार-
७०.	"	ज्वालावली चैत्य	"	२० श.	मिता षडक्षरी लोकेश्वर, व मञ्जुश्री
७१.	"	जलहयोर्योपरी	च्वलामू त्वःधूगु	"	वेदिका क्वस्सं तयातःगु दु । थुगु चैत्यय्
		जिनालंकृत चैत्य			अभिलेख नं । लिस्सें थुगु चैत्यय् जल-
					हरीया द्योने कालीहृदया दृश्य अंकित
					यानातःगु दु ।
७२.	स्वयम्भू रत्नसम्भवया न्ह्योनेच्वंगु ।	शिखरकूट चैत्य	च्वलामू लिपा थप याःगु	१६ श.	शुकिइ च्वलामू स्यनाः सिमन्ति तयाः दिनातःगु, लिस्सें पद्मपाणि लोकेश्वरया मूर्ति विनष्ट जुयाच्वन ।
७३.	मङ्गलवहुद्वार चैत्यया न्ह्योनेच्वंगु ।	"	"	"	
७४.	"	"	"	१८ श.	शुकिइ वेदिका क्वस्सं धर्मधातु वागीश्वर, मञ्जुश्री आर्यतारा तयातःगु दु ।
७५.	मङ्गलवहुद्वार चीवाहाः न्ह्योनेच्वंगु ।	शिखरकूट चैत्य	च्वलामू लिपा तःगु	१८ श.	
७६.	"	वज्रधातु चैत्य	पूर्णविस्था	१७ श.	श्व चीवाहाः त्वहंयागु जूसां फःया कपं कपं चिकअतलं दनातःगु दु । श्वया वेदिका क्वस्सं धर्मधातु वागीश्वर मूर्ति तयातल, श्वया लिउनेपाखे शिलालेख नं दिनातःगु जुल ।

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
७७.	मङ्गलबहुद्वार चीबाहाः न्ह्योनेच्वंगु ।	शिखरकूट चैत्य	पूर्णाविस्था	१९ श.	थुकिइ च्वलामू ल्यूवयत तयार जुयाच्वंगु दु । थुगु चैत्यय् अभिलेख नं खनेदु ।
७८.	"	जलहुर्योपरी जिनालंकृत चैत्य	"	२० श.	थुगु चीबाहाः प्यकुनय् महाअमिताभ, बुद्ध, धर्म व संघ एवं मञ्जुश्री तयातःगु दु । थुकिइ जलहरी च्वस्सं काली-हृदोत्पन्न दृश्य नं ।
७९.	मङ्गलबहुद्वार चैत्यया खःपाखे च्वंगु ।	शिखरकूट चैत्य	च्वलामू खण्डित	१८ श.	लिपा जीर्णोद्धार जगू दु ।
८०.	"	"	"	"	"
८१.	"	"	अपूर्णाविस्था	"	२० शदीइ जीर्णोद्धार जगू अभिलेख अंकित ।
८२.	स्वयम्भूया वायुपुरया न्ह्योनेच्वं ताशिगोर्मो चीबाहाः ।	मङ्गलबहुद्वार चैत्य	पूर्णाविस्था	१९ श.	थ्व चीबाहाः अप्पायागु दय्काः ग्वाख पतिकं विभिन्न देवदेवताया १२० गू मूर्ति अंकित यानातल, लिस्से थ्वया च्वस्सं पिखाद्वारया प्यह्म बुद्ध मूर्ति खनेदु । थुकिइ निगू प्यंगू मूर्ति पाः जुयाच्वन । थ्व चीबाहाः अप्पायागु दय्काः वज्र प्लाष्टर यानातःगु दु । थ्व चीबाहाःया ववस्सं छ्चालं धयाथे विविध मूर्ति सजय् यानातल- षडक्षरी लोकेश्वर, वज्रदेवी, सुखावती लोकेश्वर, अक्षोभ्य, वज्रपाणि बोधिसत्व तथा वीणादेवी व आर्यतारा इ० ।
८३.	पुलां गुम्बाया न्ह्योने पाखे च्वंगु ।	वज्रधातु चैत्य	"	१८ श.	

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
८४.	पुलां गुम्बाया न्होनेच्वंगु ।	चतुर्व्यूह चैत्य	पूर्णविस्था	६।१० श.	थुगु चैत्यया च्वय् ववय् मूर्ति खालि यानाः दय्कातःगु खः । थुकिया आकार प्रकार हेनाकर महाविहारया चीबाहाःया अनुरूप धाःसां ज्यू । चैत्यया ग्वलय् पत्र पत्र ब्लाच्वंगु । च्वलाम् लिपा जक तःगु खः ।
८५.	"	शिखरकूट चैत्य	"	१६ श.	लिपा जोर्णोद्धार जुइ धुंकूगु ।
८६.	"	जलहयोपरी	"	२० श.	थुकिया वर्णन ल्याः ७८ कथं ।
८७.	"	जिनालंकृत चैत्य	खण्डित	"	थुकिया च्वलाम् खण्डित जूगु दु । थुकिइ बोधिसत्वया जःखः नामांकित दानपतिपिनिगु मूर्ति तयातल ।
८८.	"	चतुर्व्यूह चैत्य	पूर्णविस्था	१६ श.	थुकिइ च्वलाम् लिपा जोर्णोद्धार यानातःगु खनेदु ।
८९.	"	शिखरकूट चैत्य	खण्डितावस्था	"	थुकिइ च्वलाम् स्यनाच्वन ।
९०.	"	अष्टकोणाकृति वेदिकोपरी जिनालंकृत चैत्य	पूर्णविस्था	"	थुकिइ च्याकुनय् च्याह्म नागकन्या जलकन्या प्रार्थना मुद्राय् अंकित यानातःगु दु । थ्व थुकिया विशेषता खः । थ्वया द्योने जलहरी नं तयातल ।
९१.	"	वज्रधातु चैत्य	"	१८ श.	थुकिइ उष्णोष चूडामणि स्यनाच्वंगु दु ।
९२.	"	शिखरकूट चैत्य	"	"	थुगु चैत्यय् बोधिसत्वया स्थान चतुर्महाराजपित वियातःगु खनेदु । मूलद्वारय्

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
६३.	हारती देगःया जःपाखे च्वंगु ।	जलहर्योपरी ह्रदो- त्पन्न जिनालंकृत चैत्य	पूर्णावस्था	१८ श.	दुत्ते प्रकोष्ठय् मुखावती लोकेश्वर, दक्षिणय् खङ्गराज, पश्चिमय् चैत्यराज, उत्तरय् ध्वजराज । ध्व चैत्य कालीह्रदस स्वयम्भू उत्पत्ति जगु स्मृतिकथं दयकूगु छगू प्रकारया चीवाहाः खः । थुकिइ प्यकुनय् प्यह्य द्यःपि तयातःगु दु- आदिवुद्ध महाअभि- ताभ, प्रज्ञापारमिता, षडक्षरी लोकेश्वर व मञ्जुश्री ।
६४.	हारती देगःया जःपाखे ।	"	"	२० श.	"
६५.	"	शिखरकूट चैत्य	च्वलामू	१९ श.	थुकिइ पिखाद्वारया च्वस्सं वज्र प्लाष्टर यानातःगु दु ।
६६.	"	"	खण्डित	"	"
६७.	"	"	"	१८ श.	"
६८.	"	"	"	१९ श.	"
६९.	"	"	"	"	"
१००.	हारतीया लिउने कुनेसं च्वंगु ।	वज्रधातु चैत्य "	पूर्णावस्था	२० श.	थुगु चैत्यय् शिलालेख दिनातःगु दु । खतु न्हापा सिद्धपिसं स्वयम्भूया प्यखे छगः छगः चीवाहाः स्थापना यानाथकूगु दु । उगु सिद्ध चैत्य मध्यय् छगः थुकि- यात मानय् यानातल । कालान्तरय् जीर्ण जुयावनाः उगु चैत्यय् सिमा बुयावल । ने. सं १०३८ सालं स्वयम्भू

त्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
					रत्नं गु इलय् उगु सिमा ध्यनाः लि बांलाक बल्लाक हानं चैत्यसंतु दयकाः सुवर्णमय गजू छत्र तथाः शोभा वृद्धि यानाबिल । थुगु चैत्यय ने. सं. १०२० सालं जीर्णोद्धार जूगु अभिलेख तयातः गु दु ।
१०१.	श्वया लिकसं ।	वज्रधातु चैत्य	पूर्णावस्था	१९ श.	ने. सं ९५२ सालं दयकगु अभिलेख युक्त थुगु चैत्यया वेदिकाय् दिनातः गु ।
१०२.	"	कूटागार चैत्य	"	"	थुगु चैत्यया उपरी भाग जीर्णोद्धार यानातः गु खनेदु । थुकिइ धर्मधातु वागी- श्वर, अपरिमिता, मञ्जुश्री तयातः गु खनेदु ।
१०३.	श्वया लिकसं ।	ज्वालावली चैत्य	"	२० श.	श्व चीवाहाः वेदिका च्वस्सं वासुकी, श्वया द्योने लःहू, अनं च्वय् अद्धविक- सित पद्म - रत्नावली - ज्वालावली - वज्रावली - विकसित पद्मोपरी जिना- लंकृत ।
१०४.	"	शिखरकूट चैत्य	च्वलामू खण्डित	१९ श.	जीर्णोद्धार यानाः पूरा यानातः गु, तर उष्णीष चूडामणि खण्डित जुयाच्वंगु ।
१०५.	"	चतुर्व्यूह चैत्य	पूर्णावस्था	१० श.	थुगु चैत्यय पद्मोपरी प्यखे प्यहा दना- च्वं पि बुद्धमूर्ति तयातः गु दु । पूर्वय् अभय वरद मुद्रा, दक्षिणय् वरद मुद्रा, पश्चिमय्

श्रीस्वयम्भू महाचैत्य



बुद्ध चतुर्भूह चैत्य

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
					धर्मचक्र मुद्रा, उत्तरय् बोध्यंग मुद्रा । तर थुगु चैत्यय् च्वलाम् न्हूगु तयातःगु जुल ।
१०६.	थ्वया न्ह्योनेच्च्वंगु ऊवलय् च्वंगु ।	शिखरकूट चैत्य	पूर्णविस्था	१६ श.	थुगु चैत्य जोर्णोद्धार यानाः पूरा याना- तःगु ।
१०७.	अनसंतु च्वंगु ।	"	"	"	"
१०८.	"	"	"	"	थुगु चीबाहाःयागु गर्भगृह अनुमानित ५।६ शदी पाखेयागु अशोक चैत्ययागु अवशेष खः । थुकिइ लोहलेप तया- तःगुलि चीबाहागवः तल्कय् जू । तर थुकियात आदरपूर्वक सुरक्षित् यानातःगु खनेदु ।
१०९.	"	अष्टकोणाकृति पद्मोपरी जिना- लंकृत चैत्य शिखरकूट चैत्य	खण्डित	१८ श.	अष्टबोधिसत्व युक्त चैत्य, थुकिइ च्वलाम् खण्डित ।
११०.	"	"	"	"	थुकिइ च्वलाम् खण्डित जुयाच्चन ।
१११.	स्वयम्भू चैत्यया आर्यताराया न्ह्योनेपाखे ।	"	पूर्णविस्था	१८ श.	थुगु चीबाहाः अप्पां दनाः वज्र प्लाष्टर यानाः सुवर्ण छत्र तयाः शोभा वृद्धि यानातःगु । थुकिइ बोधिसत्वया थासय् थःगु कुल स्वरूपं चिन्ह ज्वनाच्च्वं अलंकार सहित्पि बुद्धमूर्ति अंकित याना- तल । थ्व थःगु हे विशेषता खः । पूर्व-

ल्याः	प्रस्थापित स्थान	चैत्यया नां	अवस्था	शताब्दी	सक्षिप्त विवरण
-------	------------------	-------------	--------	---------	----------------

११२. स्वयम्भू चैत्यया आर्यताराया न्होनेपाखे । शिखरकूट चैत्य १६ श. अक्षोभ्य, दक्षिण- रत्नसम्भव, पश्चिम- षडक्षरी लोकेश्वर, उत्तर- अमोघसिद्धि । ने. सं. ६८० सालं दयकूगु चैत्य जीर्णं जुयाः ववययागु भाग अप्पां दनातल । चवय् गर्भगृह न्हूगु दयकातल । दथुत्वाः छगू जक पुलांगु जुयाच्चंगु खनेदु । थुकिइ अभिलेख अंकित ।
११३. कूटागार चैत्य १८ श. थुगु चैत्यय् तइतःगु गर्भगृह छगू पुलांगु अन्तिम लिच्छवीकालयागु अवशेष मिलय् यानाः आदरपूर्वक सुरक्षित् यानातःगु दु । थुकिइ ताम्रलेपया आभास खनेदु । लिस्सें उष्णीष चूडामणि खण्डित जुया- च्चन । थ्व चीवाहाः कूटागार शैली जुया निमित्त पञ्चबुद्ध निम्न भागय् तइतःगु जुल ।
११४. शिखरकूट चैत्य पूर्णविस्था " थुगु चैत्य मेमेगु शिखरकूट चैत्य स्वयाः गावकं मिलय् मजू, थुकिइ दथुत्वाःया च्वस्सं पिखाद्वारया ववस्सं अम्बसाः तयातल । अले थ्वया द्योने थस्वः ववस्वः निगू तले पलेहः तयातःगु जुल । उकिसं थुकिइ मूर्ति प्रस्थापन कथं नं फरक जुगु खनेदु-

ल्याः /	प्रस्थापित स्थान	चैत्यया नां	अवस्था	शताब्दी	संक्षिप्त विवरण
					प्रथम तल्लाय् पञ्चबुद्ध मध्यय् प्यह्म बुद्ध मूर्ति । द्वितीय तल्लाय् धर्मधातु वागीश्वरया प्यह्म मूर्ति । तृतीय तल्लाय् पूर्वय् शाक्यमुनि वज्रासन स्थित वरद अभय मुद्राय् । दक्षिणय् वज्रसत्त्व । पश्चिमय् अपरिमिता । उत्तरय् षण्मुखयुक्त पुस्तकांकित पद्माङ्कुर ज्वनाः ध्यान मुद्रा याना- च्वंह्य अरपचन वागीश्वरया छगू प्रकारया विशेष मूर्ति ।
११५. स्वयम्भू स्वागत मञ्चया लिउनेसं च्वंगु ।		वज्रधातु चैत्य (प्राचीन शैली)	पूर्णविस्था	१९ श.	श्व चैत्य जीर्णोद्धार यानाः अङ्ग पुरय् यानातःगु खनेदु ।
११६.		शिखरकूट चैत्य	खण्डित	१८ श.	थुगु चीवाहाःया दथुत्वालं च्वययागु भाग खण्डित जुयाः मेगु चीवाहाःया गर्भगृह स्वानाः दय्कातःगु खनेदु, तथापि च्वलामू खण्डित जुयाच्वन ।
११७.		वज्रधातु चैत्य	"	"	थुकिइ उष्णीष चूडामणि खण्डित, व थें अमोघसिद्धिया अनुहार नं ।
११८. नागपुर वशिगाः लिकसं च्वंगु ।		शिखरकूट चैत्य	"	१९ श.	थुगु चैत्य जीर्णोद्धार यानाः पूरा याना- तःगु खनेदु, अथे नं पले चक्का स्यना- च्वने धुंकल । थुकिइ च्वलामू नं मदु ।

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
११६.	कर्मराज गुम्बाया न्ह्योनेसं च्वंगु ।	शिखरकूट चैत्य	खण्डित	१८ श.	पश्चिम वेदिकाय् शक्तियुक्त महामञ्जुश्री- या मूर्ति तयातःगु दु । थुकिइ जीर्णोद्धार यानाः अङ्ग पूरा यानातःगु तर उष्णीष चूडामणि खण्डित जगु दु ।
१२०.	"	रम्यकूटागार चैत्य	पूर्णविस्था	"	थुकिइ प्रथम तल्लाय् चतुर्बुद्ध व चतु- तारा तयातल, द्वितीय तल्लाय् धर्मधातु वागीश्वरया मूर्ति भेद प्यंगू, श्वया लिकसं षोडशपूजादेवीपि उपस्थित याना- तःगु जुल । स्वंगु तल्लाय् मैत्रेय, रत्नपाणि, पद्मपाणि, विश्वपाणि, श्वया लिकसं षोडश बोधिसत्त्वपि । क्वय्यागु तल्लाय् पूर्वय् वीणाराज, शिव पार्वती । दक्षिणय् खङ्गराज । पश्चिमय् चैत्यराज । उत्तरय् ध्वजराज ।
१२१.	"	शिखरकूट चैत्य	खण्डितावस्था	"	थुकिइ उष्णीष चूडामणि खण्डित । दक्षिण वेदिकाय् षडक्षरी लोकेश्वर, तयातःगु दु ।
१२२.	"	"	पूर्णविस्था	"	थुगु चोबाहाःया वेदिकाया पूर्वय् वज्र- पाणि, दक्षिणय् षडक्षरी लोकेश्वर, पश्चिमय् आर्यतारा ।
१२३.	पवन भैरव देगःया लिउनेसं च्वंगु ।	रम्यकूटागार चैत्य	"	"	थुगु चैत्य ल्याः १२० या चैत्य समान

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
					जसां ववययागु तल्लाय् थुकिइ चतुर्महा- राजया मूर्ति तयातःगु मडु । तर थुकिइ चवलामू न्हूगु दय्कातल ।
१२४. ध्वया जःपाखे च्वंगु ।		शिखरकूट चैत्य	खण्डित	१८ श.	थुकिइ उष्णीष चूडामणि खण्डित, तर दथुत्वालं च्वय्या सम्पूर्ण भाग नवनिर्मित यासे जीर्णोद्धार यानातइतःगु दु ।
१२५. अनसंतुं च्वंगु ।		"	"	१९ श.	थुगु चैत्य चवलामू खण्डित जुयाच्वंगु दु । लिस्से ने. सं. ९१६ साल अभिलेख अंकित यानातल । वेदिका पूर्वय् सत्व- पर्यङ्क आसनस वज्रपाणि, दक्षिणय् षडक्षरी लोकेश्वर पश्चिमय् शक्ति सहित महामञ्जुश्री, उत्तरय् सिंहनाद लोकेश्वर ।
१२६. प्रतापपुरया लिउनेसं च्वंगु ।		ज्वालावली चैत्य	खण्डित	२० श.	ने.सं. १००६ सालया अभिलेख अंकित ।
१२७. कर्मराज गुम्बाया न्ह्योनेसं च्वंगु ।		अष्टकोणाकृति पद्म चैत्य	"	१९ श.	अष्टबोधिसत्व युक्त चैत्य । थुकिइ चवलामू खण्डित ।
१२८. भजन फलेचाया न्ह्योनेच्वंगु ।		अशोक चैत्य	पूर्णविस्था	१०।११ श.	थुगु चैत्य प्यखे स्वंगू स्वंगू तहः द्वार खुलय् यानातःगु दु । तर मूर्ति छुकिइसं खनेमडु । च्वय्यागु द्वारया कुनय् कुनय् सिंह मूर्ति अंकित यानाः शोभा वृद्धि यानातल । थुकिइ चवलामू न्हूगु दय्काः तइतल ।

लयाः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
१२९.	भजन फलेचाया न्ह्योनेच्वंगु ।	शिखरकूट चैत्य	खण्डित	१८ श.	थुगु चैत्य जीर्णोद्धार यानाः अङ्ग पुरा यानातःगु दुसां उष्णीष चूडामणि स्यना- च्वंगु दु ।
१३०.	स्यंगु बहीया ।	"	चवलाम् खण्डित	"	थुकिइ पूर्वया मैत्रेय बाहेक स्वस्थरसं द्यः मतसे दयकातःगु श्व थुगु चैत्यया विशेषता खः । श्व नं जीर्णोद्धार जुइ धुंकूगु खनेदु ।
१३१.	"	कूटागार चैत्य	"	१९ श.	कूटागारया द्योने वज्रधातु चैत्यया दथु- त्वाः स्वानाः जीर्णोद्धार यानातःगु दु ।
१३२.	सख्वाः दय्केगु गाःया नापनापं च्वंगु ।	शिखरकूट चैत्य	पूर्णावस्था	"	श्व चीवाहाः जीर्णोद्धार जुइ धुंकूगु दु । थुकिइ पूर्वय् भविष्य व्याकरण मुद्रा बुद्ध । दक्षिणय् भविष्य व्याकरण मुद्रा बुद्ध । पश्चिमय् पिण्डपात्रधारी बुद्ध । उत्तरय् अभय मुद्रा बुद्ध । जीर्णोद्धार जुइ धुंकूगु ।
१३३.	"	"	"	"	
१३४.	सख्वा दय्केगु गाःया लिक लिकसं ।	शिखरकूट चैत्य	पूर्णावस्था	१९ श.	थुकिइ पूर्व, दक्षिण, पश्चिमय् भविष्य व्याकरण मुद्रा बुद्ध व अले उत्तरय् मञ्जुघोष तयातल । श्व थुकिया विशेष- पता खः । थुकिइ जीर्णोद्धार जुइ धुंकूगु दु ।
१३५.	"	"	"	"	
१३६.	"	"	"	"	थुगु चैत्यया उत्तरय् भविष्य व्याकरण

ल्याः	प्रस्थापित स्थान	चैत्यया नां	अवस्था	शतान्दी	संक्षिप्त विवरण
१३७.	सख्वाः दय्केगु गाःया लिक लिकसं ।	शिखरकूट चैत्य	पूर्णाविस्था	१६ श.	मुद्रा बुद्ध तयातल, मेगु पाखे साबिक मूर्ति ।
१३८.	"	"	"	"	श्व नं जीर्णोद्धार जुइ धुंकूगु खनेदु ।
१३९.	"	चतुर्व्यूह चैत्य	"	१७ श.	पूर्वय् भविष्य व्याकरण मुद्रा बुद्ध, मेगु स्वखे साबिक किसिमं बोधिसत्व तइतःगु दु ।
१४०.	"	जलहय्योपरी जिना, लंकृत चैत्य	"	"	थुकिइ वेदिका मतसे नागःनिसे शुरु यानाः ह्यं चाय्काः दय्कातःगु खनेदु । थुकिइ चतुर्बुद्धया आसन त्वाकलय् चतुर्महाराज तयातःगु दु ।
१४१.	"	अशोक चैत्य	"	१३ श.	थुकिइ निगू तहः द्वार दु, तर मूर्ति मडु । थुकिइ २० शदीपाखेया च्वलामू तयातल ।
१४२.	"	शिखरकूट चैत्य	"	१६ श.	श्व चीबाहाः सादापन खनेदु ।
१४३.	"	अशोक चैत्य	"	१६ श.	थुकिइ १८ शदीया दथुत्वाः स्वानाः चतुर्बोधिसत्व मूर्ति तइतल, तर च्वलामू न्हगु दय्कातःगु खनेदु ।
१४४.	"	शिखरकूट चैत्य	"	१८ श.	जीर्णोद्धार यानाः पूरा यानातःगु ।
१४५.	"	"	च्वलामू खण्डित	१८ श.	जीर्णोद्धार यानातःगु ।
१४६.	"	कूटागार चैत्य	पूर्णाविस्था	"	थुकिइ चतुर्बुद्धया ववस्सं ववस्सं चतु-

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
१४७.	सख्वाः दयकेगु गाःया लिक लिकसं ।	कूटागार चैत्य	चवलामू खण्डित	१९ श.	कुलया चिन्हत प्रधानता बियातःगु श्व थुकिया विशेषता खः । जीर्णोद्धार जुइ धुंकूगु ।
१४८.	" "	" "	पूर्णाविस्था	"	थुगु चैत्यया गर्भगृह मेमेगु चैत्यलिसे मिलय् मजू, धान्यराश्याकृति रूपय् तया- तःगु दु । थुकिइ वज्रपाणि बोधिसत्व छद्म व मेगु चतुर्महाराजया स्वंगू मूर्ति तयातल । थुकिइ चतुर्बुद्धया मूर्ति तया- तःगु खनेमदु । श्व थुकिया विशेषता खः ।
१४९.	"	शिखरकूट चैत्य	अपूर्णाविस्था	१८ श.	जीर्णोद्धार यानातःगु ।
१५०.	"	कूटागार चैत्य	पूर्णाविस्था	१९ श.	"
१५१.	"	"	"	"	थुकिइ बोधिसत्वया थासय् चतुर्देवी तया- तःगु दु- पूर्वय् वज्रच्छेदिका प्रज्ञापार- मिता, दक्षिणय् मामकी, पश्चिमय् पाण्डुरा, उत्तरय् आर्यतारा; श्व थुकिया विशेषता खः ।
१५२.	"	"	"	"	थुकिइ निगू तहः चतुर्बुद्ध खनेदु । दथु- त्वाकय् द्यःपि मतसे खालि त्वहंपाता जक, श्व नं छगू प्रकारया विशेषता धाय्फु । थुगु चैत्य नं जीर्णोद्धार जूगु दु ।

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
१५३.	सखाः द्यूकेगु गाःया लिक लिकसं ।	कटागार चैत्य	चवलामू	१६ श.	थुकिइ नं बोधिसत्वया थासय् चतुर्तारापि तयातल ।
१५४.	"	"	खण्डित	"	"
१५५.	"	"	पूर्णावस्था	"	थुगु चैत्य नं जीर्णोद्धार जुइ धुंकूगु दु ।
१५६.	"	"	चवलामू	"	जीर्णोद्धार जुइ धुंकूगु ।
१५७.	"	रत्न चैत्य	खण्डित	२० श.	थुकिइ मूर्ति मतसे खालि रत्न बुत्तां चाःहुइकाः गर्भगृहया द्योने चकू तयाः दयकातःगु जक खः ।
१५८.	"	वज्रधातु चैत्य (प्र. शै.)	पूर्णावस्था	१७ श.	ने. सं. ६३१ सालं जीर्णोद्धार जूगु अभिलेख दु ।
१५९.	"	" (न. शै.)	"	१६ श.	जीर्णोद्धार जुइ धुंकूगु ।
१६०.	"	कटागार चैत्य	"	"	"
१६१.	"	"	"	"	"
१६२.	"	शिखरकूट चैत्य	"	"	"
१६३.	"	"	"	"	"
१६४.	"	"	"	"	"
१६५.	"	वज्रधातु चैत्य	"	"	"
१६६.	चःस्वां सिमाचाकलय्	ज्वालावली चैत्य	चवलामू स्यंगु	२० श.	थुकिइ प्यकुनय् अमिताभ, षडक्षरी लोकेश्वर, प्रज्ञापारमिता, मञ्जुश्री तयातःगु दु ।
१६७.	"	जलह्योपरी जिनालंकृत चैत्य	"	१६ श.	"
१६८.	"	धर्मधातु जिनालंकृत	पूर्णावस्था	२० श.	"

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
१६८.	चःस्वां सिमाचाकलय् ।	चतुर्व्यूह चैत्य	पूर्णावस्था	१७ श.	थुकिइ वज्रपर्यङ्कासन स्थिता चतुर्तीराया भव्य मूर्ति अंकित यानातल । उकि थुगु चैत्ययात ताराचतुर्व्यूह चैत्य धकाः न धाइ । थुकिया च्वलामू २० शदीयागु खः ।
१६९.	"	कूटागार चैत्य	भग्नावस्था	१८ श.	थुकिइ उपरीभाग चैत्य ज्वालावलीयागु, गर्भगृह जक अथे दय्कातःगु खनेदु, तर च्वलामू मदुगु ।
१७०.	"	"	च्वलामू खण्डित	२० श.	थुकिइ १७ शदीया गर्भगृह स्वानाः तइ-तल, लिस्से च्वलामू खण्डित ।
१७१.	क्वाःपाःलुखाया न्ह्योने ।	अशोक चैत्य	पूर्णावस्था	८ श.	थुकिइ ८ शदीया निम्न भाग श्वया छोने १० शदीया निगू तहः द्वार खुलय् याना-तःगु अशोक चैत्य स्वाकाः तइतल । च्वलामू जक २० शदीया ।
१७२.	अग्निपुरया लिक्सं ।	अष्टकोणाकृति	च्वलामू खण्डित	१७ श.	थुकिइ छचालं अष्टबोधिसत्त्व तयातःगु दु ।
१७३.	"	शिखरकूट चैत्य	"	१९ श.	
१७४.	शान्तिपुरया न्ह्योनेच्वंगु ।	"	पूर्णावस्था	२० श.	
१७५.	शान्तिपुरया जःपाखे ।	ज्वालावली	"	१९ श.	
१७६.	"	वज्रधातु चैत्य	"	२० श.	थुकिइ चतुर्बुद्ध कुंकुलामय् स्वकाः तइ-तःगु दु ।
१७७.	"	दुर्गतिपरिशोधन	च्वलामू	१९ श.	दथुत्वाःया भागं च्वय् वंचु हाकुनःगु

त्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
१७८.	शान्तिपुरया जःपाखे ।	शिखरकूट चैत्य	चवलामू खण्डित	१९ श.	त्वह ववय् सामान्य भ्वासात्वहं तथाः दयकातःगु । थुकिइ षोदशबोधिमत्व व पूजादेवीया संक्षिप्तीकरणया रूपय् पले- स्वां बुत्तां चाःहुइकातःगु जुल । थुकिइ चतुर्बुद्ध तथातःगु मडु ।
१७९.	"	"	पूर्णविस्था	२० श.	
१८०.	"	धर्मधातु जिनालं- कृत चैत्य	पूर्णविस्था	२० श.	ने. सं १०४० सालया अभिलेख युक्त ।
१८१.	शान्तिपुरया खःपाखे ।	बोधि चैत्य	"	"	तिब्बती शैली मूर्ति रहित सादापन कला । गनं गनं थुकियात कलश चैत्य धकाः नं धाइ ।
१८२.	"	वज्रधातु चैत्य	"	"	
१८३.	"	वज्रधातुपरी बोधिमत्व जिना- लंकृत	चवलामू खण्डित	१९ श.	उत्तराभिमुख बोधिमत्व सत्वपर्यङ्कासन, मेगु मूर्तित वज्रपर्यङ्कासनय् च्वंपि जुल ।
१८४.	"	कूटागार चैत्य	पूर्णविस्था	२० श.	थुकिइ पूर्व व उत्तरया मूर्ति हरण जूगु डु ।
१८५.	"	वज्रधातु चैत्य	चवलामू खण्डित	"	ने. सं. ९९४ साल अभिलेख अंकित ।
१८६.	"	"	"	"	
१८७.	"	शिखरकूट चैत्य	छुं स्यनाच्चंगु	"	दथुत्वाः छुं भचा स्यनाच्चंगु दु ।
१८८.	"	कूटागार	चवलामू	"	पूर्व पश्चिमय् भविष्य व्याकरण मुद्रा बुद्ध-

तथा:	प्रस्थापित स्थान	चैत्यया नां	अवस्था	शताब्दी	संक्षिप्त विवरण
			खण्डित		दक्षिणोत्तरय् पद्मपाणि लोकेश्वर । श्व चैत्य जीर्णोद्धार जुइ धुंकूगु ।
१८६.	"	शिखरकूट	पूर्णाविस्था	"	
१९०.	"	वज्रधातु	"	"	
१९१.	"	बोधि चैत्य	"	"	गर्भगृहं कवय् तिब्बती शैली च्वय् नेपाली शैली । थुकिइ ने. सं. १०८१ सालया अभिलेख सहित ।
१९२. शान्तिपुरी न्ह्योने त्वाथलं च्वय् च्वंगु ।		वज्रधातु	"	१८ श.	
१९३.	"	वज्रधातु चैत्य	"	२० श.	वर्तुलाकार वेदिका सहित यानातःगु, श्वया कवस्सं चतुर्बोधिसत्व तथातःगु दु ।
१९४.	"	शिखरकूट	च्वलामू खण्डित	१८ श.	
१९५.	"	वज्रधातु चैत्य	"	१९ श.	थुकिइ रञ्जना लिपि अक्षोभ्य बुद्धया धारणी क्रियातःगु दु । श्वया कवस्सं बोधिसत्व मूर्ति तथातःगु दु ।
१९६. सख्वा:गा: पाखे वनेगु लैय् च्वंगु ।		शिखरकूट चैत्य	"	१८ श.	श्व चैत्य जीर्णोद्धार जुइ धुंकूगु खनेदु । थुकिइ रत्नसम्भव मूर्ति खण्डित जुया- च्वन ।
१९७.	"	वज्रधातु चैत्य	पूर्णाविस्था	२० श.	
१९८. मैत्रि गुम्बां आनन्द कुटी वनेगु लैया बिचय् च्वंगु तःग्वःगु चोबाहाः ।		वसुवन्धुस्मृति चैत्य (वज्रधातु चैत्य)	"	१७ श.	खतु श्व चैत्य द्वितीय शदीपाखेया आ- चार्य वसुवन्धुस्मृति कथं दय्कातःगु, श्व चैत्ययात उष्णीष विजय धर्मपारंगत चैत्य

ल्याः	प्रस्थापित स्थान	चैत्यया नां	अवस्था	शतान्दी	संक्षिप्त विवरण
					धकाः इतिहासकारतयसं वर्णन यानातल । तर लिपा थुकिइ स्वयम्भू महाचैत्य जीर्णोद्धार यानाः ल्यंगु मूर्तित तयाः दय्कूगु धाइ । वर्तमान स्वरूप वज्रधातु चैत्य रूप्य् परिणत जुल । थुकिइ च्वंहा अक्षोभ्य बुद्ध छह्ण जक २० शदीया मूर्ति खः । थुकिया चक्रावली गोलाकृति मजुसे चतुष्कोणाकृति याना- तःगु दु । श्व थुकिया विशेषता खः । श्व चोबाहाः छगलं वज्र प्लाष्टर याना- तःगु जुल ।
१९९.	वसुवन्धुस्मृति चैत्यया अग्निकुनय् च्वंगु ।	विम्ब चैत्य	पूर्णाविस्था	१७ श.	
२००.	" " नैऋत्य	" "	" "	" "	
२०१.	" " वायव्य	घटकूट चैत्य	" "	" "	श्व चैत्य ऊवात्त स्वयंबल्य् घटकूट चैत्य थे' च्वंसां मेमेगु चैत्यतयगु अवशेषत छथाय् तयाः संग्रह यानाः दय्कातःगु जक खः ।
२०२.	" " ईशान	विम्ब चैत्य	च्वलामूया दक्षिण भाग स्यंगु	" "	
२०३.	वसुवन्धु चैत्यया न्होनेच्वंगु ।	धर्मधातु चैत्य	अपूर्णाविस्था	१६ श.	श्व धर्मधातु मण्डलाकारया निम्न भाग तूंगः थे' यानाः अप्पां दनातःगु । थुगु

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
२०४.	वसुवन्धु चैत्यया जःपाखे च्वंगु ।	वज्रधातु चैत्य	पूर्णविस्था	२० श.	मण्डलया द्योने ल्वहंया विशाल रूप वज्र दिकातःगु दु । श्व वज्र विनष्ट जुया- च्वन । धयातःगु दु, श्व वज्र व धर्मधातु मण्डल श्रीस्वयम्भू महाचैत्यया न्ह्योने- च्वंगु सुवर्णया वज्र व धर्मधातु मण्डलया न्ह्यथु ।
२०५.	श्वया लिकसं च्वंगु ।	धर्मधातु जिनाल- कृत चैत्य	"	"	श्व चीवाहाः सिमन्ति प्लाष्टर याना- तःगु । वि. सं. २००४ सालया अभिलेख अंकित ।
२०६.	वसुवन्धु चैत्यया लिउनेसं च्वंगु ।	वज्रधातु चैत्य	खण्डितावस्था	१६ श.	थुकिइ अम्बसा व पिखाद्वारत स्यना- च्वंगु खनेदु । लिस्सें अधोभ्य, रत्नसम्भव खालि जुयाच्वन । थुकिइ फःया च्वय्यागु भाग वज्र प्लाष्टर यानातल ।
२०७.	श्वया लिकसं लैया सिथय् च्वंगु ।	विम्ब चैत्य	पूर्णविस्था	२० श.	थुगु चीवाहाः छगलं सकभनं वज्र प्लाष्टर यानातःगुलि यानाः शताब्दी निर्णय याय् मछिगु खनेदु । तर वर्तमान वज्र प्लाष्टर २० शदीयागु जक खः ।
२०८.	श्वया न्ह्योनेसं च्वंगु ।	धर्मधातु जिना- लंकृत चैत्य	"	"	ने. सं. १०५५ सालया अभिलेख अंकित ।
२०९.	मोटर पार्कया त्वाथःया च्वस्सं च्वंगु ।	बोधि चैत्य	"	२० श.	तिब्बती शैली ।

ल्याः /	प्रस्थापित स्थान	चैत्यया नां	अवस्था	शताब्दी	संक्षिप्त विवरण
२१०.	मोटर पार्कया त्वाथःया च्वस्सं च्वंगु ।	धर्मधातु जिना- लंकृत चैत्य	च्वलामू खण्डित	२० श.	ने. सं. १०७३ सालया अभिलेख सहित ।
२११.	मोटरपार्क मञ्जुश्री वनेगु लैय् च्वंगु ।	वज्रधातु चैत्य	"	"	थुगु चैत्यया पश्चिम वेदिका ववस्सं सुन्दर मूर्ति अपरिमिता तथागत स्थापना याना- तःगु दु ।
२१२.	"	खासोचेन महाकूट चैत्य	पूर्णावस्था	"	श्व चैत्य अप्पां दत्ताः वज्र प्लाष्टर यानातःगु खः । थुकिइ छ्वालं पञ्चत्रिंश तथागत ३५ व आदिबुद्ध वज्रधर, वज्रसत्त्व एवं अपरिमिता तथागतया मूर्तित तथाः चाःहुइका तल । लिस्से श्वया ववस्सं पञ्चबुद्धया मूर्ति तथातःगु दु । धयातःगु दु- थुकिइ दुने स्वयम्भू महाचैत्य जीर्णोद्धार यानाः ल्यंगु अवशेष- तयगु सम्मान व सुरक्षित्या लागी थुगु चैत्यया गर्भय् स्वथनातःगु दु ।
२१३.	श्वया न्ह्योनेसं च्वंगु ।	धर्मधातु जिनालंकृत चैत्य	च्वलामू खण्डित	"	धयातःगु दु, श्व चीबाहाः नेपाःया छह्म नांजाःह्म बौद्ध विद्वान् पण्डित गुरु रत्नबहादुर वज्राचार्यजुं स्थापना याना- तःगु ।
२१४.	श्वया लिकसं ।	धर्मधातु चैत्य	पूर्णावस्था	"	
२१५.	खासोचेन चैत्यया लिउनेसं च्वंगु ।	धर्मधातु	खण्डितावस्था	"	श्व चैत्यया जैत्वाः छगू बाहेक अधोभाग

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
		जिनालंकृत चैत्य			वेदिका उद्धर्भाग चबलामू खण्डित जुया- च्वंगु दु ।
२१६. मञ्जुश्री तैया फुसय् च्वंगु ।		धर्मधातु चैत्य	पूर्णाविस्था	२० श.	वि. सं. २०३२ सालया अभिलेख युक्त ।
२१७. "		धर्मधातु	"	"	
		जिनालंकृत चैत्य			
२१८. ध्वया लिकसं च्वंगु ।		वज्रधातु चैत्य	चबलामू खण्डित	१६ श.	पश्चिम वेदिका जीर्णाविस्था अक्षोभ्य बुद्ध खालि ।
२१९. ध्वया लिकसं च्वंगु ।		"	"	१६ श.	पिखा द्वारय् मूर्ति रहित ।
२२०. मञ्जुश्री स्थानया मूल चैत्य ।		मञ्जुश्री स्मृति चैत्य (वज्रधातु चैत्यया रूपय्)	पूर्णाविस्था	"	वर्तमान स्वरूप १६ शदीस जीर्णोद्धार जगु जुल । थुगु चैत्यय् लुं सियाः चबलामू तयाः उकिइ च्वस्सं भव्य रूप लिइया इलां प्यनातःगु दु । थुगु चैत्यया पश्चिम पाखे गुरु वागीश्वर मञ्जुश्रीया पादुका अंकित लिसे ध्वया लिउनेसं छगू बःचाह्मंगु तोरण युक्त ग्वाख तयातल । ध्वया नं लिउने चैत्य गर्भय् दुने अमिताभ शिरस विराजित पद्मपाणि लोकेश्वर विज्याकातःगु दु । गुलिसिनं थुगु मूर्ति- यात धर्मश्रीमित्रयात छली रूपय् विज्याःगु उफोस्वां ज्वनाच्वंहगु गुरु मञ्जुश्रीया प्रतिमूर्ति धकाः नं मानय् यानातल । ध्व हे मूर्ति ब्वस्सं 'आर्य-

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
					मायाजालतन्त्र' या शुभ प्रतीककथं विल्वरया पुस्तकाकृति चिन्ह अंकित यानातःगु नं दु ।
२२१.	पर्वस्थान वनेगु लैया लिकसं च्वंगु ।	मंधातु जिना- लंकृत चैत्य	च्वलामू खण्डित	२० श.	वि. सं. २००६ सालया अभिलेख दु । थुगु अभिलेखय् थुगु चैत्यया नां 'ज्योति- राज' धकाः उल्लेख यानातल ।
२२२.	"	बोधि चैत्य	पूर्णविस्था	"	ने. सं. १०६५ सालया अभिलेख सहित थुगु अभिलेखय् श्व चीवाहाःया नां 'बोधिचैत्यराज' धकाः अंकित यानातःगु जुल ।
२२३.	श्वया लिकसं ।	धर्मधातु जिनालंकृत चैत्य	"	"	ने. सं. १०६६ सालया अभिलेख किया- तःगु दु ।
२२४.	"	"	"	"	ने. सं. १०७३
२२५.	श्वया लिकसं ।	धर्मधातु चैत्य	"	"	श्व चीवाहाः सिमन्ति प्लाष्टर यानाः घण्टाकारया छातं बःचागःगु देगःचायात चैत्याकार रूपय् परिणत यानातःगु ।
२२६.	"	घण्टाकृति चैत्य	"	"	थुकिइ पश्चिमपाखे चैत्यया गर्भगृहय् शाक्यमुनि बुद्धया छगू मूर्ति तथातःगु । जोर्णोद्धार यानाः सिमन्ति प्लाष्टर याना- तःगु दु ।
२२७.	पर्वस्थान धर्मचक्र गुम्बाया न्ह्योनेसं च्वंगु ।	वज्रधातु चैत्य	"	१८ श.	
२२८.	पर्वस्थान न्युनेल्लाखाङ्ग गुम्बाया लिउने	"	"	१९ श.	थुगु चैत्ययात शिलापत्रय् 'दुर्गतिपरि-

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
					शोधन चैत्य' धकाः नां उल्लेख यानातः गु दु ।
२२६.	"	पूर्वया चीवाहाः	पूर्णविस्था	२० श.	
२३०.	"	दक्षिण	"	"	
२३१.	"	पश्चिम	"	"	शाक्यश्री गुरुया शिष्य पातालामाजु श्रीलोवसाङ्ग नामग्याल् सुमतिउष्णीष लामा गुरुया नामं श्वया शिष्यपिसं स्थापना याःगु । श्वसपोल लामाजुया निर्वाण मिति १०६५ थिलागाः चौथी मंगलवार सुथसिया गुताः इलय् धकाः अंकित यानातल ।
२३२.	"	आग्नेय	"	"	वि. सं. २०१० सालया अभिलेख युक्त ।
२३३.	"	"	"	"	
२३४.	"	नैऋत्य	"	"	ने. सं. १०७८
२३५.	"	वायव्य	"	"	ने. सं. १०८०
२३६.	"	ईशान	"	"	
२३७.	"	"	"	"	वि. सं. २०११
२३८.	पुलां स्यंगुया मूल चैत्य ।	जिनालंकृत चैत्य धर्मधातु गोपुच्छाग्र चैत्य	"	"	ने. सं. १०३४ सालं जीर्णोद्धार प्रतिष्ठा- भि शिलालेख युक्त । श्व चीवाहाः वर्तुलाकार वेदिका युक्त वज्रधातु

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
					चैत्याकार रूप्य दयकातः गु जुल । थुकि- यागु वास्तविक प्राचीनता गुलि खः व घायम्फु तर वर्तमान स्वरूप २० शदी खः । थुगु चैत्यय् त्रयोदश चक्रावली मतसे नवनाकविशुद्धिया प्रमाण नव- चक्रावली जक तथाः दयकातः गु जुल । ध्व थुकिया विशेषता खः ।
२३९.	पुलां स्यंगु क्वय् मोटर पार्क वनेगु लैय् च्वंगु ।	वज्रधातु चैत्य	पूर्णाविस्था	१९ श.	थुगु चैत्यय् वज्र प्लाष्टर यानातः गु । थुकिइ पिखाद्वार मदुगुलि पञ्चबुद्ध मूर्ति नं अंकित जूगु खनेमदु । ध्व थुकिया विशेषता खः ।
२४०.	"	"	"	"	श्री ५ राजेन्द्र विक्रम समयया अभिलेख सहित । थुकिइ नं वज्र प्लाष्टर याना- तः गु दु ।
२४१.	"	"	"	"	ने. सं. ६४५ सालया अभिलेख युक्त । थुकिइ अक्षोभ्य अमोघसिद्धिया ख्वाः स्यनाच्वंगु दु ।
२४२.	"	"	"	१८ श.	ने. सं. ६२३ सालया अभिलेख सहित- थुकिइ 'पुलां स्यंगुकोस पातारकीर्ति श्रीभगवान् प्रतिष्ठा याना' धकाः अंकित यानातल ।
२४३.	"	"	"	१९ श.	थुकिइ रत्नसम्भवया मूर्ति विनष्ट जूगु

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
२४४.	पुलां स्यंगुया कवय् मोटर पार्क वनेगु लैय् च्वंगु ।	वज्रधातु चैत्य	पूर्णाविस्था	१९ श.	खनेदु, लिस्से' सिमन्ति प्लाष्टर यानाः जीर्णोद्धार यानातःगु नं दु । थुकिइ नं सिमन्ति प्लाष्टर यानातःगु दु ।
२४५.	"	"	"	"	अर्द्धचन्द्रोपरी उष्णीष चूडामणि सहित । थुकिइ अक्षोभ्य, रत्नसम्भवया मूर्ति स्यनाच्चंगु दु ।
२४६.	"	"	"	"	वज्र प्लाष्टर यानाः जीर्णोद्धार याना- तःगु । थुकिइ नं अर्द्धचन्द्रोपरी उष्णीष चूडामणि तयातःगु ।
२४७.	ज्ञानमानसि (सुमतिशील भिक्षु) या छेँ कवस्सं ।	धर्मधातु जिनालंकृत चैत्य	"	२० श.	ने. सं. १०८९ अभिलेख सहित । श्व चीवाहाःया पिखाद्यःया दिशा चतुर्विदिग् नाप मिलय् जू ।
२४८.	मञ्जुश्री तैया कवस्सं ।	"	"	"	वि. सं. २०३२ सालया अभिलेख युक्त ।
२४९.	"	"	"	"	ने. सं. १०६९ सालं जीर्णोद्धार जूगु अभिलेख सहित । थुकिइ बोधिचैत्यया स्वरूपं वेदिका तयाः अंग पुरय् याना- तःगु खनेदु ।
२५०.	"	विम्ब चैत्य	"	१९ श.	सिमन्ति प्लाष्टर यानाः बोधिचैत्यया छातं वेदिका तयाः जीर्णोद्धार याना- तःगु । थुगु चैत्यय् अन्य स्थानया मूर्तित हयाः थुकिइ दिनातःगु खनेदु । १७

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
२५१. मञ्जुश्री तैया ववस्सं ।		वज्रधातु चैत्य	च्वलामू खण्डित	१६ श.	शदीया अक्षोभ्य रत्नसम्भव व ७।८ शदीया पाञ्चिकयक्ष मूर्ति । सिमन्ति प्लाण्टर यानाः जीर्णोद्धार यानातःगु । वेदिका रहित गर्भगृह व चकू स्वाना- तःगु ।
२५२. मञ्जुश्री तैया ववय्च्वंगु पलेस्वां पुखूया कुनय् च्वंगु ।		विम्ब चैत्य	जोर्णविस्था	"	
२५३. ख्वाउँ बुँगाःया फुसय् च्वंगु ।		वज्रधातु चैत्य	च्वलामू खण्डित	१६ श.	ध्व चैत्य छगलं वज्र प्लाण्टर यानातःगु डु । थुकिइ अमोघसिद्धि छह्म बाहेक मेगु मूर्ति तयातःगु मडु । ध्व चैत्यया तःलय् ख्वाउँबुँगाः तयातल । प्रस्तुत मूर्ति अनुमानित १६ शदीयागु खः ।
२५४. आनन्दकुटी श्रीलङ्का चैत्य विहारय् च्वंगु ।		श्रीलङ्का चैत्य	पूर्णाविस्था	२० श.	थुगु चैत्यय् छुं मूर्ति व कलात्मक शुभ प्रतीक अंकित जूगु खनेमडु, केवल मुचुक पिचुक सादा किसिमं दयकातःगु जुल । खतु थुकिइ चकुलिइ न्हय्गू तला जक तयातल । ध्वयां च्वय् लुँगजू तयातःगु डु । ध्व चैत्य महायान देश नेपालय् थेरवादी शासन (हीनयान) या बीजारोपन रूपय् स्थापना जूगु धकाः धाइ ।
२५५. ध्यानकुटीइ च्वंगु ।		योगरत्न स्मृति चैत्य	"	"	ध्व चीबाहाः ऊवात स्वयंबलय् योमरि लसि वः । थुकिइ छुं मूर्ति व कलात्मक

त्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
२५६.	स्यंगु ईशान कुनय् गः चाःहुलेपाखे च्वंगु ।	वज्रधातु चैत्य	जीर्णविस्था	१८ श.	चिन्ह तयातःगु मडु । श्व चीवाहाःया फः सिमन्ति प्रयोग यानाः अप्पां दनातःगु वेदिकाया द्योने गर्भगृह चकू पुलांगु तयातल । लिस्से अक्षोभ्य व अमोघसिद्धि निगू जक मूर्ति तयातःगु जुल ।
२५७.	श्वया लिकसं च्वंगु ।	विशाल रूप चैत्य- या त्रयोदश चक्रा- वली जक	"	१७ श.	थुगु चकूया वेदिका, गर्भगृह आदि व्यावक अङ्ग छितरवितर जुल, केवल चकू जक ल्यनाच्चंगु । उकियात चैत्यया रूप वियातःगु ।
२५८.	श्वया लिकसं मंत्र संग्रह शिलाखण्डया न्ह्योनेच्चंगु ।	वज्रधातु चैत्य	च्वलामू खण्डित	१९ श.	
२५९.	सूर्यमुख गणेशया न्ह्योनेपाखे लँया सिथय् च्चंगु ।	धर्मधातु जिनालंकृत चैत्य	जीर्णविशेष मात्र	"	थुगु चैत्यया दथुत्वाः पिखाद्यः जक वाकि दनि, व नं ख्वाः स्यनाच्चंगु । थुगु मूर्तिया च्चय् ववय्या भाग उखेलाः थुखेलाः मदयावन । गुबले गुबले थुगु चैत्यं पुना ह्य यो धइगु लोकोक्ति दु । उकि थुकियात गुलिसिनं 'प्रेतचैत्य' धकाः नं धाइ । श्व हे कारण स्यंगुः चाःहुलीपिसं मिथ्या धारण अनुसारं ल्वहंचां कय्केगु नं याः ।

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
२६०.	भुइख्यःया दक्षिण लङ्गया पंङ्गालय् च्वंगु ।	वज्रधातु चैत्य	गर्भगृह चर्कय् जूगु च्वलामू खण्डित	१७ श.	प्रताप मल्लया समयय् सम्यक् न्यायकूगु उपलक्षय् स्थापना जूगु । थुकिइ रत्न- सम्भवया थासय् निपा ल्हातं वज्र ज्वनाः हृदी दिकाः पालि निपां अज्जलि बुद्ध यानाः आसन यानाच्चगु छगू मूर्ति तयातःगु दु । थुकियात गुलिसिनं वज्र- गर्भ बोधिसत्व धकाः नं धाइ । थव थुकिया विशेषता खः । थवया द्वार तोरण खण्डित जुयाच्चन ।
२६१.	थवया लिकसं च्वंगु ।	प्रताप चैत्य	गजू व वेदिका खण्डित	"	थव गन्थकूट शैली 'प्रताप चैत्य' या पूर्व भाग दय्के सिमधवं कलाकारं ज्या तोतूगु खनेदु । थुकिइ स्वस्थरसं रत्न- सम्भव, अमिताभ, अमोघसिद्धि दु । तर अक्षोभ्य तथागत तयातःगु मदु । थुगु चैत्यया गर्भगृह अतिरिक्त च्वय् क्वय्या भाग हरण जुइ धुंकल । ने.सं. १०६२ सालया अभिलेख सहित ।
२६२.	भुइख्यलं स्वयम्भू वनेगु हितिया लिउनेसं च्वंगु बुंगाःया फुसय् ।	वज्रधातु चैत्य	च्वलामू खण्डित	१० श.	
२६३.	चीधंगु किनूवाहाःया दत्थुइ च्वंगु ।	धर्मधातु जिनालकृत चैत्य	पूर्णविस्था	२० श.	
२६४.	अनसंतु मैत्रेय बोधिसत्वया न्ह्योनेच्वंगु ।	धर्मधातु चैत्य	"	"	थुगु धर्मधातु मण्डलया च्वय्यागु भाग व क्वय्यागु अष्टबोधिसत्व मूर्ति धातुयागु दय्कातःगु । मण्डल अमोघपाशया । थव चैत्य जीर्णोद्धार जुइ धुंकूगु दु ।
२६५.	किनूवाहाःया दत्थुइ च्वंगु ।	शिखरकूट चैत्य	"	१८ श.	

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
२६६.	किनूबाहाःया दुने अक्षोभ्य बुद्धया न्ह्योनेच्वंगु ।	धर्मधातु मण्डल	पूर्णविस्था	२० श.	वज्र व सिमन्तियागु दयकातःगु ।
२६७.	किनूबाहाःया जःपाखे बगिचाय् च्वंगु ।	बुद्धगया चैत्य	"	"	वि. सं. २०३३ सालया अभिलेख युक्त । श्व चैत्यय् निगू तल्लाय् भूस्पर्श मुद्रा बुद्ध तयातःगु दु । तर श्व चैत्य व मूर्ति सिमन्तियागु खः ।
२६८.	किण्डोल खोर्सांनी बारोइ च्वंगु ।	वज्रधातु चैत्य	"	१६ श.	थुगु चैत्य १६ शदीपाखे जीर्णोद्धार जूगु शिलालेख दु । श्व खोर्सांनी बारोइ सय्कातःगु मल्ला चीनया बादशाहयात कर पुलेगु धइगु लोक कथन दु । थुगु चैत्यया च्वलामुलिइ अर्द्धचन्द्रोपरी उष्णीष तयातःगु जुल ।
२६९.	किनूबाहाःया न्ह्योनेच्वंगु ।	"	"	१७ श.	थुगु चैत्यया गर्भगृह छगू १७ शदीयागु जुल, मेगु अङ्ग फुक्क २० शदीयागु ।
२७०.	"	"	"	१८ श.	थुगु चैत्य २० शदीइ वज्र प्लाष्टर यानाः जीर्णोद्धार यानातःगु ।
२७१.	"	"	च्वलामू खण्डित	१९ श.	थुकिइ व्याक्क मूर्ति मदय् धुंकल तर सिमन्ति प्लाष्टर यानाः जीर्णोद्धार यानातःगु ।
२७२.	"	"	"	२० श.	थुकिइ नं मूर्ति मदय् धुंकल । सिमन्ति प्लाष्टर यानातःगु दु ।

ल्याः	प्रस्थापित स्थान	चैत्यया नां	अवस्था	शताब्दी	संक्षिप्त विवरण
२७३.	भुइख्यःया जगतोद्वार विहारय् च्वंगु ।	स्वयम्भू चैत्य	पूर्णाविस्था	२० श.	अप्पां दनाः सिमन्ति प्लाष्टर यानातःगु दु । थुकिइ पद्मोपरी द्योने पञ्चबुद्ध व पञ्चतारा अंकित यानातःगु जुल ।
२७४.	भचातगिया सिद्धिबाहाःया दत्थुइ च्वंगु ।	वज्रधातु चैत्य	"	"	ने. सं. १०६२ सालया शिलालेख सहितगु थुकिइ अप्पां दनाः वज्र प्लाष्टर याना- तःगु दु ।

स्वयम्भू जंगलया उरत्ये धुरत्येच्चवंगु ल्वहँतय् कियातइतःगु तन्त्र
 वज्रयानया पारखे पिज्वःगु सूत्र, मन्त्र, धारणी स्तोत्र एवं
 गाथाया संक्षिप्त विवरण सूची

न्याः	प्राप्ति स्थान	लिपि	भाषा	मन्त्र	अधिष्ठातृ देवता	पुण्यानुशंसा
१. स्यंगु ध्वाकां दुहांवनेवं म्ह्योनेच्चवंगु ।		तिब्बती	संस्कृत	ॐ मणिपद्मे हूं ।	अवलोकितेश्वर (षडक्षरी लोकेश्वर)	षट्गति प्राणिनिगु उद्धार कामनां श्रद्धा निश्चयपूर्वक उगु मन्त्र द्वं पि, ताः पि, न्यं पि व स्पर्श याः पि एवं अनुस्मरण याः पि थु पि सकले पाप क्लेशं मुक्त जुयाः सम्बोधिज्ञान प्राप्त जुयाः उद्धार जुइ ।
२. श्वया लिकसं ।		"	"	ॐ अरपचन धी धी धी धी धी धी धी ।	वागीश्वर महामञ्जुश्री	सुनां श्रद्धापूर्वक धारण याइ, वाचन याइ इमित प्रज्ञा, धृति, श्रुति, स्मृति अभिवृद्धि जुयाः सकल अज्ञान दोषं मुक्त जुयाः सद्धर्मबोधिज्ञान प्राप्त जुयाः वागीश्वर तुल्य जुइ ।
३. वातैन पाखे शान्तिपुर		"	"	ॐ तारे तूतारे तुरे मम आयु पुण्य ज्ञान पुष्टि कुरु स्वाहा ।	सप्तलोचनी तारा	श्रद्धापूर्वक थुगु मन्त्र धारण यात धाः सा निर्विघ्नपूर्वक आयु, पुण्य, ज्ञान प्राप्त जुयाः पुष्ट जुइगु ।

ल्याः	प्राप्ति स्थान	लिपि	भाषा	मन्त्र	अधिष्ठातृ देवता	पुण्यानुप्रशंसा
४. श्वया लिकसं ।		तिब्बती संस्कृत		ॐ सर्वकर्मावरण विशोधयति स्वाहा ।	दुर्गति परिशोधन तथागत	सम्पूर्ण पाप क्लेश कर्मावरण परिशुद्ध जुयाः सकल दुर्गति नाश जुयाः विमुक्ति महामुख प्राप्त जुयाः सुखावती इ वनी ।
५. श्वया लिकसं ।		"	"	अआ ईई उऊ एऐ ओऔ अंअः ।	अरपचन वागीश्वर (नामसंगीति)	श्व मन्त्र ब्वनागुलि नामसंगीतियागु हृदय- मन्त्र धारण यानागु समानं पुण्य प्राप्त जुयाः विद्वान् जुइ ।
६. "		"	"	ॐ नमोबुद्धाय ।	भगवान् बुद्ध	बुद्धयाके शरण वनागु समानं पुण्य लाभ जुयाः बोधिपद प्राप्त जुइ ।
७. स्यंगु बातैन्य च्वंगु ।		"	"	ॐ मणिपद्मे हूं । ॐ वागिश्वरीमुं । ॐ वज्रपाणि हूं ।	त्रिकुलनाथ- अवलोकितेश्वर मञ्जुश्री, वज्रपाणि	श्रुपि स्वहृत्सिगु मन्त्र धारण यानागुलि त्रितन- यागु शासनिक ज्ञान, गुण, कर्म, सिद्धि फल प्राप्त जुयाः लिस्से त्रिदोष फुनाः त्रिकाय- ज्ञान प्राप्त जुइ ।
८. श्वया जःखः पाखे ।		"	"	ॐ अमिदेवाह्नीः ।	अमिताभ तथागत	थुह्य सुखावती भुवनया स्वामियागु मन्त्र धारणा यानागुलि दुर्गति पाखे वच्य जुयाः अपरिमित गुण सञ्चय नाम लोक धातु सुखावती भुवनय् जन्म काःवने दइ ।
९. "		"	"	ॐ तारे तुतारे तुरे स्वाहा ।	आर्यतारा	सुनां श्रद्धापूर्वक ब्वनी उह्यसित अष्टमहाभय हरण जुयाः दशपारमिता गुण, कर्म, सिद्धि लाभ जुयाः सर्वथा मारविघ्नपाखे रक्षा जुइ ।
१०. बातैनपाखे शान्तिपुर वनेगु लैय् ।		"	"	ॐ नमः सर्वतथागत हृदय अनुगते ॐ कुरु गिनी स्वाहा ।	प्रज्ञापारमिता	थुगु धारणी मन्त्र ब्वनागुलि कल्पान् कल्प तक यानावयागु कर्मावरण परिशुद्ध जुयाः सकल तथागतपिनिगु हृदय समानगु प्रज्ञा-

लयाः	प्राप्ति स्थान	लिपि	भाषा	मन्त्र	अधिष्ठातृ देवता	पुण्यानुप्रशंसा
------	----------------	------	------	--------	-----------------	-----------------

११. वातैनपाखे शान्तिपुर वनेगु लैय् ।	तिब्बती संस्कृत ॐ गतेगते पारसंगते बोधि स्वाहा ।				प्रज्ञापारमिता	ज्ञान धारण यानागु तुल्य अपालं पुण्य लाइ । संसारया दुःखया मूल अज्ञान क्लेशादि संकल्प विकल्पं छुट्य जुयाः भिन्नकं पारंगत जुयाः सम्पूर्ण पारमिता पूर्ण अवस्थाय् थ्यनाः मायावाद संसार कल्पना जालं सुविमुक्त जुयाः प्रज्ञापारमिता दर्शन प्राप्त जुइगु ।
१२. " " "	" " " ॐ वज्रसत्त्व समय- मनुपालय वज्रसत्त्व त्वेन प्रतिष्ठो ...				गुरु वज्रसत्त्व	गुह्यसिन् श्रद्धापूर्वक चतुर्बल देशना सहित यानाः वज्रयानया मूल क्षमापन शताक्षर युक्त थुगु वज्रसत्त्वधारणो धारण याइ उद्भासित सम्पूर्ण पाप क्लेश परिशुद्ध जुयाः चतुरानन्द सुख प्राप्त जुइ । श्व धारणी वज्रकुलया पाखे उत्तमगु देशना धयातल । थुगु मन्त्र व धारणी धारण यानागुलि आयु फुइ धुं कूसां अपरिमिता आयु प्राप्त जुयाः आयु, पुण्य, गुण, कर्म, सिद्धि सौभाग्य फल प्राप्त जुयाः अपरिमित गुण सञ्चय नाम लोकधातुस जन्म काःवने दइ । थुगु सप्ताक्षरी कूटाक्षर दुथाय् वज्रपातादि भय हरण जुयाः मङ्गल जुइ । थुकिइ वसपोल महाकारुणिक आर्यावलो- कितेश्वर साधन याय्त ब्वनेमाःगु शरणगमन,
१३. स्यंगु ववततलेया देपापाखे च्वंगु ।	" " " ॐ अमरणि जीवन्ति स्वाहा ।				अपरिमिता तथागत	
१४. स्यंगु त्वाथलं थहांवनेवं न्ह्योनेपाखे च्वंगु सिमा क्वस्सं ।	" " " रञ्जना कूटाक्षर				कालचक्र, योगाम्बर	
१५. स्यंगु ततलेया विशाल	तिब्बती तिब्बती महाकरुणा साधन				महाकारुणिक आर्यावलोकितेश्वर	

ल्याः	प्राप्ति स्थान	लिपि	भाषा	मन्त्र	अधिष्ठातृ देवता	पुण्यानुप्रशंसा
	अक्षोभ्य बुद्धया लिकसं द्विचिनातःगु ।			चर्या पुस्तकया सम्पूर्ण भाग कियातःगु ।		बोधिचित्तोत्पत्ति, पूजा, ध्यान ज्ञान आदिया संक्षिप्त रूपं अंग पुरय यानातःगु जुल ।
१६.	वातैनय चतुर्महाराजया थासय च्वंगु ।	देव- नागरी	संस्कृत	ॐ नमोबुद्धाय । ॐ नमोधर्माय । ॐ नमोसंघाय ।	त्रिरत्न- बुद्ध, धर्म संघ ।	श्रद्धापूर्वक थुगु वाक्य परलपागुलि निश्चय नं दुर्गतिइ वने मालिइ मखु । लिस्से त्रिरत्नया शासनिक गुण ह्यस्यूह्य जुइ ।
१७.	वातैनया देपापाखे च्वंगु जंगलय् ।	तिब्बती	"	ॐ मुनि मुनि महा- मुनये स्वाहा ।	बुद्ध शाक्यमुनि	बुद्ध शाक्यमुनियागु गुण बांलाक ह्यस्यूह्य जुयाः अपरिमित पुण्य प्राप्त जुइ, लिस्से अन्तय बोधिपद लाइ ।
१८.	ध्वया लिकसं च्वंगु ।	"	"	ॐ वज्रसत्त्व हूं ।	गुरु वज्रसत्त्व	थःह्यं यानातयागु अकुशल कर्म पाप क्लेश शान्त जुयाः वज्र समानं क्वात्तुगु चित्त जुयाः चतुरानन्द प्राप्त जुइ ।
१९.	स्यंगु पर्वतया दक्षिण जंगलय् च्वंगु ।	"	"	ॐ सुप्रतिष्ठित वज्रे स्वाहा ।	वज्रगुरुं अधिष्ठान याइगु मन्त्र	ध्व थुगु पर्वतय् गुलि नं मन्त्र, देवता आदि दयकातइतल उपि व्याकक यावत् कल्पतकं स्थिर जुया च्वनेमा धकाः मंगलपूर्वक गुरु वज्राचार्य अधिष्ठान याइगु मन्त्र ।
२०.	ध्वया लिकसं दकलय् सकलय् तःग्वःगु ल्वहैतय् ।	"	तिब्बती	कर्मापा ख्येनो!!!	काग्युपा मूलगुरु कर्मापा लामा	तिब्बती बौद्धजगतय् चलय् जुगु प्यंगु सम्प्र- दाय मध्यय् छगू मुख्यगु धर्म काग्युपा शासनया मूलगुरुयात श्रद्धा प्रेमपूर्वक सम्बो- धन यानाः तइतःगु ।
२१.	स्यंगु तैनं शान्तिपुर वनेगु लैय् ।	"	संस्कृत	ॐ मम धुनि स्वाहा ।	?	?

ख्याः	प्राप्ति स्थान	लिपि	भाषा	मन्त्र	अधिष्ठातृ देवता	पुण्यानुप्रशंसा
२२.	स्यंगु बातैन्य चीबाहाःया तिब्बती ववस्सं च्वंगु ।			ॐ जेचुन्मा फामा धोलमा... (एकविंशतितारा स्तोत्र)	आर्यतारा	थुकिइ आर्यतारायागु ध्यान, गुण, मन्त्र, प्रसिद्धि व रहस्य विषयक संक्षिप्तीकरण रूप्य स्तोत्र यानातःगु धारण यानागुलि आपाः आपालं अन्तराय भयादि दोष परित्राण जुयाः शान्ति सुख मंगल प्राप्त जुइ । तिब्बत बौद्धजगत्य् चल्य् जूगु प्यंगू प्रसिद्ध सम्प्रदाय मध्य्य पुलांगु पत्तिइ निगमापा शासनया प्रवर्तक मन्त्र धर गुरु रिम्पोछे महागुरु पद्मसम्भवयागु मन्त्र धारणा याना-गुलि मारविघ्न दोष शान्त जुयाः अद्भूत सिद्धि प्राप्त जुयाः महासन्धियागु ज्ञान दर्शन लाइगु ।
२३.	स्यंगु पर्वतया दक्षिणपाखे तःगवःगु त्वहंया ववस्सं ।	"	संस्कृत	ॐ आःहूं वज्रगुरु पद्मासिद्धि हूं	गुरु पद्मसम्भव	त्रिरत्न बुद्ध धर्म संघया बीजाक्षर रूप्य मान्य यानातःगु लिस्सें त्रिकाय परिणुद्ध जुइगु त्रितत्त्व ज्ञान लाभ जुइगु रूप्य भावना यानातःगु । सारांशतः त्रिरत्न स्मरण यानागु समानं पुण्य प्राप्त जुइगु ।
२४.	प्रतापपुरया फलय् च्वंगु ।	"	"	ॐ आःहूं ।	त्रिरत्न देवता	आपालं धन धान्य रत्नं परिपूर्णं जुयाः श्री-समृद्धि सुख प्राप्त जुइगु ।
२५.	सुवर्णवज्र युक्त धर्मधातुया लिकन्वगु तिहया ह्दी अंकित ।	"	"	ॐ वसु धारिणी स्वाहा ।	वसुन्धरादेवी	
२६.	बातैनया चतुर्महाराजया जःपाखे जंगलय् च्वंगु ।	"	"	संस्कृत आंकार आर्मा धेह्नी तिब्बती सुन्पो शिशि माला	?	?

ल्याः	प्राप्ति स्थान	लिपि	भाषा	मन्त्र	अधिष्ठातृ देवता	पुण्यानुप्रशंसा
२७.	वातैनया चतुर्महाराजया जःपाखे जंगलय् च्वंगु ।	तिब्बती	तिब्बती	उहुलाग् लामादोर्जे जिनपोला छ्याग् छालो.....	गुरु वज्रधर	मुक्तिपा धइह्य तीर्थिकं बुद्धधर्म प्रति तःचंगु अपराध कर्म याःगु प्रायश्चित्त शुद्धया लागी गुरु वज्रधरयात लुमंकाः देशना याःगु छगू पाप देशना खः धकाः धाइ ।
२८.	स्यंगु जंगलया दक्षिणपाखे च्वंगु ।	"	संस्कृत	हा. आ. शा. सा. मा. हा.	षट्मुनि	षट्पतिलोक विशोधन जुइगु वीणाक्षर मन्त्र छगू किसिमं 'ॐ मणिपद्मे हू' थे जाःगु पवित्र मन्त्र भाःपाः तःगु ।
२९.	"	"	"	ॐ पद्मसत्त्व समय मनुपालय पद्मसत्त्व त्वेनो प्रतिष्ठो...	गुरु पद्मसत्त्व	पद्मकुलया पाखे देशना यायगु मुख्यगु धारणी जुल ।
३०.	"	"	"	ॐ धुरु धुरु जयमुखे स्वाहा ।	?	श्व मन्त्र छधाः ब्वनाः मेमेगु मन्त्र धारणी स्तोत्र ब्वन धाःसा, जाप यात धाःसा अप्रमेय पुण्य संख्या प्राप्त जुइगु ।
३१.	"	"	"	ॐ भैषज्य भैषज्य महा भैषज्य महा-गते स्वाहा ।	भैषज्यराज तथागत	शुक्ति शारीरिक मानसिक निगू रोग व्याधि मुक्त जुयाः परमारोग्य सुख प्राप्त जुयाः वज्रकाय जुइ ।
३२.	स्यंगु जंगलया पूर्वपाखे च्वंगु ।	"	"	ॐ जै लै सा हा ।	जम्बल जलेन्द्र	धनरत्न साधन यायगु जम्बल जलेन्द्रया मन्त्र ?
३३.	"	"	"	बै हू		
३४.	माणे पःखाःया लिउने पाखे च्वंगु ।	"	तिब्बती	उर्ग्येन् पेमा ज्युनि-ला सोलवादेव....	गुरु पद्मसम्भव	थुगुक्थं स्तोत्र यानागुलि गुरु पद्मसम्भव प्रसन्न जुयाः कलिया दोष निवारण जुयाः

ल्याः	प्राप्ति स्थान	लिपि	भाषा	मन्त्र	अधिष्ठातृ देवता	पुण्यानुप्रशंसा
३५.	स्वयम्भू जंगलया दक्षिण- पाखे च्वंगु ।	तिब्बती	संस्कृत	(गुरु पद्मसम्भव स्तोत्र) ॐ मणिपद्मे हूं ह्रीः ।	आर्यावलोकितेश्वर	निर्विघ्न सिद्धि प्राप्त जुइ । ‘ॐ मणिपद्मे हूं’ या वर्णन च्वय् वने धुंकल, तर थन थुगु मन्त्रय् लिउने आर्यावलोकिते- श्वरया बीजाक्षर समेत दुगु सप्ताक्षरी जुल । ?
३६.	स्यंगु जंगलया लिउने रेञ्जर अफिस लिकच्वंगु बीगःचागु देगःनाप ।	”	”	ॐ आमु ध वि ह्री ।	?	?
३७.	स्यंगु जंगलया ईशान कोणपाखे च्वंगु ।	”	संस्कृत	तद्यथा । आकाश- निवरणीनि सर्व- धर्मनि । इय मन । विपशन । हमले चले सुपरि धर्म निखेन । वरुनिचय सर्वतथागतयागु हृदय स्वभाव वर्णन याना- तइतःगु छगू किसिमया धारणी । ध्व धारणी धारण यानागुलि आपालं पुण्य प्राप्त जुइ ।	सर्वतथागत	
३८.	अनसंतुं च्वंगु ।	”	संस्कृत	सर्व तथागत हृदय...	”	”
३९.	”	”	तिब्बती	आर्य ध्वजाग्र केयूरी नाम	आर्य ध्वजाग्रकेयूरी	गुह्यसिनं ध्व धारणी ब्वनी वया त्वापु ख्यापु वादविवाद दइमखु, लिस्से देव मनुष्यया जुजुपिसं रक्षा याइ, गुबले भय दइमखु । शत्रुसैन्यत फुनावनी, पाप नाश जुयाः सदां मंगल जुइ, श्रीलक्ष्मी प्राप्त जुइ धयातल ।

ल्याः	प्राप्ति स्थान	लिपि	भाषा	मन्त्र	अधिष्ठातृ देवता	पुण्यानुप्रशंसा
४०.	शान्तिपुरया न्ह्योनेपाखे च्वंगु चीवाहाः ।	रञ्जना	संस्कृत	ॐ कंकनि कंकनि रोचनी रोचनी त्रो- चनी त्रोचनी....	अक्षोभ्य तथागत	श्व धारणी धारण यानागुलि अक्षोभ्य तथागतयागु ज्ञान, गुण धारण यानागु समानं पुण्य प्राप्त जुइ ।
४१.	स्यंगु जंगलया ईशान कुलांपाखे च्वंगु ।	तिब्बती	"	ये धर्मा हेतुप्रभवा हेतु...	महाश्रमण बुद्ध	श्व गाथा धारणा यानागुलि बुद्धयागु सम्पूर्ण उपदेश ब्वनागु न्यनागु समानं पुण्य प्राप्त जुइ, मङ्गल जुइ ।

रितिथिति गुठीया सूची

स्वयम्भूप्रति श्रद्धाभक्ति तयाः विभिन्न इलय् न्याय्कावइच्चंगु पर्व, गुठी व लस्ताःपुजाया संक्षिप्त परिचय-सूची

१] स्वयम्भू वीजारोपन चैत्र पूर्णिमा (लहुतिपुन्ही)

थौयागु महान् पर्वदिनय् विपश्ची तथागत जामाःचो पर्वतस विज्यानाः अकनिष्ठ भुवनं अधिष्ठान यानाः बियाहःगु सकि ज्वनाः योगध्यान यानाः प्रणिधान यासे कालीहृदस पलेसकि वीजारोपन यानाविज्याःगु खः । थ्व हे पलेसकि वीजारोपन यानाःलि खुला लिपा श्रीस्वयम्भू ज्योतिरूप रश्मि प्रकाश जुया विज्याःगु जुल । थ्व हे कारणं थुगु दिनयात “श्रीस्वयम्भू महाचैत्य गर्भाधान जूगु” महान् पर्व पुण्यतिथि धकाः धाइ ।

थ्व हे खँयात ध्यान आकर्षित यासे थौया अद्यापि लहुतिइ स्नान यानाः जामाःचो भगवान् दर्शन यानाः लिसेलिसे श्रीस्वयम्भू महाचैत्य नं दर्शन व पूजन याय्गु यानावइच्चंगु जुल । थुखुनु स्वयम्भू पर्वतया न्ह्योनेपाखे च्वनाः थ्वःचा थ्वःचा मुनाः सँय्-सँमि, तामाङ्क, गुरुङ्क आदिपिसं पौभाः प्रतिमादि ब्वयाः पूजा, भाव, भक्ति यानाच्चनिइपिनिगु संख्या नं कम मजू ।

थौ हे नेपाःयागु सम्पूर्ण बौद्ध धर्म, दर्शन, कला, संस्कृति अभ्युदय जूगु दिन धकाः नं धाय्फु ।

२] स्वयम्भू उत्पत्ति- आश्विन पूर्णिमा (कतिपुन्ही)

विपश्ची तथागतं चैत्रपूर्णिखुनु कालीहृदस पलेसकि पिनावनाःलि खुला लिपा आश्विन पूर्णि रेवती नक्षत्र शुक्रवार ध्रुवयोगखुनु सुथसिया न्हापां ब्रह्ममुहूर्तय् श्रीस्वयम्भू ज्योतिरूप प्रकाश जुल ।

थुगु महान् पवित्र दिनय् श्रीस्वयम्भू ज्योतिरूप उत्पन्न जूगु जन्मदि जूगुलि परम्परागत नेपाःया थःगु सांस्कृतिक विधि अनुसार धार्मिक प्रकृयाद्वारा श्रद्धा निश्चय तथाः अनेक प्रकारं पूजा भाव भक्ति यानावइच्चंगु खनेदु । थुलि जक मखु श्रीस्वयम्भू महाचैत्य एवं थनया विविध चैत्य चैत्य पत्तिकं धया थे सखाःपा याय्गु, पञ्चपुरी आदि थासय् दृष्टिदान याय्गु अले आकाश भैरव (पचलि भैरव) या खलःतय्सं तूर्यताडावचर प्वंगा पुयाः दिव्यसन्देश न्यंकेगु आदि महत्वपूर्ण क्रिया जुइ ।

श्रीस्वयम्भू ज्योतिरूप उत्पन्न जूगु महान् शुभ उपलक्षय् देवराज इन्द्र अनेक देवदेवतापिसं स्वागत सत्कार यानाः सुवर्ण छत्र रत्नचूडामणि द्वहलपावंगु जूया निम्ति व हे परम्पराकथं नेपाःमि बौद्धतय्सं चैत्यकुलनायक श्रीस्वयम्भू उत्पत्ति जूगु पवित्र स्मृतिकथं थःथःगु विहार विहारय् प्रतिष्ठापित चीबाहाः चीबाहाः पत्तिकं रत्नचूडामणि छत्रया भावनाकथं आश्विनशुक्ल पूर्णिखुनुनिसे आश्विनकृष्ण अष्टमी तक च्यान्हुयंकं इलां प्यनेगु अथवा थुकिया दिव्यभावनाकथं काष्ठमयदण्डीस चौमरी चतामहि तथाः उकिइ द्योने खाइसि छगः घानाः चीबाहाः चीबाहालय् चौछाय्गु गुठी न्याय्कावइच्चंगु खनेदु । खतु स्वयम्भू महाचैत्यय् सखाःपा याय्गु थःगु हे किसिमया विधिविधान दु । थौया दिनय् हे भक्तजनपिसं महादी च्याकेगु नं याइ ।

३] स्वयम्भू प्रतिष्ठा कर्म कार्तिक पूर्णिमा (सकिमनापुन्ही)

थौयागु महान् पर्वय् वसपोल श्रीस्वयम्भू ज्योतिरूप दर्शन याय्त बिज्याःह्य गुरु वागीश्वर मञ्जुश्रीनं स्वयम्भूयात स्तोत्र यानाः भाव भक्ति यासेलि वसपोल श्रीस्वयम्भू ज्योतिरूप वास्तविक थःगु स्वरूप प्रभाश्वर धर्मकाय ज्योतिरूप पञ्चरश्मिपाखे पञ्चबुद्ध दर्शन बियाबिज्यात । हानं व हे पञ्चबुद्ध न्याह्यं छह्य जुयाः धर्मधातु विश्वरूप जुयाः क्यना बियाबिज्याःगु दि धयातल । व हे आदर्श अनुसारं नेपाःयागु चीबाहाः चीबाहाः पत्तिकं पञ्चबुद्ध प्रस्थापन याय्गु यानावइच्चंगु जुल ।

अज्ज थौयागु महान् पवित्र स्मृतियात परिलक्षित् यानाः गुरु शान्तिकराचार्यजुं श्रीस्वयम्भू ज्योतिरूपयात महान् चैत्यया रूपय् परिणत यानाः विधिवत् प्रतिष्ठा कर्म सम्पूर्ण याःगु दिन नं थौं हे जूगु जुल । थुगु प्रतिष्ठा कर्म सिधसेलि बडो हर्ष व आनन्दपूर्वक अनेक मङ्गल उत्सव यानाः शतबीज बिईवः ह्वलाः स्वयम्भू जंगल प्रदक्षिणा यानाः नेपाःया लागी भविष्यवाणी यानाः थःह्यं

दयकूगु शान्तिपुर महागुहास दुहांविज्यानाः सदांया लागी चिन्तामणिरत्न मत च्याकाः आष्फनिक योग याना विज्यानाच्वन । उकिं थौं स्वयम्भूयागु विषय कयाः त्रि-महापर्व संयोग चूलाःगु दिन नं धाइ ।

थ्व हे दिनयागु गुणगौरवयात लुमंकाः वसपोल स्वयम्भूप्रति श्रद्धाभक्ति तसे कार्तिक लच्छि विशेष प्रकारं स्वयम्भूइ कातिसेवा जुइ । थ्व कातिसेवा सम्पूर्ण जूगु दिनय् कातिपुन्ही (सकिमना-पुन्ही) खुनु स्वयम्भू व मञ्जुश्रीया न्ह्योने दीपावली मत च्याकाः हलिमलि व सकिमना व्वयाः थःथःगु श्रद्धा निश्चय अनुसारं तुतः व्वनाः पाठपूजा आदि प्रदक्षिणा याय्गु ज्या जुइ ।

बौद्ध धारणा अनुसार विपश्ची तथागतं पिनाथकूगु सकिपाखे वसपोल श्रीस्वयम्भू ज्योतिरूप उत्पन्न जूगुलि उगु गुणानुस्मरण यानाः कातिपुन्हीखुनु सकिमनापुन्ही मानय् याय्गु यानावइच्वंगु जुल । व हे स्वयम्भू ज्योतिरूपया स्वागत सत्कार निम्ति त्वाःत्वालय् बाहाःबाहालय् कःसिइ कःसिइ आलोकमत च्याकाः दीपावली उत्सव याय्गु नं यानावइच्वंगु धाइ । अज्ज थुलि जक यानाः नं सन्तोष मजुयाः नेनाम शून्य निरञ्जन निराकार चित्त चैतन्यरूप वसपोल स्वयम्भू भगवानं पालन यानाः रक्षा यानातःगु थासय् च्वंपि नेपाःमितय्सं श्रीस्वयम्भू ज्योतिरूप महाचैत्याकार रूपय् प्रतिष्ठा जूगु महान् शुभदिनय् नेपाःया नववर्ष आरम्भ जूगु खः धइगु इतिहासयात लुमंकाः नेपाल सम्बत्था प्रारम्भ महिना नं थ्व हे कार्तिकशुक्ल प्रतिपदानिसें शुभारम्भ जूगु धाइ । नेपाःमि बौद्धतय्गु थ्व थःगु हे धारणा खः ।

४] गुह्येश्वरी विश्वरूप दर्शन व्यूगु- मार्गकृष्ण नवमी

कालीहृदया लः छ्वनेत विज्याःह्य सर्वप्रथम नेपाल निर्माणकर्ता गुरु वागीश्वर मञ्जुश्रीयात वसपोल आदिबुद्ध शक्ति प्रज्ञापारमिता नैरात्मा देवीं (गुह्येश्वरी) थौंया दिनय् शान्त व क्रोध स्वरूपं विश्वरूप दर्शन व्यूगु धयातल । थुकियागु हे अनुस्मरणकथं मृगस्थली जंगलय् विश्वरूपया मूर्ति स्थापना यानातल धाइ ।

५] सम्बरोदय दिशि- मार्गकृष्ण दशमी

थुगुकथं मार्गकृष्ण नवमीखुनु मञ्जुश्रीनं गुह्येश्वरीया विश्वरूप दर्शन प्राप्त जुसेलि वयां सतिखुनु थुगु विश्वरूप (महासम्बर) दर्शन प्राप्त जूगु लस्ताय् विधिपूर्वक दर्शन व पूजन यानाः धर्मोदया गुह्येश्वरी कुण्डया वज्रोदक अभिषेक काय् धुंकाः यथाविधि थे गुह्येश्वरी कुण्डयात वांलाक बल्लाक दय्काथकूगु जुल ।

थ्व हे दिनयागु ऐतिहासिक घटनायात लुमंकाः नेपाःमि बौद्धतय्सं थौतकं तन्त्रवज्रयानया विधिकथं सम्बरोदय जुगु दिन धकाः दिशि-पूजा यानावइच्चंगु जुल । उकिं थुगु दिनय् बौद्धतय्सं गुह्येश्वरीयात विशेष प्रकारं पूजा-आजा याय्गु यानावइच्चंगु खनेदु ।

६] मञ्जुश्री आगमन- मञ्जुपञ्चमी (श्रीपञ्चमी)

माघशुक्ल पञ्चमी उत्तरभद्र नक्षत्र बृहस्पतिवार चूलाःगु दिनयात गुरुपञ्चमी अर्थात् मञ्जु-पञ्चमी धाइ । थौयागु दिनय् महाचीन पञ्चशीर्ष पर्वतं गुरु मञ्जुश्री श्रीस्वयम्भू ज्योतिरूप दर्शन याय्त नेपाः थ्यंकः विज्याःगु जुल । थौयागु दिनयात लुमंकाः सकल विद्याप्रेमी भाजु मय्जुपिसं गुरु वागीश्वर मञ्जुश्रीयात थःथःगु श्रद्धा भक्ति अनुसारं पूजाभाव भक्ति याय्गु यानावइच्चंगु खनेदु ।

थौयागु दिनय् सुं श्रद्धालु भक्तजनपिसं तःदहनय् स्नान यानाः अनयागु जल कयाहयाः स्वयम्भू व मञ्जुश्रीयात जल चह्लय् यात धाःसा अज्ञानी मूर्ख नं पाण्डित्य जुइ धकाः वर्णन यानातल । निर्धनी नं कुवेर समानं धनी जुइ धकाः प्रशंसा यानातःगु दु ।

७] शान्तिपुरीइ लुँ मोह छाय् गुठी

सकिमनापुन्ही व सिपुन्हीखुनु दच्छिया निकः लुँ मोह (असर्फि) छाय्गु गुठी श्री ५ रणबहादुर शाह जुजुं तयाथकूगु थिति थौतकं परम्परा चलय् जुयाच्चंगु दनि । थुकियात हे ब्वलंकेगुकथं यानाः श्री ५-गीर्वाणयुद्ध जुजुं शान्तिपुरीस महापूजा गुठी निम्ति सिजःपौ तया-थकूगु दु ।

८] शान्तिपुरीइ दुहांवनेगु गुठी

शान्तिपुरीइ स्वंगू तहःया लुखा दु । उकिइ न्हापांगु लुखां दुहांवनेगु सर्वसाधारणया लागी पूजा याय्गु थाय् जुयाच्चन । थ्वयां दुनेच्चंगु न्हाबले धया थे तालं ग्वयातःगु लुखां सर्वसाधारणया लागी मखु विशेष कारण व खास अधिकारीकपि जक दुहांवने ज्यूगु लुखा जुल । थुगु लुखां गुबलय् गुबलय् दुहांवनी धइगु विषय पर्व ववय् च्वयागु दु । थन नं दुने च्वंगु अभ्यन्तरयागु लुखां

दुहांवनेगु जक अत्यन्त गोप्य व रहस्यमय जुयाच्चंगु जुल । खास याना: थुगु लुखा चाय्का: दुहांवनेत अधिकारया खँ मखु कि सियाबजि, पौबजि, मुस्या, पालु, ओयात मन्त्राधिष्ठान पाखे पञ्चवलि विइफुपि शक्ति समर्थवान्पि जक दुहांवने फइगु थाय् धयातल ।

- १) लय् लय् पत्तिकं कृष्णपक्ष दशमी व एकादशी
- २) श्रीपञ्चमी न्ह्यरुखुनु व श्रीपञ्चमी
- ३) कतिपुन्ही
- ४) सकिमनापुन्ही
- ५) सिपुन्ही
- ६) दिशीपूजा प्यन्हुयंक
- ७) सम्यक् न्याय्किइबल्य्
- ८) सखा:पा याइबल्य्
- ९) स्यंगुया थपात्वय्बल्य्
- १०) अनावृष्टि समयय् वर्षापण क्रिया जुइबल्य्, इ०

६] मञ्जुश्रीतँनय् पाल्चामत च्याके गुठी

मञ्जुश्रीप्रति श्रद्धाभक्ति तसे माघशुक्ल चतुर्थीया बहनी व श्रीपञ्चमीखुनु तँया ज:ख: पाल्चामत च्याकेगु ज्या जुइ ।

१०] नास:पूजा गुठी

गुंला लच्छियंकं शृङ्गभेरी न्यकू पुया: स्वयम्भू प्रदक्षिणा याना: ग:चा:हुला: प्राप्त जूगु दक्षिणा संकलन यानागु आयस्ता मुंका:लि फाल्गुणशुक्ल पञ्चमीखुनु फसखाद्य:याथासय् नृत्येश्वर (नास:द्य:) पूजा याना: गुठी न्याय्की ।

११] घाँय् पुइ गुठी

गथांमुग: च:ह्लय् छन्हु निन्हु न्ह्यव: स्वयम्भू चाकलय् शान्तिपुरीइ, पुलां स्यंगु व मञ्जुश्रीया-थाय् घाँय् पुइगु, सुग्घर सफा याय्गु ज्या जुइ । थुनिया नं अलग्ग गुठी दु । थव हे ज्या चालंखुनु नं याइ ।

१२] पिवखा द्वार तोरण सिले ज्या

स्वयम्भू महाचैत्यया गर्भगृहस विज्याकातःपि पिवखा द्वार- पञ्चबुद्धया लुखा, तोरण्य चुकं पानाः बांलाक सुग्घर सफा याय्गु ज्या जुइ । अथे हे इलं लाःसा हारती व शान्तिपुरीइ आदि थासय् नं जुइ ।

१३] पुलुं भुनेगु गुठी

भलभल अष्टी (आषाढशुक्ल अष्टमी) खुनु स्वयम्भू महाचैत्यया चकुलि चव्य त्रयोदश चक्रावली छचालं पुलुं भुनेगु ज्या जुइ । थ्व पुलुं भुनागु स्वलातक तयाः कूछिम्बय् आश्विनशुक्ल अष्टमीखुनु लिकाय्गु ज्या जुइ । थुकिया लागी अलग्ग गुठी दु ।

१४] माकःयात कःनि ह्वले गुठी

स्वयम्भू जंगलय् च्वं पि स्वयम्भूया आश्रय यानाच्वं पि स्थानीय माकःतय्गु लागी नं न्हि न्हि कःनि ह्वलेगु व्यवस्था यानातःगु दु । स्थानीय बुरापाकातय्गु धापूकथं न्हापा न्हापा न्हि स्वफा स्वफा दरं कःनि ह्वलेगु यानातःगु दु धाइ । लिपा जूलिसे हप्ताय् स्वफा जक कःनि ह्वलेगु यात, अथे नं मफयाः लय् स्वफा तकं जुयावन । थ्व गुठी गुरुपञ्चमी श्रीपञ्चमीखुनुनिसे आरम्भ जुइ । थुपि माकःतय्गु वारय् नं थथे धयातःगु दु- मञ्जुश्री पर्वस्थानया माकःतय्सं मञ्जुश्री व गोपुच्छाग्रचैत्यया सेवा याइ । स्वयम्भू महाचैत्यया चाकलय् च्वं पि माकःतय्सं स्वयम्भू व हारतीया सेवा यानाच्वनी । थ्व स्वयम्भूया चाकलय् च्वं पि माकःत नं तँतले व क्वतलेया भेदं निगू स्थानया माकः विभाजन यानातल । थुपि च्वय्यापि ववय् वय् मदु, क्वय्यापि च्वय् वने मज्यु । छुं जुयाः वन धाःसा वं वयात लिनायंकी । थुपि माकःत स्वयम्भूया धर्मपाल हारतीमांया अप्रत्यक्ष दूत धकाः मानय् यानातःगु दु । उकिं गुबले गुबले थुपि माकःतय्सं विचित्र घटना क्वनाच्वनी धयातल ।

१५] स्वयम्भू व हारतीयात भुजा छाय् गुठी

स्वयम्भू भगवान् यात व हारतीमाजुयात न्हि न्हि सुथय् सुथय् विधिपूर्वक शुचिनीचि यानाः भुजा छाय्गु चलन दु । स्वयम्भूस स्वांयापुन्हीखुनु भुजा छाय्गु नं गुठी दु ।

१६] ताडन आसँकि काय्गु थिति

यल बुँगद्यःया इहीभू (चैत्रकृष्ण चतुर्दशी) खुनु बुँगया भायोजु पाँजुतय्सं थःगु विधि अनुसारं पूजा सामग्री ज्वनाः स्वयम्भूया नमसिकौशि लिकच्वंगु योगाम्बर स्थानय् ताडन आसँकि काय्गु विधि जुइ ।

१७] फय्प्वाः तिइगु विधि

यल बुँगद्यःयात नैकयालं लुइन्ह्यो वउ विइत स्वयम्भू वायुपुर फसखाद्यःयाथाय् विधि अनुसार पूजा यानाः फय्प्वाः तिइगु ज्या जुइ ।

१८] दे आचार्य गुठी

फाल्गुणकृष्ण अष्टमीखुनु कान्तिपुर महानगरया सम्पूर्ण गुरु वज्राचार्यपि च्वनाः श्रीस्वयम्भू महाचैत्यया अग्रय् नं शान्तिपुरीइ विधिपूर्वक पूजा यानाःलि उपस्थित सकल गुरु वज्राचार्यपित दान प्रदान व भोजन नकेगु ज्या जुइ ।

१९] अनन्तपुर प्रतापपुर प्रवेश

गुबलय् स्वयम्भूइ सखाःपा याइ अथवा स्वयम्भूया गुरुजुपिनि थपात्वय्गु ज्या जुइ, गुबलय् अनावृष्टिया कारणं शान्तिपुरीइ पूजा जुइ उगु बेलाय् नं थनं दुहांवनेगु ज्या जुइ । थन किनिदय् छकः दुहांवनेगु नं गुठी दु ।

२०] स्वयम्भू भगवान् भुइख्यलय् बिज्याकेगु

द्वादशवर्षीय सम्यक् महादान गुठी न्याय्किइबलय् अथवा सुं श्रद्धालु महोदय दातापिनिगु-पाखे भुइख्यलय् सम्यक् न्याय्किइबलय् नं वसपोल श्रीस्वयम्भू भगवान्या जात्रा यानाः भुइख्यलय्

बिज्याकी । ध्व दिन खः पौष मसान्त मकरसंक्रान्ति न्ह्यरुखुनु, अनंलि घ्यःचाकु संलू न्हिचिछ
भुइख्यल्य बिज्याकाःलि बहनी किलागलया छःछेय् तयाः वयां सतिखुनु स्वयम्भूइसंतुं लितय्गु ज्या
जुइ ।

२१] नरांखुनु स्वयम्भू भगवान् दानशालाय् बिज्याकी

गुबलय् कान्तिपुर महानगरय् सुं श्रद्धालु महोदय दातापिनिगु छेय् पञ्जरां नरां न्याय्की उबलय्
स्वयम्भू भगवान्या जात्रा यानाः उगु दानशालाय् बिज्याकेगु चलन दु ।

२२] न्हाय्कं-क्वाति त्वंकेगु गुठी

पौषशुक्ल पञ्चमीखुनु हारतीथाय् पूजा यानाः न्हाय्कं-क्वाति दय्काः त्वनेगु विशेष प्रकारया
छगू गुठी चल्य् याय्माःगु थिति दु ।

२३] सायात छ्व नकेगु गुठी

सिंहसंक्रान्ति भाद्र १ गतेखुनु स्वयम्भू जंगलय् च्वंहा तःधिकःहा अक्षोभ्य बुद्धया न्होनेच्वंगु
मण्डःपायाथाय् छ्व ह्वलाः सायात नकेमाःगु छगू प्रथा दु । थुखुनु स्वयम्भूइ वव्य् सातय्गु जमघट
जुयाच्वनी ।

२४] न्हय्सः साय्मितय्गु गुठी

फागुपुन्ही धुनेवं वइगु बुधवारखुनु काठमाण्डू निवासी मानन्धर समाज न्हय्सः साय्मितय्
स्वयम्भू, हारती व मञ्जुश्रीया पूजा यानाः छगू गुठी न्याय्किइगु थिति दु ।

२५] ओँला च्वंवइगु थिति

श्रीघःपुन्ही (कतिपुन्ही) खुनु येँय् च्वंपि किसानीतय् थःगु जात कर्म संस्कार परिशुद्ध निम्ति स्वयम्भूइ चच्छि न्हिच्छि च्वनाः निराहारं अहोरात्रव्रत च्वनी । थुलि कर्म याय् धुंकूह्य किसानी व्रतबन्ध यानागु तुल्य जुइ । स्वयम्भू स्थानय् ओँला च्वने धुंकूपि किसानी हानं व्रतबन्ध याय्गु आवश्यक मदु । थुपि ओँला च्वनाः स्वदँ दय्वं स्वयम्भूयात पताः छ्याःवय्माः धाइ ।

२६] महादी च्याकेगु गुठी

खास यानाः श्रीघःपुन्ही (कतिपुन्ही) खुनु थःथःपिनिगु गुठीपाखे व अथवा थःगु स्वेच्छानुसारं नं स्वयम्भूया अग्रय् च्वनाः महादीप च्याकाः भक्तिभाव यानाच्वनी । अथवा गुगुं तत धंगु पर्वदिनयात लुमंकाः नं महादीप च्याकःवइपि मदुगु मखु । अज्ज थौंयागु दिनय् महादी जक मखु ग्वदारमत, चाकःमत, पाल्चालत व घ्यःदिवा आदि च्याकाः दीपदान उत्सव जुयाच्वनी ।

२७] सख्वाःपा यायगु चलन

खतु स्वयम्भूया गुठीकथं कतिपुन्ही श्रीघःपुन्हीखुनु स्वयम्भू महाचैत्य व अनच्चंगु चीबाहाः चीबाहाः पत्तिकं सुधालेपन विधि अनुसार सख्वाःपा याइ । हानं गुलि श्रद्धालु दातापिसं थःह्यं भाकल यानागु दिनय् सख्वाःपाया विधिविधानुसार तःधंक उत्सव यानाः आपालं धन खर्च यानाः नं सख्वाःपा याइपि दु । थ्व असाधारण विधिया सख्वाःपा क्रिया खः । साधारण विधिया सख्वाःपा प्रत्येक वर्ष आश्विन पूर्णिमाखुनु सख्वाःपा जुयाच्वनी । थुखुनु गुबले गुबले असाधारण विधिकथं नं सख्वाःपा क्रिया जू । तर तिब्बती लामातय्सं याइगु सख्वाःपा व नेपाःमि बौद्धतय्सं याइगु सख्वाःपाया चलन आपालं फरक खनेदु ।

२८] पताः छाय् गुठी

अहोरात्रव्रत ओँला च्वनाः स्वदँ लिपा ओँला साङ्गि जूगु उपलक्षय् श्रीस्वयम्भू महाचैत्यय् कापताः व्वय्की । हानं सुं श्रद्धालु दातापिनिगुपाखे स्वयम्भूया उष्णीष चूडामणि निसे व्वय्

३१८ त्वाथः थ्यंक नं थः शक्ति अनुसारं १००० द्वःछिकु ५०० न्यासःकु हाकःया प्रमाणं विस्तार यानाः पताः छाःवइपि नं मदुगु मखु । गुलिसिनं स्वयम्भू महाचैत्य छचालं लिबि कलडर किङ्किनी जाल सहित यासे शोभायमान जुइक तानवितान छाःपिइपि नं दु ।

२६] पञ्चबुद्धया भुतिमालि ब्वय्केगु गुठी

आश्विनशुक्ल पूर्णिमाखुनु भुतिमालिइ पञ्चबुद्ध (वैरोचन, अक्षोभ्य, रत्नसम्भव, अमिताभ व अमोघसिद्धि) चित्र अंकित यानाः स्वयम्भूइ च्वनाः भुतिमालि ब्वय्केगु नं विशेष प्रकारया थिति दु । थौं थ्व थिति लोप जूगु खनेदु ।

३०] गुंला धर्म सेवा

श्रावणशुक्ल प्रतिपदाखुनुनिसें श्रावणकृष्ण औंसि तक लच्छि स्वयम्भूइ विविध प्रकारं श्रीस्वयम्भू महाचैत्यया सेवा भावभक्तिया रूप्य पूजा, पाठ, स्तोत्र यानाः धारणी मन्त्र ब्वनाः, न्यकू पुयाः प्रदक्षिणा याइपि नं दु । लिस्सें गुंलावाजं थानाः गुंलासेवा याःवइपि नं मदुगु मखु । थ्व गुंला लच्छि तापाक तापाकनिसें छन्हु हे त्वःमफिइक नसंचा इलय् च्के वइपि भक्तजनपि हूलमूल जुयाच्चनी ।

३१] गुंला धर्म प्रारम्भ

गुंला धर्म प्रारम्भ जुइवं स्वयम्भूइ निम्नप्रकारं धर्मकर्म सेवा भावभक्ति प्रस्तुत जुयाच्चनी—

- १) लँज्या धकाः थाय् थासय् कठिपुठि कारपात चिइकाः लँ भिकेगु अभियान जुयाच्चनी ।
- २) सद्धर्म ग्रन्थ पठन पाठ जुयाच्चनी ।
- ३) धर्मोपदेश व्याख्यान जुयाच्चनी ।
- ४) गुंलावाजाया सुमधुर घोषं स्यंगु जंगल गुञ्जायमान जुयाच्चनी ।
- ५) शृङ्गभेरी न्यकू पुयाः स्वयम्भूगः प्रदक्षिणा जुयाच्चनी ।
- ६) नामसंगीति, तुतः ब्वनाः स्वयम्भू चाःहुलाच्चपि नं खनेदइच्चनी ।
- ७) गुलि सौन धारण यानाः जापमाला हिइकाः प्रदक्षिणा यानाच्चनी ।

- ८) गुलिसिनं माणे हिइकाः प्रदक्षिणा यानाच्चनी ।
- ९) गुलिसिनं ब्रत उपासना अवसं, यो अवसं, माय् अवसं च्वनाः स्वयम्भूया सेवा यानाच्चनी ।
- १०) गुलि लामा लामाजुपिसं नं गुम्बा गुम्बाय् च्वनाः इमि थःगु तालं धर्म यानाच्चंगु सः ताय्दयाच्चनी ।
- ११) गुलिसिनं दिवङ्गत आत्माप्रति शान्ति कामना यासे दस्तुर बियाः शृङ्गभेरी न्यक् पुइकाः स्वयम्भू प्रदक्षिणा याकःवइपि नं दु ।
- १२) गुलिसिनं ल्हापिन्पां द्वहलपी, गुलि पताः छाःवःपि, गुलि निसलाः छाःवःपि, गुलि तोङ्छापूजा ताराधर्म याकःवःपि, गुलि छाहाय्कःवःपि, गुलि दुःखी दरिद्र याचकपित दानदातव्य याःवःपि, गुलि आर्यसंघ भिक्षु, गुरु वज्राचार्य, लामाजु भिक्षुजु आदिपित दान दक्षिणा बियाः भोजन याकिइपि, गुलि स्वयम्भूइ च्वंपि कंगःपंक्षि व माकःतय्त अन्न वृही आदि ह्वलिइपि नं खनेदइ । गुलिसिनं लः छाय्गु धकाः लखछि प्रमाणं पूजनीय वस्तु चह्य् याःवइपि नं दइच्चनिइगु जुल ।
- १३) गुलि पञ्च-प्रणाम व अष्टाङ्ग-प्रणाम यानाः ह्यधू दानाः दण्डवत प्रणाम यायां स्वयम्भू गःचाःहुलाच्चनिइपि नं दइ ।
- १४) ज्ञानमाला भजन, दाफा भजन याइपि नं दयाच्चनी ।

३२] गुंलाया नुफ्यने चलन

स्वयम्भूइ गुंलासेवा वयाच्चंपि श्रद्धालु भक्तजनपिसं थःगु गच्छे अनुसारं शान्तिपुरया छ्चालं च्वनाः लगः धगः धाला थाःपि स्वनाः मोहनी फयाः सगुन धौपति ब्वयाः यथाविधि थे पूजा यानाः नुफ्यनेगु ज्या जुइ । छगू किसिमं वज्रयानयागु कांकि प्रदर्शनी थे जुयाच्चनी । थ्व दिन खः भाद्रशुक्ल प्रतिपदा ।

३३] निसलाः छाय्गु

खतु थ्व निसलाः छाय्गु चलन विविध पर्व उत्सव पत्तिकं धया थे भक्तजनपिसं स्वयम्भू भगवान्यात चह्य् याय् हइ । खास यानाः गुलां लच्छियं स्वयम्भूइ गुंलाबाजं थानाः न्हित्थं छे के वयाच्चंपि त्वाःत्वाः बाहाःबाहाःया बाजंखलःतय्गुपाखे विशेष सजधजसाथ स्वयम्भू भगवान् अग्रय् निसलाः किभु ब्वय्गु ज्या जुइ । हारतीयात सहाय् ज्वलं तयाः पूजा याइ, अथे हे शान्तिपुरीइ

वनाः लपिचा तथाः मोहनीसिंहः फयाः पूजा याइ, प्रसाद ग्रहण याइ । श्व दिन नं नुपयनेखुनुसंतुं जुइ ।

३४] मत्याःयाद्येके वइगु

श्रावणकृष्ण द्वितीया (दथुसाया) खुनु यलयत्त मत्याः (दीपजात्रा) वनिइपिं सकले धया थे मत्याः धुंकाः जुगो लाकाः स्वयम्भूइ द्येके वयाच्चनी ।

३५] दमखिं थाःवइगु थिति

दथुसाया मत्याःखुनु यलदेया प्रसिद्ध बाजा नवबाजा दमखिं न्यकू पुधा बाजा वडो सजधजसाथ यलय् त्वाःत्वाःया दबुलिइ वनाः थाःवनी । श्वयां छन्हु निन्हु लिपा दमखिं खलःत थःगु अनुकूल ई मिलय् यानाः श्रीस्वयम्भू महाचैत्यया अग्रय् न्यकबाजा सहित दमखिं बाजा थाःवनेगु यानाच्चंगु दु ।

३६] येँया पञ्जरां जूगो

श्रावणकृष्ण त्रयोदशी (कलीयुगोदय) दिनय् श्रीस्वयम्भू महाचैत्यया छ्वालं स्यंगुया बुद्धाचार्य व अन्य शाक्यभिक्षु, वज्राचार्य, चैलक, ब्रह्मचर्यभिक्षु आदिपिं च्वनाः दान कयाच्चनी । अले थुमित स्वयम्भूइ द्येके वइपिं श्रद्धालु उपासक, उपासिका आदिपिसं थःथःगु त्यागशील अनुसारं दान वियाच्चनाच्चनी । दान कयाच्चपिं बौद्धसंघपिं श्वःचा श्वःचा मुनाः न्ह्याइपुसे च्वंक मधुर घोषं दानगाथा व्वनाच्चंगु सः ताय्दइच्चनी । थन धकि व रुमाल गा लायातःगु मानो वसाः लायातःगु थे पंक्तिवद्ध जुयाच्चंगु खनेदइ ।

३७] गुंला धर्म समाप्ति

स्वयम्भूइ लच्छियंकं थःथःगु मनोवाञ्छानुसार गुह्यसिनं गुगु धर्मकर्म यात उगु पुण्यकार्य निर्विघ्नपूर्वक सिधय्कूगु लस्ताय् भाद्रशुक्ल प्रतिपदा (गुंला पारु) खुनु विशेष प्रकारया पूजोपचार

चह्य याइ । लिस्सें थुखुनु नुपयनेगु धकाः शान्तिपुरीइ लँपिचा तथाः पूजा यानाः नुपयनाः भव्यं नइ । भव्य-भी नय् धुंकाः थःथःपिसं ज्वनावःगु वाद्यवादन थासे श्रीस्वयम्भू महाचैत्य प्रदक्षिणा यानाः बिदावादी कयाः क्वहां वइ । उगु नृत्य, गीत, वाद्यवादन सम्मिलित यानाः बडो आनन्दपूर्वक उल्लास उमंगसाथ स्वयम्भू तँनं क्वहांवयाच्चंगु दृश्य खनिइवल्य् मानो पर्वतं लःया करना क्वहांवयाच्चंगु थें बडो रमणीय दृश्य खंगु थें न्ह्याइपुसे च्वंच्वनी । लिस्सें नेपाःमि बौद्धतय्गु संस्कृति प्रवाह जुयाः न्ह्यानाच्चंगु छगू प्रकारया काँकि प्रदर्शनी जुयाच्चंगु थें खनाच्च्वनी ।

३८] यंला सेवा

भाद्रवशुक्ल अष्टमीनिसें आश्विनशुक्ल अष्टमी तक लच्छि खास यानाः रत्नपीठय् विराजमान जुयाच्चंहा वसपोल श्रीहारतीमाजुया थासय् व उखे महासम्बरादि गुह्य क्रोधगण देवतापि विज्याना-च्चंगु सिद्धगुहा शान्तिपुरी व अन्य वसुपुर, वायुपुर, अग्निपुर, अनन्तपुर, प्रतापपुरय् सेवा भक्ति याय्गु ज्या जुइ ।

३९] कातिसेवा

स्वयम्भू धर्मधातु वागीश्वर स्थानय् कातिसेवा वनेगु धकाः कतिपुन्हीखुनुनिसें आरम्भ यानाः सकिमनापुन्हीतक लच्छि सुथसिया नसंचा इलंनिसें दनावनाः सक्क फक्क त्तोत्र, पाठ पूजा व प्रदक्षिणा आदि यानाः स्वयम्भू, मञ्जुश्री, पुलां स्यंगु व शान्तिपुरी, हारतीया सेवा यानाच्च्वनी । थुगु कातिसेवा निम्ति ब्रह्ममुहूर्तय् स्वयम्भूइ थ्यंकेमाःगु जूया निम्ति खास यानाः यलया स्वंगू स्थानया तुतःखलः- उकुवाहाः, बूवाहाः, क्वाःवाहाः इलन्ह्यापि चान्हसिया २॥ अथवा ३ बजे यलं प्रस्थान जुइ धुंकी । थुगुकथं लच्छिया सेवा यानाः पूर्ण जुइखुनु थुमिसं स्वयम्भू भगवान्या न्ह्योने व मञ्जुश्रीया अग्रय् च्वनाः हलिमलिया रंग ल्ययाः ल्ययाः दिव्यभावनाया शुभप्रतीकत-पलेस्वां, चन्द्रहास खड्ग, पुर्णकलश एवं विश्ववज्र आदि विविध माङ्गलिक वस्तुयागु थःगु हे तालगु छगू किसिमया चित्रकला प्रदर्शनी धया थें न्ह्योने ब्वयाः तुतःखलःतय्सं तुतः ब्वनी । तुतः ब्वने सिधय्काः व हे हलिमलि प्रसादया रूपय् वितरण जुइ ।

४०] वसन्त सेवा

माघशुक्ल पञ्चमी श्रीपञ्चमीखुनुनिसें लुखुँ चःह्य (पासाचःह्य) चैत्रकृष्ण चतुर्दशीतक

स्वलाया दुने स्वयम्भू स्थित गुरु वागीश्वर मञ्जुश्री पर्वस्थानय् सरस्वतीपूजा धकाः ससुपूजा न्याय्कःवइपि विद्यानुरागो भक्तजनपि वयाचवतो । लिस्से बाद्यवादनया शूर तालय् नृत्यगीत यानाः अनेक किसिमं रसरंग यानाः वसन्त उत्सव यानाः भव्य न्याय्कःवइपि नं उलिथुलि मदु ।

४१] पिन्पाँ (पिण्डपात्र) द्वहलपेगु

स्वयम्भू अमिताभ बुद्ध आदि पञ्चबुद्धयात ल्हापिन्पाँ (ल्हातिइ च्वंगु पिण्डपात्र) थंवइपि दु । थुगु पिण्डपात्रया लिसे लिसे आपालं पुण्य लाभ याय्गु इच्छा यानाः २१ गः, १०८ गः, १००० गः आदि संख्या वृद्धि यानाः पिण्डपात्र थनिइपि मदुगु मखु । थ्व पिन्पाँ गुलि ग्वःगः थन उलि हे प्रमाणं जलपात्र (तिं) घ्यःदिवा (छोकुं) व सत्वगोजा (तोर्मा) द्यकाः सहस्रावर्त्त पूजा याइपि नं दु । थ्व पिण्डपात्र भक्तजनपिनि छगू छगू उद्देश्य तथाः न्ह्याबले चह्लय् याय्फु । अथे नं अष्टमी, पुन्ही, संलू तथा विशेष पर्वदिनय् पिन्पाँ द्वहलपेगु अप्रमेय पुण्य दु धकाः प्रशंसा यानातल ।

४२] छाहाय्केगु चलन

स्वयम्भू संरक्षिका धर्मपाल स्वरूपं च्वनाच्वंहा वज्रयक्षिणी हारतीदेवीयाथाय् विविध भक्तजनपिसं थःपिनिगु मनोवाञ्छा पूर्ति निम्ति भाकल यानाः छाहाय्कःवइपि नं कम मजू । थ्व दिन भक्तजनपिनिगु अनुकूलय् निर्भर जुइ ।

४३] तोङ्खापूजा (सहस्रावर्त्त पूजा)

अष्टमी, पुन्ही, संलू एवं युगोदय दिनय् श्रद्धालु भक्तजनपिसं छगू छगू पवित्र उद्देश्यकथं स्वयम्भूया सन्मुखय् द्वःछि द्वःछि ल्याखं पिण्डपात्र, जलपात्र, सत्व तथा दीपमालिका (घ्यःदिवा) च्याकाः कलश स्थापना यानाः धर्मधातु वागीश्वर श्रीस्वयम्भूया पूजा या वइपि नं खनेदु । गुलिसियां गुठी हे तथातःगु नं दु ।

४४] चतुर्गु गोदयया सेवा

श्रीस्वयम्भू महाचैत्य विराजमान जुयाच्चंगु स्वयम्भू पर्वत प्यंगू युगया भेदं युग उदय जूगु शुभमुहूर्तय् प्यंगू हे नामकरण जूगु दु :-

- १) सत्ययुगोदय- कार्तिकशुक्ल नवमीखुनु स्वयम्भू पर्वत "पद्मगिरि" नामं विख्यात जुल ।
- २) त्रेतायुगोदय- माघशुक्ल पूर्णिमाखुनु स्वयम्भू पर्वत "वज्रकूट पर्वत" धकाः प्रसिद्ध जुल ।
- ३) द्वापरयुगोदय- बैशाखशुक्ल तृतीयाखुनु स्वयम्भू पर्वत 'गोशृङ्ग पर्वत' नामं प्रख्यात जुल ।
- ४) कलियुगोदय- श्रावणकृष्ण त्रयोदशीखुनु स्वयम्भू पर्वत 'साह्येगु' गोपुच्छ पर्वत धइगु नामं चलय् जूगु जुल ।

थ्व हे दिनयात कयाः श्रद्धालु भक्तजनपिसं स्वयम्भूइ गुलिसिनं सहस्रावर्त पूजा याइ, गुलिसिनं महादी च्याकाः उत्सव याइ, गुलिसिनं यज्ञयागादि यानाः पाठ स्तोत्र धारणी ब्वनी, गुलिसिनं पञ्च-प्रणाम, अष्ट-प्रणाम आदि यानाः दण्डवत यायां स्वयम्भू चाःहुली, गुलिसिनं विशेष प्रकारं भजन कीर्तन यानाः पुण्य आर्जन याइ, इत्यादि प्रकारं सद्धर्मकार्य हनाः उखुनुया दिन सार्थक याइगु जुल ।

४५] बुसाधं गुठी

श्रीस्वयम्भू महाचैत्य सेवार्थं गुलि नं श्रद्धालु दातापिसं स्थापत्यकला (बाहाः बही, देगः चीबाहाः आगंछे, द्योछे) व मूर्तिकला शान्त क्रोधया अनेक देवदेवतापिनिगु मूर्तित स्थापना यानाः धर्मकीर्ति तयावन उकियागु संस्मरणकथं परिशुद्ध निम्ति यज्ञयागादि होम यानाः बुसाधं याःवइपि नं गुबले गुबले उख्ये थुख्ये खनेदयाच्चनी । थ्व थ्व हे दिनय् जुइ धकाः धाय्मफु, थःथःपिनिगु धर्मकीर्ति दत्त प्रस्थापन जूगु दिन घात पर्वयात लुमंकाः बुसाधं याःवयाच्चनी ।

४६] बहः पलेस्वां छाय्गु गुठी

फाल्गुणकृष्ण प्रतिपदाखुनु येँया चित्रकारी समाजं श्रीस्वयम्भू भगवान्, पञ्चबुद्ध व हारतीयात बहःया पलेस्वा अले मञ्जुश्रीयात किंकिपा द्वहलपेगु यानावइच्चंगु दु ।

४७] पञ्चबुद्धयात तिसां तिइके गुठी

गुंलाधर्म प्रारम्भ जुइ न्ह्यो श्रीस्वयम्भू-वैरोचन, अक्षोभ्य, रत्नसम्भव, अमिताभ, अमोघसिद्धि तथागतयात विशेष प्रकारं तिसां तिइकेगु व्यवस्था यानातःगु । थ्व ज्या स्यंगुया द्यःपाःलाः बुद्धाचार्यपि च्वनाः छायेपेगु ज्या जुइ ।

४८] ख्यचाय्के गुठी (नित्यपूजा)

स्वयम्भू अमिताभ बुद्धयाथाय् स्वयम्भूया द्यःपाःलानं न्हित्थं नियमानुसार विधिविधान यानाः स्नान याकाः देव ख्यचाय्काः विविध उपचार सहित यानाः पूजा याइ । अमिताभ बुद्धयाथाय् पूजा याय् धुनेवं पञ्चबुद्ध, पञ्चतारा व पञ्चपुरी आदि स्थानय् सुप्रभातं स्तोत्र आदि ब्वनाः स्वयम्भूया छचालं च्वंपि विविध देवतापित नित्यपूजाया क्रमय् पूजा याइ । लिस्सें स्वयम्भू व हारतीयात भुजा छायेगु नं ज्या जुइ । थ्व हे नित्यपूजाया सन्दर्भय् बहनी आर्यनामसंगीति व तुतः ब्वनाः दीपदान बिइगु ज्या जुइ । छुं पर्वदिनय् स्वयम्भू परिवारं भजन नं याइ ।

४९] बाहाःपूजाय् न्हापालाक शुरु

काठमाण्डू सहरय् गुलि नं बौद्धविहार- बाहाः, बहो, कच्चाबाहाः दइच्चन उपि ब्याक्कभनं येँय् बाहाःपूजा न्याय्किइबलय् सर्वप्रथम श्रीस्वयम्भू महाचैत्य स्थाननिसें शुभारम्भ याइगु जुयाच्चन । थ्व येँय् च्वंपि बौद्धतय्गु न्हापांनिसें यागु परम्परागत चलन खः । थ्व दिन छुं निश्चित मद्दु, गुबलय् बाहाःपूजा न्याय्कल उबलय् जक जुइगु जुल ।

५०] ज्ञानमाला भजन

ज्ञानमाला भजन खलःतय्सं न्हियान्हित्थं सुथय् सुथय् स्वयम्भूया भजन फलेचाय् च्वनाः हारमोनियम तबलाया शूरय् भजन कीर्तन यानाः स्वयम्भूया सेवा यानावइच्चन ।

५१] ओँलाया द्ये के वइगु चलन

यलदेसय् सुनां गुह्यसिनं न्हूगु चीवाहाः दय्काः प्रतिष्ठा याइ इमिसं उगु चीवाहाः प्रतिष्ठा यानाया उपलक्षय् यलदेया सम्पूर्ण चीवाहाः पत्तिकं कत्तिपुन्हीखुनु धःधःपा (बुद्ध धर्म संघ) धइगु वाजा थानाः ओँला वनी । व ओँला वक्व सकले धया थे कत्तिपुन्ही धुनेवं वइगु बुधवार चूलाकाः वसपोल चैत्यकुलनायक श्रीस्वयम्भू महाचैत्ययात भाग थ्याके निम्ति ओँला वःपि भक्तजनत सकले धया थे द्ये के वइगु चलन दु ।

५२] स्वांयापुन्ही (बुद्धजयन्ती)

शान्तिनायक शाक्यमुनि बुद्ध जन्म जूगु, बोधिज्ञान प्राप्त यानाबिज्याःगु लिस्से महापरिनिर्वाण समेत जूगु त्रिमहापर्व चूलाःगु पवित्र स्मृतिकथं बैशाखपुन्हीखुनु स्वयम्भू विकास मण्डलयागु ग्वसाःकथं श्रीस्वयम्भू पञ्चबुद्धयात न्याहा गुरुजुपिसं मुखलं पुयाः आचार्य पोशाकं पुनाः भव्य रूपं स्वागत सत्कार यानाः षोडशलास्या कयाः गुरुजु-प्याखं हुलाः पूजा याइ । लिस्से भन्तेपिनिगु पाखे शील प्रदान व धर्म देशना एवं लामाजुपिसं तिब्बती महायान धंगं पूजा यानाः श्रीस्वयम्भू महाचैत्य प्रदक्षिणा याइ । प्रहर प्रहरय् ज्ञानमाला भजन जुइ । हानं हारतीयो लिउने चैत्यपार्कपाखे बौद्धकला, बौद्धचित्र एवं बौद्धकृतियगु नं प्रदर्शनी जुयाचवनी । बहनी धुमधाम नक्सां दीपावली जुइ ।

५३] ज्याःपुन्ही (ज्येष्ठ पूर्णिमा)

स्वयम्भूया चाकलय् च्वंगु गुम्बा गुम्बाय् च्वनाः धर्मचर्या यानाः दिन हनाच्वंपि घेलुङ (भिक्षु) द्येसे (विद्वान्) लोप्वेन् (आचार्य) लामा (गुरु) तुल्कु (अवतारी) पिसं तिब्बती बुद्धधर्मया विश्वासकथं थौयागु दिनय् बुद्धया जन्मदि धकाः इमि थःगु धंगं बडो धुमधाम नक्सां कःकः धाय्क पूजा यानाचवनी । थुखुनु इमिगु छाँतं स्वागत सामग्री ज्वनाः श्रीस्वयम्भू महाचैत्य प्रदक्षिणा व पूजा याइ । थौया दिनय् हे नेपाःया परम्पराकथं विहार विहारय् जीगः विइगु धकाः हलिमलि दान विइगु नं ज्या जुइ ।

५४] न्हिसिवा कलःपूजा- मञ्जुश्रीस

विविध पूजोपकरण सहित यासे गुठी संस्थान पाखे खर्च हनाः गुरु वज्राचार्य मार्फत्

मञ्जुश्रीस पूजा याकाच्चंगु दु । थुगु पूजाय् गुरु वागीश्वर मञ्जुश्रीया वहःया पादुका ब्वयाःलि पूजारी गुरुजुं थःगु विधि अनुसार पूजा याइ, लिस्सें हारती व स्वयम्भू भगवान्या थासय् नं । थुगु न्हिसिवा कलःपूजापाखे गुरुपञ्चमी श्रीपञ्चमीखुनु मञ्जुश्रीया अग्रय् होमक्रिया नं जुइगु दु ।

५५] धर्किं प्यने गुठी

स्वयम्भूइ गुबलय् सखाःपा याइ उबलय् थःगु धंगं परम्परागत विधिकथं च्वइतःगु धर्किपाः (पर्दा) ब्वय्गु याइ । थुगु धर्किपाः छथाय् निथाय् जक ब्वयां मगाः, निम्नलिखित स्थानय् ब्वइगु जुल :-

१) पञ्चबुद्ध न्याहा	५	२) पञ्चतारा न्याहा	५
३) शान्तिपुरी	१	४) हारती	१
५) अनन्तपुर	१	६) प्रतापपुर	१

उक्त स्थानय् ब्वइगु धर्किपाः छगू हे किसिमं फुक्कय्सं समान रूपं च्वइगु मखु । थाय् विशेषं देवतापिनिगु गुण अनुसार उगु धर्किपाःया बुट्टाया अर्थ लक्षण व्यञ्जनया भाव विशुद्धि अलग अलग दु ।

५६] घण्टा घोषण याय्गु थिति

यलय् बुंगद्यः रथय् विज्याकेत स्वयम्भू योगाम्बर स्थान नमसिकौशिस साइतपो काःवय्माः । उखुनु चान्हय् विधिवत् थुगु थासय् च्वनाः रहस्याच्चर्चन पूजा जुइ । उगु बेलाय् शुद्ध वाचाइलय् थःगु हे धंगं घण्टा घोषण यानाः श्रीस्वयम्भू महाचैत्य प्रदक्षिणा याइ । तर थ्व घण्टा घोषण याइगु इलय् स्यंगुमितय्सं जूसां स्वय्गु अधिकार मदु । उबलय् स्यंगुया छचालं च्वंगु फुकभनं ऊयाःतकं तिना तय्माः धाइ ।

५७] पुन्ही सेवा

प्रत्येक पुन्ही पत्तिकं पुन्ही सेवा खलःतय्सं स्वयम्भूया अग्रय् शतसंख्यावर्त्त अथवा सहस्रावर्त्त पूजा जुइ । लिस्सें मञ्जुश्री व शान्तिपुरीइ एवं हारतीस यथाविधि थें पूजा याइ ।

५८] आरती गुठी

स्वयम्भूया न्होने तयातःगु धातुया १०८ प्वाः दिवा दइच्चंगु आरतीमत च्याकाःलि श्रीस्वयम्भू महाचैत्य पूजा यानाः गुठी न्याय्की । थ्व दिन खः कार्तिक पुन्ही ।

५९] न्हिसिवा कलः गुठी

येँदेया वज्राचार्यपिनिगुपाखेँ तयातःगु दिगाचार्य गुठीया गुठीहारतय्गु व्यवस्थाकथं श्रीस्वयम्भू महाचैत्यय् न्हि न्हि कलःपूजा वय्माःगु थिति दु ।

६०] महास्नान गुठी

श्रीस्वयम्भू महाचैत्य स्थानय् प्रतिस्थापित पञ्चतथागत, पञ्चतारा एवं गोपुच्छाग्रचैत्य, मञ्जुश्री, शान्तिपुरी व हारतीयात महास्नान विधिकर्मकथं स्नान याकेगु ज्या जुइ, लिसे लिसे मेमेगु प्रतिष्ठित मूर्ति व चैत्यतय् नं ।

६१] योसिँ बुसाधं गुठी

श्रीस्वयम्भू महाचैत्यया गर्भगृहया दुने तयातःगु मेरुदण्ड- यष्टिदारू-गर्भकाष्ठ प्रतिष्ठा याःगु दिनयात लुमंकाः उकियागु बुसाधं याय्गु ज्या जुइ ।

६२] फर्किवाता बुसाधं गुठी

स्वयम्भू महाचैत्यया दकल्य् सकल्य् च्वय् च्वंगु सर्वबुद्ध महामुकूट उष्णीष चूडामणियात स्थानीय भासं 'फर्किवाता' धाइगु जुयाच्वन । उगु 'फर्किवाता' प्रतिष्ठा याःगु दिनयात लुमंकाः परम्परागत विधि अनुसारं बुसाधं याइ । थ्व दिन जुल चैत्रशुक्ल नवमी ।

६३] पञ्चायन-पूजा

स्वयम्भूयात बाह्य रूपं पञ्चबुद्ध स्वरूपं पूजा याइ । व हे पञ्चबुद्धयात गुह्य रूपं पञ्चमहाबुद्ध रूप्य पूजा याइ, अथे हे अभ्यन्तर रूपं पञ्चबुद्धयात पञ्च सम्बरात्मककथं पूजा याइ । थुगु किसिमं पञ्चबुद्धयात बाह्य, गुह्य व अभ्यन्तर विधिविधानं पूजा याय्गु यात 'पञ्चायन-पूजा' धकाः धाय्गु यानावइच्चंगु जुल । थुगु पूजा न्हात्थाय् न्हाबले खनेदइगु मखु । अथे हे तन्त्रवज्रयानय् श्रद्धा भक्ति दुपि सुं श्रद्धालु भक्तजनपिसं गुरु वज्राचार्यपिनिगु निर्देशनकथं गुबले गुबले जक विशेष उत्सव सहित यानाः पूजा याइगु जुयाचवन ।

६४] सिईछाः-पूजा विधि

श्रीस्वयम्भू महाचैत्ययागु त्रयोदश भुवन व्याप्त जुइक सिईनं भुनेगु अथवा सिईयागु विशाल छत्रावली दय्काः चह्लय् याय्गु गुगु समारोह खः उकियात 'मयनच्छत्रारोहन विधि' धकाः धाइ । थुकियागु अलग विशेष प्रकारयागु विधिविधान दु । थ्व क्रिया न्हापा न्हापा जुयाच्वंगु दु । थुकियागु हे संस्मरणकथं अर्थात् संक्षिप्तीकरण रूप्य मतयाः, ओला (अहोरात्र), बाहाःपूजा जुइबलय् छत्र स्वरूप सिईस्वां दय्काः चह्लय् याय्गु यानावइच्चंगु धाइ । थ्व सिईछाःपूजा (मयनच्छत्रारोहन) विधिकर्म सर्वसाधारण भक्तजनपिसं सिर्तिमिति याय्फइगु मखु । थ्व छगू असाधारण प्रक्रिया खः ।

६५] प्यम्ह भगवान् बुद्ध सिइकःवइगु चलन

नेपाःया प्रसिद्ध प्यह्म भगवान् बुद्ध— आदिबुद्ध श्रीस्वयम्भू, नमःबुद्ध, खास्ति चीबाहाः व वदेगांया चीबाहाः थुपि मध्यय् सर्वश्रेष्ठ रूप्य मानय् यानावइच्चंगु श्रीस्वयम्भू महाचैत्य जुल । थुपि प्यह्म भगवान् सिइकः वइबलय् नं न्हापालाक थन हे ब्रत शुभारम्भ यानाः सेवा याइगु जुयाचवन । थ्व दिन नं श्रद्धालु दातापिनिगु अनुकूलकथं जुइ । तर सँदेया इतिहासकथं विचाः याय्बलय् 'छोर्तेन नाम्वासुम्' धकाः त्रिमहाचैत्य जक मानय् याइ, उकिइ वदेगांयाःगु नां दुथ्याःगु खनेमदु । गुगु वंशावलीइ वदेगांया चीबाहाः ल्याः मखासे चाय्बहीया धन्दोचीबाहाः कयातल, गुगु लिइ सक्क वज्रयोगिनीया गुंवाहाः चैत्ययात कयातल । थ्व स्वंगू सहरया थःथःपिनि स्थान विशेषं फरक खनेदु ।

६६] विभिन्न समयय् जुइगु लस्ताःपूजा

विभिन्न महानुभावपिसं थःगु दशाकुशल पाप मोचन अष्टमहाभयादि दुःख परित्राण, सप्त-
वृष्टि परिपूरण एवं नैर्वाणिक सम्पत्ति सम्बोधिज्ञान प्राप्ति हेतुं छगू न छगू मनोवाञ्छा पूर्ति
कामना यासे विभिन्न समयय् पर्वकाल उत्सवय् वसपोल श्रीस्वयम्भू महाचैत्य स्थानय् धर्मकर्म
याःवइपि नं मदुगु मखु । थ्व दिन उत्सव नं श्रद्धालु दातापिनिगु अनुकूलकथं जुइगु जुल । थुलि जक
मखु सुं परदेश गमनकालय् सकुशल लिथ्यंगु व आपालं धन द्रव्य रत्न लाभ जूगु व हानं सुं
गुह्यसिया व्रतबन्ध, चूडाकर्म, विवाह एवं दीक्षादि कर्म साङ्गि जूगु लस्ताय् नं अन्तय् थ्व हे नेपाल
प्रतिष्ठाता श्रीस्वयम्भूस अनेक माथं पूजा, पाठ, हवन यानाः अनेक प्रकारं धर्मकर्म यानाच्चंगु
खनेदइच्चनी ।

परिशिष्ट

इमरिजीप

स्वयम्भूस्थान नाप सम्बन्धित स्मरणीय तथ्यांक

युगभेदं स्वयम्भू पर्वतया नां

१. सत्ययुगय्	पद्मगिरि
२. त्रेतायुगय्	वज्रकूट पर्वत
३. द्वापरयुगय्	गोशृङ्ग पर्वत
४. कलियुगय्	गोपुच्छ पर्वत
५.	साह्येगुँ
६.	सिद्धगु
७.	शिद्धकुन्
८.	गोमशालगण्ड
९.	स्वामिगुँ
१०.	स्वयम्भू जंगल

कार्यकारणं स्वयम्भूया नाम संज्ञा हिलावंगु

१. स्वयम्भू
२. स्वयम्भू ज्योतिरूप

३. स्वयम्भू ज्योतिरूप आदिबुद्ध
४. पञ्चबुद्धात्मक स्वयम्भू ज्योतिरूप
५. स्वयम्भू ज्योतिरूप धर्मधातु वागीश्वर

स्वयम्भू स्थित विविध पुरया नां

- | | |
|----------------------------|-----------|
| १. शान्तिपुर ^१ | } पञ्चपुर |
| २. वसुपुर | |
| ३. अग्निपुर | |
| ४. नागपुर (बशिगाः) | |
| ५. वायुपुर | |
| ६. रत्नपुर (रत्नपीठ) | |
| ७. अनन्तपुर | |
| ८. प्रतापपुर (कवीन्द्रपुर) | |

स्वयम्भू स्थित षट् भैरव

१. पृथ्वी भैरव
- शान्तिपुरया दक्षिण पाखे ।

२. तेजसा भैरव (पाताल भैरव)

पर्वतया पूर्वपाखे ।

३. वायु भैरव

नैऋत्यकुतय् पाखे ।

४. आकाश भैरव

पश्चिम दिशापाखे ।

५. शून्य भैरव

पूर्व पाःया मध्यस्थानय् ।

६. असिताङ्ग भैरव

पूर्वपाखे उच्छीष्टवली स्थानय्

स्वयम्भू अन्तर्गत विहार

१. साह्ये गुँ विहार

२. शान्तिकर विहार

३. सिद्धगु बही (पारावत्त विहार)

४. गुरुरत्नरक्षित् विहार

५. किमाण्डोल विहार (किण्डोल विहार—
कीर्तन महाविहार)

६. आनन्दकुटी (श्रीलङ्का चैत्य विहार)

७. दीपङ्कर विहार (मार्मैसाङ्गये गुम्बा)

८. धर्मचक्र विहार

९. ध्यानकुटी

१०. मैत्रि विहार

११. महाकरुणा धर्मद्वीपविहार (थुग्छेन्छ्वेलिङ्ग
गुम्बा)

१२. तेजकीर्ति विहार

१३. जगतोद्धार महाविहार

१४. बोधिमण्डपसिद्धि विहार

१५. कर्मराज विहार

१६. निर्वाणस्मृति विहार (उपासिकाराम)

१७. धर्मकीर्ति मंगल विहार

स्वयम्भू दर्शन गमन पथ

१. पूर्वमार्ग

वज्रधातुया न्ह्योनेच्चंगु

२. दक्षिणमार्ग

वसुवन्धु चैत्यया न्ह्योनेच्चंगु

३. पश्चिममार्ग

मञ्जुश्री पर्वस्थानया न्ह्योनेच्चंगु

४. उत्तरमार्ग

आनन्दकुटीया न्ह्योनेच्चंगु

स्वयम्भूस्थानया आश्रम वेद

१. बही

२. विहार

३. द्योछे

४. आगंछे

५. गुम्बा

६. फले

७. सतः

८. धर्मशाला

९. आनन्दकुटी

१०. ध्यानकुटी

११. विद्यापीठ

१२. बौद्धछात्रावास

१३. उपासिकाराम

१४. गृहस्थाश्रम

स्वयम्भूया फले व सतः

१. सिंहः तिकेगु फलेचा सहित सतः निगू

तल्ला दइच्चंगु बिमांऊयाः तयातःगु ५ कवः

दइच्वंगु १ । पूर्वपाखे च्वंगु सतः ।

२. गुंलां न्यकूवाजा व्वइगु स्वकवः दुगु दक्षिण-
पाखे च्वंगु फलेचा ।

३. पूर्वपाखे च्वंगु भजनसतः न्यातँ न्याकवः दइ-
च्वंगु ।

४. पूर्वपाखे तँवय् च्वंगु लँया सिथय् लाःगु
स्वकवः दुगु फलेचा । ने. सं. १०६३ सालं
विनष्ट जुल ।

५. ससुतँया वातँनय् च्वंगु स्वकवः दुगु सतः ।

६. थ्वया न्ह्योनेच्वंगु दुनाच्वंगु वज्र प्लाष्टर
यानातःगु स्वकवः दुगु पाटी ।

७. मञ्जुश्रीया न्ह्योनेपाखे च्वंगु सिमन्ति प्लाष्टर
यानातःगु आधुनिक धंगया सतः भव्य रूपं
दय्कातःगु ।

८. मञ्जुश्रीया लिउनेपाखे च्वंगु सिमन्ति प्लाष्टर
यानातःगु सतः ।

९. शान्तिपुरया जःपाखे च्वंगु भग्नावशेष
फलेचा । नमसिंकौशिया लिकसं च्वंगु ।

१०. शान्तिपुरया खःपाखे च्वंगु न्याकवः दइच्वंगु
फलेचा ।

११. थ्वया लिकसं च्वंगु सिमन्ति प्लाष्टर याना-
तःगु पाटी ।

१२. शान्तिपुरया न्ह्योनेपाखे च्वंगु भग्नावशेष
फलेचा ।

१३. हारतीया खवय् च्वंगु सिमन्ति प्लाष्टर
यानातःगु स्वागत मण्डप फले ।

१४. भुइख्यलय् च्वंगु सम्यक् पाटी ।

१५. थन हे संतुं च्वंगु न्याकवः दुगु फलेचा ।

१६. थन हे टर्चाकी धारानापं च्वंगु स्वकवः दुगु
सिमन्ति प्लाष्टर पौवा ।

१७. मञ्जुसुलि वजारय् च्वंगु स्वकवः दुगु भजन
पाटी ।

१८. गःचाःहुलेबलय् उत्तरपाखे च्वंगु पौवा ।

१९. सूर्यमुखगणेश नापं च्वंगु पाटी ।

२०. गःचाःहुलेबलय् पूर्वपाखे लँया सिथय् च्वंगु
पाटी ।

स्वयम्भू गःचाःहुलेबलय् खनिइगु जलाश्रय
(पुखू, हिति, जःधुं, बुँगाः, खुसिचा)

१. बुर्बुदायमान तीर्थ

भचाखुसिया तगिनय् विजयस लिउने च्वंगु ।

२. आकाशगङ्गा तीर्थ

वसुपुरया क्वस्सं च्वंगु हिति ।

३. गोडावरी रत्नकुण्डली

किण्डोबुँया हिति ।

४. भगीरथी महापुण्य

इचंगु खुसिताया क्वस्सं ।

५. चन्द्रभागा खगानना

मसिंगाः

६. सूर्यभागा महामोक्ष

धिमेत्वहं वनेगु बुँस बुँगाः

७. योगधारा कुसुमाञ्जलि

तीर्थवाहिरी

८. ज्ञानधारा मोक्ष

ताईने बुँगाः

९. ज्ञानकुण्डल वसुन्धरा

स्वयम्भू गलय्

१०. योगधारा आकाशगङ्गा

खाउँबुँगाः

१ थुगु सतः ने. सं. १०९२ सालं पर्वत भासय् जुयाः विनष्ट जुल ।

११. योगकुण्डली

अजिमा पुखूया च्वस्सं च्वंगु पुखू ।

१२. भद्रवती नदी

अजिमा पुखू

१३. सिद्धधारा मन्त्रवती

विजेश्वरी क्वस्सं च्वंगु विष्णु ह्वंगु तीर्थ ।

१४. पलेस्वां पुखू

भुइख्यः पुखू ।

स्वयम्भू डाँडाया छ्वाःख्यरं च्वंगु मुख्य मुख्यगु ऐतिहासिक स्थानत

१. पूर्वपाखे— विजयेश्वरी, शोभा भगवती, राम-
डोलि (करवीरश्मशान) व विष्णुमतीया
दत्थुइ च्वंगु लँपु काठमाण्डू नगर प्रवेश
जुइगु आवागमन मार्ग । थ्वया लिक् स्वयम्भू
क्वस्सं भूमिखेल सम्यक् न्याय्केगु पवित्र
भूमि गन कि मञ्जुश्री गुरु नेपाःया सर्व-
प्रथम राजा घोषित यानाः धर्माकरयात
शुभराज्याभिषेक प्रदान याःगु स्थान । थ्व हे
भूमिखेल नापं नेपाःया थःगु परम्परानुसार
तन्त्रवज्रयान सम्बन्धी शिक्षा-दीक्षा विइगु
स्थान जगतोद्धार महाविहार दु ।

२. दक्षिणपाखे— किण्डोल विहार गन कि
तिब्बत प्रदेश हिमाली खण्डया महायानिक
बुद्धधर्म लामा धर्म चल्य जुयाच्चंगु स्थान
उकि थन न्यूनेब्रतया मुख्य देवता सहस्रभुज
लोकेश्वर द्वःछि मूर्ति स्थापना यानातइतल ।
थ्वयां भचा उज्यां छाउनी म्यूजियम (नेपाल
राष्ट्रिय संग्रहालय) नं स्थापना जुयाच्चंगु
दु ।

३. पश्चिमपाखे— इचंगु, आदेश्वर (विक्रमेश्वर

वीतराग) व भीम ढुंगा सीतापाईला वनेगु
छगू लँपु नं दु । थ्व हे लँपुपाखे चाःहुलाः
वय्वलय श्रीलङ्काचैत्य प्रस्थापना यानातःगु
आनन्दकुटी थ्यंकःवइ गन कि लङ्का बर्मा
पाखे न्ह्यांवःगु थेरवादी शासन (हीनयान)-
पिनिगु केन्द्रीय स्थल आनन्दकुटी विद्यापीठ
दइच्वन ।

४. उत्तरपाखे— जातमात्रोच्च पर्वत जामाःचो
गन कि विपश्ची तथागत बिज्यानाः अधिष्ठान
यानाथकूगु उकिइसं महायानिक दर्शनय्
धुरन्धर विद्वान जुयाच्चंगु माध्यमिकाचार्य
सिद्ध नागार्जुन बोधिसत्व आदि आपालं
आचार्यपि च्वनाः धर्म प्रचार यानाः योग
साधन यानावंगु विविध प्रकारया प्राकृतिक
गुफापाखे शोभायमान जुयाच्चंगु नागार्जुन
जंगल दु । थ्व हे जंगलया छ्वाःख्यरं छगू ति
छगू उमलाःगु जामा थे प्रसिद्ध वन जंगलं
चाःहुलाच्चंगु योगि सिद्ध विद्याधरपि वासं
च्वनावंगु पवित्र स्थान खः । थुगु नागार्जुन
जंगलया क्वस्सं अनेक थासं ल्वहंति नायाः
वयाच्चंगु आनन्ददायकगु सुन्दर उपवन ल्हुति
२२ धाः हिति अविरल गति निर्मल जल
हायाच्चंगु जलाश्रयं भर्य जुयाच्चंगु बालाजु
(जलशयन नारायणजु) निरन्तर गगन अव-
लोकन यानाच्चंगु भव्य सुन्दर मूर्ति दइच्चंगु
बालाजु उद्यानपाखे सुशोभित जुयाच्चन ।

स्वयम्भूस्थानयात रक्षक स्वरूपं प्रतिष्ठा यानातःपि रक्षक देवता

१. वज्रयक्षणी हारती

२. वज्रसाधु महाकाल गण

३. कालीमहानाग
४. षट् भैरव
५. गणेश
६. चतुर्महाराज
७. विरूपाक्ष
८. पवन भैरव

६. तिब्बती लिपि
७. कूटाक्षरी
८. देवनागरी लिपि
९. आङ्गल लिपि (अंग्रेजी)
१०. नाग लिपि (उर्दू गति लिपि)

स्वयम्भू स्थित अभिलेख भेद

१. शिलाभिलेख
२. ताम्रपत्राभिलेख
३. स्वर्णपत्राभिलेख
४. काष्ठपत्राभिलेख
५. लोहपत्राभिलेख
६. रूप्यपत्राभिलेख
७. नीलपत्राभिलेख
८. भित्तीचित्राभिलेख

शिलाभिलेख भेद

१. शिलापत्र
२. शिलास्तम्भ
३. शिलाखण्ड
४. शिलामूर्ति पादपीठ

थन हे दइच्चंगु लिपि भेद

१. पूर्व लिच्छवी लिपि (गुप्ताक्षर)
२. उत्तर लिच्छवी लिपि (कुटिलाक्षर)
(सिद्धमातृका लिपि)
३. रञ्जना लिपि
४. नेपालाखल (नेपाल भाषा लिपि)
५. चीन लिपि

थ्व लिपि शान्तिपुरीइ दुने जक सुरक्षित यानातःगु दु धाइ । थ्व लिपि शान्तिकराचार्यजुं नागराजपिनिगु नुगःचुया हि कयाः च्वयातःगु दु । थ्व सफू निभालय् पातकि जलवृष्टि जुइ धयातल ।

स्वयम्भूइ दइच्चंगु कलात्मक भेद

१. मूर्तिकला (देवदेवता)
२. स्थापत्यकला (वास्तुकला)
३. चित्रकला (भित्तीचित्र आदि)
४. लिपिकला (जातं जातया आखः)
५. संगीतकला (वाद्यवादन)
६. साहित्यकला (धर्मग्रन्थ)

स्वयम्भूइ च्वंगु स्थापत्यकला शैली

१. स्तूप शैली— स्वयम्भू
२. चैत्य शैली— चोबाहात
३. छत्र शैली— हारतीया देगः
४. गन्धकूट शैली— अनन्तपुर प्रतापपुर देगः
५. गुफा शैली— शान्तिपुर
६. पीठ शैली— अग्निपुर, नागपुर
७. तिब्बती शैली— गुम्बा
८. मुगल शैली— आनन्दकुटी
९. मण्डप शैली— विहार
१०. नेपाली शैली— ब्वाःपाःछे

स्वयम्भू स्थित समूह मूर्ति विभिन्न पक्ष

त्रिरत्नमूर्ति

१. बुद्धरत्न (आदिबुद्ध स्वयम्भू)
२. धर्मरत्न (प्रज्ञापारमिता)
३. संघरत्न (आर्यावलोकितेश्वर)

त्रिकुलनाथ

१. षडक्षरीलोकेश्वर
२. मञ्जुश्री
३. वज्रपाणि

त्रिआयुदेव

१. अपरिमिता तथागत
२. उष्णीष विजय
३. सप्तलोचनी तारा

त्रिविद्यादेव

१. मञ्जुश्री
२. गणेश
३. महाकाल

पञ्चबुद्ध

१. वैरोचन
२. अक्षोभ्य
३. रत्नसम्भव
४. अमिताभ
५. अमोघसिद्धि

सप्तबुद्ध प्रतिनिधि स्वरूप सप्त विशाल

बुद्धमूर्ति

१. विपश्ची
२. शिखी

३. विश्वभू
४. क्रकुच्छन्द
५. कनकमुनि
६. काश्यप
७. शाक्यमुनि

प्यह्य प्रसिद्ध नाथ

१. स्वयम्भूनाथ
२. पशुपतिनाथ
३. मत्स्येन्द्रनाथ
४. गोरखनाथ

प्यह्य प्रसिद्ध बुद्ध भगवान्

१. स्वयम्भू
२. खास्ति
३. नम्बुद्धा
४. बदेगांया चीबाहाः

गुलिसिनं चाय्वही धनदो चीबाहाः
अथवा सक्व खङ्गजोगिनोया चीबाहाःयात मानय्
यानातल ।

प्यह्य प्रसिद्ध जोगिनीया प्रधान उपासक

१. नैरात्मा गुह्येश्वरी- मञ्जुश्री
२. खङ्गजोगिनी- मणिचूड
३. वज्रयोगिनी- ओदियानाचार्य
४. विद्याधरी- वज्रपादाचार्य

स्वयम्भू स्थित विविध शैली चैत्यया प्रकारान्तर

१. स्वयम्भू महाचैत्य
२. गोपुच्छात्र चैत्य
३. मञ्जुश्रीस्मृति चैत्य

४. उष्णीष विजय धर्मभारंगत चैत्य

(वसुबन्धु चैत्य)

५. मंगलबहुद्वार चैत्य

६. धर्मधातु जिनालय चैत्य

७. वज्रधातु चैत्य

८. धर्मधातु चैत्य

९. दुर्गतिपरिशोधन चैत्य

१०. रत्न चैत्य

११. लयन चैत्य

१२. विम्ब चैत्य

१३. कूटागार चैत्य

१४. शिखरकूट चैत्य

१५. धान्यराश्याकृति चैत्य

१६. चतुर्व्यूह चैत्य

१७. रम्यकूटागार चैत्य

१८. घटकूट चैत्य

१९. पद्म चैत्य

२०. ज्वालावली चैत्य

२१. अष्टकोणाकृति चैत्य

२२. कूटागारोपरी सप्तपद्मासन चैत्य

२३. जलहयोरपरी पंचजिनालकृत चैत्य

२४. सुखावती चैत्य

२५. घण्टाकार चैत्य

२६. भुवलय (सुमेरु) चैत्य

२७. बोधि चैत्य

२८. श्रीलङ्का चैत्य

स्वयम्भू नाप सम्बन्धित ऐतिहासिक पवित्र
स्थल

चतुर्महाप्राकारभूत पर्वत

१. जामा:चो

२. धिनाचा

३. फूचो

४. सिफूचो

प्यंगू न्हुछेकाप

१. गोकर्ण न्हुछेकाप

२. आर्यघाट "

३. चोबाहार "

४. क्वदुवाल "

अष्ट वैतराग

१. मणिलिङ्गेश्वर- मणिचूदहः

२. गोकर्णेश्वर- गोकर्ण

३. कीलेश्वर- चाङ्गु

४. कुम्भेश्वर- क्वन्ति

५. गर्तेश्वर (गोपालेश्वर)- फर्पिङ

६. फणिकेश्वर शिखरनारायण "

७. गन्धेश्वर-चोबाहार

८. विक्रमेश्वर (आदेश्वर)

स्वयम्भू बातेनय् च्वं पि चतुर्महाराज

१. धृतराष्ट्र (वीणाराज)

२. विरूपाक्ष (खड्गाराज)

३. विरुद्धक (ध्वजाराज)

४. वैश्रवण (चैत्याराज)

स्वयम्भूया पिखाद्वारय् च्वं पि च्याह्य प्रसिद्ध
भिक्षुपि

१. शालिपुत्र

२. मौङ्गल्यायण

३. आनन्द

४. उपाली
५. राहुल
६. महाकाश्यप
७. सुभूति
८. सुभद्र

पिखाद्वार्य् अंकित अष्ट बोधिसत्त्वपिं

१. आर्यावलोकितेश्वर
२. मैत्रेय
३. गगनगञ्ज
४. समन्तभद्र
५. वज्रपाणि
६. मञ्जुश्री
७. सर्वनिवरण विष्कम्भो
८. क्षितिगर्भ
९. स्वर्गर्भ

स्वयम्भूस्थानया मूर्तित निम्नप्रकारं विभाजित जूगु खनेदु

१. गुरु
२. बुद्ध
३. बोधिसत्त्व
४. लोकेश्वर
५. तारा
६. गुह्यदेवता (सम्बर)
७. धर्मपाल
८. लोकपाल
९. क्षेत्रपाल
१०. सिद्ध
११. भिक्षु

१२. लामा
१३. राजा
१४. दानपति
१५. पूजादेवी
१६. महास्थवीर
१७. आचार्य
१८. वीरजन्तु (अलौकिक जन्तु)

स्वयम्भू स्थित त्रि-महाचैत्य

१. स्वयम्भू महाचैत्य
२. गोपुच्छाग्र चैत्य
३. मञ्जुश्रीस्मृति चैत्य

स्वयम्भूया न्होनेसं च्वंगु धर्मधातु मण्डलया जन्तु

- | | |
|------------|---------|
| १. मलः | माघ |
| २. सर्प | फागुन |
| ३. सल | चैत |
| ४. फइ | वैशाख |
| ५. माकः | जेठ |
| ६. कंगः | असार |
| ७. खिचा | साउन |
| ८. फा | भदौ |
| ९. छुँ | असोज |
| १०. द्रहं | कार्तिक |
| ११. धुँ | मंसिर |
| १२. खराःचा | पूस |

हारती देगल्य् च्वपिं तुनाःसिया मूर्तितय्गु नां

१. वीणादेवी

२. वंशादेवी
३. मृदङ्गादेवी
४. भुरुजादेवी
५. लास्यादेवी
६. माल्यादेवी
७. गीतादेवी
८. नृत्यादेवी
९. पुष्पादेवी
१०. धूपादेवी
११. दीपादेवी
१२. गन्धादेवी
१३. रसादेवी
१४. स्पर्शादेवी
१५. आदशादेवी
१६. धर्मादेवी

हारतीया लुखाफुसय् च्वंगु तोरणय् अंकित पञ्चरक्षादेवी

१. महाप्रतिसरा
२. महामायूरी
३. महासाहस्रप्रमर्दनी
४. महामन्त्रानुसारणी
५. महाशीतवती

स्वयम्भू महाचैत्यय् प्रस्थापित पञ्चबुद्ध

१. वैरोचन- मध्यस्थान
२. अक्षोभ्य- पूर्व दिगय्
३. रत्नसम्भव- दक्षिण दिगय्
४. अमिताभ- पश्चिम "
५. अमोघसिद्धि- उत्तर "

स्वयम्भू महाचैत्यया प्यकुनय् च्वं पि तारादेवीपि

१. सप्तलोचनी- ईशानय्
२. मामकी- आग्नेयय्
३. पाण्डूरा- नैऋत्यय्
४. तारा- वायव्यय्

स्वयम्भू महाचैत्यया प्यख्यरसं च्वंगु हलपतिइ अंकित मूर्तितय्गु नां

पूर्वया हलपतिइ च्वंगु

१. वैरोचन
२. समन्तभद्र
३. क्षितिगर्भ
४. खगर्भ
५. कन्हपा

दक्षिणया हलपतिइ च्वंगु

१. शाक्यमुनि
२. नागाज्जुन
३. मैत्रिनाथ
४. वागीन्द्रकीर्त्ति

पश्चिमया हलपतिइ च्वंगु

१. अमिताभ
२. गुरु शान्तिगुप्त
३. लोकेश्वर
४. गुरु पद्मकर
५. जालन्धर

उत्तरया हलपतिइ च्वंगु

१. भैषज्य गुरु वैदुर्य प्रभराज
२. वज्रपाणि
३. गोरषवम्भय
४. सर्वनिवरणविष्कम्भी
५. आर्यतारा

सप्तबुद्धपिनिगु संक्षिप्त विवरण तालिका

	१	२	३	४	५	६	७
१] बुद्धया नां ^१	विपश्ची	शिखी	विश्वभू	ऋकुच्छन्द	कनकमुनि	काश्यप	शाक्यमुनि
२] " मां ^१	बन्धुमती	प्रभावती	यशोवती	विश्वचिनी	उत्तरानी	धनवती	मायादेवी
३] " अबु ^३	बन्धुमान	अरुण	सुजित्	अग्निदत्त	यक्षदत्त	बन्धुदत्त	शुद्धोदन
४] " कलाः ^१	विपश्यन्ती	शिखीमालिनी	विश्वन्धरा	ककुट्बती	कण्ठमालिनी	धर्मधरा	यशोधरा
५] " काय् ^३	महामति	रत्नधर	आकाशगञ्ज	सकलमंगल	कनकराज	धर्मधर	राहुलभद्र
६] " देस ^१	बन्धुमती	अरुणाक्ष	अनुपरम	क्षेमावती	शोभावती	वाराणसी	कपिलवस्तु
७] " जात ^१	क्षेत्री	क्षेत्री	क्षेत्री	ब्राह्मण	ब्राह्मण	ब्राह्मण	क्षेत्री
८] " बोधिबूक्ष ^१	क्वफो सिमा	रुक्कमल	धुँसिमा	शिसो सिमा	दुम्बर	बरमा	वंगल सिमा
९] " विशेषता ^२	तेज	बल	सत्यवाक्य	समाधि	ज्ञान	ऋद्धि	वीर्य
१०] " मुद्रा ^१	धर्मचक्र	ध्यान	वरद	ध्यान	भूस्पर्श	अभय	भूस्पर्श
११] " प्रमुख शिष्य ^१	खण्ड, तिष्य	अभिसम्भव	सोण्ड, उत्तरा,	विधुर, संजीव	भायाश्र	तिष्य, उत्तम	शालिपुत्र, महा-
१२] " आयु ^३	८०,०००	७०,०००	६०,०००	४०,०००	३०,०००	२०,०००	मौद्गलि, आनन्द
१३] शाक्यमुनि पूर्व जन्म नां ^५	सत्यधर्म	क्षेमराज	पर्वताक्ष	ज्योतिपाल	सुधर्मराज	ज्योतिराज	सवार्थसिद्ध
१४] सप्तबुद्ध नेपाल्य बिज्या-गु थाय् ^५	जातमात्रोच्च पद्मगिरि	ध्यानोच्च	फुलोच्च	सिद्धि फुलोच्च वज्रकूट पर्वत	गोश्रृङ्ग पर्वत	गोपुच्छ गिरि पर्वत	

स्वयम्भू वन जंगलया छचाःरत्यरं चाःहूलाच्चवंगु तीर्थ सारिणी^१

ल्याः	देवता	तीर्थ	नागराज	पीठ	स्थान
१)	वैरोचन	बुर्बुदायमान	वरूण	शान्तिपुर	भचाखुसिया तगिनय् विजयस लिउने
२)	अक्षोभ्य	आकाशगङ्गा	कर्कोटक	वसुपुर	वसुपुरया क्वस्सं च्वंगु हिति
३)	रत्नसम्भव	गोडावरी रत्नकुण्डली	तक्षक	वायुपुर	किण्डो बुँया हिति
४)	अमिताभ	भगीरथः महापुण्य	वासुकी	अग्निपुर	इचंगु वनेगु खुसिताया क्वस्सं
५)	अमोघसिद्धि	चन्द्रभागा खगानना	कुलिक	नागपुर	मसिंगाः
६)	लोचनी	योगधारा कुसुमाजली	अनन्त	फसखा भैरव	तीर्थबाहिरी
७)	मामकी	सूर्यभागा महाभोक्ष	पद्म	पवन भैरव	धिमेल्वहं वनेगु बुँस बुँगाः
८)	पाण्डुरा	ज्ञानधारा मोक्ष	कुर्बुर	चण्डीतीर्थ	ताईने बुँगाः
९)	तारा	ज्ञानकुण्डल वसुधारा	धवल	सूर्यविनायक	स्वयम्भू गलय्
१०)	योगाम्बर	जोगधारा आकाशगङ्गा	महापद्म	शान्तिपुर	ख्वाउँ बुँगाः
११)	मञ्जुश्री	योगकुण्डली	शेष	मञ्जुसुलिइ च्वंह्य गणेश	अजिमा पुखूया च्वस्सं च्वंगु पुखू
१२)	हारती	भद्रनदी	मुचलिनद	पीठ च्वस्सं गणेश	अजिमा पुखू
१३)	स्वयम्भू	सिद्धधारा मंत्रवती मूलधारा	अपराल	विद्याधरी	विजयेश्वरी क्वस्सं विष्णुमती ह्वंगु तीर्थ

^१ करुणामय शरणया मे, बाबुकाजी शाक्य, ओमबाहाल, येँ लिखित पुस्तक अनुसार ।

काठमाण्डू उपत्यकाया द्वादशतीर्थ

ल्याः	तीर्थ	स्थान	नागराजा	संगम तीर्थ	धूप
१)	पुण्य	गोकर्ण	तक्षक	अमोघफलदायनी	सिल्हा
२)	शान्त	गुह्येश्वरी	सोमशिखी	मारदायिका	कुशहा
३)	शंकर	शंखमूल	शेखपाल	त्रिवेणी रुद्रधारा मणि रोहिनी	बाल
४)	राज	धंतिल	सुरूप	राजमञ्जरी	श्रीखण्ड
५)	मनोरथ	खुसिख्यः	कुलिक	विमलावती	कस्तुर
६)	निर्मल	भचाखुसि	उपलाल	भद्रनदी केशावती	कपू
७)	निधान	लखतीर्थ	नन्दोपनन्द	स्वर्णनदी	सिल्हा
८)	ज्ञान	करखुसि	वासुकी	पापनाशिनी, केशावती	गुंगू
९)	चिन्तामणि	तेकुदुवान्	वरुण	केशावती	श्रीखण्ड
१०)	प्रमोद	दानिगाः	पद्म	रत्नावती	गुंगू
११)	सुलक्षण	भाजंगाः	महापद्म	चारुमती	सिल्हा
१२)	जय	न्यखु	श्रीकान्त	प्रभावती	कपूश्रीखण्ड

संक्षिप्त विवरण तालिका

भोजन	दक्षिणा	स्नानवस्तु	दानवस्तु	पालनवस्तु
चाकु	मणि	दाफस्वां	जलधट	तुलसिलः
चिनी	शंख	धालपतिस्वां	पंचवृहीरत्न	गोमय
प्रियंगु	लाओ	लवंजिफोस्वां	वस्त्र, धौ, चन्द्रमा	गोमूत्र
कस्ति	नील	यिताथिताचा	कुला, लाकां, तुतां निसलाः	गोक्षीर
कुंकुम	कर्कटन	जटामास	पिण्डपात्र	कस्ति
जाकि	भीष्म	करवीरस्वां	पुवाजाकि वहःचकि	गोघृत
दुरु	नील	लुँगजूस्वां	पुवा, बोकिलुँ	तूयूहामो
घ्यः	मरकट	तुयूगुन्तु	वसुजाः	फलमूल
घ्यः	हीरा	पंचामृत	नवरत्नवृही	व्या
आख्ये	माणिक	चवःस्वां	वस्त्र	अम्बः
क्वलः	मुति	हाकुहामो	आत्म विम्बद्वीप	तुसि
घ्यः कस्ति, साखः	कर्कटन	श्रीखण्ड	शय्यादान	धालय्

शब्दानुक्रमणिका-सूची

ॐ आकाशगर्भे हूं २२४	अखिल नेपाल बौद्ध संघ ४४६	अद्वयपरमार्थ नामसंगीति ५६७
ॐ कार ५४१	अग्निकुण्ड पाद स्थापना १५७	अद्वयवज्र ५०८
ॐ कुलीश्रीरुद्रवर्ण महाविहार ३४४	अग्निदत्त राजा २०	अद्भूत सिमा ५८१
ॐ नमोवागीश्वराय १६७, ५८४	अग्निपाक विधि २२६	अधिवासन ३२५
ॐ पद्मोष्णीषविमले हूं फट् ४६२	अग्निपुर ६०, २८६, ५६४	अधिवासन दुसल क्रिया ३२६
ॐ मणिपद्मे हूं १३३, ३२७, ५५०	अग्निवज्र आचार्य १६४	अध्यात्मषडायतन ४८६
ॐ वज्रपाणि हूं ३२७, ५५०	अग्नि संस्कार २५०	अध्येषणा मुद्रा ५६६, ५६८
ॐ वागीश्वरी मुं ३२७, ५५०	अग्नि साधन २८४	अनन्तजीव भारो १५२
ॐ सुप्रतिष्ठवज्रे स्वाहा २८३	अग्नि स्थापना ३२५, १६४	अनन्तपुर २०६, ४२०, ५१०
अकनिष्ठ भुवन ३	अग्नि स्थापना क्रिया १५७	अनन्त मल्ल राजा १३२
अकार संजात २८४	अग्न्याहुति कर्म २५०	अनन्तश्री १६३
अक्षय तृतीया ५६	अग्रश्रावक ५६६	अनागत बुद्ध आर्य मैत्रेय ६७, ७२, ५६७
अक्षयदान ६३	अङ्कोरवात् महाचैत्य ४५१	अनागारिका धर्मचारी ६०८
अक्षोभ्य १८६, २०६, २८२, ५२६	अचलवीर ५०६	अनावृष्टि ५३४
अक्षोभ्य तथागत ५६, १४२, १८१, ५४३, ५६६	अचला भूमि विष्णुद्धी २५३	अनुत्तर तन्त्र ५२८
अज्ञान सिन्धु ३५	अचिन्त्य धातु ५०६	अनुत्तर बोधिरत्न ४६६
	अतिवृष्टि ५३४	अनुत्तर बोधि ६७, २८८, ५४१
	अतिशादीपङ्कुर १३३, १२२, १६०	अनुत्तर पूजा ४०३
	अथाहल्लद ११	अनुत्तर वज्रयान ५६६, ५७०

अनुत्तर सम्यक् संबुद्ध ६००
 अनुत्तर सम्यक् संबोधिज्ञान
 ६७, ५३६, ५४०
 अनुत्तर सहज अष्टसिद्धि ४५
 अनुपम विहार ८, १५
 अनुपम नगर ८
 अनन्तप्रियादेवी २०६
 अनोमानदी ६७
 अन्तराभव ५७७
 अन्तरराष्ट्रिय बौद्ध ग्रन्थालय
 ४३७, ५२६
 अन्तरराष्ट्रिय मूर्ति संग्रहालय
 ४३७
 अन्तरराष्ट्रिय वर्क क्याम्पस
 ४२७
 अन्तरराष्ट्रिय सफाई आन्दोलन
 ४२६
 अन्त्यक्रिया विधि २५०
 अपजस पण्डित २६
 अपरिमित गुणसञ्चय नाम
 लोकधातु ५४७
 अपरिमिता तथागत ५२६
 अपरिमिताया मन्त्र ४६४
 अपाडराजा जितारिमल्ल १३२
 अभयन्दद क्षेत्री २०
 अभय मुद्रा ५६, ३६६
 अभयराज शाक्य २११
 अभयसिंह ताम्रकार १५३
 अभयाकर गुप्त ३५१
 अभिरति भुवन ५४३
 अभिसम्भव ५
 अमरसिंहाचार्य १६४

अमिताभ २०६, २८२
 अमिताभ गुरु ३०७
 अमिताभ तथागत ५६, ३०६,
 ३१५, ५२३, ५४६
 अमिताभ बुद्ध ३३३
 अमृतसञ्जीवनी ८८
 अमृतानन्द भन्ते ५६३
 अमोघपाश लोकेश्वर २७३, ५३६
 अमोघफलदायनी नदी ५६०
 अमोघवती भुवन ५४८
 अमोघसिद्धि २०६, २८२
 अमोघसिद्धि तथागत ५६, ५३३,
 ५४८
 अम्बसा कवकाय २४६
 अम्बसाहाल २२८
 अरणिको (बलबाहु) ११३
 अरपचन मञ्जुश्री ५६७
 अरपचन वागीश्वर महामञ्जुश्री
 ५३६, ५६६
 अरुणनगर ५
 अर्चिष्मतीभूमि विशुद्धि २५३
 अर्थविनिश्चय २६४
 अर्हत् २१
 अवधूति (योसिँ) ३२४
 अवलोकितेश्वर ६२, ११०
 अवलोकितेश्वरया मन्त्र ४६४
 अविश्वस्य प्रतिमानिधि १६६,
 ३५१
 अशनिप्रवेश (वज्रपात) १६
 अशोकचल्ल १३३
 अशोक चैत्य ८०, २६६, ५३२
 अशोकपट्टन (यल सहर) ८०

अशोक पुत्री (चारुमती) ८०
 अशोक स्तम्भ ४००
 अशोक शिलास्तम्भ १३३
 अशोक स्तूप ११७
 अश्वघोष ८७
 अश्वत्थवृक्षमूल ६७
 अष्टकोणाकृति चैत्य ५३२
 अष्टदिगपाल २०७
 अष्टनाग ५०८
 अष्टनागराज २०८
 अष्टपर्वत ५०८
 अष्टपर्वत देवता २०८
 अष्टपूजादेवी २०७, ५०८
 अष्टबोधिसत्त्व ४६२, ५०५
 अष्टमंगल चिन्ह ४६०
 अष्टमांगलिक चिन्ह ५०५
 अष्टमीव्रत २७३, ५३८
 अष्ट यक्ष ५०८
 अष्टयक्षराज २०८
 अष्टलोकधर्म ५०६
 अष्टविज्ञान ५०६
 अष्टविमोक्ष समापत्ति ४८६
 अष्टवैतराग ४८, ५८, ४६२
 अष्टश्मशान वलि २८६
 अष्टसाहस्रिका प्रज्ञापारमिता
 १६४
 अष्टसिद्धि ४८
 अष्टादश वृही ५६३
 अष्टादशविणिका बुद्धधर्म ४८६
 अष्टादश शून्यता ४८६
 अष्टादशौषधी ५६३
 अष्टाविंशति नक्षत्र ५०८

अष्टविंशति नक्षत्र देवता २०८
 अष्टौष्णीष २०७
 अष्टौष्णीष तथागत ५०७
 अष्टौमायोपम ५०६
 असंगवसुबन्धु ८६
 असितांग भैरव ६०, ५०१
 अस्थिधातु जात्रा ६०१
 अहिच्छत्रयुक्त त्रिबुद्ध मूर्ति ६०६
 अहोरात्र यज्ञ १६४
 अहोरात्र विधि ३२५
 अहोरात्र होम ३२६
 आकाशच्छत्र १५३
 आकाश धातु ५०६
 आकाशपुर ५७६
 आकाश भैरव ६०, ५०१
 आकाश मुद्रा ५४१
 आखा लितया २८८
 आखा स्वनाया २८१
 आखा स्वनेगु ३२५
 आचार्य खेरिम्पोछे ३२२
 आचार्य धर्मकीर्ति १२३
 आचार्य धर्मश्रीमित्र ३६३
 आचार्य नागार्जुन ८७, १८८
 आचार्य वसुबन्धु ८६, १०६,
 १८६
 आचार्य शान्तरक्षित् १६०
 आचार्य शान्तिकर ५६, ३४६
 आचार्य शीलमञ्जु १६६, ३६३
 आचार्य सिद्ध नागार्जुन ५०८
 ६०६
 आत्ता लामा ३१६

आच्छुरि १७६
 आजु अजि ५००
 आदर्श ज्ञान ४६७, ५४३
 आदित्येय विश्ववस्तु ५०८
 आदिबुद्ध गुरु वज्रधर ५६६
 आदिबुद्ध पञ्चबुद्धात्मक
 श्रीस्वयम्भू ११
 आदिबुद्धपुत्र (आर्यावलोकिते-
 श्वर) ३०७
 आदिबुद्ध वज्रधर ५६२, ५७०
 आदिबुद्ध शक्ति (गुह्येश्वरी) १४
 आदिबुद्ध स्वयम्भू १५
 आदिबुद्ध श्रीस्वयम्भू १११
 आदिबुद्ध स्वयम्भू भगवान् १००
 आदिबुद्ध स्वयम्भू महाचैत्य १५२
 आदेशपत्र ४६७
 आधारसिं (यलसिं) १८०
 आनन्द ६८
 आनन्दकुटी १६६, ५६८
 आनन्दकुटी विद्यापीठ ६०१,
 ३६३
 आनन्द भिक्षु ७६, १६४
 आनन्दमुनि वज्राचार्य ३६२
 आनन्दा ७६
 आभाश्वर मुख ३२२
 आमरण अनशन ४२६
 आरतीमत ५५२
 आर्य अमोघपाश मण्डल ५३८
 आर्यतारा १८६, ३०७, ३४१
 ५१२, ५४६
 आर्यतारा मण्डल ३४२
 आर्य नवखण्ड ३८०

आर्य नामसंगीति १८, ५१,
 १६१, १८७
 आर्य भद्रचरो प्रणिधान ४०४
 आर्य मञ्जुश्री नामसंगीति ५७०
 आर्य महायानसूत्र नवव्याकरण
 ४७५
 आर्य मैत्रेय ३१५, ५२३, ६०७
 आर्य मैत्रेय बोधिसत्व १८८,
 ६१०
 आर्य वसुन्धरा ६०४
 आर्यावलोकितेश्वर ५६१
 आर्याष्टाङ्ग उपोषधव्रत ५६०
 आर्याष्टाङ्गिक मार्ग ४८६
 आर्य स्वयम्भू २४३
 आलोकिक मोहरति २५२
 आवास तथा भौतिक परियोजना
 ४७८
 आह्वान पूजा ३२३
 आष्फानिक योग ५७७
 आष्फानिक समाधि ६२
 इतुं बाहाल १२८
 इन्द्रकलश २५१, २८३, २८५
 इन्द्रजाल विद्या १६१
 इन्द्रादि लोकपाल ६१
 इनायदलू ५५२
 इष्टिकापत्र ५३२
 ईखाछें बही ११७
 ईबही थुद्ध ८०, १६०
 उग्रतारा २०६
 उछेन् आखः २४२
 उत्तम ५६
 उत्तरा ८

उत्तरायणीदेवी ५०
 उत्पातवृष्टि ५३४
 उदुम्बर वृक्ष ५०
 उद्देश्य चैत्य ३६१
 उदकुटुक आसन ५०३
 उथान्तजु ४२४
 उपकेशिनी ६
 उपगुप्त भिक्षु ७६
 उपछन्दोह १६
 उपराज जयस्थिति मल्ल १६७
 उपलाल नाग ३०
 उपोषध कर्म ५६६
 उपोषध व्रत (अष्टमीव्रत) २७
 उपोषध शील ५६०
 उर्गेन् आचार्य १६०
 उर्गेन् तपुलि (उद्यांतपुलि) १२१
 उर्गेन् तुलकु लामा ३६४
 उर्गेन् रिम्पोछे १२१
 उर्द्धगति लिपि ५८०
 उलूकाश्या ५१०, ५७२, ५७३
 उष्णीष चूडामणि ५६, १५६,
 २१६, २८५, ५२६
 उष्णीषच्छत्र २३
 उष्णीष विजय धर्मपारङ्गत
 चैत्य ६०, १८६, ५८३
 उष्णीष विजय पता: २८४
 उष्णीष विजय पाठ २२३
 ऋद्धिपाद ५०६
 ऋद्धिलक्ष्मी २१८
 ऋषिपचन मृगदावन ६७
 एकजटी १४०, २०६

एकमुख ववखागा २८४
 ए. वि. कीनग्राम ३५४
 ओडियान आचार्य ४४, ४५, ४७
 ओदत्तपुरी जगदल विहार ६१३
 ओहमोरि फुकुसिमा ४७६
 कङ्काली रूप ५८०
 कच्छपालगिरि पर्वत ४५
 कण्ठ खुइया विधि १५७
 कनकमुनि तथागत ५०
 कनकावती तीर्थ २३
 कनकावती देस २३
 कनकश्री १६३
 कपिलमिश्र ११७
 कपिलवस्तु नगर ४४, ६७, ४२०
 कबुलियतनामा ५८०
 कमलगुप्त ५७१
 कमलामयी चित्रकार २१५
 करवीर तन्त्र ५०६
 करवीर भशान १२१
 करुणामय २६८
 कर्कपेटिक १६५
 कर्कोटक नागराज १, १०, ११
 ६२, ४८६
 कर्णदोप भमशान ३०
 कर्णटिक देस ३५
 कर्मकुल ५४८
 कर्मराज गुम्बा ५३४
 कर्मराज महाविहार ५३५
 कर्मिया हस्तपूजा २२२
 कलशपूजा १७३, २२३
 कलशाकार चैत्य २६६
 कलशाचर्चन पूजा १५६, १७२

कलाकार अरनिको ३६३
 कलात्मक वज्र २०६
 कलाविद् जोगमान शाक्य ३८५
 कल्पवृक्ष सिमा ६८
 कविकेशरी चित्तधर ३६३
 कवीन्द्र जयप्रताप १६५, १६७,
 २०३, २१६, २२०, ४४२,
 ४७६, ५१०
 कवीन्द्रमल्ली टंका १६८
 कसागा १६४, २५१
 काकाश्या ५१०, ५७२, ५७३
 काग्युपा शासन ३६३
 काङ्ग्युर १६३, ५२३
 काङ्ग्युर सद्धर्मपुथि ३६४
 काठमाण्डू उपत्यका ६८
 कातिसेवा ५३८
 काथो रिम्पोछे लामा २७५,
 २७६
 कानिङ्ग शेधुव् लिङ्ग गुम्बा ३६४
 कापालि सिंहनाथ जोगि ३०६
 कापोतल पर्वत १०
 कामधेनु सा ४४
 कामुनि पर्वत ४८
 कायिक शासन कीर्ति ११४
 कारणात्मक रूप २०५
 कार्तिक पूर्णिमा ११, ५६
 कालचक्र ५०५
 कालचक्रटीका विमलप्रभा ५७०
 कालचक्रयान ३६१, ५०६
 कालीञ्जल १, ५०३
 कालीद्या कर्मवामेतर्जनी २८४
 कालीनाग ३१४

कालीमहानाग ६०, ५०३
 कालीहृद १, १०, १८७, ५०३
 काषायवस्त्र ११४
 काष्ठपत्र ५१३, ५३२
 काष्ठपत्राभिलेख ५१३
 काष्ठपत्र रूक्का ३१२
 काष्ठमण्डप १२१, २६३
 काष्ठमण्डप अधिपति महेन्द्र
 मल्ल १५४
 काश्यप चैत्य ३५३
 काश्यप तथागत ५६
 काश्यप तथागतया धातु ५६१
 किण्डोल ६८
 किण्डोनाम महासिद्ध क्षेत्र ३३३,
 ६०३
 किण्डोल विहार ११३, १६६,
 ३३२, ३६१, ६०३
 किण्डोलस्थान २४
 किद्वल ६०४
 किमान्दोल २४
 किमान्दोल विहार ६०४
 किरणपूजा २८५
 किरण मन्त्र २७६
 किराती राजा हुमति ६८
 (जितेदास्ति)
 कीलं ताय्गु १६४
 कीर्तन महाविहार ३३३
 कीलेश्वर वीतराग ४३, ५०४
 कुक्कूटाराम महाविहार ७८
 कुमार २३२, २४५
 कुमारी छेँ २५४
 कुरूकुला २५२

कुलत्रयकुल ५४२, ५६८
 कुलदत्ताचार्य १६४
 कुलपादाचार्य १६४
 कुलवीरसि तुलाधर ५२३
 कुलिक नागराज ४१, ४२, ५०३
 कुवेरसि शाक्य ५३४
 कुशीनगर ३७
 कुसाङ्गलामे स्यालुङ्ग ३३८
 कुसुमावती ३०
 कुहः प्याखं २२३, २२४
 कूटपाल १०
 कूटपाल तीर्थ ३४५
 कूटागार ५१५
 कूटागारोपरि सप्तपद्मासन चैत्य
 २६६
 कूर्मशीला २७८
 कूशोदक जगा २६३
 कृत्यानुष्ठान ज्ञान ४६७, ५४८
 कृष्णदेव १६५, ४१८
 कृष्णवन्धु ६७, ५३८
 केतुमतो सहर ७३
 केशचन्द्र १२७, १२८
 केशर शम्शेर ३५७
 केशावती २१, ३०, ३३, ३६,
 ४३
 केशिनी ६
 केशिनी उपकेशिनी १७
 कैलाशकूट भवन १०३, ४२०
 कोटचाहति महायज्ञ २१८
 कोथामचा २५२
 कोथुचकुरि २२६
 कोदुवाः २१

कोमलराज्यलक्ष्मीदेवी शाह ४६६
 कोलमुखी (वज्रदेवी) ५१२
 कोलयी गीत २८४
 कौमारी ५१२
 कौमारीपूजा ३२५
 कौलक २८३
 क्यान्छ्या लामाजु ३३१, ३३७
 क्रकुच्छन्द चैत्य २६८, ५८३
 क्रकुच्छन्द तथागत २०, २५६
 क्रग्पा थाम्चे खेन्पा २४२
 क्रोधमूर्ति गुह्येश्वरी १४
 क्रोधराज महाबल ५५०
 क्लेशमार ५३६
 क्वन्तिबही ११७
 क्वफोसिमा ३
 क्वाचपाल देवता ४८४, ५३१
 क्षमापन क्रिया १५६
 क्षमापूजा २२१, २६०, २७७,
 २८८, ३२५
 क्षान्तिश्री १६३
 क्षितिगर्भ बोधिसत्त्व ४६
 क्षेमराज गृहपति ५
 क्षेमाकर विहार २०
 क्षेमावती नगर २०
 खँकार ५४८
 खगर्भ बोधिसत्त्व ४७, १८८
 खगानना (गुह्येश्वरी) ४५
 खः ग्वय्गु ज्या १५६
 खङ्गनरसि राणा ३५३
 खण्डवृष्टि ५३४
 खसराजा जितारि मल्ल १३२
 खसराजा रिपु मल्ल १३३

खसर्पण लोकेश्वर ५३६
 खादलू ५५२
 खासौचेन महाकूट चैत्य ३१६,
 ३२६
 खास्ति चीवाहाः ३५१, ३८५
 खिचुन् (भृकुटी) १८६
 गगनगञ्ज बोधिसत्व १५, २७
 गजरत्न ५४३
 गणचक्र २८१
 गणचक्रपूजा २२१
 गणपति २२२, २४५
 गणावर्त्त मण्डल ५५३
 गणेश ६०
 गणेशकुमार ५००
 गणेशमार ४६
 गण्डेगुम्वा ५६७
 गन्धकूट शैली २०६, ५३६
 गन्धूरी देवता ४८४
 गन्धेश्वर वीतराग ४६
 गभष्टि रश्मिमाला ५७५
 गरतुकि पिइ २२२
 गरुड ५६०
 गर्भगृह १६०, २१६, २२८
 गर्भगृह दँज्या १५६
 गर्भगृह माथ पिइ २२२
 गर्भस्तम्भ (यलसिँ) १५६
 गलतुकि ५६, २२२, २२८, २४६
 गलतुकि दने २५१
 गलतुकि पिइगु २४६
 गलसिँ १६२
 गलसिँ स्वने २२५
 गाछि २८८

गाछेप्यने २८२
 गावशृङ्ग ४६६, ५७४
 गिरिवर साह्योगुँ २४४
 गिरिवर साह्योगुँ विहार १७३
 गीर्वाणयुद्ध विक्रम २६३
 गुंगः कचादेगः ३२७
 गुठी जीर्णोद्धार ४४४
 गुणकारण्डव्यूह ४६६
 गुणकामदेव राजा ६१, ६२,
 ४८६
 गुणचन्द्र शाक्य २०६, २१४
 गुणध्वज ब्राह्मण २०
 गुणशील २३
 गुणाकर भिक्षु ५८, ५९, १८८
 गुणाढ्य ब्राह्मण १००
 गुणागुली ८
 गुप्तगत सर्वप्राचीन अभिलेख
 ५२३
 गुरु अध्येषण २८१
 गुरु उपगुप्त भिक्षु ११३
 गुरुका काय् २५१
 गुरु धर्मादित्यजु ३३५, ३८५,
 ६०५, ६१०
 गुरु पद्मसम्भव ११६, १६०,
 ५३४
 गुरुपूजा ३२५
 गुरु वन्धुदत्त ११०
 गुरु मञ्जुश्री पादुका ५६५
 गुरु मण्डल २८१
 गुरु मण्डल पूजा २४८
 गुरुमापा १२८
 गुरु रत्नरक्षित १२५, १६१

गुरु रत्नवहादुर वज्राचार्य ६१०
 गुरु वज्रधर ५७३, ६१४
 गुरु वज्रभैरु १६१
 गुरु वागीश्वर ४१
 गुरु शय्यादान २८८
 गुरु शाक्यश्री ३१६, ५२३
 गुरु शान्तिकर ४८६
 गुंलावाजं २५१
 गुंला सेवा ५३८
 गुह्यचर्य वसत २८२
 गुह्यपुर ५७६
 गुह्येश्वरी २००
 गुह्येश्वरी कुण्डल १३, १६
 गुह्येश्वरी पीठ ५७, ५८
 गुह्यसमाज १६१, ५०५
 गृद्धकूट पर्वत ६०४
 गृहस्थ चर्या २०
 गोकर्णगः २३४
 गोकर्ण राजकुमार २५
 गोकर्णेश्वर २००
 गोपाल वंशावली १४३
 गोपुच्छ ४६७
 गोपुच्छ गिरि ७४, १६६, २६६
 गोपुच्छगिरि साह्योगुँ ३६१
 गोपुच्छाग्र चैत्य ६०, ३६२,
 ५८६
 गोपुच्छ पर्वत ३१, ४८
 गोपुच्छाग्र पर्वत ७२, १८८
 गोमिराज भारो १७८
 गोरखनाथ १०७, १०८
 गोरखनाथ गुफा १२१
 गोवर्द्धन मिश्र ११७

गोविन्द्रचन्द्र विहार १२३
 गोक्रुङ्ग ४६७
 गोशृङ्ग पर्वत १६६
 गोशृङ्ग पर्वत व्याकरण २३८
 गौचरण १६६
 गौडदेस ५६
 ग्याल्पो सेगि घोछे ३५३
 ग्याल्वा कर्मापा ४३१, ५३४
 ग्रन्थकूट शैली ४२०
 ग्रन्थकूट देवी ५१०
 ग्रन्थ धूर १६५
 ग्वदारमत ५५२
 ग्वय्दां तय् विधि २७७
 ग्वहः ५१३
 घण्टा घोषण ५७२
 घुरगोम्पो ५५७
 घेलुग्पा शासन ३६३
 घोरदुष्कर चर्या ६७
 ध्यःदिवा ५५२
 डावाङ्जिम्बा ३३१
 चउकारखत ज्वाला २२२
 चकरि तय् २५२
 चकुरि २४६
 चकुलि १६४
 चकू २२२
 चक्रकुल ५४२
 चक्रसम्बर ५०५, ५०६, ६१२
 चक्रावली ३६१
 चक्रावलीया थां १५६
 चखुती ४६
 चंगुगः २३४
 चङ्क्रमण देवता ४८४

चण्डमहारोषण ६१२
 चतुआरूप्य समापत्ति ४८६
 चतुक्रुद्धिपाद ४८६
 चतुखण्ड प्रज्ञापारमिता २८६
 चतुतन्त्र ५७०
 चतुर्तारादेवी ३२७
 चतुर्थ ध्यान ४८६
 चतुर्थ विश्व बौद्ध सम्मेलन ३८६,
 ३६१
 चतुर्थी पूजा १७५
 चतुर्थीया जज्ञ २८१
 चतुर्थी याय् २८७
 चतुर्द्वारपाल २०७
 चतुर्पूजादेवी २०७
 चतुः प्रतिसम्बिद ४८६, ५०८
 चतुः प्रतिसम्बिद देव २०७
 चतुर्बलदेशना ४६४
 चतुर्ब्रह्म विहार ४६३
 चतुर्महानिमित्त ६७
 चतुमहापुण्य क्षेत्र ५६६
 चतुर्महाप्राकार ५८
 चतुर्महाराज ६८, ५०१
 चतुर्मार ५३६
 चतुराकर्षण २०८, ५०८
 चतुराकर्षण भैरव ५०७
 चतुरार्यसत्य ४८६
 चतुर्लाश्यादेवी २०७, ५०८
 चतुर्वर्गफल ४८
 चतुर्वैशारद्य ४८६
 चतुर्व्यूह चैत्य २६६
 चतुराशीति धर्मस्कन्ध ५७०
 चतुःशीलव्रत ४६३

चतुषष्ठीकला ६७
 चतुषष्ठीप्रकार लिपि ६७
 चतुषष्ठीलक्षतन्त्र ५७०
 चतुष्कायपद २४७
 चतुस्संग्रह वस्तु ४८६
 चतुस्सम्यक्प्रहाण ४८६
 चतुःस्मृत्युपष्ठान ४८६
 चन्द्रहास खङ्ग १०
 चन्द्रलक्ष्मी शाक्य ६१०
 चाकःदलू ५५२
 चाकपूजा २८६
 चांगु २००
 चांगुनारायण १६२
 चान्द्रसिद्धान्त ५१३
 चांबुंग लोकेश्वर १०६
 चाय्वही (चारुमती विहार) ८१
 चापूजा ५३८
 चारुगिरि ४१, ५६१
 चारुमती ३८, ७६, ११३
 चालनी १३१
 चाह्लिकिफु ३२६
 चिकंकुथि २६८
 चित्तपूजा (चैत्यपूजा) २२७, २२६
 चित्तचैतन्य चैत्य ६६
 चित्र संग्रहालय ४७१
 चित्रकार कृष्णवीर ३०५
 चित्रकार हर्षमान ४४३
 चित्रभय स्वयम्भू पुराण ४४४
 चोधंगु किनूवाहाः ६०७
 चिन्तामणि ४६६
 चिन्तामणि लोकेश्वर ५२१
 चिन्तामणि रत्नमत ५७६

चीन मन्दिर ११३
 चीवरवस्त्र ५५८
 चुकासि २२८
 चूडाकर्म २०, ६७
 चूडाकर्मया विधि १५७
 चूडाभिक्षुणी ७४, १८८, ४८७
 चूडामणि १६४
 चैतसिक शासन कीर्ति ११४
 चैत्य कुलनायक ७८, ३६१
 चैत्यपूजा ३६०
 चैत्यवाद निकाय ८१
 चैत्य विहार (स्वयम्भू) २३६
 चैत्य शैली ३२७
 चैत्रपूर्णिमा ३, ४
 चैलक १४६, ४८४
 चौकासि २६०
 चौछाय्पून्ही १६६
 चौडामणि छत्र २८५
 च्योङला रिम्पोछे ५६६
 च्वलामू (गजू) २६०
 छत्रारोण १६४
 छत्रावली १६४, ३६१
 छत्र शैली मन्दिर ५२४
 छाहाय्के पूजा २२३, ५३८
 छाहाय्के बलि पूजा ५२८
 छिरिङ नोर्बु लामा ३३५
 छेचुकुस्योग् लामा ४२१
 छेरिन् धु ४६३
 छोर्तेन् नाम्बासुम् २५८
 छ्वकद्वल ६०४
 छ्वेकीखोर्लो गुम्बा ५६३
 जगच्चक्षु २४१

जगतमान बैद्य (धर्मादित्य) ३३२
 जगतिद्व १६
 जगतोद्वार महाविहार १६६,
 ६१०
 जगदीश्वर श्रीस्वयम्भू ७, ४२६
 जज्ञपाद स्थापना २८१
 जटाधारी लोकेश्वर १०६
 जम्बल कुवेर ६०६
 जम्बुद्वीपया मूलगु पुण्य भूमि
 (नेपाल) २४४
 जय अर्जुनदेव १३७
 जयकीत ताम्रकार १५३
 जय जितामित्र २१८
 जय ज्योतिर्मल्लदेव १५०, १५१
 जयतीर्थ ४०
 जयदेव राजा ६२
 जय नृपेन्द्र मल्ल २१५
 जयप्रकाश मल्ल २३३, २३५,
 २३६, २४२, २४५
 जयप्रकाश मल्ली २५२
 जयराजदेव १३७
 जयलक्ष शाक्यभिक्षु १५५, १५८
 १६१
 जयवाच्छली चचा १६४
 जलयज्ञ २१४
 जलवृष्टि प्रार्थना गुठी २१४
 जयश्री भिक्षु ७६
 जलहर्षोपरि जिनालंकृत चैत्य
 २६६, ५३२
 जलाधिष्ठान २१
 जशोधरा ६७
 जसमती ३७

जाङ्गुली २५२
 जातकर्मविधि १५७
 जातमात्रोच्च ४
 जाद्यमुङ्गरच्छस्तोत्र २०६, ५१०
 जाम्बुनन्दवन्महाविहार १५८
 जायसवाल ३४६
 जित्रासि भारो
 जिनक्षेत्र ५०६
 जिनजिग् रागरति २५२
 जिनवज्र ३५३
 जिनश्रीराज बोधिसत्व ७६
 जिनसर्वज्ञ थुव्तेन् ग्याङ्गोलामा
 ३२१
 जीवन्यास १६४, २२१, ३२५
 जीव भारो वणिक ५२२
 जुजु चन्द्र शम्शेर ३४१
 जुजु जयराजदेव १३५
 जुजु नरेन्द्रदेव १८६
 जुजु पार्थिवेन्द्र ६०५
 जुजु पृथ्वीपालसेन २६३
 जुजु भाष्कर वर्मा १२७
 जुजुमान ताम्राकार ५३४
 जुजु यक्ष मल्ल १५२
 जुजु वृषदेव १८६
 जुजु शिवासिह मल्ल १५४
 जुद्ध शम्शेर ३४१
 जेचुन्मा फामा धोल्मा ३४३
 जेतवन विहार ७६
 जेत्रवर महाविहार १६४
 जेपाचुनि ६१४
 जैत्रलक्ष्मीदेवी १४१
 जोगमान शाक्य ३८४

जोगवीर नाथो ३२०
जोगिवाजं २५१
जोतिराज १४२, ५२८
ज्योतिपाल बोधिसत्व २०, ४६
ज्योतिरश्मि ३४६
ज्योतिरश्मि प्रकाश ३२२
ज्योतिरश्मि स्वयम्भू ६, १५
ज्योतिर्मय तन्त्र ५६२
ज्योतिर्मय स्वयम्भू आदिबुद्ध
११२
ज्योतिर्लिङ्ग २२
ज्योतिराज बोधिसत्व ५६
ज्योतिरूप महादीप १६८
ज्योतिरूप श्रीस्वयम्भू २, ५,
२१, २४, २६, ५८
ज्वालावली ५६, ३६१, ५५३
ज्वालावली चैत्य २६६, ५३२
ज्ञानकाय ५०६
ज्ञानकाय मञ्जुश्री ५६७
ज्ञानकाय महामञ्जुश्री ५६५
ज्ञानडाकिनी ५०५
ज्ञानतीर्थ ३६
ज्ञानपतिदेव ५४२
ज्ञानमाला भजन ३५६, ३५७
ज्ञानमाला भजन सम्मेलन ४६२
ज्ञानमुद्रा ३६६
ज्ञानवती ५०६
ज्ञानवती भूमि विभुद्धि ३५२
ज्ञानश्रीमित्र ५५, ५६५
ज्ञानपाकु धनिचीभाः १५५
क्रिद्वलं अप्पो सही ४३३
कोरिम्पोछे ५३४

डा. हेनरी लुक्के ४२२
डेनिल राईट १६५
तक्षक नागराज ५६०
तक्षशील विहार ६१३
तङ्ग्युर १६३
तत्त्वसिद्धि ज्ञानतन्त्र ५०८
तथागत वज्र १६४
तन्त्रवज्रयान ३६१
तन्त्रयान ५०६
तन्त्रयान धर्म १६१
तन्त्रवज्रयानीपित ५७०
तपोवन ६७
तमनाकृषीश्वर १२१
तरुमूलश्री महाविहार १६७,
१७४
तलवार निमन्त्रणा ३२४
ताडवंश इतिहास ११२
ताम्रपत्र २३३, २६३, ५३२
ताम्रपर्णी द्वीप ३८८
ताम्राकार धनसिंह ३०१
तारा ३२७
तारादेवी ५६
ताराद्यः २२२
ताराधर्म ५३८
तारावीरसिंह कंसाकार ६०६
ताशिगोर्मो छोर्तेन् ५१५
ताहाचल ४८७
ताहाफ कलश २८३
ताहाः सिन्द्रु राचर्चन पूजा ३००
तिनिखेल लुमरि २७८
तिनिखेल श्रीमहाकाल २७८
तिलीपा ५७३

तिष्य ५६
तिष्यरक्षिता (असन्धिमित्रा)
७६, ११३
तीर्थयात्रा २७३
तीलाव्रत ५३८
तुपसन्तरा ८
तुषिता भुवन ६७
तेजकीर्ति विहार ६०७
तेजनरसि महर्जन ६०७
तेजनारां तुलाधर २६८
तेजसा भैरव ६०, ५०१
तेता थूर ८०
त्रयोदश चक्रावली ५६, १५६
त्रयोदश कोष्ठ ५६
त्रयोदश भूमि ४८६
त्राँकार ५४५
त्रिअग्नि ५६४
त्रिकाय दिव्यप्रतीक ११४
त्रिआश्रव ४८६
त्रिकुलनाथ ४६२, ५५०
त्रिधातुज्ञान ४८६
त्रिपदक्षिणा ६६
त्रिपिटक ५७०
त्रिवोधि चित्त उत्पत्ति ४८६
त्रिभुवन ज्वलित २८२
त्रिभुवनविलास दज्जाचार्य ३२३
त्रिमहाचैत्य २५८, ३२६
त्रिरत्नमान साहु ४७३
त्रिरत्नमूर्ति ५२६
त्रिरत्नवज्र ३४५
त्रिविमोक्ष ४८६
त्रिरत्न शरण २७

त्रिरत्न शासनकीर्ति ५८
 त्रिशरण गमन ४८६
 त्रिशरण बोधिचित्त ४८८
 त्रिसमाधि २८६
 त्रिसमाधि मण्डल २८५
 त्वङ्छा पूजा ५३८
 त्वाःदिवा मत ५५२
 थँवही ३६३
 थिहाय्के २२५
 थुग्श्रेल्हा ३२२
 थुग्जेछेन् छ्वेधुवलङ्ग गुम्बा
 ५६३
 थुङ्गको किराती राजा ८०
 थेरवादी शासन १६६, ५६३,
 ५६६
 थ्यासफू २४७
 दक्षिणमुख गणेश ५०२
 दशकर्म आहूति २२५
 दशक्रोध भैरव ४६, २०७,
 ५०८
 दशक्रोध जज्ञमण्डल तारण
 २८४
 दशज्ञान ४८६
 दशतथागत बल ४८६
 दशधारणी मुख ४८६
 दशपत्र देछाय् ३२४
 दशपर्यवस्थान ४८८
 दशभूमीश्वर २८६
 दशलक्ष्मी मैजु ४४३
 द्रव्यरत्न तुलाधर ३०४
 दशाकुशल ५८, ४८६
 दशांश होमादि क्रिया ३००

दसिपौ ४६३
 दहिनावर्त शंख ४७
 दानबहादुर मानन्धर ५१३
 दानशाला १८३
 दापा भजनखलः ४६२
 दाफस्वां ६३
 दाफाबाजं २५१
 दाफा भजन ५३८
 दिगपूजा २२८
 दिग्प्रताक ५६
 दिगबन्धन कीलं स्वाःगु १५७
 दिग्माला ५६
 दिगुद्यः २८७
 दिनयज्ञ १७२
 दिव्यज्ञान ४८
 दिव्यज्ञान प्रभाश्वर धर्मकाय
 ५०६
 दिव्यप्रातिहार्य ६७
 दिव्यमञ्जुषा ११५
 दीनचूड राजकुमार ३२
 दीपक मानन्धर ४६३
 दीपङ्कर ३१५
 दीपङ्कर तथागत ११७, ५२३
 दीपङ्कर बुद्धमूर्ति ३००
 दीपावली चाकःमत ५५०
 दुक्पा लामा ३४१
 दुःखचक्र ५०६
 दुरङ्गमा भूमि विशुद्धि २५३
 दुरुपात २२२
 दुमसिहाचार्य १६४
 दुर्गतिपरिशोधन चैत्य ५६४
 दुर्गतिपरिशोधन तारा ५३६

दुर्गतिपरिशोधन पाठ २२४
 दुर्गतिपरिशोधन समाधि २२४,
 २५०
 दुवाखा २२२
 दुसरा क्रिया १६४, ३२५
 दृष्टिदान १५७
 देआचाःगुठी १६२
 देगु सहाच २८७
 देवतात्मक तत्त्व ५५१
 देवताहूति १७४, २२५
 देवाधर्मा गुम्बा ५२२
 देवाधर्मा लामा २६७
 देवावतार २६८
 देवावतार बोधिसत्व ५३०
 देवपाल क्षेत्रीकुमार ८०
 देवपुत्रमार ५३६
 देवप्रतिमार पूजा २८७
 देवमदु कोथा २०१
 देवराजइन्द्र ५७४
 देव शम्शेर ३११
 दैत्यप्याखं २२३, २२४
 दोर्जेछेवाङ्गनोर्बु २४४
 दोलशिखर स्वामि १०३
 द्वःछि अमिताभ बुद्ध ६०६
 द्वःछि सहस्रभुज लोकेश्वर ६०६
 द्वय सत्य ४८६
 द्वादशाङ्ग प्रतीत्यसमुत्पाद ४८६
 द्वादशाक्षर (स्वरवर्ण) १८, ५१,
 ५६५
 द्वादशतीर्थ ५८
 द्वादश धारणी २०७, ५०७
 द्वादश पारमितादेवी २०७, ५०७

द्वादश भूमिदेवता ५०७

द्वादश भूमेश्वरी २०७

द्वादशवशिता देवी २०७

द्वादश वर्षीय महादान गुठी

४८४

द्वाल्याख २२२, ५५२

द्वाविंशति देवयोनिगण २०७

द्विपदानामग्र बुद्ध ४८८

धर्किकापः ४८७

धनदो चीवाहाः ८१, १६५,

२६६

धनदो महाचैत्य ६२

धनवत्त देवो ५६

धनसिंह वाहाः ३०३

धनादहः ११, १५, ५८, ११५

धमांसाहु ३२१, ३२७

धरधरश्रून्यगीत २८४

धर्मकाय वज्रधरपद २४७,

५०८

धर्मकोश संग्रह २६५

धर्मगण्डी (गम्भासि) ५५८

धर्मगण्डी महाकाल ५५७

धर्मचक्र १०४, ५०६

धर्मचक्र गुम्बा ५६२

धर्मचक्र पर्वतस्थान ५६२

धर्मचक्र प्रवर्तन ६७

धर्मचक्र महाविहार ७३

धर्मचक्र लोकेश्वर ५२६

धर्मचक्र शाक्यमुनि ६०६

धर्मचैत्य ३६१

धर्मदत्त बालक २४

धर्मदत्त राजा ६२

धर्मदेव राजा ६८

धर्मधातु २५२, ५०६

धर्मधातु चैत्य २६६

धर्मधातु जिनालंकृत चैत्य २६६,

५३२

धर्मधातु ज्ञान ४६७

धर्मधातु मण्डल ५६, २०६,

२८६, ३४२, ५००,

५०७, ५३८

धर्मधातु महामण्डल ४०३

धर्मधातु महाविहार १६३

धर्मधातु वागीश्वर मण्डल ५०५,

५६८

धर्मधातु वागीश्वर पादुका ३१४

धर्मधातु वागीश्वर महामञ्जुश्री

५२६

धर्मधातु वागीश्वर श्रीस्वयम्भू

महाचैत्य ४

धर्मधातु विहार १२५

धर्मधातु स्वयम्भू चैत्य २३

धर्म-नैरात्मा गुह्येश्वरी २३६

धर्मपत्र (सन्धिपत्र) २४०, २४१

धर्मपारङ्गत ५०६

धर्मपाल २०, ५०५, ५२८

धर्मभाणक ३३०

धर्मभाणकर ज्योतिरूप २०५

धर्ममण्डल ४७५

धर्ममानसि (धमांसाहु) ३१६,

३३८

धर्ममेघाभूमि विशुद्धि २५३

धर्मराजिक महाचैत्य २३

धर्मराजिक श्रीस्वयम्भू महाचैत्य

३४६

धर्मवंश महावंश ११३

धर्मवाचा २४०

धर्मश्रो प्रज्ञापारमिता ३०४,

३०५

धर्मश्रीमित्र १८, ५३६

धर्मसिद्धिसागर लामा २७०,

२७२

धर्मसिंह वज्राचार्य १२४

धर्मस्वामि चाग्लोत्सवा १२५,

१६१

धर्मस्वामि ऊयाङ्गचे छ्वेजे

रिम्पोछे लामा ३२१

धर्माकर १७

धर्माकर राजा ४६

धर्मा लोक मुखपरिवर्त ७३

धर्मोदया २८२

धर्मोदय रूप १३

धर्मोदय सभा ३८६

धागमार छाम्बे लोशाङ्ग यांफी

लामा ५३४

धातुचैत्य ३६१

धान्यकटक पर्वत ६०४

धान्यकटक चैत्य ८७

धान्यकूट पर्वत ७८

धान्यराश्याकृति स्तूप ३१३

धार्मिक अवशेषतय्गु संग्रह क्वथा

५६५

धारणी संग्रह २५२, ५८८

धिर्जलक्ष्मी महर्जन ३०६

धुव्पेवाङ्गछ्यु छेन्पो लामा

शाक्यश्री लामा ३२२

धृतराष्ट्र ५०१
 धेपुङ्गु गुम्बा ५६६
 ध्यनाचो १८
 ध्यानकुटी ६०२
 ध्यान मुद्रा ५६, ३६६
 ध्यानोच्च पर्वत ७, १०
 नगरकोट (महामण्डप गिरि)
 १७
 नगरपरिक्रमा समारोह १५७
 नन्दउपनन्द नागराज ३३
 नन्दावलि २८६
 नमःबुद्ध ३८५
 नमःबुद्ध चैत्य ३१६, ३२६
 नमःसंघाय ५६८
 नमःसद्धर्म पुण्डरीक सूत्राय
 ४५२
 नमहं गीत २८४
 नमामि जिनधातु ३६५
 नमामि श्रीहेरुक गीत २८४
 नमु-म्योहो-रेंग्ये-क्यो २५२
 नमो धर्माय ५६८
 नमोबुद्ध (नमुरा) ७०
 नमोबुद्धाय ६३, ५६८
 नमोरत्नत्रयाय ३
 नरेन्द्रदेव जुजु १६०, ११३
 नरेन्द्रदेव राजकुमार ६६
 नवकोष्ठ ५६
 नवखण्ड (नवव्याकरण) ४७५
 नवग्रह देवता २०८
 नवनाग ताडन २२३
 नवनाग पूजा २८६
 नवनागराज १०७, ५३३

नवसागर महाराणी ६७
 नवाक्षर चूडानाम धारणी ७४
 नवानुपूर्व विहार समापत्ति ४८६
 नागकलश २८३
 नागपुखू ११५
 नागपुर ६०, ५३३
 नागभुवन ६३, ५८०
 नागराज ६०
 नागलिपि ५८०
 नागवास तःदहं ६२
 नागवासहृद २, ११
 नागवृक्ष ७३
 नागसमाधि २२३
 नागसो लोचाव १२२
 नागहृद ५, ६, १६, १७
 नागार्जुन जङ्गल ८८, १६२,
 १६६
 नागार्जुन पाद ८८
 नाघिपर्वत ३६४
 नामसंगीतिदीक्षा ५२
 नामसंगीति मूर्ति ५६६
 नामसंगीति सूत्र ३४५
 नामाक्षरया विधि १५७
 नाय्वाजं २५१
 नारायण ५६०
 नारोपा ५७३
 नालन्दा विश्वविद्यालय १६३
 नालन्दा विहार ६१३
 नालादेस ७०
 नासःमहनी २८४
 निग्मापा शासन ३६३
 निग्लीहवा १३३

निग्लीहवा थुवे ८१
 नित्यध्यान श्लोक २८४
 नित्यपूजा १६६
 निधान तीर्थ ३३
 निधिदर्शन नागराज २
 नियमपाल ४
 निरञ्जन आदिवुद्ध ५६
 निरञ्जन ज्योतिरूप ५
 निरञ्जन निराशार ५०८, ५४२
 निराञ्जन २८५
 निरूपमा ५०६
 निरोध धातु ५०६
 निर्गनादयज्ञ ५३६
 निर्मलतीर्थ ३०
 निर्वाण ५४१
 निर्विकल्प ५४३
 निष्पन्नयोगावली ३५१, ५०७
 निसला २८३
 नीगःस्वने २२५
 नोतै पूजा २३१, २५४
 नीलपत्र ५३०
 नृत्यपद संचारण ५१५
 नृपवर अशोक ८६
 नेपाल ५०, ७१
 नेपाल देवता कल्याणविशतिका
 २६४
 नेपाल पुत्र शाक्यमुनि बुद्ध ३६३
 नेपाल बौद्ध समाज २५२
 नेपाल मण्डल १५, २४, ४८,
 २४४
 नेपाल महात्म्य ६६
 नेपाली युवक बौद्ध परिषद् ४३३

नैरञ्जना नदी ६७

नैरात्मा गुह्येश्वरी ६६

नैरात्मादेवी ६, २२

न्यागःमणि ११३

न्यग्रोधवृक्ष ५६

न्यास १८०

न्यासप्राप्त लुनाया २८३

न्यास निमन्त्रणा विधि २४८

न्यास पिकाय् १५६, २४८,

२७७

न्युनेव्रत १६१

न्युने लहाखाङ्ग गुम्बा ५६२

न्हिमालामा ६०६

न्हूओलामा २७६

न्हुछेकाप ११

न्हुछेराज तोर्थराज ३१३

पञ्चकषाय ५८, ५७३

पञ्चकषाय दोष २४४

पञ्चकाम गुण ४६३, ५७३

पञ्चकुल अधिष्ठातृ श्रीस्वयम्भू

१६७

पञ्चचिन्ह १०४

पञ्चतथागत २०६, २८३

पञ्चतथागत स्तुतिपञ्च ५६७

पञ्चतारा ५०७

पञ्चताल २५१

पञ्चतालवाद्य २२४

पञ्चतालया मन्त्र २८२

पञ्चतीर्थ २२४

पञ्चदश पताः २८४

पञ्चदृष्टि ४८६

पञ्चधारा १६३, २२२

पञ्चपुर ३१३

पञ्चबल ४८६

पञ्चबुद्ध ३२७, ५०७, ५४१

पञ्चबुद्धया बाहन ५०४

पञ्चबुद्धात्मक स्वयम्भू १०४,

२३७, ३६५

पञ्चबुद्धात्मक श्रीस्वयम्भू ६,

१८४

पञ्चबोधिसत्त्व २०६

पञ्चमहापातक २३४

पञ्चमहाविलोकन ६७

पञ्चरक्षा २८६

पञ्चरक्षापाठ १६३, २२३

पञ्चरक्षादेवी ५२४

पञ्चरक्षा महामायूरी ५२५

पञ्चवर्ण रश्मि ३४७

पञ्चवज्री ५०८

पञ्चविंशतिका स्वांप्वल २८६

पञ्चाशत् पञ्चकोटि पारमिता

शास्त्र ५७०

पञ्चशीर्ष पर्वत १६, ५८४

पञ्चस्कन्ध ४८६

पञ्चसाली रहस्य पूजा १७१

पञ्चसारीपूजा १७३, २२१

पञ्चाङ्गपात्र ५१३

पञ्चानन्तर्य २४१

पञ्चाभिषेक २८५

पञ्चामृत ५६३

पञ्चायत दर्शन ४३४

पञ्चेन्द्रिय ४८६

पञ्चोपचार पूजा २२३

पञ्जर महाकाल ५५७

पटुकोदों ८०

पण्डित अमृतानन्द वन्देजु १६५,

२६१, २६३

पण्डित श्रीजवाहरलाल नेहरू

३६८

पण्डित जिनश्रीज्ञान १६३, ४७५

पण्डित जोगमुनि वज्राचार्य

१६६, ६१०

पण्डित निष्ठानन्द वज्राचार्य

३४४

पण्डित बुद्धकीर्ति १६३

पण्डित बुद्धिराज शाक्य ३३१

पण्डित महाकरुणा १६३

पण्डित वनरत्न १६१

पण्डित रत्नाकर ३८०

पण्डित श्रद्धाकर वर्मा ५७१

पण्डित श्रीज्ञानकीर्तिसेन पाद

वज्राचार्य १३६

पण्डित सिद्धिहर्ष वज्राचार्य ३५१

पण्डित ह्याङ्गलोचन १६१

पताः छायागु ३२५

पद्म ५६

पद्मकुल ५४७

पद्मकुलनाथ ३०७

पद्मगिरि १७, ४६७

पद्मनृत्येश्वर २८४, ४४५, ५७३

पद्मपाणि लोकेश्वर ५३६, ५४७

पद्मपुर २३

पद्मवर्णविहार ६१३

पद्म शम्भोर ३५७

पद्मसम्भव १२१

पद्मसम्भवया मन्त्र ४६४

पद्माकृति चैत्य २६६
 पद्मावली ५६, ५५३
 पनसंचारण ५१५, ५१६
 पदसाधन कर्म १५७
 पदसाधन क्रिया २८४, ३२५
 पदसाधन नृत्य २८४
 पदसाधन सफू ३२६
 परमगुणालङ्कृत ज्ञानसंघ १६३,
 ४७६
 परमपीठ (नेपाल) १००
 परम भैरव २२२
 परमरती २८४
 परमार्थ नामसंगीति ५७०
 परमसौगतोपासक १३३
 परिकर्म पूजा २२३
 परिभोग चैत्य ३६१, ५६२
 परोपकार संस्था ३६३
 पर्वताक्ष दानपति ८
 पर्वताख्य बोधिसत्व १५
 पर्वस्थान ५६१
 पर्वस्थान नवचैत्य ५६४
 पलिगा १७१
 पलेस्वांसकि ३
 पलेस्वांपुखू ४८७
 पवन भैरव २४६, २८३, ५३६
 पशुपति २००
 पशुपति आर्यघाट ८५
 पशुपतिनाथ १३२, १३४
 पशुपति महादेव ८३, ८४, ५५६
 पाश्चाल देस २६
 पाश्चिक नाम यक्ष ५२४
 पाश्चिक महायक्ष ७६

पाण्डूरा ५६
 पाण्डूरा तारा ३२७, ५४७,
 ५४८
 पाणिग्रहणया विधि १५७
 पादपीठ लेख ५३२
 पादस्थापना १६४, १८०, २५१,
 ३२७
 पापनाशिनी ३६
 पार्थिवेन्द्र मल्ल २१७
 पारमिताचर्या ६७, ५३६
 पारलौकिक पोष्टवक्स ५७७
 पारवत महाविहार १४०
 पाल्चामत ५५२
 पाल्देन् येशेताशि लामा २५८
 पालि बौद्ध वाङ्मय ५३०
 पिखादेव १८४, २२२, २६१
 पिण्डपात्र १८६, ५३५
 पिण्डपात्रदान १८३
 पिण्डिकर्म मण्डल २५०, २७६,
 २८४, २८६
 पिण्डिकर्ममण्डल पूजा न्यास
 २५२
 पिम्बाहाः १३५
 पीठपूजा २२७, २८२, ३२५
 पुच्छाग्र चैत्य ५८६
 पुच्छाग्र पर्वत ६०
 पुच्छाग्र पर्वतस्थान ६६
 पुण्यतीर्थ २६, ५६०
 पुण्यमती १६३
 पुण्याग्रदूत ३८०
 पुरश्चरण १६४
 पुराण स्यंगु १८८, ५६०

पुरातत्त्व विभाग, ४१८, ४२०,
 ५१८, ५२४
 पुरातात्विक सम्पत्ति ४२०
 पुलुछे २८२
 पुलुं भुने १५६
 पुलांस्यंगु २८३
 पुष्पन्यास २८६
 पुष्पपूजामेघपूजा ८
 पुष्पसुन्दर साहु ३२७
 पुस्तकरत्न २००
 पूचथुर ८०
 पूचबही १६४
 पूजामण्डल ३४२
 पूजाभः २०२
 पूजोपचार ३०१
 पूजोपहार ३०१
 पूर्णकलश ५१३
 पूर्णघट ५११
 पूर्णसेवा ग्वया १५६
 पूर्णहृति २२५
 पृथ्वीनारायण शाह १४६, २४२
 २४५, २५८
 पृथ्वीनारायण शाही मोह २५२
 पृथ्वीपात्र (पिण्डपात्र) ५४७
 पृथ्वीपूजा १५७, १६४
 पृथ्वी भैरव ६०, ५०१
 पृथ्वी मण्डल ५३६
 पृथ्वी मल्ल १३३
 पोतोङ्ग २६६
 पौभाः २००, २०३, ५८०
 प्यंगः रत्नया ज्ञान ३४४
 प्यकुंलाःगु गालय् मण्डल ४६६

प्रचण्डदेव राजा ५६
 प्रज्ञापारमिता १८६, २५१,
 ४०३, ५१२
 प्रज्ञापारमिता सद्धर्मग्रन्थ ५८०
 प्रज्ञायान ५०६
 प्रज्ञास्कन्ध विशुद्धी २५२
 प्रज्ञोपायात्मक अनुत्तर सिद्धि
 ५०६
 प्रज्ञोपाय दृष्टि ३६१
 प्रज्ञोपाय भूमि विशुद्धी २५३
 प्रज्ञोपाय महाकरुणा ५०६
 प्रज्ञोपाय विनिश्चय सिद्धितन्त्र
 ५०८
 प्रज्ञोपाय स्वरूप ५७८
 प्रतापपुर ४२०, ५१०
 प्रतिपादपूजा २८३
 प्रतिभराड ४०५
 प्रतिष्ठाकर्म २८५
 प्रतिष्ठाकर्म विधि १५७
 प्रतिष्ठामन्त्र २८५
 प्रतिसरापता २८४
 प्रत्यङ्गिरा २५२
 प्रत्यवेक्षणा ज्ञान ४६७, ५४७
 प्रत्यालीढपद ५१७
 प्रत्येकबुद्ध २१
 प्रत्येकमान साहु ४७३
 प्रभाकरी भूमि विशुद्धी २५३
 प्रमुदिता भूमि विशुद्धी २५३
 प्रभावती ५, ४०
 प्रभावती देवी ४०
 प्रवज्याव्रत २१
 प्रभाश्वर धर्मकाय १८७, ४६०

प्रभाश्वर धर्मधातु ज्ञान ५७७
 प्रलम्बपादाशन ५६७
 प्रसाद वितरण ३२६
 प्रसिद्ध गुहा ४४२
 प्रहाण धातु ५०६
 प्राचीन लिपि ६१०
 प्रियजीव अशोक ११३
 प्रेक्षाराज्यलक्ष्मीदेवी शाह ४६६
 प्वाथ दने २५१
 प्वाथ पिङ्गु २४६
 फकिवाता २२२, २४६
 फणिकेश्वर वीतराग ४५
 फर्पिङ्ग वज्रयोगिनी २७८
 फलप्राप्त विधि १५७
 फसखा २२२, २८३
 फाग्पा सिक्कुन् (आर्यसिङ्गु)
 ३३७
 फाजिङ्गक गम् लिम्पो १६१
 फाहियान ४४८
 फास्यान् १६२
 फुलोच्च पर्वत ८, १०, १८, ३६
 फेल्ग्येलिङ्ग गुम्बा ६१२, ६१३
 फोना ध्यने २५०
 फोसिदो २२२, २८३
 बखुथां २२८
 वनजात्रा १६४, १८०, २८८
 बन्धजु १४६
 बन्धुदत्त ५६, १६३
 बन्धुमतिदेवी ३
 बन्धुमति नगर ३
 बन्धुमान राजा ३
 वनरत्न पण्डित १२३

वरोबुदुर महाचैत्य ४५०
 बलभद्रादि चतुर्देवता २०८
 बसुसिं २२८
 बहिर्धायितन ४८६
 बहीछे ५२६
 बाधां २८३
 बारांबुगः २३४
 वासुकी क्षेत्र ५०३
 विचाःपूजा १७५
 विदा वियाया २८८
 बिलंपति २२८
 बिसः १६६
 विसन्ध्र साहु २७५
 बुखम् विहार १२५
 बुङ्गम लोकेश्वर १३२
 बुद्ध अक्षोभ्य ६०६
 बुद्ध आदिबुद्ध २३६
 बुद्धघोष १२३
 बुद्धचतुर्व्यूह चैत्य ५३२
 बुद्धचित्राङ्कित पेटी १६०
 बुद्धजीवनी कला प्रदर्शनी ४५५
 बुद्धजननी मायादेवी ६०६
 बुद्धधर्म १८६
 बुद्धधर्म पत्रिका ३३२
 बुद्धपादुका २६४, ३६०
 बुद्धपादुका मण्डल ४८८
 बुद्धप्रति मार आक्रमण ५३८
 बुद्धबुद्धमहाबुद्ध पंचबुद्ध ८४
 बुद्धवोधि ५४१
 बुद्धमित्र ८६
 बुद्धवर ६१२
 बुद्धवर विपश्ची ८६

बुद्धशासन ७६
 बुद्धाचार्य (स्यंगुवदे) ४८४
 बुद्धिक्ष २०
 बुयिनाय २२२, २४६, २८३
 बुसाधन १६१
 वृक्षारोपन समारोह ४६७
 बोधिज्ञान ६००
 बोधिचर्याव्रत ३०, ७०
 बोधिचित्त २४७, ५३६
 बोधिचित्तरत्न तुलाधर ५६६
 बोधिपरीणामना गाथा १८२
 बोधिवृक्ष ५६६, ६००
 बोधिवृक्षमूल ६७
 बोधिमण्डप सिद्धि विहार ६१४
 बोधिसत्त्व २१
 बोधिसत्त्व चतुर्व्यूह चैत्य ५३२
 बोधिसत्त्व मञ्जुश्री १८७
 बोधिसत्त्व श्रीकरुणामय १०६
 बोधिसम्भार ६७
 बोध्यङ्ग मुद्रा ५६, ३६६
 बौद्धजातीय कलाशाला ३६१
 बौद्धधर्म ६६
 बौद्धवाङ्मय संस्कृत ग्रन्थ ५३०
 बौद्ध संगायन ७८
 बौद्धाचार्य अभयराज १६४
 ब्रतादेसया क्रिया १५७
 ब्रह्मचर्य भिक्षु ११८, १४६,
 १६५, ४८४
 ब्रह्मचारिणी चूडा भिक्षुणी ७४
 ब्रह्मरन्ध्र ३४६
 ब्रह्मादिदेवता २०७
 भगवती आर्यतारा ४३१

भगवती श्रीआर्यतारा १४१
 भगवान् लाल इन्द्रजी १६५
 भदन्त अश्वघोष २६३
 भदन्त श्रीज्ञानध्वज ५७०
 भद्राधिवास भवन ४२०
 भविष्य व्याकरण ४८
 भविष्य व्याकरण मुद्रा बुद्ध ५३१
 भव्यरूप आर्यतारा ३०६
 भष्म नदी प्रवाह २२४
 भाजुराम नापित ५१४
 भानिदास चित्रकार ३०८
 भायाश्र ५०
 भारद्वाज ५०
 भारो महापण्डित १६३
 भाल्वो पाल्मो गेलोडमा १६१
 भाष्कर मल्ल २२०, २२१, २३१
 भाष्कर मल्ली तका २३१
 भिक्षु अमृतानन्द ३८६
 भिक्षु उपगुप्त ७८
 भिक्षु गुणाकर ५७, १८७
 भिक्षु धर्मश्रीमित्र ५१
 भिक्षु धर्मालोक स्थवीर ५६६
 भिक्षु निचिदात्सु फुजि गुरु ४५२
 भिक्षु बुद्धभद्र १६२
 भिक्षु प्रियदर्शी महास्थवीर ४४६
 भिक्षु शान्तिशील १८६
 भिक्षु श्रीआरजयजु १४१
 भिक्षु श्री ति. योशिओका ४७६
 भिक्षु सुमतिशील ५६६
 भित्तिचित्र ४४२, ४४४
 भीमसेन थापा २७४
 भुजिमोल आखल १४३

भुलायगा २८७
 भुवनलक्ष्मी २२१, २८३
 भुवनाकृति (सुमेरु) चैत्य २६६
 भूगर्भ २२८
 भूदुसलया २८४
 भूपालेन्द्र मल्ल १६५, २१८
 भूपुराकृति मण्डल ४८८
 भूमिखेल ४८३
 भूमिशोधन पूजा २२६
 भूमिस्पर्श ५६, ३६६
 भृकुटी तारा ३०७
 भैषज्य १८६
 भैषज्यराज तथागत ३१५, ५२३
 भोतु पाँडे २७५, २७६
 मकुण्डामत ५५२
 मक्समुलर १६५
 मङ्गल बहुद्वार चैत्य २६६, ५१५,
 ५१६
 मङ्गलसाधन १६१
 मङ्गलाष्टक गाथा २२७, २८७
 मञ्जुघोष १३०
 मञ्जुपञ्चमी १७
 मञ्जुदेव शाक्यभिक्षु १६४
 मञ्जुपट्टन १६, १७, १८, १८७
 मञ्जुवज्र १३
 मञ्जुवज्र जामुनागुरुजु १६४
 मञ्जुश्री ४, ६, २८३
 मञ्जुश्रीकृत रम्यपर्वत २०५
 मञ्जुश्री चरणकमल ६०
 मञ्जुश्री ज्ञानसत्त्व ५६७, ५७०
 मञ्जुश्री पर्वस्थान १७, ७४,
 २२७, ३६२, ५८४

मञ्जुश्रीपादुका ५६५, ५८४,
 ५८७
 मञ्जुश्री बोधिसत्व १८८
 मञ्जुश्री भूमि ५२
 मञ्जुश्रीस्मृति चैत्य १७, ५२,
 ६६, ७४, ५८४
 मण्डलपद ५१५
 मण्डलागार ५१५
 मणिचूडहः ४६
 मणिचूड ४६
 मतपूजा ३२५
 मत्स्याहूति यज्ञ ४४
 मन्त्रधर पद्मसम्भव ११६
 मन्त्रयान ५०६
 मन्त्रविद्याधर कुल ५४६, ५६८
 मनोरथ तीर्थ ४३
 मनोहरा २१
 मय्जुदेव २२२, २८३, २६८
 मयन छत्रारोहण १५२, १७४
 मयूरध्वज स्तम्भ ३०५
 मर्त्यमण्डल (जम्बुद्वीप) ६७
 महर्षिमहेश योगी ४७०
 महाकरुणा (बोधिचित्त) ५६८
 महाकारुणिक अवलोकितेश्वर
 ५५०
 महाकवि अश्वघोष २६३, ६००
 महाकवि चित्तधर ४३७
 महाकूर्मपद ५१५
 महागुरु ५७६
 महागुरु मञ्जुश्री १६, ५१,
 १८८
 महाचीन ४, ६, ५१

महाज्ञान धातु ५०६
 महात १६५
 महादीमत ५५२
 महादेव २३२, २४५
 महाधातु ५०६
 महान् दार्शनिक ८७
 महापण्डित गौतमश्री शाक्यभिक्षु
 १६३, ३३२
 महापण्डित जयमुनि शाक्य १६४,
 २१२
 महापण्डित धर्मश्रीमित्र १८७,
 ५६५
 महापण्डित रवीन्द्रदेव १२५, १६१
 महापण्डित राहुल ११३, १६५,
 ३४८
 महापण्डित विभूतचन्द्रपाल १६३
 महापण्डित श्रीशाक्यभद्र २६६
 महापथु चैत्य ४५१
 महापरित्राण पाठ ५६६
 महापरिनिर्वाण ५५०
 महापरिनिर्वाण मूर्ति ६०८
 महापात्र मेघपाल वर्मा १३७
 महापात्र राजहर्ष भल्लोक १३७
 महापात्र विष्णुसिंह १५५
 महापूजा २६३
 महाप्रज्ञा वागीश्वर मञ्जुश्री ५५०
 महाप्रमाणा गृह ५७३, ५८०
 महाबलिपूजा २२१
 महाबुद्ध ३८५
 महाबुद्ध देवः २६६, ३८५
 महाबुद्ध मन्दिर २११
 महाबोधिभद्र १६४

महाबोधि मन्दिर २११
 महाभिज्ञ श्रीगुणाकर ५७३
 महाभिनिष्क्रमण ६७
 महामञ्जुश्री ५०६, ५६७
 महामण्डल (नगरकोट) ६, ५६८
 महामणि ४६६
 महामन्त्रि जयसिंहरामवर्द्धन
 १४०
 महामन्त्री मदनरामवर्द्धन १४०,
 ५१०
 महामायादेवी ६७
 महामायूरीपाठ २२७
 महामुद्रा बोधिचित्त वज्रकुल
 ५६८
 महामुद्रा शासन ३६६
 महामेघ मण्डल ६३
 महामेघ मण्डल पूजा २२०
 महामेघ मण्डल साधन ६५
 महामेघ बलि स्थापना २२५
 महामेघ साधन १७०, ४८६
 महामेघ मूत्र १७०, ५८०
 महामौङ्गल्यायन ६८
 महायान १६६, ३६१
 महायान चर्या २०
 महायान प्रणिधान २४७
 महाराज क्राचल्ल १३३
 महाराज जयस्थिति मल्ल १४३
 महारानी अनन्तप्रियादेवी ५१०
 महारानी गङ्गादेवी १६२
 महारानी लालमतीदेवी ४७६
 महारानी संसारदेवी १५१
 महालक्ष्मी ५१२

महावस्तु अवदान ४०३
 महावैरोचनात्मा मञ्जुघोष
 २०६
 महाशून्यता (प्रज्ञाज्ञान) ५६८
 महाशून्यतावाद १८८
 महासचिव उथान्त ४२४
 महासत्त्व ७०
 महासन्धि ५०६
 महासन्धि धातु ५०६
 महासम्बर २५६, ५०५, ५१०,
 ५८०
 महासम्बर तन्त्र २०२
 महासामन्त अंशुवर्मा १०३
 महासिद्ध गुहा लुप्ति १८८
 महासिन्दुरार्चन १८६
 महासुख अनुत्तर तत्त्व सिद्धि
 ५०६
 महीन्द्र महास्थवीर ६००
 महीपतेन्द्र २१७
 महेन्द्र मल्ल १४६
 महोष्णीष कुल ५६८
 माकःदलू ५५२
 मार्गकृष्ण नवमी १४
 माघशुक्ल पञ्चमी १६
 माणे चक्का ५५०
 माणे धुङ्गयुर ४६४
 मातृकापूजा २८५
 मानगृह ४२०
 मानदेव राजा ६८
 मान विहार ६८
 मानसरोवर ३
 मानवीर मानन्धर ५२३

मामकी ५६
 मामकी तारा ३२७, ५४५,
 ५४६
 मामकीपूजा २८४
 मार्मलहाखाड ३१५, ५२२
 मायाजाल तन्त्र १८, ५७०
 मारपरिवर्त ५३८
 मारीचपताः २८४
 मांसाहृति ४५, १६३
 मुखोऽष्टि ८४, ८५
 मि छुड्या नियम १५७
 मिनाग्लोचन ११७, १६०
 मिलेपोसा (आर्यमैत्रेय) ११५
 मुद्रापूजा २८४
 मूगः खः ग्वय् २४६
 मूर्ति संग्रहालय ४१६
 मूल सर्वास्तिवाद ७०
 मूलसिद्धि दने ३२५
 मूलश्री महाविहार ६०२
 मृगस्थली २२, १०७
 मृतसञ्जीवनी ४६७
 मृत्युमार ५३६
 मेघपाल वर्मा १३५
 मेरुदण्ड (यष्टिदारु) ५७५
 मेषसंक्रान्ति ७, २२
 मेघसर्वज्ञ लामा २४३
 मैत्रिगुम्बा ५६६
 मैत्रिचन्द्र शाक्यभिक्षु १३०
 मैत्रेय १८६
 मैत्रेय बोधिसत्त्व ७२, १८८
 मोक्षदादेवी १०, ५३६
 मोक्षानन्द वज्राचार्य ३१२

मौङ्गल्यायन ५६६, ५६५
 म्वास्याप्वाःमत ५५२
 यक्षदत्त ब्राह्मण ५०
 यचि कयाया २८२
 यचि लितय् २८७
 यज्ञशाला ५६१
 यम्पि महाविहार ११७
 यलसि १३८, १६२, १८०,
 २२२
 यलसि काय्गु विधि २४८
 यलसि सालाया विधि १५६
 यंलासेवा ५३८
 यवनाधिराज शमस्मुद्दीन १३७
 यवद्वीप ३८८
 यवसि दुसाय्के २५०
 यवसि ध्यनेगु २४६
 यवसि भण्मप्रवाह २५०
 यवसि संस्कार याय् २५०
 यवसि स्वाय् २४६
 यशोवती ८
 यष्टिदारु ५६, १३०, १५५,
 २६६
 यस्मात्केकराक्ष श्लोक २८४
 युगनेता श्री ५ महेन्द्र ४०१
 युवराज्ञी मार्गरेथ ४२८
 युव कलाकार समूह ४५५
 युवान्च्वाड ४४८
 यूप (योसि) २४३
 योगचर्या २०
 योगचर्या भूमि ५०६
 योगनरेन्द्र मल्ल १६५, २१६
 योग मुद्रा ३६६

योगरत्न अनुस्मृति चैत्य ६०३
योगरत्न वज्राचार्य ६०२
योगाम्बर २८६, २९६, ५०५,
५०६

योगाम्बरतन्त्र ५७१
योगाम्बर श्रोत्रानडाकिनी २७३
योगाम्बर स्थान ५७१
योगिनीयोगतन्त्र ५०८
योतालिवि सुन्दर चैत्य २९६
योसिं २२२, २९०
योसिं अग्नि संस्कार २२३
रक्षाचक्र विधि ३२२
रक्षाजन्त्र ४८६
रजप्रवाह २८६, ३२५, ३२६
रञ्जना आखः ३९३
रञ्जना लिपि १३०, २४२,
३२७, ५१३
रणजीत मल्ल २३७
रणबहादुर शाह २६०
रत्न ५९
रत्नकुल ५४५
रत्नगिरि विश्वशान्ति स्तूप
४५१
रत्नघट ३३
रत्नचूड ३२
रत्नदण्ड छत्र १३८
रत्नधृक् द्वेषरति २५२
रत्नन्यास २२४, २५०, २७८
रत्नपाणि ५, ५४५
रत्नपीठ ३१३, ५२५
रत्नभद्र ५७१
रत्नमण्डल ३०१, ५२३

रत्नसम्भव ५९, २०६, २८२,
५४५
रत्नसरोज ५
रत्नाकर १९३
रत्नावती २३, ५४५
रति शर्मा ब्राह्मण २३, ६०३
रथन भारी १८१, ४९८
रम्यकूटागार चैत्य २९६
रवीन्द्रदेव १२५
रहस्यपूजा १७५, ५३८
राजकन्या भृकुटी १०३
राजकुमार मानदेव ९७
राजकुमार यक्ष मल्ल १५१
राजधानीपट्टन १८
राजपण्डित श्रीमहाबोधिदेव १४१
राजमाता भुवनलक्ष्मी २२४
राजविहार ९६, १०६
राजा जयस्थिति मल्ल १४९
राजा धर्मदेव ९६
राजा नरेन्द्रदेव १०७, ११०
राजा प्रताप मल्ल २०१
राजा प्याखं २२४
राजा भाष्कर मल्ल २२४
राजा लक्ष्मीनरसिंह १७०, १७३,
१७६
राजा वृषदेव ९१
राजा स्रचंगम्पो १०३
राजेन्द्रविक्रम शाह २७५, २८०,
२९०
रात्रिक्रिया शिराहूति ३२६
रामडोली १२१
रामसुन्दर साहु ३२०, ३२३, ३२७

रिमुचि धुव्थोलामा ५९३
रुखकमल ५
रुद्रदत्त राजा ११७
रुद्रवर्ण महाविहार २९६
रूपराज दंगुरी १६७
रूप्यपत्र ५३२
लंखनसमुद्र २३६
लगंथूर ८०
लक्षावती प्रज्ञापारमिता १९३
लक्षाहूति यज्ञ १५७, २९०
लक्षाहूति विधिकर्म १८०
लक्ष्मीनरसिंह राजा १६३
लक्ष्मीनरसिंह प्रताप मल्ल १८१
लक्ष्मीश्री १९३
लयसेवा १५७
ललितपुप ११०, ११७, ५७१
ललिताख्य ११७
ललितविस्तर ३३१, ३४४,
४०३
लसकुस २२२
लस्ताःपूजा १७७
लानिमाया कंसाकारनी ५९७
लामा कुस्योग्काग्यु ५३४
लामा चोङ्खापा ६१४
लामाजुया पिण्डिकर्म २५२
लामा थिलेन्द्रज्ञ २७१
लामा देवाधर्मा ३१५
लाय्कू पूजा ३२४
लितय् पूजा ३२५
लिपिशाला ६७
लुआखल ५३०
लुखानी ३५३

लुखाखलु ५२
 लुम्बिनी ६७, १३३, ४२४,
 ४२५, ४४८
 लुँस्वांमा २६०
 लोकनाथ १०८
 लोकोत्तर विधि २८७
 लोकालोककुल ५४४, ५६८
 लोकालोकोत्तर कुल ५४७,
 ५६८
 लोचनी ५६
 लोचनी तारा ५४३
 लोहपत्र ५३२
 लोहाग्निरक्षा २८३
 त्वहंहिति ४८८
 त्वहंशूल गणेश १६
 ल्हाम्रिम्छेन्पो ६१४
 ल्हासा ११७
 ल्हासापाकु १८
 ल्हुति १६२
 ल्हुतिमहासिद्धगुहा ३३५
 वज्र ५६, ५०८, ५०९
 वज्र आयूरीषमणि लामा २३२,
 २४२, २४६, २४७
 वज्रकूट ४६७
 वज्रकूट पर्वत ८७
 वज्रकूट प्राकार ५७४
 वज्रकुल ५४३, ५४४
 वज्रखड्ग मञ्जुश्री ५६७
 वज्रगीत नृत्यनाथ आराधना
 २८२
 वज्रगुरु ५७८
 वज्रघण्ट २५१

वज्रघण्टी १६१
 वज्रच्छेदिका प्रज्ञापारमिता
 ५०८
 वज्रडाकिनी ५०६
 वज्रतीक्ष्ण मञ्जुश्री ५६७
 वज्रधातु चैत्य २६६, ५३२,
 ६०५
 वज्रधातु देगुरिक्रम १६०, १८१,
 ३२३
 वज्रधातु देगुरिक्रमविधि १३६
 वज्रधातु देगुरिक्रमानुसार पूजा
 २४८
 वज्रधातु देगुरि पाठ २८३
 वज्रधातु देगुरि पूजा २४६
 वज्रधातु भुवन ५४१
 वज्रधातु मण्डल २८३, २८७
 वज्रधात्वेश्वरी ५४२
 वज्रधात्वेश्वरीमन्त्र २५२
 वज्रधातु समाधि २४६
 वज्रपर्यङ्क आसन ५४४
 वज्रपर्वत ८७
 वज्रपर्वत श्रीपर्वत ३६४
 वज्रपाणि ५०६, ५४४
 वज्रपाद ३०
 वज्रपाद पण्डित २६
 वज्रभूमि ५०६
 वज्रमलः १५५, १६०
 वज्रमय भूमि विशुद्धी २५२
 वज्र महायक्षणी २८७
 वज्रमुकुट २८५, ४३१
 वज्रयान ८७, १६६, ५०६
 वज्रयान धर्म १६०

वज्रयोगिनी १६४, २००, ५०६,
 ५७३
 वज्रयोगिनी गः २३४
 वज्रवाराही १०५
 वज्रवाराही मण्डल २८६
 वज्रवाराही समाधि २८४
 वज्रवीर ५०६
 वज्रवीर महाकाल १६४
 वज्रशील महाविहार १२४,
 ३६२
 वज्रशेखर ५०८
 वज्रसत्त्व ५०६
 वज्रसत्त्व मन्त्र ४६४
 वज्रसाधु महाकाल ५५७
 वज्रसिद्धि नृत्यनाथ २८८
 वज्रसूचि २५१
 वज्रसूचिपद २८३, २८५
 वज्रस्फोट सिखः ४८६
 वज्रहूँकार मुद्रा ३६६
 वज्राचार्य १४६, १६५, ४८४
 वज्राचार्य कुलमान ३१०
 वज्राचार्यपद ५७
 वज्राचार्य रत्नचूडामणि ४४३
 वज्राधिष्ठान २८३
 वज्रानल ५६२, ५६३
 वज्राभिषेक ५६
 वज्रावली ५६, १६१, ५०७,
 ५५३
 वज्रावली मण्डल ११७, १६०
 वज्रासन ५३८
 वज्रोदक १४
 वनदेवीपूजा २८०

वंजाला वनाया २८८
 वन्देदहं तत्त्वरूप ६८
 वरदमुद्रा ५६, ३६६, ५४५
 वरदादेवी १०
 वरदामोक्षदा देवी ६०
 वशिकाचल ६५
 वशिगाल २६८
 वशिदेव २४६
 वर्षापणविधि सफू २०३
 वसन्ततिलक छन्द ६
 वसन्तर्तु महाकाल ५५७
 वसन्त सेवा ५३८
 वसाः २८३
 वसुन्धरादेवी ८, ५१२
 वसुन्धराकल्प सूत्र ५१२
 वसुपुर ६०, ५११
 वसुवन्धु ८६
 वसुवन्धु स्मृति चैत्य ५८३
 वाक्द्वार २१
 वाग्मती २१, ३८, ५६०
 वागीश्वर २५२
 वागीश्वर कीर्ति १६३
 वागीश्वर मञ्जुश्री ३१३, ५६७
 वागेश्वर ताहाफ २२२
 वाङ्महानचे ११४, १६०
 वाचिक शासन कीर्ति ११४
 वादीसिंह ६८
 वा पिङ्ग्या (सिनाज्या) २३८
 वायुपुर ६०, ५१४
 वायु भैरव ६०, ५०१
 वाराणसी ५१, ५६
 विक्रमशील विहार १८७,

६१३
 विक्रमशील महाविहार ५१,
 १२२, ४७५
 विक्रमशील विद्यापीठ १२२,
 १६०, १६३
 विघ्न भुवन ५८०
 विघ्नोत्सारण ५१५
 विचित्रकर्णिकावदान ३३१
 विजयकामदेव १३१
 विद्यादेवी १८
 विद्याधरी देवी २०६, ५७३
 विद्याध्ययन केन्द्र १८७
 विद्वत्वर मञ्जुश्री ८६
 विद्वान् कवीन्द्र मल्ल ५०७
 विधुर २०
 विनयतोष भट्टाचार्य १६५,
 ३५०
 विपश्यनाधूर १६५
 विपश्ची तथागत ३
 विपुलरत्न छत्रयुक्त धर्मधातु
 चैत्य ६०३
 विमल प्रभानन्द मूलाचार्य २४८,
 २५०
 विमलाभूमि विशुद्धी २५३
 विमलावती ४३
 विमुक्तिज्ञान दर्शन विशुद्धी २५२
 विमुक्ति स्कन्ध विशुद्धी २५२
 विरंचिवसुवन्धु ८६
 विराग धातु ५०६
 विरुद्धक ५०१
 विरूपाक्ष ८२, ८४, ५०१
 विरूपाक्ष मूर्ति ५५६

विशति नमस्कार ५७०
 विशत्याकार सम्बोधि ४८६
 विशाल अक्षोभ्य मूर्ति ४६८
 विशाल बुद्धमूर्ति ५६६
 विशाल बौद्धतीर्थ यात्रा ३६०
 विशाल रूप सुवर्णवज्र ५०७
 विशाखा अनागारिका ६०६
 विश्वकर्मा पूजा २२७, ३२४
 विश्वकर्मा ५७५
 विश्वकर्मा देवता २२७
 विश्वकर्मावतार ११
 विश्वचिनीदेवी २०
 विश्वभू तथागत ८, १५
 विश्वपाणि ५४६
 विश्वरूप चिन्तामणि ११
 विश्ववज्र ५६, ५४६
 विश्वशान्ति चैत्य ४५२
 विश्वशान्ति महाविहार ५३५
 विश्वसरोरुह २८२, २८४
 विष्णु ब्राह्मण रूप २४३, २४५
 विष्णुसिंह मुकुन्दसिंह १६६
 विसमपद ५१५
 विहङ्गम हृदय स्थान ५११
 विहार पूजा ३६०
 वीर लाङ्गोरी २६५
 वीरसम्बर ५८०
 वृषदेव राजा ६८, ४००
 वृष्टि चिन्तामणि २०१
 वृष्टिदेव १०
 वृहत्स्वयम्भू पुराण ११२
 वैदूर्यमणि ११७
 वैरोचन तथागत ५६, २०६,

२८२, २८३, ३०८,
३२४, ३२७, ५४१
वैरोचन तथागत सुपुत्र ४२
वैशाखपद ५१५

वैशाली महाविहार २७०,

२७२

वैश्रवण ५०१

व्याकरण अभिषेक २८

शङ्करदेव राजा ६३, ६८

शंखोच्च पर्वत २२

शक्तिदेव ५६, १०८

शतसाहस्रिका प्रज्ञापारमिता

४७५

शताक्षर धारणी २८३

शरप्रवेश त्रिस्थान १८

शाक्यकुल ६७

शाक्यया शासन ३६३

शाक्यभिक्षु १४६, १६५,

४८४

शाक्यभिक्षु चिन्तामुनि ५४०

शाक्यभिक्षु मञ्जुदेव १८०

शाक्यभिक्षु श्रीमध्वजु १४२

शाक्यभिक्षु श्रीशासनधर २४६

शाक्यभिक्षु श्रीसिद्धजु ३३३,

६०५

शाक्यमुनि ३१५

शाक्यमुनि तथागत ५२३

शाक्यमुनि बुद्ध ६७, ७२, ७६,

५६६

शाक्यश्री गुरु ३२७

शाक्यश्री लामा ४७३

शाक्यश्रीस्मृति चैत्य ३२६

शाक्यसिंह तथागत १८८, ५३८

शान्ततीर्थ ५६०

शान्तनिर्वाण ६७

शान्त रक्षित् ११६, १२१

शान्तरूप गुह्येश्वरी १३

शान्तश्री आचार्य ६२

शान्तश्री गुरु ६२, ५७६

शान्तश्री भिक्षु ५८, ५६, ५७३

शान्तिकर आचार्य ७६, २०३

शान्तिकराचार्य ६२

शान्तिकर गुरु ५७८

शान्तिकर भिक्षु १८८

शान्तिकर महाविद्यालय १८६,

१६०, १६४

शान्तिकर महाविहार १४२

शान्तिपुर ६०, ६२, २०१, २१०

२८६, ५७२

शान्तिपुर गुफा ६०, २६०,

३६६, ४२०

शान्तिपुर चक्रसम्बर २५६

शान्तिपुर महाविहार ५२६

शान्तिपुर महासिद्ध गुहा ५७६

शान्तिपुर स्थान ३६२

शान्तिपुरी १८५, २२२, २४६,

२८३, २६८

शान्तिपुरी विहार १२३

शान्तिपूजा २२३

शान्तिवलि १६६

शान्तिभद्र १२२, १६१, १६३

शान्ति महाचैत्य ४५०

शान्तिशोल भिक्षु ६१, ४००

शालवृक्ष ८

शालिकदलू ५५२

शालिपुत्र ५६६, ५६५

शाश्वतवज्र आचार्य १६४

शासन रक्षकपाल राहुल ३२०

शाहज्यादी असराफ ४६१

शिखरकूट चैत्य २६६, ५३२

शिखरनारायण १२१

शिखी तथागत ५, १५

शितलामाजु २६४

शितला रोग २६४

शिरीषवृक्ष २०

शिलाकार पर्शुमुनि ५६१

शिलाङ्कुश ५६५

शिलापत्र ३४६

शिलालेख ५३२

शिव भारो सत्यहरि भारो १६८

शिवलिङ्ग ८४, १३७

शिवसिंह मल्ल १५८, १६०

शिवमण्डल १८५

शीलमञ्जु १६३

शीलसागर १२३, १६१

शीलस्कन्ध विशुद्धी २५२

शुद्धोदन महाराज ६७

शुभलाभ १८

शुभश्रीमित्र ११८, १६४

शूक्ष्म बुद्धगया मन्दिर ६०६

शून्यताज्ञान ५४१

शून्यता महाकरुणा ५०६

शून्य निरञ्जन ४

शून्य भैरव ६०, ५००

शून्य भैरव शक्ति सहित ५०१

शून्याकार जन्त्र २०१, ५८१

शेकु धोर्जे छ्याङ लामा ५६७
 शेधुव्छेखोर धार्ग्येलिङ
 चुगल्हाखाङ ५३५
 शेराव्दोर्जे ३२१, ५२३, ५६३
 शेपाहूति २२४, २८३
 शैवधर्म १८६
 शोधनतीर्थ ५६०
 शोभानरजु ४८८
 शोभावती नगर ५०
 शोभिताराम विहार ५०
 श्यामकर्ण सल ६३
 श्रद्धादिवस जात्रा ४४५
 श्रामणेर १४६, १६५, ४८४
 श्रामणेर जयमुनि शाक्य २११
 श्रावक १६६, ३६१
 श्रावकचर्या २०
 श्रावस्ति ७१
 श्रचुङ्चेन् ग्याल्पो १८६
 श्रीअद्वयवज्र ५७०
 श्रीअनुपरम रक्षित् ५७०
 श्रीअभयजु शाक्यभिक्षु १५३
 श्रीआदिनाथ लोकेश्वर १६१
 श्रीआदिबुद्ध ज्योतिरूप ६२
 श्रीआर्यावलोकितेश्वर २६,
 ४४, ४६, ४८
 श्रीउग्रतारा ५१०
 श्रीउनू ४१७
 श्रीएकजटा ५१०
 श्रीकरुणामय ४२, ४७, १०८,
 १८६, ५६०
 श्रीक्रगपा थाम्चे ख्येन्पा २४५
 श्रीकालचक्र मण्डल ५६८

श्रीकाष्ठमण्डप १३८
 श्रीकीर्तन महाविहार ६०५
 श्रीकीर्ति १६३
 श्रीकैलाशेश्वर १०३
 श्रीखर्जूरिका विहार १०३
 श्रीगणेश ४५
 श्री ५ गीर्वाणयुद्ध विक्रम २६३,
 २७५
 श्रीगोमाता १६६
 श्रीगोरखनाथ २४१
 श्रीचन्द्रकान्ता भिक्षुणी १६१
 श्रीचरणकमल पादुका ४८
 श्रीचाउएनलाई ३६३
 श्रीचित्तधर 'हृदय' ४७१
 श्रीचुतुनान् ३६५
 श्रीजयस्थिति मल्ल १३८
 श्रीजयाज्जुनदेव १३८
 श्रीजयानन्द वज्राचार्य १३६
 श्रीज्योतिरूप स्वयम्भू ३५
 श्रीडोम्बिहेरुक ५७०
 श्रीतरुमूल महाविहार १५८
 श्री ५ त्रिभुवनवीरविक्रम ३८६,
 ४६७, ६१०
 श्रीत्रिरत्न ४५
 श्रीद्रव्यधर साहु ४३७
 श्रीदुक्पा लामा ३१७
 श्रीदेवी १८
 श्रीदैवज्ञ केशरी पण्डित २६३
 श्रीधनसिंह ताम्राकार ३००
 श्रीधर्मचक्र महाविहार २०६
 श्रीधर्मधातु १३७
 श्रीधर्मधातु वागीश्वर १

श्रीधर्मधातु वागीश्वर महामण्डल
 ६०
 श्रीधर्मधातु वागीश्वर १५०
 श्रीधर्मधातु वागीश्वर स्वयम्भू
 २४७
 श्रीधर्मधातु वागीश्वर ५०७
 श्रीधर्मधातु विहार ४७६
 श्रीधर्मधातु स्वयम्भू स्तूप १३८
 श्रीधर्ममान साहु ४७३
 श्रीधारामानेश्वर १०३
 श्रीनरसिंहदेव १०३
 श्रीनीलसरस्वती ५१०
 श्रीनैरात्मादेवी २०
 श्रीपतला लामा ३१७
 श्रीपद्माचल शिखर १५०
 श्रीपर्वत ८७
 श्रीपर्वतेश्वर १०३
 श्रीपशुपति १०३
 श्रीपशुपतिनाथ १००, २४१
 श्रीपशुपति भट्टारक १५०
 श्रीप्रज्ञापारमिता १५, ३०
 श्रीपारावत महाविहार १२८
 श्री ५ पृथ्वीनारायण शाह २४०,
 २४१
 श्री ५ बडामहारानी ऐश्वर्य ४६३
 श्रीबुङ्गम लोकेश्वर १०५, ११८
 श्रीबोधिसत्व मञ्जुश्री ५७०
 श्रीबौध २४०
 श्रीभुम्भुक्तिजलशयन १०३
 श्रीमत्स्येन्द्रनाथ १०७, २४१
 श्रीमती गौरी उपाध्या ४२६
 श्री ३ महारत्न चैत्य २४३

श्रीमहालक्ष्मीदेवी ३६
 श्रीमहासम्बर २०२
 श्री ५ महाराजाधिराज वीरेन्द्र
 ४६३
 श्री ५ महेन्द्र विक्रम ३६०,
 ६०२
 श्रीमान् आलीढपद ५१५
 श्रीमानचन्द्र १३६
 श्रीमानविहार १०३
 श्रीमार्सल अयूब खाँ ४२२
 श्रीयलखचो गिरिशिखर १४०
 श्री ५ युवराजाधिराज वीरेन्द्र
 ४२८, ४४४, ६०८
 श्रीयोगाम्बर १०८
 श्रीरक्तमौलिधर २७०
 श्रीरणबहादुर शाह २७१, ३१५
 श्री ५ रत्नराज्यलक्ष्मी देवी
 शाह ६०२
 श्रीरत्नाकर गुप्त ५७०
 श्रीरामेश्वर १०३
 श्रीलङ्का चैत्य ६०१
 श्रीलङ्का चैत्य विहार ५६८,
 ५६६
 श्रीलक्ष्मीनरसिंह मल्ल १७२,
 १७७
 श्रीलीलावज्र ५७०
 श्रीलोकदर्शन वज्राचार्य ३६०
 श्रीवज्रसत्त्व ३१०
 श्रीवज्रयोगिनी ४५, ३०१
 श्रीवसुन्धरादेवी ३६
 श्रीवाग्वती पारदेव १०३
 श्रीविघ्नान्तक ४६

श्रीविद्याधरीदेवी ३०
 श्रीवीररत्न लामा २४५
 श्रीवैरोचन तथागत ५४१
 श्रीशंखजु शाक्यभिक्षु १५३
 श्रीशाक्यसिंह तथागत २६४
 श्रीशाक्यश्री लामा ३१७
 श्रीशान्तिकर १८६
 श्रीश्यामार्पा लामा २७०, २७२
 श्रीश्यामार लामा १७२
 श्रीसंजजु १५८
 श्रीसमन्तार्हर्ष वज्राचार्य ३०३
 श्रीसम्बरमण्डलाकार १६६,
 २७३
 श्रीसाम्बपुर १०३
 श्रीसाह्येगुँ गिरि ३६६
 श्रीसाह्येगुँ धर्मधातु १३८
 श्रीसाह्येगुँ धर्मधातु वागीश्वर
 २१४
 श्रीसाह्येगुँ महाविहार ५३१
 श्री(साह्ये) गुँ विहार
 श्रीसाह्येगुँ शिखर १३८
 श्रीसिम्बुछेत्र २४०
 श्री ५ सुरेन्द्रविक्रम ३०२
 श्रीसूर्यरश्मि २०१
 श्रीसूर्यासन विहार १६१
 श्रीस्यंगुदेव २३०
 श्रीस्वयम्भू ५६
 श्रीस्वयम्भूक्षेत्र ५७
 श्रीस्वयम्भू ज्योतिरूप ६, २७,
 २४१, ५४०, ६०३
 श्रीस्वयम्भू देवता ४८४
 श्रीस्वयम्भू धर्मधातु १०, ५१

श्रीस्वयम्भू धर्मधातु मण्डल ४५
 श्रीस्वयम्भू धर्मधातु महाचैत्य
 ६८
 श्रीस्वयम्भू धर्मधातु वागीश्वर
 ७४, ४८६
 श्रीस्वयम्भू धर्मधातु वागीश्वर
 स्थान १८७
 श्रीस्वयम्भूनाथ २४१
 श्रीस्वयम्भू महाचैत्य ५८, ६२,
 ६६, ११४, १२५, १४०,
 २४२, २६७, २६६,
 ३०१, ३११, ३२२,
 ५४०
 श्रीस्वयम्भू महाचैत्य चित्र ४००
 श्रीस्वयम्भू वैरोचन १२४
 श्रीस्वेनाम्सि लामा ४६४
 श्रीहारितीदेवी ४२१
 श्रीहंसगृह १०३
 श्रीहेरूक कूटागार मण्डल ३२२
 श्लेष्मान्तवन २२
 श्वेतचैत्य ६०१
 श्वेतमहाचैत्य ३८४
 श्वेतगाउँ आनन्दाभय चैत्य ४५०
 श्वेतकेतु बोधिसत्त्व ४२६
 षट् क्लेशमल ४८६
 षट् क्लेश महाभूमि ४८६
 षड्गतिलोक ५७७
 षट् चक्रमण्डल ५६६
 षट् धातु ४८६
 षट् पारमिता ४८६
 षट् भद्रौषधी २६६
 षट् भावना ४८६

षट् विज्ञान ४८६
 षट् संयोजन ४८६
 षट् संस्पर्श प्रत्यय वेदना ४८६
 षटांजु (सुनयश्रोमित्र) ११८
 षडनुशय ४८६
 षडक्षरी मन्त्र २७, ४६४
 षडक्षरी मन्त्रजाप ८३
 षडक्षरी लोकेश्वर ५३६
 षडभिज्ञा ४८६
 षोडशपूजादेवी ५२४
 षोडश बुद्ध २०७, ५०७
 षोडश बोधिसत्व ३०७, ५०८
 षोडश महास्थवीर ५३४
 षोडशलास्या ३६३
 षोडशलास्य पूजा ४०३
 संकाश्य नगर ६७
 सखाः दय्केगु थाय् ५३२
 सखाःपा १७८, ५१०
 संघ-आर्यावलोकितेश्वर २३६
 संघनायक श्रीआर्यावलोकितेश्वर
 ३०४
 संघभद्र ८६
 संघमित्रा ६००
 संघश्री १६३, ३०५
 संजीव २०
 सजीव मूर्ति संग्रहालय ३४६,
 ३५१, ५१८
 सद्गुरु मञ्जुश्री ७६
 स्तूपलक्षण कारिका विवेचन
 २५१
 सत्य धर्म बोधिसत्व ३
 सत्वक्षेत्र ५०६

सत्वधर्म ५३८
 सत्यया शरणनाथ २४७
 सत्वपर्यङ्क आसन ५३८
 सँदेसया बौद्धवाङ्मय ग्रन्थ ५३०
 सद्यकौमारी १४७, १६३, २८६
 ३२६
 सद्धर्म चैत्य १३०
 सद्धर्मपुण्डरीक २८६
 सद्धर्मपुण्डरीक पाठ २२४, २५१
 सद्धर्मपुण्डरीक सूत्र २५१
 सद्धर्ममूलक २१
 सद्धर्मरत्न ग्रन्थ ४७६
 सद्धर्म शासन ४६२
 सन्देश गृह ५७७
 सन्धिपत्र २४१
 सप्तत्रिंशबोधिपाक्षिका २०
 सप्तलोचनी तारा ३२७, ५४४
 सप्तविधानुत्तर पूजा ४८६
 सप्ताक्षरी कूटाक्षर २४२, ३१४
 सफू २००
 समताज्ञान ४६७, ५४५
 समन्तप्रभा ५०६
 समन्तप्रभा भूमि विगुद्धी २५२
 समन्तभद्र बोधिसत्व ४२, १८८,
 ३०१, ५०४, ५४२,
 ६००
 समन्त भद्राचार्य १६४
 समपद ५१३
 समयचक्र पूजा २२१
 समयाचक्र २८१
 समयचक्र ५०६
 समाधिस्कन्ध विगुद्धी २५२

सम्पूट महातन्त्र ५०६
 सम्पूर्णचक्र समाधि २८४
 सम्बोधिज्ञान १६
 सम्बोधिज्ञान भाष्कर १६८
 सम्बोधि चर्या ५३६
 सम्बोधिलक्ष्मी पद १३६
 सम्यक्देवता २५४, ४८४
 सम्यक् भोजन १८३
 सम्यक् मण्डप ४८४
 सम्यक् महादान गुठी ४८५
 सम्यक्सम्बुद्ध ६७
 सम्यक् संबोधिज्ञान ३०
 सम्यक् समारोह ४८४
 सम्बर ६१२
 सम्बरोदय तन्त्र ५०६
 सम्बरोदय दिशि १४
 सम्बरमण्डलाकार ३६६
 सम्बृत्ति परमार्थ ५०६
 सयसाह्या ५११
 सर्वकर्मिक कलश २८५
 सर्वज्ञ २१
 सर्वज्ञज्ञान भाष्कर ५६२
 सर्वज्ञ बुद्धया अस्थिधातु ५६६
 सर्वज्ञ मित्र २३, ६०३
 सर्वज्ञ शाक्यमुनि ७६
 सर्वतोभद्र विमान ५२५
 सर्वनिवरण निष्कम्भ बोधिसत्व
 ४४
 सर्वप्राचीन अभिलेख ५३२
 सर्वबुद्ध महामुकूट १५३
 सर्वबुद्धमहामुकूट श्रीचूडामणि
 विश्वमणि खचित २८५

सर्वसुगत गर्भगृह ३६२
 सर्वसुगत हृदय ५६
 सर्वसुगत हृदय प्रतिविम्ब १६८
 सरस्वती २०६
 सरस्वतीस्थान १७
 संग्राम मल्ल १३३
 सम्राट् अशोक ७८, ७९, ४४८
 सवालाख छोपूजा ३४१
 समुपूजा ५३८
 सहजयान ३६१, ५०६
 सहजानन्द वज्राचार्य १६४
 सह भोजन ३२६
 सहाय धाला २२३
 सहाप्रति महाब्रह्मा ६८
 सहस्रभुज लोकेश्वर १६१,
 ३३३
 सहस्रभुज लोकेश्वर व्रत ३४३
 सहस्रभुज लोकेश्वर व्रत धर्म
 ५६३
 सहस्राहति १८१, २२५
 स्कन्दपद्म ३
 स्थूदो ११३
 स्कन्धमार ५३६
 स्थम्विहार १२२
 स्त्रीन १८६
 साईतपत्र ५७२
 साकेतनगराधिपति २०, ४६
 साङ्ख्य वज्रयोगिनी १२१
 साङ्ख्येतोङ्गु २११
 साङ्ख्येतोर्जे ४६५
 सांचीस्तूप ४५१
 साधनमाला ३५१, ५७०

साधन यान ५०६
 साधुमति भूमि विशुद्धी २५३
 सानुवासि भिक्षु ७६
 साम्बपुर ५७६
 साम्भतदेया थास २६८
 साम्तेन् लामा ४६५
 सामान्य विहार १०३
 सारसिं १६०, २२८
 सारसिं साला १५६
 सारागुम्बा ६१३
 सावड्ड डवाड नाम्गेल् १६१
 सावाभूमि १८, ५२
 साहु बुद्धरत्न बोधिरत्न ३३३
 साह्येगुं ६८
 साह्येगुं गुफा ५८६
 साह्येगुं गिरि २१२
 साह्येगुं गिरिवर ३११
 साह्येगुं पर्वत ३३, ५८, ६२,
 ८०, ४६७
 साह्येगुं महाविहार १८०, १८६
 ५३६
 साह्येगुं विहार ७६
 सिकोमगुह्मि विहार १३६
 सिखःत्वहं ४८६
 सिंघाःकय्गु १५६
 सिजःया दुंगुर २०३
 सिततारा ५४२
 सिथशोधन पूजा २२६
 सिंदा लामा ३२१
 सिन्दुरजात्रा २१७
 सिन्दुरार्चन पूजा २८२, ३२५
 सिद्धगुरु शान्तिकराचार्य ५७४

सिद्धतपोभूमि ५८०
 सिद्धनागार्जुन ८७, ३५३, ६०५
 सिद्धनारोपा १२२, १६१, ५७०
 सिद्धवर नागार्जुन ८६
 सिद्धिफुलोच्च पर्वत २०, २१
 सिद्धिमुनिदेवजु १८५
 सिद्धिमान ५०६
 सिद्धि विहार ६१४
 सिद्धिहर्ष वज्राचार्य ६१४
 सिद्धौषधी ५११
 सिल् भान् लेवी ११५
 सिंहचक्र ५४१
 सिंहनाद ४८
 सिंहविक्रान्तपद ५१५
 सीकाय्या २८२
 सुइनिगू जन्मया वाखं ३३१
 सुकुन्दामत २०२, ५५२
 सुखावती भुवन ४४, ५२६, ५४७
 सुजित राजा ८
 सुदुर्ज्या १६
 सुदुर्ज्या भूमि २७३, ३६६
 सुदुर्ज्या भूमि विशुद्धी २५३
 सुधर्मराज महाजन ५०
 सुधारकरवज्र आचार्य १६४
 सुधालेपन १६७
 सुनढिकी ६०४
 सुनयश्रीमित्र ११७, १६०
 सुन्दर नगर १०
 सुमतिमुनिशासन लामा ३२२
 सुमतिमैत्रिशासन महाविहार
 ४२३, ५६६
 सुमतिसिद्धिकीर्ति ५७१

सुमेरु पर्वत ४६७
 सुयिनाय २२२, २४६, २८३
 सुयेनच्चांग ३६३
 सुरतमहाचक्रवर्ति ५०६
 सुरतवज्र १६४
 सूर्यगण्डि अग्निकाय २८४
 सूर्यमुख गणेश ५०२
 सूर्यसिद्धान्त ५१३
 सुलक्षणतीर्थ ३८
 सुल्तान समस्सुद्दीन १३४,
 १३८
 सुवर्ण कलश ध्वजारोहण
 २३१, २८५, ६०५
 सुवर्ण घट ३३, २१७
 सुवर्णच्छत्र ५६, १५३, १५६
 सुवर्णद्वीप ३८८
 सुवर्ण धर्मधातु मण्डल ५०७
 सुवर्ण ध्वज ५११
 सुवर्ण पिण्डपात्र ५६
 सुवर्णपुरी किण्डोल ६०७
 सुवर्णप्रग १ महानगर १२७,
 २७३
 सुवर्ण भूमि पर्वत ६६
 सुवर्ण भूमि ३८८
 सुवर्ण मन्दिर ५५०
 सुवर्ण माली (श्रीपाराम) चैत्य
 ४५०
 सुवर्ण माली चैत्य ५६६
 सुवर्णरचित विमान १७३
 सुवर्णवती ३३
 सुविशुद्ध ज्ञान ४६७
 सुविमुक्त चैत्य ६२

सुविशुद्ध धर्मधातु ज्ञान ५४१
 सुविशुद्ध धातु ५०६
 सुवृष्टि ५३४
 सूर्यमुख गणेश ५०२
 सृष्टिकर्ता लोकेश्वर ५३६
 सेकोद्देश ५७०
 सेथगजू १७४
 सेथगण्डल १७६
 सेसाह्या ६५
 सोण्ड ८
 सोत्थित ५६
 सौहाव चैत्य ६२, १८६
 स्यंगुदेव पानिजु १८४
 स्यंगुद्यो २३७
 स्याचु २२३
 स्वयं धर्मचक्र ५४१
 स्वयम्भू २००
 स्वयम्भू क्षेत्र सफाइ अभियान
 ४२८
 स्वयम्भू क्वा:पा:छेँ ५३१
 स्वयम्भू चित्र अंकित ४०१
 स्वयम्भू चैत्यपार्क ५३१
 स्वयम्भू चैत्यपुङ्गव ३४६
 स्वयम्भू चैत्यपूजा १७५
 स्वयम्भू चैत्य भट्टारक १०६
 स्वयम्भू चैत्यराज ३४६
 स्वयम्भू दर्शन ३१४
 स्वयम्भू धर्मधातु २०, ५०
 स्वयम्भू धर्मधातु चैत्य २१३
 स्वयम्भू धर्मपालिका ३१३
 स्वयम्भू पंचबुद्ध अंकित मुकूट
 ८४

स्वयम्भू पर्वस्थान १२२, १६५,
 ३६२, ३६८
 स्वयम्भू पुराण ६८, २१२, २४१,
 २८६, ३३१, ५१२,
 ५६१
 स्वयम्भू पुराण पाठ २५१
 स्वयम्भू पुराण महात्म्य ४४३
 स्वयम्भू प्रवेशद्वार ४६०
 स्वयम्भू बही ५२८
 स्वयम्भू भगवान् प्रातिहार्य ३४७
 स्वयम्भू भजन सतः ५३६
 स्वयम्भू महाचैत्य १, ५६, ७६,
 ७६, ८७, १२१, १२५,
 १३२, १३४, १३७,
 १८६, १६२, १२०१,
 २२१, २५६, २७४,
 २६८, ३२६, ३८५,
 ४५१, ४७६
 स्वयम्भू महाचैत्यरत्न २४४
 स्वयम्भू महास्तूप ३१६
 स्वयम्भू मूर्ति श्रीवज्रसत्त्व १११
 स्वयम्भू मूर्ति संग्रहालय ५१८
 स्वयम्भूया नामकास्य २३७
 स्वयम्भूया सिमागः २३४
 स्वयम्भू विकास मण्डल ३७४,
 ३६३, ४२०, ४७१
 स्वयम्भू विद्यालय १८८
 स्वयम्भू विद्याध्ययन केन्द्र १८८,
 १६६
 स्वयम्भू शान्तिपुर २६३
 स्वयम्भू स्तूप महाचैत्य १३८
 स्वयम्भू हारतीदेवी २६४, ३१२

स्वर्णपत्र ५३२
 स्वसंविद्या समाधि ३४२
 स्वस्ति मंगल गाथा २८३
 स्वाधिष्ठानपद ५०६
 स्वामिगुं १२८, २३३
 स्वामिजुजु २६३, २६४, २६७
 स्वायम्भू पुराण ३८०
 स्वांयापुन्ही ६७
 स्वेनामृतिजिन् लामा ३६३,
 ३६४
 हजसन् १६५, २६५
 हर्षदेव शाक्य ३४४, ६०६
 हर्मिका २१६
 हर्म्याकृति चैत्य २६६
 हर्षरत्न साहु ३०३
 हर्षसुन्दर साहु ३२७
 हरिञ्चक्र ४६०
 हरिहरसिंह मल्ल १५५

हरिहरिवाहन लोकेश्वर ५५६
 हलपति ५६, २१६, २२८, २४६
 हलसिल २८२, २८४
 हस्तमुद्रा ५१६
 हाकुगुं दुने २६४
 हाकुजु शाक्यभिक्षु १७४
 हांदु १२६
 हामूदेव १८४
 हारिती २४६, ३१०
 हारिती मन्दिर ५२४
 हारिती महायक्षणी ७६, १८८
 ५२५
 हिन्दुधर्म ६६
 हिमवत्खण्ड ६८
 हिमालय सन्निवर्ती ७०
 हिरण्यवर्ण महाविहार ८६, १६४
 २६६
 ह्रींकार ५४७

हूँकार ५४३
 हूँजात श्लोक २८४
 हूँहूँदेह गीत २८४
 हेन चीन बादशाह ११४
 हेरूक ५०६, ६१२
 हेलंयुमत ५५२
 हेवज ५०५
 हेवज भैरव ६०, ५६०
 हेवज मण्डल १६१
 हेवज समाधि १३
 हेवज्रोपासक १३३
 ह्यसपीठ ५०५
 ह्यसपीठद्वं १०८
 ह्य मत ५५२
 ह्वाइट पागोडा ४५१
 ह्वेसरघोछे ८८
 ह्वेसुज छोर्तेन् ५६१

सहायक ग्रन्थ व पत्र-पत्रिका सूची

- १) स्वायम्भू पुराण भाषानुदित, पं. रत्नबहा-
दुर वज्राचार्य
- २) मञ्जुश्रीयात नेपालया बुखँ, चित्तधर
'हृदय'
- ३) सर्वज्ञ मित्रावदान
- ४) स्वायम्भू पुराण, राष्ट्रिय अभिलेखालय
विषय ३३२
- ५) बृहत्स्वयम्भू पुराण
- ६) ललितविस्तर, पं. निष्ठानन्द वज्राचार्य-
द्वारा अनुदित
- ७) नेपाल ऋतुपौ दै २ ल्याः ४ प्राचीन
नेपाल, केशरबहादुर के. सी.
- ८) नेपालकी सांस्कृतिक कहानी, पशुपतिनाथ
घोष
- ९) सुगतावदान
- १०) धारणी संग्रह, राष्ट्रिय अभिलेखालय तृ.
६४१
- ११) धर्मकोश संग्रह, राष्ट्रिय अभिलेखालय
तृ. ६६२, पं. अमृतानन्द बदेजु
- १२) पञ्चरक्षा महामायूरी अध्याय
- १३) काङ्ग्युर घापा पृ. २ श्रावकादिनचर्या
परिच्छेद
- १४) तिब्बती बौद्ध इतिहास
- १५) अशोकावदान प्रथमोऽध्याय
- १६) अशोकके धर्मलेख, जनार्दन भट्ट
- १७) इतिहास, श्री ५ या सरकार शि. वि.
स्वीकृत फिगूगु संस्करण
- १८) बुद्धधर्म व नेपाल भाषा दै ३ अंक ३-४,
सं. धर्मादित्य धर्माचार्य
- १९) गुणकारण्डव्यूह
- २०) मञ्जुश्रीमूलकल्प
- २१) पुरातत्त्व निबन्धावली, राहुल सांकृत्यायन
- २२) नेपाल बौद्ध तीर्थावली तिब्बती इतिहास
- २३) नेपाल देश और निवासी, श्रीकान्त व्यास
- २४) अभिधर्मकोश भूमिका वसुवन्धु संक्षिप्त
जीवनी, राहुल सांकृत्यायन
- २५) स्वयम्भू वर्णन- तिब्बती इतिहास
- २६) काठमाण्डू उपत्यकाको मध्यकालीन इति-
हास, सूर्यविक्रम जवाली
- २७) देवमाला नामक पुस्तक, योगी नरहरि-
नाथ
- २८) संस्कृत सन्देश वर्ष १ अंक १
- २९) अमरकोश, अमरसिंह
- ३०) पुरातत्त्व प्रकाशन माला २१ भाषा-

वंशावली

- ३१) भाषावंशावली, सिद्धिनरसिंह शाक्यया संग्रहपाखे
- ३२) गोपाल वंशावली हिमवत्संस्कृतिस प्रकाशित
- ३३) पूर्णिमा वर्ष २ पूर्णाङ्क ६
- ३४) अमृत पत्रिका, श्री ५ महेन्द्र जन्मोत्सवाङ्क
- ३५) नेपालको प्राचीन अभिलेख, सं. हरिराम जोशी
- ३६) लिच्छवी संवत्को निष्कर्ष, शङ्करमान राजवंशी
- ३७) नेपाल बौद्धविहार व ग्रन्थ सूची, हेमराज शाक्य
- ३८) हुएन्साङ्ग भारत यात्रा वृत्तान्त, जगन्मोहन वर्मा
- ३९) प्राचीन नेपाल, पुरातत्त्व विभागया मुखपत्र
- ४०) सिल्भान्लेवी नं. १४
- ४१) इण्डियन एण्टीक्यूरी ई. सं. १८८० भगवान्लालइन्द्रजी
- ४२) हिमवत्संस्कृति
- ४३) लिच्छवीकालका अभिलेख, सं. धनवज्र वज्राचार्य
- ४४) मत्स्येन्द्र पद्यशतक, नीलकण्ठ भट्ट
- ४५) आर्यावलोकितेश्वर परिचय, हेमराज शाक्य
- ४६) नेपालको ऐतिहासिक रूपरेखा, बालचन्द्र शर्मा
- ४७) नेपाली पत्रिका पूर्णाङ्क ४८
- ४८) सद्धर्मपुण्डरीक सूत्र धर्मभाणक परिवर्त
- ४९) प्राचीन नेपाल, डी. आर. रेग्मी
- ५०) पुण्याग्रदूत पत्रिका, सं. रत्नबहादुर वज्राचार्य
- ५१) बुग्यः नेपालय् हःगु वंशावली, सं पं. वै.

आशाकाजि वज्राचार्य

- ५२) ईवही महाकाः छद्यलिया शिलापत्र
- ५३) तिब्बत मे वौद्धधर्म, महापण्डित राहुल सांकृत्यायन
- ५४) ब्लु एनल्स भाग २ पृ. ८०४
- ५५) सिजःपौया प्रतिलिपि, आनन्दमुनि वज्राचार्यया संग्रह
- ५६) 'नेपाल'— त्रिभुवन विश्वविद्यालय संस्कृत परिषद्पाखे प्रकाशित
- ५७) नेपाली ऐतिहासिक कथा संग्रह
- ५८) मेडिभल नेपाल कोलोफोन्स एण्ड इन्स्क्रिप्शन, सं. हेमराज शाक्य
- ५९) प्रमाण प्रमेय, प्र. सं. धनवज्र वज्राचार्य
- ६०) इतिहास संशोधन (क्रमगत संख्या ६२)
- ६१) काशीप्रसाद जायसवालद्वारा पूर्वप्रकाशित अभिलेख संस्कृत सन्देश वर्ष १।१०
- ६२) स्वयम्भू बहीया मूलदेवता पादपीठ लेख
- ६३) इपिग्राफिका इण्डिया भाग १२ पृ. २९
- ६४) बुद्धधर्म व नेपाल भाषा पत्रिका दँ ३ अंक १
- ६५) दिव्योपदेश, श्री ५ पृथ्वीनारायण शाह (वि. सं. २०१६ स प्रकाशित)
- ६६) थ्यासफू, हेमराज शाक्यया संग्रहपाखे
- ६७) थ्यासफू, कमलानन्द वज्राचार्यया संग्रहपाखे
- ६८) स्वयम्भू हलपतिया सुवर्णच्छत्राभिलेख
- ६९) थ्यासफू, गौतमवज्र वज्राचार्यया संग्रहपाखे
- ७०) जाम्बुनन्दवन् विहारया शिलापत्र
- ७१) थ्यासफू, परमानन्द वज्राचार्यया संग्रहपाखे
- ७२) संस्कृत सन्देश वर्ष २ अंक ६

- ७३) स्वयम्भू जंगलया विशाल बुद्धमूर्तिया
शिलापत्र
- ७४) श्री ५ या सरकार पुरातत्त्व विभागया
अप्रकाशित शिलालेख
- ७५) पुरातत्त्व एक रोचक कथा, सत्यमोहन
जोशी
- ७६) मयूरवर्ण महाविहार इतिहास, हेमराज
शाक्य
- ७७) हिमालचुली वर्ष १० अंक ६
- ७८) गोरखापत्र ०३३ ज्येष्ठ १७ 'मञ्जुश्रीदेवि
अरणिको सम्म'
- ७९) धर्मोदय पत्रिका भाग ६ अंक १०८
- ८०) मेडिभल नेपाल, डी. आर. रेग्मी
- ८१) राष्ट्रिय संग्रहालयया स्वायम्भू पुराण
अन्तिम पुष्पिका
- ८२) सुरदत्त कथा (संलूगुठीया महिमा) या
भूमिका
- ८३) नेपाल सांस्कृतिक परिषद् पत्रिका वर्ष २
अंक २
- ८४) गोरखापत्र ०१४।११।११
- ८५) स्वयम्भू मूर्ति संग्रहालय क्वस्सं च्वंगु शिला-
पत्र
- ८६) स्यंगु गःचाःहुलेबलय् तकिया लिकच्चंगु
शिलापत्र
- ८७) संस्कृत सन्देश वर्ष १ अंक १२
- ८८) पूर्णिमा वर्ष १ अंक ४
- ८९) शान्तिपुरया चित्रपट्ट अभिलेख, देवहर्ष
वज्राचार्यया संग्रहपाखे
- ९०) वर्षापणविधि, वीर पुस्तकालय च. ३
- ९१) स्वयम्भू अमिताभ बुद्धया जःपाखे च्वंगु
शिलापत्र
- ९२) वँतु तःधंवाहाःया शिलापत्र

- ९३) राष्ट्रिय अभिलेखालय च. नं. १४८४
सुगतावदानया सफूकँनय् च्वंगु 'ऐतिहासिक
घटना'
- ९४) तालपत्र तमसूक, हेमराज शाक्यया संग्रह
- ९५) मेडिभल नेपाल भाग ३, डी. आर. रेग्मी
- ९६) थ्यासफू, जीवगुरुजुया संग्रहपाखे
- ९७) स्वयम्भूया दिव्यघण्टाभिलेख
- ९८) स्वयम्भू चैत्य प्रस्थापन वर्णन, वीर
पुस्तकालय नं तृ. २७०
- ९९) मेडिभल नेपाल भाग ४, डी. आर. रेग्मी
- १००) स्वयम्भू बही फलय् च्वंगु दकलय् सकलय्
तःग्वःगु संसहल्वहं
- १०१) उकुवाहाःया दाफासफू
- १०२) मल्लशाहकालया मे, स. ठाकुरलाल
मानन्धर
- १०३) गोश्रृङ्ग पर्वत व्याकरण, अ. देखेन् नुनु
लामा
- १०४) श्री ५ पृथ्वीनारायण शाहको उपदेश
व्याख्या
- १०५) कचिभोँया थू, सप्तमुनि वज्राचार्यया
संग्रहपाखे
- १०६) स्तूपलक्षण कारिका विवेचन, वीर
पुस्तकालयया संग्रहपाखे
- १०७) थ्यासफू, भोजमानपति वज्राचार्यया
संग्रहपाखे
- १०८) पाल्देन शेयेताशि जीवन चरित्र भाग १
- १०९) पृथ्वीनारायण शाह जीवनी चरित्र नेपाल
विजय, सूर्यविक्रम ज्ञवाली
- ११०) त्रिरत्न सौन्दर्य गाथा, सुन्दरानन्द बदेजु
- १११) थ्यासफू, हर्षरत्न शाक्यया संग्रहपाखे
- ११२) महर्षि माधवलाल जोशीया जीवन चरित्र,
शुक्रराज शास्त्री

- ११३) नेपाल म्यूजियमया वंशावली टिपोट,
आनन्दमुनि वज्राचार्य
- ११४) श्री ३ रणबहादुर शाहया सालिकया
पादपीठ लेख
- ११५) सिजःपौ, शान्तिपुरया लुखाय्च्वंगु
- ११६) हारती देगःया लुंगजूया अभिलेख
- ११७) बाखंमे, प्रेमबहादुर कंसकार
- ११८) स्वयम्भू परिचय, पण्डित जिनवज्र लिखित
तिब्बती भाषा
- ११९) ह्याय्पि धर्मशालाया शिलापत्र
- १२०) हजसनजुया संग्रह, सौजन्य तुलसीराम
बैद्यपाखे
- १२१) मध्यकालीन कला, मनवज्र वज्राचार्य
- १२२) स्वयम्भू मूर्ति संग्रहालयया शिलापत्र
- १२३) ह्यूमत बुद्धवारीया शिलापत्र
- १२४) धनसिंह साहुया छेचलिइ च्वंगु शिलापत्र
- १२५) ऐतिहासिक कुण्डली, शंकरमान राजवंशी
- १२६) ताराशतनाम स्तोत्र, अ. पं. अमोघवज्र
वज्राचार्य
- १२७) नेपालको इतिहास, प्रो. ईश्वरराज अर्याल
- १२८) बौद्धतीर्थ यात्रा रिपोर्ट, भिक्षु सुदर्शन
- १२९) काष्ठपत्राभिलेख, स्वयम्भू गुम्बाया निना-
लय् च्वंगु
- १३०) अमिताभ बुद्धया न्ह्योनेच्वंगु आर्यताराया
पादपीठ
- १३१) स्वयम्भू जीर्णोद्धार चन्दा संकलन अंक,
लामा छेचु कुस्योग्या संग्रहपाखे
- १३२) ओलञ्चु गुम्बाया संग्रहपाखे (वर्तमान
छाउनी म्यूजियम)
- १३३) शाक्यश्री लामाया जीवनी इतिहास,
कान्छाभिक्षुया संग्रह
- १३४) ध्यासफू, पं. अमोघवज्र वज्राचार्यया

संग्रहपाखे

- १३५) जीर्णोद्धार कार्यया ज्यालाया रिपोर्ट,
भीमराज शाक्यया संग्रहपाखे
- १३६) वैरोचन तथागतया पादपीठ लेख
- १३७) बुद्धधर्म पत्रिका प्रथम वर्ष प्रथम अंक,
स. धर्मादित्य गुरु
- १३८) किनूबाहाःया शिलापत्र
- १३९) धर्मादित्य धर्माचार्य व नेपाल भाषा व
थ्वया साहित्य, चित्तधर 'हृदय'
- १४०) विश्वे बुद्धधर्म भाग १, भिक्षु सुदर्शन
- १४१) कुसाङ लामेश्यालुङ
- १४२) धर्मदूत, वर्ष १३ अंक १-२
- १४३) नेपाले राहुल, भिक्षु सुदर्शन
- १४४) श्री ५ या सरकार खानि विभागया रिपोर्ट
- १४५) बौद्धतीर्थ यात्रा सचित्र रिपोर्ट, भिक्षु
सुदर्शन
- १४६) स्वयम्भू भजनसतःया सिजःपौ
- १४७) कीगु बौद्धतीर्थ यात्रा वृत्तान्त, अमृतमान
शाक्य
- १४८) लुम्बिनी पत्रिका
- १४९) धर्मोदय पत्रिका वर्ष १ पूर्णाङ्क १००
- १५०) स्वयम्भू बातँया शिलापत्र
- १५१) गोरखापत्र ०२०।६।५
- १५२) 'वीरप्रताप' नामक पत्रिका १९७५ नोभे-
म्बर १७
- १५३) स्वयम्भू विकास मण्डलया संक्षिप्त परिचय
(ने. सं. १०७७ प्र०)
- १५४) बौद्धप्रथम शिक्षा भूमिका
- १५५) आर्यनामसंगीति अर्थ सहित भूमिका
- १५६) गोरखापत्र ०१३।२।१२
- १५७) चतुर्थ विश्वबौद्ध सम्मेलन रिपोर्ट, प्रो.
आशाराम शाक्य

- १५८) गोरखापत्र ०१३।१०।१४
 १५९) नेपाल संस्कृति, चित्तधर 'हृदय'
 १६०) गोरखापत्र ०१४।३।६
 १६१) सुधार कार्य विवरण (तात्कालीन निर्माण सुधार समिति प्र०)
 १६२) गोरखापत्र ०१६।३।१
 १६३) नेपालमें प्रधानमन्त्री श्रीनेहरूके भाषण
 १६४) गोरखापत्र ०१६।११।७
 १६५) गोरखापत्र ०२६।६।१४
 १६६) गोरखापत्र ०१८।६।२६
 १६७) गोरखापत्र ०२२।५।२५
 १६८) गोरखापत्र ०२०।१।२६
 १६९) गोरखापत्र वर्ष ६६ अंक ३०६
 १७०) गोरखापत्र ०२४।१।२
 १७१) लुम्बिनी समिति नेपाल नामक पत्रिका (आ. न. भौ. प.)
 १७२) नेपाल समाचार वर्ष १४ अंक १८५
 १७३) सभिस सिभिल इन्टरनेशनलद्वारा प्रकाशित पम्पलेट
 १७४) गोरखापत्र, वर्ष ६८ अंक ३६८
 १७५) नेपाली युवक बौद्ध परिषद् बुलेटिन, वर्ष ५ अंक ५
 १७६) सितु पत्रिका अंक ३ बौद्धकला अनुसंधान, हेमराज शाक्य
 १७७) थ्यासफूया छकू टुका, सानुकाजिगुरुजुया संग्रहपाखे
 १७८) शान्तिपुरया भित्तीचित्र अभिलेख
 १७९) हाम्रो संस्कृति, वर्ष ६ अंक २
 १८०) नेपाल भाषा साहित्यया जातः, चित्तधर 'हृदय'
 १८१) गोरखापत्र, वर्ष ७२ अंक १००
 १८२) चन्दा संकलन समिति केन्द्रीय कार्यालय

बबरमहलद्वारा प्रकाशित पम्पलेट

- १८३) स्वयम्भू विकास मण्डलया निमन्त्रणापौ
 १८४) गोरखापत्र ०२६।१०।११
 १८५) लुम्बिनी पत्रिका, वर्ष १ अंक १
 १८६) विश्वशान्तिस्तूप संक्षिप्त परिचय
 १८७) गोरखापत्र, वर्ष ७२ अंक ११८
 १८८) गोरखापत्र ०३१।३।१५
 १८९) गोरखापत्र ०३१।७।२४
 १९०) गोरखापत्र, वर्ष ७४ अंक १८४
 १९१) संस्कृत सन्देश वर्ष १ अंक ५
 १९२) गोरखापत्र ०११।१०।४
 १९३) स्वांयापुन्हीया देछा नेपाःया सम्यके दीप-ङ्कर तथागत, प्रो. आशाराम शाक्य
 १९४) गोरखापत्र ०२०।६।३
 १९५) पदसंचारण क्रिया विधि पुस्तक, पं. अमोघवज्र गुरुजुया संग्रहपाखे
 १९६) स्वयम्भू पुस्तिका, भुवनलाल प्रधान
 १९७) हारतीमांया मे सफू, सं. तीर्थलाल नःघःभनी
 १९८) पूर्णिमा, पूर्णाङ्क ६
 १९९) कर्मराज गुम्बाया शिलापत्र
 २००) प्रज्ञोपाय विनिश्चय सिद्धितन्त्र
 २०१) नेपाल संस्कृतिया मूलुखा, हेमराज शाक्य
 २०२) आचार्य क्रिया संग्रह गण्डिका स्थापन अध्याय
 २०३) सम्बरोदय तन्त्र अध्याय २३
 २०४) अद्वय परमार्थ नामसंगीति, पं दिव्यवज्र-द्वारा सम्पादित
 २०५) आर्य नामसंगीति गाथा अर्थ सहित, पं. रत्नबहादुर वज्राचार्य
 २०६) आर्य मञ्जुश्री नामसंगीति अर्थ तथा भावार्थया भूमिका, भिक्षु धर्मसागर

- २०७) आनन्दकुटीया शिलापत्र
 २०८) बुद्धचरित अध्याय १३, भदन्त अश्वघोष
 २०९) आनन्द पत्रिकाया प्रतिवेदन
 २१०) जगत्उद्धार महाविहार बौद्धछात्रावास
 विवरण पत्र

- २११) पञ्चरक्षा
 २१२) नालन्दा गुहा-मूर्तिकला
 २१३) पालिवाङ्मय बुद्धवंश
 २१४) करुणामय शरणया मे, बाबुकाजि शाक्य

ए. ए. सिन्हा

क्र.सं.	नाम	पता	सं.	सं.	सं.	सं.
१
२
३
४
५
६
७
८
९
१०
११
१२
१३
१४
१५
१६
१७
१८
१९
२०
२१
२२
२३
२४
२५
२६
२७
२८
२९
३०
३१
३२
३३
३४
३५
३६
३७
३८
३९
४०
४१
४२
४३
४४
४५
४६
४७
४८
४९
५०

शुद्धाशुद्धि पत्र

अशुद्धि	शुद्धि	ऊवः	पौ	अशुद्धि	शुद्धि	ऊवः	पौ
जसां	जूसां	१४	१०	छह्म	खुह्म	६	१२५
सहयात्	सहयायत्	"	"	इस्थिहार	हस्तिहार	६	१४८
याःगु	धाःगु	१०	११	कृपा	कृया	११	१६३
द्वादशाक्षर	द्वादशक्षर	२	१८	२४८	७४८	४	१६८
अने	अले	१६	२६	पञ्चदान	पञ्चज्ञान	६	१६८
हयानं	हथासं	२०	३०	उत्पत्ति	उपस्थित	२४	२१२
काःगु ई	वागुई	१६	३६	शिष्याधिरासन	शिक्षाधिवासन	३०	२२५
उत्तक	उत्तम	२४	५३	च्वकाय्	च्वछाय्	१३	२२८
यथा	तथा	२२	५४	सहशी	सदृशी	१०	२३३
शब्द	शब्द	३	५५	साहशं	सादृशं	१२	२३३
पुष्प	पुण्य	३	५६	इकुबाहाः	उकुबाहाः	१६	२३६
संहृ	संग्रह	११	६६	वाल	वास	१८	२६५
उपत्यशाय्	उपत्यकाय्	१६	७०	न्हूवा	न्हूओ	३	२७६
अश्वकल्प	अन्धकल्प	६	७३	द्वारा	द्वार	१२	२८४
पुषि	पुथि	८	८८	लेवा	नेवा	७	२८६
जयश्रुति	जनश्रुति	१५	९१	देवयाननन्दं	देवपाननन्दनं	१०	२९३
अंक्ष	अंक	३	९६	नारजिद्वभौ	मारजिद्वभौ	२३	२९४
चांदुग	चांवुग	२	१०६	तत्पादपद्य	तत्पादपद्य	२४	२९४
अट्टारक	भट्टारक	५	१०६	सहभाजन	सहभोजन	१	३२६
विपच्छान्तं	वियच्छान्तं	१५	११२	पाण्डरा	पाण्डूरा	१८	३२७
पुटुनाउ	पुटुताउ	१४	११५	मैयां	येँया	१०	३४१

<u>अशुद्धि</u>	<u>शुद्धि</u>	<u>ऊवः</u>	<u>पौ</u>	<u>अशुद्धि</u>	<u>शुद्धि</u>	<u>ऊवः</u>	<u>पौ</u>
स्वयंविद्य	स्वसंविद्या	६	३४२	दिगुदिशा	किगु दिशा	३०	५६८
कुशलमूत्र	कुशलमूल	१६	३६८	कान्तिपुर	शान्तिपुर	१८	५७२
अपरिमाता	अपरिमिता	६	४११	यश्यमभिचार	वश्यमभिचार	६	५७८
जम्बद	जम्बल	१६	४१२	जिनात्यजः	जिनात्मजः	१०	५६२
शैष्णव	वैष्णव	१२	४४६	च्छ्रोतुपिच्छामि	श्रोतुमिच्छामि	१२	५६२
सूप	स्तूप	४	४५१	तद्भवान्	तद्भवान्	१३	५६२
वागीश्वर	वागीश्वर	२०	४६३	उष्णषविजय	उष्णीष विजय	२	६०७
छत्रः	छत्र	१	४७३	घाटय् याय्गु	घोटय् याय्गु	११	६१६
सतार्थ	सत्त्वार्थ	२४	४८६	च्यंगु	च्युंगु	२	६३२
छद्म	थुद्म	१६	४९३	अजुरोन	अजरामरण	४	६५३
पार	मार	२१	४९६	घात	त्वात	१०	६५८
पूर्वष्ठ	पूर्वक	२३	५०४	अभयपान	अभयदान	१२	६६२
धर्मप्रति भाव	धर्मप्रति भाण	२७	५०४	राममञ्जरी	रत्नमञ्जरी	११	६६३
वज्रपानी	वज्रयानी	३	५०५	पभामण्डलय्	प्रभामण्डलय्	२४	६७१
शालत्रञ्जिका	शालभञ्जिका	१६	५२१	सह्य्	साह्य्	४	६८६
फसि	फंसि	४	५२२	ब्ला	ब्वला	५	७००
गौरवर्णसहप्रभां	गौरवर्णसमप्रभां	४	५२५	अञ्जलि बुद्ध	अञ्जलिवद्ध	४	७२५
धर्मकार्य	धर्मकाय	१६	५४०	सप्तवृष्टि	सप्तवृद्धि	२	७५६
पुष्पतिथिस	पुण्यतिथिस	३	५५१	आश्रम वेद	आश्रम भेद	१०	७६४
प्रज्ञापायात्मक	प्रज्ञोपायात्मक	२७	५५१				



